

清
實
錄

穆宗毅皇帝實錄(六)
卷二二一至卷三〇一
同治七年至九年

清實錄

第五〇冊

中華書局影印

清 實 錄

(第 五〇 冊)

穆宗實錄(六)

*

中 華 書 局 出 版

(北京王府井大街 36 號)

北京市中國書店發行

中國建築工業出版社印刷廠印刷

*

787×1092 毫米 1/16 · 73 1/2 印張

1987 年 3 月第 1 版 1987 年 3 月北京第 1 次印刷

印數 0,001—1,500 冊

統一書號: 11018 · 1355—50 定價: 54.00 元

清實錄第五〇冊目錄

穆宗毅皇帝實錄(六)

卷二二一	同治七年正月上	一	卷二三六	同治七年六月下	二五五
卷二二二	同治七年正月中	一五	卷二三七	同治七年七月上	二六八
卷二二三	同治七年正月下	三四	卷二三八	同治七年七月中	二八七
卷二二四	同治七年二月上	四七	卷二三九	同治七年七月下	三〇〇
卷二二五	同治七年二月下	七二	卷二四〇	同治七年八月上	三一四
卷二二六	同治七年三月上	九二	卷二四一	同治七年八月下	三三三
卷二二七	同治七年三月下	一二四	卷二四二	同治七年九月上	三五〇
卷二二八	同治七年四月上	一三三	卷二四三	同治七年九月下	三六四
卷二二九	同治七年四月中	一五一	卷二四四	同治七年十月上	三八六
卷二三〇	同治七年四月下	一六七	卷二四五	同治七年十月下	四〇二
卷二三一	同治七年閏四月上	一七七	卷二四六	同治七年十一月上	四一五
卷二三二	同治七年閏四月下	一九四	卷二四七	同治七年十一月下	四三二
卷二三三	同治七年五月上	二一〇	卷二四八	同治七年十二月上	四四六
卷二三四	同治七年五月下	二二四	卷二四九	同治七年十二月下	四六二
卷二三五	同治七年六月上	二三八	卷二五〇	同治八年正月上	四八〇
			卷二五一	同治八年正月下	四九三
			卷二五二	同治八年二月上	五〇五
			卷二五三	同治八年二月下	五一九
			卷二五四	同治八年三月上	五三三

卷二五五	同治八年三月下	五四七	卷二七四	同治九年正月上	七九七
卷二五六	同治八年四月上	五六一	卷二七五	同治九年正月下	八〇九
卷二五七	同治八年四月下	五七一	卷二七六	同治九年二月上	八二三
卷二五八	同治八年五月上	五八二	卷二七七	同治九年二月下	八三七
卷二五九	同治八年五月下	五九四	卷二七八	同治九年三月上	八五一
卷二六〇	同治八年六月上	六〇八	卷二七九	同治九年三月下	八六三
卷二六一	同治八年六月下	六一九	卷二八〇	同治九年四月上	八七六
卷二六二	同治八年七月上	六三二	卷二八一	同治九年四月下	八八七
卷二六三	同治八年七月下	六四五	卷二八二	同治九年五月上	八九七
卷二六四	同治八年八月上	六五七	卷二八三	同治九年五月下	九〇八
卷二六五	同治八年八月下	六七二	卷二八四	同治九年六月上	九二〇
卷二六六	同治八年九月上	六八五	卷二八五	同治九年六月下	九三一
卷二六七	同治八年九月下	七〇一	卷二八六	同治九年七月上	九四四
卷二六八	同治八年十月上	七二三	卷二八七	同治九年七月下	九五九
卷二六九	同治八年十月下	七二四	卷二八八	同治九年八月上	九七六
卷二七〇	同治八年十一月上	七四〇	卷二八九	同治九年八月下	九九六
卷二七一	同治八年十一月下	七五六	卷二九〇	同治九年九月上	一〇〇六
卷二七二	同治八年十二月上	七六七	卷二九一	同治九年九月下	一〇一九
卷二七三	同治八年十二月下	七七九	卷二九二	同治九年十月上	一〇三四

大清穆宗繼天開運受中居正保大定功聖智
誠孝信敏恭寬毅皇帝實錄卷之二百二十一

世宗憲皇帝御製實錄卷之二百二十一

世宗憲皇帝御製實錄卷之二百二十一

世宗憲皇帝御製實錄卷之二百二十一

世宗憲皇帝御製實錄卷之二百二十一

世宗憲皇帝御製實錄卷之二百二十一

教修

同治七年戊辰春正月庚戌朔

上詣

奉先殿行禮○遣官祭

太廟後殿○率王以下文武大臣詣

慈寧門慶賀

慈安皇太后

慈禧皇太后禮成御太和殿受朝作樂宣表如

儀○詣

大高殿

壽皇殿行禮○御乾清宮賜近支親藩等宴○

奉

慈安皇太后

慈禧皇太后幸漱芳齋侍晚膳○諭軍機大臣

等李鴻章奏按捕餘匪並收撫情形一摺擒

股餘匪由河西竄向天長為鄉團擒戮淨盡

另股二百餘人由來安竄往盱眙經道員余

思樞督令兵弁勇圍兜擊並由李世忠將擒

首李允招降牛遂任三厥亦在其內現已將

該逆首解赴潁州交英翰辦理李世忠雖係

奉英翰屬令招撫惟李允等三犯流毒數省

生靈受害無數被勦後窮蹙無路始行投誠

勢難再事姑容著英翰即將該三犯審訊明

確就地盡法處治以快人心而申國憲其餘

投誠各犯亦宜分別情罪嚴行懲治不可稍

從寬貸此外有無零星逃匿餘匪並著英翰

派兵嚴按淨盡以絕根株不得稍存大意河

北擒匪現已竄至懷慶並有擾及衛輝之說

勢甚剽疾李鴻章當懷遵前諭迅飭劉銘傳

善慶溫德勒克西督率所部兵勇馬隊馳赴河北一帶迎頭截勦務期就地殄除毋任紛擾此股擒匪有宋景詩餘黨在內尤恐其勾結東昌臨清等處教匪致滋蔓延李鴻章當豫籌防範並著另添兵勇親行督帶於黃河南岸擇要扼守以便就近調度程文炳一軍仍著英翰飭令剋期赴營馳赴北路探賊所向迎頭截勦逆首賴汶沆業經正法並著李鴻章傳檄河北直東一帶以寒張總愚股匪之膽仍應相機勦撫兼施冀孤賊勢以便迅速殄除前諭官文出省督防現想已赴大名廣平一帶扼要駐紮陳國瑞計到正定著即分撥兵勇交令管帶迅往勦賊並迎提由直入豫各軍星速前進以厚兵力將此由六百里各諭令知之○命吏部尚書朱鳳標協辦大學士○以江南水師暨馬隊官軍會勦擒匪出力予總兵官繆福賓者貴以提督簡放賞總兵官葉志超楊岐珍巴圖魯名號○辛

亥○

上詣綏履殿問

慈安皇太后安平安室問

慈禧皇太后安至戊寅皆如之奉

慈安皇太后

慈禧皇太后幸漱芳齋侍午膳○緩徵直隸宛

平通三河武清寶坻薊香河甯河霸保定固

安永清東安房山順義清苑新城雄天津青

靜海滄開東明長垣豐潤王田文安大城良

鄉涿昌平灤盧龍昌黎安肅完定興容城蠡

束鹿安高陽阜城南皮鹽山慶雲廣宗永年

雞澤元城大名南樂清豐宣化懷來涿水衡

水深定深澤晉六十二州縣被水被旱被雹

被風被擾地方新舊額賦租課暨民借倉穀

有差○壬子

高宗純皇帝忌辰遣官祭

裕陵

上詣

壽皇殿行禮○諭軍機大臣等張之萬奏籌辦江北善後事宜英翰奏行抵壽州任事餘捻投誠現在辦理情形續派勁軍馳援河北各摺片捻逆餘匪竄近來安盱眙地界李世忠督團迎擊逆匪勢感投誠該提督恐其情急南竄裹脅又多將此股全數招降李世忠勇於任事力顧大局所籌甚合機宜惟李允任三應牛遂貴為著名悍賊斷難幸逃法網著英翰仍遵前旨訊明後盡法處治以快人心

其餘投誠各犯並著察看情形妥籌辦理蒙毫一帶為捻逆老巢現在零匪既已搜捕殆盡英翰當慎選牧令除莠安良以清盜源毋令萌孽潛滋所有蹂躪地方尤宜加意拊循妥籌善後程文炳一軍英翰現飭由臨清鉅鹿一帶探明賊蹤相機迎擊並續派牛師韓方長華兩軍由汴梁馳赴河北作為遊擊之師頗能不分畛域即著分檄各軍星馳前進一面咨照官文李鴻章李鶴年悉心會商相

機調度江北土匪乘機竊發亟應嚴行搜捕著張之萬檄飭姚廣武等軍實力搜拏務絕根株所收降眾該漕督現擬賞送回籍應如何妥為安置之處著張之萬悉心辦理以免別滋事端將此由四百里各諭令知之又諭麟興等奏索倫人眾入卡後播種籽粒亟須豫為謀畫請提用前存歸綏倉內麥石以資接濟等語此項麥石前經李雲麟奏明由晉省採辦共一千九百石尚未提用著裕瑞

桂成即飭該道廳查明無論是否動用趕緊設法如數購補以便該將軍等委員提取如實在無款可籌即由新疆餉銀內動用總期無誤要需是為至要將此由五百里各諭令知之○漕運總督張之萬奏遵查上年賊匪圖竄運西經官軍截擊仍由平橋東岸南遁並無另股分竄報聞○署閩浙總督英桂議覆浙江省減兵增餉章程除海塘兵六百五十四名向來不與徵調無庸置議外擬裁水

陸額兵一萬三千八百二十九名。實存兵二萬二千五百七十六名。加馬兵月餉銀一兩。馬乾五錢。戰兵月加一兩。守兵月加五錢。添嘉興湖州兩協水師兵五百名。均照楚軍章程。選鋒操練。並增修器械。添造戰船。酌給備弁以下津貼。各營公需用費。下部議從之。

癸丑。

上奉

慈安皇太后

慈禧皇太后幸漱芳齋侍午膳。○諭軍機大臣等。官文奏豫省匪蹤竄向東南。現籌布置。並請暫緩出省各摺片。捻股廣聚。衛懷各屬。直省防務日緊。且無知兵大員前往督勦。各將士尤難用命。官文仍當懷遵疊次諭旨。相機出省。馳赴大名廣平一帶。扼要駐紮。該署督素能任事。諒不至有誤事機。其唐訓方等軍。卽著飭令前往安籌布置。余承恩一軍。仍著遵奉前旨。迅赴河北追勦。如該員所部不敷。

並著官文另籌添撥。該道員受恩深重。正宜及時立功。不得株守直境。希圖安逸。直省門戶。因應嚴防。然賊氣既近。亟宜分兵出境截勦。不得畫疆自守。任賊紛擾。前有旨令李鴻章卽赴河南督軍迎勦。著該大臣迅督諸軍入豫。扼要兜擊。劉銘傳善慶溫德勒克西各軍。著該大臣仍遵前諭。催令分路迅進。毋任遷延。山東曹鉅一帶。為捻逆往來熟路。匪蹤現竄。延津封邱等處。難保不乘勢東趨。著丁

寶楨豫籌防守。毋待逆氛迫近。徒費周章。程文炳一軍。昨據英翰奏。稱飭由臨清鉅鹿一帶前進。並續派牛師韓方長華兩軍。由汴梁馳赴河北。著卽飭令星速前行。以資勦擊。李鶴年計已馳抵衛輝。卽著就現有兵力。督飭各將弁實力兜勦。不可專恃援軍。致賊勢日形延蔓。陳國瑞已赴廣平。惟所部無人。不得不酌為抽撥。宋慶諒入豫境。並著李鶴年派員摧提。與陳國瑞合併成軍。至河北一帶合

力迎勦官文亦當飭該侍衛迅速前進毋稍
逗遛官文另片奏請截留餉銀先行動用等
語部庫餉需原不得任意截留所有湖南省
前存直隸藩司庫內解京餉銀十七萬兩零
如已動用著卽籌款歸補委解部庫其請飭
部撥銀二三十萬兩並天津新關稅銀暨撥
長蘆運司鹽斤復價一款已令戶部速議矣
將此由五百里各諭令知之○緩徵山東濟
甯齊河齊東臨邑長清平原肥城東平東阿

平陰惠民陽信商河濱滋陽鄒滕嶧汶上定
陶壽張鄆城濮范日照茌平昌樂諸城昌邑
濰卽墨嘉祥歷城鄒平長山新城濟陽禹城
泰安青城樂陵利津霑化曲阜甯陽陽穀荷
澤曹觀城朝城蘭山鄒城聊城臨淄安邱掖
魚臺五十七州縣德州東昌臨清濟甯四衛
東平所屯莊永阜永利濤維三場被水被旱
被潮被風被蟲被擾地方本年上忙額賦暨
雜課電課有差○乙卯

上詣

時應宮拈香○御紫光閣賜蒙古王貝勒貝
子公台吉暨朝鮮使臣等宴並賞賚有差○
諭軍機大臣等穆圖善奏定邊等處勦賊獲
勝金順帶兵束勦等語賊匪攻撲定邊安邊
甌井各城堡均經官軍擊敗雖受懲創尚未
遠颺金順現在帶兵馳赴東路會勦著卽將
定邊等處股匪迅速撲滅毋稍稽遲前有旨
令金順挑選所部精騎並統率沿邊馬步各

隊及胡世英各營剋期東征該署將軍現統
各軍不下二十餘營兵力較厚自當遵奉前
旨先將花馬池一帶董高二逆老巢攻克拔
其根株再赴延安所屬督飭各營節節掃蕩
以保晉甘門戶並著庫克吉泰喬松年劉典
調派陝軍與金順聯絡會勦毋得稍分畛域
花馬池一帶距晉省包頭等處不遠裕瑞桂
成尤須加意防範毋令該匪闖入邊境張總
愚股匪現已由懷慶竄至衛輝所屬各邑左

宗棠帶兵入晉。現在行抵何處。著卽迅速取道繞前截剿。毋任蔓延。穆圖善另片奏。正甯縣城被回匪攻陷。寶雞回匪退竄回巢等語。著穆圖善速派兵勇。將此兩股逆回實力堵除。並著庫克吉泰。喬松年。劉典派兵嚴防陝省邊境。與甘軍會籌剿辦。毋任再行東竄。將此由六百里諭知左宗棠。庫克吉泰。穆圖善。裕瑞。喬松年。金順。桂成。並傳諭劉典知之。○又諭。前據穆圖善奏。滙陳甘省餉缺情形。當

經諭令左宗棠按照摺內所陳。量籌接濟。嗣據左宗棠覆陳甘肅餉事。復經諭令該大臣彼此兼顧。並令穆圖善切查勇數。免涉虛冒。茲據穆圖善奏。各省協甘之餉。多為陝西截留。甘軍日形苦累等語。左宗棠身任兼圻。甘省餉糈。自應由該大臣分款撥濟。以歸畫一。惟陝甘相距較遠。分撥難免愆期。甘軍一百四十餘營。固難保無缺額。而現存營數。諒尚不少。今據穆圖善奏。稱僅撥交漢中轉運局

三萬兩。為數無多。實屬無濟於事。著左宗棠懍遵前次諭旨。妥籌撥解。並查明從前陝臺截留各省協甘餉銀。究有若干。及如何分別動用之處。詳覈辦理。現在江甯等省協甘餉銀。既經左宗棠提用。自當遵照前議。每月勻撥若干。解交穆圖善隨時支放。以顧全局。不得坐視譁潰。致軍事益形棘手。穆圖善亦當遵奉前旨。查明實在兵勇數目。月需餉數。咨商左宗棠酌辦。其譚玉龍。吳國富兩軍應需

餉銀。著喬松年由陝發給。劉效忠及胡世英所部兵餉。卽於陝省應解甘省月餉內分撥接濟。至河東道嗣後應撥甘餉。著趙長齡派員徑解甘肅。泰安糧臺。此項收到後。所有慶涇各營餉需。卽著穆圖善均勻協濟。將此由六百里各諭令知之。○以湖北黃陂縣捐輸團練。永廣學額六名。○以湖北提督江長貴捐輸軍餉。永廣四川鹽亭縣學額一名。○以操演疏懈。革甘肅軍營委參領慶春職。仍留

營○以甘肅正甯縣城被賊竄陷知縣黃紹
薪革職逮問予陣亡署訓導李蓬峰署典史
彭覺祭葬世職加等貢生于騰輝賞卹加等
○丙辰

世祖章皇帝忌辰遣官祭

孝陵○諭內閣英翰奏擒首李允提解到營記
明請旨辦理一摺擒首偽衛王李允係著名
巨捻曾受粵逆偽封與任柱張總愚等逆分
竄江蘇安徽山東河南等省到處肆行蹂躪

此次逃入皖境窮蹙詐降覈其罪狀擢髮難
數自應立予顯戮以快人心著英翰將該逆
首李允卽行就地正法無庸解京並傳首犯
事地方用昭炯戒其餘降眾均著妥為安插
以示朝廷咸與維新至意○又諭前因安徽
軍務未竣疊經諭令丁憂巡撫英翰無庸開
缺並賞假一箇月治喪假滿作為署任茲據
英翰奏稱軍務肅清籲懇扶柩回旗補行穿
孝等語現在東捻雖已蕩平而撫輯降眾撤

軍籌餉各事宜均關緊要著英翰將一切善
後事務籌辦妥協再行回旗補行穿孝英翰
回旗後安徽巡撫著吳坤修署理○諭軍機
大臣等左宗棠奏吉林馬隊勦擒大勝英翰
奏續派勁軍馳赴北路趙長齡奏請飭余承
恩統師入晉各摺片左宗棠所派喜昌等各
馬隊行抵河內縣屬之合村地方突遇捻騎
圍撲喜昌等列隊迎擊槍礮環施計經一晝
夜之久共斃悍賊一千餘名賊眾大潰實屬

奮勇可嘉所有此次尤為出力各員著左宗
棠擇尤保獎河北賊蹤麇集必須大兵會勦
方能痛埽逆氛左宗棠現因澤潞一帶積雪
難行擬從平陽大道入山趨遼州由直隸順
德一路前赴河北著卽探賊所向繞前壓勦
劉松山郭寶昌業已馳至濟源卽著飭令該
提督等會同喜昌等乘勝兜擊毋任該逆得
以喘息副都統安住延不出隊殊屬乖謬著
卽革職留營以觀後效所有安住全福所帶

馬隊著交喜昌統帶俾資得力前有旨令李鴻章催令劉銘傳善慶溫德勒克西迅赴河北該提督等諒已登程仍著遵旨檄催分路前行不准稍有延緩李鴻章亦當迅督各軍前赴河南相機調度英翰現改派陸鴻慶等隨同牛師韓前赴河北隨地遊擊騰出方長華一軍仍由河北馳赴直豫所籌尚妥著即分飭該將弁等剋期前進其程文炳一軍亦即檄令由臨清鉅鹿一路趨行以便會合諸

軍奮力勦擊李鶴年計已馳抵衛輝何以數日來未見奏報著該撫迅將近日常軍情賊情詳細奏聞並著督飭各軍乘勢兜擊以期就地殄除趙長齡奏晉省現無賊蹤與臬司陳湜分籌坊堵並調余承恩赴晉余承恩一軍現在直境勦賊毋庸調派前往俟各援軍到直後再候諭旨遵行西路河防仍形緊急著趙長齡傳知陳湜嚴密防守如再有一賊渡河致晉西復遭蹂躪卽將該臬司軍法從事

該撫等俱有天良諒不至仍前玩泄增朝廷西顧之憂正在寄諭間據官文奏稱前敵各軍迎勦情形並賊蹤擾及開州暨張曜宋慶兩軍已抵封邱各摺片捻逆由臨漳等處分股渡河經同知余沛恩等會督兵勇迎勦獲勝其由內黃過河之賊現已擾及開州之井店地方直省軍情甚屬喫緊著官文懍遵前諭剋期馳赴大名廣平一帶相機扼紮並嚴飭唐訓方等各帶所部趕緊分布毋稍疏虞

春壽富和所帶馬隊尚稱得力並著該署督令其合隊迎勦毋庸另行分撥致形單薄駐紮南苑之黑龍江馬隊一千名著神機營飭赴直隸交春壽統帶並歸官文調遣以厚兵力張曜宋慶兩軍已抵封邱卽著官文李鶴年等檄令張曜等繞出賊前與直隸各軍合力痛加勦洗以遏北犯陳國瑞已由廣平進發著卽會合張曜宋慶兩軍實力進勦如張曜等軍一時未能會合或先與春壽所統馬

隊會齊。以便相機截擊。賊蹤逼近畿疆。李鴻章英翰。務當嚴飭劉銘傳。程文炳各軍。並善慶溫德勒克西等馬隊兼程前來。如有遲延玩誤等情。惟李鴻章等是問。丁寶楨前奏。正月初旬。親赴東昌相機辦理。現賊蹤北竄。該撫計早出省。著卽迅派勁軍赴大廣一帶迎頭截擊。其吉林黑龍江丹丁馬隊。如已訓練齊集。亦卽派赴直隸交春壽統帶。該副都統久經行陣。帶隊素稱得力。著官文傳諭該副都統會合各軍步隊實力迎勦。官文所調洋槍礮隊及津軍馬步練兵。卽著崇厚遴選得力員弁管帶起程。交官文調遣。以資厚集。津郡一帶亦宜豫防。著崇厚挑派得力之兵。嚴密布置。庶免臨時周章。將此諭知神機營。並由六百里各諭令知之。○又諭英翰奏提解擒首到營。分別安插降眾一摺。牛遂一把。既據英翰奏稱從逆未久。首先投誠。情稍可原。著免其一死。仍著英翰將該犯嚴加管束。如

敢滋生事端。立即正法。毋稍姑容。其存留降眾尤當設法箝制。免致反側。以弭後患。任三應自卽任三厥。據稱於揚州渡河時淹斃。是否確鑿。著李鴻章張之萬英翰確切查明。毋令幸逃顯戮。將此由五百里各諭令知之。○又諭玉通奏西甯府屬漢回互鬪。北川失陷一摺。此次北川新城地方。被十三莊回匪攻陷。又復勾結撒拉回眾。焚掠威遠堡附近漢莊情形。甚為猖獗。玉通因兵力不厚。暫且辦撫。而西甯郡城並無道府大員駐紮。玉通遇事無所咨商。著穆圖善迅催蔣凝學前赴西甯。與玉通隨時商酌。以期有濟。其新降回目馬潮青。並著穆圖善催令前往。毋稍遲緩。將此由六百里各諭令知之。○又諭李雲麟奏患病未痊。懇請開缺。並舉員自代一摺。已賞給錫綸頭等侍衛。作為布倫托海幫辦大臣矣。惟錫綸雖熟習北路情形。而閱歷較淺。恐未能措置合宜。此時畀以幫辦之任。藉資造

就李雲麟毋庸開缺。仍當會同明瑞錫綸遇事和衷商辦。以期有濟。布橋托海新設辦事大臣。本係李雲麟創議。乃事當開辦之始。即諉之他人。揆之人臣事君之道。豈宜如此。著即仍遵前旨。力疾從公。督率棍噶扎勒參將所籌各事宜。妥為經理。以副朝廷終始保全之意。將此由五百里諭令知之。○賞刑部郎中錫綸頭等侍衛。為布倫托海幫辦大臣。○以安徽官軍扼守運河。疊次勦賊出力。賞提

督李世忠福字一方。白玉翎管一支。玉柄小刀一把。火鐮一件。大荷包一對。小荷包兩箇。總兵官張得勝雲騎尉世職。參將劉思忠遊擊牛安邦巴圖魯名號。餘升敘開復有差。○上以孟春時享。

太廟。自是日始齋戒三日。○丁巳諭內閣。前因代辦甘肅鎮西廳同知照磨錢崑墀拖欠滿營糧石銀兩。疊經降旨。將該員革職。並派伊勒屯等審訊。茲據伊勒屯等奏稱。該革員前

在鎮西廳同知任內。所欠滿營糧石。實因逃戶過多。未能徵齊。尚無侵吞情弊。所欠銀兩。無款支發。各等語。錢崑墀於滿營糧餉虧短甚多。雖屬民欠。究係催徵不力。業經革職。著毋庸議。其所得軍功翎頂。著一併註銷。○諭軍機大臣等。昨據官文奏稱。賊竄開州所屬井店地方。曾諭令官文迅即馳赴省南。並令李鴻章等催提各軍迎頭截擊。現聞捻逆分為三股。希圖肆擾。牽掣兵力。而直豫兵勇不

多。宋慶等軍未能遵旨前進。致落賊後。劉松山等軍遠在濟源河北。為完善之區。僅任賊飽掠。裹脅必至。逆燄愈張。且與畿輔路路可通。設被深入。李鴻章等豈忍坐視。前諭李鴻章催令劉銘傳等軍由直隸迎剿。至今並未覆奏。李鶴年出省後。勦辦情形亦無一字奏報。殊可駭異。著李鴻章迅催劉銘傳善慶溫德勒克西等軍兼程前進。探明賊蹤所向。分途迎剿。並著李鶴年催張曜宋慶兩軍繞出

賊前迅圖殲滅。程文炳一軍近日行抵何處。著官文英翰分別提催。此次擒逆由晉竄豫。所調各軍若能迅速前來。迎頭痛勦。河朔三郡何至徧遭蹂躪。軍行遲玩。殊堪痛恨。本當嚴加懲處。念其曾著勞績。暫緩譴責。若再任意遷延。必將該將弁等嚴辦。以肅軍律。左宗棠亦當趲程前赴順德。總統諸軍向南壓勦。並催劉松山等軍繞出賊前。毋再遲誤。李鴻章何日起程。著卽迅速馳奏。匪蹤擾及畿南。

該大臣如由山東徑趨直境。督率所調各軍自北而南。節節進勦。較為得勢。並著相機辦理。官文計已出省。當激勵諸軍分投堵勦。斷不可稍有姑息。貽誤大局。儻將弁中有巧滑延玩者。卽奏明以軍法從事。如該署督有心隱諱。經朝廷別有訪聞。則責有攸歸。恐不能當此重咎也。將此由六百里加緊各諭令知之。○又諭左宗棠奏涇州解圍攻克鄧家堡等處一摺。譚玉龍等軍攻拔窩店鎮回巢後。

旋將梟寨山土匪殲斃。涇州得以解圍。該匪雖經擊敗。難保不再圖窺伺。著庫克吉泰喬松年劉典檄飭譚玉龍黃鼎兩軍分駐邠州瓦雲驛窩店鎮等處。嚴密布置。務將該匪節節掃蕩。迅就殄除。雷正綰一軍進攻鄧家堡等處。疊有斬擒。慶陽道路已通。該郡為運糧要道。並著嚴檄雷正綰統率所部轉戰而前。直搗堅巢。毋令慶陽再被匪圍。致糧道復形梗阻。庫克吉泰等仍當與左宗棠隨時咨商。

將一切機宜會籌辦理。將此由五百里諭知左宗棠庫克吉泰喬松年並傳諭劉典知之。○又諭伊勒屯何瑄奏請飭撥哈密餉需。催兵援應。並請飭催文麟赴任各摺。片哈密兵勇口糧若專恃回戶捐輸。力難為繼。自是實在情形。著趙長齡於未解新疆經費項下迅速籌撥銀十數萬兩。解交歸綏。卽由裕瑞桂成解至烏里雅蘇台。如晉餉一時未能解到。著麟興於庫存新疆經費內酌撥銀兩聽候。

伊勒屯何瑄派員迎提以應急需伊勒屯何瑄於餉到後務期搏節動支俾餉歸實用不至虛糜成祿前已諭令出關勦賊著卽懷遵前旨統帶原部剋期赴哈密勦辦該提督在肅州日久無功致阻師行若仍復遷延不進自問當得何罪文麟簡放哈密辦事大臣為期已久現在行抵何處著伊勒屯催提迅赴本任以重職守毋再稽延安敦玉三處應解巴哈二城軍食卽由文麟迅飭撥解源源接濟毋令缺乏將此由五百里諭知麟興裕瑞桂成伊勒屯趙長齡成祿並傳諭何瑄知之○以管束勇丁不嚴摘陝西總兵官何紹賢頂帶革副將楊大勝職均留營○戊午上以孟春時享

太廟前期親詣行禮○署馬蘭鎮總兵官寶珣奏續獲私販火藥人犯解省審辦得旨高海伶張二著解交官文歸入前案審辦在逃人犯仍著飭員緝獲毋任漏網○以直隸密雲

運放兵米遲延知縣唐鉞下部嚴議○上以次辛祈穀於

上帝自是日始齋戒三日○己未享

太廟遣惠郡王奕詳恭代行禮○遣官祭

太歲之神○諭軍機大臣等本日據官文馳

奏賊勢北趨請飛調客兵入直各摺片崇厚

奏派撥洋槍隊等軍助勦一摺覽奏曷勝憤

懣張總愚等股匪前由陝省渡河入晉時卽

經諭令李鴻章李鶴年英翰飭令張曜宋慶

並劉銘傳程文炳等軍迅速渡河分由直隸

迎頭截擊疊經嚴諭催提昨因捻由河北竄

近直省復經諭令官文李鶴年催督張曜宋

慶兩軍繞出賊前會合直軍痛勦乃各路統

兵大臣並各該省撫臣膜視玩延並不實力

催提星夜前進以致處處落後任令賊由臨

漳內黃竄過漳河邊馬擾及順德所屬大股

由東北平鄉雞澤南和等境狂竄直向北趨

李鴻章等各擁重兵坐視觀望毫無急難之

意是誠何心。捻股裹脅日眾。畿輔東北一路兵力未厚。設因客兵未齊。蔓延益甚。震及近畿一帶。尚復成何事體。現在軍情萬分喫緊。張曜、宋慶兩軍已行抵封邱。李鶴年自當先其所急。飛檄該總兵等不分晝夜兼程統軍入直。繞前截剿。並著李鴻章親督所部各營由臨清德州一帶。剋日馳赴直境相機截剿。不得稍遲。片刻劉銘傳、善慶、溫德勒克西等軍。勦平東捻為日已多。將士早可休息。並不

趕緊前進。皆李鴻章督催不嚴之咎。著該大臣限日飭令迅赴直境迎頭截剿。左宗棠現在行抵何處。劉松山、郭寶昌兩軍於初三日馳過漳河。追剿尚屬出力。仍著官文、左宗棠飛速催提。繞前迎擊。總期將賊逼出直境為要。並著官文先就直省現有兵力。飭令春壽、陳國瑞等軍實力迎剿。左宗棠跟追入直。會合夾擊。以顧大局。崇厚現派洋槍隊並天津練軍共二千名出剿。著即飭令即日馳赴官

文行營。歸該署督調遣。以厚兵力。李鴻章催提劉銘傳等軍不力。並接奉諭旨後迄無一字覆奏。李鶴年於宋慶、張曜兩軍並不遵旨飭令分途前進。致匪蹤乘虛北竄。李鴻章、李鶴年均著先行交部嚴加議處。以示薄懲。儆再遷延膜視。定當重治其罪。官文出省督剿遲延。姑從寬免其議處。嗣後如再似此因循。自當一併嚴懲。各該統將等如再遲延誤事。必當治以軍法。以肅紀律。毋謂朝廷言之不

早也。官文請調黑龍江馬隊著神機營飭令立即拔隊馳赴直隸。仍遵前旨歸官文調遣。所需車輛糧米及馬匹草豆均著官文、王榕吉飭屬剋日辦齊。其由京至保定一路並著王榕吉親行護送。該馬隊行走以便沿途支應。不誤軍需。官文所請飭派神機營迅撥勁旅之處著該王大臣妥為籌畫。山西毗連直隸隘口甚多。趙長齡當速行派兵嚴密堵遏。以防回竄。程文炳一軍雖距直較遠。英翰仍

當嚴催星夜馳抵直境。並著飭令方長華一併入直。儘不趨行前進。卽當以軍法從事。不可稍涉寬縱。丁寶楨當已督軍馳赴東昌。著卽遵照前日諭旨。分撥兵勇出境兜剿。不得畫疆自守。其留駐東省黃河沿岸之吉林黑龍江丹丁計已訓練齊集。並著懷遠前飭令迅赴直隸。交春壽帶領統歸官文調遣。津郡一帶防勦事宜。仍著崇厚豫籌布置。不可略形疏懈。正在寄諭間。據李鶴年奏稱匪股

由懷慶東竄一摺。所陳接仗調兵各節。尚係賊未入直情形。現在逆縱已擾及畿南。張曜等追軍亦經渡過黃河。著李鶴年飭令就近繞至賊前。向南壓剿。不得專顧本境。致誤大局。陳國瑞俟張曜來慶入直後。卽著官文飭令會合兩軍實力勦賊。將此諭知神機營王榕吉。並由六百里加緊各諭令知之。尋吏部議李鴻章李鶴年均照不應重杖八十例上加等降三級留任。事關軍務。應不准其抵銷。

從之。○以巡洋獲盜。予福建守備蘇桂森等加銜升敘有差。○撥直隸天津關稅山東地丁銀各十萬兩。解赴直隸軍營備用。○撥兩淮鹽課兩浙鹽課福建茶稅銀各六萬兩。江漢江海關海浙海四關洋稅湖北鹽釐銀各五萬兩。四川津貼廣東鹽課河南驛站存銀暨太平關稅銀各四萬兩。淮安關稅銀一萬兩。解交內務府備本年經費。

大清穆宗繼天開運受中居正保大定功聖智誠孝信敏恭寬毅皇帝實錄卷之二百二十一

[illegible]

同治七年戊辰正月庚申。

慕陵○諭軍機大臣等昨據官文奏稱捻逆竄

至平鄉雞澤南和等處。勢漸北趨。所調援軍尚未趕到。恐其分竄肆擾。震及近畿。宣化練軍前已撤回。著官文酌量情形。調赴保定附近一帶駐紮。並著鄭魁士於古北口遵化各練軍內。挑選精銳二千名。督帶馳赴保定以南。扼要截剿。以杜紛擾。密雲練軍已逾半年。其中諒有可用之兵。著定安據實具奏。以備

陷鹽井。直撲鹽源縣城。經劉寶國等帶兵進勦。立解城圍。並將鹽井克復。川邊肅清。劉寶國帶傷力戰。奮勇可嘉。所有在事出力員弁。兵勇鄉團。著崇實擇尤彙案保奏。毋許冒濫。建南與迤西壤地毗連。難保滇匪不復萌窺伺。仍著崇實督飭該地方文武嚴密防維。毋稍大意。將此由五百里諭令知之。○是日立春。順天府進土牛春山寶座。○辛酉。祈穀於上帝。遣恭親王奕訢恭代行禮。○諭內閣。前因

擒逆竄擾直隸平鄉等境。李鴻章等未能催提劉銘傳等軍迅速赴援。降旨將李鴻章、李鶴年先行交部嚴加議處。本日據官文崇厚奏擒匪北竄衡水定州一帶。丁寶楨奏帶兵出省豫籌北援等語。覽奏曷勝憤懣。朝廷特命官文署理直隸總督。勦匪是其專責。乃毫無布置。任令擒逆北趨。日肆蔓延。實屬有負委任。左宗棠於張總愚擒股。未能在陝省就地殲除。致令紛竄山西河南。擾及畿輔。調度

無方。官文、左宗棠均著交部嚴加議處。李鴻章身任欽差大臣。為朝廷素所倚畀。當此匪蹤北擾。宜如何速派援軍。同心勦賊。乃疊奉諭旨。既未催令劉銘傳暨善慶、溫德勒克西等軍趨程前進。又日久迄無一字覆奏。是何居心。著拔去雙眼花翎。並遞去黃馬褂。革去騎都尉世職。李鶴年未能迅速出省督勦。會殄逆氛。以致擒匪竄入直境。擾及近畿。所調宋慶等援軍。又不遵旨飭令分途前進。貽誤

戎機。著革去頭品頂帶。並摘去頂帶。劉銘傳暨善慶、溫德勒克西各軍。是否李鴻章於接奉諭旨後未經催令起程。抑係該員等任意逗遛。宋慶、張曜兩軍先後寄諭李鴻章、李鶴年。飭令繞赴直境迎頭壓勦。乃均由豫省渡河致落賊後。是否該員等不聽調度。抑係李鴻章、李鶴年不遵諭旨。令其改道赴豫。著李鴻章、李鶴年據實覆奏。再行分別懲處。除丁寶楨帶兵入直。諭令迅速前進外。所有前調

劉銘傳等軍。仍著官文等迅速催提。以資兜勦。尋吏部議官文、左宗棠均照溺職例革職。得旨均加恩。仍著革職留任。○諭軍機大臣等。神機營王大臣奏遵撥馬隊赴直。並豫備馬步官兵聽候調遣。及請飭各路統兵大臣懸賞擒斬逆首。官文奏擒逆擾及定州。請飭嚴防北路。崇厚奏北路空虛。請飭李鴻章等統兵北援。並續奏派兵扼紮河間。迎勦李鶴年。奏張曜等軍勦賊獲勝。並請飭直隸等處

勸辦堅壁清野。丁寶楨奏。出省布置。並豫籌北援各摺片。覽奏。曷勝憤懣。此次捻逆由晉入豫。左宗棠、李鶴年。既不能遏賊於前。迨竄入直境。官文漫無布置。李鴻章等。又未能遵旨調軍北援。致令捻蹤闖入定州。勢等燎原。實堪痛恨。現在定州既有賊蹤。勢必愈趨愈北。亟宜重兵扼紮。著神機營王大臣。迅將所備馬步官兵。交玉亮統帶前進。視賊所向。扼要截剿。昨日調赴保定之黑龍江馬隊一千

名。並著由涿州相機前進。暫在易州駐紮。毋庸前赴省南。並著官文。派委府道大員前往照料。以便王榕吉交替回京。春壽富和所帶馬隊。著一併調赴保定。以北官文不得截留。春壽等馳抵保定後。即著官文傳諭該副都統。覘賊所在。迎頭痛擊。陳國瑞如已會合春壽等隊。亦著一併北來。如易州情形較緩。所有神機營派出之黑龍江馬隊。統歸春壽管帶。以厚兵力。並著官文。迅催余承恩等軍。統

前截擊。毋得稍延片刻。該將弁等如有稽延觀望情事。即行從嚴叅辦。崇厚現調槍隊練軍二千名。並添調槍礮各隊三營。交陳濟清統領赴河間迎剿。深合機宜。惟陳濟清向來剿賊不能奮勇。著該侍郎嚴飭該總兵兼程前進。遇賊奮剿。張曜、宋慶兩軍。節節落後。著李鶴年催令繞出賊前。如再遲延玩誤。必當重治其罪。所有河北出力將弁。著李鶴年暫行存記。俟捻逆肅清後。再行保獎。丁寶楨擬

親督莫組紳等軍。馳赴任邱、雄縣等處迎剿。洵屬勇往可嘉。即著剋期起程。馳赴直境北路。繞出賊前。合力痛剿。左宗棠現在行抵何處。喜昌、劉松山、郭寶昌馬步各軍。即著催赴北路。毋得徒事尾追。該大臣亦即兼程赴直。督同剿辦。不得再涉遲延。昨令定安挑選密雲練軍備調。鄭魁士挑選古北口遵化練軍二千名。馳赴畿南督剿。現在賊情愈急。定安著酌帶密雲駐防所練之軍。順道迅速來京。

聽候調遣。鄭魁士仍遵前旨。督帶前赴保定以南聽候官文調遣。

西陵重地。最關緊要。著奕梁。裕恪。衍秀。嚴密防範。惟該處存兵不多。並著責成官文。派兵扼堵。僅有捻蹤竄近。惟官文等是問。前因王家璧奏請招撫脅從。曾令各路統兵大臣曉諭。並由軍機處繕給滿蒙漢字告示。諒已刊刻懸挂矣。著官文。李鴻章。左宗棠。崇厚。李鶴年。丁寶楨。再行出示曉諭。如有捻斬逆首。張總

愚者。無論官員軍民。均照從前擒斬任柱之例。賞給銀兩。或酌予官職。其陷於賊中。能將該逆首斬縛自拔來歸者。除免罪外。仍著優加賞賚。以孤賊勢。並著官文。飭屬辦理堅壁清野。毋使賊有所掠。其順天所屬各州縣。著官文。萬青藜。王榕吉。會同辦理。斷不可有名無實。貽誤事機。英翰前調程文炳各軍。至今尚未見到。著即催令前進。並著官文迎提。如程文炳等有意遷延。即著官文嚴參懲處。賊

至定州。距山西大同屬邑不遠。著趙長齡。豫籌布置。將此諭知官文。李鴻章。左宗棠。崇厚。丁寶楨。李鶴年。英翰。趙長齡。奕梁。裕恪。衍秀。定妥。並傳諭鄭魁士知之。○湖南巡撫劉崐奏。援黔各軍。分勦苗教等匪。獲勝。得旨。著即嚴密布置。並著席寶田。迅督所部。馳赴石阡。將荆竹園教匪合力殲除。○予湖南援黔官軍節次陣亡副將席啟庚等五十九員祭葬。世職

加等。○壬戌

上御乾清宮。賜近支親藩等宴。○諭內閣。本日據官文馳奏。擒股竄至清苑境內。各路官軍齊集現籌。勦辦一摺。擒匪由定州竄向清苑。行蹤飄忽。經提督劉松山。總兵郭寶昌。協領喜昌。各統所部兵勇。不分晝夜。繞越賊前。趕赴保定省城。侍衛陳國瑞。亦催令張曜。宋慶。各軍陸續趕到。副都統春壽所部馬隊各軍。屈計亦可繞越賊前。現在各路大兵雲集。聲

勢甚壯。不難將該捻剋。日殲除。著官文乘此聲威。督飭各軍實力痛剿。速殄逆氛。毋任旁竄。追賊各將。尚屬出力。劉松山等軍。由陝豫追至直隸。星夜兼程。繞越保定。尤屬奮勉。可嘉。劉松山。郭寶昌。喜昌。均著先行交部從優議敘。○諭軍機大臣等。本日據官文馳奏。逆匪竄至清苑。催軍繞截。並喜昌等軍繞至賊前。及隆平剿賊各摺片。逆匪於初十日夜間。由定州直撲清苑。省城戒嚴。喜昌。劉松山。郭

寶昌各軍。於十一日已經趕到。該將士等星夜兼程。馳赴近畿應援。深慰朝廷期望。實屬奮勇可嘉。陳國瑞亦於是日帶隊趕至保定。並催宋慶。張曜兩軍。於次日到省。均屬奮勇。春壽。余承恩等軍。由高陽繞路前赴保定。此時當亦可到。官文計已督軍出城迎頭會剿。總期由北面進壓。偪向南趨。節節痛剿。是為至要。本日據神機營王大臣奏。派兵分路防剿情形。所有派出馬步軍二千七百餘員名。

著卽馳赴涿州一帶。酌量情形防剿。其餘二千一百餘員名。著卽前赴雄縣。霸州一帶防剿。其備調之黑龍江馬隊四百名。卽著趕緊補齊。馬匹相機調撥。逆騎剽疾異常。難保不由保定橫向東趨。繞赴北路。涿雄等處。兵力未厚。官文當慎為留意。隨時相機。飭令保定諸軍力固西北。毋稍疏忽。致誤全局。崇厚前派之天津洋槍練軍共二千名。並著速飭馳赴河間等處。與神機營所派防軍聯絡聲勢。

以固京南一路。鄭魁士一軍。著由附京東北趨向西南。迎頭截剿。丁寶楨昨擬帶莫組紳等軍北援。如兵勢尚單。著卽添派得力之隊。星夜趕赴北路。迎頭堵剿。並著速飭吉林黑龍江丹丁一併北來。以厚兵力。山東臨德東昌河防。仍著嚴密堵遏。毋令賊騎竄渡。山西界連直隸各山口要隘。趙長齡當懍遵前諭。派撥兵勇堵截。毋任賊蹤竄越晉疆。易州重地。關係非輕。著官文懍遵昨日諭旨。密籌布

置如有一賊竄向西北。惟官文是問。近畿情形如此緊急。李鴻章當懷遵疊次諭旨。督率所部迅速入直。並飛催劉銘傳。善慶。溫德勒。克西等軍北來會剿。淨埽賊氛。河北一帶。李鶴年亦當速籌兵勇。嚴密堵禦。以防賊蹤回竄。牛師韓一軍。著英翰嚴催入直。程文炳如遷延不行。北上。著官文。英翰速行嚴叅治罪。左宗棠現在行抵何處。何以數日並無報來。該大臣縱賊入直。若再不趕緊繞出賊前。自

問當得何罪耶。將此諭知神機營。並由六百里加緊諭知官文。李鴻章。左宗棠。英翰。丁寶楨。李鶴年。趙長齡。崇厚。並傳諭鄭魁士知之。○又諭景紋奏。裹塘案內各犯均已押解至藏。並達賴喇嘛等公同具結。懇請將東登工布一犯從寬辦理一摺。東登工布係工布朗結之子。覈其情罪。本難寬宥。惟據該達賴喇嘛暨藏俗僧俗人等結稱。東登工布當藏兵進攻之時。屢勸工布朗結退出所占地土。並

獻家貲。充作兵餉。尚知悔罪去逆。不無一線可原。除裹塘案內解到各犯。業經由景紋照案辦理。崇喜土司拉旺仁增。仁增工布二犯。並照案發往藏屬五百里。交營官嚴加管束。外東登工布一犯。著從寬貸其一死。由景紋發交一千里外。嚴飭營官照例圈禁。以示朝廷法外之仁。將此諭令知之。○又諭景紋奏。西藏豐收安樂。僧俗人等懇請達賴喇嘛下山誦經一摺。西藏連歲以來。雨暘時若。年穀

豐登。疹癘消除。民安物阜。該僧俗人等以身逢其盛。鼓舞歡欣。公請達賴喇嘛下山念誦真經。為國祈福。具見出於至誠。洵堪嘉尚。該達賴喇嘛梵修有素。向義情殷。此次下山。誦經著景紋妥為照料。並發去黃哈達一箇。銀曼達一箇。鈴杵一分。嘎巴拉念珠一串。玉盃一箇。玉盤一箇。黃緞二卷。傳諭該達賴喇嘛令其祇領用昭恩賚。將此諭令知之。○烏里雅蘇台將軍麟興等奏。遵籌暫開蒙古捐輸。

照章給獎。作為新設布倫托海一城經費。不得改撥他處。從之。○以辦理西藏贍對各案出力。賞達賴喇嘛兄夷喜羅布汪曲三品頂帶花翎。頗琿策忍班墊二品虛銜。○予江蘇各屬陣亡殉難外委王允和等紳民婦女一千九百四十五員名口分別旌卹如例。○癸亥。

宣宗成皇帝忌辰遣官祭

慕陵

上詣

奉先殿

壽皇殿行禮。○諭軍機大臣等。昨據醇郡王奏。

請帶兵前護

陵寢。當經諭令軍機大臣面傳諭旨。俟續有緊急。再行派往。茲據醇郡王續請前往守護。再申前議一摺。覽奏。具見惻忱。該王勇於任事。所奏各情。洵屬慎重周密。惟京師防務方亟。正須該王在城布置。未便遽行遠離。著

仍遵前旨。暫時無庸出京。易州重地。關繫緊要。誠不可稍有疏虞。著神機營再行添派得力隊伍。揀選熟悉帶隊將領。速即起程。前赴該處助防。該王在京控制一切。所有派出神機營各隊。庶各調度得宜也。將此諭令知之。○又諭。賈楨等奏籌辦外城團防。暨請將南營暫歸調遣各摺片。現在捻蹤伺隙。北竄。雖大兵雲集。不難剋日掃除。但賊氛已近清苑。去京非遠。亦應亟籌守備。以定人心。該大臣

等擬於適中地方。設立外城團防總局。約同官紳商民。合力舉辦。卽著照所擬實力辦理。以期防患未然。並著順天府五城御史。及外城練勇局。聯為一氣。以免宵小乘間竊發。至從前巡捕南營。曾歸國防局調遣。與現在情形不同。若有應需調遣之處。著該大臣等商同步軍統領衙門會籌妥辦。以資聯絡。將此各諭令知之。○又諭。丁寶楨奏督軍赴直援剿。並籌備東省邊境情形一摺。前因捻逆竄

至定州境內。省城戒嚴。曾經諭令丁寶楨帶兵趕赴北路迎勦。該撫業已馳抵平原。擬親督王心安等軍。由德州馳赴景州河間。向北前進。實屬奮勇可嘉。現在匪蹤已竄保定。需兵甚急。著該撫剋日拔營。由任邱雄縣一路兼程北上。探賊所向。迎頭截擊。以固近畿門戶。崇厚現派天津洋槍練軍各隊前赴河間。著卽飭令統領陳濟清與東軍聯絡聲勢。實力防勦。毋任賊蹤向東北竄擾。震及近畿。官

文此時計可與賊接仗。逆騎剽疾異常。恐其橫向東趨。繞道北竄。務當隨時偵探賊情。迅速馳奏。並著與丁寶楨互相聯絡。相機援應。以收夾擊之效。丁寶楨另片奏吉林黑龍江丹丁馬匹尚形疲弱。未能卽時派出等語。著卽飭令該統將等趕緊餵養。俟馬匹臚壯可用。卽行派赴直隸助勦。以資得力。山東臨館一帶仍著該撫飭令楊飛熊等軍嚴密堵禦。以防賊蹤東竄。毋稍玩忽。將此由六百里各

諭令知之。○醇郡王奏請添派侍郎恩承馳往雄縣一帶防勦。從之。○甲子

上詣

大高殿

壽皇殿拈香。○御保和殿。賜王以下文武大臣蒙古王貝勒貝子。公額駙。台吉暨朝鮮使臣等宴。○諭軍機大臣等。衍秀奏賊蹤竄近安肅。並神機營探稱拾蹤逼近易州各等語。撿逆剽疾異常。陳國瑞等軍既抵保定。何以縱

令西竄。致落賊後。僕賊由易州竄至房山。則長新店蘆溝橋均須戒嚴。著傳諭劉松山郭寶昌繞出賊前。迅圖兜勦。陳國瑞會同張曜宋慶統率所部。迅赴易州一帶迎頭截擊。先顧

陵寢要地。兼防東竄。春壽余承恩等軍。卽著繞赴涿州附近各處。合力痛勦。以上各軍如距陳國瑞營較近。卽著陳國瑞迅速轉傳。以免紆折阻滯。崇厚派出之軍。毋庸駐守河間。卽

著催令兼程由固安附近一帶相機進剿。丁寶楨亦著由河間雄縣趨捷徑迅赴固安。近一帶繞前兜剿。不可稍涉遷延。鄭魁士所帶之軍。卽著改道由密雲順義一帶迅速進發。以上各該軍進止機宜。並勦賊情事。均著一面互相知照。一面徑報神機營。

西陵亟宜防範。著奕梁裕恪衍秀妥為防守。其神機營派出前赴易州之馬步隊。著奕梁等派員迎提。會同駐紮。並著多張旗幟以壯聲

勢。毋使逆蹤逼近。是為至要。官文卽著出省調度。一切遵奉諭旨相機辦理。將此由六百里加緊諭知官文。丁寶楨崇厚奕梁裕恪衍秀。並傳諭鄭魁士劉松山郭寶昌陳國瑞知之。○又諭現在捻股已近易州西北一帶情形喫緊。著王榕吉會同景瑞統帶黑龍江馬隊卽行馳赴涑水易州一帶扼要堵剿。不得中途逗遛。致有貽誤。賊蹤已竄過保定以北。官文何得安坐省城。任賊紛竄。著卽趕緊出

省繞赴西北一路。統率諸軍相機截擊。以保陵寢重地。兼顧畿甸。省城應辦防守事宜。著交鍾秀妥為籌辦。毋稍大意。將此由六百里加緊各諭令知之。○又諭前日據神機營王大臣奏派兵分路防剿情形。當經諭令將派出馬步各軍馳赴涿州雄縣等處防剿。昨因易州地關緊要。復諭令該王大臣添派隊伍速赴該處助防。現在捻蹤竄近易州情形更為喫緊。京城西北一帶亦須派兵扼紮。著該王

大臣迅速揀派得力兵勇妥為布置。並分路廣設偵探。毋稍疏漏延緩。將此諭令知之。○又諭昨據賈楨等奏籌辦外城團防。當經諭令該大臣等實力辦理。現在神機營訊據獲賊供稱。捻逆扮作商民希圖潛入京城等語。都門五方雜處最易藏奸。亟應嚴行盤詰。以杜詭謀。著直年旗團防大臣步軍統領衙門五城御史悉心妥辦。嚴密搜查。不可虛應。故事致有疏虞。儻有一賊入城。查明由何員所

轄地面。入。卽將該員從重懲處。決不寬貸。其城上城下各地界。並著直年旗傳知各旗營及查城大臣。將防守事宜妥為籌備。綠營地面。著步軍統領衙門酌派勁兵。擇要扼紮。並著步軍統領衙門於各城門添派弁兵。認真盤查。毋令匪蹤潛入。各該衙門及團防大臣。仍當嚴飭該員弁等。細心訪查。不得誣良為匪。妄拿無辜。擾害閭閻。將此各諭令知之。○又諭官文奏賊蹤竄踞省城西南。各軍繞

前扼勦。李鴻章奏遵派各軍督帶赴援。並請飭豫備軍糧。左宗棠奏取道固關赴直。各摺片。本日據行秀奏。並神機營探稱。該逆大股於十三日已刻竄至距易州城外三十里地方。是賊蹤已向西北奔竄。何以官文奏稱大股賊匪尚盤踞保定距省城二三十里之涇陽驛。恐所探未能確實。著官文仍遵本日寄諭。迅卽出省馳赴易涿一帶調度。劉松山郭寶昌張曜宋慶陳國瑞等軍迎頭截勦。偏賊

南趨。並一面知照李鴻章。如賊有南竄消息。卽著迎頭痛勦。以期卽時殄滅。丁寶楨仍遵本日諭旨。馳赴近京一路合力迎擊。劉銘傳雖係患病。而受恩至重。當此烽火逼近易涿。豈可稍涉遷延。著俟病體略愈。卽行督隊北上。李鴻章已調周盛波等軍由東阿渡黃。該大臣向來辦事尚屬勇往。卽著兼程前進。馳赴近京一帶督飭各軍相機勦擊。並催提郭松林等隨後繼進。善慶溫德勒克西馬隊從

軍已久。朝廷亦深知其勞苦。俟畿輔肅清。卽由該大臣奏請就近凱撤。以資休息。該大臣行糧必須豫為籌備。著官文嚴飭各州縣豫提公款。趕購糧草。芻料各十萬斤。儲備公所。俟李鴻章兵過。卽給價取用。並仍照數買補。屆時如有缺誤。卽著李鴻章嚴參。所有轉運嚮導各事宜。卽責成張樹聲辦理。並著於天津倉內借撥粳米三萬石。飭令張樹聲派委員弁分運河間等處儲存。以備軍食。將來由

李鴻章咨明江蘇巡撫。照數籌運歸補。左宗棠縱賊東竄。雖追勦尚力。而擾及近畿。豈可不思補救。著卽取道固關。兼程前赴保定。以北安為督勦。以贖前愆。毋再遲誤。將此由六百里加緊各諭令知之。○又諭李鶴年奏馳抵彰郡。卽日進紮磁州。並飭軍力顧北路。暨張曜剗營獲勝各摺片。所陳張曜等接仗情形。尚在捻股未至保定以前。現在賊蹤擾及易州安肅。近畿軍情萬緊。張曜宋慶兩軍已

於十三日據官文奏稱。由陳國瑞催提。次日可抵保定。並經諭令官文督飭各軍。由北面進壓。偏賊南趨矣。仍著李鶴年飛飭該提督等。繞出賊前。會合直境各軍實力勦擊。不可存主客之見。稍涉遲延。該撫現擬出境進紮磁州。卽著扼要駐紮。以防回竄。並遙為保定聲援。其馬德昭等軍。著卽迅速催調。以資厚集。將此由六百里諭令知之。○又諭崇實奏統籌川黔防務。請留周達武暫緩赴任。宋延

春奏。逃西勦匪情形。並請催督撫赴任各摺片。前因貴陽軍務喫緊。諭令周達武迅赴貴州提督之任。茲據崇實奏稱。現已抽募兵勇。派知府唐炯統帶。由綦南出境援勦。並派道員劉嶽曙等分路援應。而蜀北邊防亦亟宜豫籌。自是實在情形。貴州提督周達武著准其暫緩赴任。仍令統帶所部分布川北。以固蜀省門戶。黔省既有川兵赴援。著曾璧光振刷精神。力圖進勦。不得藉口兵單。並著劉嶽

昭懌遵疊次諭旨。將龍里貴定各匪迅速掃蕩。現在逃西軍務喫緊。劉嶽昭著俟黔省藏事。卽赴雲南新任。張凱嵩現計假期將滿。並著迅赴新任。毋稍遲延。宋延春當慎固封守。籌埽逆氛。毋得專待張凱嵩等到任。致滋貽誤。將此由六百里諭令崇實。張凱嵩劉嶽昭曾璧光並傳諭宋延春知之。○命恭親王會同神機營王大臣辦理巡防事宜。○以吏部右侍郎胡肇智兼署順天府府尹。○以雲南

武定廣通定遠祿豐等州縣城被賊竄陷革署知州知縣王德誥署知縣同知丁逢泰署知縣馬培麟鄭廷璧職○予雲南姚州等處陣亡都司馬向龍等祭葬世職加等○撥戶部銀二十萬兩交神機營備用○乙丑諭軍機大臣等奕梁等奏詢明兵勇與賊相誤請暫留喜昌防守崇厚奏匪竄安肅現籌迎勦請飭鄭魁士駐紮通州各摺片據奕梁等稱易州未見有賊十二日姚村鎮所見邊馬係

官軍所發差探商民誤以為賊並省北現有賊匪屯集等語易州雖無賊蹤而該逆剽疾異常不可不豫為之備仍著官文與奕梁裕恪衍秀悉心會商嚴密布置以期有備無患現在神機營派撥馬步官兵二千餘名令王亮等統帶前赴易州防守即著奕梁等飭令擇要駐紮遇賊即擊毋稍疏虞易州防兵現已不少喜昌陳國瑞兩軍自應作為遊擊之師以利攻勦著官文等檄飭喜昌陳國瑞統

率所部會合劉松山郭寶昌等軍覘賊所向痛殲醜類崇厚即飭陳濟清馳赴東北一路會同東省官軍聯絡聲援迅籌掃蕩鄭魁士所部著官文崇厚催令該署提督駐紮通州以顧京師東路劉松山郭寶昌喜昌宋慶張曜各軍跋涉遠來糧餉易形缺乏尤應加意拊循著官文寬籌餉項發給沿途州縣購辦糧草餉料隨時支應以便源源接濟儻該州縣供應缺誤並有侵漁情弊即著官文嚴叅

治罪官文當傳諭劉松山等令其倍加奮勉會合諸軍將該逆迅行殄滅用副委任將此由六百里加緊各諭令知之○又諭本日據伯彥訥謨祜奏懇准督兵勦賊穆騰阿奏請帶兵馳赴涿易一帶迎擊各摺覽奏均堪嘉尚現在捻逆屬聚滿城等處各路征兵雲集神機營派出馬步各隊亦足以資防守並經諭令官文等迅督諸軍分路迎勦惟京師重地防守尤關緊要如近城一帶分兵布置扼

要安營各事宜。均須有人督率統領。著神機營王大臣傳知伯彥訥謨祜候旨簡派。穆騰阿本在神機營當差。嗣後如有應行調遣之處。再由該王大臣等奏派前往。此時均毋庸帶兵出京。將此諭令知之。○惇親王奏。敬擬防守三條。一。城外宜添兵駐紮。以備偵探救應之用。一。城內宜添派各旗續練槍兵。分門防守。一。城內乞旬日多。宜收羅籌給養贍。得旨著神機營王大臣酌度辦理。○丙寅諭軍

機大臣等。昨因神機營已派馬步官兵令玉亮景瑞等帶赴易州防守。當經諭令奕梁等飭令擇要駐紮。惟思該副都統等於該處地勢不甚熟悉。易州一帶山徑紛歧。必須履勘分明。布置方有把握。著奕梁裕恪衍秀挑派誠實可靠土人。作為嚮導。帶領玉亮等將易州附近各處所。周歷查看。山僻小徑。有通陵內之處。均須詳細看明。其由易州以西。通紫荆關要路。亦應知其險隘。庶防範可期。周密

奕梁等即傳知玉亮分飭各隊統領。隨同土人到處周查。毋稍疏忽。其守護

陵寢兵丁著奕梁等飭令小心防護。不准片刻疏懈。賊蹤相距非遙。務須隨時偵探。以免疏虞。玉亮景瑞等所帶馬步各隊。足資防守。著奕梁等仍遵昨日諭旨。檄飭喜昌陳國瑞統率所部會合劉松山等軍。勦賊毋得專意株守。致誤戎機。將此由六百里各諭令知之。○又諭昨據奕梁等奏稱賊蹤竄至滿城江城

大江店一帶。當經諭令官文檄飭喜昌陳國瑞會合劉松山等軍迎勦。現在賊蹤是否仍在滿城地方盤踞。抑或分股竄向他處。涇陽驛是否尚有賊匪。其竄踞滿城之賊。是否即涇陽驛全股。抑係另有分股。近日官軍曾否與賊接仗。勦辦情形如何。朝廷廑繫殊深。官文於前日奏報情形後。現無續報到京。著該署督將現在情形迅速馳奏。並著隨時馳報。以慰懸繫。賊情詭譎異常。恐其留住後股牽

綴官軍而另分前股暗竄他處以圖肆擾或由滿城以西山內暗圖繞越官文當慎選精細可靠兵役嚴定賞罰勤加偵探密為布置並著督飭各軍痛加勦擊迅挫賊氛毋任日滋延蔓陝豫東皖各軍於直境地勢不能熟悉況滿城以西山徑紛歧非得土人嚮導不能周知地利著官文迅飭各州縣暨各軍將領無論官軍行抵何處卽著該地方官選派誠實可靠土人作為嚮導以利攻勦昨據崇

厚奏賊蹤竄至安肅是否確實著官文迅速查明馳奏正在寄諭聞據丁寶楨馳奏督軍行抵任邱十六日可至雄縣丁寶楨一軍北上迅速奮勇可嘉現在賊股尚在滿城著該撫卽由雄縣橫向安肅保定一帶會合進勦並著崇厚飭令前派河間等處防軍聯絡聲勢探賊所向迎頭截勦總期偏由東北偏向西南以期屏蔽京畿是為至要東軍由德州馳赴雄縣僅裹五日行糧現在缺乏可虞著

官文崇厚趕緊籌款派員撥解銀米星赴該撫行營接濟其喜昌劉松山郭寶昌張曜宋慶等軍官文當仍遵前旨一體接濟毋任缺乏丁寶楨另片奏請入京陛見等語該撫由東省馳赴直北朝廷已深鑒其誠惟現在軍情緊急該撫當在營調度督勦俟直隸軍務完竣後再行來京將此由六百里各諭令知之又諭官文奏賊向東南竄動祁州安平已見邊馬並豫軍等請獎各摺片覽奏稍紓

廩懷張曜等軍北援迅速著官文先行傳旨嘉獎俟立有戰功卽行破格獎勵捻逆因北路防守甚嚴暫向東南退竄官文派令張曜宋慶兩軍駐紮北河暫緩拔營一面出省督師探蹤進勦布置尚稱穩妥卽著照該署督所擬迅速辦理賊情狡詐百出設或誘兵南追伺隙繞竄北路亦不可不豫為之防官文既令陳國瑞會同張曜等軍固守北路卽著傳知該侍衛等嚴密扼守以固北路藩籬如

賊果南竄北路稍鬆仍當飭令陳國瑞等奮力追剿其餘承恩春壽等各隊卽由該署督統帶出省進剿劉松山郭寶昌兩軍現已拔赴省南卽著檄飭向東南追剿實力進擊毋稍鬆勁其方長華程文炳等軍仍著官文催提迎頭截擊以厚兵力並著飛咨左宗棠李鴻章李鶴年等豫為防剿頃據丁寶楨奏督軍行抵任邱當經諭令該撫由雄縣向安肅保定一帶會合進剿此時賊既南竄自應改

道前進著丁寶楨督飭各軍會合崇厚所派防兵相機迎剿楊飛熊一軍由臨清北來並著丁寶楨飭令探賊所向迎頭夾擊以期各路兜剿就地殄除崇厚亦當飭令陳濟清等軍會同東軍聯絡前進遇賊卽擊官文摺著鈔給丁寶楨崇厚閱看將此由六百里加緊各諭令知之○以正黃旗蒙古副都統英元署右翼前鋒統領乾清門侍衛索布多爾扎布署鑲黃旗漢軍副都統鑲紅旗蒙古副都

統延煦署正紅旗滿洲副都統理藩院右侍郎桂清署鑲紅旗蒙古副都統頭等侍衛祥祿署鑲紅旗漢軍副都統鑾儀衛冠軍使景豐署正藍旗蒙古副都統記名副都統雅爾堅署鑲藍旗漢軍副都統○旌表守正捐軀安徽太和縣民婦黃梁氏○丁卯諭軍機大臣等李鶴年奏督兵馳抵磁州並借撥火藥等項籌備糧餉各摺片捻匪現由保定東南竄遁北路官兵雲集官文卽日出省督兵追

剿丁寶楨亦率東省援兵由雄縣向西南迎擊並與駐防河間之天津洋槍練軍礮隊等會合前進該逆被兵壓擊難保不回向順廣一帶奔竄李鶴年現已帶兵馳抵磁州著卽在該處駐紮設遇該逆竄至卽可迎頭截剿與直隸追軍互相夾擊迅速殄除河北一帶鎮撫事宜仍著李鶴年就近兼顧張曜宋慶兩軍現在暫紮涿州防衛近畿兼顧易州門戶昨已諭令官文接濟張曜宋慶等軍銀米

並令崇厚撥解銀米接濟丁寶楨營軍需。著官文崇厚仍遵前諭妥為籌辦。李鶴年所請令州縣採買米芻馬草豫備豫軍過境應用章程並撥車接運護送解營等語均著官文飭令直隸各地方官妥速照辦。原片著鈔給官文崇厚閱看。張曜宋慶兩軍所需細洋火藥並大小銅帽均著崇厚酌量速撥解赴該營本日復據彭祖賢奏請協濟畿輔官軍餉銀一摺除京營派出各路防兵已由神機營

籌撥款項外所有劉松山郭寶昌喜昌張曜宋慶等軍均著由官文籌撥餉項分資接濟。並著戶部撥銀二十萬兩解交官文覈實應用。其丁寶楨督帶各軍仍由崇厚籌款撥解。均毋違誤以利師行。將此由六百里各諭令知之。○以密雲副都統定安為綏遠城將軍未到任前以前任烏里雅蘇台將軍德勒克多爾濟署理。○以署正藍旗蒙古副都統景豐為密雲副都統。正白旗滿洲護軍參領濟

祿署正藍旗蒙古副都統。○予故綏遠城將軍裕瑞祭葬諡恪勤。○戊辰

上御撫辰殿大幄次賜蒙古王貝勒貝子公額

駙台吉暨朝鮮使臣等食。○諭軍機大臣等

李鴻章奏遵撥官軍赴援並督隊北上丁寶

楨奏行抵固安探明賊蹤南竄折回雄縣進

勦並商撥糧餉崇厚奏津軍會合東軍進勦

並籌津防布置各摺片現在捻蹤趨向博野

安平北路較鬆李鴻章所奏各軍行抵景德

一帶即可探賊所向迎頭截擊一鼓殄除所

需軍糧芻料前已諭知官文飭屬妥辦即著

該大臣咨商官文隨時接濟毋致缺乏丁寶

楨探知賊蹤南竄即由固安折回雄縣相機

進勦甚合機宜著即督兵南向以便聯絡諸

軍四面夾擊其楊飛熊一軍即照所請飭令

移紮景州以杜賊竄衡武棗清等處王正起

一軍駐紮臨清以固東省門戶所需軍糧等

項俱著官文崇厚等隨時撥給毋稍延誤陳

濟清所部兵勇著崇厚飭令隨同東軍迎勦。力遏賊氛。所有津防事宜。並著督率春霖等妥為辦理。不得稍有疏虞。左宗棠計已行抵井陘。本日已諭令在井獲一帶扼紮。以杜賊竄。晉省之路。皖省程文炳等軍計應早抵直境。著官文迅速迎提。以便會合諸軍協力兜勦。並著英翰、吳坤修、飛催。當此大兵雲集。必可聚而殲旃。該大臣督撫等務當激勵將士。迅奏膚公。其近日賊情並劉松山等軍有無

接仗情形。著官文確探隨時具奏。以慰廑繫。將此由六百里諭知官文、李鴻章、丁寶楨、崇厚、英翰。並傳諭吳坤修知之。○又諭前據左宗棠奏稱行抵介休。由固關取道赴直。當因賊蹤北擾。諭令迅速前來。現賊已由安平祁州南竄。北路情形較鬆。劉松山、喜昌等軍跟蹤追勦。甚為出力。丁寶楨亦督兵馳抵雄縣。兵力已厚。足敷勦辦。恐該逆聞風回竄。晉省平遼等處仍應嚴防。左宗棠計程當可行抵

井陘。即著在井陘獲鹿一帶扼要駐紮。杜賊入晉之路。並知會趙長齡派兵於晉東各隘口嚴密布置。儻有賊蹤竄近。即可整軍以待。痛加勦洗。將此由六百里諭令知之。○又諭桂成奏擊退邊外竄匪。並邊內添兵協防一摺。據稱蒙古伊克布棟等處地方賊匪經官兵先後截擊。漸次退回。邊內惟花定等處匪徒經副都統金順擊勦。東趨榆林神木一帶。晉省保德河曲與榆屬僅隔一河。當此冰橋

凝結之時。自應添撥勁軍以防偷渡。著德勒克多爾濟、桂成即飭官軍於沿邊沿河加意防堵。並遵前旨傳知貝子巴達爾琥、扎那格爾第等督飭蒙古官兵實力堵遏。毋任匪蹤闖入。是為至要。將此由五百里各諭令知之。○又諭豐紳等奏兵精告匱。請飭晉省籌餉迅解一摺。據稱甯夏滿營兵精同治六年僅領山西餉銀二萬二千兩。官兵已形苦累。近又接趙長齡咨稱協餉停解。餉源已絕。即本

城商民亦不能再行墊借。請飭山西巡撫仍照前案籌解。所奏亦係實情。著趙長齡迅飭該藩司。無論何款。先行酌提銀三四萬兩。派員解交甯夏軍營。毋稍延誤。豐紳等於此項解到時。務須撙節動用。並加意拊循。俾收飽騰之效。晉省西路防務。尚形緊急。陳湜現在移紮何處。並著趙長齡懍遵前旨。督飭該臬司認真防守。儻任陝回偷渡。致吉甯等處復遭蹂躪。必惟該撫等是問。將此由五百里諭

知豐紳。趙長齡並傳諭三壽知之。○以山西綏遠城防河出力。予總兵官馬陞等加銜升敘。開復有差。○己巳。諭軍機大臣等。恩承奏到防布置情形。暨擬仍駐涿州各摺片。捻股雖向東南竄逸。惟賊騎飄忽。近畿一帶尤應嚴防。以杜回竄。易州情形較鬆。玉亮業已馳抵該處。足資防守。恩承著暫緩前赴易州。俟涿固等處防務布置周密。偵探賊蹤。南竄日遠。再行前往。所稱調撥達明阿等隊分投防

勦之處。著相機妥為籌畫。仍隨時呈報神機營酌度辦理。將此由四百里諭令知之。○又諭恩承奏現在皖豫兩省軍務稍定。東境甫就肅清。人心最易動搖。設任捻賊紛竄。恐到處煽惑。復成燎原之勢。請飭直隸等省合力兜擊等語。直省大兵雲集。當此捻蹤南竄。亟應設法聚殲。為一勞永逸之計。著官文檄飭各軍同心合力。務將此股賊匪就地殄除。丁寶楨即飭派出官軍會籌埽蕩。如該逆竄近

豫邊。並著官文會商李鶴年協同勦洗。迅殄逆氛。毋得各存意見。遷延觀望。致匪蹤復肆蔓延。是為至要。將此由六百里各諭令知之。○又諭蘇鳳文奏官軍疊勝苗匪。現籌追勦一摺。貴州九阡苗匪。竄擾融縣之長安鎮。敗走懷遠境內。復勾結土匪。窺伺龍勝等邑。及分屯草頭坪一帶地方。副將刁經明等設計攻擊。並將三元寨等處擄平。官軍乘勝窮追。餘匪由銅盤山遁向西江而去。此次苗匪侵

軼粵疆。疊經官軍追殺。其勢漸衰。惟西江一帶。與黔省永從等縣苗境相連。非大軍繼進。不能埽穴擒渠。著蘇鳳文嚴飭刁經明等各率所部跟蹤追勦。以期悉數殲除。仍一面飭令各該地方官。激勵鄉團。嚴挖土匪。迅清邊患。其疊竄南丹土州之翁昂等處苗匪。並著該撫督飭何元鳳將邊防妥為布置。相機勦擊。毋得稍涉疏虞。將此由四百里諭令知之。○署馬蘭鎮總兵官寶珣奏請飭遵化練軍。

仍回遵薊堵禦。得旨。現在賊已南竄。丁寶楨所部各軍。由固安向南壓勦。足為東路屏蔽。鄭魁士兵亦駐紮通州。與遵化相距尤近。所有遵化練軍。仍著留於天津。以資防勦。○革職留任山西巡撫趙長齡奏竄豫捻股。闖入彰德。晉省東北邊防緊要。擬卽日親赴潞安督防。得旨。捻蹤早竄直境。該撫何以尚未知悉。殊屬糊塗。仍著懷遵前旨。將直晉毗連各要隘。妥為防範。儻再有疏失。必將該撫從重

治罪。○以打仗出力。復甘肅軍營已革總兵官馬洪勝職。賞還副將胡先勝頂翎。○以廣西攻克龍州賊巢。予副將楊安龍等加銜升敘有差。○予甘肅鞏昌陣亡殉難遊擊常德。知縣羅星點學正王林桂。張正蒙祭葬世職加等。王林桂等眷屬分別旌卹如例。

大清穆宗繼天開運受中居正保大定功聖智誠孝信敏恭寬毅皇帝實錄卷之二百二十二

山等並豫營各軍迅速合剿。官文亦即督率春壽富和余承恩等各隊奮勇進發。剋期並舉。陳國瑞所統之隊。即令作為遊擊之師。往來策應。並著丁寶楨約令陳濟清等軍。由東北兩面迎頭兜擊。以剿為防。毋稍延緩。各路大兵雲集。若不乘此聲威。聚而殲旃。以致匪徒他竄。必又成尾追之勢。該將領中如有遷延觀望。貽誤事機者。即著官文嚴參治罪。如果殲擒巨魁。盡殄醜類。亦必榮邀懋賞。至各

軍營糧草。著官文飭令地方州縣剋日辦齊。准其作正開銷。如有貽誤。即行嚴參懲辦。並著官文崇厚速將洋米轉運各處。以備李鴻章等軍營接濟。英翰所派程文炳一軍。已於初十日由東阿渡黃。著即歸官文節制調遣。並著迅速迎提北上。探賊所向。迎頭力剿。如有遲延觀望。即由官文嚴參。所需軍火糧餉。並由官文就近接濟。其方長華一軍。本由豫省渡河。著官文英翰飛飭方長華與牛師韓

兩軍均暫在黃河南岸扼要駐紮。以防賊匪南竄。所統降眾。英翰當飭令該統將等妥為駕馭。毋任滋事。李鶴年現駐磁州。著遵奉前諭。遇賊南竄順廣一帶。即與直境追軍會合夾擊。毋任竄逸他處。李鴻章現已定期北上。著即督率各營迅速馳赴直境。合力剿辦。毋稍延誤。將此由六百里各諭令知之。○吏部議覆升任浙江巡撫馬新貽奏請將原定衝繁疲難四字之平湖縣改為繁疲難三字。原

定衝繁難三字之仁和縣改為衝繁疲難四字。均應如所請辦理。至所請將應歸部選之台州府知府改為題調要缺。由外揀補。應毋庸議。從之。○理藩院奏扎薩克圖汗扎薩克郡王車林敦多布報捐俸銀。得旨該部落素稱寒苦。所捐銀兩著無庸賞收。以示體恤。○以故喀爾喀貝子沙拉布貢格弟托果瓦襲爵。以貪鄙違誤。廣西副將何元鳳革職逮問。以私徵錢糧。四川知縣吳錦銓革職逮

問 壬申。

孝聖憲皇后忌辰遣官祭

泰東陵。諭軍機大臣等英翰奏帶兵馳赴汴梁請旨入衛畿疆一摺。英翰現催吳坤修前赴潁州接署撫篆。一面親督英山等軍先赴汴梁。請旨北上。並令牛師韓等抽撥馬隊二千二百人。趲程赴援。具見勇於任事。奮勉可嘉。賊匪現在折竄祁州蠡縣一帶。著英翰統率牛師韓方長華等軍。暫紮黃河以南。如遇

該逆回竄豫邊。卽統帶所部實力進剿。所收降眾。駕馭殊難。畿輔重地。關繫尤為緊要。英翰如渡河剿匪。務當慎選可靠之軍。妥籌調度。不可稍涉大意。並檄飭程文炳一軍。迅由河間等處會合諸軍向南壓剿。英翰現已起程。著吳坤修迅赴潁州接署撫篆。所有皖省善後及征軍糧餉一切事宜。卽著妥為辦理。現聞該捻擾及深州一帶。係由東南竄逸。昨據官文奏匪陷祁州。並擾蠡縣。是賊蹤仍趨

北路。現在該逆究逸何處。祁州之賊是否盡趨蠡縣。著官文查明現在賊情。隨時具奏。以慰廑繫。左宗棠當仍遵前旨。迅駐井獲之閒。扼賊入晉之路。捻逆如有南竄消息。著李鶴年檄飭各營會同英翰所部迎頭截擊。以圖聚殲。捻逆逼近畿疆。丁寶楨英翰等深明大義。迅統援師北上。各路追剿之軍亦俱雲集。若不乘此激勵將弁。一鼓擒渠。致賊分竄他處。則匪勢既多蔓延。攻剿之師亦不能如此

厚集。且此時冰雪凝沍。野無青草。賊無所掠。其勢易窮。著官文會商各該督撫合力同心。迅籌滅賊。以副委任。將此由六百里諭知官文。左宗棠英翰李鶴年。並傳諭吳坤修知之。○又諭英翰奏皖軍遠征。餉需萬分支絀。請飭福建等省迅籌專款協濟等語。英翰現在派兵赴直援應。餉項日增。該省入款不敷。若不豫籌協濟。征軍遠行。何以收士飽馬騰之效。著英桂馬新貽下實第劉坤一。於福建浙

江江西。自本年正月為始。按月各籌撥銀一萬兩。為專濟皖軍之用。並由各該省先行籌解三箇月銀各三萬兩。即由英翰吳坤修派員分往各省催提。俾得源源接濟。以應要需。此項軍餉。俟北路軍事告竣。皖軍凱撤。即行停止。將此由五百里諭知英桂馬新貽英翰卞寶第劉坤一。並傳諭吳坤修知之。以馬蘭鎮官山疏防盜伐木植。摘署都司李瑛頂帶。予直隸祁州殉難知州胡源祭葬世職。

加等。癸酉。諭內閣。崇實甄別不職各員。請分別革職降補等語。四川梁山縣知縣艾鉞。聲名惡劣。且於署內家丁。毫無約束。中江縣知縣李步瀛。操守不謹。辦事乖張。什邡縣知縣傅華桂。才具平庸。處事糊塗。候補知縣徐廷芳。身家不清。前在署任時。不洽輿情。以上四員。均著一併革職。射洪縣知縣曹勵成。賦性疲緩。難膺民社。著以教職降補。諭軍機大臣等。昨因援兵四集。機不可失。諭令官

文會商各督撫等。迅籌滅賊之策。現聞饒陽失守。各軍觀望不前。意圖驅賊出境。不使犯及北路。雖為慎重京畿起見。而頓兵不進。任賊肆擾。上年畿南水旱疊乘。飢民眾多。儻被裹脅。則賊勢愈張。勦辦更形棘手。況賊匪出境後。難保其不再回竄。是時追勦各軍。必至又落賊後。現在北路已有玉亮各軍。分段嚴防。並令恩承總統其事。此外又有托雲定安鄭魁士諸軍。分紮通州盧溝橋等處。各專責

守。恩承定安鄭魁士著即督率各軍。妥為防範。左宗棠駐紮井獲之交。李鶴年駐紮磁州。丁寶楨程文炳兩軍。專為東北兩面屏蔽。儻遇大股逆匪衝突。著各該督撫嚴飭各軍。實力堵禦。不使一匪竄越。如止分股撲犯。即一面嚴防。一面痛加勦洗。毋使漏網。所有劉松山郭寶昌張曜宋慶陳國瑞等軍。前諭均歸官文調遣。即著該署督嚴飭各軍。專取犄角之勢。面面進攻。分為數隊。逐日更番迭戰。春

壽等馬隊於北面前進。專事包抄追逐。並責令余承恩等軍乘夜潛劫。使賊日無所掠。夜不得息。比數軍統領素稱果勇善戰。著該署督專責以攻勦之事。毋以防務牽掣。俾得盡力殺賊。卽有零股賊匪紛竄。自有各路防兵隨地勦滅。儻各該將官不能同心勦賊。卽著官文嚴參治罪。該署督務當申明賞罰。嚴覈功過。不可稍有偏向。使諸將允服。自能奮興鼓舞。共圖立功。該署督如一味因循。徒知驅

賊出境。是不以不能滅賊為恥。尚得為克盡厥職耶。李鴻章於勦擒情形。最為諳悉。現在行抵何處。卽著探明賊蹤。迎頭痛勦。其郭松林等軍。並著趲催前進。以厚兵力。前諭官文等如有擒獲張逆者。卽照拏獲任柱之案給賞。其願給官職者。卽加等優獎。著官文等再行出示曉諭軍民。使各奮勉。崇厚卽飭陳濟清。隨同東軍嚴防。並於天津等處妥為防堵。以壯聲勢。英翰卽著於河南北相機扼紮。以

杜逆賊回竄之路。毋稍疏虞。正在寄諭間。據官文馳奏。擒逆由蠡縣肅甯竄至饒陽。邊馬已及獻縣。程文炳兼程趕到。其大隊正抵獻縣。各等語。賊蹤原無定向。但任其所往。何日可以殄滅。且祁州饒陽先後失陷。何以並無官軍應援。任賊蹂躪。殊堪痛恨。現程文炳既抵獻縣。卽著官文飭令迎頭痛勦。並著丁寶楨派軍會擊。以勦為防。其劉松山等軍。卽由官文飭令由西北面緊躡賊後。合力殲除。北

路固宜嚴防。而各處大軍雲集。防勦自有專責。該署督不得以力顧北面為辭。任賊縱橫奔突。儻各軍觀望不前。聽賊遠颺。惟官文等是問。饒陽失陷。知縣劉嘉祥因公赴省。是否為賊所阻。其倉庫監獄暨同城文武下落。均著官文查明具奏。將此由六百里諭知官文。李鴻章。左宗棠。英翰。李鶴年。丁寶楨。崇厚。恩承。定安。並傳諭鄭魁士知之。又諭成祿奏官軍圍偏肅州。逆勢漸形解散。一摺。肅州在

城逆黨見官軍攻圍日緊乘夜潛逃經馬天祥等軍追至惠回堡地方殺賊不少城中踞逆因外來逆股勢多離散負隅抗守此次官軍圍偏肅城逃匪復經追殺逆勢漸衰成祿仍當檄飭王仁和等設法環攻迅圖規復肅州一城頓兵日久屢有旨令成祿將該城迅拔整隊出關該提督非以賊情窮蹙為辭即以圍偏日緊自解關外緊急情形置之不顧該提督豈復有天良耶前有旨令楊占鼇署

理甘肅提督著穆圖善卽飭該署提督趕緊馳赴肅州接辦西路軍務以便成祿剋期起程毋稍延緩成祿俟楊占鼇到時卽著統帶原部出關勦辦哈密等處賊匪毋庸辦理肅州軍務儻再藉詞遷延定將該提督從重治罪決不寬貸將此由五百里各諭令知之○又諭劉嶽昭奏滇省變亂廢弛情形派軍赴援平遠肅清白泥地苗匪投誠各摺片滇省羅次楚雄等城先後被陷賊勢披猖亟應力

籌勦辦著劉嶽昭抽調遵義等處防兵遴選得力將領統帶迅速赴滇相機進剿劉嶽昭將黔省軍事剋期料理完竣卽進駐曲靖通籌全局妥為布置該撫所陳用兵籌餉內患西征四端卽著振刷精神實心籌辦總期實事求是毋得徒託空言滇省日形糜爛亟須大員前往以資鎮撫著張凱嵩星速馳赴新任與劉嶽昭將地方軍務各事宜會商妥辦毋再遷延觀望致干罪戾劉嶽昭移師滇境

所有黔省勦匪機宜著曾璧光檄飭各軍妥為調度務將苗教各匪節節掃蕩以期次第廓清白泥地苗匪求撫是否可靠著劉嶽昭會商曾璧光督飭屬員詳察真偽妥為辦理毋為該逆所給將此由六百里各諭令知之○派工部左侍郎魁齡禮部左侍郎龐鍾璐知貢舉大學士賈楨因病請解職命以太子太保大學士致仕賞食全俸命予告大學士賈楨仍管外城練勇局事補鑄廣西

來賓縣知縣印信從護巡撫蘇鳳文請也○予甘肅肅州陣亡守備王得勝把總許文元祭葬世職加等○甲戌諭內閣本年輪應查閱湖北湖南雲南貴州四省營伍之期湖北卽派李瀚章湖南卽派劉崐雲南卽派張凱嵩貴州卽派曾璧光逐一查閱認真簡校如查有訓練不精軍實不齊卽將廢弛之將并據實叅奏該督撫等務當加意整頓毋得視為具文○諭軍機大臣等崇厚奏賊由肅甯

南竄撥籌合圍方略並籌撥洋米接濟兵食一摺賊匪邊馬竄及肅甯因陳濟清等統帶槍隊練軍由高陽任邱一帶進剿折向南奔已入武強之小範等境崇厚擬令陝軍由正定扼守滹沱上遊兼顧獲鹿入晉門戶晉軍扼守太行各山口直軍扼守滹沱下游屯兵深冀之間淮軍固守衡水景州挑濠扼紮東豫兩軍分守衛漳兩河為四面進攻之計惟直省地勢平行廣闊無險可扼各軍四處分

布相距太遠轉令賊騎得以伺隙狂竄且劉松山郭寶昌等軍業經由北面追賊而南張曜宋慶等軍已由滿城而東丁寶楨已由雄縣進紮任邱程文炳一軍昨據官文奏稱已抵獻縣正可與賊邊馬相遇由此西向進剿此時若再將諸軍紛紛更調轉延時日更慮賊匪得以乘隙肆竄裹脅日眾益覺滋蔓難圖著官文丁寶楨崇厚仍遵昨日諭旨飭令諸軍奮勇進剿務乘此援軍厚集之時迅速

勦擊但能連獲勝仗痛加懲創以後便可節節得手不難剋期殄滅潘鼎新善慶溫德勒克西等軍計期已可由德州一帶入直唐仁廉郭松林楊鼎勳並李鴻章所帶之周盛波等軍當亦陸續可到著官文李鴻章斟酌情形檄飭淮軍由景德二州橫向西出迎頭兜剿毋令賊匪回竄順廣大名並分撥淮軍遏截臨清迤北以防賊匪竄至臨清東昌等處濮范開長一帶久為匪藪毋任此股捻逆竄

往致多句結。勦辦更難得手。左宗棠仍遵前旨駐軍井獲之交。趙長齡派兵分防太行各山路隘口。遏賊竄晉之路。李鶴年嚴防磁州一帶。毋令賊蹤回竄。豫境英翰督率皖軍。嚴扼黃河南北兩岸。與李鶴年聯絡聲勢。互相截勦。天津所存之洋米。並起卸未收之洋米。均著崇厚先行撥運直境各處。接濟南軍食用。毋稍遲誤。將此由六百里各諭令知之。

以協辦大學士吏部尚書朱鳳標為翰林院掌院學士。並充國史館總裁官。戶部左侍郎毛昶熙為副總裁官。以戶部尚書羅惇衍充武英殿總裁官。命禮部尚書萬青藜教習庶吉士。以江蘇金壇縣捐輸軍餉永廣學額九名。以江西建昌府捐輸軍餉永廣學額一名。以湖北應城縣捐輸軍餉永廣學額二名。以亥諭軍機大臣等左宗棠奏行抵獲鹿相機進勦。丁寶楨奏勦賊獲勝各摺。捻逆竄陷饒陽。經丁寶楨派令王心安帶

隊進勦。收復縣城。鏖戰兩晝夜。將賊匪擊敗。該逆現向西南竄遁。丁寶楨由山東督軍北上。首先奮勇派兵擊賊。獲勝保衛近畿。深堪嘉尚。著即整頓師旅。相機追勦。毋稍鬆勁。直隸前敵各軍。如劉松山郭寶昌喜昌張曜宋慶程文炳等所部。均距賊蹤不遠。何以並未會合進攻。僅止王心安三千人孤軍深入。天津槍隊練軍與東軍同在一路。何以亦不會同前進。是否有推諉觀望情事。著官文崇厚

查明具奏。並著催令各軍乘勢迅速追勦。以期一鼓殄除。現在各路援軍雲集。深慮進止不齊。未能協力同心。共圖掃蕩。左宗棠現抵直境。所有前敵追勦各軍。均著歸該大臣總統。以一號令。賊騎飄忽靡定。現在追賊各軍。並著該大臣飭令各將領相機奮勦。不必往返請令。拘泥稽延。致誤事機。左宗棠未經接辦之先。所有勦賊事宜。仍著責成官文遵照。前日諭旨。責令劉松山郭寶昌喜昌張曜宋

慶春壽余承恩陳國瑞程文炳等專取犄角之勢面面進攻各分隊伍更番迭戰晝夜勦襲以免耽延時日至東北兩路仍責成官文丁寶楨崇厚調度各軍嚴行防勦東南兩路責成李鴻章嚴密堵禦其派出進勦馬步各隊入直境後亦歸左宗棠調遣以一事權西南一路責成李鶴年於直豫交界處所實力扼截英翰督率所部仍在河南北擇要駐紮與李鶴年聯絡聲勢以上各路防務專責成

各該督撫如賊由何路竄出卽惟何路官軍是問其前敵進勦各軍如有觀望遷延不遵調度者左宗棠亦當據實奏參毋得徇隱干咎各省官兵各有本省應領之餉儻偶缺乏著官文崇厚隨時接濟河南風門口為入山西垣曲要口據左宗棠奏防兵單薄如賊由河北回竄晉省難資得力著趙長齡另派得力將弁扼紮以固晉省門戶其吉州等處河防仍著陳湜在該處辦理左宗棠另片奏請

撥坐糧廳漕米轉運保定等語各路援軍前已令戶部撥銀二十萬兩交官文分辦軍需並令崇厚由天津撥解洋米分運直境各處接濟儻有不敷再由官文崇厚酌量奏請撥解倉場所存米石以濟軍食將此由六百里各諭令知之○又諭趙長齡奏查明捻逆搶渡入晉失事殉難各員分別辦理暨請將總兵知府等官懲辦各摺片捻匪竄入晉疆在事文武各員戰守均不得力該撫所奏與賊

接仗及失守收復各情是否確實署吉州知州余灃鄉甯縣知縣陳魯典史劉掄英有無聞警潛逃飾詞捏報之處著鄭敦謹確切查明從嚴參辦至參將趙融知府陳膺福所帶勇丁既有搶奪財物陵辱婦女等事經趙長齡飭查何以陳膺福不將滋事之勇按名交出是其庇縱勇丁已可概見著鄭敦謹卽將趙融陳膺福縱容勇丁確情查明據實奏參仍飭陳膺福將滋事之勇交出照例懲辦已

革總兵陳必友帶隊能否得力。並於賊匪搶渡時。有無貽誤重情。著一併查參。原摺片均著鈔給閱看。鄭敦謹計期早已行抵晉省。何以久無奏報。殊堪詫異。著即將該省布置防務情形。及諭令交查各件。迅速查明據實具奏。毋稍徇隱。將此諭令知之。○湖南巡撫劉崐奏遵查前任陝甘總督楊岳斌回籍就醫。怔忡咯血等證。時或舉發。尚未全痊。報聞。○命欽差大臣左宗棠總統直隸各路官軍。○

改派太常寺少卿王映斗稽察盧溝橋煮販事宜。○以山西蒲州協副將王巨孝為大原鎮總兵官。○以浙江台州勦辦土匪出力。賞同知吳琮守備畢生太等花翎千總羅懋勳等藍翎知府劉墩等加銜升敘開復有差。○以直隸饒陽勦賊獲勝。賞還已革總兵官王心安頂翎。予陣亡參將金成德守備劉家興祭葬世職加等。○以防勦不力。革山西總兵官陳必友職。仍帶隊效力。予吉州等處陣亡

殉難副將舒再元等十五員祭葬世職加等。修湖北安陸等府屬隄工。從署總督李瀚章請也。○丙子諭軍機大臣等。官文奏勦賊獲勝。並賊蹤南竄情形。李鶴年奏遵查宋慶張曜兩軍遲誤各情。並請飭豫軍不可分勦。及擬紮安陽調度各摺片。東軍勦擒獲勝情形。昨據丁寶楨具奏。已明降諭旨宣示。此次擒逆在直。任意肆擾。劉松山等軍。既未能大有懲創。而陳國瑞宋慶張曜尤未能奮力痛

勦。殊負期望。現在賊竄武強邊馬已及衡水。北路布置嚴密。不慮該逆回竄。著官文懷遵疊次諭旨。嚴飭各將。痛加追勦。不得再行觀望。致干重咎。賊蹤南趨。左宗棠正可督兵迎擊。該大臣以減賊自誓。諒不肯稍涉延緩。著即相機前進。指示各軍。同心協勦。迅圖殄滅。李鶴年前已摘頂示懲。所請治罪之處。著無庸置議。宋慶張曜兩軍。兵力未厚。可合而不可分。亦係實情。現在該總兵等仍合在一處。

進剿。惟未能奮勉。追擊著左宗棠隨時訓飭。俾知儆惕。李鶴年因磁州非用兵之地。擬改紮安陽。卽著該撫相度辦理。所有直豫交界處所。卽責成李鶴年。嚴為防堵。一面知照英翰。合兵堵剿。丁寶楨著仍遵前旨。力顧東北兩面。並嚴防該逆竄入東省。致令追軍盡落賊後。是為至要。本日據侍郎毛昶熙奏。直隸民鮮蓋藏。軍食仍絀。若四五月以前。不克掃蕩。則耕獲失時。民困思亂。師老不振。請飭各

軍迅籌剿擊等語。所慮不為無見。著左宗棠官文中。明賞罰。用作士氣。無待朝廷之日夕訓誨也。將此由六百里各諭令知之。○又諭。麒麟奏。朝陽現無成股匪徒。請酌撤征兵一摺。逸匪彌勒。僧格白凌阿等。稔惡已久。豈可任其遠逸。遽圖了事。該犯等竄入土默特旗內。沙巴爾土營子地方。經麒麟飭該營總全亮等帶兵往捕。未獲。追至梅勒板營子地方。該處與奉省交界。尤易藏奸。彌勒僧格白凌

阿等。一日未獲。則餘匪句結。難保不復釀亂。萌重煩兵力。所有前項旗兵。及八溝營參將所帶弁兵。均毋庸撤回。卽著麒麟責令全亮等會同都興阿。派出員弁。協力嚴拏。以期必獲。都興阿亦當飭屬認真防緝。毋任此等彼竄。前有旨令理藩院傳知卓索圖昭烏達各盟協同擒捕。此次該犯等竄入土默特貝勒旗境內。雖拒捕潛逃。蹤跡諒不甚遠。著理藩院卽飭各該旗跟蹤兜拏。不准互相觀望。致

令遠颺。麒麟另片奏。將練目解審等語。陳安一犯。卽著遴員解交都興阿。歸案嚴行審訊。毋許疏脫。麒麟原摺。著鈔給理藩院。都興阿閱看。將此諭知理藩院。並諭令都興阿。麒麟知之。○賞降調副都統成惠五品頂帶。交管理火器營王大臣差委。○以江南清水潭隄工堵築穩固。予同知江綬麟等加銜升敘。開復有差。○予直隸饒陽陣亡副將郭運連祭葬。世職加等。○丁丑。諭軍機大臣等。富明阿

等奏訪拏鄰境巨盜首從各犯請旨辦理一摺逸匪白凌阿及夥匪焦西平卽焦振東逃至吉林之弓棚子地方經佐領杜隆阿派兵拏獲該犯等罪惡貫盈自應立予駢誅以昭炯戒白凌阿一犯屢經官兵拏獲乘閒脫逃其真偽殊難辨別茲據該將軍等所奏各情諒必審訊明確儻此次所獲非真將來別經發覺必惟富明阿是問現已白凌阿雖已就獲其同夥匪犯藏匿於吉林各邊者尚復不

少仍著富明阿督飭緝匪員弁協同熱河等處所派各員隨時搜捕以期淨絕根株毋稍疏懈將此諭令知之○以拏獲鄰境盜匪予吉林佐領杜隆阿以協領用○戊寅孝儀純皇后忌辰遣官祭

裕陵○諭軍機大臣等官文奏擒逆乘閒北竄官軍繞截情形崇厚奏賊匪覬覦天津調兵回防各一摺賊股在饒陽被官軍擊敗遁至安平復由安平折向祁定北趨竄至省南三

五十里地方現在劉松山郭寶昌喜昌並張曜宋慶等軍均在北面扼紮程文炳軍行近省城潘鼎新軍已到獻縣左宗棠相距較遠官文職任封圻責無旁貸所有現到各軍仍著官文嚴飭將弁速行會合夾剿務期痛挫兇鋒以副委任春壽所統馬隊並由易州調赴前敵之黑龍江馬隊及余承恩陳國瑞等所帶馬步各隊均在保定官文當乘此兵力厚集督令出剿北路固有玉亮恩承等軍加

意嚴防而匪勢如果北竄亦可令春壽等迎頭扼截該署督諒不至擁兵自衛坐失事機其東北一路卽著丁寶楨督率東軍速向西面前進會合保定諸軍力殄狂氛並著兼顧北路毋令賊蹤乘隙北竄賊股旣已南竄武強衡水何以倏又北折擾及保定是否係另股北趨牽掣北路官軍而大股另圖南竄抑係全股均行北犯著官文查明具奏並著官文丁寶楨確探賊情相機會剿轉瞬春融凍

釋閭閻亟當乘時播種。若不將賊匪迅速殄除。則民食維艱。益致流離失所。畿疆重地尤屬可虞。該署督等諒早見及。左宗棠既由獲鹿前進。務當視賊所向。迎頭截擊。以顧西南一路。賊匪既有竄撲天津之意。崇厚當妥籌布置。實力嚴防。所有前經調出之槍隊練軍。卽著崇厚飭令陳濟清統帶。回紮靜海一帶。力顧東南。將此由六百里各諭令知之。○補鑄阿勒楚喀右司協領關防。從吉林將軍富

明阿請也。○予江蘇故工部尚書張祥河入祀鄉賢祠。從署巡撫郭柏蔭請也。○旌表守正捐軀安徽懷甯縣候補典史盧樹滋妻殷氏。

大清穆宗繼天開運受中居正保大定功聖智誠孝信敏恭寬毅皇帝實錄卷之二百二十三

大清穆宗繼天開運受中居正保大定功聖智
誠孝信敏恭寬毅皇帝實錄卷之二百二十四

敘修

同治七年戊辰二月己卯朔

上詣綏履殿問

慈安皇太后安平安室問

慈禧皇太后安至戊申皆如之 諭內閣給事

中志文奏南新倉米色不齊請飭查明辦理
一摺南新倉應放鑲黃旗甲米經該旗都統
查驗米色不堪支領業經行知戶部改割別
倉開放並據該給事中聲稱逐廠按冊查看
數目亦有不敷著倉場侍郎查該倉米色是
否有攙和情弊及存廠米數有無虧短一併

奏明辦理毋稍含混○又諭給事中謝膺禧
奏盤查富新倉虧短數目一摺並另片奏請
先行修理廠口等語該倉以放代盤稷秬等
米業經放竣粟麥報有存數共計虧缺稷秬
粟麥竟至二萬五千三百八十餘石之多實
屬不成事體該花戶書攢人等有無舞弊著
刑部訊明虧短情由覈擬具奏該倉監督應
得處分著於定案時分別定擬虧短米數應
如何著落賠補著戶部酌覈辦理各倉失修

廠座亟應隨時修整著倉場侍郎按照該給
事中所請認真修理遇有挑晾由監督報明
具限歸廠不准分存多日倉場侍郎稽察御
史及本倉監督均遵例分別封貼以昭慎重
○諭軍機大臣等官文奏賊匪屢圖北竄現
籌布置情形並官軍馳抵張登鎮各摺片賊
匪意在北趨雖被官軍進逼展轉奔竄仍復
伺隙北擾官文意在攔截北面俟南路諸軍
齊到再圖圍剿聚殲惟現到各路官軍已不

為少。若再不乘勢痛勦。力挫兇鋒。將來賊眾裹脅愈多。且難保不聲東擊西。伺隙他竄。潘鼎新程文炳兩軍甫經趕到。著即在北面穩紮。以固京畿門戶。藉可暫事休息。其餘張曜宋慶劉松山郭寶昌喜昌等軍。均著官文催令分路進攻。務須由北向南。節節壓勦。以期痛殲醜類。潘鼎新程文炳兩軍俟休息稍定後。再行陸續相機進擊。不可徒事株守。賊匪現向東南張登竄逸。著官文嚴飭派出追軍。

速行痛勦。丁寶楨當由東北兩面穩慎進取。會合夾攻。以勦為防。楊飛熊一軍前據丁寶楨奏稱調赴河間。著即飭令扼要駐紮。以杜賊竄天津之路。山東所調吉林黑龍江丹丁前據該撫奏稱二月初旬可期練熟。馬匹亦可調養臙壯。著即調赴直隸進勦。以資厚集。左宗棠著由西南一路趕緊進攻。以期兜裹嚴密。賊匪北竄不遂。勢必東趨天津。崇厚當嚴行布置。以備防勦。毋稍疏虞。前經諭令陳

國瑞會合張曜等軍勦賊。茲據官文奏該侍衛已有新募勇隊。自係兵數不敷。著即飭令招募勇丁二三千名。務須精壯可靠。毋以冒濫充數。並著官文妥為駕馭。以收其用。將此由六百里各諭令知之。○守護

西陵鎮國公奕梁等奏神機營馬隊現經恩承調赴涿州。得旨昨據官文奏賊由饒陽回竄。祁定易州距賊雖遠。奕梁仍當勤加偵探。嚴密防範。隨時知照恩承相機辦理。毋稍大意。

○江西巡撫劉坤一奏請將故巡撫張芾江忠源提督江忠義各專祠暨新建昭忠節孝貞烈等祠列入祀典。允之。○追予江西各屬陣亡殉難從九品黃傳榮等紳民婦女一千四百四十八員名口分別旌卹如例。○予江西因公淹歿外委譙勝發祭葬卹廕加等。○庚辰諭軍機大臣等李鴻章奏官軍先後赴直情形。並擬偪賊入豫兜勦各摺片。潘鼎新等軍昨據官文奏稱距張登鎮不遠。諭令在

北路扼紮以資休息李鴻章所稱該藩司等徑趨饒陽自係在官文奏報以前之事該司等跋涉遠來誠不宜輕於浪戰著仍遵前諭暫在北路堵扼以杜捻蹤北竄李鴻章現由東阿渡黃卽著相機前進周盛波各軍並著催提北上以厚兵力李鴻章抵直後卽可在東南一面擇要扼紮如兵力有餘並著分撥數軍馳赴東北會合丁寶楨崇厚各軍向西南壓擊現在丁寶楨駐紮任邱一帶卽著和衷商酌妥為布置當此事機孔亟宵旰焦勞該督撫等俱朝廷所委任當思師克在和之義協力同心迅籌滅賊儻因意見參商致誤事機其何顏以對軍民耶李鴻章因直隸地勢平行擬感之於懷衛設法圍制固屬因地制宜惟現聞該逆由祁州竄至安州復至高陽肆擾勢仍北趨似未知畏威南竄若不痛加擊勦恐裹脅日多必至盤踞近畿劉松山等軍著官文仍遵前旨飭令由北面壓勦而

南若得一二勝仗則軍威大振足懾逆膽儻日久遷延師老餉缺愈形棘手其郭松林楊鼎勳等軍應否飭令徑趨東昌大名一帶著李鴻章相機調派所有淮軍糧草著官文嚴飭各屬妥為備辦毋使缺乏左宗棠行抵何處著卽相機前進妥為調度並著與李鴻章隨時籌商方略共奏膚公天津為富庶之區地廣人眾逆匪垂涎實在意中著崇厚懷遵前諭妥為防勦並著與丁寶楨各軍聯絡聲

勢隨時扼截毋使闖入是為至要神機營奏陳國瑞募勇成隊酌給餉銀三萬兩以供支放著官文傳諭該侍衛祇領後搏節動用此係格外體恤該侍衛當奮勉勤賊以圖報稱不得徒託空言神機營餉項豈能時時撥給嗣後如有缺乏著官文隨時支發毋稍貽誤本日據侍郎畢道遠奏陳國瑞勦賊奮勇堪派左宗棠翼長等語陳國瑞本係交左宗棠差遣其可否派充翼長著左宗棠察看儻因

該侍衛性情與充當翼長不甚相宜。或另派妥員。或不必派員之處。均著該大臣酌覈辦理。將此由六百里各諭令知之。○又諭沈葆楨奏報造船開工日期。並陳明船廠情形。一摺。據稱開造輪船鐵廠。關繫最重。上年十二月間。船臺造成一座。所運鐵器木料。亦已附舶而來。當親率在事官紳工匠。前赴船塢開工。相機酌辦。惟需石需木需土需匠。四者頗難。所奏均中窾要。輪船一事。所難在於經始。

現在鳩庀已有可觀。尤當矢以實心實力。期於必成。卽著沈葆楨督飭周開錫等。及日意格各員。盡心經理。毋以畏難自阻。庶日新月異。共觀厥成。其巡察布置一切。均著照該前撫所議辦理。沈葆楨以本地紳士。督辦船政。事非易為。英桂馬新貽李福泰。下寶第務當遇事籌商。並將經費隨時撥給。俾得一無牽掣。充歲要工。將此由四百里各諭令知之。○又諭曾壁光奏籌辦獨山荔波軍務情形。請

在重慶設立捐局。並請調馬宗駿等員各摺。片。荔波獨山逆匪。恃取負隅。曾壁光以餉絀兵單。未能迅圖大舉。惟該州縣係黔粵往來孔道。且距省甚近。匪徒蹂躪已久。若不力籌進剿。勢將益肆蔓延。著曾壁光檄飭黃清源李泉源等軍。就現有兵力。設法進規。相機布置。黔省餉需。萬分缺乏。曾壁光擬援照湖南貴州現在辦捐章程。在川勸捐。著卽照該署撫所請。在重慶府城設立四川協黔新捐總

局。由曾壁光派員前往勸辦。並著崇實飭令川東道暨各地方官。協同經理。所收捐款。仍由曾壁光咨明四川總督。儘數劃抵川省積欠黔餉。以裕軍儲。四川副將馬宗駿湖南沅州協都司田國珍。據曾壁光奏稱均屬熟習軍事。著崇實劉崐飭令各該員迅速赴黔。交曾壁光差遣委用。其黃清源李泉源滕代榮三員。並准曾壁光留於黔省。以資差委。將此由五百里各諭令知之。○以福建開辦船廠

出力賞洋將日意格等花翎職銜有差○辛巳遣官祭

文昌帝君廟○諭軍機大臣等張之萬奏派兵入直助剿一摺張之萬以直省軍務緊要擬挑選步勇三四千名馬勇兩營派令姚廣武張從龍王文行王得勝督帶赴直協剿覽奏具見惻忱前有旨諭令英翰督率皖軍嚴扼黃河南北兩岸與李鶴年聯絡聲勢互相截剿此次張之萬所派馬步各軍卽著飭令

前赴豫省歸英翰節制調遣該軍到豫後應如何擇要扼紮之處並著英翰與李鶴年妥籌布置豫省旣添此軍防剿兵力較厚如賊蹤竄近西南著左宗棠會商李鶴年英翰相機調度賊匪現仍北趨祁定高陽一帶朝廷甚深廛繫左宗棠當懷遵疊次諭旨星馳前進迅掃逆氛以副委任王可陞所部四營卽著張之萬檄飭駐紮清淮一帶以資彈壓將此由六百里各諭令知之○又諭穆圖善奏

官軍攻克渭源現籌進剿狄道河州一摺甘肅渭源縣久經回匪竄踞穆圖善派知府舒之翰會同提督王得勝傅先宗等由鞏昌進剿直薄城下合力衝殺斃匪甚多賊向官堡奔竄當將縣城收復勦辦尚為得手惟官堡為狄道咽喉該逆大股尚踞其中亟應乘勝攻克以便節節進兵著穆圖善迅飭各軍立將官堡賊巢掃蕩以次進規狄道河州該署督卽相機出省督剿迅殄逆氛將此由六百

里諭令知之○以克復甘肅渭源縣城復已革總兵官高月桂副將周潮旺魏紹珍江成萬參將田大勝職○壬午諭軍機大臣等丁寶楨奏擒逆折竄西北分路扼剿挑派吉林等西丹馬隊赴直崇厚奏賊氛北徇會兵力遏請飭撥兵嚴防東北並接濟前敵米糧軍火等項各摺片逆騎由深祁高陽竄擾任邱河間非北向雄固卽東撲天津任邱河間一帶為扼要通衢楊飛熊一軍雖經趕到駐紮

任邱而陳濟清一軍又將回顧津郡該處兵力尚單難資堵截著官文於潘鼎新程文炳兩軍內速撥得力之軍兼程馳赴雄縣任邱大城一帶均勻分布與丁寶楨所部東軍聯絡聲勢嚴行扼截毋任賊蹤竄向東北潘鼎新程文炳等軍到後兵力較厚設津郡緊急陳濟清等各隊亦可隨時兼顧並著官文調派保定諸軍由西路節節進剿兼顧北面賊匪肆行無忌非痛加殲戮不足以挫兇鋒而

寒逆膽官文當相機進擊不可徒事株守李鴻章派援各軍其未抵直境者著迅速迎提北上或替程文炳潘鼎新等軍扼紮保定或即赴東北各路屏蔽近畿及津郡一帶著官文酌覈辦理總期各該軍取道便捷不至往返紆折為要左宗棠當速催前敵各軍進剿毋稍延緩其應駐紮何處以便呼應較靈著隨時酌度辦理天津地方富庶逆匪垂涎已久崇厚現於該處水陸設防著即嚴密布置

並著設法聯絡鄉團鼓舞人心以資堵禦左宗棠前敵各營應用米糧軍火等項崇厚當隨時撥解轉運丁寶楨所挑之吉林黑龍江丹丁一千五百名著於行抵該撫行營時認真察看飭赴春壽行營會合步隊迅速進剿一切口糧仍由丁寶楨籌給並著官文隨時接濟餉項軍火以備缺乏月餉著照所請全行發給其各丹丁家屬養贍銀兩仍著隨時另行籌解以示體恤其餘丹丁馬匹仍著丁

寶楨飭令認真訓練調養以備調派將此由六百里各諭令知之○又諭鄭敦謹奏請飭查沿途驛遞一摺前次遺失摺件所奉諭旨已由官文咨照軍機處補鈔寄去本日已明降諭旨令鄭敦謹署理山西巡撫矣前令該署撫馳赴山西查辦事件何以此次摺內並未提及著將應查各件迅速查明據實具奏一面將晉省防務妥籌布置左宗棠現已由獲鹿東進趙長齡亦經開缺固關一帶防堵

正緊著鄭敦謹迅速出省接辦以重邊防西
河水橋雖已漸釋而陝省延綏一帶回逆處
處滋擾毋稍疏虞閭敬銘前有旨令赴省城
會籌防務曾否到省患病是否痊愈並著該
署撫查明具奏將此由四百里諭令知之○
又諭庫克吉泰等奏陝軍勦賊獲勝情形派
員馳往汧寶勦賊請調蜀軍助勦各摺片米
脂邠州宜川洛川等處羣匪麇集經陝軍分
路勦擊屢獲勝仗惟回逆股數太多雖疊有

斬擒究未大受懲創著庫克吉泰劉典督飭
各軍嚴密堵勦遇賊卽擊以期盡殲醜類寶
雞縣城被匪闖入復由寶雞竄至汧陽該將
軍等已派劉效忠張岳齡會同喻步蓮前往
勦辦著卽飭令該員等馳赴汧寶之間會合
進兵實力勦洗陝省軍務緊要現在兵力不
敷勦辦周達武一軍向稱得力著崇實迅飭
該提督統帶所部進駐隴汧之間與陝軍聯
絡進攻以期迅殄逆氛褒沔一帶該署督另

派妥員前往接替以固蜀省門戶劉典另片
奏稱蔣益澧熟悉軍情請飭迅速來陝等語
本日已諭令瑞麟飭令蔣益澧趕緊馳赴陝
西軍營並著左宗棠咨催赴陝以資得力將
此由六百里各諭令知之○又諭前有旨令
蔣益澧以按察使候補發往左宗棠軍營差
遣本日據劉典奏稱現在陝甘軍務難期速
竣左宗棠督軍入直回陝尚需時日蔣益澧
熟悉軍情請飭迅速來陝各等語陝省軍事

方殷需才孔亟著瑞麟仍遵前旨飭令該員
趕緊交卸剋日起程馳赴陝西軍營毋稍延
緩將此由五百里諭令知之○山西巡撫趙
長齡開缺聽候查辦以都察院左都御史鄭
敦謹署山西巡撫○陝西巡撫喬松年因病
解職以幫辦軍務三品卿銜劉典署陝西巡
撫○以陝西香花臺勦賊獲勝復已革提督
譚玉龍職並賞還花翎○蠲緩廣東連平長
樂和平河源高明五州縣被擾地方同治四

年額賦有差○癸未諭內閣前派恭親王會同神機營王大臣辦理巡防事宜現在直隸軍務緊要所有各路統兵大臣暨各督撫均著歸該親王等節制○諭軍機大臣等據軍機大臣代奏前任戶部侍郎李鴻藻奏請派親王為大將軍左宗棠李鴻章為參贊督辦直隸軍務一摺現在各路統兵大臣並各省督撫帶兵入直勦辦擒匪雖經派令左宗棠總統前敵各軍仍恐各大臣等意見紛歧事

權未能歸一以致呼應不靈本日已明降諭旨令各路統兵大臣並各該督撫等均歸恭親王等節制矣各該大臣督撫等於賊勢軍情俱當隨時具報神機營覈辦惟軍情變幻靡常一切進止機宜仍應責成各該大臣等隨時相度辦理不得專候神機營指示俾免稽遲貽誤左宗棠李鴻章均係欽差大臣現歸恭親王等節制自可一事權而免紛歧所請欽派大將軍參贊等名目均毋庸議各該

大臣督撫等身在行間親臨前敵務須合力同心迅圖攻勦肅清畿甸儻有推諉觀望株守不前致誤戎機者卽由恭親王等隨時奏其所請申明軍律約束兵勇等事卽著恭親王等劄飭該大臣等遵照辦理將此由六百里各諭令知之○又諭左宗棠奏總統各軍籌勦擒逆一摺所陳三路進兵並令各軍互相知會聯絡聲勢為步步進逼之計布置頗合機宜惟賊勢現由祁定高陽分擾任邱

河間意在東撲天津昨已諭令官文於潘鼎新程文炳兩軍內揀派得力之軍馳赴雄縣任邱大城等處分紮扼截東北矣丁寶楨現駐河間楊飛熊陳濟清等分紮鄭州任邱其河間以南阜城景德等處尚覺空虛賊騎避兵繞竄蹈隙乘虛是其慣技左宗棠現駐正定距前敵較遠應行移紮何處並如何調撥各軍扼截或分路進兜以勦為防杜賊竄津並紛竄東北之處均著該大臣懍遵昨日諭

旨相度機宜酌量辦理將此由六百里諭令知之○又諭庫克吉泰等奏逆回竄近省城籌辦情形一摺回逆由寶雞汧陽等處避兵突竄咸陽郿縣並分股渡渭竄近省垣經庫克吉泰喬松年劉典飭令各將弁分投擊退惟賊匪紛竄肆擾我軍備多力分仍著該將軍等督飭在事各員時加防範遇賊卽擊省城重地關繫緊要經喬松年調回張岳齡一軍回顧省城劉典亦飛調楚軍五營回省著

卽嚴飭各率所部視賊所在盡力勦辦兼顧省垣毋稍疏失省中回民甚多尤須加意撫輯認真防範毋任勾結為患劉典現駐耀州未能移動喬松年雖已開缺仍須將省防事宜妥慎籌辦以期周密喬松年另片奏請令庫克吉泰回省等語省城防兵較單著該將軍統帶所部卽行回省與喬松年商辦城防俟防務較鬆仍著相機出省督勦喬松年密片一件著留中將此由六百里各諭令知之

○改鑄布倫托海辦事大臣印兼用托忒篆文從烏里雅蘇台將軍麟興請也○予陝西寶雞殉難知縣崔銓塗祭葬世職加等眷屬人等旌卹如例○予陝西靖邊等處陣亡殉難官紳外委高文英暨婦女張李氏等分別旌卹如例○甲申遣官祭

先醫之神○諭軍機大臣等前據彭祖賢奏請截留漕米以濟軍糧諭令戶部速議具奏茲據奏稱海運新漕須三四月之交方能抵

津專恃截漕助餉尚恐緩不濟急且官軍追賊所向靡定漕糧抵津之日是否仍須截留亦難豫擬請飭直隸總督屆時酌量等語卽照該部所議著官文於漕船抵津後酌量彼時軍務情形如果需用漕糧接濟兵糧卽行奏明辦理至現時籌撥兵糧前據崇厚奏稱華洋各商販運津糧米共有十七萬餘石是天津米販尚多果能認真採買自不難集有成數著官文會同崇厚酌量辦理其採買款

項並著官文崇厚於前次撥給直隸餉銀二十萬兩內會商提用仍一面將籌辦情形具奏現在大兵雲集各該地方力籌供應炭炭不可終日若再日久無功不但採買為難並恐撥運新漕亦多窒礙大局何堪設想著官文會商左宗棠等激勵將弁同心協力迅掃賊氛以副委任將此由五百里各諭令知之○又諭前據成祿奏軍餉萬難敷衍請在新疆協餉下分撥數萬兩當交戶部速議茲據

奏稱新疆餉項支絀未便再行分撥請仍飭四川等省撥解等語四川原撥成祿餉銀十七萬兩前諭先行湊撥十萬兩仍著崇實吳棠懍遵前旨無論何款趕緊撥解毋再延誤其另撥四川月協餉銀一萬數千兩陝西湖北月協餉銀各數千兩著崇實吳棠李瀚章郭柏蔭劉典何璟按月協撥源源接濟毋稍膜視將此由五百里諭知崇實吳棠李瀚章郭柏蔭劉典並傳諭何璟知之○又諭文麟

奏安玉一帶喫緊請暫駐防勒並擊賊獲勝情形一摺肅州逆匪由南山邊繞至安西三道溝一帶經文麟督軍迎勒該逆敗向東竄官軍追至赤金堡沙岡墩等處斬獲甚多所有此次出力弁勇著暫行存記俟文麟抵哈密後續有勝仗再行彙案請獎玉門東接肅州安西敦煌又係進兵後路固應設法嚴防惟哈密回蹤麇聚豈可顧此一隅使之望援念絕著文麟懍遵疊次諭旨統帶所部趕緊

赴任不得藉詞觀望其安玉各路應如何撥兵兼顧之處並著相機辦理景廉現在行抵何處即著該大臣迅速咨催前進毋任逗遛前有旨令穆圖善嚴飭楊占鼐迅赴肅州接辦西路軍務以便成祿剋期出關楊占鼐此時如未起程著穆圖善催令星馳前往安籌勒辦藉顧出關諸軍後路不准再涉遷延成祿俟楊占鼐到後即遵前諭統率原部迅赴哈城會同文麟等實力勒賊如仍前玩愒致

誤戎機該提督能當此重咎耶將此由六百
里各諭令知之○又諭文麟奏軍營需餉緊
要現由烏城解到之項為數無多亟須源源
接濟請飭山西巡撫設法撥解並請飭麟興
等趕撥軍火餉銀等語著鄭敦謹迅將文麟
軍營月餉陸續籌撥轉解並著麟興李雲麟
於解到新疆餉銀及所調軍火等物內先就
所急隨時撥發交文麟所派委員領解以濟
要需將此由五百里各諭令知之○乙酉

孝淑睿皇后忌辰遣官祭

昌陵○諭軍機大臣等恭親王等奏請飭各軍
勦擒以專責成並請將陳國瑞歸神機營調
遣官文奏擒由高陽向東南奔竄各軍追勦
情形各摺片此次令各路統兵大臣及該督
撫等俱歸恭親王等節制原冀事權畫一和
衷共濟而追勦堵扼仍應責之各路統兵大
臣督撫分段勦辦方能迅速歲事自易州及
近京一帶已有神機營精兵防衛當可無虞

侵軼所有保定西北兩面及屏蔽易州一帶
著官文左宗棠分飭所部相機扼防保定東
北兩面並天津迤南及界連山東地方並大
名以北著李鴻章崇厚丁寶楨分飭兵勇扼
要堵勦儻東北面兵力尚單並著李鴻章添
派隊伍於河間迤北一帶嚴防其直豫交界
之彰衛等處即著李鶴年英翰會同扼守該
大臣等將應防地段界址各自認定互相聯
絡以期局勢緊湊左宗棠李鴻章久歷戎行

所部尤為精銳並著抽撥馬步勁旅相機兜
勦所有到直之劉松山等軍及善慶溫德勒
克西春壽馬隊並山東所撥東三省西丹著
該督撫等妥為籌商派赴前敵以利追勦所
有一切進止機宜著該大臣等隨時酌度辦
理不為遙制儻有推諉觀望各情即著恭親
王等隨時察度指名嚴叅該大臣等為國家
所倚畀值此京畿孔亟正臣子力圖報效之
秋斷不可稍存意見致煩廛繫其所部兵勇

並著嚴飭管帶官認真約束不准稍涉滋擾侍衛陳國瑞卽作為神機營管隊官所需勇糧等項由神機營給發毋庸歸官文左宗棠調遣李鴻章現在行抵何處著卽迅速前進懍遵前諭相機扼紮所有軍情賊勢隨時具奏劉松山等軍並著官文嚴催追剿毋令逆蹤得以任意肆擾致滋蔓延將此由六百里各諭令知之○署河東河道總督蘇廷魁奏黃河凌汛安瀾並籌辦下南要工得旨著卽

督飭所屬實力趕辦以期一律平穩毋稍疏懈○

上以祭

社稷壇自是日始齋戒三日○丙戌諭軍機大臣等崇厚奏賊勢逼近津南請飭淮皖各軍進剿萬青藜王榕吉奏請飭撥官兵以固畿南各一摺崇厚所奏賊匪竄擾獻縣之淮鎮並青縣之杜林鎮距青滄等城甚近似賊股大勢又已趨近津南情形萬分喫緊該處地

廣兵單需兵甚急且各路軍火糧餉均藉津郡轉運接濟關繫非輕著左宗棠官文速派劉松山郭寶昌喜昌宋慶張曜各軍星夜兼程分道前進或由大城一路繞前迎擊或由獻縣一路躡蹤追剿務期趕緊剿辦不得專事株守任聽賊騎縱橫到處蹂躪現在河津一帶喫緊官文應先其所急速飭由安州進剿之程文炳一軍及春壽等所部馬隊一併馳赴任邱大城協合防剿丁寶楨駐軍河間

著卽分撥所部於大城任邱一帶扼要堵剿並與天津兵勇就近聯絡聲勢互相援應兼顧北路以固畿南門戶並著李鴻章懍遵前諭迅派得力大支勁旅數軍由德州河間等處兼程迎頭進剿毋得稍事遷延該大臣計期早應行抵直境卽著於天津河間一帶相機進紮迅籌滅賊之方崇厚當督飭鄧啟元陳濟清等軍在津南一帶奮力迎剿並著將津郡防務嚴密布置天津民情素稱奮勇並

著崇厚督飭該地方官聯絡紳團身先任事以資鼓舞左宗棠現已行抵定州著卽照該大臣前議督飭諸軍向南兜剿力挫兇鋒以贖前愆萬青藜等另片奏擬築黃村等處堡寨等語黃村為京南屏蔽該兼尹等現督官紳築立堡寨擬將南北兩面圍牆東至南苑西牆為止並將黃村紅門圈入寨內著照所擬趕緊辦理其餘各屬地方堡寨並著該兼尹等督飭各地方官速為興修以資守禦將

此諭知萬青藜王榕吉並由六百里各諭令知之○又諭左宗棠奏分別防勦機宜並請派練軍駐紮固關各摺片賊勢現由獻縣竄擾青縣涿州一路有神機營兵駐紮丁寶楨現駐河間卽可北顧固安一帶前據神機營王大臣奏擬令各路統兵大臣並各督撫分路防勦當經諭令左宗棠官文專顧西北現在賊勢趨重東南津郡喫緊兵力又單保定一帶情形稍鬆左宗棠日內計已到省卽著

與官文商度機宜並迅催各軍分路進攻或繞前迎擊或躡蹤追剿不可稍形鬆懈恭親王等距前敵較遠左宗棠當卽馳赴東南迅督各軍迎頭截剿痛殲逆氛一切進止機宜不必專候神機營指示以期迅速其西北一路防務卽著責成官文辦理固關一路空虛可慮著官文酌派得力直軍一千名交唐訓方統帶或另派統將帶赴該處防堵以杜賊匪回竄晉疆將此由六百里各諭令知之○

又諭趙長齡奏晉東防務緊要添兵堵禦一摺擒匪雖經束竄設被官軍截擊難保不遁而西趨晉省潞澤遼平四府州所屬沿邊各邑與豫直兩省毗連自當扼要設防以杜匪眾回竄左宗棠已由正定督師東向斷難兼顧西路之防鄭敦謹現署晉撫責無旁貸著卽查明沿邊各隘口遴派得力兵勇扼要設防並慎選地方文武使官與民相安庶可整頓鄉團以輔兵力之不足河曲巡檢司以上

冰橋尚未融消。陝西神木府谷匪蹤正熾。與山右保德等處。僅一河之隔。著卽飭令陳湜嚴督兵勇。實力防堵。不得稍有疏忽。大同沿邊一帶。當飛飭地方文武各員。嚴密籌防。毋稍大意。前次交查各件。著鄭敦謹切實查明。卽行覆奏。將此由五百里諭令知之。○以工部尚書單懋謙兼署都察院左副都御史。○以刑部右侍郎英元兼署工部右侍郎管錢法堂事。○丁亥祭

先師孔子遣大學士倭仁行禮。○諭軍機大臣等。劉崐奏援黔兵勇攻克荆竹圍賊巢。並整頓吏治。各摺片。荆竹圍賊匪踞險負隅。抗拒官軍。擾亂楚黔邊境。十餘載。經席寶田李元度等督帶楚軍進剿。將該匪老巢攻破。擒斬首逆蕭潰盛等。並將羅家巖賊巢一併攻克。匪黨殲除殆盡。勦辦甚為出力。河東轎頂山河西偏刀水等寨匪巢。卽著劉崐飭令席寶田等乘此聲威。迅速掃蕩。俾得肅清貴東。

黔省吏治廢弛日久。李元度駐紮河西。辦理善後。著曾璧光慎選樸實耐苦廉介不擾之守令前往任事。隨時稟商。李元度妥籌辦理。務期安輯閭閻。免致激生事變。其毗連湖南各縣地方官。卽著劉崐責成席寶田選舉賢員暫行任事。以期呼應較靈。劉崐原片著鈔給曾璧光閱看。將此由五百里各諭令知之。○以湖南官軍攻克貴州荆竹圍賊巢。賞記名布政使席寶田白玉翎管一支。白玉搬指

一箇大荷包一對。小荷包二箇。總兵官韓孝忠彭芝亮一品封典。副將黃元果蘇元春參將李其貴。巴圖魯名號。道員葉兆蘭等花翎。復已革按察使李元度職。並賞還花翎。餘加銜升敘有差。○戊子祭

大社

大稷遣恭親王奕訢恭代行禮。○諭軍機大臣等。官文奏陝豫各軍勦賊獲勝。逆蹤向西南奔竄。並崇厚奏請飭左宗棠等分路追剿。各

一摺此次陝豫各軍到直幾及一月疊經諭旨嚴催始能協力會剿小挫兇鋒現在賊向獻縣西南奔竄卽著左宗棠官文嚴飭各軍乘勝追剿儻能蹙之於滹沱左右較易得手如該逆越河而南並著傳諭程文炳潘鼎新兩軍節節進扼以爲劉松山等後繼左宗棠由定州進省與官文晤商後著卽出省迅飭諸將視賊所向盡力追剿毋稍稽遲該逆究竄何處並著官文詳細查明隨時具奏第逆

情詭譎恐其復折而東李鴻章仍當嚴扼東北面以防竄越丁寶楨崇厚亦應力籌堵扼不可稍涉鬆懈崇厚因丁寶楨兵力較單不如李鴻章之兵勇較厚朝廷早已洞悉前已諭令該大臣駐紮河間一帶以顧東北面復以津防緊要諭令於天津相機扼紮該大臣接奉寄諭後著卽懍遵前旨迅督所部兵勇兼程北上會合陝豫各軍向南壓剿並著將進止機宜隨時奏報以慰廑繫崇厚另片奏

請飭部撥餉銀以資接濟本日已諭知戶部撥銀十萬兩發交官文支用矣將此由六百里各諭令知之○又諭德勒克多爾濟奏馳抵歸綏飭查邊防情形並往包頭察看河防一摺據稱口外沿邊沿河防務均經布置惟回逆馬家拉拉等率領馬步萬餘竄陷甯條梁其榆林神木等處又有回匪竄擾並高家堡被圍該署將軍擬親往包頭一帶察看河防著卽悉心查勘會同桂成妥籌布置毋稍

疏虞甯條梁地方爲山陝通衢關繫緊要金順現已馳至該處卽著督率所部迅圖規復儻任該逆聚眾久踞肆意蔓延必惟該副都統是問該署將軍亦當嚴飭防邊將士實力堵扼榆林神木一帶接近山西現雖冰泮河開仍應加意防範並著與桂成檄飭各軍晝夜梭巡毋令匪蹤闌入以固邊防將此由五百里各諭令知之○又諭瑞麟奏遵旨裁撤湘軍辦理各情形一摺粵東營伍廢弛已非

一日現經瑞麟將湘軍裁撤。騰出鉅餉為本省練兵恤伍之需。不為無見。惟該省積匪最多。緝捕操防至關緊要。該督既擬挑選水陸各營加給口糧。按日教練。著即會商提督任星元、李揚陞等慎選營弁。實力整頓。總期一律精壯。俾兵歸實用。餉不虛糜。毋得徒託空言。一奏塞責。陝西軍事方殷。著蔣益澧即懷遵前旨。統帶所部親兵一千名。星速馳赴陝西軍營。毋稍延緩。將此由五百里諭知瑞麟。

並傳諭蔣益澧知之。○以江西大庾縣捐輸軍餉永廣學額十名。○以奉天馬步各軍節年緝捕出力。予頭等侍衛沙克都林扎布協領常在、德昌、集爾哈布。以副都統簡放。賞頭等侍衛色楞額等花翎。佐領德興等藍翎。餘口銜升敘有差。○以山東濮州等處拏獲逆首王來鳳等。予知州葛恩榮以直隸州知州。卽補。賞知縣王希孟藍翎。○予直隸獻縣陣亡參將周得勝守備黃得友等。祭葬。世職加

等。己丑。

孝康章皇后忌辰。遣官祭。

孝陵。○諭軍機大臣等。丁寶楨奏官軍勦擒獲勝情形一摺。此次劉松山等軍追勦捻逆。殺賊千餘。昨據官文具奏。已諭令迅速追勦。計此時保定一帶防兵如潘鼎新、余承恩等軍。為數不少。足敷堵扼。所有丁寶楨撥赴保定之東三省西丹一千五百名。卽著官文飭令春壽將原帶馬隊一併馳赴前敵。會同劉松

山等進勦。官文不得一意截留。致誤戎機。左宗棠計已行抵保定。該大臣諒必有滅此朝食之志。卽著出省。迅督前敵各軍設法兜勦。剋期奏功。丁寶楨著卽飭令莫組紳等軍跟蹤追勦。李鴻章行抵何處。久無奏報。朝廷殊深廑念。著卽兼程赴直。現在東北面尚屬空虛。抵直後卽遵前旨相機扼紮。酌量分兵進勦。毋再遷延貽誤。致干重咎。將此由六百里各諭令知之。○又諭德勒克多爾濟等奏。回

逆擾及草地蒙古官兵屢次接仗現籌防勦一摺據稱西路回匪竄陷甯條梁後復竄蒙古之依克沙巴爾等處蒙兵疊擊獲勝追至綽泰地方並乘夜往剗賊營賊仍退回甯條梁此股匪眾蓄意東趨雖經官兵擊敗難保不乘機竄越且地方遼闊尤恐防不勝防著德勒克多爾濟桂成仍遵前旨嚴飭扎那格爾第等督率各軍相機堵遏一面檄飭巴達爾琥暨馬陞等加意嚴防並知照金順迅帶

所部繞由東路迎頭截擊痛殲醜類不准稍涉稽遲所有陣亡蒙古官兵人等卽著查明請卹保德河曲等處與陝疆僅隔一河著鄭敦謹飭令陳湜親督在防將弁認真扼守其沿邊之大同一帶卽責令各地方文武時加偵察該署撫仍隨時咨會德勒克多爾濟等悉心籌防以期互相聯絡藉壯聲威將此由五百里各諭令知之○補鑄陝西提標中軍參將關防從巡撫喬松年請也○庚寅諭內

閱前因擒匪竄至吉州由平絳擾及河朔特派鄭敦謹馳赴山西將趙長齡所辦軍務如何疏懈及吏治廢弛之處確查具奏並因喬松年奏參吉州渡口為臬司陳湜舊防賊匪搶渡時陳湜之四營皆潰並所上左宗棠函係幕客代為飾稟及陳湜行至趙城停留不進暨其族人陳膺福稟稱不實等情復諭令鄭敦謹於抵山西時明查暗訪據實具奏茲據鄭敦謹覆奏趙長齡因注意嚴防河保致

令吉鄉一帶兵力單薄迨該逆乘機搶渡擾及腹地又未能撥兵迅勦任賊蔓延咎實難辭其陳湜被參各款或查無其事或查無確據惟該臬司督守全河任令該逆乘虛搶渡又因順道赴省致誤事機實屬失於防範貽誤地方請從重治罪各等語擒匪前次竄擾陝西等境疊經諭令趙長齡陳湜嚴防河岸並責成陳湜總辦沿河防務諄諄誥誡不啻至再至三趙長齡統轄全省乃任擒匪竄晉

又不能奮力堵禦致令闖入豫疆震及近畿實屬大負委任趙長齡著革職發往軍臺效力贖罪陳湜專辦河防增兵益餉朝廷無不俯允所請乃辦理一無成效卒至貽誤地方且該臬司到省之日卽賊匪搶渡之日疏防失律厥咎尤重陳湜著革職發往新疆效力贖罪以示懲儆其陳膺福等被叅縱勇滋事等款仍著鄭敦謹查明叅奏至前據都察院代奏山西紳士曹翰書等陳請將趙長齡罷斥另簡賢員等語此次查辦各情朝廷一秉至公毫無偏信該紳士等不得以挾制長刁風為疆吏者尤不可以泄沓滋口實也懍之○諭軍機大臣等左宗棠奏行抵保定現籌進剿並劉松山等會勦獲勝各摺片擒逆在獻縣境內被官軍勦敗折向深州一帶竄擾劉松山郭寶昌喜昌等業經各率所部會合追擊左宗棠卽著出省馳赴前敵嚴檄該將士等實力兜勦迅殄賊氛毋任匪蹤到處蹂

躪青滄界內無賊東路情形稍鬆該大臣當由東北偏向西南痛將賊匪勦洗毋任回竄程文炳一軍卽著飭令由高陽一帶視賊所向節節進剿毋庸調赴大城任邱一帶春壽所部馬隊並山東新到之吉林黑龍江馬隊千五百名著左宗棠官文飭令春壽一併帶赴前敵會勦官文卽著留駐省城嚴防北路並接濟前敵各營軍火糧餉毋令缺乏賊勢漸趨西南固關為山右門戶防守緊要前經諭令官文酌撥唐訓方帶兵千名或另派得力兵將前往該處防守著卽懍遵前旨安速辦理山西平定盂縣一帶並遼州各山路要隘著鄭敦謹迅速派兵堵扼以杜賊竄晉疆之路毋稍大意將此由六百里各諭令知之○又諭趙長齡業已革職鄭敦謹現攝撫篆責無旁貸其防守不力各員並縱容勇丁滋事之案著鄭敦謹確切查明據實叅奏毋稍徇隱山西各路防務著該署撫妥籌布置河

防尤為緊要。著左宗棠鄭敦謹酌派妥員接辦。陳湜俟接替有人即行起解。其未交替以前著鄭敦謹嚴飭該革員認真防範。如再有疏虞即以軍法從事。左宗棠由晉入直。於該處人才自能周知。鄭敦謹曾任晉藩屬吏。賢否尤所深悉。如有得力之員迅即奏明辦理。以專責成。擒匪由陝竄晉。蔓延數省。左宗棠未能先事防維。本有應得之咎。念其跟蹤追躡已到直隸。尚知愧奮。前既予以革職留任。

處分現姑免其治罪。務將此股擒匪迅速殄滅。以贖前愆。儻再遷延玩愒日久無功。必將從前貽誤之罪一併從嚴懲辦。懷之將此由六百里各諭令知之。○又諭前經諭令瑞麟飭令降調巡撫蔣益澧前赴陝西軍營歸左宗棠差委。並令蔣益澧帶親兵一千名前往。本日已明降諭旨將蔣益澧補授山西臬司。晉省與陝境毗連。回匪時思東竄。該處黃河防務緊要。統兵乏人。蔣益澧務當懷遵諭旨。

統帶親兵千人迅速馳赴晉省軍營辦理防務。並著瑞麟催令及早起程。毋稍遲誤。將此由五百里諭知瑞麟並傳諭蔣益澧知之。○以候補按察使蔣益澧為山西按察使。○追予貴州都勻殉難知府鹿丕宗諡壯節。於各任所地方建立專祠。家丁僕婦婢女一併附祀。○辛卯遣官祭祀。

文昌帝君廟。○署貴州巡撫張亮基奏請將辦理教案之已革知府多文等獎勵。得旨多

文於田興恕案內革職永不敘用。前據張亮基奏留該革員辦理籌餉帶練等事。不准干預教民事件。當因該革員前案情節較重。未經允准。何得顯違諭旨。仍令干預教務。所奏前後矛盾。汪維翰亦係革職永不敘用之員。張亮基輒以委辦教民案件為詞。為該革員等瀆請實屬乖謬。且督撫辦理教務係屬地方公事。何得先向主教面商。成何政體。所稱經理教案中外悅服等語。顯有鑽營請託等

弊所請著不准行多文。汪維翰並著勒回旗籍不准仍留黔省。○以貴州克復安平等城並定番等處勦匪出力賞都司柳新盛等花翎。州判李暹等藍翎。餘加銜升敘開復有差。○壬辰遣官祭黑龍潭。

昭靈沛澤龍王之神玉泉山

惠濟慈佑靈護龍王之神昆明湖

安佑普濟沛澤廣生龍王之神密雲縣白龍潭

昭靈廣濟普澤龍王之神○遣官祭圓明園惠濟祠。

河神廟○諭內閣前據前任戶部侍郎李鴻藻奏大兵雲集統兵督撫分位相埒無以一事權而泯意見請照咸豐三年故事派親王為大將軍坐鎮京師並令左宗棠李鴻章為參贊大臣分路進勦當因逆蹤距京漸遠特派大將軍坐鎮恐各路統兵督撫事事稟承必至有誤事機而該督撫等勢均位埒轉不

免互相推諉因派恭親王會同神機營王大臣節制各軍原以杜進止不齊之弊嗣經恭親王等奏請飭左宗棠由西北進勦李鴻章由東北進勦其官文丁寶楨英翰李鶴年崇厚並神機營派出各軍分段嚴扼所有進止機宜仍由該大臣等調度一切不為遙制疊經諭令左宗棠等遵照辦理該大臣等亦深知此意於軍務緊要之處即隨時相機籌辦並未事事拘執必行咨商致形紆緩茲據候

補五品京堂王家璧奏稱大帥之功在任羣帥中樞之功在任各路大帥惟恐各路統兵大臣誤會前旨事由中制請明諭宣示等語王家璧於朝廷布置及恭親王等陳奏各情未能深悉總認過慮恐外間無識之徒一唱百和騰其口說於行軍大有關繫不得明白宣示左宗棠李鴻章官文英翰李鶴年丁寶楨崇厚均著仍遵前旨分路防勦一切進兵機宜即由該大臣等妥籌調度不為遙制

儻有觀望遷延。或意見參差。致誤軍行者。卽著恭親王會同神機營王大臣指名奏。以倣玩泄王家壁摺併發。諭軍機大臣等。李鴻章奏暫駐德州。籌辦防剿情形。英翰奏遵飭牛師韓等軍暫紮直豫邊界。並請回潁料理交卸各一摺。現在捻逆向深州一帶奔竄。劉松山等軍向南壓剿。東北面仍屬空虛。難保該逆不乘隙折竄。牽掣各軍。李鴻章若紮德州。卽距深州已二百餘里。追剿勢猶不及。

著卽懷遵前旨。督率郭松林等軍迅速前進。於東北一面相機扼紮。不得以雨雪泥淖稍事耽延。其周盛波等軍。並著迅速催北來。以厚兵力。直豫交界地方。是該逆南竄之路。牛師韓方長華兩軍。旣抵黃河北岸。著英翰卽飭該兩軍於彰衛一帶妥為堵禦。豫省兵力較單。英翰仍當駐軍河干。與李鶴年會籌防剿。此時毋庸回潁交卸。俟軍務稍平。再行扶柩回旗。以遂孝思。皖省善後一切事宜。卽著咨

令吳坤修妥辦。李鶴年現駐安陽。卽著整頓士馬。與英翰聯絡聲勢。以防逸匪。左宗棠計已馳抵前敵。著卽檄飭劉松山等各率所部跟蹤追擊。並飭程文炳由高陽一帶進剿。以期四面兜圍。使該逆不得紛竄。丁寶楨近駐河間。亦當飭令莫組紳等軍向南緊逼。崇厚所派陳濟清洋槍礮隊各軍。亦當與東軍策應。毋得株守。昨有旨令官文留駐省城。卽著將北路防務嚴密布置。刻下大軍雲集。所有

各營軍火糧餉。該署督務當力籌接濟。毋令稍形缺乏。本日據候補五品京堂王家璧奏密籌根本重計等語。前因捻蹤麇集畿疆。特令左宗棠總統各軍剿賊。復命恭親王等節制各路統兵大臣及各督撫。原以一事權而免紛歧。其追剿事宜。仍責成左宗棠。李鴻章等。不為遙制。覽該京堂所奏。是於此中機緘未能窺及。已有旨將王家璧交左宗棠差委。著俟該京堂到營時。左宗棠卽將歷次所奉

諭旨給與閱看庶曉然於朝廷之並無成見也。又據御史游百川奏請飭各路統兵大臣迅籌滅賊並請詰其有無方略何時破賊切實自陳毋得飾報勝仗等語賊擾直境已逾一月各路官軍不下數萬若不迅圖剿洗糜餉勞師伊于胡底左宗棠等務各屏除意見戮力同心迅將此股賊匪就地殄滅共奏膚公王家壁游百川原摺均著鈔給閱看將此由六百里各諭令知之○又諭庫克吉泰等

奏各營擊賊獲勝情形一摺此次回匪竄近省垣一帶經庫克吉泰等派兵夾擊賊向渭北遁竄其三不通地方賊巢經黃鼎攻克汧洛等處亦經擊賊獲勝並收復寶雞縣城靈臺賊匪復經官軍擊退剿辦尚為得手所有黃鼎一軍攻克逆巢尤為奮勉出力各員弁著准其存記彙案請獎仍著庫克吉泰劉典嚴飭各營將士將各處賊匪力圖掃蕩以期迅殄逆氛現在擒竄直境剿辦尚未竣事陝

省毗連晉豫處所甚多該將軍等尤當嚴飭在防將弁認真堵遏毋任續有匪股東趨是為至要將此由五百里各諭令知之○又諭穆圖善奏遵覆甘省兵餉情形並官軍進剿官堡芻糧不繼及拾獲匪名許帖各摺片甘省本係瘠苦之區餉需奇絀各處回匪擾亂防剿兵勇不能不多朝廷素所深悉即河狄未能肅清西甯一帶不得不暫示羈縻亦係實在情形所有協甘餉銀即著左宗棠劉典

仍遵前旨飭令徑解漢中糧臺毋庸解交陝省致多周折並著穆圖善知照湖北督撫遵旨辦理左宗棠前撥海關洋稅銀兩為數較鉅現在該大臣提師入直需用雖殷而甘省為該大臣統轄之地諒不忍膜視並著於解到時飭令酌量撥給以濟甘省之急穆圖善固不可噉噉置辯左宗棠亦不必稍分畛域也河狄為蘭州西路門戶穆圖善前擬出省剿辦即著迅速進兵次第廓清其官堡地方

正在得手之際並著穆圖善飭令王得勝等乘勝攻拔毋稍觀望所需餉項著該署督迅籌撥給軍中捏造謠言鼓惑眾心亟應懲辦著穆圖善將繕寫訐帖之人密行查究惟現在月餉久欠兵心易滋怨望當於查辦之中妥為拊循使兵心愛戴雖困苦不至生變方為妥協其上年防守省城及收復洮州克復渭源出力各員弁准其由該署督查明保奏以作士氣將此由六百里各諭令知之○又

諭據張亮基奏鎮將玩視紀律分別辦理一摺總兵林自清係有旨散練回籍管束之員輒敢擅帶練勇戕官肆擄副將池有蓮奉派出師按兵不動勒索銀米殘害官民總兵劉元勳剋扣軍糧任性妄為均屬大干法紀黔省疊遭變亂民氣彫殘若再任驕將悍兵恣行橫暴民何以堪軍務亦安望有起色著曾璧光按照張亮基摺內所參各節逐細訪查將該員等撤回省城審訊明確即行奏明正

法以肅軍律惟該員等現均坐擁兵練務須不動聲色設法誘致毋致滋生事端方為妥善張亮基摺著鈔給閱看將此由五百里各諭令知之○又諭黎培敬奏請飭湖南四川督撫籌濟黔餉等語貴州餉項支絀前經張亮基派員至湖南辦理黔捐現在張亮基業已交卸儻該委員等藉詞觀望則黔餉難資接濟必至貽誤軍事著劉崐就近督飭張亮基所委各員認真辦理並當隨時查察如各

委員稍存推諉甚至別滋弊竇即著據實嚴參前據曾璧光奏請在重慶府城設立四川黔捐總局當諭令崇實督令川東道暨各該地方官妥為經理仍著崇實懷遵前諭實力舉辦四川月協餉項並著隨時籌解毋稍遲誤張亮基奏請將援黔出力之道員獎勵等語湖南辰沅永靖道楊翰於救援貴州撥兵濟餉等事有無實在勞績並著劉崐確查具奏毋稍粉飾將此由五百里各諭令知之尋

劉崐奏遵查楊翰撥兵濟餉。是其職任。未為殊功。應俟續著勞績。再行奏獎。報聞。○命候補五品京堂王家璧赴欽差大臣左宗棠軍營聽候差委。○癸巳遣官祭昭忠祠。○諭軍機大臣等。戶部奏遵撥東三省本年官兵俸餉。並請飭直隸等省籌解甲寅等年欠餉各摺片。奉天吉林黑龍江三省每年應需俸餉。節經戶部覈議。除將各該省應徵之款。儘數抵充外。下短銀兩。在於各省鹽課關稅地丁

項下酌撥。所有戶部指撥之長蘆本年應徵鹽課銀十六萬九千五百兩零。山東地丁項下未解咸豐十一年京餉銀十萬兩。河南地丁項下未解同治五年京餉銀十萬兩。山海關四成洋稅銀五萬兩。著官文丁寶楨李鶴年崇厚督飭藩運各司及奉錦道按照部撥各數。迅速徑解盛京戶部交納。毋許遲誤。都興阿富明阿德英務各遵照部定折放章程。覈實支放。毋稍浮冒。至山東等省欠解東三

省甲寅等年俸餉銀共一百七十二萬八千九百兩零。並著官文丁寶楨李鶴年劉典迅將欠解各數陸續籌解奉省交納。毋再遲延。致誤要需。原片著鈔給官文丁寶楨李鶴年劉典閱看。將此各諭令知之。○又諭李鶴年奏探聞陝省回逆分股竄偏豫邊力籌備禦一摺。據稱回逆於正月間竄入岐山縣境。突由扶風等處夾渭東趨。其前踞三原涇陽回逆同時竄向高陵藍田臨潼各縣。匪蹤已及

灞橋等語。是此股賊匪距豫省邊界已不甚遠。亟應力籌堵遏。為先事豫防之計。此時英翰已抵汴梁。牛師韓方長華兩軍亦到河北。足數扼守。前駐豫西之馬德昭一軍。應否移紮陝豫交界地方。以資堵禦之處。著該撫酌度辦理。並著該撫一面咨會庫克吉泰劉典派兵繞前截擊。一面飛飭河陝各屬激勵紳民。齊集團練。以固邊防。毋稍大意。張逆由河間竄向西南。難保不仍由順廣一帶回擾河

朔著該撫檄飭各軍確探賊蹤認真堵遏藉收夾擊之效將此由五百里諭令知之○又諭宋廷春奏鎮沅廳城解圍並克復南邱鹽井楚雄城池失守各一摺滇省迤西逆匪自鎮南姚州各軍退守後遂占踞南邱鹽井並圍攻鎮沅廳城勢甚猖獗經署總兵李錦文等調集兵練分路圍攻當將南邱鹽井克復並乘勝將鎮沅城外賊營二十餘座一律攻破城圍立解勦辦尚為得手著宋廷春即飭

李錦文等趁此聲威進規雲緬一路以斷賊援所有此次出力員弁兵練准其擇尤請獎毋許冒濫楚雄府城因祿豐失利致為杜逆攻陷該處文武雖因援隔兵單究屬防守不力即著飭令該員等會同楊國發等軍迅圖收復滇省情形危困必須督撫大員前往整頓軍務方有起色劉嶽昭計可由黔起程著卽星馳前進督飭岑毓英激勵諸軍將各路逆匪力加掃蕩毋任日肆蔓延張凱嵩現已

假滿卽著迅速赴滇會同劉嶽昭籌辦一切事宜不准藉詞觀望宋廷春於張凱嵩劉嶽昭未到以前務須振刷精神妥籌防勦毋稍玩泄將此由五百里諭知張凱嵩劉嶽昭並傳諭宋廷春知之○以甘肅洮河勦匪獲勝平毀賊巢予記名提督梅開泰記名副都統善山保儘先簡放○以雲南楚雄府城被匪竄陷護雲貴總督宋廷春署提督馬如龍下部議處代理道員護知府知縣黃紫詔署都

司千總劉興革職留營○撫恤琉球國遭風難夷如例

大清穆宗繼天開運受中居正保大定功聖智
誠孝信敏恭寬毅皇帝實錄卷之二百二十四

大清穆宗繼天開運受中居正保大定功聖智
誠孝信敏恭寬毅皇帝實錄卷之二百二十五

同治七年戊辰二月甲午諭內閣理藩院奏

遵議承襲汗王等爵一摺所有杜爾伯特汗
爵著棍布扎布承襲棍布扎布所遺親王著
巴咱爾扎那承襲巴咱爾扎那所遺貝勒著
噶勒章那木濟勒承襲○諭軍機大臣等將
益豐奏改辦太平關稅收支確數及徵收洋
稅數目各摺片廣東太平關稅務經蔣益豐
奏明改辦後一年期滿共徵正額贏餘銀十
八萬九千八百餘兩又江海關代徵絲稅紋
銀四萬二千九百餘兩較之額定數目不惟

不虧並且大有加增嗣後即可按照此次辦法覈實徵收涓滴歸公以杜中飽著瑞麟李福泰督飭南韶連道實力奉行毋得始勤終怠以致夙弊復生儻此後正稅贏餘再有短絀即將該道及各委員據實嚴叅著落賠補此次動支經費洋銀四萬一百餘兩既係實用實銷著准其動用此後遞年支發前項銀兩並免其扣減二成以示體恤該關稅務業已辦有眉目嗣後即責成該道一手管理毋

庸再派知府幫辦其太平等四分廠委員仍由巡撫遴選妥員派充一年交替由該道隨時稽察所有徵收各貨稅則比照條款著即開列清單咨照戶部備案林述訓何世俊等辦理稅務尚臻妥協著李福泰查明酌量保獎將此由四百里各諭令知之署直隸總督官文奏捻逆西竄現與左宗棠面商機宜撥軍防勦得旨賊蹤現由深州西竄左宗棠既經督軍前進官文當飭令潘鼎新等嚴防

西北一路務臻周密春壽所部馬隊昨據神機營奏令與陳國瑞會同進勦著即飭令相機前進聯絡前敵各軍互相策應毋稍觀望又奏調佐領全福等赴營差委批著咨行富明阿飭令全福等酌帶兵丁馳赴直隸軍營歸春壽統帶毋稍稽延○降調廣東巡撫新授山西按察使蔣益澧奏謝改降二級調用恩得旨務當隨時惕厲於勇往奮迅之中時以徑情直遂自戒俾慎措施而免愆尤○予

直隸祁州陣亡總兵官李光連祭葬世職加等予直隸獻縣陣亡參領奇克新等祭葬世職加等乙未遣官祭

關帝廟諭軍機大臣等李鴻章奏派隊進勦布置情形丁寶楨奏追勦獲勝繞截東路各摺莫組紳一軍追賊深州東鹿等處疊有斬擒皖豫各軍亦在東鹿大捷李鴻章以賊在深州擬派郭松林楊鼎勳大隊由景州武邑西北前往進勦惟捻騎飄忽靡定現據丁

寶楨奏稱賊有竄望都之信李鴻章當檄令郭松林等視賊所向會合劉松山郭寶昌張曜宋慶喜昌等軍分路壓勦偪賊南趨現在西北一路兵力較厚東北尚覺空虛丁寶楨飭楊飛熊一軍進紮雄縣而令莫組紳回紮任邱布置尚妥李鴻章現由德州北上著卽督率周盛傳等營進紮河間為畿南及天津屏蔽並著崇厚飭令陳濟清等統帶天津槍隊練軍聯絡防勦以期周密丁寶楨俟李鴻

章行抵河間後卽回紮東境在德州一帶扼要駐紮分布東省境內諸軍嚴防臨德東昌等處其所部王心安楊飛熊等軍卽著分布河間以南獻縣景阜等處與李鴻章聯絡聲勢以固東路之防儻此時賊已改竄東南應如何分路防勦之處卽著李鴻章與左宗棠丁寶楨等商酌調度務期周密左宗棠現赴前敵進勦著卽飭令所部與李鴻章所派各軍實力兜擊滹沱河水勢漲發賊騎不能偷

渡各路官軍厚集正可三面兜勦偪諸河干為聚殲之計左宗棠李鴻章務當合力同心迅圖殄滅不可稍分畛域望都距保定較近西北一路防務並著官文妥籌布置毋任賊蹤再行北竄現在郭松林等軍既經李鴻章飭由景州武邑前往進勦正資得力不必撤回多此紆折軍情旦夕異宜不可稍涉拘泥儻滹沱河水勢旋消賊蹤竄渡而南李鴻章亦當相機隨時追勦不得株守一方至前派

神機營王大臣節制各路統兵大臣並各督撫原以一事權而杜紛歧其進止機宜曾節經諭令該大臣督撫等臨機決斷無庸聽候神機營指示致多牽掣該大臣督撫等當善體此意不可藉詞推諉將此由六百里各諭令知之 予直隸深州陣亡都司李德旺千總劉金鐸祭葬世職加等 追予浙江各屬陣亡殉難生員陳培紳等紳民婦女一百九十九名口分別旌卹如例 丙申諭內閣英

翰奏分別舉劾屬員請旨辦理一摺所保之安徽署泗州直隸州知州候補知府鍾泰署巢縣知縣候補同知直隸州知州陳炳調補蒙城縣知縣旌德縣知縣朱錫杰調補宣城縣知縣舒城縣知縣延齡潛山縣知縣趙志和署渦陽縣知縣薛元啟均著送部引見候選知府宿州知州張雲吉貪鄙乖張有意虐民宿州縣知縣鄒泥誥險詐取巧聲名狼藉均著卽行革職永不敘用六安直隸州知州

曹光漢縱差殃民候補知縣趙光縉性情乖僻均著卽行革職候補直隸州知州朱德芬才短見偏東流縣知縣茹晉辦事顛預均著以府經歷縣丞降補前署鳳臺縣知縣丁懷德剝民肥己情節較重僅予革職不足蔽辜著革職永不敘用○諭軍機大臣等穆圖善奏官軍攻克官堡賊巢進勦渭源大捷景廉奏馳抵甘州籌辦情形各摺片回逆自渭源被創後恃官堡險隘負隅自固經副將范銘

督軍前進大挫兇鋒立將該堡攻克洵屬不避艱險奮勇可嘉仍著穆圖善檄飭該副將會同各軍進攻狄道迅殄賊氛該副將營米糧缺乏並著穆圖善飭鞏昌分設糧臺源源接濟所有此次出力各員弁著准與前次克復渭源等處各軍彙案擇尤請獎以示鼓勵提督傅先宗追賊於火兒寨地方生擒賊首馬四等正法王得勝等又疊平賊壘奪回一桿旗要隘著飭令該提督等乘勝進兵會攻

狄道毋稍懈弛其傷亡弁勇著由穆圖善查明奏請議卹以慰忠魂景廉旣已馳抵甘州所籌應行製辦皮衣各件為該兵丁禦寒要需著照所請將穆圖善發交部頒各照及藩庫實收發給該地方官妥為勸捐迅速籌備安玉敦三州縣前有旨暫歸文麟節制景廉與文麟同辦一事所有各軍口食應由該州縣撥解供支之處著會同文麟體察情形辦理文麟疊奉諭旨催令赴任計可行抵哈密

景廉將一切製辦齊備卽當剋期出關與文麟盡心籌辦毋稍玩延景廉請刊木質關防著准其刊刻開用以昭信守所請飭晉省籌撥銀兩著鄭敦謹迅撥銀五萬兩解交歸綏道庫由該處派員從阿拉善旗舊土爾扈特游牧運送玉門縣交文麟景廉軍營應用以資接濟毋得延誤將此由五百里各諭令知之又諭據總理各國事務衙門奏稱接據俄國照會內稱棍噶扎勒參帶兵西進越界

撲搶哈薩克各情請飭伊犁將軍等詳查酌辦等語哈薩克人眾居兩國之中其向背本屬無定前據榮全奏稱歸降俄國之哈薩克滋事函致棍噶扎勒參向東退居不可再釀事端曾經諭令麟興等轉飭棍噶扎勒參妥實籌辦上年棍噶扎勒參帶兵西進時亦有途遇哈薩克搶奪牲畜當經抵關並逃往俄境未便跟蹤追勦之奏是該喇嘛之截殺哈薩克確有其事而俄人之謂該喇嘛撲搶

伊界內哈薩克各節若照榮全函致該喇嘛之語則越界一事未必盡虛現經該衙門與該公使往返辯論自應查明酌辦以息爭端所有此項哈薩克是否由中國逃入俄境抑係俄國游牧之眾出境搶掠該喇嘛有無誤入俄境勦辦之事所給告示是否竟給俄國居住之哈薩克其時俄國在其本境貿易之商民人等是否一併受損並在俄境被俘之人是否係棍噶扎勒參所帶之兵卽著麟興

榮全錦丕勒多爾濟李雲麟徹底查明據實具奏以憑總理衙門設法辦理事關越界逞兵必須平心靜氣示以誠信大公方不至遽生邊釁如該喇嘛確有越界誤殺情節麟興等斷不可稍涉含糊致滋俄人口實總理各國事務衙門摺及給俄使照覆一件並俄使照會一件均著鈔給閱看將此由五百里各諭令知之署山西巡撫鄭敦謹奏遵旨出省赴固關接辦邊防得旨著卽督飭在防各

軍嚴密扼守其西路河防並著嚴飭各將士實力防範毋任一匪竄渡以江蘇辦理海運漕糧出力賞參將丁仁麟從一品封典知府李銘皖三代二品封典餘加銜升敘有差以甘肅甘州勦匪出力予總兵官楊作霖等升敘有差予江蘇各屬陣亡殉難五品封職金文浩等紳民婦女一千九百四十二員名口分別旌卹如例丁酉諭軍機大臣等奕梁等奏各禮部應需津貼要款請仍照

原奏撥解庫平實銀一摺此項津貼銀兩為恭辦

陵寢祭品及雜款要需前經奕梁等奏請擬裁折價名目改解津貼實銀每歲較省八千餘兩業經戶部覈議降旨允行茲該藩司仍按八成扣平折給不敷辦公之用自是實在情形卽著官文督飭藩司仍照戶部原奏章程每年發交易州十成庫平實銀七千兩卽令易州於每月先期兩箇月申解承辦事務銜

門以備支放毋稍延玩將此諭令知之欽差大臣曾國藩等奏請將籍隸江蘇在浙殉難員弁於本籍建立專祠允之追予江蘇各屬陣亡殉難布政司理問銜徐燦等七十六員名祭葬世職追予浙江嘉興殉難通判沈裕申於江蘇通州原籍建立專祠眷屬僕婢一併附祀追予浙江杭州殉難知縣伍崇熙祭葬世職妻勒氏暨僕楊升等旌卹如例戊戌革任山西巡撫趙長齡奏回省

交卸並陳籌防情形得旨所奏嚴防潞澤遼平一帶山口並東北路靈邱廣壽各要隘著鄭敦謹相機調度妥為布置毋稍疏懈以正黃旗蒙古都統載容兼署鑲黃旗蒙古都統正藍旗蒙古都統靈桂兼署鑲白旗蒙古都統以前任鑲黃旗蒙古副都統文煜前任西安右翼副都統穆隆阿署鑲黃旗蒙古副都統派戶部尚書羅惇衍倉場侍郎鍾岱前往天津驗收海運漕糧刑部右侍郎英

元前往通州會同倉場侍郎宋晉辦理驗收事宜 命前任福建延平協副將崇志仍赴欽差大臣左宗棠軍營聽候差委 兩廣總督瑞麟六十生辰賞

御書扁額福壽字並珍玩文綺 己亥諭內閣趙長齡奏分別叅劾州縣一摺山西洪洞縣知縣李國瀛不明緩急性情迂拘武鄉縣知縣蘇毓元因循成習任意顛預均難勝民杜之任該二員文理尚優著以教職歸部銓選

遼州直隸州知州郭兆奎久病未愈署長治縣知縣候補知縣陳迪恪年力就衰難期振作著一併勒令休致以懲怠忽而肅吏治諭軍機大臣等官文奏分撥馬隊防剿一摺捻逆現聚深澤晉州之間因潞沁水漲未能竄渡李鴻章復派郭松林等大隊由景州武邑進剿著卽飭令趕緊前往並著左宗棠督飭前敵諸軍乘此機會三面兜圍偏諸河干為聚殲之舉毋再延緩東省所練之吉林黑

龍江丹丁馬隊一千五百名著官文卽飭令管帶之侍衛春山等星夜馳赴前敵歸左宗棠調遣俟春壽到營時仍歸併春壽統帶並著催令春壽迅率所部前往會剿陳國瑞現已募勇成軍官文令安在挑派所部之黑龍江馬隊八百名會合進剿兵力尚單難資得力仍著該侍衛會合春壽所部馬軍卽赴前敵俾資厚集高陽一帶為省城東路衝要總兵劉祺所部勇力較單官文現派唐仁廉趙

喜義各部兵勇前往合紮著卽嚴檄實力防堵李鴻章此時當已遵奉前諭由景德北赴河間所有東北各路著卽嚴密布置並著兼顧高陽一帶聯絡聲勢以杜該逆回竄滿城沿山隘口既有潘鼎新等軍分段布防卽著官文飭令實力扼守以固西北一路毋稍疏解將此由六百里各諭令知之 庚子諭內閣前據官文奏陝豫各軍勦擒獲勝逆蹤向西南奔竄丁寶楨奏東軍追賊深州東鹿等

處疊有斬擒本日又據官文左宗棠奏劉松山等軍於深州等處勦賊疊勝李鴻章奏郭松林等軍在安平境內連日勦賊獲勝各一摺捻逆於獻縣商家林等處經劉松山等擊敗後卽竄向深州所屬窩鋪頭五臺子一帶盤踞本月初十日劉松山郭寶昌喜昌馬步各軍分路進勦窩鋪頭踞逆驚遽失措卽向西南逃竄劉松山乘勢截勦將賈城等村賊巢十餘處攻破逆首張總愚率悍黨數千名

冒死返撲劉松山督隊鏖戰適郭寶昌攻破五臺子等處賊巢馳至合隊聲威更壯奮力衝殺斃賊數百名賊勢不支悉向西南敗走喜昌所部復將馬隆莊等處攻拔殺賊三百餘名各軍追勦二十餘里十一日追至東陽頭收隊計共擒斬悍賊一千餘名奪獲贏馬軍械無算解散脅從數千名十二日五鼓劉松山等軍復分道西進該逆遁向祁州劉松山等卽回軍追勦遇賊奮擊馬隊徑穿賊陣

將賊隊衝為數段步軍乘勢蹙之立刃悍賊數百名奪獲贏馬五千有奇該逆紛紛敗竄越日追至博野所屬之南鄧村該逆膽敢排隊抗拒圍撲郭寶昌營盤劉松山喜昌分道夾進大股騎賊分作數十團蜂擁突至步賊繼進官軍槍礮環轟騎賊悉敗步賊望塵逃逸各軍乘勝掩殺宋慶張曜適由北面壓勦而來軍威益振追殺二十餘里賊向平安一帶竄逸李鴻章所派郭松林楊鼎勳兩軍適

至十六日卽出隊衝進該逆如牆排立我軍槍矛擊刺鏖戰三時盡決縱橫斃賊甚眾賊尚拌死抗拒楊鼎勳等分軍抄出賊後張逆腹背受敵奪路狂奔我軍沿途追殺復斃悍賊千餘名生擒五百餘名奪獲贏馬器械不可勝計次日賊乘大霧希圖繞路竄逸郭松林等於四鼓時急起追勦至饒陽所屬之楊家村該逆回軍返鬪力不能支張志青等率眾乞降餘賊敗竄十八日賊又折竄饒陽以

北劉松山郭寶昌張曜宋慶程文炳等軍亦俱趕到各派隊會勦該逆瞥見官軍卽繞道旁竄勢極窮蹙此次左宗棠李鴻章所派各軍均能奮勇勦賊不辭勞瘁和衷協力疊獲勝仗足見該大臣等力顧大局共矢公忠故能將士用命疊挫兇鋒洵堪嘉尚卽著乘此聲威飭令前敵各軍會合兜勦一鼓殲除共奏膚公同膺懋賞又諭景紋奏請飭催幫辦大臣赴任等語駐藏幫辦大臣恩麟自簡

放以來為期已久尚未抵川著沿途各督撫查明恩麟現在行抵何處催令迅速赴任以重職守諭軍機大臣等官文左宗棠奏深州等處勦賊獲勝並李鴻章奏安平勦賊疊勝各一摺覽奏欣慰具見該大臣等調度有方將士用命本日已明降諭旨宣示卽著官文左宗棠李鴻章乘此聲威迅飭各軍商同兜勦蹙之滹沱河濱一鼓殲除同膺懋賞現在賊勢已蹙左宗棠擬添調春壽善慶馬隊

以利馳逐春壽所部馬隊前本有旨會同陳國瑞步隊作為遊擊之師左宗棠係統兵大臣卽著隨時調度將春壽陳國瑞一併調赴前敵以資攻勦兼可相機策應各軍李鴻章因景德空虛恐該逆被勦東竄津郡又形喫重現飭周盛傳挑隊徑趨武強小範河口截勦為郭松林等後援兼以屏蔽東路該大臣擬暫駐景州卽著照所請辦理儻賊有向東北竄逸之信仍著該大臣進紮河閒以資堵

勦丁寶楨卽飭王心安等軍相機扼紮隨時偵探毋致稍有疏失崇厚亦當飭令陳濟清等軍加意防範不可以賊蹤略遠稍涉大意保定一帶仍著官文妥為防範毋令乘閒竄逸是為至要將此由六百里各諭令知之又諭庫克吉泰等奏彙報陝軍近日擊賊情形德勒克多爾濟等奏查探賊蹤趨向現籌堵勦暨請飭陝甘督撫等安置流亡各摺片回逆竄擾汧隴等處經總兵羅洪德等分路

勦擊疊獲勝仗其在涇州盤口川踞逆亦經
提督張在山率軍追殺賊各紛散即著庫克
吉泰喬松年劉典檄飭各防將士嚴守要隘
遇賊即擊毋任四出蔓延甯條梁失陷程興
烈一軍被賊衝散該逆遂攻陷懷遠旋撲榆
林南關並竄入神木縣城仍向榆林一帶竄
走庫克吉泰等現派劉厚基前赴榆林著即
飭令該提督迅速馳往痛加勦辦所有神木
縣殉難文武各員及懷遠等處各官下落均

著查明分別辦理榆林神木各境逆匪由府
谷一帶竄近皇甫川麻地溝勢漸北犯草地
東撲冰橋並有撲犯保德河曲托克托城包
頭鎮之說現在河冰未泮各處口岸亟應設
法嚴防著德勒克多爾濟桂成即飭巴達爾
琥扎那格爾第等督率沿邊蒙兵實力堵禦
並探明賊蹤相機迎擊一面檄令馬陞隨時
防範毋稍大意鄭敦謹亦當遵奉前諭嚴飭
防河將士於保德等處併力堵扼並飭大同

沿邊一帶地方文武慎守邊防毋令匪蹤闌
入前有旨令金順迅赴甯條梁勦賊該副都
統現已由定邊前進著即會同胡世英迅將
該鎮收復並繞赴東路一帶迎頭截擊不得
稍涉稽延致賊勢日形延蔓德勒克多爾濟
等奏體察邊方情形實由各處難民無所安
插迫而為匪暨各營游勇到處擄掠以致滋
蔓難圖所奏不為無見嗣後陝甘各省遇有
收復地方百姓未經歸業者即著該省督撫

及各路帶兵大員無論漢回妥為安插撫恤
免致流離失所各營勇丁務飭管隊官嚴密
稽查如有因不得力裁撤者並著酌量給資
令其各回原籍不得任聽淹留在外滋生事
端將此由五百里各諭令知之○西藏扎薩
克台吉妥美占堆因病乞休以其弟汪青占
堆襲職以內閣學士訥仁署鑲白旗蒙古
副都統以疏防竄賊革陝西軍營總兵官
程興烈職仍帶隊効力予直隸安平等處

陣亡副將尹昌景參將龔興祖祭葬世職加等予陝西甯條梁陣亡副都統敦奇祥阿總兵官文星明祭葬世職○辛丑諭內閣御史舒明奏倉弊日深請飭整頓等語上年祿米等倉虧短之案層見疊出總由各倉監督不能實心經理致啟倉吏蒙混並有匪徒偷竊等事實堪痛恨現值新糧將次抵津將來入倉一切弊竇亟宜剔除著倉場侍郎嚴飭各該倉監督等揀派妥役密拏偷竊人犯務

獲究辦以期盡絕根株至太平儲濟兩倉並著責令該監督等認真稽查毋許疏懈○諭軍機大臣等有人奏奉天鐵嶺正藍旗防禦阿克達布與領催塔什哈通同舞弊於蠲免之款照舊催收前年兵差過境時縱令官兵向所屬旗民勒折車價等項為數甚鉅擾害閭閻請飭查辦等語奉天為根本重地兵燹之餘尤宜加以培養豈容劣員恣行苛擾著都興阿按照所叅各節確切查明據實叅奏

毋稍徇隱原摺著鈔給閱看將此諭令知之尋奏遵查奉天鐵嶺實有浮收勒折情弊領催塔什哈馬甲吉順應即斥革枷號防禦阿克達布雖無通同等事而漫無覺察咎實難辭應請交部議處從之○又諭李雲麟奏新城籌辦經費並請將車林多爾濟起用本日已有旨將該親王作為科布多幫辦大臣矣布倫托海一城經營伊始該大臣又係創議之人尤應悉心籌畫據奏於本月初九日由

烏起程著即趕緊前進將該城籌辦經費及一切事宜妥為經理該大臣素以忠懇自期必能感恩知奮實踐前言不至意存觀望也科布多地方緊要並著李雲麟咨令車林多爾濟迅速赴任以重職守將此由六百里諭令知之○又諭伊勒屯何瑄奏哈密兵勇乏食請飭催文麟等迅速赴任一摺據稱哈密自上年十二月底至本年正月初兵糧匱乏巴城亦無餘贍軍餉經先後留撥烏台解到

餉銀仍虞不敷支放該處亟須大員鎮撫以安人心請催文麟等赴任等語文麟抵玉門後疊奉諭旨催令赴任現在行抵何處景廉前奏已抵甘州刻下哈城危急該大臣等自應迅赴本任以重職守著文麟迅即赴任景廉亦即星速出關馳赴本任一切與文麟等盡心籌辦安敦玉三處應解糧石著仍馳速解以資接濟毋稍延緩將此由五百里諭知文麟景廉伊勒屯並傳諭何瑄知之○又諭

景紋奏商同達賴喇嘛等擇吉誦經一摺前因西藏僧俗人等公請達賴喇嘛念誦真經為國祈福朝廷嘉其忱悃業經頒給黃哈達等件交達賴喇嘛祇領用昭恩賚茲據景紋奏稱因現在內地逆氛未靖兼以上年京畿雨澤愆期該達賴喇嘛等憂慮之心見於顏色商議攢集僧眾擇吉開壇恭設覆鍋大會其布施功果均係自行捐辦該達賴喇嘛梵修有素報效出於至誠此次率眾誦經著景

紋妥為照料並發去黃哈達一箇銀曼達一箇鈴杵一分椰子念珠一串玉盃一箇玉磬一箇黃緞二卷傳諭該達賴喇嘛令其祇領用示恩賚頻加至意將此諭令知之○命盛京將軍都興阿會同工部侍郎奕慶恭修永陵大班房等處工程○以圖謝圖汗親王車林多爾濟為科布多幫辦大臣○以新設布倫托海城池倡捐經費賞辦事大臣李雲麟父母從一品封典郡王銜扎薩克貝勒錦丕

勒多爾濟郡王並以郡王銜貝勒世襲扎薩克郡王桑噶西哩紫纒公銜二等台吉達瓦車林以公銜世襲伊勒固克森呼圖克圖羅布桑三都普通善禪師名號○旌表守正損軀四川江津縣民曹基才母程氏○壬寅諭內閣都興阿額勒和布奏尊藏玉牒請旨遵行一摺此次玉牒告成應恭存鳳凰樓上層其中層現供奉

皇祖聖容屆期應恭請於

崇政殿內黃案上暫時供奉俟尊藏禮成後仍恭請於

鳳凰樓中層供奉以昭誠敬卽著欽天監於本年恭送

玉牒至盛京時先期擇吉知照該將軍等敬謹遵辦諭軍機大臣等崇厚奏東光縣知縣拏獲上年著名梟首李幅悞餘匪楊仲悞訊據供稱該匪等因陝捻竄入直境欲與逃匪

王五糾邀起事因潛至滄州探詢王五業經外出等語回民王五曾經與李幅悞等結夥滋事現在潛伏不出仍有匪徒起意勾結非趕緊捕獲不能絕根株而過亂萌著順天府轉飭大宛兩縣將王五嚴密捕獲並將南西門外二十餘里之漫窪大廟內和尚法漬一併拏獲毋任遠颺並著步軍統領衙門五城御史選派幹役協同緝捕王五雖經外出難保不在滄州附近處所隱匿著崇厚劄飭天

津道轉飭滄州知州趕緊查拏務獲懲辦原片著鈔給閱看將此各諭令知之○又諭崇實奏調撥楚軍迎擊渭北回匪劉嶽昭奏苗匪投誠分別安插並滇省軍務喫緊難顧貴陽暨請飭川省協餉各一摺陝省回匪肆擾股數較多兵力難於兼顧前因回逆竄擾實難諭令崇實派周達武馳赴汧隴扼勦該署督現已派令周達武所部之提督李輝武率勁卒三千人由褒城取道留壩鳳縣出駐汧

陽仍令周達武統率所部並增募千人駐防大安驛一帶著卽飭令與李輝武聯絡聲勢並兼扼徽文兩當之衝以固川北門戶所有該兩營糧米仍由川省設法轉運毋令缺乏黔省白泥地苗匪現既畏罪投誠著劉嶽昭卽飭令將軍械呈繳設法解散並著曾壁光慎選地方文武分別安插各令歸業所有苗匪侵占民人田畝並令清出以杜釁端其善後事宜曾壁光當飭大定文武速為接辦該

處積匪散處暗伏劉嶽昭當一面督飭營員設法勦捕一面知照曾璧光趕緊接辦以便迅速赴滇所有勦辦苗匪之在事員弁准劉嶽昭彙案擇尤酌保毋許冒濫滇省軍務緊要杜逆股匪較貴陽匪徒尤為猖獗劉嶽昭勢難移師回顧貴陽著卽速將邊防事宜交代星馳赴滇督勦所有黔省邊防並貴陽附省匪徒仍著曾璧光與張文德會籌妥辦不得專待客兵援勦劉嶽昭旣須留兵兼防川

邊所帶入滇之師為數較單不敷防勦自應添募新軍以厚兵力所需月餉三萬兩著崇實設法按月籌解務須源源接濟不可稍有推諉滇省情形糜爛甚於貴州非得大支勁旅不足以張撻伐設令餉缺兵潰川省豈能安堵是援滇卽以安川該署督當深明此意力顧全局不得強分畛域劉嶽昭另片奏請令史致康辦理川省捐務等語四川候補道史致康熟悉川省情形著崇實卽飭令該員

在川辦理滇捐事務並著飭令四川藩司與史致康會辦以資得力將此由六百里各諭令知之又諭崇實奏請飭陝省照舊安設驛站一摺前因陝西驛路梗阻川省文報改由川東遞送湖北河南直隸轉遞茲據崇實奏稱自改道以來凡限行五六百里摺報往返六七十日始行遞回其題奏本章及部院公文更屬遲緩現在漢南業已肅清川省援陝之軍進紮寶雞與西安省城聲息相通兩

省文報自可照常接遞著劉典喬松年照舊安設驛站遇有川省摺報題本及一切公文仍由川北各州縣至陝西山西直隸往返接遞以免稽延將此由四百里各諭令知之○又諭崇實奏籌撥成祿軍營協餉二萬兩派員協同肅營催餉委員管解至甘省秦州轉解等語成祿軍營待餉孔殷著穆圖善卽派委員迎提迅速轉解成祿軍營以應急需毋得率行截留致滋貽誤將此由五百里諭令

知之 盛京將軍都興阿奏派兵緝拏逸犯
彌勒僧格得旨著卽嚴飭帶兵各員認真巡
捕務期必獲毋稍疏懈 以直隸協勦烏匪
並援勦山東捻匪出力賞守備張恩榮等花
翎 以直隸緝獲馬賊賞知州王文田花翎
餘加銜升敘有差○予四川因公淹歿副將
張福田等五十七員祭葬卹廕 予貴州緒
拱箐等處傷亡都司姚洪順等祭葬世職
癸卯補鑄哈密扎薩克印信從巴里坤領隊

大臣伊勒屯請也 賞江蘇等省丁卯科鄉
試年老諸生潘煒等一百四十二人舉人副
榜有差 甲辰

孝昭仁皇后忌辰遣官祭

景陵 諭軍機大臣等前據左宗棠李鴻章官
文先後馳奏深州安平勦賊疊勝各情當經
降旨宣示冀得乘官軍會合聲威大振之時
勦此窮寇必可剋期奏功乃至今數日尚未
續有捷報現聞逆眾日少器械亦不齊全勢

甚窮蹙若曠日持久不能殄除則必有誤春
耕而上年畿輔水旱頻仍民情飢困不堪加
以兵燹滋擾必至窮而為匪勢益蔓延於畿
疆大有關繫著左宗棠李鴻章官文嚴檄前
敵各軍迅速進剿蹙之滹沱河千一鼓蕩平
毋得各懷觀望遷延時日致干重咎丁寶楨
亦當飭令莫組紳各軍整陣以待以杜逆蹤
旁竄不得稍涉疏懈將此由六百里各諭令
知之 又諭劉典奏回匪竄擾無常現商辦

理情形並請另簡陝西巡撫仍帶勇勦賊各
摺片回逆自竄擾汧隴後鳳翔麟遊等境又
復蜂擁而來是陝甘回匪已有路路牽掣之
勢邠州董志原回逆將家屬移赴環縣其趨
向亦屬無定周家河吉兆坡等處賊股雖經
張岳齡于奇泮等勦擊賊眾分逃而伏匿叢
山之賊尚多並未大受懲創劉典現檄高連
陞劉端冕等分駐宜君郿州等處黃鼎譚玉
龍等軍仍駐邠州長武一帶所籌尚屬周密

著卽會同庫克吉泰嚴飭各軍覘賊所向迎頭截擊以期節節掃蕩毋任蔓延該署撫與庫克吉泰分駐三原咸陽並著隨時相機扼紮不得專顧一隅周達武所派之軍已駐鳳縣應否移紮實難以厚兵力之處著卽咨商周達武妥籌進止以顧陝南一路其由甯條梁竄入之賊疊陷懷遠神木旋回榆林各情與德勒克多爾濟等前奏情形大略相同已有旨令金順由定邊前進繞赴東路一帶截擊並諭德勒克多爾濟等嚴為防範矣惟該逆詭譎異常不能東竄卽思西擾劉典務當力籌兼顧激勵各防將士步步緊逼毋令該逆得以喘息肆意東趨陝省軍務方殷該署撫身受厚恩務須亟圖報稱與庫克吉泰督率諸軍痛殲醜類以紓朝廷西顧之憂毋庸以巡撫責重難於勝任為詞致滋貽誤將此由五百里諭令知之○漕運總督張之萬奏遵派馬步各軍赴河南防堵得旨著飭張從

龍等趕緊赴豫聽候英翰調遣以厚兵力○以正紅旗漢軍都統載齡兼署鑲紅旗漢軍都統○乙巳春分朝

日於東郊遣怡親王載敦恭代行禮○諭軍機大臣等前據侍郎延煦等奏接見朝鮮委員並查勘鳳凰輟陽兩邊門外大概情形各摺件當經諭令恭親王會同大學士六部九卿公同商議副都統奕榕一併令議具奏茲據恭親王等奏稱細閱延煦等所奏查勘各處

私墾地畝並屋宇窩棚鋪戶雖未全行開闢已無大段閒荒而朝鮮所慮專在民物涸雜欲除涸雜之弊在乎邊禁之嚴復經該親王等會同延煦奕榕詳加審度將展邊一切事宜分別商酌並請飭盛京將軍會同原勘之延煦等悉心查辦等語覽奏均悉著仍派延煦奕榕馳驛前往奉天會同都興阿出邊查辦惟事當創始必綱舉而目始張且與外藩交涉尤應禁令修明方能垂諸久遠都興阿

前於入山查勘一節跡涉推諉此事係該將軍專責豈能置身事外延煦奕榕行抵奉天後卽著都興阿帶印出省會同周厯妥辦所有該衙門日行事件卽咨交副都統清凱代拆代行都興阿務當按照該親王等所奏各節並將未盡事宜妥為籌辦儻仍意存觀望虛應故事以致貽誤將來有懷大局必惟該將軍是問延煦奕榕均經親歷其境自必了然於心此次奉命前往尤當會同都興阿逐

一查勘認真辦理以安邊境而衛藩封不得稍形疏漏恩合旣屬明悉邊情卽著加恩賞給五品頂帶交都興阿等帶往差遣該員務當感恩圖報悉竭所知如果遇事盡心將來尚可錄用如再不知愧奮則自外生成朝廷斷不為寬貸前次延煦等接見之朝鮮使臣所設問答均極明晰足見該國王深明大體洵堪嘉尚卽著禮部傳知朝鮮國王俟查勘定議後務須嚴飭該國邊界官員一體遵守

以副朝廷安民弭患之意恭親王等原摺著鈔給都興阿閱看將此各諭令知之○丙午諭軍機大臣等官文奏請飭各省協撥軍餉一摺捻匪竄擾直境將及兩月各省官軍雲集為數幾及十萬雖餉需未必盡資於直省而各軍隨帶餉銀用盡卽須由直省接濟糧米柴草亦須籌備直境上年被旱被擾民間蓋藏空虛購辦之費較鉅亟應寬為儲備著湖南湖北江西江蘇廣東福建各督撫速於

捐輸鹽釐並華洋關稅項下無論何款每省各撥助餉銀十萬兩剋期由海道輪船解赴天津交崇厚驗收卽由崇厚轉解保定交官文應用以期迅速現在逆氛擾近畿甸非尋常軍務可比各該省自應星夜撥解儻不知緩急致誤要需卽由官文隨時奏官文於此項餉銀解到後務當撙節支放不可冒濫動用以歸覈實並著官文隨時會商左宗棠李鴻章等迅籌減賊之方毋再遷延時日以

致糜餉殃民自取咎戾將此由六百里諭知
官文曾國藩瑞麟英桂李瀚章丁日昌劉崐
劉坤一卞寶第李福泰崇厚並傳諭何璟知
之○丁未遣官祭賢良祠○諭內閣鍾代宋
晉奏請飭抽查漕糧御史認真抽掣嚴防積
弊等語漕糧為天庾正供理宜嚴杜偷漏之
弊近來各倉虧短纍纍輒藉掣欠一項為諉
卸之地若不力加整頓何以除積弊而重倉
儲著抽查漕糧御史於大通橋抽掣時按照

奏定章程認真稽覈務得掣欠實在數目不
得視為具文稍涉疏忽其由橋至倉卽責成
各該監督詳細抽掣以昭覈實所稱倉場衙
門差委乏人卽著戶部將記名監督咨送數
員以備差委○諭軍機大臣等左宗棠官文
奏追勦捻逆疊獲勝仗請撥餉銀並調劑皖
豫兩軍餉項各摺片李鶴年奏豫軍追捻疊
勝布置情形一摺捻逆被各路官軍痛勦折
竄狂奔由東南逃向東北復由東北折向西

南勢極窮蹙正宜乘此機會力圖聚殲渚沱
水勢消長靡定若不乘此水漲之時亟行殄
滅設被賊騎搶渡而南蔓延將何底止郭松
林楊鼎勳等軍自安平饒陽獲勝後現在進
勦情形如何日久未據李鴻章奏報著卽迅
速陳奏左宗棠李鴻章官文務當振奮精神
合力同心共圖聚殲之舉不可稍涉延緩致
誤機宜丁寶楨亦當於河間西南兩面嚴密
防勦與左宗棠李鴻章各營和衷共濟互相

聯絡不可稍分畛域皖豫兩省赴直援勦各
營勇糧月額較湘淮等軍數少左宗棠擬於
皖豫兩營斬獲首級奪獲羸馬加懸賞格藉
資津貼等情均著照所議辦理該大臣隨營
餉項不敷著戶部迅撥現銀五萬兩解赴該
營應用以濟急需卽由左宗棠隨時籌撥戶
部歸款該大臣當趕緊督軍滅賊毋再遷延
李鶴年所奏豫軍戰勝情形與左宗棠所奏
大略相同牛師韓方長華兩軍分紮楚旺臨

漳兩處馬德昭一軍改紮滑濬之交卽著李鶴年飭令嚴密堵禦設遇賊匪搶渡濬沱南竄卽令此起防軍迎頭截擊以杜蔓延陝豫交界處所仍著該撫隨時防範毋稍大意將此由六百里各諭令知之○又諭麒麟慶奏緝拏逆犯請飭兵丁歸伍等語彌勒僧格率從三五十人潛匿蒙古各旗荒僻處所自當確實偵探嚴密搜捕該都統所稱熱河獲盜素由掩捕而得不事多兵仍請將參將閃甫躍

等帶來兵丁歸伍酌留馬隊會同蒙漢兵勇搜捕以節糜費卽著照所擬辦理彌勒僧格係多年漏網要犯必須趕緊弋獲豈容任令竄逸久稽顯戮麒麟慶身膺重寄務當認真緝嚴拏務獲儻再仍前玩泄致令要犯日久在逃必惟該都統是問該犯藏匿阿魯科爾沁旗地方經建昌縣知縣前往查拏該處蒙古膽敢相率抗拒致令竄逸情殊可惡著理藩院行知該旗務將彌勒僧格交出儻敢再

行庇匿必將治以連坐之罪並責令將庇匪蒙古查拏究辦以儆愚頑昭烏達盟長已飭所屬各旗派兵捕拏卽著理藩院行知該盟長飭屬實力兜緝並著麒麟慶咨照協同勦捕俾該犯於旗漢界內無處容身自必易於就擒將此各諭令知之○以兵部尚書董恂兼署戶部尚書○以直隸深澤等處追勦捻匪獲勝提督劉松山等得旨嘉獎予總兵官張曜等議敘有差復已革副都統安任職○以

不遵約束河南軍營已革參將李世玉遣戍軍臺○戊申諭軍機大臣等英翰奏回穎交卸撫篆並籌豫西防務各摺片前以直隸軍務喫緊豫省兵力較單諭令英翰與李鶴年會籌防勦毋庸回穎交卸茲據英翰奏稱現已回抵潁州交卸撫篆該署撫本月初二日拜發摺件至今二十餘日尚未奉到諭旨等語已命軍機處將二月十四日寄信諭旨一道另行鈔錄封寄該署撫勇於任事當念直

豫交界地方防務正關緊要著卽懍遵前諭
剋日折回汴梁督飭牛師韓等軍於臨漳楚
旺一帶扼要駐紮並隨時與李鶴年會籌布
置相機調度毋稍稽延刻下豫省西路防務
較鬆姚廣武等軍計已到豫應否移紮河陝
一帶以固邊防之處卽著英翰李鶴年會商
辦理將此由五百里各諭令知之署山西
巡撫鄭敦謹奏行抵固關現將全省防務妥
籌布置得旨卽飭該將弁等移紮獲鹿嚴密
布置遼潞一帶山口林立尤應豫防偷越陝
省榆林逆回肆擾逼近河干並著嚴飭在防
文武實力堵遏毋稍疏虞以前任光祿寺
卿倪杰為太僕寺卿

大清穆宗繼天開運受中居正保大定功聖智
誠孝信敏恭寬毅皇帝實錄卷之二百二十五

大清穆宗繼天開運受中居正保大定功聖智誠孝信敏恭寬毅皇帝實錄卷之二百二十六

救修

同治七年戊辰三月己酉朔

上詣綏履殿問

慈安皇太后安平安室問

慈禧皇太后安至戊寅皆如之○諭軍機大臣

等李鴻章奏官軍兇勦獲勝偏賊南趨並逆

蹤已搶過滹沱河丁寶楨奏探悉賊蹤仍竄

西南擬調軍布紮兼籌防勦各一摺郭松林

等軍追賊於深州李家村等處疊獲勝仗將

邱逆一股勦除殆盡張逆率黨拌拒復經張

曜等軍擊敗其偷渡滹沱河之賊經官軍追

至淹斃不少未渡者亦經圍殺餘賊均向南竄著卽檄飭郭松林等跟蹤緊躡毋任該逆得以喘息賊蹤飄忽能扼之於滹沱北面自易收功若乘間南趨則竄豫竄東賊勢又形延蔓此事未據左宗棠等奏報卽著李鴻章等會同確查具奏如此時該逆尚未渡河左宗棠李鴻章官文務當懍遵疊次諭旨督飭前敵各軍乘勝合勦仍感之滹沱河濱盡殲醜類丁寶楨亦當飭令楊飛熊等實力扼紮

並與追勦各軍聯絡聲勢以期面面緊逼使逆蹤不得旁竄儻該大臣等各存意見致已窮之寇復肆鴟張其何以副朝廷之委任耶山東邱縣曲周交界處所土匪滋擾著丁寶楨迅飭各該地方文武會同王正起將臨清等處匪類認真查拏務期悉數弋獲以絕根株將此由六百里各諭令知之○又諭劉坤一奏拏辦奉新教匪並湖南會匪滋事派兵防堵等語江西奉新匪犯張繼生等習教喫

齋聚眾刦殺。經該處文武督團將張繼生等七名捕獲解省。訊供分別辦理。逸犯曾幗才。楊萬盛本係義甯州教匪滋事。案內漏網要犯。此次復敢傳習邪教。煽惑眾心。必須拏獲懲辦。以絕根株。著劉坤一嚴飭該地方官上緊緝捕。毋任遠颺。並將夥黨各犯一律訪拏究治。奉新縣知縣徐廷琛疏防境內匪徒聚擄。事後僅獲犯七名。其餘首夥各犯迄未續獲。實屬不知振作。著摘去頂帶。勒緝逸犯。以

贖前愆。湖南瀏陽醴陵會匪圖擾江境。經瀏陽團勇拏獲數十名。餘均逃散。此股匪徒於何時嘯聚為首要犯。是否就擒。著劉崐迅速查明具奏。並酌派兵勇前往接捕。以遏亂萌。不得敷衍了事。並著劉坤一飭令派往萍鄉萬載之副將賀掄元等。與湘省官弁協力兜拏。毋令竄越。萬載縣匪徒張大吉欲糾黨赴瀏陽入夥。現經拏獲正法。逸犯黃發香仍著劉坤一嚴飭躡緝。其已獲之張更生等三名

並著確訊究辦。將此由五百里各諭令知之。
○以江西吉水縣捐輸軍餉永廣學額三名。
○以湖南甯遠縣捐輸團練永廣學額六名。
○以山東營員劉時霖報效軍餉永廣貴州安化縣學額一名。
○予湖北鍾祥陣亡提督曹仁美吳崇國總兵官謝連陞等於死事地方暨原籍各建專祠。
○追予湖北尹隆河陣亡提督唐殿魁諡忠壯。交國史館立傳。於江蘇湖北暨原籍各建專祠。陣亡弁勇一併附

祀。
○予江西各屬陣亡殉難庫大使沈恆齡等紳民婦女一千九百六十員名口分別旌卹如例。
○旌表夫亡殉節湖北尹隆河陣亡副將劉朝煦妻方氏。並准於安徽廬州府原籍合建忠節祠。
○庚戌諭軍機大臣等恭親王等奏擒逆渡河南竄請飭各路統兵大臣迅圖追剿。左宗棠等奏官軍勦擒疊勝並殲斃賊目暨渡河南竄情形各摺片。張曜宋慶督軍在饒陽東北乘夜擊賊。直搗中堅。程文

炳追賊深澤晉州等處將斷後悍賊痛勦擒斬甚多張曜宋慶一晝夜馳逐一百六十餘里尤屬迅速賊目張和尚張玉均為郭寶昌所部槍斃張五孩亦被槍傷該逆敗殘已極向滹沱水淺處所竄渡前以滹沱水勢消長靡定諭令左宗棠等務乘水漲之時偪諸河濱迅圖聚殲今賊果由水淺處所涉渡南竄距京師雖屬較遠惟未能在滹沱北面迅籌勦滅失此機會甚屬可惜滹沱以南地勢平

衍若不振奮精神趕緊將此股殄除致令蔓延肆擾難於收拾必將該大臣等重治其咎以儆玩泄著左宗棠迅督前敵諸軍儘力追勦毋任喘息並將善慶溫德勒克西馬隊調過南岸與春壽馬隊合軍以利追逐陳國瑞馬步勇隊亦著飭令一體追勦潘鼎新等軍即著官文飭令移紮滹沱北岸扼要駐紮以防回竄應否調赴南岸之處並著左宗棠酌量調遣恩承所部京兵即移紮保定一帶與

官文妥籌駐防丁寶楨所部即移紮直東交界地方以顧東省門戶兼顧河間以南並飭東省各軍嚴扼臨清濮范一帶其定安富和富爾蔭鄭魁士等軍即著移紮河間以北一帶並著官文恩承妥籌調度崇厚所派天津洋槍練隊即著飭令該統將陳濟清等與定安等聯絡聲勢兼顧津防余承恩唐訓方劉景芳及直隸駐省各軍均著官文派令扼要移紮揔捕河北餘擒土匪兼顧省防李鴻章

所部郭松林等軍即著飭令由滹沱河南迅速前進並著親督所部兼程進勦與左宗棠合力夾擊該大臣等務當戮力同心和衷共濟迅圖藏事不可稍存意見致誤事機賊勢現當窮蹙北路官兵厚集該逆非東竄臨清東昌即西竄晉省李鴻章由景州一帶進兵當兼顧東南一路以防捻逆與大名及濮范等處匪徒勾結晉省與直境交界山隘甚多防兵力單尤屬可慮左宗棠現在定州當一

面督兵進剿一面兼顧晉省山隘以杜賊蹤
西竄其平定遼路各山口鄭敦謹當加意嚴
防毋令闖入晉疆致成不了之局大順廣一
帶與豫省交界處所著李鶴年督飭皖豫防
軍妥籌堵遏遇賊竄近即當越境截剿毋任
蔓延張之萬所派姚廣武等軍曾否到豫並
著李鶴年迅速催過河北一帶歸李鶴年調
遣以厚兵力本日又據英翰奏請回旗穿孝
一摺現在捻渡滹沱勢將南竄豫境防務喫

緊皖軍牛師韓等部均在河北該署撫現又
續派黃秉鈞等軍由陳州北趨衛輝正須大
員分路統帶仍著該署撫遵奉前旨回駐汴
省與李鶴年協力籌防如遇賊蹤竄近豫疆
即著該署撫渡河與李鶴年會剿俟捻股蕩
平後再行回旗補行穿孝以遂孝思將此由
六百里各諭令知之○又諭總理各國事務
衙門奏俄人窺金地方是否越界請飭覈實
勘辦一摺據稱接庫倫辦事大臣咨稱俄人

窺金一案疊經與俄國領事官往返查覆其
窺金地方是否在中國界內雖前經庫倫大
臣照繪地圖咨送考覈而圖中山河糾紛方
向遠近無從揣測遽難定斷至俄使所稱第
十鄂博靠山近離水遠應順山為界之處非
詳查舊檔圖冊並現在俄使來文認真細勘
殊難覈定請飭庫倫大臣再行確切履勘等
語此事輾轉數年迄無定議俄人心存叵測
輒思藉端牽混非切實勘定不足以正疆界

而息爭端著張廷岳阿爾塔什達按照總理
各國事務衙門指陳各情平心細勘僅俄人
窺金地方果在俄國界內固可無庸攔阻若
在中國界內斷不得任其侵越即著該大臣
等詳查案卷指出確據咨行該領事官將窺
金人眾收回總期速為了結以弭釁端總理
各國事務衙門摺一件單七件均著鈔給閱
看將此各諭令知之○以直隸饒陽等處追
剿捻匪獲勝賞總兵官程之偉參將楊春祥

遊擊蔣尚鈞賈蕙山守備馬玉崐巴圖魯名號守備宋得勝等花翎餘加銜升敘有差辛亥加賞普濟堂功德林養賑小米二百石展期兩月○壬子諭內閣張凱嵩奏假期已滿病仍未痊懇請開缺一摺雲貴總督張凱嵩由縣令不數年閒洊擢封圻上年簡放雲貴總督疊經諭令星馳赴任乃沿途逗遛屢以病體未痊奏請開缺實屬意存規避有負委任張凱嵩著卽行革職以示懲儆諭軍

機大臣等李鴻章奏逆蹤南竄擬督軍由冀州大名一帶相機進紮一摺前因捻逆竄渡滹沱曾諭令左宗棠等督兵嚴追乃仍任捻逆於晉州境內渡河從容南竄官軍未能跟蹤截擊殊屬可恨滹沱以南虛無一兵大順廣各屬土匪甚多固易勾結況西通晉省東接臨清等處賊騎飄忽尤恐紛竄為患著左宗棠李鴻章等同心協力督率各軍迅籌殄滅儻再任賊蔓延必當重治其罪晉省平遼

各要隘著鄭敦謹加意嚴防並著丁寶楨迅帶所部移紮直東交界處所相機防剿捻蹤已由鉅鹿西南竄逸潘鼎新善慶溫德勒克西各軍著官文懌遵前諭迅飭渡河南剿不得稍涉疲玩致誤事機李鴻章擬赴冀州大名進紮設法兜剿與前諭符合卽著照所議辦理潘鼎新等軍南下後並著李鴻章妥為調度恩承卽著移紮保定一帶與官文會商妥籌布置現在捻蹤既已南竄近防不如遠

剿李鶴年卽著統率皖豫各軍出境迎剿以收夾擊之效並著英翰迅赴河北以為李鶴年聲援毋致闖入河北三郡是為至要將此由六百里各諭令知之○又諭劉典奏請飭庫克吉泰兼顧省防並請將隨營人員留陝庫克吉泰奏劉典奏回逆竄擾鄜州各摺片陝省回逆飄忽無常意圖分擾腹地劉典現駐三原著卽督飭各軍加意防剿毋稍疏虞省城重地防範宜嚴劉典一時未能晉省著庫

克吉泰妥籌兼顧督率在省司道等嚴密布
置慎固城防不得稍有疏懈劉典所請將知
府喻步蓮張雲知縣羅重熙周豫剛留陝補
用之處均著照所請分別班次留於陝西補
用已革知縣向世永著准其留營差遣回逆
大股竄陷鄜州並由張家川竄至汧陽屬境
又由涇河川什字道一帶向南分竄勢甚剽
疾著庫克吉泰劉典嚴飭劉端冕等軍分路
進剿迅將各股殲除淨盡以靖疆圉其鄜州
城內文武員弁並著該署撫查明具奏現在
陝省東西路均形喫緊左宗棠務將竄直捻
匪迅速掃除以便移師回陝免致有所牽掣
將此由六百里各諭令知之○又諭戶部奏
遵議喬松年奏請撥海關四成洋稅濟餉一
摺陝西回逆紛擾需餉浩繁慶涇各營亦須
力籌接濟亟應趕緊籌撥著照該部所議自
本年三月起即著英桂瑞麟郭柏蔭李瀚章
李福泰何璟師曾於閩海等關四成洋稅項

下按月各撥銀一萬兩其廣東江蘇原定每
月協餉一萬兩仍著瑞麟曾國藩丁日昌如
數撥解以濟要需劉典於各該省餉項解到
時務須撙節動用均勻撥濟毋令缺乏原摺
著鈔給閱看將此由五百里諭知曾國藩英
桂瑞麟郭柏蔭李瀚章丁日昌李福泰劉典
並傳諭何璟師曾知之○以江西捐輸軍餉
永廣信豐縣學額十名餘干縣九名○以河
南捐輸軍餉永廣鄉試中額三名尉氏滑溫
三縣學額各三名汜水密武陟登封四縣各
二名杞鄆陵鄭禹商邱汲新鄉輝延津封邱
河內孟偃師鞏永甯商水扶溝許襄城汝郊
陝商城二十三州縣各一名○以陝西麟遊
等處剿匪獲勝予總兵官丁賢發以提督簡
放賞副將周廷興朱桂馥巴圖魯名號鹽經
歷楊懋春藍翎餘加銜升敘有差○癸丑諭
內閣官文左宗棠奏營員疊被民團戕害亟
應查辦一摺直隸辦理團練原以保衛地方

官兵等過境如有肆行騷擾者亦應聽候統兵大臣按照軍法辦理若如官文左宗棠所奏歷經派出偵探解糧之守備王廣先等在深澤交河等處地方疊被鄉民殺害至數十名之多覈其被害情由並非因騷擾啟釁該鄉民等任意妄殺不可不嚴行懲辦著官文左宗棠出示嚴禁以後官兵務當嚴肅紀律各該處鄉民不得仍前妄殺儻有前項情弊即行嚴拏懲治用遏亂萌並著官文嚴飭各該地方官將各案為首兇棍嚴緝究辦正定縣知縣鄭兆同於營員解餉過境並不派差護送任令差役羣毆弁勇又不交犯追贓咎無可辭著即行撤任留於地方協緝仍聽候官文等查叅辦理○諭軍機大臣等官文左宗棠奏潯沱河南北兩岸官軍勦擒獲勝賊蹤南竄官文回駐省城請留成保差遣丁寶楨奏回顧東境相機進勦各摺片擒逆竄過潯沱河後官軍在南北兩岸疊獲勝仗現在

賊在豪城趙州一帶著左宗棠李鴻章懷遵疊次諭旨同心協力迅籌殄滅務將此股就地殲除毋任再行紛竄宋景詩是否亦在賊中遇有擒獲賊匪訊供時可得該逆蹤跡著左宗棠等查明一併勦除以杜後患現據獲賊供稱該逆圖竄懷慶清化鎮伐竹為矛等語著李鶴年妥籌守禦並迅飭各軍出境迎勦會殄逆氛英翰當懷遵昨日諭旨迅赴河北以為李鶴年聲援晉省南路天井關風門口等處尤應豫為之備著鄭敦謹調撥官軍嚴密布置賊蹤被創狂竄殊無定向亟應嚴扼潯沱北岸橋梁淺灘以固正定河間天津三府門戶著官文崇厚悉心籌畫分別嚴防官文現已回省並督飭地方官購運糧草接濟各軍毋令缺乏已革副都統成保著仍發往穆圖善軍營效力贖罪官文所請留於春壽軍營之處著毋庸議恩承即駐紮保定一帶與官文會籌防守丁寶楨現由景德一路

前進應如何扼要駐紮之處著該撫覘賊所向相機辦理潘鼎新一軍著官文仍遵昨日諭旨飭令由淳沱南岸前進會合諸軍迅殲醜類將此由六百里各諭令知之○署直隸總督官文奏請留調任布政使鍾秀幫辦防務允之○以雲南巡撫劉嶽昭為雲貴總督雲南布政使岑毓英為巡撫按察使宋廷春為布政使前浙江按察使李元度為雲南按察使○以四川官軍克復貴州綏陽等城出

力賞總兵官譚翊襄副將易得森李致輝李鴻基何行保都司黎佐清鄔德全巴圖魯名號知州李兆祺都司羅長盛等花翎把總張希文等藍翎餘加銜升敘有差○予直隸深澤等處因公被戕副將何文喜參將鍾開元守備王廣先祭葬卹蔭監生邱萬年等賞卹如例○予廣西各屬陣亡殉難監生曾學質等紳民婦女五百十九名口分別旌卹如例○賞廣東省丁卯科鄉試年老諸生容斐如

等二人舉人○命五城叢賑展期兩月○甲寅以

神靈顯應頒山東鄒城縣

關帝廟扁額曰神威顯佑○諭內閣前因御史佛爾圖奏稱休致河南知縣李瑞椿訪有政聲援案懇請恩施並參劾封邱縣知縣孫成竹等朋比貪墨等款當經降旨令李鶴年查明覆奏茲據李鶴年奏稱李瑞椿經原任河南巡撫吳昌壽參劾後曾赴李鶴年行

營謁見經該撫察看語言舉止諸欠安詳其耳聾亦係因病時發時止並非為營礦所震前在署新安縣知縣任內才識庸下辦公竭蹶政績既無表見聲名亦屬平常吳昌壽劾請勒休實無屈抑所參封邱縣知縣孫成竹教諭劉聿堂各款均無其事等語御史職司糾察原許風聞言事向來遇有參劾人員交各該省督撫查無實據者原皆置之不議所以開言路而防壅蔽至業經被劾之員既無

屈抑何得妄引舊案率行陳奏以致淆亂是非今該御史所叅孫成竹等朋比貪墨等款經李鶴年覈實查覆均屬毫無影響姑置勿論至所奏李瑞椿被叅屈抑其為挾私妄奏已可概見且前任知縣蘊琛開復原官之案曾經欽派曾國藩秉公查奏該員實係甚洽民心著有勞績是以降旨開復原官乃該御史引為成案代為李瑞椿率行奏請其中情節尤屬顯然易見此等惡劣風氣斷不可長

佛爾國春著回原衙門行走以示薄懲所請將李瑞椿援案恩施之處著毋庸議其所叅之封邱縣知縣孫成竹教諭劉聿堂二員均著免其置議○署山西巡撫鄭敦謹奏遵查前任山東巡撫閻敬銘病未痊愈難以赴省辦防報聞○以協辦大學士吏部尚書朱鳳標為會試正考官吏部尚書文祥兵部尚書董恂都察院左副都御史繼格為副考官○以禮部尚書全慶刑部尚書譚廷襄兼署吏

部尚書禮部尚書萬青藜暫署戶部尚書禮部右侍郎沈桂芬署兵部尚書○以鑲藍旗蒙古都統世鐸兼署鑲白旗滿洲都統散秩大臣恩來署正白旗滿洲副都統○追予浙江海甯山陰等州縣殉難廩生曹錦堂暨婦女胡劉氏等十三名口分別旌卹如例○賞廣東省丁卯科鄉試年老諸生謝燮機舉人○蠲緩山東高密鄒平魚臺日照歷城章邱長山新城禹城泰安惠民陽信商河曲

阜汶上朝城鄒滕嶧濟甯滋陽甯陽樂陵齊東海豐蒙陰沂水臨淄樂安安邱諸城萊陽蘭山壽光昌樂平度濰膠淄川單諸化臨朐四十三州縣暨德州濟甯臨清三衛濤雒水利二場被擾被水被旱被風被蟲地方新舊額賦有差○乙卯諭軍機大臣等崇實奏練軍勦捕鹽梟獲匪多名續派馬步馳勦並請飭劉策先查辦團練各摺片上年梟匪竊發屢經直軍兜勦始獲蕩平現在擒匪雖已南

竄尚未遠離直境天津河間兩府復有鹽匪結幫滋事若不趕緊勦捕必至釀成巨患且恐與捻匪互相勾結又成不了之局陳濟清所部官軍赴交河泊頭鎮勦捕匪眾五百餘人膽敢放槍拒敵守備周永全等整隊奮勦陣斬四名生擒三十六名尚未大加懲創崇厚現調劉景芳馬勇並正定練軍馳赴滄州南皮交河東光等處會勦卽著飭令該將弁等會同陳濟清派出各隊實力揔捕將著名

匪首查拏淨盡並飭知縣馬淮督同各商巡役購綫密拏毋任漏網此次獲犯弁兵卽照該侍郎所請提銀分賞並著官文嚴飭該地方員弁督飭兵役會同派出各軍趕緊揔捕嚴杜亂萌前令定安一軍移紮河間著官文行知該將軍於抵河間後嚴密堵扼以防他竄上年馬賊頭目王五現在直東交界地方聚人索馬糾集數十騎到處紛竄丁寶楨由河間督兵回顧東境正可乘勢勦捕卽著該

撫迅速派隊掩捕悉數殲除至青滄以南之梟匪聚則刦搶鹽店散則涸跡各村兼為巡役書差所包庇最難揔捕候補道劉策先現在易州以南駐紮著官文速飭該道員統帶所部練勇馳赴滄州一帶查辦團練務使梟匪不得涸跡以清內患將此由六百里各諭令知之○又諭鄭敦謹奏賊蹤南竄布置晉防各摺片捻逆渡過滹沱向南狂奔現由陰平竄至鉅鹿任縣沿途詢問彰德路徑左宗

棠督兵傍山南追務須盡力攔剿杜賊竄晉之路平定州迤南各山隘並遼潞澤及垣曲各關口與直豫交界處所甚多鄭敦謹現已派兵防守著卽飭令帶兵各員認真堵截毋稍疏懈賊騎剽疾異常該署撫當勤加偵探視賊所向隨時相機擇要移紮居中調度免致顧此失彼李鴻章擬由衛冀一帶馳赴大名等處追勦著卽兼程前進務當與左宗棠前敵各軍迅速會勦不可稍涉遲緩李鶴年

現駐彰德正可督飭豫皖防軍越境迎擊並著英翰懷遵前旨星馳赴豫渡河助剿一面飛飭黃秉鈞張從龍等軍迅赴河北以厚兵力晉省兵力尚形單弱左宗棠等總以合力同心防剿兼施毋令捻蹤竄入晉疆為要並著在直境會兵兜剿就地殄滅永靖逆氛儻推諉觀望任令逆蹤竄及他省致成不了之局恐該大臣督撫等不能當此重咎也將此由六百里各諭令知之○又諭庫克吉泰等

奏官軍剿賊獲勝克復鄆州城池並麟遊等處剿賊情形各摺片此次回匪突陷鄆州城池經劉端冕劉厚基等督兵攻克周紹濂等復在吉子峴地方擊賊獲勝大挫兇鋒勦辦尚屬出力惟西路回匪時思東竄著庫克吉泰劉典督飭劉端冕等探賊所向奮力堵勦節節掃蕩以靖疆圉其竄及楊家店一股既經高連陞擊敗仍著檄令該提督相機進剿毋稍鬆懈北路榆林一帶竄賊近日勦辦情

形若何並著妥籌兼顧譚玉龍一軍在麟遊鄆州等處擊退賊匪尚為奮勉該革員前在香花臺勦賊出力經庫克吉泰等奏請開復提督原銜並賞還翎支已於二月初四日寄諭內照所請獎勵此次在事出力員弁著准其存記彙案保獎回逆崔三一股現竄汧陽寶雞一帶著督飭張岳齡等會合川軍妥籌兜剿迅殄逆氛將此由五百里各諭令知之○命都察院左副都御史鮑源深仍在上書

房行走○以克復陝西鄆州城賞副將文明章章復威巴圖魯名號予總兵官甘大有等加銜升敘有差革援勦不力副將黃超羣都司張鵬程吏目孟振鈞職仍留營○丙辰遣官祭

歷代帝王廟○以江西弋陽縣捐輸團練永廣學額七名○以奉天伯都訥雙城堡等處捐築城圩予佐領杜隆阿等加銜升敘有差○以山東登州等處防勦擒匪出力予升任

鹽運使潘霽等加銜升敘有差。追予浙江石門陣亡知縣李宗謨等於死事地方暨原籍均建專祠。丁巳諭軍機大臣等李鴻章奏賊竄豫境擬由大名前進相機夾擊李鶴年奏張曜宋慶兩軍在饒陽勦匪獲勝擒逆被擊南趨分路兜勦情形請飭各軍布置直晉與豫交界各摺片。擒逆由成安竄入豫省臨漳一帶雖經官軍疊加勦洗該逆被創狂奔異常剝疾刻下已過衛輝非南撲黃河卽

肆擾衛懷等屬李鴻章以懷慶衛輝北阻太行南偏黃河地形較狹各軍若進扼懷慶再派隊蹙之一隅。比在直晉圍勦較得地勢與李鶴年意見相同卽著李鴻章李鶴年與左宗棠悉心籌畫合力兜擒為一鼓聚殲之計。並著英翰迅赴河北與李鶴年會商布置。端蕩逆氛李鶴年以勦匪自任務當實事求是迅將此股賊匪剋期殄滅以副朝廷委任。儻任該匪竄過黃河致滋延蔓必惟李鶴年是

問左宗棠在直勦擒既不能在滹沱北岸就地殲除現又著著落後致逆氛復擾豫境儻再不能迅速殲事自問當得何罪著左宗棠卽在豫晉交界處所擇要駐紮妥為調度一面酌派重兵星速赴晉將各處隘口嚴密扼守以杜該逆竄晉之路並著鄭敦謹仍遵前諭於澤絳所屬各口隘妥為防守李鴻章卽由大名一帶相機進勦並將大順廣一帶扼要布防遇有賊匪回竄卽行迅速截擊潘鼎

新一軍卽著官文飭赴李鴻章營以厚兵力。滹沱河以南並著官文嚴為備禦以防該逆回竄所有善慶溫德勒克西春壽等軍及陳國瑞所部並著官文左宗棠等飭令迅赴河北懷衛一帶會同豫皖各軍實力進勦丁寶楨卽在豫東交界地方擇要扼守遇賊卽擊毋任該逆闖入東境所有直隸山東山西各邊界卽責成各該大臣等派兵嚴為防範如有一匪竄逸必惟各該大臣等是問前據官

文。左宗棠奏。深澤等處勦擒獲勝業經明降諭旨。將宋慶張曜獎敘。此次李鶴年請將該提督等優加獎勵之處。著暫行存記。如能將張捻在河北三郡迅速勦除。定當破格加恩。此外尤為出力員弁。俟此股殄滅後。准其彙案請獎。將此由六百里各諭令知之。○又諭傳諭署安徽巡撫吳坤修。吳坤修奏接印日期並擬移紮壽州一摺。皖省現距賊氛稍遠。而本省善後諸務正宜次第舉辦。該署撫以

潁州地勢較偏。不如壽州為適中之地。擬俟布置後親查各屬險隘。即移紮壽州。該省蒙亳一帶土匪甚多。其降卒之散回者。亦復不少。均宜相機鎮撫。以遏亂萌。抵壽後籌濟餉需。舉辦善後。皆關緊要。著即悉心籌辦。直趨現趨河北一帶。竄突靡定。僅或該省邊界有警。該署撫仍即馳回潁州。力籌防勦。總期軍務地方兩無偏廢。以副委任。○予河南臨漳陣亡千總孫士元周東才。祭葬世職加等。○

戊午。諭內閣。丁日昌奏設局刊刻牧令各書一摺。州縣為親民之官。地方之安危繫之。丁日昌現擬編刊牧令各書。頒發所屬。即著實力舉行。俾各州縣得所效法。其小學經史等編。有裨學校者。並著陸續刊刻。廣為流布。至邪說傳奇。為風俗人心之害。自應嚴行禁止。著各省督撫飭屬一體查禁焚毀。不准坊肆售賣。以端士習而正民心。○又諭前據官文左宗棠奏報宋慶張曜兩軍二月二十三日

在饒陽東北勦賊獲勝。逆首張五孩身受槍傷。茲復據該署督等奏稱。張五孩業被槍子打入咽喉。伏誅訊據投誠人眾曹平義等供亦相符。張五孩即張五黑。係張落刑胞姪。在諸賊中。最為兇悍。每遇接仗時。首先馳突。屢抗官軍。現被豫軍殲斃。洵足寒賊膽而快人心。所有此次接仗。尤為出力之千總汝得林李大川徐效孟等三員。著以守備補用。並均賞戴花翎。以示鼓勵。○諭軍機大臣等。左宗

崇奏擒逆竄過漳河現籌防勦情形等語。擒股於前月三十日竄過漳河。昨據李鶴年馳奏擾及臨漳地方。為方長華等軍擊敗。南竄已過衛輝。劉松山等軍追擊均落賊後。左宗棠於初五日始抵順德。計初七日始可抵彰德。距賊更遠。逆蹤剝疾異常。恐由風門口舊路仍竄晉境。天井關亦係由豫入晉要路。此外各小口山隘甚多。均應到處嚴防。著鄭敦謹趕緊督兵扼守。不得稍形鬆懈。晉省兵力

單弱。左宗棠當兼程赴豫。西傍太行前進。豫籌攔截。並分撥兵勇於晉豫山路各隘口駐紮。與晉省兵勇合力防守。以杜竄越。逆騎竄向衛懷。該處有山河扼阻。正可乘此機會。感之一隅為聚殲之計。左宗棠鄭敦謹務當振刷精神。力籌堵禦。儻任賊蹤闖入。致成不了之局。必惟該大臣等是問。黃河正當冰消水長之時。李鶴年、英翰正可乘勢督兵防守。以資扼截。其各渡口船隻並著全行提歸南岸。

僅任賊騎南渡。恐該撫等亦不能當此重咎也。將此由六百里各諭令知之。○以江蘇吳江縣捐輸軍餉永廣學額六名。○以陝西官軍克復綏德州城並援勦直隸擒匪出力賞提督楊見山總兵官周國勝潘運璋副將王鳳鳴胡國龍一品封典提督黃萬友周雲祥彭緒圻總兵官劉祥發陳鳳源何永盛副將曾金和參將沈義勝方庭芝宋朝如丁錫金遊擊郭占榮鄧正峰都司張懷玉巴圖魯名

號守備李文奎等花翎餘加銜升敘有差並賞投誠賊目張振遠五品頂帶藍翎。○己未孝賢純皇后忌辰遣官祭

裕陵。○諭軍機大臣等前因志和奏蒙古越旗種地不遵驅遣當經諭令富明阿派員赴各該盟長旗查辦嗣據富明阿等奏稱擬將越界種地各蒙古分別收回安置定期辦理復經諭令理藩院轉飭該旗王公等按照富明阿所擬章程妥辦茲據富明阿奏稱派員前

赴郭爾羅斯公旗地方。僅有土默特、孟古勒、津喀喇沁等旗委員。其餘均未到齊。且有藉詞推諉等情。請飭理藩院嚴催一摺。上年十一月間。令理藩院轉飭該旗王公等。按照富明阿所擬章程。妥辦之旨。該衙門當久已行文。傳知何。以此次該蒙古各員等。均稱未經奉到。不肯將越界各戶領回。實屬疲玩。著理藩院再行嚴催。各該旗盟長。迅速派員。按照富明阿上年奏擬章程。趕將越旗種地各戶收回。轉瞬春暮。正在播種五穀之時。各該旗王公等。不得任意遷延。坐待各蒙古戶播穀籽糧。後藉口推諉。致干咎戾。並著富明阿一面嚴催。務於定限內。早行辦結。毋任延玩。將此諭知理藩院。並由五百里。諭令富明阿知之。

○署閩浙總督英桂等。奏委員查辦福建連城縣戕官一案。得旨。卽著飭令關鎮國等。詳細確查。從嚴懲辦。不准一名漏網。○浙江衢州鎮總兵官李恆嵩。因病解職。以記名總兵

官簡桂林為浙江衢州鎮總兵官。○福建汀州鎮總兵官沈俊德。開缺。養親。以閩浙補用總兵官關鎮國為汀州鎮總兵官。○撥山東司庫銀五萬兩。解赴東河。以備工需。○庚申清明節。

上詣
奉先殿
壽皇殿行禮。遣官祭
永陵
福陵
昭陵
昭西陵
孝陵
孝東陵
景陵
泰陵
泰東陵
裕陵

昌陵

昌西陵

慕陵

慕東陵

定陵○遣官祭

端慧皇太子園寢○諭軍機大臣等都興阿奏遵覆查辦邊地情形並請親歷各城巡閱兵練一摺奉天展邊事宜最關緊要該將軍身任地方責無旁貸現在延煦等因邊外道

路難行奏明改於秋間前往都興阿此次儘可帶印出邊巡閱務當實心查校不可稍涉粉飾延煦等到後仍著該將軍會同出邊將應辦一切事宜認真辦理總之此事係因時制宜且與朝鮮業經定議勢難中止該將軍毋得固執己見迴護前說任聽協佐各員一面之詞以致自干咎戾也將此諭令知之○又諭官文恩承奏捻蹤南竄會商布置請飭劉策先駐紮省西一帶各摺片恩承率富爾

孫督帶所部赴望都駐紮並令博崇武等分

紮定州等處均著照所擬辦理官文以省西

空虛請令劉策先前往駐紮惟天津等處梟

匪復行肆擾勦辦亦關緊要著官文仍遵前

旨檄令劉策先統帶所部練勇馳赴滄州一

帶相機防勦其省西至滿城沿山一帶應否

另撥勁旅前往填紮之處著官文恩承妥籌

調度並著崇厚嚴檄派出各軍將該處梟匪

實力擒捕勒限殲除毋任一名漏網鉅鹿一

帶聞有土匪滋擾李鴻章由衡水冀州前進

正可順道擒勦即著抽撥兵勇認真緝拏以

靖地方山東臨清另有土匪為數亦屬不少

現聞竄至朝城著丁寶楨探明匪蹤派隊掩

捕並著官文丁寶楨查明竄擾朝城及距鹿

之土匪是否即係一股抑另有分股之處迅

速覆奏毋得遷延粉飾致貽他患馬賊頭目

王五現在是否拏獲官文丁寶楨崇厚當飭

屬嚴行躡緝務期淨絕根株是為至要將此

由六百里各諭令知之○又諭鄭敦謹奏晉省南路喫緊擬移紫澤州督辦防堵一摺。捻逆剽疾異常。竄距懷慶不遠。晉省澤州之攔車鎮與懷慶接壤。該署撫擬移緩就急。檄調知府陳膺福等赴天井關與參將怡壽協力嚴防。親督兵勇即日馳往該鎮地方。為後路策應。著卽懷遵前諭振刷精神督飭各將弁於晉豫毗連各山隘加意扼守固關等處仍著防兵嚴密布置風門口為該匪往來熟徑

並著添派得力將弁嚴防以杜竄越。左宗棠迅遵前旨。傍太行前進豫籌攔截。隨時知會鄭敦謹合力防守。務將此股賊匪四面兜圍為就地殲除之計。目下河水雖泮而陝回紛竄靡定。河防仍未可弛。著鄭敦謹檄飭在防將士加意梭巡嚴防該匪偷渡毋稍疏虞。將此由六百里各諭令知之○又諭據理藩院奏轉據吐爾扈特扎薩克卓哩克圖汗布彥烏勒哲依圖呈稱請欽派大臣帶兵進勦烏

嚕木齊回匪該汗率所屬會同進勦並請每年差人進京恭請聖安祇領時憲書及自同治三年起應領十三旗俸銀俸緞由京賞給請旨遵行等語布彥烏勒哲依圖自其祖父渥巴錫投順以來百有餘年安居樂業。歷受恭養深恩其感激圖報自係出於至誠前次會同和碩特等兵於喀喇沙爾勦擊回逆嗣又帶兵進勦伊犁逆回並捐輸馬匹其惓忱甚屬可嘉此次又請帶兵進勦烏嚕木齊回

匪著該衙門傳諭該汗令其馳驛前赴布倫托海地方聽候該處大臣李雲麟酌量辦理以期事出萬全不至屢遭挫敗所請每年差人進京請聖安及領時憲書著准其照所請行其歷年應領俸銀俸緞已加恩交戶部速議該汗所屬人數尚多游牧無貲著傳諭該汗於領到時卽行分給各屬以資養贍毋庸由京置辦軍器俟到布倫托海後儘可會合進勦所需軍仗李雲麟等自當籌給也將此

諭令知之。○又諭。理藩院奏。據土爾扈特盟長布彥烏勒哲依圖來京。陛見。呈請特派大臣帶兵進剿烏魯木齊回匪。該盟長帶領所屬官兵會同征剿。並請每年差人來京承領時憲書。所有應領歷年俸銀俸緞。應如何支領。請旨遵行等語。盟長布彥烏勒哲依圖應領俸銀俸緞。自同治三年以來未經支領。該盟長遊牧盡失。而屬下困苦殊堪軫念。卽著戶部酌量情形。妥速議奏。其本年時憲書並

著欽天監咨交理藩院補給。交該盟長祇領。惟布彥烏勒哲依圖請派大臣帶兵進剿回匪。現在既無重兵可派。亦無專餉可撥。而該盟長所屬各旗。並厄魯特人眾尚多。若聽其任意進兵。非特無濟於事。兼恐內外扎薩克。為其驚疑。於大局甚有關係。第留之在京。則所屬遊牧人眾日久無人統率。又恐滋生事端。因諭該盟長令其前赴布倫托海地方。聽候李雲麟辦理。該大臣熟悉西路情形。卽著

悉心籌畫。妥為羈縻。毋使別生枝節。其經過烏里雅蘇台科布多地方。並著麟興奎昌酌量賞送。所有該盟長屬下土爾扈特厄魯特遊牧人眾。餬口無貲。並著李雲麟等設法接濟。就近照料。以弭變端。此旨。關繫邊疆大局。他人不得與聞。李雲麟明瑤麟興奎昌務當慎密從事。不得稍有漏洩。原摺均著鈔給閱看。將此由五百里各密諭知之。○以記名提督王可忠為直隸宣化鎮總兵官。○以安徽

籌餉出力。予道員杜文瀾等加銜升敘有差。○以四川籌辦陝甘軍餉出力。予布政使江忠濬等升敘加銜有差。○予直隸軍營病故總兵官張詩日祭葬卹蔭。謚勤武。○予因公被戕陝西知縣倪之經祭葬。世職加等。如陣亡例。○予陝西吳堡陣亡團長賈肇魁祭葬。世職如外委例。殉難家屬人等。旌卹如例。○辛酉諭軍機大臣等。李鶴年奏豫省兵力足敷。勦辦請飭皖軍及清淮防軍停止來豫。一

摺河北地方連歲荒歉現在劉松山等軍俱已追勦至豫合以該省各軍並英翰所派之方長華牛師韓兩軍兵數已不下數萬當此賊勢衰落之時足資兜勦若令黃秉鈞等軍俱行前進轉恐易糧不給於事無益所有英翰續派之黃秉鈞一軍即著留駐皖境為豫省南岸聲援其總兵姚廣武等軍並著張之萬飭令在徐州駐紮毋庸馳赴河北李鶴年既以勦賊自任即著責成該撫嚴飭各軍勒

限殄滅不得徒託空言致令殘孽復張該逆現已竄至懷慶李鶴年亦當迅速折回督勦何以尚在安陽著即親赴前敵相機調度左宗棠務遵前旨派兵嚴防由豫入晉各要隘以杜紛竄現據生獲匪供該逆有圖由曹州黃河水淺處所竄渡回巢之說亦在意中丁寶楨計已回駐東境即著督軍嚴防毋令闖入李鴻章現由畿南進發並著迎頭攔截毋任回竄直境儻該逆由豫省渡河即惟李鶴

年是問如果由曹州竄渡則丁寶楨亦不能當此重咎也懍之勉之將此由六百里各諭令知之○又諭德勒克多爾濟等奏匪蹤肆擾請飭陝甘派兵駐防邊內東路一摺回匪久踞甯條梁擾及陝省榆林神木一帶時出草地焚掠邊外地方遼廓僅恃貝子扎那格爾第率領蒙兵千餘名東西奔馳兵力實形單薄該逆現有圖竄口外之意揆厥所由總因邊內東路防軍時有時無逆匪方得縱橫

肆擾以逞其避實擊虛之計庫克吉泰等所派劉厚基一軍阻於榆林穆圖善並未撥兵援應該將軍等既不能派兵專顧邊外又不能截賊東趨設竟任賊擾及歸綏一帶該將軍等自問當得何罪前諭金順迅赴甯條梁勦賊此時諒已進兵著即迅速攻克繞赴東路以保完區如甯條梁一時未能收復著穆圖善庫克吉泰劉典迅派得力將弁駐紮東路先將竄踞府谷回匪勦滅鼓行而西與金

順一軍收夾擊之效。沿邊一帶仍著德勒克多爾濟、桂成、飭令扎那格爾第等帶兵駐守。相機迎剿。以杜逆匪紛竄。將此由六百里各諭令知之。○恭親王等奏逆蹤南竄。酌擬撤回盧溝橋防兵。仍歸南苑操演。允之。○壬戌諭軍機大臣等。本日據鄭敦謹馳奏。捻竄懷慶。澤州防務危急。一摺。捻逆由臨漳竄至新鄉。獲嘉河內一帶。邊馬擾及清化鎮。距澤州邊隘甚近。防務萬分緊要。著鄭敦謹兼程馳

赴該處。督率文武嚴防。並添調兵勇。分布大小各隘口。密籌布置。不得稍有疏忽。晉省兵力單弱。深慮該逆乘隙竄入。此時勦匪機宜。總以攔截懷慶北面山口為要務。左宗棠當懍遵疊次諭旨。迅督兵勇沿山麓一帶。星夜前進。視賊所向。橫截攔剿。並著嚴飭陳國瑞飛速馳赴風門口一帶。迎頭截擊。兼與王巨孝、李慶翔等協力防守。杜賊回竄晉疆之路。毋任遷延推諉。陳國瑞即著歸左宗棠調遣。

以一事權。賊到河內後。現又竄向何處。李鶴年計可馳抵懷境。既以滅賊自任。當嚴飭皖豫各軍。盡力兜剿。迅速殄除。毋任匪蹤紛擾。並著左宗棠分飭前敵各軍。會合截剿。迅圖聚殲。毋稍稽延。縱令他竄。將此由六百里各諭令知之。○緩徵黑龍江巴彥、蘇蘇等處被電被蟲地方。上年租賦。○貸黑龍江齊齊哈爾、墨爾根兩城被旱地方旗丁籽種口糧。○

癸亥祭

先農之神。遣惠郡王奕詳行禮。○諭內閣。內閣奏庶吉士散館考試詩賦策論。先期請旨一摺。此次著考試詩賦。至策論兩項。該庶吉士等業經於殿試朝考時分別考試。散館時自無庸再行覆考。嗣後散館著仍考試詩賦。屆期不必奏請以復舊制。○諭軍機大臣等。李鶴年奏豫軍疊獲勝仗。並賊蹤東竄情形。各摺片。捻匪竄擾滑縣。經馬德昭設伏擊賊。追至新鄉。獲嘉。張曜一軍。追至距清化鎮四

十里之恩。柁將破竹之賊。擒斬殆盡。宋慶由獲嘉。追至修武。與馬德昭、張曜等軍連次敗賊。擒斬解散者甚多。該逆兇鋒疊挫。現由原武陽武循河東竄。邊馬已及封邱延津。勢將蔓及直東。李鴻章現已由衛冀趨向大名。著卽趕緊督軍迎頭截擊。前經諭令官文等。飭潘鼎新一軍。前赴李鴻章營。飭善慶、溫德勒克西、春壽等軍。赴河北懷衛一帶。此時計尚未出直境。正可探蹤迎截。著左宗棠、李鴻章

官文。分飭各統將等。會合豫皖各軍奮力截勦。並著官文懍遵前諭。嚴防滹沱以南。與李鴻章、左宗棠互相聯絡。毋任賊蹤回竄直境。丁寶楨現在臨清。務當督飭東省防軍。嚴密扼擊。毋令擾及東境。逆勢敗殘。張總愚已受槍傷。正當乘此兵力厚集之時。速圖聚殲。李鶴年既以滅賊自任。尤當督飭豫皖陝諸軍。就地殄除。牛師韓、方長華兩軍。早抵河朔。劉松山、郭寶昌兩軍。在直境時。亦頗勇往。何以

此次擒竄豫疆。追勦均落賊後。著該大臣督撫等嚴飭各將。合力兜勦。毋稍鬆勁。儻以賊蹤去京較遠。稍形懈弛。致令蔓延他竄。必惟該大臣督撫等是問。晉省與豫直交界各山隘。鄭敦謹當隨時相機嚴防。左宗棠仍當督飭諸軍。傍山麓一帶。相機攔截。毋稍疏忽。前因鉅鹿一帶。聞有土匪滋事。曾諭李鴻章抽撥兵勇。順道擒勦。曾否捕除淨盡。如尚有零星匪徒滋擾。著該大臣仍遵前旨。迅派將弁。

認真緝拏。該大臣仍星夜前赴大名西南一帶。實力堵扼。毋任擒蹤回竄。勾結。是為至要。將此由六百里各諭令知之。○又諭崇實奏抽調川北防兵。移顧建南邊防一摺。滇省回勢方熾。崇實慮其復窺川邊。勾結越雋等處夷匪。滋擾建南。現調周達武抽帶武字八營。先赴越雋。勦辦夷匪。以清內患。著卽飭令該提督將越雋等廳夷匪實力勦除。總兵劉寶國前解鹽源城圍。克復鹽井。頗屬奮勇。所有

南路防勦事務。此著責成該總兵認真辦理。以期得力。陝省雖無捻蹤。而回匪股數甚多。兵力不敷防勦。李輝武所部三千人。現駐寶雞一帶助守。而褒沔為寶雞後路。且當秦隴之衝。儻被甘回闌入。川北邊防。又形棘手。崇實現留武字數營防守褒沔。仍恐兵力尚單。該署督當另撥數營添紮該處。以資周密。儻遇陝南軍務緊急。仍著飭令周達武回顧漢中。毋得顧此失彼。將此由五百里諭令知之。

大清穆宗繼天開運受中居正保大定功聖智誠孝信敏恭寬毅皇帝實錄卷之二百二十六

大清穆宗繼天開運受中居正保大定功聖智誠孝信敏恭寬毅皇帝實錄卷之二百二十七

臣等謹將本年內各款恭摺具奏伏乞聖鑒訓示謹奏
理刑部奏為部內各款恭摺具奏伏乞聖鑒訓示謹奏
兵部奏為部內各款恭摺具奏伏乞聖鑒訓示謹奏
工部奏為部內各款恭摺具奏伏乞聖鑒訓示謹奏
戶部奏為部內各款恭摺具奏伏乞聖鑒訓示謹奏
刑部奏為部內各款恭摺具奏伏乞聖鑒訓示謹奏
禮部奏為部內各款恭摺具奏伏乞聖鑒訓示謹奏
兵部奏為部內各款恭摺具奏伏乞聖鑒訓示謹奏
工部奏為部內各款恭摺具奏伏乞聖鑒訓示謹奏
戶部奏為部內各款恭摺具奏伏乞聖鑒訓示謹奏
刑部奏為部內各款恭摺具奏伏乞聖鑒訓示謹奏
禮部奏為部內各款恭摺具奏伏乞聖鑒訓示謹奏

教修

同治七年戊辰三月甲子諭軍機大臣等英

翰奏近日軍情擬赴衛輝督勒丁寶楨奏帶軍回東分布扼紮並派隊追捕馬賊各一摺捻逆在清化鎮等處經張曜等軍痛剿由原武陽武循河東竄邊馬已及封邱延津英翰現擬渡河協剿即著馳赴衛輝一帶與李鶴年會籌布置迅掃逆氛其續派史念祖一軍到豫後應否渡河會剿或在黃河南岸嚴防之處並著與李鶴年會商調度張之萬所派張從龍等軍前已諭該漕督飭令在徐州駐

紮妥籌布置捻蹤已至封邱延津勢將竄擾直東邊境丁寶楨現駐東昌著即嚴檄各軍相機防守毋任一賊竄入東境莫組紳王正起兩軍並著飭令在曹州一帶扼紮以杜該逆竄東之路毋庸前赴豫境轉致顧此失彼官文當懷遵前旨嚴防潯沱以南與李鴻章互相聯絡妥籌防剿毋任該逆回竄直境李鶴年當與左宗棠等會商嚴飭各將領四面合圍將此股就地殲除毋任再行旁竄懷慶

陽武等處尚有捻蹤難保不因東北兩路官兵雲集折而西竄左宗棠於山西澤絳各口隘仍當派兵嚴密堵禦直東交界馬賊著丁寶楨認真掩捕並著官文嚴飭廣平大名各屬一體控拏務絕根株鉅鹿等處土匪頗形滋擾著李鴻章探明匪蹤派隊分剿以靖地方將此由六百里各諭令知之○又諭伊勒屯何瑄奏請飭烏里雅蘇台派兵赴巴城北界防剿並伊勒屯奏請飭撥馬匹暨修補軍

械銀兩各一摺。巴里坤之北界三塘湖地方。為巴城往來要道。本年二月間。有回匪百餘人。竄往該處。肆行殺掠。巴城兵力甚單。不敷防剿。著麟興等。迅即派撥蒙兵一二千名。前往該處遊牧。以遏賊匪。東西竄伏之路。俟大兵出關後。再行撤回。並著伊勒屯等。飛咨成祿。文麟。嚴飭安敦。玉等處文武。一體防範。毋稍疏虞。巴城戰馬短少。自應趕緊籌撥。即著麟興等。在北路撥給驢壯馬四五百匹。以資

應用。至所需修補軍械銀兩。並著麟興等。籌撥銀一二萬兩。解交巴城。俾得將殘破軍器。隨時修補。如無款可籌。即催山西將應解新疆軍餉。迅速撥解。由麟興等分撥。以應急需。將此由五百里諭知麟興。錦丕勒。多爾濟。伊勒屯。並傳諭何瑄。知之。○又諭伊勒屯奏請飭催成祿。文麟。速赴哈密一摺。成祿。賴兵肅州。老師。廉餉。屢經諭令。迅往哈密勸辦。乃仍藉詞延宕。實屬不知振作。文麟既經行抵安

玉一帶。自應懍遵。疊次諭旨。剋日赴任。何以至今逗遛。哈密地方防守緊要。豈可日久無人鎮撫。成祿。文麟。均著星速遄行。儻再事遷延。以致哈密復有疏虞。貽誤大局。朝廷惟有執法從事。決不能為該提督等曲原也。懷之勉之。將此由六百里各諭令知之。○乙丑。諭軍機大臣等。都興阿奏。派隊擒捕餘匪一摺。逸匪彌勒。僧格。並逆首宋四。閻王等。均係著名要犯。經都興阿飭統帶吉林馬隊之德昌

等嚴密擒拏。雖據查明新立屯地方。並無嘯聚蹤跡。並經該將軍督飭將弁。擒獲餘犯三十餘名。均已訊明正法。惟奉省清河邊門一帶。向來匪蹤出沒無常。現在直省被擾之後。農作失時。野無所掠。尤虞勾結土匪。垂涎完善。著都興阿通飭各屬暨各營將弁。撥兵四出。嚴密擒捕。務期有犯必獲。將在逃之彌勒。僧格等。悉數訪拏。以淨根株。毋任幸脫。並知會熱河都統。飭屬不分畛域。隨時擒拏。務獲

懲辦將此諭令知之。○又諭左宗棠等奏勦擒獲勝賊蹤東竄現籌兜勦並陳國瑞誘致勇丁截奪軍裝及請將該侍衛酌改副參等官暨兵將進勦情形各摺片擒逆被豫皖各軍截勦折向東趨原武陽武一帶前據李鶴年奏聞曾諭令該大臣會合各營兜勦並諭官文嚴防滹沱南岸左宗棠西傍太行前進力扼晉省沿山各隘口著左宗棠官文仍遵前旨嚴飭各軍妥為防勦剋期殄滅陳國瑞勇而無禮朝廷素所深悉因其前在山東尚能力戰將材難得廢棄可惜令其馳赴前敵假以虛名冀策後效並非寵待優崇不料該侍衛謬妄至此本應量加懲處惟念當勦賊喫緊之時姑示包容陳國瑞本係交左宗棠差遣嗣因逆氛逼近畿輔是以改歸神機營節制今擒蹤既深入豫境即著仍歸左宗棠節制並著該大臣傳諭令其將神機營前給鈐記繳回由左宗棠派員解交神機營查銷

照前敵各將領之例另給木記以資稟報軍情之用軍行以尊卑體制為最要方得大小相維之道現在營中如都統等官尚歸該大臣督撫節制侍衛雖係京員豈可與欽差督撫平行致紊體制並著左宗棠等一一明晰傳諭令其恪遵儻或仍前狂妄即著治以應得之罪該侍衛所部勇丁並不得逾三千名之數著左宗棠詳悉查明妥為裁撤嗣後該侍衛營中軍餉軍械即由左宗棠隨時撥給此中輕重機宜諒該大臣自能斟酌辦理也劉松山等追賊勞苦情形久所洞悉第擒逆一日不平則宵旰焦勞滋甚該大臣當於拊循之中仍示督飭之意俟逆匪蕩平自當大加恩賚也將此由六百里各諭令知之。○又諭崇厚奏梟匪被勦逃散現飭拏捕並查辦團練一摺梟匪李鳳山等在泊頭一帶聞拏逃散由崔兒莊遁入杜林東光匪首高言率眾與鹽巡接仗經該縣集團勦捕竄入秦村

連鎮官軍雖小有擒斬惟該匪出沒無常兵至則散兵去復聚是其慣技亟應嚴行搗捕著官文崇厚悉心會商檄飭派出官軍探明藏匿處所認真掩捕務絕根株匪首高言李鳳山劉二麻子並著飭令嚴拏務獲毋任一名漏網據崇厚奏稱直隸鄉團良莠不齊往往私行集團製備器械並有梟匪即充團長等語現在勦散匪徒難保不涸跡私團潛行詭計著官文等飭令各該地方官將所屬團練悉心訪查務須遴派公正紳士作為練長不安分者概行斥退其所募人數所製器械均先稟知地方官編造清冊由查辦團練之員親加點驗給與印諭方准舉辦如有匪徒涸跡經練長舉發送官即與獎賞至各團私殺私埋傷害兵勇等事尤應嚴行禁止以消奸宄而靖地方將此各諭令知之○撥直隸司庫銀六千兩解赴西陵廣恩庫備用○免直隸隆平營天津三州

縣積滂大窪地畝上年糧賊有差○丙寅禮部以宗室會試中額請得旨取中二名○丁卯諭軍機大臣等劉崐奏楚軍攻克轆頂山等寨防勦邊境請飭川軍會辦上游教匪各摺片曾璧光奏楚軍攻克荆竹園賊巢黔軍防勦開修一帶並防勦安順情形各摺席寶田督率楚勇將大小轆頂山賊巢先後攻拔陣斬偽帥宋玉山等生擒逆首石廷古馬汶組正法黃號教匪全股蕩平李元度一軍於攻克荆竹園後復將秦家寨攻拔生擒逆匪秦崑崙勦辦均屬出力逆首劉儀順遁回偏刀水寨李元度現在進攻該處賊寨著劉崐即飭令該臬司迅速攻克並將劉儀順擒獲毋任旁竄其餘各處匪寨並著分別勦撫早行肅事沅晃靖一帶屢為黔邊苗匪滋擾劉崐當飭令席寶田將貴東苗匪實力勦洗以淨根株荆竹園潰散餘匪即著曾璧光商同張文德在開修沿江一帶搗勦務期殄滅淨

盡以免蔓延。現在貴東等處匪勢日衰。楚軍於肅清下游後。卽當進規尚大坪等處賊巢。崇實當飭川省援黔各軍。與楚師會合夾攻。將上游路賊。次第掃蕩。以除積患。並著飭令唐炯在貴東一帶籌辦善後事宜。安順團匪勾結永甯匪徒。攻城肆擾。著曾璧光飭令派出援軍。與劉嶽昭留黔之師合力勦除。肅清黔西。母任日久滋蔓。劉崐另片奏請於易佩紳葉兆蘭二員內。簡署貴東道一員。又曾璧光另片奏陳署貴東道趙崇慶勞績。貴東道一缺。前已據張亮基奏請以李德義升補。該員此時現在何處。有無別項事故。著曾璧光查明具奏。劉崐原片著鈔給曾璧光閱看。將此由五百里各諭令知之。尋曾璧光奏准升貴東道李德義。前經奏明派赴四川重慶府辦理轉運等事。貴東道缺。現委銅仁府知府陳枚署理。得旨貴東道一缺。既係陳枚署理。劉崐所請著毋庸議。○戶部奏遵議土爾扈

特盟長歷年欠放俸銀。准其由京補領。此後每歲仍由部庫放給。俟伊犂克復後。再歸伊犁支發。以符向章。至欠領俸銀。暫予折銀抵放。從之。○以湖南官軍攻克貴州轎頂山賊巢。予總兵官周家良。屈得茂。彭文興。黃開榜。以提督簡放。餘升敘有差。陣亡副將王金福。參將張玉魁。遊擊戴鳳鳴。都司鄧懿春等。祭葬世職加等。○予江西各屬陣亡殉難教諭教成德等紳民婦女三千七百三十七員名。口分別旌卹如例。○予貴州荊竹園陣亡都司李義行等三十六員祭葬世職加等。○予貴州貴筑被戕州同雷恩揚祭葬世職加等。○蠲緩陝西留壩潼關甯羌寶雞汧陽朝邑西鄉城固洋九廳州縣被水被旱被擾地方積欠額賦有差。○戊辰諭軍機大臣等。李鴻章奏。官軍勦匪獲勝。進駐開州接應。偪賊南趨一摺。捻逆由滑縣東南向東奔竄。援及直隸開州邊境。經郭松林等軍攔勦獲捷。該逆

回竄延津封邱一帶。惟逆謀甚狡。若不就地殄除。勢將仍圖北竄。左宗棠由彰德前進。正可嚴扼西大道之路。李鴻章進抵開州。如賊由東大道竄直。亦可迎頭攔截。著左宗棠李鴻章李鶴年悉心籌商。嚴檄各軍四面兜剿。務將此股賊匪。即在豫境迅速殲除。不容再行旁竄。並著官文懷遵前旨。嚴防潯沱以南。與李鴻章聯絡聲援。妥籌布置。擒蹤飄忽。靡常。難保不折而西趨。伺隙入晉。左宗棠於山

西澤絳各隘口。務當派兵實力堵禦。不可稍涉疏虞。英翰現在行抵何處。即著迅赴衛輝一帶。與李鶴年合力進兵。迅殲醜類。豫東交界處所。著丁寶楨嚴密防維。遇賊即擊。毋任一匪闖入。正在寄諭間。李鶴年奏張曜等軍在延津等處勦擒疊勝。並牛師韓等分勦績勝一摺。擒逆腐聚修武。迤南一帶。經牛師韓窺破賊情。合軍追勦。將騎賊數千壓退。張曜等軍復在延津吳家寨等處連番追擊。斬殺

無算。賊向西南奔竄。現在賊勢雖屬窮蹙。但恐因獸猶鬪。官軍乘勝進勦。務當穩慎兜剿。以期計出萬全。著左宗棠李鴻章李鶴年趁此事機。順手之時。嚴督各軍一鼓聚殲。以竟全功。儻任賊逸出豫境。復成不了之局。必惟該大臣等是問。將此由六百里各諭令知之。又諭宋廷春奏迤西逆匪分股圍逼省垣。連日防勦獲勝情形。一摺。本年正月間。迤西逆匪攻撲富民縣城。安甯一路亦被該逆黃

夜往攻。兩城先後失陷。該逆遂由圍山等處分股圍逼省垣。經宋廷春添兵扼守。並經馬如龍親率將弁攻勦。屢有新獲。賊仍分踞梁家河一帶。堅守不出。省城根本重地。亟應設法嚴防。著宋廷春督飭在省文武官紳悉心固守。一面商同馬如龍分撥將士。將附近堡寨相機攻拔。毋任賊蹤久踞。牽掣官軍。所有富民安甯文武各官下落。即著宋廷春詳查參辦。岑毓英近在曲靖。著即遴派得力將弁

帶兵馳援並將富民等城迅速克復。此次防守富民之文武兵勇遇賊敗走。並著該撫查明整頓。以壯軍威。劉嶽昭已授雲貴總督。黔西道路已通。即著趕緊赴滇。會同岑毓英將該省防勦事宜逐一籌辦。毋再遷延。又片奏提督馬如龍捐助軍餉。並勸各回民一體捐輸等語。該提督於逆氛密邇之時。陸續捐銀三萬兩。以濟經費。並於迤東迤南殷實回民酌量勸捐。尚屬急公可嘉。所有此次各該回民捐輸銀數及該提督應行獎勵之處。著俟軍務稍鬆。由劉嶽昭等查明分別請獎。以昭激勵。將此由六百里諭知劉嶽昭。岑毓英。並傳諭宋廷春知之。○署湖廣總督李瀚章等奏遵覆解錢鑄銅各事宜。擬於本年應解京餉項下酌運制錢二十萬串。臨時按照市價開報。運津腳費約錢一千需銀一錢有零。均歸應解項下開支。至東洋之紅銅條銅採買較難。施宜一帶銅礦現擬招商試辦。下部知

之。○以雲南楚雄府城上年被賊竄陷。暫革署總兵官副將李維述。署參將都司陳宗舜。署遊擊千總張成樑。職仍留任。○以陝西西北兩路官軍勦匪獲勝。予總兵官蕭德經以提督簡放。賞參將姜鳳興巴圖魯名號。餘升敘有差。予陣亡教諭趙鳳鳴等祭葬世職。○予直隸開州陣亡總兵官胡家讓參將夏得勝。遊擊周得意。羅清瑞。祭葬世職加等。○予陝西鄜州陣亡學政張湘等祭葬世職加等。

○己巳祭

先蠶之神。遣總管內務府大臣存誠行禮。○諭軍機大臣等。左宗棠奏官軍勦擒疊勝。並擬馳赴彰衛督勦各摺片。昨據李鴻章李鶴手先後馳奏情形大略相同。已諭令該大臣等分路兜勦。著即懷遵前旨。嚴飭各軍相機勦辦。毋令旁竄。致成不了之局。現在逆勢窮蹙。拌命很鬪。冀圖逃逸。實在意中。我軍當於奮勇之中。仍寓持重之意。劉松山等軍追勦

既屬勞苦。而郭寶昌因欲生擒首逆。致受重傷。尤可嘉尚。即著左宗棠、李鴻章、英翰、李鶴年傳諭各將領。令其奮勉圖功。一俟奏凱。必當大加賞賚。用酬殊勳。左宗棠擬赴彰衛一帶督勦。著即相機馳往。逆情詭譎。難保不乘虛西竄。該大臣務當於澤絳各隘口。仍撥兵嚴防。並著鄭敦謹隨時督飭防軍。加意堵扼。毋稍大意。李鴻章現在東路。如賊有東竄之信。即著督兵迎擊。並著丁寶楨妥為防範。官

上奉

慈安皇太后

慈禧皇太后幸宣壽宮侍午膳。○賜王以下文武大臣蒙古王貝勒貝子額駙等食。○山東

巡撫丁寶楨奏官軍追剿馬賊。擒斬殆盡。現飭探捕。並防黃河南岸。得旨。馬賊雖屬無多。仍著嚴飭各該文武捕除淨盡。以絕根株。擒逆現在衛郡各邑。難保其不思紛竄。疊諭該撫嚴防東境。著仍遵前旨實力扼堵。毋稍疏虞。○以山東黃河防堵竄匪出力。復已革道員王成謙職。○辛未。

萬壽節遣官祭

太廟後殿。○遣官祭

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵○遣官祭

顯佑宮

東嶽廟

城隍廟○

上詣

大高殿

壽皇殿行禮○詣綏履殿

慈安皇太后前行禮○平安室

慈禧皇太后前行禮○御乾清宮○王以下文武

大臣蒙古王貝勒貝子額駙等行慶賀禮○眾

官於午門外行禮○奉

慈安皇太后

慈禧皇太后幸宣壽宮○侍午膳○賜王以下文

武大臣蒙古王貝勒貝子額駙等食○諭內

閣貝勒載澂不入八分鎮國公載瀛俱著加

恩在上書房讀書○又諭都察院左副都御

史鮑源深著授載澂載瀛讀○命禮部右侍

郎沈桂芬在軍機大臣上行走○壬申

上奉

慈安皇太后

慈禧皇太后幸漱芳齋○侍午膳○癸酉諭軍機

大臣等庫克吉泰劉典奏遵旨兼顧榆林回

逆求撫請旨辦理各等語○賊匪由神木竄近

榆林○疊經官軍擊退○另有賊股由永清橋西

竄一由歸德奔響水一由波羅向邊牆外長

海子等處逃逸○庫克吉泰等現飭劉聲集等

各率所部分路防剿○即著嚴檄該總兵等聯

絡聲援視賊所向○迅掃逆氛○前諭金順迅赴

甯條梁剿賊○著該副都統仍遵前旨○趕緊進

兵○將甯條梁力圖攻克○繞赴東路○以保完區

胡世英所部○應否將駐紮延安兩營調歸一

路之處○著庫克吉泰劉典相機辦理○回甘肅

得彥被擒求撫。非真心悔罪者。比難保不生反覆。著庫克吉泰劉典察看情形。如該逆心跡尚屬可靠。不妨予以自新。令其緘約回甯。率眾歸順。用示朝廷寬大之恩。儻仍心懷叵測。著即將該首處斬。以弭後患。總之此次收撫事宜。如辦理未能妥協。致生事端。必惟庫克吉泰劉典是問。將此由六百里各諭令知之。○漕運總督張之萬奏。遵調征軍回駐徐州。得旨。江北扼要處所。自應豫防。即著酌量

情形。妥籌調派。○署黑龍江將軍德英奏。請派大員覆勘杜爾伯特蒙古旗屬與省接壤地界。得旨。著派克蒙額前往交界處所。會同阿勒坦鄂綽爾。將兩界地址。秉公覈斷具奏。尋克蒙額等奏。遵赴交界處所。親歷履勘。並查同治三年所立分界封堆。均係適中之地。並無不合。其所控官屯越占該旗地面一節。詢係當日兩造認地分占。各就其所以安生計。有同治三年圖案可憑。並非侵越。惟該旗

生齒日繁。遊牧地少。茲查有省城東南空地一區。請賞給該旗。以資生計。從之。○以疏防擒匪竄擾六塘河。降江蘇總兵官高芳吉為遊擊。奪道員南耀南勇號花翎。○以江南淮安等處肅清出力。賞總兵官姚廣武。歐陽利見黃馬褂。監運使李元華。縱一品封典。總兵官張從龍。許長瀛。副將姚守讓。王桂林。石得寶。向興貴。參將王得勝。巴圖魯名號。道員丁壽祺等花翎。從九品謝逢元等藍翎。餘加銜

升敘。聞復有差。○以陝西宜君等處勦擊回匪獲勝。賞副將張佑庭。徐萬福。章占雄。參將蕭雅泗。巴圖魯名號。都司劉忠發等花翎。把總朱文炳等藍翎。餘加銜升敘有差。○甲戌。諭軍機大臣等。都興阿奏。先行派員詳查邊外地勢。再行覆勘一摺。都興阿以邊外地勢遼遠。山川險峻。擬先派熟悉邊務之員前往。綏陽。險。廠。旺。清。等。三。邊。門。地。外。沿。渾。江。西。岸。詳細勘度。俟詳報到日。再行覆加履勘。即著

都興阿飭令該委員等將各該處地勢扼要處所。周歷查勘。毋稍疏漏。該將軍即可俟延煦等到後。會同出邊覆勘。將展邊一切應辦事宜和衷商確。務臻周妥。不得稍涉推諉。將此諭令知之。○又諭富明阿等奏。揀派官兵赴直。並請催直隸等省迅解銀兩一摺。副都統春壽前次請調吉林官員赴營差遣。輒將永不敘用之已革協領三隆已革佐領春毓一併請調。富明阿以該員等均係永不敘用

人員。未便派往辦事。甚屬認真。春壽並不聲明該革員等犯事案由。蒙混調取。著交部議處。以示懲儆。三隆春毓均著不准調往協領全福現已充當統領。有操演巡防之責。卽著照富明阿所請。毋庸調赴軍營。其餘勝全等九員及派定換防兵丁著富明阿飭令剋期起程。前赴直隸軍營。歸春壽統帶至吉林待餉孔殷。今又籌發奉調官兵整裝銀兩。實屬需用緊急。直隸山東河南等省欠解吉林軍

需銀整裝銀共十六萬兩。久未報解。著官文丁寶楨李鶴年嚴飭藩運各司將應解吉林銀兩立即如數籌解。不得再有拖欠。將此各諭令知之。○又諭鄭敦謹奏籌備晉省邊防一摺。捻逆盤踞獲嘉修武境內。時竄擾於陽武延津之間。經官軍緊蹙追勦。西竄滎澤東趨滑濬。均距晉省邊界不遠。時虞竄入山口。總兵劉定發等所募楚勇既抵陝州。卽著鄭敦謹迅速催提入晉。與朱楚和等兵勇嚴防

風門口要隘。該處為捻匪經由熟路。務須督飭在防將士加緊防範。不可稍涉疏懈。陳國瑞一軍既可無須徑赴原曲。卽著左宗棠檄令屯紮河內之清化鎮。或濟源一帶。扼賊之衝。該侍衛由晉赴豫。所需糧餉軍裝如有落後未能到齊者。卽由鄭敦謹酌量接濟。以期迅速。澤州天井關等處各隘口並著鄭敦謹飭令陳膺福等諸軍實力堵遏。與陳國瑞一軍彼此聯絡。平定遼州等處各山隘該撫亦

宜一體嚴防。不得以去賊稍遠。致形鬆懈。左宗棠當仍遵前旨。添布諸軍。循太行山麓。迎頭攔截。為晉邊屏蔽。毋稍疏略。致誤全局。陝省回逆。竄擾延榆同州各屬。奔突靡定。晉省西路河防。到處戒嚴。該逆現在宜川。紛竄距大甯之馬關。甚近。鄭敦謹已檄陳湜馳赴該處嚴防。即著飭令該革員認真堵遏。力贖前愆。回土各匪。既竄韓城邵陽等處。與晉疆僅隔一河。並著鄭敦謹飭令在防各軍。加意

梭巡。其河保一路。仍當時加警備。以固西面。毋稍大意。將此由六百里各諭令知之。○禮部以會試中額。請得旨。滿洲取中七名。蒙古取中二名。漢軍取中五名。直隸取中二十名。奉天取中三名。山東取中十六名。山西取中七名。河南取中十七名。陝甘取中五名。江蘇取中二十四名。安徽取中十五名。浙江取中二十五名。江西取中二十二名。湖北取中十一名。湖南取中十四名。福建取中二十名。臺

灣取中二名。廣東取中十五名。廣西取中十二名。四川取中十六名。雲南取中四名。貴州取中十名。○以戶部右侍郎延煦兼署刑部右侍郎。吏部左侍郎阜保暫署工部右侍郎。管錢法堂事。○以正白旗蒙古副都統西拉網阿暫署右翼前鋒統領。○以吉林勦捕奉天竄匪出。加予協領依克唐阿以副都統用。賞防禦忠林等花翎。通判薩呢揚阿等藍翎。釋遣戍已革塔爾巴哈台領隊大臣圖庫爾

回籍。○乙亥。署直隸總督官文奏。道員劉策先新募勇隊。擬飭駐紮省西。以資操練。得旨。劉策先勇隊。著准其留於省西操防。並著飭令余承恩與天津各軍。揀捕鹽匪。河間天津各屬團練。即責成博多宏武次第舉行。務臻妥善。毋滋流弊。又奏。請飭左宗棠李鴻章。如賊趨近直境。派兵協堵。並前經疊諭左宗棠嚴扼西路。李鴻章攔截東路。賊蹤如果竄近直境。即著官文等知照左宗棠李鴻章相機

撥兵與直軍聯絡遏擊。洮沱以南一帶仍著
官文督飭直軍分布防守毋稍疏懈。○命協
辦大學士吏部尚書朱鳳標為大學士。○丙
子諭內閣前據楊岳斌林之望互相參奏各
款當經降旨交穆圖善秉公查辦茲據該署
督詳細查明並鈔錄楊岳斌林之望親供呈
覽據奏楊岳斌原參林之望於糧臺支放毫
無稽覈一節甘肅省城設有楚軍糧臺與該
省標兵分局支給迨蘭州兵變以後林之望
等稟明就所入銀米一律支領並非漫無稽
覈原參林之望奏參英奎各情均無影響一
節前任甘肅按察使英奎辦理糧運局務所
派委員頗有需索虧那情弊兵變時借為口
實不得謂無影響彭楚漢赴援省城時督軍
衝入車道嶺獲勝因距蘭州較遠省中無由
得知實與援省之事無涉並聲明楊岳斌潔
己奉公戰功久著林之望彈盡血誠克保危
城陳奏事件尚屬因公請均免議各等語此

案楊岳斌等互相奏參雖經穆圖善查明俱
屬因公惟以總督藩司意見未能和協均有
不合前任陝甘總督楊岳斌現任甘肅布政
使林之望均著交部議處尋議楊岳斌林之
望均照不應重公罪降二級留任得旨准其
抵銷○又諭蘇鳳文奏請將庸劣各員分別
革休改教一摺署廣西河池州知州試用通
判譚應祥才具庸劣聲名狼籍代理天河縣
知縣藩庫大使鄭金鑑任性乖張不知檢束
補用同知陳崢嶸狠鄙性成不知自愛以上
三員均著即行革職試用知府胡尚濠心地
糊塗舉止乖謬龍勝通判高作梅蘆鄙近利
不愜輿情曾經被控有案以上二員均著勒
令休致揀發知縣楊維城珠拉杭阿才具平
庸難膺民社惟該員等係舉人出身文理尚
優均著以教職歸部銓選融縣教諭蔣承玠
年力衰邁著即勒令休致從九品盛時昌性
情輕浮顧繩武行止卑污均著即行革職以

肅官常○諭軍機大臣等英翰奏皖軍勦賊獲勝各情並馳赴前敵相機進剿一摺牛師韓等軍在修武一帶擊賊獲勝岳寨等處之賊復經郭寶昌等擊勦大捷惟郭寶昌身受重傷前據左宗棠等馳陳業經諭令妥為附循本日復明降諭旨賞假兩箇月俾該總兵安心調理並賞給物件以獎勞勦矣著英翰傳諭該總兵趕緊醫調傷痊後即奮勉勦賊其所部兵勇即令總兵郭運昌暫行統帶以資進剿英翰現已馳抵陳留即日督軍渡河勦賊洵屬奮勇可嘉著即督率各軍與左宗棠李鴻章等聲勢聯絡相機勦辦以期迅掃賊氛賊匪現踞獲嘉修武境內時竄擾陽武延津之間著左宗棠稟遵疊諭嚴飭各將弁扼守晉豫毗連各要隘毋任賊蹤闖入李鴻章力顧東路之防毋令竄逸李鶴年以勦賊自任著即會同左宗棠李鴻章英翰力籌進剿為一鼓聚殲之計官文著仍遵前旨嚴防

淳沱以南毋稍大意儻賊復北趨仍著左宗棠李鴻章速撥重兵嚴密堵遏將此由六百里各諭令知之○又諭穆圖善奏延安防兵疊次勦匪情形並調金順赴陝暨請飭山西巡撫籌解原定協撥各餉江南等省撥解甘餉四川山西籌撥軍火各摺片胡世英一軍駐紮延安止以防陝省北路而逆首董福祥率股分擾盤龍川一帶擾及安塞邊境勢甚猖獗雖經該總兵疊擊獲勝難保不於甯靈花馬池等處復行煽惑著穆圖善嚴飭該總兵乘機掃蕩以期漸次肅清前因陝西榆林各境逆回勢漸北犯曾諭金順迅赴甯條梁勦賊繞赴東路截擊計該副都統此時當由定邊前進仍著該署督咨令迅速進兵將甯條梁趕緊收復毋任賊勢蔓延胡世英是否捏報邀功並著懍遵前旨切實查明毋稍瞻徇河州東鄉等處應否添兵會勦著該署督悉心籌辦左宗棠現在直省帶兵於甘事勢

難兼顧。該省勦辦事宜。穆圖善責無旁貸。其派兵扼紮北山。調回舊部之處。卽著咨商劉典妥為辦理。惟不得偏顧甘境。致陝地又患空虛。山西應解穆圖善軍營月餉三十六萬兩。著鄭敦謹迅飭藩司設法籌撥。遴派妥員徑解甘垣。毋庸由陝省轉撥。其原定協撥甯夏新疆及富勒琿各餉。亦著該署撫仍照前數按月籌解。江南等省欠解甘餉甚多。著曾國藩崇實鄭敦謹丁日昌李瀚章郭柏蔭劉

崐何璟各將上年七月以前應撥甘餉如數迅解。所有各該省協撥餉項。劉典務當遵奉前諭。飭令徑解漢中。不得由陝解交。致多周折。甘省勦回正亟。軍火等項。不可稍形缺乏。著崇實鄭敦謹趕撥火藥各二萬斤。火繩各二萬盤。擡鳥槍子各五千斤。派員解赴穆圖善軍營。以利攻勦。甘餉奇絀。各該督撫務須隨時籌措。以濟軍食。不得視同膜外。使甘事益形棘手也。將此由六百里諭知曾國藩崇

實穆圖善鄭敦謹丁日昌李瀚章郭柏蔭劉崐劉典並傳諭何璟知之。○又諭梁肇煌奏西逆圍攻省城。請飭督撫大員迅速赴滇一摺。滇省富民安甯被陷後。復於二月初六日易門失守。昆陽新興晉甯河西均屬喫緊。前據宋廷春奏省城危急各情。與該學政所奏大略相同。現在易門繼陷。賊勢益肆蔓延。著宋廷春懷遵前旨。會商馬如龍就現有兵力分路布置。防勦兼施。迅殲醜類。該省被匪肆

擾數月以來。商賈裹足。釐金稀少。餉需愈形缺乏。若非督撫大員添撥勁旅。星馳援救。並寬籌餉項接濟。省城危殆情形。實有不可終日之勢。岑毓英務當懷遵前諭。帶兵馳援。並將富民等城迅圖克復。以解省城之危。黔西道路已通。卽著劉嶽昭趕緊赴滇。與岑毓英悉心會商。將兵事餉事及一切布置機宜。妥籌辦理。毋再遷延。梁肇煌請將此次防勦出力及捐資助餉各員。由該學政查明奏獎之

處著俟軍務較鬆省城解嚴後由該學政會同該督撫擇尤保奏毋許冒濫將此由六百里諭知劉嶽昭岑毓英梁肇煌並傳諭宋廷春知之○調工部尚書單懋謙為吏部尚書以都察院左都御史鄭敦謹為工部尚書仍署山西巡撫戶部左侍郎毛昶熙為都察院左都御史並署工部尚書調禮部右侍郎沈桂芬為戶部左侍郎管三庫事仍署兵部尚書○以內閣學士殷兆鏞為禮部右侍郎未

到任前以都察院左副都御史鮑源深署理○以內閣學士祥泰署正黃旗蒙古副都統○以運送甘肅軍糧出力予阿拉善親王貢桑珠爾默特優敘賞佐領策林等花翎餘賞賚有差○以河南封邱縣匪獲勝受傷總兵官郭寶昌給假調理並賞白玉翎管一支白玉搬指一箇小刀一柄火鐮一件大小荷包各一對○以甘肅泰安縣匪獲勝賞總兵官陳德隆白玉翎管一支白玉搬指一箇小刀

一柄火鐮一件大小荷包各一對○以甘肅收復平涼府城出力賞副將李洪春蕭孝祥參將郭萬春洪聯魁黃湛潤余國榮巴圖魯名號遊擊梁國棟等花翎外委趙連科花藍翎總兵官孟玉德等加銜升敘有差○以甘肅進攻狄道踴躍平賊卡子提督王得勝優敘○予河南修武陣亡守備范錫之祭葬世職○予陝西定邊陣亡千總王在華祭葬世職加等○予甘肅安定被戕通判陶壘等祭葬

世職○

上以孟夏時享

太廟自是月始齋戒三日○丁丑以神靈助順

加江蘇宿遷縣

金龍四大王封號曰襄猷河南封邱縣

黎河神封號曰孚惠陳留縣

朱大王封號曰護國山東汶上縣

永濟神封號曰顯應○諭內閣前據給事中

謝膺禧奏富新倉存廩米石有虧那情弊當

經諭令倉場侍郎徹底清查。茲據奏稱共虧短梗私粟米麥二萬五千三百餘石。實屬任意虧短。情弊顯然。所有該倉花戶人等。著刑部嚴提審訊。務期水落石出。從重懲辦。該倉監督有無知情徇隱等弊。著該部於定案時分別定擬。虧短米石。並著分別賠補。鍾斌宋晉未能先事覺察。咎實難辭。應得處分。著歸入前次失察祿米等倉虧短案內。刑部於定案時一併聲明請旨。○諭軍機大臣等。李鴻

章奏賊蹤東竄。籌辦情形。李鶴年奏官軍勦匪疊勝。賊向東北敗竄。請留遣員帶隊各摺。片。捻逆現竄內黃。據獲賊供稱懷衛一帶地勢過狹。該捻恐被圍困。急圖出險。此時賊勢雖盛。難保不為困獸之鬪。別逞狡謀。李鴻章擬先扼竄路。再圖進剿。所籌甚合機宜。著李鴻章與左宗棠、李鶴年合力籌辦。嚴檄各軍穩紮穩進。實力兜剿。務將此股即在豫境殲除。毋令再行竄出。致賊勢復張。勒辦又形棘

手。李鴻章各營在衛河南岸兜剿。左宗棠督軍在衛河北岸夾擊。即著該大臣聯絡聲援。遇賊即擊。毋任偷渡。英翰已抵陳留。著即統率所部星速渡河。會籌掃蕩。逆蹤距東較近。丁寶楨當督飭官兵嚴密布置。扼賊竄東之路。遣員王永慶前經成祿奏調。朝廷以其所犯情節較重。不准留營。茲既據李鶴年奏稱打仗尚屬出力。即著照所請。將王永慶暫行提禁。留豫帶隊。儻不能始終勤奮。仍著即行

發遣。毋稍瞻徇。將此由六百里各諭令知之。○又諭文麟、景廉奏兵會玉門。酌商先後馳赴安西。並陳伊勒屯等截留餉銀各摺。片。哈密必須大員鎮撫。疊經諭令文麟等迅速赴任。現在景廉亦行抵玉門。亟應會合前進。雖據報肅逆多騎。由南山邊分竄搶掠。文麟等豈得以逆騎飄忽。牽掣進兵。藉詞延緩。至伊勒屯等前次奏明動用烏里雅蘇台餉銀。自因巴哈需餉孔亟。亦由文麟等久不到任。有

此那移總之地方為重。文麟既節節耽延。該處亦安能懸餉以待耶。惟伊勒屯等所截留之銀。本係文麟等軍營專餉。伊勒屯等亦不得概行截留。其應如何兼顧之處。著伊勒屯等妥籌撥給。文麟景廉於接奉諭旨後。著卽星速督兵分起前赴哈密。一切悉心籌辦。以重職守。毋許在安西逗遛。自干重咎。所請飭撥餉需。已寄諭麟興等趕緊籌解。此項餉銀解到。著文麟景廉與伊勒屯等酌量均勻分配。以資應用。將此由六百里諭知文麟景廉伊勒屯。並傳諭何瑄知之。○又諭文麟奏需餉甚殷。請飭寬為籌撥等語。哈密辦事大臣文麟正當出關勦賊喫緊之時。所需軍餉。自應寬為設措。著鄭敦謹督飭藩司等。將應解文麟協餉。陸續籌撥。交文麟委員領收妥解。以資接濟。並著麟興李雲麟將解到新疆餉項。隨時撥交赴烏催餉委員徑解文麟軍營應用。毋稍延緩。將此由五百里各諭令知之。

○以工部右侍郎潘祖蔭兼署吏部左侍郎。○予河南內黃陣亡提督陳振邦守備李惠恩祭葬世職加等副將劉正同等祭葬世職。

○戊寅。

上以孟夏時享。

太廟前期親詣行禮。○諭軍機大臣等恭親王等奏擒逆由直豫邊境竄入山東搶渡運河。現籌布置丁寶楨奏擒竄東昌。飭軍分剿各一摺。擒逆由滑縣開州等處折援清豐南樂。

復由大名趨向莘縣搶渡運河竄至東昌。丁寶楨現飭東省各軍分路馳剿。黃河船隻一律提歸南岸。惟賊蹤剽疾異常。運河水勢復淺。恐其由臨德一帶北渡。撲犯河間。或沿河竄向東北。擾及天津。畿疆重地豈可再任竄擾。丁寶楨務當督飭東軍設法攔截。杜其北竄之路。李鴻章當飭郭松林等軍沿運河南岸儘力追剿。或分軍兜截。或設法旁批。總以先杜北犯。迅即撲滅為要。英翰著督率皖軍。

卽入東境合力追勦宋慶張曜等軍並著李鶴年星催赴東追擊不得專留豫境彰德一帶仍著李鶴年派兵嚴防以杜回竄擒逆旣到東省此後卽責成李鴻章親督所部迅入東境嚴飭諸將領將此股竄匪就地殲除所有前敵各軍均著李鴻章調度以一事權景州河間等處防務緊要著官文恩承迅速撥軍嚴加堵遏如兵力不敷並著官文等酌量就近檄調以資得力並著左宗棠卽赴直境於直東交界處所扼要駐紮天津地方著崇厚速籌堵禦毋任賊蹤竄入直境姚廣武等軍著張之萬飛飭由徐州北上馳赴東境合剿以厚兵力此次賊由豫直竄入東境搶渡運河究係何隊攔截不力著各該大臣督撫等查明嚴叅將該統將等從重懲辦以肅軍律擒逆由直入豫左宗棠不能迅速殲除李鴻章專防直東兩省仍任賊蹤紛竄李鶴年以滅賊自任辦理迄無成效復任竄入東境

致追勦各軍均落賊後丁寶楨復不能力扼運防任賊搶渡均堪痛恨若再不振刷精神力加掃蕩或縱令北犯畿疆南渡黃河以致賊勢益張該大臣督撫等自問當得何罪耶懍之慎之將此由六百里各諭令知之○又諭前據趙長齡奏山西汾陽縣知縣慶文辦事顛預緝捕廢弛當經降旨將該員勒令休致茲據步軍統領衙門奏稱汾陽縣監生靳履恭等以慶文前在該縣任內素有善政於賊匪逼近時辦理城守等事均能認真地方賴以安堵懇請暫留該縣以安民命等情赴該衙門呈訴等語慶文前在汾陽縣任內是否辦防得力民情愛戴抑係如趙長齡所奏難期振作著鄭敦謹確切查明據實具奏毋稍徇隱原呈著鈔給閱看將此諭令知之

大清穆宗繼天開運受中居正保大定功聖智
誠孝信敏恭寬毅皇帝實錄卷之二百二十七

卷之二百二十七

七

大清穆宗繼天開運受中居正保大定功聖智
誠孝信敏恭寬毅皇帝實錄卷之二百二十八

欽此
光緒七年四月己卯朔享
太廟遣睿親王德長恭代行禮○
上詣綏履殿問
慈安皇太后安平安室問
慈禧皇太后安至丁未皆如之○奉
慈安皇太后
慈禧皇太后幸漱芳齋侍午膳○諭內閣宋晉
奏請變通漕務章程一摺覽奏各條如各倉
歸併存米酌定抽掣口袋進米收米設立三
連印單酌給各倉辦公之款准令經紀雇役

同治七年戊辰夏四月己卯朔享

太廟遣睿親王德長恭代行禮○

上詣綏履殿問

慈安皇太后安平安室問

慈禧皇太后安至丁未皆如之○奉

慈安皇太后

慈禧皇太后幸漱芳齋侍午膳○諭內閣宋晉

奏請變通漕務章程一摺覽奏各條如各倉

歸併存米酌定抽掣口袋進米收米設立三

連印單酌給各倉辦公之款准令經紀雇役

梭巡均為防弊起見卽著照所議認真辦理至朝陽門內外一帶店鋪每遇漕運盛行卽有沿途買賣麤米之事情弊顯然其慶豐牘沿岸葦院向為偷盜藏匿之所亟應嚴行查拏以除積患著步軍統領衙門飭令派出兵弁加意巡緝毋稍懈弛至米石進倉時著倉場侍郎嚴飭該倉監督全行住倉隨時監掣驗收查倉御史於收米喫緊時亦著逐日到倉監視以重倉儲而杜弊端○又諭宋晉奏

本年東糧開行迅速應請無庸沿途停泊一摺山東首幫漕船已於三月初八日開行其餘各船依次前進海運頭起甫於三月二十一日開行若照向章飭令沿途停泊遇有海運脫幫始行前進必至久羈水次米多耗壞且今年運河水足東糧除截留災賑外不過十一萬石有零挽運較易著丁寶楨迅飭糧道貴寶相機抽幫前進俾得早日抵通此次東糧到通後卽著駐通驗米大臣會同宋晉

一體驗收以示體恤另片奏暫借通濟庫銀七百兩散放兵丁半季餉銀等語卽著照該侍郎所請提銀借放並著直隸總督轉飭該藩司及通永道將通州協兵丁欠餉趕緊籌解劃還借款○諭軍機大臣等英桂等奏籌米運津一摺英桂等以畿輔大兵雲集需糧孔亟擬撥款購米十萬石由輪船運赴天津聽候提撥實能力顧大局卽著飭令周開錫等趕緊採辦陸續運津並著崇厚督飭天津

道府先期雇備剝船俟此項米石到津卽飭天津道會同道員夏獻綸驗收並由崇厚妥速運赴京倉所有前項米船經過地方著官文曾國藩郭柏蔭丁日昌何璟飭令各關口概免徵收釐稅卽予查驗放行將此由五百里諭知官文曾國藩英桂郭柏蔭丁日昌李福泰崇厚沈葆楨並傳諭何璟知之○又諭傳諭署安徽巡撫吳坤修吳坤修奏籌辦開荒善後事宜並請嚴辦滋事生童各等語皖

省被兵後衙署存者僅潁州一府宿泗二州
阜陽太和靈璧三縣此外各府州縣衙署監
獄均已無存該署撫因興修費鉅無款可籌
擬清丈荒田設法招墾俟成熟後於各屬上
下忙徵收丁漕款項內覈計多寡提出一二
成估定應修數目分定年限先造監獄後建
衙署同時興辦事竣作正覈銷著卽照所議
認真辦理毋稍紛擾至考試為掄才大典士
子必須安分守法靜候校試乃宿松縣生員

石春禮竟因童生何兆文等被竊報案未獲
毆傷捕役復糾眾數百人拆毀懷甯縣署殊
屬不安本分近來各省士習不端每於考試
時聚眾滋事動輒抗官開署橫行不法若不
嚴行懲辦必至競相效尤風氣日壞何以端
士習而勸善良著該署撫卽將石春禮先行
咨部斥革一面提同滋事生童人等嚴行審
訊按律從重懲辦以儆將來在逃滋事之犯
並著勒限該地方官嚴拏務獲從重治罪毋

任漏網嗣後遇有此等案件該署撫當責成
該地方官認真嚴辦不得博寬大之名畏難
苟安致長刁風○又諭崇實奏川軍赴陝助
剿連獲勝仗一摺李輝武所部在隴州地方
剿回疊勝攻克隴屬之縣頭鎮與劉典等前
奏大略相同汧隴之間回氛肆擾雖經川陝
官軍會剿稍挫兇鋒該逆遁回隴西仍恐乘
隙紛竄李輝武所部現駐寶鳳一帶扼要堵
截卽著飭該提督與陝軍聯絡聲勢相機防

剿○襄沔僅駐數營兵力尚嫌單薄著崇實仍
遵前旨酌量添撥以固川省門戶兼為李輝
武後路聲援建南軍務卽著責成周達武認
真勦辦迅速歲事以便騰出兵力回顧漢中
毋得顧此失彼此次攻克縣頭鎮出力傷亡
人等著崇實查明分別奏請獎卹將此由五
百里諭令知之○又諭劉嶽昭奏恭報赴滇
日期一摺前據宋廷春奏迤西逆匪分股圍
逼省垣添兵扼守並據梁肇煌奏西逆圍逼

省城富民等城被陷。疊經諭令劉嶽昭趕緊赴滇。與岑毓英妥籌布置。現在該督已將黔省經手軍事料理完竣。於三月十六日起程進駐曲靖。岑毓英已帶兵赴省救援。劉嶽昭職任封圻。責無旁貸。即著力為其難。將省城防守事宜與岑毓英會商妥辦。以顧根本。其省城附近被陷之富民安甯昆陽新興等城。及附省賊寨。並著該督分撥兵勇迅圖攻克。以解省城之危。該督現調先鋒各營交提督

李家福統帶先赴曲靖。與總兵楊盛宗兵練互相接應。著即嚴飭該提督等激勵兵勇。迅籌攻剿。以振兵威。楚勇二千八百名。即交道員劉嶽曙管帶留黔。貴州龍里貴定等處賊匪該督即咨照該巡撫提督等派兵籌剿。將此由六百里諭令知之。○又諭劉嶽昭奏滇省軍情危急。餉需奇窮。上年八月間指撥之浙江續提銀六萬兩。廣東續提銀四萬兩。四川續提銀四萬兩。江西續提銀一萬兩。湖南

續提銀二萬兩。河南續提銀一萬兩。太平關續提銀一萬兩。粵海關酌提銀一萬兩。迄今未見分解。請飭催迅解等語。雲南省垣被圍。軍情萬分緊急。劉嶽昭現已統師赴滇。亟圖援剿。當此軍情萬緊。餉項奇絀之際。各該督撫等豈容膜視。著瑞麟崇實馬新貽李瀚章。劉坤一劉崐李鶴年。師曾。即將上年各該省續提解滇之款。照數委員迅速解赴滇省。不得再有短少。並著戶部再將有著之款指撥

滇省二十萬兩。以濟軍需。將此由五百里諭知瑞麟崇實馬新貽李瀚章。劉坤一。劉崐。李鶴年。並傳諭師曾知之。○又諭伊勒屯。何瑄。奏擊退哈密回匪。請飭催成祿出關。文麟。景廉等赴哈。並催撥烏城等處銀米一摺。西路逆回勾結哈密纏頭攻陷駐紮五堡之定西營盤。經已革都司趙英傑等帶領勇隊與勇目孔才所部合力夾擊。該匪始行退去。惟匪蹤飄忽。靡定難保。不去而復來。哈密城池久

無大員帶兵鎮守人心渙散勢必另生變故前經疊次嚴諭成祿帶兵出關文麟景廉馳赴哈密諭詞嚴切至再至三該提督等一味疲玩屢次飾詞逗遛深堪痛恨著卽趕緊馳赴哈城不准以後路糧餉為名託故遷延儻再畏難觀望致哈城復為賊踞必將該提督等執法從事決不寬貸該提督等當懍遵疊次諭旨毋貽後悔肅州軍務並著穆圖善催令楊占鰲迅速馳往該處接辦毋稍遲誤已

里坤哈密軍餉缺乏待用孔亟著麟興速撥銀數萬趕緊籌解並著文麟將安敦玉糧石速行挽運源源接濟以救眉急不得視為具文致干咎戾將此由六百里諭知麟興穆圖善成祿文麟景廉伊勒屯並傳諭何瑄知之○以四川勒平瞻對夷匪肅清邊境出力賞守備陳肇疇等花翎縣丞章宗城等藍翎餘加銜升敘開復有差並豁免各土司地方三年租賦○以貴州仁懷等處勦滅苗號各匪

出力予副將楊正高以總兵官簡放賞副將劉萬勝胡鳳岐廖永福李志高巴圖魯名號同知孫寶書都司彭福順等花翎守備鄧桂林等藍翎餘加銜升敘有差○庚辰諭軍機大臣等英翰奏皖軍續獲勝仗現擬親赴衛輝督勦一摺牛師韓等軍在滑縣境內及衛輝城北截勦獲勝黃秉鈞郭運昌等又在封邱迤北等處獲勝勦辦尚為得手該署撫就皖軍派出各隊分為三大軍親率黃秉鈞郭

運昌等卽赴衛輝相機督勦賊匪現已竄至東昌搶渡運河前有旨諭令英翰督軍入東著卽懍遵前諭迅統所部各軍馳赴東境會同李鴻章丁寶楨悉心籌辦現賊所向分投兜勦以期一鼓聚殲郭寶昌傷尚未愈著傳諭安心調理仍由該署撫派員照料以冀速痊將此由六百里諭令知之○以故阿巴噶扎薩克頭等台吉杜噶爾布木子勒爾濟勒桑圖布襲職○以浙江水師巡洋出力賞都

司張勳等花翎知縣劉定國等藍翎餘加銜升敘有差○贈河南延津陣亡哨官謝增千總銜子祭葬世職○予浙江因公淹歿把總毛化耀外委陳鳳華祭葬卹廕加等○辛巳諭軍機大臣等左宗棠奏勦擒獲勝派兵赴山東追勦崇厚奏擒竄荏平派隊堵扼丁寶楨奏官軍在荏平勦擒大勝並王正起等追賊疊勝各摺片丁寶楨所派王正起一軍並王心安所部於二十六七等日兩次勦賊於

荏平境內疊獲勝仗惟本日據恭親王等陳奏接據探報擒逆於三十日竄至荏平德平邊馬已至德州吳橋以北東光以南均見火光○是東軍雖獲勝仗而逆蹤實已北竄各軍仍落賊後此次逆匪狂奔注意河間天津著崇厚迅飭余承恩劉景芳陳濟清等軍確探賊蹤迎頭攔截毋令闖入津郡恩承現在望都地非扼要並著迅即整隊前赴河間會同定安鄭士魁等妥為堵勦恩承所統馬步各

軍應如何擇要駐紮著該侍郎與官文妥籌調派該將軍等兵力尚單著官文添撥勁旅協同堵扼以固北路前經疊諭李鴻章嚴防東北兩路乃仍令逆蹤紛竄若不迅圖補救該大臣問心何以自安現在定安崇厚恩承等軍俱形單薄著李鴻章迅督諸軍馳赴吳橋一帶扼要駐紮以為前敵諸軍調度郭松林楊鼎勳潘鼎新等軍已由高唐繞出德州並著該大臣飛催繞前迎擊毋許再有遲誤

致干重咎丁寶楨責任封圻不能遏賊東竄致令復擾近畿不得以獲有勝仗稍形鬆懈並不得專候左宗棠李鴻章會商致延時日著即督軍出境追勦以贖前愆並催王正起等先赴直境迎頭攔截以為北路屏蔽該逆雖全股東竄而追軍趕到恐又折回南擾是官軍徒奔馳道路於事何濟左宗棠著仍酌量情形於直東交界處所扼紮整陣以待所有劉松山等軍即催令前進到直東後就近

歸李鴻章節制。以一事權。儻左宗棠已入東境。追剿卽著英翰移軍於開州大名一帶扼紮。以防回竄。所有東軍陣亡弁勇著丁寶楨查明奏請優卹。左宗棠等另片奏請將陳國瑞歸山西河南撫臣節制等語。該侍衛桀驁性成。非威望素著者難以震懾其心。仍著左宗棠隨時調度。不必有所顧忌。該侍衛所部勇丁現已逾三千名之數。並著左宗棠嚴飭裁汰。妥為辦理。毋令滋生事端。該大臣身為

統帥。不得諉諸他人。為自全之計。俟事定後朝廷自有處置也。將此由六百里各諭令知之。○又諭德勒克多爾濟等奏查探邊防酌將蒙古官兵暫行遷調。並請飭察哈爾選派蒙兵以備調遣一摺。陝西回匪在柳樹澗一帶盤踞。並有圖竄包頭鎮之說。歸綏沿邊等處防務緊急。德勒克多爾濟等將扎那格爾第原帶蒙兵及駐紮歸化城之察哈爾蒙兵分別移撥。卽著照所擬辦理。惟賊蹤飄忽。防

剿未可稍鬆。並著該署將軍等檄飭扎那格爾第統帶所部確探賊蹤。於附近陝省各要隘認真扼紮。一面嚴飭馬陞督率沿河各營將士晝夜梭巡。毋稍疏懈。其各旗營應領餉銀馬價著劉飭歸綏道分別籌撥以資接濟。察哈爾蒙兵除病廢撤回外。所賸無多。著文盛杜嘎爾於察哈爾八旗內酌派馬隊兵五百名配齊軍械。並遴委幹員時加操練。聽候德勒克多爾濟等咨調。文盛等務將該蒙兵

加意挑選。毋得以羸弱充數。此項官兵赴防時卽著杜嘎爾管帶前往會同德勒克多爾濟等相機攻剿以期得力。將此由五百里各諭令知之。○又諭本日據三壽奏患病未痊懇請開缺調理已明降諭旨准其開缺回旗。並令善山保署理甯夏副都統矣。甯夏地方緊要不可無大員統率。金順現在東路剿賊到任尚需時日。著穆圖善傳知善山保卽赴署任。三壽俟善山保到任後再行交卸回旗。

將此諭知穆圖善並傳諭三壽知之○三口通商大臣兵部左侍郎崇厚奏福建籌濟兵米現由輪船起運到津擬飭天津道會同該省委員先行驗收屯棧報聞○以正白旗漢軍都統全慶兼署鑲藍旗漢軍都統○署甯夏副都統三壽因病解職以黑龍江布特哈協領善山保署甯夏副都統○以護送甘肅軍糧出力賞蒙古章京巴拉丹巴布多爾濟二品頂帶拉希等花翎色楞等藍翎○予河

南滑縣陣亡參將唐永清祭葬世職加等○予直隸祁州殉難學正于壯圖祭葬世職加等與獻縣殉難訓導陳成烈於天津府原籍均建專祠各家屬人等分別附祀○壬午諭軍機大臣等昨據恭親王等奏捻逆竄至荏平德平邊馬擾及德州當經諭令崇厚迅飭津郡防軍迎剿恩承定安等赴河間扼堵官文添撥勁旅協堵李鴻章左宗棠丁寶楨分路防剿茲據崇厚馳奏捻逆竄近吳橋東光

一帶請飭南路各軍繞前攔截一摺與恭親王等所奏情形大略相同現在津郡萬分喫緊崇厚雖飭余承恩等分路防剿兵力甚形單薄李鴻章務當懍遵連日諭旨迅督諸軍由直境繞赴賊前與東軍合力夾擊以期迅殄逆氛一面飛催郭松林楊鼎勳潘鼎新等軍繞前壓剿並著丁寶楨迅催王正起等軍先赴直境迎頭截擊以固畿疆恩承所統神機營各軍移赴河間一帶兵力尚單官文務

遵前旨多撥勁旅添赴該處助防毋稍延誤左宗棠仍當酌量情形迅速赴直東交界處所扼紮以防該逆回竄天津防務著崇厚嚴密布置毋稍疏懈東光吳橋並南皮滄州一帶運河船隻均著崇厚迅速提歸津郡以北毋任捻蹤搶渡將此由六百里各諭令知之○予河南輝縣陣亡千總汪桂榮祭葬世職加等○予河南各屬陣亡殉難紳民婦女一千九百七十七名口分別旌卹如例○癸未

諭內閣前因捻匪竄遁河南衛輝一帶疊經諭令李鶴年就地殲除該撫屢次摺奏亦以滅賊自任並稱兵力已敷勦辦無庸援軍前往助剿乃賊由清化鎮回竄該撫漫無布置任令由滑濬等處沿河東趨既未能痛加勦洗復縱賊竄入東境擾及畿疆張曜宋慶等軍曾否出境繞前兜擊亦未見有奏報貽誤軍情實難辭咎李鶴年著交部嚴加議處左宗棠李鴻章總統諸軍由東西大道兩路進

剿若能嚴密堵截何至任賊回竄現在該逆已擾及東光吳橋一帶該大臣等追軍又落賊後調度無方亦有應得之咎左宗棠李鴻章均著先行交部議處仍責令該大臣等督率各軍繞前兜擊迅將此股賊匪剋期殲滅毋再稽延致干重咎尋吏部議李鶴年照溺職私罪例革職左宗棠李鴻章均照不應重公罪例降二級留任得旨李鶴年著加恩改為革職留任左宗棠李鴻章均著照部議降

二級留任不准抵銷○諭軍機大臣等官文恩承奏捻逆北趨直省請飭各軍協剿李鴻章奏東昌勦捻獲勝催軍繞前兜剿各一摺捻逆由山東德州擾及直境之吳橋東光一帶津門防務萬分喫緊現聞逆蹤益向北趨距津郡愈近京畿東南面甚形空虛左宗棠等督兵防剿未能在豫境滅賊致令由大名東昌竄及近畿儻再不振奮精神認真設法繞前攔截自問當得何罪前據丁寶楨奏郭

松林楊鼎勳潘鼎新等軍已於前月二十六日由博平高唐繞向德州迎剿何以此時尚未繞出賊前著李鴻章迅飭該將領等不分晝夜盡力繞前務由西北壓向東南先固近畿門戶該大臣現赴東昌去賊甚遠著即懷遵前旨疾赴景德一帶駐紮調度不可稍緩須臾丁寶楨當迅督王正起王心安莫組紳等所部馳赴河間等處防堵恩承計已移紮河間著與定安等會商將河間迤東沿運河

一帶視賊趨重處所相機扼截與東軍聯絡聲勢官文現派總兵劉祺所部練勇三營移赴河間著卽飭令星夜前往與恩承等軍合隊嚴防直境兵力未厚左宗棠當由西南一路督軍疾馳東北屏蔽畿疆並著崇厚嚴防津郡分飭余承恩等軍與李鴻章前敵諸軍會合夾擊現在賊勢逼近肘腋剽疾異常該大臣督撫等均宜各知緩急連夜催軍北上毋待朝廷敦促也英翰當已遵奉疊次諭旨

督率皖軍馳赴東境著卽迅速前進分路趨向德州武定一帶儻遇賊蹤回竄卽可迎頭兜擊與李鴻章所部圍剿以圖聚殲將此由六百里加緊各諭令知之○又諭鄭敦謹奏布置澤州防務並擊退搶渡回匪一摺擒匪現由東省竄擾直境距晉邊較遠澤州防務業經鄭敦謹分投布置卽著責成該署撫認真防範毋以賊氛漸遠稍形鬆懈陝省宜川等處回匪勢甚鴟張竟在七郎窩對岸結筏

搶渡雖經已革臬司陳湜督兵擊退難保不乘隙復來著鄭敦謹嚴飭陳湜督率將弁加意防守不得掉以輕心再干咎戾晉省西面各屬與陝省延榆綏等處僅隔一河地段綿長必須添兵協守鄭敦謹現已檄令王巨孝帶兵五百折回甯吉一帶協防並將道員吳光春新募勇丁三千名分布沿河上下兵力稍厚然遠防不如近剿陳國瑞所部自可先其所急飭令前往吉州一帶渡河而西將宜

川等處回匪相機截剿以固晉疆劉典當檄飭陝軍與該侍衛聯絡聲勢兩面夾擊務將此股回逆剋期殲除毋任延蔓陳國瑞既赴秦晉毗境剿賊距左宗棠軍營日遠一切進止機宜著暫歸鄭敦謹妥為調度軍餉軍火亦著隨時撥給安住所部卽著在清化鎮屯紮以杜捻逆回竄將此由五百里各諭令知之○追予安徽三沙等處陣亡千總潘邦志等祭葬世職○予山東東昌陣亡副將嚴鴻

猷等祭葬世職加等○甲申諭軍機大臣等恭親王等奏捻趨南皮東路防務喫重擬將京兵酌量調撥崇厚奏津防喫緊調軍會合防剿並續奏賊撲靜海迎剿獲勝津郡情形萬急各一摺捻逆大股由南皮竄至靜海雖經陳濟清擊退而該逆繞赴東北距津十二里之稍直口已見邊馬津防情形萬分喫緊况刻下漕船連檣北上正在驗收轉運之際天庾正供尤關緊要著崇厚就現有兵力分

路防剿並知會英國法國破船將濠牆協同守禦以固津防且恐該逆繞赴北路窺伺京畿李鴻章務當懷遵前旨迅赴北路扼要駐紮相機調度郭松林楊鼎勳潘鼎新等軍早抵德州距南皮甚近何以此時尚未繞出賊前會同剿洗實屬意存觀望著李鴻章嚴飭星馳前進一面將該將領等遲延之處據實叅奏斷不准稍涉徇隱左宗棠卽由西南一路督軍馳赴東北以衛畿疆王正起王心安

莫組紳等軍著丁寶楨飭令迅赴河間等處嚴密防堵扼賊紛竄之路皖軍程文炳牛師韓方長華等豫軍張曜宋慶等並善慶溫德勒克西暨春壽等馬隊此時均行抵何處何以未見繞入直境迎頭截擊著李鴻章嚴檄催提合力兜剿免致賊勢紛馳益難收拾北路空虛亟應添兵扼守著恩承酌量情形覘賊所向擇地扼紮以固京師門戶其所派防守任邱之兩翼驍騎營馬隊應否移紮文安

與駐守大城之兵聯絡聲援之處並著該侍郎酌度辦理王亮等軍及河西務等處均著照恭親王等所擬妥籌布置香河寶坻甯河等處亦形空虛尤應統籌兼顧著官文酌撥兵勇實力防維並著萬青藜王榕吉督飭各該縣民團協同守禦保衛地方毋令匪蹤蔓及劉祺所部官文卽飭令趕緊移赴河間任邱以北會合恩承等軍嚴防直境毋稍疏懈將此諭知順天府並由六百里加緊各諭令

知之○命散秩大臣希元往奠喀喇沁扎薩克都楞郡王色伯克多爾濟茶酒賞銀五百兩治喪○乙酉諭內閣吏部奏丁憂人員請分別飭令回籍起復守制一摺前據李鴻章奏稱卽補知縣魏彥回籍守制後調營辦理營務糧臺各事宜請卽在營起復崇實奏候補道彭汝琮丁憂後採辦甘肅軍米需員請仍留四川責令經理當經降旨允准茲據該部奏稱查照章程均屬不符請旨遵行等

語卽補知縣魏彥著李鴻章飭令回籍由原籍呈報服滿候補道彭汝琮著崇實飭令回籍守制將來仍由原籍呈報服滿以符定制○又諭崇厚奏官軍勦擒獲勝力保津郡一摺捻逆竄犯靜海思渡運河西岸本月初五日經總兵陳濟清派隊堵遏副將鄧啟元統率所部在甄垛小灘等處迎賊鏖戰力挫兇鋒該逆敗向東南奔竄津郡以安現在郭松林潘鼎新等軍已到津郡卽著崇厚督飭陳

濟清鄧啟元等趁此聲威聯絡諸軍務將此股捻逆迅速殄除以清畿輔此次逆匪猝犯直境逼近津門追勦各軍均落賊後總由各該大臣等去前敵太遠以致各將領進兵紆緩不能力遏狂氛李鴻章左宗棠等務當迅赴前敵嚴督各軍實力兜勦以贖前愆毋再遲延致干重咎○諭軍機大臣等恭親王等奏軍情緊要添撥隊伍並請飭催追軍羅惇衍奏商辦保護海運米石定安奏現籌河間

防堵事宜崇厚奏津軍擊賊獲勝擒向東南敗竄各一摺捻股竄逼天津思渡運河西岸經崇厚派令總兵陳濟清等迎擊獲勝賊向東南敗走該侍郎力保津郡痛挫賊鋒深堪嘉尚仍著檄飭陳濟清等確探賊蹤相機堵截郭松林潘鼎新等軍現已陸續抵津是官軍聲勢較壯而賊走濱海一帶其勢漸窮李鴻章務當懍遵疊次諭旨妥籌方略迅赴前敵嚴飭郭松林等跟蹤追擊感之海隅使該

逆不得逞其奔突。一鼓蕩除。左宗棠行抵何處。何以數日並無奏報。著卽迅速北上。並飭令劉松山等趕緊北來。會同勦擊。河間一帶空虛。昨諭丁寶楨飭王正起等軍迅赴河間。扼賊紛竄。著卽星馳前進。毋再遲延。其程文炳各軍著英翰催同夾擊。並張曜宋慶等軍均著李鴻章派員迎提。以厚兵加捻股。雖竄往東南。離津門不遠。李鴻章等諒不至坐視肘腋之患。故作遲回也。恭親王等奏請飭恩

承赴王慶坨等處堵截。定安等由河間赴天津一帶迎截。刻下賊情稍異。難保不東西分竄。著恩承確探該逆趨重處所。會同定安鄭魁士等聯絡聲勢。相機扼紮。定安富和鄭魁士等應否仍紮河間之處。著恩承等會商妥籌布置。劉祺所部勇隊並著定安催赴河間。協同防守。明慶等所帶各隊均著照恭親王等所擬迅速辦理。京城內外尤宜防宵小。潛跡亦著咨行步軍統領衙門順天府五城團

防一體嚴查。毋得虛應故事。王正起等未到河間以前。著官文酌度情形。派兵填紮其附近保定一帶。亦不得以賊蹤較遠。稍涉空虛。天津為商賈輻湊之地。該逆久已垂涎。崇厚務須嚴飭在防將士。時加防範。毋稍疏虞。日來頻接奏報。尚合機宜。嗣後並著將附近軍情隨時馳奏。以慰廑繫。羅惇衍鍾岱奏保護海運米石情形。均屬妥協。卽著照該尚書等所議。妥為辦理。以期無誤。正供將此由六百

里各諭令知之。○又諭劉典奏新撥三關洋稅銀兩。擬分別派員領解。請催原撥廣東江蘇協餉。及請飭湖廣等省將奉撥陝省賑銀迅解各摺片。陝省軍務方殷。待餉孔亟。前經諭令閩海粵海江漢等關。於四成洋稅內各按月撥解銀一萬兩。又原撥廣東江蘇兩省協餉按月一萬兩。乃廣東等省撥解寥寥。設因餉需不繼。兵勇譁潰。於大局甚有關係。所有閩海關洋稅著英桂知會沈葆楨代為經

理卽由沈葆楨派員按月催領起運粵海關洋稅暨廣東省協餉著瑞麟飭令前經奏派辦理陝省米捐分局之臬司梅啟照等照奏定章程妥為經理交知縣洪需按期運解江蘇月協陝餉著丁日昌就近派委道員胡光墉按月催領起運以上餉需均由各該省運至湖北交陝甘後路糧臺道員王加敏經收至江漢關每月洋稅卽由王加敏就近催領並將洋協各餉一併轉運陝省交收並著曾

國藩瑞麟丁日昌將前欠陝省協餉迅卽籌款如數分起補解仍按月源源籌解以資接濟其上年由部奏撥山西省銀六萬兩四川湖北各銀七萬兩為陝省辦賑之用除湖北籌解銀一萬兩外山西等省並無分釐報解著崇實郭柏蔭鄭敦謹何璟無論何款迅速撥解以應急需毋許再有延緩將此由五百里諭知曾國藩瑞麟英桂崇實郭柏蔭鄭敦謹丁日昌沈葆楨並傳諭何璟師曾知之○

以直隸天津勦擒獲勝賞副將鄧啟元遊擊趙起都司韓維錡馬魁守備周永奎張恩榮劉恩榮巴圖魯名號○丙戌諭軍機大臣等羅惇衍等奏賊偏津門請飭各路官軍合擊並請飭統兵大臣擇要駐紮丁寶楨奏會商分道追賊並催隊赴運東防勦崇厚奏淮東各軍現抵津郡分隊兜勦萬青藜等奏遵飭各屬整頓團練並察看堡寨各摺片擒逆竄至津郡稍直口並靜海良王莊等處經津軍

擊敗退向東南郭松林等淮軍現已追抵津郡溫德勒克西等軍亦相繼而進王心安軍現已馳抵靜海崇厚商同諸軍分路壓勦該逆又向西南竄動深虞繞竄西北左宗棠現已由德州趨向東北著卽沿運河西岸探賊所向力扼運防毋任竄渡北犯定安等軍卽著駐紮河間一帶與左宗棠聯絡勢勢屏蔽京畿東南恩承著於河間以北覘賊所向扼要駐紮毋庸移赴王慶坨並著官文遵奉前

旨催令劉祺所部馳赴河間。以厚兵力。運河以西既有左宗棠軍防堵。王正起等軍。卽著毋庸趨赴河間。著丁寶楨卽督該將領等沿運河東岸向吳橋滄州一帶迎剿。現在津郡兵力較厚。該逆北竄不遂。必沿舊路回竄山東。李鴻章現在行抵何處。究竟如何調度。布置何以未見奏報。著懷遵前諭。迅赴前敵。相機扼紮。並嚴督各將領迎頭探擊。務乘諸軍會集之時。或乘夜攻刦賊營。或分路圍合。三

面兜剿。威諸海隅。就地殄除。毋任該逆逸出。又形蔓延。豫軍張曜宋慶等。並春壽馬隊。均著李鴻章嚴檄催提。馳抵津郡西南。分布兜剿。英翰飛督黃秉鈞等軍。由黃運之閒北上。合力夾擊。毋稍遷延。並著李鴻章遵奉前旨。將程文炳牛師韓方長華等軍。就近催提。先馳前進。遏賊回竄之路。郭松林等軍。距李鴻章營太遠。若無統帥嚴催。勢必稽遲。著就近暫歸崇厚調度。卽檄令由西北向東南壓剿。

與各路援軍合力夾擊。力圖聚殲。尤須防其繞向津東。由甯河一帶北竄。該將領等所需軍火糧米。卽由崇厚酌量接濟。儻不遵調遣。致誤事機。著崇厚卽行叅辦。海河一帶仍著崇厚嚴防。毋任賊蹤繞竄。該處搶船北渡。海運米石船隻。並著羅惇衍等會商崇厚設法保護。毋稍大意。李鴻章左宗棠軍報每多疏緩。嗣後軍情務當隨時勤奏。以慰廑繫。不得仍前疲玩。順天府屬東南各州縣團練堡寨

卽著萬青藜等督飭各牧令認真興辦。並派員分路督催。仍由該兼尹府尹等察看妥為籌畫。並妥辦粥廠。增撥米石。以濟窮黎。毋任失所。將此諭知萬青藜王榕吉。並由六百里各諭令知之。○以江蘇泰興縣捐輸軍餉。永廣學額六名。○以河南中牟縣捐修城工。永廣學額一名。○丁亥。以神靈顯應。加安徽潁州府城隍神封號曰顯佑。阜陽縣

城隍神封號曰靈感○諭軍機大臣等官文奏籌防北路飭軍遏截情形並請飭部撥餉各摺片捻逆竄至津郡淮部各軍業經追及余承恩陳濟清等軍已回顧津郡刻下丁寶楨所部東軍已與淮部各軍由運河東岸前進左宗棠所部亦由運河西岸前進津郡河間一帶兵力稍厚足數分布官文仍當飭令余承恩陳濟清等相機布守運河北岸以防竄渡並飛飭劉祺所部移赴河間任邱一帶

與京兵聯絡扼守俟續有援軍到防卽酌量情形飭令該總兵拔赴武清香河一帶防堵省城防務仍著官文在保定妥籌布置務臻周密直隸軍需用項浩繁前經諭令湖南湖北江西江蘇廣東福建各督撫每省協助餉銀十萬兩剋期由海道輪船解津交崇厚驗收轉解應用各該省至今尚無報解信息現在待用孔亟著戶部先於部庫內借撥銀三十萬兩迅速解交官文應用並著戶部嚴催

各該省速行撥解俟此項餉銀到津卽由崇厚扣留解部歸款其餘三十萬兩著於長蘆鹽課及天津關稅正款內隨時通融措撥官文當摺節動用支放毋稍冒濫並嚴飭防剿各營將弁會合各軍將此股捻逆迅速殄除毋得糜餉殃民致干重咎將此由五百里各諭令知之○又諭前據戶部奏請飭濱臨江海各省督撫籌解制錢運津為京師變通圓法之用當經諭令各該省督撫等照辦並令

崇厚先行存儲津門嗣據李瀚章等覆陳湖北試行情形現復據馬新貽奏稱提解錢數運津各一摺浙省釐捐項下制錢經馬新貽先提十萬串分批委員由輪船解赴天津此項錢文抵津後卽由崇厚驗收在津郡擇地封存仍遵前旨以籌備該處練餉為名聽候提用不可稍有洩露浙省委解之員於盤運交收事宜未能熟悉並由崇厚派員妥為經理需用經費卽由該處就近支銷馬新貽所

稱擬於起解時將錢數合計銀數並將銀價運費分計併算。卽於應解京餉之牙釐各項下作抵著。卽照所議辦理。仍著馬新貽體察浙省情形。如此次制錢運津後。民間用項不至短絀妨礙。卽隨時酌增續運。李瀚章等並馬新貽摺各一件。均著鈔給崇厚密看。將此各密諭知之。○欽差大臣左宗棠奏。官軍由德州馳赴天津。力圖截剿。擒匪得旨。覽奏與昨日丁寶楨奏報大略相同。已寄諭該大臣

等迅速督兵於運河東西兩岸分路截剿。以防北竄。著卽懍遵。疊次諭旨。妥籌辦理。毋再遷延。致干重咎。擒匪由直而豫而東。直犯津郡。剽疾異常。官兵節節落後。該大臣旣稱不敢飾詞諉過。亦不敢希圖引避。巧卸仔肩。卽當振刷精神。力圖補救。迅將此股逆匪聚殲無遺。以副委任。若再事延緩。致令遠颺。或任其東奔西突。擾及完善。震驚畿輔。徒事跟蹤尾擊。勦辦迄無成功。雖廷議寬大。亦不能為

該大臣曲為優容也。懍之。此旨並著由該大臣鈔給李鴻章閱看。○子江蘇故工部尚書王廣蔭入祀鄉賢祠。從署巡撫郭柏蔭請也。○戊子諭內閣。前因擒逆紛竄。諭令左宗棠嚴防直晉交界。李鴻章嚴防直東交界。以期分路迎剿。乃該逆由豫竄東。由東竄直。駛至天津附近地方。疊諭李鴻章督率所部前進。並將前敵各軍悉歸調度。以一事權。現淮軍雖先後到津。而該大臣自三月三十日自開

州發報後。迄今並無奏報。未知行抵何處。該大臣責任統帥。進剿機宜。豈宜遲緩至此。著卽統軍馳赴北路。督率各軍扼要駐紮。廣籌方略。相機殄滅。其已到之皖豫各軍。均著歸李鴻章調度。以專責成。左宗棠現已由德州前進。卽著扼紮運河以西。分兵追剿。丁寶楨亦已進駐交河。並著該大臣等會商。無分畛域。互相策應。該大臣督撫等均受朝廷重寄。斷不可稍有推諉。趨避。儻能一鼓殲除。自宜

同膺上賞。若再遷延貽誤，亦必重治其罪。懍之。○諭軍機大臣等：崇厚奏擬就運河築圍嚴防海河，並續奏逆蹤退竄靜海。淮軍拔隊壓追，丁寶楨奏暫紮交河，探賊攔截，各一摺。賊匪大股現在竄至靜海東南。淮軍郭松林、潘鼎新跟蹤壓剿，崇厚擬將各路大隊調集運河，挑築長圍，仿照上年東省防守運西辦法，扼賊竄路，再行疊剿。刻下賊情既異，且長圍工程非旦夕所能蒞事。總以嚴飭各

軍實力合剿，迅圖聚殲為要。著崇厚卽飭郭松林等軍奮力追剿，副將莫組紳等軍已抵靜海，並著丁寶楨飭令莫組紳、王正起會同淮軍合力夾擊。迅殄逆氛。李鴻章現在行抵何處？本日已明降諭旨，催令迅赴前敵。著卽兼程前進，與官文、崇厚會籌布置。懾諸海隅，為一鼓聚殲之計。丁寶楨卽著暫駐交河，覘賊所向，相機策應。王心安等軍自應留紮運河東岸，會同勦辦，以防回竄。其西岸兵力尚

單，並著該撫調軍扼堵，以資得力。賊蹤雖已稍遠，而運河海河防務仍關緊要。應如何嚴密布置，並津郡濠牆以外添挖二道濠溝之處，著李鴻章於抵津後會商崇厚酌度情形妥為辦理。左宗棠卽沿運河西岸探賊所向，力扼運防，為順屬暨河間保定一帶屏蔽。該大臣等務將此股迅就殄除，儻再縱令北犯，震驚畿輔，恐該大臣等不能當此重咎也。將此由六百里各諭令知之。○以直隸天津截

勦捻匪出力賞總兵官陳濟清大荷包一對、小荷包兩箇、白玉翎管一支、白玉搬指一箇、火鐮一件。○以直隸滄州防守出力賞還已革提督劉景芳頂翎。予陣亡守備李化龍把總鄧立廷祭葬，世職加等。

大清穆宗繼天開運受中居正保大定功聖智
誠孝信敏恭寬毅皇帝實錄卷之二百二十八

大清穆宗繼天開運受中居正保大定功聖智
誠孝信敏恭寬毅皇帝實錄卷之二百二十九

載餘

同治七年戊辰四月己丑諭軍機大臣等左

宗崇奏賊由天津靜海折竄而南分道防剿
李鴻章奏行抵東昌所派各軍節節抄前攔
剿各一摺捻逆自靜海縣東竄至縣屬四當
口餘股尚在天津縣屬之衛南窪左宗棠現
擬由西岸折回過連鎮後再行東渡督剿著
該大臣星馳前進會合李鴻章等官軍感之
河海之間會籌聚殲昨日又明降諭旨催令
李鴻章迅赴北路其已到之皖豫各軍均歸
調度茲覽李鴻章奏報旬日以來始抵東昌

擬赴德州吳橋等處扼紮實形遲緩擒蹤折
回北犯剽疾靡定正宜力圖埽蕩保衛畿疆
以副委任李鴻章身為統帥合圍既無把握
斷無任賊縱橫不籌殄滅之理著卽兼程北
上與左宗棠和衷商榷規賊所向迅殲醜類
儻再遷延觀望致賊四出紛竄該大臣問心
何以自安丁寶楨現駐交河卽與左宗棠李
鴻章協力同心會籌夾擊英翰所部各營未
識行抵何處著卽趕緊前進相機策應前諭

恩承於河間以北扼要駐紮應如何與左宗
棠等聯絡聲援協同勦洗之處卽著恩承妥
為調度此次南皮被陷余承恩畏賊不前距
南皮二十餘里任賊破城飽掠而去實堪痛
恨著崇厚就近查明據實奏參毋稍徇隱據
左宗棠奏現在句賊犯津實鹽梟高品所致
高品係滄州下窪高家口人糾集鹽梟馬賊
約三千人投入賊夥賊數有增等語亟應將
梟匪嚴行搜捕方不致互相勾結捻勢復張

著官文崇厚抽調官軍會同各該州縣地方
官將鹽梟認真躡緝並將匪首高品迅速拏
獲以孤捻勢直東官軍實已數倍於賊近聞
將領有虛報勝捷等弊著左宗棠官文丁寶
楨崇厚於直東將領中查明何員虛報勝仗
任意欺飾卽著據實嚴參以肅軍律儻扶同
徇隱別經發覺恐該大臣督撫等不能當此
重咎也前月二十六日左宗棠所發摺報尚
未遞到卽著查明在何處耽延仍一面另繕

復奏將此由六百里各諭令知之○又諭曾
璧光奏請飭四川湖南督撫轉飭援黔各軍
赴援並鼎照山賊首投誠各一摺貴州平遠
遵義各屬匪巢與甕開黃越等處毗連並與
龍里貴定各逆響應鎮甯踞匪亦未勦盡現
在劉嶽昭移師入滇上游無人夾擊自應迅
集援兵以資攻勦著崇實劉崑卽飭劉嶽曙
席寶田李元度唐炯蹇閣曾志友熊英豪賀
連級各軍由秀山等處迅赴安順進擣甕安

平越及龍貴苗疆各賊巢以期廓清黔境毋任遷延不進致誤事機各軍未到以前仍著曾壁光督同張文德嚴飭各營將士實力防維其白泥坵投誠苗匪該署撫務飭知府馬應鏜妥為辦理不可掉以輕心所稱張文德勦辦鼎照山賊匪各情是江內漸可肅清已准將何正觀免罪矣惟何正觀倡亂多年此次懾於兵威率眾乞降是否真心可恃仍著曾壁光妥籌安插毋令日後再生事端所有

沿江營壘並著飭令駐紮開州之戴榮宗認真防範俾免疏虞將此由五百里各諭令知之○命大學士朱鳳標管吏部事○以貴州鼎照山勦賊獲勝賞參將戴榮宗都司周有齡色圖魯名號同知用知縣劉培琳花翎副將林從太等升敘有差免投誠賊目何正觀罪予陣亡遊擊馮成龍舒善選祭葬世職加等○庚寅諭軍機大臣等羅惇衍等奏津郡守備情形並撥鹽關各款應用一摺賊匪現

由靜海滄州竄至鹽山去津稍遠崇厚當飭令各路援軍馳赴該處四面兜勦力圖殲滅尤須防其回竄毋稍疏虞賊匪是否全竄鹽山滄靜一帶刻下有無匪蹤著崇厚確查具奏鹽山逼近山東該侍郎記已飛咨李鴻章丁寶楨合力堵勦羅惇衍等現擬將津郡濠牆加高培厚並添挖濠溝以資守禦崇厚擬添練洋槍礮勇二營練勇二營並雇借外國輪船水陸兼防均著照所擬辦理所需經費

卽著於鹽關兩庫應解本年京餉項下先行借撥銀三四十萬兩剋期舉辦事竣覈實報銷不可稍有冒濫著崇實迅撥四川餉銀二十萬兩瑞麟迅撥廣東餉銀二十萬兩馬新貽迅撥浙江餉銀十萬兩趕緊籌備徑解部庫以抵天津鹽關兩稅應解部庫之數並著戶部咨催毋稍延誤將此由五百里各諭令知之○又諭成祿奏官軍圍勦緊急逆黨分竄連日掩襲情形一摺肅州踞匪屢經官軍

勦敗勢漸解散存城逆黨僅止數千正可乘機攻勦著成祿趕緊激勵將士設法環攻迅圖規復南山居民串通竄逆煽動五堡戶民戕官滋事該提督親往勦辦陣擒土逆首惡傳三冒料等正法其餘金佛寺各堡戶民仍當設法安撫慎重妥辦毋再滋生事端其逃出關外各匪卽飛咨文麟景廉並地方文武沿途截勦關外待援孔亟疊經嚴諭成祿帶兵出關該提督一味遷延疲玩飾詞逗遛置邊外軍情於不顧殊堪痛恨著卽趕緊帶兵出關將哈城等匪迅圖勦辦毋稍遲緩儻再畏難苟安致邊外稍有疏虞必當執法從事署甘肅提督楊占鼐現在是否起程著穆圖善懍遵疊次諭旨迅飭該署提督趕緊馳赴肅州接辦西路軍務毋再遲延將此由五百里各諭令知之○山東登州鎮總兵官周惠堂開缺養親以記名總兵官陳擇輔為山東登州鎮總兵官○以玩視營務革山東參將

李炳武職遣戍新疆汪宗發革職不准留營○以約束兵丁不嚴革甘肅遊擊王禮和職仍留營○予甘肅肅州陣亡都司王瑞千總韓占元祭葬世職加等○辛卯署安徽巡撫吳坤修密陳防範提督李世忠舊部兵勇情形得旨該署撫當不動聲色隨時嚴密防範毋令滋生事端○命候補鴻臚寺少卿袁保恆赴欽差大臣李鴻章軍營聽候差委○追予江蘇常州合門殉難前湖南巡撫譚世臨庶母戚氏暨親屬等分別旌卹如例○追予江蘇各屬殉難通判董崇恩等紳民一千四百三十九員名賞卹如例○撥山西烏槍四百桿解赴烏里雅蘇台將軍麟興軍營備用○

上以常雩祀

天於

園丘自是日始齋戒三日○壬辰諭軍機大臣等李鴻章奏官軍由東境轉戰入直沿途獲

勝情形一摺。此次郭松林等軍由東昌北上沿途追賊疊勝。直抵天津。該大臣行抵德州。擬暫行駐紮。相機派隊進剿。雖因該處空虛起見。惟該逆已竄鹽山。郭松林等軍自當奮力追剿。該大臣去前敵太遠。各將領無所稟承。於軍行不無遲滯。著卽懷遵前旨。統軍北上。扼要駐紮。以爲淮皖各軍調度。並著會商左宗棠等互相策應。迅籌殄滅。逆蹤去津未遠。該大臣既抵德州。一切軍情務當勤加奏

報。毋得仍前遲緩。將此由六百里諭令知之。○又諭英翰奏遵旨督軍入東會剿一摺。捻逆現由靜海滄州擾及鹽山。恐又將回竄東境。著英翰趕緊馳赴東昌。與李鴻章會商布置。覘賊所向。合力聚殲。另片奏奉到三月二十八日寄諭摺片。印花折損。郭寶昌賞件。僅有小刀一柄。餘皆遺失。該署撫所發奏報及疊奉寄諭均遲延多日。始行遞到等語。軍營文報最關緊要。驛站任意延緩。必致貽誤戎

機。著英翰咨會李鶴年會查沿途各州縣將經過驛遞挨站嚴究。訊明何站折損遺失。並在何處遲延之處。卽將該州縣按律嚴懲。迅速奏。一面仍著兵部由直境各驛挨站查至豫境。據實嚴叅。以肅郵政。將此由六百里諭令知之。○又諭庫克吉泰劉典奏甘回竄擾陝疆。連日剿辦獲勝。暨慶陽府城失守。隨卽克復各摺片。甘回竄擾隴涇一帶。經總兵蕭羣魁暨黃鼎等軍分剿疊勝。譚玉龍在邠

州剿賊。忽被賊股包抄。相持一晝夜之久。援兵未至。譚玉龍等力戰陣亡。知縣喻兆奎等率隊追剿。殺賊甚多。賊向正甯奔竄。邠涇毗連處所回蹤。蟄集若非痛加剿洗。不足以靖陝疆。北路廊延一帶土匪甚多。回逆尤剽疾異常。仍須防其東竄。著庫克吉泰劉典嚴飭劉厚基等各率所部相機兜擊。毋任竄入北山。復形延蔓。譚玉龍一軍卽著飭令胡日盛妥爲鈴束。並將邠長一路實力嚴防。慶陽府

城失守。當經雷正綰派兵收復。該處地方緊要。防勦未可稍鬆。應如何撥兵堵禦。遏賊入陝之處。著穆圖善庫克吉泰劉典悉心籌商。毋得臨事周章。頻煩兵力。將此由五百里各諭令知之。○以陝西邱家寨勦賊獲勝。予副將閻定邦以總兵官用。○復陝西邠州陣亡已革提督譚玉龍原官。予祭葬世職。諡武壯。交國史館立傳。副將張士榮參將陶輝寬遊擊言美良。都司呂金明。守備焦洪雲。千總劉秀江等。祭葬世職加等。○予山東茌平等處陣亡都司邱得功等祭葬世職加等。○追予江蘇各屬陣亡殉難紳民何世奎等暨婦女一千八百七十五名口分別旌卹如例。○追予江蘇金壇合門殉難民人史鳳韶等男婦二十八名口分別旌卹如例。○癸巳察哈爾都統文盛等奏遵旨挑練馬隊官兵五百名。聽候咨調報聞。○甲午常雩祀天於

圓丘。遣怡親王載敦恭代行禮。○諭內閣。官文奏永定河南四工河口漫溢。請將廳汛員弁分別叅處一摺。此次永定河南四工十七號隄埝漫溢。該廳汛員弁等未能先時搶護。平穩致令掣動大溜。刷開口門二十餘丈。實屬咎無可辭。著南岸同知余汝偕著革職留任。南岸四工固安縣縣丞胡彬著革職留工。以觀後效。守備尹光彩千總李柯均著交部議處。署永定河道蔣春元統轄全河。雖到任未久。亦屬咎有應得。著交部議處。此時工程正關緊要。著官文督飭委員陸慎言趕緊馳往漫口處所查勘情形。會同該署道迅速盤築裏頭。毋任再行刷寬。俟水勢稍平。趕緊籌辦堵合。並查明被水村莊。應否先行撫恤。著該署督妥籌辦理。毋令災民失所。○諭軍機大臣等。穆圖善奏官軍會勦回匪。克復狄道州城。並秦州勦賊。肅州激變各摺片。狄道州回逆甘心倡亂。肆逆已久。經穆圖善派兵會勦。

屢獲勝仗。力將州城攻拔。擒斬靡遺。實足申天討而快人心。河州援匪尚有數千。潛至北莊。其非真心悔罪。已可概見。該署督當細加察度。不可為其所紿。總須先將兇悍滋事逆回痛行殄盡。再准脅從各回投誠。不可將就了事。秦州回匪。本係狄河悍黨。在山溝內伏劫糧運。並圖撲犯秦城。經道員豫師探蹤會督各隊馳往追擊。力行壓退。克保州城。尚屬奮勇。所有在事出力員弁。准穆圖善彙入克

復狄道案內酌保數人。毋許冒濫。仍飭豫師速會各軍將秦州回匪殄滅。肅城久未攻拔。成祿王仁和所部兵勇。又復互相爭鬪。並激變金佛寺堡居民。縱勇在河西各村堡焚掠。肆擾成祿前已疊次嚴諭。催令出關。著穆圖善迅飭楊占鼈馳抵肅州。接辦成祿營務。以便該提督剋日起程。毋任藉詞延宕。至王仁和營勇與成祿所部彼此接仗。屢撫屢潰。漫無約束。現在逃至甘州駐紮。著穆圖善查明

啟釁情由。據實奏。並將逃馳甘州潰勇分別遣撫約束。毋任滋事。其激變金佛寺等堡居民。並騷擾清水堡等處之統將委員等均著飭令楊占鼈確切查明實情。由穆圖善嚴叅重辦。不得稍存姑息。將此由六百里諭令知之。又諭穆圖善奏甘省需餉甚急。請飭各省督撫將協甘專款徑解甘肅等語。前因穆圖善奏請分撥甘餉。設立後路糧臺。並由漢中採辦兵米各摺片。當交戶部速議具奏。

本日據該部奏稱甘餉十分竭蹶。請飭勻撥分解。並請飭王文韶辦理穆圖善後路糧臺各等語。甘省軍務緊急。餉項十分匱乏。必須各該省分別撥濟。方免譁潰之虞。即著照該部所擬辦理。左宗棠身任甘督。本屬責無旁貸。豈得坐視甘餉缺乏。置之不顧。著於前項借款解到時。飭令糧臺酌度分撥。穆圖善所部軍士尚有一百數十營之多。杯水車薪。斷難有濟。所有山西山東河南等省應解月餉。

著鄭敦謹丁寶楨李鶴年查照穆圖善原奏分給一半徑解甘省湖南江西兩省餉銀著劉崐劉坤一分給一半解由穆圖善新設糧臺轉解署湖北布政使王文韶本係辦理甘肅後路糧臺即著何璟傳知該員分投催提趕緊轉解以濟急需河東道所欠六年蘭州常餉著鄭敦謹飭令如數徑解蘭州毋庸由陝西轉解以免紆折至四川月協採米甘餉既經解至六年十月為止著崇實嗣後按月

源源解至漢中交甘省轉運局自行採買米石運甘接濟戶部摺著鈔給左宗棠穆圖善閱看並著該督等行知各該省迅速籌解毋得稍有蒂欠致誤要需阿拉善親王貢桑珠爾默特解運麥石牛隻接濟甘省甚屬急公著穆圖善傳旨嘉獎將此由六百里諭知左宗棠穆圖善崇實鄭敦謹郭柏蔭劉坤一劉崐丁寶楨李鶴年並傳諭何璟知之○又諭蘇鳳文奏越南正貢屆期據情代奏並密陳

鎮安防勦喫緊應否察看情形再行開關各摺片越南國王阮福時以來年己巳正貢屆期請示進關日期具見誠悃前因南太兩郡軍務未平該國例貢業經三次展緩現在由太郡至省道路既無梗阻自應令其依期入貢以遂其愛戴之忱著蘇鳳文查照向例進關之期行令該國王遵照辦理鎮安逆匪吳亞終盤踞歸順等處並著蘇鳳文督飭官軍迅速勦辦以靖地方越南貢使經由太郡儻

因鎮安鄰氛未靖即著該撫設法妥為護送令其繞道前進毋稍疏忽至河南直隸等省道途現無阻滯屆時由該撫咨行經過各省督撫一體妥為護送以昭慎重將此諭令知之○以克復甘肅狄道州城賞副都統善山保常順玉柄小刀各一把大荷包各一對小荷包各二箇提督李奉清高月桂饒得勝副將蘇家良二品封典總兵官吳于城副將田魁元胡光勝潘昌勝呂得祥羅啟祥委營總

常明參領正福參將王長勝林萬春陳富隆
葉占魁遊擊樊保泰張世才余東旺張政順
孫銑康達佐領莫依托都司王仕奎守備李
正榮王德隆巴圖魯名號守備胡玉升等花
翎訓導馬紀等藍翎知府舒之翰等加銜升
敘有差予陣亡副將陳長安參將關得勝劉
錫海遊擊周得順都司劉才棟祭葬世職加
等○乙未

孝端文皇后忌辰遣官祭

昭陵○諭內閣御史舒明奏存儲米石辦理未
能盡善請飭另行妥議並臚陳嚴杜竊米弊
端四條各摺片著軍機大臣八旗都統會同
該部彙入宋晉前奏漕糧改歸八旗存儲散
放案內一併妥議具奏○諭軍機大臣等都
興阿著迅速來京陛見並著於曾在軍營管
帶馬隊將領中揀選熟諳得力者數員一併
帶領來京盛京將軍著奕榕署理該副都統
著卽迅赴盛京任事錦州副都統著都興阿

派員署理奕榕未到任以前盛京將軍印信
都興阿卽交額勒和布暫行管理都興阿交
付額勒和布印信後不必俟奕榕到任接署
卽著趕緊起程毋稍遲緩將此由五百里各
諭令知之○又諭恭親王等奏請嚴定勦賊
限期丁寶楨奏擬赴東昌布置各一摺賊由
天津鹽山擾及山東之陽信海豐邊境武定
一帶現有劉松山張曜宋慶各軍並王正起
莫組紳東軍跟蹤追擊靜海滄州一帶亦有
楊鼎勳潘鼎新兩軍扼紮以防折竄兵力足
敷防勦丁寶楨現因東昌一路空虛慮該逆
由此南竄擬帶王心安一軍並郭松林所部
馳赴該處著卽在東昌一路嚴密布置不得
稍有疏虞致令逆蹤紛越運河水勢消長靡
定現在水勢雖旺防務仍未可稍疏著左宗
棠督率所部沿運河一帶視賊所向力行堵
遏所有沿河船隻著官文崇厚嚴飭該州縣
地方官速行提歸西岸以防逆騎搶渡不得

有名無實。現據恭親王等奏稱探聞賊有回擾滄州之信。是否賊匪分股。希圖牽掣官軍。著左宗棠檄飭各軍就近勦洗。英翰當懷遵疊次諭旨。督率所部皖軍。星夜兼程。由豫境馳赴武定。迤西迎頭攔擊。以杜回竄。至逆騎數月以來。疊擾直豫東三省。奔突數千里。來往自如。官軍十餘萬人。不能遏其竄越。各將領彼此觀望。粉飾戰功。並有縱勇擾民。致百姓戕殺弁兵之事。若再日久遷延。農民耕作失期。恐又別生他變。且入夏以後。田禾日長。賊騎到處潛伏。進勦更形棘手。況賊股現竄海隅。正可乘此機會。三面圍蹙。就地殄除。著李鴻章迅督前敵諸軍。步步圍逼。合力同心。認真勦辦。限於一月內。將此股賊匪全數殲滅。儻能於限內告竣。所有出力各將領。定必破格施恩。優加懋賞。如再遲延誤事。亦必當重治其罪。該大臣前在山東勦滅任賴股匪。此次總統北路軍務。尤須力加奮勉。肅清全

局。毋墮前功。總之勦賊之事。惟責成李鴻章一人。各將領統歸調遣。直東各路分段防勦。則左宗棠官文丁寶楨英翰崇厚等任之。如賊匪被勦窮蹙。由何路紛竄。則惟何路官兵是問。懷之勉之。正在寄諭間。據崇厚奏陳截守運河方略。並請飭江蘇派輪船兵丁來津巡防一摺。該大臣擬於捷地減河起至祁口一帶止。趕築長圍隄牆。先將運河截斷。以固北面。天津河間之防。再由運河西岸自滄州捷地直抵張秋。黃運交流處所沿河西北兩岸。連築長圍。分撥兵隊聯絡各州縣民團練勇分段固守。並請直隸練軍及京營各軍嚴守滄州交河東光吳橋景州沿河西岸一帶。令李鶴年英翰所部進扼東昌臨清。騰出湘淮大支勁旅。與東省各隊縱橫截勦等語。著李鴻章左宗棠官文丁寶楨英翰崇厚迅速會籌辦理。直境沿運一帶。著左宗棠官文崇厚妥商布置。東境沿運一帶。著英翰丁寶楨

督率所部扼防。毋稍疏忽。至該逆探知官軍沿河築牆。必應併力衝突。李鴻章專辦勦賊。當迅督諸軍合力進擊。使該逆無暇衝突。方為妥善。賊蹤逼近海隅。恐有洋人勾結暗濟。軍火著曾國藩。丁日昌。迅即派員將上海捕盜輪船。架礮配兵。星駛來津。交崇厚酌度。派令巡查嚴防海口。武定之利津大山兩海口。船隻甚多。著丁寶楨速行提歸南岸。毋任賊蹤紛越。劉銘傳前在山東勦平捻股。於諸將中較為出力。該提督受國厚恩。當思力圖報效。現在三月假期已滿。自當督率所部迅赴北路勦賊。李鴻章自應檄催該提督銷假。毋俟朝廷諭旨也。崇厚原摺著鈔給左宗棠。李鴻章。官文。英翰。丁寶楨閱看。將此由六百里各諭令知之。○又諭長善奏布置防守情形。請撥軍扼要堵剿一摺。捻逆前次竄近津郡。誠恐紛擾畿東。該副都統請酌撥大兵扼紮玉豐等處。以防捻竄東北兩路。所陳自不為

無見。現在捻由鹽山竄入東境。距畿東一路較遠。自不必再行徵調。致分兵力。惟賊蹤飄忽靡定。防範不可稍疏。且永平府屬無業遊民較多。關內外馬賊伏莽未淨。尤當防患未然。著長善就現有兵力。妥籌布置。並須勤加偵探。分路梭巡。庶期有備無患。以免疏虞。將此諭令知之。○以福建臺灣疊次緝匪出力。賞同知吳本烈。都司李忠元等花翎。知縣朱必昌等藍翎。餘加銜升敘有差。○追予廣東

潮州殉難道員鳳安建立專祠。○予湖南故雲貴總督勞崇光入祀鄉賢祠。從巡撫劉崐請也。○賞福建省丁卯科鄉試年老諸生林佐湯等三十一人舉人副榜有差。○丙申諭內閣翰林院侍講學士錢寶廉奏請嚴禁火葬一摺。火葬之習。久干例禁。近來浙江嘉湖等府。尚有此弊。若如該學士所奏。實於地方人心風俗大有關係。亟宜嚴禁。以挽頹風。著浙江巡撫出示曉諭。申明例禁。並恐他省沿

此陋習。著各省督撫通飭所屬州縣一併嚴禁。如有仍前火葬者。卽行按律治罪。其嘉興府向有惡棍阻葬等事。並著李瀚章飭令各州縣從嚴懲辦。以儆刁頑。○諭軍機大臣等。穆圖善奏各軍渡河西。勦獲勝。進擣河州東南二鄉一摺。官軍克復狄道州。後渡河而西。續獲勝仗。現在進擣河州東南鄉賊巢。著穆圖善卽飭派出各軍乘勝進攻。節節掃蕩。以期次第廓清。河東一帶。仍酌派勁兵扼守。以防該匪抄襲後路。至牟弗諦及燕脂川各部回眾。如果真心向化。將器械馬匹全行呈繳。原不妨網開一面。予以自新。惟該回性多反覆。難保不首鼠兩端。別生詭計。著穆圖善馳赴狄道。察看情形。妥籌辦理。仍一面督飭官軍將河西布置機宜。悉心調度。毋稍疏虞。將此由六百里諭令知之。○以甘肅甘州守城禦賊暨捐辦軍糧出力。賞道員崇福布政使銜。予知縣錢寶仁等以同知直隸州知州用。

並賞花翎。餘升敘有差。○丁酉。以神靈助順。頒甘肅甘州府。

關帝廟扁額曰福佑河西。○諭軍機大臣等。醇郡王奏請停築圍。勦擒之舉。依當限迅圖殄滅。一摺。據稱崇厚請築長圍。不獨工大費繁。非旦夕所能竣事。卽使築就。安有若許兵勇環守。且民與賊俱在圍中。恐賊之糗糧未絕。而民之儲蓄先空等語。擒逆一日不滅。閭閻一日不安。總須各將領同心協力。將此股剋期殄除。方為善策。前據崇厚奏請築圍。勦擒朝廷。恐曠日持久。難收實效。未經允准。嗣據該侍郎陳奏。截守運河之方。仍恐未必確有把握。令該大臣等會籌。並一面嚴飭李鴻章迅速追勦。左宗棠等實力防守。沿運一帶。本日據李鴻章奏賊騎飄忽。無從圍制。張秋至臨清。運河二百四十里。設防最難。費兵最多等語。匪蹤剽疾異常。朝廷惟以勦賊責成李鴻章。防務責之左宗棠等。著卽嚴飭各

將領等迅圖滅賊。築圍之舉。著李鴻章左宗棠崇厚等酌度辦理。醇郡王所奏。不為無見。原摺著鈔給閱看。前據崇厚奏請京營各軍協守滄州等處。沿河西安一帶。京營派出各軍。如全紮沿運西岸。則北路太形空虛。著恩承仍督各軍。在原駐地方嚴密防守。毋稍疏忽。將此由六百里各諭令知之。○又諭李鴻章奏官軍追賊獲勝。籌商布置情形一摺。捻逆由天津一帶竄向鹽山等處。經劉松山等

追勦疊勝。該逆以官軍俱在運東。仍圖西竄。第自張秋至臨清。運河水涸。黃水未能濟運。該大臣現令潘鼎新等軍。在滄州扼守減河。以杜入津之路。並令該藩司等察度布置。蓄水使深。辦理尚合機宜。卽著咨商崇厚妥籌辦理。東昌一路空虛無備。英翰計日可抵。該郡儻該逆竄往。正可以逸待勞。迎頭截擊。卽著該署撫嚴飭各將領整陣以待。力挫兇鋒。如郭松林一軍趕到。並著會商夾擊。該逆有

圖竄運西之語。內黃滑濬一帶。亟宜嚴防。著李鶴年飭令防兵認真扼守。毋任再行回竄。其衛河南岸船隻。著官文飭屬提歸北岸。以防竄越。丁寶楨前赴東昌。儻遇賊西竄。卽著會同英翰等分投痛勦。劉松山等軍並著李鴻章飭令奮力追勦。毋令該逆稍停喘息。則逆勢漸衰。兇勦較易。李鴻章現駐德州。距賊蹤較近。所有一切調度機宜。卽責成該大臣就近督飭辦理。如匪蹤去德州漸遠。卽著馳

赴前敵督率各將領等迅速奏功。毋得遷延。干咎。左宗棠等亦各懍遵前旨。嚴扼運防。毋稍疏虞。是為至要。將此由六百里各諭令知之。○調安徽布政使張兆棟為江蘇布政使。以安徽按察使吳坤修為布政使。仍署巡撫。直隸熱河道裕祿為安徽按察使。○以甘肅克復安定縣城。暨各軍勦賊出力。賞總兵官周模善副將翁九良黃飛熊白新州劉道明程高升李大發周三元陳得勝龔文愷蘇家

良張棟祥王銘忠參將田得勝李占超向科德鄭萬興李金發楊元亮陳政明彭宏連劉玉吳全勝張東五林金蘭程德升劉興發巴圖魯名號遊擊任得勝等花翎守備徐登朝等藍翎餘加銜升敘開復有差○予直隸軍營病故江蘇布政使鍾秀祭葬卹廕○予甘肅各屬陣亡殉難都司蔣得魁等官弁紳團七十一員名分別賞卹如例○戊戌諭軍機大臣等鴻臚寺少卿朱學勤奏請催提督勦賊並暫停直隸六軍各摺片劉銘傳自勦滅賴汶洸等股匪後乞假養疾該員本係直隸提督值捻匪竄犯近畿卽應力疾銷假赴直勦賊以副專閫之寄况現值三月假期已滿若竟晏然安居豈人臣急難赴公之義該提督起自卒伍不數年間擢至提督受恩深重現當捻逆猖獗之際當不至苟且偷安頽然自棄著李鴻章卽催令該提督迅督所部馳赴直隸山東一帶隨同該大臣勦賊將此股

捻匪迅速殄除以圖報稱儻或始終遷延卽由李鴻章奏奏以肅紀綱直隸所練六軍規模甫立卽值鹽匪起事捻逆竄擾勢難按期操練而所需餉銀糜費甚鉅該少卿擬請將六軍暫行停止將派調之遵化等軍應支餉項歸於軍需項下支給以節靡費俟捻股勦盡別圖良策等語練軍為久遠計用勇不如用兵惟將來軍務平定各營勇丁若何安插亦須籌及應如何籌畫俾無流弊之處著左

宗棠李鴻章英翰各就所見會同官文妥商籌辦朱學勤原摺一件著鈔給李鴻章閱看片一件著鈔給左宗棠等閱看正在寄諭間據左宗棠奏報馳抵吳橋會勦情形與昨日李鴻章所奏大略相同賊騎剽疾異常不數日間已由武定竄及平原禹城之間必須各軍儘力追勦方可制其奔突該大臣旣稱現在局勢可以制賊李鴻章丁寶楨英翰各路會齊兵力更厚誠不可失此機會左宗棠現

與程文炳一軍駐紮吳橋著卽偵探賊蹤相機扼剿嚴守運河西北兩面過其北竄李鴻章著懷遵前次諭旨嚴督各軍感賊黃運之交於一月內趕緊剿辦迅殄賊氛一面咨會丁寶楨英翰力遏運河西面免其紛竄並迅飭各軍分路兜擊共奏膚公將此由六百里各諭令知之又諭劉崐奏楚軍攻克覺林寺賊巢並截擊苗匪獲勝現籌進剿暨查辦瀏陽醴陵會匪情形各摺李元度一軍自攻克轎頂山等老巢後招撫毛家棚各寨並勦撫三角山白茅鋪等三十六寨將偏刀水前路略定焚毀朱村收復覺林寺後路之高臺等處攻克拖尾營並與統帶川軍之道員蹇閻等會合堵剿將覺林寺前壘力行攻拔生擒逆首朱明月勦辦甚屬得手著劉崐卽飭令李元度乘此聲威將偏場踞逆悉心掃除務將逆首劉儀順擒斬以靖教匪根株至分犯晃州沅州麻陽等處苗匪經該處文武各

員並席寶田所部分路堵擊力加勦洗疊獲勝仗殲斃極多著劉崐卽飭令席寶田等軍將黎平苗匪速行擊退進剿寨頭並其餘苗巢務期悉行殄除毋任牽掣援軍西進之路現在川省援軍業已入黔卽著崇實責成帶兵之道員蹇閻知府唐炯等將尚大坪玉華山教匪老巢攻拔並著曾璧光督派黔軍會合勦辦肅清附省肘腋之患此次李元度等並各營出力員弁勇丁著劉崐擇尤分案保

獎毋許冒濫至湖南會匪屢在瀏陽醴陵滋事現復經該處兵勇團練將起事匪犯勦殺多名惟未獲餘黨潛伏尚多仍慮散而復聚著劉崐卽嚴檄該地方文武會督紳團設法認真搜捕務當淨絕根株毋任一名漏網將此由五百里各諭令知之○湖南巡撫劉崐奏山西按察使蔣益澧因病請假得旨蔣益澧著賞假兩箇月趕緊調理俟期滿後卽行馳赴山西臬司新任接辦防務所部兵勇著

受為選擇酌帶赴晉以資得力○派大學士倭仁吏部尚書單懋謙禮部尚書全慶署禮部右侍郎鮑源深工部左侍郎魁齡右侍郎潘祖蔭內閣學士王祖培都察院左副都御史繼格為殿試讀卷官○以戰功卓著賞陝西軍營中書科中書吳士邁員外郎銜花翎以江西萬載等處勦捕竄匪出力賞縣丞鮑承宣等藍翎知縣江璧等加銜升敘有差○予山東武定陣亡副將沈義勝祭葬世職加等○予貴州覺林寺陣亡參將周君耀等十六員祭葬世職加等軍功蒲秀智黃國崇賞卹如把總例○予湖南瀏陽陣亡團總武生張文慶賞卹如例○追予江西瑞州等處歷次陣亡軍功陶忠烈等二十七名賞卹如例○賞會試年老舉人黃鳳翔等二十一人司業編修學正職銜有差○旌表守正捐軀奉天新民廳民張甸發妻王氏

大清穆宗繼天開運受中居正保大定功聖智誠孝信敏恭寬毅皇帝實錄卷之二百二十九

集嘉謨爾多士其敬聽朕命危微精一之旨。

蹤隆古者。豈徒儉不足以示國歟。抑務其名而不求其實之過歟。今欲使天下黜華崇實。易俗移風。何道以致之。武備之要。訓練為先。蒐苗獮狩。四時教戰。成周之制。備已。漢有京師教試之法。有州郡教試之法。能詳悉言之歟。唐設府兵。三時勸農。一時講武。人思自奮。悉為精銳。果何由而得此。宋初收天下勁兵。列營京畿。為禁兵。親御近郊閱武。京師之兵。稱為強盛。而州郡率皆疲弱。意在懲前代藩

鎮之弊。其制果盡善歟。明成繼光練兵實紀一書。為談兵家所稱善。其六練之法。能備詳之歟。國家整軍經武。兵制修明。近復練兵近畿。用備藩衛。果何以慎。簡軍實。俾各營悉成勁旅也。上古無司刑之官。虞命皋陶制刑。為五刑所由昉。周官五刑之屬各五百。而呂刑言五刑之屬三千。所增減者安在。楚之僕區。鄭之刑書。晉之刑鼎。作於春秋時。而論者謂李悝法經六篇。為後世律例所自始。其果然

歟。漢初約法三章。厥後蕭何定律令。於李悝法經。凡益若干篇。叔孫通復益者。何律。唐之律令格式。宋之刑統。元之至元新格。大元通制。明之大明律令。其輕重繁簡之數。可約舉歟。朕欲本欽恤之心。行明允之法。司憲者宜如何持平協中。以臻刑期無刑之邦治也。凡茲四端。懋修以建極。節用以阜財。訓卒以詰戎。明罰以勅法。經邦體國。莫要於斯。爾多士其詳明著於篇。毋泛毋隱。朕將親覽焉。○庚

子諭軍機大臣等。英翰奏。會商機宜。擬馳赴臨清布置。並請飭天津撥給米石。及南樂等處民圩。剗斃員弁各摺片。捻逆竄向禹城。高唐等處。前阻黃流。西北兩面。又有運河足資守禦。正可乘機兜剿。現在李鴻章駐紮德州。丁寶楨駐紮東昌。若英翰移紮臨清。足成犄角之勢。卽著照所議。會同李鴻章。左宗棠。于寶楨。妥籌商辦。更番扼守。更番輪戰。以期迅速殄滅。此時各路大軍不下十餘萬。而捻逆

不過數千。該大臣督撫等屢奏賊勢窮蹙。而任其竄突。莫可制禦。總由各將領互相觀望。不肯實心痛剿。試思合數省兵力。剿此殘寇。不能及時殄滅。該大臣等久任統帥。捫心豈不自愧。卽著李鴻章妥籌方略。申明紀律。奮加勦洗。毋得再涉遷延。致干咎戾。儻任該逆竄渡運西。必當查明由何路竄逸。將沿途督防之該大臣督撫等從嚴懲處。決不寬貸。天津賑米尚有存餘。英翰軍營需米甚急。卽著

崇厚撥給一萬石。派員解交英翰軍營。以資接濟。如此項米石。不堪食用。並著崇厚另籌撥解。免致轉折。徒煩運費。丁寶楨所調吉林黑龍江丹丁馬隊三千名。前諭將挑出之一千五百名。飭赴直隸交春壽管帶。其餘一千數百名。丹丁馬隊。著訓練餵養。以備調遣。此項馬隊現紮何處。春壽所帶一千五百名。能否得力。著左宗棠、丁寶楨查明覆奏。直隸民團屢經戕害官弁。前已明降諭旨。令地方官

嚴行禁止。何以此次南樂元城復有此等惡習。並敢劫掠銀兩。馬匹。開槍抗拒。其為地方奸棍。已可概見。豈可稍事姑容。著官文再行飭屬嚴行曉諭。務使軍行無阻。並恐山東民團亦有此弊。著丁寶楨一體飭屬豫行曉示。儻敢戕害官弁。卽行嚴辦。以儆刁頑。該大臣督撫等亦必嚴飭各帶兵將領。於所過圩寨。不可騷擾地方。庶兵民相安。不至互相仇恨。將此由六百里各諭令知之。○三口通商大

臣兵部左侍郎崇厚奏。辦理津郡保甲撫恤難民得旨。所有撫恤及清查戶口事宜。著督飭各員認真辦理。毋得虛行故事。○予直隸南樂被戕運同馬駿祭葬世職。如陣亡例。○予河南滑縣陣亡都司魏玉祭葬世職。加等。○辛丑諭軍機大臣等。給事中陳鴻翔奏。請嚴禁兵勇搶掠。並各營毛勇。改與勇丁一律服色。各摺片。各路援直兵勇。疊經諭令統兵大臣督撫等嚴禁搶掠。以肅戎行。若如該給

事中所奏。兵勇在天津售賣所搶驢馬衣服等項。經地方官嚴禁。始行斂跡。並有毛勇服飾與髮賊無異各情。是其不遵紀律毫無忌憚。已可概見。該管將領所司何事。何以縱容至此。該統兵大臣督撫等既不能滅賊以衛民。又不能申法以懲勇。其何顏以對此窮黎。著左宗棠李鴻章官文英翰丁寶楨崇厚嚴飭各將領等。務當恪守紀律。不得仍前搶掠。儻有前項情弊。卽按軍律嚴辦。其毛勇服飾

尤駭觀瞻。並著查明飭令改與勇丁一律。不得稍有歧異。經此次申諭後。儻仍前玩忽。或經科道參奏。或別有訪聞。必將該大臣督撫等嚴懲。各將領以軍法從事。毋謂不教而誅也。原摺片均著鈔給閱看。將此各諭令知之。○又諭德勒克多爾濟等奏難民土匪回匪滋擾蒙古遊牧。現經官軍擊退。並籌補馬匹一摺。甯條梁等處回匪勾結難民土匪。在蒙古遊牧邊界四出擄掠。該將軍現飭扎那格

爾第督兵防剿。卽著嚴檄該貝子相機布置。遇賊卽擊。毋任再行紛竄。儻該貝子仍前玩泄。未能實力堵遏。卽著德勒克多爾濟等據實參奏。並飭令貝子已達爾琥總兵馬陞一體嚴防。毋稍疏虞。金順著恪遵前旨。迅將甯條梁攻克。以便繞赴東路。藉保完區。並彈壓匪眾。不至四出滋擾。難民紛竄搶掠。多由困苦失所以致流而為匪。並著金順咨商穆圖善派員將收復地方難民未經歸業者。妥為

安插撫恤。裁撤營勇。並給賞令其回籍。以免別滋事端。扎那格爾第所報防兵馬匹多有倒斃。亟應籌補。以資乘騎。卽著照德勒克多爾濟等所擬。妥為辦理。將此由六百里各諭令知之。○又諭蘇鳳文馮子材奏太郡官軍疊克全若等處賊巢。疏通鎮安餉道。蘇鳳文奏鎮安官軍收復東山寨等處。並攻克大虎巖。現仍督軍進剿各一摺。龍州匪股紛擾。雖經官軍攻拔下凍巖寨全若等處賊巢。殲擒

匪首黃忠傳陳七等多名。疏通鎮安餉道。而龍英向武鎮遠等土州地方。匪蹤麇聚。尤應及早殲除。著蘇鳳文馮子材。仍飭姚茂田等軍乘勝進攻。並知會諒山夷官兩面夾擊。迅掃邊氛。一面檄飭各該地方文武。於要隘處所實力嚴防。毋稍疏懈。東山寨等處匪巢林立。經道員覃遠璉會同李雲梯各軍分路攻取。將大虎巖一帶賊壘悉數蹋平。餘匪向歸順州大道墟等處遁去。逆匪吳亞終勢力漸衰。

潛結鎮遠向武各股逆竄。擾右江河道。希圖牽掣官軍。該逆負固稽誅。正宜乘此以威。一鼓聚殲。著蘇鳳文嚴飭覃遠璉等會合下游巡防水師及劉玉成等軍奮力勦擊。以期掃穴擒渠。毋得遷延觀望。貽誤事機。將此由五百里各諭令知之。○又諭伊勒屯何瑄奏巴里坤哈密軍務緊急。請催援兵一摺。西路賊匪勾結哈密纏頭。攻撲哈城。雖經伊勒屯等派勇會同駐哈員弁將賊擊退。而據獲賊

供稱烏垣踞逆已會商吐魯番各處回賊擬於三四月間分路東犯。該逆等蓄意大股內擾巴城等處。兵力孤單。勢甚危急。文麟景廉已抵安西玉門。距哈密甚近。何以屢次催令赴任。猶復頓兵不救。實屬大負委任。著文麟景廉接奉此旨後。卽日馳赴哈密。將防守事宜妥為布置。儻再意存觀望。必將該大臣等軍法從事。成祿一軍圍攻肅州。久無成效。朝廷未加嚴譴。特令移師出關。至今尚未成行。

尤屬有意延玩。署提督楊占鼂現在是否抵肅。卽著穆圖善催令該署提督速將肅州軍務接辦。成祿交卸後。卽日帶兵赴援。關外不准稍事逗遛。如仍前玩泄。貽誤戎機。必重治其罪。決不寬貸。原摺著鈔給文麟。景廉成祿閱看。將此由六百里諭知穆圖善文麟。景廉伊勒屯成祿。並傳諭何瑄知之。○署山西巡撫鄭敦謹奏。匪蹤回竄直境。酌撥營勇移守固關。得旨。捻蹤現竄山東禹城一帶。難保不

乘隙渡運一意西趨固關自應添防遼路各隘口亦不可稍形疏忽著督飭各將弁嚴密防守陳國瑞一軍催令迅速渡河相機截剿晉省西面河防並著陳湜實力堵禦毋再疏虞致干重咎○壬寅

上御養心殿召讀卷官入親閱定進呈十卷甲第○吏部以大學士曾國藩朱鳳標應定何殿閣請得旨曾國藩著授為武英殿大學士朱鳳標著授為體仁閣大學士○盛京將軍

都興阿奏請將蒙古官弁改獎得旨薩金波保著註銷三品台吉賞給頭品頂帶吉克莫特等十五員均著賞戴花翎○癸卯

上御太和殿傳臚賜一甲洪鈞黃自元王文存三人進士及第二甲許有麟等一百二十七人進士出身三甲鄭賢坊等一百四十人同進士出身○諭軍機大臣等李鴻章奏捻逆折竄東北官軍分投兜剿崇厚奏捻竄滄州迤南扼守防剿情形各摺片捻匪由高唐博

平折竄平原陵縣等處直趨滄州勢甚剽疾雖經劉松山等軍在平原夜擊賊營迄未痛加殲戮現在滄州捷地減河已開楊鼎勳潘鼎新等軍在該處築牆沿岸扼守將撲牆賊匪擊退逆蹤已向東南一帶逃竄左宗棠追剿之兵亦至牯河南岸惟減河下游淤淺處所尚多著崇厚趕緊設法疏濬並飭楊鼎勳潘鼎新等軍分紮減河力固北面至由滄州抵德州一帶沿河西岸尚無兵勇僅恃民團

堵禦不足以資扼守崇厚現咨令鄭魁吉劉祺所部分赴薛家窩泊頭與淮軍聯絡聲勢並飭余承恩由靜海滄州與楊鼎勳等軍協同迎截而泊頭以南仍屬空虛且鄭魁士等軍兵力亦單必須兵有後繼方可以資接應據崇厚奏稱已函商李鴻章就近籌辦即著該大臣派兵力顧德州以北運防並著左宗棠定安恩承就近相機援應兼將運河西岸嚴密巡扼官文當速籌兵勇添赴該處力扼

運西以資厚集。儻任賊蹤搶渡河西。擾及河間。惟左宗棠官文崇厚等是問。恐不能當此重咎也。李鴻章現駐德州。當督飭前敵諸軍。儘力窮追。毋任賊蹤稍行喘息。並著設法繞前兜擊。丁寶楨一面分軍與李鴻章所部合剿。一面與英翰各軍嚴扼東昌臨清河防。並著英翰酌抽得力將弁。與李鴻章丁寶楨所部分路兜剿。迅圖殄滅。本日復據左宗棠奏稱防剿情形一摺。與李鴻章崇厚所奏大略

相同。該大臣現進軍鹽山一帶。欲與英翰丁寶楨所部各軍。蹙諸海隅。以期局勢較緊。所籌不為無見。惟賊蹤異常飄忽。恐各路官軍未集。而賊已乘隙他竄。左宗棠李鴻章丁寶楨英翰等總當迅速乘機督軍會剿。不可稍緩須臾。致令賊蹤蔓延。運河水勢消長靡定。民團心志不齊。難於深恃。左宗棠當隨時相機兼顧。不可稍涉大意。東昌臨清德州至滄南一帶運防官文丁寶楨英翰當彼此兼顧。

聯絡聲勢。以防賊騎回竄。總須一面籌防。一面籌剿。臨機相度。不可偏執一見。至左宗棠李鴻章均係督兵大臣。前因賊竄保定等處。左宗棠已抵直境。距賊較近。是以令其總統前敵諸軍。嗣因賊竄山東。距李鴻章行營較近。是以將前敵諸軍改命李鴻章總統。朝廷本係為剿賊迅速起見。於該大臣等並無軒輊。左宗棠現雖將張曜宋慶等軍交與李鴻章統帶。亦當與李鴻章合力會辦。不得稍涉

推諉。該大臣等同辦一事。且現在駐紮處所相距不遠。自應以國事為重。和衷商酌。不可固執成見。各分畛域。前敵諸軍雖已交李鴻章調度。左宗棠亦可就近檄剿。以期迅速。藏事將此由六百里各諭令知之。○又諭前因劉銘傳剿賊較為出力。且三月假期已滿。是以諭令李鴻章傳諭該提督迅赴直隸山東一帶剿賊。茲據李鴻章奏稱已兩次手書傳令到營。襄助曾國藩亦為懇切函催等語。劉

銘傳受朝廷不次之擢。任重專閫。邇來捻勢猖獗。自應奮勇誓師。滅此朝食。以圖報稱。且三月假期已滿。骸疾諒已全愈。豈可藉病推諉。自耽安逸。現在捻逆偏處黃運之交。各路大兵已集。機會大有可乘。李鴻章既稱劉銘傳熟悉捻情。卽著再行飛催銷假。迅速到營。不准片刻稽延。致誤軍事。並著曾國藩吳坤修就近催令啟行。現在軍事甚急。若待添募兵馬。必至耽延時日。所部銘軍。既派丁壽昌

在邳州代為操練。卽可統率舊部。鼓行而前。不必另行招募。至湘淮皖豫各統將。平日既與劉銘傳相習。該提督到營時。卽著總統前敵馬步各軍。奮力勦賊。以期迅奏膚公。榮膺上賞。該提督素日尚明大義。當不始終延誤。自外生成也。銘軍啟行時。如有應需款項。著曾國藩代籌助給。以利進行。將此由六百里諭知李鴻章。曾國藩。並傳諭吳坤修知之。○甲辰。諭軍機大臣等。都興阿奏遵旨嚴審要

犯供認強搶得賄縱盜大概情形一摺。前因練目陳安屢經被控。諭令麒慶解交都興阿嚴訊。茲據該將軍奏稱。審明該犯夥眾強搶得財放盜等情。均已屬實。惟假團練擾民一節。該衙門並無案據。其在熱河有無擾害被控實蹟。請飭熱河都統詳查再辦等語。匪犯陳安。始則糾眾行劫。拒捕傷官。迨充番役後。復於撫民廳甯遠州等處。得賄縱盜。肆行搶劫。實屬怙惡不悛。若不按律嚴懲。何以安閭

閭而靖奸宄。陳安一犯。卽著照響馬例定擬。所請飭熱河都統詳查之處。著毋庸議。將此諭令知之。○又諭。理藩院奏據土爾扈特汗布彥烏勒哲依圖報稱。收留厄魯特人眾。請歸布倫托海辦事大臣妥為籌畫。並應給俸餉。請飭戶部覈議各等語。厄魯特人眾。因伊犁失陷。逃避土爾扈特。遊牧地方。情極可憫。而該汗布彥烏勒哲依圖。竟能容留洵屬深明大義。第厄魯特人眾。寄居該遊牧地方。究

非久遠之計。卽著交李雲麟、明瑤、錫綸就近將厄魯特十四佐領下官兵等妥為安插。酌給耕牧地方。以資生計。所需俸餉應如何支給之處。著戶部覈議具奏。原摺著鈔給李雲麟等閱看。將此由六百里各諭令知之。○又諭總理各國事務衙門奏。西疆毗連俄境各卡倫請飭建立界牌。鄂博一擲。新疆各城多與俄界毗連。前經分界大臣與俄官會勘分定。嗣以該處回氛不靖。未能舉辦。續據俄使

照會內稱。俄國官員擬從昌吉期台至烏科卡倫一帶撤出中國卡兵。其建立鄂博一端。並請速定等語。分界一事。現既可以設法辦理。自應從速舉行。且呼圖克圖進攻哈薩克一案。卽因界址未清。俄國得以藉口。此時若不速籌建立。勢必釀成釁端。辦理更形棘手。著奎昌、福濟、車林多爾濟、李雲麟、明瑤、錫綸咨商麟興、崇金、錦丕勒、多爾濟。速將分界事宜會同俄國邊界官員查明。三年所分界址。

將應建界牌鄂博概行建立。以固邊防。原摺均著鈔給閱看。將此由六百里各諭令知之。○引見滿洲考取軍機章京人員。得旨。豐紳泰、增林、桂斌。文綬、文齡、額勒精額、如松、文英、榮、望、曾、銖、穆、特、亨、額、德、克、吉、訥、那、丹、珠、鈺、坤、承、恩、鄂、昌、莖、岫、玉、恆、佛、爾、恭、額、豐、仲、泰、富、華、均著記名。以軍機章京用。○署山西巡撫鄭敦謹奏。添派紳士襄辦省城防務。得旨。現在捻蹤離晉。雖覺稍遠。而地方團練。本係應辦

之事。仍不可稍形鬆懈。所請酌保數員之處。著俟軍務肅清。再行奏請。○以失察勇丁搶奪革山西副將胥建發職。勒令回籍。○予山東海豐等處陣亡千總戴文彬黃紀成。從九品胡湘。祭葬世職加等。○乙巳。諭軍機大臣等。崇厚奏。擒撲滅河。淮軍截擊獲勝一摺。擒逆大股。由滅河以南。撲犯于家橋等處。經官軍追剿。該逆敗竄。慶雲所屬之舊縣。匪蹤異常剽疾。亟應速籌兜擊。著左宗棠、李鴻章、懷

遵二十五日諭旨。迅速會商。督軍進剿。不可稍緩須臾。致令賊蹤蔓延。崇厚務將減河下游淤淺處。所趕緊設法疏濬。與左宗棠等妥籌守禦。毋稍疏虞。左宗棠李鴻章當和衷共濟。迅殄逆氛。以副朝廷委任。不得各分畛域。貽誤戎機。自干咎戾。將此由五百里各諭令知之。○署直隸總督官文奏。派按察使張樹聲等察看民團。互相激勵。以資保衛。得旨。著卽飭令該臬司等督同地方紳團。實力防守。毋稍疏懈。○福建臺灣鎮總兵官劉明燈奏。整頓臺灣營務。稍有端倪。懇請入覲。得旨。臺灣營務久弛。此次整頓之後。當見日有起色。該總兵仍當認真籌畫。毋任積久弊生。其水師應辦事宜。卽著咨明該省督撫辦理。所請入都陛見之處。著俟二三年後。該地方大定。再行奏請。○予直隸保定陣亡提督羅雨春祭葬世職加等。○予直隸鹽山殉難知縣杜恩祿教諭劉銑典史鮑桂芬千總孫大鵬。祭

葬世職加等。○丙午。引見乙丑科散館人員。得旨。修撰崇綺。業經授職。二甲廕吉士達潤。古。福臣。劉恩溥。張相宇。王先謙。朱福基。汪鳴鑾。廖壽恆。鄭守孟。顧奎羅家勛。李汝霖。蕭晉卿。黃毓恩。鈕玉庚。李用清。楊紹和。周開銘。施之博。朱以增。吳仁傑。張清華。謝維藩。張懷恩。顧雲臣。龔顯曾。文治。如芝。胡聘之。張英麟。章業祥。鄭溥元。松春。楊頤。潘衍鑒。董執。慶錫榮。汪敏。嘯張端卿。曹秉哲。李璠。溫紹棠。周岱。樓譽。普易子彬。崔文海。俱著授為編修。三甲廕吉士楊泰亨。田翰墀。劉青照。吉長清。黃晉治。周冠俱著授為檢討。郝同麓。馮光勛。啟秀。王廷輝。柳長庚。唐景崧。夏裕綸。李士彬。霍鵬南。沈成烈。李緒昌。蘇維城。俱著以部屬用。何琛源。德生。胡元照。謝文起。劉鳳苞。楊超元。楊松兆。屈秋泰。林樑材。俱著以知縣卽用。繡譯庶吉士崇勳著授為編修。○丁未。孝慎成皇后忌辰。遣官祭。

慕陵

大清穆宗繼天開運受中居正保大定功聖智
誠孝信敏恭寬毅皇帝實錄卷之二百三十

大清穆宗繼天開運受中居正保大定功聖智
誠孝信敏恭寬毅皇帝實錄卷之二百三十一

同治七年戊辰閏四月戊申朔

上詣綏履殿問

慈安皇太后安。平安室問

慈禧皇太后安。至丙子皆如之。○諭軍機大臣

等。前因李雲麟等奏詳酌新城事宜。請豁免

貢皮。改設臺兵額兵等情。當交原議王大臣

等妥議具奏。茲據惇親王等奏稱李雲麟等

以前擬分歸新城之土爾扈特及烏梁海數

旗。現擬安設正臺。各該旗一切差徭。絡繹不

絕。請將呈進皮張。全行停止。自為體恤貢戶

起見。所有阿勒台烏梁海七旗應進皮張。著准其暫行停止。惟此項皮張。為內廷傳用及頒賞要需。仍著該大臣隨時體察情形。總期該處丁力稍充。卽量為變通。設法補交。以符舊制。其烏梁海各旗內。既有善獵槍手數百名。可藉為勁旅。又有貢戶額兵多名。該大臣等請將貢戶一項。以百數十戶改為臺兵。下餘五百餘戶作為額兵。儘能訓練得宜。誠為一舉兩得。著卽照擬辦理。仍著該大臣等按

季認真操演。務期悉成勁旅。以資防勦。不得有名無實。臺兵遇有重差。應用幫臺之人。由各該旗貢戶以外之散兵閒丁中調派。卽由該大臣等詳定章程。妥為辦理。惇親王等會議原摺。均著鈔給閱看。將此由五百里各諭令知之。○又諭宋廷春奏逆匪圍攻省城。分股襲踞各州縣。近日辦理情形。請將從逆各員革職嚴拏各摺片。逆匪攻陷易門縣後。句結內奸。先後竄陷昆陽新興晉甯。呈貢嵩明。

尋甸等州縣。賊壘已逼省垣城下。僅餘東路尚可繞越。亟應趕緊援救。岑毓英現由七甸進攻。卽著該撫督飭各軍轉戰而前。將逆股次第掃蕩。力解省城之困。仍一面兼顧東省。以通糧運。宋廷春卽飭楊盛宗等。就現有兵力。分路防勦。迅殄逆氛。劉嶽昭職任兼圻。責無旁貸。著懍遵前旨星馳前進。將省城防守事宜與岑毓英會商妥辦。以固根本。並著該督嚴檄李家福等。統率所部迅速赴省。相機

策應。從賊之參將楊振鵬。楊先芝。馬天順。武進士。田慶餘。都司馬世德。守備馬葵。千總馬文成。均著革職。嚴拏務獲。訊明後卽在軍前正法。以昭炯戒。毋任一名漏網。將此由六百里諭知。劉嶽昭岑毓英並傳諭宋廷春知之。○河南巡撫李鶴年奏軍務未竣。請將本年彰衛懷三府秋審展緩辦理。從之。○予安徽盱眙等處被戕訓導金崧傷亡千總王光明祭葬世職。○己酉諭內閣。羅惇衍鍾岱奏請

將押運漕米赴通各員弁分別獎懲等語。本年海運剝船抵通業已陸續驗收。其第一起第九起漕白糧米全數交清。米色乾潔。該押運員弁尚屬認真。惟第十六起剝船短欠漕米至一百四十餘石之多。且有潮涇攪雜情形。自應分別獎懲。以昭激勵。候補州判凌道增。外委隋登甲。試用典史郭鴻綬。外委潘富元。均著賞給六品頂帶。候補未入流吳崇傑。外委章文元。均著先行摘去頂帶。仍責令押

運後起剝船赴通交納。如再不知愧奮。卽著從嚴叅辦。○諭軍機大臣等。左宗棠奏賊蹤近偪山東運河。現回吳橋防剿。英翰奏暫駐臨清。布置防務。並郭運昌等軍擊賊獲勝。各一摺。捻股竄至舊滄州。經宋慶等追擊。折向東南。由鹽山掠及樂陵德平一帶。郭運昌等軍敗賊於恩縣城南。賊復走清平縣境。是賊之縱橫奔突。總思搶渡運河。現在東昌沿運一帶牆工計已竣事。追剿各軍不下十萬機

勢實有可乘。左宗棠務將運西力加扼守。並商同英翰。丁寶楨。嚴飭劉松山等軍相機夾擊。以為且防且剿之計。其臨清迤北等處。並著李鴻章。官文趕緊派撥隊伍前往填紮。丁寶楨亦當督同郭松林等嚴扼張秋一路。並與英翰所統各軍聯絡聲勢。毋任匪蹤竄越。如稍有疏虞。必惟丁寶楨等是問。至前敵調派事宜。乃李鴻章專責。該大臣務須嚴督淮湘各軍奮加剿擊。依限滅賊。迅奏膚公。儻日

久防疏致賊勢復行延蔓。則咎各有歸。朝廷不能為之曲貸也。英翰現赴觀音嘴一帶河下。著卽將防務妥為布置。並籌進剿。其張從龍一軍。卽歸該署撫調度。以厚兵力。將此由六百里各諭令知之。○又諭鄭敦謹奏侍衛陳國瑞自請帶隊北援。據情代表一摺。現在捻逆退竄東境。各路大軍雲集。疊經諭令該統兵大臣等速籌攻剿。自當剋日殲除。回逆雖向西趨。距晉稍遠。而西河一帶防務未可

鬆懈該侍衛業經拔隊啟行著鄭敦謹飭令恪遵前旨迅速渡河將宜川等處防勦事宜相機妥辦毋得藉詞延宕致干重咎所有該侍衛進止機宜仍著歸鄭敦謹暫行就近調度嗣後如帶兵需人再降旨令其北上也將此由五百里諭令知之○以詹事府詹事邵亨豫為內閣學士兼禮部侍郎銜○撫恤朝鮮國遭風難夷如例○庚戌諭軍機大臣等總理各國事務衙門奏查明誤擄諾海貿易

牲畜等件請飭會商妥辦一摺棍噶扎勒參由察罕鄂博進兵至烏蘭布拉特穆爾綽爾霍等處途遇哈薩克接仗得回牲畜該卡倫雖議歸俄國惟尚未立界牌鄂博不得謂侵越俄境棍噶扎勒參欲仍執舊圖理論藉免賠償而榮全向俄官告稱諾海在該處遊牧貿易語言服飾與哈薩克無異此時無從稽查並有查明後設法密賠善了其局等語俄人心懷叵測每思得步進步此事藉端生釁

豈一時空言所能了結榮全既有設法善了之說自可相機辦理免致別滋事端著麟興榮全錦丕勒多爾濟李雲麟明瑤錫綸會商妥辦將索賠諾海牲畜一事先行在外設法了結免致將來辦理各節動行棘手該將軍大臣等辦理此事固當力持大體亦不值惜小費而啟釁端總期權其重輕斟酌妥辦以免流弊總理各國事務衙門摺著鈔給閱看將此由六百里各諭令知之○以奉天捐輸

軍餉永廣長春廳學額三名吉林廳二名○辛亥諭軍機大臣等李鴻章奏各軍獲勝情形會籌調度一摺昨據左宗棠奏賊由鹽山繞竄清平屢思渡運當經諭令左宗棠等嚴扼運防李鴻章督軍勦擊茲據該大臣所稱各節是運防已穩固可恃自應趕緊進兵以期迅就撲滅李鴻章既與左宗棠意見相同卽著將堵勦機宜妥商籌辦萬不可失此機會東昌等處已有東皖淮軍分段扼守卽著

丁寶楨英翰分飭各軍實力堵遏以專責成。官文曾有飭令張樹聲在運西督辦民團之奏。卽著嚴飭該臬司迅速舉辦。並遵奉前旨。派撥隊伍前往臨清迤北等處填紮。其滄州減河李鴻章已至商崇厚酌添津軍分段協守。卽著崇厚星速派兵前往協防。以便騰出勁旅專作遊擊之師。左宗棠亦當遵奉前旨。嚴飭各軍力扼運西免致疏虞。賊旣不能突竄運河無虞鋌走定可一鼓擒渠。李鴻章所派各軍疊次獲捷。卽著嚴飭各路將士乘勝追擊分投兜剿。依限滅賊以竟全功。將此由六百里各諭令知之。○壬子以福建省城新建

基等軍復在甘泉獲勝。甘省回逆土匪先後竄至洛川等處。總兵周紹濂一軍大獲勝仗。勦辦尚為得手。該省西北一帶逆蹤靡定。而西路回逆四五千。方由靈臺繞竄麟遊境內。亟應嚴檄各軍分途進剿。著庫克吉泰劉典督飭黃鼎等覘賊所向力圖埽蕩。並飭劉效忠等由岐山等處進剿。其宜君白水一帶偏近北路雖係殘匪尤應加意嚴防。並著庫克吉泰劉典迅將該匪殄除淨盡以清醜類。將此由五百里各諭令知之。○陝西巡撫劉典奏邊防喫重請暫變通營制選兵作勇得旨著照所請仍當認真訓練俾成勁旅。○授一甲一名進士洪鈞翰林院修撰二名黃自元三名王文在編修。○癸丑諭內閣本日據刑部奏審明富新祿米等倉倉米虧短情形請將花戶宋齊賢等分別定擬。監督鍾霖等嚴議並遵旨將倉場侍郎處分於定案時聲明。歷任各監督職名請飭部查議等語。此案

花戶宋齊賢容留逃犯張二淦等朋比為奸計其所分之贓已在十兩以上著發往新疆酌撥種地當差姜勇明知廢米虧短並不稟究著於徒罪上加為附近充軍其監禁待質之朱士魁及應得杖罪各犯均著照該部所擬辦理富新倉監督鍾霖童世樑祿米倉監督宜麟聯海北新倉監督岳泰韓啟鴻均著交部嚴加議處各該員虧短米石著戶部覈定成數著落分賠歷任各倉監督著吏部一

併查取職名分別議處在逃之花戶李忠張世禾臧泰卽張三張遇春等並逃遣張二淦阜隸馬薜小馬童凱等均著步軍統領衙門順天府五城一體嚴拏務獲究辦倉場侍郎鍾岱宋晉職司倉儲毫無覺察非尋常疏忽可比著一併交部嚴加議處○諭軍機大臣等都察院奏江蘇舉人蔡則澧等遣抱以瀾水頻年被淹請復舊誌等詞赴該衙門呈訴據稱現在改誌原為保隄而設但運河存水

常行在一丈以外今減為一丈四尺勢必連年開墾民力均屬拋荒仍請水誌遵行一丈六尺立秋後始准開車運壩處暑後始准開中新等壩成案等語該舉人等所稱各情應如何因時制宜仍復舊案以衛民生之處著曾國藩張之萬丁日昌悉心會商妥為辦理原呈均著鈔給閱看將此各諭令知之尋奏舉人蔡則澧所稱水誌查係得自傳述無案可稽應無庸議報聞○又諭鄭敦謹奏帶兵

人員擅離防所請旨辦理一摺副都統安住前諭令將所部馬隊在河南清化鎮屯紮原以防捻匪回竄現雖賊氛較遠仍應遵旨扼紮乃該副都統以賊擾直隸靜海等處輒藉詞移緩就急擅離防所實屬任意自專安住著交部嚴加議處卽著鄭敦謹飭令統帶所部馳赴保定聽候諭旨並著官文於該副都統抵保定後飭令將所部勇丁妥為鈐束將此由五百里各諭令知之尋兵部議安住應

照檀離汎守例革職得旨著加恩改為革職留營○命協辦大學士工部尚書瑞常吏部尚書單懋謙教習庶吉士○甲寅諭軍機大臣等崇厚奏派兵防守減河請飭撥南路各軍赴滄協守一摺潘鼎新一軍現經李鴻章調赴前敵進剿天津減河一帶僅有楊鼎勳一軍不敷防守崇厚現飭余承恩劉景芳馳赴捷地減河並調李昌連練軍兩營前往該處協防惟減河西自通運石壩東至祁口一

百數十里地段綿長民團稀少分布勢難周密津郡僅存陳濟清練軍槍隊並遵化兩營兵力甚單未能盡赴河防著左宗棠李鴻章於湘淮陝豫各軍內擇其轉戰日久應行休息之隊抽撥數營派赴減河與楊鼎勳等軍協力防守既可保固河防並可以均勞逸左宗棠現在吳橋尤當就近兼顧崇厚亦宜添募津勇設法協守並將米餉軍火由津運滄以資接濟該大臣等總須協力同心妥籌會

辦不可稍涉推諉致誤事機將此由六百里各諭令知之○以直隸靜海鄉團擊賊出力予練總州判劉崇儀以知州選用武舉李金第五品頂帶均賞藍翎監生劉繼魯等六品頂帶○乙卯諭內閣崇厚奏道員延不赴防請革職留營一摺直隸候補道余承恩帶隊在天津防堵經崇厚飭令馳赴滄州會同潘鼎新等協力防守減河杜賊紛竄乃該道於未經奉劄之先卽具稟請假散勇接劄後竟

敢延不赴防自往運河西岸在甄河地方築營實屬任意取巧余承恩著卽行革職留營效力仍責令帶隊迅赴減河由楊鼎勳指分地段實力嚴防儻再不知愧奮卽著從嚴叅辦○又諭前因御史朱澄瀾奏叅嘉興紳士張清泰等嗜利庇匪各款當經諭令馬新貽據實查辦茲據奏稱查明員外郎張清泰被叅包庇匪棍拜認師生等款訊無其事承辦橋工檢用廢棺木料係屬經理不善租給微

商孫松亭店屋附近居民暫押衣物該員並不預聞軍柴局勸捐收發均有細帳亦無假公濟私情弊惟不知引嫌自重致啟人言疏於檢點請交部察議並辭退書院講席不准干預地方公事舉人鮑昌照被參為匪徒畫策攻城同惡相濟及收漕等事播弄挾制各情訊屬子虛惟於高芝亭絲行被竊報縣詣勘該舉人在旁窺探經該知縣查問始行走避雖無教供情事跡涉可疑請照不應重律

擬杖八十照例納贖免其斥革等語此案張清泰曾任京職且主講書院不知立品遠嫌擅行干預公事動招物議實屬不安本分其督匠檢用舊棺修理橋工一節亦屬謬妄僅予察議尚覺從輕花翎道銜兵部員外郎張清泰著改為卽行革職舉人鮑昌照於地方官勘案之時既經在旁窺探其非安靜守分已可概見僅擬杖贖免革亦覺輕縱鮑昌照著改為斥革舉人以示懲儆丁憂福建候補

州同章皆仁係已故槍匪章聞盛之子豈容濫登仕版著卽斥革以清流品○以浙江嘉興等處拏辦槍匪出力予知府蔣澤灃等升敘有差○免琉球國貢船隨帶貨物稅銀○丙辰引見新科進士得旨一甲進士三名洪鈞黃自元王文在業經授職外許有麟吳寶恕主壽國錫珍吳大澂宗室寶廷孫慧基周崇傳張登瀛鄭嵩齡吳華年胡喬年譚承祖陳啟泰閻迺統陳壽昌焦肇駿鮑存曉劉廷

枚邵曰濂劉常德周璜李肇錫陳寶琛何如璋趙繼元梁仲衡李郁華熊汝梅杜瑞麟周麒張人駿魯琪光顧樹屏苑棠池劉海龍慕榮齡秦鍾簡何萊福陶模闡朝宗黃湘李瑞裕沈善登潘衍桐馨德鳴泰林懋祉許景澄蔡以瑞徐祥麟邵積誠張清元葉大焯李振南陸芝祥吳士愷李培元劉治平高萬鵬戴恆徐兆瀾余鑑徐文洄姚協贊魏弼文廣照許振祥劉春霖程澤霈徐會澧洪良品賀爾

昌姜球皇甫治鄭賢坊楊際春鄭揚芳嵩申
聯元蘇寬蕭振漢趙汝臣陳瑜俱著改為翰
林院庶吉士林祖述沈受謙魯宗周丁雲翰
楊廷傳高紀隋聿修胡泰福孫欽晃張喬芬
戚人銑張惟儁周芳杏滄預麟汪彤程黃翊
王瑞星袁誠格凌忠鎮徐鼎琛張元普胡功
祁劉至喜王鵬運方瑞麟馮芳緝徐家鼎張
文璿張丕績宗丙壽嚴必太歐陽衡陳達張
士煥文琦曹燮湘沈詠彤程志和汪文樞祝

世功孫汝明蘇汝恆鄔鳴雖王裕嶸喬駿吳
應揚謝鴻誥魏迺勳蘇大治孫儒卿趙時熙
陳惺馴鄧佐槐黃元文殷諫汪鑑林之升陳
作霖陳兆翰溫猷廷孫承烈夏玉瑚鄧明宗
室恩景慕芝田黎淞慶高蔚光邱璜易學清
熊鳳儀辛孚德郭乃心趙國蘭黃燦章延譽
王金鼎華煜俱著分部學習孟繼震由逢年
王慶霖蕭宗瑞羅德綉楊桂芳龔鎮湘王逢
年俱著以內閣中書用楊鼎來陸嗣齡沈鎔

經余烈劉鑑凌心坦楊春富李應鴻張朝漳
朱世篴路青雲劉履安丁維王懋修張志賢
崔國榜鞠捷昌藍瑾章楊誠一王國均陽肇
先胡廷琰章淡如薛振鈺吉紳滕希甫王必
名陳翔墀特秀陳受梁鍾廷瑞張鑑堂徐德
裕徐作梅劉昌嶽尹果岑傳霖嚴蔚太林步
瀛李宗鄴張佩訓趙從佐徐鳴皋吳聯奎慶
振甲陳杞文榮黃兆槐袁思幹朱成棠梁琛
于萬川吳紹正華懋欽彭潤章郭椿鄧煥黃

維翰張之堂蔣繼芳湯銘新汪以誠扎拉芬
林灼三丁翥江琛金兆基王煦李凌霄楊士
芳易鑑章荒其釐孫炳煜馮佐熙黃長森彭
煇昇馮慶長譚培塹劉承矩朱乃恭俱著交
吏部掣簽分發各省以知縣即用刑部候補
主事鄭訓承葉蔭昉李昶方汝紹工部候補
主事陳欽銘俱著以主事即用兵部學習員
外郎孫永治刑部學習員外郎張賡賜俱著
俟報滿作為候補員外郎後以該部員外郎

卽補戶部學習主事林生澤兵部學習主事
廖鶴年俱著俟報滿作為候補主事後以該
部主事卽補候選郎中陳以威著分部學習
餘著歸班銓選○丁巳諭內閣瑞麟奏在籍
主事把持公務請旨革審並將被控縣令先
行摘頂一摺廣東鎮平縣在籍刑部學習主
事劉伯芙以該縣設立清查局徵收錢糧未
派該員經理卽倡為浮收之說在外把持復
糾眾直入縣署逞兇毀搶經代理知縣鄒之

麟稟請查辦劉伯芙旋以該知縣浮收各情
列款控訴據瑞麟飭交廣州府查明均無實
據供情亦復狡展並經職員楊會祺等臚列
劣款呈訴其為恃符放縱已可概見亟應從
嚴懲辦以儆劣紳劉伯芙著暫行革職廩生
李盈門生員李廷俊傅錫芹均著一併斥革
衣頂交瑞麟提集全案秉公審訊代理鎮平
縣知縣鄒之麟設立清查局徵收錢糧並未
豫先稟明咎無可辭鄒之麟著先行摘去頂

帶並著查明有無浮收各弊毋稍偏護○諭
軍機大臣等恭親王等奏特參侍衛不候調
度請旨交部嚴議並請飭催余承恩迅赴減
河協防各摺片前據鄭敦謹奏陳國瑞自請
帶隊北援當諭令鄭敦謹飭令該侍衛懷遵
前旨辦理宜川等處防勦事宜茲據恭親王
等奏據該侍衛稟稱回軍北援於初四日馳
抵臨清等語覽奏不勝駭異該侍衛係奉旨
赴陝勦賊之員乃不候調遣擅行拔隊北上

實屬任意自專陳國瑞著先行交部嚴加議
處該侍衛現抵臨清卽著歸英翰調遣該署
撫卽責令陳國瑞隨同進隊由北而南將此
股捻逆痛加勦洗以贖前愆儻不能奮勇殺
賊或任性妄為不遵該署撫調度朝廷惟有
執法從事不能再為該侍衛曲貸也運防已
穩固可恃防勦各軍不下十萬亟應乘此機
會為一鼓擒渠之計李鴻章務當恪遵疊次
諭旨剋期埽蕩迅殄逆氛並著左宗棠英翰

丁寶楨檄飭各軍分投防勦以資厚集各該大臣督撫等毋得遷延觀望日久無功致負委任潘鼎新馬步各營現調為遊擊之師減河一帶僅有劉景芳五營甚形空虛頃捻蹤又近滄州亟應添兵扼守著官文嚴催余承恩迅率所部馳赴減河一帶會同劉景芳協力堵禦崇厚於余承恩到防後酌度機宜妥為布置潘鼎新既調赴前敵正與賊隊相迎著李鴻章嚴檄該藩司實力痛勦若復遷延

觀望或避賊而行是既不任防又不任勦必當重治其罪運西一帶左宗棠官文英翰丁寶楨當認真嚴防不可稍涉疏虞將此由六百里各諭令知之尋兵部議陳國瑞應照違制杖一百私罪例革職得旨著加恩改為革職留任○又諭戶部奏遵議新疆餉需請飭各省將原撥欠餉迅速提解一摺山西山東河南直隸指撥新疆月餉除報解外共欠銀一百四十二萬餘兩之多實屬延玩現在新

疆需餉緊迫兼以派兵赴巴城北界防勦軍裝口糧等項需款甚多亟應迅籌接濟除直隸現有軍務所有欠款暫緩起解外著鄭敦謹等於山西欠解之二十四萬兩內先提銀八萬兩山東欠解之七十萬兩內先提銀十二萬兩河南欠解之四十五萬兩內先提銀十萬兩勒限一月內如數措解不准稍事耽延以後各該省應解新疆月餉仍著照數源源籌解毋存膜視麟興等於各該省餉項解

到時務須撙節動用並迅速接濟赴巴兵丁以重防務將此由五百里各諭令知之○以恭親王為宗人府左宗正○調正黃旗領侍衛內大臣惇親王為鑲黃旗領侍衛內大臣以鑲藍旗漢軍都統伯彥訥謨祜為正黃旗領侍衛內大臣○以禮親王世鐸為閫兵大臣○以正黃旗漢軍都統阿克敦布署鑲紅旗滿洲都統調鑲紅旗蒙古都統景壽為正紅旗滿洲都統以烏里雅蘇台將軍麟興為

鑲紅旗蒙古都統未到任前。以前任鑲黃旗蒙古副都統文煜署理。○新設廣東赤溪同知司獄各一缺。撥新甯縣額進客童二名。為赤溪廳學額。隸肇慶府學。升廣海寨遊擊為副將。與那扶都司均移紮赤溪。撥欽州左營雷州左營千總。把總各一員。惠州左營三江左營外委各一員。各標兵四百六十一名。為赤溪新營。升廣海寨守備為都司。移瓊州右營守備於那扶。改佛山同知為簡缺。裁瓊防

同知。廣海寨主簿各一缺。從總督瑞麟等請也。○命鎮國公奕謨帶領侍衛十員往奠故豫親王義道茶酒。予祭葬。諡曰慎。賞銀一千兩治喪。○戊午。諭軍機大臣等。丁寶楨奏。追賊接仗。並築牆設守各情形一摺。臨清東昌運防。經東皖准各軍趕築長牆。分段設防。足資扼守。惟自臨清東北至德州一帶。運防事宜。尚未籌及。李鴻章當與丁寶楨等設法兼顧。以期布置周密。毋任賊騎乘隙竄渡。張曜

宋慶與王正起等軍。由清平博平等處。追及賊股。截其竄撲運河之路。賊復折竄德平陵縣等處。著李鴻章督催前敵各營。與丁寶楨所部各軍。儘力窮追。並分路兜剿。依限滅賊。銘軍現抵東昌。郭松林所部。休息已久。並著李鴻章飭令該提督進兵追剿。作為遊擊之師。會合前敵各軍。迅殲窮寇。毋稍遷延。本日復據崇厚奏。稱滄州減河防務未周。事機萬緊。一摺。滄州開放減河石壩。以運河水灌入

下游。因劉慶莊以下地勢漸高。未能達海。其山東海豐縣地方。兼有直赴大沽海口捷徑一條。又有地方岑子頭大路一條。直通天津葛沽鹹水沽等處。現在減河營牆。自石壩起至周慶莊止。雖已築有營牆。其周慶莊以下至祁口海河約四五十里。水勢散漫。深不過一二尺。岑子頭大路。並未淹沒。該處營牆未立。兼無兵隊駐守。勢極空虛。現潘鼎新軍向南進剿。僅有楊鼎勳並劉景芳數營分布。殊

屬不敷防守。著左宗棠、李鴻章趕緊撥兵。前赴減河下游海灘處所扼要駐防。毋得稍涉疏虞。致干重咎。並著李鴻章檄令潘鼎新所部由北向南壓剿。儘任賊蹤紛竄。搶渡減河。是潘鼎新既不俟接替有人。置河防於不顧。又不能遏賊痛擊。遏其北竄。朝廷必當重治其罪。著李鴻章嚴飭該藩司實力堵遏。以剿為防。毋蹈從前膠萊河故轍。崇厚亦當設法疏通劉慶莊以下河道。並添募練勇扼守。以

助兵力所不及。東省所練西丹馬隊尚有一千五百名。現在當已練熟。能否得力。堪以調用。著丁寶楨迅速具奏。將此由六百里各諭令知之。○又諭德勒克多爾濟等奏回匪肆擾。請調兵籌餉一摺。四月間另股回匪馬拉。拉又陷神木縣城。並擾及鎮羌木瓜孤山等處。董福詳股匪現在懷遠縣南山滋擾。古城沙楞子僕牛川一帶賊匪有由草地圖竄河口之說。賊勢如此披猖。儘竟分股竄擾。則薩

托清各境。在在可虞。邊防蒙古官兵近多疲弱。恐不足以資堵截。著文盛、杜嘎爾遵奉前次諭旨。於察哈爾八旗內選派馬隊兵五百名配齊軍械。卽由杜嘎爾管帶前往綏遠城。會同德勒克多爾濟等相機攻剿。力保巖疆。德勒克多爾濟等務就現有兵力。探明賊蹤。分投堵剿。毋令一匪竄越邊境。並著轉飭貝子扎那格爾第、巴達爾璉暨總兵馬陞等嚴飭各官兵竭力堵禦。共圖保衛。察哈爾官兵

應需鍋帳、火藥、鉛丸等項。著鄭敦謹寬為籌解。並無論何款。先行籌撥銀數萬兩。迅速解赴綏城。毋稍延誤。其沿邊沿河防剿各軍應需餉銀。並著源源委解。以資接濟。將此由六百里各諭令知之。○以頭等侍衛祥裕署鑲黃旗蒙古副都統。○以直隸饒陽縣城被賊竄陷。革署知縣劉嘉祥。典史章慶嵩外委吳文彬職。暫留營。予殉難教諭常純祭葬。世職。○予直隸獻縣殉難都司馬寶臣祭葬。世職。

○予直隸祁州殉難祀總石永清等祭葬世職○予山東茌平陣亡把總吳永泰祭葬世職加等○己未補鑄杭州正黃旗滿洲協領鑲白旗鑲紅旗滿洲佐領各圖記條記從將軍連成請也○以浙江諸暨縣集團助勦永廣學額四名○庚申諭軍機大臣等李鴻章奏連日各軍兜勦獲勝情形吳坤修奏添調水陸各營馳赴臨清防守各一摺捻逆雖經周盛波等軍連日兜勦疊有擒獲而逆情慄猾仍向平原高唐一帶圖竄運西周盛波劉松山張曜宋慶程文炳等軍相繼進勦卽著李鴻章嚴飭各軍乘勝痛擊大加懲創使賊氛漸衰得以一鼓殲除陳國瑞前有旨交英翰調度現在該侍衛既赴前敵距英翰較遠卽著李鴻章就近調遣該侍衛性情諒李鴻章素所深悉朝廷並無成見不過策其後效期共殲此殘寇該大臣自當不避嫌怨妥為駕馭所需餉項並著李鴻章酌量接濟使之

知感知奮運西各防關繫最要儻任竄渡則勢又燎原左宗棠英翰丁寶楨專任此事務當嚴飭各軍晝夜梭巡不使兵勇稍有疏懈如任該逆西竄朝廷惟有執法從事決不能邀寬典吳坤修所派張得勝軍並水師四營卽著英翰派員迎提以厚兵力並著該署撫催令迅速啟行毋稍延緩劉銘傳計報起程著李鴻章檄令迅赴前敵統帶各軍共圖滅賊將此由六百里諭知左宗棠李鴻章英翰丁寶楨並傳諭吳坤修知之○又諭穆圖善奏親抵前敵先將狄道州境熟籌布置仍相機進勦一摺狄道州克復後鞏蘭一帶道途俱已暢行惟河州東南鄉之泰子寺巨巢未下其燕脂川黃家灣三甲集又路徑崎嶇匪巢環紮康家崖新添鋪沙楞等處則為入省最近之路賊匪於各該處對岸設有渡船隨時可至東岸官軍進攻之路止恃狄道附城之永甯浮橋穆圖善擬將各軍相度要隘分

投扼堵著卽督飭將士相機規取以杜該匪後襲旁抄之計痛埽賊氛並將康家崖一帶妥為防範以固省垣狄道甫經收復民氣未蘇該署督仍當責令該地方官將善後各事宜悉心辦理毋滋事端據稱甘省糧餉奇窘各省協濟餉銀數月未到該署督卽遵奉本日批諭飛咨四川等省督撫迅將應解協濟餉銀如數籌解以濟軍食將此由五百里諭令知之○辛酉諭軍機大臣等富明阿奏請

飭理藩院嚴催各盟長迅將越旗種地蒙古收回一摺郭爾羅斯蒙古越旗種地一案自經查辦後業已明定章程現除哲里木錫林郭勒等旗遵旨收領外昭烏達等旗所派各員尚未一律到齊卓索圖一盟迄今並未派員前往其喀喇沁前派各員又稱係會同查辦事件並非收領各戶該員等隨卽回旗各該盟於收領越旗各戶任意耽延難保不令眾戶又起種地之念致生事端且官兵在彼

久候收領無期徒耗鹽糧實屬不成事體著理藩院行文各該旗嚴催各盟長迅速派員務將越旗種地各戶剋期領回不准該委員等沿途逗遛再滋延誤其有不能收領願在郭爾羅斯公旗安置者卽照原定章程辦理以弭釁端原摺著鈔給閱看將此諭令知之○以理藩院右侍郎桂清兼署吏部右侍郎○以內閣學士廣壽署正黃旗漢軍副都統正紅旗滿洲副都統果勒敏署鑲藍旗護軍

統領○予江蘇各屬殉難同知余豐之等紳民婦女一千九百十四員名口分別旌卹如例○緩徵江蘇邵海沔陽三州縣被擾地方新舊額賦○壬戌諭軍機大臣等羅惇衍等奏請飭統兵將帥聯絡鄉團並嚴定賞罰依限滅賊一摺直隸故城及山東臨邑柳林等處均有大隊鄉團足為防勦之助此外直東各處鄉團應亦所在皆有官軍正可乘勝聯絡迅殄賊氛若如羅惇衍等所奏官軍嚇詐

鄉團剽奪擄掠無所不至。因而團與兵仇。互相睚眦。情形如此。必至別釀事端。著左宗棠、李鴻章、丁寶楨、英翰於所統各軍。懍遵疊次諭旨。嚴申紀律。約束兵將。如有擾民滋事者。卽於軍前正法。其避兵逃勇無所歸束者。卽著設法驅除。以免冒充官軍。肆擾民團之弊。各營兵勇中如有服色詭異。素不安分者。亦著查明懲辦。以整營規。免致與賊相混。該大臣督撫等統兵征剿。不能嚴束兵將。迅圖殄賊。反致殃民滋事。自問於心何安。至民團强悍不馴。剽奪官兵零騎。及各處過路員弁。如左宗棠、英翰前次所奏各情。亦非事所必無。然非官軍素行滋擾。與民積恨成仇。亦何至釀成如此情形。直隸民團前已據官文奏派臬司張樹聲前往彈壓。其山東民團卽著丁寶楨揀派道府大員分路前赴各堡寨。曉諭彈壓。毋任別啟釁端。左宗棠、李鴻章、丁寶楨、英翰亦當聯絡各處鄉團。互相策應。以期依

限迅圖滅賊。至羅惇衍等所稱懸立重賞之處。著左宗棠等妥籌辦理。羅惇衍等原奏著鈔給左宗棠等閱看。將此由六百里各諭令知之。○又諭李鶴年奏捻逆圖撲運西。督軍守禦南路匪徒突起。派兵勦捕。並請飭釋放降人家屬各摺片。捻匪由德州恩縣駛至博平。茌平等境。仍圖竄越運河。避兵西竄。現在臨清以南至張秋鎮。經前敵各軍分投扼剿。足資堵禦。惟張秋一帶河水淺涸。難保該逆不銜險疾趨。希圖竄越。豫境東路之防。亟應早為戒備。卽著李鶴年迅飭在防將領。妥籌布置。嚴密扼守。與東省各路官軍互相策應。以期有備無患。豫省南路匪徒花得春等糾眾焚掠。自泌陽石河寨等處竄至裕境。顧張店旋向東南檀木溝一帶盤踞。該處與角子山相近。向為匪蹤出沒。難保匪徒不竄往該處負隅抗拒。且匪眾雖僅百餘人。恐糾聚日久。裹脅愈眾。勦辦益形棘手。該撫現調原派

防守黃河之歸德鎮標兵一千名。交總兵崔廷桂管帶。馳赴南陽一帶勦辦。著李鶴年嚴飭該總兵會同該管鎮道合力兜擊。務將首夥各匪悉數殲除。毋任一名漏網。致貽後患。降人桂錫楨。既據該撫奏稱疊次打仗出力。察看情形。實屬革面洗心。毫無疑貳。卽著該撫飭知該降人奮勉立功。力圖報效。儻能隨同官軍勦平捻逆。朝廷必當破格錄用。以獎勤勞。所有該降人家屬。著俟擒匪勦平後。再行釋放。將此由五百里諭令知之。○又諭曾壁光奏勦賊獲捷。擒斬巨逆。並攻克廬山賊巢各摺片。川楚各軍攻破覺林寺偽城。生擒逆首朱明月。與劉峴前奏大略相同。賊首楊老冒等突竄扎佐班竹園一帶。經張文德督飭各軍分投勦擊。陣斬偽元帥楊老冒。斃賊甚多。在事出力員弁。著曾壁光擇尤保獎。候旨施恩。仍著飭令張文德等會合川楚各軍。率得勝之師。迅克偏巢。將平甕龍貴各賊巢。

次第底定。早奏膚公。定番文武各員。擊退逆匪。攻克廬巢。在事出力員弁紳團。著曾壁光擇尤酌保。毋許冒濫。逆首陳喬生由龍里逃竄。仍著飭令在事各員實力搜捕。以期淨絕根株。一面督飭該廳州將防守事宜認真籌辦。毋稍大意。將此由五百里諭令知之。○貴州巡撫曾壁光奏請將新授陝西延綏鎮總兵官汪柱元暫留差委。允之。

大清穆宗繼天開運受中居正保大定功聖智誠孝信敏恭寬毅皇帝實錄卷之二百三十一

州縣亟行設法。立限辦理。毋得顛預了事。並著嗣後嚴行禁止。以期消患未然。前據該督奏整頓營務。諒非徒託空言。並著瑞麟檄飭該地方文武員弁。遇有搶擄械鬪之案。會拏嚴辦。用戢亂萌。原摺著鈔給閱看。將此諭令知之。○又諭庫克吉泰。劉典奏陝軍勦賊獲勝。並籌堵竄匪情形一摺。隆坊白水等處賊匪。經周紹濂周金品等軍連日獲勝。並將敗竄中部之賊悉數殲除。其竄擾宜君之賊。復

經高連陞疊次獲勝。劉厚基克復延長。劉端冕將鄜州洛川之賊擊敗。舊縣槐柏鎮等處賊勢最重。亦經周紹濂奮力痛剿。大挫賊鋒。勦辦尚屬出力。總兵周紹濂周金品等所部。尤為出力員弁。准庫克吉泰等擇尤彙保。毋許冒濫。回逆大股。由靈臺竄至鳳翔。眾約數萬。劉典現擬馳赴鳳郡督戰。著卽檄調各軍。痛加勦洗。力遏狂氛。毋任蔓延。至陝境北路回匪。前據德勒克多爾濟等奏稱。復將神木

縣城攻陷。擾及鎮羌一帶。意圖竄出口外。現在晉省薩托清各城防務。甚形喫緊。著庫克吉泰劉典迅速籌撥兵勇。將延榆一帶回匪實力勦洗。嚴扼沿河沿邊要隘。毋任竄入晉境。致成不了之局。將此由六百里各諭令知之。○予陝西延長陣亡知縣宋良典史鄧兆璫。遊擊鄒懷德。守備蕭千勝等。祭葬世職加等。○甲子。諭內閣。理藩院奏。已故貝勒出缺。無嗣。請旨承襲。並已故貝勒之母與其妻意

見不合。遣抱赴京呈訴各摺片。扎魯特扎薩克多羅達爾漢貝勒諾爾布林沁病故無嗣。所遺之爵。該已故貝勒之母色楞瑪。則欲以伊弟圖布特恩柯德恩承襲。其妻滿濟達瑪。則欲以圖布特恩柯德恩之子桑巴承襲。彼此呈報互異。各執一詞。此中有無蒙混承襲情弊。著交麒麟慶會同昭烏達盟長確切查明。秉公定擬。奏明辦理。毋稍徇徇。○諭軍機大臣等。富明阿奏。俄界匪人聚眾攻殺俄兵。現

飭副都統赴琿春會商俄官勦辦一摺。俄界漁戶。雖係中國人民。而敢於焚卡作亂。其為不安本分。已可概見。富明阿現令烏勒興阿。訥穆錦等。派兵嚴防要隘。遇有匪人。拏獲囚禁。以備對質。所辦尚合機宜。卽著該將軍嚴飭烏勒興阿等。慎守邊隘。毋任匪徒闖入肆擾。儻該匪被俄兵擊散。逃入琿春境內。卽飭盡數勦除。既可綏靖邊境。亦不至啟釁鄰封。致滋藉口。所有富明阿續派全福所帶官兵。

並著前赴琿春交烏勒興阿調遣。以備策應。將此由五百里諭令知之。○又諭英翰奏。運防布置已定。現飭各軍合隊進勦。請調安住赴營各摺。片。運防長牆。經英翰督軍修築完竣。自清平縣境之李家圍起。至臨清迤上之衛河口止。現已沿運排營。分段扼紮。南路東淮各軍分防地段。亦已竣工。著左宗棠李鴻章英翰。丁寶楨。悉心籌商。嚴檄兵勇認真守禦。毋令該逆竄過運西。儻賊由何路竄出。卽

將何路防軍。治以應得之罪。臨清迤北河牆。民團現已興工。著李鴻章。官文。嚴催臬司。張樹聲等。迅速布置。剋期蒞事。並著李鴻章。另派得力將弁。前往堵扼。毋稍疏虞。捻逆現已竄至清平之蔡屯。孫梁莊等處。乘雨搶撲戴家灣。運防經張從龍等軍擊退。英翰現擬親往督勦。卽著星馳前進。與左宗棠李鴻章等。會籌勦辦。該大臣等當懍遵疊次諭旨。依限滅賊。迅埽逆氛。用副委任。陳國瑞已至英翰

軍營。該署撫當勛以大義。俾知奮勉圖功。毋得觀望遷延。自干罪戾。安住一軍。現已飭令暫紮保定。另候調遣。毋庸前赴英翰軍營。將此由六百里各諭令知之。○又諭金順奏。遵籌進勦。暨逆首乞撫。及官軍擊賊獲勝各摺。片。金順馳抵定邊。進勦兵力尚虞單薄。著督飭總兵胡世英。先就現有兵勇。將回逆盡心勦洗。以孤陝北賊匪之勢。蒙古地方。水草缺乏。著一面趕籌行糧。卽酌留隊伍。分守花定。

等處剋日東進相機勦辦並著庫克吉泰劉
典迅派得力將弁統帶勁旅馳往會勦以期
聯絡聲勢毋稍遲延董幅詳為陝北著名首
逆據金順奏稱該逆率眾投誠果能立功自
贖不妨予以自新但賊情叵測難保非藉乞
撫為緩師之計著金順咨商穆圖善劉典悉
心察看妥為辦理斷不可墮其狡謀清水營
西北五里墩竄賊經官軍擊退金順現在親
往督勦著卽激勵將士迅殄逆氛將此由五

百里各諭令知之○又諭金順奏請飭山西
陝西各巡撫籌撥餉銀軍火等語甘肅甯夏
軍餉向歸山西等省按月協濟現在金順帶
兵赴東路勦賊軍事正當喫緊而協餉解到
無幾各營兵勇待哺整整不得一飽設因飢
譁潰大局何堪設想著鄭敦謹劉典督飭藩
司無論何款各籌撥銀數萬兩並多撥軍火
帳房等件迅解金順軍營以濟要需毋得藉
詞延緩致誤戎事將此由五百里各諭令知

之○又諭崇實奏川師援黔屢勝現在添派
防兵出境助勦一摺劉嶽曙蹇閻唐炯等軍
抵黔境後收撫降眾疊下松煙鋪等處賊巢
並會楚軍生擒首逆張保山及賊目多人唐
炯復乘勝馳抵湄潭之偏刀水與蹇閻等約
期進取於牛天溪連獲大捷現已進規水源
溝檜木園會同楚軍分取龔家營觀音營聲
勢尚覺聯絡崇實復添派川兵分出涪南以
趨正安婺川卽著檄飭唐炯等督率各軍分

投進攻迅圖掃蕩並著劉崐飭令席寶田等
與川軍併力夾擊毋得互相觀望致隳前功
曾壁光亦當嚴飭黔中將士及各屬紳團聯
絡聲援廓清黔境崇實另片奏唐炯一軍攻
勦正當喫緊未能兼辦善後等語唐炯現在
督軍圍攻偏刀水老巢將來尚須渡江而南
進規玉華山尚大坪等處所有善後事宜自
未能一人兼顧著劉崐迅派廉明勤幹之員
專辦貴東善後事宜以期周妥其川師平定

處所。撫輯亦關緊要。並著曾壁光另派妥員。次第經理。唐炯卽責令專事進剿。痛殄逆氛。將此由五百里各諭令知之。○予貴州牛矢溪陣亡守備余國瀛千總何洪興外委李占洪等祭葬世職加等。○予河南各屬陣亡殉難紳民婦女二千三百五十三名口分別旌卹如例。○乙丑諭軍機大臣等李鶴年奏。官軍剿賊獲勝。派兵赴東昌協防。並籌辦土匪一摺。張曜等軍會合劉松山春壽等馬步各隊。於上月在甯津等處追賊。疊有斬擒。倂賊東趨。現在捻逆竄向清平一帶。屢圖搶撲。運河運西防守事宜。極關緊要。該撫已檄馬德昭馳赴東昌。協同扼守。卽著飭令該提督迅速到防。聽候李鴻章調派。不得稍涉遲延。泌陽土匪嘯聚。業經李鶴年派令總兵崔廷桂馳往剿捕。並著飛飭該總兵。乘此匪勢未張。妥速設法殄除。毋使滋蔓。所陳暫駐滑縣相機進止情形。該撫務當隨時斟酌緩急。會合

各路大軍。防剿兼籌。不可稍事拘泥。致失戎機。是為至要。將此由五百里諭令知之。○又諭丁寶楨奏。官軍追賊疊勝。現飭王心安追剿一摺。捻逆竄至臨邑。經民團接仗。丁寶楨所派之營官劉時霖等。直突賊陣。該逆旋即敗退。狂竄。復經官軍連日追剿。擒賊百數十名。奪獲羸馬一千數百匹。馬鞍一千數百副。洋礮旗幟數百件。逆首張總愚僅隨數十騎。向西北潛遁。與全股匪眾幾至相失。剿辦甚為奮勇。此次東軍追剿數日。賊竄吳橋東光。又竄平原高唐茌平。均與左宗棠李鴻章大營相近。若能派兵迎剿。張逆卽可就擒。何至復令竄遁。左宗棠李鴻章等。未免心存膜視。軍務何日得了。該大臣等務當激發天良。嚴飭各軍實力會剿。毋得各分畛域。致干咎戾。英翰亦當飭令所部會同馳擊。不得稍存觀望。至臨清以北。武城夏津恩縣德州暨直隸之吳橋東光等處。運防著左宗棠李鴻章等

迅派得力將弁聯絡民團嚴密扼堵毋稍疏虞將此由六百里各諭令知之○又諭德勒克多爾濟等奏沿邊蒙兵堵截不力賊匪逼近河干請飭山西巡撫撥兵迎剿並請截留文麟等軍營餉銀及動碾歸化廳倉穀各摺片陝回竄陷神木高家堡後盤踞烏紳旗分擾府谷縣等處竄入準噶爾旗界並有賊匪竄踞十里長灘及巴漢圖地方距托克托城不遠河防萬分喫緊即著該署將軍等嚴檄

扎那格爾策激勵諸軍相機攔截一面飛飭馬陞督率兵勇嚴守要隘其烏喇特三旗無險可扼並著設法嚴防以遏東竄杜嘎爾計已帶兵起程著即趕緊前進會同德勒克多爾濟等迅籌勦擊綏城需兵甚亟著文盛再行酌撥察哈爾馬隊兵數百名派員帶交德勒克多爾濟杜嘎爾等調度以資厚集匪蹤趨向靡定儻竟越河分擾則晉疆岌岌可虞鄭敦謹務當抽撥勁旅遴選得力將弁管帶

取道河保傍河北上迎頭截擊毋任闖入薩清托等廳所管地面遼闊又無城堡可守所有扼要防堵及稽查奸宄彈壓匪徒各事宜著鄭敦謹遴派結實可靠之員前往各該廳協同辦理以資得力並著劉典迅咨金順帶兵由神木等處跟蹤追剿以孤賊勢此次賊偪河干蒙古官兵堵截不力著德勒克多爾濟等查明據實叅辦陳國瑞所部現在山東勦賊所請調由吉州迎剿之處著毋庸議山

西撥解文麟等軍營餉銀五萬兩即著照該署將軍等所請暫行截留應用仍著鄭敦謹於應解歸綏餉內迅撥銀五萬兩解赴歸綏轉解文麟等軍營毋稍延緩歸化廳常平倉存穀二萬八千餘石著即查明鄭敦謹檄飭歸綏道迅行動碾提運以濟軍食將此由六百里各諭令知之○又諭成祿奏遵旨部署出關請催楊占鼐赴肅接替暨酌撥甘涼米石迅催川省協餉及請飭派員辦理糧臺各

摺片關外盼援甚亟。疊經諭令成祿俟楊占鼇到肅卽趕緊出關。楊占鼇奉旨已久。何以尚未到營。著穆圖善催令迅速帶隊馳往接辦防勦。毋許遲延。成祿著一面趕緊部署。俟楊占鼇到肅後卽行拔隊馳往哈密等處。盡心勦辦。不得藉詞逗遛。自干重咎。鎮西一軍著准其統帶出關以厚兵力。該提督出關後自應多備餉糈。所有前請飭撥倉糧十萬石內未經解到七萬石。著穆圖善在甘涼屬下

再行分撥數萬石。並著先期籌備裹帶以裕兵食。上年諭令四川先措銀十萬兩解交成祿軍營迄今尚未解到。著崇實查照前撥餉數剋期解交。毋稍延緩。並著穆圖善遴派得力道府一員前赴該提督行營辦理糧臺事務以資臂助。將此由六百里各諭令知之。○以山東臨邑勦賊獲勝。予參將曹正榜等升敘有差。○追予江西各屬陣亡殉難候選州判黃鳳詔等紳民婦女三千四百九十員名。

口分別旌卹如例。○丙寅諭軍機大臣等。英翰奏官軍先後獲勝並追勦情形一摺。程文炳牛師韓在高唐擊賊獲勝。陳國瑞由陵縣平原追至高唐連獲勝仗。莫組紳陳國瑞復於荏平夜襲賊營。疊獲大勝。勦辦均屬認真。賊匪無日不遇官軍。疊遭挫敗。勢已窮蹙。正可乘此機會合力殄除。著左宗棠李鴻章丁寶楨英翰督催各路官軍會合兜勦。迅殄賊氛。一面飭令防河將士嚴密扼守。毋任竄渡。

河西再致蔓延。此次東皖及陳國瑞等軍勦賊均各盡力。李鴻章等所部各營何以並未接仗。該大臣等務當振刷精神。力圖會勦。以期速就蕩平。不得任聽各將士遷延觀望。自干咎戾。陳國瑞勦賊奮勇。所需軍火糧餉著英翰隨時接濟。馬步各隊並著該署撫酌撥數營歸其統帶以厚兵力。兼飭程文炳牛師韓等軍與該侍衛合隊實力痛勦。俾竟全功。將此由六百里各諭令知之。○予山東高唐

陣亡守備李國幹千總趙得然等祭葬世職加等。○丁卯諭軍機大臣等左宗棠奏現籌防勦情形一摺。捻逆現竄在平高唐博平等處。疊經東皖及陳國瑞各軍擊敗。該逆圖竄運西不遂。勢必仍折而北。向東光吳橋及天津減河一帶搶渡。左宗棠分防地段。自吳橋至滄州捷地減河一百六十餘里。僅止親軍五千人。並劉棋三營及明慶博崇武馬隊兩起兵力較單。該大臣現調劉松山移軍回紮

東光所屬之下口一帶。郭運昌軍移紮柳莊一帶。並分劉松山所部黃萬友章合才四營。郭運昌所部一營。前赴減河運河交接地方。駐紮兼小楊鼎勳將所部現駐減河口之營。勻縮十里向東移紮。以便劉景芳余承恩等營節遞勻減。移向東北。籌辦尚屬妥協。至減河下游入海處所。距津郡僅數十里。該處防兵即可由津軍內就近撥往。著崇厚即撥津軍各營並添募勇丁。前赴下游河岸嚴密扼

守。毋稍推諉。左宗棠崇厚既經專辦防務。即當加意嚴守。不得稍涉疏懈。其進勦事宜。即著責成李鴻章認真辦理。務當督飭現有前敵各隊。並陳國瑞一軍。儘力追截。與各處防軍互相策應。俾得迅殄賊氛。春壽所統馬步各軍。著李鴻章飭赴減河一帶。協同防守。如遇賊蹤北竄。即可迎頭截勦。並與喜昌所部馬隊聯絡聲勢。以厚兵力。將此由六百里各諭令知之。○予山東德平陣亡總兵官宋發

興等祭葬世職加等。○己巳諭內閣馬新貽奏遵查已革遊擊被參貪劣不職各款。請永不敘用等語。已革花翎補用遊擊吳長安前被左宗棠奏參索賄侵餉各情。查明尚無其事。其詳請將撤任之千總方慶祥開缺。亦無不合。惟係參遊大員。輒向所屬營弁那借銀錢。又於周祥麟拔補遺缺。營書得受紙筆費。毫無覺察。實屬形同輩贖。所參嗜好甚重。亦係確實。吳長安業經革職。著永不敘用。並不

准投效各路軍營。以肅營務而示懲儆。○諭軍機大臣等。庫克吉泰。劉典。秦西北兩路官兵。勦賊疊勝。甘回。竄陝。現籌防勦。林壽圖。秦甯州合水失陷情形。各摺片。提督劉端冕。在鄜州道左鋪等處。督軍進剿。斃賊甚多。賊向西竄。其分擾汧隴麟鳳之賊。亦經蕭德經。羅洪德等迎擊獲勝。董志原回逆。與土匪潰勇。連陷慶陽甯州各城。悉由靈臺南竄。武功渭河一帶。亦有賊蹤。劉典現由醴泉移紮咸陽。係為兼顧陝垣起見。惟逆眾傾巢竄陝。意圖就食鳳境。而中宜鄜洛等處。賊蹤方張。若不亟圖埽蕩。勢必聯成一片。進剿愈難。著庫克吉泰。劉典。嚴檄劉端冕等軍。分投攔擊。迅殄逆氛。劉典卽由咸陽督飭。魏光燾等。併力西向。毋得株守一隅。致賊勢日形延蔓。林壽圖奏稱甯州仍為賊踞。慶郡守城官兵敗遁各情。署甯州知州凌光漢。於州城失陷時。隱忍偷生。實堪痛恨。著穆圖善迅速查明。從重參

辦。署合水縣知縣楊炳華。力戰捐軀。亦著查明請卹。逆酋禹得彥等。糾黨圖逞。並著穆圖善等。各令雷正綰。實力堵遏。毋稍疏虞。雷正綰軍營糧餉。林壽圖務當隨時接濟。以贍軍食。慶陽地方緊要。知府員缺。豈可久懸。穆圖善亦當遴派妥員前往蒞事。以資撫輯。將此由五百里諭知穆圖善。庫克吉泰。劉典。並傳諭林壽圖知之。○予陝西長安等處傷亡同知李卿材等。祭葬。世職加等。○追予江蘇各屬殉難布政司經歷余維旭等。紳民婦女一千九百五十一員。名口分別旌卹如例。○庚午。以神靈顯佑。頒直隸省城關帝廟扁額曰布昭聖武。城隍廟扁額曰靈昭遐寇。火神廟扁額曰德炳朱方。○諭內閣。前因杜爾伯特汗爵爭襲涉訟。經理藩院遵議具奏。降旨令棍布扎布承襲汗爵。茲據麟興等奏。棍布扎布呈稱。報捐銀四千兩。懇請賞還親

王並請於巴咱爾扎那及噶勒章那木濟勒二人內酌定承襲汗爵等語。覽其情節殊不可解。棍布扎布所捐銀兩著毋庸賞收。所有此案原委仍著奎昌、福濟、車林多爾濟會同麟興、錦丕勒多爾濟榮全傳集人證詳訊確實。奏明辦理。○諭軍機大臣等前因鴻臚寺少卿朱學勤奏請暫停六軍擬將派調遵化等軍餉項歸於軍需餉下支給當經諭令官文會同左宗棠等妥商籌辦茲據官文奏稱

刻下防剿捻逆直隸練兵有全軍調防者有調數營赴前敵助剿者未便撤令歸伍體察情形六軍現難停止所需練餉仍請按月給發各等語該省練軍現調各路防剿即著暫緩停撤所需練餉仍著按月照數給發俟剿匪事竣即著官文會同左宗棠等將六軍應否停止並該少卿所奏安插各營勇丁等情一併妥議具奏將此由四百里諭令知之○又諭李鴻章奏各軍兜剿獲勝布置情形並

豫軍追賊大捷劉銘傳患病開釋革員家屬各摺片王正起陳國瑞等軍在荏平高唐等處剿賊獲勝程文炳牛師韓在高唐截擊張曜宋慶在夏津東南攔截亦均有斬擒賊匪現由陵縣以南竄往臨邑著李鴻章檄飭追軍與該處團勇合力兜剿痛加殲戮毋任喘息東昌臨清肅河河水勢淺涸李鴻章現調馬德昭軍前赴東昌助守著即督飭在防各軍聯絡聲勢協力防堵毋任賊眾竄越河牆臨

清肅河以下運防並著設法嚴密布置毋稍疏漏張曜宋慶在臨邑剿賊大勝所部出力將士准李鴻章存記彙案保奏劉銘傳現患腰疾著李鴻章催令趕緊醫治一俟痊愈即檄調赴營毋任遷延自便現在賊勢漸形窮蹙李鴻章正當乘此機會督飭諸軍更番輪擊以期迅速歲功若僅知防守運河置進剿為緩圖必至賊蹤復張辦理更難措手李鴻章務當一面防守一面追剿不可顧此失彼

致失機宜。另片奏請將陳國瑞營軍餉由山西等省撥解。本日已寄諭鄭敦謹等接濟矣。該侍衛前已有旨令李鴻章調遣。著該大臣卽檄令力洗舊習。奮勉立功。以觀後效。如其故智復萌。不遵約束。李鴻章亦當隨時奏。所請將桂錫楨兄子釋放之處。桂錫楨勦賊出力。如果始終不懈。俟軍務完竣時。自當將該革員家屬全行釋放。並將桂錫楨加恩獎勵也。將此由六百里諭令知之。○又諭吳坤

修奏皖軍設局轉運。請飭護解一摺。據稱皖軍現在山東東昌一帶勦賊。距後路糧臺較遠。餉項軍火轉解維艱。應於東西兩路各設轉運局。就近運解。東路以清江浦為總局。濟甯為接運。西路以汴梁省城為總局。封邱道口為接運。請飭經過地方官隨時照料。妥為接護等語。著官文、曾國藩、丁日昌、丁寶楨、李鶴年各飭所屬。遇有皖營轉運委員到境。迅卽代雇舟車。派撥兵役。妥為護送。並傳知各

鄉圩寨不得留難稽滯。以便隨到隨解。並著吳坤修咨會英翰派員迎提。以濟軍食。將此由五百里諭知官文、曾國藩、丁日昌、丁寶楨、李鶴年。並傳諭吳坤修知之。○又諭現在山東各軍雲集。需餉孔殷。陳國瑞帶馬步數千。馳赴東省勦賊。已諭令歸李鴻章調遣。惟該軍餉項無出。殊難進勦。所有山西部定月協李鴻章軍營餉銀一萬兩。卽著鄭敦謹按月迅速派員解交陳國瑞軍營。以濟急需。並著

劉坤一、李瀚章。無論何款。各月撥銀一萬兩。解交李鴻章軍營。以資轉發。各該撫於奉旨後。卽著按月照數撥解。不容稍有短欠。並著按月咨報神機營。以備查考。將此由六百里各諭令知之。○又諭鄭敦謹奏。河保喫緊。分飭堵禦。並請飭陝省另調一軍駐紮榆林。各摺片。前據德勒克多爾濟等奏。賊匪攻陷神木。擾及府谷等處。當經諭令鄭敦謹派兵取道河保迎頭截擊。茲據該署撫所陳各節。與

德勒克多爾濟等前奏大略相同。現在陝省之邊內草地均有賊擾。晉省邊內之河保口外之清托薩包等處同時喫緊。該署撫雖已咨明綏遠城將軍添兵嚴防。口外沿河各處其河保沿邊各處已飭在防文武各員弁分投堵遏。布置漸能周密。惟防務萬分喫緊。非有大員親往統率。不能聯為一氣。現在潞澤防務較鬆。著鄭敦謹另派妥員駐守。卽行馳往河保一帶。擇要扼紮。嚴督在防各將士加意梭巡。實心堵禦。儻有稍涉疏懈者。卽著該署撫嚴參懲辦。毋稍姑容。陝省賊氛日熾。晉省河保各邑暨薩托清等城更形喫緊。著庫克吉泰劉典遵奉前旨。迅撥得力兵勇。將延榆等處回匪實力勦洗。卽著駐紮榆林嚴扼沿河邊隘。與晉省防兵互為聲援。毋稍疏失。將此由六百里各諭令知之。○又諭伊勒屯何瑄奏請飭撥巴里坤軍餉一摺。巴城自軍興以來。滿漢官兵餉項。每年共需銀十四五

萬兩。方可敷衍支放。乃自同治三年後。由烏城領到餉銀。每年或一二萬兩。二三萬兩不等。自上年八月以來。由安敦撥到軍糧。亦屬不敷支放。本年由烏城領到餉銀五千兩。杯水車薪。無濟軍食。兵丁替替待哺。困苦難支。實屬可憫。亟應速籌撥解。以贍飢軍。著鄭敦謹迅速籌撥。新疆專款銀二十萬兩。解至歸綏道庫。卽由歸綏道派員轉解烏里雅蘇台將軍收納。此項餉銀解到後。卽著麟興迅卽知照伊勒屯何瑄派員迎提。並著文麟將安敦玉等處糧石。每月籌撥京石糧四千石。按月解交巴城。毋稍延誤。將此由五百里諭知鄭敦謹麟興文麟伊勒屯。並傳諭何瑄知之。○又諭麟興等奏請派大員會定界址一摺。新疆毗連俄境。分定界址。應建界牌。鄂博等事。亟應速籌辦理。所有烏里雅蘇台地方。著派榮全科布多地方。著派奎昌布倫托海地方。著派李雲麟各於應行建立界牌鄂博之

處會同俄國分界官員詳慎妥辦以期早日了結將此由五百里各諭令知之○辛未諭內閣盛京將軍都興阿著管理神機營事務授為欽差大臣馳赴天津等處會同左宗棠李鴻章勦辦賊匪所有春壽陳國瑞張曜宋慶四軍馬步各隊均歸調遣其餘吉林黑龍江馬隊並著都興阿酌量剴調都興阿所請隨帶之侍衛興凌等均著准其帶往三口通商大臣兵部左侍郎崇厚著幫辦都興阿軍務兼籌糧餉軍火以資接濟仍駐天津督辦防守事宜前有旨諭令左宗棠李鴻章限一月內滅賊迄今限期已滿賊股仍未殲除實屬督勦不力均著交部嚴加議處仍責令該大臣等會同都興阿協同勦賊務將此股捻匪迅速殄滅毋再遷延致干重咎都興阿未到以前該大臣等仍當嚴飭各將領認真防勦毋稍觀望致誤戎機尋吏部議立宗棠李鴻章均照不應重公罪降二級留任例上加

等議以降三級留任事關軍務不准抵銷從之○諭軍機大臣等前因捻逆竄擾直東大肆猖獗疊經諭令左宗棠李鴻章督兵勦辦並立定期限令於一月內勦辦淨盡現在限期已滿而賊匪全股尚未蕩平仍復奔突自如該大臣等辦理毫無成效本日已明降諭旨將左宗棠李鴻章交部嚴加議處並令都興阿管理神機營事務授為欽差大臣兼命崇厚幫辦都興阿軍務都興阿久歷戎行於管帶馬隊事務尤為熟悉是以令其前赴直東一帶會同左宗棠李鴻章勦賊期於追勦迅速早行蒞事該大臣務當與左宗棠李鴻章等合力同心妥商籌辦不得稍分畛域崇厚亦當妥籌軍火糧餉接濟都興阿軍營並將天津防務嚴密布置不得稍形鬆懈左宗棠李鴻章與都興阿同辦一事尤當互相聯絡隨地策應於運河防務固宜盡力布置於會勦事宜亦不可稍涉推諉致懈軍心官文

丁寶楨英翰於防勦事宜當隨時與都興阿左宗棠李鴻章合力籌辦不可稍有觀望以期共殄賊氛懋膺上賞將此由六百里各諭令知之○又諭崇厚奏派撥兵勇赴減河下游防守並曾國藩等奏調用閩省輪船赴津各摺片天津減河上游已經左宗棠抽派劉松山郭運昌等營勻紮其下游自吳莊至祁口一帶現經崇厚派令劉景芳余承恩春霖三軍防守並添募勇丁兩營以資厚集所陳

於水淺處所徧掘陷坑斷岑子頭高埂並雇雁艇槍勇巡防各節籌辦尚屬周妥著卽認真辦理不得有名無實蘇省捕盜輪船不適於用閩省之華福寶輪船現在上海可以移調北來俟駛抵天津後著崇厚飭令該督帶委員沈應奎等於津門沿海洋面一帶實力巡緝以杜洋人接濟捻匪暗相勾結之弊所有軍火糧餉並著妥籌接濟毋令缺乏曾國藩等原片著鈔給閱看將此由五百里諭

令知之○又諭有人奏直隸順義縣有著名匪棍張桂林原名張添恩在城東之小店村地方勾串吏役設立私刑威逼鄉里並在楊各莊聚養匪人肆行搶掠伊姪張鈞與之同惡相濟所奏如果屬實大為地方之害著萬青黎王榕吉確切查明如果實有其事迅卽派員查拏懲辦據實具奏原摺著鈔給閱看將此各諭令知之尋奏遵訊張桂林尚無聚匪搶掠各情而素行兇橫屬實應發極邊充

軍張鈞被人屢控亦非安分良民應杖責枷號滿日遞交本縣嚴加管束從之○又諭張之萬奏清淮餉絀請飭催解一摺清淮軍需本極支絀加以派兵遠征尤須各省協助方足以資接濟著李瀚章迅將上年欠解協餉一萬五千兩卽行補解並著劉坤一劉崐何璟將本年協餉提前籌解以濟餉需將此由五百里諭知劉坤一李瀚章劉崐並傳諭何璟知之○命頭等侍衛索布多爾扎布赴欽

差大臣都興阿軍營聽候差委○追予江蘇大倉被戕千總鍾友勝陳茂全祭葬世職如陣亡例○壬申諭內閣文麟奏請將藉病逗遛之已革遊擊議罪等語甘肅已革遊擊希朗阿前經文麟奏帶出關輒敢託病延不赴營該革員本係獲咎叅革投營效力之員仍復意存規避實屬膽玩希朗阿卽著交部照例議罪並著穆圖善飭查該革員現在何處責令回旗聽候部議各路統兵大臣均不得

率請留營以杜取巧○諭軍機大臣等文麟景廉奏請簡放都統並委署道缺及吉恆解餉情形阿底爾句逆復仇並文麟奏親督隊伍前進擊敗安玉竄匪暨請飭伊勒屯等迅解截贖軍餉各摺片烏魯木齊都統統轄各城當此軍務喫緊之時自應派員總統方可呼應靈捷惟文麟等既未能前進而伊勒屯亦有巴里坤應辦事務未便簡派所請著毋庸議其鎮迪道員缺准其卽以黎獻暫署著

穆圖善催令出關赴任接辦催運事宜其屯田都司把總並准以魏忠義徐天智署理事事鍾貴既於人地相宜卽著准其接署主事原缺所有伊勒屯派往之筆帖式伯恆著卽撤回哈密地方遼闊文麟等擬分兵籌辦尚屬可行著文麟卽行前赴哈密新任景廉暫駐後路以防安敦玉並催運一切所有西路竄賊著文麟等飭令魏忠義確探情形隨時防剿伯克阿底爾先經拏獲何以復被回逆搶回致令糾眾復仇所稱回子小玉素普與郭鳳賢將阿底爾酷刑拷打勒逼謀殺賄縱等情文麟等既經據伯恆所稟咨詢何以伊勒屯等並未具覆卽著伊勒屯何瑄查明阿底爾原案覆奏其伊勒屯等截留餉銀前因巴城待餉孔亟文麟等又無出關消息是以准其提用惟哈密亦屬支絀著伊勒屯何瑄遇有餉到卽行撥還嗣後不得再行截留各分畛域致干咎戾並著文麟等迅派妥員前

赴山西烏里雅蘇台迎提以濟急需吉恆催餉不加著暫行革職安敦玉一帶物產有限現在文麟各軍籌糧甚艱所有肅州各軍著穆圖善飭令毋庸前赴關外籌辦糧餉俾文麟等餉糈得以寬為接濟其沁城一帶能否興辦屯田並著文麟景康等察度情形妥為辦理將此由六百里諭知穆圖善文麟景康伊勒屯並傳諭何瑄知之○以安徽官軍疊次勦辦捻匪出力賞總兵官楊明勝周占魁

字集

字

副將許思義楊占先參將宋忠元李華文遊擊王金榜巴圖魯名號道員劉毓楠副將楊先受等花翎都司吳春發等藍翎餘加銜升敘開復有差○癸酉諭內閣吏部奏遵議各倉監督並倉場侍郎處分一摺富新倉監督鍾霖等均著照部議革職倉場侍郎鍾岱宋晉總理倉儲職任甚重於各倉虧短米石毫無覺察實屬不能勝任鍾岱著調補泰甯鎮總兵兼總管內務府大臣宋晉著補授內閣

學士兼禮部侍郎銜仍照部議革職留任鍾岱於天津驗收海運米石完竣後再行赴任宋晉於通州收米事竣再行來京供職○以泰甯鎮總兵官衍秀戶部右侍郎畢道遠為倉場侍郎調工部右侍郎潘祖蔭為戶部右侍郎管錢法堂事○以鎮國公奕梁暫署泰甯鎮總兵官兼總管內務府大臣○甲戌正黃旗滿洲都統醇郡王因病乞假以正白旗漢軍都統全慶署正黃旗滿洲都統○以都

字集

字

察院左副都御史鮑源深為工部右侍郎管錢法堂事仍兼署禮部右侍郎禮部左侍郎龐鍾璐兼署吏部左侍郎○乙亥旌表守正捐軀直隸易州民王運生女旺兒○

地於

方澤自是日始齋戒三日○丙子以廣東潮州鎮總兵官翟國彥為水師提督肇慶協副將楊青山為潮州鎮總兵官○以四川官軍攻

克貴州水源溝等處逆巢賞遊擊吳洪貴巴圖魯名號餘升啟開復有差投誠賊目聶定邦等以守備用並賞藍翎○予廣東各屬陣亡殉難紳士簡雄照等暨民勇一千一百三十五名分別賞卹如例

大清穆宗繼天開運受中居正保大定功聖智誠孝信敏恭寬毅皇帝實錄卷之二百三十二

大清穆宗繼天開運受中居正保大定功聖智誠孝信敏恭寬毅皇帝實錄卷之二百三十三

同治七年戊辰五月丁丑朔

上詣綏履殿問

慈安皇太后安平安室問

慈禧皇太后安至丙午皆如之○諭軍機大臣

等劉嶽昭奏行抵曲靖分軍力救省圍兼防東路並請調員差委各摺片滇垣西南北三門均為迤西賊匪所圍其尋甸之賊與省賊響應窺伺東曲省外之大板橋楊林等處經岑毓英屢挫賊鋒糧道無阻劉嶽昭現抵曲靖擬進攻尋甸早解省圍以保全東路著卽

嚴檄全祖凱李家福等相機夾擊。先將尋甸一路廓清。一面飭令宋廷春督率在城文武。將省防嚴密布置。並會同岑毓英妥籌防剿。力維全局。晉甯一路亦當檄令梁士美等實力進攻。以分賊勢。據稱移咨四川分撥藥鉛數萬。軍火為進剿急需。著崇實迅籌鉛藥數萬斤。派員解赴劉嶽昭軍營應用。並著源源接濟。毋令短絀。四川候補道李祐既據該督奏稱熟悉滇省情形。即著崇實迅飭該員剋

期前往交劉嶽昭差委。以資得力。將此由五百里各諭令知之。○戊寅夏至祭

地於

方澤。遣鄭親王承志恭代行禮。○

上奉

慈安皇太后

慈禧皇太后幸漱芳齋侍午膳。○諭軍機大臣等左宗棠奏防軍截賊北竄連獲勝仗並追剿情形。李鶴年奏豫軍疊勝防運情形各摺。

捻逆由臨邑德平竄至海豐鹽山一帶。官軍於上月二十四日以後疊次追剿獲勝。均有斬擒。此次劉松山等由樂陵亟赴鹽山截賊北竄之路。辦理尚合機宜。賊蹤雖已由德平南竄。仍虞伺隙折回。左宗棠當飭在防各軍嚴密扼守運河。天津減河下游著崇厚一體嚴防。毋稍疏懈。德州至臨清東昌一帶李鴻章當與英翰丁寶楨等督飭各路官軍防剿兼施。毋任撲越運河。並嚴飭各營認真痛剿。

不得沾沾以小勝自喜。稍涉鬆勁。都興阿現已前赴天津。著即齊集馬步各軍趕緊進剿。既可杜其回竄。兼可追剿迅速。並著左宗棠李鴻章丁寶楨英翰各飭所部一面嚴守運河。一面與都興阿聯絡聲勢。會合夾擊。不得因有都興阿進剿遂至互相觀望。總期和衷共濟。合力同心。膚公早奏。方為盡心公事。李鶴年所陳張曜等軍在夏津等處獲勝情形尚係十一日以前之事。現在賊仍由北路南

竄東昌臨清一帶。正須嚴防。馬德昭一軍。已經李鶴年派赴東昌。著卽飭令該提督會同在防各營認真過截。該撫現帶四營馳赴大名。著與臨清東昌防軍就近策應。隨時赴援。以固運防。並嚴飭帶隊員弁約束兵勇。毋任騷擾地方。是為至要。將此由六百里各諭令知之。又諭前因總理各國事務衙門奏查明誤擄諾海安集延貿易牲畜請飭會辦。當經諭令榮全會同李雲麟等斟酌妥辦。茲據

榮全奏稱。接准棍噶扎勒參來咨。語多任性。礙難照辦。並鈔錄咨文呈覽一摺。棍噶扎勒參前因迎接索倫等眾。路過拜精格特哈薩克搶掠牲畜。互相接仗。雖出一時情急。究屬冒昧。自應靜聽榮全等妥善辦理。以息爭端。何得一意逞強。致啟邊釁。該喇嘛負性強戇。不知輕重。設竟糾眾肆殺。將來辦理諸事。窒礙愈多。著李雲麟。明瑞。錫綸就近善為開導。務須阻止該喇嘛。不可因勦洗哈薩克致滋

俄人口實。並著榮全隨時咨商辦理。榮全摺並咨文各一件。均著鈔給李雲麟等閱看。將此由五百里各諭令知之。○湖南巡撫劉崑奏請將丁憂按察使席寶田留營辦理軍務。允之。○以直隸臨榆等處辦團出力。予知縣宋彭壽以知州用。並賞花翎。驍騎校穆克登額等藍翎。餘加銜升敘有差。○以湖南官軍攻克貴州寨頭匪巢。予總兵官蘇元章以提督簡放。賞遊擊藍廷位巴圖魯名號。同知左

樞守備徐啟瑞花翎。道員葉兆蘭等加銜升敘。開復有差。予陣亡副將唐立莪。遊擊喻有喜。都司李本宜。守備黃石壽。千總陳孝禮等。祭葬世職加等。○蠲緩山西蒲翼城。臨汾。襄陵。大甯。絳。太平。垣。曲。沃。洪。洞。河。津。吉。聞。喜。十三州縣上年被擾地方。新舊額賦有差。○己卯。

孝誠仁皇后忌辰。遣官祭。

景陵。諭內閣。前據曾國藩等奏。擬補長江水。

師各缺。續陳未盡事宜。並請以大銜借補小缺各摺片。當令軍機大臣會同該衙門速議具奏。茲據奏稱。總兵係專閫大員。例應特簡。所有岳州鎮總兵等缺。應否仍由軍機處開單請旨簡放。抑或援照廣西右江鎮雲南普洱鎮之例。令該督等另擬正陪。請旨簡放等語。長江水師事屬創始。該督等請補各缺。自為因地擇人起見。所有岳州鎮總兵員缺。著准其以彭昌禧借補。漢陽鎮總兵員缺。著准其以許朝琳補授。湖口鎮總兵員缺。著准其以丁義方補授。瓜州鎮總兵員缺。著准其以吳家榜借補。嗣後遇有該四鎮缺出。即由該省督撫保舉堪勝總兵人員。擬定正陪。請旨簡放。其請補副將以下新設各缺。著照所議。准以周國興等暫行借補。至未盡事宜十條。及大銜借補小缺章程。均著照所議辦理。長江水師所轄江面。延袤五千餘里。職任所關甚重。該督撫等務當會同該水師提督。隨時

實力整頓。期於經久無弊。毋任漸形懈弛。以重營務而固江防。○以正紅旗蒙古副都統寶珣署鑲紅旗蒙古副都統。○予浙江各屬殉難候選縣丞朱澧等紳民婦女一百三十五員名口分別旌卹如例。並予建祠。○庚辰諭軍機大臣等。李鴻章奏擒逆被擊回竄。連日各軍兜剿獲勝情形一摺。此次擒逆乘虛北竄。經劉松山等迎擊。復經郭松林陳國瑞等追及。該逆敗後。仍向東南回竄。據陳國瑞稟報。該逆欲撲臨清渡運。其計甚為狡詐。著李鴻章即飭該侍衛會合各軍奮力追剿。毋令得以竄逸。英翰近在臨清。丁寶楨亦相距非遙。並著督飭各軍嚴密防剿。毋令一八一騎得竄運西。致干重咎。陳國瑞自春間帶隊以來。未見奮勉出力。此次由豫赴東。雖經屢次接仗。亦僅截殺尾賊。未能痛加剿洗。遠不及昔年山東剿賊之時。著都興阿李鴻章傳諭該侍衛會合諸將領同心協力。迅殄逆氛。

張曜宋慶郭松林潘鼎新等亦係帶隊大員。務當忠誠共矢不遺餘力。毋得稍有推諉。觀望本日李鴻章奏劉銘傳所部勦擒出力各員獎勵一摺。劉銘傳向來卓著戰功。特沛恩施降旨允准。該提督當亦倍加感奮。著李鴻章傳諭劉銘傳迅赴前敵督隊勦賊。以仰副朝廷終始成全之意。擒逆被勦既急難保不復圖北竄。並著左宗棠宗厚嚴扼運減各河。遇賊即擊。毋得鬆勁。都興阿抵津後即著會

商左宗棠等檄飭各軍兜勦。迅奏膚公。以慰懸盼。將此由六百里各諭令知之。○又諭鄭敦謹奏遵撥官兵增防河保以北相機迎勦一摺。陝省神木等處回匪竄入。準噶爾旗一帶該署撫現派河保舊駐大同鎮兵一千名。沿河北上與前挑選之存城官兵等擇要駐紮。即著鄭敦謹督飭馬陞統率所部覘賊所向認真截擊。一面將船隻提歸東岸。毋令該逆偷渡。河保偏關一帶與陝省神木府谷等

邑僅隔一河。該署撫仍當督飭防軍嚴密守禦。不可稍涉疏虞。薩清托等廳防務著即檄飭道員恆祐會商歸綏道興奎等將稽查奸宄彈壓匪徒各事宜實心辦理。毋得虛應故事。所有防勦機宜鄭敦謹當與德勒克多爾濟杜嘎爾等悉心籌商妥為調度。以期迅殄逆氛。該署撫現駐澤州距省北較遠。應如何兼顧之處並著統籌全局相機辦理。將此由五百里諭令知之。○以直隸提督劉銘傳所

部各營疊次勦擒出力予總兵官駱國忠等以提督簡放賞總兵官劉盛休馮如霖王德成一品封典。劉盛瑞尹嘉賓丁達材王貴揚道員丁壽昌劉盛藻副將張駿蘇得勝姚天霖唐士純邱尊謙張光亮趙長發章高元劉起鰲衛天成王孝理參將郭寬張佩芝楊慕時李春王保勝參領吉爾洪額驍騎校全福巴圖魯名號道員裴德俊佐領恩和等花翎都司賈兆君等藍翎餘加銜升敘開復有差

○辛巳

上奉

慈安皇太后

慈禧皇太后幸漱芳齋侍午膳。○諭軍機大臣等庫克吉泰等奏遵覆籌兵會剿及土匪悔罪投誠並飭劉厚基等派兵會剿穆圖善奏北路剿匪情形並河州回匪畏懼乞降各摺片榆林屬境回匪既經庫克吉泰等抽兵會剿即著飭令前敵各軍迅速痛剿盡殲醜類

胡世英留駐延安之兩營並著金順飭令歸併進剿以厚兵力土匪董幅詳是否真心投誠該將軍等自能酌度即著會商金順妥為辦理不可墮其詭謀致貽後悔其收撫之後著金順嚴禁兵勇攫取財物俾得資生以免反側北路定靖一帶回逆竄陷梁鎮擾及甯條梁復有回竄之信又有土匪乘間竊發亟宜保護甯條梁要地以免肆擾著金順督率胡世英等軍相機堵剿毋令該逆得以逞志

第聞胡世英從前頗知奮勉近來漸形驕縱其原帶各營已不能精選以致多有家室不守紀律未便再令管帶程興烈舊部著穆圖善另派妥員接管並著該署督會同金順檄飭胡世英裁汰老弱嚴加鈐束毋任兵勇肆意妄為以歸實用河州東南鄉回匪畏懾兵威懇請乞降其中誠偽朝廷無從遙測該署督既稱馬占鰲所稟尚非虛語即著相機妥辦收繳器械馬匹補納錢糧並興辦布種以

濟軍食其彭忠國等軍並著飭令嚴密扼堵毋任竄逸所有隆靜土匪即著飭令陳德隆等會剿該署督斷不可因河州逆回已撫稍涉大意致滋貽誤將此由六百里各諭令知之○又諭庫克吉泰等奏陝軍需餉孔亟請飭山西巡撫每月仍照一萬五千兩報解以一萬兩解左宗棠軍營以五千兩解至蒲州由該將軍提取等語陝西軍務方殷待餉甚亟若晉省驟裁五千兩之數該省與左宗棠

軍營誠恐不敷分布該將軍所奏自是實情著鄭敦謹督飭藩司查照前定一萬五千兩無論如何為難總期按月如數撥解以一萬兩解交左宗棠軍營以五千兩解至蒲州由庫克吉泰派員提取應用毋得再事覈減致誤要需將此由五百里諭令知之○兼署閩浙總督英桂等奏已革藩庫大使屠楚現已來閩繳清賠款查無侵吞入己情弊應請免其查議並予開復原官下部議從之又奏查

明永春州釐局被搶一案叅革知州周式濂並無徇庇家丁情事應照例送部引見報聞○甘肅肅州鎮總兵官程興烈休致以記名提督黃金山為甘肅肅州鎮總兵官○以甘肅攻克米拉溝賊巢出力賞副將李年松楊文寶王騰蛟王尚舉參將尚兆嘉郭國廷遊擊楊得勝劉璞巴圖魯名號遊擊王大發等花翎都司曹文元等藍翎餘加銜升敘免罪有差○以四川官軍攻克貴州偏刀水賊巢

賞知府唐炯道銜○予甘肅甯條梁陣亡副都統敦奇祥阿等十一員祭葬世職加等○癸未諭軍機大臣等子寶楨奏官軍追剿情形一摺捻逆由武定鹽山竄至德平臨邑境內連夜奔馳圖撲河牆經郭松林潘鼎新王心安等各率所部追至荏平甫經接仗賊即敗潰折向東趨該逆恣意奔突遇兵即遁官軍追逐多日並未能獲一大戰痛加殲戮似此日事尾追疲於奔命於事何濟都興阿現

已馳抵津郡著即前赴直東交界處所探賊所向四面布置統率馬步各隊實力夾擊使該逆不得任意奔竄以期一鼓殲除並著左宗棠李鴻章各飭所部節節進紮與追剿之師聯絡援應俾該逆到處阻截為以逸待勞之計庶辦理較為得力天津減河一帶崇厚當嚴加防範以備該逆回竄直東沿運河牆均經築就李鴻章左宗棠子寶楨英翰均當督飭防軍嚴密遏守不可稍形疏懈致逆蹤

竄越河西。是為至要。將此由六百里各諭令知之。○又諭庫克吉泰、劉典奏擊退西路賊匪。撥兵防剿西北。並榆林等處被擾情形。各摺片。陝省西路鳳翔各屬。被大股甘回竄擾。經李輝武督率川軍。在寶雞所屬之號縣鎮底店斜坡等處。疊擊獲勝。殲斃偽帥馬姓。賊目趙姓。並擊敗杜家莊等處股匪。斃賊甚多。其由扶風橫竄乾州之賊。亦經常興阿等擊退。敗竄岐山。由鳳翔麟遊分路遁回甘境。該

逆竄鳳未遂。復由邠長三水內竄中部。經周紹濂督兵力戰。疊獲大勝。殲斃偽帥曹姓。惟周紹濂所部兵力較單。該逆現已分股。由中部繞至洛川白水及宜君馬欄鎮等處。郃陽澄城均有賊蹤。勢甚蔓延。劉典現已調派各營。馳赴白水等縣剿辦。著即嚴檄諸軍分路痛擊。速行殄滅。毋任擾至沿河一帶。震及晉疆北山土回各匪。竄撲榆林各屬。兵團失利。神木失陷。該逆分股竄往草地。勢蹙頗張。庫

克吉泰、劉典務當檄調得力之軍迅速馳往剿辦。並飛咨金順迅率所部會合延綏鎮總兵盡力剪除。不得以去省較遠稍涉懈弛。三水邠州長武各隘。並著庫克吉泰等派兵防守。以杜該逆續行東竄。昨據御史郭從矩奏請飭陝甘等省修築堡寨堅壁清野一摺。所陳事宜三條。於陝省情形有無可採。著庫克吉泰、劉典酌籌舉行。郭從矩原摺著鈔給閱看。將此由六百里各諭令知之。○補鑄福建

臺灣水師副將左營遊擊中軍守備各關防條記從署總督英桂請也。○以陝西甘泉等處剿賊獲勝。復已革副將黃超羣職。予副將劉厚填等升敘有差。○予陝西神木陣亡參將慶連祭葬。世職加等。○甲申諭軍機大臣等鄭敦謹奏遵旨移防北路。並請將知府等員開復頂帶各摺片。陝回竄近準噶爾旗界。晉省河保各邑及薩清托等城情形喫重。其路澤一帶防務較鬆。自應移緩就急。力固省

北鄭敦謹以甯武地處適中。現擬由澤州起程。前往駐紮。著卽懍遵疊次諭旨。迅將河保等處防務。妥為布置。一面飛咨總兵馬陞統率所部。探明何處有警。卽向何處截擊。一面嚴檄郭得勝。管帶忠字舊營。與原駐河保之忠字新營各勇丁。會合扼守。毋稍鬆勁。在省之撫標官兵。並著抽出精壯數百名。以資策應。其攔車鎮大河口東陽關各隘。該署撫仍當飭令陳膺福崇安等。加意嚴防。不准虛應。

故事知府陳膺福參將趙融。既據查明無縱容勇丁情事。其巡查口隘。亦尚勤奮。陳膺福趙融均著賞還頂帶。仍飭帶隊以觀後效。前據郭從矩奏請飭山西等省修築堡寨堅壁清野一摺。所陳事宜三條。於晉省情形有無可採。著該署撫相度機宜。飭屬斟酌辦理。毋徒擾民為要。郭從矩原摺著鈔給閱看。將此由五百里諭令知之。○追予浙江湖州殉難布政司理問李麟等紳民婦女八百九十四

員名口分別旌卹如例。並予建祠。○乙酉諭軍機大臣等。都興阿等奏會籌進剿情形一摺。都興阿已抵津門。現於津防洋槍礮隊內撥兵一千二百餘名。派王佐臣統領前赴減河駐紮。現在運河以西有左宗棠各營防守。李鴻章所部由德州一路進剿。西南兩面布置既嚴。自宜由北路進兵。以為夾攻之計。著都興阿馳赴減河。擇要扼紮。督率各軍相機前進。會同左宗棠李鴻章廣籌方略。妥速剿

辦。為一鼓聚殲之計。達明阿所帶精字威遠隊八百名。著都興阿崇厚咨照恩承。飭令該章京統率所部迅赴都興阿軍營。以資厚集。其吉林黑龍江馬隊官兵。都興阿於到防後務擇其技藝嫺熟馬匹臚壯者。飭令過河協剿。迅殄逆氛。將此由六百里各諭令知之。○又諭伊勒屯等奏請飭諭烏科二城捐輸軍餉奎昌奏據聞布倫托海有警。派兵確探各摺。巴城累年領到軍餉不敷支發。該處兵丁

枵腹荷戈。自應設法接濟。烏科兩城。尚稱完善。著麟興榮全。錦丕勒多爾濟。奎昌福濟。車林多爾濟。於該兩城官商及蒙古人等。妥為勸諭。如有力能助餉。踴躍輸將者。准其給予議敘。一俟捐有成數。卽解至巴城。以濟軍食。惟不得抑勒苛派。致滋擾累。奎昌奏蒙兵棍布報稱。聞布倫托海於四月二十六日夜間。有難民變亂情事。致附近蒙古各站。人心驚惶。驛路梗塞。該處距布倫托海尚遠。傳聞是

否確實。著奎昌等卽派員繞道前往。探明確耗。隨時具奏。布倫托海新城。關繫緊要。如有難民擾害。亟應設法布置。李雲麟何以尚未入奏。著一面據實奏聞。一面嚴飭該城員弁。彈壓撫綏。以靖邊圉。將此由五百里諭知麟興。榮全。錦丕勒多爾濟。奎昌。福濟。車林多爾濟。李雲麟。明瑤。錫綸。伊勒屯。並傳諭何琯知之。○丙戌。諭內閣。前因丁寶楨奏請將惠民縣知縣帥蒿齡升補高唐州知州。經吏部議

駁。茲據該撫奏稱。山東高唐州地居衝要。該員署任將及一年。措置裕如。仍請升補。斯缺等語。自係為因地擇人起見。高唐州知州。著仍准以帥蒿齡升補。嗣後不得援以為例。○又諭丁寶楨奏請將不職之牧令革職等語。山東嘉祥縣知縣李青林。麤鄙昏謬。廢事虐民。前署鉅野縣知縣候補知州孫懷珍。任性乖張。致激民怨。李青林。孫懷珍。均著卽行革職。○又諭丁寶楨奏請將藉端訛賴並縱子

滋事之遊擊革職。審辦一摺。署福建海壇營遊擊陳期登。管駕金州戰船。輒敢私帶貨物。沿途逗遛卸賣。藉端訛賴。擾累商人。伊子在卽墨縣境滋事。釀成命案。經該縣提審。並不將人犯交出。復以亟應出洋。屬令將已獲之犯釋回。實屬荒謬。陳期登著革職。拏問。交丁寶楨提省嚴行審訊。勒令將伊子及在場之水兵全數交出。按律懲辦。○諭軍機大臣等。羅惇衍等奏。夾板船試運江蘇米石。驗收辦

理情形一摺。江蘇田捐採買米三萬石。試用夾板船運津。經羅惇衍等前赴紫竹林查閱。除將已到米石驗收外。尚有未到米四千五百三十石。羅惇衍鍾岱現將正供漕米驗完。已有旨令其回京。所有此項未到米石。著俟續運到津後。卽由崇厚就近驗收。以歸簡易。至沙船裝運正漕。早已如數抵津。而夾板船所運田捐採買米石。轉未能一律到齊。其中有無掣肘。明年能否再行試辦。抑仍廣招沙

船裝運之處。著曾國藩。丁日昌體察情形。詳細妥籌。屆時奏請辦理。將此各諭令知之。○安徽巡撫英翰奏。遵旨嚴督將士盡力固守。以防賊竄。運西得旨。著卽督飭皖軍程文炳等與陳國瑞盡力追賊。並與都興阿。左宗棠。李鴻章所派各軍會合夾剿。仍一面嚴督沿河防軍實力堵遏。毋稍鬆懈。○以直隸天津驗收海運漕糧完竣。予戶部尚書羅惇衍優敘。餘加銜升敘開復有差。○以防護海運米

石出力。賞同知朱其昂等花翎。知縣錢開震等藍翎。餘加銜升敘有差。○予河南臨漳陣亡千總潘鳳岡祭葬世職加等。○予山東各屬陣亡殉難紳民婦女二千一百六十九名口分別旌卹如例。○丁亥。諭軍機大臣等。都興阿崇厚奏。捻逆勢向北趨。擬赴前敵布置一摺。捻逆由臨邑敗潰狂奔。有北趨之信。都興阿現已親督洋槍礮隊全軍。並調達明阿所帶威遠隊及吉林黑龍江馬隊徑赴減河

一帶查閱布置。著卽實心經理。相機迎剿。恩承現赴青縣。著都興阿就近與該侍郎妥商。斟酌抽調。總須後路防兵足數分布。方可抽撥前進。不可使後路空虛。致賊乘隙渡河。又形滋蔓。張曜。宋慶。春壽。陳國瑞四軍。旣在德州獲勝。卽俟剿賊喫緊之時。該將軍職在督剿。正當親赴前敵。督帶各軍合力進剿。何得以張曜等四軍。仍請歸李鴻章調遣。似此跡涉推諉。大非朝廷委任之意。著都興阿於到

減河後。查閱事竣。迅速前進。探明張曜等軍進兵處所。就近督率迎剿。以殄逆氛。減河防守事宜。著崇厚嚴密布置。毋稍疏漏。並將軍火糧餉。隨時接濟。都興阿軍營。毋任缺乏。將此由六百里各諭令知之。○又諭。明瑤等奏。布倫托海兵民啟釁一摺。據稱四月間。布倫托海兵民。因風聞李雲麟有洗滅兵民之意。眾心驚惶。由此起事。搶去軍械。並庫存茶布等項。傷斃官兵等語。該城設立未久。一切安

插事宜。責成李雲麟等辦理。何以倉卒之間。忽生變亂。李雲麟何以不亟籌彈壓。藉安設臺站為詞。率往青格里一帶。難保非有心規避。其該兵民挖出摺臺。是否係李雲麟所擬之件。著即明白回奏。聽候諭旨。並迅回布倫托海。會同明瑤等。妥籌彈壓。以靖地方。福濟計已將抵科城。錫綸係布倫托海幫辦大員。現在行抵何處。諒距該城不遠。著該大臣等。趕緊會同前往查辦。將啟釁情形。據實奏聞。

毋稍徇隱。該處突起釁端。顯係有奸人從中煽惑。藉端生事。未必兵民盡萌叛志。但人數眾多。亟宜妥籌綏輯。以靖亂階。明瑤豈可前往科城。置本任於不顧。棍噶扎勒參平日辦事實心。現值該處有事之秋。正當竭力圖維。以副委任。豈可遽萌退志。著明瑤棍噶扎勒參。先將附從人眾。曉諭解散。其為首倡亂者。諒亦不過數人。即著設法拏辦。以儆刁頑。務使該兵民喇嘛等。盡釋疑慮。各安生業。是為

至要。明瑤等摺一件。著鈔給福濟錫綸閱看。軍機處呈遞明瑤等咨到文彙等五件。著一併發給閱看。將此由六百里諭知福濟李雲麟。明瑤錫綸。並傳諭棍噶扎勒參知之。○以轉運遲延。大通橋監督恩奎等。分別嚴議。議處。○戊子。諭軍機大臣等。劉崑奏援黔官軍攻克偏刀水賊巢。肅清河西。並疊克苗寨。及勦撫後山各地。尚情形一摺。貴州偏刀水地方。經李元度等會合川軍。攻克賊巢。擒斬首

逆各情。業據崇實奏報。楚軍攻剿黔省教匪。疊獲勝捷。貴東漸可肅清。惟教中頭目尚有劉儀順一犯至今未獲。是否乘間潛逃。仍著飭令李元度切實查明稟報。毋稍含混。老圍巖柯秦家寨等處。卽著嚴檄彭芝亮督率所部擇要駐紮。如該提督不甚得力。該撫務選結實可靠之員前往管帶。以資鎮撫。李元度旣屬患病。著賞假兩箇月。一俟病痊。卽赴雲南臬司新任。其遣撤兵勇。並著傳知該臬司

挑選精壯。帶赴雲南。隨同剿賊。貴東一帶地方。甫臻安靖。所有善後事宜。曾璧光務當嚴飭貴東道。督率各該地方官妥籌撫輯。毋致再生事端。將此由五百里各諭令知之。○以湖南官軍攻克貴州偏刀水賊巢。賞提督黃開榜總兵官池中和。彭楚宥。巴圖魯名號。都司鄧第武花翎。提督彭芝亮等獎敘有差。予陣亡把總李積蕃祭葬世職。○己丑遣官祭關帝廟。○庚寅諭軍機大臣等。李鶴年奏剿

辦泌陽匪徒淨盡。並遊擊被戕各摺片。河南泌陽匪徒滋事。擾及裕州。經該地方官激勵兵勇。會同泌陽民團。將分股匪徒斬殺殆盡。復經李鶴年派往之總兵崔廷桂督帶官兵。聯絡各處鄉團。與總兵趙鴻舉。將泌陽唐縣等處股匪殲除淨盡。並將首匪張十。及兇悍夥犯任禿子擒獲。辦理尚為迅速。所有在事出力之員。弁紳團。准李鶴年擇尤存記。彙案保獎。在逃之首犯花得春。著飭令崔廷桂

等嚴督兵練。設法擒捕。務期弋獲。毋任漏網。至候補遊擊張鏞。經李鶴年派往德州一帶設撥馳送文報。行至山東夏津縣之盧里莊。被民團多人戕害。並將同行之豫省遊擊周明崐砍傷。張鏞所帶弁兵及馬夫人等十二名。均無下落。近來各處民團强悍。恃眾戕官之案。不一而足。其風斷不可長。著丁寶楨認真究辦。務將此案首從各犯嚴拏懲辦。以儆兇頑。其無下落之弁兵等。是否全行被害。一

併查明具奏。東省民團並著丁寶楨揀派委員會同該地方官妥為經理。並剴切曉諭。毋得仍蹈故習。以消隱患。李鶴年原片著鈔給閱看。將此由五百里各諭令知之。○又諭張之萬奏請飭山東巡撫劃撥解部款項等語。淮安關庫存銀一萬五百餘兩。既經清淮借充軍餉。自應籌還解部。以重款項。現在該處軍餉支絀。山東省自同治五年五月起。每月協撥清淮軍餉銀二萬兩。截至六年年底止。

先後僅解過銀二萬兩。積欠尚多。著照張之萬所請。所有清淮前經借撥淮安關應行解部銀兩。著丁寶楨於欠解清淮協餉項下。劃撥銀一萬五百八十一兩九錢一分。過便搭解部庫。以清款目。其餘欠餉。並著迅速籌解。清淮俾濟征軍。將此各諭令知之。○又諭林壽圖奏請裁撤甘肅後路糧臺一摺。據稱山西等省應協甘餉。業經奏明徑解甘省。湖南等省甘餉。已由湖北糧臺轉解。河東常餉。亦

徑解蘭州。其由王加敏分運到陝之餉。左宗棠委知縣朱瑛經收。涇慶各軍現由道員彭思曾支發餉項。該藩司並無經手甘軍餉事。請將糧臺裁撤。以節糜費等語。西安糧臺本為轉運甘省軍餉而設。屢次議撤。議留。辦理殊覺歧異。著左宗棠將林壽圖所奏各情詳細酌度。所有西安糧臺應否裁撤之處。即著奏明辦理。原摺著鈔給閱看。將此諭令知之。○又諭林壽圖奏平涼失陷。遊擊李承萬遇

害。知縣陳日新並未殉難。據稟出城彈壓。且千總張維有通匪情事。又風聞陳日新與張維私分餉銀。與之齟齬等語。棄城通賊。罪名均重。虛實均應徹底根究。以肅紀綱。著穆圖善按照林壽圖所陳情節。遴委妥員。確切查明。嚴叅懲辦。遇害遊擊李承萬著穆圖善查明請卹。林壽圖片著鈔給閱看。將此諭令知之。尋左宗棠奏遵查張維隱匿餉銀。挾李承萬勒令全繳之嫌。勾引匪目蘇存鴻。竄夜入

城戕害李永萬。陳日新聞信赴援無及。現拏獲張蘇二犯正法。陳日新並無棄城先遁及私分餉銀情事。惟城池被陷。咎有應得。請革職留營從之。○以四川馬邊剿匪出力。賞總兵官王大文。張升揚彭振興。一品封典。總兵官蕭迎祥張步霖。副將周代禮。遊擊姜殿宜。巴圖魯名號。遊擊王騰芳等花翎千總李錫麟等藍翎。餘加銜升敘開復有差。○予山東夏津被戕遊擊張鏞祭葬世職。如陣亡例。

大清穆宗繼天開運受中居正保大定功聖智誠孝信敏恭寬毅皇帝實錄卷之二百三十三

大清穆宗繼天開運受中居正保大定功聖智誠孝信敏恭寬毅皇帝實錄卷之二百三十四

批

同治七年戊辰五月壬辰諭軍機大臣等郭

柏蔭等奏遣撤霆峻各營並辦理江湖會匪情形一摺。江湖會匪首蕭潮翥即蕭潮舉在湖北地方立有蓬萊天台等山老帽陪堂紅旗等項名目。沿江肆掠。乘霆峻等營遣撤糾黨分布黃梅武穴龍坪各水次阻截散勇。迫脅滋事。兇燄甚熾。經郭柏蔭等檄飭提督譚仁芳等水陸各營擒獲匪黨劉子霖胡國星等十餘名。正法並盤獲匪船三隻。其盤踞黃梅陸家嘴之匪亦經總兵婁雲慶密約水

師會同民練。殲斃四五百人。餘匪星散。匪首蕭潮耆。經知縣廖恩樹副將向百福會合兵勇追捕。經勇丁陳之貞等將蕭潮耆殺斃。辦理甚為妥速。著郭柏蔭何璟。嚴飭所屬各地方官。聯絡水陸各營。將逃散餘匪一體認真兜拏。務期盡絕根株。毋任一名漏網。霆峻各營散勇。並著飭令婁雲慶妥為鈐束。毋令沿途逗遛滋事。所調各營。仍令擇要駐紮。嚴密按捕。以靖地方。將此諭知郭柏蔭。並傳諭何

璟知之。○又諭庫克吉泰。劉典奏北山賊匪充斥。官軍力戰受挫。甘肅賊竄陝境。現籌防剿情形。並賊擾府谷。及進剿汧陽獲勝。撥營前赴邠州各摺片。逆首楊汶志突撲延安。副將劉文華等馳往堵禦。力戰陣亡。劉厚基帶隊赴援。斃賊無算。並將延安城防妥為布置。賊始不敢攻撲。劉厚基一軍。此次因賊眾失利。膚施宜川延長等處。匪勢鴟張。晉省吉州一帶。與延宜僅隔一河。尤虞賊蹤東越。該將

軍等請飭鄭敦謹派兵渡河。與陝軍夾擊。著即檄令劉厚基。劉端冕各率所部。分投進剿。鄭敦謹計已馳抵甯武。著相度機宜。將本境河防布置周密。如可分兵渡河。即飭陳湜迅率防河之軍。由吉州過河。以期東西合擊。痛埽賊氛。甘省回逆各匪。乘陝境麥熟。分途竄擾。雖經高連陞周紹濂等軍截擊獲勝。而汧隴邠長沿邊地方。麥收較遲。該逆尚思掠食。著庫克吉泰。劉典。檄令吳士邁黃鼎等聯絡

各軍。併力嚴扼。不可稍涉疏虞。榆林東路回逆。由神木竄撲府谷縣境。擾及木瓜清水等堡。遊擊榮光等先期逃避。實屬怙怯無能。黃甫營遊擊榮光。清水營把總康濟均著即行革職。拏問。文庫克吉泰等提省審訊。按律懲辦。府谷城與保德州城相距甚近。山西防務尤未可鬆。如府谷附近。有警。即著鄭敦謹飭令防守河保各軍。渡河援應。並著添派勁旅。嚴防河保一帶。毋得稍涉大意。李輝武等軍。

在汧陽一帶大獲勝仗。汧鳳境內現無賊蹤。惟邠州西北原上賊股麇聚。自應迅圖撲滅。著庫克吉泰、劉典、嚴飭劉倬、雲喻兆圭等。分路前進。與黃鼎一軍相機夾擊。毋任四出蔓延。將此由六百里各諭令知之。○又諭崇實奏官軍進剿越嵩夷匪。疊獲勝仗。並現在籌辦情形一摺。四川越嵩夷匪恃其地險巢深。叛服無常。久為建南之患。本年春間滇匪窺伺蜀邊。勾結晃越夷匪。該署督以越嵩為省垣西南門戶。尤關緊要。派提督周達武等於四月間督兵進剿。乘勝攻破賊卡兩座。軍威大振。現在官軍進逼普雄。勦撫兼施。辦理尚為得手。惟該匪負隅抗拒。暨不畏死。目下阿彌羅尖角垵兩卡雖已攻破。而普雄為猺夷藏匿淵藪。該處山川險阻。尤宜嚴飭將士相度形勢。穩慎進攻。僅能拔其巢穴。庶邊界地方可期一勞永逸。著崇實檄令周達武等乘此聲威。力圖進取。如該夷悔罪投誠。亦不妨

分別辦理。所有此次出力人員著准其擇尤保奏。毋許冒濫。傷亡弁勇並著查明請卹。將此由六百里諭令知之。○以陝西官軍疊次防剿甘肅回匪出力。賞總兵官鍾開南、巴圖魯名號。餘升敘有差。○予甘肅延安等處陣亡副將劉文華等四十三員祭葬。世職加等。與總兵官文星明合建總祠。○癸巳諭軍機大臣等。李鴻章奏官軍追賊獲勝。擬偪令南趨。再圖蹙剿。並會派兵圍扼守情形各摺片。捻逆北竄。後經張曜等督軍追剿。該逆敗遁南竄。臨邑復經潘鼎新等擊敗。李鴻章擬趁黃河伏汎。縮地圍紮。就馬頰河截長補短。偪賊西南層層布置。庶該逆無可紛竄。殄滅更有把握。即著李鴻章督飭郭松林等由臨邑陵縣接築牆壕。與馬頰河民圩接續。並著英翰將新到之張得勝、張從龍兩軍酌派赴馬頰南岸清平高唐一帶扼剿。丁寶楨身任地方。即著嚴飭馬頰河沿岸州縣趕緊集團。勒

限藏工。現在機勢可圖。總宜剋期辨竣。以速為要。若日久為逆匪窺破。必不肯就我範圍。左宗棠李鴻章英翰丁寶楨務當協力同心。不得稍存歧視。都興阿即著懷遵前旨。迅由北路進剿。會合諸軍。一鼓殲除。不得以慎重為辭。致失機宜。該將軍營所需軍火糧餉。著崇厚妥為護送。該大臣等均為朝廷倚賴之人。當此天氣炎熱。兵將疲困。而宵旰焦勞。不遑寢食。如再遷延。各存意見。不能迅奏膚公。

其何以上對朝廷。下慰將士。以拯生民於水火耶。勉之慎之。將此由六百里各諭令知之。○旌表守正捐軀浙江麗水縣民女周美芝姑。○甲午諭內閣。左宗棠奏請將副將革職拏辦等語。儘先副將丁錫金。於出隊剿賊時。兩次藉病逗遛。迨經查問。輒敢私行逃走。實屬有干軍律。丁錫金著即行革職。並撤銷勇號。嚴拏懲辦。○諭軍機大臣等。左宗棠奏捻竄直境。截剿疊勝。現籌防剿情形一摺。劉松

山郭運昌喜昌等軍。追賊至鹽山海豐滄州等處。疊獲勝仗。擒斬甚夥。該逆分起逃竄。復經官軍追殺。均向德平南趨。昨據李鴻章奏。稱擬就馬頰河沿岸築牆。並於臨邑陵縣等處。築挖牆濠。與馬頰河民圩接續。茲據左宗棠奏。稱李鴻章在德州陵縣濟陽掘濠築牆。與李鴻章昨奏大略相同。左宗棠當督飭諸軍迎頭截擊。以固裏圍濠牆。一面仍將沿運河牆聯絡民團兵勇。嚴密扼守。並知會李鴻

章。丁寶楨英翰。一體兼防運河岸牆。不可稍有疏虞。致令賊蹤竄越。甯津一帶防剿事宜。並著左宗棠督飭劉松山等軍。妥籌兼顧。將此由六百里諭令知之。○又諭沈葆楨奏。江岸坍塌。逼近船臺。現籌堵禦一摺。船臺前江岸。於閏月十九日夜間。被風浪衝齧。塌入水中。所有岸旁堆積羣材。雖經拖運中間。臺前亦添釘巨椿三層。暫資堵禦。惟岸址未堅。風濤不時衝激。其勢斷不能久。該大臣現擬疏

洩積水。改築石隄。將環陽長濠一律填塞。俾土性乾凝。岸旁地基鞏固。所籌尚屬妥協。著卽照所擬辦理。船陽廠基。關繫綦重。該大臣務當趕緊庀材集夫。督率興修。以防橫決。此次江岸坍塌。該大臣未能先事豫防。所請嚴議之處。姑從寬加恩。改為交部議處。嗣後惟當審慎督修。毋稍疏忽。以期無負委任。將此由四百里諭令知之。尋吏部議沈葆楨照防範不嚴。例降一級留任。得旨准其抵銷。○浙

江衢州鎮總兵官簡桂林因病解職。以前任福建金門鎮總兵官陳東友為浙江衢州鎮總兵官。○以不遵調遣。革山東軍營道員方雲藻職。副將胡國龍遊擊夏如賓革職。遣戍軍臺。○乙未。以詹事府少詹事景其濬為詹事。○丙申。諭軍機大臣等。都興阿奏馳赴青縣察看減河。擬籌布置情形一摺。據稱減河水勢並不寬深。自捷地至呂家橋。雖築有橫牆。而迤北之運河西岸。毫無防範。京旗各營

相距太遠。擬將靜海等處鄉團調歸本處。扼要之地。多紮官兵。各等語。所奏不為無見。南路李鴻章等軍追剿既急。兵勢甚盛。該逆冒險北竄。圖越減河。實在意計之中。第南路鄉團既調回青滄等處。則自吳橋以北。上沂南皮運河西岸。左宗棠之軍能否足敷防守。不可不通盤籌畫。萬一該逆從東光等處乘虛西竄。則南北各軍俱落賊後。辦理更無把握。著都興阿會商崇厚恩承。應否將京兵調紮

獨流等鎮之處。妥籌布置。並咨商左宗棠能否堵扼。不使逆匪得以橫竄。再行將鄉團調回。以扼北路。都興阿現已行抵青縣。兵力尚單。卽著迅速前進。檄催春壽宋慶張曜。陳國瑞各軍會合。妥為調度。俾得與李鴻章之軍南北聲勢聯絡。遇賊卽擊。迅奏膚公。用副殷盼。將此由六百里各諭令知之。○以鑲白旗滿洲副都統何永安署正黃旗護軍統領。○丁酉。諭內閣。何璟奏甄別庸劣不職之同知

知縣佐雜各員請旨分別休致降革一摺。湖北補用同知趙思曾性喜營求習氣甚重。著以府經歷降補候補同知常麟心地糊塗。不諳事理。著以原品休致。鄧西縣知縣程光第。縱用私人招搖生事。著即行革職。補用知縣承印輕躁任性。前署穀城縣事。不協輿情。著以巡檢銓選。縣丞許遂生年少輕浮。前署蒲圻縣縣丞。見鄙士民。沌口巡檢楊元璋遇事貪刻。任意妄為。多雲巡檢王勛仁工於心計。

性情巧滑。著一併革職。以儆官邪。○以通州驗收海運漕糧完竣。予刑部右侍郎英元議敘。餘加銜升敘有差。○予湖北各屬陣亡殉難外委吳尊倫等紳民婦女一百五十五員名口分別旌卹如例。○旌表守正捐軀湖北安陸縣民婦吳唐氏。○戊戌舉行同治六年軍政湖廣卓異官八員。不謹官六員。罷輟官二員。年老官三員。有疾官二員。兩廣卓異官三員。不謹官二員。罷輟官一員。年老官五員。

分別議敘處分如例。○己亥。

孝恭仁皇后忌辰遣官祭

景陵。○諭軍機大臣等載鋼等奏天罡隊匪徒聚眾搶劫請飭嚴拏等語。南新城附近

陵寢竟有匪徒結盟聚眾肆行搶劫實屬目無法紀。亟應嚴拏究治。淨絕根株。以清亂源。所

有現獲各犯著載鋼等飭令遵化州知州嚴行審訊。並著官文轉飭該州認真嚴究。毋稍

寬縱。其未獲各犯著官文飭令各該州縣地

方官一體嚴拏。務須乘其初起之時迅速撲

滅。毋任滋蔓。原片著鈔給官文閱看。將此各

諭令知之。○又諭鄭敦謹奏擊退撲河竄匪

並晉兵驟難渡河情形各摺片。陝省府谷賊

匪經蒙古官兵會合該處民團擊退竄往葭

州米脂一帶。神木府谷境內一律肅清。惟該

逆蹤跡飄忽難保不去而復來。鄭敦謹當飭

晉省北路防兵隨時嚴防。不可稍涉鬆懈。葭

州與晉省興臨等縣亦係毗連。並著庫克吉

泰劉典將竄往葭州米脂之賊。派兵迅速勦除。毋任再行肆竄。至邵陽韓城賊匪竄逼河干。疊經晉省西路防軍擊退。防堵尚屬認真。鄭敦謹現住省城。居中調度。著卽嚴飭陳湜親督各營將士。並各地方官。於蒲絳吉鄉等處。聯絡堵禦。並將沿河渡船提歸東岸。不可稍涉大意。庫克吉泰劉典尤當督飭陝軍。將韓城邵陽等處賊匪力籌勦洗。不得任聽賊蹤竄及晉疆。致干咎戾。晉省西路沿河地段

繇長鄭敦謹以兵力較單。難於抽調防兵。過河進剿。致本境轉形空虛。亦係實在情形。庫克吉泰劉典惟應就陝省現有兵力。將北山賊匪迅圖殲滅。不得專待鄰省會剿。致涉延誤。至府谷與保德僅隔一河。地勢較近。儻遇該處有警。鄭敦謹仍當酌量派兵渡河援應。以固疆圉。將此由六百里各諭令知之。○予浙江各屬陣亡殉難運庫大使牛森等紳民婦女三百三十三員名口分別旌卹如例。○

庚子諭內閣巡視西城御史錫恩等奏請將副指揮仍留西城補用等語。候補副指揮謝蓉溪前經吏部以定章不符奏駁。茲據該御史等奏稱該員熟悉地方情形。並疊獲要犯多名。洵屬得力之員。謝蓉溪著准其俟西城副指揮缺出卽行留補。○又諭成祿奏官軍勦賊疊勝收復各處屯莊。並總兵營勇潰變。請旨懲辦一摺。甘肅肅州踞逆因黨與漸散。潛於肅高兩屬各處勾煽。以致逆匪同時蠢動。經該提督派總兵馬天祥等統軍由營兒

塢進攻連戰皆捷。先後殲斃逆回三四百名。奸匪千餘名。自營兒塢以及石灰窯東洞子金佛寺等處各屯莊全行收復。我軍進紮上下河清一帶。軍威大振。高屬之紅崖子等處從逆各屯莊亦望風反正。勦辦甫經得手。詎總兵王仁和一軍陡因糧絀變潰。各營繼起。眾心驚惶。旋經健銳鎮西兩軍多方拊循。始得相安無事。該總兵等統率無方。自應嚴行

懲辦以肅軍律。署肅州鎮總兵王仁和著卽行革職。仍留署任責令帶營立功贖罪。如再不知奮勉。卽著從嚴叅辦。已革遊擊王禮和著發往新疆效力贖罪。遊擊石子成守備潘禹各剋扣軍糧。以致眾心潰變。實屬大干軍律。均著在軍前正法。以昭炯戒。○諭軍機大臣等。長善奏直隸貧民出口謀食人多。恐有逆匪奸細蒙混。請飭各省一體稽查等語。直隸各州縣貧民疊被水災。賊擾紛紛出關。往

奉天吉林等處謀食。曾經長善奏明。此項貧民到關。卽詢明謀食地方。按戶登記冊檔。分造清冊。咨報兵部。並咨行各該地方官。隨時稽察。辦理尚屬認真。現在捻逆仍在直東之交滋擾。時有奸細假扮難民。各處窺探。更難保無雜髮匪徒。溷跡潛逃。自應加意盤詰。仍著長善督飭各口防守尉等官。細心查覈。不可日久生懈。惟此項難民。不盡由關門而出。北邊一帶荒僻小口。隨處皆可行走。並有乘

坐海船由水路前往奉天吉林等處者。著奕榕富明阿額勒和布恩錫各飭所屬旗民地方官。於所到難民。妥為安插。如有形跡可疑及奸匪假冒情形。立卽拏究。仿照長善奏定章程一體覈實辦理。不准虛應故事。將此由五百里各諭令知之。○又諭英翰奏皖軍在武定勦擒獲勝牛師韓為民圩誤傷調營養息。並飭張得勝等合隊前進一摺。擒逆竄向武定。經牛師韓督軍追勦。設計誘賊得獲大

勝。追至霑化。距賊甚近。乃牛師韓為民圩排槍擊傷。以致不能前進。機會甚屬可惜。卽著英翰派員迎調牛師韓前赴臨清。趕緊延醫調治。以期速痊。霑化所屬李家民圩。既經該總兵告知。勿須驚懼。何以驟放排槍。致牛師韓身受多傷。隨從員弁亦傷至三十餘人。是否該弁兵等先有騷擾情事。抑係該民圩恃眾傷官。並著丁寶楨確切查明。嚴行懲辦。前據李鴻章奏。擬於馬頰河添築濠牆。以拒賊

竄曾諭英翰派張得勝等軍前往協防。現在該署撫已派該提督會同程文炳合隊前進。即著英翰飭令張得勝等協同防守。如遇賊竄近。即行迎剿。俾濠牆得以速竣。而滅賊較有把握。諒該署撫必能與李鴻章妥商籌辦也。將此由六百里各諭令知之。○又諭庫克吉泰等奏。回逆竄擾邠長。甘省靈臺境內。擊賊獲勝。請飭晉兵渡河夾擊。並請將知府成定康留於陝西各摺片。長武三水等處。經閻定邦等分路進剿。疊獲勝捷。該逆現由邠州折竄。庫克吉泰等檄道員黃鼎迅赴長武會剿。即著該將軍等催令該道員星速前進。會同閻定邦等覘賊所向。迅殄逆氛。甘肅回目馬豔魁等竄踞靈臺。擾及麟遊。經吳士邁等進剿。大獲勝仗。即著庫克吉泰等嚴檄官軍乘勝埽蕩。悉數殲除。毋留遺孽。晉省西路沿河地段縣長。昨據鄭敦謹奏稱。兵力甚單。未能抽調防兵過河進剿。自係實在情形。著庫

克吉泰劉典懷遵昨日諭旨。就陝省現有兵力分路布置。將匪股次第撲滅。以期漸就廓清。候選知府成定康著准其留於陝西。以知府歸候補班補用。該將軍等擬令該員募勇千五百人。進駐綏德。並署理綏德州知州事務。均著照所擬辦理。庫克吉泰等當飭令成定康將安民勦匪事宜實心辦理。毋得有名無實。將此由六百里各諭令知之。○又諭成祿奏。官軍勦匪情形。並商同楊占鼐先顧肅軍前敵大局。再行部署出關。暨籌辦潰勇各摺片。官軍進攻肅州。連獲大捷。克復屯莊多處。而王仁和所統仁字一軍。因餉匱變亂。以致前敵各軍眾心惶惑。全行掣動。著穆圖善傳諭楊占鼐。一面督軍進攻肅城。一面將金塔毛目一帶潰勇。或勦或撫。相機妥辦。此起潰勇。將來即使收撫回營。已成無紀之師。並著該署督飭令楊占鼐加意拊循。仍須實力整頓。並此後放糧。嚴禁各營官私行剋扣。以

肅營規成祿壘奉嚴諭催令出關勦賊乃肅城既日久未下復致有營勇潰變之事該提督現在馳回高臺已與楊占鼇會晤即可將肅州軍務交與楊占鼇接辦不得以潰勇滋事餉絀兵單藉口遷延自干咎戾其前奉指撥川餉十萬兩著由成祿專弁飛催以作料理出關之用並著穆圖善飭令甘涼各屬籌捐糧石豫備該軍出關裹帶由成祿派員催趲星馳挽運毋稍延緩前據都興阿保奏之

儘先協領富勒琿記名副都統托克屯著穆圖善查明該二員現在何處軍營卽飭令來京聽候諭旨將此由六百里各諭令知之○又諭宋廷春奏勦叛逆匪疊勝克復州縣城池及省垣防守穩固情形一摺滇垣被困日久自岑毓英小板橋獲捷之後派遊擊楊玉科等繞由川境收復元謀復進擣環洲賊巢生擒逆目將武定祿勸兩城先後攻復並克羅次縣城其石虎岡等處踞賊復經李維述

等四面堵截殲斃甚多將賊壘全行攻克餘匪向新草房江右館一帶逃竄該省城外南北兩路官軍擊賊獲勝疊復城池勦辦尚為得手惟富民安甯祿豐等處逆匪來往靡常仍著岑毓英飭令楊玉科等迅將各該城池克復以斷賊援省東一路並著劉嶽昭嚴檄全祖凱李家福等軍將嵩尋各股賊匪痛加勦洗以振軍威劉嶽昭等俟各路賊匪廓清後再行進駐省垣會辦一切善後事宜刻下

省城防務著宋廷春商同馬如龍督率在城文武官紳晝夜巡查嚴加堵禦毋得稍涉疏虞元謀等州縣甫經收復民氣彫殘卽著劉嶽昭等遴選州縣等官趕緊赴任以資撫輯所有前次失守各州縣官員下落並勦匪出力文武及傷亡官弁兵勇等應辦事宜著俟劉嶽昭等抵省時分別辦理將此由六百里諭知劉嶽昭岑毓英並傳諭宋廷春知之○予陝西汧陽陣亡提督李佑厚祭葬世職加

等諡壯烈。把總吳清奇等祭葬。世職加等。○予甘肅高臺陣亡遊擊楊永先等祭葬。世職加等。○辛丑以神靈顯應。頒四川鹽源縣關帝廟扁額。曰威宣定作。○諭內閣。前據前任倉場侍郎宋晉奏。請將漕糧改歸八旗存儲散放。並御史舒明奏。存儲米石。未能妥善。請飭另議。及陳嚴杜弊端四條。當經先後降旨。交軍機大臣八旗都統會同該部議奏。茲據奏稱。漕倉事務。定例極為周備。若改歸八旗分別管理。易致紛舛。御史舒明所奏。有與現辦情形相符者。其餘各條。請飭倉場侍郎督飭各監督認真辦理。各等語。所有各倉存儲米石。仍著責成倉場侍郎管理。毋庸改歸八旗分管。其舒明請緝拏偷竊米石匪徒各條。著該管侍郎等督飭各監督認真覈辦。毋得虛應故事。各倉監督養廉。著卽籌給十成。毋庸減成支放。並著隨時甄別。以昭懲勸。各倉花戶。照例招募。不准任意空缺。所領口分

著該侍郎酌量調劑。其看守各倉旗弁兵丁。各旗都統副都統務須擇其妥實可靠者。派往認真巡守。並著查倉大臣御史嚴行稽查。會同步軍統領衙門兵丁加意巡緝。儻有偷安曠誤情事。卽行從嚴叅辦。○諭軍機大臣等。曾國藩奏。劉松山派員回至湖南募勇。已飭湖南鹽局撥銀招募。並令在直隸添募馬勇。請飭直隸等省督撫飭屬照料等語。直隸河南山東等省各州縣民團。近來仇殺官兵之案層見疊出。曾諭官文等遵旨查辦。此次劉松山所募湖南新勇一千七百名。行經直隸等處地方。尤恐兵民不習。滋生事端。著官文李鶴年于寶楨卽飭各屬曉諭居民。毋得留難刁阻。以利適行。該提督在直隸添募馬勇。並著官文責令各該地方就近妥為照料。曾國藩卽檄飭湖南鹽局照數籌撥。俾該軍迅速成行。並檄該提督轉飭募勇各員弁沿途嚴加管束。毋得騷擾地方。將此由五百里

各諭令知之○山東巡撫丁寶楨奏捻逆東竄現飭高唐等縣速修馬頰河隄牆以期兜逼得旨卽著嚴飭各該地方官會同王心安一軍妥速辦理並著該撫會同英翰及淮豫各軍嚴遏賊竄毋稍疏懈○以廣東欽州紳民力保危城永廣學額二名○予江西各屬陣亡殉難四品軍功鍾士清等紳民婦女四千一百九十員名口分別旌卹如例○予四川各屬陣亡官弁兵勇一百八十一員名分別旌卹如例○壬寅諭軍機大臣等曾壁光奏川楚各軍攻克偏刀水賊巢黔軍現規龍貴並請飭川楚督撫派員分辦善後川省按月協餉各摺片川楚各軍攻拔偏刀水賊巢勦撫兼施貴東漸次可望肅清著崇實劉崐飭令川楚各軍乘此聲威將嚴阿廟壩餘匪掃蕩卽行移師進拔玉華山尚大坪等處賊巢以清積年巨患龍貴教匪黨與眾多曾壁光現商令張文德親統黔軍由谷腳巴鄉龍

山一帶分投進剿為搆穴擒渠之計俾該逆有所牽制不至與尚大坪等處踞匪援應著該署撫卽行妥籌餉需飭令該署提督迅督將士剋期將此股積匪殄滅不可失此機會李元度業經因病賞假前已有旨令該臬司假滿卽赴雲南新任並將遣撤兵勇挑選精壯帶赴雲南剿賊所有貴東善後事宜卽著崇實派令宣維禮會同署貴東道妥為辦理並著劉崐酌派楚營可靠之員會同川黔各員一體妥辦曾壁光原片著鈔給崇實劉崐閱看至黔省餉源枯竭已久現值防剿喫緊需用尤急著崇實按照曾壁光所奏無論何款每月撥解銀數萬兩不可稍有間斷黔省軍務正當順利之時該署督諒能統顧全局不至推諉遲延坐失機宜也曾壁光原片並著鈔給崇實閱看將此由五百里各諭令知之○癸卯諭軍機大臣等丁日昌奏連解軍火赴京請飭妥為護送等語神機營派隊勦

賊需用軍火。現據丁日昌奏稱。製就開花輕銅礮。並兵槍馬槍火箭等項。派委候補直隸州知州廣元。由輪船解赴天津。轉運至京。惟現在直東一帶。民團盤詰甚嚴。運解恐致阻滯。此項軍火。解抵天津後。著崇厚嚴飭地方官沿途照料。妥為接護。俾得迅速到京。毋稍延誤。將此諭令知之。○豁免湖南晃州廳被擾地方上年民欠額賦。○甲辰諭軍機大臣等。穆圖善奏軍糧缺乏日甚。大局萬難支撐。

請飭催各省協餉一摺。據稱狄道各軍。後路毫無接濟。四十餘營。斷炊四五日。或六七日不等。該軍紛紛泣懇移營就食。退紮後路。萬難再為駕馭。鞏昌糧臺委員胡世彥。以糧缺恐誤大局。有情急服毒解救得蘇情事。請飭催協餉等語。覽該署督所奏情殊可憫。前據戶部遵議分撥甘餉。當諭令鄭敦謹等迅速籌解。山西山東河南等省應解月餉。著鄭敦謹丁寶楨李鶴年查照穆圖善原奏分給一

半徑解甘省。湖南江西兩省餉銀。著劉崐劉坤一分給一半。解由穆圖善新設糧臺轉解。河東道所欠六年蘭州常餉。著鄭敦謹飭令如數徑解蘭州。該撫等務當竭力籌措。趕緊解甘。以濟眉急。其已經起解之款。卽著懍遵。四月十六日寄諭解交。至續解餉銀。著照穆圖善所請。迅解湖北糧臺。交王文韶等轉撥道員臻武。史敬銘等收運到甘。以歸迅速。前據左宗棠奏。以洋款半給甘肅。現飭王文韶

王加敏於洋款過鄂時。先提銀二十萬。交甘肅委員解甘。下存之銀。仍統解陝西。交林壽圖將甘肅餉項覈算。酌留若干。就近勻撥。一面將長存之項。陸續解甘等語。著郭柏蔭何璟督飭王文韶等。如數提撥。速交甘肅委員解甘。林壽圖務於洋款解陝時。照左宗棠所擬迅速勻撥。毋得稍涉遲誤。將此由六百里諭知鄭敦謹郭柏蔭劉崐劉坤一丁寶楨李鶴年並傳諭何璟林壽圖知之。○又諭穆圖

善奏派員在川督催餉銀並買就米穀請飭四川總督迅速運解等語四川省原定每月協甘餉銀二萬兩自左宗棠咨明由川採買穀米十八萬石該省遂將上年八月以前未解餉銀一概抵還穀價其八月後至今應撥甘餉二十萬兩報解寥寥辦就米穀亦未解到穆圖善現派在川辦捐之道員楊炳銓就近督催自為需餉孔亟起見著崇實查明欠解甘餉若干兩迅速補解仍按月源源籌撥

其辦就米穀並著嚴催各屬趕緊起運所需運費暫由川省籌墊一俟運竣再於協餉內劃扣以清款項甘軍糧餉兩紬專恃鄰省接濟該署督素顧大局必能趕緊運解不稍貽誤也將此由五百里諭令知之○又諭穆圖善奏已革總兵守城擊賊懇請撤銷永不敘用字樣仍革職留營並自請議處等語已革甘肅河州鎮總兵李助發前因會剿狄河在紅土窰遇賊失挫楊岳斌奏參革職永不敘

用嗣據穆圖善奏請開復經部議駁並令將該總兵永不敘用之案毋庸撤銷以符定制茲據該署督奏請將李助發撤銷永不敘用之案仍革職留營自係為軍務得人起見軍營永不敘用人員不推開復原以杜鑽營濫保之漸惟既據該署督奏稱李助發尚未犯贓私重罪又無恇怯驕縱各情上年賊撲甘垣經該署督派令守城專管礮位藉保危城若令其廢棄終身似屬可惜甘肅現當用人

之際覽該署督所奏尚無見好之心自應俯如所請李助發著准其開復永不敘用處分仍革職留營以觀後效嗣後不得援以為例儻該總兵始勤終惰或查有別項劣蹟仍著該署督隨時奏參毋稍瞻徇所有該署督自請議處之處著交部議處將此諭令知之○以甘肅甘州平番等處疊次勒匪出力賞都司陳桂章千總王庭勝巴圖魯名號守備張俊炳等花翎千總楊玉堂等藍翎道員黎獻

等加銜升敘聞復免罪有差○以甘肅徽縣
等處防勦髮逆出力擢知縣古一忱以知府
用並賞花翎外委劉生義等藍翎餘加銜升
敘有差○以甘肅會甯高臺等處辦理城防
出力賞雲騎尉馬正明等藍翎餘加銜升敘
有差

大清穆宗繼天開運受中居正保大定功聖智
誠孝信敏恭寬毅皇帝實錄卷之二百三十四

大清穆宗繼天開運受中居正保大定功聖智
誠孝信敏恭寬毅皇帝實錄卷之二百三十五

同治七年戊辰六月丁未朔。

上詣綏履殿問

慈安皇太后安平安室問

慈禧皇太后安至乙亥皆如之○奉

慈安皇太后

慈禧皇太后幸漱芳齋侍午膳○諭內閣刑部

理藩院奏訊明蒙古貝勒被控各款定擬一

摺此案土默特旗貝勒散巴勒諾爾營被解

掄元等呈控各情。雖無縱放彌勒僧格及主

使白音將解掄元燒傷確據亦無侵用恩賞

老人銀兩情事。惟賞給圖克蘇二品頂帶。及其幼姪三等護衛花翎。並擅用頭等護衛。有違定例。該貝勒管理旗務。於分派差錢等事。諸多乖謬。以致上控之案。層見疊出。實屬不協輿情。散巴勒諾爾贊著革去扎薩克。不准管理旗務。仍著熱河都統會同該盟長查明。該貝勒如有苛斂剋扣情弊。再行從重定擬。彌勒僧格即郭汶得。係奉旨交拏要犯。竟任脫逃。非尋常疏忽可比。著照所擬。給限四箇

月。勒令該貝勒將彌勒僧格訪拏到案。限滿無獲。即行照例叅處。並著各該旗盟長及盛京吉林黑龍江熱河各將軍都統一體嚴拏。彌勒僧格務獲。由該將軍都統就近訊明。是否該貝勒故縱。抑係解擒元誣告。據實具奏。候選知府解擒元。控告散巴勒諾爾贊各款。雖未盡實。均尚事出有因。惟該員不候盛京將軍等訊結。輒敢潛逃來京呈控。殊屬不合。解擒元著交部照例議處。該員尚有被控冒

籍報捐等情。即著解赴義州訊辦。塔布囊呢嗎。因散巴勒諾爾贊不准回贖絕賣地畝。欲辦誣告。即脫逃赴京砌詞上控。雖所控得實。究屬刁健。呢嗎著照蒙古例議處。協理布彥巴達爾呼拉西彭桑格。楊桑阿。辦理旗務。未能妥協。各有被控案件。均著先行撤任。聽候審辦。所有未結各案之原告呢嗎等。並聯名續控之業什鄂薩拉等共三十四名口。即著解交熱河都統會同該盟長查訊明確。迅速

覈辦。○諭軍機大臣等。榮全奏籌辦誤擄牲畜情形一摺。據稱棍噶扎勒參誤擄牲畜一事。業經會同麟興。錦丕勒多爾濟籌議賠償銀兩。備文飛咨俄人。約地會辦。咨商李雲麟等。未據回覆等語。此事既據榮全等籌商辦理。自應迅速了結。免致日久別滋事端。若待李雲麟咨覆到日。再行商辦。往返耽延。反恐別生枝節。著榮全會同麟興。錦丕勒多爾濟迅將此事辦結。不可拘泥誤事。一面分定烏

里雅蘇台邊卡界址與俄人約至邊界會立鄂博界牌分定限址以正疆界布倫托海亂萌初起尤須速籌弭患之方李雲麟何得藉安設臺站為名避往青格勒地方置本任於不顧著懷遵前旨馳回本城會同明瑤等亟籌戡定並將立界事宜妥速辦理毋得規避貽誤致干罪戾將此由六百里各諭令知之○又諭麟興榮全奏請飭土爾扈特盟長速赴布倫托海一摺土爾扈特盟長布彥烏勒

哲依圖來京呈請特派大臣帶兵進勦烏魯木齊回匪該盟長帶領所屬官兵會同征勦曾經諭令該盟長前赴布倫托海地方聽候李雲麟辦理現據麟興等奏稱該盟長自起程後所屬部落復被烏魯木齊吐魯番等處回匪滋擾該遊牧接仗失利陣歿多人喀喇沙爾地方不能居住現已移至大小珠勒都斯等處各情現在該盟長所屬部落人眾日久無人統率誠恐眾心惶惑別生事端布彥

烏勒哲依圖由京起程是否業已出口著理藩院即行查明催令迅速由驛馳赴布倫托海聽候李雲麟酌量情形辦理並著李雲麟明瑤錫綸遵奉前諭接濟照料妥為羈縻毋使別生枝節麟興等另摺奏現調蒙兵未能起程並送越界俄人出境及拏獲普哈爾夷人各摺庫倫所屬東西兩盟僅能派兵四百名尚無起程日期扎薩克圖汗賽因諾顏兩盟長應行續派之兵又因情形苦累軍械駁

馬口糧均未能自備著麟興等即飭令各該盟長等將所派各兵均行停止以示體恤唐努烏梁海地方越界俄人既經該總管等設法查辦護送出境交俄目收回仍須防其復來並著麟興等飭令該總管等隨時巡防毋任再行越界滋事所有此次出力之候補防禦瑪祿堪等三員均著先行存記俟另有勞績彙案請獎普哈爾貿易夷人迷失路徑誤至烏城既非奸細不必寄禁著麟興等妥為

撫恤並諮詢俄國邊界官如何由俄國遞回普哈爾之處。卽著設法送回該部落以示羈縻。將此諭知理藩院。並由六百里各諭令知之。○旌表守正捐軀山西沁水縣民婦李張氏。○撥部庫銀二萬兩解赴綏遠城轉解烏里雅蘇台備用。○戊申諭軍機大臣等。李鴻章奏各軍分投勦擒連獲大捷。現仍會合追勦一摺。擒逆竄擾濟陽等處。經各軍分投攔擊斬馘甚眾。敗賊一股向東回竄。一股竄踞

離德州七十里之楊丁莊等處。現在進勦。既經得手。著李鴻章檄飭各軍乘此聲威。會籌掃蕩。迅殄逆氛。張逆被勦窘急。圖竄運河以東。以求生路。自係意中之事。且東光南皮以上河西兵團皆少。殊慮空虛。李鴻章當會商左宗棠等嚴密布置。認真守禦。馬頰河西北長牆丁寶楨卽督飭官紳趕緊興築。剋日蒞工。以資障蔽。捷地減河一帶著都興阿崇厚激勵將弁。實力堵禦。毋任該逆再行北竄。運

河水勢日涸。尤為可慮。雖經李鴻章咨商李鶴年。使洹河丹河泉源下注。惟日來運水僅增尺餘。應如何設法疏濬。俾該逆不得偷渡之處。著李鴻章妥籌辦理。英翰卽統率所部協同勦洗。為四面聚殲之計。現在賊勢窮蹙。事機較為順手。該將軍督撫等務當同心協力。嚴扼運防。一面督飭前敵諸軍實力兜勦。並檄令在防將士認真盤詰。不使匪徒偷越。是為至要。將此由六百里各諭令知之。○又

諭庫克吉泰劉典秦秦楚各軍連獲勝仗。回逆退竄。董志原仍飭各軍嚴防一摺。回首馬正和糾合涇河川踞賊竄撲長武。經總兵閻定邦會同劉正高等迎勦獲勝。適黃鼎雷正綰各軍乘勢夾擊。賊皆敗竄。長武城圍立解。其竄擾三水之賊亦經知縣喻兆圭擊敗。竄向正甯。知縣劉倬雲等復擊之於萬家村原上。並會商高連陞分道直追。該逆悉回竄董志原老巢。此次管帶甘軍之閻定邦會同長

武官紳固守城池。擊賊獲勝。所有該軍出力將士及該縣官紳著庫克吉泰等擇尤彙保。毋許冒濫。現在三水邊境。雖臻安謐。而宜川之雲巖鎮。有捻逆餘孽勾結土匪潰勇。勢甚披猖。庫克吉泰。劉典。務當嚴飭劉端冕等。各率所部跟蹤進剿。以期就地殄滅。毋任蔓延。其隴鳳邠廊各屬地方。賊氛尚熾。並著檄令在防將士。嚴加堵扼。不准稍有疏虞。將此由五百里各諭令知之。○以山東濱州等處勦

辦捻匪疊勝。賞總兵官汪炳炎。副將宋冠軍。遊擊吳永紹。任永清。參將周行發。巴圖魯名號。予副將衛汝成。以總兵官簡放。陣亡知縣黃振楚。副將劉斌。遊擊萬得勝。都司龍德福。祭葬世職加等。○以甘肅靈臺勦賊獲勝。殲斃首逆馬豔魁。賞副將謝盛楠。參將劉厚福。巴圖魯名號。參將蘇志賢等。加銜升敘有差。○己酉。諭軍機大臣等。左宗棠奏。官軍勦賊疊勝一摺。捻股竄踞海豐。經劉松山。郭運昌

等軍躡勦獲勝。追至砥橋三寶店等處。生擒賊目多名。賊敗東趨。復由吳橋之東南竄走。各軍進抵陵縣。沿途散賊甚多。現在捻蹤折向東北。劉松山等仍駐甯津。相機追剿。此股賊匪疊為南北官軍所敗。其勢已衰。惟張逆狡猾異常。非乘其黨夥披離。四面兜擊。不能殄此渠魁。左宗棠務趁官軍得手之時。檄令劉松山等各率所部。會合南北各軍乘機勦洗。李鴻章。英翰。丁寶楨。亦當嚴飭各將領前截後追。毋任該逆得以喘息。仍一面固守運防。使無竄越。都興阿計已馳抵減河。何以久無奏報。卽著會同崇厚。迅飭陳國瑞等併力前進。以期南北夾擊。迅掃逆氛。捻眾雖多。其中勢窮被脅。無路逃歸者。諒亦不少。茲據左宗棠奏稱賊無不滅。及賊無盡殺等語。不為無見。嗣後官軍接仗。該逆眾如有投械乞降。非罪在不赦者。著該大臣督撫等分別遣釋。給以免死護照。回籍後如別無違犯。地方官

概不推牽引舊案。故為誅求。並著出示曉諭各該州縣所屬圩團。遇此項人眾遣歸。止准隨時盤詰。毋得藉端擅殺。以示矜全。並一面出示。如有能將該逆自縛獻者。給予重賞。使賊眾自相猜忌。易於一鼓成擒。左宗棠現駐運東。其西岸僅安陵有劉祺三營。十五里口僅有李昌連兩營。連鎮北至減河。僅遵化練軍三營。其餘全係民團。又難勻布。逆蹤屢圖北竄。直隸運河一帶空虛。甚屬可慮。即著左

宗棠就近會商都興阿崇厚妥籌布置。以壯北路聲威。並著官文嚴飭臬司張樹聲於河間等處民團。妥為勸諭。與各官軍聯絡聲勢。實力嚴防。毋令賊蹤擾及。復肆蔓延。將此由六百里各諭令知之。○又諭穆圖善奏甘省兵力不敷。請仍由陝西撥兵會防邊內東路。並涇州危急情形。咨催楊占鰲赴肅州。請以謙禧署副都統各摺片。前諭穆圖善飭金順一軍繞赴東路。以保完善。茲據該署督奏稱

陝回漸已繞越入甘。不惟磴口包頭等處最關緊要。且恐甯靈已撫之回。被其偏脅。金順一軍專防陝西北境。難令分赴東路。請飭陝軍分出數營。駐防東路。所奏尚係實在情形。著庫克吉泰劉典迅即抽調勁旅。就近繞赴東路。並飭令劉厚基高連陞等於延安榆林綏德鄜州等處。兼籌防剿。穆圖善仍當嚴飭金順相機夾擊。轉戰而前。毋得株守一隅。意存諉卸。儻完善之區。稍有損失。恐不能當此

重咎也。金順軍已入陝。所需糧餉軍火。即著庫克吉泰劉典隨時撥濟。毋令缺乏。仍在陝西應解甯夏軍營月餉抵扣。以清款項。回匪呂得彥等疊陷鎮原慶陽甯州等城。大股圍撲涇州。勢甚猖獗。著穆圖善迅即添撥勁兵。會同雷正綰力圖掃蕩。並著庫克吉泰劉典飭令黃鼎併力勦洗。雷正綰總統慶涇諸軍。責無旁貸。著穆圖善傳知該提督。務須振刷精神。早奏廓清之效。毋得縱賊蔓延。致干罪

戾鎮原縣城收復。有無捏飾情弊。慶陽甯州已否收復。各城文武官員下落。均著穆圖善確查分別奏。前據成祿奏楊占鼇已行抵高臺。卽著該署督飛咨楊占鼇。迅將肅州軍務接辦。以便成祿剋日出關。甯夏副都統一缺著准其以謙禧暫署。仍著穆圖善詳細查看能否勝任。據實奏聞。侯善山保一軍接替有人。卽著前往署理。以重職守。將此由六百里各諭令知之。尋奏謙禧久隨軍營才識兼

優勇於任事。且熟悉甯夏情形。現署副都統實堪勝任。報聞。○又諭崇實奏川軍駐防陝境連獲勝仗等語。四川李輝武一軍赴陝助勦。扼守寶鳳一帶。在寶雞等處疊挫賊鋒。乘勝直搗周原。將賊巢平毀。該逆悉數逃竄。崇實復派提督唐友耕等為該軍援應。著卽傳諭李輝武等互相聯絡。以壯聲威。渭北一帶得此一軍扼守。據崇實奏稱回逆不敢竄入南山興漢兩府。皆可無虞。其應否令李輝武

盡率所部會合陝軍跟蹤追勦之處。著崇實劉典相度機宜。會商辦理。不得顧此失彼。另摺奏官軍進勦越嶲夷巢。連獲勝仗。攻破普雄石城。該夷族類甚眾。犬羊之性反覆無常。亟宜乘勝制服。俾能革面洗心。庶不至重煩兵力。仍著崇實督飭將士及地方文武勦撫兼施。恩威並用。以期綏靖巖疆。將此由六百里各諭令知之。○以四川越嶲攻克賊巢。予提督周達武總兵官李有恆獎敘賞總兵官

丁永陞巴圖魯名號。○予直隸鹽山陣亡都司蔡茂修等祭葬世職加等。○庚戌以大學士倭仁充國史館總裁官。○調協辦大學士工部尚書瑞常為刑部尚書。理藩院尚書存誠為工部尚書。以戶部左侍郎崇綸為理藩院尚書。○調工部左侍郎魁齡為戶部左侍郎。管三庫事。轉工部右侍郎恩承為左侍郎。未到任前。仍以刑部右侍郎英元兼署。以正藍旗滿洲副都統明善為工部右侍郎。管錢

法堂事。○調正藍旗漢軍都統華豐為鑲紅旗滿洲都統。以前任鑲黃旗蒙古副都統文煜為正藍旗漢軍都統。理藩院尚書崇綸署鑲紅旗蒙古都統。○命貝勒載治帶領侍衛十員。往奠故刑部尚書綿森茶酒。贈太子少保。予祭葬。謚端懋。賞銀五百兩治喪。子郎中奕沆。以四五品京堂候補。○辛亥。諭內閣。奕榕奏要工將次完竣。請飭選擇合龍吉期。並派員驗收一摺。

福陵碑樓工程。現將修竣。著欽天監於本年六月內。敬謹選擇合龍吉期。速行具奏。並派額勒和布於工程完竣後。敬謹驗收。○諭軍機大臣等。戶部奏籌辦銅斤。請催各督撫認真辦運一摺。京師自滇銅停運。鼓鑄不能如額。曾經戶部奏令四川省派員在瀘州一帶設局採買滇銅。由湖北轉運天津。並議准林鴻年所奏雲南東川所屬各廠。每年額辦京銅三百六十萬斤。運赴川楚變價。迄今日久。並

未據該省督撫覆奏。實屬遲誤。著崇實。吳棠。劉嶽昭。岑毓英。宋廷春。各將該省招商開廠設局收買等事宜。迅於三月內。妥議章程具奏。由部指撥有著之款解往。分起辦運。不得如前因循。以重圖法。瀘州存積滇銅。湖北省應如何分局收買。及施宜等處銅礦。能否開採。著郭柏蔭。何璟。迅飭妥議。奏明辦理。至紅銅條銅。足資鼓鑄。應如何體察華洋商販情形。隨時變通設法採買之處。著曾國藩。英桂。

馬新貽。瑞麟。丁日昌。李瀚章。李福泰。趙燾。籌辦。不准空言塞責。原摺著鈔給閱看。將此由五百里。諭知曾國藩。崇實。英桂。吳棠。馬新貽。瑞麟。劉嶽昭。郭柏蔭。李福泰。丁日昌。李瀚章。岑毓英。並傳諭宋廷春。何璟。知之。○以貝勒奕劻為內大臣。○調鑲藍旗滿洲副都統增慶為鑲黃旗滿洲副都統。正黃旗蒙古副都統英元為鑲藍旗滿洲副都統。以內閣學士廣壽兼正黃旗蒙古副都統。正紅旗滿洲副

都統延煦署正黃旗漢軍副都統。○以鑲黃旗漢軍都統春佑為總管內務府大臣。鑲白旗滿洲副都統榮祿為京營左翼總兵。○壬子。以直隸河南陝西馬步各軍疊次勦賊出力。賞提督王慶福。李春雲。總兵官鍾義山。羅鳳齋。副將楊玉週。正一品封典。副將李承先。從一品封典。提督王慶福。總兵官張映南。張會元。副將蔣東才。李承先。喻瓊林。譚上連。徐上達。王久青。張仲春。曾奉元。方泗。高陳隆。興

李光輝。舒克相。曹才祿。尹松友。曾傑。麟。屈德。復。黃岐。鳴。仇宗佑。康義山。龍國望。鮑葵芳。唐祥益。鄧光發。黃輝山。段柏溪。參將周本。立。湯彥和。高登玉。鍾建高。曾楚勝。賀喜文。冷得貴。劉萬春。顏瓊林。溫其林。黃定山。龍桂林。王福田。朱漢廷。王拔。羣。陳尊榮。楊緒述。劉世福。張啟開。譚拔萃。江發榮。張起和。彭開武。周曙春。蕭榮慶。彭連陞。楊懋霖。彭華堂。歐陽通。楊宗源。王維馨。遊擊張鍾祿。劉紹南。李隆寶。劉立

志賀光南。劉上達。牛得超。張得志。楊得勝。吳得勝。郭熙昌。都司陳宗藩。張兆孟。巴圖魯名號。副將張忠武。知州何誠等。花翎。守備文雲。臨等。藍翎。餘加銜升敘有差。○癸丑。諭軍機大臣等。都興阿奏。酌度兵力。擬親督進紮會。勦。並陳國瑞連日勦賊大勝。及請飭定安移。紮泊頭鎮。崇厚奏。豫籌善後事宜。各摺片。減。河等處防務。誠為緊要。該大臣布置既定。即。當統兵前進。與李鴻章。左宗棠等軍會勦。斷。

不准託詞河防。遷延不進。明慶等所部馬隊。值此炎暑。自不能無疲乏。惟其中有無扣剋。糧草等情。該大臣亦當嚴密查明懲辦。以清。宿弊。據奏陳國瑞獲勝情形。尚屬出力。著即。嚴飭該侍衛會合各軍。乘此得手之時。迅速。進勦。一鼓殲除。副將丁錫金。前經左宗棠。英。翰。奏。奏。降。旨。革職。嚴拏。何以現在陳國瑞營。中帶隊。著都興阿查明辦理。定安所統官兵。與泊頭鎮相近。該處地屬緊要。即著恩承與。

定安妥商移紮泊頭鎮以資防守崇厚所奏豫籌善後各條不為無見該將領兵勇棄家從征轉戰數省情本可憫此次擒逆蕩平朝廷必沛恩施著該將軍督撫等豫行傳知該將領兵勇等俟擒逆殄滅後其將領中已補缺者卽赴本任願休息者准其回籍其兵勇願遣散者卽行賞送歸農內有曉健之勇無家可歸者卽著酌給口糧於各省扼要處所派員管帶駐紮用資鎮撫儻有果敢之士願

奮勉西征者並著該大臣等曉諭令其自行報名精加遴選使之踴躍從軍立功上進以備干城之選將此由六百里各諭令知之○又諭都興阿奏降勇無故潛逃請飭山海關副都統盤查並盛京將軍等飭屬嚴拏等語據稱劉景芳前由奉天所帶投誠馬勇許占一隊下勇目李維忠原名維藩綽號烏痣李李振澄綽號李老疙瘩勇丁徐萬良丁萬幅董勤李恆等共六名自到直省以來尚屬安

分許占一戰歿從此項勇隊所贖無多都興阿前在盛京將軍任內深知李維忠李振澄等不法情事惟業經投誠姑俟其戴罪立功茲覽該大臣所奏該犯等無故潛逃是稔惡性成必至潛回奉省復逞故技擾害地方且數月以來該犯等習見擒逆詭譎情形為患尤非淺鮮若不亟行拏辦勢將餘孽復萌著長善密飭在關人役詳加盤詰毋任乘隙遠颺並著奕榕富明阿額勒和布恩錫通飭所

屬各該文武嚴密躡緝務將該犯等按名弋獲毋令潛匿滋患該將軍副都統等一經拏獲卽將該犯等就地正法以絕根株將此由五百里各諭令知之○以宗人府府丞石贊清為都察院左副都御史○甲寅諭軍機大臣等文麟景廉奏前起二營已抵沁城並酌給營勇糧石一摺魏忠義所帶二營已抵哈密沁城據報營官孔才所部因哈密乏食眾議東行經烏城委員途遇勸阻撥給口糧眾

勇現投回沁城。魏忠義以孔才營勇飢不可待。撥給糧二千餘石。不過暫濟目前。文麟景廉現已派弁前往敦煌守催糧石。著於此項糧石到日。迅速分撥哈密駐防各營。免致飢軍譁潰。一面飭令魏忠義將孔才營勇口糧設法通融勻撥。毋任缺乏。該營雖照舊安紮。仍須有大員親往彈壓撫輯。方免滋生事端。文麟當剋期迅赴本任。以資鎮攝。並將哈密防勒事務妥為經理。不得藉故耽延。景廉著

仍遵前旨。暫駐後路。嚴防安敦玉一帶。並催運軍糧。隨時接濟。其屯田事宜。關繫緊要。仍著文麟等迅速商辦。毋託空言。將此由六百里各諭令知之。○又諭麟興等奏查看布倫托海大概情形。並籌辦烏城難民各摺片。奎昌等奏確探西路情形。兼籌防守等語。布倫托海屯田守備李俊倡率奇古難民搶劫官營財物軍械。並將霍博克賽里土爾扈特等旗牲畜等項刦奪。殺害蒙古人眾甚多。該逆

初起時僅百餘人。現在裹脅漸眾。其勢日熾。若不趕緊撲滅。將來益難收拾。土爾扈特汗布彥烏勒哲依圖現已由京起程。前赴該旗遊牧。計期當已行抵烏城。著麟興榮奎催令布彥烏勒哲依圖兼程馳赴布倫托海。統帶所部遊牧進剿。並著李雲麟。明瑤飭令霍博克賽里土爾扈特三旗備集兵丁二千名。聽候該汗調遣。新城所屬郡王一旗備兵五百名。卽由李雲麟。明瑤飭派科布多貝子旗下兵五百名。卽由奎昌。福濟。車林多爾濟飭派。均由布彥烏勒哲依圖統帶進剿。李雲麟卽應親率滿兵及烏梁海兵前進援應。至三路進兵會剿之議。或恐兵分力單。難於得力。李雲麟當酌度機宜。妥慎籌辦。不可拘滯成見。總以迅殄逆匪。毋任蔓延為要。錫綸現在行抵何處。著卽迅赴布倫托海。會同李雲麟。明瑤等辦。趕緊進剿。烏科兩城地方。並著麟興奎昌等嚴密防守。烏城迤南所居奇古難民。

麟興等擬辦團練立營收聚著卽揀派委員
劉切曉諭辦理毋任為逆匪勾結並著飭令
扎薩克圖汗部落各旗嚴密設法防堵其科
布多所屬蒙古部落亦著奎昌等飭令一體
防堵以備賊匪繞路刼奪逆首李俊究竟因
何起事著福濟錫綸懷遵前旨前往查辦如
果李雲麟有辦理不善激變情事著卽據實
參奏毋稍隱飾麟興等另片奏請將前赴布
倫托海查探委員獎勵等語六品頂帶筆帖

式依徹佈著准其作為防禦先換頂帶以示
鼓勵奎昌等另片奏請令烏梁海貢皮照例
呈進等語烏梁海本年應進貢皮著仍照舊
例交科布多呈進不准違誤將此由六百里
各諭令知之○以廣東潮州府捐輸軍餉永
廣學額二名○予甘肅玉門殉難知縣于銓
祭葬世職加等○乙卯

上詣

奉先殿

壽皇殿行禮○山東巡撫丁寶楨奏連日勦賊
獲勝暨修築馬頰河牆漸可竣工得旨高唐
一帶河牆該撫當嚴飭地方官督率紳團趕
緊興築完固水師礮船現赴臨清著丁寶楨
卽飭帶兵員弁駛赴運河歸李鴻章調遣○
補鑄福建邵武府知府印信從巡撫李福泰
請也○予山東海豐陣亡副將王福田祭葬
世職加等○丙辰以神靈助順加直隸省城
城隍神封號曰孚惠

劉猛將軍封號曰顯應博野縣

城隍神封號曰惠濟○諭軍機大臣等庫克
吉泰劉典奏北路官兵勦賊獲勝移營進逼
城根現督軍力籌勦洗並三水邠州等處勦
賊疊勝情形各摺片白水澄城一帶疊經官
兵搜勦已無賊蹤其盤踞雲巖鎮之賊經知
縣余觀瑞隨同劉厚基等所部分路進攻連
破賊卡木城直逼城根逆首袁大魁率黨拌
拒城難猝下現已添兵圍攻雲巖鎮為該逆

老巢若能乘勢攻拔則宜川一路冀可肅清。著庫克吉泰劉典卽飭劉端冕魏光燾等激勵士卒併力規取以期就地殲除毋稍鬆勁。該處逼近黃河應如何添兵分扼之處並著隨時知照鄭敦謹妥為辦理回匪紛竄三水邠州等處經提督高連陞等暨黃鼎各軍追擊頗有斬擒隴州火燒寨地方復有回逆土匪乘機擄掠總兵羅洪德先後督勇追殺賊眾敗走現在賊股盤踞正甯涇州甯州一帶。

涇州情形尤為喫緊雷正綰雖由長武窯店前進兵力尚單著卽檄飭劉效忠迅率所部先顧涇城會合雷正綰一軍痛加勦洗並著飭令黃鼎相機夾擊迅殄逆氛將此由五百里各諭令知之○追予湖北雲夢等處陣亡殉難監生戴修仁等紳民婦女六百一十七名口分別旌卹如例並予建祠○丁巳署直隸總督官文奏添撥勇隊前赴運西助守以固河防得旨著卽檄飭劉策先帶隊前往運

西會商張樹聲等水陸各將弁妥籌分布實力嚴防毋稍疏懈○山東巡撫丁寶楨奏上年應辦軍政請俟軍務告竣舉行從之○予四川永甯殉難知縣瑛桂祭葬世職眷屬家丁分別旌卹如例○戊午諭軍機大臣等御史郭從矩奏請飭晉省撫藩嚴禁種植罌粟花一摺前據鄭敦謹奏請開種罌粟花禁經部議駁現據郭從矩奏稱該撫與藩司胡大任派員向各州縣徵收罌粟花稅使風俗民生兩受其害等語晉省土瘠民稠多種一畝罌粟卽少生一畝之穀若竟開禁聽民種植殊於民食大有妨礙著鄭敦謹懍遵歷次禁煙諭旨辦理免滋將來流弊該御史籍隸本省見聞較確摺內所陳委員勸辦收稅各節著鄭敦謹查明據實具奏原摺著鈔給閱看將此諭令知之○又諭何璟奏請飭撥銀兩馬匹一摺據稱巴里坤營庫軍械久經殘缺近年疊次出征所有捐造礮械等件因兵勇

失利遺缺尤多。兵丁騎操馬匹。歷年倒傷。未經撥補。請飭戶部指撥銀二萬兩。補製軍器。並由烏里雅蘇台籌撥戰馬五百匹。以資騎用等語。軍械馬匹。均為軍營所必需。現在巴里坤防勦緊要。自應亟籌添補。著戶部卽行指撥銀二萬兩。解至烏里雅蘇台收存。並著麟興榮全撥給戰馬五百匹。一併由何瑄派員領取。俟領到後。卽將軍火器械趕緊製造。覈實動用。並將馬匹認真餵養。臚壯以備征

勦之用。將此由五百里諭知麟興榮全。並傳諭何瑄知之。已未。諭軍機大臣等。英翰奏飭軍兜勦賊匪。並派水師扼紮防運一摺。捻逆因陵縣臨邑一帶。添築長牆。折向東北。英翰現復添派馬隊。令與張得勝程文炳等會合淮東各軍。隨地兜勦。著卽檄飭該將士等盡力追截。並著都興阿親赴前敵。督率各軍實力兜勦。左宗棠李鴻章嚴飭各將領。與英翰丁寶楨所部諸營。聯絡聲勢。合力截擊。以

期就地殲除。賊匪被勦情急。勢必拼死搶撲。運河減河上游一帶。形勢散漫。兵力空虛。民團亦甚稀少。最為可慮。左宗棠李鴻章尤當檄飭諸軍。隨地遮護。毋任竄近河岸。其減河下游近海一帶河防。都興阿崇厚等亦當加意嚴防。毋稍疏懈。賊蹤剽疾異常。趨向靡定。西南馬頰河長牆。並臨清東昌等處運防。仍著李鴻章英翰丁寶楨實力防守。不可因距賊尚遠。稍涉大意。黃運兩河。現值水勢盛漲。

余先元等水師礮船。均已駛抵臨清。英翰現飭令余先元等分駐臨清以北之油坊鎮等處。著卽飭令認真梭巡。並與北路水師互相聯絡。黃翼升姚廣武及直隸西路水軍。均已由臨清北上。著李鴻章妥籌分布。本日復據李鴻章馳奏。官軍疊獲大勝。並張總愚受傷情形各摺片。郭松林等軍。由陵縣等處追賊。商河惠民濱州陽信。疊獲大捷。擒斬甚多。張總愚在商河被官軍槍傷甚重。勦辦甚屬認

真賊匪屢經敗挫。勢頗窮蹙。現在首逆被傷。賊情渙散。官軍正可乘此機會。盡力勦洗。著都興阿等激勵將士。趕緊將此股殄滅淨盡。毋留餘孽。前據都興阿奏稱賊眾多有薙髮希圖裝扮官軍。濶過運河者。現聞逆首張總愚亦有薙髮希圖濶跡渡運之事。雖不可信。為確實。而賊情詭譎。亦屬事所應有。該逆雖被官軍槍子洞穿背腹。生死尚未可定。現在下落如何。並著李鴻章確實查明具奏。仍著

都興阿、左宗棠、李鴻章、崇厚等督飭沿河兵團。嚴加盤察。毋令該逆改裝濶跡。潛渡運西。致令漏網。英翰、丁寶楨亦當督飭官軍。並各處鄉團一律嚴加盤察。毋稍大意。黃翼升等水師已抵東光。即著李鴻章飭令該提督酌帶師船。駛赴南皮、東光以下。梭織巡防。俾河防益臻周密。將此由六百里各諭令知之。○又諭豐紳三壽奏甯夏滿營生計維艱。請飭撥糧餉。暨請保出力人員各摺片。甯夏滿營

糧餉匱乏。軍士待哺。暫罄。晉省應解之餉。批解寥寥。豐紳等屢次派員守催。而該省撫藩等拒不見面。尤屬不成事體。著鄭敦謹嚴飭藩司。無論何款。先行酌提銀三四萬兩。迅交赴晉催餉之員。管解到營。以蘇兵困。至官兵應支月糧。亦係刻不容緩。著穆圖善轉飭藩司。檄令甯夏府知府按滿營現存兵數。估撥月糧。每月仍由夏朔兩縣支領。抑或由靈州中衛平羅等處就近協撥。務期趕緊籌畫。毋

誤兵食。甯夏官弁兵勇緝匪出力。著豐紳等查明擇尤請獎。毋許冒濫。將此由六百里諭知穆圖善、鄭敦謹、豐紳。並傳諭三壽知之。○以山東商河等處勦賊獲勝。予提督胡良作等獎敘有差。○予山東萊州等處殉難在籍主事馬廷元等紳民婦女三十七員名口分別旌卹如例。○庚申諭軍機大臣等御史舒明奏請飭查無糧黑地一摺。據稱天津縣東北塔河甸一帶。有河閃地約四五百頃之多。

被匪徒溫姓隱匿私種。鄉民畏其威。莫敢舉發。請飭查辦等語。該御史所奏如果屬實。亟應嚴行懲辦。著官文密派妥員。前赴該縣。將匪徒溫姓嚴拏究辦。至此項地畝。應如何勘丈報部升科之處。並著官文妥籌辦理。原摺著鈔給閱看。將此諭令知之。○又諭。前據曾國藩等奏。署泰州知州長康被控。門丁指官詐贓。延不交案。當經降旨。將長康革職。勒令將門丁高順交出審辦。茲據御史張沄奏。

稱該署知州復有授意詐贓。以致民人曹毓芝自刎。及非刑責打李日廣。令出錢了事。並有革書李鳳岐等疊經控告各等語。長康平日居官。如果尚知自愛。何至屢被叅劾。著曾國藩。丁日昌。按照該御史摺內所參各情。嚴行審訊。以肅吏治。而挽頽風。原摺著鈔給閱看。將此各諭令知之。○辛酉。

上奉

慈安皇太后

慈禧皇太后幸漱芳齋侍午膳。諭軍機大臣等。工部奏請飭催各省欠解硝斤一摺。直隸等省欠解硝斤。為數甚鉅。經工部屢次催解。該督撫置若罔聞。殊屬延玩。所有直隸河南山東承辦硝斤各員。著吏部查取職名。先行交部議處。現在軍務未平。硝斤需用甚多。而工部火藥局不敷支放。所有直隸欠解淨硝五十七萬九千五百餘斤。河南欠解淨硝五十六萬九千九百餘斤。山東欠解淨硝五十

六萬斤。著官文李鶴年。丁寶楨。迅即埽數起解。毋得再有遲誤。儻如前玩忽。延不報解。必將該督撫等從重懲處。將此各諭令知之。○又諭。奕榕奏官兵緝獲匪犯。並遵飭各屬稽查難民一摺。奉天法庫邊門等處。向為匪徒出沒之區。此次經該署將軍豫飭各處實力查拏。並派兵馳赴各處。擇要駐守。旋據協領叢登甲等緝獲匪犯多名。均已訊明正法。近日各處匪徒。稍知斂跡。辦理尚屬認真。著奕

榕仍嚴飭該將弁於各要隘明查密訪務期有犯必獲盡絕根株不可稍形疏懈並懍遵前諭通飭各屬並沿海一帶旗民地方官於所到難民一體實力稽查分別辦理俟邊界肅清卽與邊內一律編查保甲俾該匪等無從託足以靖地方另片奏請飭吉林將軍將從征員弁照黑龍江奏定章程補用等語吉林官兵從征甘肅等省及調赴奉省防勦著有勞績有十餘年未得補授實缺者自應持

平辦理著富明阿查照黑龍江將軍奏准之例嗣後各旗翼缺出遵部定章程以一缺揀用存營人員以一缺咨送軍營揀補用昭平允將此由五百里各諭令知之○又諭蘇鳳文奏官軍勦賊疊勝收復歸順州城並派員赴楚採辦軍火蘇鳳文馮子材奏太郡官軍追勦叛匪獲勝各摺片歸順一州地處粵西極邊逆匪吳亞終逃逸後其黨黃崇漢等負險抗拒經道員覃遠璉調派張友田馬正龍

各軍連番勦擊逆黨就殲馬正龍等分攻州城蹋平城外各賊營壘當將州城收復逃匪悉為官軍所殺惟新墟一帶餘匪俱向三台山舊巢竄去仍著蘇鳳文檄飭覃遠璉督率將士乘此聲威迅圖掃蕩以清邊圉軍火為攻勦要需該省既乏硝磺自不得不向鄰省商辦蘇鳳文現派員前赴衡州永州寶慶三府屬採買軍火卽著劉崐迅飭各該地方官幫同粵省委員妥為照料湖南為產硝之區

雖各省採辦過多究非若粵西之缺乏劉崐務當設法通融毋得稍存畛域蘇鳳文亦當剴知派往各員遵照所給印票採辦不准私運數浮致滋弊混逆匪吳亞終勾結越南弄匡匪徒同攻洛陽九葑等處經副將謝繼貴等督帶兵練會同夷兵分路夾擊斬獲甚多立解九葑洛陽之圍勦辦尚為迅速並據獲賊供吳亞終欲分襲龍州下凍逐卜等處牽掣官兵卽著蘇鳳文馮子材嚴飭羅文福實

力防堵。並令太平府各屬文武將逐卜一路
隘口嚴加扼守。以遏賊蹤。一面劄飭太平府
知會越南國夷官。及各路文武員弁。會合勦
擊。殲厥渠魁。毋任日久蔓延。頻煩兵力。昨據
御史部從矩奏請飭臬司赴任等語。新任山
西按察使將益濃續假計又期滿。該省防勦
需人。著劉崐傳知該臬司趕緊起程赴任。毋
再遷延。將此由五百里各諭令知之。

大清穆宗繼天開運受中居正保大定功聖智
誠孝信敏恭寬毅皇帝實錄卷之二百三十五

大清穆宗繼天開運受中居正保大定功聖智
誠孝信敏恭寬毅皇帝實錄卷之二百三十六

教修
同治七年戊辰六月壬戌諭軍機大臣等劉
嶽昭岑毓英奏省外官軍歷次勦匪獲勝各
情形一摺。岑毓英由曲靖赴援省城。於宜良
七甸一帶進攻。連破大小石壩等賊營二十
餘處。並攻克小板營賊壘三座。收復官渡水
寺等民堡。其分攻呈貢晉甯等州縣之軍。亦
將賊兵擊敗。攻拔金馬寺等處賊營十餘座。
進紮大樹營。疏通省城糧路。逆黨復由邵甸
糾合嵩尋之匪圍攻楊林。官軍乘風縱火。焚
其木壘。連破賊營碉樓。並將官渡來撲之賊

擊敗甸尾古城廠口等處賊壘。亦經官軍分路攻克。追敗焚掠九甲河賊眾。拔海梗賊營三座。其石虎岡等處踞壘。並經官軍先後攻拔。生擒偽大將軍李洪勳等正法。呈貢城外賊營。亦經官軍攻破。現經合圍縣城。滇省各路官兵。自二月至閏四月。疊獲勝仗。勦辦甚屬得手。現在賊勢漸感。著劉嶽昭岑毓英。激勵將士。將屯踞省外賊匪。速行勦洗。以固省垣重地。一面督飭各路官兵。將尋甸等處股

匪次第殲除。所有歷次出力之文武兵勇。均著劉嶽昭等於省城解圍後。彙案請獎。劉嶽昭另摺奏。滬陳滇黔軍情吏治營務廢弛。並團練流弊一摺。滇西逆黨眾多。分路攻撲省垣。擾及各府州縣。紛至沓來。勢甚蔓延。該督撫等當督率諸軍。先清附省賊匪。將新陷各城。以次收復。為進規迤西之計。並將迤東完善各地方銅鹽稅課。妥為籌辦。以裕餉源。簡委賢能。牧令。埽除積習。以敦吏治。並將僭冒

文武各委員一體裁撤。以清積弊。其跋扈不馴之滇黔各團首。均著劉嶽昭岑毓英曾璧光次第懲辦。檄令各歸地方官督理。嚴懲大團首私行仇殺干預公事舊弊。以杜亂源。黔省各路援勦之川湘各軍。著崇實劉崐。卽檄令統帶各員。歸曾璧光節制。以一事權。各該營餉需。仍著崇實劉崐源源接濟。不得視同膜外。滇黔需餉孔亟。所有歷經部撥各省並各關協濟餉銀。著戶部行文各該省督撫並

各該關監督。嚴行催解。毋任視為具文。另片奏岑毓英進攻楊林受傷情形等語。岑毓英臨陣打仗。身受槍傷。奮勇可嘉。現在調理當已痊愈。著劉嶽昭隨時馳奏。以慰廕繫。將此由六百里各諭令知之。○雲南昭通鎮總兵官沈宏富開缺。另簡以記名提督李家福為雲南昭通鎮總兵官。○予雲南宜良等處陣亡遊擊楊文炘等十三員祭葬世職加等。○癸亥諭軍機大臣等。當明阿等奏截勦竄匪

獲勝並與俄國會議情形一摺。俄界挖金匪人滋事。竄入甯古塔界。經富明阿派兵迎剿。將匪黨殲戮殆盡。並生擒匪首石才等三名。在逃餘匪。雖僅止三四名。匿入深林。難保不餘燼復燃。著富明阿等即飭令派出官兵實力挖捕。不准一名漏網。以清邊境。烏勒興阿現赴庫倫地方。與俄官辯論邊境交涉事務。並會議現辦事宜五條。尚屬妥協。著俟俄人聲覆後。奏明辦理。所有此次剿匪出力之

官弁兵丁。准其俟邊界會議事竣。餘匪剿辦肅清後。彙案保獎。所陳分界圖說一件。留中備覽。將此由五百里諭令知之。○賞駐藏幫辦大臣恩麟副都統銜。為駐藏辦事大臣。以副都統銜正紅旗漢軍參領德泰為駐藏幫辦大臣。○予故湖南布政使升任雲貴總督潘鐸入祀名宦祠。從巡撫劉崑請也。○甲子以佛力顯佑。頒山東濟甯州。釋迦如來佛。禪院扁額。曰龍象神通。○諭軍

機大臣等李鴻章奏賊勢日熾。劉銘傳回營飭赴前敵一摺。捻逆經官軍擊敗後。遁入濟陽。潘鼎新等會軍進剿。劉銘傳現已回營。經該大臣飭赴前敵。即著李鴻章嚴飭劉銘傳會合諸軍。乘此賊勢窮蹙之時。加勁追剿。悉數殲除。毋留餘孽。並著左宗棠英翰丁寶楨嚴防運河。毋任該逆得以偷渡。儻有賊匪竄近。即行派兵截擊。鹽山慶雲現在有無捻蹤。該捻現分幾股。並著都興阿左宗棠李鴻章

崇厚確切查明。如鹽山等處尚有分股。即著都興阿就近痛剿。毋任漏網。將此由六百里各諭令知之。○又諭庫克吉泰劉典奏官軍攻克雲巖鎮賊巢。生擒賊目。餘黨殲除淨盡。一摺。逆匪袁大魁等竄踞宜川之雲巖鎮。一城兩堡。均極堅固。知縣余觀瑞疊次環攻。該逆恃險抗拒。復經道員魏光燾會同劉端冕等分投進擊。拔椿填濠。將雲巖鎮城克復。其踞寨之匪亦即開門乞降。逆目張大有等均

經訊明正法。惟據奏賊目袁大魁投井溺斃。又稱乘人眾擁擠時。獨自潛逃。該逆屍身既未撈獲。難保非乘隙遠颺。冀逃顯戮。仍著庫克吉泰、劉典責令附近各地方文武。明查暗訪。總期得有實據。毋任餘孽復萌。該處新經克復。百姓困苦異常。並著飭令余觀瑞加意拊循。將飢民等妥為安插。以蘇民氣。涇州長武等處賊勢鴟張。庫克吉泰、劉典務當乘此得手之時。分撥勁軍。會同該處在事將士。迅

圖掃蕩。用竟全功。將此由五百里各諭令知之。○以陝西攻克雲巖鎮賊巢。賞提督劉端冕白玉翎管一支。大火鏢一件。大荷包一對。小荷包二箇。副將楊德明參將祝鑑嵩已圖魯名號。守備劉德明等花翎。餘加銜升敘。開復有差。予陣亡都司謝榮貴主得華祭葬。世職加等。○丙寅。諭軍機大臣等。富明阿等奏防兵需餉孔亟。請開墾圍荒。繪圖呈覽一摺。吉林防兵常川操演。餉項支絀。所稱墾荒各

節業據派員確切查勘。繪圖貼說。尚屬詳明。約計可墾之地。共得二萬晌。有奇。既係光山無樹藏牲。且可於荒溝河南原有圍場附近處所。另覓圍場。不礙虞獵。自無妨通融辦理。著富明阿等詳慎妥商。毋滋流弊。並不准再行開闢。以示限制。至直隸山東等省。逃往吉林難民。尤須隨時稽查。妥籌安插。免貽後患。圖一件留覽。將此諭令知之。○又諭英翰奏賊竄濟陽。抽撥防兵會剿。丁寶楨奏東軍連獲大勝。並圖勇擊退竄賊情形。各一摺。昨據李鴻章奏。稱賊由商河遁入濟陽之鄆家渡。龍王廟一帶。連日大雨。平地水深二三尺。徒駭河與黃河水勢增漲。賊營以外一片水窪。官軍分路進剿。已獲大勝。現在賊勢甚蹙。正可乘此機會。為迅圖殄滅之計。英翰現復添派總兵奎光帶領所部馬隊。並於運河防軍內抽撥三千人。令奎光帶赴濟陽一帶。著卽飭令會合張得勝等軍。實力進剿。並著丁寶

楨檄飭東軍。併力合擊。一面鼓勵團勇。並黃河礮船嚴密防守。李鴻章督飭前敵各營。會合東皖豫各軍。四面兜剿。務期就地殲除。都興阿遵奉前旨。如鹽山等處。探有分股。卽著就近痛剿。左宗棠崇厚。仍須嚴扼運河及減河一帶。以防竄撲。毋稍疏虞。英翰所奏。本月初二三日。後陳國瑞隊伍潰逃。該侍衛不知下落。同日據丁寶楨奏。初四至初七等日。戰事。陳國瑞軍在武定商河等處。勦賊疊有斬

擒。是潰勇等所供。未可憑信。著都興阿、李鴻章、英翰、檄飭該侍衛於所部勇丁。妥為駕馭。會合各軍。迅速滅賊。英翰另片奏請將程文炳開副將底缺。並將副將黃鳴鐸以原品休致等語。均著照所請。行。程文炳仍著記名。以提督遇缺儘先提奏。本日復據李鴻章奏。連日獲勝。並擊退搶渡運河逆匪。都興阿奏。察看河防。並擬挑兵渡河。會剿各一摺。官軍在濟陽東北會合攻剿。破毀玉林鎮鴻福寺等

處賊巢。追至黃河沿老海窪一帶。循河勦殺。疊獲大勝。賊復由德平甯津。越過吳橋。於德州桑園高家店等處。搶渡。先後經礮船團勇及李鴻章由德州派往之隊。會合截剿。將賊股擊退。疊次擒斬及收降賊匪甚多。並殲斃著名逆目多名。該逆敗殘已極。著李鴻章等激勵將士。乘勢痛剿。或另圖內間。將此股殄滅淨盡。毋留餘孽。西北一帶運河防堵最關緊要。左宗棠現駐吳橋。兵力較單。務當振刷

精神力。籌堵禦。李鴻章尤當於德州一帶加意防河。毋任一騎竄渡。致成不了之局。並著都興阿將所部各營。迅速挑選。抽撥得力之軍。渡河會剿。不可仍前延玩。自干咎戾。減河防務。仍著會商崇厚。妥籌兼顧。楊鼎勳在營病故。殊堪憫惜。著李鴻章奏請優卹。都興阿現派王萬釗暫統所部防河。能否勝任。仍著李鴻章查奏。春壽呈報勝仗情形。與春山等所稟各異。而所部將士傷亡頗多。有無捏飾。

仍著都興阿確查參奏。將此由六百里各諭令知之。○欽差大臣都興阿奏請將因病請假輒卽回籍之提督陳天佑革職留營戴罪效力。允之。○以山東濟陽等處勦賊大勝。予總兵官程之偉以提督簡放。賞副將蔣東才。李承先。遊擊姜柱題。已圖魯名號。都司鄧林椿等花翎。把總劉知檢藍翎。餘加銜升敘有差。釋已革遊擊桂錫楨家屬監禁。予陣亡遊擊王林。把總劉青。和祭葬。世職加等。○撫恤

朝鮮國遭風難夷如例。○戊辰諭軍機大臣等。左宗棠奏官軍勦賊大勝。並英翰奏皖軍戰勝收降。現在追勦情形各一摺。捻逆由商河北竄。經劉松山等截擊。大獲勝仗。逆目張大幅等先後乞降。現在酌量辦理。該逆等窮蹙來歸。自應分別遣留。妥為安置。以孤賊勢。英翰此次收降逆首楊榮桂等。並著妥為鈐束。挑選精壯。用作前鋒。使之效力行間。不至再生反側。惟左宗棠摺內前稱賊目洪順林。

後又稱洪沅林。是否卽係一人。著查明覆奏。逆賊周六。焦仲。有眾三千。赴郭運昌營乞撫。十六日夜。又有賊目率眾二千。赴劉松山營乞撫之事。郭運昌等現在已否收降。作何安插。著左宗棠查明。一併覆奏。並著該大臣督撫等嚴飭各將領。遇有乞撫之眾。務須悉心稽察。妥為鈐制。賊黨業已離散。必不能久。張總愚雖未得確耗。而其勢已孤。著該大臣督撫等遵照前旨。出示懸賞。使之互相疑貳。張

總愚係著名逆首。荼毒生靈。重煩兵力。諒該大臣督撫等同深憤怒。斷不任其漏網。卽著嚴飭各軍加緊追勦。俾得剋日殲除。以慰廬繫。將此由六百里各諭令知之。○予山東商河等處陣亡副將雷致祥。遊擊江春生。祭葬。世職加等。○予江蘇各屬陣亡殉難州判陳曾輝等紳民婦女一萬五千二十六員名口。分別旌卹如例。○予廣東豐順陣亡文生丁為龍等賞卹如例。並入祀昭忠祠。○己巳遣

官祭火神廟。○諭內閣。前據巡視南城給事中景雲等奏。遵保拏獲盜犯之團防紳董。並獲盜出力司坊等官。當交吏部議奏。茲據該部奏稱。拏獲盜犯樊二。卽范舉兒等九名一案。曾據步軍統領衙門及東城中城各御史。遵保各該司員等官。均經覈准。若將南城所保施濤等三員。仍照案議獎。是獲盜僅止一案。而各衙門紛紛奏保。似亦漫無限制。並請明定章程等語。此案南城保列各員。既覈與

定章不符。所有正指揮施濤等。升用加銜之處。著毋庸議。嗣後各城御史等。遇有此項請獎人員。卽著按照該部此次所奏章程辦理。並於保奏摺內。將是否會銜之處。聲敘明晰。以昭覈實。而杜紛歧。○旌表守正捐軀直隸甯津縣民婦劉李氏。○庚午。諭內閣。羅大春奏。續行查閱福甯鎮標。暨提轄各協營伍一摺。閩省為濱海巖疆。武備最關緊要。仍著羅大春會同該督撫等。實力稽查。加意操防。務

期營務日有起色。其各直省營伍。雖經該提鎮等按時校閱。誠恐狃於積習。相率因循。以致有名無實。著各該省督撫。提鎮大員。一體認真整飭。嚴勸懲。明賞罰。俾得悉成勁旅。用備緩急。僅各營將備以下等官。有稍涉玩誤者。卽著隨時糾參。不准姑容。用副整頓戎行至意。將此通諭知之。○又諭鄭敦謹奏。丁憂人員。求差不遂。挾嫌妄稟一摺。據稱丁憂山西候補州吏目張茂春。因求餉差不遂。赴署

布政使胡大任署內。投遞稟詞。縷陳派解餉差。不符政體。並牽涉候補縣丞羅廣煦。係署巡撫鄭敦謹外甥。並不遵例迴避。含混當差等語。各省派解餉差。向有定章。茲據鄭敦謹奏稱。該署布政使胡大任。所派張振鐸等。管解京餉。俱係遵照定章辦理。並無偏私。羅廣煦因進京引見之便。飭委管解京餉十萬兩。亦與向章相符。其應行迴避一節。先已由該署撫咨部覈辦。是鄭敦謹暨胡大任先後辦

理各節均無不合。張茂森以丁憂人員。干求差委。已屬不安本分。乃因求差不遂。妄行具稟。意圖挾制。尤屬膽大妄為。張茂森著卽行革職。驅逐回籍。以戢刁風。鄭敦謹所請派員審辦之處。著毋庸議。○諭軍機大臣等。李鶴年奏。豫軍勦賊。疊獲大勝。懇將出力員弁。獎勵一摺。據稱本月初七至十二等日。豫軍追賊至郭橋柳橋。並崔寨老海窪一帶。接仗疊勝。及玉林鎮鴻福寺大捷情形。與李鴻章前

奏大略相同。宋慶張曜前由豫省督軍赴直。勦賊頗為出力。此次追賊直東。疊獲勝仗。並於玉林鎮鴻福寺痛勦賊匪。尤屬奮勇可嘉。所有出力各員。前據李鴻章擇尤保奏。已明降諭。旨照請獎敘。此次李鶴年所保各員。有李鴻章前摺未經保獎者。卽著該撫咨明李鴻章彙案保獎。以歸畫一。前據李鴻章奏稱。逆首張總愚竄至吳橋德州。首先搶渡運河。為礮船及對岸民團擊退。復被官軍追擊。折

向德平竄逸。是張總愚在玉林鎮投入黃河之說。尚未的確。該撫仍當檄飭豫軍。將張總愚擒斬。不得稍涉大意。另片奏豫省水師礮船。駛赴東昌等語。著李鶴年卽飭管帶礮船統領。與馬德昭防軍。水陸援應。互相聯絡。以固河防。將此由六百里諭令知之。○又諭。本日據蘇廷魁馳奏。黃河伏漲異常。請飭豫撫撥款防秋。並中河廳搶辦險工情形各摺片。豫省黃河兩岸工程。因歷年經費未充。辦理

久經竭蹶。本年伏汎盛漲異常。七廳兩岸險工。到處疊出。中河祥河兩廳尤甚。所稱稽料之艱。餉需之絀。自係實在情形。現在伏汎未完。秋期正遠。若不亟籌餉需。趕備稽料。堵禦勢將不可收拾。捻逆竄擾直東一帶。尤賴黃運兩河。限制賊騎。設豫省黃隄潰決。不獨附近民舍田廬。悉被淹沒。卽直東河防。亦將無從措手。於軍務關繫尤重。著李鶴年於豫省庫存項內。無論何款。立即籌撥。開歸道銀五

萬兩。河北道銀四萬兩。尅期交付。俾資修守。該撫務當顧全大局。不可視為泛常。稍涉游移。推諉。貽誤干咎。除分撥九萬兩外。屆時儻遇險工。再有不敷。仍著該撫設法另籌。隨時撥解。並著蘇廷魁督飭開歸河北兩道。率同各廳員認真趕辦各料。用資秋汛修防。並將中河廳屬中牟下汛三堡隄身。趕緊設法搶護。俾臻穩固為要。將此由六百里各諭令知之。○以年力就衰。福建守備劉得勝勒令休

致。○辛未。以河南南陽鎮總兵官宋慶為湖南提督。記名提督王萬釗為河南南陽鎮總兵官。○以山東運河防守出力。賞副將陳南金黃本立。王青山。張得明。吉正祥。蕭振位。參將張潤桂。周大馥。楊維幹。范立川。遊擊陽名山。譚祖綸。劉炳忠。都司周添順。屈忠星。守備龔長贊。已圖。魯名號。道員李明墀等花翎。都司蔣載坤等藍翎。餘加銜升敘有差。○予直隸軍營病故湖南提督楊鼎勳祭葬卹廕加

等。諡忠勤。交國史館立傳。並於江蘇福建山東等省立功地方建立專祠。○壬申。諭內閣。給事中夏獻馨奏。請申明稽查詞訟舊例。一摺。各省州縣自理詞訟。限以二十日完結。仍將已結未結各案開立號簿。由該管府州按月查覈。立法本極周詳。近來州縣官奉行故事者多。積案累累。各該管上司亦未能認真稽覈。遂至百弊叢集。獄訟滋豐。覽該給事中

所奏。均係實在情形。著各直省督撫。府尹嚴飭所屬該地方各官。將例定章程實力奉行。並責成各該道府就近稽查。如有州縣自理詞訟遲延不結。及開報蒙混遺漏者。即從嚴叅處。儻該管道府從中徇隱。不行查揭。並著該督撫等一併查明奏請議處。經此次申諭後。各該督撫。府尹務當破除情面。隨時糾察。以清訟源。而臻上理。將此通諭知之。○諭軍機大臣等。官文奏。運西勇團師船擊退逆酋。現飭加意嚴防一摺。捻逆被運東各軍疊次

勦敗。亟思竄渡。運西經集司張樹聲等督率勇團。會同師船。奮力擊退。不令該逆得以西竄。辦理尚屬奮勉。但恐該逆被勦窮蹙。仍圖竄逸。著官文督飭張樹聲等。激勵勇團。加意防守。毋任偷渡。致滋蔓延。本日據給事中夏獻馨奏。京東灤州等處。有賭匪倡立花會。愚民被其引誘。每於夜間聚會。附近十餘里村莊。男婦相率猜賭。請飭查禁等語。匪徒聚賭。最為閭閻之害。花會名目。尤干例禁。當此捻

逆未平。京東一帶。盜風尚熾。亟應嚴行查禁。著官文飭令該管地方官。嚴行查辦。不准虛應故事。務使賭風斂跡。不至別生事端。是為至要。原片著鈔給閱看。將此諭令知之。○署安徽巡撫吳坤修奏。散勇全數出境。現飭文武巡查游匪。得旨。著嚴飭地方文武員弁。於楚皖交界處所。實力梭巡。如有散勇勾結匪徒滋事。立即從嚴懲辦。○癸酉。諭軍機大臣等。岑毓英奏。旋抵省營。分布防勦情形。並請

催四川等省迅撥協餉。各摺片。岑毓英以回匪分竄邵甸。欲糾各逆阻截。省東糧運。因於五月十四日。馳回省營。相機辦理。並派同知岑毓英等分路進勦。現在新興州之後裕鄉。已經收復。又攻克呈貢縣之小古城等處。賊壘直薄城下。一俟呈貢晉甯得手。即分軍進徇昆陽。以解省城之圍。籌辦尚合機宜。著劉嶽昭。岑毓英。激勵將士。分道進勦。速將屯踞省外賊匪。全行勦洗。以固省垣重地。其省內

防守事宜。並檄飭在城司道等。盡心守禦。以維大局。該省餉需久絀。亟須各省接濟。著崇實。瑞麟。李瀚章。劉坤一。各查照張凱嵩及劉嶽昭在巡撫任內先後奏准。部撥協濟滇餉。迅速如數籌畫。兌交滇省。提餉委員。星馳解往。以資接濟。將此由五百里各諭令知之。○上以孟秋時享。

太廟。自是日始。齋戒三日。○甲戌。江西巡撫劉坤一奏。接據總理各國事務衙門咨調九江

關呢吩輪船赴天津巡防。現飭駕赴上海修
艙堅固。即行放洋北上。下所司知之。○乙亥
上以孟秋時享

太廟前期親詣行禮。○諭軍機大臣等。左宗棠
奏截勦竄賊。續獲勝仗。並安置降眾情形。一
摺。劉松山等軍。由甯津吳橋等處追賊直至
鹽山。沿途獲勝。並於鹽山之保和寨夜襲賊
隊。斬戮甚多。生擒賊目多名。疊次收降難民
賊眾。分別遣留。該逆敗殘之餘。僅止二三千

人。能戰者不滿千人。兼多軍械不全。其窘蹙
情形。已可概見。正宜乘此機會。力圖殲滅。著
左宗棠李鴻章英翰于寶楨會督諸軍。合力
兜勦。務期及早殄滅。以奏膚公。賊匪被勦情
急。勢必乘隙圖竄。運西左宗棠李鴻章當力
籌扼截。毋稍疏虞。並著都興阿一面嚴顧運
防。一面督軍會勦。崇厚亦當力籌軍火糧餉。
接濟都興阿軍營。以應急需。至各路軍營所
收降眾。惟有令在前敵殺賊。如不肯盡力。或

與賊暗通消息。著左宗棠等飭令前敵統將
即行正法。沿河一帶防務。現值喫緊之時。不
可將降眾錯置其間。致貽後患。該大臣等務
須慎之又慎。不得稍涉大意。其給發照票散
遣老弱降眾難民一節。亦宜詳慎辦理。不可
掉以輕心。致令奸匪涸跡渡河。又形滋蔓。將
此由六百里各諭令知之。○又諭前因林壽
圖奏請裁撤西安糧臺。當令左宗棠酌度具
奏。茲據左宗棠奏稱。西安所設甘肅後路糧

臺原為支應慶涇諸軍而設。西安糧臺一撤。
秦隴餉道中斷。平慶涇固一帶實兩省孔道。
糧臺專設秦安。遠道轉輸。亦有鞭長莫及之
虞。西安所設甘肅後路糧臺。斷不可撤等語。
左宗棠身任兼圻。自應總權兩省。通盤籌畫。
既據酌度定議。即著林壽圖仍遵前旨。將西
安糧臺各事宜。照舊妥為經理。毋許推諉。並
著左宗棠隨時提撥協甘各餉。通融接濟。俾
得餉項有著。克贍飢軍。甘省荒瘠情形。既為

該大臣所深悉。且現存兵數。尚有百四十餘營之多。軍士待哺。豈能枵腹荷戈。雖先秦後隴。勢有固然。而脅齒相依。實為安危所繫。該大臣務當妥籌兼顧。以濟急需。不可稍存歧視。致虞譁潰。山西原協。涇慶之餉。著鄭敦謹照舊撥解。西安糧臺。以歸簡易。穆圖善卽行轉飭林壽圖。於協餉到時。隨時提撥。以資接濟。將此由六百里諭知左宗棠。穆圖善鄭敦謹。並傳諭林壽圖知之。○又諭麟興。榮

全奏請飭撥兵催餉。籌辦烏科防務。福濟錫綸奏。布倫托海叛賊東擾。情形各一摺。布倫托海啟釁之由。旣因李雲麟辦理不善所致。又不能設法彈壓。棄營遠走。以致叛賊尋蹤東擾。貽誤事機。厥咎甚重。本日已明降諭旨。將李雲麟先行革職。交福濟錫綸確查。據實叅辦。並將明瑤補授布倫托海辦事大臣矣。明瑤惟當振刷精神。會同錫綸。將布倫托海應行事宜。妥籌辦理。不可畏難苟安。致有貽

誤。棍噶扎勒參現已帶兵進搗賊巢。奮勇可嘉。並著明瑤錫綸商同該呼圖克圖。迅速相機勦辦。毋任蔓延。其有被脅之人。亦當分別解散。以孤賊勢。該匪既有東竄之信。科城防務。實關緊要。奎昌福濟務當先事圖維。督率兵民。嚴密固守。並酌調蒙古官兵。協同防勦。不可漫無布置。麟興等請調直隸等處兵丁出關助勦。此時內地沿邊一帶。防勦正資。兵力勢難抽調出關。且亦緩不濟急。其請飭催各省協餉三十萬兩。著戶部查明應解新疆餉銀省分。行知該督撫。催令將欠解之款迅速籌解。不得仍前延緩。致誤大局。烏城防守事宜。著麟興榮全錦丕勒多爾濟就現有兵力。認真籌辦。毋稍大意。奎昌等另摺奏軍林多爾濟因病懇請開缺等語。本日已明降諭旨。准其開缺回旗調理。該城一切事宜。是否必應添設蒙古人員相助為理。著麟興奎昌福濟等詳細酌覈。如必應添設。卽著該將軍

等酌保一二員。候旨簡放。將此由六百里各諭令知之。○布倫托海辦事大臣李雲麟革職查辦。以幫辦大臣明瑤為辦事大臣。仍兼管塔爾巴哈台事。○以浙江辦理海甯石塘工竣。予道員唐樹森等升敘。開復有差。○追予故漕運總督邵燦諡文靖。入祀江南名宦祠。○予直隸甯津陣亡守備張得升。抱總胡松林祭葬。世職加等。○予江南臺莊因公淹歿守備李洪發祭葬卹廕加等。○追予浙江永康合門殉難在籍參將胡鳳鳴等男婦八員名口立祠建坊。○追予浙江杭州殉難廣東布政司照磨張福海妻姚氏暨兄福澄等男婦九員名口分別旌卹如例。

大清穆宗繼天開運受中居正保大定功聖智誠孝信敏恭寬毅皇帝實錄卷之二百三十六

大清穆宗繼天開運受中居正保大定功聖智誠孝信敬恭寬毅皇帝實錄卷之二百三十七

光緒二十九年五月十五日奉太后上諭

光緒二十九年五月十五日奉太后上諭

光緒二十九年五月十五日奉太后上諭

光緒二十九年五月十五日奉太后上諭

光緒二十九年五月十五日奉太后上諭

敬修

同治七年戊辰秋七月丙子朔享

太廟遣睿親王德長恭代行禮○

上詣綏履殿問

慈安皇太后安平安室問

慈禧皇太后安至甲辰皆如之○奉

慈安皇太后

慈禧皇太后幸漱芳齋侍午膳○諭軍機大臣

等戶部奏遵議指撥巴里坤補製軍器銀兩

並請催山西等省撥解新疆月餉等語昨據

麟興等請催各省協餉三十萬兩已諭戶部

查明應解新疆餉銀省分行知各該督撫迅速籌解茲據該部奏稱自五年九月奉撥之日起截至本年五月止山西等省欠解甚鉅該部前於議覆麟興請催軍餉摺內曾經聲明除直隸暫緩起解外擬令山西先提銀八萬兩山東先提銀十二萬兩河南先提銀十萬兩迄今兩月有餘仍未報解分毫等語新疆需餉孔亟著鄭敦謹丁寶楨李鶴年嚴飭各該藩司遵照戶部前次奏案迅將先行提

撥餉銀趕緊如數措齊限一月內解交綏遠城轉解烏里雅蘇台收存以備新疆各路提用此係提撥業經逾限之款各該撫不得仍前玩延致滋貽誤其各該省欠解餉銀為數不少仍當陸續照章籌解不得僅以提撥有款任意遲逾致形諉卸何瑄所請撥補製軍器銀兩該部議於山西等省應解前項新疆月餉七萬兩內由綏遠城將軍酌提銀二萬兩以資接濟著德勒克多爾濟俟前項餉銀

解到時儘先如數提出解交烏里雅蘇台由麟興知照何瑄派員領取應用毋稍延緩將此由五百里各諭令知之○旌表守正捐軀熱河朝陽縣民婦安趙氏○丁丑以直隸山東勦平捻匪紅旗報捷

上詣綏履殿

慈安皇太后前平安室

慈禧皇太后前賀喜○諭內閣本日據李鴻章英翰由六百里加緊馳奏官軍會勦擒逆全

股蕩平大概情形各一摺覽奏甚為欣慰前據李鴻章等疊次奏報追勦逆匪賊勢窮蹙諭令各該大臣等迅速殲除茲據奏稱六月二十日提督劉松山督隊追至鹽山滄州等處截殺三四百名布政使潘鼎新提督郭松林張得勝侍衛陳國瑞會同追賊至德平等處降其逆首羅六郭松林等復會同都統善慶溫德勒克西追至商河該逆涉水向西南逃逸潘鼎新等仍復冒雨力追追至高唐該

逆圖撲運河復經提督劉銘傳郭松林候補京堂袁保恆等聯絡豫皖各軍分段扼守二十八日早賊由西向東回竄劉銘傳調軍追殺適郭松林追賊東來攔截竄路縱橫合擊大股賊匪全數擒斬並擒獲張總愚之子張葵兒正法兼生擒各賊目多名計共生擒老賊三四千人餘逆悉數殲除全股蕩平從此直隸山東河南各地方生民得以安業慶幸良深惟據稱張總愚投水淹斃逆屍尚未尋獲著李鴻章等查明張逆實在下落無論生死務須得有確據並著督飭各軍搜捕餘匪總期盡絕根株以免後患李鴻章前因督軍赴援遲延並不能剋期滅賊曾疊予懲處該大臣深知感畏奮勉督勦冒暑遠征克奏膚公自應先予開復以彰勞勩李鴻章著先行賞還雙眼花翎黃馬褂騎都尉世職其疊次因勦擒不力降革各處分並著查明開復左宗棠縱賊出陝追勦尚屬迅速抵直隸後督

軍截擊。扼守運防。亦頗嚴密。著將該大臣疊次降革處分。一併先行開復。河南巡撫李鶴年。前以防勦貽誤。量予懲處。惟該撫所派張曜。宋慶兩軍。勦賊甚為得力。該撫並督隊出境防堵。亦能顧全大局。李鶴年著先行開復。革留處分。並賞還頭品頂帶。李鴻章等暨英翰。丁寶楨等。均俟一律具報肅清。聽候恩旨。所有疊次勦賊最為出力之劉松山。郭寶昌。郭運昌。宋慶。張曜。善慶。溫德勒克。西。陳國瑞。郭松林。潘鼎新。跟蹤追勦。歷時最久。不辭勞瘁。甚可嘉尚。劉銘傳。甫經抵營。雖於勦辦此股擒匪。戰績無多。惟該提督前勦任賴各逆。勤勞卓著。此次帶隊會勦。蕩平醜類。亦屬一體有功。該都統提督等及所部馬步各隊出力人員。著各該大臣督撫等迅速查明。覈實請獎。以昭懋賞。其餘出力員弁。亦著一併請獎。毋許冒濫。○又諭。本日據李鴻章馳奏。官軍追勦擒逆。於六月二十八日。在山東茌平。

南鎮一帶。將逆匪張總愚全股蕩平。已明降諭旨宣示。因思擒逆自上年冬閒渡河北犯。擾及河南彰衛懷三府。及直隸山東所屬各州縣。凡賊蹂躪之地。焚燒擄掠。慘不可言。小民耕種失時。流離轉徙。各該處紳民猶能集團修寨。並隨同官軍築牆防運。奮勇殺賊。保衛地方。朝廷於矜憫之中。尤深嘉尚。除山西被擾各州縣應徵錢糧。業經該撫奏請蠲緩外。其直隸山東河南被賊各州縣。著各該督撫迅速查明。分別擾害輕重情形。奏請蠲緩錢糧。候旨施恩。所有各處團練出力紳董人等。亦著各該督撫等一併詳查。奏請獎勵。其禦賊被害者。並著查明請卹。○又諭。都興阿奏請將帶隊私逃之提督革職等語。提督徐名揚。經侍衛陳國瑞於攻賊獲勝時。派令追勦敗匪。既未親行。復縱所部擅取財物。並帶隊私逃。實屬有違軍律。徐名揚著即行革職。仍著英翰責令該革員戴罪自效。儻再不知。

愧奮。卽行就地正法。○諭軍機大臣等。李鴻章奏連日督軍追剿。屢獲大捷。西擒全股蕩平。並飭各軍查明張總愚下落。各摺片。覽奏。實深欣慰。各路官軍追剿張逆。在鹽山。滄州。及德平。博平。清平等處。疊獲大捷。逆目次第乞降。大股賊匪全數擒斬。惟逆首張總愚。是否擊斃。抑係淹死。未據查明。著李鴻章等督飭各軍嚴密挖尋。該逆無論是死是生。總須訪查確實。毋令渠魁漏網。該逆之姪張正江。

亦尚無下落。著一併查明具奏。並著都興阿。左宗棠。李鴻章。英翰。丁寶楨。飭令該將領等。乘此聲威。挖捕餘匪。務絕根株。運河等處官軍團練。並著都興阿。左宗棠。李鴻章。官文。崇厚。英翰。丁寶楨等。責令各該兵團加意嚴防。認真守禦。且張總愚屢圖鳧水偷渡。以求幸脫。尤不可稍涉大意。各營疊次收降甚眾。該大臣督撫等。當妥籌善策。分別遣散。並令將馬匹器械一律呈繳。現在兵勇尚難遽撤。至

將來遣撤之時。尤當分起撤回。妥為辦理。斷不可吝惜小費。就近在直東遣散。以致滋生事端。陳國瑞所收降人。偽淮王卬沅寸。諒卽係卬遠才。卽著都興阿。飭令該侍衛派隊將卬沅寸及該降眾。送至英翰軍營。交該署撫妥為鈐束。正在寄諭間。據英翰馳奏。各軍偪賊於徒駭河。大獲全勝。逆首張總愚投水伏誅。逆屍尚未尋獲等語。仍著李鴻章等。檄飭各軍會同挖捕。務得確情。是為至要。將此由

六百里各諭令知之。○又諭本日據李鴻章奏。擒逆蕩平。已明降諭旨宣示。並將該大臣等分別施恩矣。惟此次各軍追剿陣斬各逆固多。而窮蹙投降者亦復不少。前據左宗棠奏稱。該大臣收降已至七千餘名。而李鴻章英翰各營所收亦不下數千名。此輩狼子野心。當賊匪熾盛之時。卽拌力抗拒官軍。迨剿敗之後。始行乞降。以冀免死。恐日久故態復萌。為患無窮。所有收降之各頭目。著該大臣

督撫等密為察看。其中歷次反覆及桀驁不馴者。卽予正法。毋稍濡忍。致滋後患。其所帶降眾。如實係裹脅者。量予遣散。其餘亦當妥為鈐束。設法安插。畿輔重地。未可稍涉疏略。再煩兵力。此次飭赴英翰軍營之降目卬沅。並著英翰妥為辦理。該署撫向來遇事尚有決斷。諒不至為所愚也。將此由六百里各密諭知之。○又諭劉崐奏苗股撲犯寨頭。官軍疊擊獲勝。並分勦黎平思州竄苗情形。暨

請催江西協濟餉銀。教首劉儀順現已逃逸。各摺片。席寶田一軍。踴毀岑松等處賊卡。逆首潘老冒等聚踞地洲。經榮維善各軍分路攻擊。疊將鬼總牛尾坡等處賊巢焚毀淨盡。其豪榮賊匪。突由寨頭西山圖撲官軍營盤。亦經謝蘭階鄧子垣等督軍追勦斃賊甚多。楚邊業已安謐。惟貴東近楚苗巢以寨頭為最險。自應於攻克後。籌畫進兵。卽著劉崐飭令葉兆蘭等暫行駐紮寨頭。遇賊卽擊。毋棄

前功。席寶田業經給假兩月。並著飭知該臬司假滿後迅速回營。以圖進取。思南石阡一帶善後事宜。該撫務當檄令彭芝亮妥為經理。並派營分駐以資鎮撫。不准稍涉疏虞。湖南餉需。久形支絀。前議由江西每月協濟銀一萬八千兩。藉資接濟。現在李元度席寶田兩軍。兵數有增無減。需餉尤亟。著劉坤一將每月撥解李元度餉銀一萬八千兩。改為協濟湖南。援黔軍餉。按月委員解往。以贍軍食。

李元度假滿在卽。著劉崐傳知該臬司。懍遵前旨。挑帶勁旅。趕緊赴滇勦賊。毋許藉詞逗遛。教首劉儀順稔惡已深。現雖將朱明月等先後擒斬。而該逆改裝遠颺。其詭譎已可概見。據奏年已昏耄。不能為禍。將來第該逆身為教首。狼子野心。安知不復行煽惑。現既逃入貴西麻哈州地境。則自有蹤跡可尋。仍著劉崐密飭各防將士。隨時按拏。毋任元兇漏網。將此由五百里各諭令知之。○以故喀喇

沁扎薩克都楞郡王色伯克多爾濟子旺都特那木濟勒襲爵○以贊畫軍務得力賞湖南在籍四品卿銜內閣中書郭崑燾三品頂帶○以湖南官軍攻克貴州荊竹園等處賊巢賞副將秦飛龍遊擊曾新發巴圖魯名號同知黃啟蘭參將王華封等花翎守備葉玉成等藍翎餘加銜升敘有差予陣亡參將彭蓋勳遊擊戴萬勝把總涂連陞祭葬世職加等都司羊炳森祭葬世職○戊寅諭內閣戶

部奏酌定漕倉章程十條一摺漕倉事務繁雜弊竇叢生上年查出祿米等倉虧案業經戶部將倉儲事宜酌議具奏茲復據該部擬定章程十條開單呈覽甚為詳盡均著照所議行並著該部分別行知直隸總督倉場等衙門及查倉王大臣等遵照辦理嗣後在事各員務當按照此次章程實力奉行期於興利除弊此外如有未盡事宜或應行變通之處著倉場侍郎隨時體察情形認真整頓不

可仍蹈前轍以重倉務○諭軍機大臣等昨據李鴻章英翰馳奏擒股全數蕩平各摺當經諭令該大臣等並各該督撫按捕餘匪並確查張總愚下落具奏本日據丁寶楨馳奏淮東等軍勦賊疊勝並擒獲逆首各摺片王心安王正起等軍或緊躡賊蹤或在防迎勦並與淮皖豫各軍分路兜勦均屬奮勇其蒲臺利津等處之水陸兵團力扼賊匪未容搶渡亦屬出力該逆全股現已經各路官軍圍

勦殲淨盡惟據李鴻章英翰奏稱六月二十八日之戰張總愚尚未擒獲所稱投水淹斃之語亦未得有確據丁寶楨此次所稱二十八日在馮官屯地方將逆首張總愚並張總導擒獲是否確實仍著李鴻章英翰丁寶楨詳細查明無論淹斃擒獲均須得有確據並著認真按捕不可稍有疏略該逆詭譎性成或恐難髮改裝溷跡渡河竟至漏網李鴻章英翰丁寶楨固宜盡力按捕都興阿左宗

崇官文崇厚亦宜督飭兵勇及各地方鄉團一體嚴緝總當俟查明該逆首下落後方可將沿河兵團再行議撤毋得草率了事致貽後患將此由六百里各諭令知之○又諭穆圖善奏派隊勦辦東南各匪及秦州土匪一摺土匪剛八即張貴在靜甯州地方糾眾倡亂黨與至一萬餘人之多微成各縣境界突有東來股匪滋擾糧道梗塞自應迅速勦辦以免蔓延穆圖善現已派令善山保傅先宗

等分投勦洗著即嚴飭該副都統等激勵將士實力奮擊以靖亂階微成一帶回匪尚未踞有巢穴尤當乘其立足未定併力捕誅毋留餘孽剛八雖係迫而為盜而庸聚稱亂與回匪等其被脅難民固不必概行誅戮該匪首甘心叛逆豈得曲從寬宥著穆圖善飭令派出各員分別妥慎辦理毋得將就了事貽患方來將此由五百里諭令知之○署陝甘總督穆圖善奏署肅州鎮總兵王仁和營勇

潰變經提督楊占鼇勦撫竣事請將王仁和革職撤去統領留營差遣得旨前據成祿奏參已明降諭旨將王仁和革職仍留署任茲據穆圖善奏稱王仁和統率無方不勝重任著毋庸再留署任撤去統領交楊占鼇軍營差遣以觀後效○以甘肅靈州拏獲盜犯予副將銜回目馬潮青以副將用並加提督銜餘升敘有差○予直隸馮官屯陣亡都司歐陽應發祭葬世職加等○己卯諭內閣前因

副都統春壽呈報勝仗情形多有隱飾諭令都興阿確查具奏茲據奏稱查明春壽前在海豐慶雲交界處所突遇大股馬賊接仗失利傷亡頗多捏報勝仗請旨懲辦等語齊齊哈爾副都統春壽以帶兵大員勦辦賊匪一切接仗情形自應據實呈報乃既不能奮勇殺賊又復捏詞稟報諱敗為勝實屬可惡春壽著即行革職毋庸留營以昭炯戒其所部馬隊即著飭令副都統富和等認真整頓並

查明該營員等如有剋扣兵餉等事。卽著從嚴叅辦。○諭軍機大臣等。恩夔奏兵米改發折色。不敷餉口。請飭山東巡撫。援案辦理一摺。據稱青州駐防兵丁。久形苦累。本年閏四月。所領兵米。按照折價章程。每石折給實銀八錢。以之糴米。僅敷數日之需。請飭山東巡撫。援照同治元年閏月兵米每石折給實銀一兩四錢。辦過成案。依數支發等語。恩夔所奏。自係實在情形。著丁寶楨卽行查照成案。

加增發給。以恤兵艱。一面知照恩夔。遵照支領。將此諭令知之。○引見直省補行考取拔貢生。得旨。陳其璋等十三名。以七品小京官分部學習。周蕃等十五名。以知縣試用。吳國賢等十名。交吏部詢問。以教職佐貳等官分用。○引見直省考取優生。得旨。楊際清等十九名。以知縣用。何官尹等十七名。以教職用。○以記名提督李輝武。暫署陝西漢中鎮總兵官。○賞喀喇沁扎薩克都楞郡王旺都特

那木濟勒三眼花翎。○以陝西省城辦理糧臺出力。予府經歷尤葆瓊等加銜升敘有差。○以紀律不嚴。撤陝西軍營總兵官胡世英統領。交署巡撫劉典查辦。○以縱勇滋擾。山西副將穆騰阿革職訊辦。○賞廣東等省丁卯科鄉試年老諸生羊海等一百二十人舉人副榜有差。○庚辰諭內閣。志和奏會審副都統希拉布與協領訥欽布互相參訐一案。供詞仍前狡執。請派大員研訊等語。此案本

係諭令解京訊辦。因額勒和布等奏稱人證業經提集。是以改令額勒和布會同盛京刑部詳慎定讞。無庸解京。現在既據志和奏稱此案供詞。仍前狡執。卽著仍遵前旨。將案內緊要人證解京交刑部訊辦。其餘無關緊要人等。著無庸解京。以省拖累。○諭軍機大臣等。李鶴年奏豫軍合剿捻逆。全股蕩平。張逆伏誅一摺。張總愚投水淹斃之說。尚無確據。現雖餘眾蕩平。而首逆至今並無實在下落。

萬一含糊了事。日後仍復潛出。嘯聚再煩兵。加尚復成何事體。著該大臣督撫等嚴飭所部各將領實力按查。張逆是生是死。必得實在確據。方能撤防。並著該大臣等迅速查明覆奏。以慰塵繫。張逆素性詭譎。恐其薙髮。潛逃過河。著左宗棠、官文、崇厚等飭屬一體嚴拏。毋稍大意。其各處藏匿餘匪。必當按捕淨盡。斷不可使一名漏網。所有先後收降之眾。為數甚多。前已密諭該大臣督撫等設

法安插。其著名頭目及反覆無常之輩。斷難使其幸生。諒已妥速辦理。自來降眾。忽撫忽叛。最為大患。況捻逆與流寇無殊。該大臣等當引前事為鑒。不可苟且目前。致棄前功。諒該大臣督撫等深明利害。必能措置得宜也。其如何辦理之處。並著妥商覆奏。毋稍疏略。正在寄諭間。復據英翰奏善後章程各條。並請撤皖軍各摺片。所奏不為無見。其請撤直隸練軍留勇扼紮一節。都興阿、左宗棠、李鴻

章、官文俱久歷戎行。目覩畿輔情形。崇厚在津年久。亦深知其得失。即著該大臣等會商良策。以昭覈實。西征事宜。前因崇厚、陳、曾、諭該大臣等於軍務完竣。擇其願留軍營者。挑選入關。除劉松山、郭寶昌所部兩軍應由左宗棠統帶回陝接辦。回務外。其各營勇丁。著李鴻章、左宗棠等酌量情形。奏聞候旨。派往皖省。應留重兵。並免其查究前案。自係權宜辦理。李鴻章籍隸皖省。都興阿亦久在江

南。情形自必熟悉。並著會商覆奏。其東豫兩省。應如何酌留兵勇鎮撫地方之處。並著丁寶楨、李鶴年一併妥籌。奏明辦理。英翰著俟查明張逆實在下落。餘匪肅清。再行統帶回皖。兵勇南下。諒旬日之間。必可蕆事。正不必急急言旋也。所請保舉出力員弁各摺單。著暫留中。屆時再行降旨優獎。密片一件。著留中。候旨妥辦。將此由六百里各諭令知之。○又諭本日據英翰密片一件。所陳不為無見。

著將原片鈔給李鴻章閱看該大臣卽將所奏情形悉心妥籌辦理該降逆當日句結任張諸逆以致僧格林沁捐軀殊堪痛恨該大臣當將此意宣示庶現在降眾不至羣懷疑懼也將此由六百里密諭知之○又諭劉嶽昭奏滇中匪股太多省圍難解請飭川軍移防為勦一摺據稱迤西賊匪連陷楚雄澂江各府州縣二十餘處省城圍困已及半年賊匪愈聚愈多若延至七八月中滇事尤難措

手現在鎮雄等處已就肅清川省防兵尚未遣撤請飭將四川筠連各處防軍仍歸提督胡中和統領出境移勦滇匪等語滇省匪氛一日未平卽川防一日難撤自應移師會勦以全危局而顧邊疆除劉嶽昭咨行胡中和辦理外著崇實迅飭該提督統帶筠連防軍取道昭通直攻永北以肅賊巢該軍軍火口糧卽由四川隨時撥解俾資飽騰其尋甸一路並著劉嶽昭督率李家福等相機攔截遏

賊旁趨岑毓英亦當激勵兵練將附省之賊痛加勦洗以期四面夾擊藉解省圍劉嶽昭另片奏續調之梁士美一軍甫抵晉甯卽退是滇練既不足恃客兵尤不可遲等語所奏均係實情胡中和駐紮處所距滇非遠卽著該督飛調前進毋任在途逗遛該提督入滇後該督仍當與之妥籌進止會合滇省各軍以壯聲勢而殄寇氛將此由六百里各諭令知之○雲貴總督劉嶽昭奏請調前任甘肅

鞏秦階道金國琛赴營差委允之○以吉林協領全英為齊齊哈爾副都統○予山東德平陣亡守備何長勝祭葬世職加等○辛巳諭內閣庫克吉泰劉典奏軍營事務殷繁亟須妥員辦理請調四川道員曾傳理來營並將丁憂陝西知縣李殿爵留陝補用知縣余家珍已革知縣李天柱留營差委等語曾傳理現在湖南原籍著劉崐飭令該員卽赴陝西軍營交庫克吉泰劉典差遣委用李殿爵

著仍遵前旨。飭令回籍守制。余家珍、李天桂均准其分別留營差委。以資得力。○諭軍機大臣等。蘇廷魁奏黃河險要各工。現籌搶護一摺。據稱上南廳胡家屯溜勢。於六月二十四日以後。忽提至漿澤汎十堡。該處舊工久經淤閉。隄身本矮。此次水勢非常旺盛。更兼徹夜風雨。水由隄頂漫過。刷寬口門三十餘丈等語。該處險工。亟宜搶護。著蘇廷魁督飭所屬。寬備稽料。廣集人夫。乘此尚未奪溜之時。趕緊盤做東西裏頭。搶下埽占。實力追壓。

以維危局。蘇廷魁所請續撥防險銀兩。前已諭李鶴年迅籌撥解。著該河督仍一面飭司寬籌款項。以資接濟。惟須工歸實用。毋任該廳員等濫支冒銷。徒糜帑項。將此由五百里諭令知之。○又諭庫克吉泰、劉典奏甘回分途內犯。各軍接仗疊勝。暨文家川等處擊賊獲勝各摺片。甘省回逆。由靈臺竄至麟遊。經中書吳士邁等擊退。其大股圖竄耀州三原。

提督周紹濂、高連陞等。追至雷原。合軍夾擊。斃賊尤多。黃鼎、劉倬雲等軍。復在邠州世店等處。擊敗馬正和回黨。而回逆仍由三水內犯。設伏原下。劉倬雲督軍鏖戰。賊始敗走。赫阿渾馬偽元帥一股。竄至中部之王村一帶。亦經魏光燾、高連陞等四面抄擊。該逆眾淹斃殆盡。現已檄飭高連陞各軍相機進剿。所籌尚屬妥協。惟三水以北。宜君以西。賊蹤麇集。若不將甘回痛加剿洗。則陝境何日得安。

著庫克吉泰、劉典迅飭高連陞。由同官一路乘勝前進。其洛川中部等處。並著分飭劉端冕、周紹濂。攔頭截擊。毋任該逆喘息復肆。蔓延。所有洛東敗賊。卽責令魏光燾實力跟追。以期悉數殲滅。回目楊汶治率黨竄踞文家川、紅崖河及正甯之三家原一帶。劉倬雲派隊分擊。殺斃極多。該逆踞堡抗拒。復經喻兆圭等督隊圍攻。連破賊壘。賊向正甯北原上敗去。仍著檄令劉倬雲嚴飭所部。隨時偵探。

不得以逆蹤遠颺稍形疏懈將此由六百里各諭令知之○予陝西邠州等處陣亡總兵官侯鼎綬等祭葬世職加等千總胡芝益祭葬世職如都司例○壬午諭軍機大臣等崇厚奏請撥北倉餘米撫恤難民等語直隸滄州等處地方既被兵災又遭水患閭閻疾苦甚為可憫崇厚擬將天津北倉餘存備賑粳米撥放滄州南皮鹽山慶雲吳橋東光甯津各處難民係為撫恤流亡起見自應照所請

辦理其河間天津以西直隸各府屬雖經被擾尚未被水地方應否概行撫恤之處著官文查明籌辦北倉所存餘米於滄州等處散放外能否勻撥他處抑須另籌款項均著官文崇厚妥商辦理山東被災被擾地方亦應分別輕重酌量撫卹著丁寶楨妥速籌辦以安窮黎將此各諭令知之○又諭昨據劉嶽昭奏請飭川軍移防為勦當經諭令崇實迅飭胡中和統帶筠連防軍取道昭通直攻永

北以搗賊巢該軍軍火口糧即由四川隨時撥解茲據崇實奏稱胡中和係實缺提督有邊防營務之責難應鄰省徵調等語現在滇南軍事萬緊餉絀兵單非藉援鄰省殊乏滅賊之策川省援黔之軍屢次獲捷該處軍務較鬆自應分力援滇為自固藩籬之計仍著該署督遵奉昨日寄諭辦理毋得稍存膜視如該提督萬難移師入滇即著崇實另籌一軍遴派得力將領星速統帶前往不得有名

無實一應軍火口糧仍由川省隨時撥解該軍入滇後著劉嶽昭岑毓英遵奉前旨與之妥籌進止會合滇軍聯絡聲勢迅殄逆氛將此由六百里各諭令知之○欽差大臣都興阿奏整頓馬隊請飭都統明慶幫同辦理得旨所有分別留撤馬隊各事宜著聽候神機營王大臣咨明辦理明慶著毋庸幫辦○甲申。

孝靜成皇后忌辰遣官祭

慕東陵○諭內閣前因捻逆蕩平直隸山東河南被擾地方飭令該督撫等查明輕重情形分別蠲緩並寄諭官文丁寶楨等妥籌撫恤茲據御史游百川奏陳善後事宜各條除賑恤貧民俟官文丁寶楨等查明後再降諭旨外其團練出力紳董及殉難紳民婦女著官文丁寶楨轉飭該地方官確切查明分別獎卹毋得冒濫遺漏至保甲之法疊經諭令該督撫等認真辦理現在捻股既除尤當實力舉行以輯閭閻儻地方官有貪庸不職不以民事為心者卽著該督撫等據實嚴參以副朝廷保衛民生整頓吏治至意○諭軍機大臣等神機營奏捻逆蕩平餘匪尚須搜捕擬將設防各隊分別留撤並請飭官文等責令各地方官查拏餘匪各摺片此次勦平捻股情形經李鴻章等先後馳奏當將安插降眾遣撤兵勇各事宜諭令該大臣等悉心妥辦惟逆首張總愚投水伏誅情節是否可憑至

今未據查覆仍著都興阿左宗棠李鴻章英翰丁寶楨等懍遵疊次諭旨迅速查明該逆是死是生總以得有屍身為據毋得稍涉含糊致貽後患降眾人數過多若不妥為鈴束必生事端並著左宗棠李鴻章英翰丁寶楨嚴飭各將領將所收降眾帶出直境妥為布置以免滋擾各省遣撤勇丁亦著飭令分起撤回如有逗遛降眾及落後游勇卽責令沿途各地方官隨時拏辦恩承所部隊伍仍著在防駐紮用資鎮撫直隸各隊應如何分布留紮著官文崇厚斟酌辦理定安所帶之密雲官兵著卽遣撤歸伍其京營派防各隊仍俟各省隊伍及各降眾全數出境後再由神機營王大臣等奏請遣撤善慶溫德勒克西並京營派出吉林黑龍江馬隊及山東所調西丹馬隊著左宗棠李鴻章丁寶楨檄令該都統等分別覈實造冊將各隊管帶回京暫駐南苑聽候神機營調撥逆匪宋景詩稽誅

已久。前聞此股賊中有該逆在內。何以現在各營並未提及。著該大臣督撫等徹底查明。毋任幸逃。顯戮直東一帶。尚多伏莽。現當大兵未撤之時。按捕較易為力。即著都興阿、左宗棠、李鴻章、官文、崇厚、丁寶楨乘此聲威。如查有成股未散之著名匪棍。派兵按拏。以清積患。刻下捻股雖經殲滅。其敗散零匪乘隙逃匿者尚復不少。若不及早鏟除。難保不於撤兵後復行嘯聚。第各省兵勇與直東各處民團互相仇殺。結怨已深。豈可再使兵勇紛紛滋擾。著官文、崇厚、丁寶楨各飭地方道府州縣官親帶紳團。按地嚴拏餘匪。如有敷衍了事及含混塞責者。一經發覺。即將各該地方官指名嚴參。按律治罪。各村莊中有隱匿賊匪逃勇者。並著從嚴究辦。以遏亂萌。儻按捕各匪必須會同兵勇。即著官文等咨調在防京兵及本省駐紮官兵分別勦辦。亦毋庸借撥客兵致多擾累。將此由六百里各諭令

知之。○又諭李鶴年奏榮澤汎黃河漫口情形一摺。豫省上南廳屬榮澤汎十堡黃水泛溢。前經蘇廷魁奏籌搶險。茲據李鶴年奏稱該處險工漫溢情形與蘇廷魁所奏大略相同。李鶴年現在馳赴工次。著會同該署河督嚴飭各該道廳將漫口處所趕緊搶護。以資補救。毋得草率從事。再涉疏虞。所有該署河督續撥防險銀兩著李鶴年懍遵前旨迅速撥解。儻有不敷。仍著該撫隨時籌撥。毋誤要

工。將此由五百里各諭令知之。○又諭總理各國事務衙門奏請改派西疆分界大臣並請飭催將分界事宜迅速舉辦一摺。布倫托海分界事宜前有旨派李雲麟辦理。該員現已革職。所有布城分界事宜著改派明瑞接辦。新疆毗連俄境分定界址應建界牌鄂博等事關繫極為緊要宜如何迅速籌舉辦乃布倫托海辦事大臣欲令烏科兩城先辦而科布多參贊大臣將烏柯克卡倫迤西屬於布

倫托海據原議條約自西而東一語欲令布倫托海先辦烏里雅蘇台將軍又以立界之事自應照原議由西而東而烏柯克卡倫係科布多所屬仍欲令科布多先辦彼此互相推諉不知是何居心儻再任意延宕貽誤事機該大臣等其能當此重咎耶著榮奎奎昌明璠懷遵前旨各於應行建立界牌鄂博之處會同俄國分界官員詳慎妥辦速為了結麟興身任將軍於地方緊要事件尤不可畏難苟安一意推諉有負委任布倫托海雖有勒匪事宜亦不可置分界為緩圖一味顛頑致滋貽誤明璠即當斟酌情形會商麟興榮奎奎昌剋期辦理毋得遷延干咎原摺均著鈔給閱看將此由六百里各諭令知之○河南巡撫李鶴年奏報會勒擒逆全股蕩平訊據獲賊供稱逆首張總愚業經投河斃命報聞○雲南按察使李元度開缺養親以迪南道程誠為按察使○乙酉

孝懿仁皇后忌辰遣官祭

景陵○以擒匪蕩平直隸山東等省一律肅清

上詣綏履殿

慈安皇太后前平安室

慈禧皇太后前賀喜○以神靈助順頒山東張

秋鎮

河神廟扁額曰榮光普佑○諭內閣李鴻章

奏遵旨查明逆首張總愚實在下落各軍按

捕餘匪淨盡直隸山東一律肅清一摺據稱

提督劉銘傳郭松林查明張總愚之兄張總

導及其弟姪族人並賊中頭日程大老坎等

均於陣前正法張總愚於亂軍中先帶數十

騎逃走嗣僅帶賊匪八人向東北林叢中逃

竄經官軍四路按捕據民間紛傳該逆首投

水淹斃旋據降賊王雙孜供稱伊即在張總

愚所帶八人之內是日隨張逆逃至徒駭河

邊親見張逆棄馬投河淹斃與英翰丁寶楨

等奏報獲賊所供情形無異現經諸軍按捕

各處逃匿餘匪並無一名漏網直隸山東境內一律肅清李鴻章自督兵赴剿以來各該將領隨同進剿均能奮勉出力自應渥沛恩施以示鼓勵所有單開尤為出力之提督劉銘傳著由三等輕車都尉晉為一等男郭松林著由騎都尉晉為一等輕車都尉宋慶著賞給二等輕車都尉世職張曜著賞穿黃馬褂並賞給騎都尉世職副都統善慶著賞給二等輕車都尉世職溫德勒克西著賞穿黃

馬褂並賞給騎都尉世職山東布政使潘鼎新著賞給雲騎尉世職一等輕車都尉提督黃翼升著賞加一雲騎尉世職總兵周盛波等十一員均著照一等軍功從優議敘其餘出力人員著李鴻章查明彙案奏請獎勵另片奏京卿赴營剿賊出力請旨獎勵等語候補鴻臚寺少卿袁保恆經李鴻章派充翼長與前敵諸將妥籌防剿且冒暑督隊能耐勞苦因思伊父袁甲三從前剿辦捻匪著有勤

勞該京卿尚能勉承父志袁保恆著開復前次降調處分仍以翰林院侍講學士補用並加恩賞給三品銜頭等侍衛陳國瑞經神機營王大臣奏派管帶銳勇隊協剿捻逆打仗甚屬出力著賞還黃馬褂花翎勇號並開復總兵記名提督仍賞給雲騎尉世職○又諭本日據李鴻章馳奏剿辦捻匪全股蕩平覽奏之餘實深嘉悅捻逆自倡亂東南十有餘年竄擾數省生民受其荼毒神人共憤罪惡

貫盈上年派李鴻章為欽差大臣剿除任柱賴汶洸等股匪本年正月間逆首張總愚復糾合匪眾肆擾山西河南直隸窺伺近畿經官文英翰丁寶楨李鶴年督兵防剿並經左宗棠統軍追擊朝廷復調李鴻章赴直東一帶督剿以收眾志成城之效現經李鴻章會同各軍督率各將領蕩平捻逆並將餘匪按捕淨盡具見該大臣督撫等協力同心膚公克奏前已賞還李鴻章雙眼花翎騎都尉世

職黃馬褂並開復處分及左宗棠等降革處分均予開復自應分別再沛恩施以昭懋賞李鴻章著賞加太子太保銜並以湖廣總督協辦大學士左宗棠著賞加太子太保銜並交部照一等軍功議敘丁寶楨英翰均著賞加太子少保銜並交部照一等軍功議敘李鶴年著賞戴花翎並交部照一等軍功議敘崇厚當捻逆攻撲天津時督率兵勇紳團力保郡城並籌濟各營糧石餉需源源不絕實

屬著有勞績崇厚著賞加太子少保銜頭品頂帶並賞戴雙眼花翎兩江總督曾國藩籌辦淮軍後路糧餉軍火俾李鴻章等克竟全功著交部從優議敘署直隸總督大學士官文前在湖廣總督任內暨本年捻匪竄直時均因會剿不力疊經降旨懲處此次捻股悉平著加恩開復太子太保銜暨勦捻不力革職留任處分並賞還雙眼花翎以示錫爵酬庸用彰慶賞至意○又諭捻匪倡亂以來十

有餘年我

皇考文宗顯皇帝宵旰籌畫

指授機宜朕御極以後仍派李鴻章等督軍勦

辦次第埽除直隸等省一律肅清洵堪上慰

在天之靈著派惇親王奕諒前詣

定陵敬謹祭告並著翰林院迅速撰文呈進用

昭誠恪○又諭現在捻逆蕩平直隸等省肅

清朕於本月十一日親詣

壽皇殿行禮並景山

闕帝廟拈香用申敬悃○又諭原任欽差大

臣科爾沁博多勒噶台親王僧格林沁自咸

豐三年督師勦捻疊殲巨寇懋著勤勞同治

四年四月間在山東曹州勦賊乘勝逐北中

伏捐軀前已疊降恩旨從優賜卹現在捻股

蕩平逆首次第伏誅因思該親王忠勇性成

齎志以歿眷念殊勲倍深愴惻僧格林沁著

加恩賜祭一壇派盛京工部侍郎奕慶前往

致祭用示篤念蓋臣至意○又諭現在捻匪

全股肅清本日降旨將已故親王僧格林沁賜祭一壇因思已故三品頂帶副都統伊興額從前在安徽等省勦擒戰功卓著嗣後隨同僧格林沁在山東東平州力戰陣亡該故員忠勇奮發未獲及身滅賊此時擒股蕩平追念前勲倍深憫惻伊興額著加恩賜祭一壇由富明阿派協領一員前往致祭用慰忠魂○又諭侍郎彭玉麟奏病勢日深懇請開缺回籍一摺據稱治軍十餘年身受重傷積

勞多疾咸豐二年間母喪未能終制現在東南肅清髮捻平靖軍事已完懇請開缺回籍等語情詞懇切出於至誠自應俯如所請兵部右侍郎彭玉麟著准其開缺回籍補行守制該侍郎帶領長江水師多年戰功卓著近年辦理善後一切事宜悉臻妥協朝廷倚畀甚深著於終制後卽行來京陛見聽候諭旨○諭軍機大臣等李鴻章奏查明逆首投水淹斃得有降賊確供各軍接捕餘匪淨盡直

束一律肅清請循例陛見及恭繳關防各摺片逆首張總愚前經各軍追擒後在徒駭河投水淹斃情形疊諭該大臣等詳細查覆茲據奏稱張逆實已淹斃並鈔呈降賊王雙孜供單是該逆自知無可偷生投河淹斃其屍身被水漂去情節似尚可信降人王雙孜即著羈留在營備質各處逃匿餘匪現雖接捕淨盡而各營兵勇若仍留紮德州一帶未免滋生事端著李鴻章飭令劉銘傳等將在營

兵勇概行移撤大河以南妥為鈐制該大臣俟各事稍畢再行來京陛見原頒欽差大臣關防並著陛見時齎帶至京恭繳其各營餉項卽由該大臣與曾國藩等設法籌措以資應用又據丁寶楨奏擒股蕩平現仍嚴密接捕並辦理收降及各營現無降眾各摺片山東曹濟等處地方向為匪徒出沒之所此次各軍撤回終恐有著名匪棍隻身伏匿涸跡偷生仍著丁寶楨通飭各府州縣文武嚴密

按查母留萌繫以靖地方英翰所帶援勦皖軍著卽移紮黃河南岸陸續撤回其應如何留防皖省及抽調西征之處著該署撫等會商奏明辦理左宗棠何以久無奏報劉松山郭寶昌疊次追勦捻逆甚為出力喜昌亦尚奮勉著該大臣迅速查明奏請優獎將此由六百里各諭令知之○以捻匪蕩平直隸山東等省一律肅清賞提督馮汝霖徐邦道周志本總兵官丁達材劉朝幹梁善明吳鳳柱

王保勝張佩芝一品封典總兵官周盛傳吳長慶駱國忠劉克仁楊西平滕嗣武吳從發張景春潘國揚徐道奎黃馬褂提督唐定奎劉盛休馮汝霖劉盛瑞徐邦道周志本魏興發總兵官張賢發周盛波潘鼎立李長樂宋德鴻蔡國祥王平西戴春林馮作霖梁永福蔡家旺陳本榮張樹屏許保清魏林起李得成蕭良桂蔣傳盛殷錫茂吳尚霖朱大珍劉世幹竇如田趙延訓陳明龍趙孟坤朱先民

馬朝選毛明詩倪祥福洪福勝姚靖戎潘永勝委營總色勒鄂特貢噶扎勒沁副將周瑞龍張兆海潘國英楊春發梅東益吉玉成謝家福知府萬國順吳秉權知州鄒增翰同知鮑灼參將王春臺談燮和李大倉羅建山錢永林遊擊王鳳彩鄧宗仁陸懷邦都司何增益千總鄧長安胡連發夏青雲巴圖魯名號參將蘇彬委參領雜克巴等花翎餘加銜升敘有差○以紅旗報捷賞奏事處班領廣科

兵部捷報處員外郎廉恩等加銜加級有差員外郎德禧等花翎鍾霖等藍翎並予沿途驛站員弁兵夫等議敘獎賞予山東商河傷亡提督胡良作祭葬世職加等諡武烈於湖南郴州原籍建立專祠追予河南滑縣陣亡提督陳振邦諡勇烈於江蘇清河縣寄籍建立專祠

大清穆宗繼天開運受中居正保大定功聖智
誠孝信敏恭寬毅皇帝實錄卷之二百三十七

大清穆宗繼天開運受中居正保大定功聖智
誠孝信敏恭寬毅皇帝實錄卷之二百三十八

教習

同治七年戊辰七月丙戌

上詣

壽皇殿行禮景山

關帝廟拈香○奉

慈安皇太后

慈禧皇太后幸漱芳齋侍午膳○諭內閣昨據

李鴻章奏殲除捻逆直東一律肅清軍機大

臣恭親王等贊理機務昕夕慎勤今幸大功

告成自應量予獎敘恭親王奕訢文祥寶馨

沈桂芬均著賞加二級軍機章京等夙夜趨

公承書諭旨。亦屬著有微勞。著恭親王等分別奏請獎勵。候旨施恩。○又諭。昨據李鴻章馳奏。勦辦搶匪。全股蕩平。地方一律肅清。業經降旨分別加恩。恭親王暨管理神機營王大臣。自辦理巡防以來。懋著勤勞。茲當紅旗奏捷。自當一體加恩。恭親王。醇郡王。文祥。崇綸。均著賞加一級。○又諭。溯自捻逆肆擾。凡屬臣工。無不同深敵愾。共盼捷音。今幸巨患削平。中原底定。允宜普被恩施。所有親郡王。

貝勒。貝子。公。及中外文武大小臣工。均著賞加一級。八旗及綠步各營兵丁。著戶部照現放章程。賞給半月錢糧。用昭恩賚。○諭軍機大臣等。昨據李鴻章馳奏。查明逆首投水確情。餘匪淨盡。直東一律肅清。請循例陞見等情。當經諭令該大臣。將在營兵勇移撤後。再行來京陞見。惟現在陝甘等省軍務緊要。亟須左宗棠統帶原部劉松山。郭寶昌。喜昌等軍回剿。著左宗棠卽飭令劉松山等軍。一面

拔營。由山西渡河入陝。將鄜延綏榆等處回氛。節節掃蕩。左宗棠著先行來京陞見。李鴻章所部。並各營兵勇。陸續移撤大河以南。為數較多。計須稍稽時日。該大臣當遵奉前諭。俟各事捐畢。再行來京陞見。陝省回匪紛擾。股數繁多。除劉松山等軍外。各營將弁勇丁。如有忠勇奮發。願西往從征者。並著李鴻章。

左宗棠。英翰。曉諭各營。聽候遴選。歸左宗棠節制。郭寶昌傷病。現在計已全愈。如尚未能銷假。卽著郭運昌帶領該總兵舊部。先行西進。英翰著卽統帶回皖。各軍南下。妥為安插。俟辦理就緒後。再行回旗。將此由六百里各諭令知之。○又諭。盛京地方緊要。都興阿係實任將軍。責任綦重。必須前往鎮攝。方足以資控制。著都興阿迅回本任。以重職守。所部將領。卽飭行歸伍。俾資操防。欽差大臣關防。卽由都興阿派員齎送到京恭繳。陳國瑞一軍。前諭該將軍擇尤保獎。現在大功告成。所

有該軍出力員弁者都興阿迅速查明奏請獎勵將此諭令知之○吏部左侍郎吳存義因病解職調戶部左侍郎沈桂芬為吏部左侍郎禮部左侍郎龐鍾璐為戶部左侍郎管三庫事轉禮部右侍郎殷兆鏞為左侍郎未到任前以工部右侍郎鮑源深兼署以內閣學士杜聯為禮部右侍郎未到任前以通政使司通政使于凌辰署理調工部左侍郎黃倬為兵部右侍郎轉工部右侍郎鮑源深為

左侍郎以都察院左副都御史石贊清為工部右侍郎管錢法堂事○江蘇按察使李鴻裔因病解職以兩淮鹽運使李元華為江蘇按察使○以安徽官軍勦辦捻匪出力賞提督黃秉鈞頭品頂帶總兵官徐登善一品封典提督程文炳張得勝張從龍總兵官牛師韓黃馬褂總兵官奎光按察使史念祖道員方長華副將黃文誥參將王化成宋雲田遊擊韓大武魏學純朱天慶巴圖魯名號餘加

銜升敘有差○以河南官軍扼守運河防勦擒匪出力賞總兵官田慶和劉廷從一品封典參將程允和巴圖魯名號知府李在鎬副將馬玉崑等花翎通判沈宣昭等藍翎予總兵官蔣東才等加銜升敘開復有差○以山東勦辦烏匪並防守黃河出力予按察使文彬優敘賞副將莫組紳參將李朝明張福興王學禮遊擊劉仁山楊飛鵬李培榮詹占元同知劉時霖巴圖魯名號前署布政使盧定

勳遊擊陳光祿等花翎道員岳雲溪等藍翎餘加銜升敘有差○丁亥

慈安皇太后聖壽節遣官祭

太廟後殿

奉先殿○

上率王以下文武大臣詣

慈寧門行慶賀禮眾官於午門外行禮○詣綏

履殿

慈安皇太后前侍早膳○奉

慈安皇太后

慈禧皇太后幸漱芳齋侍午膳○諭內閣蘇廷魁奏上南河黃水漫口請將文武各員懲處並自請治罪一摺本年六月間上南河廳溜勢提至榮澤十堡坐灣淘刷水勢擡高漫隄過水雖經該道廳盤做裏頭正河未至奪溜旁趨而口門已刷寬九十餘丈在工各員疏於防護實屬咎無可辭除上南同知鄒梁辦理不善業經隨隄落水身故外該署河督請

將廳員等分別革職議處尚覺過輕署上南守備王麟榮澤汛縣丞龔國珉署榮鄭汛把總朱永和均著卽行革職枷號河干以示懲儆開歸道紹誠著摘去頂帶交部照例議處蘇廷魁督辦河防是其專責未能先事豫防亦難辭咎著摘去頂帶革職留任仍責令戴罪自效督率在工各員趕緊堵築毋稍延誤至漫水所經地方雖不甚遠而田廬淹沒人民流離殊堪憫惻著李鶴年迅飭地方官分

別妥為撫恤○諭軍機大臣等前據蘇廷魁李鶴年先後馳奏黃河南岸榮澤汛十堡漫口情形疊經諭令該督撫等督飭各該道廳趕緊搶護茲據蘇廷魁奏該處漫口已刷寬九十餘丈雖經盤做裏頭正河未至奪溜而口門丈尺甚寬實屬修防不力蘇廷魁身任河督河務是其專責著卽趕緊鳩集料物設法搶辦儘能迅速蒞功其咎尚可末減若再玩誤定當嚴懲不貸李鶴年現既前赴工所

著卽星馳抵工會同蘇廷魁督率道廳營汛各員認真搶築隄工毋任大溜旁趨致成巨患北岸七壩及順二壩埝身為黃水衝刷各壩數丈情形喫緊並著蘇廷魁李鶴年會督河北道堵禦搶護毋任再有疏失應需銀兩李鶴年當遵奉疊次諭旨力籌撥解毋稍遲緩同知鄒梁於所屬工次石料任聽土夫偷竊售賣漫無稽察致令失事殊堪痛恨業經隨隄落水身故應毋庸議嗣後各廳營汛文

武各員弁。如有此等玩誤情形。該署河督當隨時訪察。嚴叅懲辦。不得稍事姑息。將此由五百里各諭令知之。○戊子。

上奉

慈安皇太后

慈禧皇太后。幸漱芳齋。侍午膳。○以江蘇海門

廳捐輸軍餉。永廣學額二名。己丑。三口通

商大臣。兵部左侍郎。崇厚。奏飭派道員。楊詠

春。知府任信成。分赴天津河間各屬。督同地

方官。清查餘匪。撫恤難民。報聞。庚寅。中元

節。

上詣

奉先殿

壽皇殿行禮。○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵。○遣官祭

端慧皇太子園寢。○

上奉

慈安皇太后

慈禧皇太后。幸漱芳齋。侍午膳。○諭軍機大臣

等。榮全。奏革員通匪等情一摺。已革伊犁總

管德勤。勾通不肖官兵。毆傷領隊大臣霍伽

布等。復與逆回勾結為亂。實堪痛恨。該革員

現與伊犁避難官兵居住圖危魯克等處性情反覆難測榮全雖暫事羈縻仍當密為防範並查明實在情形隨時具奏棍噶扎勒參誤據俄商牲畜前案業經榮全派員前往斜米辦理現值布倫托海變亂道途恐有梗阻仍著榮全添派妥員設法探明道路護送所帶銀兩前往斜米早將此案辦結將此由五百里各諭令知之○辛卯諭內閣毛昶熙奏軍務漸平宜益思寅畏一招所請勤聖學崇

節儉飭吏治固根本諸條皆能剴切敷陳有裨治道朕以冲齡踐阼又值時事艱難何敢稍涉戲豫自忘敬戒惟有恪遵

皇太后訓諭親師講學仰慰

慈懷至於服御允宜崇樸黜華力求節儉內廷一切用度具有常經前已疊諭總管內務府大臣循照舊章大加撙節該大臣等務當嚴飭司員力除浮冒不得稍事虛糜以慎度支釐金一項屢經諭令各該督撫酌量減裁惟

因賊匪未靖迫於時勢不能概予裁撤瞻念民生良深廛繫今幸軍務漸平餉需稍可節省著各該督撫體察情形如不能一時盡裁務當酌留大宗撤去分局遇有零星雜販概免抽釐庶不至小民益形拮据仍當慎選妥實可靠人員管理局務隨時認真稽查以期涓滴歸公毋任中飽州縣為親民之官尤須慎選循良與民休息不得任用貪酷不肖官吏擾累閭閻畿輔根本重地務當豫籌防範

以備緩急應如何設立重兵扼要駐紮暨及時訓練之處著各路統兵大臣及直隸總督妥議具奏○又諭御史王道源奏京外捕務廢弛請嚴申舊章以重緝捕一招近來京外盜風日熾白晝搶奪暨明火重案層見疊出該地方文武員弁平時既不能實力巡查及至失主報案時往往任聽吏胥徇令改盜為竊甚至有藉端勒索情事似此捕務廢弛何以詰奸暴而安善良嗣後京外承緝各文武

衙門遇有民間盜竊各案。務即督飭兵役人等實力躡緝。毋得再行玩愒。其荒僻處所。最易藏奸。尤須嚴密梭巡。以絕盜萌。並著各該衙門酌籌經費。以備兵役賞需。如敢仍蹈從前惡習。卽著嚴為懲辦。○諭軍機大臣等。前據李鴻章等先後馳報。捻股肅清。首逆張總愚投水淹斃。疊經諭令該大臣督撫等。擒捕餘匪。並將各營勇丁分別次第凱撤。現在餘匪是否挖淨。各營勇丁如何分別撤歸。應由

何路行走。未據李鴻章等覆奏。近聞各營勇丁與民團尋仇。互相鬪殺。並有焚掠情事。如果屬實。必至激成事端。左宗棠李鴻章官文。崇厚英翰丁寶楨。務當將各營勇丁妥為彈壓。不得再任肆行滋擾。至直東各處境內藏匿餘匪。諒亦不少。該大臣督撫等自當認真挖捕。務期殄滅淨盡。捻股匪首不止一人。有無潛匿他所漏網稽誅者。此事不厭詳求。總須力求真實確據。著該大臣督撫等再行訪

查。並督飭所屬各地方文武認真挖緝。或為民團及地方官所擒殺。亦須訪求確據。至挖捕餘黨事宜。當飭令地方官督率各處民團辦理。如須兵勇協助。李鴻章等當揀派老成將領選擇誠實勇丁助緝。不得任聽各隊勇丁紛紛四出藉為爭功。尋仇之舉。前經諭令左宗棠等將崇厚英翰所陳留撤勇丁事宜妥議具奏。著卽迅速覆奏。本日復據左都御史毛昶熙奏請飭劉銘傳赴直隸提督本任

並統帶所部勇丁萬人在大順廣一帶駐防。仍一面訓練營伍。所陳不為無見。著左宗棠李鴻章官文安速會商覆奏。另片奏請設局收繳凱撤勇丁火器馬匹等語。著李鴻章英翰丁寶楨一併會商籌款辦理。原摺著摘鈔閱看。片一件一併鈔給閱看。將此由六百里各諭令知之。○又諭寄諭欽差大臣左宗棠直東軍務完竣以後。誠恐餘匪潛藏伺隙萌發。而兵團仇殺尤恐釀成禍患。業經諭令各

該大臣督撫等妥籌辦理。惟近聞本月初三四五等日。尚有捻股一千餘人。並有大頭目在內。由德平樂陵一帶。竄往鹽山。經劉松山等軍擊勝。復竄甯津等處。以致難民紛紛遷徙。現在情形如何。該大臣駐紮處所相距較近。著趕緊查明。據實覆奏。一面督飭各將士迅速殲除。毋得稍留餘孽。致貽後患。此次李鴻章等捷報頻仍。該大臣何以無一字奏報。著即將官軍剿賊情形。並交辦各件一併具

奏。劉松山、郭寶昌兩軍。當早日部署。以便事竣。剋日西征。前經諭令該大臣會同李鴻章、英翰等。遴選弁兵。隨從前進。現在如何辦理。著趕緊定議馳奏。以慰廑念。將此由六百里諭令知之。○又諭曾壁光奏。剿辦安順股匪。疊破賊營一摺。貴州安順各路匪黨滋擾。經官軍分投雕剿。疊破賊營。匪黨陳枝山率眾投誠。擊退賀潘巖曾各逆。受撫者一百餘寨。六合團匪暨定南各團。亦聞風向化。自將逆

苗擊退。軍務尚為得手。惟巖曾諸匪。尚未殲除。十三旗逆黨。亦須大加懲創。方免蔓延。著曾壁光仍飭畢大錫等。隨時相機剿辦。迅掃賊氛。其反正各團。尤當妥為鎮撫。免致反側。另摺奏黎平解嚴。攻克寨頭各賊巢。與劉崑前奏大略相同。該署撫當嚴飭該管文武。加意防範。毋令匪蹤再肆奔突。並檄令黔軍會合楚軍。將清台施黃各苗逆次第掃蕩。以靖地方。將此由五百里諭令知之。○又諭曾壁

光奏黔省需餉支絀。請飭催欠餉等語。黔省辦理軍務。需用浩繁。四川等省解到之餉。按照戶部奏定章程。積欠甚鉅。現在兵勇雲集。餉項短絀。若不寬籌協濟。何以收飽騰之效。著崇實、郭柏蔭、李瀚章、何璟查照戶部奏定章程。迅將應撥協黔月餉新餉。寬為籌撥。發交黔省催餉委員。源源解濟。以應急需。將此由五百里諭令崇實、郭柏蔭、李瀚章。並傳諭何璟知之。○以直隸剿辦梟匪出力。賞總兵

官黃名進倪開珩江開泰副將文明迪夏有
篤三品封典總兵官蔣良眷參將李其昌巴
圖魯名號道員費學曾都司成忠等花翎知
縣王敷政等藍翎賞還副將李炳業花翎勇
號餘加銜升敘開復有差○以貴州克復湄
潭縣城暨攻克荊竹園等處賊巢出力賞知
府紀煥選同知胡乃鈞等花翎州判羅峰等
藍翎餘加銜升敘開復有差○予貴州黎平
陣亡署參將舒澤洛署遊擊易乾定都司曹

得勝千總夏秉中孫龍標把總張順秩縣丞
楊開泰祭葬世職加等○壬辰

文宗顯皇帝忌辰遣官祭

定陵○

上詣

奉先殿

壽皇殿行禮○諭內閣昨據毛昶熙奏軍務漸
平宜益思寅畏等語當因其剴切敷陳虛懷
嘉納宣示中外臣工妥籌善後以期與民休

息茲復據御史張緒楷奏請保泰持盈及時
講學一摺與毛昶熙前奏均屬方今要務現
在捻逆雖已肅清陝甘雲貴等省軍事方殷
河患未平庫儲未裕流亡未復物產未豐正
我君臣交相咨儆之時朕欽奉兩宮

皇太后懿訓憂勤惕厲軫念時艱典學親師講
求治道大學士倭仁等務當盡心啟沃裨益
朕躬軍機大臣恭親王等亦當兢惕同深彌
勤贊畫其各部院臣工均有官守言責並當

精白乃心實事求是各該督撫將軍府尹等
身膺重寄尤不可以軍務漸平於察吏安民
及興利除弊諸事宜稍形疏懈總期力戒因
循同求上理以收長治久安之效朕實有厚
望焉將此通諭知之○諭軍機大臣等左宗
棠奏各軍連日搭捕現在辦理情形一摺張
總愚淹斃情形左宗棠訊據賊供並採訪居
民傳說未敢信為真實證據其竄逸餘黨尚
復不少自應迅圖搭捕以淨根株著飭令地

方官督率民團實力挖剿。如有應需兵力之處。卽檄飭劉松山等。選帶妥實隊伍。相機剿擊。仍一面知照運河西岸水陸各軍。暫緩撤防。以期一勞永逸。鹽山甯津等處賊蹤已否。淨盡。並著遵奉昨日諭旨。妥為辦理。該大臣所收降眾。數至七千餘人。其中並有髮逆捻逆遺黨。若輩懾於兵力。窮蹙來歸。雖不至遽形反覆。而野性難馴。駕馭頗非易事。據奏將各降眾。鈐以軍令。挈歸陝西。其籍隸山西陝

西及河北三府者。隨同各哨行走。就地資遣。所籌尚屬妥協。卽著隨時斟酌辦理。該大臣俟善後事宜稍為就緒。卽遵前旨來京。陛見。將此由五百里諭令知之。○又諭都興阿崇厚奏會籌設防各隊。分別撤留。並請入覲一摺。盛京地方。關繫極重。前有旨諭令該將軍迅回本任。且該省馬賊。雖經大軍嚴行搜捕。而萌孽易滋。難保不復形蠢動。緝捕事宜。尤關緊要。都興阿當懷遵前旨。星速回任。以重

職守。毋庸來京。陛見。所調各隊馬步官兵。應如何妥為遣撤之處。並一切善後事宜。均著崇厚悉心辦理。其劉景芳余承恩各軍。應否擇要駐紮。或卽行裁撤。著崇厚咨商官文斟酌情形。相機布置。將此由五百里各諭令知之。○又諭林壽圖奏甘餉緊急。請飭查鄂臺洋款確數。以憑運解。並請飭晉省速撥河東協餉各摺片。左宗棠前奏借款合洋款二百萬兩。除劃提赴直楚軍經費外。曾諭令一半

給陝。一半給甘。並令王文韶等先提銀二十萬兩解甘。餘銀仍解陝。交林壽圖酌留勻撥。茲據林壽圖奏稱。自左宗棠入關以來。該藩司未經收領甘餉。詢據留陝委員稱。借款業經用竣。並查閱湖北咨文。洋款亦兌過三十萬兩。若併由鄂解甘之二十萬兩。開除約止贖銀四十餘萬兩。尚須留供左宗棠等楚軍經費等語。現在甘省需餉孔亟。林壽圖於鄂臺洋款有無可撥。難以備知底蘊。自是實

在情形著郭柏蔭何璟就近飭王文韶等查覈原奏留撥左宗棠劉典及徑交甘省委員外有無餘銀可分解陝臺約得確數若干卽由郭柏蔭等具奏一面迅催隨收隨解毋稍延誤其部議專協慶陽之河東歲餉距陝較近著鄭敦謹速飭河東道於戊辰綱應協銀十萬兩內先籌銀三萬兩剋期解陝餘銀仍按月陸續起解由林壽圖分撥接濟將此由五百里諭知郭柏蔭鄭敦謹並傳諭何璟林

壽圖知之尋郭柏蔭何璟奏奉撥甘餉洋款銀二十萬兩業經如數提解甘臺交收並飭該司道等查明欠解銀兩趕緊籌解陝臺報聞○直隸正定鎮總兵官婁雲慶開缺養親以記名提督譚勝達為直隸正定鎮總兵官○以軍機處校對清字檔冊完竣予內閣中書額圖琿等加銜升敘有差○以陝西官軍剿辦捻匪出力賞提督劉松山黃馬褂並三等輕車都尉世職郭寶昌騎都尉世職並賞

還黃馬褂許得龍張會元正一品封典餘升敘有差○以侍衛陳國瑞所部勦擒出力賞遊擊紀長巴圖魯名號把總陳澤雲以守備用並賞花翎千總李振山等藍翎餘升敘有差○以甘肅涇州籌辦軍糧並疊次守城出力賞知府劉校書都司王秉寅等花翎縣丞張仕達等藍翎予總兵官劉明泰等加銜升敘有差○予山東德州等處陣亡副將蘇正達等祭葬世職加等○追予安徽軍營病故

總兵官張運桂附祀按察使張運蘭專祠○追予安徽全椒陣亡知縣孟煊建立專祠○予安徽績溪陣亡殉難從九品陳德興等紳民婦女一萬二百八十六員名口分別旌卹如例○追予江蘇常州殉難紳民史承簡等暨婦女一百二十名口建立專祠○癸巳以神靈顯應加江蘇宿遷縣金龍四大王封號曰輔化河南陳留縣陳九龍將軍封號曰贊順

曹將軍封號曰護國。

黃大王封號曰孚澤。○諭軍機大臣等。李鶴年奏沁河陡漲。民隄漫溢。現飭勘辦。大概情形一摺。據稱武陟縣西北岸趙樊村。連日河水陡長。水高隄面。溜勢頂衝。該處隄身漫溢。掣溜北趨。口門約寬五十餘丈。由下游修武一帶行走。現已設法堵築。並派員馳往被水各區。分別賑撫等語。前因榮澤汎十堡漫口。當經諭令該撫馳赴工所。會同蘇廷魁督屬

搶築。茲復據報樊村民隄漫溢。是前險未平。後患洵至。覽奏實為焦急。著蘇廷魁、李鶴年會督該管道府廳縣等。趕緊購集夫料。設法堵築。毋任汎溢無歸。並查明水勢究由何處歸宿。妥籌辦理。李鶴年現已派員攜帶銀兩。馳往被水各區。會同該地方官雇覓船筏。並帶席棚糖餅。分投援渡賑撫。所辦尚是。惟水災較廣。民困益深。該撫務當嚴飭各該地方官及委員等。妥為撫恤。毋令一夫失所。榮澤

漫口工程。已否辦有頭緒。秋汎前能否竣工。現在大溜曾否全行掣動。並著蘇廷魁、李鶴年。分飭趕築。各廳文武員弁。如有偷減玩誤情事。蘇廷魁等當懷遵前旨。隨時訪查。嚴叅懲辦。該撫並檄飭藩司。寬籌款項。源源接濟。以期河患早平。藉蘇民困。將此由五百里各諭令知之。○以捻逆蕩平。賞軍機章京太常寺卿鄭錫瀛二品頂帶。內閣侍讀文海等。花翎員外郎續昌等。藍翎。餘加銜升敘有差。○

予江西各屬陣亡殉難武舉王履和等紳民婦女四千二百十六名口。分別旌卹如例。○甲午。諭內閣。詹事府右春坊右庶子翁同龢奏請給假開缺。回籍葬親一摺。翁同龢著賞假三箇月。准其回籍葬親。無庸開缺。原任大學士翁心存靈柩回籍。著沿途地方官妥為照料。以示篤念耆臣至意。○追予福建各屬陣亡殉難縣丞張霖等紳民婦女六千三百四十五員名口。分別旌卹如例。○乙未。諭內

閣崇實奏薦舉人才一摺四川候補知府彭名湜恒泰瀘州直隸州知州許培身候選道資州直隸州知州黃濟馬邊廳同知張秉堃會理州知州徐傳善候補知州程廷杓廣元縣知縣蓋星階候補知縣杜受廉均著送部引見候旨錄用○諭軍機大臣等前因官文奏餉需浩繁請飭部再行借撥銀三十萬兩由部飭催江蘇等省將欠解協餉解部歸款一摺當交戶部速議具奏茲據奏稱直省供

應防兵清理欠餉並籌辦善後事宜需費浩繁請在部庫先行借撥銀十萬兩並催解欠銀等語現在捻匪蕩平該省一切用款尚多即著照戶部所議先行借撥銀十萬兩解交該署督應用以濟急需著曾國藩丁日昌將江蘇欠解銀十萬兩迅速解部歸款並著郭柏蔭劉崐丁寶楨何璟將湖南欠解銀五萬兩湖北欠解銀七萬兩山東欠解銀八萬兩迅即委員解交直隸藩庫以備應用官文即

行分投催提毋任遲延藉欠各餉解到時官文當嚴飭藩司撙節動用毋稍虛糜嗣後並不得再行瀆請將此由五百里諭知官文曾國藩郭柏蔭丁日昌劉崐丁寶楨並傳諭何璟知之○調兩江總督曾國藩為直隸總督閩浙總督馬新貽為兩江總督以福州將軍英桂為閩浙總督正藍旗漢軍都統文煜為福州將軍○予江西各屬陣亡殉難都司李發灃等紳民婦女二千九百六十七員名口

分別旌卹如例

大清穆宗繼天開運受中居正保大定功聖智
誠孝信敏恭寬毅皇帝實錄卷之二百三十八

大清穆宗繼天開運受中居正保大定功聖智
誠孝信敏恭寬毅皇帝實錄卷之二百三十九

終

同治七年戊辰七月丙申諭內閣前據官文

奏疏防屬境失守之司道府州等員援案請
寬免處分當諭令俟軍務完竣再行奏請茲
復據該署督奏稱捻股肅清遵旨奏明懇恩
等語直隸布政使盧定勳等於所屬州縣城
池失守皆能督屬先後收復防勦兼施功過
尚足相抵布政使盧定勳按察使張樹聲清
河道費學曾天津道周家勳前署天津道博
多宏武保定府知府恩福河間府知府靈志
署天津府知府任信成深州直隸州知州劉

東琳均著加恩寬免處分。○署直隸總督官文奏懇開復道員余承恩等革職留營處分。並請賞還原銜翎頂。得旨。余承恩等處分均著准其開復。並賞還原銜翎頂。不得再行保獎。余承恩所部勇丁。應否撤遣。或交左宗棠帶赴陝西之處。著官文咨商辦理。○以鑲黃旗滿洲副都統崇綸為正藍旗漢軍都統。鑲紅旗漢軍都統奕劻署鑲紅旗蒙古都統。○以京營左翼翼尉達明阿為右翼總兵。○丁

酉。諭內閣。前因捻匪全股蕩平。降旨將已故親王僧格林沁。並已故副都統伊興阿。均加恩遣官賜祭一壇。以彰忠蓋。因思捻逆竄擾安徽河南等省。十有餘年。各該省文武官員。及各路軍營將領等。或城破戰歿。或臨陣捐軀。忠義凜然。皆未獲及身滅賊。此時捻氛廓清。追念前勳。倍深憫惻。所有按察使銜記名道安徽廬州府知府金光勛。內閣學士全順。記名布政使前福建汀漳龍道彭毓楠。開復

河南南陽鎮總兵邱聯恩。江南徐州鎮總兵滕家勝。提督銜署山東曹州鎮總兵郝上庠。副都統舒明安。河南河北鎮總兵余際昌。正黃旗漢軍都統舒通額。護軍統領恆齡。副都統蘇倫保。記名副都統常順。總兵何建龍。廣西右江鎮總兵張樹珊。均著加恩賜祭一壇。由各督撫將軍都統等。迅派參佐道府等員。前詣各該旗籍致祭。用慰忠魂。○又諭。前因捻逆蕩平。施恩在事諸臣。賞加左宗棠太子

太保銜。並交部照一等軍功議敘。茲據左宗棠奏稱。追勦無功。難以忝竊。請收回成命。覽其情詞。甚為懇摯。惟國家論功行賞。自有常經。該大臣其勉效馳驅。用副委任。毋許固辭。○諭軍機大臣等。前因侍郎彭玉麟奏。病勢日深。兼未終制。懇請開缺回籍。當經降旨允准。仍令於終制後來京。陛見。候旨錄用。惟現在曾國藩調補直隸總督。長江水師營制。係屬初創。恐黃翼升一人不足以資控制。著彭

王麟於百日後迅赴江皖地方扼要駐紮兼以養病。朝廷仍不畀以員缺。於該侍郎本意亦屬相符。諒該侍郎素性忠義。經朝廷如此體諒。當亦不敢再行瀆請。即著劉崑傳知該侍郎。於百日後迅赴江皖擇地駐紮。庶黃翼升得有商榷。而各舊部亦有所稟承也。將此由四百里各諭令知之。○又諭金順奏賊股麋聚榆綏。馳赴東路截剿。並請飭催山陝協餉。胡世英請假回籍各摺。片。花池等處竄匪。

雖經各軍截剿。疊有新擒。而土回各匪股數甚多。蔓延葭米。並有髮逆袁姓大股竄至綏德。亟應速籌剿辦。金順酌留資糧等扼守花定一帶。親督胡世英等營兼程東進。即著該副都統督率所部。迅赴榆郡。會商庫克吉泰。劉興視賊所向。痛加勦洗。迅殄逆氛。榆郡與晉省永甯保德僅隔一河。其東北神木府谷尤與歸綏相近。著鄭敦謹嚴檄兵勇實力防守。以固晉省門戶。甘省回匪絡繹入陝。應如

何嚴扼竄路次第掃蕩之處。著穆圖善庫克吉泰。劉興金順會籌布置。左宗棠身任欽差大臣。責無旁貸。所有西路防剿機宜。務當廣籌方略。妥為兼顧。前據左宗棠奏。胡世英於保安安塞告急時。並未派兵往援。當諭令穆圖善查奏。嗣據劉興奏。該總兵不能約束勇丁。復將胡世英撤去統領。交劉興查奏。茲據金順奏稱。該總兵擬請假五箇月回籍省親就醫等語。胡世英著俟被參各節查辦完竣後。再照所請給假。令其回籍。金順帶兵東進。需餉急為迫切。著鄭敦謹。劉興。於應解該營協餉內。先各籌撥銀數萬兩。並另籌軍火帳房。一併速解金順軍營。以資接濟。劉興仍一面檄令延榆綏道。飭屬籌辦糧石。按日供支。其糧腳各價。准其作正開銷。儼因糧餉缺乏。致金順所布貽誤事機。必惟該撫等是問。將此由六百里各諭令知之。○以故輔國將軍惠略子寶善襲職。○予山西絳州殉難郎

中衛如圭等紳民婦女六十員名口分別旌卹如例並予建祠○戊戌以神靈佑助頒河南封邱縣

金龍四大王廟扁額曰功昭式遏山東臨清

州

黃大王廟扁額曰神功翊運

黎河神廟扁額曰丹誠永賴

漳河神廟扁額曰發鳩澤遠○諭內閣自捻

逆倡亂以來疊經各路統兵大臣分投勦洗

復經諭令各該省督撫等激勵民團同仇敵

愾現在捻逆蕩平官兵一律凱撤勇丁亦各

還鄉里誠恐江南安徽河南山東從前被擾

處所不免伏莽潛匿乘隙竊發又為民害著

江南安徽河南山東各督撫於徐海穎亳歸

汝曹沂等處飭令各該地方官勸諭民間照

舊修理圩寨整頓鄉團互相保衛庶足以戢

奸宄而安閭閻此外民團亦應一體整飭並

著該督撫等慎選收令安良除暴以靖地方

至捻逆未平以前所有為匪之人已經投誠
遣散者一概准予自新不准處處紳團再行
尋仇控殺地方官吏亦不得藉端苛求償此
後該降眾等再有作奸犯科為害鄉里者仍
責成地方官從嚴懲辦毋稍寬貸○諭軍機
大臣等左宗棠奏遵覆善後事宜並料理西
征各摺片李鴻章奏辦理善後並陸續撤勇
籌辦降眾各摺片淮皖等軍現既無願往陝
境自請投效之人左宗棠亦稱其於西征情

形不便且淮軍月餉數目與各營優絀亦殊
諸多未便該大臣擬就現有兵力辦理陝省
軍務如需續行添兵即擬在皖豫等省另行
招募著即照所議辦理直隸所屬地方李鴻
章既稱南勇與民情恐不相習且久役思歸
著即照所議將劉銘傳郭松林等軍陸續裁
撤分駐徐州濟甯周家口等處速行籌補欠
餉俟補足後即行裁撤歸籍英翰所部皖軍
前據該撫奏稱擬挑留一萬二千名分為四

支選派將領扼紮要地鎮守。曾經諭令李鴻章等會商。茲據李鴻章覆奏。與該撫意見相同。著英翰卽將遣將選兵並分紮何處。妥籌布置。李鴻章所陳駕馭降眾事宜。本日已明降諭旨。飭令兩江安徽各督撫妥辦矣。蒙亳一帶民風素稱強悍。將來散遣降眾。歸籍錯處。尤易滋生事端。英翰當慎選賢能。收令妥為整頓。李鴻章請令皖撫常駐潁壽一帶。就近督察控制。所陳不為無見。著英翰妥議具

奏。捻股投降賊目。及兇惡反覆。並藉隸蒙亳從逆多年之匪。業經李鴻章派員正法。其餘脅從降眾。均著收回軍械。分別遣留。妥為安插。將此由五百里各諭令知之。○又諭李鴻章奏請飭撫恤難民等語。現在捻股蕩平。各路兵勇陸續裁撤。其鹽山慶雲滄州武定等處。向多鹽梟出沒。每圖勾結滋事。該處此次被擾較重。設或難民無業可歸。被匪勾結。難保不復行嘯聚。擾害閭閻。瘡痍餘生。曷克當

此著官文崇厚子寶楨懷遵前旨。督飭地方官將難民分別撫卹。毋令流離失所。庶不至迫於飢寒窮極思亂。至梟匪兇獷性成。頑梗難化。現雖懾於兵威。暫時弭伏。兵退之後。難保不故態復萌。著該督撫大臣等督飭兵勇實力巡緝。隨地鏟除。以靖亂階。並責成各該地方官隨時查拏。有犯必懲。毋得視為具文。日久生懈。李鴻章奏宋景詩並不在此股捻匪之內。惟該逆狡猾萬分。難保不仍在直東

交界一帶潛匿。著官文子寶楨飭屬嚴查。毋任該逆漏網。將此由四百里各諭令知之。○欽差大臣左宗棠奏請調總兵官馬德順赴陝西差委。允之。○漕運總督張之萬奏陳籌辦善後情形。得旨。所有邠境劉兆燦等股匪。著卽督飭嚴密按剿。毋留餘孽。以靖地方。○以直隸山東辦理運防穩固。予前任雲南提督傅振邦以提督簡放。並補給同治元年恩廕。○以江蘇淮安等處扼守運河暨隨辦文

案出加賞參將蔡冠倫二品封典在籍員外郎銜光祿寺署正程增賢等花翎同知楊學瑛等藍翎餘加銜升敘有差○己亥諭軍機大臣等有人奏京倉花戶擅造私斛剋減開放米數一摺據稱興平倉本月開放鑲黃旗甲米時有該倉身後辦事之逃軍田立兒串同花戶吳勇聰即吳五兒自造私斛多張並於斛中添夾板片剋減開放米數請飭查拏等情著步軍統領衙門速行密派妥幹員役

前赴該倉斛房將私造之斛起獲並將田立兒吳勇聰等拏獲送交刑部嚴行訊辦毋任漏網原摺著鈔給閱看將此諭令知之○追予江蘇丹陽陣亡在籍內閣中書馬釗祭葬世職加等建專祠子監生文藻賞卹如例並附祀○庚子

仁宗睿皇帝忌辰遣官祭

昌陵

上詣

壽皇殿行禮○諭內閣錄白旗蒙古奏世管佐領因案革職繼子襲職無分別無應襲之人繕具家譜援案請旨辦理一摺錄白旗蒙古世管佐領吉祥所遺佐領一缺著暫行改為公中佐領俟吉祥生有子嗣再行奏請承管○諭軍機大臣等子寶楨奏酌留兵勇並分別遣留吉林黑龍江馬隊一摺東省武定東昌臨清三府州與直境毗連素為鹽梟教匪出沒之所曹沂兩屬接壤豫徐又為幅匪長

槍會匪所伏匿該撫現酌留七八千人分駐武定各屬卽著擇要扼紮以資鎮撫其應行裁撤各營丁寶楨當檄飭帶兵將領及各該地方官妥為辦理毋任沿途騷擾別滋事端吉林黑龍江丹丁馬隊其派赴直隸之一千五百名中有疲弱者卽照該撫所擬酌給川資飭令就近由天津回籍其精壯丹丁卽飭該委員等按名點驗覈實造冊一面咨商左宗棠等檄令分隊起程前赴南苑暫駐聽候

神機營調撥。至隨同丁寶楨防剿之丹丁九百餘名。並著照所請給賞。違回以示體恤。東境雖已肅清。而伏莽尚易潛滋。仍應悉心搜捕。以衛閭閻。該撫現已回省。所有善後一切事宜。務當迅速籌辦。實心經理。不得因地方現已稍安。即形疏懈。轉致有名無實。將此由五百里諭令知之。○又諭。前據劉嶽昭奏。請運粵鹽以抵滇餉。當經諭令戶部速議具奏。又據翰林院侍讀學士馬恩溥奏。請籌濟滇

餉。一併交部查明覈議具奏。茲據該部奏稱。查同治六年冬撥以前。廣東省欠解滇省協餉約共四十餘萬兩。內由鹽課項下指撥協解者。有丙辰丁巳乙丑三年共指撥銀二十一萬兩。又太平關欠解三十餘萬兩。粵海關欠解二十餘萬兩。經該部三次奏催。僅據粵東將初次奏提銀六萬兩陸續解往。其餘多未報解。劉嶽昭所請運鹽抵餉一節。從前雲南廣東本有銅鹽互易之案。章程載在則例。

今滇銅雖不能運粵。仍須取給粵鹽。即以劃抵欠餉。視銅鹽互易舊章。辦法雖殊。而情理則一。且廣東產鹽不慮不敷。若運至雲南廣南府督銷。更無沿途曬賣侵灌粵東引地之慮。著瑞麟嚴飭廣東運司。趕緊酌提鹽斤。飛咨滇省委員接收。售充軍需。按每鹽一包合銀一兩二錢有零之數。抵算欠餉。不准藉詞推諉。其廣東藩鹽兩庫及太平關粵海關。截至現在實欠滇餉各若干。並如何酌提鹽斤。均勻劃抵。及滇省如何委員設局督銷轉運之處。著瑞麟、劉嶽昭、岑毓英各趕緊會商妥擬章程具奏。浙江等省應解滇省協餉報解寥寥。現在滇省需餉孔亟。除廣東一省現議提撥鹽斤售抵欠餉外。著曾國藩、崇實、英桂、郭柏蔭、鄭敦謹、李瀚章、劉坤一、劉崑、李鶴年。迅飭各該藩司監督。按照戶部疊次奏明提撥各數目。趕緊如數起解。毋稍延宕。並著劉嶽昭、岑毓英遵照該部歷次奏案。將各省奉

撥滇餉已解未解各數目分晰開單專案飛咨該部以憑查覈。至馬恩溥所奏請簡派良將一二員統帶勁旅一二萬人入滇助剿等語。雲南距直東較遠移師往剿情形未必相宜。如該省亟須籌添兵勇著劉嶽昭等即就近添募以資得力。將此由五百里諭知曾國藩、崇實、瑞麟、英桂、劉嶽昭、郭柏蔭、鄭敦謹、李瀚章、劉坤一、劉崑、李鶴年、岑毓英並傳諭師曾知之。○又諭曾壁光奏請飭四川湖南等省嚴督席寶田各軍分進剿辦以竟全功等語。現在龍里貴定兩城均經克復黔省軍務漸有轉機。若川楚援剿各軍遽行撤退不惟前功盡廢必至後禍尤烈。據曾壁光奏石阡思南因撤兵太速餘匪已有百十為羣漸肆擄掠者且由龍貴東下直至鎮遠清黃施秉一路苗教各匪林立。非川軍楚軍分途進擊黔局殊屬難支。所奏均係實情。唐炯、蹇閣、劉嶽昭所帶川軍現已進取玉華山轎頂山尚

大坪等處。著崇實迅飭唐炯等由北而南縱橫奮擊不可稍涉遷延。臬司席寶田前已給假兩月現計假期將滿著劉崑檄令該臬司仍率所部由黔省下游取道前進期與川黔各軍三面夾擊使苗教各匪首尾不能相顧以壯聲威。崇實等素顧大局諒不至以得勝即止忽視鄰封。所有席寶田唐炯各軍並著崇實等懷遵前旨將各該軍飭歸曾壁光節制其各營餉項軍火仍由該省源源接濟。用資飽騰。曾壁光亦當飭令張文德督率黔中將弁乘此聲勢奮力追剿並隨時與川楚各軍互相策應。逐漸掃除以清餘孽。本日據崇實奏生擒趙嵩廳曾勒烏立茲現飭趙嵩廳監禁等語該夷酋攻城擄掠壘拒官軍實屬異常兇悍俟將歷年所擄漢人盡行交出後著即盡法處治毋稍姑容。西昌冕甯等處攻剿事宜並著遵奉本日諭旨妥籌辦理將此由五百里各諭令知之。○實授曾壁光貴州

巡撫黎培敬布政使。○以貴州督辦軍務出力。賞提督張文德白玉翎管一支。白玉搬指一箇。火鐮一件。大荷包一對。小荷包兩箇。予道員林肇元以按察使用。○以約束兵丁不嚴。山東遊擊馬秉阿。守備韓英魁革職訊辦。○以湖南官軍攻克貴州德明等處賊巢。出力。予總兵官黎得盛以提督用。賞副將魏忠海。黃秀林。參將彭蓋勳。已圖魯名號。知州瑞澎。遊擊黃開才等花翎。知縣崔銳等藍翎。餘加銜升敘有差。○以四川勦撫逆黨等處夷寨。賞總兵官周家盛正一品封典。副將黎澤桂。巴圖魯名號。知州楊秉琛等花翎。縣丞陳世彬。藍翎。餘加銜升敘有差。予陣亡參將鄧有才。千總帥鳳山。祭葬世職加等。○以克復貴州龍里。貴定兩縣。城。予總兵官汪柱元等以提督用。賞副將李榮春。遊擊何雄輝。都司舒得勝。守備王得貴。已圖魯名號。知府樊葆書等花翎。李懷易。藍翎。餘加銜升敘開復有

差。予陣亡都司田國珍等十三員祭葬世職加等。○予宋儒袁燮從祀。文廟。從浙江巡撫馬新貽請也。○辛丑。諭內閣。前因喬松年於陝西司道年終密考單內。註明潼商道蔣徵陶。奉職勤慎。精力稍遜。諭令該署撫劉典細心察看。如不勝任。據實具奏。朝廷本無成見。本日據該署撫覆奏。悉敘蔣徵陶積勞患病情形。並將未領養廉等項及籌措現銀四千兩捐助軍餉。請免查叅等語。蔣徵陶如果勝任。該署撫何妨據實具陳。儻貽誤公事。亦豈捐助軍餉所能獲免。現在該道既稟請開缺。卽著勒令休致。所有該員捐餉銀一萬四千兩。著毋庸賞收。○諭軍機大臣等。劉典奏派員赴晉辦理陝甘米捐分局一摺。陝甘兩省米捐分局。以章程參差。捐務有礙。業經由劉典等合為一局辦理。所有山西省分局。向設太原省城及河東運城等處。該撫以原派道員蘇彰阿等不能得力。改

派甘肅甘涼道董文煥等會同藩司胡大任等。分辦太原等局。著鄭敦謹督同晉省司道暨各該委員等。認真勸辦。以濟餉需。至陝省分設廣東捐局。經劉典現派降調道員李義鈞等前往會辦。著卽知會廣東督撫。飭令臬司梅啟照等。會同妥辦。將此各諭令知之。○又諭成祿奏。北路潰勇。殲除淨盡。南山肅清。現合諸軍攻取肅城一摺。據稱仁字軍潰衆盤踞金塔附近之舊寺墩等處。僭立偽號。經

該提督飭令楊占鼐率隊圍攻。擒獲逆首喬鍾嶽。餘黨悉就殲除。其南山一帶屯莊亦經馬天祥等次第攻拔等語。該提督正當乘此聲勢。懷遵疊次諭旨。振刷精神。激勵將士。勒限將肅城剋期收復。星速出關。以贖前愆。儻仍玩誤遷延。藉詞支飾。則是自取咎戾。國法具在。決不能再邀寬典也。楊占鼐業經調集各隊。行抵下河清滾營前進。卽著穆圖善傳知該員。迅速會合諸軍。立將肅城攻克。接替

軍務。毋許延宕。致該提督有所藉口。將此由五百里各諭令知之。○又諭麟興榮全奏。科布多竄賊退去。人心稍定。及酌練本城兵丁。錫綸奏。難民叛形日張。蒙兵不能用命。會商仍復舊制。各一摺。布倫托海滋事兵民。聞棍噶扎勒參起兵。追剿之信。俱往青格里一帶。科城現屬安謐。惟據錫綸奏。叛民張恩等在土爾扈特肆擾。後西竄烏龍古河。該處與博塔山等境相連。設難眾南竄。勾結避難民人。

再行北擾。則烏科大局。何堪設想。現在該難民多掠馳馬。其意尚圖遠竄。正宜糾集蒙兵及早進剿。著麟興榮全。錦丕勒多爾濟奎昌。福濟。明瑤。錫綸。審賊所向。就現有兵力。分投攔擊。並知會棍噶扎勒參。及土爾扈特。相機兜剿。不得以逆蹤稍遠。輒形疏懈。其在廠之男婦老幼。並著麟興等。選派幹員。妥為開導。將所掠之馬匹軍火等項。並令趕緊交出。福濟。錫綸。係查辦此事之人。固不可稍形決裂。

亦不可一意遷就。致滋貽誤。李雲麟被參各情。仍著福濟等懷遵前旨。切實查明覆奏。毋稍徇隱。烏里雅蘇台戍守額兵。即著照麟興等所擬。分別調練。惟不得虛應故事。徒費餉需。錫綸奏。子蘇木蒙兵不能用命。請仍復舊制。以期勦辦得力等語。著即會同奎昌。福濟。明瑞。將改復塔城舊制事宜。先行妥籌。一面曉諭該蒙兵。隨同棍噶扎勒參跟蹤進剿。以靖邊氛。錫綸摺一件。已交原派會議王大臣

等妥議具奏矣。將此由五百里各諭令知之。○予故署綏遠城將軍貝子德勒克多爾濟祭葬。謚成勤。○予甘肅肅州等處陣亡參將黃達源等祭葬。世職加等。○壬寅諭內閣。湖北學政張之洞奏。府州縣試錄送過濫。請申明舊例。以定限制等語。向來府州縣錄送文章。荒謬不通至五十卷以上者。參處立法。本嚴。自軍興以來。被兵省分。士子播遷流離。備嘗艱苦。是以於考試時。每寬其科條。廣其登

進。藉以培養士氣。茲據該學政所奏。近來府州縣積習相沿。於考試文章。全行錄送。並不遺漏一人。以致院試時。每有塗寫雜字。並鈔寫他題成文。以及槍冒傳遞懷挾等弊。層見疊出。於士習文風。大有關繫。此等惡習。他省諒亦不免。著各該省學政嚴飭各府州縣。遇考試文章時。查照舊例。認真刪汰。錄送不准過濫。其實有事。故正場後。始經趕到者。定期於院試將近。彙齊補考一次。認真局試。荒謬

不通者。屏絕不錄。並嚴禁搭冊等弊。其有藉考試為名。希圖滋事聚眾擾害者。並著地方官嚴拿懲辦。以正士習。而絕弊端。將此通諭知之。○又諭。湖北學政張之洞奏。各省捐輸。加廣學額。請覈實辦理。並請變通廣額章程等語。軍興以來。各省捐輸團練經費。均准加廣學額。原於鼓勵人心之中。寓嘉惠士林之意。若如該學政所奏。近來各省開辦捐數。動多浮冒。以致各州縣廣額過多。其中根柢淺

薄文藝。疏者。濫竿充數。殊非朝廷培植人才之意。嗣後各直省督撫。於所屬捐輸團練經費。務須查明實用實銷之處。切實覈減。方准奏請加廣學額。不得任聽籠統開報。致滋流弊。並著該部將原定捐輸廣額章程。量為變通。與御史范熙溥摺。一併妥議具奏。尋奏現在各府廳州縣。除原額及永遠定額照數取進外。所加一次廣額。擬請比照恩詔加額之例。大學七名。中學五名。小學三名。以示限制。

制。所有餘額。分屆遞廣。其實在人數不敷及文少通順者。仍責成學臣任缺無濫。至御史范熙溥所稱。明定數人取進一名。殊多窒礙。請無庸議。從之。○諭軍機大臣等。文麟景廉奏。修築營寨。堵擊出關回匪。並委員沿途被劫等情。各摺片。哈密地方緊要。亟須大員帶兵前往鎮守。疊經諭令文麟等迅赴該城。該辦事大臣等稽遲日久。又藉口於城垣坍塌。欲於哈密附近蔡巴什湖一帶。安設營寨。另

圖修築。其畏難苟安之心。已可概見。著文麟。景廉懷遵前諭。即行督隊先後馳赴哈密。暫駐蔡巴什湖一帶。將哈密城垣趕緊擇要修墊。為振奮堅守之計。不得苟且粉飾。致懈眾心。自干咎戾。肅州逆匪屢次出關。竄擾玉安所屬地方。經文麟等派兵擊退。仍須加意嚴防。不可稍形鬆懈。並著成祿會同楊占鰲。速行攻拔肅城。不准再事遷延。任令該逆到處滋蔓。安玉等處打仗陣亡。並出力弁勇。及捐

辦軍餉各員名。均著文麟等查明稟奏。請獎。卹都司龍騰光。由關外起程。前赴歸化城。迎提山西餉銀。行至毛目地方。為該處變勇擄劫行李。並將公文護照一併擄去。龍騰光亦被變勇擁入堡內。前據成祿奏稱。肅州城外變勇業已殲戮殆盡。何以毛目地方尚有分股肆掠。著即趕緊派兵接剿。並將龍騰光下落查明。其被擄公文護照。恐為變勇執持。前赴歸化城冒領軍餉。著鄭敦謹往成。詳細

查明並著將此項餉銀五萬兩。迅派妥幹弁兵解赴文麟。景麟軍營交納。以應急需。將此由五百里各諭令知之。○以四川官軍援勦貴州賊匪出力。賞總兵官黃一澄。副將張占鼐。參將鄧鴻超。謝鴻章。已圖魯名。統同知王繼祖。都司潘壽麟等。花翎知縣顧汝萼等。藍翎。餘加銜升敘有差。○癸卯。諭內閣。前因捻逆蕩平。賞給英翰太子少保銜。並照一等軍功議敘。茲據英翰奏稱。勞績毫無不敢貪竊

恩寵。設居憂冒賞。負疚更深。籲懇撤銷獎勵。情詞極為懇摯。惟墨經從戎。載於古訓。論功行賞。朝廷具有常經。該署撫毋許固辭。以副委任。○諭軍機大臣等。李鶴年奏榮工口門刷寬。估計籌堵一摺。覽奏曷勝焦急。前據蘇廷魁。李鶴年先後奏報漫口情形。聲稱口門尚未刷寬。方期趕緊堵築。易於歲事。乃現在榮工口門已刷寬二百餘丈。若任其潰溢。將來逐漸塌卸。勢將何所底止。著蘇廷魁。李鶴

年嚴飭道廳。及在工各員弁。趕緊盤築兩壩裏頭。毋令再行衝刷。俟霜清水落。即行設法堵合。此次裏頭工程。正在急需。著准其先在司庫撥湊。以濟要工。將來舉辦大工。再行奏請籌撥餉需。惟須嚴飭在工員弁等各矢天良。務當涓滴歸公。不准絲毫糜費。並將下游各工。力保平穩。南北兩岸附近各州縣。即飭其廣購料物。刻速運工。以備應用。榮澤鄭州中弁祥符尉氏扶溝一帶被災處所。著李鶴

年遵奉前旨。妥為周恤。並飛咨下游江皖各省。查照辦理。毋令一夫失所。是為至要。將此由五百里各諭令知之。○又諭庫克吉泰。劉典奏勦辦回逆獲勝。並籌防東甯情形一摺。回逆大股。由中部竄至洛東。擾及白水等縣各村鎮。並攻撲郃陽縣城池。經官軍分路勦擊。大獲勝仗。該逆連受大挫。圖回老巢。復經官軍分路堵勦。於蒲城三原富平等處。斬馘甚多。並於同官耀州各境內。疊獲勝仗。其統

竄涇陽等縣。並續竄宜君中部之賊。均經官軍先後分剿。連次獲勝。此次賊股萬餘。竄擾腹地各州縣。並有續竄宜君等處另股。前來救援。均經官軍擊敗。逃回者僅二千餘人。勦辦尚屬出力。著庫克吉泰、劉勳查明酌量彙案請獎。現在賊匪雖已敗遁。難保不迭而復來。仍著嚴飭各將士實力堵剿。毋令復行竄擾。魏光燾一軍。既經劉勳飭令休息。店頭隆坊之賊。亦須添兵會剿。卽著飭令成定康先行馳赴中部。會同周紹濂相機勦辦。將此由五百里各諭令知之。○西安將軍庫克吉泰等奏。記名提督劉厚基等軍疊次勦賊獲勝。並解清湖縣城圍。得旨著卽檄令各處防兵。將山北各股匪相機勦辦。迅掃逆氛。又奏。總兵官劉聲集等軍攻勦黨家岔等處賊匪。疊獲勝仗。批。仍著飭令劉聲集等。迅將此股賊匪盡數殲除。毋任延蔓。○以兵部右侍郎伊精阿兼署戶部右侍郎管錢法堂事。○予安

徽巢縣等處陣亡外委張鳳翔等七十五員祭葬世職加等。○予山東崔平等處陣亡都司戚才林等三十二員祭葬世職加等。○予陝西中部等處陣亡副將陳清彥等三十六員祭葬世職加等。○甲辰諭軍機大臣等。崇實奏。川師克復甕安縣城。疊破賊巢。生擒首逆。現進規尚大坪一摺。貴州自甕安縣城失陷後。玉華驕頂諸山。均為賊匪巢穴。勢甚猖獗。經唐炯督率同知鄧錡。總兵劉鶴齡等軍。

由袁家渡龍院江界河三路。渡江前進。克復甕安縣城。並將玉華山大小驕頂山賊巢焚毀淨盡。逆首何雙富。王超凡等均擒拏正法。聞甕餘慶各境。一律肅清。惟尚大坪賊巢尚未攻破。現已督軍進規。該處為開州平越通途。地方緊要。仍著崇實飭令唐炯。乘此聲勢。激勵各軍。先將尚大坪老巢規復。並會同黔楚各軍。將下游苗教各匪節節掃蕩。以靖黔疆。將此由五百里諭令知之。○山西布政使

劉秉璋因病解職。以河南按察使胡大任為山西布政使。浙江杭嘉湖道譚鍾麟為河南按察使。以四川官軍克復貴州。覓安縣城。並臺破賊巢。予知府唐炯以道員用。總兵官劉鶴齡以提督簡放。知縣劉鴻齡以知州用。並賞花翎。府經歷趙彝憑藍翎。投誠賊目向秉忠等擢用有差。

大清穆宗繼天開運受中居正保大定功聖智誠孝信敏恭寬毅皇帝實錄卷之二百三十九

大清穆宗繼天開運受中居正保大定功聖智誠孝信敏恭寬毅皇帝實錄卷之二百四十

敕修

同治七年戊辰八月乙巳朔

上詣綏履殿問

慈安皇太后安平安室問

慈禧皇太后安至甲戌皆如之。諭內閣前日據御史德泰奏請修理園庭以復舊制。並稱內務府庫守貴祥有擬就章程五條。既不動用庫款。又可代濟民生。條理得宜。安置有法。各等語。當諭軍機大臣將德泰代遞貴祥所擬章程呈覽。詳加披閱。荒謬離奇。實出情理之外。當此軍務未平。民生困苦。流離朝廷方

欲加意撫恤乃該庫守則請於京外各地方按戶按畝按村鱗次收捐如此擾害閭閻尚復成何政體前明加餉派餉以致民怨沸騰國事不可復問我

列祖

列宗屢次引為殷鑒中外大小臣工詎不深知況御史為言事之官其於國計民生有礙者正當力陳其弊藉資補救不意德泰所陳顯違

列聖之彝訓反欲朝廷剝削小民動搖邦本並以貴祥所擬章程為可取且云於國計民生兩有裨益喪心病狂莫此為甚德泰著即革職庫守貴祥以微末之員輒敢妄有條陳希圖漁利著即革去庫守發往黑龍江給披甲人為奴以為券言亂政者戒諭軍機大臣等臺灣地方關繫最為緊要道員吳大廷前因患病內渡經沈葆楨留於船政局差委即著英桂等飭令迅回本任以重職守總兵劉

明燈能否勝任並著英桂卞寶第留心察訪如不稱職即行據實奏毋得稍涉瞻徇致滋貽誤將此由五百里各諭令知之復以鄧廷枏為福建布政使以儘先副將黃聯開為福建海壇鎮總兵官以直隸永定河隄工漫溢署總督官文下部議處革道員蔣春元同知余汝偕州同何承祐守備尹光彩職分別留任留工旌表守正捐軀四川閬中縣民黃萬溶妻楊氏○

上以祭

社稷壇自是日始齋戒三日丁未祭

先師孔子遣協辦大學士刑部尚書瑞常行禮諭軍機大臣等都察院奏廣東新甯縣貢生趙德等違控告趙安赴該衙門呈訴割地瞞奏等情此案廣東曹冲客匪與土民互鬪滋事前經將益澧督兵勦辦並據瑞麟蔣益澧疊次奏陳將田頭等處田廬悉歸客民其客遺之冲萑等處田廬概屬土民均令作

為世業彼此不得再起爭端現據該貢生趙德等復以未回故土等詞來京呈訴並稱該寨匪徒有挖墳墓及搶劫附近各鄉擄掠婦女等情著瑞麟李福泰秉公查明前次土客分界事宜有無窒礙妥為覈辦其所控匪徒掘墓及搶擄各情如果實有其事卽著將該匪徒嚴行緝拏務獲懲辦不可姑息養奸趙德等原呈著鈔給閱看將此各諭令知之○又諭鄭敦謹奏請調得力官兵赴榆林進

勦等語陝省榆林綏德等屬回土各匪出沒靡常久成蔓延之勢該處毗連晉境與河保等州縣僅隔一河且距歸化薩托清等處不遠晉省北路防務喫重兵力較單前據鄭敦謹屢經陳請另派一軍由晉渡河扼守榆林相機進勦適值直東交界未平兵力未能抽撥現在左宗棠所部業已凱旋移征陝省前據該大臣奏稱令劉松山等所部由豫境前赴陝省此時行抵何處著該大臣酌度情形

如該軍尚未出豫境卽著抽派得力將弁檄令改道折由晉境沿河北趨由河保一帶渡河西向榆林節節進勦以扼賊匪東竄如該軍已經入陝卽著飭令由陝省沿河北趨繞向榆林與陝省南路各軍互收夾擊之效兼可以顧晉省門戶鄭敦謹現既馳赴河保著卽督飭在防將士實力防守並著會商綏遠城將軍定安副都統桂成暨總兵馬陞等督率文武員弁設法堵禦毋稍疏懈另片奏請

飭接任臬司迅速赴晉並陳湜因病請假赴省等語前據劉崑奏稱蔣益澧因病懇請開缺已有旨再行賞假兩月毋庸開缺矣所有臬司印篆著鄭敦謹派員署理已革臬司陳湜係獲咎之員何得乞假赴省置身事外著該署撫卽飭令該革員仍赴防所督軍守禦力贖前愆勉圖自效將此由六百里各諭令知之○戊申祭

大社

大稷遣禮親王世鐸恭代行禮 諭軍機大臣等崇實奏川師援黔攻克尚大坪生擒首逆餘賊勦撫淨盡一摺唐炯入黔後節節掃蕩竟將積年難拔之尚大坪攻克生擒倡亂之教首劉儀順號匪秦崽餘匪勦撫淨盡辦理甚為得手著崇實仍飭該員等乘勝會同黔楚各軍進規平越黃平等處務期一鼓殲除以清餘孽總兵劉鶴齡等曉暢戎機已交軍機處分別存記將此由五百里諭令知之

禮部右侍郎杜聯因病解職以都察院左副都御史溫葆深為禮部右侍郎 以直隸天津防勦擒匪出力賞總兵官陳濟清王佐臣二品封典道員李世侃都司石寶琳等花翎鹽大使許之泰等藍翎餘加銜升敘開復有差 以直隸天津管駕輪船巡防出力予同知沈應奎等加銜開復有差 以捐運甘肅口糧予陝西知州湯敏等加銜升敘有差 以四川官軍攻克貴州尚大坪賊巢生擒

逆首署總督崇實得旨嘉獎賞總兵官劉鶴齡黃馬褂道員唐炯巴圖魯名號縣丞于德楷以同知用並賞花翎餘升敘有差投誠賊目劉俊民等分別以都司守備補用 予甘肅松樹莊溝等處陣亡遊擊李三元等祭葬世職加等 已酉諭軍機大臣等英翰奏皖軍渡黃陳國瑞所部一併帶回皖省請飭劉銘傳扼紮畿南各摺片皖省各軍現已一律渡黃即著該署撫於南旋後悉心籌畫妥為

遣撤陳國瑞所部勇丁現既分隸程文炳等隊下將來應如何遣散之處英翰尤當妥為辦理毋令滋生事端東昌一帶各營散勇每起或三四十人或四五十人時有攜帶軍器搶劫滋事之案皖軍渡河時曾遇數起經英翰派員彈壓酌給錢文追繳器械押令過河回籍黃河北岸地方縣互恐此等散勇尚復不少著官文丁寶楨遴委妥員會同各該地方官稽查彈壓尤不可顧惜小費致令流而

為匪擾害地方恩承當督飭所部沿途按查協同辦理前諭李鴻章飭令劉銘傳將在營兵勇移撤大河以南現在該提督所部行抵何處應否飭令扼紮畿南以資鎮撫之處著李鴻章統籌全局迅速具奏將此由五百里各諭令知之又諭吳坤修奏請飭江西等省停解皖軍協餉仍飭湖南迅速籌解等語前諭江西閩浙三省每月協濟皖軍餉銀各一萬兩現在該軍陸續凱撤所有該三省協

餉除已經報解俟兌收清楚由吳坤修截數具奏外嗣後該三省即將協餉停解俾免轉運之煩惟皖軍未能盡撤尚需支發口糧湖南省自奉停皖捐部定每月由湘撥銀五千兩至今分釐未解著劉崐仍按月如數籌撥以資接濟俟該軍全數遣撤再行奏請停止將此由五百里諭知英桂卞寶第李瀚章劉坤一劉崐並傳諭吳坤修知之又諭前因錫綸奏布倫托海難民叛形日張十蘇木蒙

兵不能用命請仍復塔城舊制當經諭令原派會議王大臣等妥議具奏茲據該王大臣等奏稱李雲麟自到布倫托海以來種種辦理不善現據錫綸咨行明瑤劉飭該總管等傳諭該蘇木人眾仍復塔城舊制以安眾心請飭明瑤錫綸等妥為經理具額設餉精並請照舊定之數源源籌撥所有應行變通事宜仍由明瑤錫綸等隨時體察請旨定奪等語布倫托海新城猝遭變亂是李雲麟所改

章程與民不便之處已可概見自應改復舊制以洽輿情即著明瑤錫綸等懍遵前旨悉心籌辦但不可稍存遷就貽誤將來張懸等乘機搆亂罪不容誅惟此股人數究有若干現在竄至何處抑仍在烏龍古河著麟興榮全錦丕勒多爾濟奎昌福濟明瑤錫綸迅飭在事將士偵探明確相機兜擊並檄令巴彥特古斯等督率蒙兵隨同棍噶扎勒參會合上爾扈特各旗兵跟蹤追剿以期痛殲醜類

綏靖邊疆其額設餉精卽照該王大臣等所議由該大臣等遵照舊定之數源源接濟毋令稍形缺乏該城係屬新設一切事宜如有隨時變通之處明瑤錫綸等務當加意體察奏明辦理李雲麟貽誤各情仍着福濟錫綸詳細查明據實具奏原摺均着鈔給閱看將此由五百里各諭令知之○又諭據總理各國事務衙門奏請簡放上海通商大臣已明降諭旨令馬新貽充補矣馬新貽新任兩江

總督丁日昌久在上海於外國情形更為熟悉遇有緊要事件着卽幫同辦理將此各諭令知之○令兩江總督馬新貽充辦理通商事務大臣○予山東德州陣亡千總姬文富祭葬世職加等○緩徵廣東鎮平縣被擾地方同治五年額賦庚戌遣官祭

文昌帝君廟○欽差大臣左宗棠奏分別撤留吉林黑龍江兵勇得旨均著照所議辦理惟增募民勇是否可用仍着該大臣隨時體

察儻實在不能得力卽行撤回斷不可意存遷就致誤戎機○命候補五品京堂王家璧以四品京堂卽補仍留欽差大臣左宗棠軍營差委以廣東豐順縣紳民力保危城永廣學額二名以陝西官軍防勒回匪並援勒直隸擒匪出力賞提督宋朝如隋君廷喻執益周雲祥蘇大德洪必勝賀能超張映南鄧成日席大成孫桂亭唐國華張永輝彭長春章在作熊有常張福陞彭緒圻王秀林總

兵官李占椿譚上連曾松明陳鳳源何永威龐玉林劉文有葛芝藤袁彥賢劉祥發尹興茂張仲春方泗高陳江山屈德復朱宗庠王久青周勝才彭廣源李光輝曾奉元舒克相曹才祿尹松友李政洪章洪勝王楚華李榮富楊欽元龍國望胡萬亨唐年泰曾金和副將高登玉湯彥和曾定元楊懋霖譚拔萃章其作彭華堂鍾建高湛其英一品封典道員薛書常等二品封典提督章合才易德麟蕭

章開陶定昇唐光輝李雲貴何作霖黃馬褂
總兵官易萬勝張四維劉桂森陳美仙易隆
清張南桂文友勝黎勤發胡新發韓尚吉彭
得勝康登五張執中董占品道員劉錦棠副
將彭煥彰譚世義李其森謝太泗潘長青羅
茂義陽中和文德昌楊茂榮楊春林楊明英
易作義曾楚南曾萬友鍾紫山雷吉祥武日
勝成鏡春彭必勝易文光李心海馮殿英張
傳典參將何友田王克勝舒永勝劉文海李

桂香金德恆黃萬福李雲照張拔萃黃大勝
胡文祥夏仲美鄧國振鍾宣晉陳仕標譚和
義羅照陞譚貴忠朱長發李春元彭明達胡
敬忠張忠發李先榮劉定清賀復泰鍾福山
李勝本龍賜玲何明海周春生晏曦俊彭榮
貴謝明華張春發朱德和王遠清王榮華熊
得佑周煥文羅三元李義勝蔣永和楊恆祥
黃友信唐義海張嘉會曹太高龍自良李占
魁高得勝遊擊王慶藩鄧漢南錢寶鍾李清

勝謝玉泰賀華照楊發勝陳金凱李泗益張
祖耀黃仁祥邱俊鳳文道燦李聲翰楊德俊
李文奎郭得林劉春祥都司萬金龍董布亮
守備劉錦錫郭宗儀高登彩巴圖魯名號參
將沈福堂等花翎守備范金貴等藍翎餘加
銜升敘開復有差○予直隸景州等處陣亡
副將李得謙等祭葬世職○辛亥秋分夕
月於西郊遣鄭親王承志恭代行禮○諭軍機
大臣等奕榕等奏草倉河被水衝刷飄失鹿

角志和奏草倉蘇子等河淤徙情形各一摺
據奕榕等奏稱

永陵明堂前新修草倉河因山水陡發衝刷淤
墊併歸蘇子河向南順流而下泊岸西頭衝
刷寬深護隄樹株衝倒並原設鹿角及橋板
欄杆均被衝失甚多石隄倒落二處御路衝
斷成阡等情

陵寢重地風水攸關奕榕奕慶現已親詣查看
著卽詳細履勘應如何速為修理之處卽著

奏明辦理至草倉河曾於咸豐六年間由慶
祺奏明改歸舊道八年復由王明詳勘具奏
辦理現被水衝沙淤併歸蘇子河向南順流
並據志和奏稱蘇子河身亦有北移情形著
奕榕奕慶一併敬謹察勘查照舊案奏明覈
實興修

啟運殿後神榆樹身所發枝條甚見茂密著奕
榕飭令總管常存等敬謹看護妥為培養興
京附近一帶民間田廬有無被水應行撫恤

之處並著奕榕額勒和布恩錫查明具奏將
此各諭令知之○以庸劣不職革江蘇布政
司理問羅炳堃職永不敘用○追予江蘇各
屬陣亡殉難紳民章啟等暨婦女一千八百
八十九名口分別旌卹如例○予山西吉州
等處陣亡殉難都司傅桂山等七十五員名
分別賞卹如例○追予山西垣曲殉難知縣
王國寶都司劉國治典史王單建立專祠○
壬子諭內閣前因捻逆張總愚竄擾直隸等

省小民耕種失時流離困苦軫念良深諭令
各督撫查明被擾輕重情形分別奏請蠲緩
錢糧以示普沛恩膏因思捻逆肆擾湖北河
南安徽江蘇山東等省歷十餘年吾民蕩析
離居轉徙顛沛殊堪憫惻今幸次第蕩平自
應一體施恩俾小民得免追呼之苦所有被
擾最重之安徽鳳陽潁州泗州江蘇徐州海
州山東曹州濟南青州沂州河南開封歸德
陳州許州汝州光州湖北黃州德安所屬各

州縣同治六年以前錢糧除業經蠲免外其
實欠在民者均著概予豁免此係朝廷曠蕩
之仁該督撫等即當督飭所屬州縣認真稽
覈不得以完作欠致滋弊混並著刊刻謄黃
徧行曉諭務使實惠均霑毋任吏胥舞弊其
餘被擾較輕各屬並著各該督撫查明分別
奏明請免舊欠錢糧以副朝廷軫念災區至
意○又諭李鴻章奏請將在營出力之京員
量予超擢等語據稱刑部候補主事倪文蔚

前在湖北隨同官文出省防勦嗣經李鴻章調赴軍營始終兵事未進一階頗為廉讓可風倪文蔚著加恩以該部郎中遇缺卽補○諭軍機大臣等御史吳鼎元奏捻匪業已肅清仍宜杜絕根株繕遞章程八條並請飭各省督撫將裁撤釐金分局日期張貼曉諭各摺片山東安徽河南各毗連府州縣地方為捻匪出沒之所向時湖北之雲夢安陸等處時有捻子潛往搶劫江蘇徐沛一帶民俗亦

屬强悍現在捻逆已平亟應正本清源使斯民同遷於善咸與維新該御史所奏八條自係為易俗移風起見著各該督撫等體察情形按照該御史所擬章程次第籌辦毋使萌孽潛滋復貽後患至各省裁撤釐金分局原以體恤民艱若如該御史所奏是局員局紳等罔利營私病民尤甚並著各該督撫等一面將所撤釐局若干處據實奏聞一面通飭各屬卽將所撤釐局日期刊示頒發並省會

總局及分局所隸地方一律張示如各州縣等有違示濫收情弊卽著分別叅辦以蘇民困原摺片均著鈔給閱看將此諭知曾國藩李鴻章馬新貽郭柏蔭丁日昌英翰丁寶楨李鶴年並傳諭吳坤修何璟知之○又諭李鴻章奏請將索餉滋事之防禦撤委並催豫省籌補吉林等處馬隊欠餉等語副都統善慶所部吉林黑龍江馬隊係由豫省調防向由豫省撥餉業經李鴻章咨明李鶴年迅籌

撥解乃該營營總防禦雙玉輒以餉欠過多盡惑眾兵肆言訛索實屬謬妄雙玉著卽撤委以示懲儆其所遺委營總一缺准以富凌阿補授至善慶統帶馬隊奉旨回京聽候調撥已報起程所有豫省欠撥月餉卽著李鶴年迅速照數籌補委員徑解神機營以供支放毋稍玩延將此各諭令知之○以山東濟陽勦捻出力賞遊擊王光龍等花翎守備韓立本藍翎餘加銜升敘有差○撥部庫銀二

萬兩交綏遠城轉解科布侈備用○癸丑

太宗文皇帝忌辰遣官祭

昭陵以神靈顯應加直隸唐山縣

城隍神封號曰昭應○諭軍機大臣等官文奏請將防勦出力文武大員獎勵各摺片此次擒匪竄擾直境道員劉策先今春派赴易州到防頗為迅速尚屬能知緩急總兵劉祺防勦亦尚得力該二員均照所請給獎藩司盧定勳等前已有旨開復失守所屬州縣處

分並其餘各員中所保過優均經酌改以昭平允唐訓方准其回籍省墓其所部各營暨保定練軍著官文另派受員管帶道員余承恩等前所開復處分時已諭令不准再保所請鼓勵之處著毋庸議此外勦擒員弁於勦辦梟匪案內已經保獎者著該署督仍遵前旨不得再行瀆請將此諭令知之○又諭庫克吉泰劉典奏陝甘各軍勦賊疊勝董志原回逆仍圖竄陝一摺涇河北岸賊匪竄至長

武縣境經雷正綰督令陳義等率隊追擊斬獲甚多提督劉厚基所部復於解清澗城圍後疊獲勝仗賊向老君殿一帶竄走其竄洛川宜君等處之賊亦經高連陞劉端冕兩軍擊敗此時賊勢雖衰而大股仍踞正甯北原崔三一股逼近隴州北路土匪廣聚安定保安蔓延懷遠綏榆一帶防務尚未可鬆仍著庫克吉泰劉典檄飭高連陞等督率所部會合雷正綰一軍前截後追將董志原逆股痛

加勦洗毋任四出飽掠並一面嚴飭知州成定康迅赴綏德與榆林鎮兵聯絡聲勢加意嚴防不准稍涉疏懈將此由五百里各諭令知之西安將軍庫克吉泰等奏土匪梟彰自赴延安求撫得旨著嚴飭劉厚基等妥籌辦理不可稍涉大意廣東南韶連鎮總兵官卓興因病解職以記名總兵官方耀為廣東南韶連鎮總兵官以直隸省城防守出力予前任布政使唐訓方布政使盧定勳按

察使張樹聲優敘賞總兵官劉祺道員歐陽正墉邑圖魯名號餘加銜升敘開復有差○以安徽湖北等省歷年勒匪暨水師團練籌餉轉運出力賞提督吳長慶總兵官衛汝貴丁全勝彭述清吳從發李永元副將許先傳李正芳馮作霖一品封典提督王占魁張棟材李洪壽袁發總兵官熊兆周吳從發吳殿元龍藻琦姚禮士馬德順李新燕趙榮亮黃得勝劉長慶副將王鍾麟徐萬成王芝生賈

起勝石精明汪隆元李勝鄧榮佳劉安泰雷玉春雷顯揚萬重暄金慶元郭得山梁永福楊紹勛張賢貴簡福升宋興元朱占魁周盛朝張正久潘永長滕國春李占得劉松林曾懷仁潘永久王占魁楊祺李有勝虞朝綱余連陞董學友梁彥河彭必勝薛金榜李金彪周東萬蔣全勝劉有忠王得勝徐耀廷韓定湘羅友貴杜萬和郭松盛黃振鼈王佐朝蕭心廣張志勝鄭采華鄧元魁參將邱錦龍林

長清余德昌黃斌尹長林唐榮陞陳敘寅杜長生吳輔仁孫顯寅程廣和馮義德李國珠桂林香周盛鼎蕭韶榮向日傾孔士高周鵬飛張耀南楊成能李紹銘左承福唐秉鈞曾德麟陳文和周啟茂蕭宗義遊擊李加典朱榮魁梅宏勝黃修發都司舒拜發吳西元陳錦標鄧顯廷胡鳴盛胡南升守備高占魁鄒相魁巴圖魯名號按察使李鴻喬參將張景星等花翎同知唐際昌等藍翎餘加銜升敘

開復有差 予甘肅長武陣亡都司張金學祭葬世職加等 追予江蘇蘇州殉難在籍府經歷林國楨祭葬世職 追予江蘇各屬陣亡殉難縣丞王炳修等紳民婦女一千九百四十九員名口分別旌卹如例 甲寅

上詣

奉先殿
壽皇殿行禮 諭軍機大臣等蘇廷魁李鶴年奏請撥款堵築榮工分流一摺黃河榮工漫

口隄岸塌寬二百十丈之多現經蘇廷魁等督率工員搶鑲兩壩裏頭雖已完竣而口門寬廣正河溜勢恐其併歸分流處所南趨該署河督等現擬於外口估築欄溝大壩以閉其氣俟壩基增培完竣即於兩壩先行進占為收窄合龍地步著即趕緊籌辦所需工料銀九十萬兩現當應用緊急之時著戶部先行撥發庫銀四十萬兩由順天府派員迅速解赴工次以便剋日興工其餘銀五十萬兩

即由戶部續撥有著之款以資接濟蘇廷魁等務當撙節動支不得任聽工員浮冒開銷致涉虛糜所稱此項用款俟截數後於各省支發各項內每百兩扣除二兩以資歸款之處著戶部酌議具奏將此諭知戶部並由五百里諭令蘇廷魁李鶴年知之○乙卯

太祖高皇帝忌辰遣官祭

福陵○諭軍機大臣等曾國藩奏豫籌撤勇經費一摺據稱捻股蕩平李鴻章所部各軍亟

應趕緊裁撤蘇省歷年供支該營軍餉業已不遺餘力目前撤勇經費需款較鉅一時無從籌畫請借撥浙江江西湖北三省銀兩以應急用等語刻下捻匪既平裁撤勇丁一事最關緊要自應寬籌經費妥速辦理江蘇用款繁多庫儲支絀係屬實在情形著李瀚章劉坤一於浙江江西各借撥銀二十萬兩郭柏蔭何璟於湖北借撥銀十萬兩解交曾國藩為遣撤湘淮各軍之用並照所議仍由蘇

省於四箇月後陸續歸款浙江之款由淞滬釐局解還江西之款由西鹽督銷局解還湖北之款由鄂鹽督銷局解還以清款項其本年閏四月所借浙江銀十萬兩既據曾國藩奏稱無力籌還即著作為協蘇之款由浙江歸入軍需報銷以清輾轉將此由五百里諭知曾國藩郭柏蔭李瀚章劉坤一並傳諭何璟知之○命都察院左都御史毛昶熙前往奉天省城估修賢王祠工程○以京畿防守

出力賞還侍郎恩承黃馬褂賞副都統榮祿
玉亮頭品頂帶翰林院侍講學士常恩侍衛
同吉等花翎員外郎耀年等藍翎餘加銜升
敘有差 追予江南歷次陣亡傷亡參將曾
思厚等四十三員祭葬世職加等 予河南
各屬陣亡殉難紳民婦女二千四百七十二
名口分別旌卹如例 丙辰遣官祭黑龍潭
昭靈沛澤龍王之神玉泉山
惠濟慈佑靈護龍王之神昆明湖

安佑普濟沛澤廣生龍王之神密雲縣白龍
潭

昭靈廣濟普澤龍王之神 遣官祭圓明園
惠濟祠

河神廟 諭內閣李鶴年奏甄別庸劣不職
各員請分別懲辦一摺河南內鄉縣知縣戴
作乂嵩縣知縣胡燕清人地未宜難期整頓
均著撤省俟有相當缺出另行酌補候補知
縣方鏞氣質輕浮著以府經歷縣丞歸部銓

選候補直隸州知州莊定安性喜鑽營不知
檢束閱鄉縣縣丞方國清性情浮躁任意妄
為均著即行革職 諭軍機大臣等李鴻章
奏各軍陸續凱撤遵飭銘軍暫紮張秋兼顧
畿南一摺劉銘傳一軍應否飭紮畿南前經
諭令李鴻章統籌全局具奏茲據奏稱直省
兵燹以後再調大支客軍移紮近畿居民轉
相驚疑現擬令該軍暫紮張秋迤北與大名
河間等境相近尚可兼顧畿南糧餉接濟亦
便等語該軍久在東省兵民相安自應令其
暫紮張秋以資彈壓著即檄令該提督嚴飭
劉盛藻將該軍汰弱留強妥為鈐束並隨時
稽查游勇以靖地方德州一帶並著飭令吳
長慶督率各營毋稍滋擾昨據曾國藩奏豫
籌撤勇經費已諭知李瀚章劉坤一於浙江
江西各借撥銀二十萬兩郭柏蔭何璟於湖
北借撥銀十萬兩此時遣撤湘淮各軍事關
緊要著曾國藩遵奉前旨咨催各該省督撫

按照所撥數目趕緊解交江甯以便彙齊餉項將撤勇事宜早為辦理李鴻章另片奏曲阜
孔廟宜及時修葺請飭兩江湖廣總督各籌銀二萬兩彙解山東並由山東巡撫在本省籌銀二萬兩派員興修等語即著曾國藩郭柏蔭於該省撤軍就緒後各速籌銀二萬兩解赴東省並著丁寶楨在該省籌銀二萬兩遴派委員謹將

大成殿九間檐宇及坍塌各工擇要興修以昭誠敬將此由五百里各諭令知之○又諭左宗棠奏遵籌布置情形一摺晉防自歸化薩托清等處由北而南一千六七百里秦軍進剿勢難久駐河岸回土各匪現既蔓延北山一帶路徑紛雜難保無漏逸餘匪乘虛東犯所有晉省北路防務鄭敦謹當會商定安桂成悉心籌畫河保巡南沿河各邑防堵該署撫亦應督飭帶兵各員弁嚴密布置如須

調兵募勇務於冰橋未成之先趕緊籌辦毋得專恃鄰軍援剿坐失機宜晉省防務秦師固難專任而於一切布置機宜左宗棠仍當全局統籌力扼賊匪毋使東竄如有大股賊匪偏近晉邊仍應迅撥兵勇入晉會剿以保完區該大臣無論從何路入陝總以兵由東進偏賊西趨最為要著秦回日肆猖獗亟須添撥勁旅協同剿洗劉松山郭運昌等營即著左宗棠檄令趕緊訓練俾迅速成軍尅期

西進掃蕩逆氛將此諭知左宗棠並由五百里諭令鄭敦謹定安桂成知之○以故豫慎親王義道子本格襲爵○命欽差大臣陝甘總督左宗棠在紫禁城騎馬○以山東官軍克復直隸饒陽縣城出力賞副將雷揚一品封典副將宋興元肅紹榮參將馮義德巴圖魯名號遊擊汪玉山等花翎千總于得水等藍翎餘升敘開復有差○予四川越嶲等處陣亡殉難紳民鄧元鑑等暨婦女一千六百

二十一名口分別旌卹如例○追予四川新甯殉難知縣國澍於死事地方暨旗籍建立專祠典史耿鳳翔抱總何玉春國澍弟監生國富暨家丁等一併附祀○緩徵直隸霸州客永清三州縣被水地方新舊額賦暨旗租有差並減免差徭○蠲緩山東東阿臨清濟甯德冠魚臺鉅野博興八州縣暨德州濟甯臨清三衛被水被雹被擾地方新舊額賦雜課有差○丁巳遣官祭

關帝廟○以神靈顯應頒江蘇高郵州康澤侯廟扁額曰福綏臨澤○以江蘇江陰等處巡洋獲盜出力擢巡檢馬聲煥以知縣用賞遊擊張焜巴圖魯名號千總龔雲鵬等藍翎餘升敘有差○追予江蘇揚州陣亡殉難紳民孔昭熊等十二名分別賞卹暨從九品汪宗洛女旌表如例 戊午遣官祭昭忠祠○諭內閣此次恭送

皇考文宗顯皇帝

聖容

實錄

聖訓

玉牒

冊

寶前赴盛京除綠營官兵照舊例派出外前鋒統領前已派出察杭阿仍著酌派章京護軍校帶領護軍二十名由京城恭送至山海關再行回京並派盛京副都統清凱禮部侍郎

清安帶同該處派出官兵先期起程迎至山海關敬謹送至盛京以昭慎重都興阿等仍照舊例出郊跪接不必遠迎至派出乾清門侍衛一切應得之項著照大門侍衛一體給與護軍營官兵計日應得路費銀兩馬匹等項著照行圍官兵之例給與至此次隨往之官員兵丁夫役人等著世鐸德長察杭阿妥為約束毋許稍有擾累其按站住宿處所官員等如有令地方官豫備公館需索供應者

該王等據實奏並將該地方官一併叅處
事竣後並飭令同日進城毋許逗遛

冊

寶回京之日仍著德長沿途彈壓一體辦理以
昭嚴肅○又諭理藩院奏據科爾沁博多勒
噶台親王伯彥訥謨詰為庶祖母生母呈請
封典請飭部查明辦理一摺伯彥訥謨枯故
父僧格林沁自幼經額駙索特那木多布齊
之媵韓氏撫養賴以成立僧格林沁功勳卓

著為國捐軀前已疊沛恩施今韓氏年逾八
旬自應念其撫育之勤一體加恩著封為索
特那木多布齊之側室伯彥訥謨枯生母尼
魯特氏著一併加恩封為僧格林沁之側室
以遂孝思嗣後不得援以為例 諭軍機大
臣等前因滇省軍務緊要胡中和未能移師
入滇諭令崇實另籌一軍遙派得力將領帶
往援應茲據崇實奏稱現派道員劉嶽曙統
軍赴滇一摺劉嶽曙所部果後營後軍二千

八百名本係劉嶽昭舊部現經崇實派令由
黔西大定赴滇援應著即飭令迅速前進歸
劉嶽昭調遣應需軍火口糧仍由崇實源源
接濟黔省安平巖大五股匪即著崇實檄調
陳希祥統帶所部馳赴劉嶽曙駐防處所責
成勦辦滇省軍務正值喫緊之時省垣城圍
未解劉嶽昭帶兵入滇已及半載尚未進抵
省城疊據有人奏稱該督所部勇丁與岑毓
英所部練丁積不相能戰陣既多推諉又復

自相攻擊該督之屏梁士美効楊盛宗為全
滇騷動之由州縣相繼淪亡猶復以捷報掩
飾等語劉嶽昭自駐曲靖以來僅止派兵前
赴尋甸並未進援省城滇省情形自是先解
城圍力顧本根為急豈得遲迴觀望專以艱
鉅之事諉諸岑毓英一人該督身任兼圻責
無旁貸著即迅督所部馳抵省垣會剿應如
何布置籌畫並著詳細奏明所統勇丁尤當
約束嚴明不得任其與滇練私行爭鬪滇省

文武各官亦宜選擇賢能量材器使以收得人之效不可駕馭失宜致拂輿情一切奏報軍情尤應據實直陳不准粉飾欺隱自干咎戾毋謂該處距京遙遠朝廷竟無聞知也懍之慎之將此由五百里各諭令知之○又諭蘇鳳文奏鎮安官軍連克匪巢一摺逆首吳亞終屢被官軍擊敗遁入越南餘黨猶踞三台等巢恃險抗拒經該處團勇分投攻擊疊有斬擒連克三台安德等賊巢並將湖潤寨

另股賊匪擊敗勦辦尚為得手惟各股餘孽現均遁入越南與鎮郡相去非遙邊外游匪素多易於勾結而太平龍州所屬各土司處處接壤密邇賊蹤防勦均形喫重且吳亞終曾勾結越南弄匪攻擾洛陽九封等處並有欲襲下凍等處之說是賊情狡譎異常尤須及早盡數殲除方免延蔓覃遠璉已因病交卸兵事馮子材統帶各營責無旁貸所有太鎮軍情該提督均當妥籌兼顧著卽親督諸

軍剋期越境勦賊或分兵兩路夾攻或合軍專力進勦務須體察情形相機籌辦越南係屬外藩既有匪徒潛匿自當趕緊搜捕絕其根株免致別生枝節著蘇鳳文飭屬知照越南夷官查拏該處奸宄會同官軍悉力兜擊毋令該逆得以漏網並嚴飭地方文武員弁實力防堵以遏賊氛該撫等具隨時和衷商辦早清邊圉不得敷衍草率了事致貽亂萌將此由五百里各諭令知之○以陝西攻克

綏德州等城暨疊次勦匪出力賞提督劉厚基白玉搬指一箇白玉翎管一支大荷包一對小荷包二箇總兵官周金品長勝王其發陳集賢李大有一品封典總兵官余明發張大雄董玉春張鴻發黃毓觀彭祥勝吳禧德平福成趙嗣昌黃光才按察使張岳齡副將劉奉發黃有本陳光明陳高華劉甫田李瑞林夏奉朝李獻厚謝開貴郭翼祥尹德芳向先甲劉占克吳得勝參將張自申劉澤銘劉

德福鄴登科劉占山都司陳國珍李定國巴圖魯名號參將黃三元等花翎守備嚴長發等藍翎餘加銜升敘有差以廣西攻克太平鎮遠等處賊巢賞副將謝繼貴參將劉玉成巴圖魯名號復參將唐元芳職並賞還花翎餘加銜升敘有差以廣西歸順州城被匪占踞革署知州同知黃義亭職與已革副將將遊擊楊致英均永不敘用己未上奉

慈安皇太后

慈禧皇太后幸漱芳齋侍午膳（派工部右侍

郎明善恭勘

泰陵應修工程

大清穆宗繼天開運受中居正保大定功聖智誠孝信敏恭寬毅皇帝實錄卷之二百四十

大清穆宗繼天開運受中居正保大定功聖智
誠孝信敏恭寬毅皇帝實錄卷之二百四十一

救世

同治七年戊辰八月庚申諭軍機大臣等前

因吉林將軍富明阿等奏。吉省官兵待餉。請飭催各省欠解軍需等項銀兩。當交戶部速議具奏。茲據該部奏稱。吉林原撥軍餉三十萬。除各省報解及本年山東解過一萬兩外。計欠解銀十萬兩。其整裝項下河南欠解銀二萬五千兩。賑恤項下直隸山東欠解銀四萬兩。又本年指撥東三省戊辰年俸餉。計長蘆鹽課銀十六萬九千五百餘兩。山東地丁銀十萬兩。河南地丁銀十萬兩。山海關四成

洋稅銀五萬兩。共四十一萬九千五百餘兩。內應撥給吉林銀九萬六千六百兩。是吉林歷次應領各餉計數原足敷用。乃各省欠解疊疊。以致兵食支絀。現在吉林邊防緊要。待餉尤殷。豈容任意拖欠。著官文、丁寶楨、李鶴年、劉典、崇厚、嚴飭各該藩司及奉、錦、道等。遵照部撥數目。分別籌解。並將各該省歷年積欠款項。埽數解清。以資周轉。該督撫等素顧大局。諒不至視同膜外。使該省停兵待餉。日

形竭蹶也。至河南已經報解整裝銀二萬五千兩。尚未據盛京戶部咨報收訖。究係因何遲延。並著官文李鶴年迅速查明。咨行盛京戶部。此項到奉省時。富明阿卽派妥員赴奉關領。藉濟要需。該將軍等前請在戶部撥給銀數萬兩。現陳國瑞一軍已經凱撤。著崇厚卽於各省解到協餉內。迅撥銀二萬兩。委員解赴盛京戶部。轉解吉林。毋稍延緩。再直隸等省疊次保奏記名提鎮人員。其中如有紀

律嚴明長於訓練能實心實力整頓營務者著官文丁寶楨李鶴年劉典崇厚悉心查訪出具切實考語隨時奏聞候旨錄用毋得博採虛名以昭覈實將此由五百里各諭令知之○又諭戶部奏遵議提撥甘省餉銀並辦理甘肅後路糧臺大員無庸改派一摺甘省餉需前經戶部奏准飭令左宗棠酌度勻撥嗣據左宗棠覆奏前借洋款及四成洋稅二百萬兩除劃提赴直軍餉外餘應分平解甘

並飭王文韶等先提洋款二十萬兩交甘省委員領解業經戶部行知遵照辦理現在九江關協甘常餉二十萬兩及江蘇等省協甘半餉十萬兩已據湖廣總督奏報分起解赴漢中轉解計此時必可陸續到甘自足以資接濟著郭柏蔭等即飭署藩司王文韶於洋款到鄂時迅即提出二十萬兩交甘肅委員琿武等領解並將以後解到餉銀分半給甘其湖南江西解到協甘餉銀亦即按月分半

解往毋許遲滯致誤要需至左宗棠前奏赴直軍餉於洋款二百萬兩內劃提支用所餘洋款仍著左宗棠估計甘省應分一半之數報部備覈甘肅後路糧臺著照該部所議仍責成王文韶兼辦無庸改派以期呼應較靈再陝甘軍營保奏記名提鎮人員其中如有曉暢戎機長於訓練能實心實力整頓營務者著左宗棠移圖善悉心查訪出具切實考語隨時奏聞候旨錄用將此諭知左宗棠並

由五百里諭知穆圖善郭柏蔭傳諭何璟知之○以正紅旗漢軍都統載齡署鑲白旗蒙古都統正白旗滿洲副都統魁齡署右翼前鋒統領改革職留營西安右翼副都統安住為革職留任調補正白旗漢軍副都統正白旗漢軍副都統明春為西安右翼副都統○命候補翰林院侍講學士袁保恆赴陝甘軍營交欽差大臣左宗棠差委辛酉湖南巡撫劉崑奏援黔各軍疊次獲勝得旨著即

督飭道員葉兆蘭等乘勝進剿毋稍鬆勁。至河西一帶善後事宜並著檄令彭芝亮妥籌辦理。予貴州寨頭陣亡遊擊彭漢明等祭葬世職。壬戌諭內閣御史秀文奏請嚴禁京師捕役匪徒擾害等語近日京城內外捕役藉起賊贓為名誣指鋪戶居民任意妄拏勒索錢文私行拷掠致使無辜良民輒受冤抑並有無賴匪徒三五成羣藉查漏稅巡役為名訛詐商民若不嚴行整頓何以戢奸究

而安善良著步軍統領衙門順天府五城及崇文門稅務衙門一體出示嚴禁如有捕役藉端勒索及匪徒影射情事即著嚴行懲辦以安善良。○諭軍機大臣等總理各國事務衙門奏辦理中外交涉事件關係重大請飭格外慎重一摺西洋各國自入內地以來辦理諸多棘手凡遇中外交涉事件有關擊大局者自宜慎重將事不得稍有洩漏乃曾國藩於密陳籌議修約事宜摺件不能慎重致

被人傳鈔業經交部議處此事若再追究誠恐欲蓋彌彰轉於大局無益第思各直省將軍督撫三口通商大臣等均有中外交涉事件遇有奉到密寄諭旨及總理衙門密行文件並該將軍督撫等密奏摺件若復稍涉大意致有洩漏則機事不密咎有攸歸嗣後務當格外慎重以維大局如有在事各員不能體會此意一經察出定當從重懲處決不寬貸原摺均著鈔給閱看將此各密諭知之。○

又諭左宗棠奏陝甘餉源奇絀請飭兩江督臣協撥劉松山軍營餉需一摺陝省地方荒瘠異常糧價昂貴軍營餉需全恃各省撥款接濟現在劉松山所部隨同左宗棠回陝勦辦回匪該營應需軍餉向由兩江協濟著馬新貽於到任後按照舊章源源撥解不得視為尋常協款稍涉延誤江蘇安徽江西等省記名提鎮人員其中如有紀律嚴明長於訓練能實心整頓營務者並著馬新貽悉心察

訪出具切實考語。隨時奏聞。候旨錄用。將此由五百里諭令知之。○又諭左宗棠奏籌備晉防。請催臬司赴任等語。晉省西北兩路防務緊要。自應於冰橋未成之先。豫籌堵遏。方免臨時張惶。左宗棠請令鄭敦謹一面另籌調兵募勇。一面先儘現有兵力。嚴為設防。卽著該署撫。懍遵疊次諭旨。實力嚴防。如另有可調之兵。暨添募勇丁之處。並著趕緊籌畫。以期有備無患。已革臬司陳湜因病乞假旋

省。已諭令仍赴防所。惟既交卸臬司篆務。深恐調度不靈。反致誤事。著鄭敦謹刊刻木帶木質關防。發交該革員開用。責令督率各員嚴密防堵。以資統攝。新任臬司蔣益澧屢催赴任。迄未成行。晉省防務正在喫緊。何得託故遷延。著劉崐傳知蔣益澧。迅卽馳赴本任。應行選募勇丁若干。卽由該臬司自行酌度辦理。所需餉項。著郭柏蔭、劉崐、何璟先為墊給。以利進行。蔣益澧到任接辦防務後。所有

在防文武兵勇概歸節制調遣。如有粉飾疏忽。抗玩軍令者。卽由蔣益澧稟知鄭敦謹從嚴參奏。其一切應辦事宜。並著蔣益澧隨時與鄭敦謹妥商籌辦。以副委任。左宗棠本有節制晉省軍務之責。一切布置機宜。仍著該大臣妥籌兼顧。毋得稍分畛域。貽誤事機。再湖北湖南各營保奏記名提鎮人員。其中如有曉暢戎機。長於訓練。能實心實力整頓營務者。著郭柏蔭、劉崐悉心察訪。出具切實考

語。隨時奏聞。候旨錄用。將此諭知左宗棠。並由五百里諭知鄭敦謹、郭柏蔭、劉崐傳諭何璟知之。○追予江蘇揚州陣亡在籍內閣中書許銘勳祭葬世職。殉難舉人張光輝賞卹加等。○追予江西各屬陣亡殉難貢生黃炳炎等紳民婦女三千五百二十四名口分別旌卹如例。○癸亥諭軍機大臣等傳諭署安徽巡撫吳坤修、吳坤修奏捻逆已平。擬旋省督辦善後一摺。前因捻逆肆擾皖省。應籌前

敵餉需吳坤修奏請移紮壽州便於照料該處距省較遠遇有緊要公事文函往返需時終覺事機濡滯現在捻患已除潁毫蒙宿地方亦均安謐吳坤修自可旋省籌辦善後以期呼應較靈著俟前敵各軍回皖分別撤留後吳坤修即暫行旋省督同司道各員將清查田畝招墾荒蕪及一切應辦事宜悉心經理次第舉行藉資整頓惟皖省素稱捻藪尤須隨時稽查彈壓庶免萌孽復生俟善後事

宜辦理就緒該署撫仍當出省周歷巡查以期綏靖地方另片奏仍請留張兆棟辦理秋徵等語張兆棟著准其暫緩交卸俟秋徵完竣即行前赴新任以重職守刻下捻逆肅清營伍尤宜整頓該省記名提鎮人員中如有熟悉戎機長於訓練能實心實力整飭營務者著該署撫留心察看出具切實考語隨時奏聞候旨錄用 甲子諭軍機大臣等丁日昌奏遣勇四散後患堪虞調任督臣請暫緩

赴直據呈轉奏並請暫留曾國藩數月飭彭玉麟暫緩回籍各摺片馬新貽月內計可抵任曾國藩即將散勇機宜及地方一切公事與馬新貽悉心籌商著俟撤勇事竣布置妥協曾國藩再赴直隸總督新任以重職守前因曾國藩調補直隸總督長江水師提督責任綦重恐黃翼升一人不足以資控制已寄諭彭玉麟於百日後迅赴江皖扼要駐紮矣至疆吏遷調朝廷自有權衡豈臣下所得妄

參丁日昌及馮桂芬等均著傳旨申飭原片留覽將此各諭令知之 以湖北江陵等處歷年拏獲教匪出力賞知府榮光等花翎鹽課大使徐鎔藍翎餘加銜升敘有差予蒙古防邊陣亡官弁散丕勒多爾濟等一百六十四員名分別賞卹如例 乙丑遣官祭賢良祠 諭軍機大臣等庫克吉泰等奏各軍勦賊疊勝並現籌防勒情形劉典奏審明慘殺回戶人犯正法各摺劉厚基一軍追賊至

延川西溝口將匪目袁大魁殲斃其竄擾中部洛川等處賊匪經知州成定康會同毛正明等夾擊擒斬甚多劉端冕黃鼎等復敗賊於街子河紅崖河一帶該逆分股回撲又經劉倬雲喻兆圭督率各隊四路環攻賊敗向正甯逃走據獲賊供董志原踞賊缺糧已極現仍飭各軍暫時固守此次劉厚基等軍追勦疊勝軍事尚屬得手惟該匪股現正乏食當秋糧棲野之時難保不圖飽掠著庫克吉

泰劉典檄飭劉厚基等實力嚴防並偵探賊蹤相機追擊毋任闖入腹地復肆蔓延陝垣團練總蘇濬率勇殺害回人馬五羊兒及其父馬建功弟馬隨羊兒並將伊家婦女幼孩全行殺斃事後又復栽贓誣賴該犯等仇殺回民竟至一家八命殘忍已極現經劉典訊明將蘇濬常添喜楊城蕭老二張豹子五犯正法在逃之李濬常老三飭獲另結辦理尚屬持平漢民回民皆係朝廷赤子軍興以來

已疊諭該督撫等籌辦陝甘地方事宜止分良莠不論漢回原以昭大公而戢亂萌嗣後該署撫遇有漢回交涉事件務當酌度情由妥為覈辦不得稍存歧視致啟紛爭此案逃犯李濬常老三仍著飭屬嚴拏務獲究辦毋令幸逃法網該署撫卽摘錄此次諭旨編行曉諭以示化莠為良之意該省漢回錯處近時有無猜忌情形仍著詳查具奏將此由五百里各諭令知之尋奏逃犯李濬等已拏獲

正法漢回各民均無猜忌報聞○又諭劉典奏請飭湖北省將分收湖南銷售淮鹽釐金一款撥充陝餉並請催四川等省迅解奉撥賑銀各等語陝西需餉孔亟據劉典奏稱該省地丁隨徵隨發此外無款可那又無外省協濟奉撥洋稅每月僅三萬兩以之供支各軍不敷甚距現辦收撫土匪安插降眾各事宜在在須籌經費湖北向有分收湖南銷售淮鹽釐金一款每年約可收銀八九萬兩著

郭柏蔭何璟查明此款卽全數撥給陝省充餉由劉典奏委大員經收解陝俾資要需。湖北本有欠解該省餉銀賑銀卽以此款撥抵以清款目前經部議籌撥陝西賑款山西撥銀六萬兩四川撥銀七萬兩迄今均未報解。著崇實鄭敦謹將欠解銀兩迅速如數措齊卽行解陝毋稍延緩再四川各營保奏記名提鎮人員其中如有曉暢戎機長於訓練能實心實力整頓營務者著崇實悉心察訪出

具切實考語隨時奏聞候旨錄用將此由五百里諭知崇實郭柏蔭鄭敦謹並傳諭何璟知之命都察院左都御史毛昶熙恭勘

永陵草倉河

福陵

隆恩殿應修工程命協辦大學士湖廣總督李鴻章在紫禁城騎馬。追予江蘇江甯等處陣亡殉難舉人劉紹曾等紳民婦女二百二十九名口分別旌卹如例並予集團禦賊

陣亡貢生史良等建立專祠。丙寅諭軍機大臣等有人奏湖南米捐按租起派未免操之過嚴一摺湖南變通捐章改收米石原係酌量通融之法若如所奏各節名雖捐米實則捐銀且有委員四出差役橫行假公報私倚強凌弱等弊如果屬實殊非體恤小民之道著劉崐按照摺內所陳實心體察力去勒索嚴禁中飽務令有裨於公而不病於民方為妥善原摺著鈔給閱看另片奏道員張自

牧辦理黔捐物議沸騰捐生張德遜等赴部驗看並無案據乃辭卸黔捐又充米捐總辦等語該員經辦捐項有無含混著劉崐曾壁光勒令將歷年收捐數目詳細造報以憑覈辦如查有蒙混隱匿情弊卽行從嚴叅辦嗣後不准干預局務原片均著鈔給閱看前據御史吳鼎元奏請裁併釐局等語各省釐捐原為接濟軍餉而設勢難遽議裁撤如有分設局卡較多處所劉崐當酌度情形量為裁

併總期於籌款之中仍寓體恤之意至局員局紳之罔利侵漁則須嚴為查察力除積弊務令涓滴歸公母任中飽原片著鈔給劉崐閱看再黔省記名提鎮人員中如有曉暢戎機長於訓練能實心實力整頓營務者著曾璧光悉心察覈出具切實考語隨時奏聞候旨錄用將此各諭令知之○又諭奕榕奏官兵勦賊獲勝現在撥捕情形一摺奉省邊外匪徒由四家子屯等處竄入邊裏在孤家子

屯等處肆擾其彰武臺地方亦有另股匪徒搶掠均經奉省派出官兵並蒙古兵丁分路勦捕殺斃多名搶傷首匪張西城並擊斃王金良等三名惟逃散餘匪尚復不少張西城程廣學二人尤為著名巨匪必須及早翦除以杜滋蔓著奕榕督飭協領常在與添派之委營總成福帶領所部官兵馳赴邊外會合蒙古官兵併力撥捕務將逃匪悉數殲除並將著名盜首按名弋獲毋任漏網遠颺致貽

後患將此諭令知之○以正黃旗蒙古副都統富明署正黃旗漢軍副都統 丁卯
世宗憲皇帝忌辰遣官祭

泰陵○

上詣

壽皇殿行禮○諭軍機大臣等曾國藩奏請陛見並懇陳歉忱各摺片曾國藩著俟馬新貽抵任後將散勇事宜及地方一切公事會同商辦妥協後再行來京陛見赴直隸總督新

任該督自辦理軍務十餘年來勤勞王事不遑顧及其親朝廷每一垂念深為惻然惟現在畿輔要區正賴重臣整理該督當仰體朝廷倚畀之專勿拘故常而遽萌退志以副委任有厚望焉兩江記名提鎮人員中如有曉暢戎機長於訓練能實心實力整頓營伍者並著曾國藩出具切實考語據實奏聞以備錄用將此諭令知之○又諭劉嶽昭奏進攻尋甸獲勝情形請飭川省撥餉會辦滇捐並

請飭兩江督臣採買火藥器摺片。劉嶽昭所部各軍分路進攻七星橋。將該處木城攻破。並渡河奪破卡隘。進敗靈臺庵等處賊匪。攻破柳樹河賊壘。並青龍村馬石窩逆壘。將高峰庵等處賊營一律掃蕩。尋甸州城業經官軍紮營環攻。著劉嶽昭卽督飭在營將士。將此城迅速攻拔。毋稍濡滯。至省垣為根本重地。被圍日久。岑毓英固當督兵勦賊。速解城圍。劉嶽昭身任疆寄。亦豈能專顧一隅。置省

垣重地於不顧。著卽懷遵前旨。督飭所部兵勇。前赴省垣會剿。將圍城賊匪迅行殄滅。不得專諉諸岑毓英一人。僅遲回觀望。貽誤事機。恐該督不能當此重咎也。川省按月應解滇餉銀三萬兩。至今五月。僅止補解前欠協餉銀一萬兩。滇省軍務正當喫緊之時。崇實當按月如數撥解。源源接濟。不得稍存膜視。並著飭令川省藩司會同劉嶽昭所派遣員馮崐。辦理滇省駐川捐局事務。以資接濟。滇

營需用火器。著曾國藩就近委員赴上海代為採買。應需價銀。卽由江甯藩庫籌款。先為墊給。仍由滇省撥還歸款。滇省記名提鎮人員中。如有曉暢戎機。勤於訓練。能實力實心。整頓營伍者。著劉嶽昭岑毓英出具切實考語。據實奏聞。以備錄用。將此由五百里各諭令知之。○三口通商大臣兵部左侍郎崇厚奏各軍凱撤。並親赴津南查勘撫恤。得旨。所有津南一帶撫恤事宜。著督飭該道府妥籌

辦理。並著檄令劉景芳駐紮鹽慶等處。認真彈壓。毋稍疏懈。以詹事府詹事景其濬為內閣學士兼禮部侍郎銜。大理寺卿童華為都察院左副都御史。○以侍衛陳國瑞所部勦擊直隸擒匪出力。賞副將王正標都司鄧正雲。已圖魯名號。都司范金順等花翎。千總魯仕林等藍翎。餘加銜升敘開復有差。○戊辰。諭軍機大臣等。戶部奏吉林請開圍荒。宜防流弊。並歷年報墾尚未升科地畝。及欠交

租項請飭查追一摺吉林圍場原為長養牲畜以備狩獵之用設堆置卡封禁甚嚴乃該處游民借開墾之名偷越禁地私獵藏牲斬伐樹木迨林木牲畜既盡又復竄而之他有招佃之虛名無徵租之實效數百年封禁之地利遂至蕩然無存即如景綸前於咸豐十一年奏稱尚有圍場二十一處而此次富明阿奏稱該處南北十七八里東西八十餘里皆無樹藏牲其為游佃偷越已可概見此次

該將軍辦理開墾事宜自當嚴防流弊即著親往履勘嚴定界限毋任委員弊混並將新墾各地造具畝數四至佃戶花名清冊以及如何那移卡倫添設封堆暨布置員弁逐處巡察各事宜詳細妥籌迅行覆奏以杜弊端其前任將軍景綸奏請開墾夾信溝涼水泉荒地二十五萬餘晌現有佃認領徵租者十三萬晌零未報升科地尚有十二萬晌續墾之土門子並省西圍場阿勒楚喀等處地畝

共三十萬晌應交押荒地捐兩項錢文共一百二萬餘吊除交過錢六十二萬餘吊尚有未交錢四十萬吊其交過押租地畝既有佃戶認領何以僅將雙城堡佃戶認領地三萬三千一百六十晌零造具花名清冊其餘十四萬八千二百餘晌遲延不報至此外未交押租地十一萬餘晌何以數年之久並不招人承領著富明阿確切查明將土門子等處已交押租之佃戶造具清冊迅速送部並追

出歷年地租錢文以充兵餉其餘土門子等處未交押租並夾信溝涼水泉未報升科地畝即著詳細履勘予限一年招佃認領按晌升科毋再延宕僅查有已墾未報及認多報少情弊並著從嚴叅辦以昭覈實將此諭令知之又諭前據蘇廷魁李鶴年奏請撥餉九十萬兩堵築榮工當諭令戶部先撥庫銀四十萬兩其餘銀兩由戶部撥有著之款接濟茲據該部奏稱已由部庫遵撥銀四十萬

兩分作四批。由順天府派員領解起程。其餘五十萬兩。請撥兩淮鹽釐銀十四萬兩。閩海關洋稅十五萬兩。河南本年漕折銀二十一萬兩。由該將軍督撫等委解豫工。俾資接濟。卽著曾國藩馬新貽英桂丁日昌李鶴年迅速如數措齊。委員解往工次。毋得稍涉延玩。致誤要工。蘇廷魁李鶴年務當撙節動支。不得任聽工員浮冒。該署河督等所奏。向來大工例價。銷六賠四。有名無實。豫省民力難再

加徵幫價。請由各省支發款項。攤扣歸款一節。據戶部奏稱窒礙難行。著毋庸議。豫省向有行銷蘆鹽加價錢文一款。專為河防而設。現在軍務凱撤。該部擬移防河之餉。補修河之虧。以此項鹽斤加價。作為榮工加價。卽著官文李鶴年遵照辦理。並著李鶴年將河防經費趕緊截清數目。嗣後所收前項加價。卽行存庫。備補榮工用款。俟工竣截數咨部。並將分次徵收加價數目。隨時報明。以昭覈實。

前據御史吳元鼎奏。請裁併釐局等語。各省釐局。為接濟軍需而設。勢難遽議裁撤。如有分設局卡較多之處。亦為量為裁併。以示體恤。著英桂卞寶第斟酌情形辦理。至局員局紳罔利侵漁等弊。尤須嚴加查察。務令涓滴歸公。毋任中飽。原片著鈔給英桂卞寶第閱看。閩浙江蘇記名提鎮人員中。如有曉暢戎機。長於訓練。能實心實力整頓營務者。著英桂丁日昌卞寶第悉心查覈。出具切實考語。

隨時奏聞。候旨錄用。將此由五百里各諭令知之。又諭成祿奏肅軍接仗情形。請飭催總兵帶隊會剿一摺。肅州踞匪經楊占鼐馬天祥等連番勦擊。已形窮蹙。惟該城西面尚屬空虛。必須厚集兵力。四面急攻。方能得手。總兵陶生林所統十營。現仍留駐涼州。該提督以攻勦正亟。請飭催該軍赴肅會剿。自應迅速抽調。規復堅城。著穆圖善卽將陶生林一軍。分出五營。留在涼州護送省糧。其餘五

營令該總兵親身統帶前赴肅州毋稍延緩。成祿於此軍到後並著率同楊占鼐等會合環攻將該城迅圖克復不得以賊匪拌命抗拒藉詞耽延。成祿另片奏部署出關請飭戶部指撥銀兩並山東等省匯解鉛丸火藥暨請飭穆圖善派定糧臺等語著戶部於山西河東湖北等處欠解新疆協餉項下議定指撥銀一二十萬兩以資周轉其前據山東山西湖北河南陝西按月協濟之鉛丸火藥並

著戶部咨令各該省解交山西藩庫以便該提督委員赴歸化城提取成祿統軍出關應由何路安設糧臺著穆圖善先期派定所需車馬駝隻等項並著飭知該省軍需局妥議章程隨時接濟以利師行該提督仍當懍遵疊次諭旨迅復肅城整軍西向毋藉口於餉絀兵單觀望遷延自干咎戾將此由六百里各諭令知之以直隸山東辦理黃運各河防出力賞道員范梁遊擊瑞凌等花翎知縣

朱靖旬等藍翎餘加銜升敘開復有差。○予甘肅肅州陣亡遊擊鄧德祥守備馮元傑等祭葬世職加等。○予直隸南皮等處殉難童生劉書紱等紳民婦女二十三名口分別旌卹如例並予建祠。己巳以神靈顯應加江蘇宿遷縣

金龍四大王封號曰靈感河南陳留縣

黃大王封號曰綏靖

朱大王封號曰孚惠。○諭軍機大臣等前因

左宗棠奏請議撥實餉當諭令軍機大臣會同戶部速議具奏茲據奏稱擬由各海關六成洋稅內湊撥銀一百萬兩為該督西征軍餉並由該督酌量協濟甘省等語著曾國藩馬新貽丁日昌於江海關撥銀五十萬兩英桂於閩海關撥銀二十萬兩郭柏蔭何璟於江海關撥銀十五萬兩師曾於粵海關撥銀十萬兩李瀚章於浙海關撥銀五萬兩各該將軍督撫監督等務當迅速如數解往以濟

要需廣東福建浙江湖北江蘇五省每月共計協撥左宗棠餉銀十九萬兩扣至本年十一月止月餉全行扣抵借款著各該督撫等自本年十二月起各照原撥數目按月協濟此外山東山西河南湖南四川江西河東等處每月共計協撥左宗棠餉銀十萬三千五百兩各該督撫等尤當按照奉撥之數源源報解左宗棠返旆西征需餉極為迫切該將軍督撫監督等其各竭力籌措星速解交以

維大局其河南陝西湖北湖南四川江蘇江西山東山西等九省協撥穆圖善餉銀每月共計十二萬八千餘兩著該督撫等各按原撥數目趕緊籌解甘省糧餉兩缺兵勇困苦難堪該督撫等毋得視甘餉為緩圖以致餓軍譁潰貽誤戎機左宗棠前奏借洋商銀一百二十萬兩及續借續撥各海關銀二百萬兩曾據左宗棠奏此次銀兩陸續解到陝甘時均勻分支現在已支若干尚存若干著左

宗棠查明具奏陝甘專請協餉之營尚有數處應如何歸併支發及該督軍餉究竟每月實需若干著左宗棠統籌全局奏明辦理前據御史吳鼎元奏請裁併釐局等語各省釐局為接濟軍餉而設勢難遽議裁撤如有分設局卡較多之處亦應量為裁併著瑞麟李福泰李瀚章劉坤一斟酌情形辦理至局員局紳罔利侵漁等弊尤當嚴加查覈務令涓滴歸公毋任中飽原片著鈔給瑞麟李福泰

李瀚章劉坤一閱看廣東浙江江西記名提鎮人員中如有曉暢戎機長於訓練能實心實力整頓營務者著瑞麟李福泰李瀚章劉坤一悉心查察出具切實考語隨時奏聞候旨錄用將此由六百里諭知左宗棠曾國藩馬新貽丁日昌鄭敦謹穆圖善崇實吳棠英桂卞寶第瑞麟李福泰郭柏蔭劉崑李瀚章劉坤一丁寶楨李鶴年劉典並傳諭何璟師曾知之又諭丁寶楨奏遵旨分別遣留吉

林黑龍江丹丁籌辦善後及撫恤卹城災民各摺片。東省派赴直隸之吉林丹丁一千名。黑龍江丹丁五百名。現當捻匪蕩平。自應分別留撤。吉林丹丁除左宗棠挑留三百餘名外。該撫挑出精壯官兵二百餘名。著仍交待衛春山管帶。卽日前赴南苑聽調。並於丹丁起程之日起。豫先放足兩月口糧。其應行遣撤回旗各丹丁。著分別發給川資。令沿途地方官妥為照料。以示體恤。東省應行留撤各

營。著照所請辦理。所有存留各軍。仍飭王心安等分紮東昌等處。巡緝操防。以期得力。河北雖無餘匪。該撫仍當嚴飭各該地方官。加意拊循。並派員將李鴻章撥存德州軍米。暨該撫存儲濟陽及另購米石。分賑濟武兩屬災區。俾窮民藉資餬口。卹城被水村莊。著該撫卽飭藩司速撥銀兩。派委妥員馳赴該縣地方。妥為拊循。毋任災民失所。此外各州縣如有被水情形最重者。並著查明實在戶口。

續行籌款賑恤。現在軍務甫平。小民蕩析離居。深堪矜憫。該撫務飭屬員留心撫恤。毋令因災致生事端。將此由五百里諭令知之。○以勦平捻匪出力。開復山東布政使潘鼎新降留處分。○子湖北小軍山陣亡參將周祿暨子從九品承鑾祭葬。世職於死事地方。暨原籍建立專祠。○追予廣東從化殉難知縣李福培於死事地方。暨原籍建立專祠。典史趙應瑞暨李福培弟從九品性培並家丁等

一併附祀。予安徽霍邱合門殉難國子監典籍銜寶如郊暨眷屬人等分別旌卹。並立祠建坊如例。予安徽各屬陣亡殉難外委姬文奎等紳民婦女四千五百六十七員名口分別旌卹如例。庚午諭內閣吳坤修奏請將庸劣各員分別懲處等語。安徽合肥縣知縣余國卿才具平庸。鳳臺縣知縣林調陽迂拙無能。均著開缺另補。准補定遠縣知縣陳斌。身家不清。物議沸騰。候補從九品張寶

勳任性妄為。不知分際。宿州營守備方豫功。嗜好太深。聲名狼籍。均著革職。永不敘用。○諭軍機大臣等。鄭敦謹奏。勘明河保地勢。籌辦冬防。並請派軍防勦各摺片。晉省保德河曲一帶。河岸綿長。冬令冰橋凝結。賊騎處處可行。該署撫擬於保德之天橋。修築石卡石壘。並於下游各隘口。分派官兵駐紮。添募礮勇。為上下應援。其河曲舊有邊牆。亦擬補葺。挑濠築壘。修建垛卡。以資憑守。所籌尚屬周

妥。著卽照所擬辦理。務於黃河未凍以前。速行布置完密。不可延緩貽誤。歸綏所屬薩托清等處。地勢平行。無險可扼。總兵馬陞現雖駐守包頭。惟隆冬。河水堅凍。賊匪若自蒙古地面。乘冰紛竄而下。路徑歧出。處處可通。著鄭敦謹飭令馬陞。俟入冬後。再於包頭以內。相度地勢。將沿河一帶。可以乘冰偷越之處。添兵駐防。並著定安。桂成。添派駐防旗兵。協同堵扼。以重邊防。定安計已到任。著將該處

防務實力整飭。會同桂成。杜嘎爾。妥籌布置。至晉省沿河防兵。力尚單弱。豫境現已安謐。宋慶張曜。馬德昭三軍。素稱得力。著李鶴年。揀派一軍。赴陝州一帶扼要分紮。以固豫省邊境。另派一軍。赴晉省西路。迤南沿河防堵。騰出晉省南路。設防兵勇。並赴中路防河。責令各認汛地。分段堵禦。晉省北路一帶。情形喫重。鄭敦謹屢請撥軍。赴榆林駐紮。現在榆林賊匪。雖已他竄。難保不去而復來。著李瀚

年。於宋慶等三軍內。酌派得力大支一軍。由晉境渡河。於陝西榆林一帶扼紮。為薩托清等處屏蔽。既可於陝軍南北會勦。又可與省省沿河防兵。互為聲援。以固邊境。以上豫軍在晉省者。卽著歸鄭敦謹調遣。在陝境者。卽著歸左宗棠調遣。左宗棠未到陝以前。庫克吉泰。劉典。當就陝省現有兵力。將內地回土各匪。力行勦洗。毋令竄近晉境。至左宗棠身任統帥。秦晉防勦事務。均宜兼顧。務須力遏

賊氛由東而西節節進勦先顧晉省門戶以杜紛竄不可稍分畛域致涉貽誤鄭敦謹亦當嚴密籌防不可恃有客兵稍涉疏懈豫營應需兵餉仍著李鶴年籌款撥解毋任缺乏將此由六百里各諭令知之命荊州將軍巴揚阿在紫禁城騎馬辛未諭軍機大臣等穆圖善奏請飭金順專辦援陝軍務等情一摺金順由甯夏督兵馳赴定邊進援陝省北路所有駐紮延安之英禮等營並甯夏花

馬池各營及吉林黑龍江馬隊與金順所帶之隊向歸該署將軍調遣著卽將甘省北路援陝各軍妥為籌布與陝省防勦之師互相策應以期聯為一氣一應軍情及催辦糧餉事務均由金順隨時奏報左宗棠庫克吉泰劉典當督飭陝軍與金順所統甘軍互為聲援將延榆一帶賊匪合力會勦不可稍分畛域甘省中衛縣屬之甯安堡路通鹽固慶陽時虞陝匪竄越清水營地方亦時有竄匪滋

擾均宜駐兵扼勦不可輕於移調穆圖善現駐蘭州距甯夏較遠所有甯夏府屬各路軍務並著金順就近兼顧應辦事件卽與豐伸會銜具奏甯安堡所駐貴字三營需用糧餉並著金順分撥接濟穆圖善亦應於協濟甯夏軍餉內隨時勻撥毋得稍涉推諉儘先協領富勒琿記名副都統托克屯著穆圖善遵奉前旨查明該二員現在何處軍營迅飭來京聽候諭旨將此由五百里各諭令知之○

迨予湖北武昌殉難同知王本立於河南羅山縣原籍建立專祠壬申諭軍機大臣等曾壁光奏黔軍攻拔王卡川師收復玉華山等處及甕安縣城一摺黔省王卡踞匪經該撫督飭唐天佑進攻勦撫兼施當經王卡克復在事出力人員准曾壁光擇尤保奏毋許冒濫至克復轎頂山尚大坪等處前已據崇實奏報情形大略相同曾壁光當檄飭兵勇會合川軍節節掃蕩迅殄逆氛張文德現由

貴定進勦著曾壁光卽飭該署提督實力控捕務將潘逆迅圖擒獲以絕根株並一面分軍進規麻哈等處俾牽賊勢黔省事機極為順手。至盼添軍協助席寶田假期已滿著劉崐催令統率所部從清江台拱等處西上。剋日進攻毋再遷延觀望克復平越州城詳細情形曾壁光迅卽查明具奏將此由六百里各諭令知之。○以都察院左都御史靈桂吏部尚書單懋謙兼署禮部尚書吏部左侍郎

沈桂芬暫署工部尚書。阜保兼署禮部左侍郎。禮部右侍郎綿宜兼署刑部右侍郎。○以記名總兵官劉厚基為陝西延綏鎮總兵官。○癸酉以刑部尚書譚廷襄兼署都察院左都御史。○以貴州攻克覺林寺等處賊巢。予總兵官馮有翼以提督簡放賞遊擊曾獻林等花翎千總李盤湘等藍翎餘加銜升敘有差。○甲戌諭軍機大臣等吳坤修奏豫省黃水漫口下注淹及皖境情形一摺豫省榮工

漫水現已下注皖省之潁壽一帶潁郡所屬地方一片汪洋已成澤國勢必由洪澤湖下注高寶維揚一帶亦慮被災現在淮揚通泰等處有無被水情形著曾國藩張之萬丁日昌趕緊查明具奏應如何分洩湖河水道以殺水勢之處並著豫籌辦理馬新貽計可行抵江境著俟到任後會同曾國藩等迅速籌辦潁壽一帶被災地方著吳坤修卽行查明妥為撫恤該處向為捻匪出沒之區現在投

誠降眾已歸皖省並著吳坤修妥籌駕馭毋任與災民勾結滋事勇丁如何分別撤留分紮何處著曾國藩馬新貽吳坤修熟籌辦理豫境被淹究係何處災黎是否安帖著李鶴年趕緊查奏撫恤一面彈壓奸宄毋任滋事榮工漫口有無掣動全溜情形現距霜降節候已近自應趕緊堵禦以杜水患辦理情形若何並著蘇廷魁李鶴年隨時具奏以慰廑念將此由六百里諭知曾國藩馬新貽張之

萬蘇廷魁丁日昌李鶴年並傳諭吳坤修知之。又諭崇實奏訊取匪首確供正法鈔錄供詞呈覽一摺。教匪首犯劉儀順習教傳徒謀反倡亂。秦愬愬相助為逆。受其偽職。經官軍擒獲。解送成都省城。崇實親提研訊。供認謀逆不諱。該二犯罪大惡極。業經凌遲處死。傳首倡亂地方。以昭炯戒。該犯劉儀順供稱由湖南寶慶遷居四川宜賓。又有四川豐都人徐大川等代為傳教。是其醜類散布。實繁有徒。若不悉數殲除。誠恐死灰復燃。致貽後患。仍著崇實督飭所屬嚴密捕拏。毋任漏網。至所供兩湖江西浙江河南山東廣西雲貴陝甘等省皆有黨與。互相勾結。此時首逆既誅。人心渙散。亟應乘時速為翦滅。免致散而復聚。著左宗棠等按照該逆犯所供情節。並各人犯住址姓名。嚴飭所屬認真按緝。不得含混了事。致留亂萌。供詞著各鈔給閱看。將此諭知左宗棠崇實穆圖善劉嶽昭郭柏蔭

丁寶楨李鶴年李瀚章劉坤一劉崐蘇鳳文岑毓英曾璧光劉典並傳諭何璟知之。

大清穆宗繼天開運受中居正保大定功聖智誠孝信敏恭寬毅皇帝實錄卷之二百四十一

大清穆宗繼天開運受中居正保大定功聖智
誠孝信敏恭寬毅皇帝實錄卷之二百四十二

教

同治七年戊辰九月乙亥朔

上詣綏履殿問

慈安皇太后安平安室問

慈禧皇太后安至癸卯皆如之以故不入八

分輔國公溥咸子毓厚襲爵○丙子以恭送

孝淑睿皇后

孝和睿皇后

宣宗成皇帝

孝穆成皇后

孝慎成皇后

孝全成皇后

孝靜成皇后

文宗顯皇帝

孝德顯皇后

冊

寶尊藏盛京

上詣

太廟綵幔前恭閱行禮○以恭送

文宗顯皇帝聖容

實錄

聖訓尊藏盛京

上詣東華門外

綵棚前行禮○奉

慈安皇太后

慈禧皇太后幸漱芳齋侍午膳○遣官祭

歷代帝王廟○諭軍機大臣等李鶴年奏裁

汰嵩武毅字兩軍暨防河水陸兵勇分別去

留並籌辦善後事宜一摺所籌尚屬妥協前

有旨令李鶴年於宋慶張曜馬德昭等軍內
揀派一軍赴陝州一帶分紮另派一軍赴晉
省西路迤南沿河防堵並酌派得力大支一
軍由晉境渡河於陝西榆林一帶扼紮茲據
奏稱提督馬德昭六營已派赴潼關防所現
擬於嵩武毅字兩軍內挑選歸併各留十營
共計二十營酌令宋慶駐紮歸德張曜駐紮
河南分資控扼等語陝回現尚鴟張晉豫兩
邊防勦均未可緩該撫仍當遵奉前諭檄令
宋慶張曜各帶此次所挑兵勇分路前進毋
得藉詞逗遛並著飭知該將領等在晉者歸
鄭敦謹調遣在陝者歸左宗棠調遣以資鈐
束歸陳一帶即著嚴飭參將田慶和前往扼
紮查探散勇妥為照料出境其餘裁撤之馬
步各隊並飭原帶員弁親身押送分起回籍
毋令沿途騷擾別滋事端黃河水師礮船練
勇均著照所擬辦理該省兵燹之餘復遭水
患居民失業甚多其善後事宜著卽悉心籌

辦並劄飭各地方官於保甲撫恤各事實力
奉行毋得空言塞責榮工辦理情形前諭該
撫隨時具奏現在大溜是否全行掣動各州
縣被淹輕重想均派員確勘霜降節候已近
著會同蘇廷魁督飭在工各員迅圖堵禦毋
再遲延將此由五百里諭令知之○以浙江
捐輸軍餉永廣嘉興紹興兩府學額各十名
甯波太平府縣各六名嘉興永嘉二縣各五
名秀水嘉善桐鄉德清四縣各四名定海海
甯海鹽諸暨上虞平陽六廳州縣各三名餘
杭平湖石門象山臨海義烏六縣各二名餘
姚黃巖天台樂清瑞安泰順麗水七縣各一
名○丁丑以神靈助順加河南陳留縣
黃大王封號曰溥化山東臨清州
漳河神封號曰顯應○諭內閣丁日昌奏籌
辦禁絕槍船情形一摺江浙槍船匪徒前經
郭柏蔭會同馬新貽等派員查拏將首犯擒
獲正法脅從解散河道漸可肅清惟槍匪為

害閭閻必須盡絕根株卽著照該撫所擬會同李瀚章於蘇松嘉湖四府向有槍船來往之處督飭府縣編查水陸保甲凡有漁船農船均於戶下註明儻敢窩匿槍船卽治以連坐之法各該地方官等仍隨時切實開導務使勉為善良並令水陸居民藏有槍礮軍器者悉數呈繳不准差役藉端騷擾此後官民人等概不准乘用槍船其無軍器者勒限改作農船如仍有打造槍船式樣者立將該船

截毀並將製造工匠及雇船之人嚴行懲辦以靖地方○以江蘇松江等處拏獲槍匪出力予提督熊元等優敘軍功吳文榮以把總用並賞藍翎餘升敘有差○追予江蘇各屬陣亡殉難州同銜吳瑞棠等紳民婦女一千九百八十三員名口分別旌卹如例○戊寅諭內閣明善奏查勘工程情形請飭承修一摺

泰陵明樓臺面銅溝甃出水石經明善查明情

形應行修理卽著察杭阿桑春榮歸入本年另案各工一併敬謹估修並著欽天監擇吉開工○諭軍機大臣等蘇廷魁奏籌堵榮工情形一摺榮工漫口兩壩裏頭雖已辦竣惟新鑲埽段尚未一律到底該署河督務當督飭在事員弁加意防護跟追以臻穩定昨據吳坤修奏稱皖省潁壽一帶黃水下注被災甚廣自應將榮工漫口迅籌堵築以拯災黎前經諭令戶部先撥庫銀四十萬兩解赴工

次並令續撥有著之款五十萬兩接濟茲據蘇廷魁奏稱撥餉到工須在九月半前後一切購辦料物均須錢糧料理著李鶴年先於豫省藩庫內撥款墊發交蘇廷魁派員籌辦不得遲延推諉俟撥餉到工時卽由該署河督撥還歸款下游上南廳等處河隄仍著該署河督飭令員弁認真防護務保無虞榮澤工次彈壓需人前據李鶴年奏派崔廷桂帶兵駐工著該撫檄飭該將弁等實力巡查毋

任散勇災民藉端滋事。將此由五百里各諭令知之。○己卯諭軍機大臣等奕榕奏請留防勇調遣一摺。總兵張得祿所部弁勇駐紮奉省新民屯扼要巡防。前經定安擬將此軍調赴綏遠城。惟奉省西面地勢遼闊。距邊甚近。盜匪餘黨尚未淨盡。若將此軍調往他省。則奉省西面地方空虛。仍慮餘匪乘間生事。張得祿著暫留奉省調遣。卽由奕榕咨明定安。並責令該總兵督帶所部認真緝捕餘匪。務期盡絕根株。毋留餘孽。都興阿假期滿後著卽迅速回任。毋再遲延。奉省為根本重地。該將軍當將本處官兵認真訓練。務成勁旅。以期兵歸實用。不得久恃客兵。耗糜軍餉。將此各諭令知之。○又諭前因成祿奏部署出關請飭指撥銀兩當經諭令戶部議定指撥。茲據戶部奏稱山東山西河南直隸四省欠解新疆月餉為數甚鉅。直隸河南均經奏請緩解。若再提撥成祿軍餉殊難望其速解。現

經議定除直隸河南無庸提撥外擬請在山東山西提撥二十萬兩等語。卽著鄭敦謹於山西欠解新疆月餉二十四萬四千兩內提銀四萬兩丁寶楨於山東欠解新疆月餉八十七萬五千兩內提銀十六萬兩均著迅飭各該藩司如數措齊解交成祿軍營應用。毋稍延緩致誤要需。至成祿出關應由何路安設糧臺著穆圖善妥籌辦理。前撥山東山西湖北河南陝西按月協濟成祿軍營之鉛丸火藥著戶部咨催各該省迅速籌解不得遲延。將此諭知戶部。並由五百里各諭令知之。○以吉林穆楞河截勦竄匪出力賞佐領訥木津等花翎委筆帖式忠德等藍翎餘加銜升敘有差。○庚辰諭內閣前因吏部奏火藥局承辦司員郎中王珩長潤經存誠等請保翎支與定章不符駁令另行覈獎當經降旨允准。茲據存誠等奏稱該司員等勞績較著請仍照前奏賞戴花翎等語。該司員等承辦

火藥局事務雖屬著有微勞惟既與定章不符自應遵旨另請獎敘存誠等所請仍照原奏給獎之處著不准行該二員應得獎敘仍著存誠等另覈請獎嗣後各衙門奏保人員務當遵照定章遇有部議另請覈獎者毋得以原擬保獎再三瀆請以崇體制而肅官常○辛巳署安徽巡撫英翰奏督飭凱旋諸軍馳抵潁州妥籌留防及善後事宜得旨願壽一帶被災地方著吳坤修派員查明妥為撫恤至挑選勇丁一萬二千人著英翰吳坤修督飭張得勝等統率所部分要扼紮俾資鎮撫所餘應撤之二萬人著陸續遣還妥慎安插郭寶昌傷既未愈並傳諭安心調理一俟痊可卽添帶精銳一二十人剋日西行以資得力○以宗人府府丞鄭錫瀛為都察院左副都御史○壬午遣官祭

都城隍之神○諭軍機大臣等穆圖善奏覆陳官軍克復慶陽郡城並甯州失守情形暨

庫克吉泰劉典奏請飭山西撥解餉銀護送軍火各摺片慶陽甫經克復著穆圖善嚴飭在事各員實力防範並將善後事宜妥籌辦理毋稍疏忽甯州賊氛正熾又有赴涇州南原分竄汧隴邠長之說雷正綰既難分兵甘省現駐各營亦難抽調著左宗棠庫克吉泰劉典酌撥各軍會同雷正綰兩面夾擊迅將甯州城池克復毋任賊匪久踞黃鼎一軍現駐邠州能否移營進剿並著該大臣等妥籌辦理晉省按月應解陝西軍餉銀一萬五千兩自上年十一月以後屢有短絀並未照原定數目報解陝省前借洋稅現將用盡軍營支款短絀需餉甚亟著鄭敦謹仍照前定數目每月解銀一萬五千兩以一萬兩解交左宗棠軍營五千兩解交庫克吉泰軍營不得再有短絀致誤要需其從前欠解之項仍著鄭敦謹分起補足搭解以資接濟左宗棠庫克吉泰於晉餉解到時亦當擇節支放毋稍

虛糜陝省北山一帶土匪甚多道途梗阻所有駐紮榆林綏德各軍餉銀軍火等項仍須繞由山西解往著鄭敦謹飭令所屬各地方官遇有陝省解往榆綏餉銀軍火過境時照例供支護送劉典仍當揀派妥員押解以昭慎重再行軍必先熟悉地勢著左宗棠穆圖善劉典將各該省駐兵及有賊處所詳細繪圖具奏將此由六百里各諭令知之○以故青海扎薩克輔國公察哈巴克子羅布桑端

多布襲爵○以甘肅甯州等城被賊竄陷革總兵官孟玉德職仍留營都司秦登藩千總石永清把總楊光宏曾占魁卯廷華均革職訊辦副將徐定邦把總黃守元均革職遣戍新疆○予甘肅慶陽等處陣亡總兵官沈大興遊擊趙金標千總陳鳳鳴典史李遇春祭葬世職加等○予陝西懷遠殉難知縣劉著昌等祭葬世職○追予山東東平殉難知縣周毓楠建立專祠○癸未諭內閣本日丁寶

楨保奏之山東兗沂曹濟道長賡山東候補知府惠慶德州知州趙新署平原縣知縣張廷揚候選知縣薛福保均著送部引見○又諭前因布倫托海地方變亂李雲麟辦理乖謬降旨將該員革職交福濟等查辦茲據福濟錫綸查明具奏李雲麟因幫辦新疆軍務輒行招集古城一帶民勇至科布多地方聽調不能斟酌情形慎之於始旋因人數眾多大半遣回該民勇等遠道跋涉身受飢寒不

知體恤大失眾心迨經任布倫托海辦事大臣平日毫無防範致前項民勇在該處造言煽惑滋生事端又不能彈壓地方設法解散種種貽誤咎實難辭已革布倫托海辦事大臣李雲麟著刑部將該革員應得罪名定擬具奏並著福濟錫綸飭令該革員迅即來京聽候部議○諭軍機大臣等麟興錦丕勒多爾濟奏探聞變亂難民退至布倫托海一帶明瑤棍噶扎勒參奏難民滋蔓籌備進剿明

瑤奏請簡派大臣督同辦理請將李雲麟暫緩查辦棍噶扎勒參奏請赴甘肅軍營效力各摺片布倫托海變民自竄往青格里一帶後日漸鴟張亟應妥籌進剿現在棍噶扎勒參在阿勒台山挑選蒙兵喇嘛立營成軍著福濟錫綸卽行馳赴該處會同棍勒扎勒參督率官兵迅籌進剿毋任日久蔓延愈難了局厄魯特等人眾亦應妥籌安插需用經費銀十萬兩著戶部速議具奏所調烏城馬匹

著麟興卽行備齊解交棍噶扎勒參應用該呼圖克圖向稱奮勇此時布倫托海賊匪滋擾正在需人勦辦之際自當勉力圖報豈可置身事外所請赴甘省軍營之處殊屬非是著不准行賊匪裹脅漸多難保不復思東竄刻下內地擒匪雖已蕩平而陝甘軍事方殷尚資兵力東三省馬隊勢難遠調出關所有烏科兩城防守事宜著麟興榮全錦丕勒多爾濟奎昌明瑤督率兵民妥慎籌備以固邊

圉李雲麟旣因辦理不善致滋變亂厥咎甚重豈可復令任事明瑤棍噶扎勒參請令該革員辦理後應及會同麟興督辦之處均毋庸議將此由六百里各諭令知之○又諭前據裕瑞等奏綏遠城防務喫緊請將棍噶扎勒參所撥火箭三百枝截留備用茲據棍噶扎勒參奏稱現在進剿逆匪亟需火器以利攻擊請飭綏遠城將軍將截留火箭迅籌補解等語卽著定安等迅將前次截留火箭三

百枝剋日解交該呼圖克圖毋稍延誤如綏城辦防需用火箭仍著隨時具奏由火箭營另撥俾資應用將此由五百里各諭令知之○三口通商大臣兵部左侍郎崇厚奏請將已革頭等侍衛祥恩發往陝西軍營交欽差大臣左宗棠差委允之○以故蘇尼特扎薩克輔國公布彥特古斯子瑪哈什里襲爵○以科布多幫辦大臣福濟為布倫扎海辦事大臣調布倫托海辦事大臣明瑤為科布多

幫辦大臣○予故前任烏里雅蘇台將軍明
誼祭葬諡勤果○追予故湖南提督楊鼎勳
於直隸滄州減河地方建立專祠○甲申諭
軍機大臣等戶部奏遵議籌撥黑龍江俸餉
一摺黑龍江地處邊陲歷年欠餉甚鉅兵餉
無期支放前據德英奏稱遇有甲兵缺出不
願赴挑若陳餉不能補放新餉不能開領恐
致兵心渙散自係實在情形卽著照戶部所
議由部庫先借撥銀十萬兩著德英卽派員

赴部領取並著官文督飭藩運各司於旗租
鹽課項下欠解東三省俸餉銀內各提銀五
萬兩解赴盛京戶部由德英派員領解奉天
吉林均不得任意截留致誤要需並著額勒
和布於各省解到俸餉內劃撥銀七萬五千
六百兩以符戶部本年撥給黑龍江俸餉之
數至部庫銀兩待放甚多著丁寶楨於欠解
東三省俸餉內劃出銀十萬兩趕緊解部抵
還此次撥款儻有遲誤卽由戶部照京餉例

叅處將此各諭令知之○又諭給事中陳廷
經奏西陲未靖宜及時抽調會剿屯墾招安
一摺現在直東等省雖已肅清而粵捻各股
降眾在各軍中者尚不下三兩萬人各省凱
撤兵勇為數亦多陝甘軍務方殷左宗棠所
帶之兵不過三萬該給事中以東皖等省或
酌留萬餘人或數千人坐耗糧餉不如驅使
勦賊請留養精銳以杜亂萌分路進兵防勦
互用及時興屯兼備安撫所陳不為無見陝

甘防勦事宜是左宗棠專責李鴻章勦賊有
年於東南將士性情知之最悉該大臣等均
屬國家重臣當此邊陲未靖自應亟籌長策
以收底定之功著卽就該給事中所奏各條
彼此函商務須屏除成見通籌全局迅速奏
聞以資採擇原摺均著鈔給閱看將此由六
百里各諭令知之○又諭文麟奏擇期馳赴
哈密並請飭巴里坤興辦屯田各摺片肅州
賊匪竄擾安西旋攻撲敦煌城垣經該城防

守員弁將賊擊退復經文麟派員追勦獲勝賊匪遁回肅州敦煌軍事已鬆文麟著卽剋日起程馳赴哈密將該處撫綏防勦各事宜悉心籌辦以固邊圉毋再遷延干咎安敦玉三處為哈密糧餉所關難保肅州踞匪不再來肆擾著景廉嚴飭在防將弁實力堵勦文麟亦當與景廉隨事咨商以期兼顧所有軍糧轉運章程並著妥籌具奏安敦玉三城奉撥巴里坤兵糧無可籌措自係實在情形惟

巴城待餉孔殷所有敦煌縣欠解巴城之糧三千石仍著文麟飭催速解安玉二處能否通融協濟文麟當通籌全局斟酌辦理惟巴城專待外來糧餉終恐拮据該城既向有屯田地畝又有逆回遺業亟應就地開墾屯田以盡地利而濟兵食卽著伊勒屯何瑄熟籌興辦毋得畏難苟安坐以待食已革副將蕭青雲係戴罪效力之員乃仍不知愧奮經文麟派員押解輒敢聞風逃遁實屬怙惡不悛

卽著文麟咨行各處嚴緝務獲正法以昭炯戒將此由六百里諭知文麟景廉伊勒屯並傳諭何瑄知之○乙酉諭軍機大臣等庫克吉泰劉典奏官兵擊退董志原回逆及北山土匪一摺提督劉端冕等軍在鄜州羊園等處追勦董志原回逆連獲勝仗其竄擾延川土匪亦經劉厚基等擊退前據穆圖善奏甯州賊匪又有赴涇州南原分竄汧隴邠長之說已諭左宗棠等酌撥各軍會同雷正綰夾

擊並令黃鼎移營進勦諒經妥籌辦理逆酋馬新沅等現雖竄退董志原而糧盡勢窮意在竄踞長武三水飽掠秋糧分途肆擾北山山路紛歧土匪又復麇聚若不痛加勦洗則回逆土匪四面沓來必至乘機東犯仍著左宗棠庫克吉泰劉典檄飭劉端冕等軍分投勦擊將各逆逐漸殲除毋稍鬆勁據報回股竄踞靈臺地境擾及汧麟另股至宜君地界張岳齡等軍戰狀何似並著飭令該臬司等

互相策應以期痛埽逆氛肅清陝境將此由六百里各諭令知之○又諭崇實奏川軍攻克苗寨會同黔軍收復平越州城一摺官軍自攻拔尚大坪賊巢後偽苗王楊阿九糾約苗黨於牛場祁山坵等處結寨抗拒道員唐炯飭降人莫掄元隨黔軍乘間入據平越州城提督劉鶴齡知府鄧錡派兵勦擊疊次獲勝陣斬偽苗王楊阿九賊棄祁山坵竄去其牛場烏雲山賊寨亦經劉鶴齡及總兵何行

保等先後攻拔勦辦均屬得手卽著崇實督飭唐炯等乘此聲威由牛場上塘進規清平黃平兩城回擊都勻麻哈以收破竹之勢安平安順尚有號匪餘黨及潰散黔勇為害亟應及早殲盡以絕根株並著崇實檄飭提督陳希祥成耀星等力圖埽蕩毋令餘燼復燃現在黔省軍事日有起色尤宜通力合作用竟全功前有旨令劉崐催席寶田由清江台拱西上進攻卽著嚴檄該臬司剋日拔隊毋

得遷延貽誤曾璧光亦當檄飭黔軍分道會合兜擊以期全境廓清並將收復平越州城詳細情形迅查具奏再行軍必須熟悉地勢著曾璧光將黔省進兵道路及賊匪盤踞處所繪圖呈覽將此由六百里各諭令知之○以陝西郿州等處擊退回逆並勦辦延川土匪獲勝賞副將陳春萬李玉春參將胡應芳遊擊何玉超林定遠巴圖魯名號餘升敘開復有差予陣亡總兵官李大有諡武壯余明

發諡剛烈翟春壽諡勇烈均祭葬世職加等與故提督譚玉龍於三水縣城合建專祠弁勇等一併附祀○予陝西窯店等處陣亡副將謝英才參將劉榮貴遊擊李世久都司高在福等祭葬世職加等○予貴州牛場陣亡參將吳洪貴祭葬世職加等○丙戌諭內閣前據都察院奏請飭各省將京控案件迅速審辦當經降旨嚴飭各該省大吏督飭屬員依限審結毋許遲延茲據御史馬相如奏稱

各省積習相沿於命盜重案及尋常詞訟因循延閣以致小民冤屈莫伸並於京控案件藉詞延宕久不審結等語覽奏實堪痛恨嗣後各直省督撫務當嚴飭所屬遇有詞訟案件隨到隨審不得如前積壓並飭定期限期飭屬依限完結至於京控發交各案遇有冤抑必須早為申雪其有逾期未結者卽行奏參予以應得處分毋得瞻徇迴護以清訟獄而恤民生將此通諭知之○諭軍機大臣等德

明奏請飭催俸餉銀兩一摺滄州為梟匪出沒之區現在捻逆甫平仍應巡緝奸宄認真操防該處旗營兵丁應領本年春夏秋三季俸餉米折馬乾銀兩並未給發情形拮据自應迅速撥解以資接濟著官文卽飭藩司先將春夏兩季應領餉項趕緊發給並將秋季俸餉隨後續發毋稍延緩將此諭令知之○又諭劉崐奏籌畫進剿黔苗機宜並請飭撥餉需一摺黔楚交界之區苗寨林立自應會

合各省兵力分道並進方可收夾擊之效席實田已假滿抵省著劉崐飭令該臬司懍遵前旨剋日拔隊會商唐炯張文德等相機進剿毋稍延延該撫所稱湖南現兵二萬餘人勦苗不敷分布必須添募十餘營方可大舉深入所奏自係實在情形惟餉督支絀增兵則力不能給尤賴各省協濟方克集事江南湖北兩省著每月各協濟湖南援黔軍餉銀二萬兩湖南督銷局原有應解江南鹽課釐

金卽可就近撥解湖南又督銷局有鄂釐一款湖北協濟湖南之款亦可於此項內劃撥所有不敷之數再由各該省委解設此兩項內尚有贏餘仍由督銷局分撥各省一轉移閒兩有裨益卽著曾國藩馬新貽郭柏蔭何璟遵照辦理現在捻逆肅清亟盼貴州軍務早平進圖滇省以清南服各該督撫等素顧大局諒必合力同心肅公迅奏也將此由五百里諭知曾國藩馬新貽郭柏蔭劉崐並傳

諭何璟知之。○勇直隸永清殉難生員趙文林等紳民婦女五十六名口分別旌卹如例並予建祠。○丁亥諭內閣都察院奏據湖北民人劉照棠以隄潰不修等詞赴該衙門呈訴前因湖北民人葉華品呈控隄潰停修全境被害等情當經降旨交該督撫體察情形妥籌辦理茲復據民人劉照棠呈稱江陵隄工日久仍未修理民命攸關豈可任意延宕著該省督撫飭屬勘明趕緊興辦毋再玩誤

尋李鴻章等奏勘估江陵潰隄工程浩大現值春汛將臨未便修築擬俟秋後再籌辦理報聞。○諭軍機大臣等金順奏進紮榆林連日獲勝並籌保完區一摺金順於七月十三日馳抵榆林督飭官軍進剿截擊綏德州竄匪大獲勝仗追至雙廟灣巡檢司一帶敗匪不及入巢紛紛西竄復經我軍將周家嶺等處賊巢踴毀金順甫抵榆境卽能踴壘焚巢所向克捷實屬謀勇兼備仍著該副都統督

率所部會合陝省官軍將北山一帶土回各匪節節掃蕩迅殄逆氛庫克吉泰劉典務當檄飭各營與金順之軍聯絡聲援視賊所向實力殲除毋令竄近晉邊擾及完善花定甯條梁等處賊匪雖經擊退難保不復圖窺伺著金順檄飭富勒琿等嚴密防範毋稍疏虞陝省剿匪事宜極為喫緊亟盼左宗棠前往迅籌滅賊之方該大臣當督帶兵勇星速西行力圖剿洗以副委任前諭穆圖善飭令富

勒琿來京茲據金順奏該協領在花定一帶防堵該處防務如有可以接替之人著金順另派妥員接辦卽飭富勒琿迅速來京將此由六百里各諭令知之。○派兵部右侍郎黃倬知武舉以吏部尚書單懋謙為武會試正考官翰林院侍讀學士馬思溥為副考官。○戊子諭軍機大臣等本日據軍機大臣呈遞棍噶扎勒參來咨內稱布倫托海賊勢猖獗烏科兩城豫籌防堵恐致虛耗款項可否將

防兵挑派精壯各五百名其烏城之兵責成錦丕勒多爾濟管帶科城之兵分責棍布扎普管帶該呼圖克圖請另調土爾扈特三旗之兵會齊進剿以為三路進兵使賊內變之計布倫托海叛民現竄青格里一帶烏科兩城應防應剿及由何路進兵卽能撲滅之處麟興等諒已熟籌茲覽該呼圖克圖所陳是否可採著麟興榮全錦丕勒多爾濟奎昌明瑞福濟錫綸妥商辦理以期兵歸實用迅殄

逆氛棍噶扎勒參打仗素稱奮勇前調烏城馬匹卽著麟興等趕緊備齊解交以資進剿福濟錫綸此時計抵布倫托海著會同該呼圖克圖督率官兵相機奮擊毋任該逆愈聚愈多致滋延蔓烏科兩城仍著麟興榮全錦丕勒多爾濟奎昌明瑞慎籌防範毋稍疏虞棍噶扎勒參原文均著鈔給閱看嗣後該呼圖克圖遇有應行條陳事宜卽咨明該將軍大臣等附報代遞著福濟錫綸傳知該呼圖

克圖欽遵辦理毋得時發咨文以符體制將此由五百里各諭令知之○賞五城貧民棉衣銀○己丑有流星犯織女大如扇○

上奉

慈安皇太后

慈禧皇太后幸漱芳齋侍午膳○諭內閣翰林院侍讀孫家鼐編修趙佑宸均著在上書房行走孫家鼐並著授奕詳奕詢奕謨讀○諭軍機大臣等蘇廷魁奏榮工情形日變亟待

撥款興辦一摺據奏大河水勢總未暢消各廳要工間有墊動其榮工口門溜勢仍分兩股該署河督亟籌堵合因錢糧料物均不湊手以致水淹漸廣形勢大變該處工程緊要著該署河督會同李鶴年督飭在工各員趕緊先籌防護多派員弁招徠料物以資興辦部餉四十萬兩早經撥給著一面派弁迎提到工剋日興辦部餉未到以前並著李鶴年督飭藩司無論何款先陸續借撥銀一二十

萬兩毋誤要需蘇廷魁等務期搏節動用不得任聽各員藉工糜費其另行指撥之五十萬兩著蘇廷魁等查照部定數目咨催迅解此後口門情形若何並著詳細體察隨時據實具奏目下附近工次一帶飢民散勇雖屬安靜仍著飭令崔廷桂隨時彈壓毋任藉災滋事將此由五百里各諭令知之 又諭鄭敦謹奏通籌河防分認汎地並請飭催鄰軍到防暨西河沿岸卡壘工竣繪圖呈覽各摺

晉省西路逼近陝疆在在均須堵禦現由鄭敦謹通籌沿河各防責令分認汎地以資巡守惟本年節氣較早西河中路之鄉吉北路之河保冰橋早結尤為各防中最要之區卽著照該署撫所請由李鶴年檄飭張曜一軍於汾州府境擇要駐紮宋慶一軍由晉入陝扼紮榆林為晉省西北屏蔽所需軍火仍由豫省撥解豫工正值喫緊籌運一切恐難依時如該軍遇有缺乏鄭敦謹務當設法接濟

以贍鄰軍毋得稍存畛域並著鄭敦謹嚴飭王巨孝閻文忠陳必友等軍於河保以南分段梭巡不得恃有客兵稍涉疏懈晉省黃河每於大雪前後冰橋凝結著李鶴年催令張曜宋慶均乘河冰未沍之先督隊入晉以便詳勘地勢籌備設防庶不至臨時失措口外地方遼闊著定安桂成杜嘎爾率同馬陞酌度情形增調滿漢官兵隨機布置用壯聲威其西河沿岸卡壘修建既已歲事則兵勇有

險可憑不至毫無把握著鄭敦謹嚴檄各軍督率兵勇加意防範圖留覽另片奏請令陳湜暫緩交卸臬篆並免發遣等語已革臬司陳湜獲咎較重且係發遣之員何得仍留臬司之任該署撫仍當懍遵前旨派員署理臬篆所請免其發遣之處著不准行將此由五百里各諭令知之

大清穆宗繼天開運受中居正保大定功聖智
誠孝信敏恭寬毅皇帝實錄卷之二百四十二

大清穆宗繼天開運受中居正保大定功聖智
誠孝信敏恭寬毅皇帝實錄卷之二百四十三

救

同治七年戊辰九月庚寅諭軍機大臣等御

史秀文奏直隸救荒事宜請飭認真辦理一
摺前因畿輔近年被災被擾曾經降旨令該
督查明奏請豁免錢糧以示體恤若如該御
史所奏屬員善為彌縫壓閣騰黃仍行追比
等情實屬可惡著官文嚴飭各該州縣務須
將被災被擾地方輕重情形據實查報不准
稍涉含混仍一面另委妥員詳細覆查如有
不符之處即將該地方官嚴參懲辦毋稍寬
縱另片奏遷安縣知縣胡如川藉捐斂財縱

令戶書俞蔭南等私通賊匪句串惡紳鄭鳴先等說合公事等語所奏是否屬實並著官文確實查明秉公參辦不得稍有徇庇原摺片均著鈔給閱看將此諭令知之○兵部以武會試中額請得旨滿洲蒙古取中三名漢軍取中二名奉天取中一名直隸取中十四名陝甘取中一名廣東取中九名河南取中五名山東取中四名江蘇取中三名安徽取中二名山西取中五名湖北取中三名湖南取中三名四川取中七名廣西取中一名福建取中四名浙江取中七名江西取中六名○辛卯諭內閣彭玉麟奏回籍起程日期各摺片據稱水師分汛各事宜俟交代清楚明春再行起程將來到家後遇有緊要事件儘可東赴江皖商推料理等語覽奏具見惻忱前因彭玉麟奏請終制情辭出於至誠是以准予開缺回籍補行守制以遂孝思嗣念長江水師營制初定曾國藩調任直隸總督仍

須該侍郎始終經理方為妥善是以諭令於守制百日後迅赴江皖地方扼要駐紮並不畀以員缺實於責成之中仍寓體恤之意茲覽該侍郎所陳各節籌畫雖極周密而相距較遠深恐呼應不靈且責任不專亦不足以資統攝著該侍郎將水師分汛各事宜布置周妥明春再行回籍一俟百日期滿即著懷遵前旨迅赴江皖擇地駐紮用資控制以副朝廷廑念江防曲體重臣至意諒該侍郎素

矢公忠必不至再行瀆請置身事外也○諭軍機大臣等曾國藩奏新造輪船工竣並陳上海機器局籌辦情形及請獎上海通商委員各摺片中國試造輪船事屬創始曾國藩獨能不動聲色從容集事將第一號輪船造成據稱堅緻靈便可涉重洋此後漸推漸精即可續造暗輪大艦並陳製器設廠及添建譯館各情形足見能任事者舉重若輕深堪嘉尚馬新貽計抵新任即可會同丁日昌按

照會國藩李鴻章籌辦規模悉心講求以期周妥。設局以來各該委員等均屬著有微勞。所有尤為出力各員。准由曾國藩會商李鴻章。為新貽丁日昌酌量奏保。其上海通商委員辦理洋務亦臻妥協。並著曾國藩等擇尤請獎。以示鼓勵。將此由四百里各諭令知之。○又諭。延煦奕榕奏展邊事務未能即時查辦一摺。奉天展邊一事。前本諭令都興阿先行派員查勘。俟延煦等到後。一同出邊覆勘。

現在延煦業經馳抵奉省。而都興阿請假回籍。尚未回任。據延煦等奏稱。轉瞬冬令。邊外堅冰深雪。車馬勢難行走。請緩至明春再行查辦等語。此事關係邊境甚為緊要。豈可再事延緩。都興阿此時計已抵籍。著即迅速起程。馳赴奉天。會同延煦等妥商籌辦。毋庸俟假滿起程。致延時日。延煦奕榕著將應辦事宜。詳細妥籌。先行出邊。不得因都興阿未到。致涉延誤。都興阿回奉後。亦應和衷商榷。不

得。以此次未經出邊。稍事推諉。致干咎戾。將此由五百里各諭令知之。○又諭。定安桂成奏。挑選步隊。請領軍械。歸綏請設糧臺。李鶴年奏。晉防緊急。先飭張曜赴防。宋慶俟假滿後。即飭西征。並請飭山西協濟餉銀。各摺。薩拉齊清水河。現無重兵扼紮。自應添兵協防。定安等擬於綏遠右衛步軍養育兵間散內。挑選一千五百名。製備軍械。派往防守。並另挑馬隊二百名。作為親軍小隊。分派沿河梭

巡偵探。均著照所擬辦理。步隊現已成軍。至應速赴薩清一帶。以資守禦。所需餉銀。即照定安等所請。就近先由殺虎口監督衙門。暫行提銀二萬兩應用。仍俟晉省餉到。再行撥還歸款。著鄭敦謹傳諭該監督欽遵辦理。定安所請歸綏添設糧臺。即著責成與奎妥為經理。不准稍涉浮冒。應需餉項。著鄭敦謹先行籌撥銀十萬兩。迅速解往。嗣後並當源源接濟。毋令缺乏。晉省防務。極為喫緊。張曜一

軍著李鶴年飭令添足十四營迅赴汾州府境擇要駐紮宋慶擬請假回籍省墓著卽賞假一箇月以示體恤現在河水將結著李鶴年飭令宋慶將現有兵勇先行派員統帶由晉赴陝仍一面在東省迅集舊部添足十六營趕緊親督赴陝黃河水橋凝結賊匪每易窺伺李鶴年當懷遵前旨催令張曜宋慶乘河水未涸之先先後督隊入晉籌備設防以免臨時失措李鶴年以司庫窘迫請飭山西

每月協濟餉銀三萬兩亦係實在情形著鄭敦謹按月如數籌解俾資兵食將此由六百里各諭令知之○撥神機營鳥槍五百桿擡槍三百桿鉛丸四萬粒火藥五千斤轟藥五十斤火繩五千根竹桿槍五百桿給綏遠城將軍定安軍營領用○壬辰諭軍機大臣等前據穆圖善奏請飭左宗棠撥還甘餉當交戶部速議具奏茲據該部奏稱查左宗棠前借洋銀二百萬兩係因酌撥甘省津貼陝軍

酌濟晉防等處客兵散放慶涇一帶甘餉並移徙漢民安撫降回飢民起見又係在左宗棠各省協餉內劃抵本非協甘專款本年左宗棠追捻入直既未另立糧臺亦未另籌協濟不得不提用甘餉軍需不能豫定數目餘款卽不能豫知多寡自不得不先提二十萬兩解甘其去陝較近之甘軍亦不得不於前款內酌提就近撥給該署督所陳各節係於左宗棠奏借洋款及援師赴直各緣由未能

深悉若令左宗棠將此項撥還甘省則左宗棠入直之餉又歸無著各等語穆圖善所奏雖未洞悉源委而甘省兵餉支絀情形朝廷久深廬念左宗棠現已赴陝卽著將前借洋款及關稅銀二百萬兩除入直提充軍餉外餘存若干迅速秉公覈算以一半解甘一半留陝毋得稍分軒輊本年八月間戶部奏准於各海關六成洋稅項下指撥左宗棠軍餉一百萬兩亦著分半解甘毋稍短欠現據湖

廣督臣先後奏報。管理鄂臺王文韶已將九江關協餉二十萬兩。江蘇等省協甘半餉十萬兩。洋稅提撥銀五萬兩。分起解赴漢中轉解。卽著穆圖善派員迎提。以資應用。並著左宗棠嚴飭王文韶等。將應解甘省半餉。隨到隨解。不准遲延。其河南山西陝西湖北四川江蘇應解專協穆圖善月餉。及山東山西河南應解協甘半餉。每月共銀十一萬三千餘兩。著戶部開單嚴催。專解穆圖善軍營。藉資接濟。左宗棠入直。提用洋款數目。並著查明咨部備覈。將此由五百里各諭令知之。○又諭。曾壁光奏。官軍克復平越州城。暨署提督請假。派員暫護提篆。各摺片。逆首金大五。與清黃苗匪勾結。久踞平越州城。經遊擊唐天佑督同孔茂槐等。攻破各門。四面掩殺。該匪奪路奔竄。當將州城克復。此次官軍於收復王卡後。兼克堅城。勦辦尚屬得力。所有在事出力員弁。紳團。著曾壁光擇尤彙案保獎。毋

許冒濫。惟該城與清平麻哈為鄰。守禦極關緊要。該撫當嚴飭馬樹清會同唐天佑將善後事宜。悉心籌辦。毋稍疏虞。並一面咨令唐炯。將平越未投各寨。協同勦撫。以期一勞永逸。署提督張文德。傷病既稱。屬實。著准其回籍調治。因便葬親。以示體恤。黔省軍事。現正得手。著傳知該署提督。於回籍後趕緊料理。仍馳回貴定一帶。督軍進剿。毋庸泥定三箇月假期。藉詞延宕。所有貴州提督篆務。卽著

林從大暫行護理。督飭各軍。妥慎進取。毋稍鬆勁。將此由五百里諭令知之。○奏。已諭軍機大臣等。岑毓英奏。官軍攻克州縣城池。及各路勦賊獲勝一摺。逆匪竄撲滇省。疊陷府州縣城。多處經岑毓英督派各軍。分道進剿。張保和。岑毓寶等。擊退省城竄賊。何秀林。梁士偉等。進逼晉甯。登城搏戰。復經馬忠岑毓寶等。由歸化會合兜剿。攻克賊壘甚多。擒斬偽大將軍馬平。岑毓英親督官軍。攻克

呈貢。斃賊三千餘名。陣斬逆酋馬開義等四十七名。田仲興一軍。勦辦新興賊匪。將該州之上四鄉全行收復。僅餘孤城一座。馬宗龍等進勦馬街踞賊。殲擒殆盡。陣斬逆首衛大將軍等。將馬街土城收復。勦辦均屬奮勉。所有此次攻拔晉甯呈貢。並前克復武定。祿勸。元謀等城。出力員弁。著岑毓英會同劉嶽昭。擇尤彙奏請獎。毋許冒濫。劉嶽昭現駐曲靖。著卽將滇省後路布置穩固。督飭李家福等

由尋甸節節掃蕩而前。與岑毓英諸軍會合。勦洗相機移軍前進。毋事株守。滇省糧路已通。事機較順。岑毓英務當乘勝進規。激江昆陽。以次進復各城。毋稍鬆勁。並咨令馬如龍。及在省司道等將省防密布。嚴詰內奸。邵甸新興之賊。仍責令岑毓英。田仲興等。迅圖殄滅。竄撲武定等處賊匪。尚眾。並飭楊玉科等痛勦。迅將羅次規復。馬街土城。卽著屯毀。以清後患。晉甯等處有無餘匪。並著派軍搜捕。

再行軍必先熟諳地勢。著劉嶽昭岑毓英將滇省各處進兵道路。及賊匪竊踞地方。詳細繪圖呈覽。將此由六百里各諭令知之。尋岑毓英奏。遵查杜逆竊踞迤西數十郡縣。勢甚蔓延。官兵紮營防勦之處。縱橫數百里。謹分別繪圖呈覽。報聞。○補鑄福建邵武縣縣丞條記。從巡撫李福泰請也。○予安徽甯國陣亡同知左紹登祭葬世職。眷屬人等分別旌卹如例。○予雲南晉甯等處陣亡遊擊金長

壽等二十四員祭葬世職加等。○勾到奉天陝西廣東廣西新疆情實罪犯。停決奉天斬犯一人。陝西斬犯一人。餘三十九人予勾。○甲午諭軍機大臣等。前因明瑤等奏籌備經費。安插難民。請飭部撥銀兩。當經降旨交戶部速議具奏。茲據戶部奏請籌撥部款。暨飭催各省欠解銀兩等語。布倫托海亂民亟應及早勦辦。該部因需項緊急。恐外省協撥稽遲。請在部庫撥銀十萬兩。自係為慎重邊防

起見。卽著戶部撥庫銀十萬兩。由順天府迅速委員解往綏遠城。接解烏里雅蘇台。遞解科布多。轉解福濟等兌收。以為布倫托海勦匪及賑卹等項之用。沿途經過地方。不得稍有稽延截留。致誤要需。福濟等卽派員迎提。以期妥速。並著懷遵前旨。將變民認真勦洗。不得再以烏城解馬遲延等詞。藉口推諉。致亂民愈集愈多。迄無了局。其各項難民。亦當妥籌安插。毋稍疏失。其安置伊犁索倫人眾。

前經榮全奏撥庫銀二萬兩。戶部業已撥解。俟此項到時。卽著榮全等會商。將伊犁避難索倫官兵眷口。酌量接濟。並妥籌安插。毋稍疏虞。福濟等卽咨商榮全。並傳知棍噶扎勒參欽遵辦理。至明瑤所稱布倫托海新城一切經費。及進勦軍餉。並官兵應支鹽糧俸銀。共約需數十萬兩。現在布倫托海已復塔城舊制。毋庸另設新城。各項需費。諒亦無多。惟念該處事機正關緊要。不得不寬備餉需。以

期應手。著鄭敦謹於山西欠解新疆月餉項下。提撥銀四萬兩。丁寶楨於山東欠解新疆月餉項下。提撥銀四萬兩。李鶴年於河南欠解新疆月餉項下。提撥銀二萬兩。查照部撥庫銀遞解章程。解交福濟等分別緩急斟酌。動用。毋稍虛糜。嗣後該城一切經費盈絀。由該辦事大臣等隨時覈實具奏。不得紛紛各請撥餉。以歸畫一。將此由六百里各諭令知之。又諭傳諭署安徽巡撫吳坤修。吳坤修

奏密陳皖省實在情形等語。皖省素稱捻藪。近甫肅清。而降眾散勇猶多。全在地方大吏控制得宜。乃無後患。不特投降之營勇。在所當防。卽散歸之降捻野性未馴。亦應妥為撫綏。方免反側。至統軍各將領。扼要分紮。雖屬各有責成。而彈壓稽查各事宜。吳坤修亦不得置身事外。該署撫既攝疆符。責無旁貸。卽著檄飭各將領認真整頓。以靖地方。皖南游民亦當設法防範。毋任滋生事端。長江哥老

會匪溷跡可虞尤應嚴拏懲辦毋稍疏忽該署撫仍隨時體察情形或在省坐鎮或出省巡閱以期妥籌兼顧是為至要○乙未諭軍機大臣等榮全等奏差往俄國辦事章京中途被阻並派員接應索倫人眾各一摺章京薩碧屯等奉差前往俄國斜米辦事行至烏克卡倫被坐卡蒙古人等阻止並聚眾喧鬧打破帳房覽奏各節實出情理之外榮全等以該蒙古人等素性愚頑未便遽行查辦

固是權宜辦法然似此聚眾逞強藐視國法亦不可不加以懲儆著榮全會同麟興錦丕勒多爾濟奎昌明瑤嚴諭該部落所管官員等令其剴切開導將滋事之蒙古人等量予懲辦固不可操之太蹙激成事端亦不得一味姑容致長刁風至所奏擬撤去八卡官兵將昌吉斯臺霍呢邁拉尼兩卡侍衛暫行移入烏克卡附近駐守等語邊界所設卡倫關繫綦重現在分界未定若遽將卡倫移撤恐

俄人得步進步易滋口實榮全等務當熟籌妥商如於分界之事尚無窒礙即可照擬辦理斜米等處應辦之事亦宜早為了結即著飭令該章京等由庫倫取道恰克圖迅速馳往辦理毋稍遲誤其由俄境旋回之索倫部落人眾現既行抵雅爾玉爾地方即著福濟錫綸派員會同榮全派出之員設法接應並遵前旨俟戶部撥款二萬兩解到後酌量接濟妥籌安插將此由五百里各諭令知之○

以正藍旗漢軍副都統安興阿署鑲黃旗蒙古副都統○予陝西固原殉難參將景文眷屬人等旌卹如例○賞普濟堂功德林袁賑小米八百石○丙申諭內閣御史袁方城奏仕途流品日雜請飭考覈裁汰一摺據稱近年捐納人員眾多其中流品混淆請嚴行裁汰等語敕令與民最親必須公正廉潔方足以資治理若如該御史所奏實恐仕途日雜亟須嚴加考覈著各直省督撫於通省州縣

內凡由俊秀監生捐納之員。無論實缺署事。候補隨時面加考試。如有文理清順。議論通達者。方准與正途人員一例升轉補用。儻文理荒謬。卽以原品休致。考試時仍須嚴密關防。毋任代借傳遞。虛行故事。至居官之勤惰。行己之貪廉。雖正途人員亦當一體隨時察看。秉公舉劾。以肅官方。而清吏治。○諭軍機大臣等。有人奏四川石泉縣知縣趙基係銀號鋪夥。在署安岳任內。激成戴姓聚眾一案。

以致冤殺數百人。萬縣知縣張琴。橫恣貪婪。以逼糶為名。遇有米船過往。納錢始放。在任數年。贓逾鉅萬。各等語。州縣為親民之官。豈可任性妄為。若如所奏。則該縣等貪劣殃民。何得稍事姑容。著吳棠按照所參各情。詳悉查明。據實叅辦。毋得稍有徇隱。並據稱四川州縣共一百餘缺。而由捐納得缺者。至六十餘員之多。雖係按例敘補。而正途登進無期。於吏治大有關係。並著吳棠認真察看。如有

於地方不相宜者。卽行叅撤。不得稍避嫌怨。致負委任。原摺著鈔給閱看。將此諭令知之。尋奉安岳縣民因與汎弁口角細故。聚眾入城。係屬知縣趙基辦理不善。萬縣知縣張琴被控多端。其平日不協輿情。已可概見。請分別革任。革職訊辦。至四川州縣由捐納得缺者太多。應遵旨認真察看。如有於地方不相宜者。卽當隨時叅撤。從之。○又諭曾國藩等奏。榮工漫水。漸入洪湖。會籌堵禦一摺。洪湖

水勢自九月初二日後。逐日加長。淮河入湖一段。每多淤沙。騰起漫水。業已南趨。運河東西隄情形。極屬喫重。卽著曾國藩馬新貽。張之萬。丁日昌。會同商酌。寬籌款項。迅將東隄滲脫處所。培築堅固。並將西隄各段。最要工程。趕緊興辦。沿隄各牘洞民工。近多殘缺。並嚴飭各州縣督飭紳董。作速補砌。毋許藉端滋擾。其張福口引河。碎石河等處。應否再加挑濬。以資分洩。並著妥籌辦理。蘇廷魁李鶴

年務當懷遵前旨將榮工亟籌堵合戶部撥款四十萬兩計應解到卽著多備料物剋日興工務於年內肅事轉瞬春水發生恐堵築更為棘手儻該署河督等稍涉迂緩以鄰為壑致裏下河等處完善之區被水浸灌恐不能當此重咎也其部撥河南及各省之五十萬兩仍著蘇廷魁等飛速催提毋誤要需黃河改道及舊黃河並運河各牘壩情形著張之萬蘇廷魁分別詳細繪圖貼說具奏將此

由五百里各諭令知之尋張之萬奏遵查沿運各隄現已一律興修至江境舊黃河及運河各牘壩情形謹繪圖貼說呈覽報聞○又諭崇實奏進勦冤甯夷匪疊勝建南大路暢行現會勦西昌交脚夷巢一摺建南大路因夷匪橫行久絕行旅提督周達武與總兵李有恆丁永陞等由冤甯督隊進攻將阿禹各支及界木大小馬廠等處夷堡先後焚毀並攻破東山寺山腰夷巢斃賊甚多建南道路

一律疏通現會合大兵進駐西昌縣境為逼攻交脚夷巢之計勦辦甚屬得手交脚老巢地險夷悍非痛加勦洗不能盡拔根株著崇實吳棠仍飭周達武等乘此聲威四面雕擊以期擒渠埽穴用竟全功建南善後事宜卽著嚴飭該處地方文武悉心經理其投誠之大小部落及交出被擄漢人並著撤飭在事各員妥籌安插毋令別生事端將此由五百里各諭令知之○又諭伊勒屯奏請飭烏里

雅蘇台將前撥修補軍械銀兩照數籌撥並請催哈密欠解糧石各摺片前諭烏里雅蘇台迅撥巴里坤修補軍械經費一二萬兩茲據伊勒屯奏稱僅領回一千五百兩實屬不敷應用著麟興仍遵前旨籌解該城銀一二萬兩如無款可籌卽於山西解到新疆軍餉內由麟興分撥毋誤要需巴城兵丁乏食著文麟將舊欠之糧米三千石並新撥月糧趕緊籌撥以資接濟將此由五百里諭知麟興

文麟。伊勒屯並傳諭何琯知之。○哈密幫辦大臣景廉奏暫留安西辦理防守催運事宜。並肅逆出關竄擾。邀擊獲勝。得旨該大臣出關後。卽能督軍截擊竄匪。尚屬能事。所有出力及陣亡員弁。著卽會同文麟查明彙案奏請獎卹。並著督飭各地方官及各糧臺設法催運。以濟前敵。毋稍鬆勁。○句到四川情實罪犯。停決斬犯五人。餘三十四人予句。○丁酉。以正白旗蒙古副都統西拉綱阿署鑲黃旗漢軍副都統。正紅旗漢軍副都統希元署鑲藍旗漢軍副都統。○予湖北黃陂等處殉難從九品銜童福林等紳民婦女四十八員名口分別旌卹如例。○追予廣東南雄等處陣亡殉難生員古思義等紳民婦女二千五百三十四名口分別旌卹如例。並予建祠。○追予安徽廬州陣亡護總兵官遊擊何朝亮建立專祠。○追予湖北德安殉難知府易容之建立專祠。子觀揚附祀。○戊戌。諭軍機大

臣等當明阿等奏查辦蒙古越旗種地各戶竣事。請將出力人員獎勵一摺。前因喀喇沁等戶私越郭爾羅斯公旗種地。不遵驅逐。諭令富明阿查明辦理。茲據奏稱。派令副都統全英會同各旗委員將喀喇沁等戶設法開導。俱各情願遷移。並經各該旗分別收領。現在郭爾羅斯公旗地面一律肅清。富明阿辦理此事。自係一勞永逸之計。惟究竟該旗境內。是否尚有逗遛未去之戶。仍著隨時督飭該旗認真辦理。毋得含混塞責。致成未了之局。郭爾羅斯公旗地面。旣經此次查清。嗣後不得再行招募蒙漢各民任意開墾。致礙遊牧。其業經領回各戶。並著理藩院飭令各該旗妥籌安插。俾安生業。至喀喇沁王之戶。該王並未派員收領。經該戶頭目帶領回旗。阿魯科爾沁庫哩拉嗎等二旗之戶。雖經該旗委員帶回。亦未呈遞領結。著理藩院行令各盟長轉飭各旗將收回各戶妥為安置。並令

將收戶甘結迅速補送嗣後務須隨時稽察母任所屬人戶再行越界滋事以杜爭端將此各諭令知之○又諭王通奏漢回構怨日深請飭穆圖善迅赴西甯籌辦及阿家呼圖克圖出口勾結野番各摺片西甯回眾滋事以來屢與漢團構釁近則十大莊等處不法回眾勾致撒拉各回焚掠沙塘川一帶兇殘頗張復因阿家呼圖克圖與之結怨攻屠漢團大肆殺戮情形狂悖已極王通現在親身勸解責令兩造毋再仇殺但須確有把握俾漢回稍息爭端不得一味姑息致該回眾愈撫愈驕也王通當咨商穆圖善妥為籌辦該處難民招撫既有頭緒著王通設法撫恤以安眾心西甯地方變亂若此一切勦撫事宜亟應認真整頓著穆圖善妥籌兼顧相機辦理阿家呼圖克圖未能保護地方致寺院燒毀多處復潛行出口勾結野番欲與回眾報復該野番犬羊成性易生事端著穆圖善王

通傳知該呼圖克圖迅即回寺梵修毋許冒昧從事致貽後患將此由五百里各諭令知之○又諭總理各國事務衙門奏豫蘇閩等省現辦傳教各案中外未能相安一摺據稱河南省南陽教堂一案民人傳帖聚眾其勢洶洶江蘇揚州聚眾毆辱教士曾國藩咨報訊辦稍有頭緒臺灣壯勇殺死教民英桂尚未將辦理情形咨報而該國使臣屢請拏辦正兇情詞迫切等語傳教一事既已載在條

約勢難顯為禁止惟在自端趨向崇正黜邪現在辦理各件務須妥慎籌維當行者就案完結當拒者按約辨明不至日久遷延橫生枝節方為妥善著曾國藩英桂馬新貽丁日昌下寶第李鶴年各將現辦未結之教案迅速設法了結毋稍徇徇致辦理不得其平轉滋流弊原摺著各鈔給閱看將此由五百里各諭令知之○又諭本日據總理各國事務衙門奏現辦傳教各案中外未能相安請飭

迅速完案。並通飭各省按約辦理一摺。已諭令江蘇福建河南各督撫迅速辦理矣。惟思傳教一案。載在條約。自難顯為禁止。惟在修明正學。自端趨向。乃能崇正黜邪。潛消隱患。遇有交涉事件。尤當持平辦理。當行者就案完結。當拒者按約辨明。庶可關其口而奪之氣。嗣後各該地方如有傳教之洋人。務令士民各守本業。不得聽信浮言。無端尋隙。僅有不安本分教士。滋擾地方。卽知會領事官按

約懲辦。必使民教相安。不至釀成巨案。著各直省將軍督撫等。通飭各該地方官妥慎辦理。毋稍偏徇。致滋流弊。原摺著各鈔給閱看。將此各諭令知之。○以吉林查辦越界種地出力。予三等台吉伯彥阿勒達爾希胡等加銜升敘有差。○予因公淹歿孟古勒津旗委員閻都色楞額祭葬卹廕。○予雲南威遠被戕生員曹椿等賞卹如例。○勾到福建湖廣浙江江西情實罪犯。停決福建斬犯二人。湖

廣斬犯二人。絞犯一人。浙江斬犯一人。江西斬犯三人。餘三十二人予勾。○己亥諭軍機大臣等。有人奏兩浙鹽務敗壞已極。連年奏銷缺額過多。請飭整頓一摺。鹽務為國課攸關。自應覈實經理。乃兩浙自試行票鹽以來。徵收課釐。並未按年報銷。辦理毫無成效。亟應妥議章程。期於經久。著李瀚章按照所奏各節。體察情形。應如何興利除弊之處。詳細定議奏明辦理。至販運私鹽本干例禁。尤當

督飭弁兵認真巡緝。不得藉口於化私為官。致滋流弊。其歷年應行報銷之款。卽飭運司趕緊造冊報明戶部。以憑覈辦。另片奏前任運使高卿培罔利營私。辦理乖謬。以致私匪充斥。官票滯銷。又縱令親戚收買私鹽。描擋押銷。告病後逗遛省城。干預鹽務釐務。又與同知汪元祥狼狽為奸。總辦局員候補道馮禮藩昏暗無能。惟該運使之言是聽等語。著李瀚章卽行查明。據實奏參。不准稍有迴護。

隱飾致干咎戾。原摺片均著鈔給閱看。將此諭令知之。尋奏遵查兩浙票鹽近年收支課釐業經報部並無短絀。請仍照舊辦理。高卿培實心任事。查無罔利營私各情。報聞。○又諭侍郎石贊清奏請裁減湘軍移餉濟黔一摺。湖南援黔之兵二萬有餘。月需餉銀十三四萬兩。該侍郎以湘軍入黔不甚得力。請將現有兵勇清查淘汰。以萬餘眾交席寶田統帶扼要駐紮。每月可省銀七八萬兩。卽以此

項按月撥銀五六萬兩。解赴貴州選將練兵。一轉移間。湘黔皆屬合宜。近來黔省軍務漸有起色。未嘗不賴湘軍援助之力。現在匪勢尚熾。該省兵力是否足敷勦辦。著曾璧光斟酌情形詳慎籌畫。務須謀及萬全。方為妥善。另片奏貴州遭亂以來遇賊殉難者固多。捐貲辦團者亦復不少。請飭查明旌卹。並加中額學額等語。著曾璧光督飭各州縣於殉難者迅速查報。奏請旌卹。其捐貲辦團助餉者。

覈實查明具奏。毋稍遲延。原摺片均著鈔給閱看。將此由五百里諭令知之。○又諭劉嶽昭等奏滇省歷年長運粵銅請飭撥款歸還一摺。滇粵銅鹽互易從前辦有成案。自道光十七年起至三十年止。滇省長交廣東高低銅二百三十八萬八百餘斤。計銅價運腳銀二十八萬二千餘兩。廣東應解滇省作抵鹽斤並未分毫報解。現在滇省軍務緊要。餉項不支。所有廣東歷年積欠應解該省銅價運

腳銀二十八萬餘兩。自應陸續籌還。以清舊欠。著瑞麟於廣東所收釐金項下按月劃撥銀二萬兩。由劉嶽昭岑毓英派員赴粵承領轉解回滇接濟軍餉。毋許推諉。將此由四百里各諭令知之。○庚子諭軍機大臣等有人奏河南項城縣知縣張士恭本係幕友出身。廣通聲氣。無惡不作。去臘覆試縣考。因出題豫先漏洩。幾至罷考。遂與諸生為仇。廩生曹澍因控告積匪。聞籠頭。經該縣誣以挾嫌搶

掠詳革鞭責監禁以致各匪愈橫民人張萬經之女被惡匪李同馬幅等搶擄迨馬幅被獲供出夥匪十七人概置不緝遇有詞訟刑求威逼賄賂公行徵收錢糧有正項一兩而納制錢十餘串者抽釐養勇並無一勇該縣生日廣出傳單索取餽送且平日容納流倡在署動經旬月各等語知縣為親民之官豈容任意貪縱若如所奏實屬大干法紀著李鶴年按照摺內所參各情詳細查明據實具

奏毋稍徇庇原片著鈔給閱看將此諭令知之○又諭蘇廷魁等奏河工積習難除請嚴為立法以儆效尤等語河工辦事各員向多積習往往惟利是圖不顧要工現當經費支絀之時尤應力求撙節此次榮工在事文武弁役如有玩視要工及虛糜錢糧等弊即准該署河督等照軍營例便宜行事從重懲辦以儆效尤所有前次部撥各省餉銀並著嚴行催提俾得及早集事迅速竣工有人奏豫

工漫口自上南河以下漫塌口門幾三百丈大溜已掣十之六七在工人員康費侵漁查料及買土者通同作弊上下交欺請飭嚴禁等語現在榮工在事各員難保無前項情弊著蘇廷魁李鶴年確切訪查嚴行參辦並著督飭各該員等迅速辦理毋稍延緩原摺均著鈔給閱看將此由五百里各諭令知之○又諭劉典奏勻協金順月餉暨請撥該軍不敷餉項火藥並請催裁留胡世英舊部一摺

金順一軍現駐榆林歸德堡等處所需月餉暨軍火帳篷等項每年約數十萬兩該署撫擬按月協濟該軍餉銀五千兩其所需軍糧復於每月額協外另籌銀三千兩交地方官採買為協供軍糧之價並酌供帳篷軍械計一年協濟銀十餘萬兩作為協甘之項惟陝省餉源枯竭金順軍營餉需尚多不足若不寬為籌備何以資其飽騰著穆圖善於陝省協濟各項外酌量籌款勻撥毋令稍形缺乏

總兵胡世英所部勇丁。既屬恒怯無用。自應分別裁留。申明軍律。卽著金順就近將該軍嚴行淘汰。並將該勇丁之勇敢安分者。歸併數營。隨同攻剿。以免虛糜。胡世英前次被參各款。仍著劉典咨查辦理。陝省解赴榆綏等處軍火。現須繞行山西。而該省每年所造。尚不敷各軍攻剿之用。所有金順一軍應需火藥。著鄭敦謹隨時製備。就近解榆。以資應用。另片奏米脂賊匪紛擾。請飭金順督軍夾擊。

等語。米脂賊匪現由鎮川堡迤北渡無定河東竄。該縣城防喫緊。又榆米清綏邊境土匪飢民。與戈匪潰勇麇聚。必須兩面夾擊。方可次第殲除。著金順親率所部。由北壓剿而南。並著庫克吉泰、劉典、檄飭成定康、劉厚基等相機兜剿。以期迅掃逆氛。庫克吉泰等另摺奏。現在北山及西路防剿機局似覺周密。惟靖定尚乏防營。擬俟河南援軍抵榆後。飭令金順仍帶所部駐紮靖邊定邊一帶等語。固

為邊防緊要起見。惟該副都統既抵榆林。不必再赴靖定。該處如嫌空虛。著俟宋慶到榆林後。由金順派兵往紮。以昭周密。將此由六百里各諭令知之。○又諭。曾壁光奏逆首投誠。妥為安置。並請飭催實缺總兵赴任。准令辦捐臬司孫亨專摺奏事各摺片。龍貴克復以後。逆首潘名桀及其胞弟潘得明逃竄。復糾合都勻苗酋柳添城等肆擾。經官軍痛剿。潘得明泣勸潘名桀投誠。該逆不從。竄往獨

山。潘得明乃自攜妻子戚屬面縛乞降。曾壁光飭司訊供。尚無偽情。已示以不殺。交張文德管帶使之殺賊自效。固係權宜辦法。藉安反側。惟潘得明隨其兄為亂多年。罪惡甚重。此次窮蹙來歸。難保將來不復萌異志。且潘名桀在逃未獲。尤恐潛通消息。洩我軍情。著曾壁光密飭張文德妥為鈐束。留心體察。如果始終不渝。卽責令隨隊剿賊贖罪。未可驟假之兵。以防反噬。潘名桀係首先倡亂之人。

乃敢怙惡不悛。必須上緊緝獲正法。以洩黔民之憤。並著曾壁光嚴檄各路將領。暨各地方官。會合搜捕。毋令久逃。法網致貽後患。古州鎮總兵劉士奇。請假回湘。計將假滿。現在擒匪蕩平。該總兵自當迅赴本任。以重職守。卽著李鴻章飭令該總兵。毋庸回營。由湘赴任。並著劉崑催其迅速起程。到任後與席寶田等共籌防勦。以靖苗疆。曾壁光請令李鴻章將該鎮所部奇字軍挑撥三千人。派員帶

往貴東。仍歸劉士奇統帶。所需糧餉。仍由原撥省分運濟之處。著李鴻章斟酌辦理。葆亨在湘辦捐。所有各省捐局請獎及催撥餉銀等事。著准其專摺具奏。以免遲滯。將此由六百里各諭令知之。○以陝西汧陽等處勦賊獲勝。賞知府成定康。副將戴光明。遊擊殷忠廷。巴圖魯名號。餘加銜升敘有差。予陣亡副將張詩奇。守備劉再祥。千總李昭明。把總李盛慶等。祭葬世職加等。○予陝西軍營病故

總兵官何紹賢祭葬卹廕。○句到江蘇河南山東情實罪犯。停決江蘇斬犯二人。河南斬犯一人。山東絞犯一人。餘三十八人。予卹。○

辛丑

孝慈高皇后忌辰。遣官祭

福陵。○諭內閣。前因曾國藩等奏請。以候補道高梯補授江南徐海道一缺。當經吏部奏稱。與例不符。令另揀員請補。茲據該督等奏稱。徐海缺關緊要。該員人地相需。請仍准變通

辦理等語。江南徐海道員缺。著准其以高梯試署。以資得力。嗣後不得援以為例。○又諭。李瀚章奏。請飭織造將司局已解款項造銷。仍照部議酌數籌辦一摺。杭州織造衙門織辦一切活計。原屬要需。惟浙省帑項未充。且有撥解要款。前經戶部議奏。如織務實關緊要。款項實有不敷。應由織造會同該撫酌覈籌撥銀兩。實用實銷。摺節辦理。該織造雖有承辦要務。自應會商巡撫量入為出。若如李

瀚章所奏該織造疊催籌解難免顧此失彼。自是實在情形著李瀚章一面督飭藩司力籌報解俾濟要需並著該織造先將司局解過銀錢數目覈實造銷仍照該部奏定之案酌覈籌辦以重庫款而維全局。諭軍機大臣等張之萬奏籌辦江北善後敬陳管見四條並請飭各統兵大臣查明軍營攜帶民婦子女遞回原籍各摺片江北一帶為東南完綸要地年來徵兵籌餉小民生計日艱現在捻患已平土匪亦疊經殲滅亟宜休養斯民冀培元氣尤必妥籌善後以備不虞該漕督以降眾散勇彈壓需人勇隊未可全撤而因於留餉練兵安插將弁各事宜悉心規畫擬在清淮各軍內挑留水陸勇丁數千人自邳州以下分段駐紮將內河各釐卡酌量裁併酌減糧釐停止兩江月協餉銀四千兩其餘釐金桶捐鹽釐協餉各款請飭兩江江西浙江湖南湖北照舊撥解清淮捐輸照舊辦理。

並抽調漕標淮揚鎮標各營更番訓練清淮出力將領與漕標人員挨次輪補以上各條均屬因時制宜卽著該漕督實心經理以為經久之圖不得徒託空言有名無實其兩江江西浙江湖南湖北應解釐金桶捐鹽釐協餉等項並著張之萬咨行各該督撫照舊源源接濟毋稍膜視團練圩寨等事仍著飭令各地方官認真整飭軍營留養婦女人口本干例禁該漕督所稱賊中被掠婦女官軍獲捷後輒以為賊眷挾之而歸自係實情著曾國藩李鴻章嚴飭各路統領確查營中如有攜帶婦女及幼年子女者立時分別遞回原籍交地方官傳知該家屬領回俾無失所儻有隱匿抗不交出者卽著從嚴參辦將此各諭令知之。○以甘肅鎮番縣城解圍並收復裴家營堡出力賞提督陶世貴一品封典總兵官潘福廷副將周思勝潘玉春尹中順張慶雲曹冠斗巴圖魯名號知府蔣德鈞參將

韓廷芝等花翎通判張斌等藍翎餘加銜升敘有差。○追予江蘇各屬殉難布政司理問銜徐大鈞等紳民婦女一千九百二十七員名口分別旌卹如例。○追予浙江杭州各屬殉難訓導華福恩等紳民婦女二百九十九員名口分別旌卹如例。○減免兩浙橫浦浦東袁浦青村四場歉收地方竈課有差。○撫恤琉球國遭風難夷如例。○

上以孟冬時享

太廟自是日始齋戒三日。○壬寅諭軍機大臣等錫綸奏交代印信在科辦理糧餉一摺。錫綸於九月初八日將布倫托海辦事大臣印信派員齎送明瑤俟餉項撥清再行西進。惟布倫托海辦事大臣一缺現已將福濟調補。錫綸尚在科城正可與福濟彼此會商。迅將現到餉項劃撥清楚。後路糧臺安置妥協。卽偕福濟刻期前赴布倫托海及早視事。不得任意遲延。致滋貽誤。滿兵身受寒苦甚堪憫。

惻福濟等當籌畫款項為之置辦衣履以示體恤。起程時仍當斟酌情形設法安插。不得置之不顧。福濟等抵布倫托海後該處一切應辦事宜均當悉心商酌妥籌整頓以靖地方。其由俄境接回之索倫人眾尤應妥為安置毋令失所。將此由五百里各諭令知之。○以候補三品京堂彭久餘為太常寺卿。○以正紅旗蒙古副都統奕貴署鑲黃旗滿洲副都統。○以直隸督帶練軍得力予署提督鄭

魁士優敘。○以神機營官弁在防出力予副都統尚宗瑞等優敘。賞右翼總兵達明阿等花翎。知府常綬等藍翎。餘加銜升敘開復有差。予陣亡驍騎校保全等祭葬世職。○予布倫托海陣亡知州岳嵩武等祭葬世職加等。○癸卯。

孝敬憲皇后忌辰遣官祭

泰陵。○

上以孟冬時享

太廟前期親詣行禮○諭內閣景霖奏請借款移栽樹株一摺

東陵前園海地現有自生小樹數萬棵景霖擬揀選小松一萬九千七百餘棵移栽

陵寢官道陰護風水自應籌撥款項以資應用

直隸遵薊等州縣歷年拖欠永濟籌備兩庫

租銀尚有四萬四千五百餘兩未經報解著

直隸總督飭令藩司無論何款先行如數借

撥解交景霖挪節動用此項借撥銀兩即於

前欠永濟等庫租銀項下由該藩司催徵如

數扣抵○又諭刑部奏解部審訊案內外看

之協領乘間自縊並御史舒明等奏查驗官

犯自盡各一摺協領訥欽布因與副都統希

拉布互相參訐撤任解部嚴訊本月二十六

日在收禁之空房自縊身死是否畏罪所致

抑係另有別情著該部提集案內人證切實

根究該禁卒等如有別項情弊即著從嚴懲

辦○諭軍機大臣等神機營王大臣奏請東

三省舉行冬圍並請飭部議加俸餉各等語

向來奉天吉林兩省均有圍場每屆冬季由

各該將軍等統領官兵進山圍獵黑龍江省

亦有行圍之舉自軍興以來東三省官兵徵

調頻仍且俸餉未能如期照數關領由是行

圍之事久已停止該官兵等弓馬技藝不免

生疏圍場之內游民濶跡日久廢弛實屬不

成事體現在各省軍務漸就肅清東三省官

兵陸續凱撤回旗正宜及時舉行圍獵以復

舊制著都興阿奕榕富明阿德英查照舊章

奏明舉辦其所需經費或於本省籌辦或另

請酌增餉項務須悉心籌畫奏明辦理不准

藉詞推諉一奏塞責至各該省官兵俸餉自

經費支絀久未能如額關文頻年苦累異常

難資操練所有盛京吉林黑龍江三省官兵

應領俸餉或按季全數發給或加成開放著

戶部會同兵部妥議具奏將此各諭令知之

○又諭前因英翰條陳善後章程請撤直隸

練軍留勇扼紮一節。當經諭令都興阿、左宗棠、李鴻章、官文、崇厚、會商良策。嗣經各該大臣先後覆陳。復令神機營王大臣一併妥議具奏。茲據奏稱。撤兵留勇。流弊滋多。請仍整頓練軍等語。軍興以來。因兵力不足。未嘗不資募勇以利征剿。原為救急應變之舉。現在畿輔既經肅清。若仍留勇丁分紮各路。誠恐客軍與土著雜處。未必相安。轉非所以保衛閭閻。英翰所請留勇扼紮一節。著毋庸議。至

直隸營務久經廢弛。前經總理各國事務衙門會同戶部兵部議定。選練六軍。誠以根本重地。當為自強之謀。迨捻匪北竄。直隸官軍打仗。仍不得力。雖云訓練未精。然國家歲糜鉅萬帑金。養此無用之兵。實堪痛恨。此時賊匪既平。亟應將前定練軍章程。從新整頓。曾國藩久諳戎事。應如何因時變通之處。著於到任後詳慎妥籌。悉心經理。務期化弱為強。一洗後前積弊。以衛畿疆。儻因直境甫就。教

平。毗連東豫一帶。應暫撥勇隊以資彈壓。一併由該督斟酌奏明辦理。曾國藩未到以前。官文務飭各員弁照常訓練。不得稍有懈弛。神機營原摺均著鈔給閱看。將此各諭令知之。○又諭左宗棠奏籌防歸綏。派員躡緝游勇。吳坤修奏請派大員督辦省防。長江皖南各釐請歸還安徽會籌開隄事宜。各摺片。綏遠歸化地界極邊。薩托清等處黃流淺漫。防務極關緊要。著左宗棠會商定安等嚴密防

維妥為布置。該大臣請飭袁保恆選募淮軍徑駐歸化。並令其會同定安奏事之處。均毋庸議。陝省匪勢蔓延。左宗棠當統率各營迅速西行。殄除醜類。豫省游勇冒充官軍。於師行前後數十里間。公行剽劫。弁勇亦遭其害。左宗棠雖已派員擒捕。李鶴年當隨時督飭地方官實力嚴拏。按律懲辦。皖境游匪乘機搶掠。去省數里。劫案疊出。哥老會匪到處皆有。尤慮互相勾結。吳坤修現駐壽州。未能兼

顧所有省城防務著卽責成裕祿認真辦理
遇有匪徒滋擾盡法懲治以靖地方山東至
清淮一帶亦有游勇涸跡搶掠行旅並著張
之萬丁寶楨飭屬嚴拏務獲究辦吳坤修所
稱皖餉支絀現聞淮軍議撤請以長江皖南
釐金除每年撥歸水師三十二萬兩外其餘
概歸安徽等語卽著曾國藩馬新貽丁日昌
吳坤修會商辦理豫省決開隋隄借道放水
皖境宿州及靈泗等處必罹重災民命攸關

不可不慎益加慎著曾國藩馬新貽張之萬
蘇廷魁李鶴年吳坤修悉心籌商妥為辦理
毋得以鄰為壑貽害民生將此由六百里諭
知曾國藩左宗棠馬新貽張之萬蘇廷魁丁
日昌丁寶楨李鶴年並傳諭吳坤修知之○
舉行同治六年軍政東河卓異官一員議敘
如例○以安徽官軍會勦直隸山東捻股出
力賞提督鄧得勝總兵官徐名揚副將呂道
宣朱廷芳二品封典總兵官張捷書李華東

趙宜全參將楊步斗郁存仁劉開講張啟才
汪世第遊擊牛書琴陸懷恩陳長勝李占標
鄧成先陳學堂徐思祥侯永固都司江雲鶴
巴圖魯名號知州周光淮副將劉其順等花
翎遊擊魏保洪等藍翎餘加銜升敘有差○
追予江蘇各屬殉難候選縣丞孫需等紳民
婦女一千八百九十二員名口分別旌卹如
例○旌表守正捐軀四川郫縣民趙福祺妻
徐氏

大清穆宗繼天開運受中居正保大定功聖智
誠孝信敏恭寬毅皇帝實錄卷之二百四十三

大清穆宗繼天開運受中居正保大定功聖智誠孝信敏恭寬毅皇帝實錄卷之二百四十四

同治七年戊辰冬十月甲辰朔享

太廟遣怡親王載敦恭代行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵○遣官祭

端慧皇太子園寢

上詣綏履殿問

慈安皇太后安平安室問

慈禧皇太后安至癸酉皆如之○奉

慈安皇太后

慈禧皇太后幸漱芳齋侍午膳○頌同治八年

時憲書○試中式武舉陳桂芬等八十二人

於太和殿前○諭內閣前因福建臺灣鎮總

兵員缺緊要當經諭令英桂等察看劉明燈

能否勝任茲據奏稱該總兵於臺灣重鎮不

甚稱職劉明燈著即開缺交英桂下寶第再

行詳加察看臺灣鎮總兵員缺著該督撫等於通省總兵內揀員調補所遺員缺著朱德明補授○諭軍機大臣等前據李鶴年奏請將應解京協各餉停緩並據蘇廷魁等奏榮工情形變更請添撥部款八十萬兩前次部撥之兩淮鹽釐閩海關洋稅銀二十九萬兩先將兩湖應解京餉截留所撥河南漕折銀二十一萬兩一併由部庫籌撥等語疊交戶部議奏茲據該部奏稱擬再於部庫內撥給

銀六十萬兩並由江海關撥解洋稅銀十萬兩江漢關撥解洋稅銀五萬兩閩海關添撥洋稅銀五萬兩以足八十萬兩之數即著戶部將續撥庫款六十萬兩趕緊措齊仍交順天府領解星速赴工交納並咨行直隸總督飭屬妥速遞解毋稍遲延前次部撥銀兩據蘇廷魁等奏稱尚未解到並著該部飛催沿途各督撫趲解儘承領員弁及地方官任意稽留即著從嚴叅辦江海關等處添撥之款

著曾國藩馬新貽英桂郭柏蔭丁日昌何璟照數籌撥剋日起解並將原撥兩淮鹽釐閩海關稅各按部撥之數解清以重要工蘇廷魁等請先將湖廣京餉截留之處著毋庸議河南漕折一項前因李鶴年奏報除留支報解外尚餘徵存銀二十一萬兩是以該部照數奏撥該署河督等何得又以丁漕所入不敷率請改撥著仍著戶部原議辦理該省京餉已准緩解其各省協餉仍著李鶴年設法

籌解毋得藉端推諉其鹽斤加價錢文准其暫行留用一俟司庫稍充仍照戶部前奏積存報解彌補此項工需晉省應解豫軍防晉協餉每月三萬兩著鄭敦謹按月源源接濟毋令缺乏當此經費支絀之際此項工需部帑已及百萬外省協餉七十萬尚不在內果能搏節動用涓滴歸公自敷應用該署河督等原奏輒以從前歷次大工經費數目比較是於釐剔弊端力禁浮冒等事尚未認真整

頃蘇廷魁李鶴年各當激發天良嚴飭在工員弁潔己辦公務期工堅料實年內合龍以慰廛繫方為不負委任將此由五百里諭知曾國藩馬新貽英桂郭柏蔭鄭敦謹蘇廷魁丁日昌李鶴年並傳諭何璟知之○又諭前因伊勒屯等奏巴城兵勇乏食請催解新疆軍餉一摺當降旨交戶部速議具奏茲據該部奏稱遵查巴里坤餉銀據烏里雅蘇台將軍於本年四月間奏報解過張和等軍銀一

千兩巴里坤銀五千兩嗣又於六月報解銀三千兩九月報解銀一千兩伊勒屯所稱領到銀五千兩自係因六月九月續解銀兩尚未解到惟該城歷次請撥餉銀為數雖多而報解實屬無幾總由各該省督撫視新疆餉項為緩圖未能源源解往間有解到餉銀而各城需用甚急又往往不敷分給亟宜籌撥以恤兵艱等語著麟興在各省解到新疆餉銀內卽行提銀二萬兩派員解往巴里坤並

知照伊勒屯等派員迎提並將伊勒屯等前奏請撥軍需經費臺站等項銀一萬六千兩統於新疆餉內酌量分撥其巴里坤月餉並著麟興查照原定各數目陸續解交毋任缺乏各省奉撥新疆月餉山西除劃撥庫克吉泰銀二萬五千兩外按月應解一萬兩山東按月應解三萬五千兩河南按月應解二萬二千五百兩直隸按月應解二千五百兩自五年九月奉撥起至本年九月止山西除已解外欠解銀二十五萬四千兩山東共應解銀九十一萬兩分毫未解河南除已解外欠解銀五十七萬七千兩直隸除已解外欠解銀五萬五千兩現在巴城軍餉奇絀著官文鄭敦謹丁寶楨李鶴年嚴飭各該藩司迅將以上欠解新疆餉銀陸續籌措解交烏里雅蘇台卽由麟興分撥各城應用並著麟興於各省解到銀兩內卽將巴里坤應撥餉銀按照該部奏案如數分撥以濟要需毋稍玩誤

將此由五百里諭知官文麟興。鄭敦謹。丁寶楨。李鶴年。伊勒屯。並傳諭何瑄知之。○以河南官軍勒平捻逆出力。賞提督馬德昭程之偉。白玉翎管各一支。白玉小刀各一柄。火鐮各一件。大荷包各一對。小荷包各二箇。總兵官蔣東才。李寶林。正一品封典。總兵官董建西。劉廷保。英。由慶和。副將莊啟元。參將康如年。陳繼昌。郝勇。剛。孫金彪。楊鴻禮。遊擊徐效孟。李葆璿。馮桂增。鄧林椿。宋得勝。吳守義。牛

如。蘇。將廣明都司李大川。同知張同方。巴圖魯名號。知府劉成忠。副將永奎等。花翎。鹽大使。何桐楫等。藍翎。餘加銜升敘有差。予陣亡遊擊苗祥麟。防禦春凱。州判趙雲。壽縣丞劉昌祺。守備陳永春。把總趙占一。外委王應魁等。祭葬。世職加等。○乙巳諭內閣。前據山東職員張維均等。遣抱以奉委被押等詞。赴都察院呈控。當交麒麟慶親提嚴訊。茲據該都統審明確情。定擬具奏。此案伴官張維均。以建

昌縣舊有秀塔書院一區供奉

至聖先師神牌。道光年間。因書院湫隘。該縣另行建立。

文廟奉祀。將舊有書院改為辦差公所。交鄉約鋪戶人等承直看管。張維均。輒以鋪商霸占。為詞。邀同建昌縣生員燕淑德。赴衍聖公府蒙稟。孔祥珂。派該伴官前赴建昌縣投文。並未令其查辦。該伴官復邀齋奏官劉卓漢出口。妄稱公府委員。聽信前署洙泗學錄孔

憲忠一面之詞。擅率生童將

文廟神主。那移辦公處所。經麒麟慶。查明孔祥珂。將該伴官等管押訊究。復砌詞遣抱赴京呈訴。雖訊係虛誣。尚未始終狡執。著照麒麟慶所擬。將該伴官張維均。並隨同妄控之齋奏官劉卓漢。解交衍聖公孔祥珂。查明斥革。酌量懲處。生員燕淑德。雖據供稱呈詞內姓名。係孔憲忠。冒名捏寫。孔憲忠現未到案。難保非飾詞誣卸。惟既知悔悟。著免其斥革。交建

昌縣嚴行管束。毋許復出滋事。在逃之學錄孔憲忠。生員郭春耀。均著先行斥革。仍著嚴緝歸案。訊結。前署建昌縣知縣耆齡。巡檢王清。被控各節。既無其事。著無庸議。

文廟奉祀神牌。已經該地方官率領士民請還。卽著敬謹安設。以重祀典。衍聖公孔祥珂。劉縣行查。本有未合。惟張維均恃劉招搖。非其意料所及。所有孔祥珂失察處分。著加恩寬免。○又諭。前因熱河總管奏承德府州縣

等欠交兵米。當經諭令直隸總督勒限嚴催。茲據文錦奏稱。該處欠交同治五年分兵米。業經全數交倉。惟前任代理平泉州知州金齡所欠咸豐十年分兵米一千七百餘石。僅交過五百石。所欠尚有一千二百餘石之多。兵食攸關。豈容任意延宕。著官文再行嚴催。飭令該員將欠交米石埽數完交。毋許玩誤。此後應交該處米石。仍著年清年款。以裕兵食。而重倉儲。○丙午。諭軍機大臣等。有人奏

已革雲貴總督張凱嵩。前在廣西辦理軍務。避重就輕。居心壅蔽。克復山澤後。泗郡乞援。擁兵不救。以致泗城歸順。龍州相繼失陷。縱寇殃民。咎有應得。該革員升任雲貴總督。不願赴任。屢次藉詞遷延。平日貪婪。官民交怨。擁貲何止百萬。請飭罰銀充餉等語。張凱嵩現避雲貴。朝廷洞燭其情。是以將其革職。至在廣西巡撫任內。貽誤軍事。婪索屬員。如果屬實。大千法紀。蘇鳳文久官粵西。知之必悉。

著卽確切查明。據實具奏。毋稍徇隱。原摺片著鈔給閱看。將此諭令知之。尋奏遵查。張凱嵩服官西粵。歷辦軍務。並無貽誤。擢任巡撫。後整躬率屬。亦無婪索各情。報聞。○又諭。鄭敦謹奏。請令已革臬司暫緩交卸。並修理包頭濠牆各摺片。前因陳湜係發遣之員。不應仍留臬司之任。諭令鄭敦謹派員署理。茲據奏稱。晉省河防喫緊。該革員暫緩交卸。集篆辦理防務。呼應較靈等語。現屆河冰將凍。宜

川等處賊匪竄擾沿河防守自關緊要既據鄭敦謹一再陳奏姑照所請准令陳湜暫緩交卸卽責成該革員督率兵勇於永甯吉鄉河曲保德等處分投布置嚴密防維儻任令陝匪一人一騎渡河則是一誤再誤定將該革員加等治罪並將鄭敦謹一併從重治罪決不寬貸包頭地方無險可扼現經該處商民濬濠築牆辦理團防著卽飭令馬陞及在防員弁督率催辦藉資捍禦並著定安桂成將薩托清等處防務加意圖維毋稍鬆懈將此由五百里各諭令知之○又諭前因晉省防務喫緊屢經諭令劉崐飭催臬司將益澧迅卽赴任現屆冬令河冰凍結防守尤關緊要該臬司假期已滿著劉崐迅催蔣益澧懷遵疊次諭旨剋期起程星速赴任接辦河防毋再遲延干咎將此由五百里諭令知之○又諭馮子材奏廣遠南太鎮安各邊境漸次肅清一摺廣西慶遠南甯太平鎮安各屬匪

勢延蔓經馮子材分飭各營痛加勦洗將各處匪巢攻拔多處左江軍務已稱得手而右江路匪吳亞終勾結鎮遠上映向武下雷各積匪竄併平馬嘯聚感墟滋擾天保縣屬下崗一帶復經馮子材親往龍州督隊兜勦疏通右江運道各路積匪均已次第鏟除惟吳逆竄併越南木馬邊隘甚多匪勢尚熾亟應迅速翦滅著蘇鳳文馮子材會商調度將積年巨匪趕緊掃除並將各邊隘迅圖廓清以弭後患再廣西記名提鎮人員中如有曉暢戎機長於訓練能實心實力整頓營務者著蘇鳳文悉心查察出具切實考語隨時奏聞候旨錄用將此由五百里各諭令知之○派惇親王正紅旗滿洲都統景壽鑲紅旗漢軍都統奕勛校閱中式武舉馬步射技勇○丁未

上御養心殿引見中式武舉親定甲乙○諭軍機大臣等庫克吉泰劉典奏西路各軍追勦

賊匪情形一摺雷正綰黃鼎所部在靈涇一帶勦賊疊勝總兵黃超奪亦於甘泉境內擊敗董志原竄匪餘賊糾黨攻撲宜川縣城復蜂聚於絳桃村經庫克吉泰等檄令張雲松嚴守要隘扼賊南竄之路並飭劉端冕等分道援勦著卽催令該員等迅速前進務將此股賊匪盡數殲除毋令竄逸涇靈境內現無賊蹤邠三中宜等處防範雖嚴尤當格外慎重免致逆股尋隙內犯至邠延一帶兵力尚單董志原回逆糧盡計窮難保不圖竄往肆行擄掠該處防勦均當妥籌兼顧左宗棠已飭卓勝軍先行入關卽著庫克吉泰劉典檄飭該軍迅赴宜川將該處賊股勦盡卽會同劉端冕所部扼要駐紮毋任匪蹤東竄左宗棠仍當督率各軍剋期入陝相機勦辦以竟全功將此由五百里各諭令知之以候補總兵官楊復東為四川北鎮總兵官○以繡書房行走人員五年期滿予主事慶春等

升敘有差○以江南淮安等處漕糧試行海運出力予知府沈壽嵩等加銜升敘有差○資河南榮澤中牟尉氏鄭鄆陵淮甯西華扶溝沈邱項城武陟修武河內十三州縣被水災民一月口糧○戊申

上御太和殿傳臚賜一甲陳桂芬謝子元張光斗三人武進士及第二甲劉金華等十三人武進士出身三甲馮楚燊等六十二人同武進士出身○己酉諭內閣御史周恆祺奏軍務漸平亟需整飭吏治敬陳管見一摺所奏不為無見朝廷政令務在必行乃如清積案行保甲屢經諄諄訓諭而各省實力奉行者甚少嗣後著各該督撫遇有通諭事件務飭各屬實力奉行不得視為具文如有仍前延玩者卽行嚴叅其保舉人才近來每以空言列諸剡章殊非覈實之道嗣後中外大臣有保舉人才者著卽臚列事蹟登諸薦牘如有所行與所舉不符者卽治舉者以應得之咎

河南直隸山東等省。差徭最重。兵興以來。民間協濟車輛。尤多苦累。而各州縣親友子弟。幕友家丁。無不擅用差車。實堪痛恨。著各該督撫嚴行禁革。如查有前項情弊。即將濫發。濫應之員。嚴叅治罪。其正項應用車輛。亦不准丁役藉端訛索。以省擾累。至該御史所稱。惜名器減捐納。綜釐局各條。著各該部妥議具奏。○諭軍機大臣等。有人奏江西水勇虛糜餉項。請查明裁撤等語。據稱前甘肅臬司

劉于濤。在籍管帶礮船水勇口糧。均係該紳一人經管。藩司無從過問。弊端不可枚舉。著劉坤一飭令劉于濤。將歷年支銷款目。詳細造冊報銷。如有侵冒浮開情弊。據實叅奏。該省軍務久已肅清。此項水勇。應卽裁撤。以節餉需。如仍須酌留船隻。以備巡緝之用。卽著劉坤一另委妥員管帶。所有勇糧支放。並歸藩司經理。以符定制。所有支應水勇之釐局八九處。應否裁撤歸併。並著該撫查明辦理。

原片著鈔給閱看。將此諭令知之。尋奏遵查。劉于濤歷年支放勇糧。皆造冊報明。善後總局並無侵冒浮開情弊。該員先曾因病告退。已另委道員何應祺接統水師。泉港等處釐局。業經酌量裁撤歸併。報聞。○又諭延煦。奕榕奏遵旨定期先行出邊查勘。並奕榕奏請派署將軍印務各摺片。奉省邊外查勘展邊事宜。關係緊要。茲據該侍郎等奏查渾江東岸地面。尤屬寬遠。風聞該處游民聚眾較多。

開墾日久。地與朝鮮密邇。亟應查勘情形。妥籌布置。該侍郎等於拜摺後。卽行起程等語。現在邊外天氣。雖已嚴寒。但事關查勘邊境。勢難稍緩。所有轅陽邊門一帶。該侍郎等上年未經親歷。及委員已查未查各處。著卽督飭各員親歷周勘。悉心查辦。以副委任。盛京將軍印務。著額勒和布暫時署理。該處地方緊要。該侍郎於巡防控緝各事宜。認真辦理。毋稍貽誤。將此由五百里各諭令知之。○又

諭奉省展邊事宜。關繫緊要。前經諭令都興阿迅速回任。會商辦理。該將軍假期將滿。著懍遵前旨。剋日回奉。妥為籌商。並著德英就近催令趕緊到任。毋稍延緩。將此各諭令知之。○又諭鄭敦謹奏請指撥豫軍先赴榆林一摺。榆林北通蒙古。東鄰河保。為秦晉邊防最要之區。前諭李鶴年催令張曜等先後入晉。原以宋慶一軍兵力較厚。於冰橋未結之前。馳赴榆林。豫籌布置。茲據鄭敦謹奏稱。宋

慶現在乞假一月。計督隊入榆。已在三月以外。請飭催張曜兼程趲行。務於大雪以前。由晉抵榆等語。河水為時已迫。且自包頭至河保地段。絲長。結冰最早。開冰最遲。冬防尤為緊要。豈容稍涉疏虞。著李鶴年迅飭張曜速率所部。前赴榆林。毋庸駐紮汾州。以資援應。宋慶籍隸山東。現已請假回籍。著丁寶楨傳知該提督。於一月假滿後。招齊舊部。趕赴晉省汾州一帶。扼要駐紮。不准藉詞逗遛。貽誤

戎事。並著將該提督由籍起程日期。隨時奏報。現在汾州一帶。著鄭敦謹嚴飭陳湜督帶南勇。加意防範。遇有緊急。該署撫即當親身赴汾。增兵堵禦。金順現紮榆林。得張曜援應。一軍聲威更壯。該副都統當與張曜互相聯絡。防剿兼施。以顧秦晉北路。毋稍疏懈。榆綏等處匪勢。鴟張亟應痛加勦洗。庫克吉泰劉典務飭在事將士。與豫軍合力同心。相機奮擊。不得以援兵到境。意存觀望。致賊蹤日肆。

蔓延。將此由六百里各諭令知之。○以御前大臣奕山為上書房總管。○以翰林院侍讀學士梁肇煌為詹事府詹事。○命江甯將軍魁玉在紫禁城騎馬。○以甘肅甯夏滿營緝匪出力。賞協領瑪魯堪等花翎。前鋒罕都吞等六品藍翎。餘加銜升敘有差。○予故湖南學政升任大學士祁寯藻入祀名宦祠。從巡撫劉崑請也。○庚戌。以直隸固守省城並協防運河出力。賞知府劉樹堂都司曾士貴

等花翎知縣王桐吉等藍翎餘加銜升敘開復有差○辛亥諭軍機大臣等前經軍機大臣會同戶部議奏籌撥左宗棠西征實餉當經諭令曾國藩等於各海關六成洋稅項下湊撥銀一百萬兩茲因左宗棠奏請增撥鉅款復據軍機大臣會同戶部具奏分別籌撥左宗棠奉命西征餉項刻不容緩所有前撥之洋稅一百萬兩著兩江閩浙兩湖各總督江蘇浙江湖北各巡撫福州將軍粵海關監

督懷遵本年八月二十五日諭旨將奉撥左宗棠軍餉江海關銀五十萬兩閩海關銀二十萬兩江漢關銀十五萬兩粵海關銀十萬兩浙海關銀五萬兩共銀一百萬兩統於本年年底埽數解齊毋得遲延蒂欠左宗棠所請借貸洋銀一節自可毋庸再議陝西現在無款可籌遇有急需實難設措著山西巡撫於河東鹽課項下提撥銀二十萬兩四川總督於川省鹽課項下提撥銀二十萬兩迅速

解陝仍於四川欠解協甘餉銀並採買甘糧等款及河東欠解甘餉內分別劃除左宗棠於各路協餉到齊後仍將此次提撥河東四川銀共四十萬兩分協甘肅以抵欠款而免膠轕至左宗棠所稱陝西每年缺餉一百四十餘萬兩甘肅每年缺餉三百餘萬兩請自明年為始每年提撥實銀四百萬兩分解陝甘一節歷次戶部奏令各省月協陝甘兩省軍餉統計不下七百數十萬兩此次左宗棠

通盤籌畫僅請撥銀四百萬兩自係為事必求實餉歸有著起見現在正供之外各項收款以釐金為大宗尤以江蘇安徽江西浙江湖北廣東福建七省釐金為最旺著各該督撫等速行定議各該省釐金除必需之款酌留接濟外每省每月究可提存若干迅速覆奏聽候指撥現屆捻匪肅清陝甘軍情正急勦賊之任責在統兵將帥籌餉之事責在東南疆臣均屬無可推諉各該省督撫等受恩

深重。務當秉公酌議。力全大局。以紓朝廷西顧之憂。儻敢各存私見。以本省用項較多為辭。一奏塞責。置西北大局於不顧。則是有心貽誤。必不能曲為寬宥也。將此由六百里諭知曾國藩。左宗棠。又煜馬新貽。吳棠。英桂。瑞麟。鄭敦謹。郭柏蔭。丁日昌。下寶第。李瀚章。劉坤一。李福泰。並傳諭吳坤修。何璟。師曾。知之。○又諭穆圖善奏進剿河州回匪獲勝。請飭速解餉銀一摺。河州回匪投誠後。延不呈繳。

馬匹等項。意存反覆。自難稍事姑容。現經穆圖善派令總兵范銘。攻克綠麻景古城等處賊巢。疊挫兇鋒。剿辦尚為得手。穆圖善現在親赴狄道。督軍進剿。著即激勵諸軍奮力攻擊。迅圖掃蕩。如有畏罪投誠者。當察其是否真心悔悟。不可輕墮術中。致誤戰事。大軍後路尤宜妥籌兼顧。其西甯回匪。仍當會商玉通相機辦理。甘省餉需支絀。軍士枵腹荷戈。殊深廬念。據穆圖善奏稱。各省應解甘餉。除

江西九江關協濟銀二十萬兩。山西河東四川省城解到銀數萬兩外。其餘由鄂臺經收各省協餉。數月之久。仍未解到。著戶部迅即行令應協甘餉省分各督撫。趕緊籌解。源源接濟。並飭鄂臺將勻撥甘省餉銀。速即撥解。毋再延緩。致誤大局。將此由五百里諭令知之。○命工部尚書鄭敦謹。都察院左都御史毛昶熙。吏部左侍郎沈桂芬。鑲白旗漢軍副都統滿慶。在紫禁城騎馬。○壬子。

上奉

慈安皇太后

慈禧皇太后幸漱芳齋侍午膳。○癸丑。

慈禧皇太后聖壽節遣官祭

太廟後殿。

奉先殿。○

上率王以下文武大臣詣

慈寧門行慶賀禮。眾官於午門外行禮。○詣平

安室

慈禧皇太后前侍早膳○奉

慈安皇太后

慈禧皇太后幸漱芳齋侍午膳○甲寅

上奉

慈安皇太后

慈禧皇太后幸漱芳齋侍午膳○乙卯諭軍機

大臣等文麟奏馳抵哈密籌辦情形一摺哈

密自被賊擾後城垣坍塌地方彫敝文麟現

已抵任自應將善後事宜妥為籌辦應否改

設城垣或將舊城重加修葺著即相度地勢

詳慎辦理葫蘆溝等處現有賊匪竄擾並著

派兵梭剿毋任滋蔓威儀等營分紮哈密塔

爾納沁等處如已足敷分布即可將巴里坤

派來之兵撤歸本城惟哈密巴里坤兩處唇

齒相依文麟務當隨時咨商伊勒屯等互相

聯絡以壯聲援哈密軍食缺乏全恃後路轉

運景廉現駐安西著將安敦玉應辦糧石設

法催齊源源運解並著文麟將蔡巴什湖屯

田認真興辦暨塔爾納沁附近雪山一帶屯

田漸次推廣俾資接濟該城籌辦善後及應

發兵餉需用孔亟著鄭敦謹將應解新疆餉

銀寬為籌撥迅速報解並著定安麟興榮全

錦丕勒多爾濟於山西餉銀解到時即行轉

交該城催餉委員押解赴營毋稍延緩嗣後

遇有指撥哈密之餉他處不得擅行截留致

誤要需將此由五百里各諭令知之○丙辰

諭軍機大臣等穆圖善奏官軍渡洮擊賊獲

勝現飭諸軍由高家集進剿一摺河州踞匪

與甘肅省垣僅一洮河之隔經穆圖善親督

諸軍渡河會剿將高家集堅巢攻拔以次平

毀鄧家灣大草灘清水溝蘇家集等處賊堡

共斃賊數千救出難民甚多奪獲軍糧器械

無算剿辦尚為得手所有出力各員并准穆

圖善存記俟續有戰績再請獎勵陣亡將士

並著查明請卹賊匪現奔竄秦子寺勢漸窮

蹙該處城大而堅山高路險必須先將附近

各賊壘掃蕩以全軍四面圍攻乃可一鼓殲滅卽著穆圖善激勵各將弁乘此聲威由巴池溝等處轉戰而前迅復河州為埽穴擒渠之計其投誠良回並著穆圖善妥為安撫以示招徠將此由五百里諭令知之准山東省截留漕糧八萬石賑濟南武定兩府屬災民○丁巳諭內閣前派禮親王世鐸睿親王德長等恭送

文宗顯皇帝聖容

實錄

聖訓前赴盛京供奉尊藏現在業經禮成欽惟我

皇考文宗顯皇帝雲日垂型

乾坤合撰十一年

功文巍煥億萬世

謨烈光昭

實錄

聖訓卷冊閱富昭示來茲今者

上儀疊舉同莅陪都周道兼旬暄和應序禮成之時風清日耀天宇昌明並值

冊

寶

玉牒同時尊虔仰維

在天默佑吉事有祥實深敬慰所有派往護從之王大臣官員等祇肅隨行恪恭將事允宜特加恩欽禮親王世鐸睿親王德長尚書全慶萬青黎署尚書毛昶熙侍郎英元及乾清

門侍衛夫門侍衛暨派出隨往之提調纂修收掌及執事各官並恭送

冊

寶

玉牒隨往執事各員均著交部議敘其由京恭送至山海關之前鋒統領察杭阿直隸道員副將等自關外迎護之侍郎清安副都統清凱府尹恩錫接送隨護之副都統長善安圖署副都統古尼音布並關內外承辦棚座橋

道各官員著查明一併交部分別量予議敘。派出沿途護送滿漢官員兵丁著查明食俸官員咨部議敘。食餉兵丁每人賞給半月錢糧以示朕錫類推恩有加無已至意。○又諭刑部奏遵議已革大員罪名一摺。已革布倫托海辦事大臣李雲麟不知體恤民勇以致造言煽變實屬撫馭無方。該部議以發往新疆係屬照例辦理。惟該革員在新疆獲咎未便再行發往。李雲麟著改發黑龍江充當苦

差以示懲儆。○又諭丁寶楨奏知縣交款解清請旨遵行一摺。山東臨邑縣知縣李毓泰前在署城武縣任內交代逾限。經丁寶楨奏參革職暫予留任。茲據該撫奏稱該員交代遲延實因捻逆竄擾道路戒嚴以致應解銀兩未能及時起解。被參後隨將正雜銀三千四百兩零解赴軍營充餉交代業經清結。且該員辦理城守均屬妥協與賊接仗頗有斬擒尚屬著有微勞。李毓泰著准其開復原參

革職處分並免交捐復銀兩。嗣後不得援以為例。○山東巡撫丁寶楨奏省城新建昭忠祠請列入祀典下部知之。○予山東滕縣陣亡守備郭齡鼇祭葬世職加等。○蠲緩山東齊河濟陽禹城臨邑陵德德平平原惠民陽信商河海豐霑化東阿濱樂陵歷城長清聊城博平茌平清平高唐夏津莘三十五州縣暨德州東昌臨清各衛被災被擾地方新舊額賦並永阜場電地錢糧有差。○戊午

上奉

慈安皇太后

慈禧皇太后幸漱芳齋侍午膳。○諭軍機大臣等。戶部奏統籌軍需全局並遵議胡大任條陳一摺。軍興以來用兵省分需餉較多或由本省籌畫或由他省協濟頭緒紛繁章程不能畫一。現在髮捻各逆次第殄滅而各省未裁之營尚復不少虛糜餉項伊于胡底著各該督撫迅議章程分別遣留專案奏報其裁

撤各營原撥各省協餉即可概行停解。所有從前協撥之餉著截清年月銀數開單具奏。如有必須協撥者並著專案奏明聽候部議。至陝甘雲貴數省軍務緊要前以籌餉艱難未能大張撻伐現幸中原肅清自可厚積餉需藉資攻勦。前經諭令江蘇江西安徽湖北廣東浙江福建等七省督撫將釐金一項每月可酌提若干接濟外省奏明辦理著仍遵前旨迅速籌議限於年內奏到該督撫等受

恩深重當知顧全大局不至遲延觀望致誤事機。其釐金報部章程並著照兩淮鹽釐格式每年分兩次奏報以歸簡易。至各省軍務既平所有捐輸一款自應專供陝甘雲貴之用除江西一省業經劉坤一奏明辦理外其江蘇等六省亦應倣照辦理著該督撫等一併籌議具奏。原摺均著鈔給閱看。另片奏廣東從前抽釐濟餉坐賈行商一律抽收集款甚鉅自將益漕改為止徵行商不徵坐賈遂

至走漏包私利歸中飽收數大不如前等語。著瑞麟李福泰體察情形應如何將抽釐章程變通整頓之處妥籌辦理原片著鈔給閱看。將此由五百里諭知官文曾國藩馬新貽英桂瑞麟郭柏蔭丁日昌丁寶楨劉坤一下寶第李瀚章李福泰並傳諭吳坤修何璟知之。○又諭侍郎胡家玉奏請濬黃河故道以利漕運一摺黃水遷徙以來不遵故道頻年泛溢堪虞該侍郎擬請趁此時疏濬河身高培河隄令河循故道由雲梯關入海江廣之漕運可行直東之水患可紓並請將直隸山東河南安徽等省及清淮一帶留而不撤之勇各數千人仿古人發卒治河之法令各營將領各帶所部分段挑掘等語果能如此辦理將舊河深通決上游之水掣溜東行自是一勞永逸之計且勇非坐食餉不虛糜尤為策之善者著曾國藩李鴻章馬新貽張之萬蘇廷魁李鶴年丁寶楨吳坤修各按該侍郎

所奏悉心體察彼此會商奏明興辦以重河道而利漕運另片奏製造軍船擬令江西等省先行試辦酌徵本色規復全漕等語著曾國藩李鴻章馬新貽通盤籌畫一併妥議具奏原摺片均著鈔給閱看將此諭知曾國藩李鴻章馬新貽張之萬蘇廷魁李鶴年丁寶楨並傳諭吳坤修知之○命服闋侍郎李鴻藻仍在弘德殿軍機大臣上行走並署禮部左侍郎○命山東布政使潘鼎新赴陝西軍營交欽差大臣左宗棠差委

大清穆宗繼天開運受中居正保大定功聖智誠孝信敏恭寬毅皇帝實錄卷之二百四十四

大清穆宗繼天開運受中居正保大定功聖智誠孝信敏恭寬毅皇帝實錄卷之二百四十五

此卷係在官日編纂臣等奉 上諭將前奉 上諭各款查核明白後將各款分別開列於左
一、光祿寺卿胡瑞瀾為大理寺卿○賞
一、河南等省丁卯科鄉試年老諸生李步雲等
五十五人舉人副榜有差○撥外火器營火
箭五百枝解赴綏遠城備用○庚申諭軍機
大臣等李鶴年奏檄催豫軍剋期入晉遵飭
張曜改赴榆林請將陝省募勇滋事員弁懲
辦各摺片張曜一軍已於本月初九日北渡
即著李鶴年飛催該提督兼程前進迅赴榆
林與金順聯絡防剿以固秦晉北路並嚴催
宋慶超將舊部招集星速由豫入晉駐紮汾
州以重防務該軍應需資糧等項著李鶴年
先為製備俾宋慶超回豫後即可趨行免致稽
延貽誤豫軍西征餉需軍火轉運最關緊要
李鶴年已派員在澤州地方設局經理並著
鄭敦謹一體督飭妥辦毋令稍有缺乏懷慶

同治七年戊辰十月己未諭軍機大臣等定

安等奏添兵扼守沿河一摺薩托清等處河
段綿長防兵單薄花定一帶時有賊匪竄擾
該處東西兩岸路徑紛歧自應添兵扼守以
固冬防現據馬陞將備調之大同鎮兵派撥
一千五百名赴包頭五百名赴托克托城分
布扼紮即著定安等檄令此項官兵剋期出
口嚴密布置一面就現有兵力加核織巡防毋
稍鬆懈現在時近隆冬河冰將次凍結防務
極為緊要該將軍等務當加意慎重厚集兵

府屬地方於左宗棠督師過境時突有游勇冒充官軍滋事刦搶傷人之案層見疊出該處瘡痍未復何堪再遭擾害即著李鶴年飭令楊長春會同地方官嚴密查拏盡法懲治以靖閭閻並著左宗棠嚴查如有隨營游勇在外滋擾者即照軍法從事毋稍徇護劉典以親軍缺額派副將劉秀桃參將陳鳳林赴豫招募步隊數百人充補該員等輒濫收馬步至三千餘名之眾沿途漫無約束淫掠毆搶疊斃民命閭鄉一縣被害呈訴者已一百五十餘起其他可知殊堪痛恨劉秀桃陳鳳林著即革職並著劉典將縱勇肆擾各節逐細查明按律究治並勒令將犯事勇丁交出押解赴豫正法梟示以昭炯戒此項新募之勇到營後如須酌量遣撤務當另派妥員分起押送毋使再滋事端將此由六百里各諭令知之○湖南巡撫劉崐奏添調兵勇赴黔勦辦苗匪得旨著即檄飭黃潤昌統率所部

迅赴沅州會商席寶田相機前進併力攻勦○以克復甘肅貴德廳城暨北川新城賞同知明良都司銜馬本源等花翎餘加銜升敘開復有差○以科布多守城出力賞土爾扈特郡王凌扎棟魯布親王銜餘升敘有差予陣亡台吉班第祭葬世職○蠲緩河南祥符安陽湯陰臨漳內黃林武安涉汲新鄉輝武武嘉淇延津滑濬封邱考城河內濟源修武武陟孟溫原武陽武二十六縣被災被擾地方

新舊額賦有差○辛酉諭內閣都察院奏江蘇職員趙曾向等遣抱以文員帶勇陣亡懇請優卹建祠等語赴該衙門呈訴江蘇已故候補知府于醅儒於咸豐十年在常州府城殉難業經降旨照知府陣亡例議給世職所請優卹加銜之處著毋庸議其死事地方及該知府原籍准其捐建專祠所有同時殉難之幕友文生沈應乾等九名並准其一併附祀○壬戌命署禮部左侍郎李鴻藻在紫禁

城騎馬○癸亥諭軍機大臣等蘇鳳文奏遠匪屠聚越南復窺太郡現籌進剿並各屬勦辦土匪情形各摺片賊匪吳亞終等遁入越南境內屠聚諒平木馬九葑等處分股擾及太平邊境雖經馮子材派兵分剿攻破丁村壩墟等處賊巢而該匪復敢攻擾龍州下凍竄踞憑祥土州匪勢甚為猖獗太郡各屬與越南邊境相連該處防兵甚單難保該逆不乘隙回竄且此賊一日不平非特內地不能

安堵卽越南邊境被擾朝廷一視同仁亦豈能置之不顧著蘇鳳文會商馮子材督飭官軍會合夷兵迅圖進剿務將此股賊匪悉數殲除不得以賊去稍遠停兵不進數衍目前致成不了之局所有應用軍餉等項並著源源籌解毋令缺乏其太郡防務並著飭令徐延旭添募勁勇認真堵禦毋稍疏懈來賓象州等處伏莽尚多蘇鳳文當分飭在事文武實力勦辦次第廓清並飭賓武永等州縣查

拏逸匪妥籌善後俾地方日有起色另片奏據馮子材咨稱道員覃遠璉收復歸順州城有給賊銀兩之事如果屬實荒謬已極著蘇鳳文確切查明據實奏辦毋稍含混將此由五百里各諭令知之○以陝西道員黃鼎捐輸軍餉永廣四川崇慶州學額一名○以貌法潛逃廣西都司趙佐清革職拏辦○甲子諭內閣都察院奏已革知縣以被參屈抑等詞赴該衙門呈訴據稱已革知縣白振采前

被人以曾充家丁奏參查辦革職茲據呈稱該革員係由書吏報捐向無白升之名被參屈抑等語此案業經查辦議結該革員復於事後呈訴是否被斥挾嫌抑係實有冤抑著曾璧光確切查明據實覆奏已革知縣白振采該部照例解往貴州聽候訊辦所有該革員原呈並著都察院咨鈔曾璧光辦理○又諭英桂卞寶第奏甄別正佐各員請分別降革查辦一摺福建永福縣知縣李心簡年力

漸衰難勝民社。惟係舉人出身。尚堪司鐸。著以教職銓選。上杭縣知縣博爾歡。泰才具平庸。著以府經歷縣丞降補。閩清縣知縣陳寶清。善於趨避。霞浦縣知縣馬騰駿。不洽輿情。均著開缺。留省察看。同安縣教諭李庚。在連江縣教諭任內。營私舞弊。控案累累。按察司司獄魯經。前署龍巖州雁石巡檢任內。擅受民詞。營求署缺。均著革職。晉江縣知縣王衡。泉州府經歷張暉翰。淡水廳艋舺縣丞陳澧。

閩清縣典史邢吉霖。雲霄廳照磨薛光藻。順昌縣典史黃鵬飛。該六員。延不到省。著卽開缺。並著查明實在下落。分別叅辦。諭軍機大臣等。都察院奏。同知陳泰琨。違抱劉升。以捐購軍火赴營投效等詞。赴該衙門呈訴。據稱。該同知籍隸廣東南海。曾隨戈登。辦理洋鎗隊。及協帶常勝軍。克復崑山等處。現在購覓花旗新樣馬槍三十桿。子藥六千出。七門手槍一百桿。銅帽子藥一萬出。步兵槍四百

桿。銅帽十萬顆。洋火藥二千斤。寄存上海。擬赴山東軍營投效。適聞凱撤。請發往雲南各等語。該同知以情殷報效。購備軍火。願赴軍營效力。其志尚屬可嘉。但所稱寄存上海各軍火。是否實有其事。著馬新貽。丁日昌。確切查明。如果所稱軍火等項。實已購備。卽著給咨飭令該同知。攜帶軍火。迅赴雲南。聽候劉嶽昭。岑毓英。差遣。儻所訴不實。並著奏明辦理。抱告家丁劉升。著都察院照例交兵部解

赴江甯。交馬新貽等。質問後釋放。將此各諭令知之。尋奏陳泰琨。捐購軍火。查驗屬實。遵卽飭赴雲南投效。報聞。○又諭蘇廷魁。李鶴年。奏。收到部撥餉銀。擇日興工。請催續撥。及指撥各款。並將榮工情形。繪圖呈覽。一摺。榮工口門。塌寬二百十丈。大溜約有六分。目前客水逐漸見落。亟宜乘此進占。堵合。卽著蘇廷魁。李鶴年。先儘解到部餉。催辦物料。剋日興工。並嚴飭在工文武員弁。力祛浮糜。實心

辦理。如有藉工作弊者。立置重典。以儆效尤。惟戶部前撥庫款四十萬兩。迄今兩月之久。僅據解到頭二三批三十萬兩。第四批迄未解到。指撥各省協款。並無一處報解。殊屬任意延玩。著順天府迅將原撥第四批部款及續撥部款六十萬起解日期查明咨部。一面嚴催該委員等星速趲行。並著官文派委結實可靠之員接解。限十一月上旬悉數到工。沿途州縣先期飭令多備車輛。挨站遞送。毋許片刻停留。儻該員等不知緩急。仍前遲滯。即著該署督府尹等指名嚴叅。原撥兩淮鹽釐閩海關洋稅二十九萬兩。曾國藩馬新貽英桂丁日昌計應早已撥齊。並著將續撥江海關洋稅十萬兩。添撥閩海關洋稅五萬兩。一律措解。續撥江漢關洋稅銀五萬兩。郭柏蔭尙環亦當趕緊籌解。以上各款均勒限十二月以前解到工次。不准絲毫拖欠。該署河督等一面遴派妥員分路催提。一面督飭在

工各員無分晝夜上緊興辦。務於年內歲事另片奏請設立總局。並調員留工掌壩等語。候補道姜麓即著該署河督等飭令駐紮工次會同開歸道綜理總局事務。雲南琅鹽井提舉曹文振著准其留工管壩。暫且毋庸開缺。另選俟全工合龍如能得力。准由該署河督等奏請獎勵。再行開缺。將此諭知萬青藜王榕吉。並由六百里諭知官文曾國藩馬新貽英桂郭柏蔭蘇廷魁李鶴年丁日昌並傳諭何璟知之。○追予山東博山陣亡道員李澤長祭葬。世職加等建專祠。○予山東各屬殉難拔貢生吳鵬等紳民婦女二千五百四十五名口分別旌卹如例。並予建祠。○乙丑諭內閣御史袁方城奏故員濫列鄉賢請旨飭查一摺。據稱前四川巴縣捐納訓導廖春瀛學問平常。並無片善足述。該縣紳民濫舉鄉賢。遠近傳為笑柄等語。著四川總督學政秉公確切查明。據實覆奏。○又諭穆圖善奏

部駁保舉人員戰功卓著。仍懇加恩獎勵等語。甘肅署蘭州府知府舒之翰。隨營轉戰。歷有年所。疊次督軍攻克渭源狄道等城。尚屬出力。著准其免補知府。遇有陝西道員缺出。奏請補授。並賞加布政使銜。○諭軍機大臣等。穆圖善奏官軍擊退徽成逆回。遣散靜甯土匪。並清水縣城解圍。請將辦事回目的保各摺片。徽成兩縣回股。經教天印傅先宗等合力勦擊。賊眾紛走。境內一律肅清。其靜甯土匪亦經舒之翰等將首犯樊幗。喝擒拿正法。餘匪分別遣散。辦理尚屬認真。該州與清水相距甚近。無兵防守。仍恐為竄匪所乘。卽著檄飭舒之翰等。責令張貴率領所部分駐水洛城等處。並令善山保帶領安楨桐二營分駐古城一帶。以資保衛。崔三大股猝撲清水縣城。副將敖天印親督各營乘夜潛襲。斃賊甚多。城圍得以立解。惟訊獲賊供該逆意欲直犯秦州。以圖飽掠。該處尚稱完善。久為

匪黨垂涎。仍著嚴飭該副將督率兵勇相機堵禦。毋得稍有疏虞。匪首楊生魁等。在同心城滋擾。經回目馬潮青馬忠海等將首夥各犯槍斃。救出難民。地方賴以安靖。該回目等居心樸誠。甚屬可嘉。所有此次出力紳民著准其擇尤酌保數人。以昭激勸。將此由五百里諭令知之。○又諭定安等奏請催山西巡撫籌解欠餉等語。據稱歸綏一帶防兵欠餉甚多。烏蘭察布伊克昭兩盟官兵共欠領津

貼銀十二萬餘兩。綏遠右衛土默特大同鎮各營官兵欠領口分四箇月。察哈爾各起官兵欠領口分亦將及兩月。現值冬防喫緊。自應迅速籌接濟。著鄭敦謹嚴飭藩司。無論何款卽將所欠滿蒙旗綠各營餉銀趕緊如數籌撥。以恤兵艱。而重防務。毋稍延緩。將此各諭令知之。○丙寅諭內閣。曾國藩奏殉難大員政績卓著。懇請優卹一摺。已革廣西巡撫鄒鳴鶴前在本籍江甯省城殉難。當經降旨照

道員例賜卹茲據曾國藩奏稱該故員由守令洊升巡撫均有政績可傳其在江甯殉節時尤為臨難不苟大義凜然鄒鳴鶴著再加恩照巡撫例從優議卹並准其予諡以彰忠節○又諭本日英翰保奏之史念祖任蘭生程以輔桂中行胡玉墀陸迺普裕庚均著送部引見○諭軍機大臣等曾國藩奏老湘營軍餉仍歸江蘇接濟英翰等奏籌撥西征軍餉酌定轉運章程各摺片劉松山所統老湘營餉項向由江南供支該軍現在西征所有餉項自應仍歸江蘇接濟即著馬新貽丁日昌每月協撥該軍餉銀六萬兩以資飽騰惟靈寶等處糧臺及清江轉運局均將次第裁撤此後協撥該軍月餉著丁日昌委員解交湖北省城甘肅後路糧臺接收江蘇每月尚有應協左宗棠穆圖善軍營餉三萬兩劉典軍營餉一萬兩著一併解赴湖北均交陝甘委員轉運由襄陽老河口登陸入關著郭柏

蔭何璟查照辦理其從前積欠劉松山軍餉銀九萬九千餘兩曾國藩已飭湖南督銷淮鹽局每月籌解銀一萬兩解交甘肅後路糧臺轉解該軍分作十箇月解清仍著馬新貽隨時督催以清積欠至郭寶昌西征月餉除山西月協一萬兩湖南月協五千兩外英翰等現擬於皖省月協該軍餉二萬五千兩暨隨時找補不敷之數均解交湖北甘肅後路糧臺轉解潼關由郭寶昌派員接收並著郭柏蔭等督飭局員遇皖餉解到即行轉運入關以期迅速山西月協之一萬兩由左宗棠隨時催解郭寶昌軍營兌收至湖南每月應解之五千兩何以奏定後並未撥給著劉崐於本年十月起按月照數迅解湖北轉運局運赴前敵不得再有遲誤其十月以前應解之數仍著解赴安徽俾吳坤修得以找發欠餉毋誤要需將此由五百里諭知曾國藩左宗棠穆圖善馬新貽郭柏蔭丁日昌劉崐英

翰劉典並傳諭吳坤修何璟知之予故吏部左侍郎吳存義祭葬如例予安徽軍營病故總兵官柳壽田祭葬卹廕入祀蕪湖縣暨湖南長沙府原籍昭忠祠○句到直隸山西熱河情實罪犯停決直隸斬犯二人絞犯二人山西斬犯一人餘三十七人予句○丁卯以神靈顯應加江蘇揚河廳

康澤侯封號曰綏靖○引見考取漢軍機章京人員得旨李耀奎李方豫沈成烈李士彬

丁鶴年沈源深魏邦翰陳毓秀馮光勛李固恆李芳柳余聯沅蕭韶方恭銘莊子楨黃兆樾祝維城曾長治柳長庚孫紀雲俱著記名以軍機章京補用○戊辰諭軍機大臣等劉嶽昭奏進剿尋匪疊勝並親赴文筆山相機布置及覆陳到滇後籌畫情形各摺尋旬賊匪經李家福等連番勦擊斬獲甚多而嵩明踞匪分路出巢希圖牽掣兵力劉嶽昭抵文筆山法鼓山察看情形將各要隘嚴為防守

李家福等復將新莊魯背等處賊壘乘勢環攻賊不敢出其法鼓山左右村莊及小坡賊壘一律攻克勦辦尚屬得手惟北路餘匪勢仍鴟張該督現已馳回曲靖自當嚴飭李家福全祖凱督率各軍迅拔尋城不得以東路稍清輒形鬆懈至覆陳辦理梁士美等各節尚屬事出有因該督身任兼圻受恩不為不重滇省軍事方棘務當與岑毓英等和衷共濟綏奠邊陲其於捷報掩飾等情尤當存有

則改之無則加勉之心方為不負委任劉嶽昭計已入滇著卽檄飭該道員會同李家福等軍分投進剿以壯聲援其省防事宜仍著督飭宋延春等時加防範毋稍疏虞將此由五百里諭令知之○以

文宗顯皇帝實錄告成予留辦館務人員知府王福祥等加銜升敘有差○予雲南尋甸陣亡遊擊張肇培千總梁高興等祭葬世職加等○予雲南邱北等處被戕知縣盛光斗從

九品楊作楫祭葬世職加等○己巳諭內閣李瀚章奏甄別庸劣不職各員請分別改教休革一摺浙江同知胡寶晉性耽安逸難資治理知縣梁匡國體氣軟弱難膺民社該二員文理尚優均著以教職歸部銓選甯波府通判錢恩榮信任丁役輿論未孚著以府經歷縣丞降補准調樂清縣知縣阮恩元病成瘋痰候補知縣謝蘭生年力就衰不能振作均著勒令休致臨海縣知縣朱日升官聲平

常輿情不治試用知縣馬士彥才質陋劣不堪造就杜濇場大使劉湘辦事顛預聲名狼藉著一併革職以肅吏治○又諭山東布政使潘鼎新奏懇恩賞假回籍葬親並帶勇回皖分別辦理各摺片著照所請潘鼎新准其給假三箇月回籍葬親並著於假滿後挑選所部勇丁統帶赴陝聽候左宗棠差遣以資攻剿○諭軍機大臣等曾壁光奏官軍攻克鎮甯苗逆老巢興義縣城被陷旋復成耀星

等軍餉請仍由川省撥解各摺片苗逆黃大老板竄踞鎮甯州十三旗地方窺伺郎岱等城經官軍堵剿獲勝先將羊昌河玲瓏賊壘平毀進攻十三旗老巢陣斬賊酋黃老五唐開科等二十餘名斃賊無算立將十三旗克復該逆由關寨遁去即著曾壁光檄飭畢大錫等乘勝接剿務將逆首黃大老板嚴大五等擒獲正法以淨根株六合團首黃汰尚踞烈山堡恐與各屬餘匪勾連麇聚復肆蔓延

並著曾壁光嚴督該文武員弁力圖聚殲勿留餘孽在事出力各員弁紳團准由曾壁光擇尤奏請獎勵毋許冒濫馬狝金萬照等匪勾結為患曾壁光當檄飭該文武等會合滇軍相機堵剿毋稍疏虞川省添撥陳希祥一軍著曾壁光檄飭迅速赴防與成耀星各將濫練土匪實力剿洗即合軍由安順進剿興義貞豐等處回逆一面檄催葉正邦迅由西林渡江以收夾擊之效成耀星陳希祥兩軍

糧餉軍裝。著吳棠照舊源源撥解。毋令缺乏。將此由五百里各諭令知之。○又諭何璟奏懇恩借撥養廉銀兩。並請飭撥營員俸廉公費等語。據稱該總兵自出征以來。轉戰數省。歷升巴里坤鎮總兵。迄今十載。並未關領俸廉。以致家屬養贍維艱。負累甚重。所奏自係實情。著麟興等於解到新疆軍餉內。即行借撥養廉銀數千兩。由該總兵派員領取。俾資接濟。此項銀兩。俟軍務稍鬆。仍由甘肅藩庫

扣留歸款。至該鎮標各營將備等。應發俸廉及公費銀兩。除已由烏里雅蘇台撥過一千兩零外。仍著麟興等遵照前旨。每月籌撥銀二千兩。以示體恤。將此由五百里諭知麟興。榮全。錦丕勒。多爾濟。並傳諭何璟知之。○以烏里雅蘇台管解巴里坤戰馬出力。予郎中恆慶。以知府選用。並賞花翎。外委白兆熊等藍翎。餘升敘有差。○以貴州興義縣城被匪竄陷。旋即克復。免代理知縣吳保慶護遊擊。

劉官德罪。仍革職留營。○以哈密擊賊獲勝。賞把總石貴四品頂帶花翎。軍功李升有等藍翎。副將芮林等補用升敘有差。予陣亡三品銜軍功張和祭葬世職加等。○予浙江各屬殉難知縣陳鴻棟等紳民婦女三百三十六員名。口分別旌卹如例。○庚午改丁憂杭州將軍連成為署任。○句到朝審情實罪犯。停決斬犯一人。餘十八人。予句。○辛未諭內閣。毛昶熙奏查勘

永陵河工。酌擬辦理。並開單繪圖呈覽一摺。永陵河工。既據毛昶熙詳細查勘。自應將此次衝開水口。照舊修築。其河身石堤等工。均宜分別挑挖平墊。並添築月堤。以期經久。庶草倉蘇子二水安流。互相環繞。至所稱本年太歲在辰。來年在巳。方向均不宜修。應緩至同治九年再行開工等語。著工部按照該署尚書咨送清冊。確覈銀數。先行存案。俟來年冬季再行咨明欽天監選擇開工吉期。奏派承

修大臣敬謹籌解以昭慎重○又諭本年各直省辦理秋審人犯經刑部由緩決改情實者陝西省有五起之多該撫並臬司於秋讞重犯未能詳審覈議著交部查明分別議處嗣後各將軍府尹督撫等務當督同所屬遵照定例酌覈案情悉心究擬固不可失之刻覈亦不可惑於救生不救死之說故從輕減總期執法持平無枉無縱用副明慎用刑至意將此通諭知之○諭軍機大臣等丁日昌

奏委解洋槍赴津請飭接護等語神機營備用來福槍現經丁日昌向外洋定購一千桿業已到扈委員齋領仍由輪船解津轉運至京赴總理各國事務衙門交納著崇厚於此項洋槍解運抵津時迅飭經過地方官一體妥為照料接護到京毋得稍有疏虞將此諭令知之○以太僕寺卿倪杰為宗人府府丞○予江蘇各屬殉難布政司理問銜邵大榕等紳民婦女一千八百八十五員名口分別

旌卹如例○蠲緩直隸文安永清清豐安平霸保定宛平固安高陽安元城豐潤寶坻大城良鄉新城蠡雄河間獻阜城任邱青靜海晉無極平鄉永年雞澤清河磁大名南樂懷安玉田甯晉隆平深饒陽深澤藁容城肅甯任邱鄆四十五州縣被水被雹地方新舊額賦○壬申諭內閣前因曾國藩奏稱已革廣西巡撫鄒鳴鶴在江甯殉難大義凜然當經降旨加恩照巡撫例從優議卹並准其予諡

茲據御史朱鎮奏稱該故員前經陸建瀛奏請幫辦城守事宜當江甯失守後該故員扶病避匿民居被賊所殺並非力竭捐軀者比該御史當時在籍鄉居自係確有聞見所有前准曾國藩請將鄒鳴鶴照巡撫例從優議卹並加恩予諡之處均著撤銷○熱河都統麒麟慶等奏請將緝盜官兵撤回歸伍得旨著照所請其彌勒僧格一犯仍著飭令地方官會同蒙古各旗認真嚴密偵緝毋稍疏懈○

癸酉諭內閣吏部奏查明道員例應迴避請
旨遵行一摺浙江督糧道英樸著卽迴避調
補江蘇督糧道所遺浙江督糧道員缺著奇
克坦奏調補本年浙江起運漕務仍著英樸
辦理江蘇起運漕務仍著奇克坦奏辦理俟
該二員經手事務完竣後再各飭赴新任○
諭軍機大臣等李鶴年奏張曜由澤州赴防
宋慶起程來豫並會同蘇廷魁諏吉興工一
摺張曜一軍旣行抵清化鎮卽著檄令由澤

州兼程前進迅赴榆林並咨明鄭敦謹查照
辦理宋慶於本月二十日前由籍起程此時
計已抵豫該提督所部應需資糧等項業經
李鶴年先期飭備自不至於濡滯著卽飭令
肅伍邁行星速赴汾擇要駐紮以重冬防榮
工已於本月二十一日興工先由西壩進占
著蘇廷魁李鶴年督率道廳及在工員弁懍
遵疊次諭旨實心辦理務期年內合龍以慰
廑繫沁河漫口工程並責令尹耕雲綸恩會

同勘辦仍著該署河督等將開工後堵築情
形分晰具奏續撥部餉六十萬兩均由順天
府委員領解著李鶴年派委妥幹員弁沿途
迎提迅速到工毋稍延緩將此由六百里各
諭令知之○又諭蘇鳳文奏接據越南國王
咨文派兵協勦各等語逆匪吳亞終句結越
南降匪謝靜川等憑險抗拒勢甚猖獗前諭
蘇鳳文等迅督官軍會合夷兵夾剿剋期殄
滅茲覽越南國王咨文是其待援情形實為

迫切該國久列藩封恭順有加乃任內地匪
黨擾及邊隅何以副朝廷懷柔遠人之意歸
順憑祥等處旣有踞匪兵力不能兼顧卽著
蘇鳳文馮子材等添募勁旅分道並進越境
疾攻會同越南夷兵兩面夾擊迅殲醜類以
靖邊疆不得以越境險遠置之不問為越南
所笑所需糧運軍火並著蘇鳳文寬為接濟
毋令缺乏再與圖為行軍所必需著該撫將
現在本省用兵及有賊處所詳細繪圖貼說

具奏將此由六百里各諭令知之尋奏本省
太鎮邊境現在已無賊蹤所有越南國諒山
高平一帶進兵勦賊處所謹繪圖貼說呈覽
報聞○湖南巡撫劉崐奏現任江西巡撫劉
坤一妻雷氏因誤聽訛傳劉坤一陣亡遂自
刎以殉應請旌表以彰烈行得旨著照例旌
表○以鑲黃旗蒙古副都統尚宗瑞署正白
旗滿洲副都統○追予湖北通城陣亡縣丞
鄒永詰等祭葬世職生員陳邦偉等賞卹如

例

大清穆宗繼天開運受中居正保大定功聖智
誠孝信敏恭寬毅皇帝實錄卷之二百四十五

[illegible]

同治七年戊辰十一月甲戌朔

慈安皇太后安平室問

慈禧皇太后安至癸卯皆如之○奉

慈安皇太后

慈禧皇太后幸漱芳齋侍午膳○遣官祭

先醫之神○諭軍機大臣等前因棍噶扎勒

參請派烏科兩城防兵。勦賊等情。諭令麟興等妥商辦理。茲據奏稱。烏城防兵僅止一百數十名。係為彈壓地方而設。此項防兵為數

倫托海賊匪近日情形若何亦未便任其蔓

俟商議就緒卽行奏聞如須調蒙古官兵著

卽將備調之五百名派員管帶前赴福濟等

軍營○聽候調遣○棍噶扎勒參請調馬匹○現值

大雪封山。勢難運解。應否派撥前往並著咨

商福濟錫綸斟酌辦理布倫托海雖距烏城

較遠。麟興錦丕勒多爾濟榮全總當隨時確

探情形。與科布多大臣豫商籌辦。顧全大局。

不得一味因循。致有貽誤。將此由四百里各

諭令知之。○以江西南贛鎮總兵官王永勝

所部各營捐輸軍餉永廣江蘇六合縣學額

六名。江甯上元二縣各五名。安徽桐城縣三

名○以四川官軍克復貴州麻哈州城道員

唐炯得旨嘉獎。賞道員張玉文三代二品封。

典參將唐天佑巴圖魯名號餘升敘有差○投

誠賊目黃子剛以守備用。並賞花翎。姚天元

等以藍翎守備用。○以四川雷波廳屬千萬貫土司楊石金子德壽襲職。○乙亥諭內閣。前因江甯克復。洪逆伏誅。經禮部援引成例。奏請編緝方略。時因遺孽洪幅填尚未授首。擒逆亦未埽除。暫緩纂輯。茲復據禮部奏稱。粵擒各逆肅清。請一併纂修方略等語。因思逆氛飄起。流毒海內。十有八年。我皇考文宗顯皇帝命將出師。救民水火。憂勤日昃。

廟略宣昭。朕御極後。欽承

先烈。並仰遵

慈安皇太后

慈禧皇太后懿訓。激勵將士。疊殲羣醜。幸賴

昊蒼默佑。粵擒各逆。次第蕩平。迄今追溯艱難。

敢不毖後懲前。益深兢惕。著照禮部所請。編

緝成書。俾資省覽。卽派軍機大臣恭親王。文

祥。寶。岑。沈。桂。芬。李。鴻。藻。充方略館總裁。督飭

該提調總纂等。詳慎分編。毋遺毋漏。所有應

辦各事宜。並著恭親王等隨時斟酌辦理。○諭軍機大臣等。蘇廷魁奏請展緩朋馬奏銷一摺。河東河標朋馬奏銷。自咸豐十年後均未造報。據蘇廷魁奏稱。咸豐十年冬季俸餉。派兌曹縣倉穀。尚未兌清。河標四營十一年四季兵餉。全未支發。同治元年後。每年僅發過數月。以致朋馬奏銷案內。應扣朋銀若干。買馬若干。無從覈報。自係實情。所有奏銷遲延各處分。均著免其查議。山東軍務。現已肅

清。丁寶楨當飭令藩司。迅將歷年積欠四營官兵俸餉。陸續籌撥補發。俾蘇廷魁得將朋馬奏銷按年造報。不致再事遲延。以重馬政。另片奏請酌加歲料價銀等語。本年南北兩岸。疊出險工。築工又復漫口。購用稽料既多。各廳應辦。已巳年歲稽。例價不敷。著照蘇廷魁所請。上南等七廳工料。准其加價銀四萬八千七百餘兩。以資津貼。此項加價銀兩。著李鶴年飭令藩司。連歲料例價一同撥發。由

鹽釐加價項下彌補歸款。該署河督卽飭廳員依限趕緊購辦。一律報齊。毋稍延緩。將此由四百里各諭令知之。○予故浙江布政使升任福建巡撫徐宗幹入祀名宦祠。從馬撫馬新貽請也。○予安徽故江南河道總督潘錫恩入祀鄉賢祠。從護巡撫吳坤修請也。○丙子諭軍機大臣等。左宗棠等奏陝省西北兩路及東北路勒匪獲勝情形。暨該大臣抵陝籌度軍情。鄭敦謹奏賊犯河干。越河擊退。

各摺片。此次劉端冕吳士邁等軍擊敗鄜州洛川等處竄回。周紹濂擊敗中部賊匪。張岳齡等擊敗隴州等處竄匪。其由鄜東竄回。逆復經劉端冕截勒大勝。延綏一帶土匪亦經劉厚基成定康進勒獲勝。鄜州等處已經肅清。延長等州縣亦漸有肅清之望。左宗棠行抵西安。著與庫克吉泰劉典會商調度。乘此得手之際。督軍分投進剿。所有高連陞等軍著卽照該大臣所擬調撥扼紮。以資分剿。陝

省土匪回各匪。雖以董志原為淵藪。而北路高樹嶺等處有回匪窺伺。河干當此冰橋已結。尤當加意截其東竄之路。歸綏一帶防兵不多。朝廷亦深慮其地廣兵單。第恐淮軍前往扼紮。人地不甚相宜。著定安等隨時斟酌情形。如果兵力不敷。防剿卽奏明於風土相宜地方酌調官兵前往鎮攝。陝省窺伺河干之匪已經官軍擊退。難保不狡焉思逞。總兵馬陞本係專防河保一路。現在添調官兵千名。

卽著鄭敦謹督飭該總兵認真梭巡。遇賊卽擊。並著嚴飭陳湜在中路巡防。不得稍有疏忽。張曜一軍已抵汾境。儘吉鄉有警。准其酌留數營。以厚兵力。宋慶前已赴豫。著李鶴年仍遵前旨。催令該提督統率所部迅速入晉。扼紮汾州一帶。毋稍延緩。郭運昌現在患病。自應暫行調理。前據英翰奏稱郭寶昌傷疾已愈。添兵助剿。卽著吳坤修催令剋期赴陝。並著李鶴年檄令星夜進行。沿途毋稍耽延。

該提督素稱勇敢諒不肯稍有逗遛也陝西土回各匪雖有畏懼乞撫各情該將領等亦同心勦賊但當不執成見以收實效左宗棠久在軍中熟悉情偽必能調度合宜以副委任也將此由六百里諭知左宗棠庫克吉泰定安鄭敦謹李鶴年劉典桂成並傳諭吳坤修知之○又諭穆圖善奏官軍接仗獲勝進紮劉家坪督勦一摺河州賊匪憑山踞險抗拒官軍經穆圖善飭軍分道進攻將清水溝

賊營並黨川堡逆巢攻拔善山保等軍疊敗大股賊匪攻克段家坪等處老巢穆圖善已進紮劉家坪相機調度著卽分飭善山保等軍由田家溝進梅開泰等軍由清水溝進兩面夾攻先克復新路坡要隘以次進攻秦子寺三甲集再圖規復河州毋稍鬆勁據獲賊供稱該逆現勾結撒拉回股俟洮河水結竄擾官軍後路又有約董志原陝回先搶鞏昌糧臺次擾狄道並知會米拉溝回目分擾平

番古浪之說與各營詳報略同該逆等紛紛蠢動無非為圖擾河州起見若能將河城及早收復則各路之賊自將聞而裹足卽著穆圖善一面嚴飭各軍奮勇進勦迅拔堅城一面飛飭教天印蘇家良等迎勦陝回安防南路並飭張萬美黃有才力顧西路疏通運道其省城防務及狄道後路該署督並當妥籌兼顧務臻嚴密將此由五百里諭令知之○署安徽巡撫吳坤修奏現聞湖北蘄水縣逆

匪馮和義等業經拏獲恐其餘黨逃竄境勾結生事擬親赴英霍一帶巡閱得旨皖鄂交界處所既有匪黨潛匿亟應趕緊摻捕以絕根株該署撫現擬巡閱邊境著卽督飭各該地方官加意防範毋稍大意○以陝西郿州等處勦賊疊勝賞總兵官周勝元蕭羣魁副將陳家貴參將龔曉亭劉寶元巴圖魯名號總兵官黃儲寶等加銜升敘有差予陣亡副將劉仕祁祭葬世職加等參將曾恆勝遊

擊魯桂德把總謝文泰祭葬世職○以糧臺支款浮濫革甘肅道員彭思曾職○蠲免吉林雙城堡被雹被水屯田本年租賦並折給倉穀暨修理房間銀○丁丑諭內閣朕叔鍾郡王奕詒秉性端和持躬謹飭自幼仰承皇祖宣宗成皇帝慈愛我

皇考文宗顯皇帝誼篤友于封為郡王並令在內廷行走仍在上書房讀書迨朕御極後派令管理武英殿中正殿事務俱能恪恭將事

勤慎有加前因患病未痊賞假調理復派人看視方冀舊恙漸痊長承寵眷遽聞薨逝震悼實深著賞給陀羅經被派郡王銜貝勒載治卽帶領侍衛十員代朕前往奠醊朕於本月十三日親臨賜奠並派總管內務府大臣崇綸辦理喪事所有一切事宜俱由官為經理其餘飾終典禮各該衙門查例具奏尋議上賜祭葬諡曰端○諭軍機大臣等前據御史秀文奏參遷安縣知縣胡如川藉捐斂財

等情當經諭令官文確查參辦茲復據御史舒明奏稱該員自署遷安以來辦事乖張濫用匪人充當官役遇差苛派紳民該縣民婦薛張氏窩藏賊匪勾串吏役人等肆行擾害該員毫無覺察等語該員前次被參各情尚未據官文覆奏此次復被參劾自應一併查辦以肅官常著官文將前後所參各情確切查明據實具奏不准稍有瞻徇原摺著鈔給閱看將此諭令知之尋曾國藩奏胡如川業於甄劾劣員案内革職至先後被參各款均係查無實據報聞○旌表守正捐軀直隸正定縣民婦康趙氏○戊寅諭內閣衍秀畢道遠奏本屆海運餘米米色甚壞等語著直隸總督轉飭天津道於明歲驗收海運各項餘米務須認真查驗不得草率從事如查有瞻徇通融情弊卽由倉場侍郎據實嚴參山東督糧道費寶於東糧尚知整頓如下屆辦理妥協准由倉場侍郎奏懇恩施又片奏嗣後

籌備抵正米石所有應解隨漕銀兩請照海運正漕之例一律批解等語著兩江總督江蘇浙江巡撫查照辦理○又諭行秀畢道遠奏請派員承修剝船由部籌款一摺插河城河應添排改排運糧剝船既據衍秀等奏稱通庫無款可籌又不便分兩次排造請仍歸戶部籌款撥發並派大臣承修著照所請派魁齡潘祖蔭會同行秀畢道遠覈實估修奏明辦理○改浙江黃巖甯海兩縣縣丞為要缺常山海鹽兩縣縣丞為簡缺從巡撫李瀚章請也○

上以冬至祀

天於

圜丘自是日始齋戒三日○己卯諭內閣劉典奏請將調任道員暫留川省辦理援甘捐項並新章捐輸等語四川東道調任雲南迪南道吳鎬著准其暫留川省將經理援甘捐項迅速造冊報銷限於半年內完竣即行前

赴新任毋得藉詞逗遛所有陝甘推廣新章捐輸著四川總督另行派員辦理○命惠郡王奕詳管武英殿事鎮國公奕詢管中正殿事○以留營效力始終勤奮免己革總兵官伊綿阿遣戍○蠲緩直隸開東明長垣三州縣被水地方新舊額賦地租暨民借倉穀有差○庚辰諭內閣丁日昌奏請將清理詞訟各員酌予獎勵並勒限清理積案各摺片江蘇省兵燹以後各州縣於訟獄事件未暇兼顧案牘日積日多甚至有竊案延閣十餘年未經審定違犯例限久滿仍淹禁在獄者其平常控案拖累尤多新舊交乘百弊叢積現經該撫督率該省藩臬通飭各廳州縣認真辦理自去年五月起至本年七月止蘇屬實在審結註銷息銷者共七千七百餘起本年四月起至七月止甯屬實在審結註銷息銷者共五千餘起各地方收押控告等事責令按月造冊呈送數月以來清理漸有成效仍

著該撫隨時查覈以期日起有功訟風衰息除因循玩愒之各州縣官業經奏請參辦外所有該省結案較多勤明奮勉者准其擇尤酌保數員以資觀感至同治三年以前江北未經解府審定案犯若仍展轉解省未免株連著照所請將未解人犯卽責成該管道府州逐起研審由司覈詳免其提解此次勒限清理自可少申淹滯如各州縣仍有隱匿遲誤等情卽著該撫按章參辦毋稍姑容餘均

照所擬辦理因思案牘積壓不獨江蘇一省為然內外問刑衙門遇有大小案件往往積久不審以致囹圄滯滿並有罪名未定出入人已瘼斃獄中者小民何辜罹此荼毒雖屢經朝廷訓誡終未見實力清理尚復成何事體嗣後內外大小問刑衙門著該管上司破除情面徹底清查將新舊各案立限訊結固不得草率了事尤不准任意拖延以清積牘而重民生將此通諭知之○諭軍機大臣等

庫克吉泰奏派員赴晉商定的餉數目再行酌調新隊一摺據稱山西省應解該營月餉歷次遞減僅止一萬五千兩自上年十一月後奏明以五千兩協解該營以一萬兩解左宗棠軍營由劉典每月撥還該營五千兩乃自本年閏四月後迄未報解該將軍因餉絀兵疲擬將所部吉林黑龍江馬隊官兵內酌留三十員名隨營當差其餘殘廢不堪者一併遣撤回旗西安滿營馬隊及忠勇營步隊

亦量為裁減現派道員文墀赴晉商定的餉再奏請調募勁旅與左宗棠等合力助剿等語所奏自是實情著鄭敦謹督飭藩司查照奏撥餉數迅籌的款按月報解毋使懸釜待炊致誤戎事庫克吉泰一面催提餉銀一面裁汰疲卒挑選勁旅與左宗棠等會商勦辦務期兵歸實用餉不虛糜將此由五百里各諭令知之○予江蘇各屬陣亡殉難布政司理問銜張禮培等紳民婦女一千七百九十

五員名口分別旌卹如例○辛巳冬至祀

天於

圓丘遣怡親王載敦恭代行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵○遣官祭

端慧皇太子園寢○停次日朝賀○

上奉

慈安皇太后

慈禧皇太后幸漱芳齋侍午膳○諭軍機大臣

等蘇廷魁等奏截留楚餉請飭部照數扣抵

並購辦工料及進占西壩各摺據稱榮工先

辦物料用多存少指日東壩與舉需料更夥

前請部餉僅收到四十萬各路協餉報解寥

寥年前為日無多恐致停工以待現有楚餉

過境請截留濟用飭部扣抵等語自係為工

程緊要起見著該署河督等將此次湖北解

到江漢關洋稅等項銀兩除內務府戶部國

子監兩款仍令解京外下餘八萬兩及前次

楚餉十三萬兩准其一併截留以資應用此

項銀兩即著戶部於江漢關等處協撥榮工

款內照數提扣毋庸於續撥之六十萬內扣

存亦毋庸派員截回儻有未經起解銀數仍

著知照順天府迅速轉解及早到工至西壩

現係深水自應趕緊鑲做其挑挖提卸各事宜卽著該署河督等相機妥辦所有該工應用稽麻等項並著飭員上緊採辦毋誤要需各省撥餉仍當遵奉前旨分別派員迎提以免停待之虞凌汛將至蘇廷魁等務飭在工文武人等認真堵築以期年內合龍不准稍有遲誤將此由五百里各諭令知之○又諭岑毓英奏官軍肅清晉甯州城餘匪及各路勦匪情形一摺雲南官軍攻克晉甯州城後

該逆眾分西南東北兩路來援勢極兇猛經該撫派兵力勦擒斬甚多已將州城內外一律肅清其武定州城被圍日久經楊玉科等督軍固守該撫已函商劉嶽昭由晉甯撥兵援應著卽督率將士力圖攻勦迅解城圍激江尋甸等處賊匪亦已派兵協勦著俟得手後卽分派重兵進攻易門等處劉嶽昭現籌進勦尋甸著卽督軍分投進攻以壯聲勢該督有統軍之責自當分籌策應不得稍涉觀

望附近省城逆壘著岑毓英會同馬如龍力籌掃蕩其省防事宜仍著督飭宋廷春等隨時防範毋稍疏虞將此由五百里各諭令知之○又諭文麟奏行抵哈密籌辦一切並履勘城垣駐紮地勢及請飭烏科各城撥給駝隻各摺片哈密地當孔道自被亂後人物荒殘葫蘆溝等處賊騎時有窺伺著文麟督飭魏忠義等勤加偵探隨時挖勦以備不虞郡王伯錫爾之福晉籌辦軍需能顧大局此次

該回王又捐湊米麥以濟軍食實屬深明大義卽著傳旨嘉獎並飭各兵勇恪守營規各屬回部由各頭目出具連環保結以固人心但不可稍涉煩擾文麟辦理此事務當留心體察妥為勸導其蔡巴什湖屯田卽著酌量興辦不可畏難自阻哈城殘毀已甚應否興修或擇地建築著文麟會商景廉相度地勢奏明辦理如須另築並著繪圖貼說具奏以備考覈哈密臺站曠廢亟應復設以利郵傳

並轉運軍糧。開辦屯田。須用駝隻馬牛甚多。該處荒殘之區。難以籌購。亦係實情。自應於附近地方撥往。卽著麟興榮全錦丕勒多爾濟奎昌明瑤分撥駝一千隻。牛四百隻。馬四百匹。馬鞍二百副。所撥駝隻馬牛。務選健壯適用。不得以羸弱充數。其未到之先。並著伊勒屯何瑄先行借撥馬一百匹。以便文麟將哈密各臺站安設。其頭三堡等處現在道路未通。准其暫緩興復。將此由六百里諭知。

麟興榮全錦丕勒多爾濟奎昌明瑤文麟景廉伊勒屯並傳諭何瑄知之。○雲南巡撫岑毓英奏。遵查東川府銅廠久廢。驟難開辦。且應在尋甸州採辦炭斤。該州現為賊踞。請俟克復後再行議辦。允之。○予江西各屬陣亡殉難把總羅必陞等紳民婦女二千六百七十四員名口分別旌卹如例。○蠲緩山東鄆城齊河濟甯濮范東平壽張臨清齊東肥城平陰青城濱利津滋陽曲阜鄒泗水滕嶧汶

上陽穀河澤定陶鉅野觀城朝城曹堂邑金鄉嘉祥魚臺章邱單城武冠武城鄒平長山館陶羊蘭山郟城濟陽臨淄厯城新城泰安蒲臺甯陽費日照益都樂安壽光昌樂諸城掖。雖高密卽墨六十一州縣暨德州東昌臨清濟甯安東五衛東平所屯莊永阜濤雒水利三場被水被旱被蟲被雹地方新舊額賦並雜課倉穀有差。○壬午諭內閣。丁寶楨奏甄別各員。分別降革等語。夏津縣知縣劉成

功罷輟無能。難期振作。候補知縣袁福海居心巧詐。才質庸庸。候補知縣恩啟舉止輕佻。頗滋物議。均著卽行革職。署鉅野縣知縣裕凱辦事庸疏。候補知縣恆豐作事虛僞。候補知縣李鈐性情浮滑。均著以府經歷縣丞降補。○又諭。丁寶楨奏請將藉名巧斂各員革職查辦。一摺。山東臨邑縣知縣李毓泰。陵縣知縣樊維垣。德平縣知縣周士瀚。署樂陵縣知縣王元。相於本年奉旨賑恤災區。竟敢藉

名私派畝捐擾累閭閻實屬瞻玩李毓泰樊維垣周士瀚王元相均著卽行革職提省查辦餘著照所議辦理另片奏前因李毓泰防守出力奏請開復交代逾限革職處分茲以該員心術平庸一時不能確查自請議處等語丁寶楨著加恩改為察議○諭軍機大臣等景廉奏擊敗竄匪現擬移紮敦煌一摺肅州回逆分股竄入安西州境築壘盤踞經景廉派令總兵張玉春等馳往攻剿破壘直入賊眾敗竄追殺二十餘里復獲大捷其竄撲敦煌縣境之賊亦經官軍擊敗勦辦尚為得手惟安敦玉一帶地廣兵單賊蹤飄忽異常難保不乘隙復來肆行焚掠必須擇要扼紮方足以遏賊氛景廉以敦煌地方較安玉為完善擬卽帶隊親赴該處駐紮仍酌留數營分紮安西以為犄角所籌尚妥著卽將安玉挽運事宜布置就緒卽行馳赴敦煌以資鎮撫毋任該逆往來自如致地方復遭蹂躪也

將此由五百里諭令知之○予山東信陽合門殉難團長王兆蘭暨家屬十四名口分別旌卹加等並立祠建坊如例陣亡團丁一併附祀○癸未諭內閣禮部工部奏酌保襄辦典禮司員開單請獎各一摺前因禮親王世鐸等奏恭送

文宗顯皇帝聖容

實錄

聖訓前赴盛京尊藏禮成並

冊

寶

玉牒同時尊虔業將護送執事各員交部議敘惟念此次四案併行一切禮儀俱臻妥協該員等沿途照料著有微勞所有禮工二部執事人員著照咸豐八年成案加恩再行交部議敘原奏所請獎勵未免過優著毋庸議○引見應封宗室不入八分輔國公溥靜二等鎮國將軍德隆三等鎮國將軍溥祿延祺佑

棋奕均。一等輔國將軍溥泰三等輔國將軍載國聯魁三等奉國將軍奕燿奕燐載燮載益載努奉恩將軍奕楠奕樞增鐸得音均著照例授職。○賞二等鎮國將軍德隆三等鎮國將軍溥祿頭等侍衛在大門上行走。○補鑄江蘇蘇州松江兩府管糧通判吳江宜興兩縣縣丞長洲昭文兩縣儒學蘇州府照磨新陽縣巴城巡檢丹陽縣奔牛巡檢各關防印信條記從巡撫丁日昌請也。○予江蘇故

廣東巡撫朱桂楨入祀鄉賢祠從巡撫丁日昌請也。○甲申以京畿雪澤愆期

上詣

大高殿祈禱行禮。○遣惇親王奕訢詣

時應宮恭親王奕訢詣

昭顯廟醇郡王奕譞詣

宣仁廟孚郡王奕誥詣

凝和廟拈香。○諭軍機大臣等行秀畢道遠奏請密拏把持倉務之花戶並請將倉糧以

放代盤一摺興平倉花戶吳湧淦係因查取木斛案內應行審訊之犯乃敢延不到案仍暗中把持倉務以致該倉花戶無人接充實屬可惡據行秀等訪聞該犯原住北新橋枯樹胡同現潛住瓦岔胡同張姓之家著步軍統領衙門派員即將吳湧淦密拏務獲解交刑部歸案嚴審訊結後仍將該犯監禁俟行秀等查明倉存糧石有無虧短知照到部再行按律懲辦惟該犯蹤跡詭秘步軍統領衙

門務當多方探緝毋任遠颺該倉署滿監督楊聯恩漢監督周悅讓辦理公務不能得力著卽撤任所遺之缺先行揀員調署責令趕緊招募花戶以便開放米石其已剗未放米石或改剗別倉或稍展限期著行秀等咨部辦理該倉存儲糧石十數萬自應及早清釐免成鉅虧行秀等擬請以放代盤明歲新糧暫緩派進之處著戶部覈議具奏將此各諭令知之。○乙酉諭軍機大臣等金順奏官軍

勒匪疊勝葭境肅清現仍帶隊出邊請撥馬隊以資追勒一摺竄葭逆匪經遊擊李考祥等在關山峁地方擊敗大股屯踞張家坪官軍從旁衝擊遊擊劉崇慶等復帶隊擁上斃賊甚多追殺至小川溝口葭境肅清其邊外回匪現擾扎薩克旗之宮堡金順仍督馬隊及英中等營前往並令李考祥出邊隨勒著卽乘此聲威併力追勒以殄賊氛惟榆林高家堡一帶近有賊蹤是該逆意圖回竄神府

續行束犯不可不早為之防目下河水凝結山右河保等處在在堪虞鄭敦謹務飭在防將士晝夜梭巡毋令賊騎偷越張曜已入晉境並著飭令該提督整隊趨行前赴榆林以資厚集逆蹤飄忽靡常歸綏各邊防守尤關緊要著定安等分飭各將領勤加偵探扼要嚴防不准稍涉疏懈神木府谷等處究屬空虛左宗棠當會同劉典等嚴飭在事文武相機掩擊毋任賊股東趨日形延蔓金順所部

馬隊本屬無多且往來疲乏勒辦實覺不敷察哈爾前次備調馬隊五百名著文盛卽在此項內酌撥二三百名選派得力將弁管帶馳赴金順軍營隨同攻勒不得以疲羸應數此起馬隊口糧卽著鄭敦謹按月籌款解交金順給發俾資飽騰秦之榆林無警卽晉之邊境獲安該署撫務須源源接濟毋視為尋常協撥之款藉詞推延宋慶計已自豫起程著李鶴年迅飭該提督趕緊赴汾駐紮以壯

聲援金順得此次所撥馬隊兵力較厚著卽會合張曜一軍四面兜剿迅覓全功將此由六百里各諭令知之○丙戌

聖祖仁皇帝忌辰遣官祭

景陵

上詣

壽皇殿行禮○臨故鍾郡王第賜奠○諭內閣富陞奏請將經手建蓋兵房謀利誤工之協領等革職查辦一摺京口兵房於同治五年

開撥款興辦。經手之協領廷康佐領同瑞遲至本年始行開工。已屬玩視公務。且以帑項二萬五千餘兩之多。為伊等販賣木植圖利之用。以致欠款未清。完工杳無時日。並據自認獲利八千餘兩。實屬膽大妄為。協領廷康佐領同瑞均著暫行革職。交魁玉訊明舞弊確情。據實叅辦。以儆官邪。所有未蓋兵房。並著該將軍督飭趕緊蓋齊。藉資官兵棲止。○諭軍機大臣等。昨因金順奏葭境肅清。邊外

回匪肆擾。誠恐河冰凝結。山右河保等處。在在堪虞。當經諭令該統兵大臣等。檄飭各軍分投防剿。現據金順奏由邊外馳回榆林。探悉小川溝竄賊盤踞海會寺馬湖峪一帶。嚮水堡迤南。復有大股屯踞邊外蒙地一片沙漠。無險可扼。金順所部兵力甚單。若不會合馬步各軍。亟圖防範。設該匪乘虛東竄。必至防不勝防。著鄭敦謹遵奉前旨。檄飭張曜星馳赴榆。以厚兵力。李鶴年迅飭宋慶統帶所

部趕緊赴汾州駐紮。以壯聲援。並著文盛遵奉前諭。將備調馬隊官兵內迅撥二三百名。派員管帶馳赴金順軍營。隨同攻剿。毋稍遲延。各軍未到以前。金順務當就現有兵力。實力防剿。左宗棠庫克吉泰劉典等。迅即嚴飭在事文武相機剿辦。先東北而後西南。毋任賊股東趨。更成不了之局。金順駐兵榆林。與甯夏花定相距較遠。不能兼顧。設回匪勾結西竄。則該處亦甚可虞。著豐紳先事密籌防

範。以免疏失。鄭敦謹劉典撥定協餉。暨河東道應解甯夏之餉。即著按月如數批解金順行營。以資勻撥。毋稍延欠。蒙兵截剿竄匪。因眾寡不敵。以致東犯。逼近河干。扎薩克召相距薩托包頭鎮。均不過三百餘里。該處情形均形喫緊。冰橋凝結。何堪一誤。再誤。現在定安等已飭達爾濟等督隊分路防剿。大同鎮官兵亦已到防。綏遠右衛官兵交馬陞調遣往薩清一帶扼紮。即著定安桂成杜嘎爾等

責成各路防軍沿河實力堵剿遇賊卽擊毋得稍涉鬆懈致干重咎殺虎口監督所撥稅課銀二萬兩著定安等咨催迎提以期妥速察哈爾暨晉省沿河一帶及宣化地方著文盛鄭敦謹官文一體認真嚴防定安等前請戶部籌撥銀十萬兩現在河防喫緊餉項缺乏著戶部迅速撥銀十萬兩以濟急需將此由六百里各諭令知之○又諭金順奏請飭撥協餉等語金順所部馬步各營現在榆林

一帶剿賊需餉孔亟自應迅撥餉項以資飽騰該副都統請由天津每月協濟餉銀一萬兩著崇厚按月照數籌撥解交金順軍營毋稍延緩將此諭令知之○漕運總督張之萬奏遵飭營員緝拏清淮一帶游勇得旨清江為南北衝途往來雜遝著卽嚴飭錢鼎銘會同地方文武時加巡緝遇有游勇行劫等情卽行擒拏正法以靖閭閻○以江蘇徐州擒獲匪首高歸予縣丞曹式宗等升敘有差○

撥神機營竹槍五百桿刺刀一千把給綏遠城將軍定安軍營領用○緩徵兩淮富安安豐梁垛東臺何垛丁溪草堰劉莊伍佑新興廟灣板浦中正臨興十四場歉收地方新舊折價錢糧有差○丁亥諭內閣朕奉

慈安皇太后

慈禧皇太后懿旨前因鍾郡王薨逝並無子嗣當卽諭令惇親王恭親王醇郡王孚郡王往見鍾郡王福晉問其於近支中願以何人為

嗣據實指出以便奏明辦理本日據惇親王恭親王醇郡王孚郡王面奏鍾郡王福晉請以恭親王之次子不入八分鎮國公載瀅承繼等語著照鍾郡王福晉所請將載瀅給與鍾郡王為嗣載瀅著卽照例承襲貝勒百日孝滿後不必帶領引見並加恩支食半俸所有應行事宜該衙門察例具奏○又諭朕叔鍾郡王素承優眷恩禮疊加昨日朕親臨賜奠篤念懿親彌深悲惋鍾郡王福晉著加恩

賞給郡王半俸以資養贍○又諭李鶴年奏帶兵大員縱勇殃民請飭查辦一摺甘肅涼州鎮總兵周盛波上年帶勇在河南南陽一帶追剿捻匪縱令所部馬隊駛至唐縣所屬之少拜寺砦搶殺難民輒因若民間礮抵禦復縱勇逞兇槍斃團丁多名破砦而入肆行殺掠以致民人婦女受傷身死及畏辱自盡者百數十人實屬藐法已極周盛波著先行革職並著李鴻章將該總兵從嚴叅辦不得稍涉寬縱一面責令將滋事弁勇按名交出從重懲辦以肅軍律○諭軍機大臣等福濟錫綸奏滬陳布倫托海情形一摺布倫托海創建新城皆係李雲麟偏執已見冒昧從事以致無事之地橫生枝節實屬乖謬已極福濟等體察該處情形宜靜不宜動宜虛不宜實並深悉其受病之由辦理必有把握自應及早另籌良策力革前非著即將叛民趕緊戡定悉心相度機宜妥籌辦法務使各處流

民及各屬部落均安生業免致復起事端以靖邊疆而副委任將此由五百里各諭令知之○予四川各屬陣亡傷亡官弁兵勇一千二十四員名分別賞卹如例○予布倫托海被戕防禦達林泰祭葬世職○戊子

上奉

慈安皇太后

慈禧皇太后幸漱芳齋侍午膳○諭軍機大臣等定安等奏河防喫緊請調官兵馬匹以資

防剿一摺陝省土回各匪擾及神木竄出邊外扎薩克烏紳貝子旗等處榆林附近地方賊勢日重並據獲賊供該逆股有分竄河保營包頭鎮搶掠之意歸綏河防此時萬分喫緊著定安等會商杜嘎爾先就現有兵力相機進擊並飭達爾濟過河截剿以遏狂氛包頭鎮濬濠築牆想已竣事並著飭令馬陞督率兵勇會合該處團練加意防範毋稍疏虞歸綏現存察哈爾各隊馬匹臚分不齊著文

盛卽由商都兩翼太僕寺牧羣挑選肥壯馬五百匹。迅派妥員解由草地馳赴定安等軍營。以資勦擊。該將軍等所請調撥現駐南苑之吉林黑龍江馬隊一千名。前鋒護軍營馬隊五百名。威遠步隊八百名。應領軍火餉乾等款。由神機營覈發。又天津洋槍隊一千名。應需軍火等項。由三口通商大臣按月籌撥。本日已交神機營王大臣等速議具奏矣。將此由六百里各諭令知之。○又諭曾壁光奏

川黔各軍攻克麻哈州城一摺。賊踞貴州麻哈州城。經曾壁光派兵會同川師勦撫兼施。當將州城克復。與崇實等前奏大略相同。現在署提督張文德力疾親督諸軍進紮王都保。並分軍規復都勻。著曾壁光傳諭該署提督。乘此聲威。鼓行而進。並著崇實吳棠飭令道員唐炯聯絡黔軍。進規清平舊州節節進勦。務將都勻踞逆一律殲除。併力下游。以期肅清黔境。將此由五百里各諭令知之。○以

記名提督傅先宗為甘肅涼州鎮總兵官。○以克復貴州麻哈州城。予武生唐步階等以守備用。並賞花翎雲騎尉杜光前藍翎。餘加銜升敘有差。

大清穆宗繼天開運受中居正保大定功聖智誠孝信敏恭寬毅皇帝實錄卷之二百四十六

大清穆宗繼天開運受中居正保大定功聖智
誠孝信敏恭寬毅皇帝實錄卷之二百四十七

[illegible]

理史部古稀子三原李海如七級雲功鳳風陽市加七級印三十九北區舞臺會曉莊公館居講官太子少保大以附功開事禮閣大學士武英殿總纂

元祐漢州州都監管理工部見修會事務內大司輔國公奉勅賜一紙隨帶人紙紙錄十七上 慈聖聖教 弘治己未歲三月 唐江府太子太保翰林院掌書

學士指家牧奉上表奏牛成國史館編修方略館纂修辦上學士部尚書軍機大臣欽此臣等謹此奉
上諭事務知九龍軍功知九龍隨

加六以成有十九乘之七倍分子本數兩度官雖能讀官則品類常同鄉志云其理戶界一學士徐應若如九城記等十二卷皆屬手筆

叔鈔

同治七年戊辰十一月己丑諭軍機大臣等

直隸提督劉銘傳所部勇丁向稱得力。捻逆蕩平後，該軍移紮山東張秋鎮。休息已有時日。昨據定安奏回匪竄擾扎薩克烏紳貝子旗等處，歸綏情形喫重。山西大同直隸宣化一帶亟應嚴防。著曾國藩、李鴻章傳知劉銘傳，卽行來京陛見，迅赴本任以重職守。其駐紮張秋勇隊並令派委得力之員實力整頓。聽候調遣。將此由六百里各諭令知之。○以故扎魯特扎薩克達爾漢貝勒諾爾布林沁

繼子桑巴襲爵○以熱河勦匪出力予協領
禧霖以副都統用餘加銜升敘有差○旌表
守正捐軀直隸清豐縣民女劉根姐○庚寅
諭內閣前因景霖奏請借款移栽樹株當經
諭令直隸總督督飭藩司借撥茲據景霖奏

陵寢官道兩旁等處共移栽小樹二萬二百餘
棵修養小樹十五萬六千六百餘棵其栽樹
經費六千四百餘兩前撥之款迄今尚未解

到請旨飭催等語著直隸總督懷遵前旨督飭藩司無論何款趕緊將此項銀兩迅速撥解毋再玩延○諭軍機大臣等神機營奏遵議定安等請調官兵一摺定安等以賊竄榆林境北河防喫緊奏調神機營等官兵前往防剿現經該管王大臣等議奏按照該將軍等所請派撥吉林馬隊五百餘員名黑龍江馬隊五百餘員名威遠勝字槍礮隊八百餘員名護軍營馬隊現須休息改派駿字驤字

兩起馬隊五百名分作四起起程除放給一月征餉外仍撥解兩月餉項並另籌雜款銀五千兩交定安按月覈放此項調出馬步官兵久暫難定以後所需餉乾等件均由神機營按月給發以資飽騰惟行餉較操餉加增此次該營既墊發三箇月除應發操餉外其加增行餉卽著戶部如數撥還各起隊伍由直隸前赴山西著官文鄭敦謹分飭各該地方官遇此項官兵經過卽將需用車輛駝隻妥為應付毋誤進行定安等俟官兵到綏卽交杜嘎爾統帶或扼要駐紮或過河進剿力遏賊氛官兵未到以前定安桂成杜嘎爾均當就現有兵力認真防範不得稍有疏虞其請撥天津洋槍隊一千名著崇厚照數選派配足軍火器械剋期馳往歸綏交定安等調遣並籌備三箇月餉項及雜款銀兩隨隊運往俾免缺乏此次添調隊伍一切餉項軍火均由神機營及崇厚自行籌發鄭敦謹定安

等仍當隨時妥為照料毋視客兵在境漠不關心是為至要將此由六百里各諭令知之○又諭有人奏湖南布政使李榕性情堅僻行止乖謬用優伶為家丁招搖詐索並買良為賤冤抑屬員以致劣員藉端科斂民怨沸騰其濫支賣缺等弊難以枚舉等語李榕以藩司大員當如何整躬率屬以副委任若如所奏各節種種乖謬殊堪痛恨著李鴻章按照摺內所參各節逐款確切查明據實覆奏毋得化大為小稍涉徇隱原摺著鈔給閱看將此諭令知之○辛卯諭內閣宗人府奏應給貝勒官員甲數請旨遵行一摺鍾郡王之承繼子載澄已封為貝勒其應有官員甲數著卽照貝勒分內應得之數給與○諭軍機大臣等李鴻章等奏分別遣撤留防各軍一摺李鴻章抵德州後陸續將所部兵勇遣撤共五十營至江甯省城復與曾國藩等商定以淮勇未可盡撤酌留銘鼎兩軍分駐河北

濟甯一帶其江蘇徐州及沿江要隘則以吳長慶勇隊及勦字營分防劉玉龍礮隊仍紮江甯下關江口而留湘勇三營駐紮城內所籌均屬周密李鴻章以湖北為四戰之地游匪防勇尚多擬帶郭松林等裁贖各營前往藉資鎮攝如江皖稍有蠢動仍可調回策應自係老謀深算且沿江一帶難保無游勇滋事亦可以資彈壓卽著照所請行以上留防各軍馬新貽丁日昌均當相度機宜隨時酌

量調遣務令地方安戢永絕亂萌各營本食蘇餉自應仍由蘇省供支著馬新貽丁日昌分別籌解源源接濟毋令缺乏俟善後事宜大定再由李鴻章等酌度情形次第裁撤以節餉需至潘鼎新前已有旨令赴左宗棠軍營旋准該藩司所請給予假期統帶舊部回皖再挑募勇丁四千赴陝是該藩司所部未能扼紮濟甯應如何酌撥餉糈另籌布置之處著李鴻章會商丁寶楨妥為辦理前諭李

鴻章等飭令劉銘傳來京陛見迅赴本任該軍現有劉盛藻統帶駐防張秋卽著李鴻章遵照前旨催令該提督剋期起程毋再延緩李鴻章另片奏請假埽墓省親等語李鴻章為國宣勤身在行間十有餘載今幸軍務平定自應俯如所請以遂孝思著賞假一箇月回籍惟兩湖地方緊要亟須該督前往控制一俟假滿迅卽起程赴任以重職守將此由五百里各諭令知之○壬辰諭內閣御史游

百川奏請除吏胥積弊一摺京外各衙門額設吏胥不過用以執簿書供奔走乃近來各衙門胥吏或舞弊營私甚至盤踞把持緣引為奸壞法亂紀殊堪痛恨嗣後內外大臣務當嚴飭所屬振刷精神破除積弊將一切文案立限清理吏數過多者覈實裁汰其有舞文弄法之吏隨時察訪痛懲不准稍涉徇庇至家丁串通書役紳衿包攬詞訟亦著一併嚴禁以儆貪蠹而杜弊端將此通諭京外各

衙門知之。又諭兵部代奏候補主事李揚華敬陳管見一摺。據稱近來地方各吏。但講虛文。全無實政。因而巨奸大猾橫暴閭里。絕無創懲。良民受屈赴愬。往往押候延閣。甚至發交命案。避重就輕。曲為免犯。開脫姑息。徒以養癰等語。刻下髮捻蕩平。各省大吏。亟宜澄敘官方。勤求民瘼。如該主事所陳。實為近今惡習。著各省督撫。力為整飭。董率所屬。於自理詞訟。迅速清結。命案認真辦理。至京控各案。統由各該督撫親提審訊。不得轉委首府各官。以重民生。而祛積弊。○諭軍機大臣等。兵部代奏主事李揚華敬陳管見一摺。所陳請飭督撫將帥查點營勇數目。並將游勇挑補兵缺等語。軍興以來。各路軍營募勇勦賊。往往以少報多。虛冒餉項。如該主事所稱。每營以二三百人充數五百者。自係實有其事。上下欺蒙。殊堪痛恨。即著各路統兵大臣督撫等。各將所部逐細查點。按名過操。不准

以長夫濫充勇數。如有任意浮冒者。即將該統領嚴行叅辦。毋稍粉飾。現在撤營甚多。游勇四散。雖疊經諭令各督撫大臣等。妥為安插。誠恐人數過多。未必盡安生業。各省綠營額設官兵。類多孱弱。該主事所請汰綠營之疲卒。補以勇丁之健壯。於營伍情形。有無窒礙之處。並著各該督撫悉心斟酌。妥籌辦理。原呈著鈔給閱看。將此各諭令知之。○癸巳諭軍機大臣等。延煦等奏遵查邊外地勢民情酌擬章程繪圖呈覽一摺。邊外流民私墾。歷有年所。前因該侍郎等合詞公請查辦。派延煦等前往會同都興阿妥籌辦理。茲延煦奕榕於渾江以西。已經查勘。擬就章程。請飭都興阿酌覈辦理。其章程內所稱關礙風水圍場地方。俱應封禁。自係正辦。惟何處關礙現在能否飭令遷徙。該侍郎等並未指明。又設局呈報。有無流弊。報出民戶。作何鈐束。亦未議及。摺內所稱暖江一帶。從緩查辦。情形

是否確實。都興阿身膺重寄。責無旁貸。著卽悉心籌畫。務使經久可行。毋存苟且塞責之意。延煦等原摺。並章程八條。著鈔給都興阿閱看。其中有無可採。並一切未盡事宜。均著該將軍酌覈以聞。再降諭旨。將此由五百里諭令知之。○甲午。諭內閣。前因毛昶熙奏。軍務漸平。請飭裁減釐金。當經降旨諭令各該督撫體察情形。酌留大宗。撤去分局零星雜貳。概免抽釐。以紓民力。茲據郭柏蔭何璟奏。

稱湖北現存各營需餉尚多。並有積欠舊餉。及籌辦善後各事宜。現在酌留局卡八十六處。擬裁分局分卡五十四處。其餘偏僻集場各局卡。概行裁撤等語。卽著照所擬。將暫留局卡。慎選妥實可靠人員。認真經理。以歸覈實。其裁撤各局卡。如有私收等弊。卽行從嚴叅辦。毋稍徇隱。此外抽釐省分。各該督撫等務當懷遵前旨。體察情形。分別裁留。迅速具奏。○賞藍翎侍衛文麟頭等侍衛。實授哈密

辦事大臣。○乙未。諭內閣。鍾郡王於本月二十六日奉移暫安處。著派恭親王於是日前往府中奠醑。並派醇郡王送至暫安處。再行祭奠。○諭軍機大臣等。大成奏遵撥馬隊赴陝。並籌辦防務一摺。察哈爾備調馬隊三百名。該都統已遵調進口。著卽飭令迅速啟行。前赴金順軍營聽候調遣。毋許稍有延緩。察哈爾界連歸綏。現值冬令。河冰凝結。甘省回匪。旣竄擾扎薩克旗。難保不乘隙東犯。自應

先事籌防。文盛擬派張家口駐防兵五百名。察哈爾八旗馬隊一千名。擇要駐紮。著卽督飭該官兵等。勤加操練。隨時確探歸綏一帶情形。認真防範。所需馬乾等項銀兩。著宜成於張家口稅銀內。提留銀二萬兩。由文盛隨時動用。需用軍火等項。已諭令工部武備院照數撥發矣。將此諭知文盛。並傳諭宜成知之。○以通政使司副使載慶為太僕寺卿。內閣侍讀學士朱學勤為光祿寺卿。丙申。諭

內閣前據侍郎胡肇智呈進前任安徽潁州府教授夏忻恭繹

聖諭十六條附律易解一卷暨所撰檀弓辨誣三卷述朱質疑十六卷當交南書房翰林閱看據稱該員所輯附律易解尚得周官與民讀灋遺意用於講約甚有裨益其檀弓辨誣述朱質疑二書亦均能有所發明該員年屆耄耋篤學不倦甚屬可嘉卽著武英殿將該員所繹

聖諭十六條附律易解刊刻頒發其檀弓辨誣述朱質疑兩書均著留覽○諭軍機大臣等前據定安奏陝省回匪擾及神木竄至邊外扎薩克烏紳貝子旗地方當經諭令定安等相機進擊旋又調撥神機營及天津勁旅前往助剿第恐邊外地方遼濶賊情飄忽值此河冰凝結之時尤恐乘間竄渡現在歸綏防務若何薩拉齊清水河托克托城等處是否安謐有無回逆竄近該處著定安鄭敦謹確

切探明據實迅速覆奏以慰廑繫並著定安

會同杜嘎爾認真堵剿毋令該逆得以渡河擾及完善定安身膺重寄自當竭力防剿鄭敦謹有統轄全省之責豈得置之不問儻有邊外賊情消息卽著妥籌兼顧隨時奏聞將此由六百里各諭令知之尋定安等奏現在匪蹤去河較遠薩拉齊等處安謐如常報聞○又諭前因陝省奏撥餉項由戶部議令湖南將捐項四成歸陝甘兩省分用嗣又准劉

典所請諭令郭柏蔭何璟將湖北分收湖南銷售淮鹽釐金全數解陝原以陝餉支絀藉此資其飽騰茲據劉典奏稱屢次催提並未分釐解到該省軍事方殷現又收撫卮彰一股籌給口食並安插經費無款撥發自係實情且湖南係屬完善之區捐輸各款尚易為力劉岷自應統籌全局彼此兼顧所有前經部議分成捐輸銀兩著卽按照成數隨時分解並就近催令道員易潤壇將准撥湖北分

收淮鹽釐金全數起解。毋再藉詞推延。致陝軍日形匱乏。劉典卽酌量派員迎提到營。以資應用。將此由五百里各諭令知之。○予河南各屬陣亡殉難紳民兵勇婦女一千七百八十三名口分別旌卹如例。○丁酉諭軍機大臣等。毛昶熙奏請調宿將駐紮畿北一摺。前因歸綏防務喫重。宣大一帶亟應嚴防。曾降旨令曾國藩李鴻章傳知劉銘傳迅卽來京。陛見。其駐紮張秋勇隊整頓候調。現在歸

綏防務仍未見鬆。宣大為畿疆屏蔽。亟宜大員督率辦防。劉銘傳著卽兼程來京。陛見。儻該提督尚在江甯。卽著馬新貽就近傳知。如已回本籍。並著李鴻章吳坤修傳知。以期迅速。宋慶一軍前令馳赴汾州扼紮。該處情形較鬆。宋慶曾否自豫起程。卽著李鶴年鄭敦謹飭令該提督統率所部徑赴歸綏協同防禦。並著定安等督率所部聯絡聲勢。以資得力。所需餉糧軍火著李鶴年鄭敦謹寬為籌

備。毋令缺乏。致有貽誤。將此由六百里諭知曾國藩李鴻章定安馬新貽鄭敦謹李鶴年。並傳諭吳坤修知之。○又諭本日據御史郭從矩奏訪聞山西平定州之樂平鄉有外來匪徒假作乞人。姓張者謂之張二。姓李者謂之李二。俗名二字會。每於秋後挨村借糧。並肆搶劫。或經報官。官輒令改盜為竊。現在該匪等聚有二三百人。疊劫東寨村等處當店多案。本地匪徒亦入其黨。等語。樂平地方南

近河南武安。東界直隸贊皇。道路叢雜。易為盜藪。該匪等聚黨多年。連番劫掠。地方官何以漫無見聞。若不及早擒拏。必至愈聚愈多。釀成巨患。著鄭敦謹迅飭該州縣官趕緊緝拏。逐案究治。如該州縣有諱匿等情。卽著從嚴叅辦。該處為直晉通途。又與豫省密邇。尤恐此拏彼竄。並著官文李鶴年嚴飭所屬會合按捕。以期淨絕根株。毋任逃逸。原摺均著鈔給閱看。將此由四百里各諭令知之。○戊

戊以江蘇軍營總兵官劉士奇等捐輸軍餉永廣湖南鳳凰廳學額三名安徽廬江縣二名江蘇吳江縣一名已亥諭內閣給事中劉慶奏災區不堪再擾請嚴申禁令一摺直隸河南山東等省被匪擾害地方受禍最深該地方官亟應實加撫恤而不肖州縣於業經蠲緩之錢糧往往藉口因公巧換名目按戶苛派如丁寶楨奏泰山東臨邑縣李毓泰等私派畝捐各弊殊可痛恨一省如此他省恐亦在所不免瘡痍餘生何堪復加擾累著各該督撫等留心查訪儻有州縣官藉端巧斂者卽行從嚴叅辦並責成該管道府隨時查察如有徇庇亦著一併叅處以副軫恤民生至意又諭曾璧光奏官軍攻克都勻府城一摺貴州官軍自克復麻哈州城後進規都勻逆首楊開燭等分率苗黨踞守關隘阻我進兵之路提督張文德親督各軍於十月間進取王都保賊巢逆首潘名桀等率眾投

降徑道關之賊集黨死守旋經官軍攻破並進拔文得關殺賊五百餘名乘勝直薄都勻分門環攻十三日夜間官軍一擁登城短兵相接斃賊一千餘名餘賊奪門四潰復追殺數百名當將都勻府城克復勦辦尚屬得手仍著督飭官軍將毛坡賊巢剋期掃蕩迅殄逆氛提督張文德力疾督軍克拔堅城奮勇可嘉著賞穿黃馬褂並賞換達桑阿巴圖魯名號諭軍機大臣等有人奏奉天甯遠州地方於此次恭送

聖容

實錄

聖訓

王牒過境時該處知州有科派商民東錢十餘萬串之事迨經差回又苛斂數萬串如有不遵卽加鎖押勒錢保贖請飭查辦等語此次恭送事宜曾經降旨毋許稍有擾累若如所奏該州科派病民實堪痛恨著都興阿等確

切查明據實奏毋稍徇隱原片均著鈔給閱看將此各諭令知之○又諭定安桂成秦沿河沿邊一帶道路及扼要處所繪圖呈覽並截勦賊匪情形各摺片賊黨馬繫禁等三
四千人現在準噶爾旗南界古城哈喇寨及迤西拉拜山等處盤踞該處路徑崎嶇扎那格爾第達爾濟以兵力過單未便深入卽在沁扎木招地方扼紮距賊尚有百餘里此時河水凝結難保該逆不乘隙東竄定安桂成務當飭令該貝子等督率所部嚴密防範勤加偵探遇有賊蹤竄近卽行奮力截勦毋任擾及河干並令杜嘎爾馬陞督帶官兵認真梭巡毋稍大意前調神機營馬步各隊及天津洋槍隊均已陸續起程俟此項官兵到後兵力較厚卽著定安桂成相機調度飭令會合杜嘎爾所帶之兵探明賊蹤過河進勦埽蕩逆氛將此由五百里各諭令知之○又諭穆圖善奏官軍攻克新路坡等處現在進勦

情形一摺河州逆匪久踞新路坡經穆圖善督軍攻拔乘勝收復泰子寺汛城並躡平祁家集逆巢辦理尚為得手河州悍賊俱在大東鄉而三甲集為大東鄉咽喉必須將該處攻克方能次第埽蕩著穆圖善檄飭各軍穩紮穩進將三甲集回匪剋日殲除以期節節進勦廓清河州全境甘省兵食久罄各營刈草為羹藉資果腹困苦情形殊堪矜憫著左宗棠懷遵九月十八日諭旨將甘餉源源分撥以濟飢軍傳先宗前已補授涼州鎮總兵該員現在請假回籍著穆圖善催令迅赴新任以重職守傳先宗簡放是缺能否勝任並著穆圖善查明覆奏將此由六百里各諭令知之尋奏遵查傳先宗久歷戎行堪勝涼州總兵之任報聞○又諭曾璧光奏攻克都勻府城並請留楚軍各摺片逆首楊開懃久踞都勻府城經張文德督軍攻拔餘賊奔踞毛坡亟應迅速埽蕩方免孤軍深入之虞且逆

首潛逃。尤應趕緊捕拏。以除巨慝。著曾璧光仍飭張文德等。迅將毛坡賊巢一律攻毀。殲擒首逆。毋任久稽。顯戮清台。苗逆分擾銅仁石阡印江及麻陽晃州等境。楚黔邊防喫緊。彭芝亮一軍駐紮思南。尚形單薄。若再撤回楚省。則該處更形空虛。設苗逆橫出。思南脅降。肆擾緩急。復何所恃。著劉崐仍令彭芝亮一軍留駐思南。毋庸撤回楚省。席寶田假期已滿。並著該撫催令該臬司。懍遵疊次諭旨。

督率所部。由黔省下游取道前進。毋再稽延。將此由五百里各諭令知之。○河南巡撫李鶴年奏。提臣宋慶來豫。整隊剋日渡黃。並榮工緊要。擬會同河臣妥速興修。得旨著遵照前旨。飭令宋慶統率所部。迅赴歸綏協同防剿。榮工緊要。著該撫會同蘇廷魁併力進占。務於年內合龍。其沁河工程。亦著飭令迅速進築。毋稍延誤。○以肅親王華豐署鑲黃旗領侍衛內大臣。○以正黃旗蒙古都統載容

兼署鑲藍旗蒙古都統。以克復貴州都勻府城。賞提督林從太。田榮顯。汪柱元。一品封典。遊擊張盛琦。黎占魁。盧起貴。田興貴。都司田慶謙。羅芳林。熊培崧。守備葉正雄。巴圖魯名號。同知俞懷信。遊擊楊佑春。等花翎。餘加銜升敘。開復有差。予陣亡把總羅繼美。祭葬世職加等。○以哈密擊退賊匪出力。賞佐領達三。布副都統銜。餘升敘有差。○庚子。以故車臣汗扎薩克郡王托克托呼圖魯子莽珠

巴扎爾襲爵。○辛丑。諭內閣。英桂奏。特參閩革謬妄之武職各員。請旨分別降革。議處一摺。浙江署理黃巖鎮總兵凌應高。捕務廢弛。於密飭拏辦。本標把總解廣潮之父。解宏高等。勾通買缺之案。並不慎密。以致人證脫逃。署理象山協左營都司石有元。不能鈐束兵丁。任聽滋擾。且有挾嫌妄控。知縣黃丙瑩之案。實屬任性妄為。凌應高著以都司降補。仍留於該地方。勒限兩箇月。飭令購拏案內人

證解宏高等務獲究辦。儻逾限無獲。卽著從嚴叅處。石有元著卽行革職。署象山協副將准補福建叅將倭什洪額於飭查石有元妄控之案。並不秉公徹查。率據石有元稟詞轉覆。亦有不合。倭什洪額著交部議處。以示懲儆。○諭軍機大臣等。蘇廷魁。李鶴年奏榮工兩壩埽占情形。並防護凌汛各摺片。榮工口門。自本月初八日溜勢。卽走中洪。東西兩壩埽占情形。均見輕緩。趁此事機順利。著該署

河督等督飭在工員弁。趕購料物。無分晝夜。竭力興辦。以期年內合龍。現在河水雖未漲凌。但一經風雪。卽轉沍寒。冰凌不可不防。並著該署河督等。飭屬妥慎防護。力保無虞。毋稍大意。將此由五百里各諭令知之。○又諭。左宗棠等奏各路擊賊獲勝。現籌布置情形。鄭敦謹奏沿河擊退竄匪。並請飭宋慶無庸入晉各摺片。綏德延安等處土回各匪。疊經成定康劉厚填各軍勦擊殲斃甚多。賊勢漸

已衰。左宗棠檄令劉松山一軍由陝州茅津渡河入晉。徑赴汾州。並以宋慶一軍北趨甯朔。為歸綏後勁。所籌甚是。著卽飭令劉松山於到汾後。擇地駐紮。先固晉防。並探聽軍情。自酌進止。張曜不久卽抵榆林。自可與金順會商戰事。惟黃河冰橋早結。秦之東北空虛。仍應力籌兼顧。扼賊東趨。著左宗棠庫克吉泰劉典。迅飭劉端冕等分投追擊。痛殄逆氛。使不得乘機北竄。其踞董志原之陝回。食

竭求撫。能否就地安插。並著該大臣等隨時酌辦。沿河賊匪分竄永甯大甯等處。雖經晉軍擊回。難保不乘隙偷渡。仍著鄭敦謹督率在防將士及沿河各地方文武。於河水未泮之前。晝夜梭巡。見賊卽擊。不准稍有疏虞。宋慶現已由豫起程。該軍行抵晉境時。該署撫當懷遵前旨。卽令該提督統率所部。徑赴歸綏。以資厚集。郭寶昌軍需餉方殷。未便任其久待。鄭敦謹仍飭該藩司按月籌撥。不必以

蘇餉抵解致有缺乏歸綏地方緊要定安等當就現有兵力妥為堵禦一面咨令馬陞加意嚴防俟神機營所撥各隊到綏卽會同杜嘎爾相機進擊用靖邊陲將此由六百里各諭令知之○又諭左宗棠奏劉松山軍餉欠缺雜款無著請飭兩江照舊解支鄭敦謹奏江蘇應協晉餉尚未報解各摺片劉松山一軍餉銀前經諭令江蘇每月協濟銀六萬兩茲據左宗棠奏稱前撥該軍餉銀合計劉松山現在所部新舊各營每月尚缺額餉一萬五六十兩此外應領帳篷等項雜款更屬無從籌給請仍由江南照舊供支自係實在情形所有該軍月餉著馬新貽丁日昌仿照舊案供支其帳篷車輛米價馬價及員弁勇丁卹養等項亦著一併源源接濟毋令缺乏至江蘇應協山西每月餉銀一萬兩該處冬防正在喫緊並著迅速如數撥解將此各諭令知之○又諭英桂卞寶第奏臺灣領事官縱

令洋將違約妄為請飭總理衙門辦理一摺臺灣領事官吉必勳於議結之案忽然翻約縱令駝噹開礮擄船占踞營署偏死副將大員殺傷兵勇焚燒軍火局庫索取兵費種種違約實屬有心構釁豈能稍事姑容已諭令總理各國事務衙門知會英國公使辦理矣臺灣物阜而民雜近年各國通商易於起釁英桂卞寶第務擇為守兼優通達事體之鎮道大員前往遇事剛柔互用按約辦理並整頓營制吏治以肅官方不可稍涉大意未結各案卽著飭令曾憲德等迅速辦結將此由五百里各諭令知之○以山東勦平捻匪暨歷年城防河防出力賞總兵官蕭紹榮一品封典總兵官莫組紳副將雷顯揚陳安邦楊正琪李楹黃兆昇劉得順參將黃增廣熊國志王寶林郭大勝周森藻劉萬發陳榮輝楊飛鴻遊擊何大培官得祿王仕旺宋正才莫在明陳步雲都司陳連德陳保憲張仕忠楊

長華。劉德泰守備劉培巴圖魯名號道員蕭培元。參將廖楚勝等花翎。郎中高柏齡等藍翎。副都統莫爾賡額等升敘開復有差。○予福建臺灣傷亡副將江國珍祭葬世職。○壬寅諭內閣長善奏。訊明滋事官兵。請分別懲處。一摺。黑龍江官兵。經過山海關地方。儘先佐領驍騎校委參領訥勒德依。輒因遺失物件。將店夥王維世等捆毆追賠。迨經控告查訊。又稱失物均已尋獲。顯有訛詐情事。甲兵和勒善幫同捆縛相助。為虐均應從嚴懲治。訥勒德依著卽行革職。撤銷升階升銜。和勒善著革去披甲。並撤銷保案。均交該將軍嚴加管束。卽補驍騎校委防禦訥恩德善並不勸阻。反行幫毆。佐領委營總博遜泰身任營總。於所管官兵滋事。不能約束。均有應得之咎。訥恩德善博遜泰。均著交部分別議處。以示懲儆。諭軍機大臣等。麒麟奏軍務告藏一摺。盜首任義潰及著名匪徒殲除殆盡。惟

彌勒僧格在逃未獲。該犯稔惡多年。豈得任令遠颺。久稽顯戮。且此犯一日不除。必至死灰復燃。貽患將來。著都興阿額勒和布恩錫富明阿麒麟慶嚴飭各該地方文武員弁。勤加躡探。認真捕拏。務獲以絕根株。儻因兵勇既撤。漸生懈心。致令要犯漏網。恐該將軍等不能當此重咎也。將此各諭令知之。○以熱河勦辦奉天竄匪出力。予協領全亮以副都統簡放。驍騎校全吉以佐領用。並賞花翎。知縣文卜年藍翎。餘加銜升敘有差。○癸卯上復詣大高殿祈雪行禮。○遣恭親王奕訢詣時應宮。醇郡王奕譞詣昭顯廟。孚郡王奕誥詣宣仁廟。惠郡王奕詳詣凝和廟拈香。諭軍機大臣等。林壽圖奏糧臺餉項不繼。請飭催欠餉一摺。雷正綰一軍駐紮甘肅平涇一帶。防剿極關緊要。現在糧

餉萬分缺乏。兵勇困苦情形。不堪言狀。亟應
迅籌接濟。著鄭敦謹飭令河東道於戶部奏
定協撥慶陽戊辰綱鹽課項下。籌撥銀五萬
兩。趕緊批解。限十二月內到陝。毋稍遲誤。林
壽圖於此項餉銀解到時。務當權衡緩急。妥
為支放。左宗棠身任兼圻。於甘軍籌餉事宜。
責無旁貸。該大臣當統籌兼顧。源源接濟。以
拯飢軍。將此由五百里諭知左宗棠。鄭敦謹
並傳諭林壽圖知之。○追予甘肅慶陽陣亡

知縣倪之經。祭葬世。祇加等。建專祠。

大清穆宗繼天開運受中居正保大定功聖智
誠孝信敏恭寬毅皇帝實錄卷之二百四十七

大清穆宗繼天開運受中居正保大定功聖智誠孝信敏恭寬毅皇帝實錄卷之二百四十八

臣等謹將本年十月間奉 上諭內閣崇實吳崇奏官軍攻勦西昌交脚夷巢疊勝招撫大小部落乘勝進勦一摺四川西昌縣之交脚汛為猺夷來往通衢其間部落如林而竹黑大木桿呷牛壩等處尤為强悍句眾擄掠

同治七年戊辰十二月甲辰朔

上詣綏履殿問

慈安皇太后安平安室問

慈禧皇太后安至壬申皆如之奉

慈安皇太后

慈禧皇太后幸漱芳齋侍午膳○諭內閣崇實

吳崇奏官軍攻勦西昌交脚夷巢疊勝招撫

大小部落乘勝進勦一摺四川西昌縣之交

脚汛為猺夷來往通衢其間部落如林而竹

黑大木桿呷牛壩等處尤為强悍句眾擄掠

民間被害甚慘八月間經提督周達武與總兵李有恆等四面雕剿先後將竹黑大木桿夷堡一律平毀官軍進紮呷牛壩後山十月十七十九等日疊敗賊於婁落赤碧璣等處約姑落各踞匪堅壁不出官軍分路設伏進攻陣斃逆匪多名賊股同時擊退竹黑大小夷部悉詣軍營求撫勦辦尚為得手著崇實吳崇飭令周達武等乘勝進攻節節掃蕩一面將呷牛壩遁匪挖除淨盡並檄飭地方文

武各官妥籌善後以靖邊陲○諭軍機大臣等戶部奏遵撥東三省己巳年官兵俸餉銀兩並直隸等省籌解甲寅等年欠餉各摺片奉天吉林黑龍江三省己巳年應需俸餉現經該部覈議除將各該省應徵之款儘數抵充外其奉天餘贖銀十四萬七千兩零即著留為該省緝捕官兵經費吉林黑龍江兩省不敷銀兩在於鹽課關稅等項下撥給所有戶部指撥吉林之長蘆己巳年應徵鹽課銀

四萬一千二百兩零。指撥黑龍江之長蘆。已年應徵鹽課銀十萬八千四百兩。及東海關洋稅銀十萬兩。著官文崇厚。丁寶楨。迅飭該監督運司等。遵奉部文。按數分別委員。徑解吉林黑龍江。俾資放給。吉林應追佃戶王泳。詳拖欠地租錢文。著富明阿趕緊查追。專案報部。所有各項支放銀兩。都興阿。富明阿。德英。務各遵照部定折放章程。覈實辦理。並將用過銀錢。於奏銷時照例題報。其餘賸之

銀。卽著歸於下年請領時聲明備抵。毋稍浮冒。至直隸等省。欠解東三省甲寅等年俸餉銀共二百餘萬兩。並著官文。丁寶楨。李鶴年。劉典。飭各該藩運司。迅將欠解各數。陸續籌解奉省。交納。儻各該省仍前玩誤。著戶部查明叅奏。以重餉需。原片著鈔給官文。丁寶楨。李鶴年。劉典閱看。將此各諭令知之。○又諭劉崐奏。湘軍攻克貴州天柱縣城。現籌進剿情形一摺。逆目陳大六等占踞天柱縣屬之

江口地。陷沒縣城。句道苗逆推巨逆李恆吉為首。久為黔楚之害。經劉崐飭席寶田督軍分道進攻。先將援賊之悍苗九大白等股擊退。攻入江口地。逆寨擒斬甚多。巨逆李恆吉等死於軍中。逆目陳大六等均經就獲。並將縣城收復。勦辦尚為奮勉。卽著劉崐飭令席寶田等。務將餘匪按捕淨盡。所有天柱縣善後事宜。妥為部署。卽督軍埽蕩附近苗寨。東通鎮遠。西達清江。期與川軍會合。其分擾石

阡銅仁等處之苗匪。並著劉崐嚴飭彭芝亮。羅孝連。黃潤昌。迅速殄滅。毋任蔓延。古州逆目楊志汰等。窺伺黎平。劉崐已飭戈鑑等募勇兩營進剿。該處毗連粵西。著蘇鳳文。迅速得力兵勇三四千人。派員帶赴黔粵交界地方。與湘黔各軍會攻。以收夾擊之效。毋稍玩誤。將此由五百里各諭令知之。○以湖南官軍克復貴州天柱縣城。賞總兵官李金榜。副將陳賢勝。參將趙聯陞。巴圖魯名號。把總潘

李光藍銓餘加銜升敘有差。予陣亡遊擊吳誠富都司曾陽春等祭葬世職加等。○予四川呷姑落陣亡知府楊秉琛祭葬世職加等。建專祠。副將董瑞麟都司湯錫福祭葬世職加等。附祀楊秉琛專祠。○乙巳諭內閣。前因金州副都統希拉布與協領訥欽布互相參訴。當諭令將該員等撤任解京。交刑部審訊。旋據刑部奏稱。訥欽布到案後。自縊身死。並諭令該部嚴切根究。茲據刑部奏稱。遵將希

拉布揭參。訥欽布及訥欽布稟許希拉布各款。逐層研鞫。並將看守訥欽布之禁役嚴加審訊。定擬具奏。此案撤任金州副都統希拉布。原參訥欽布遇事輕動。廢弛營伍。各款未盡覈實。其被訥欽布許告收受奠儀。雖無其事。惟於丁役人等折貼班規。毫無覺察。派令兵丁護送妻柩出境。尤屬違例。著照部議。即行革職。撤任金州協領訥欽布。雖無擅動官軍私散兵丁情事。惟於兵丁藉端訛索。不能

彈壓。挾嫌具稟。被參後復誣控希拉布勒賄一萬餘千。律應反坐。業已畏罪自盡。著無庸議。佐領文志俊於希拉布拜摺後。輒聽屬追留摺差。殊屬昏憤。著卽行革職。訥欽布到案。自縊。雖訊無禁役陵虐索詐別情。該提牢官不能先事防範。咎有應得。著查取職名。交部照例議處。金州各旗致送該副都統祭品及戈什哈盤費。均由兵餉內攤派。陋習相沿。殊屬不成事體。著永遠革除。並將舒什哈班規

名目一併永遠禁革。○以陝西勦辦長武等處回匪出力。賞總兵官項上達副將舒大富守備李金鳳。巴圖魯名號。遊擊劉正國等花翎。府經歷李得瑚等藍翎。餘加銜升敘有差。○丙午諭內閣。衍秀畢道遠奏部議挽回漕倉積弊章程。內有礙難遵辦各條。請酌量變通。開單呈覽。一摺。據稱漕糧進倉。各倉監督分別勸懲。及重懲棍徒攪亂倉務。嚴禁花戶無故更替。修理堆撥。棲止官兵各節。均照部

定章程辦理。至遴選經紀體恤車戶花戶暨收放款項隨時報部等四條。或應仍照舊章。或宜稍就變通等語。所籌尚係實在情形。著照該侍郎等所議。所有津通經紀仍著倉場侍郎照現行章程認真選派。無庸會同江南山西各道御史籤掣。以免紛擾。大通橋車戶承領車價銀兩。仍由該橋監督照舊領放。如有書吏剋扣。即行從重究辦。儻該監督稍涉徇庇。即著倉場侍郎從嚴叅處。倉茶果一項。

仍著照舊章分款開銷。無庸拘定以七成接濟花戶之議。並著倉場侍郎視庫存銀數若干酌量發給花戶。以示體恤。收放款項仍照舊章報部。無庸分作兩次開報。儻有不符。即由戶部詳覈駁詰。衍秀畢道遠務當逐款覈實辦理。以期倉務日有起色。毋得有名無實。日久弊生。另片奏招募花戶等語。花戶空缺太多。亟應招募足額。著衍秀畢道遠按照定例。通飭各倉監督認真挑募。毋許將就塞責。

○諭軍機大臣等。戶部奏豫撥來年京餉一摺。據稱歷屆京餉均係年前豫撥。現屆應撥同治八年京餉。擬在各省地丁鹽課關稅等款內指撥銀七百萬兩。請飭各該省於來年分批起解等語。京餉關繫最為緊要。現經該部就各省緩急情形斟酌動撥。自應遵照奏定數目。源源報解。以濟要需。著各該將軍通商大臣督撫鹽政監督等務於來年開印後分批起解。限五月前解到一半。十二月初間。

全數解清。不准截留改撥。藉詞延誤。儻屆限不到。即照奏定章程指名嚴叅。原單均著鈔給閱看。至本年未解京餉。前經該部節次奏咨飛催。現屆年終仍未如數解清。著各該督撫等迅速籌解。毋再遲延。干咎。另片奏內務府同治八年分應需經費擬撥兩淮鹽課銀六萬兩。兩浙鹽課銀六萬兩。福建茶稅銀六萬兩。江漢關洋稅銀五萬兩。江海關洋稅銀五萬兩。閩海關常稅銀五萬兩。浙海關常稅。

銀五萬兩。九江關常洋兩稅銀五萬兩。湖北鹽釐銀五萬兩。廣東鹽課銀四萬兩。四川按糧津貼銀四萬兩。太平關常稅銀三萬兩。淮安關常稅銀一萬兩。共銀六十萬兩。請飭勒限完解等語。著該將軍督撫鹽政監督等各按撥定數目。務於來年開印後陸續徑解內務府收納。並將起程日期報部。限六月前解到一半。十二月初間掃數解清。毋稍延緩。其九江等處漫價等項。應由該部催令按限報

解。將此由五百里諭知福州將軍三口通商大臣直隸兩江湖廣閩浙兩廣四川江蘇安徽江西福建浙江湖北湖南山東山西廣東各督撫。並傳諭粵海淮安各關監督知之。○又諭定安等奏賊匪竄近河干各隊防勦情形。一摺。賊匪分撲包頭鎮昭君墳。大股在十里長灘等處。官軍分路進勦。達爾濟所部小有失利。亟應速籌守禦。扼賊竄擾東北之路。著定安桂成檄飭達爾濟等軍防勦兼施。將

逼近河干之匪。節節掃蕩。悉數殄除。以期次第廓清。喇嘛灣對岸已見邊馬。托城防務喫緊。該將軍現調駐紮薩拉齊之綏遠步隊一千名。分防包頭托城。卽著定安等就現有兵力。相機布置。嚴密防守。並著左宗棠督飭北路官軍。覘賊所向。認真截擊。毋令續竄邊外。致匪勢益肆蔓延。鄭敦謹務當嚴檄沿河兵勇。實力堵禦。不可稍有疏虞。宋慶現在行抵何處。著鄭敦謹李鶴年催令該提督懍遵疊

次諭旨。星夜過行。徑赴歸綏。以厚兵力。神機營所撥各隊及天津洋槍隊。業經起程。著神機營王大臣催令該官兵兼程前進。迅速赴防。協勦。毋稍遲滯。致誤戎機。計黑龍江吉林等處官兵。刻下可抵殺虎口一帶。如托清等處軍情緊急。定安當飭就近徑赴該處防勦。以免周折。薩拉齊包頭為賊匪所垂涎。聲東擊西。是其故技。應如何嚴密布置之處。定安等當加意防範。毋稍疏忽。將此由六百里各

諭令知之。○禮部以明年元旦慶賀禮節請得旨是。照例行禮。奉

慈安皇太后

慈禧皇太后懿旨。停止筵宴。其在外公主福晉命婦進內行禮之處。並著停止。○盛京將軍都興阿等奏。遵查圍獵舊章。奉省部庫無款可籌。惟內河小船。每年應徵糧貨稅小數錢。三四十萬千不等。擬請圍獵屆期就近動用。下部知之。○丁未。諭內閣。官文奏獲咎大員。曾膺重寄。謹舉所知。可否錄用一摺。已革陝西巡撫瑛榮。降調湖南巡撫。憚世臨。均著吏部帶領引見。○諭軍機大臣等。麒麟慶奏。擒獲要犯。保奏出力人員各摺片。已明降諭。旨照所請獎勵矣。彌勒僧格。一犯結黨肆擾。罪大惡極。屢次被獲。脫逃。尤為兇狡。現在既經擒獲。訊明確實。若再羈禁待質。儻致瘐斃。因圖轉得幸逃。顯戮著麒麟慶接奉此旨後。即將該犯明正典刑。以彰國法。毋稍稽延。將此諭令

知之。又諭麟興等奏。經費支絀。請旨飭催一摺。烏科兩城。地處極邊。情形困苦。現在防守尤關緊要。兵丁待餉孔殷。亟應迅籌接濟。著鄭敦謹速飭藩司。無論何款。將烏科二城應領本年經費銀兩。趕緊撥解。務於年內解赴歸綏道衙門。飭交領餉委員。星速解赴烏里雅蘇台。以資接濟。不得稍有遲誤。將此由五百里諭令知之。○又諭福濟錫綸奏。現存滿兵。請改地安插一摺。伊犁巴燕岱烏魯木齊古城吐魯番各城駐防滿兵。自回逆倡亂以後。遷徙流亡。所餘僅一百五十人。鋒鏑餘生。殊堪矜憫。若留於西路征勦。亦不成一隊。自應照福濟等所請。改地安置。即著於綏遠城熱河張家口三處。分別安插。毋庸改隸京旗。福濟等即按定人數。妥籌賞遣。分隸各處。仍照該官兵等原有職任。錢糧坐補。以示體恤。此項官兵到時。定安麒麟慶。文盛仍責令照常操演。毋令游手好閒。坐耗餉糈。布倫托海

勦匪應需兵力著福濟錫綸妥商籌辦毋稍貽誤將此各諭令知之○署安徽巡撫吳坤修奏軍務甫平例案毀失請將本年大計展緩舉行從之○以鑲黃旗漢軍都統春佑署鑲黃旗領侍衛內大臣○以熱河擒獲逆匪彌勒僧格賞同知慶康台吉巴有扎布花翎餘加銜升敘有差○緩徵直隸永清獻衡水三縣被水地方新舊額賦並減免差徭○戊申署陝西巡撫劉典奏軍務未竣請將本年

大計展緩舉行從之○以江蘇淮安等處防汛出力予道員劉咸等升敘加銜有差○以山東防勦擒匪暨籌餉得力免署布政使文彬前署按察使錫祉道員蕭培元署知府張鼎輔疏防屬境失守處分○緩徵安徽懷甯黟宣城南陵貴池青陽銅陵建德東流蕪湖繁昌無為廬江巢壽宿懷遠定遠靈璧阜陽亳蒙城太和泗盱眙天長五河和潛山宿松績溪涇當塗合肥鳳陽霍邱來安建平歙祁

門鳳臺潁上望江舒城含山桐城太湖旌德四十八州縣被水被旱被蟲地方新舊額賦暨各項租課○豁免山東泰安武定兗登萊濟甯臨清七府州被擾地方節年未完額賦○己酉

孝惠章皇后忌辰遣官祭

孝東陵○諭內閣劉典奏甄別知縣各員請分別勒休革職一摺陝西城固縣知縣于錫齡年力衰邁公事顛預著勒令休致署山陽縣知縣易亨聽斷偏私輿情不洽分缺閒用知縣趙德輿性情偏執辦事乖謬均著一併革職以肅官方○予福建彰化被戕巡檢曹本祭葬世職○庚戌諭軍機大臣等李鶴年奏催軍前進籌備餉糧軍火暨堵築河工一摺綏遠城一帶防務喫緊宋慶一軍已於前月二十五六等日渡黃著李鶴年懍遵前旨飛催該提督統帶所部星馳入晉迅赴歸綏一帶鄭敦謹派員沿途催令趲程前進不可稽

遲應需餉銀軍火李鶴年鄭敦謹務須妥為籌備毋令停兵待餉致誤師行托清等處連日情形若何各軍到時著定安妥籌調度實力扼剿未到以前務當就現有兵力嚴密布置不可稍涉大意前據定安等奏賊匪竄近河干大股在十里長灘達爾濟所部接仗失利該處情形極為喫緊金順能否由河保繞至清托一帶助剿或派隊往援藉資策應均著該副都統確探賊蹤並道里遠近斟酌辦理榮工連日進占鑲埽趁此河勢順利著蘇廷魁李鶴年督飭在事員弁實力興築務期年內合龍以慰塵繫將此由六百里各諭令知之○又諭前據英桂等奏臺灣洋人違約妄為等情當經諭令總理各國事務衙門知會英國使臣辦理茲據奏稱臺灣樟腦一案疊經咨行該督撫早為辦結免致藉端生釁乃遷延日久致有開礮擄船殺傷兵勇之事現經該衙門將領事等逞兇違約情形照會

該國使臣令其從嚴懲辦尚未接有照覆惟該督撫前奏臺灣焚燒教堂並華洋交毆謀死教徒各案已結五起未結二起及吉必勳覆文一切情形未據咨報總理衙門無憑辦理中外交涉事件必須彼此隨時知照方免舛誤豈可稍涉遲延著英桂卞寶第即將辦理已未結教案啟釁情由及與該領事面議各節並來往文件趕緊詳細咨報該衙門覈辦並將此案始末情形據實咨報不得稍有

迴護粉飾致滋口實將此由五百里各諭令知之○醇郡王奏興修墳塋請借俸銀五萬兩得旨著加恩由部庫賞給毋庸扣還○以鑲黃旗蒙古副都統興林署正白旗漢軍副都統○辛亥署河東河道總督蘇廷魁奏現辦榮工合龍請將本年大計展緩舉行從之○追予江蘇高淳殉難紳民吳功文等暨婦女三千五百二十二名口分別旌卹如例並予建祠○科爾沁扎薩克圖謝圖親王巴寶

多爾濟等八人。烏珠穆沁扎薩克車臣親王彭蘇克那木濟勒等三人。巴林郡王那木濟勒旺楚克等二人。敖漢郡王布彥德勒格呼固魯克齊蘇尼特郡王托第布木等二人。扎賚特郡王阿勒坦鄂綽爾。扎魯特鎮國公達瓦賓保。郭爾羅斯輔國公阿勒坦鄂齊爾。喀喇沁公銜頭等台吉塔布囊德勒格爾等三人。阿巴噶卓哩克圖郡王剛噶爾倫布等二人。翁牛特輔國公克什克阿爾畢濟呼四子。

部落達爾漢卓哩克圖郡王那木凱多爾濟。喀爾喀扎薩克公銜頭等台吉齊莫特多爾濟。察哈爾恩騎尉巴圖濟勒噶爾於養心門內瞻覲。○壬子諭軍機大臣等。金順奏賊眾東趨。督兵勦辦一摺。邊外回匪東趨麻地溝哈喇寨一帶。金順聞信後。卽帶兵東趨府谷。先據渡口。視賊所在。截其竄渡。所籌甚合機宜。現在榆林既有總兵劉厚基一軍。張曜之軍計日亦可趕到。則郡城不至空虛。金順已

赴府谷。自當一意勦截東竄之賊。以免顧此失彼。卽著該副都統會同張曜督飭官軍實力防剿。毋令該逆得以東渡。如邊內兵力已厚。或繞至清托一帶。與歸綏各軍聯絡聲勢。合力堵剿。仍著該副都統體察情形。斟酌辦理。協領富勒璉記名副都統托克屯前據都興阿保奏。曾降旨飭令來京。現該二員在金順軍營辦理糧臺等事。儻可派員接替。卽著飭令來京。聽候諭旨。將此由六百里各諭令

知之。○兩江總督馬新貽奏。上年各屬被災減徵。本省各標兵米不敷給發。請截留江北新漕八千六百六十石。均勻搭放。允之。○以江蘇邳州擒獲匪首。予外委劉永康等升敘有差。○追予浙江杭州陣亡知縣楊庭欽暨眷屬人等分別旌卹如例。並予建祠。○追予福建浦城陣亡在籍員外郎祝德醇祭葬世職。眷屬親友七十五名口分別旌卹如例。並予建祠。○追予福建臺灣陣亡總兵官林向

榮建立專祠。弟向皋子張成暨弁兵等一併
附祀。○緩徵湖北江夏嘉魚漢陽漢川黃陂
孝感沔陽黃梅鍾祥京山潛江天門江陵公
安石首監利松滋枝江荊門武昌蘄水應城
二十二州縣暨沔陽武昌一衛被水被旱地
方新舊額賦。○浩齊特額爾德尼郡王喇特
那巴咱爾科爾沁貝勒達瑪林旺濟蘇尼特
貝勒布希圖阿巴哈納爾貝勒達木定扎布
喀爾喀貝勒貢桑巴林貝子索哩雅於養心

門內瞻覲。○癸丑諭內閣內閣侍讀學士鍾
佩賢奏敬陳管見一摺。目前各省軍務雖漸
肅清而伏莽未淨餉項未充秦隴滇黔尚多
逋寇官吏貪婪未能悉革民間疾苦未盡上
聞屢諭中外臣工保舉賢員隨時錄用循名
責實亦未盡得其人該侍讀學士所陳各條
於用人行政之道不無可採著留中備覽候
旨施行。○又諭翰林院侍讀鐵祺奏請開墾
南苑一摺所奏實為紕繆南苑為我朝肄武

之地

列聖疊降諭旨禁止私墾

聖訓昭垂豈宜稍改舊制朕御極之初升任通
政司副使劉有銘陳請開墾當經管理奉宸
苑王大臣會同戶部查勘以其事乖舊制曾
降旨斥駁鐵祺職在論思豈未之知耶所請
著不准行。○以詹事府少詹事錢寶廉右春
坊右庶子何廷謙翰林院侍讀孫家鼐充日
講起居注官侍講吳元炳署日講起居注官

○以浙江辦理海運出力予知府王維炳等
加銜升敘開復有差。○以浙江慶元勦捕齋
匪出力予知府劉濬等加銜升敘有差。○追
予浙江湖州殉難通判楊然敬母許氏旌表
如例。○蠲緩浙江仁和錢塘海甯富陽餘杭
臨安新城於潛昌化嘉興秀水嘉善海鹽平
湖石門桐鄉歸安烏程長興德清武康安吉
孝豐諸暨金華蘭谿東陽義烏浦江湯溪西
安龍游建德富安遂昌相廬分水山陰會稽

蕭山。餘姚臨海黃巖甯海天台仙居永康武義常山開化遂安壽昌麗水縉雲青田松陽宣平象山上虞新昌嵊雲和六十二州縣暨杭嚴嘉湖衢州三衛被水被旱被風被雹地方新舊漕糧額賦○甲寅以雪澤未霑

上於

大高殿設壇祈禱親詣行禮○遣惇親王奕詝

詣時應宮恭親王奕訢詣

昭顯廟醇親王奕譞詣

宣仁廟孚郡王奕譔詣

凝和廟拈香○

孝和睿皇后忌辰遣官祭

昌西陵○諭軍機大臣等前據曾國藩奏請禁

川私入楚收復淮南引地以復舊制當交戶

部議奏茲據該部遵議請旨辦理一摺淮南

引地以楚岸為大宗從前因江路梗阻淮鹽

未能行銷疊經湖廣總督奏明借撥川鹽並

抽收川私釐稅原係一時權宜之計近年江

路早經暢通自應規復舊制雖節經酌減淮釐以輕成本而鄰私未能盡禁淮鹽總難暢銷曾國藩所陳川私病淮各節自係實在情形著吳崇李鴻章郭柏蔭何璟即將川鹽行楚章程妥籌停止其宜昌沙市等處應如何撤局停稅並稽查偷越之處著李鴻章郭柏蔭何璟飭屬妥辦並將裁停川稅日期截清報部毋滋弊混至曾國藩所稱淮鹽並收鄂釐淮銷果暢鄂餉即可加增將來所收鄂釐

較之川稅收數能否不至大相懸殊著李鴻章等體察情形具奏惟川鹽行楚既久井竈增多現在既經禁銷自應酌量封禁並著吳崇妥為籌辦其如何分限減停及堵緝各路鄰私著馬新貽覈議章程奏明辦理自此次改復舊章之後務當嚴禁商人夾帶並飭垣商講求煎煉其到岸候輪之鹽不准私自擅價該督撫等總當不分畛域實力妥籌以絕弊竇而維大局至湖南彬桂等處抽收粵鹽

釐稅著劉崐查明奏請一併停收禁止粵私入楚以歸畫一其兩淮應用行鹽引張並著兩江總督查明委員赴部請領不得僅用鹽政大票以符舊例原摺均著鈔給閱看將此諭知李鴻章馬新貽吳棠郭柏蔭劉崐並傳諭何璟知之○以大理寺少卿王映斗為太僕寺卿○以甘肅安西等處疊勦竄匪暨籌辦城防出力予總兵官張玉春以提督簡放賞副將蔣富山范如松巴圖魯名號侍衛誠

慶等花翎縣丞張厚慶等藍翎餘加銜升敘開復有差予陣亡守備唐清海千總陳大賓等祭葬世職加等○乙卯

孝德顯皇后忌辰遣官祭

定陵○以神靈助順頒直隸天津府

河神廟扁額曰仰鏡澄流

火神廟扁額曰光昭離曜

城隍廟扁額曰畿疆保障天津縣

城隍廟扁額曰功昭拱衛通真道人仙祠扁

額曰玉清福佑○諭內閣前因給事中徵麟奏直隸懷柔縣范各莊地方有土棍杜申苛派紳士捐米折錢入已並不放粥等事當經降旨令萬青藜等查拏審辦茲據奏稱究出懷柔縣已革鄉保張傑因與杜申挾嫌圖控輒與王德順輩進年展轉營求聽信李七之言賄買摺子等情此案據供各節既有端倪無難切實根究雖李七當時未經指實所託何人何以徵麟所奏與此事適相脗合案關

賄通奏事豈容稍涉含混所有案內人證著送交刑部嚴行審訊務得確情奏明辦理在逃之李七著步軍統領衙門順天府五城一體嚴拏務獲究辦至杜申所犯誘拐邢魏氏應得罪名著刑部於定案時一併議結○諭軍機大臣等鄭敦謹奏河防喫重近日堵禦情形暨因病請假各摺賊匪窺伺河干出沒無常北自包頭河保南至鄉吉河冰凝結處處喫緊鄭敦謹已飛咨定安商令杜嘎爾統

帶神機營新到官軍相機進剿飛催張曜由河曲剋日過河截擊神木北竄之賊以為包頭援應即著照所擬飛催各路官軍分路堵剿毋稍遲誤宋慶行抵何處並著催令速赴歸化以資厚集陳湜有專辦河防之責甯鄉永和大甯各境疊有賊匪沿河竄擾雖屢經官軍擊退而來去無定河岸縣長偷越堪虞著鄭敦謹嚴飭陳湜會督在防文武往來梭巡遇賊即擊不可稍涉大意再干重咎鄭敦

謹現在患病著賞假一箇月安心調攝其軍務及緊要事件仍著親為辦理前任山東巡撫閻敬銘患病聞已就痊現在寓居何處著鄭敦謹催令迅赴山西省城毋許託故遲延閻敬銘到太原時即由鄭敦謹具奏聽候諭旨將此由五百里諭令知之尋奏閻敬銘病體未痊仍請展假調理報聞○頒直隸天津府故欽差大臣科爾沁博多勒噶台忠親王僧格林沁專祠扁額曰丹心萬古○予直隸

滄州等處陣亡守備李化龍等祭葬世職○予故記名提督蔣臨照祭葬卹廕如軍營病故例○予故湖南學政通政使司副使錢澧福建汀漳龍道桂超萬羅源縣教諭莊一鳴廣東雷瓊道周鳴鑒山東東昌府知府曹丙輝江蘇溧陽縣知縣吳學濂南匯縣知縣欽連四川汶川縣知縣李錫書入祀名宦祠從總督瑞麟署總督英桂崇實巡撫丁日昌馬新貽劉崑丁寶楨請也○予福建故通政使

司副使林枝春龍溪縣訓導黃宗澄江蘇故安徽南陵縣知縣劉邦鼎湖北故浙江雲和縣知縣陳治策浙江故杭州府教授陸以湑平湖縣舉人張兕誠黃巖縣舉人王映玉湖南故湘鄉縣教諭黃大猷增生張穀瑞安徽故廩生呂緝熙入祀鄉賢祠從署總督英桂郭柏蔭巡撫丁日昌馬新貽劉崑署巡撫吳坤修何璟請也○丙辰諭軍機大臣等傳諭署安徽巡撫吳坤修巴揚阿奏行抵彰德等

處詢知沿途兵勇尚屬安靜。惟安徽兵勇籍隸穎毫壽者居多。各該處民情素稱犷悍。時有搶掠之案。請飭安徽巡撫妥籌安撫等語。安徽遣撤兵勇數本不少。而穎毫壽之人尤多。前諭該署撫將潛匿匪黨趕緊搜捕。著仍遵前諭。督飭各該地方官隨時防範。除暴安良。總期杜患未然。毋任藉端滋事。是為至要。○又諭定安等奏連日擊退賊匪情形一摺。回逆馬政和等股竄擾唐蓋談多等處。經杜

嘎爾馬陞督率包托兩路官兵分投奮擊。賊均敗退。馬陞現已回包頭大營駐紮。並於中灘昭君墳地方添兵防守。布置尚屬周密。惟該逆等均在哈拉寨十里長灘一帶負隅踞險。難保不偷越冰橋自應迅籌截勦。力遏賊氛。著定安桂成仍商同杜嘎爾督飭扎那格爾第達爾濟並檄飭馬陞均就現有兵力。於沿河地面扼要嚴防。相機勦擊。毋任該逆乘虛搶渡。神機營所撥各隊除吉林黑龍江兵

已由定安派赴托城外其餘馬步各隊並天津所撥隊日內計可陸續抵綏。定安等當即咨令杜嘎爾督飭帶隊官會同在防將士確探賊蹤。節節進勦。以期早殄逆氛。將此由五百里各諭令知之。○調大理寺卿胡瑞瀾為宗人府府丞。宗人府府丞倪杰為大理寺卿。丁巳諭內閣岑毓英奏官軍克復澂江府城各路勦匪獲勝一摺。雲南澂江府城久為回匪竄踞。經岑毓英督派各軍進攻。疊破逆

壘多處。直逼城下。晝夜環攻。復經馬如龍派員將援賊馬自新斬斃。十月十四日官軍架梯登城。殲斃逆首偽中郎將張鵬程。殲賊一千餘名。接獲偽印偽劄等件。其派援武定之師復將沙浪果冬村等逆壘全行攻拔。擒斬偽裕信大將軍沙映棠陣斬茶偽大將軍殲除逆黨多名。攻勦邵甸之軍連破矣者村堡逆壘七座。斃賊二百餘名。生擒徐偽中郎將楊偽將軍正法。勦辦均屬得手。即著岑

毓英督飭各軍乘勝進剿肅清全境○諭軍機大臣等據都察院奏編修朱福基等以故員殉難情形聞見各殊請飭查明赴該衙門呈訴一摺前任廣西巡撫鄒鳴鶴在江甯殉難經曾國藩奏稱臨難不苟大節凜然因加恩照巡撫例賜卹並准予謚旋據御史朱鎮奏稱該故員避匿民居為賊所殺並非力竭捐軀該御史自稱在籍鄉居得之難民傳述言之鑿鑿因復降旨撤銷朝廷予奪一秉大公

初無成見茲據編修朱福基等呈稱則鄒鳴鶴於江甯城陷時帶勇馳援遇賊陣亡並無與祥厚掣肘之處與朱鎮所奏情形全殊若不確切查明使從容就義之臣蒙苟且偷生之謗殊失國家褒忠之道著馬新貽丁日昌再行訪查明確據實具奏朱鎮原摺並都察院原摺各一件朱福基等原呈一件均著鈔給閱看將此各諭令知之○又諭岑毓英奏官軍收復府城各路剿匪獲勝各摺片○

江府城失陷賊燄日張岑毓英於克復呈貢後派令何秀林等移兵進攻疊破逆壘張元林率眾乞降官軍仍加勁圍擊乘勝入城殲斃逆首當將府城收復飭何秀林等進攻嵩明其沙浪果冬村矣者村堡等處逆壘並經張保和黃文學李廷標等攻拔擒斬偽將多名剿辦甚為奮勉現在省城糧路較寬惟武定邵甸一帶尚未肅清著岑毓英仍飭黃文學等相機渡河聯絡諸軍規復武定一面

飭令李廷標等攻剿邵甸毋稍鬆勁該撫現回省城並著商同馬如龍督飭各將弁將附城賊營悉數埽蕩劉嶽昭亦當嚴飭各軍迅取尋甸並會合岑毓英所派將士分路兜剿以收夾擊之效已革守備張元林通賊獻城其罪本無可貸茲據該撫奏稱隨同克復府城傷疾甚重著暫緩正法俟其立功後再行請旨將此由六百里各諭令知之○以故圖謝圖汗扎薩克貝子德勒克多爾濟子那木

濟勒端多布襲爵○以故扎薩克圖汗扎薩克頭等台吉達木丹瓦濟爾子車營多爾濟襲職○命大學士直隸總督曾國藩在紫禁城騎馬○以雲南防守省城出力復已革副將李維述知縣黃紫詔等職○予雲南激江陣亡守備楊仕代千總金滿堂把總繆發等祭葬世職加等○戊午諭內閣馬新貽丁日昌奏請將丹陽等縣應徵錢漕暫辦抵徵一摺據稱江蘇丹陽金壇溧陽三縣前被賊擾

最重本年收成歉薄請丈田畝亦未完竣擬請仿照江甯府屬抵徵章程除新墾荒田不計外所有原墾熟田銀米併計折收錢文等語著照所請金壇溧陽二縣每畝徵收錢二百文丹陽縣每漕田一畝徵收錢一百六十文洲田一畝徵收錢一百文火耗羨餘一併在內該督撫務當嚴飭該地方官覈實徵收不准書役人等絲毫多取以恤民困所有該三縣未丈田畝並著督飭所屬趕緊清理定

額啟微母再延緩致滋駭累以故三等承恩公克興阿子恩慶一等子玉福子連慶二等子博昆子珠爾杭阿王基子桂普三等男舒祥子榮兆敬印弟敬謙各襲爵○追予江蘇各屬陣亡殉難紳民郭日照等暨婦女一千二百九十八名口分別旌卹如例

大清穆宗繼天開運受中居正保大定功聖智誠孝信敏恭寬毅皇帝實錄卷之二百四十八

大清穆宗繼天開運受中居正保大定功聖智誠孝信敏恭寬毅皇帝實錄卷之二百四十九

臣等謹將本年以來軍機處奉 上諭事開列如左
一、上諭：著將前次所奏各款，著照所請辦理。欽此。
一、上諭：著將前次所奏各款，著照所請辦理。欽此。
一、上諭：著將前次所奏各款，著照所請辦理。欽此。
一、上諭：著將前次所奏各款，著照所請辦理。欽此。
一、上諭：著將前次所奏各款，著照所請辦理。欽此。
一、上諭：著將前次所奏各款，著照所請辦理。欽此。
一、上諭：著將前次所奏各款，著照所請辦理。欽此。
一、上諭：著將前次所奏各款，著照所請辦理。欽此。
一、上諭：著將前次所奏各款，著照所請辦理。欽此。
一、上諭：著將前次所奏各款，著照所請辦理。欽此。

同治七年戊辰十二月己未諭軍機大臣等

左宗棠等奏官軍剿賊疊勝情形一摺。高逆餘黨張萬飛等糾合內竄。經成定康痛剿獲勝。餘賊向清澗竄逸。周紹濂一軍復將中部宜君竄賊擊退。董志原逆回突入甘肅正甯縣城。並分擾邠州三水北境。均經劉倬雲黃鼎兩軍擊敗。其竄撲涇州之賊亦經雷正綰馳援解圍。勦辦尚為得手。惟洛川澄城郃陽白水等處尚有賊騎出沒。著仍飭周紹濂實力搜捕。悉數殲除。並飭成定康將竄向清澗

之賊迅速追剿。董志原賊匪雖已被擊回巢。而來去無定。仍當督飭各軍分投堵剿。遇賊即擊。毋令深入陝境。其榆林一帶及邊外竄匪雖經金順督軍追剿。而後路必須有兵策應。杜其續竄之路。使邊外之賊勢成孤立。較易殲除。且延榆綏沿河一帶尤必隨處有兵截擊。庶不至竄越鄰疆。左宗棠庫克吉泰劉典務當妥籌兼顧。以維全局。回目禹得彥等遞稟乞撫。未必可恃。該大臣等當嚴飭諸軍

奮力進剿。懾以兵威。察其真心悔罪酌量收撫。方為一勞永逸之計。陝甘賊匪頭緒紛繁。應如何入手次第翦除之處。著左宗棠等熟籌方略。迅圖大舉。毋稍遷延。左宗棠另片奏彭玉麟於水師月餉贏餘項下撥解該督軍營銀二萬兩。尚屬能顧大局。又片奏遊擊丁汰洋所部勇丁缺額甚多。意圖冒餉。著即於軍前正法。以肅軍律。將此由六百里各諭令知之。○又諭王通奏請飭籌撥蒙古王公俸

銀等語。青海蒙古王公等俸銀自同治二年以後均未放給該處生計維艱困苦情形日甚一日。自應迅籌撥解。著鄭敦謹無論何款迅將該王公等二三兩年全俸設法籌解歸綏道衙門暫為收存。一面咨會玉通遼派妥員迎提以供支放。其四五六等年俸銀山西省應如何籌解之處並著鄭敦謹迅速籌款源源接濟。將此諭令知之。○命大學士朱鳳標稽察欽奉上諭事件處。○追予江蘇各屬

陣亡殉難布政司理問銜顧思恩等紳民婦女一千八百九十一員名口分別旌卹如例。○予直隸清苑殉難從九品王緒等紳民婦女四百七十二員名口分別旌卹如例。並予建祠。追予安徽桐城陣亡總兵官郝光甲於直隸任邱縣原籍建立專祠。○蠲緩江蘇上元江甯句容江浦六合江都儀徵山陽阜甯清河桃源鹽城高郵泰東臺甘泉興化寶應銅山豐沛蕭陽山邳宿遷睢甯海沭陽贛

榆泰興溧水高淳安東通海門三十五廳州縣暨淮安大河揚州徐州鎮江五衛被水被旱地方新舊漕糧額賦。○庚申諭內閣御史游百川奏請飭嚴禁栽種罌粟以濟民生一摺。栽種罌粟之害有妨民食。始於甘肅延及陝西山西近復江蘇河南山東等省亦有漸行栽種者。小民貪利忘害。僅顧目前勢必至膏腴之產盡種無用之物。於百姓生計大有關礙。前曾嚴行申禁。著各該督撫迅飭各地

方官再行剴切曉諭一體禁止。儻有不法匪徒故意抗違。卽治以應得之罪。各州縣官如不能認真辦理。任令吏胥飾詞蒙蔽。並著各該管上司從嚴叅辦。毋稍徇隱。將此通諭知之。又諭御史盧士杰奏請將陣亡道員予諡建祠等語。前任江蘇淮海道吳葆晉於咸豐十年在清江募勇勦賊殉難甚慘。業經從優議卹。著准於死事地方及原籍河南固始縣捐貲建祠。所請加恩予諡之處著毋庸議。

○兩江總督馬新貽奏。江蘇藩司張兆棟甫經到任。請將本年大計展緩辦理。從之。○予河南各屬陣亡殉難候選從九品侯鈞等紳民婦女三百七十二員名口分別旌卹如例。○旌表守正捐軀山東即墨縣民婦紀張氏。○蠲緩江蘇長洲元和吳江震澤常熟昭文崑山新陽太湖華亭婁金山青浦武進陽湖無錫金匱江陰宜興荆溪丹徒太倉鎮洋嘉定靖江奉賢。一十七州縣暨蘇州太倉鎮海金山鎮江五衛被水地方新舊額賦並雜課有差。○蠲緩兩浙仁和海沙鮑郎蘆滙橫浦浦東六場被擾竈地錢糧。○辛酉察哈爾都統文盛奏。查明商都牧羣臙壯官馬實有三千八百十三匹。堪備徵調。下部知之。○壬戌。

上復詣

大高殿祈雪壇行禮

遣惇親王奕誼詣

時應宮恭親王奕訢詣

昭顯廟。醇郡王奕譞詣

宣仁廟。孚郡王奕誨詣

凝和廟拈香。○諭軍機大臣等。李鶴年奏宋慶全軍馳抵清化。改道前進。一摺。宋慶一軍抵清化後。經鄭敦謹飭令由直省井陘一帶入晉。該提督由清化改道。又須折赴東路。從衛輝彰德兩府取道入直。行程未免紆折。歸綏防務。極關緊要。亟盼該提督前往。以資厚集。著鄭敦謹李鶴年檄催宋慶統率所部。星

速赴防。定安卽派員迎提。俟該提督到後。應令扼紮何路。相機進剿之處。卽著妥為調度。宋慶一軍沿途應需芻糧。著鄭敦謹飭屬妥為供應。儻因兵食缺乏。師行遲滯。致誤戎機。恐該署撫不能當此重咎也。將此由五百里各諭令知之。○又諭崇實吳崇秦川軍援黔。克復黃平舊州兩城。並牛場剿賊情形。各摺片。黃平舊州兩城居鎮遠都勻之中。縱橫數百里。悉為苗逆占踞。現經唐炯督軍深入疊

破關隘克復城池。勦辦甚為奮勉。該逆以屢經懲創。復敢糾黨圖襲牛場。甕安。擾我後路。雖經官軍馳救擊退。而現在進規清平地險。賊眾必應厚集兵力。穩紮穩進。以期節節掃蕩。崇實吳棠現已調陳希祥一軍馳赴下游。著卽飭令會合唐炯等軍。併力進勦。迅掃逆氛。俾苗疆早得戡定。安平股匪奔竄。卽低並著檄飭成耀星嚴扼各隘。如遇賊匪回竄。卽行探蹤截擊。毋稍鬆動。張文德一軍克復都

勻後。曾否將毛坡賊巢攻拔。著曾璧光飭令聯絡川楚各軍。迅速進兵。以資厚集。將此由六百里各諭令知之。○又諭蘇鳳文奏官軍攻勦苗匪獲勝一摺。貴州九阡苗匪屢次滋擾粵西邊界。經蘇鳳文派令副將孔憲隆前往防勦。將竄擾河池等處賊匪擊退。邊境獲安。旋與黔軍定期調派兵練進圖九阡老巢。由洞塘進紮巴灰。攻毀寨糾苗寨。勦辦尚屬得手。惟水洞孟塘各寨尚多踞匪。必須次第

攻克。方可直搗九阡。掃其巢穴。著蘇鳳文嚴飭孔憲隆等會同黔軍。節節掃蕩。迅殄逆氛。曾璧光務當檄令該省帶兵員弁。乘粵軍在境。併力夾攻。毋稍觀望。慶遠各屬蘇鳳文仍飭地方官會同防軍嚴密守禦。毋令該逆回竄。另片奏勦辦吳亞終股匪疊勝等語。太平官軍連破那仰等處賊寨。殺賊甚多。並收復派嶺等村。賊勢現已衰弱。著馮子材乘此聲勢。迅督各軍相機雕勦。一面清除內匪。免致

該逆暗中勾結。仍不得以驅賊出境為辭。敷衍了事。卽著蘇鳳文會商馮子材。懍遵前旨。添募兵勇分道越境往勦。以期永靖邊疆。將此由五百里各諭令知之。○又諭蘇鳳文奏越境遠征。請籌撥餉銀。吳坤修奏請停止協餉。各等語。皖省征防各軍及郭寶昌西征軍餉。經吳坤修分款籌撥。尚不至過於缺乏。湖南月撥西餉五千兩。著劉崐於年內如數解濟。自來年正月為始。卽將此款停止。以歸搏

節。廣西賊匪屯踞越南邊地。亟須分兵往援。而太平轄境。仍被匪擾。防勦亦關緊要。廣西餉項。本來竭蹶。此次分道過征。需餉尤繁。必須寬為籌撥。方免飢潰之虞。湖南應解銀五萬兩。除先後解到餉銀軍火共合銀一萬八千兩。尚欠解銀三萬二千兩。著劉崐迅即撥解。以應急需。並著戶部趕緊籌議。於廣西附近省分。有可協撥之處。指定實款。按月撥銀二萬兩。如數解粵兌收。以濟軍用。不准推諉。延宕。一俟越南軍務告竣。即行停止。將此由五百里諭令知之。○又諭據吳坤修奏。差弁姬文鳳。齎摺進京。於十一月初四日行至直隸新城縣地方。突遇劫匪。將該弁毆傷甚重。並損兩目。不能行走。姬文鳳現在該縣養傷。請飭嚴查等語。新城縣地當孔道。各省摺弁往來所必經。似此匪徒橫行毆傷差弁。若不從嚴懲治。何以儆兇頑而安行旅。著官文飭屬嚴拏。務將該犯弋獲。從重懲辦。以靖地方。

將此諭令知之。○以四川官軍克復貴州。黃平舊州兩城。賞副將周萬順都司楊繼春。巴圖魯名號。知縣趙彝。憑以同知用。千總田泰。時以守備用。均賞花翎。餘加銜升敘。有差。投誠賊目石占揚等。以守備用。並賞藍翎。子陣亡副將石萬和。知府馬樹清等。祭葬。世職。加等。○予廣西太平陣亡守備朱鳴笙等。祭葬。世職。加等。喀爾喀扎薩克貝子德濟特多爾濟等十二人。喀喇沁額駙烏爾哲依巴圖。察哈爾輔國公濟楚克扎木蘇等五人。於神武門外瞻覲。○癸亥。諭軍機大臣等。都興阿奏。蒙古台吉。勾匪聚擾。請飭拏送。一摺。賓圖王旗台吉。托克托虎。糾集匪徒。宋四間。王鄭五楊四藍三等。三百餘人。以防程廣學等復仇。為名。在東魯地方。大肆搶掠。並在光定營子。五成店等處。憑圍屯聚。經都興阿派員馳赴賓圖王府。根究該王西哩巴。咱爾派令章京入圍開導。托克托虎抗不遵諭。決意打仗。

似此聚眾構釁，豈不畏法？若不嚴拏懲辦，何以儆兇頑而靖邊圉？著理藩院傳知西哩巴咱爾、將托克托虎等，拏送歸案，並著伯彥訥謨祜派員前往光定營子地方幫同查拏。不准一名漏網。都興阿仍飭德昌等統帶勇隊駐紮哈立套力改街，勤加密探，設法捕拏。務期趕緊弋獲歸案究辦。將此諭知理藩院，並由四百里諭令都興阿知之。○又諭劉典奏：請將擅行募勇之主事懲辦等語。主事陳廷

瑞前赴劉典軍營，以赴川探親為詞，請給沿途護照，迨抵川後，擅行募勇三營，妄立營名，刊刻關防，實屬膽大妄為，亟應嚴行查辦。著吳棠將陳廷瑞私行募勇情形確切查明，就地拏獲，按律從重懲辦。其所招勇丁並著該督遴派幹員妥為遣散，毋令滋生事端。陳廷瑞如潛回陝境，即著劉典飭屬嚴拏。毋任遠颺。原片著鈔給吳棠閱看。將此由五百里各諭令知之。○署陝西巡撫劉典奏營官劉秀

桃等縱勇肆擾，咨令總兵劉厚基解營訊辦，得旨著即迅飭劉厚基將劉秀桃等及犯事各勇分別解訊，查明正法，不准任意延宕。以肅軍律。○甲子諭內閣：京察記名人員將次簡放完竣，著內閣、部、院各衙門於京察一等未經記名各員內遴選才具優長者出具切實考語保送，由吏部於明年開印後帶領引見。○諭軍機大臣等：定安等奏官兵截勦撲河窰匪獲勝情形一摺，此次杜嘎爾督率達

爾濟等迎勦逆匪，擒斬多名，該逆見我軍整隊齊進，翻山逃遁，仍窰回十里長灘，雖未將全股殲除，兇鋒已挫。著定安等仍飭杜嘎爾等現賊所向奮力攻勦，務期盡殲醜類。毋任東趨。包頭河西踞匪千餘名，由西山背逃西搶入後套，漸向舍太一路竄擾。著一面檄飭馬陞盡心守禦，以遏逆氛，並著飭令威遠隊進紮薩拉齊地方，與該總兵聲勢聯絡。加意嚴防。金順前奏帶兵東趨府谷，著該副都統

仍遵前旨。體察情形如邊內兵力已厚。卽繞出邊外。與歸綏各軍合力埽蕩。將此由五百里各諭令知之。○蠲緩山西陽曲太原徐溝平遙薩拉齊清水河河津臨汾八廳縣被水被擾地方新舊額賦。乙丑以神靈顯應。加江西梁縣張巡廟封號曰護國。○諭內閣刑部奏請將秋審朝審緩決三次以上人犯。援照歷屆減等成案。准予查辦一摺。各省緩決人犯。自咸豐十一年遇赦。援免後至今。又逾

數年。較之咸豐六年查辦人數。及緩決次數。大略相同。自應照例查辦。以示矜恤。卽著刑部查照歷屆減等發配章程。繕具條款。請旨辦理。○兵部奏遵議甯夏將軍穆圖善於畏罪潛逃之已革副將敦天印。奉旨飭令押交河南審訊。抗不遵辦。輒為蒙保。應照徇庇私罪例降三級調用。得旨著加恩改為革職留任。○署直隸總督官文奏上年永定河決口。督飭在事各員興工堵築。所有南四工南七

工大壩均已合龍。堵閉報聞。○補鑄安徽蕪米營遊擊合肥縣梁園巡檢各關防印信。從署巡撫吳坤修請也。予直隸各屬陣亡殉難文生孔廣心等紳民婦女一萬一千五百五名口分別旌卹如例。丙寅

上御撫辰殿大幄次。賜蒙古王貝勒貝子公等宴。並賞賚有差。○諭內閣馬新貽等奏。蘇省荒廢田地設法勸墾。招領請酌定年限。暫免錢糧一摺。蘇省克復後各項荒廢田地多未

領認墾種。亟應妥為經理。若將新墾荒田與熟田一律徵糧。民力未免拮据。至宅廢營壘濠溝。以及荒墳古墓房屋地基各項情形。不同均應分別年限。暫免錢糧。俾編民早得復業。加恩著照所請。所有鎮江府屬全壇溧陽二縣荒廢田地。著按年註冊。挨免錢漕三年。丹徒丹陽二縣與蘇州常州二府屬被兵各廳縣並松江府屬。除已墾全熟外其餘畝縣金山青浦三縣。又太倉州並該屬之鎮洋嘉

定二縣荒田均著自同治八年起暫免錢漕二年。又蘇松等五府州屬宅廢營壘濠溝一項除太湖川沙華亭奉賢上海武進陽湖無錫金匱江陰靖江丹陽寶山崇明十四廳縣或業已填平或均係完善地方外其餘各州縣如堆積過高開挖過深一時難於墾復者著自同治八年起暫免錢漕二年內挑復較易之金山婁縣丹徒三縣著暫免一年又荒墳古墓一項除川沙上海靖江寶山崇明五

廳縣照額徵糧外其餘各州廳縣均著自同治八年起暫免錢漕二年如逾限無人認領酌留墳旁周圍不墾照例豁糧以免侵削餘地招墾減則承糧若有載在志乘祀典之古墓及實在故絕冢地丈見畝分註冊年滿另行請豁又無主房屋地基一項著暫免錢漕不拘年限俟建造翻種後隨時定則完賦如至二年後查明實在故絕者連鈔案官房分別充公該督撫卽行刊刻謄黃徧行曉諭務

使實惠均霑毋任吏胥舞弊用副軫念民艱至意諭軍機大臣等前因劉典奏陝餉支絀請飭添撥一摺當經降旨交戶部議奏茲據該部奏稱陝西餉銀尚不敷一百四十萬兩應俟各省釐金覆奏後再行通盤覈計斟酌辦理惟該省現在情形萬緊待餉孔殷所有江蘇廣東粵海關閩海關江漢關等處欠解該省協餉為數尚多自應迅速籌解著文煜馬新貽瑞麟英桂丁日昌李福泰師曾趕

緊照數撥解並著郭柏蔭何璟飭令江漢關監督迅速籌撥毋再遲誤左宗棠劉典於各省餉銀到時分勻支放以收飽騰之效原摺均著鈔給閱看將此由五百里諭知左宗棠文煜馬新貽瑞麟英桂郭柏蔭丁日昌李福泰劉典並傳諭何璟師曾知之○又諭蘇廷魁奏運河五廳已已年另案工程援案請撥銀兩以便估辦一摺運河另案工程久未大加修築運道幾至殘廢將來南漕轉運必須

河道疏通方可規復舊制現在運河兩岸殘缺險要之工甚多尤應趕緊估辦以重漕運所有己巳年另案工程銀五萬兩卽著丁寶楨督飭藩司趕緊照數批解以濟要需東省司庫五年分應撥運河另案銀五萬兩尚短銀一萬兩六年分應撥銀五萬兩尚短銀二萬一千五百兩七年分應撥銀五萬兩尚短銀四萬兩共七萬一千五百兩並著丁寶楨飭司照數解清毋得稍有帶欠該署河督於

東省銀兩解到後卽著督飭道廳認真趕辦漸圖規復漕運將此各諭令知之○又諭福濟錫綸奏叛賊蔓延請調援兵一摺布倫托海叛民變亂日久蒙兵既不能用民勇又無從招募以致欲剿無兵現在悍賊雖止三百餘人脅從不過七八百人而厄魯特十蘇木人心渙散棍噶扎勒參招集之兵耗餉無功聽賊蔓延燎原立見亟宜派兵剿辦以遏亂萌文麟帶勇已抵哈密著先其所急於此項

練勇內調撥一千名或五六百名選派妥實營官帶至科城交福濟錫綸統率西進剿撫兼施以期早日蕆事著文麟景廉迅籌辦理將此由五百里各諭令知之○又諭總理各國事務衙門奏接據英國照會據實奏聞一摺洋弁在臺灣違約妄為前經總理衙門照會英國使臣辦理現據該國使臣阿禮國照覆以一切情形未據臺灣領事詳報若確情果與所奏相同必將該領事暨洋將責處其索去之洋銀亦為辦理退還並稱吉領事已解任兩月現咨請本國水師提督派員總管兵船前赴臺灣會同卹領事與地方官妥速辦結是該使臣亦屬自知無理惟以英民在臺久受冤抑地方官不早為申理致釀巨案其意直以辦理失宜歸咎於地方官自占地步設將來該領事所報與英桂等前奏不符該使臣必將藉端抵賴著英桂卞寶第懷遵前旨迅將此案始末情形確切查明咨報該

衙門覈辦。至洋人在臺有無冤抑之處一併據實陳明。均不得迴護粉飾。俾該使藉口狡展。庶辦理方有把握。原摺着鈔給閱看。將此由五百里各諭令知之。尋奏遵查洋案一律辦結。業將全案始末咨報總理各國事務衙門。至洋人久受冤抑。乃吉必勲詭飾之詞。實無其事。下所司知之。○兩江總督馬新貽等奏。現在應辦事宜最要者六條。曰培養民生。以籌辦善後。修築運隄。以宣防河務。清查官虧。以講求吏治。選擇將才。以整頓綠營。酌留水師。以聯絡江防。恪守條約。以辦理洋務。得旨。所陳六條。該督其實心實力為之。勿驚虛名。勿求速效。總期於國事民生有濟。毋得徒託空言。烏里雅蘇台將軍麟興等奏。遵查科布多操防巡守均責成於所屬王公。若再添設蒙古參贊。諸多窒礙。應請無庸置議。允之。命大學士朱鳳標充文淵閣領閣事。○以都察院左都御史靈桂戶部左侍郎龐鍾

璐右侍郎潘祖蔭充經筵講官。陝西布政使林壽圖開缺養親。以四川按察使翁同爵為陝西布政使。湖北安襄鄖荆道英祥為四川按察使。○以河南汝甯等處節年勦辦捻匪出力。賞知府周文灝都司楊繼才等花翎。守備王枝發等藍翎。餘加銜升敘開復有差。予廣西各屬陣亡巡檢谷集榮等十六員祭葬世職。○是日己巳年立春。順天府進土牛春山寶座。○丁卯。諭軍機大臣等。劉嶽昭奏攻勦尋甸賊匪獲勝一摺。回逆盤踞尋甸。為省城賊匪聲援。經劉嶽昭督軍進勦收復果馬一帶地方。並在塘子張徐灣等處擊賊疊勝。尋賊復環築碉樓負嵎抗拒。官軍分道並進攻其附郭賊壘。賊勢已孤。而富民逆回膽敢率黨來援。自應添兵痛加勦洗。該督現已派令道員劉嶽曙統帶所部馳往援勦。並親赴尋營調度。著即嚴飭諸軍迅將此股援賊盡數截殺。毋令蔓延。一面督率各營併力

攻城期於速拔不得曠日持久致誤戎機現在徵江府城業經岑毓英派員克復若得尋旬速下則官軍聲勢聯絡更易得手省城之圍不難立解該督撫其隨時互相策應迅奏膚公尋旬克復後劉嶽昭務當乘勝掃蕩直前毋稍遲滯將此由五百里各諭令知之○追予山東冠縣陣亡道員秦聚奎諡剛烈予雲南尋甸陣亡參將李克昌等十九員祭葬世職加等○追予江西各屬陣亡殉難舉

人劉砥柱等紳民婦女三千五百四十八名口分別旌卹如例 戊辰

孝莊文皇后忌辰遣官祭

昭西陵○諭內閣前因萬青藜等奏遵旨審辦直隸懷柔縣土棍杜申苛派捐米一案有已革鄉保張傑展轉營求賄買摺子情事當諭令將全案送交刑部嚴訊茲據刑部奏稱審得此案張傑因挾杜申欺壓之嫌輒添砌多款展轉賄求給事中徵麟具摺陳奏據張傑

等供據確鑿請將該給事中解任歸案質訊等語徵麟職任言官輒敢聽受賄屬奏事殊屬不知自愛著卽行解任交部歸案質訊務得確情毋任狡展並著將家丁西四卽西升迅卽交出以憑審辦○諭軍機大臣等棍噶扎勒參奏賊匪近情索倫等官兵來營日期暨請安插厄魯特人眾各摺片索倫等眾前據榮全奏稱已抵雅爾玉爾地方並令霍伽布率同該人眾趕往塔爾巴哈台境內度冬

茲據棍噶扎勒參奏稱旗綠索倫厄魯特等營官兵一百零四員名到營在各喇嘛處湊借銀兩梭布為該官兵黏補衣類餬口之資等語索倫人眾此時度可行抵塔境轉瞬雪融春暖自可按程言旋應如何接濟銀兩多備騎馱及到何處安插撥給耕籽牛隻之處著麟興榮全錦丕勒多爾濟福濟錫綸悉心籌商妥為辦理不至顛沛失所此次棍噶扎勒參湊借銀兩梭布等項並著麟興榮全錦

丕勒多爾濟福濟錫綸按照該呼圖克圖所
墊數目趕緊籌還以免苦累至所稱厄魯特
人眾與杜爾伯特原係一脈若令遷移該處
一切均有所賴其歲支錢糧仍照舊章歸科
布多大臣辦理此項人眾願歸杜爾伯特是
否出於真情抑另有他處可以安插卽著福
濟錫綸斟酌情形妥為安插毋令日久弊生
布倫托海叛賊蔓延亟應及早剿洗昨已諭
文麟等撥兵援剿福濟錫綸一俟哈密兵勇
到時卽行統率西進迅殄賊氛不可因循致
誤棍噶扎勒參摺片各一件均著鈔給閱看
將此由五百里各諭令知之○熱河都統麒
慶因病解職以錦州副都統慶壽為熱河都
統未到任前以戶部左侍郎魁齡署理○以
山海關副都統長善為廣州將軍調正藍旗
蒙古副都統玉亮為山海關副都統○予直
隸定州陣亡殉難武生王際唐等紳民婦女
一千五百六名口分別旌卹如例並予建祠

○旌表守正捐軀安徽泗州民女韓氏
上以歲暮禋祭

太廟自是日始齋戒三日○己巳署陝西巡撫
劉典奏查明總兵胡世英所部在延安綏德
滋事胡世英時在定邊隨剿鞭長莫及情尚
可原惟賊攻保安安塞之時該總兵並不派
兵往援實難辭咎請交部議處從之○以禮
部右侍郎綿宜署戶部左侍郎管三庫事○
以頭等侍衛載良為正藍旗蒙古副都統記

名副都統雅爾堅署正藍旗漢軍副都統
以兩廣總督瑞麟兼署廣州將軍○予直隸
天津陣亡守備溫如璋等祭葬世職○予福
建連城被戕知縣華鍾祥祭葬世職○緩徵
江西義甯南昌新建進賢清江新淦新喻峽
江蓮花安福永新鄱陽餘干樂平建昌安義
德化德安湖口彭澤豐城東鄉瑞昌金谿廣
昌二十五廳州縣暨九江同知所屬被水被
旱被蟲地方新舊額賦○庚午

上以歲暮裕祭

太廟前期親詣行禮○遣官祭

太廟中殿

後殿諭軍機大臣等前因延煦等奏查勘邊

地酌擬章程八條當經諭令都興阿酌覈辦

理茲據履陳大概情形以及未盡事宜覽奏

均悉奉天邊外流民日多既難概行驅逐自

應妥籌安插之法惟旺清邊外地近

永陵風水禁地關係緊要必應查明封禁本日

已派禮部主事張元益於明年二月間前往

奉天隨同都興阿等將應行封禁處所逐一

勘明分別界限以昭慎重此外尚有應進貢

物地方亦應照舊封禁據都興阿奏稱近來

游民續行出邊占地者絡繹不絕若不趕緊

查辦勢必愈聚愈多何所底止著都興阿恩

錫會同揀派委員於春融後先往渾江迤西

覆加查勘將各該處游民戶口及荒熟地畝

詳細查明酌覈情形妥籌辦理務期經久無

弊方為妥善額勒和布現在穿孝俟其回任
後並著都興阿等會同辦理其晚江一帶地
方游民尤多且有代木山匪涸跡其間出沒
無常雖一時未能處置然亦豈可聽其自然
致滋他患都興阿等務當先行訪查明確熟
籌辦法一俟渾江西岸辦理就緒即可次第
查勘也將此各諭令知之又諭鄭敦謹奏
沿河擊退竄匪永甯渡河之軍勦賊大勝定
安等奏南北官軍擊退踞匪並請由神木截

勦各摺片晉省沿河西岸北自包頭南至鄉
吉到處賊匪紛至沓來窺伺河干張曜已至
河曲分兵渡河金順由十里長灘北進會軍
進勦大甯永和臨縣等處竄匪陳湜等往來
縱擊各路均有斬擒該匪紛紛回竄仍著定
安桂成鄭敦謹嚴檄在事各員弁盡力追勦
毋稍鬆勁一面穩慎設防晝夜守禦不可為
賊所乘劉松山一軍由永甯州過河於小理
川大理川等處躡平賊巢二十餘處斃賊無

數敗匪南竄該提督統兵過河獲此大捷洵屬奮勇可嘉著左宗棠仍飭劉松山統帶全軍再向西南壓剿迅殄賊氛以竟全功十里長灘及東北一帶踞匪經金順等軍分路勦洗向西敗竄距托清較遠距薩尚近著定安等檄飭馬陞沿河實力堵截咨會杜嘎爾飭令達爾濟烏爾圖那遜錫力追剿與金順張曜等會合夾擊以收聚殲之效逆匪敗遁西竄勢必沿邊鋌走榆林神木一帶亟須有重

兵截剿金順現已帶隊折回神木著卽相機進兵迎頭勦辦並著鄭敦謹飛催宋慶趕赴太原就近馳赴神木出邊截剿宋慶前有從衛輝彰德兩府取道入直之說著官文李鶴年沿途飛催趕程前進毋得稍涉遲延致誤戎機將此由六百里各諭令知之○又諭前據左宗棠奏請飭催軍餉當交戶部建議具奏茲據該部奏稱左宗棠前奏陝甘缺餉數目暨請增撥鉅款並未明晰前撥六成洋稅

一百萬兩未嘗無裨於陝餉其各省釐金應由各該省定議再行覆覈籌撥於撥餉之期並無遲誤陝省缺餉數目據劉典奏明每年需銀三百萬兩除本省所入及江廣粵海關海江漢協餉外仍不敷銀一百四十萬兩自應酌量添撥甘省情形雖據穆圖善陳奏月需餉四十萬兩未據逐款分晰等語陝甘常年軍餉及現在用兵餉需必須逐款分明方免轉輾陝省據劉典所奏缺餉已有確數著

該部迅卽酌度情形彙案添撥以資接濟甘省每年實需餉若干除本省入款及各處協款外缺餉若干各省專協甘肅之款何處尚能協濟何處並不協濟著左宗棠穆圖善會同覈議繕悉陳明再由該部酌覈辦理其提撥六成洋稅一百萬兩除浙海關已全數解清外閩海關尚欠解銀十萬兩江漢關尚欠解銀七萬兩江海關據報年內籌解一二批而籌解銀數及欠解銀數並未聲明粵海關

奉撥銀兩既未籌解又未登覆吏局處玩著英桂馬新貽郭柏蔭丁日昌何璟師曾各將奉撥未解銀兩迅即埽數解清不准稍有帶欠各省抽釐收捐情形本令各該督撫於年內具奏安徽浙江湖北業經奏到昨據劉坤一奏明江西裁撤釐卡各情較往歲收數十減三四請自明年二月始按月協濟陝省二萬兩此外江蘇廣東福建均未覆奏著馬新貽丁日昌瑞麟英桂卞寶第懷遵前旨迅速

詳查覆奏不得再有延誤其從撥河東餉銀二十萬兩與晉省司庫款項無涉所有山西欠解郭寶昌及左宗棠兩營四箇月餉銀十四萬兩著鄭敦謹趕緊如數補解不得因河東已撥前項銀兩即行藉端推諉至吳棠前奏各省赴川勸捐委員無庸分赴各屬陝省籌餉較他省情形尤亟如陝省委員赴川省各屬勸捐尚無流弊仍可照舊舉行著吳棠察度情形秉公酌辦其提撥陝餉二十萬兩

僅據解過三萬兩所有欠解銀十七萬兩並著該督迅即籌解毋誤急需郭寶昌一軍現已增募馬隊三千餘於陝餉有無窒礙著左宗棠悉心的辦戶部原摺著鈔給左宗棠閱看將此由六百里諭知左宗棠穆圖善鄭敦謹馬新貽瑞麟英桂吳棠郭柏蔭丁日昌卞寶第並傳諭何璟師曾知之欽此戶部侍郎兼管奉天府府尹額勒和布等奏時屆封篆部文未到請將本年大計展限舉行從之

○賞札貴特郡王阿勒坦鄂綽爾紫纓車臣汗郡王莽珠巴扎爾三眼花翎以湖北襄陽縣捐輸團練承廣學額八名以江西道員段起捐輸軍餉承廣湖南衡州府學額五名錫綬陝西咸寧長安三原涇陽臨潼咸陽高陵富平鳳翔寶雞大荔蒲城郿乾武功隴汧陽西長武淳化洛川綏德米脂清澗吳堡清南興平醴泉鄠岐山扶風華耀同官澄城華陰三水南鄭城固郿中郿宜君膚施安

塞安定延川延長定邊清邊保安甘泉榆林

懷遠神木府谷朝邑藍田盤屋孝義甯陝六

十廳州縣被水地方舊欠額賦 朝鮮國使

臣金有淵等三人於午門外瞻覲 辛未 裕

祭

太廟遣惇親王奕諱恭代行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵○遣官祭

端慧皇太子園寢 遣官祭

太歲之神○壬申

上御保和殿筵宴朝正外藩科爾沁烏珠穆沁

巴林蘇尼特教漢扎賚特阿巴噶浩齊特四

子部落車臣汗喀喇沁察哈爾扎噶特郭爾

羅斯翁牛特王貝勒貝子額駙公台吉暨朝

鮮正副使隨文武大臣依次就坐諸樂並作

上進酒召科爾沁扎薩克圖謝圖親王巴寶多

爾濟烏珠穆沁扎薩克車臣親王彭蘇克那

木濟勒巴林郡王那木濟勒旺楚克蘇尼特

郡王托第布木敷漢郡王布彥德勒格呼固

魯克齊扎賚特郡王阿勒坦鄂綽爾阿巴噶

卓哩克圖郡王剛噶爾倫布浩齊特額爾德

尼郡王喇特那巴咱爾四子部落達爾漢卓

哩克圖郡王那木凱多爾濟車臣汗郡王莽

珠巴扎爾喀刺沁貝勒德木齊扎布察哈爾
輔國公濟楚克扎木蘇扎噶特鎮國公達瓦
甯保郭爾羅斯輔國公阿勒坦鄂齊爾翁牛
特輔國公克什克阿爾畢濟呼等至
御座前賜酒成禮（酉刻）
上詣綏履殿

慈安皇太后前行禮平安室

慈禧皇太后前行禮諭軍機大臣等金順奏

官軍截剿偏河大股踞匪疊勝河保解嚴現

回榆林察看賊蹤剿辦一摺此次逆匪窺伺
河干經金順由十里長灘進剿疊獲大勝斃
賊甚多前據定安具奏已諭知該副都統相
機剿辦現在逆蹤西竄已至烏龍堡等處榆
郡空虛難保不希圖撲犯劉厚基既回榆林
該副都統亦帶隊同到即著和衷商辦相機
截剿張曜此次赴援迅速並馳至邊外古城
地方與金順會商進剿機宜洵屬勇往並著
金順隨時籌商聯為一氣以資策應倘有大

股賊蹤竄近即行分路夾剿以靖地方另片
奏請飭綏遠籌解駝隻等語陝北轉運艱難
需駝甚亟即著定安等於伊克昭烏蘭察布
錫林郭勒三盟內籌辦駝三千隻配帶鞍
繩於來年正月解赴榆林以資轉運將此由
六百里各諭令知之○以陝西古城等處剿
辦回匪疊勝復已革副都統常福職並賞還
頭品頂帶實記名副都統永慶依精阿總兵
官田玉廣一品封典遊擊胡有勝都司俞厚
安何維愷李大勝梁肇榮熊履山巴圖魯名
號知縣王輯瑞同知銜花翎餘加銜升敘有
差○豁免河南南陽汝甯河南陝四府州所
屬被擾地方舊欠額賦蠲緩河南榮澤中
牟尉氏淮甯西華扶溝沈邱通許太康杞商
邱永城柘城甯陵睢虞城夏邑柘柏上蔡十
九州縣被水地方本年漕糧額賦○准河南
省留湖北京餉銀二十一萬兩賑濟災民○
是年旌表孝子江西等省張化光等十八名

孝存湖北等省詹玉光等六名孝義江蘇等省彭來保等八十七名孝婦直隸等省劉文太妻王氏等五口孝女四川等省雍唐氏等四口烈婦奉天等省米充妻鮑氏等三十四口貞婦四川省祝大姑等二口義夫江西等省程添錫等六名義民江蘇省王淮一名守節合例滿洲治儀正烏爾棍布妻富察氏等一百十六口蒙古養育兵扎克丹妻佟氏等五十九口漢軍馬甲武雲鵬妻花氏等四十二口內務府護軍延祿妻崔氏等九口各省駐防壯丁王興亮妻劉氏等七十三口奉天等省顧來住妻馮氏等二萬一千二百三十五口夫亡殉節浙江等省章洪竣妻沈氏等十九口未婚守志浙江等省吳道一妻葉氏等二十口百歲壽民婦廣東等省陳廷贊等八名口五世同堂四川等省鄧望和等四十四家六世同堂福建省徐胡氏一家均給銀建坊如例六會計天下民數數除直隸江

蘇安徽福建湖北湖南陝西四川廣西雲南貴州未經冊報外奉天等省通共大小男婦二萬三千八百十八萬一百三十五名口存倉米穀二百九十萬八千二百四十七石三斗六升一合五分

大清穆宗繼天開運受中居正保大定功聖智誠孝信敏恭寬毅皇帝實錄卷之二百四十九

大清穆宗繼天開運受中居正保大定功聖智誠孝信敏恭寬毅皇帝實錄卷之二百五十

同治八年己巳春正月癸酉朔

上詣

奉先殿行禮○遣官祭

太廟後殿○率王以下文武大臣詣

慈寧門慶賀

慈安皇太后

慈禧皇太后禮成御太和殿受朝作樂宣表如

儀○詣

大高殿

壽皇殿行禮○御乾清宮賜近支親藩等宴○

奉

慈安皇太后

慈禧皇太后幸漱芳齋侍午膳○甲戌

上詣綏履殿問

慈安皇太后安平安室問

慈禧皇太后安至壬寅皆如之○綏微直隸霸

安開薊晉磁深保定文安固安永清宛平高

陽元城清豐東明長垣豐潤安平寶坻大城

良鄉新城容城蠡雄河間獻阜城肅甯任邱

青靜海無極平鄉任水年邯鄲雞澤清河大

名南樂懷安王田衡水甯晉隆平饒陽深澤

四十九州縣歉收地方新舊額賦租課有差

○乙亥

高宗純皇帝忌辰遣官祭

裕陵

上詣

壽皇殿行禮○丙子諭軍機大臣等本日據署

貴州按察使糧儲道林肇元奏滇禍無已川

黔亦受其敝。請飭四川周達武一軍取道會理州渡金沙江出永北以攻迤西之背。飭廣西別籌一軍從百色入廣南規楚雄以搥迤西之吭。遠近作勢使杜逆首尾不顧。滇圍可解。迤西可復。川黔亦可無唇齒之災。等語。滇省近日情形疊據劉嶽昭岑毓英奏報較前漸有起色。林肇元所陳各情雖於滇事有濟。而四川廣西能否如此辦理。著崇實吳棠蘇鳳文統籌全局。彼此熟商。固不可存推諉之

見。亦不必有意調停。總期於事有濟。俾川滇黔三省漸底教平。是為至要。孔憲隆等軍已否前進。著蘇鳳文遵奉前諭。迅飭會同黔軍節節掃蕩。以殄寇氛。林肇元原片均著鈔給閱看。將此由五百里各諭令知之。○以河南桐柏縣捐修城垣。永廣學額一名。○予貴州定番等處殉難通判汪慶增等祭葬世職。○予貴州貴定殉難總兵官汪柱元母史氏旌表如例。○予貴州各屬陣亡殉難知縣萬家

春等官紳婦女三百三十五員名口分別旌卹如例。○緩徵山東臨清濟甯德東平濱濮高唐厯城長山齊河齊東濟陽禹城長清陵平原東阿平陰青城陽信海豐樂陵商河霑化滋陽曲阜鄒泗水滕嶧汶上陽穀壽張荷澤單城武曹定陶鉅野鄆城范湖城蘭山聊城堂邑博平茌平清平冠武城金鄉魚臺利津觀城惠民五十五州縣暨德州東昌臨清濟甯四衛本年上忙額賦並永阜永利二場

竈地錢糧。○丁丑諭軍機大臣等曾璧光奏籌議緩裁援黔湘軍並請飭湖南廣西催派各軍會剿一摺。黔省自收復龍貴都勻等處後設防愈寬。上游各匪尚須勦辦。林從太駐師勻城兵練無多。僅能支持一面。黔事現多可乘之機。自未便將援黔湘軍遽行裁減。前據劉崑奏湘軍攻克天柱縣城已飭席寶田等軍分道前進。刻下潯陽江以北苗教各匪未平。卽著劉崑迅催席寶田等統帶新舊各

部由鎮遠施秉舊日驛路攻勦而上與川軍會合分別勦撫以期東面肅清其都勻麻哈新城各城及獨山荔波一帶均近廣西著蘇鳳文嚴飭派出之孔憲隆等軍剋期馳赴與川楚黔各軍分路雕勦將潯南苗務早日辦竣不推意存觀望至黔省收復地方殘破已極其安插降眾招集流亡及一切善後各事宜曾璧光務須振刷精神妥籌布置毋藉口於餉絀兵單致多貽誤將此由五百里各諭令知之○以貴州克復長寨廳城並疊次勦賊出力賞知州袁開第參將陸文春等花翎都司朱和安等藍翎餘加銜升敘開復有差○戊寅諭軍機大臣等岑毓英奏攻克富民縣城分兵援應各營一摺岑毓英自克復潯江後卽將該處餘匪挖殺斬馘逆回馬葵等內患已清正擬分兵攻擊附省逆壘而武定逆匪分竄新興嵩尋應援各賊田仲興在新興極力抵禦幸未疏虞惟尋甸援賊萬餘勢

甚喫緊若不併力勦洗則嵩明尋甸二城不能速拔防勦各軍俱為賊所牽掣劉嶽昭現已親赴尋甸督戰獲勝岑毓英復派員克復富民斷賊咽喉要地正可乘此聲勢會督諸軍合力截擊毋令死灰復燃著劉嶽昭岑毓英相機勦辦迅埽逆氛尋甸賊糧缺乏勢難久踞富民既克嵩尋逆匪已無路可歸惟賊匪尚有三萬餘恐其奪路狂奔又成滋蔓著岑毓英嚴飭李維述固守廠口防賊衝突並飭張保和等嚴扼富民各要隘毋稍疏失該縣善後事宜尤應妥為籌辦以定人心其新興軍務岑毓英已派王正坤等前往助勦著卽飭令會同田仲興迅將州城恢復毋得曠日持久省外逆壘仍著該撫次第掃蕩以孤賊勢而解城圍岑毓英片片奏胞弟岑毓寶援勦出力可否給予獎勵等語同知岑毓寶著以知府用嗣後續有勞績著咨由劉嶽昭奏請獎敘將此由五百里各諭令知之○雲

南巡撫岑毓英奏軍務未竣請將同治七年大計展緩舉行從之○以雲南克復徽江等城出力擢參將馬忠以總兵官用遊擊何秀林以副將用與總兵官曹星柏遊擊張保和邵天貴均賞巴圖魯名號副將察興阿同知鍾念祖等花翎千總張嘉福等藍翎餘加銜升敘開復有差○予雲南富民等處陣亡守備馬鳴鑾把總段聯甲等祭葬世職加等○
上以上辛祈穀於

上帝自是日始齋戒三日○己卯

世祖章皇帝忌辰遣官祭

孝陵○諭內閣吳坤修奏甄別庸劣不職各員分別降革一摺安徽婺源縣知縣陳善奎辦事顛預難膺民社著以府經歷縣丞降補涇縣知縣黃炳勳辦事遲鈍不知緩急著開缺另補汰廈巡檢邵芝躁妄不謹大通巡檢於士廉不知檢束委用訓導沈瑋試用訓導張忠居心險詐均著卽行革職以肅吏治○諭

軍機大臣等穆圖善奏回匪竄擾南路州縣籌辦防剿一摺陝回由渭河偷渡闖入秦州清水秦安地面勾結附近遊匪四出滋擾且與董志原賊巢相距甚近省城黃河狄道洮河正在結冰之際設竟蹈冰直渡則到處滋蔓勢成燎原省垣空虛大局尤為可慮穆圖善現飭前敵各軍扼要分紮相機進擣三甲集作步步為營之計一面單騎旋省籌備芻糧整理附省各營以防河州東南鄉回匪渡

冰東竄卽著嚴檄各將士將竄甘陝回迅圖攻擊力解秦安之圍並飛催駐陝各路官軍一併設法截剿毋得推諉觀望貽誤事機穆圖善將省防布置穩固仍須出省督師以期調度較靈金順現在榆林勦辦陝西北路竄匪正在得手之際勢難抽調回甘穆圖善仍須就現有兵力認真激勵以資攻剿將此由五百里諭令知之○又諭定安桂成奏豫軍追剿河西竄匪疊勝成祿奏請飭催指撥銀

兩各摺片張曜一軍在十里長灘擊賊獲勝後卽由烏蘭布拉一帶向北進剿行至達拉特旗地方賊眾列隊抗拒經張曜督軍縱擊馬步各賊紛紛敗竄乘勝由小古城一路西進連踴賊踞村莊三十餘處斬獲甚夥敗匪復敢糾合騎賊數千回撲各營併力勦擊擒斬悍匪賊目多名餘賊均向西南逃竄河西及準噶爾貝子境內均無賊蹤勦辦甚為得手現在此股賊匪竄蹙已極亟應乘此聲威

盡力追剿著定安桂成催令達爾濟烏爾圖那遜各隊與張曜所部互相聯絡三面還擊務將此股醜類聚而殲旃毋令回竄沿河一帶防兵仍當實力堵禦不可因賊蹤較遠稍涉鬆懈著定安等知照杜嘎爾飛飭馬陞認真防範以免疏虞並著鄭敦謹隨時妥籌兼顧前因成祿軍營餉缺曾令戶部於湖北山西河東欠解新疆協餉項下指撥該軍餉銀一二十萬兩山西河東應解指撥成祿軍營

餉項著鄭敦謹趕緊措解務於春閒解到成祿軍營以應急需將此由五百里各諭令知之○又諭成祿奏肅軍連日攻剿請於凱撤各軍內挑撥馬步西征擬派道員辦理轉運各摺片肅州東北兩面及南面甫經官軍圍攻旋因南山扁都口回股出竄硤口等處疊陷我軍失利成祿勦辦肅州逆匪日久無功似此逡巡畏縮軍務尚有了期耶著成祿會合諸軍實力進剿將肅城迅圖克復以期振

旅出關毋再託故遲延自干罪戾歸化城距肅州相去甚遠若在該處設局轉運程途紆折一切諸多掣肘所請令歸綏道與奎辦理後路轉運之處著毋庸議直束凱撤各軍左宗棠各營現已回秦勦匪李鴻章所部亦尚留防各路一時均難抽調况成祿軍營餉項本屬不敷豈可再添兵勇該提督當就現有兵力節節掃蕩迅殄逆氛前因營勇潰變經成祿將王仁和等奏參當降旨將王仁和革

職仍留署任王禮和發往新疆又據穆圖善奏稱王仁和統率無方不勝重任復降旨將王仁和毋庸再留署任撤去統領該革員等情節較重成祿請將仁字一軍仍令王仁和統帶王禮和暫緩赴戍留於軍營之處均不准行將此由六百里諭令知之○又諭成祿奏請調軍火以資攻剿等語現在成祿圍攻肅州需用礮火緊急甘省地方素無純鐵堪以造鑄現檢患肅清湘淮各軍所有開花大

礮等件正可抽調赴甘以利攻剿該提督現已派員赴江南領運卽著馬新貽酌撥頭號開花礮二尊二號開花礮二尊頭二號開花礮子各二百顆洋藥數千斤卽交該委員運解回營以期迅拔堅城毋誤要需將此由四百里諭令知之○又諭前因已革副將敖天印殺害孫之友一案諭令穆圖善將該革員解交河南歸案審訊茲據穆圖善奏該革員稟稱前在趙家川勦賊因聞營官敖明愷等

與孫之友勇隊互鬪致孫之友受傷身故當卽回營彈壓將滋事弁勇查出稟請懲辦旋經張之萬將敖明愷等正法並據副都統善山保等聯銜具稟力辯該革員殺害孫之友之誣請免解訊等語敖天印前在河南帶勇於殺害孫之友一案是否主謀下手所稟各情有無捏飾著李鶴年詳細查明據實具奏原摺著鈔給閱看本日又據成祿奏請飭催直隸州知州凌振家赴營差遣等語著李鶴

年卽飭該員迅赴肅州軍營毋稍延緩將此諭令知之○

上以孟春時享

太廟自是日始齋戒三日○庚辰諭內閣月勅載治之第三子著命名溥儀○諭軍機大臣等前因鄭敦謹奏請停改協餉當交戶部速議具奏茲據該部奏稱山西增防募勇需餉孔亟前經議由江蘇浙江福建廣東等省自七年七月起每月各協晉餉一萬兩刻下晉

防緊要部定各該省協餉為數亦覺無多卽著馬新貽英桂瑞麟丁日昌李瀚章卞寶第李福泰趕緊籌撥按月如數解赴山西毋稍延玩至晉省雖四面設防而地方尚屬完善除戶部豫撥八年分京餉仍將該省地丁銀定為一百萬兩奏請行知外該省應解各路協餉著俟各省覆議陝餉到日再由戶部酌度辦理惟此時陝甘各路軍事方殷鄭敦謹仍當儘力分撥未便率請停放致誤要需將

此由五百里各諭令知之以山東博山縣捐輸團練永廣學額六名辛巳祈穀於

上帝遣惇親王奕誥恭代行禮

上以孟春時享

太廟前期親詣行禮諭軍機大臣等前因御史錫光奏稱張玉山糾眾搶掠並偷砍圍場樹木等情復據都察院奏稱關禧遣抱以指荒舞弊私吞國課等詞呈遞均交富明阿秉公究辦茲據該將軍等奏稱張玉山卽玉山

因避難東山被關禧率人將伊家焚搶報明阿城衙門拏辦關禧潛逃未獲遣其姪順興等赴京呈控順興等到案後皆恃關禧未到於糾搶重情忽認忽翻其所控玉山捏控各節審明均屬子虛張玉山亦訊無通天王綽號及為匪不法各情請旨定奪等語此案疊被誣扳之張玉山卽玉山既無糾眾搶劫等情著先行取保釋放毋庸看管盜首關禧卽趙泳當現既拏解到案卽著富明阿毓福將

該犯及其子順林姪順興先後呈控情節傳集原案人證三面環質以期水落石出從重懲辦毋任狡展將此諭令知之尋奏遵訊關禧及其子順林等呈控指荒舞弊各節全屬子虛其焚搶玉山家財屬實應從重問擬下部議從之○又諭蘇廷魁李鶴年奏榮工堵築情形一摺據稱榮工口門收窄後水勢日見擡高東壩埽占鑿冰築做春氣發動間有墊壩須趁溜趨金門逐段加鎮穩實現辦雁

翅魚麟等埽為邊占之助雖不能趕於年內合龍不過旬日半月之遲而堵築穩固究可放心等語該署河督等所奏係為慎重要工惟合龍固不可草率總宜乘春水未生趕緊鑲築速期蒞事著即督率在工各員弁無分晝夜認真趕辦以期一舉告成早慰廛繫將此由五百里各諭令知之○又諭崇實吳崇秦官軍進攻吽牛壩夷匪部落投誠建南一律肅清一摺建南夷匪煽亂十餘年久為川

省邊境之患經崇實奏派周達武督師征剿疊獲勝仗此次進攻吽牛壩羣夷畏服伏地乞降周達武責令呈繳軍器放還難民回軍越舊修砌建堡用資保障辦理均屬妥協深堪嘉尚即著崇實等檄飭該提督會同該地方文武將善後事宜詳細規畫務期亂萌永戢以固邊陲將此由五百里各諭令知之○又諭崇實等奏酉陽民教仇殺現飭查辦一摺四川酉陽州教民龍秀沅偪勒朱永泰退

婚並掠財焚屋該州團民激於公憤焚毀教堂燒斃司鐸李國安及教民多人是此案啟釁由於教民龍秀沅而據主教范若瑟陳稱則該州團民有擄殺教民九家及燒毀教堂傷斃教民百餘人之多情節不甚相同酉陽地處邊隅民情强悍民教各執一詞必至互相尋釁著崇實吳崇飭令山東道會督該州文武持平辦理庶可折服民教之心斷不可稍有偏重致滋事端署任知州胡圻先事未

能駕馭臨事又不能彈壓著暫行革職留於地方協緝首先滋事之犯以贖前愆將此由五百里諭令知之○以四川平定夷匪建南肅清將軍崇實總督吳崇得旨嘉獎實提督周達武黃馬褂 壬午享

太廟遣睿親王德長恭代行禮○遣官祭

太歲之神

上詣

時應宮拈香○御紫光閣賜蒙古王貝勒貝

子公暨朝鮮使臣等宴並賞賚有差 諭軍機大臣等劉崐奏稟報勦撫苗寨情形現分路進剿一摺貴州清江廳屬苗寨林立大為楚黔邊害席寶田正擬督兵次第掃蕩而豪雍等寨苗匪竟敢糾黨圍攻巴冶席寶田派令榮維善等往援匪眾解圍遁走乘勝攻拔豪雍六甫柳羅烏包等寨敗匪麇集者磨恃眾抗拒官軍槍礮轟擊賊始敗潰統計殺賊五六千名並收撫耶磨平夏高邱白兜等寨

清江北岸苗寨悉就蕩平勦辦極為得手席寶田現已派令戈鐔李金榜進剿古州李光燦清查天柱土匪後會師清江黃潤昌率同鄧子垣進規鎮遠彭芝亮俟兩路進兵卽行規取施秉是楚省援黔諸軍正圖大舉深入曾壁光當乘此聲勢飭令黔省帶兵員弁與楚軍協力雕勦迅掃逆氛早清疆圉並著劉崐嚴檄清鎮各營併力勦洗毋稍鬆懈一面催令席寶田迅督所部直攻施洞口諸苗潰

其腹心免致該逆四出滋擾此次出力各員弁著劉崐存記俟清江廳城克復後併案保獎將此由五百里各諭令知之○賞浩齊特郡王喇特那巴咱爾子頭等台吉棟多克僧格蘇尼特貝勒布彥圖子頭等台吉索特那木多布沁阿巴噶貝子杜英固爾扎布二等台吉貢多三保花翎○癸未

孝全成皇后忌辰遣官祭

慕陵○賞烏里雅蘇台參贊大臣賽因諾顏貝

勒錦丕勒多爾濟母達什拉穆扁額曰貞壽之門○甲申諭軍機大臣等都興阿奏擊獲邊外滋事各犯並仍飭緝逃匪一摺蒙古台吉托克托虎勾結匪徒宋四閭王等以防程廣學復仇為名藉肆訛搶前經諭令都興阿等嚴拏茲據該將軍奏稱遵派副都統德昌等督帶兵勇會同賓圖王旗擒獲托克托虎並首匪楊四催等二十餘名分別保候解省審辦復續獲宋四閭王之姪宋七十其兄宋

義一併研訊卽著都興阿先將解到各犯逐一嚴訊務得啟釁確情按律定擬毋稍寬縱托克托虎藉詞復仇殺斃民人韓城幅家二十八命兇惡已極尤須嚴切研鞫並有無另案訊搶商民情事從重懲治保候之蒙古特各喜巴彥等如有應行質訊之處著卽提省歸案毋任疏脫在逃之宋英卽宋四閭王程廣學等仍著都興阿富明阿嚴密按捕並著理藩院傳知賓圖王旗及附近各王旗一體

躡緝務獲究辦以淨根株另片奏請將獲犯出力將弁獎勵等語副都統德昌總兵張得祿所部弁兵內著准其擇尤酌保母許冒濫將此諭知理藩院並由五百里諭令都興阿富明阿知之尋都興阿奏現經拏獲逸犯藍泳碌及韓城幅之子韓甸偉等到案訊明托克托虎與韓甸偉因細故積恨仇殺互傷多命藍泳碌幫同拒捕致傷弁勇均屬兇惡除楊四催業經病故托克托虎韓甸偉藍泳碌

應請先行正法宋七十等訊不知情應卽省釋在逃各犯俟獲另結從之○又諭瑞麟奏現派鎮道大員馳赴潮州辦理搶擄械鬪各案一摺廣東潮州府屬素有搶擄械鬪之案經瑞麟督飭藩臬出示曉諭各屬械鬪稍知斂跡而匪類仍未捆交該督因派總兵方耀道員文星瑞帶兵先赴惠州所屬之陸豐再赴潮郡相機辦理自係為整頓地方起見但潮郡民風素稱强悍而各省撤回勇丁尤為

兇橫若辦理不得其宜恐能發而不能收其患不可勝言瑞麟既歷經詳詢諒必深知竅要而李福泰曾任惠潮嘉道於該處民風地利自當熟悉卽著妥籌機宜飭令方耀等嚴申軍律相機辦理俾潮郡良民無稍擾累匪徒知所儆惕將搶擄各兇犯交出懲辦以遏亂萌仍不可一味逞威激成變故另片奏鶴山曹冲土匪客民滋事現派兵妥辦等語鶴山客民聚眾數千突入高明縣境肆擾瑞麟

現飭總兵鄭紹忠帶兵勇前往辦理其東莞新安土匪潛匿曹冲附近之長沙地方肆行剽掠瑞麟調水師輪船前往圍拏辦理俱尚妥協卽著瑞麟等飭令鄭紹忠等分別妥辦迅速肅事不可稍涉遷延將此由五百里各諭令知之○又諭麟興等奏布倫托海請調哈密援兵先將大概情形豫為籌畫一摺前因福濟錫綸奏叛民變亂亟圖進剿疊諭文麟於哈密撥出兵勇一千名迅速赴援茲據

該將軍等奏稱此項兵勇由哈密至巴里坤繞道烏科再至布倫托海沿途行走維艱各臺站應付不及現在索倫等眾三千四百餘名已抵雅爾玉爾地方該人眾素稱勁旅若就近調用較之遠調哈勇尤為便捷等語布倫托海距雅爾玉爾由間道僅有十餘站轉瞬春深凍解道路自利進行惟該人眾辛苦餘生未及休息卽令其荷戈從戎能否得力哈密兵勇遠來既屬不易而該人眾尚有數

千亦未便任其棄置著麟興錦丕勒多爾濟榮全福濟錫綸彼此熟商不必各存成見如該人眾略加訓練可以調用卽著福濟錫綸咨明文麟將前調兵勇暫為停撥如仍須哈兵前來其添設臺站及應付口糧各事宜該大臣等尤當先行籌畫毋誤師行索倫人眾到後無論調用與否應於何地安插得無失所之處麟興等務須妥籌辦理將此由五百里各諭令知之○以江蘇領解海運漕糧無

誤予知府沈壽嵩等加銜升敘有差○乙酉上御乾清宮賜近支親藩等宴○諭內閣郭柏蔭何璟奏遵查知府難資表率據實劾一摺湖北施南府知府張觀鈞處事任性操縱失宜不足以資表率著以同知降補歸部選用諭軍機大臣等鄭敦謹奏沿河賊匪被擊西竄並勦賊績勝情形一摺山西北路一帶地方屢有陝回窺伺河干希圖東犯經張曜馬陞等督軍迎勦斬馘甚多前經定安奏

到曾降旨令該將軍等飭知達爾濟烏爾圖那遜會同張曜所部相機追剿。卽著仍遵前旨。乘此得手之際。奮力勦辦。毋任逃逸。其中路永和大甯吉州各處。復經已革臬司陳湜率勇過河。與副將何鳴高李運春等分路追剿。疊獲勝仗。百里以內。已無匪蹤。春氣融和。河水漸泮。自可較有把握。第賊情詭譎。不可因其遠竄。稍涉疏懈。仍著鄭敦謹督飭陳湜等嚴密防剿。以保完善之區。宋慶一軍。擬由

神木趨赴防所。著催令前進。與張曜等軍聯絡一氣。用資堵遏。將此由六百里各諭令知之。○又諭文麟奏請飭催烏科兩城迅解駝馬等項。並請飭山西巡撫籌解欠餉各摺片。哈密需用駝隻馬牛。係為轉運軍糧。開辦屯田。前諭麟興等迅撥駱駝一千隻。牛四百隻。馬四百匹。馬鞍二百副。以備應用。茲據文麟奏稱該城運務屯務待用孔亟。請再飭催等語。昨據麟興等奏遵撥哈密牲畜。咨商備調。

尚不足數。並缺少全副馬鞍。惟該城軍務方殷。所需駝馬等件。實係刻不可緩。著麟興榮全錦丕勒多爾濟奎昌明瑤。仍遵前旨。務選膘壯牲畜。如數籌解。不得以羸弱充數。其需用馬鞍。亦應設法籌辦。毋許推諉。山西欠解哈密專餉。為數尚多。著鄭敦謹督飭藩司無論何款。迅速設法。寬為籌撥。卽交該城委員領解赴營。俾濟急需。毋稍延緩。將此由五百里各諭令知之。○予蒙古台陽川陣亡守備

包慶餘等祭葬世職。○丙戌

宣宗成皇帝忌辰遣官祭

慕陵

上詣

奉先殿

壽皇殿行禮。○總理各國事務衙門奏密陳辦理夷務宜策萬全。得旨。此摺著交醇郡王大學士閱看。仍著該衙門隨時斟酌情形。妥籌辦理。○命翰林院編修王昕提督山西學政。

○以甘肅洮州勦辦回匪出力賞提督張萬美一品封典副都統謙禧總兵官葉廣勝方德湘許耀文副將姚正高張興元石在位梅天海楊永成張勝元彭清勝桂興得吳甲申參將吳定安徐炳元何元明張萬成李成林張金魁遊擊姬伏信委防禦滿達里都司康學連趙謙士胡炳南劉大順張從志色圖魯名號佐領莫爾根布知州周浩等花翎千總李盈發等藍翎餘加銜升敘有差○丁亥○

上詣

大高殿

壽皇殿行禮○御保和殿賜王以下文武大臣蒙古王貝勒貝子公額駙台吉暨朝鮮使臣等宴○奉

慈安皇太后

慈禧皇太后幸漱芳齋侍午膳

大清穆宗繼天開運受中居正保大定功聖智誠孝信敏恭寬毅皇帝實錄卷之二百五十

平定縣志

志

[illegible]

同治八年己巳正月戊子。

上御乾清宮。賜大學士尚書等宴。○諭軍機大臣等。瑞麟奏。勦辦高明客匪平靖。現飭軍接捕鶴山餘匪一摺。廣東鶴山客民潛糾高廉等府遣散客取竄入高明縣境。占踞村莊。經瑞麟派令總兵鄭紹忠等帶兵往捕。該匪猶敢在石圭嶺等阮抗拒官軍。鄭紹忠等分投追殺。復由三峰凹偏攻。餘匪由鶴山之石門四堡各村逃逸。其主謀之客紳郭大猷等四名。並經拏獲解省。高明境內被占村莊現已

延將此由五百里各諭令知之○己丑諭內閣布政使銜補用道錢鼎銘二品銜簡用道陳鼐均著發往直隸以道員補用安徽無為州知州署和州知州游智聞著發往直隸以知州補用候補知府李興銳著發往直隸以知府補用浙江補用直隸州同知趙烈文著發往直隸以直隸州同知補用江蘇補用知縣方宗誠前署漂陽縣知縣金吳濶均著發往直隸以知縣補用刑部員外郎陳蘭彬著

發往直隸交曾國藩差遣委用○諭軍機大臣等曾國藩奏略陳直隸應辦事宜請調軍駐守並飭江蘇酌撥銀兩一摺直隸練兵治河俱關緊要曾國藩擬練兵二萬有奇自屬防患未然但急切未能奏效劉銘傳一軍萬餘人現駐張秋素稱得力卽著李鴻章飭知該軍長作拱衛畿輔之師所需餉項仍由江南撥解將來該軍應否調赴北路或分紮直東之交並著聽候曾國藩酌辦永定河歲修

銀兩未能足數而練兵之餉亦須豫籌直隸藩庫款項支絀異常自應酌撥餉項以資應用著馬新貽丁日昌按月籌解銀三萬兩毋得稍有短絀以重畿疆將此由五百里各諭令知之○又諭前因瑞麟奏滇省擬配粵鹽事多窒礙仍於滇餉無裨其奉撥餉款當飭藩運兩司等陸續籌解當交戶部議奏茲據該部奏稱粵鹽劃抵滇省欠餉既據瑞麟所稱廣南府縣鹽難暢銷恐沿途灑賣沖銷西

埠敗壞粵鹽全局各情辦理實多窒礙所有粵鹽運滇之處著照部議准其暫行停止惟滇省需餉孔亟而粵省於協解滇餉一事尚未實力妥籌滇軍必益形拮据著瑞麟李福泰卽飭藩運兩司及太平關監督並傳知粵海關監督於積欠滇餉數內先行提撥銀二十萬兩限本年三月以前遞派委員分批解赴劉嶽昭軍營或徑交滇省赴粵運鹽委員管解前往總期迅速達滇以濟要需並不准藉詞推諉劉嶽昭於此項銀兩到營後並著斟酌緩急商同岑毓英分撥支用以贍軍食至粵省現稱完善除此次先解二十萬兩外仍著瑞麟李福泰將應解銀兩源源籌撥毋令缺乏將此由四百里各諭令知之○旌表守正捐軀安徽宿州民婦常戴氏○庚寅諭軍機大臣等左宗棠等奏北路官軍獲勝勦辦竄邊賊匪續獲勝仗回逆求撫未可深信各摺片成定康劉松山等軍由清澗及綏德

等處進剿。疊獲大捷。事機極為順利。在事尤為出力之將領士卒。著左宗棠等存記。案案保奏。候旨施恩。匪勢現極窮蹙。左宗棠庫克吉泰劉典。務當飭令各軍。乘此聲威。分路進攻。將敗殘餘匪悉數殲除。為次第廓清之計。董幅詳恃鎮靖堡為堅巢。其眷屬則竊踞靖邊。該逆一日不除。賊黨一日不盡。著左宗棠等檄飭劉松山統率所部進攻鎮靖堡。徑擣賊巢。迅殲醜類。惟師行日遠。轉饋愈難。應如

何源源接濟。俾軍食不至缺乏之處。著該大臣等妥籌辦理。竄邊逆匪。經張曜等疊次擊敗。劉松山又由綏德掃蕩而西。直擣董幅詳老巢。該逆急於回顧。不但歸綏游氛漸斂。即榆林等處官軍。剿辦亦易得手。著左宗棠等激勵將士。迅赴戎機。毋稍延緩。董志原回逆首鼠兩端。現又求撫。左宗棠等恐其包藏禍心。未敢將就了事。所見甚是。該大臣等務當相機妥為辦理。毋稍大意。將此由六百里各

諭令知之。○又諭成祿奏克復肅州城池一摺。肅州業經克復。成祿當懷遵疊次諭旨。迅帶所部剋期出關。奮勉圖功。以副委任。楊占鼐帶兵尚能得力。即著隨同成祿出關。剿辦賊匪。肅州地方不可無兵鎮攝。著成祿酌留數營。以顧後路。成祿出關後。所部軍火糧餉。必須源源轉運。穆圖善當斟酌情形。派員在肅州地方妥為經理。俾免缺乏。肅州善後事宜。並著穆圖善飭令地方文武悉心籌辦。務

臻妥協。安肅道蔣凝學如尚未能赴任。即著遴派妥員前往接署。毋令員缺久懸。成祿另片奏現派馬忠良等充當回民頭目。請先行獎勵等語。馬忠良著賞給三品花翎。馬金貴蘇海麟韓忠國均著賞給四品花翎。仍責成該回民等將該處回務妥為料理。不得滋生事端。至此次克復肅州。成祿由六百里加緊馳奏。並附紅旗。殊可不。嗣後遇有克復地方。止須照常入奏。俟新疆全境底定。再行馳

報紅旗將此由六百里各諭令知之○以克復甘肅肅州城賞提督成祿楊占鼉黃馬褂守備任鳳翔千總石成器把總劉玉汪巴圖魯名號都司張賢等花翎復提督王仁和副都統色楞泰職免已革知縣寶璽遣戍並賞四品頂帶花翎餘加銜升敘有差予陣亡從九品熊奎把總楊潤春外委陳廷相等祭葬世職加等○以甘肅高臺金塔等處解圍出力擢遊擊謝長青以副將用千總王蘭譜王有著均以都司用把總黃祖沔以守備用王有著黃祖沔並賞花翎免已革副將楊永魁知縣房廷華遣戍並賞還頂翎餘加銜升敘有差○辛卯

上御撫辰殿大幄次賜蒙古王貝勒貝子公額駙台吉暨朝鮮使臣等食○諭內閣都興阿等奏請將辦理不善之旗民地方各官交部議處一摺據稱遼陽州糧行向用五升小斗該城守尉因永隆等棧呈請更換十升大斗

會同該州知州曉諭商民一體更換旋有貢生董壇武生董坊等以鄉民不便行使大斗聚眾入城抗鬧經該地方官拏獲十餘人稟請提省審辦等情此案該地方官並未體察輿情率行改用大斗以致鄉民聚眾滋鬧實屬辦理不善遼陽城守尉銳莊署遼陽州知州馮繼堯均著交部議處至貢生董壇等因更換大斗輒行糾眾滋事武生董坊施放洋槍致傷州役此風斷不可長並據該城守尉等稟稱董壇等欲令各鋪敘給伊弟編修董執進京盤費方准用斗又據犯供董執有為屯眾作寫匿名呈詞等情亦應切實根究著都興阿會同盛京刑部將案內人證詳細審明按律定擬具奏毋稍偏徇○又諭前據劉崑代奏山西按察使蔣益澧因病未能赴任當降旨給予假期旋據該員以假滿病未就痊懇請開缺仍復賞假調理山西地方緊要屢次催令該員假滿後迅赴本任以重職守

茲劉崐奏據該員呈稱病仍未愈請寬以時
日等語。蔣益澧簡放山西按察使為日已久
疊經給假尚無起程日期員缺未便久懸蔣
益澧著即開缺毋庸再行賞假○又諭劉崐
奏甄別同知州縣各員請旨降革一摺湖南
試用同知羅楷遷就取巧言語支離候補知
州梅震榮聲名狼藉不洽輿情試用知縣許
文釗勸辦捐輸鄙瑣營私候補府經歷徐禮
領解軍餉沿途騷擾均著即行革職試用直
隸州知州王懌輕率任情難膺民社著以縣
丞降補歸部銓選以肅官常○以盛京刑部
侍郎志和暫署兼管奉天府府尹○蠲緩湖
南澧武陵安鄉龍陽沅江華容巴陵湘陰益
陽臨湘十州縣暨岳州衛被水地方新舊額
賦有差○壬辰諭軍機大臣等前據蘇廷魁
等奏築工口門收窄水勢日見擡高現辦雁
翅魚鱗等埽為邊占之助不過旬日半月之
遲即可合龍當經諭令趕緊鑲築迅速歲事

迄今已逾旬日尚未見該署河督等奏到合
龍日期實深殷盼此事關係東南大局今年
節氣較早凌汛挑汛相偪而來若不及早堵
築歲事該署河督等豈能當此重咎著蘇廷
魁李鶴年督飭在工各員弁無分晝夜趕緊
趕辦剋期合龍毋許藉詞遷延並將近日水
勢情形迅即覆奏以慰廑繫將此由五百里
各諭令知之○又諭定安等奏敗匪糾合回
逆撲犯草地經官軍追勦獲勝一摺邊外回
逆經官軍擊敗後復敢糾合邊內大股回匪
出邊希圖牽掣官軍撲犯包頭鎮薩拉齊經
達爾濟大敗賊於布爾噶蘇臺扎哩克招等
處追殺五十餘里附近各村竄匪均經殲斃
其達拉特旗西北大股賊匪亦經扎那格爾
第等督隊迎勦擒斬頗多該逆喪膽向西南
敗遁勦辦甚為出力即著定安等知會杜嘎
爾督飭達爾濟等乘此聲威節節跟追奮力
掃蕩並著飭知馬陞督率沿河防兵加意堵

邊母令該逆得以撲犯以固邊防將此由五百里各諭令知之○以記名按察使史念祖為山西按察使○以山西綏遠歸化等處追勒竄匪獲勝賞總管達爾濟頭品頂帶子貝子扎那格爾第等優敘○豁免浙江蕭山會稽二縣被水牧地節年租錢○調察哈爾商都牧羣駝三百隻解赴綏遠歸化兩城備用

○癸巳

孝穆成皇后忌辰遣官祭

慕陵○諭軍機大臣等御史范熙溥奏有備無患一摺據稱直東之交伏莽易於潛藏擬設提督授以重權增兵加餉以資鎮撫並酌撥款項整頓窩鋪刊發簡明律例以肅營規各等語前據曾國藩奏稱練兵二萬有餘及調劉銘傳所部拱衛畿輔原為防患未然起見該御史所奏是否可採其酌撥經費整頓窩鋪刊給告示俾各營知所斂戢行之能否有益均著曾國藩察看情形酌度辦理至黃緣

傾軋最為官方之害曾國藩本擬整飭吏治如查有此等惡習並著從嚴叅劾以挽頹風原摺著鈔給閱看將此諭令知之○又諭有人奏湖北幕友徐翼黃緣卑污招搖生事請飭查辦等語據稱徐翼本係江陵縣幕友黃緣將軍門路招降叛黨莫昌幅等擢功得保復令莫昌幅等到處滋事串出李侍英首控教匪謀逆藉查拏餘匪為名恣憑將軍將其私人列保又潛勾河南匪徒來荆一面密稟將軍兜拏情節支離僉以為誑各等情湖北甫經安靖豈容此等僉壬藉端生事於地方大有關繫即著郭柏蔭何璟按照所叅各節訪查確實奏明辦理該將軍是否為其欺蒙一併詳查具奏不准曲為迴護降人莫昌幅等如實係不安本分並著按律嚴懲原片著鈔給閱看將此諭知郭柏蔭並傳諭何璟知之○又諭穆圖善奏官軍繫退竄擾南路陝回秦安等城解圍並請飭金順前往定邊等

處勦辦各摺片。陝回馬鎮和崔三率領馬步賊眾數萬圍撲泰安縣城。經教天印等分路抄擊斬馘甚多。該逆復直趨清水縣地面。官軍夜襲賊壘。賊向東路紛竄。由秦州北路分道進逼。四面仰攻。疊經教天印等追殺賊勢不支。退竄關山隴州一帶。此次賊股竄擾南路意在救援河州。教天印各軍均能踊躍用命。將泰安清水秦州城圍立解。所有出力員弁著准其擇尤彙案奏保。惟秦州為該省完

善之區。該逆股素所垂涎。現雖經官軍勦退。難保不聲東擊西。乘間分擾。仍著穆圖善督飭教天印等偵探賊蹤。乘勝壓勦。以杜回竄。河州地方緊要。並著嚴檄在事將士奮力截擊。毋任此股前往救援。復形棘手。定邊花馬池等處直達歸化包頭。因應嚴密防範。第金順現在榆林一帶勦賊。正屬得手。未便拔隊前往。著俟該處賊匪掃除淨盡。再行相機移紮。此時花定一路應如何保護糧道。穆圖善

仍當妥籌辦理。前據左宗棠奏。官軍疊獲勝仗。賊勢漸衰。劉松山等已由綏德西進。即著該大臣等檄令各將領與金順等軍聯絡聲勢。迅將榆綏等處踞賊痛加勦洗。用竟全功。將此由六百里各諭令知之。○賞烏珠穆沁親王彭蘇克那木濟勒孫阿勒坦呼雅克圖輔國公貝勒達克丹在紫禁城騎馬。○甲午諭軍機大臣等。蘇廷魁李鶴年奏。榮工合龍並籌辦善後一摺。現在大溜併股東趨。仍靠

壩前必須普壓大土。其大壩前後應鑲護埽。應幫土餞及增培隄壩。均當速籌妥辦。南岸三廳修守尤關緊要。著蘇廷魁等即將此次節省存項籌備物料。責成該管道督飭趕辦。務期全工穩固。永慶安瀾。不得草率從事。致有貽誤。將此由四百里各諭令知之。○又諭曾璧光奏。川黔各軍克復汛城。攻拔賊巢一摺。川軍陳希祥由安平進勦。連戰皆捷。平毀苗苗關永豐山一帶賊營。克復定南汛城。平

舟六尚等處積年賊巢亦經獨山州文武紳團次第攻拔提督林從太在都勻設伏擊賊臺有斬擒辦理均尚得手著曾璧光督飭派出各軍會同川師陳希祥合力勦辦迅掃狂氛獨山州出力各員并著曾璧光擇尤保獎毋許冒濫另片奏請催廣東欠餉等語粵省於應撥黔省月餉積欠甚多現在貴州軍務漸有起色亟須餉項充足方能乘機進取著瑞麟李福泰將積欠黔省月餉於該省司庫

鹽運粵海關三處款下按月勻撥解黔以濟要需毋再延誤將此由五百里各諭令知之○署河東河道總督蘇廷魁等奏報榮澤大工合龍命詣

河神廟祀謝開復蘇廷魁革職留任處分與河南巡撫李鶴年均加二級道員紹誠開復革職留任處分並賞布政使銜釋守備王麟把總朱永和和號免治罪○以貴州克復龍里等城出力賞總兵官李迎祥副將段多試

參將楊得勝趙明清何鳳鳴知府庭中瑜巴圖魯名號道員奇克慎參將張文道等花翎守備張開瀛等藍翎餘加銜升敘開復有差○予貴州都勻陣亡都司謝永綱祭葬世職加等○乙未

孝聖憲皇后忌辰遣官祭

泰東陵○豁免江蘇山陽阜甯清河桃源安東五縣被擾地方民欠錢糧暨徐州府海州所屬舊欠未完額賦○丙申諭軍機大臣等左

宗棠等奏劉松山一軍徑擣賊巢獲勝並勦敗北竄回逆現籌安撫事宜及請飭部撥餉採買糧石接濟各摺片○劉松山一軍自綏德埽蕩而西至靖邊之鎮靖堡又至定邊之高小灣三剿土匪一剿回匪均獲大勝洵屬謀勇兼優深堪嘉尚土匪董幅詳之父董侍有及董幅祿畏懾聲威將鎮靖堡及靖邊縣城降眾難民造冊乞撫卮彰餘黨亦詣鎮靖堡乞降左宗棠等因其罪尚可恕不忍峻拒自

係目睹其畏懾真情確有把握卽著該大臣等妥為安插惟董幅詳隨帶三四人未經招回尚未可恃著左宗棠等嚴飭董侍有迅速喚回毋令遷延變計其未投誠之賊首李棟等仍著飭令劉松山各軍奮力追剿以淨根株陝省北山素稱瘠苦籌糧為難亦係實情本日已飭戶部撥給部帑十萬兩解赴歸綏著定安於此項銀兩解到後派委妥員分赴各牛渠定購糧石解交金順大營轉發成定康以備賑撫安插之用第恐歸綏各屬一時未能得如許之糧並著定安設法採買解往毋令缺乏金順一軍前因穆圖善奏請飭赴定邊一帶曾諭該副都統酌度辦理現在榆林既有張曜等軍足資控制著金順仍遵前旨如東路可以無事卽仍回靖定一帶駐紮以資堵剿將此由六百里各諭令知之○又諭岑毓英奏尋甸官軍失利省城後路喫緊並請飭川省派兵援應迅解協餉一摺據

稱李維述各軍攻拔廠口羊街等處逆壘並祿勸境內肅清該逆力撲尋甸馬祥麟賀聯璧等所紮營堡相繼失陷全祖凱各營潰散附省逆匪攻陷東門外營盤現經恢復等語覽奏實為詫異前據劉嶽昭奏親赴尋營督戰何以當各路得手之時變生意外該督頓兵曲靖已及一年而於尋甸一隅並不奮力進剿殊屬意存觀望此次如已行抵尋營馬祥麟賀聯璧等營堡失陷何竟漫無鈐制設賊勢從此蔓延以致省城搖動該督能當此重咎耶著卽馳赴前敵督飭全祖凱等收集兵勇晝夜環攻以期痛殄賊氛毋得一誤再誤省垣關繫緊要岑毓英仍須督同馬如龍激勵士卒將附近匪巢相機攻拔所有失守營壘之千總楊義培廖鼎宗著卽革職拏獲就地正法以昭炯戒新降回目馬祥麟父子三人禦賊被害殊堪憫惻著劉嶽昭查明奏請議卹全祖凱賀聯璧防守不力並著查明

據實奏。叅川滇為唇齒之邦。滇事垂危。川省豈能坐視。著崇實。吳棠。迅派得力將弁。酌帶兵勇。由東川曲靖分路援應。毋稍遷延。應解滇省協餉。並著該督源源籌解。以資飽騰。劉嶽昭。岑毓英。於援軍未到以前。總當就現有兵勇。斟酌緩急。併力攻剿。以維全局。將此由六百里各諭令知之。○予雲南尋甸陣亡千總李安貴。把總馬標。外委李正明等。祭葬。世職。○予雲南富民陣亡都司易得勝。祭葬。世職。

職。○撥部庫銀十萬兩。解交綏遠城購備陝西軍糧。○丁酉諭軍機大臣等。劉嶽昭奏。尋甸援賊猖獗。暫行退守。請將文武員弁分別革職治罪。並自請嚴議一摺。尋甸援賊圍攻果馬。該處數十村翻旗從賊。謝景春等擅自撤營。以致各營失守。劉嶽昭現擬仍回曲靖。覽奏。曷勝憤懣。滇匪反覆無常。雖屬慣技。而劉嶽昭辦理此事。毫無把握。殊負委任。卽著懷遵。昨日諭旨。馳赴前敵。督飭全祖凱等收

集兵勇。痛殄賊氛。並飭道員劉嶽曙等分紮馬龍王家莊鐵廠等處。力為兼顧。不得以居中調度為辭。遷延不進。致滇省全境震動。仍一面商同岑毓英。力固省防。將附近匪巢。迅圖攻拔。毋得互相觀望。貽誤事機。所有撤營不報之總兵謝景春。著卽行革職。如再不知奮勉。卽於軍前正法。知縣謝培元。縣丞梁賡熙。均著革職。永不敘用。昭通鎮總兵李家福。著革職留任。總兵李盛貴。鍾福俊。王興仁。副將賀聯璧。均著革職留營效力。滇營將弁疲玩已極。此次失律。損師各員。姑照所請分別革留。以示薄懲。嗣後該督等務當申明紀律。如再有似此畏葸等情。卽按照軍法從重懲辦。毋稍姑息。劉嶽昭調度無方。著交部嚴加議處。陣亡之員弁兵勇。均著查明請卹。將此由六百里各諭令知之。尋吏部議。劉嶽昭應照不應重公罪降二級留任例。上加等議。以革職留任從之。○以正紅旗蒙古副都統奕

貴署鑲紅旗蒙古副都統○予安徽鳳陽等處殉難六品軍功張聖堂等紳民婦女三千五百八十一員名口分別旌卹如例○戊戌諭內閣都察院奏掌京畿道御史秀文才具不甚優長辦事未能得力請擇員更調一摺掌京畿道御史著准其以台斐音調補所遺掌山東道御史員缺即著以秀文補授○庚子福建巡撫卞寶第因病乞假以閩浙總督英桂兼署巡撫○辛丑

孝儀純皇后忌辰遣官祭

裕陵○諭軍機大臣等左宗棠等奏西南路各軍勦辦回土各匪疊勝暨榆林綏德一律肅清各摺片上年十二月間劉端冕一軍由郿州至新集將臺等處分勦回土各匪連獲大勝宜洛一路賊匪亦經張雲松郭運昌等分途追殺其東竄太白山河等鎮南竄涇州回股疊為魏光燾雷正綰等軍擊敗本年正月間劉厚塹郭寶昌等復將延安土匪宜洛回

匪痛歎延川延長歸巢回逆並經劉端冕等追擊擒斬甚多勦辦尚為得手即著左宗棠等督飭各軍乘勝跟追大張捷伐竄擾葭米綏德之董幅詳張萬飛各股經成定康等疊加截剿榆綏現已肅清該處兵勇自可調赴西路併力進攻著該大臣等斟酌情形將現在如何布置之處詳悉具奏西征一事必左宗棠督軍前進將士更易為功著即將省防事宜妥為料理一面厚集兵加剋期出省節

節掃蕩陝甘逆回蔓延已久該大臣務當一鼓作氣速奏廓清之效諒不待朝廷再三敦促也其榆綏兩屬善後事務著劉典嚴飭該地方官加意經理並著該大臣行知金順仍遵前旨回紮靖定一帶以資堵剿董幅詳是否投誠此次片奏何以又有董逆由府谷神木竄入葭米之事即著查明具奏將此由六百里各諭令知之○予陝西甘泉等處陣亡副將王開福遊擊史秀成都司盧華千總王

化臣。把總鄭有德等祭葬世職。○予江西進賢等處殉難廩生黎陞隆等紳民婦女九百九十九名口分別旌卹如例。○壬寅諭軍機大臣等。李鴻章奏遵查湖南藩司李榕叅案先行覆陳大概等語。李榕用優伶翠喜為家丁。業已確鑿。其有無縱令攬權詐贓及挾妓買良冤抑屬員苛斂殃民等款。均須徹底根究。至米捐如何騷擾以致與情不協。尤當秉公覈辦。本日已照李鴻章所請。令王文韶馳往湖南。署理藩篆。卽著李鴻章。劉崐。督飭該員及臬司李廷樟。將李榕被叅各款。確切查明。據實具奏。毋稍含混。優人翠喜現在湖南。著劉崐派員密速查拏。交地方官管押聽候提訊。毋任脫逃。將此由四百里各諭令知之。○湖廣總督李鴻章奏。提督王遠和呈請歸宗復姓為宋遠和。提督李常付請更名常孚。總兵官謝世彩更名詩才。王得勝更名孝祺。下部知之。○暫革湖南布政使李榕職。聽候

查辦。以湖北按察使王文韶署湖南布政使。

大清穆宗繼天開運受中居正保大定功聖智誠孝信敏恭寬毅皇帝實錄卷之二百五十一

大清穆宗繼天開運受中居正保大定功聖智
誠孝信敏恭寬毅皇帝實錄卷之二百五十二

光緒二十九年正月二十二日奉 慈禧端佑康頤昭豫莊誠壽恭欽獻崇熙皇太后 諭 軍機處 欽此

光緒二十九年正月二十二日奉 慈禧端佑康頤昭豫莊誠壽恭欽獻崇熙皇太后 諭 軍機處 欽此

光緒二十九年正月二十二日奉 慈禧端佑康頤昭豫莊誠壽恭欽獻崇熙皇太后 諭 軍機處 欽此

光緒二十九年正月二十二日奉 慈禧端佑康頤昭豫莊誠壽恭欽獻崇熙皇太后 諭 軍機處 欽此

光緒二十九年正月二十二日奉 慈禧端佑康頤昭豫莊誠壽恭欽獻崇熙皇太后 諭 軍機處 欽此

奏

同治八年己巳二月癸卯朔

上詣綏履殿問

慈安皇太后安。平安室問

慈禧皇太后安。至壬申皆如之。○奉

慈安皇太后

慈禧皇太后幸漱芳齋。侍午膳。○諭內閣。本年

輪應查閱福建浙江廣東廣西四省營伍之

期。福建著卽派英桂。浙江卽派李瀚章。廣東

卽派瑞麟。廣西卽派蘇鳳文。逐一查閱。認真

簡校。如有訓練不精。軍實不齊者。卽將廢弛

之將弁據實奏。毋得視為具文。○諭軍機

大臣等。戶部奏遵議籌撥吉林備調官兵整

裝銀兩一摺。吉林省挑選馬隊官兵五百名。

豫備神機營調撥。應需整裝銀兩。該省既無

存款可發。鋪商又力難再墊。經富明阿奏請

飭部籌撥銀一萬兩。據戶部議奏。擬於山東

地丁項下照數指撥。未到以前。由盛京戶部

墊發等語。著清安在於庫存項下籌出銀一

萬兩。將吉林官兵整裝銀兩。先行如數墊發。

以期迅速。並著丁寶楨。文彬。遵照部議。提撥

該省地丁銀一萬兩。徑解盛京戶部歸款。毋

稍遲誤。其給過官兵整裝銀數。著富明阿專

案覈實奏報。以清款目。將此諭知丁寶楨。並

由五百里諭知富明阿。清安。傳諭文彬知之。

○又諭。伊勒屯。何瑄。奏查辦案件。請飭交哈

密辦理。福濟。錫綸。奏請添調巴里坤官兵助

勦。各摺片。據稱郭鳳賢疏脫逆首阿底爾一

案。兩造供詞各執。且牽連干證多人。均在哈

密現在文麟已將郭鳳賢調赴哈城。卽著伊勒屯等將此案人證卷宗一併咨交文麟就近查辦。以成信讞。前據麟興等奏哈密兵勇調赴布倫托海行走維艱。請就近調用索倫人等。較為便捷。當經諭令福濟等熟商辦理。所有哈密練勇。應否調用。著福濟錫綸仍遵前旨。斟酌妥辦。至巴里坤官兵。旣據福濟等咨商。可以分撥。著伊勒屯、何瑄卽派滿漢官兵二百名。馳赴科布多聽候調遣。布倫托海叛眾近日情形若何。福濟錫綸務當妥商籌辦。相機進剿。毋稍遷延。將此由五百里諭知福濟錫綸、文麟、伊勒屯並傳諭何瑄知之。○越南國王阮福時遣使呈進方物。並補進上三屆例貢。命留抵三次正貢。賞賚如例。○改福建海壇鎮右營遊擊為都司。裁水師各標營千總九員。把總十六員。外委二十二員。戰守兵六千七百三十九名。從閩浙總督英桂請也。○甲辰遣官祭。

先醫之神。○諭內閣廣科奏銀庫該班官兵避匿。請旨辦理一摺。東華門內銀庫直班護軍校等。於本月初一日。竟無一人接班。經廣科派員嚴傳該官兵等。先期逃避。庫門外柵欄亦有浮動情形。難保別無隱情。銀庫重地。豈容任意玩誤。所有護軍惠林、全慶、明福、秀崑、玉來、松凌、文通、德蘊、吉陞、存壽。俱著斥革。護軍校穆騰額著先行革職。卽著步軍統領衙門順天府五城將該官兵等一體嚴拏。務獲解交刑部嚴行審辦。其餘銀庫該班各旗官兵如有應行傳訊之處。著刑部分別辦理。並著派惇親王、景壽會同管庫大臣盤查。有無別情。據實具奏。毋許含混。○諭軍機大臣等。據長善奏。滙陳邊關緊要情形。請飭文武和衷振作。辦理一摺。直隸軍務雖已肅清。而關內盜萌未絕。奉天、熱河等處。節經嚴緝盜匪。而邊外馬賊。仍不免出沒無常。加以土匪奸民。俱應隨時緝捕。長善所奏。於緝盜防邊。

不無裨益。著玉亮於到任後嚴飭所屬體察情形。於關門出入人等認真盤詰。遇有查出奸匪。卽知照地方官緝拏懲辦。並著曾國藩嚴飭各該州縣一體振刷精神。將保甲民團各事宜極力整頓。以期互相聯絡。各專責成。將此各諭令知之。○又諭定安桂成奏馬隊官兵續獲勝仗。敗匪退回邊內。並請飭山西巡撫籌撥短解等項餉銀各摺片。據稱回逆竄踞拉什吹朗召之庫家鋪。經烏爾圖那遜

扎那格爾第等率隊進剿。斃賊甚多。追至杭錦旗界。賊已由鄂托克旗遁入邊內。現在伊克昭盟鄂爾多斯七旗草地已無賊蹤等語。惟陝甘回匪每因邊內受創。卽走草地自應扼要嚴防。以杜紛竄。著定安等迅咨杜嘎爾督飭達爾濟所部駐紮河西新召一帶。其河西十里長灘哈拉寨等處並著檄飭烏爾圖那遜等各帶所部駐紮與現紮古城之張曜一軍聯絡聲勢。毋任該逆乘虛再犯。仍一面

嚴飭馬陞督率官兵加意防守。不准稍涉疏虞。據奏山西應解各款未能如數解到。馬步官兵餉乾均難按月支發。自係實情。著鄭敦謹迅飭該藩司於戶部指由京餉劃撥銀十萬兩內之短解銀四萬兩及允解防兵月餉之欠解銀五萬餘兩。並二月應解防兵月餉三萬兩一併趕緊籌解。毋得藉詞推延。至滿蒙旗綠各營官兵餉銀亦關緊要。仍著該署撫遵奉前諭。卽飭該藩司查明所欠數目。源

源撥給。以贍軍食。將此由五百里各諭令知之。○予江西各屬陣亡殉難千總胡光裕等紳民婦女二千八百六十九員名口分別旌卹如例。○乙巳遣官祭文昌帝君廟。○

上以祭

社稷壇。自是日始齋戒三日。○丙午諭內閣步軍統領衙門奏。拏獲偷盜內庫銀兩要犯。請交部審辦一摺。護軍德蘊等膽敢起意糾夥。

偷盜內庫銀兩多次實屬目無法紀該犯等供詞閃爍顯有不實不盡亟應嚴行根究德蘊全福秀崑玉來富謙何陞德錢氏郭白氏花慶阿吉順均著交刑部嚴行審訊逸犯穆騰額惠林等仍著嚴拏務獲歸案審辦至拏獲此案出力人員著刑部於定案時聲明請旨○諭軍機大臣等林壽圖奏清釐糧臺報銷並籌雷正綰軍餉一摺林壽圖現將交卸糧臺清理經手事件據稱年來所管甘餉止籌供雷正綰十數營因此一軍而留糧臺似覺糜費惟該軍逼近前敵艱窘異常餉項必須有著應否簡員接辦糧臺抑或裁撤歸併等語左宗棠總統師干陝甘兩省兵餉事宜均應該大臣通籌調度自本年三月起雷正綰一軍如須仍設糧臺卽著左宗棠派員接辦若酌度情形可以裁撤歸併則應歸何處支餉每月應給糧餉若干亦卽妥為覈定並須予以的餉源源接濟不得徒託空言該大

臣其統籌全局迅速奏聞將此由五百里諭令知之○撫恤朝鮮琉球二國遭風難夷如例○丁未祭先師孔子遣大學士朱鳳標行禮○欽奉慈安皇太后慈禧皇太后懿旨皇帝大婚禮儀典則崇隆允宜先期豫備一切應辦事宜著派恭親王寶璽會同總管內務府大臣禮工二部堂官詳稽典章敬謹辦理○諭軍機大臣等戶部奏請飭各省整頓丁漕按限奏報等語國家維正之供以地丁漕糧為大宗各直省自被兵以後瘡痍甫起田地未盡開墾徵收錢漕勢難驟復定額自係實情然理財之道不外盡地力而務農功果能設法招墾次第推廣賦額自日見起色本屆江浙新漕較之上年數目仍不相上下各直省地丁所入缺額仍多若不力圖整頓恐年復一年正供半歸虧欠國用所關豈容膜視著各直省督撫嚴飭該

地方官將招墾開徵諸事宜實力講求以期漸復舊額並著自同治八年為始督飭藩司將全省一年上下兩忙徵收丁漕各實數及上屆徵收總數開具比較清單詳明專案奏報統限各該年年底出奏以備稽考毋得遲逾將此各諭令知之○又諭戶部奏遵查各省釐金酌定添撥西征軍餉並請飭各省整頓釐金各摺片左宗棠前請按年籌撥陝甘實餉四百萬兩現據戶部將各省釐金覈明

通盤籌計奏請酌量添撥西北餉源素絀本仰給於東南陝甘現又軍務方殷不得不寬為籌備即著照戶部所議安徽省除接濟郭寶昌餉需軍火外無論釐金捐輸項下著吳坤修每月添協陝甘軍餉銀二萬兩每年共添協銀二十四萬兩浙江省除每月原協左宗棠軍餉銀七萬兩外著李瀚章每月再添協陝甘軍餉五萬兩每年共添協銀六十萬兩該省每年協濟雲貴軍餉十餘萬兩仍著

照常籌解該撫前奏每月再各撥五千兩即著毋庸添撥其應協山西清淮各餉不得藉口停免該撫當將該省防兵如何裁遣或酌補兵額之處認真籌辦以節經費現辦塘工捐輸及外省收捐分局仍著照舊辦理毋庸議改湖北省每月除原協陝甘各餉外著李鴻章郭柏蔭每月再添撥陝甘軍餉銀四萬兩每年共添撥銀四十八萬兩該省歲入各款較前徵收短少該督等當隨時逐款整頓

並將用款酌量緩急以資周轉本省及外省捐輸仍著照常辦理毋庸議改江西省除地丁項下每月原協陝甘軍餉銀二萬兩外著劉坤一每月再添撥陝甘軍餉四萬兩每年共添撥銀四十八萬兩江省釐金仍須認真經理毋令減色福建省除每月原協陝甘餉銀四萬兩照常籌解外著英桂卞寶第每月再添撥陝甘協餉四萬兩每年共添撥四十八萬兩江蘇省除曾國藩前奏由該省每月

協濟陝甘軍餉十萬兩。每年共一百二十萬兩。照數按月批解外。著馬新貽。丁日昌。每月再添協陝甘軍餉銀三萬兩。每年共添撥三十六萬兩。該省釐金。仍當整頓。其各屬捐輸。著照常勸辦。毋庸議改。至留防直東江鄂各軍食餉。尚鉅。應如何漸次裁減。著會商李鴻章妥籌辦理。至瑞麟前奏廣東省提存釐金五成。協撥外省軍需。未據酌定准數。著瑞麟李福泰。於原協陝甘餉銀每月四萬兩。照舊

籌辦外。每月再添撥陝甘餉銀三萬兩。每年共添撥三十六萬兩。該省添支各項經費。著瑞麟等力求撙節。以省虛糜。其本省及外省捐輸事宜。仍著照舊辦理。以上添撥銀兩。著該督撫等自本年正月始。一律照數籌撥。遇閏加算。按月各解交湖北省。陝甘後路糧臺交收。均不准稍分畛域。偶有蒂欠。致誤要需。該督撫等總當顧全大局。妥速籌解。左宗棠於接到餉銀時。著按照陝甘兩省缺餉多寡。

分別接濟勻撥。以昭公允。其各省原協陝甘各路軍營餉銀。均著照舊支應。毋稍牽混。各該省報解陝甘新舊撥款。及左宗棠劉典。穆圖善等營收到各省撥款。並各路捐局所收捐款。均著隨時奏報。以憑查覈。西征軍餉竭各省之力。以供應用。左宗棠當撙節支發。毋稍糜費。該大臣前請撥四百萬兩。現已酌撥至三百萬兩。不為不多。合之原協各餉。及收捐款目。每年統計九百五十餘萬兩。該大臣

原請銀數。能否覈減。卽著迅速覆奏。並將各營需餉實在數目。分別詳細奏聞。釐金一項。現據各該省奏報。每年減收已不下數百萬兩。若辦理不善。經費將何所出。各該督撫仍須悉心酌覈。力除中飽。毋得徒博虛譽。率行減免。遇有局卡太密。重複徵收者。仍隨時裁汰懲辦。其釐金報部章程。仍照兩淮鹽釐半年奏報一次。著馬新貽將開報式樣。鈔錄咨行各該省查照辦理。原摺片均著鈔給閱看。

另片奏。遵議穆圖善請催撥餉等語。湖北省奉撥甘肅餉銀二十萬。據郭柏蔭奏報。已如數批解。著穆圖善查明。此項撥款。是否收到。專案報部查覈。如尚未收到。卽著派員迎提。左宗棠前借洋款二百萬兩。除已提撥銀二十萬兩解甘外。其餘應分甘省若干。著左宗棠趕緊覈算。將應分甘省之款。陸續撥給。其指撥各海關六成洋稅一百萬兩。業據各關奏報批解過半。並著該大臣分半勻給甘省。

母稍延欠。四川應解甘肅鹽釐銀二十萬兩。現在解到若干。著左宗棠穆圖善查明迅速報部。並著吳棠迅將此項銀兩。埽數解清。毋許推諉。其河南等省應解協甘餉銀。卽著戶部開單分投嚴催。毋任延宕。將此由六百里諭知左宗棠李鴻章穆圖善馬新貽英桂瑞麟吳棠。丁日昌劉坤一李瀚章卞寶第郭柏蔭李福泰。並傳諭吳坤修知之。○又諭。前因岑毓英奏滇省欠餉太多。請飭部改撥等語。

當經降旨。交部速議具奏。茲據戶部奏稱。浙江等省共欠解滇省餉銀三十八萬三千兩。如將同治七年十二月浙江報解滇省餉銀五萬兩。歸入該省常年兵餉內覈計。應共欠解滇省餉銀四十三萬三千兩。覈與岑毓英奏報欠解數目。均有未符。其中因何參差。著岑毓英詳細查明。分晰開單報部。以憑覈辦。惟現在滇省軍情萬緊。待餉孔殷。除浙江廣東江西等省。另由該部覈辦外。其湖南河南

粵海關三處積欠該省餉銀各二萬兩。並四川欠解指撥該省餉銀八萬兩。亟應趕緊撥解。並著李鴻章吳棠劉崐李鶴年。師曾崇禮。各按實欠數目。無論何款。趕緊迅速籌撥。解赴滇省。毋得稍有稽遲。致誤邊陲大局。岑毓英於此項餉銀到時。當權衡緩急。先行均勻支放。以濟軍食。原摺均著鈔給閱看。將此由五百里諭知李鴻章吳棠劉崐李鶴年岑毓英。並傳諭師曾崇禮知之。○又諭。左宗棠劉

典奏請留現任藩司辦理經手事件鄭敦謹奏請飭分撥張曜軍營駝隻金順奏花定防勦情形並請飭晉省借撥京餉各摺片西路定邊花馬池一帶時有賊匪竄擾各軍分路追勦臺有新擒賊俱敗退惟北山官軍雲集劉松山一軍已抵鎮靖如該逆畏懾兵威別圖竄擾花定一帶恐復喫緊著金順會同張曜體察情形相機布置節節西進埽蕩逆氛榆林附近波羅堡之賊雖已聞風遠遁仍著

金順檄飭常福統率所部由邊外之紅洞澗一帶視賊所向認真勦辦郡王旗地方如尚有匪竄伏卽著派隊往勦毋任蔓延左宗棠庫克吉泰劉典務當統籌方略將一切進止機宜與金順會商分投勦洗以期次第廓清左宗棠等請將林壽圖暫留陝西藩司之任清理經手事件卽著飭令林壽圖暫緩交卸金順軍營需餉甚迫著鄭敦謹暫將應解京餉借撥十萬兩迅解金順軍營仍著該署撫

將欠解金順之餉先行湊足十萬兩補解戶部以清款項張曜一軍現紮古城採辦軍食轉運不易前因金順糧運艱難諭令定安等籌辦駱駝三千隻解赴榆林卽著定安於此項駝隻內分撥四百隻解交張曜軍營驗收俾資轉運將此由六百里各諭令知之○又諭左宗棠劉典奏甘省委員赴興漢一帶招募勇丁如穆圖善派田玉陞成祿飭楊開榜等所招之勇往往沿途搶劫滋事漢南一帶

毗連隴蜀不無潰勇會匪呼朋引類募勇之員輒向該處開招概為收留百弊叢生無裨軍事請飭甘省不必拘定漢南一帶招募等語漢南現尚安靖若在該處招募恐潰勇會匪藉端應募轉致滋生事端著穆圖善成祿嗣後招募勇丁不必執定陝西南山一帶亦不得任聽營官濫行招募以肅戎行將此各諭令知之○又諭崇實吳棠奏川軍赴援徽縣情形並派兵援滇抽練營兵各摺片甘回

由秦州南犯直撲徽縣經駐防大安之副將
宇文秀等帶兵掩擊生擒回目馬義和等並
將全股逆匪殲滅無遺徽境一律肅清勦辦
甚屬奮勉出力員弁及傷亡勇丁准其查明
分別奏請獎卹雲南尋甸賊勢猖獗情形緊
急川滇唇齒相依自應速籌援應崇實等現
已撥銀接濟並調唐友耕一軍馳赴東昭尚
能力顧大局著該將軍等飭令會合滇軍相
機防勦以全危局其川北一帶並著飭令李

有恆嚴為戒備毋稍鬆懈川省用兵日久餉
需支絀所議裁勇練兵自為節餉整軍起見
著卽督同富森保胡中和將旗綠各營認真
訓練俾成勁旅以備緩急之用所請酌加津
貼銀兩卽著照數覈實動支將此由五百里
各諭令知之○四川總督吳棠奏在籍主事
陳廷瑞守備張連聲私招勇丁請併案審辦
得旨陳廷瑞等均著嚴行審訊並著飭令該
地方官隨時稽察遇有假名招勇聚積匪類

者卽行嚴拏懲辦毋稍輕縱又奏防堵喫緊
請將上屆軍政仍展緩舉行從之○以四川
官軍援勦甘肅徽縣回匪獲勝予知州周振
瓊副將宇文秀周蓮生升敘有差○戊申祭
大社

大稷遣恭親王奕訢恭代行禮○以京畿雨澤
愆期

上詣
大高殿祈禱行禮○遣惇親王奕誼詣

時應宮惠郡王奕詳詣

昭顯廟定郡王溥煦詣

宣仁廟貝勒載治詣

凝和廟拈香○以神靈顯應頒山東禹城縣

關帝廟扁額曰祝阿昭佑○諭內閣惇親王

等奏遵查內庫銀兩虧短情形一摺東華門

內銀庫經惇親王等逐細盤查共計虧短銀

九千餘兩之多與步軍統領衙門前奏起獲

銀兩數目不符著刑部再行嚴切根究按律

懲辦所有失察直班弁兵之該管大臣應得處分並著刑部於定案時聲明請旨嗣後應如何設法稽查益昭嚴密之處著前鋒統領護軍統領等衙門妥議章程具奏尋議庫門內外向有直班官兵擬添派章京在彼率領每日官兵出班時由庫門外直班章京會同庫官按名嚴密揆查後赴景運門呈報確實方准出班並請飭戶部添派庫官一員互相稽查以昭嚴密從之○諭軍機大臣等本日

據左宗棠奏榆林暨薩托清一帶肅清宋慶一軍應否飭其回豫免滋勞費等語上年陝回竄擾邊外歸綏等處所調防勦兵勇人數甚多購糧不易左宗棠西征各軍亦以兵多糧絀為虞是轉運日煩軍行轉增苦累現在歸綏薩托清一帶及榆綏各屬一律肅清且春融凍解晉防較鬆所有前次調赴歸綏之神機營吉林黑龍江馬步各隊天津之洋槍隊如可撤回著定安斟酌情形具奏宋慶一

軍雖屬採糧維艱而該軍素稱得力既由太原取道永甯入陝若再令折回未免徒勞跋涉張曜現在陝西北路即著左宗棠迅飭該提督率隊前往會同張曜相機堵剿杜賊東趨將此由五百里各諭令知之○欽差大臣左宗棠奏請以翰林院侍講學士袁保恆督辦西征糧臺並專摺奏事允之○以陝西將臺等處截勦回匪獲勝賞提督王照南正一品封典副將楊恩澤蕭德林邵永齡巴圖魯名號從九品吳銘訓藍翎餘升敘開復有差○越南國使臣黎竣等三人於神武門外瞻覲○己酉

孝淑睿皇后忌辰遣官祭

昌陵○庚戌春分朝

日於東郊遣克勤郡王晉祺行禮○諭內閣前因翰林院代奏編修吳鴻恩呈稱表揚節孝請歸學政主稿一摺當經降旨交禮部議奏茲據奏稱學政衙門主稿不若督撫辦理妥

速請仍照舊章毋庸議改等語。表揚節孝風化攸關。自應及時辦理。以免積壓稽遲。嗣後各直省督撫務當督飭各州縣於應行旌表節孝。取有供結。限一月內徑詳督撫學政會同具題。如有逾限。卽著將失察之員隨本附叅。交部議處。○諭軍機大臣等。定安桂成奏請將在防官兵分別移紮遣撤一摺。前因歸綏薩托清一帶賊蹤已遠。諭令定安將前調神機營馬步各隊及天津洋槍隊酌量撤回。

原以此項官兵勢難久戍邊外。茲據定安等奏稱草地現無匪蹤。擬將防兵分別遣留。著仍遵前旨。斟酌情形。將前項官兵可否撤回之處。卽行奏明辦理。其餘蒙古官兵及沿河駐紮滿漢官兵。仍著定安等裁汰老弱。挑留精壯。擇要扼守。勤加訓練。賊蹤來去無定。該將軍等仍當督同杜嘎爾馬陞等隨時偵探賊情。與張曜等軍聯絡聲勢。相機防勦。毋稍疏懈。另片奏留防官兵夏秋月餉馬隊請仍

給七兩步隊仍給三兩等語。著准其照數給發。以示體恤。將此由四百里各諭令知之。○又諭總理各國事務衙門奏四川酉陽州民教仇殺現籌辦理情形一摺。據稱法國使臣羅淑亞以酉陽州一案情事重大。必欲派員前往會辦。經該衙門阻止。該使函開四款。約須照辦。旋帶同由川省來京傳教士至署。聲言民教仇殺皆由該省官員暗中唆使。又復函開五款。砌詞挾制。均經該衙門逐層辯論。

仍請飭妥速辦結等語。民教仇殺釀成巨案。若不迅速持平辦結。無以折服中外之心。轉令該使有所藉口。現在該衙門業將該使所開各條。並與辯論情形密函知照。著崇實吳棠參酌情形。妥速籌辦。但能一秉大公。處置允當。民教自各息爭端。不至別生枝節。案關中外交涉。該將軍等務當持平辦理。迅速結案。毋稍遷延。原摺著鈔給閱看。將此由五百里各諭令知之。○辛亥。諭內閣景紋奏。滬陳

西藏僧俗愛戴情形。代請獎勵一摺。據稱上年西藏辦理贍對事竣。該達賴喇嘛等。以商上僧俗及在事漢番各員。均邀獎敘。惟駐藏大臣未奉恩旨。公同具呈。代為景紋請獎等語。覽奏甚為詫異。景紋身為駐藏大臣。辦理藏務。本屬分內之事。乃以俯順番情為詞。自行乞恩。向來無此體制。且據稱新任駐藏大臣恩麟。即日可以到任。如果該達賴喇嘛等愛戴情真。何不呈請恩麟具奏。景紋雖託詞。

批駁數次。仍於交卸之先。自行陳請。實屬卑鄙無恥。景紋著交部嚴加議處。尋兵部議景紋應降四級調用。無庸查級紀議。抵從之。

壬子諭內閣。單懋謙奏承修盛京。

鳳凰樓工程。請派員勘明應行採辦木植。以備興修一摺。著派阜保。胡家玉。敬謹查勘應用。木植大小尺寸。開單奏交盛京將軍。遴員照式採辦。並著該將軍等隨時查勘。俟木植採齊。即行奏請興修。○又諭。刑部奏審明言官。

聽受賄屬。並案內各犯定擬具奏一摺。此案給事中徵麟。因聽受鞏進年等代張傑賄買。摺奏率以杜申捐糧入己等情具摺陳奏。雖經刑部訊明。賊未接受。而輒藉言事為納賄之資。其情節甚屬可惡。吏科給事中徵麟。著照部議。即行革職。發往軍臺效力贖罪。其所擬鞏進年等杖徒各罪名。均著照所議辦理。○以刑部右侍郎英元兼署吏部左侍郎。戶部左侍郎龐鍾璐兼署兵部左侍郎。禮部右。

侍郎溫葆深兼署刑部左侍郎。○以正白旗。

漢軍副都統銘安署鑲紅旗滿洲副都統。

癸丑。

孝康章皇后忌辰。遣官祭。

孝陵。○甲寅。諭軍機大臣等。神機營奏。遵議金。

順請調撥官兵一摺。山西歸綏一帶。防務雖鬆。仍不可稍涉大意。吉林黑龍江馬隊。未便撥赴榆林。著照神機營所議。仍歸定安調遣。毋庸遠調。此項官兵。未可久戍在外。一俟歸。

綏撤防。卽著定安飭令回京歸伍。其察哈爾馬隊。旣未便交杜嘎爾管帶。應否仍回張家口備調。或卽在歸綏助防之處。著定安會商金順妥籌辦理。金順現在勦賊喫緊。兵力如不敷分布。左宗棠穆圖善自應酌度情形。各將得力隊伍。酌量撥給。以資厚集。儻該副都統軍營餉糈支絀。並著左宗棠穆圖善妥為兼顧。設法接濟。毋任缺乏。原摺著鈔給閱看。將此由五百里各諭令知之。○又諭麟興等

奏。現聞招撫布倫托海變民。並請酌留餉銀一摺。據稱巴里坤領餉委員毓秀等。經伊勒屯等派往布倫托海招撫變民。麟興等現已催令先往辦理等語。布倫托海變民。現在情形若何。日久未見奏報。何以伊勒屯等遽行派員招撫。是否確有把握。果能悔罪輸誠。未始不可網開一面。予以自新。若辦理稍涉遷就。恐此等愚民。不知畏威感恩。難免復蹈故轍。著麟興榮全錦丕勒多爾濟伊勒屯何瑄。

飭令該委員等相機妥辦。不可輕率從事。致貽後患。福濟錫綸身任布倫托海大臣。此事是否可行。並著會商籌辦。其哈密練勇。應否調用。著福濟等仍遵前旨。斟酌情形。知照文麟辦理。麟興等請將布倫托海餉銀酌留四五萬兩備用等語。著照所請酌量留用。將此由五百里諭知麟興榮全錦丕勒多爾濟福濟錫綸文麟伊勒屯。並傳諭何瑄知之。○補行同治六年軍政。西安駐防卓異官三員。議

敘如例。○乙卯遣官祭

文昌帝君廟。○丙辰遣官祭黑龍潭

昭靈沛澤龍王之神。玉泉山

惠濟慈佑靈瀆龍王之神。昆明湖

安佑普濟沛澤廣生龍王之神。密雲縣白龍

潭

昭靈廣濟普澤龍王之神。○遣官祭圓明園

惠濟祠

河神廟。○諭軍機大臣等劉嶽昭奏馬龍州

城解圍。霑益餉道無阻。現調勁旅合攻尋城一摺。尋甸逆首楊標奇等率眾萬餘。由王家莊直竄馬龍。經副將楊國發等連番追擊。斬馘甚多。並將湖瓜田等處賊營焚毀。馬龍州城圍立解。王家莊踞匪焚寨而逃。附近村堡亦一律收復。其竄踞霑益境內之三營各村逆股。並經總兵謝景春等先後攻克。賊眾奔潰。霑益餉道得以無阻。現在東昭三郡亦皆安堵。即著該督商同岑毓英督飭李廷標等軍。乘此聲威。分路進剿。一面飭令楊玉科等進攻八甲果馬。並守備任順有招集鄉練四面兜圍。以期迅復尋城。毋稍鬆勁。劉嶽昭仍當懷遵疊次諭旨。親赴前敵督軍攻取。以贖前愆。此次解圍出力之副將楊國發等。著暫行存記。俟尋甸收復後。再由該督同其餘出力員弁及傷亡兵勇。分別奏請獎卹。另片奏革職總兵。懇請開缺隨營等語。革職留任昭通鎮總兵李家福。著毋庸開缺。仍責令帶隊。

勦賊以觀後效。將此由五百里各諭令知之。
○丁巳遣官祭

關帝廟。○遣官祭昭忠祠。○諭內閣都興阿等奏恭修

福陵

隆恩殿等工。請擇吉移請

神牌安奉

東配殿一摺。著欽天監於三月初四日以前。敬謹選擇吉期。迅速具奏。○太僕寺卿徐繼

畬以老病乞休。命以二品頂帶致仕。

大清穆宗繼天開運受中居正保大定功聖智
誠孝信敏恭寬毅皇帝實錄卷之二百五十二

實錄卷之二百五十二

三十九

大清穆宗繼天開運受中居正保大定功聖智
誠孝信敏恭寬毅皇帝實錄卷之二百五十三

叔

同治八年己巳二月戊午日重輪抱珥五色

諭軍機大臣等文麟奏查辦搶劫賊犯擒捕餘匪興辦屯田請飭撥駝隻等項景廉改換營名各摺片哈密南山口一帶時有賊匪聚眾搶劫雖經文麟拏獲首犯正法而石城子躔泉子等處盤踞賊匪不少自應及早擒捕以絕根株且據犯供吐魯番逆匪有二月間撲擾哈密之信尤當先事嚴防著文麟督飭官軍先將附近之賊擒緝淨盡其各路要隘務須嚴密防守以杜窺伺景廉業經行抵

敦煌卽著懷遵前旨。迅赴哈密。與文麟商辦一切。張玉春所帶威儀營。經景廉改為靖邊營。是否別有意見。現在哈密諸事創始。文麟景廉總當和衷商榷。共濟艱難。不得各懷私見。致誤大局。其各營月餉。並著文麟等按照營數均勻分撥。毋稍偏枯。哈密興辦屯田。需用駝隻等項。前經諭令烏科兩城撥給。茲據文麟奏稱。接麟興等咨。除馬匹照數撥給外。僅撥給駝二三百餘隻。水牛三百餘隻。不敷

應用。且水牛亦不能為耕田之用。等語。著麟興、榮全、錦丕勒多爾濟仍照文麟前次請撥之數。挑選齊備。卽行解交哈密應用。如挑撥不能足數。卽於解到新疆餉銀內提款買補。扣抵哈密軍餉。科布多應撥駝隻等項。並著奎昌、明瑤迅速撥給。毋稍延緩。哈密應建城垣。仍著文麟、景廉會勘辦理。將此由五百里各諭令知之。○又諭總理各國事務衙門奏分界事宜。請飭迅速辦理一摺。前據福濟等

奏稱。科城所分之地。西至瑪呢圖噶圖爾幹卡倫。已色過布倫托海之西三百餘里。布倫托海現無與俄國可分地界。惟瑪呢圖噶圖爾幹卡倫以東。所包布倫托海之三百餘里內。有無塔城管轄之地。未據該大臣等詳細聲明。如現在應分界內。有向歸塔城屬地。卽係布倫托海專管之處。該大臣等仍當遵照前旨。將分界事宜妥為經理。今日之布倫托海。卽前日之塔爾巴哈台。異名而不異地。不

得藉詞含混。意存諉卸。若實無塔城屬地。則該處分界事宜。自應歸奎昌經營。卽著責成奎昌悉心辦理。毋許推諉。至立界一事。上年遲誤。已失信於俄人。此次約期已近。若再不迅速舉行。尚復成何事體。著榮全、奎昌、福濟按照定約。如期前往。各將應分地界。會同俄使妥速辨結。並著麟興、錦丕勒多爾濟、明瑤、錫綸於該處分界事宜。隨時與榮全等商酌妥辦。毋稍膜視。儻該將軍等藉故耽延。致有

貽誤卽著總理各國事務衙門據實奏原摺均著鈔給閱看將此由五百里各諭令知之○乍浦副都統明興因病解職調鑲黃旗漢軍副都統富爾孫為乍浦副都統以頭等侍衛常順為鑲黃旗漢軍副都統○補鑄甘肅安肅道關防從烏魯木齊提督成祿請也○予陝西鄜州殉難知州鄭壽齡祭葬世職加等○己未遣官祭

歷代帝王廟○諭軍機大臣等前據岑毓英

奏籌辦滇省軍務八條當交該部速議具奏茲據覆奏逐條酌議請飭該督撫認真籌辦並飭各省迅撥餉銀等語滇省杜逆盤踞迤西日久稽誅上年復陷楚雄等處擾及省垣一帶若不練兵選將力圖攻剿恐匪勢蔓延愈難收拾岑毓英所陳各條係為破除積習大舉進剿起見自應速籌辦理著劉嶽昭岑毓英卽照部議章程悉心會商將擇將選兵練勇各條實力整頓並將分道進取之處妥

籌辦理不得日久因循有名無實原摺單著鈔給劉嶽昭岑毓英閱看至滇省軍餉缺乏各省協撥之款自應趕緊籌解四川湖南山西浙江每月共應撥銀十二萬一千六百餘兩著吳棠劉崐鄭敦謹李瀚章嚴飭藩司迅速籌款按月解其常年兵餉及酌提餉銀亦卽陸續籌解不得仍前延緩岑毓英所請劃撥鄰省協餉著照部議將浙江應解滇餉銀六萬兩江西應解滇餉銀四萬五千兩一

併改歸湖北撥解著李鴻章郭柏蔭轉飭藩司在於本年應解京餉款內劃出趕緊解滇並著李瀚章劉坤一文輝將應解滇餉劃解部庫以清款項其廣東省並太平關欠解滇餉銀十三萬八千兩著瑞麟李福泰卽行備齊派員由輪船解至漢口卽由李鴻章等委員遞解滇省以期迅速至粵鹽劃抵滇省欠餉案內撥銀二十萬兩著瑞麟李福泰仍遵前旨限本年三月前分批解赴劉嶽昭軍營

母稍遲延原單均著摘鈔閱看將此由五百里諭知李鴻章瑞麟吳棠劉嶽昭鄭敦謹郭柏蔭李瀚章劉崐劉坤一李福泰岑毓英並傳諭文輝知之以故一等昭勇侯楊忻子光坦襲爵以正紅旗滿洲副都統延煦署鑲黃旗漢軍副都統以江蘇漕標官軍防勦擒匪出力賞副將張保聖一品封典副將劉鶴年田恩來參將張相泰巴圖魯名號同知江綬麟遊擊朱徵庸等花翎守備傅克棟

等藍翎餘加銜升敘開復有差 庚申

上復詣

大高殿祈雨行禮 遣惇親王奕誥詣

時應宮恭親王奕訢詣

昭顯廟醇郡王奕譞詣

宣仁廟孚郡王奕誨詣

凝和廟拈香 壬戌諭軍機大臣等福濟錫

綸奏哈薩克殺賊獲勝籌辦分安厄魯特人

眾暨安置索倫各摺片布倫托海叛民殺害

哈薩克多人哈薩克率眾尋仇遂將叛民圍殺福濟等現與奎昌等商酌撥給火藥等件助其攻擊即著飭令該郡王凌扎棟魯普轉飭該頭目等勦力進攻迅將叛民盡數殄滅朝廷必立予恩施獎其義憤現在哈薩克既與賊交惡圍攻賊營布倫托海地方事有轉機福濟等前請調哈密巴里坤兵勇應否即行停止即著相度機宜知照文麟伊勒屯何瑄辦理至厄魯特人眾尚多聚之一方不如

散之各處自係實情福濟等擬於科城之杜爾伯特地方量為安插再於烏里雅蘇台庫倫所屬喀爾喀等四愛曼內定地分置即著奎昌明瑤調令棍布扎普赴科面為開導令其酌量杜爾伯特地方可以安置若干戶責成該王妥為經理其餘人眾即在車臣賽因諾顏圖謝圖扎薩克圖等四愛曼內安置著麟興榮全錦丕勒多爾濟張廷岳阿爾塔什達各飭該旗汗王等遵照辦理不得互相推

該此項人眾安插得所卽各歸該管大臣隨時約束一切未盡事宜著麟興奎昌張廷岳等會商福濟等悉心籌畫務臻妥協至阿勒台山南既有現成隴畝地多閒曠可以安插索倫人眾著福濟等斟酌情形妥速籌辦一面咨商麟興等將厄魯特人眾趕緊分布免與索倫雜居一處滋生事端將此由五百里諭知麟興榮全錦丕勒多爾濟奎昌明瑞福濟錫綸文麟張廷岳阿爾塔什達伊勒屯並

傳諭何瑄知之○命普濟堂功德林貴賑展期兩月○癸亥諭內閣御史袁方城奏請整飭吏治一摺近來參革人員往往以軍營為捷徑夤緣保舉開復之後難免故態復萌不可不嚴加甄覈著各直省督撫於此項人員留心察看儻有劣蹟卽行從嚴叅劾統兵大臣亦不得將參革之員濫行留營以杜幸進州縣為親民之官凡實缺人員必當久於其任方能洞悉民情藉資整頓各該督撫毋得

存調劑之見率行更換至文員蒙捐本籍果有此弊實屬不成事體著各直省督撫曉諭所屬如有此等人員准其自行檢舉改歸他省儻始終蒙混一經發覺卽行從重懲辦司道與屬員拜認師生向干例禁惟陋習相沿難保必無此弊著各該督撫隨時訪察嚴行禁止毋稍徇庇前因軍務方殷各該地方官拏獲匪徒卽行就地正法原屬一時權宜之計除現有軍務地方仍准照辦外其業經肅

清省分遇有獲案要犯著仍照舊章詳由該管上司覆覈辦理以重人命從前各州縣設有防堵公局本以保衛地方現在軍務已平省分原設防堵之局未盡裁撤地方官與局紳假公濟私在所不免著該督撫卽行查明概行裁撤以省擾累○以正紅旗滿洲都統景壽署鑲白旗蒙古都統前任廣州漢軍副都統成明署鑲白旗滿洲副都統頭等侍衛忠德署鑲黃旗蒙古副都統正紅旗蒙古副

都統寶珣暫署正白旗滿洲副都統以正紅旗漢軍副都統希元署右翼前鋒統領以河南開歸陳許道紹誠為按察使旌表守正捐軀河南盧氏縣民女李隨英甲子諭內閣工部奏風聞司員身家不清請飭查明以清流品一摺工部捐納郎中劉文鍾其祖曾充粵海關衙門門丁署中司員差與為伍該郎中籍隸大興是否身家不清卽著順天府府尹督飭大興縣知縣確切查明據實

具奏毋許稍有含混以重流品而肅官方恭親王等奏現辦大婚禮大清門以內經由各門座應否修飾得旨屆時俱行清道毋庸油飾彩畫亦不必派員查勘予福建浦城陣亡舉人許觀成賞卹如例撫恤琉球國遭風難夷如例乙丑諭內閣景豐奏拏獲偷盜內庫銀兩要犯請交部審辦一摺護軍松凌偷盜內庫銀兩逃至密雲縣境經佐領榮壽等訪獲亟應嚴行訊究卽著景豐妥

派員役將該犯解送刑部嚴行審訊按律懲辦佐領榮壽等三員緝捕尚屬出力均著交部議敘諭軍機大臣等彭玉麟奏遵籌水師分汛事宜布置周妥再行回籍一摺長江水師關係東南大局彭玉麟於交代後不卽回籍擬赴江浙就醫仍回長江周歷勸勉具見悃忱深堪嘉尚該侍郎在江上十餘年氣體日衰朝廷不忍遽拂其意准其回籍第無重臣督率易於廢弛仍著彭玉麟於假滿後懍遵前旨前赴江皖擇地駐紮以資控制黃翼升接任後當念創始艱難新舊交代之際尤為勤惰之所乘除務須振作精神力圖報稱不可稍涉疏懈其有應行補救更張之處並著李鴻章馬新貽丁日昌劉崑劉坤一吳坤修文輝隨時會商黃翼升悉心酌度請旨辦理以期日久不至廢墜將此由四百里諭知李鴻章彭玉麟馬新貽丁日昌劉坤一劉崑黃翼升並傳諭吳坤修文輝知之○又諭

穆圖善奏收復肅州大概情形。請將出力員弁獎勵。並鈔錄肅州回目原稟暨遵繪地圖。附陳甘省兵勢賊情餉事。擬由川省招募兵勇。請飭成祿自設糧臺。金順回駐花定。各摺片。所陳收復肅城情形。與成祿前奏大略相同。前諭楊占鼇隨同成祿出關勦賊。惟現在肅城新復。一切善後事宜。亟須布置。該署督卽飭楊占鼇暫駐肅州。會同該鎮道等悉心籌辦。毋令再生事端。甘州金塔等處匪蹤未

淨。並著該署督飭令李守愚等相機布置。以靖地方。至回目稟內所稱沙州口外各回民奉烏嚕木齊妥老阿渾送書來肅。寄來帥印二顆。其中有無別項情弊。成祿現在出關。卽著就近查明。斟酌辦理。其餘稟訴各情。亦著穆圖善隨時體察。以消反側。成祿統軍西行。本無定所。應於何地安設糧臺。便於呼應之處。仍著該提督自行派員督辦。該軍應需糧餉。著左宗棠於撥給甘餉內。分籌該軍的餉。

數成。毋令缺乏。穆圖善亦當於甘餉解到時。按照左宗棠所籌成數。徑解成祿糧臺。不可意存歧視。四川等省每年應協成祿糧臺。卽著戶部查照原撥省分。迅速咨催。前解金順現已移紮定邊花馬池一帶。卽著督率所部兵勇實力防守。遏賊東趨。磴口糧臺是否被回匪全搶。著左宗棠庫克吉泰穆圖善定安鄭敦謹劉典查明實在情形。具奏。委員烏勒西布等下落。並著穆圖善飭員查辦。甘省兵

勇缺額太多。由四川招募兵勇。能否得力。糧餉能否接濟。著該署督酌度辦理。甘民困苦已極。該署督自當妥籌良策。用就救平。不得以餉絀兵單為辭。稍存諉卸。左宗棠已行抵乾州。於甘省情形知之較易。該署督便可將兵勢賊情彼此和衷商辦。迅奏廓清。以紓廩繫。穆圖善奏磴口糧臺被搶片。著鈔給左宗棠庫克吉泰定安鄭敦謹劉典閱看。將此由六百里各諭令知之。○命都察院左都御史

毛昶熙倉場侍郎衍秀前往天津驗收海運
漕糧戶部右侍郎延煦前往通州會同倉場
侍郎畢道遠辦理驗收事宜以甘肅克復
洮州廳城並攻拔官堡賊巢出力賞總兵官
榮立茂鄭開發一品封典副將吳康達劉天
雲參將李華錦黃澤峰余瑞義杜學凱遊擊
李大成管得發巴圖魯名號都司姚舉等花
翎千總王興等藍翎餘加銜升敘開復有差
以克復甘肅肅州城予縣丞杜輔臣以知
縣用並賞同知銜花翎餘加銜升敘有差
追予江蘇各屬陣亡殉難候選通判陶澤煊
等紳民婦女二千八百五十八員名口分別
旌卹如例撥湖北火藥二萬斤火繩五千
盤鉛丸五千斤解赴甯夏將軍穆圖善軍營
備用丙寅清明節

上詣

奉先殿

壽皇殿行禮遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵遣官祭

端慧皇太子園寢以神靈顯應加山東東
海孝婦祠封號曰誠感丁卯諭軍機大臣
等前據左宗棠奏請於陝甘餉項外專款指

撥西征實餉。當交戶部議奏。茲據該部奏稱。各省專協左宗棠劉典穆圖善軍營月餉。皆同治六年以前奏定數目。此外另協之款。如指撥洋稅一百萬兩。接濟左宗棠軍餉。及劉松山郭寶昌協餉。尚不在內。本年二月間。添撥安徽等七省釐金三百萬兩。原係歸併覈議。令各省轉解左宗棠軍營。兌收酌協陝甘兩省之用。未便另分西征實餉等語。各省報解協餉。遲速多寡。難免參差。若必區定協餉

界限。彼此不能通融。則各路軍營餉需。必至此絀彼盈。中多軒輊。左宗棠總統師干。陝甘兩省皆該大臣管轄。自應將兩省軍需通盤區畫。隨時勻撥接濟。不必強分界限。亦毋庸稍避嫌疑。嗣後各省關前後奉撥陝甘軍餉。除專解穆圖善軍營及秦州銀每年一百二十萬兩。仍解甘肅外。其原撥左宗棠協餉。每年三百三十餘萬兩。劉典協餉。每年六十萬兩。及本年添撥各省釐金三百萬兩。均仍由

左宗棠兌收。以一事權。該大臣務將各軍一切餉需。酌量緩急撥濟。並分助甘肅之用。不得置穆圖善軍營於不顧。至各該省關原撥陝甘兩省各路軍營餉項。及安徽等七省本年添撥陝甘軍餉銀兩。著戶部咨催各該省力籌報解。儻任意延欠。卽由該部指名嚴叅。原摺著鈔給左宗棠閱看。至郭寶昌一軍月餉不敷。已照戶部所議。諭令吳坤修鄭敦謹按月籌解。該大臣當督飭郭寶昌奮勉圖功。

毋得糜餉。老師是為至要。將此由五百里各諭令知之。○又諭前據左宗棠奏。西征皖軍月餉參差。請飭安徽添撥。當諭令戶部議奏。茲據奏稱。郭寶昌一軍馬步共十七營。照楚軍營制。每月需銀五萬一千兩。除山西原撥一萬兩。皖省籌解二萬五千兩。湖南原撥未解之款。業經該省奏明停止。仍由皖省籌解銀五千兩外。每月尚短銀一萬一千兩。請飭安徽再行添撥等語。將士同營異餉。彼此相

形恐釀釁端自係實在情形著吳坤修在於釐金捐輸項下每月再添撥郭寶昌軍餉銀一萬一千兩連前撥二萬五千兩原撥湖南改由皖省籌解銀五千兩共銀四萬一千兩按月如數籌措一併解交郭寶昌軍營毋令稍有缺乏山西月協該軍營一萬兩著鄭敦謹源源籌解俾濟軍食原摺著鈔給吳坤修閱看將此由五百里諭知鄭敦謹並傳諭吳坤修知之○又諭前因麟興等奏請撥部庫

銀兩並催各省應解新疆協餉當令戶部速議具奏茲據奏稱各省應解新疆月餉曾於山西欠款內提銀八萬兩山東欠款內提銀十二萬兩河南欠款內提銀十萬兩迄今僅據山西解過銀三萬兩其餘均未報解新疆各城軍務緊急待餉孔殷設有貽誤譁潰堪虞著鄭敦謹丁寶楨李鶴年文彬迅將上年奏提之三十萬兩趕緊歸數解清毋再延緩至直隸山西山東河南四省應解新疆月餉

著曾國藩等飭令各該藩司自本年正月起按月籌解不得再行短欠其舊欠之款每月尚能籌解若干並著自行酌覈據實覆奏儘再諉卸拖延置西餉於不顧卽著戶部指名嚴叅至巴里坤哈密等處現赴烏城領餉整待哺係屬實情卽著戶部先行借撥銀二十萬兩由順天府遴派妥員迅速遞解烏里雅蘇台由麟興等酌量分撥各城文麟伊勒屯等於餉銀到時均勻支放以拯飢軍至此

次部庫借撥之款卽在山西河南山東欠解新疆協餉項下劃解部庫以清款目山西山東各劃銀七萬兩河南劃銀六萬兩著鄭敦謹丁寶楨李鶴年文彬迅速劃撥限五月節前歸數解部毋得稍有帶欠原摺著鈔給鄭敦謹丁寶楨李鶴年文彬閱看將此由五百里諭知曾國藩麟興榮全錦丕勒多爾濟鄭敦謹丁寶楨李鶴年文麟景廉伊勒屯並傳諭文彬何瑄知之○予甘肅甯夏合門殉難

候選縣丞畢慶雲文生張玉樹二家男婦四十二員名口分別旌卹加等。○追予四川各屬陣亡殉難紳民趙榮奇等暨婦女一千二百九十五名口分別旌卹如例。○戊辰

孝昭仁皇后忌辰遣官祭

景陵。諭軍機大臣等金順奏綏德營勇猝變盤踞州城現飭所部嚴加備戒並請飭山西巡撫調軍扼紮軍渡一帶請將玩誤軍糧之知州摘頂各摺片據稱駐紮綏屬新店之老

湘四營兵變攻入州城成守陳牧不知去向該逆勇並搶去成信軍餉銀數萬其義合兩營亦同時生變刻下州城逆勢愈熾有合股竄赴榆林之謀等語覽奏深為詫異老湘一軍向稱得力此次駐紮綏德劉松山交與何人管帶何以任其構變攻陷州城且西路回逆土匪並未淨盡該逆勇若與句合則下攻清澗上攻米脂而榆林相距非遙亦為可慮金順現已商令劉厚基調撥一營前赴米脂

並通知宋慶先由神木酌撥數營取道葭州赴米扼堵所辦甚是著卽督飭所部嚴為扼防一面探明情形會同劉厚基等相機堵擊其成信軍新招後營馬隊已否隨同肆擾並著就近查明知照左宗棠等辦理左宗棠身統師干責無旁貸卽著會商庫克吉泰劉典嚴飭劉松山迅為戡定以遏亂萌並查明該營勇丁因何變亂據實奏明懲辦歸化距榆綏不遠自應及早防範著定安卽飭馬步兵

勇擇要嚴防毋任乘閒竄越綏德與永甯僅隔一河鄭敦謹尤當迅調勁旅於軍渡一帶先期扼紮以備意外之虞並於永甯迤南各渡口一體撥兵嚴防毋任擾及晉疆至湘軍留駐黃河東西兩岸及山西永甯州屬之柳林鎮尚有三營難保不聞信思亂著左宗棠庫克吉泰鄭敦謹劉典察度情形妥為鈐束金順摺內所稱之成守陳牧自係成定康陳瑞芝二員該員等現在下落並著左宗棠劉

典查明具奏署葭州知州胡有志經金順派運軍糧並不上緊籌運任意枝梧實屬不知緩急胡有志著先行摘去頂帶仍責令將派運軍糧埽數解營如再有違延卽由金順咨照劉典據實嚴叅以儆玩泄此項變亂勇丁恐其飽掠而歸仍取道河南著李鶴年迅派得力員弁帶隊前往堵禦免致紛竄將此由六百里各諭令知之○蠲免直隸安任隆平天津四州縣被水村莊額賦有差已已諭軍機大臣等上年十一月間因御史郭從矩奏山西平定州所屬之樂平鄉有外來匪徒聚眾搶刦各情當經諭令鄭敦謹迅飭該地方官嚴拏究治並諭官文李鶴年飭屬會緝至今已逾數月未據鄭敦謹等覆奏殊屬不成事體樂平地方在深山之中南近河南東界直隸設匪類日聚日多必至釀成巨患州縣官以諱飾為能事而鄭敦謹亦置之不問將來勢成滋蔓豈能當此重咎著卽嚴飭該

地官官趕緊緝拏逐案究治如有諱匿情事卽著從嚴叅辦匪徒此拏彼竄是其慣技並著曾國藩李鶴年嚴飭所屬會同搜捕毋得稍分畛域以期除惡務盡將此由四百里各諭令知之○庚午諭軍機大臣等鄭敦謹奏叛勇窺伺晉疆現籌堵禦一摺老湘左旗一軍兵變攻陷綏德州城該叛勇竄擾軍渡西岸呼令東岸之湘勇兩營入夥經官軍轟擊旋即折回現在劉松山郭寶昌成定康及宋慶所駐各營足敷巡防西岸卽著鄭敦謹會商左宗棠等督飭各軍認真守禦毋任該逆勇擾及晉疆劉松山已抵綏德並著左宗棠庫克吉泰劉典責成劉松山將該逆勇分別查辦速為戡定老湘營係該提督所部儻不能剋期歲事任令逆勢蔓延恐劉松山不能當此重咎也據鄭敦謹奏該營因查拏哥老會匪激成事端究竟如何啟釁是否另有別情左宗棠卽查明原委據實詳細奏聞米脂

一帶防務著金順懷遵昨日諭旨妥為布置
仍一面探明情形會同劉厚基等相機進剿
遇賊即擊迅殄逆氛至東岸各客軍鄭敦謹
當督飭陳湜設法撫馭並接濟口食以安其
心將此由六百里各諭令知之○以太常寺
卿彭久餘為大理寺卿○辛未諭軍機大臣
等衍秀畢道遠奏訪聞積慣偷竊漕糧人犯
請飭拏辦一摺歷年漕糧由通壩轉運大通
橋其間宵小結夥行竊實為倉務之害茲據

衍秀等訪聞各犯開單呈覽著步軍統領衙
門即派幹員按照所開姓名住址密速查拏
送交刑部訊辦毋任一名漏網原單著鈔給
閱看將此諭令知之○壬申遣官祭賢良祠
○諭內閣文盛奏廢員不安本分請從重改
發一摺廢員特保因錢債涉訟膽敢抗不遵
斷挾制問官咆哮公署實屬目無法紀特保
著從重改發黑龍江到配後枷號一箇月滿
日交該管官嚴加管束以示懲儆○諭軍機

大臣等定安等奏請將神機營天津馬步各
隊暫停撤回並左宗棠奏請飭綏遠城將軍
等嚴杜逆回接濟各摺片歸綏地方遼闊防
務緊要所有前次調往之神機營吉林黑龍
江天津馬步各隊既據該將軍等察看情形
驟難撤回著准其暫行停撤仍令各隊扼紮
嚴防不准稍涉疏懈俟該處軍務略鬆再行
奏明辦理此次左宗棠奏奪獲逆首于彥祿
所騎之戰馬據逆姪于驢兒供係馬化澄餽

送又據探報董志原賊巢糧食將絕馬化澄
於二月間用駝運糧接濟嗾其入犯馬化澄
陽雖就撫陰實助逆是京師前此拏獲置買
軍械之犯據刑部所奏恐有濟賊情事已屬
確實著該部即提丁良潰馬大平二犯嚴刑
審訊取有確供即行照律懲辦以昭炯戒逆
回糧械等項既自金積堡販運而來必由歸
化城包頭一帶轉運前此包頭曾盤獲逆匪
買馬是其明證著定安桂成嚴飭各廳於所

管地方認真盤查遇有甘肅採買糧食戰馬
槍礮等項非持有穆圖善委員印文一概禁
止轉運以斷逆匪接濟之路毋稍疏忽將此
由六百里各諭令知之○以奉天清河邊門
緝匪出力賞驍騎校順林等五品銜花翎餘
升敘有差○以甘肅正甯等處迎勦回匪獲
勝賞副將趙興隆劉治均遊擊黃虎臣都司
朱蘭亭巴魯魯名號縣丞青勝藍藍翎總兵
官徐占彪等加銜升敘有差○予綏遠城十
里長灘陣亡驍騎校三音們都祭葬世職加
等

大清穆宗繼天開運受中居正保大定功聖智
誠孝信敏恭寬毅皇帝實錄卷之二百五十三

大清穆宗繼天開運受中居正保大定功聖智
誠孝信敏恭寬毅皇帝實錄卷之二百五十四

恭錄穆宗皇帝實錄卷之二百五十四

理學宗師

元江漢

學

知

救修

同治八年己巳三月癸酉朔

上詣綏履殿問

慈安皇太后安。平安室問

慈禧皇太后安。至壬寅皆如之。○諭內閣。文彬

奏。知府稟訴本管道員。請一併解任查辦。一

摺。據稱山東兗州府知府沈錫慶稟稱。兗沂

曹濟道長賡連斃李三等九命。內有卞衍運

等三名。係府署夫役。經長賡非刑斃命。旋據

長賡稟稱。拏獲隨捻焚劫之劉吉等五犯。並

究出李三潤跡。府署轎班房。探聽消息。該道

因府署轎班房聚集多人。開場賭博。實為益
較。率勇往拏。起獲賭犯賭具。將卞衍運等棍

責示懲。乃卞衍運等不服。大肆咆哮。該道恐

啟胥役刁惡之漸。飭役重責。卞衍運等因之

斃命。嗣經文彬派委候補道王成謙往查。均

與長賡所稟相符。覈與沈錫慶所稟懸殊。請

飭查辦等語。府署轎班房開場聚賭。容留匪

類。何以該管知府毫無覺察。稟內亦無一字

提及。是否有心隱飾。在官人役設局誘賭。亟

應按律懲辦。長賡有無任用非刑。均應徹底

根究。長賡沈錫慶著一併解任。卽著丁寶楨

提同人證卷宗。嚴審確情。據實具奏。毋稍徇

隱。○又諭曾璧光奏。拏獲不法武員。遵旨正

法。請將出力各員獎勵一摺。已革總兵林自

清前在雲南戕官屠民。嗣後擁眾萬餘。滋擾

四川。並多攜死黨回籍。焚殺搶擄。擾害閭閻。

甚至妄給頂翎。私設釐局。霸占田地。無所不

為。其帶勇由四川繞赴貴州興義縣時。該署

知縣陳世鎮。因其蓄意巨測。不令入城。竟至挾嫌將陳世鎮及其子陳先洋並家丁二名。盡行殺斃。並搶去行李衣物。實屬情同叛逆。罪不容誅。經曾壁光密派提督陳希祥等設法擒拏。立在營前正法。並將其隨帶練勇全行勦殺。洵足以申國法而快人心。該撫等於此事不動聲色。籌畫精詳。卒使積年巨慝。首從悉就殲除。實屬辦理迅速。所有出力之提督陳希祥。著賞給達春巴圖魯名號。並賞穿黃馬褂。布政使黎培敬。著賞戴花翎。道員林肇元。著交部從優議敘。吳德溥。著賞加布政使銜。畢大錫。著賞給格洪額巴圖魯名號。宣維禮。著賞給博奇巴圖魯名號。○諭軍機大臣等。豐紳謙禧奏陝匪突竄河西。經官軍迎勦。仍遁回河東。請飭金順督隊赴援一摺。陝匪於上年十二月間。竄撲橫城。經官軍擊退。後復敢偷渡河西。撲犯通昌等村莊。並由磴口南竄。搶掠李岡等堡。現經豐紳督兵擊敗。

該逆仍竄回河東。卽著豐紳謙禧就現有兵力。隨時偵探。認真堵勦。毋令該逆得以肆擾。第甯夏防兵單薄。設有大股回逆竄近。力難堵禦。前諭金順督隊回駐花定等處。刻下綏德勇變。各軍俱集。金順如能西行。卽著左宗棠等酌量情形。飭令金順前赴花定等處駐紮。以為甯夏屏蔽。用壯聲威。將此由六百里諭知左宗棠。庫克吉泰。劉典。金順。豐紳。並傳諭謙禧知之。○又諭岑毓英奏官軍肅清武定州逆匪。並攻克羅次縣城及邵甸等處賊巢一摺。雲南自馬龍州城解圍後。該逆分黨竄擾邑市等處。經官軍節節進勦。當將武定州境一律肅清。復進攻羅次。斃匪甚多。該縣城亦經克復。其邵甸古城柯渡可郎等處賊巢。俱經官軍以次掃蕩。岑毓英此次改調李廷標一軍。由邑市橫出嵩尋之間。上下截擊。並飭何秀林等分道進取。調度甚合機宜。著該督撫飭各路將弁乘勝進勦。以殄逆氛。劉

徽昭仍當懷遵疊次諭旨。親赴前敵督軍攻勦。不得株守一隅。將此由六百里各諭令知之。○又諭曾璧光奏安南普安兩城被賊闌入。旋即收復一摺。貴州安南縣城失陷後。曾璧光因青山餘匪四出滋擾。飭令普安文武前往堵勦。該匪復乘虛襲陷普安縣城。旋經同知吳宗蘭等分路進攻。先後將該兩城克復。惟該處附近一帶。賊匪出沒靡常。難保不復圖紛竄。仍著該撫督飭各該地方文武嚴

密防範。並將善後一切事宜妥為經理。毋稍大意。將此由五百里諭令知之。○以四川越舊攻克夷巢出力。賞遊擊鍾大有等花翎。縣丞繆庸等藍翎。副將熊得勝等加銜升敘有差。○以貴州安南普安兩縣城被賊竄陷。旋即收復。予署同知知縣吳宗蘭以知府用。並賞花翎。通判牟謙篤藍翎。革署知府知州劉正朝代理知縣府經歷周佳琦都司馬金奎。把總黃志綸職。仍留營。○以貴州擒獲不法

武員林自清正法。予通判章桐以知州用。守備陳希湧以遊擊用。均賞花翎。從九品林澤忠等藍翎。餘加銜升敘有差。被戕知縣陳世鎮祭葬世職加等。子文生先洋賞卹如例。○以雲南克復武定等城出力。開復前護總督布政使宋廷春署提督總兵官馬如龍降級留任處分。予遊擊楊玉科以副將用。並賞巴圖魯名號。餘加銜升敘有差。陣亡都司王瓊等十四員祭葬世職加等。○予直隸南皮等

縣殉難監生高容崑等紳民婦女一百五十六名口分別旌卹如例。並予建祠。○甲戌諭內閣劉崑奏援黔各軍連破苗巢。並克復鎮遠府衛兩城一摺。席寶田等軍自疏通清江後。進規鎮遠一路。上年十一月間。經榮維善等疊破抱金苗榜報谷黃牯地鬼科各寨。斃賊數千人。十二月間。清江逆苗渡江占踞者磨附近之張溝。經蘇元春等襲勦。拔其柵壘。殲斃逆酋輦往金失。並賊黨數百人。本年正

月間苗逆九大白復糾悍賊三四千人屯踞上下臺繞榮維善唐本有等率軍圍偏陣斬逆酋往垢堞等數十名餘賊悉數就殲蘇元章等並將秀地等寨次第攻克黃潤昌等會師焦溪派兵將竄擾思州晃州後路之賊肅清二十七日督隊直薄鎮遠府城各軍奮勇爭先斬關而入該逆奪路狂奔立將鎮遠府衛兩城克復分兵追擊連拔牙溪等處數十地先後擒斬賊眾二三千人其古州一路亦

經戈鑑等軍疊克賊寨勦辦甚為得手仍著督飭各軍進取施洞口等處節節掃蕩迅殄逆氛○諭軍機大臣等麟興等奏分安厄魯特人眾諸多窒礙暨請撥款籌買哈密牲畜等件各一摺前據福濟等奏厄魯特人數眾多科屬之杜爾伯特未能安插擬於烏城庫倫之喀爾喀四愛曼內分置當經諭令麟興等遵照辦理茲據麟興等奏稱該城所屬之喀爾喀扎薩克圖汗賽因諾顏西兩部落並

無隙地可容厄魯特人眾窒礙甚多已咨明福濟等另行酌議等語厄魯特人眾是否可以分布必須斟酌情形會商良策固不可冒昧舉行致貽後患亦不可因一處畏難不辦遂至彼此推諉著麟興榮全錦丕勒多爾濟奎昌明瑤福濟錫綸張廷岳阿爾塔什達悉心商酌各將該處能否安插有無窒礙之處通盤籌畫會同妥議具奏至烏城應撥哈密駝隻各件既未能措辦足數自應籌款買補

以應急需前經戶部借撥銀二十萬兩解赴烏城交麟興等勻撥巴里坤哈密應用著於此項餉銀內提出銀二萬兩由文麟派員前赴烏城接領自行購買足數並著麟興等派員幫同照料此項銀兩即著文麟覈實報銷以清款目本日明降諭旨將布彥烏勒哲依圖賞用黃纁並賞給銀二萬兩即作為特旨加恩著麟興傳知布彥烏勒哲依圖俾該汗益深感激其銀兩亦於戶部借撥之二十萬

兩內如數提用。將此由五百里各諭令知之。
○以齊齊哈爾協領愛紳泰為黑龍江副都
統。○賞土爾扈特盟長卓哩克圖汗布彥烏
勒哲依圖黃縵並所部貝勒公官員等銀二
萬兩。○補鑄陝西駐劄神木辦理蒙古民人
事務關防從巡撫劉典請也。○添鑄黑龍江
管理齊扎雅等九臺哈克鄂莫等八臺圖記。
博爾濟哈臺察普欽臺鄂多爾圖臺布拉克
臺扎喀和碩臺呼蘭臺新安臺各臺記從署

將軍德英請也。○以湖南官軍克復貴州鎮
遠府衛兩城。予記名布政使席寶田等優敘。
賞提督蘇元章一品封典。遊擊楊洪亮巴圖
魯名號。餘加銜升敘有差。予陣亡總兵官江
忠珀祭葬世職加等。謚武愍。建專祠。副將范
榮超等十六員祭葬世職加等。○旌表守正
捐軀山西崞縣民王增壽妻杜氏。○乙亥。祭
先農之神。遣順承郡王慶恩行禮。○丙子。
上復詣

大高殿祈雨行禮。○遣惇親王奕誼詣

時應宮恭親王奕訢詣

昭顯廟。孚郡王奕譞詣

宣仁廟。惠郡王奕詳詣

凝和廟拈香。○予直隸安徽山東河南等處

陣亡副將周盛武等四十一員祭葬世職加

等。周盛武暨兄遊擊盛華姪孫副將行發於

安徽廬州府原籍合建專祠。周盛武妻陶氏

殉節旌表如例。並附祀。○釋遣戍黑龍江已

革甘肅提督成瑞已革科布多參贊大臣廣

鳳回旗。○丁丑。追予浙江各屬陣亡殉難從

九品方家薰等紳民婦女三百五十三員名

口分別旌卹如例。○戊寅。撥武備院弓六百

張。梅鉞箭二萬枝。解赴烏里雅蘇台備用。○

己卯。諭內閣。本格萬青藜奏。祇告祭文發遞

遲誤。請旨飭查一摺。此次恭修

泰東陵

隆恩殿暨

昌陵

和裕皇貴妃園寢饗殿。經欽天監擇於三月

初三日辰時。行祇告禮。移請

神牌。茲據本格等奏稱。祇告祭文。遲至禮成後

始行遞到。著兵部將因何遲誤之處查明覆

奏。尋奏查係中途州縣遞送遲誤。請飭直隸

總督順天府府尹查取職名叅處從之。○諭

軍機大臣等。左宗棠。劉典奏。官軍蕩平董志

原賊巢。果軍叛勇戕害統將。並綏德勇變情

形各摺片。董志原回匪。疊經官軍懲創。潛謀

竄遁。經雷正綰。黃鼎等督軍追剿。自太昌荔

家堡起。直抵慶陽府城。斬戕盈萬。沿途賊巢

一律肅清。現在賊蹤徑趨金積堡。正可乘其

喘息未定。痛加剿洗。著左宗棠。劉典。飭令各

軍節節進剿。毋稍鬆勁。追軍既經深入。仍當

策應後路。以助聲援。不可稍涉大意。所有各

軍獲勝情形。並著詳細奏聞。果軍營勇變亂。

提督高連陞被戕。本日已明降諭旨。照請予

卹矣。此次變起倉卒。經周紹濂等扼之同官

古泉。叛黨殲除殆盡。辦理尚為迅速。首逆丁

玉隴。是否在必逃。必須嚴拏務獲。盡法懲治。毋

任漏網。綏德州叛勇情形。前已據金順。鄭敦

謹先後奏報。諭令左宗棠等速籌戡定。現在

郭寶昌。宋慶等軍。均已前進。兵力甚厚。著左

宗棠。劉典。飭令劉松山。會合各軍。迅速圍剿。

毋任旁竄。其軍渡一帶。著鄭敦謹。飭令陳湜

嚴密守禦。以防偷渡。陝省各營。旬日之間。勇

丁兩變。殊屬不成事體。左宗棠身統師干。責

無旁貸。應如何整頓營規。撫馭將士。豫籌弭

變之方。務當悉心籌畫。以固軍心。而杜後患。

全福馬隊。計已行抵直隸境內。著曾國藩。鄭

敦謹。催令由山西汾州永甯州過河。隨同劉

松山進剿。毋稍遲延。將此由六百里各諭令

知之。○以直隸宣化鎮總兵官馬德昭為甘

肅提督。○以陝西同官勦除叛勇。予遊擊桂

錫楨以參將用。並加副將銜。○予陝西楊店

被戕提督高連陞祭葬世職加等。諡勇烈。於
廣西。浙江。福建。廣東。陝西。立功地方建立專
祠。○追予江西各屬殉難巡檢徐思鏞等紳
民婦女四千五百六十九員名口分別旌卹
如例。並予建祠。○旌表守正捐軀山東卽墨
縣民婦張王氏。○庚辰。諭軍機大臣等。據吳
坤修奏。自上年三月接辦郭寶昌軍餉。現擬
截至九月底。作為一案造報。惟郭寶昌未將
收支數目報結。左宗棠咨稱給發津貼。又未

將數目移知。礙難懸揣造報。請旨辦理等語。
郭寶昌自同治七年三月起。由左宗棠津貼
銀數。並照湘軍支發口糧。起支日期。著該大
臣查明。知照吳坤修。以憑造報。抑將該軍所
領正雜各款。統由左宗棠造報。以歸畫一之
處。並著該大臣酌度辦理。原片著鈔給閱看。
將此由五百里諭令知之。○署安徽巡撫吳
坤修奏。辦理撤勇。尚稱安靜。至清查田畝。現
責令各屬區畫都圖。升科招墾。得旨。撤勇一

節。著卽妥慎辦理。毋任滋生事端。清查田畝。
尤須督飭地方官實力為之。毋求速效。毋託
空言。○泰甯鎮總兵官鍾岱因病解職。以盛
京禮部侍郎清安為泰甯鎮總兵官。兼總管
內務府大臣。未到任前。以內閣學士銘安署
理。○以內閣學士麟書為盛京禮部侍郎。○
豁免兩淮富安。安豐。梁垛。東臺。何垛。丁溪。草
堰。劉莊。伍佑。新興。廟灣。板浦。中正。臨興。十四
場舊欠竈課銀兩。○辛巳祭

先蠶之神。遣總管內務府大臣春佑行禮。○
以吏部尚書單懋謙。暫署工部尚書。刑部尚
書譚廷襄。兼署都察院左都御史。○以前任
西安右翼副都統穆隆阿。署鑲紅旗漢軍副
都統。鑲黃旗滿洲副都統克興阿。署正白旗
漢軍副都統。正藍旗蒙古副都統載良。署鑲
紅旗滿洲副都統。○追予江蘇各屬殉難五
品銜陳廷弼等紳民婦女二千三十五員名
口分別旌卹如例。○予山西太平等處殉難

光祿寺署正呂紹望等紳民婦女五十三員名口分別旌卹如例。並予建祠。○壬午。諭軍機大臣等。李鶴年奏籌撥潼關荆關兩路防軍一摺。綏德變勇。現經官軍進逼。難保不乘隙逸出。該逆既有覓路回家之意。勢必取道河南。李鶴年現已令宋慶由神木拔隊會合張曜等軍進剿。並令酌撥數營沿河迤南直趨潼關。與馬德昭防軍合力守禦。所籌尚妥。著卽飭令該提督等會合各軍速為戡定。並偵探賊蹤。相機防剿。毋任闖入豫境。荆子關一路為豫楚交錯之所。尤應先事嚴防。王萬釗所帶標兵為數無多。恐難得力。著李鴻章酌派兵勇迅赴該處。會同王萬釗之兵實力防範。以備不虞。本日據吳坤修奏。皖省撥解郭寶昌軍餉。由湖北轉運。該營久未接到。恐由西安轉解。以致遲滯。現在郭寶昌駐紮宜川。派員在潼關接餉。著李鴻章飭令轉運局嗣後凡遇皖省解到該軍餉銀。卽行徑解潼

關交郭寶昌委員兌收。以期無誤要需。將此由六百里各諭令知之。○癸未。

孝賢純皇后忌辰。遣官祭。

裕陵。○改福建臺灣鎮標右營臺灣協中營澎湖協左右二營都司臺灣鎮標右營守備為千總。噶瑪蘭守備為把總。裁臺灣協中右二營澎湖協左右二營守備各一缺。臺灣鎮中左二營臺灣城守右軍北路協中營臺灣協中左右三營澎湖協左右二營噶瑪蘭營滬尾營南路營嘉義營北路協右營千總十四缺。臺灣鎮標中營南路下淡水營北路協中營右營臺灣協中左右營滬尾營澎湖協右營把總十七缺。外委四十六缺。馬兵五十名。戰兵三千七百四十七名。守兵三千一百五十六名。改臺灣鎮標右營為道標。專隸臺灣道管轄。從閩浙總督英桂請也。○追予江蘇各屬殉難五品銜周志等紳民婦女一千九百十三員名口分別旌卹如例。○蠲緩廣西

歸順宣化。隆安。永瀉。新甯。武宣。崇善。左。養利。永康。天保。奉議。凌雲。橫。來。賓。象。雒。客。柳。城。思恩。河池。桂平。平南。貴。臨。桂。靈。川。賀。永。安。武。緣。賓。遷。江。上。林。三十一州縣被擾地方。額賦有差。○甲申。諭內閣。英翰現在百日服滿。著卽仍回安徽巡撫署任。○諭軍機大臣等。前因降眾李維忠等由天津潛逃出關。當經諭令盛京等將軍府尹一體嚴拏務獲。旋據奕榕奏稱。拏獲李振澄一名正法。而李維忠原名李維藩。綽號烏痣李。及徐萬良。丁萬幅。董勤。李恆等五名。遲至十月之久。僅據富明阿奏將李恆拏獲。其餘均未就擒。李維忠等在關外時。種種不法。投誠後。狼子野心。仍復怙惡不悛。若不亟行拏辦。必至潛匿滋患。著都興阿。富明阿。德英。志和。恩錫。魁齡。飭屬嚴密躡緝。務將李維忠卽烏痣李等按名弋獲。卽於該地方正法。以杜後患。並著知照各蒙古旗一體兜拏。不得任意遷延。致干重咎。將此由

五百里各諭令知之。○又諭。史念祖由軍營出身。人尚明白。惟未經歷地方事務。是否能勝臬司之任。著曾國藩留心察看。據實具奏。以重地方。將此諭令知之。○調直隸按察使張樹聲為山西按察使。山西按察使史念祖為直隸按察使。○乙酉。

上復詣

大高殿祈雨行禮。○遣惇親王奕誼詣

時應宮。恭親王奕訢詣

昭顯廟。孚郡王奕譞詣

宣仁廟。惠郡王奕詳詣

凝和廟拈香。○諭內閣。御史宋邦德奏請整頓吏治。並請舉辦社倉社學。普濟育嬰。各摺片。州縣為親民之官。苟不得人。則百姓休戚漠不相關。而民生日蹙。故化民善政。莫如責成州縣。以求吏治。該御史所陳興教化。杜浮收。清案牘。省徭役。禁官價。除盜賊。修城池。禁賭博。治衙蠹。減僕從。各條。均為州縣官應行

之事。著各直省督撫嚴飭各該州縣實心講求。並飭藩臬各司及本管道府隨時查察。如有廉勤素著者。卽著列名保奏。其因循不職之員。並著破除情面。從嚴叅處。以肅吏治而裕民生。至社倉社學普濟堂育嬰堂。皆有裨於吾民。惟日久弊生。各州縣不無廢弛。現除用兵省分外。卽著各該督撫轉飭所屬地方官。查照舊章。一律興復。第設立社倉等項。每資民力。奉行不善。適以擾民。其瘠苦地方。應否酌提公項。以均貧富之處。並著各直省督撫妥議章程。奏明辦理。○又諭御史宋邦德奏京控案件牽連人證。請飭加意矜恤。並審辦各案亟宜申理等語。各直省京控案件。自應及早清釐。庶不至拖累無辜。久淹囹圄。近來各省。往往將案内人證任意羈禁。疲斃甚多。情殊可憫。著各直省督撫嚴飭所屬。於此項人等。給與衣食。妥為照料。毋任吏胥剋扣陵虐。儻該管官不能實力奉行。以致疲斃較

多。卽著分別叅處。至辦理京控案件。不宜積壓稽延。尤不得彌縫迴護。並著各該督撫。屬認真申理。如案內牽涉原問官丁胥蒙蔽等情。概不准巧為開脫。以期曲直分明。無枉無縱。將此通諭知之。○又諭御史徐景軾奏。請飭用兵省分。安集流民。務農興利一摺。軍興以來。人民流徙。田地荒蕪。其現經克復地方。小民亟宜復業。乃田疇或占於豪強。猝難認領。舊賦或虧於官長。恐迫追呼。種種困苦情形。殊堪矜憫。著各直省督撫。於從前被兵現經收復地方。慎選賢良牧令。責令加意拊循。流亡有歸業者。為之清還田產。緩其逋租。假以籽種之資。俾有歸農之樂。務使兵燹餘生。各安舊業。以恤民艱。而固根本。○又諭。昨因英翰百日服滿。降旨令仍回安徽巡撫署任。茲據英翰奏稱。滯陳下情。以伊父葬事尚未完竣。籲懇留京當差等語。英翰著賞假兩箇月。經理葬事。假滿後仍卽迅赴安徽巡撫

署任以重職守。○諭軍機大臣等寄諭直隸總督曾國藩。據御史宋邦德奏。陝省營勇變亂。請飭左宗棠詳察情形等語。營勇因開餉滋事。已屬亂萌。而此番劉松山所部留防綏德州之四營。踞城以叛。高連陞所部竟至戕其主將。實為各營所未聞。雖據左宗棠奏稱。因查拏哥老會啟釁。而勇丁之好亂樂禍。難以有功。亦可概見。該御史所稱勇丁因地瘠缺望起見。諒亦有之。而召募土勇。能否奏效。

亦難確有把握。削平粵匪以來。楚勇暮氣已乘。此時應如何變通。以弭後患。著卽悉心籌度。據實以聞。用副疇咨之意。原片著鈔給閱看。將此諭令知之。○又諭前因劉松山高連陞所部楚勇相繼變亂。曾諭令左宗棠整頓營規。撫馭將士。以弭後患。茲據御史宋邦德奏稱。楚勇因秦地瘠苦。易於缺望。一軍叛亂。恐各軍效尤。如不可用。或分起遣散。另行就地召募。請飭該大臣詳察辦理等語。楚勇在

秦兩次變亂。實為用兵以來所未聞。左宗棠從前曾有南人用之。西北本非所宜。擬將陝甘各營兵勇分別汰留之語。現在各營楚勇仍多。儻各營效尤。俱有離叛之心。則變生肘腋。其患何可勝言。該御史所陳。亦或變通之策。著該大臣虛心體察。斟酌辦理。以杜後患。原片著鈔給閱看。將此由五百里諭令知之。○丙戌。諭軍機大臣等。前因御史郭從矩奏。山西平定州所屬之樂平鄉。有匪徒聚眾搶

劫。曾諭鄭敦謹飭屬嚴拏。並諭直隸各督撫協同按捕。嗣因鄭敦謹等久未覆奏。復經降旨嚴催。茲又有人奏稱。樂平縣界二字匪黨。以直隸贊皇縣之黃沙嶺一帶為巢穴。出沒無常。愈聚愈多。蓄有鳥槍軍械。孟縣又有黑骹匪。在滹沱河一帶滋事。近復勾結二字匪黨等語。地方匪類日多。勢必釀成巨患。著曾國藩。鄭敦謹。督飭所屬認真查拏。盡絕根株。毋留後患。儻任聽屬員諱匿不辦。致釀事端。

恐該督撫不能當此重咎也。匪黨遁跡贊皇而樂平地界又逼近河南。並著李鶴年仍遵前旨。迅飭所屬一體嚴密按拏。毋任逃逸。原摺著鈔給曾國藩鄭敦謹閱看。將此由四百里各諭令知之。○又諭。有人奏。山西省鹽務自咸豐年間改為官運官銷。每鹽一斤於定價二十八文之外。暫增五文。近聞長治縣有奸商秦鵬。勾連土棍丁瑞符。把持鹽務。買通縣官出示曉諭。每鹽一斤。頓長價十五文之多。民間被累。紛紛聚訟。請飭查辦等語。鹽斤價值向有定章。若如所奏。該縣聽信奸商。加增鹽價。圖利害。民實屬不成事體。著鄭敦謹督飭河東道。詳細查明。因何私增鹽價之處。據實叅辦。毋稍諱飾。將此諭令知之。尋奏。遵查長治縣官鹽。因上年運銷賠累過重。稟明暫行加價十五文。本年三月已遞減至三十七文。有案可稽。秦鵬丁瑞符並無把持等情。應俟池鹽腳價漸次平落。再行覈減。報聞。○

貴州巡撫曾璧光奏。軍務未平。請將上年大計展緩辦理。從之。○予貴州各屬陣亡殉難生員吳傳心等紳民婦女一百九十名口分別旌卹如例。○丁亥。諭軍機大臣等。傳諭署安徽巡撫吳坤修。吳坤修奏。皖省捐釐利弊。餉項支絀。辦理踴蹶情形。裁軍濟餉。請飭詢英翰各摺片。據稱每月入款約計全皖貨釐不及三萬兩。長淮四成鹽釐一萬餘兩。兩淮協餉五千兩。鹽課一萬二千兩。撥解軍餉。所短甚鉅。卽動用丁漕亦難挹注等語。吳坤修署理巡撫。皖省籌餉事宜。是其專責。乃僅以所收各款入不敷出為詞。而於餉需如何籌畫。各軍如何撥濟。未據聲敘。若遇事並不實心籌辦。僅將為難情形一奏塞責。朝廷又安用此封疆大吏為耶。又據稱擬將防兵裁撤數營。勻出月餉。增補郭寶昌軍餉。惟留防之軍。英翰又面屬不宜輕撤。請飭詢英翰等語。居心尤為巧滑。皖中情形。英翰固已洞悉。吳

坤修豈應諉為不知。且吳坤修現在署任。並不因時制宜。妥籌奏聞。轉請飭令久經交卸之英翰詳審覆奏。尤出情理之外。著吳坤修將皖省餉項通盤籌畫。並留防之軍應否裁撤酌定辦法。迅速具奏。毋再意存取巧。致干咎戾。尋奏。西征協餉。並郭寶昌月餉。儘力籌解。至留防之勇。此次續裁後。尚存一萬五千餘名。現在伏莽仍多。未便全撤。再容相機辦理。以期妥善。報聞。○又諭金順奏收復綏德

州城大略情形。派隊勦辦邊外竄匪。請飭撥兵扼紮靖邊各摺片。綏德叛勇南竄清澗。劉厚基一軍由米脂前進。收復州城。跟蹤追勦。擒獲逃匪多名。其大股逆匪已經劉松山勦辦。被脅各勇分別收撫。所有詳細情形仍著左宗棠據實具奏。其收撫各勇著責成劉松山妥為鈐束。毋致再生事端。榆郡迤西邊外海流圖河暨波羅堡西南一帶約有竄匪六七千人。並有達拉旗竄來回逆數千。金順已

派常福等會同劉厚基所派之兵出邊截勦。著卽惟探賊蹤。如有大股東竄之信。卽行親督各營前往截擊。毋任滋蔓。此股賊匪係從何處竄至。並著查明具奏。歸綏防務未可稍鬆。前調神機營等兵業經准其暫停遣撤。仍著定安嚴密布置。豫籌防範。其宋慶張曜等軍應如何調度之處著左宗棠妥為籌畫。前據穆圖善豐紳謙禧先後奏請飭令金順前赴花定防勦。現在東路既有賊蹤。該副都統

自應速籌勦辦。一俟軍情稍鬆卽行回紮花定以資控扼。靖邊一帶亟應派兵堵勦。並著左宗棠酌度辦理。甯夏一帶防務仍著豐紳謙禧就現有兵力認真籌辦。並著穆圖善妥籌兼顧。將此由六百里諭知左宗棠穆圖善定安金順豐紳並傳諭謙禧知之。○又諭前據穆圖善奏已革副將敖天印於殺害孫之友一案經善山保等聯銜具稟力辨其誣請免解豫審訊當經諭令李鶴年將此案詳細

情由查明具奏。茲據奏稱前訊教明愷供該革員以統帶之員親身在場並不攔阻反以將來報復為詞供證明確。此案兇犯雖經正法而獄仍未結。連年以來疊據孫之友親屬將慘殺情形呈控請飭仍將教天印解豫審辦等語。甘肅軍務現尚未平。該革員隨營勦賊一時未能解案。著穆圖善於軍務稍鬆時仍懍遵前旨將教天印解赴河內交李鶴年歸案訊辦。以成信讞。將此各諭令知之。○又

諭崇實吳棠奏援黔各軍獲勝一摺。川省陳希祥一軍援勦貴州上游克復定南城後招撫七十餘堡收降賊黨三千餘人乘勝蕩平郎岱所屬各賊巢斬馘甚眾。下游唐炯懸軍深入疊破苦竹等苗寨提督劉鶴齡復分軍跟蹤掩擊連下重拜等數十寨收復重安要隘各軍同出清平縣城不難卽下。惟下游環境皆苗彼眾我寡前本令陳希祥移師下游會同唐炯進剿。現在陳希祥辦理上游軍務

正在得手黔省兵單若將該軍移赴下游轉致鬆勁著曾璧光飭令陳希祥卽由安順埽蕩直前務將首惡巖黃各逆悉數殲除肅清上游各境以專責成。至下游諸苗必須痛加勦洗陳希祥既不能移師合剿唐大有所部又調赴滇中唐炯兵力過單不敷分布著崇實吳棠檄飭該道增募五營以資厚集仍飭令迅速圖功毋得虛糜餉項。劉崑亦當嚴飭楚軍會同川軍早戡黔亂毋稍觀望其上游

下游兩路軍情並著曾璧光隨時妥籌兼顧將此由五百里各諭令知之。○予甘肅磴口陣亡副都統烏勒西布祭葬世職加等諡武毅入祀京師暨齊齊哈爾原籍昭忠祠並於甯夏府城建立專祠。○撥吉林黑龍江官兵各二百五十員名察哈爾牧羣馬五百匹赴署甯夏將軍金順軍營聽候調遣。

大清穆宗繼天開運受中居正保大定功聖智
誠孝信敏恭寬毅皇帝實錄卷之二百五十四

大清穆宗繼天開運受中居正保大定功聖智
誠孝信敏恭寬毅皇帝實錄卷之二百五十五

欽

同治八年己巳三月戊子直隸總督曾國藩

等奏代造兩湖剝船已成一百六十隻請欽
派大臣驗收得旨著派毛昶熙衍秀就近驗
收○己丑諭軍機大臣等前因伊勒屯奏由
部庫撥給滿營軍餉二十萬兩官員養廉銀
二萬兩修理器械銀一二萬兩安設軍臺銀
一二萬兩採買紙札銀五百兩採買糧石銀
四萬兩先後降旨令戶部議奏茲據該部奏
稱色里坤滿營經費各項疊經山西四川等
省及李雲麟等籌解而伊勒屯以前項撥款

或不能如數解到。或解到仍不敷用。輒派員來京請領部款。上月部撥烏里雅蘇台將軍銀二十萬兩。本係分撥巴里坤等處應用。現在庫餉短絀。馬能再行支應等語。所奏自係實情。卽著麟興等於收到前項部撥銀兩時。除給哈密布彥烏勒哲依圖共銀四萬兩外。將巴里坤滿營軍餉。官員養廉。修補器械。設立軍臺。採買糧石。覈計應需數目。在所存十六萬兩內。先行酌量勻撥。迅咨伊勒屯派員迎提。以資應用。其餘銀兩。並著該將軍等留備哈密等處提撥。伊勒屯領到此次所撥銀兩。務須撙節動用。毋得稍有虛糜。並嗣後該城一切用款。仍應聽候麟興等從新疆月餉內分給。不得率請部項。徒事曉曉。至所請紙札奏摺銀五百兩。准其於該城委員到京日。由戶部如數發給。其新疆月餉。曾經戶部奏定。由山西山東河南直隸每月解交烏里雅蘇台銀七萬兩。並上年閏四月提撥山西山

東河南銀三十萬兩。迄今報解寥寥。屢催罔應。實屬玩延。著曾國藩鄭敦謹丁寶楨李鶴年。遵奉疊次諭旨。查照欠款數目。分別籌解。儻再遲逾。卽著戶部將各該督撫指名奏。以重要需。將此由五百里各諭令知之。○調鑲白旗滿洲副都統榮祿為鑲黃旗滿洲副都統。正紅旗蒙古副都統奕貴為鑲白旗滿洲副都統。以右翼前鋒統領載岱為正紅旗蒙古副都統。○庚寅。諭軍機大臣等。定安等奏察哈爾馬隊擊賊獲勝。撥隊迎勦。另股賊匪暨查詢磴口失守情形。各摺片。抗錦旗內盤踞回逆。雖經勦滅。兩股惟尚有一股逃竄。逆首藍倍漳亦未就擒。難保不糾黨復來。再圖肆擾。著定安飭令達爾濟等探蹤截擊。務將此股敗匪盡數殲除。毋留餘孽。抗錦旗界連磴口。尤恐外來匪黨乘間竄入。並著飭令達爾濟嚴密防範。以顧西路。磴口迤東後套纏金一帶。既有股匪七八百名。該處由後套

陸路可以直達歸綏。則包頭地方防務。實為喫緊。張曜已派王連三等管帶四營。移紮包頭。迤西黃河對岸。烏爾圖那遜亦赴後套。纏金一帶進剿。即著定安檄令該員等認真防剿。以遏賊氛。並知照杜嘎爾嚴防後套。聯絡聲勢。毋得稍有疏虞。磴口失守。糧臺餉銀被劫。該處係穆圖善儲糧之所。關係甚重。現在賊勢如何。究竟失去糧餉若干。著穆圖善。金順。查明具奏。甯靈兵力過單。勢難撥兵進剿。

磴口踞賊。穆圖善自應迅派隊伍前往剿辦。毋任賊勢鴟張。至董志原雖經收復。賊眾均退踞金積堡老巢。左宗棠如何籌畫進兵。及近日各路剿賊情形。著即詳細具奏。包頭一帶防務緊要。張曜現在古城。能否親督所部相機援應之處。著該大臣酌度辦理。將此由六百里各諭令知之。○以廣東合浦縣紳民力保危城。永廣學額二名。○以甘肅磴口迎剿竄匪獲勝。賞營總轍德恩副都統銜。貢果

爾巴圖魯名號。○辛卯諭內閣。前因山西按察使史念祖於召對時。見其年歲甚輕。恐於地方事務。未能諳練。當降旨與直隸按察使張樹聲對調。並諭令曾國藩察看。茲據曾國藩奏稱。直隸刑案積壓極多。現與臬司力籌清釐。甫有端緒。若張樹聲能留畿輔。計一年之內。可將積案全清等語。曾國藩到任後。辦事認真。於吏治民風。實心整頓。力挽敝習。自應俯如所請。俾收指臂之助。張樹聲著准其

暫留直隸。按察使本任。以資熟手。臬司為刑名總匯。該督奏稱。史念祖初入仕途。縱有過人才智。而欲究諳刑律。熟悉地方。非數月期年不能。所籌亦係實情。史念祖年力正強。人亦明白。若隨同曾國藩講求公事。正可藉資歷練。史念祖著仍赴直隸。將刑名案件。悉心學習。暫緩接印任事。俟張樹聲清理積案完竣後。再由曾國藩奏明。請旨辦理。○又諭。曾國藩奏查明屬員優劣。分別開單呈覽一摺。

直隸大名府知府李朝儀順德府知府任道鎔。正定府知府王啟曾天津府知府李文敏。深州知州劉秉琳。易州知州夏子齡蔚州知州李秉衡。磁州知州王簡保定府同知陳崇砥。東光縣知縣陳錫麒據曾國藩臚列該員等才具政績。均有可觀。實為直隸出色人員。深堪嘉獎。著曾國藩飭令該員等益加策勵。勉為循良。毋得始勤終怠。王田縣知縣許春田。性情卑鄙。操守不潔。前署遷安縣知縣胡如川。貌似有才。心實貪酷。均著革職永不敘用。灤州知州嚴祖全。擅作威福。物議沸騰。署廣平府知府德成。品行卑污。輿情不愜。元氏縣知縣陳鳳藻。舉動輕浮。操守平常。前任吳橋縣知縣王恩照。辦公廢弛。事多荒謬。代理安平縣知縣孫作霖。專事夤緣。貪而多詐。靜海縣知縣胡桂芬。浮徵勒派。民怨尤甚。代理吳橋縣知縣王諤。品行卑鄙。嗜好甚重。曲陽縣知縣萬方泰。性情乖僻。才亦平庸。均著卽

行革職。武強縣知縣劉振中。身體軟弱。嗜好太重。著革職永不敘用。以肅吏治。○諭軍機大臣等。金順奏會剿邊外竄匪獲勝。並擊退花馬池回匪各摺片。賊匪竄至邊外海流圖河馬家梁等處。經常福等會合劉厚基所派之兵。分路兜擊。斃賊三千餘人。餘匪向西遠遁。惟邊外地勢遼闊。匪蹤來去無定。且據獲賊供稱。另有馬賊數百名。繞道向東北竄去。究竟竄往何處。著定安、金順確探賊蹤。派兵截剿。毋任擾及東路。昨據定安奏稱。杭錦旗踞匪逃竄一股。後套纏金一帶。又有股匪七八百人。是否卽係此股匪徒。著定安查明具奏。該逆紛竄邊外。恐有窺伺包頭之意。著定安飭令達爾濟烏爾圖那遜等認真防剿。力遏賊氛。張曜一軍。現在古城。於邊外地勢賊情。自應熟悉。著左宗棠飭令相機援應。合力截剿。毋誤戎機。本月初間。回匪突襲花馬池城。經富勒琿等擊退。難保不再圖撲犯。金順

已調洋槍隊及衝勇一營前往助守。著卽飭令富勒琿等加意防範。不可稍涉大意。將此由五百里各諭令知之。○又諭前據鄭敦謹奏。晉省應解京餉。奉旨借撥金順餉銀十萬兩。須於四五月方有成數。請飭改撥。當經降旨交部議奏。茲據金順奏稱。現在勦賊喫緊。軍中糧無越宿。餉無絲毫。情形窘迫。請仍飭令山西解撥等語。陝甘軍情萬緊。兵丁待餉孔亟。亟應迅籌接濟。著鄭敦謹嚴飭藩司。仍

將借撥京餉十萬兩。趕緊如數籌措。解赴金順軍營。儻因餉需不繼。致該副都統貽誤戎機。恐該撫藩不能當此重咎也。將此由五百里諭令知之。○以山西河東道李慶翱署按察使。○壬辰。兵部等部議覆調任兩江總督曾國藩酌改江蘇水師營制事宜。一。江蘇水師應改為內洋外海裏河三支。以資控馭。一。內洋外海營數應以蘇松鎮川沙吳淞二營改歸福山鎮管轄。並提督所轄南匯營蘇松

鎮中營左營狼山鎮掘港營為外海六營。蘇松鎮右營福山鎮左營狼山鎮右營並新設通州海門二營為內洋五營。一。裏河水師應以原設提標右營太湖左營右營並添設淞北淞南二營為五營。專歸提督管轄。一。狼山鎮新設通州海門二營。應歸江南提督專管。並由長江水師提督兼轄。一。外海每營撥廣艇二號。內洋每營撥三板十二號。太湖等營酌撥三板十三號至二十號不等。應卽興修。

一。續造輪船四號。分撥提督及蘇松各鎮。專巡外海內洋。一。江甯設立船廠。按年輪修戰船輪船應由上海船塢整理。一。水師專以管船為主。每船設一官。大者設兩官。其無船之弁兵一律裁撤。一。裏河內洋兵糧照長江章程給發。外海較為辛苦。應遞加以示區別。一。前議設立淮揚水師。應行緩辦。一。太湖七營改為裏河五營。應裁員弁。遇有裏河缺出。卽行酌補。一。所裁內河外海及通州海門兩營

守備等員。分歸兩提督先行序補。一。蘇松鎮中軍。應仍其舊。狼山福山裁去中營。應以通州營遊擊為狼山鎮中軍。福山營遊擊為本鎮中軍。各留陸兵百名。以備差遣。一。統計水師俸餉。歲需十五萬餘兩。兵米雜費四萬餘兩。覈算歷年司庫實發銀兩。足敷支放。無庸另議款項。以上十四條。均應如所請辦理。從之。○以清理詞訟奮勉。予江蘇知府涂宗瀛等加級開復有差。○癸巳。諭內閣。瑞雲奏。請

將抗不解糧之知縣嚴議等語。甘肅署鎮番縣知縣黃昶。於藩司每歲估撥鎮番縣滿洲營兵糧。歷年欠解至一萬四千石之多。又於指撥未運防城口糧二年之久。尚欠三千二百石。疊次嚴催。抗不遵解。實屬玩延。黃昶著先行交部嚴加議處。並著穆圖善勒限四箇月。嚴飭該員協同新委鎮番縣知縣詹芝祺。迅將防城糧石。及歷年估撥兵糧。埽數清解。毋任延宕。○諭軍機大臣等。鄭敦謹奏。綏德

叛勇安輯。河防解嚴。並賊匪圖竄包頭。張曜等撥兵前進。劉典奏。叛勇戡定。擬回省會勘。秋審各摺片。綏德叛勇。經左宗棠派兵圍剿。殲除殆盡。晉省永甯沿河一帶。防務解嚴。鄭敦謹擬將前調之晉右春左中軍三營歸防。著卽飭令各回原派防所。以期分布周密。陝甘回氛尚熾。晉防究未可鬆。所有沿河防務。該署撫卽令署臬司李慶翱接辦。以專責成。並擇要駐紮。聯絡各軍聲勢。毋稍疏虞。劉典

所奏湘軍果軍變勇。勦撫均已就緒。與鄭敦謹奏報情形。大略相同。陝邊各隘。現均安靜。劉典著暫行回省。將秋審事宜妥為會勘。惟果營逃出叛勇數十人。向逆回老巢遁去。湘軍搆叛。首逆在逃。餘孽亦未淨盡。仍著左宗棠等嚴飭劉松山各軍。隨時接捕。以絕根株。陝省各營營規。現在如何整頓。嗣後有無變通辦法。及湘軍果營啟釁詳細情形。左宗棠當懷遵疊次諭旨。據實具奏。董志原踞回。既

歸併金積堡老巢。現在陝之邠長及中部宜君鄜州延安一帶。是否肅清。甘肅靈州。本係逆回廣聚之區。東與花馬池及定靖各邑相近。出邊卽河套鄂爾多斯旗境。沿套迤西而北。又可直趨包薩。刻下花馬池杭錦及後套纏金。均有賊匪竄及。磴口又有匪踞。蔓延一片。甚屬可虞。應如何布置之處。著左宗棠相機妥籌。該大臣現駐乾州。是否扼要。能否顧及北路。均著酌度隨時奏聞。包頭逼近歸綏。

賊圖竄擾。張曜已派兩營赴包頭西岸駐守。宋慶亦由神木前進。定安務當飭令馬陞及在防文武。會同張曜等相機夾擊。並晝夜實力嚴防。毋任逆蹤近擾。將此由五百里各諭令知之。○甲午。

上奉

慈安皇太后

慈禧皇太后。幸宣壽宮。侍午膳。○賜王以下文武大臣蒙古王。貝勒。貝子。額駙暨越南使臣。

等食。○諭內閣。文麟奏已故郡王之福晉捐糧助餉。懇恩獎勵等語。已故郡王追封親王。伯錫爾之福晉邁里巴鈕。自哈密軍興以來。籌捐兵勇口糧。並借回地以備屯田。藉資軍食。此次撥勦西山竄逆。復自備資斧。遣台吉等隨同官兵征勦。約束回部。以衛地方。洵屬深明大義。伯錫爾之福晉邁里巴鈕。著加恩封為親王福晉。其應得敕封。該衙門卽行頒給。○諭軍機大臣等。文麟奏撥勦賊匪情形。

請將出力各員獎勵各摺片。七道溝逆首胡爾板胡里。勾結吐魯番賊匪。圖犯哈密。文麟督兵於沙窩子鴨子泉等處。撥勦疊勝。擒獲胡爾板胡里等正法。餘匪現已遠遁。辦理尚為得手。惟吐魯番逆首蘇布爾蓋。既有窺伺哈密之意。自應嚴加防範。著文麟督飭官兵扼守要隘。勤加偵探。遇有賊蹤竄近。卽行痛加截擊。其本地良回。並著妥為安撫。以靖內患。現在哈密防務緊要。景廉當懍遵前旨。卽

行赴任。會商辦理。毋再遷延。前因肅州收復。諭令成祿。卽行出關。此時計已部署起程。著卽迅速前進。相機勦辦。不得藉詞逗遛。文麟另片奏。違旨索煥。漳遣人面稱。意欲投誠。現已派員會同成祿委員前往招撫等語。該逆狡詐性成。是否真心歸順。殊難憑信。文麟等務當酌度情形。妥慎辦理。不可輕率從事。卽該逆果能就撫。其黨與眾多。亦止可於吐魯番等處設法安插。斷不可使其移近哈密。致滋事端。將此由四百里各諭令知之。○以哈密按勒西山逆匪。地方肅清。擢軍功孔才以守備用。與都司魏忠義均賞巴圖魯名號。守備高林等花翎。侍衛誠慶等加銜升敘有差。○乙未。

萬壽節。遣官祭
太廟後殿。○遣官祭
福陵。
昭陵。

昭西陵。
孝陵。
孝東陵。
景陵。
泰陵。
泰東陵。
裕陵。
昌陵。
昌西陵。
慕陵。
慕東陵。
定陵。○遣官祭
顯佑宮。
東嶽廟。
城隍廟。○
上詣
大高殿
壽皇殿行禮。○詣綏履殿

慈安皇太后前行禮。平安室。

慈禧皇太后前行禮。○御乾清宮。王以下文武大臣。蒙古王。貝勒。貝子。額駙等。行慶賀禮。眾官暨越南使臣。於午門外行禮。○

上奉

慈安皇太后

慈禧皇太后幸寧壽宮。侍午膳。○賜王以下文武大臣。蒙古王。貝勒。貝子。額駙暨越南使臣等食。○諭軍機大臣等。李鶴年奏遵旨籌防

一摺。據稱神木一路尚無邊警。宋慶所部除留防陝北數營外。擬令該提督將全隊親自督帶。順河迤南。直趨潼關。會同馬德昭防勦等語。綏德變勇現經戡定。潼關情形較鬆。陝北一帶。為回土各匪出沒之所。並與晉境毗連。不可無重兵扼紮。以資守禦。著李鶴年檄飭宋慶一軍。仍紮陝北。會合張曜等軍。相機進勦。迅掃逆氛。毋庸調赴潼關。致陝省北路布置。轉涉鬆勁。其潼關一帶。即著飭令馬德

昭就現有兵力。妥為布置。毋稍疏虞。將此由

四百里諭令知之。○又諭蘇鳳文。馮子材奏克復憑祥土州情形。蘇鳳文奏添勇赴黔會勦各一摺。逆匪吳亞終由越南分股回竄。闖入憑祥土州。蔓延龍州下凍等處。經馮子材督軍進攻。連破賊壘。克復憑祥土州。餘賊遠遁。太鎮境內已無賊蹤。惟該逆去來無定。不特太鎮等屬時虞滋擾。即越南境內亦屢受其害。自應迅拔根株。以清邊圉。馮子材已派謝繼貴等四營。越境進攻。那涯等處逆巢。恐兵力尚單。著即添撥勁旅。由龍州憑祥繼進。力圖掃蕩。大兵所至。務須約束嚴明。不得絲毫擾累。是為至要。貴州九阡苗巢。久為粵邊之患。孔憲隆四營現紮荔波。蘇鳳文已添派潘其泰三營。馳往會勦。著即飭令各軍實力進勦。迅掃逆氛。其古州一帶賊匪。並著確探情形。次第勦辦。將此由四百里各諭令知之。○以廣西太平等處勦平逆匪出力。賞同知

譚壽祥守備譚得祿等花翎。千總黃依然等藍翎。餘加銜升敘有差。○以廣西勦辦貴州竄匪出力。賞提督刁經明一品封典。道員朱文江都司李德全等花翎。府經歷葛之盛等藍翎。餘加銜升敘有差。○以廣西勦辦象州等處踞匪出力。賞副將陳培桂巴圖魯名號。同知恩敬等藍翎。餘加銜升敘有差。○丙申上奉

慈安皇太后

慈禧皇太后幸漱芳齋。侍午膳。○戊戌。以理藩院右侍郎桂清兼署戶部右侍郎管錢法堂事。○以正紅旗滿洲副都統果勒敏署鑲黃旗漢軍副都統。○己亥。諭內閣。朕奉

慈安皇太后

慈禧皇太后懿旨。本日據倭仁泰大婚禮儀。宜崇儉以光聖德一摺。皇帝大婚禮儀。前曾諭令各該衙門先期敬謹豫備。又恐應辦事宜。或至踵事增華。稍涉糜費。特派恭親王。寶

會同各該衙門堂官詳稽典章。以杜奢靡而示限制。皇帝大婚。典禮攸關。自不能不籌款辦理。惟現在民生未裕。軍務未平。物力艱難。正宜倍加愛惜。前據該王大臣等奏稱。乾清門外一切工程浩大。業經諭令概行停止。宮內止令稍加修葺。以示撙節。倭仁所奏。與朝廷愛民節用之心。正相脗合。著該王大臣及總管內務府大臣並承辦各衙門。於一切應辦事宜。凡有可以節省之處。隨時會商。奏明

請旨。酌量減裁。並力杜中飽。用副敦崇節儉至意。○諭軍機大臣等。戶部奏請飭催各省關應解本年京餉。並四成洋稅銀兩一摺。據稱部庫支放八旗兵餉等款。每年不下千餘萬兩。其王公官員廉俸。各衙門領項。並內務府借撥銀兩。尚不在內。各省解到京餉。及銅局捐數。所入已不敷支放。現在內務府恭辦大婚事宜。需款尤鉅。本年奏撥京餉等款。已屆三月。各省關應解京餉。及四成洋稅。報解

均屬寥寥。請旨飭催等語。部庫支放各款。均關緊要。若因報解遲延。不敷周轉。貽誤非輕。著各該將軍通商大臣督撫鹽政監督等。遵照奏案。各將八年分京餉。於五月前解到一半。並各海關四成洋稅。按結報解。不准稍有蒂欠。儻敢諉卸拖延。逾限不解。或解不足數。卽著戶部照貽誤京餉成案。指名嚴叅。以示懲儆。將此由五百里諭知福州將軍。三口通商大臣。直隸兩江湖廣閩浙兩廣四川江蘇安徽江西福建浙江湖北湖南山東山西廣東各督撫。並傳諭粵海淮安各關監督知之。○以山西薩拉齊等處迎勦回匪出力。賞委參領永祿。烏爾貢色。委營總達木欽扎布。巴圖魯名號。委營總明壽等花翎。巡檢李丕烈等監翎。餘加銜升敘有差。○庚子。諭軍機大臣等。豐紳等奏。請飭山西照案協撥兵餉。並飭穆圖善估撥月糧一摺。據稱甯夏滿營官兵。生計維艱。萬分苦累。前奏准由晉省每年

劃撥甘餉銀十萬兩。上年十月。僅領到晉餉一萬兩。迄今五月之久。並未續解。官兵月糧。僅據甯夏等縣解過二千三百餘石。平羅縣顆粒俱無。統計比較糧數。不及原撥十分之三。該官兵目下懸釜待炊。旗營生計益艱。於操防大有關繫等語。所奏自係實情。著鄭敦謹督飭藩司。無論何款。先行酌提銀四五萬兩。迅交甯夏催餉委員。星夜管解赴營。俾資接濟。穆圖善於本省兵糧。尤應迅速籌撥。著

卽督飭藩司。檄行甯夏府。速將欠撥同治七年滿營月糧。如數撥解。仍遵向例估撥八年一歲官兵月糧。每月由甯夏甯朔兩縣開支。儻有不敷。卽由靈州中衛平羅等縣協撥。毋稍延誤。並著該署將軍等。就近檄催各該州縣。迅撥協濟。以資飽騰。將此由五百里諭知穆圖善鄭敦謹豐紳。並傳諭謙禧知之。○禮部以貴州本年補行己未

恩科鄉試。應否准其帶補兩科請。得旨。加恩著

准其帶補辛酉壬戌兩科。以廣登進。嗣後不得援以為例。○

上以孟夏時享

太廟。自是日始齋戒三日。○辛丑。諭內閣。御史宋邦德奏。天時亢旱。敬陳管見一摺。番役捕快。原准隨時躡緝。若如該御史所奏。該役等竟敢私立下處拷訊。偏供實屬有違定例。著步軍統領順天府五城及各直省督撫嚴飭該役等。緝獲案犯。卽日送官審訊。不准私立

下處。偏供誣陷。儻有前項情事。卽行從嚴究辦。禁卒陵虐囚犯。定例本嚴。近來漸就廢弛。並著內外有獄各衙門。嚴加查察。如禁卒有需索陵虐等弊。卽行按例嚴辦。每屆年終。將瘦斃囚犯若干名。申報該管官。以憑考覈。至各直省地方官濫刑斃命。本有定例。近因軍務初平。往往有借除暴為名。草菅人命者。實非欽恤用刑之道。著各直省將軍督撫府尹等。轉飭所屬。嚴行禁止。五城義冢原撥地畝。

日久多無間空。著五城御史妥為辦理。其大宛兩縣有無義冢官地。應否添置。並著順天府飭屬查辦。○諭軍機大臣等。本日據給事中陳鴻翔奏。奉天錦州所屬河淤夾荒黑地。該處旗民首報十段。業經奉天委員勘丈三段。其餘未勘之地。請飭續勘。援案定則。與前勘之地一律升科。此外所屬各州縣。如有歷年開墾成熟地畝。並請准其自行首報。辦理升科等語。著都興阿。志和。恩錫。按照該給事

中所陳。審度情形。悉心商榷。如其中實有干礙。或事尚可行。均著據實具奏。毋稍遷就。原片著鈔給閱看。將此諭令知之。尋奏查明旗人李尚義所報錦州淤地十三處。其滾子溝等五處。已報部升科。八百壟等三處。奏明歸盤蛇驛租地。馬家屯等五處。係馬廠滋生地段。此外並無間荒黑地。報聞。○又諭穆圖善奏。各軍勦匪獲勝。現仍相機進取。並查明高臺潰勇情形。各摺片。河州三甲集踞匪負隅。

日久。經副都統善山保等分路進攻。該逆膽敢迎拒。其東西兩梁之賊。勢尤兇悍。提督王得勝等乘勝追擊。直抵三甲集堡邊。洮河邊賊亦經黃金山等擊敗。此次各軍會同進剿。尚為得手。即著穆圖善檄飭善山保等各率所部。趁此天氣融和。迅圖掃蕩。並將大東鄉一路相機進取。以竟全功。高臺勇丁潰變。該署督所聞。雖覈與成祿原咨情形相異。惟副將黃應斗所招勇內。究竟有無仁字軍脫逃游勇。及駐高勇丁因何譁潰之處。仍著該署督詳查懲辦。毋稍含混。前據文麟奏稱。逆首索煥漳投誠各節。當經諭令成祿即行出關。該提督此時計已起程。著即剋期前進。並將所部勇丁。分別汰留。嚴行約束。毋任沿途滋事。索煥漳等是否真心歸順。該提督即會同文麟等派員妥辦。不可輕率議撫。致貽後患。將此由五百里各諭令知之。○又諭。穆圖善奏。甘省軍務喫緊。請調吉林黑龍江馬隊赴

甘助剿等語。現在甘省河州巨寇未平。陝西回匪竄入秦州等處。日見鴟張。該省各營馬隊無多。難資征剿。穆圖善請由吉林黑龍江各調馬隊一千名。擬令副都統溫德勒克西總管。雙福分起管帶赴甘。以資剿賊。著富明阿。德馨酌度情形。如能各挑選精壯馬隊一千名。即配齊軍械馬匹。並傳諭溫德勒克西。雙福二員。兼程管帶赴甘。聽候穆圖善調遣。此項馬隊二千名。每月餉銀約需二萬兩。應由何省協撥供支。著戶部速議具奏。將此由五百里各諭令知之。○又諭。穆圖善奏。請飭四川籌撥銀兩。採買籽種等語。甘肅頻年被賊擾害。田地荒蕪。經穆圖善在阿拉善旗借辦籽種牛隻。發給鄉民。稍資接濟。現屆青黃不接。民食維艱。該旗墊款尚未清還。殊難再行商辦。四川毗連甘省。自應力顧鄰封。著吳棠於月協甘餉外。另行籌撥銀三萬兩。星速解甘。毋誤該省播種之期。所撥銀兩。仍准其

在協甘月餉內扣還。以清款目。將此由五百里諭令知之。○予甘肅安定陣亡州判劉習之。吳翊聯。祭葬世職加等。○壬寅。

上以孟夏時享

太廟前期親詣行禮。○諭內閣。前因都察院奏編修朱福基等呈稱。前任廣西巡撫鄒鳴鶴在江甯殉難。與御史朱鎮所奏情形迥殊。當經諭令馬新貽。丁日昌查明具奏。茲據奏稱。徧訪當時在城紳耆。僉稱鄒鳴鶴協同防守。

事有條理。及城垂破。誓以身殉。旋因罵賊不屈被戕。並無避匿民居之說。朱鎮所奏係屬傳聞之誤。仍請優卹予諡等語。朝廷褒忠之典。網紀攸關。鄒鳴鶴殉難情形。既據訪查確實。著仍照曾國藩原請。照巡撫例從優議卹。予諡以彰忠烈。御史原許風聞言事。惟事關人之名節。亦豈得冒昧瀆陳。茲朱鎮於鄒鳴鶴死事情形。並未詳查。經曾國藩察訪明確。奏准賜卹予諡後。輒以傳聞無據之詞。遽請

撤銷。實屬不勝言官之任。朱鎮著回原衙門行走。以示薄懲。○諭軍機大臣等。本日據周達武奏。川省邊防緊要。未便以重兵久駐夷地。補擬善後八條。開單呈覽等語。四川越巂等處夷地。現經官軍戡定。亟須地方文武各官妥籌善後。認真經理。方能夷漢相安。該提督所陳慎選文武。及善後八條。卽著崇實。吳棠悉心會商。妥為辦理。原片單均著鈔給閱看。將此由四百里各諭令知之。○予甘肅河

州陣亡協領德隆阿祭葬世職加等。○予陝西神木殉難員外郎吉謙妻薩爾圖克氏旌表如例。○追予江蘇汴塘陣亡守備杜元平祭葬世職加等。殉難眷屬三十九名口分別旌卹如例。並予建祠。○追予兩江各屬陣亡殉難教授何金麟等紳民婦女三千七百六十七員名口分別旌卹如例。並予建祠。

大清穆宗繼天開運受中居正保大定功聖智
誠孝信敏恭寬毅皇帝實錄卷之二百五十五

實錄卷之二百五十五

十

大清穆宗繼天開運受中居正保大定功聖智
誠孝信敏恭寬毅皇帝實錄卷之二百五十六

教諭

同治八年己巳夏四月癸卯朔享

太廟遣惇親王奕誼恭代行禮○

上詣綏履殿問

慈安皇太后安平安室問

慈禧皇太后安至辛未皆如之○諭內閣劉嶽

昭奏請將不勝表率之知府降補等語雲南

雲南府知府王楷性情褊急不知檢束著開

缺以通判仍留雲南降補○諭軍機大臣等

戶部奏遵議鄭敦謹奏請改撥金順軍餉一

摺據稱現在各省均有應解京餉軍餉實無

可改之款。所有金順軍餉請仍令山西借撥等語。著鄭敦謹、懷遵、疊次諭旨。迅於該省同治八年分應解京餉內借撥銀十萬兩。先行解交金順軍營。毋稍延玩。致誤戎機。仍將欠解金順軍餉照數補還。部庫以清款目。至江蘇、浙江、廣東、福建四省。每月各應解晉省協餉銀一萬兩。前據鄭敦謹奏稱並未解到。著戶部咨催各該督撫趕緊按月報解。以濟要需。將此由五百里各諭令知之。又諭劉嶽

昭奏整軍相機進剿請飭各省迅解欠餉一摺。滇省自尋甸兵潰後匪勢猖獗。楊林又復被圍。劉嶽昭派令副將何秀林等前往援應。旋以眾寡不敵失陷營盤。劉嶽昭之兵一蹶竟不復振。實屬不能得力。著該督振刷精神認真整頓。以肅軍律。省城根本重地。逼近賊氛。岑毓英獨力難支。情形甚為喫緊。該督現與岑毓英商定嚴守曲靖。以通餉道。而固省城。後路仍須隨時妥為策應。不得株守一隅。

總兵謝景春、全祖凱等已分扼霑益、東川等處各路要隘。雖均有兵守禦。惟賊蹤飄忽。劉嶽昭等仍當檄令各員嚴密防守。毋令有隙可乘。一面相度機宜。跟蹤進剿。毋任蔓延。並催令唐友耕等軍由東川進攻尋甸之北。四面兜剿。以期一鼓殲除。至滇省餉需異常支絀。浙江、江西、湖南、廣西、山西、四川、廣東歷年應解滇餉積欠甚多。著瑞麟、吳棠、鄭敦謹、李瀚章、劉坤一、劉崑、李福泰、蘇鳳文、文輝各將

該省欠解滇餉於三箇月內全數起解赴滇。以顧大局。此項餉銀到時著劉嶽昭、岑毓英均勻撥用以資飽騰。將此由五百里諭知瑞麟、吳棠、劉嶽昭、鄭敦謹、李瀚章、劉坤一、劉崑、李福泰、蘇鳳文、岑毓英並傳諭文輝知之。○以湖南耒陽縣捐輸軍餉永廣學額一名。○追予浙江杭州陣亡道員繆梓榮葬世職。加等。於死事地方暨原籍建立專祠。殉難守備孫遇龍等一併附祀。予雲南尋甸陣亡副

將饒漢卿等二十四員祭葬世職加等○予
浙江因公淹歿知府志勳祭葬卹廕○追予
江西各屬陣亡殉難紳民婦女二千八百二
十九名口分別旌卹如例○予河南輝縣等
處陣亡殉難練長馬金良等紳民婦女三百
五十四名口分別旌卹如例並予建祠○撫
恤朝鮮國遭風難夷如例○甲辰以雨澤未
霑

上於

大高殿設壇祈禱親詣行禮○遣惇親王奕誼

詣

時應宮恭親王奕訢詣

昭顯廟醇郡王奕譞詣

宣仁廟孚郡王奕誨詣

凝和廟禮親王世鐸詣

覺生寺克勤郡王晉祺詣

黑龍潭順承郡王慶恩詣密雲縣

白龍潭拈香○乙巳諭內閣福濟錫綸奏大

員遇事推諉辦理諸多掣肘據實直陳請旨
遵行一摺前因杜爾伯特旗未能安插厄魯
特人眾諭令烏里雅蘇台將軍麟興於喀爾
喀四愛曼內分置乃該將軍奏稱喀爾喀並
無隙地咨明福濟等另行酌議朝廷已疑其
畏難不辦復諭令妥商安插茲據福濟等奏
稱喀爾喀幅員較廣可以分安麟興並未向
各盟勸導率行推諉且所奏各情前後自相
矛盾該將軍身膺重寄於安插厄魯特一事

關繫北路大局乃堅執已見藉詞搪塞實屬
居心巧滑溺職辜恩麟興著革去烏里雅蘇
台將軍及鑲紅旗蒙古都統加恩仍留公爵
回旗當差以示懲儆○諭軍機大臣等福濟
錫綸奏大員遇事推諉及請無庸截留餉銀
並查明分界內無塔城管轄之地各摺片麟
興久在北路因其情形尚為熟諳今膺將軍
重寄乃於安插厄魯特一事種種推諉取巧
不顧大局實屬辜恩溺職殊堪痛恨現在將

軍一缺既簡放福濟該將軍受茲異數當思北路安危所繫於安插人眾等事實心經理以副委任前據麟興等請酌留布倫托海餉銀四五萬兩原以備巴里坤哈密調兵安臺之費現在防兵既已停止調往而安插索倫諸費又由布倫托海經理所有前請酌留布城餉銀即著福濟榮全錦丕勒多爾濟知照錫綸停止以歸實用瑪呢圖噶圖爾幹卡倫既在科布多地界並著奎昌明瑤悉心經理

毋稍推諉將此由五百里各諭令知之○以布倫托海辦事大臣福濟為烏里雅蘇台將軍賞鴻臚寺少卿文碩頭等侍衛為布倫托海辦事大臣○丙午以睿親王德長為鑲紅旗蒙古都統○命江甯布政使李宗義來京陛見○

上以常寧祀

天於

圓丘自是日始齋戒三日○丁未追予陝西節

陽陣亡在籍翰林院編修王鳳翔建立專祠○戊申以神靈顯應加福建建甯府練夫人祠封號曰靈佑諭內閣前據趙長齡奏山西汾陽縣知縣慶文辦事頗煩緝捕廢弛當經降旨將該員勒令休致嗣經該縣監生靳履恭等以慶文在任素有善政請暫留該縣等情赴步軍統領衙門呈訴復諭令鄭敦謹查奏茲據奏稱趙長齡因訪聞汾陽縣任俸堂家竊案未見獲犯詳報將慶文奏參係屬

事出有因惟已獲犯審辦因防務緊急詳報稍遲非緝捕廢弛可比該員在任時辦防認真與情愛戴可否開復等語慶文著准其開復勒令休致仍以知縣留於山西另補○綏遠城將軍定安等奏查探邊外賊情派撥馬隊截勦竄匪得旨著即飭令烏爾圖那遜迅將後套纏金一帶股匪盡數殲除並飭沿河沿邊各軍加意防範毋令賊蹤竄擾○補鑄甘肅肅州鎮總兵官肅州知州浙江分水縣

儒學各關防印信條記從署總督穆圖善巡撫馬新貽請也。以湖南官軍克復貴州清江廳城並攻拔鎮遠等處苗寨賞布政使席寶田提督榮維善白玉翎管各一支搬指各一箇大荷包各一對小荷包各二箇提督李喜溢正一品封典總兵官張宜道李發武道員李光燦戈鑑參將徐啟瑞戴登高彭開文。遊擊楊正清都司沈凱袁虞慶巴圖魯名號都司滕代文等花翎餘加銜升敘有差。以

湖南官軍攻克貴州寨頭苗巢出力賞總兵官陳柏貴一品封典副將歐朝盛魏忠海龔天元參將趙聯陞巴圖魯名號知府劉思詢參將唐福內等花翎都司胡有全等藍翎餘加銜升敘有差。予貴州清江陣亡副將黃時貴參將丁蘭發都司王得貴守備蔣維海把總陳得喜等祭葬世職加等。已酉常需祀天於

園丘遣睿親王德長恭代行禮 諭內閣前因甘肅提督高連陞軍變被害疊諭左宗棠等詳查究辦茲據該大臣等奏將全案各情審明具奏此案副將鄧玉魁駐營宜君縣城於哨長蔣宏高等結拜哥老會時既無覺察復與副將楊玉魁均被叛卒刦赴大營回攻同官迨經官軍勦敗始同楊玉魁投營自首補用總兵唐畢賢駐營楊店所管三哨一時同變事前不能救援統將事敗始投劉典軍營

並據叛卒所供亦係會內香長現均經逐款訊明押解乾州監禁該犯等情罪重大未便稍事稽誅鄧玉魁楊玉魁唐畢賢均著即行正法以申國憲副將周廷興道員楊銘濬未能力挫兇鋒本有應得之咎惟或因格鬪受傷或因守城出力情節尚屬可原周廷興楊銘濬均著暫行革職仍留營差遣 又諭左宗棠劉典奏勦除綏德州叛卒州城收復一摺本年二月間陝西綏德州營勇突被游匪

句結叛踞州城經提督劉松山率蕭章開等會合總兵章合才所部由瓦窰堡馳抵清澗殺斃游匪百餘名叛卒二十餘名被脅弁勇乘勢反正縛匪首謝泳青唐汰春訊係自湖北句結會匪陸續至綏德煽亂當經處斬其指出敗卒一百二十七名及叛將羅忠貴湯惠能王福升黃忠貴一併正法收復綏德州城池擒獲逸匪吳得勝楊占魁斬之軍情大定此案劉松山有統率將弁之責不能先事防範卽予從重治罪亦屬咎有應得姑念該提督平日打仗尚屬奮勉加恩免其治罪著交部議處前署綏德州知州成定康現署綏德州知州陳瑞芝亦有應得之咎均著革職留任失察之營官哨長著左宗棠等查明分別叅處此次綏德勇變除倡首之犯務獲正法毋許一名漏網外其餘被脅反正弁勇概免追究以示區別○諭軍機大臣等左宗棠等奏官軍克復董志原回巢慶涇各屬一律

肅清現籌布置情形一摺董志原地居秦隴要膺久為回逆老巢經官軍此次痛剿克復慶涇各屬一律肅清該逆由環縣固原兩路北竄下馬關等處左宗棠等因裹糧將盡仍令各軍回駐原防擬擇要興屯徐圖進取固屬老成持重第當此得勝之餘軍威大振回情渙散甘肅各匪經此懲創自必大為震懾若能乘勢進剿必當事半功倍儻遲遲取恐回逆結謀抗拒轉形費力著左宗棠將糧餉等事與劉典妥商後卽行西征隴回並馳至涇州接受總督關防擇要駐紮居中調度以期秦隴兩省得以兼顧至延安一帶地方是否安謐扈彰有無反側董幅詳是否歸降興辦兵屯應如何經畫左宗棠籌定後卽可交劉典經理免致失此機會穆圖善於左宗棠未到甘肅以前仍當將金積堡等處竄回盡力堵剿毋令軼出邊外勢成蔓延左宗棠另摺奏查明劉松山及高連陞兩軍變亂情

形均已明降諭旨將劉松山等分別議處革留及副將楊玉魁等正法其未獲之蔣宏高石文科仍著左宗棠等隨時嚴拏毋任漏網現在高連陞所部陣斬及擒獲正法者人數甚多未變各營改派李輝武等統帶尚屬妥協著卽飭該統領等妥為鈐束不可稍涉大意致生事端將此由六百里各諭令知之○陝西巡撫劉典奏軍務未竣請將本年大計展緩辦理從之○以記名總兵官李輝武為

陝西漢中鎮總兵官○以甘肅攻克董志原回巢賞都司趙連科花翎餘加銜升敘有差○以四川官軍克復貴州甕安縣城並疊破賊巢出力賞總兵官蔣定邦巴圖魯名號遊擊吳國祥知州易紹琦等花翎知縣焦光鼎等藍翎餘加銜升敘開復有差○予甘肅楊店被戕總兵官黃毓馥副將賀茂林守備吳學裕知縣謝生春等祭葬世職附祀提督高連陞專祠○予廣東信宜等處陣亡殉難紳

民余士楨等暨婦女一千七百三十九名口分別旌卹如例 庚戌予河南各屬陣亡殉難紳民婦女一千五百九十七名口分別旌卹如例 辛亥以神靈顯應頌山東德州金龍四大王廟扁額曰通津顯佑 諭內閣本年自春入夏雨澤愆期疊經降旨祈禱尚未渥沛甘霖現在節屆小滿農田望澤彌殷因思在京問刑各衙門於現審案件或日久宕延未能清結無辜之人紛紛拖累甚至瘞

斃囹圄以致上千天和著刑部步軍統領衙門順天府將現辦各案趕緊清釐如有待質應訊之人飭司坊各官取保後迅速傳訊早為結案不准稍有積壓拖累以迓和甘○予山東各屬陣亡殉難文生劉傳霖等紳民勇丁一千七百六十一名賞卹如例○豁免山東東昌府屬各州縣衛同治六年以前舊欠額賦○壬子諭軍機大臣等戶部奏遵議穆圖善請撥吉林黑龍江馬隊月餉一摺穆圖

善所調吉林等處馬隊二千名係因勦辦甘省賊匪與其格外籌餉不如就近由該省已撥之餉均勻協濟左宗棠西征的餉為數甚鉅所有移圖善請撥馬隊月餉二萬兩著俟該隊到營後即由左宗棠在各省解到前撥西征餉內按月照數劃給俾濟要需該大臣公忠素著且係陝甘本任總督自不至意存歧視也將此由五百里各諭令知之○癸丑上復詣

大高殿祈雨壇行禮遣惇親王奕誼詣

時應宮孚郡王奕誨詣

昭顯廟惠郡王奕詳詣

宣仁廟貝勒載治詣

凝和廟禮親王世鐸詣

覺生寺克勤郡王晉祺詣

黑龍潭順承郡王慶恩詣密雲縣

白龍潭拈香以太僕寺卿王映斗為太常

寺卿○予直隸束鹿殉難生員薛天然等紳

民婦女二千四百四十六名口分別旌卹如例並予建祠甲寅署熱河都統魁齡奏圍場移建卡倫現飭總管等一律查明覈辦得旨該署都統即嚴飭該總管等將應行修立紅椿卡倫逐細勘明地界一律修齊○乙卯諭軍機大臣等金順奏回逆趨重北路現籌進剿一摺回匪盤踞磴口烏喇特等處蔓延纏金日漸東趨董志原回逆數千又擾及定邊迤西大水坑一帶旋復他竄騎賊由橫城

附近出邊者絡繹不絕後套情形甚為喫緊該處地上沃饒為甘軍糧源所出若被該匪竄踞關繫非輕金順現已派副都統常福先赴達拉旗探剿即擬親率各營進規烏喇磴口所籌甚是著即迅速前進向賊匪趨重之處迎頭痛剿截其東竄疏通甘軍糧路兼為甯郡聲援邊外地方遼闊若賊匪分股肆擾必須分兵兜擊金順所部十餘營尚嫌單薄張曜赴陝剿賊甚為奮勉現駐古城相距較

近著金順知照該提督移營西進藉為後路策應其古城一帶亦須有兵填紮並著金順知照宋慶即率各營擇要扼堵仍聯絡劉厚基等軍以壯聲威張曜宋慶等軍剋日進取需餉接濟著鄭敦謹速為籌畫毋誤師行董志原賊匪既經北竄陝省西路情形較鬆而北路賊勢日肆蔓延左宗棠宣可膜視著即派撥勁旅馳赴北路相機進剿以期早殄逆氛歸綏等處防務著定安懷遵疊次諭旨認真籌辦以杜窺伺將此由六百里各諭令知之○丙辰以神靈顯應加湖北孝感縣城隍神封號曰護國○丁巳諭內閣魁齡等奏剝船工程完竣請派員驗收並籌議彌補庫款一摺此次成造剝船即著派廷煦畢道遠就近驗收所稱由南漕項下撥補庫款及十年期滿分別挑留承運並無料可抵各船工價不敷擬酌加四成之處著戶部議奏尋奏遵議造船經費請以南漕項下額徵輕齋

銀兩備用商人造船保固限以十年限滿無損挑留承運無料可抵各船酌加四成工價由部庫給發從之○以翰林院編修郭懷仁為貴州鄉試正考官許振祿為副考官○舉行同治七年大計直隸卓異官十五員不謹官一員浮躁官四員才力不及官三員有疾官一員年老官二員江西卓異官八員不謹官二員浮躁官二員才力不及官二員浙江卓異官十一員不謹官五員浮躁官三員才力不及官一員年老官四員有疾官一員福建卓異官九員不謹官二員浮躁官一員罷輟官一員才力不及官二員有疾官一員年老官二員湖北卓異官九員不謹官一員浮躁官二員才力不及官二員有疾官一員湖南卓異官七員不謹官一員浮躁官一員罷輟官一員有疾官一員年老官二員河南卓異官十二員不謹官二員浮躁官一員才力不及官一員有疾官一員年老官二員山東

卓異官十員。不謹官一員。才力不及官一員。
年老官一員。山西卓異官十二員。不謹官二
員。才力不及官一員。年老官二員。四川卓異
官十四員。不謹官二員。浮躁官二員。罷輟官
一員。才力不及官二員。年老官五員。廣東卓
異官八員。不謹官四員。浮躁官一員。罷輟官
五員。才力不及官一員。有疾官二員。年老官
三員。廣西卓異官八員。不謹官二員。罷輟官
一員。才力不及官一員。有疾官一員。年老官
二員。貴州卓異官六員。不謹官二員。罷輟官
一員。分別議敘處分如例。以東河堵築禁
工出力。賞遊擊郭廣泰都司曹映科二品封
典。知府陸費萊遊擊彭萬里等花翎。同知袁
景曜等藍翎。餘加銜升敘開復免罪有差。

大清穆宗繼天開運受中居正保大定功聖智
誠孝信敏恭寬毅皇帝實錄卷之二百五十六

大清穆宗繼天開運受中居正保大定功聖智
誠孝信敏恭寬毅皇帝實錄卷之二百五十七

恭錄穆宗實錄卷之二百五十七

聖訓

聖訓

聖訓

聖訓

聖訓

同治八年己巳四月戊午諭內閣李鴻章奏

請將藉端挾制及約束不嚴各員分別懲辦
一摺湖北管帶壯勇營記名總兵鄧大欽經
該統領記名提督姜玉順以貪劣廢弛等情
稟請撤委該員抗不交卸輒以統領月餉未
清意存挾制並乘遣撤勇丁之際噉眾爭鬧
實屬膽玩鄧大欽著即行革職撤銷勇號發
往雲南效力贖罪姜玉順雖查無侵蝕餉項
情事惟約束不嚴於餉項復多轆轤以致營
官藉口稟訴亦屬咎有應得著以副將留於

湖廣降補以示懲儆○諭軍機大臣等穆圖
善奏陝回竄擾南路撤回駐紮各軍以保完
善請飭金順兼顧山陝西北邊界並餉需為
難情形及出差官弁被地方官殺斃多命各
摺片陝回竄擾秦州等處勢極猖獗雖經善
山保等奮力衝擊立解秦州之圍而糧運不
繼詳潰堪虞穆圖善現飭駐紮狄道各軍移
紮鞏昌並於甯遠伏羌二縣要隘分營扼守
合鞏南路股匪疏通運道尚係為事勢所迫

不得不斟酌緩急處以權宜所請交部議處
之處著加恩寬免左宗棠聞清水民團之變
出示曉諭許以請帑賑撫禁革差徭固係為
恤民起見惟穆圖善處餉源窮乏之地力為
其難左宗棠總當恪遵疊次諭旨將各省解
到餉銀均勻分撥不得以空言見好於民致
甘省軍務辦理愈形棘手前已有旨令左宗
棠馳至涇州接受總督關防現在甘省南路
軍情緊急著即懍遵前旨迅赴涇州接印任

事。覘賊所向。認真勦辦。毋稍延緩。金順現已進規烏喇磴口。未必卽能分兵。花定甯夏一帶防務。穆圖善當隨時與金順咨商。相機布置。穆圖善所派赴楚製辦軍裝之遊擊周欽輝等。行至榆林。被該處地方官殺戮殆盡。穆圖善以該道所稟情節支離。飭令切實根究。一年有餘。尚未稟復。顯有事前枉殺事後粉飾情形。著劉典提集人證。嚴訊確情。務令水落石出。毋稍瞻徇。原摺著鈔給劉典閱看。穆

圖善另片奏。擊辦潰勇情形。並派員赴川募勇等語。成祿黃有才。勇丁東潰。雖經分別安插懲辦。該營官未能妥為防範。咎有應得。副將屈國香著卽行革職。撤去管帶。仍留營效力贖罪。儻再不知愧奮。卽行從嚴叅辦。勇丁相率潰變。此風萬不可長。必須嚴加整頓。以肅軍律。著穆圖善嚴飭楊占鼐黃有才等。各將其餘部眾。妥為鈴束。毋令滋事。效尤。此起潰勇。已抵涼州。願入穆圖善軍營。隨勦該署

督仍當體察情形。不可輕率錄用。至所稱甘勇多不得力。而就地招募。後患尤多。擬派員赴川募勇六營。赴甘助勦。所籌尚是。惟當嚴飭該員等。揀選精壯。訓練成軍。俾知紀律。沿途尤宜嚴加約束。毋令滋擾地方。將此由六百里各諭令知之。○又諭穆圖善奏派員赴川募勇。請飭經過地方撥給口糧等語。穆圖善以甘省勇丁多不得力。現須裁汰歸併。另募健卒。以資整頓。甘省用兵。向係川勇可恃。

已派委提督李奉清等。酌帶將弁。前往四川重慶一帶。招募勇丁三千。赴甘助勦。應需經費。及製辦軍裝銀八千兩。著吳棠飭令藩司。在於川省應解協甘餉銀內。如數撥交李奉清等具領應用。此項勇丁募足啟行時。經過四川陝西甘肅各州縣。每名每日著給予麵一斤半。馬匹草料。照例供支。卽著左宗棠吳棠劉典各飭所屬。一體遵照辦理。俾免缺乏。將此由五百里各諭令知之。○予甘肅峽口

堡等處陣亡千總楊發榮等祭葬世職加等
○撥湖北劈山礮十尊。擡槍六百桿。小槍二千桿。解赴署陝甘總督穆圖善軍營備用○
己未

孝端文皇后忌辰遣官祭

昭陵○兩廣總督瑞麟等奏。總兵官吳光亮捐建所部陣亡將士專祠。擬請賜名表忠。允之
○以四川官軍克復貴州清平縣城道員唐炯。提督劉鶴齡得旨嘉獎。並賞白玉翎管各

一支。白玉搬指各一箇。大荷包各一對。小荷包各兩箇。提督陳希祥一品封典。參將田應豪守備王成忠。向秉忠。同知于德楷。知縣王恩榕。邑圖魯名號。同知張之濂。守備劉舜臣等花翎。餘加銜升敘有差。投誠賊目潘名傑以守備用。並賞花翎。予陣亡把總陳炳山。外委舒大有等祭葬世職。○予故四川北鎮總兵官鶴齡祭葬卹廕加等。如軍營病故例。○予廣東各屬陣亡殉難廩生楊嘉謀等紳

民婦女二十二名口。分別旌卹如例。○追予直隸獻縣殉難知縣熊存瀚。建立專祠。都司馬寶臣。訓導陳成烈等。一併附祀。陳成烈眷屬旌表如例。○庚申。諭內閣。御史袁方城奏。忠義卹典。請歸地方官舉辦。不必言官瀆奏。一摺。近來被兵各省分。殉難紳民婦女。由科道陳奏。請卹原因。該言官等事關本籍。見聞較確。是以一經奏請。朝廷立沛恩施。惟表揚忠節。係地方官應辦之事。著各直省督撫查

明賊擾地方。如有臨危授命大節無虧者。卽隨時彙案奏請旌卹。不得任聽屬員延閣不辦。致有書吏需索情事。至言官果有採訪確實。仍准隨時奏請。但不得稍涉冒濫。將此通諭知之。○又諭御史袁方城奏。中城奏交王宏慶。攔劫一案。經刑部審訊。全屬子虛。其中起意買扳。倡認之人。請交刑部覈其情節。分別議罪。並請定五城捕盜獎敘議處限制。及平反此案。刑部司員。應否獎勵各等語。著該

部議奏嗣後刑部遇有此等案件務當悉心研訊以副朝廷明慎用刑之至意○又諭前因李鶴年奏參帶兵大員縱勇殃民當經諭令李鴻章查辦茲據該督將全案先後辦理情形查明具奏此案已革甘肅涼州鎮總兵周盛波於同治六年五月間在河南南陽一帶追勦搶匪所部馬隊行至唐縣所屬之少拜寺砦砦內因未見勇營旗幟誤認為賊開礮將營官楊安典轟傷該哨兵勇亦即施放

槍礮攻進砦牆傷亡男婦大小一百餘名○而弁勇死者亦三十餘人其時周盛波在前敵派人回顧並將滋事勇目任傳芝等當眾正法曾經李鴻章派員會同豫省委員李在鈺等查辦其仇殺情由與現在所查各節尚屬相符惟周盛波以帶兵大員所部在外滋擾雖續將率勇攻砦之把總戴長安拏獲正法而平日之不能約束勇丁已可概見姑念事起倉卒尚非意料所及周盛波業經革職

著毋庸議營官副將楊安典管押輜重事前並不小心防範亦屬咎有應得楊安典著卽行革職以示懲儆○諭軍機大臣等李鴻章奏提督劉銘傳患病未痊懇請開缺已明降諭旨准其開缺調理矣惟該提督所部各營前經曾國藩奏明作為畿輔護衛之師現在劉銘傳既經開缺劉盛藻接統是否勝任或須另派妥員接管並應否遣留之處著曾國藩悉心察度隨時奏明辦理李鴻章原摺著

鈔給閱看將此諭令知之尋奏遵查劉盛藻廉明精細將士翕服接統劉銘傳所部堪以勝任報聞○河南布政使李宗燾因病解職以浙江按察使劉齊銜為河南布政使○甘肅布政使林之望因病解職以西甯道崇保為布政使○直隸提督劉銘傳因病解職實授傅振邦直隸提督○調福建陸路提督郭松林為湖北提督湖北提督江長貴為福建陸路提督○辛酉諭內閣鄭敦謹奏請將出

力之已革大員免其發遣等語。已革山西按察使陳湜前因辦理河防。未能堵禦。以致逆匪竄越。當經降旨革職。並發往新疆效力。嗣因鄭敦謹奏請暫留山西辦理防務。茲據該署撫奏稱陳湜自留防一年有餘。實心實力辦理。俱有成效。請加恩免其發遣。各等語。陳湜著准其暫免發遣。帶勇前赴左宗棠軍營戴罪立功。以觀後效。○諭軍機大臣等。陳湜自抵山西後。辦理河防。增兵益餉。朝廷無不

立允。乃於擒匪搶渡之日。竟敢在省遷延。其咎甚重。迨褫職後。辦理防務。雖有微勞。但並無戰績可稱。足以自贖。豈能遽行施恩。惟該革員在軍營有年。廢棄可惜。著鄭敦謹卽飭陳湜統帶所部楚勇。馳赴左宗棠軍營。隨同剿賊。儻能奮勉立功。著有奇績。卽由左宗棠奏請恩施。至陳湜赴陝以後。山西兵勇較少。應如何布置。李慶翱能否得力。著鄭敦謹妥籌經理。毋得稍有疏懈。致負委任。將此由四

百里各諭令知之。○以山西歸綏道興奎為浙江按察使。○以山西水陸官軍疊次堵剿。竄匪出力。賞總兵官李春森一品封典。副將陳起鳳。蕭紹珂。蕭必友。巴圖魯名號。副將杜方來等。花翎。知縣強兆芸等。藍翎。餘加銜升敘。開復有差。○壬戌。諭軍機大臣等。定安等奏截剿黃河兩岸竄匪情形。並請飭張曜赴磴口剿賊。各摺片。磴口賊匪紛竄。後套一帶黃河東西兩岸。均有賊蹤肆擾。經烏爾圖那

遜。馬陞等在哈木爾和碩及薩拉素地方。分投進剿。斃賊多名。餘匪向西南敗遁。惟二圪旦灣富家補隆一帶。尚有賊匪盤踞。難保不乘隙東犯。著定安飭令烏爾圖那遜等。趕緊探蹤追剿。迅殄逆氛。所有此次出力官兵。准其擇尤彙保。毋許冒濫。前因磴口情形緊急。諭令金順由烏喇一帶進圖規復。並令張曜一軍移營西進。為後路聲援。定安此次所請令張曜前赴磴口進剿。自係尚未接奉前旨。

著定安懷遵前旨。卽飭張曜迅速拔營前進。會同金順相機勦辦。其宋慶一軍並著遵照前旨填紮古城。以資扼堵。張曜宋慶兩軍距左宗棠軍營較遠。所有該二軍應行進止之處。卽著定安就近調遣。以期迅赴戎機。金順現在行抵何處。著卽酌度情形。與張曜一軍聯絡進剿。力遏賊匪東竄。毋任蔓延。張曜宋慶兩軍應需糧餉。仍著鄭敦謹速為接濟。俾利師行。將此由六百里各諭令知之。○癸亥。

諭軍機大臣等。有人奏廣西候補道李均貪鄙險詐。善於鑽營。向有凶人之目。把持釐金軍需等局。十有餘年。引用私人。收受月規。節規壽規等項。侵蝕剝削公項。半入私囊。平日袒護局員。挾仇報復。並有父子異籍姻親同官情弊。請飭嚴辦等語。李均以監司大員。總理局務。自應奉公守法。愛惜聲名。若如所參各情。實屬貪劣不職。著蘇鳳文逐款確切查明。據實參奏。毋稍徇隱。原摺著鈔給閱看。將

此諭令知之。○以太常寺卿慶陞為內閣學士兼禮部侍郎銜。○甲子。

上復詣

大高殿祈雨壇行禮。○遣惇親王奕誼恭祀

天神壇。恭親王奕訢恭祀

地祇壇。孚郡王奕譞恭祀

太歲壇。惠郡王奕詳詣

時應宮。貝勒載治詣

昭顯廟。鎮國公奕詢詣

宣仁廟。鎮國公奕謨詣

凝和廟。禮親王世鐸詣

覺生寺。克勤郡王晉祺詣

黑龍潭。鄭親王承志詣密雲縣

白龍潭拈香。○以神靈顯應。加山東禹城縣

城隍神封號曰沛澤。○諭內閣。阜保。胡家玉

奏承修工程。請選擇合龍吉期等語。盛京

福陵

隆恩殿合龍吉期。著欽天監於五月十五日以

後二十九日以前。敬謹選擇兩日具奏。並卽行知該侍郎等。以期無誤要工。○諭軍機大臣等。文麟景廉奏關外軍務喫緊。請停撥援兵。暨道員呈請回籍。據情代奏各摺片。前因福濟等奏布倫托海叛賊滋擾。請調援兵。當諭文麟等抽調兵勇。迅速赴援。嗣據麟興等奏哈密兵勇來往不易。復諭福濟等咨明文麟。將前調兵勇暫為停撥。茲據該大臣等奏稱所部各營。除分撥防護及防守各城外。兩

路僅十餘營。兵力已形單薄。而哈密刻下軍務又屬緊急。請停止援兵等語。所奏自係實情。現在布倫托海地方。賊勢稍鬆。索倫人眾亦已踵至。所有前調之哈密援兵。著毋庸調往。吐魯番等處回情。及惠回堡花海子沙棗園子一帶防務。仍著文麟。景廉隨時偵探。並督飭兵勇實力嚴防。毋得稍涉疏懈。調署鎮迪道黎獻著准其回籍守制。惟鎮迪道係催運哈密後路糧務。不可接替無人。著穆圖善

於甘肅現任及候補人員中。擇其才能勝任者。卽行奏補。毋庸拘泥成例。致滋貽誤。其出關催運事宜。該署督卽飭新補之員前往接辦。以便景廉帶兵進剿。毋任逗遛。將此由五百里各諭令知之。○乙丑。諭內閣李鶴年奏。才不稱職及人地未宜各員。請分別降調另補一摺。河南署中牟縣事葉縣知縣何鼎才。具平庸。辦案草率。尉氏縣知縣方恩壽。才欠歷練。難資整頓。永甯縣知縣陳延芬。辦事任

性。不洽輿情。均著以府經歷縣丞降補。封邱縣知縣孫成竹。人尚明白。辦事遲鈍。著卽開缺留省察看。睢州知州費均。措置未能裕如。靈寶縣知縣杜克輝。遇事操切。致滋物議。均著開缺留省。遇有相當缺出。酌量補用。○以河南泌陽等處勦辦會匪。並歷年防河出力。予總兵官崔廷桂。以提督簡放。賞參將經文布正二品封典。參將田宗勝。遊擊左成元。郭廣泰。張順。都司謝聯陞。巴圖魯名號。道員李

汝鈞守備席蘭洲等花翎。知縣陳慶文等藍翎。餘加銜升敘開復有差。○追予河南涉縣陣亡知縣李毓珍於死事地方暨原籍建立專祠。○丙寅諭軍機大臣等。沈葆楨等奏前任臺灣道吳大廷因病開缺。回籍調理。現在船政需員。請飭仍赴閩省等語。吳大廷告假回籍調治。業經半載。計早痊愈。著劉崐迅卽飭令該員趕緊赴閩。襄理船政。不得遲延。將此諭令知之。○丁卯諭軍機大臣等。岑毓英

奏堵剿省東竄匪獲勝。攻克洛紅甸等處一摺。尋甸嵩明賊匪。攻撲楊林。官軍退守宜良北屯。該逆旋撲大板橋各營。分股繞竄省東十里鋪等處。疊經官軍堵剿。俘馘千計。省城糧路尚無阻滯。惟該逆並未遠遁。且恐與江右館之賊暗通消息。亟應相機進剿。斷賊聲援。著岑毓英飭令楊國發等。由邑市等處進兵。節節掃蕩。規復楊林。該逆既踞楊林。其尋甸老巢。當有可乘之機。劉嶽昭豈得株守曲

靖一籌莫展。著卽迅速進兵。與省城官軍東西夾擊。務將嵩尋兩城力圖克復。迅掃逆氛。其洛紅甸豆溫鄉等處踞匪。經蔡標等攻克。廣西師宗境內肅清。勦辦尚屬奮勉。仍著飭令迅掃餘匪。以靖地方。逆首馬幗汰雖經殲除。謝洪尚無下落。並著認真搜捕。出力員弁兵勇。准其查明存記。彙案請獎。此次楊林首先失營之都司楊相。千總胡興邦。均著革職留營效力贖罪。儻再不知愧奮。卽在軍前正

法。毋稍姑容。副將何秀林督率無方。咎無可辭。著交部議處。仍責令帶兵勦賊。以觀後效。岑毓英另片奏。署提督馬如龍傷疾較重。懇請給假等語。馬如龍著賞假一箇月。趕緊調理。毋庸開缺。將此由六百里各諭令知之。○予雲南楊林陣亡都司馬恩才等三十一員祭葬世職加等。○戊辰諭內閣。前據吳坤修奏。安徽婺源縣知縣陳善奎辦事顛預。難膺民社。當經降旨。以府經歷縣丞降補。茲據吳

坤修奏稱正擬派員接署。適陳善奎以捐升同知呈請開缺等語。陳善奎既不能勝民社之任。則同知為知縣升階。豈復能期其稱職。明係該員聞有降補之旨。報捐升階。以免降補。似此蒙混取巧。於吏治人心大有關繫。所有陳善奎捐升同知之處。著該部查明撤銷。嗣後遇有各省督撫甄別降革之員。具呈報捐者。著該部詳細查明。遵照定章辦理。毋任蒙混取巧。以肅吏治。○己巳諭軍機大臣等。

瑞麟等奏。勦辦高明等處客匪完竣。現飭進勦長沙踞匪一摺。廣東鶴山客民糾黨竄入高明縣境。經總兵鄭紹忠先將高明客匪勦平。移紮鶴山。分別勦撫。並經該督等派員將客眾按名酌給川資。分遣雷廉等府地方妥為安插。該客民自應知感懼。不敢復出為匪。惟粵東土客宿隙未除。難保不再搆釁。應如何設法辦理之處。著瑞麟、李福泰督飭道員齊世熙悉心經理。務使日久相安。永杜後

患。新安東莞等處土匪竄踞赤溪。同知所屬之長沙地方。該處環山臨海。匪徒膽敢負隅。著該督等即飭鄭紹忠親統兵勇相機進剿。所有勦辦客匪出力各員。并准俟長沙勦匪事竣。彙案擇尤奏請獎勵。將此由五百里各諭令知之。○追予廣東乳源殉難知縣冒芬於死事地方。暨原籍建立專祠。○庚午內務府奏放款支絀。請飭部仍按原數撥給銀兩。得旨。著照所請。仍准由戶部借撥銀三十萬

兩。搏節動用。毋許浮冒。俟各省撥款解到。即行歸還部庫。○辛未。

孝慎成皇后忌辰。遣官祭

慕陵。○諭軍機大臣等。前因給事中陳鴻翊奏請整頓長蘆鹽務。當經降旨交戶部議奏。茲據奏稱陳鴻翊所擬各條。或係申明成例。或係現辦有案。或款由外銷。向未報部。總之蘆網積弊。在引案虛懸。乏人認運。因而交款日絀。浮費過重。商力難紓。正供遂至暗虧。請飭

迅速整頓等語。著曾國藩按照該部議奏各條。督飭長蘆運司將應辦事宜。趕緊修舉。應汰陋習。實力埽除。如尚有未盡事宜。並著體察情形。酌擬章程具奏。原摺單著鈔給閱看。將此諭令知之。尋奏。遵議蘆綱散商領引納課。均著網總查催。致有把持等弊。今將總商四人酌留二人。俟遴選有人。卽行接充。按年輪換。諸弊可清。應飭暫先試辦。並將官商及已撤總商欠款。趕緊查辦。下部議從之。○又

諭。戶部奏。遵議改撥滇餉一摺。滇省需用軍餉。前經指撥四川湖南山西浙江每月共銀十二萬一千六百餘兩。惟四川省撥款較多。恐力有未逮。河南山西廣東距滇甚遠。委員領解。動輒經年。恐有懸軍待餉之虞。自應酌量改撥。以資接濟。所有原撥滇省月餉。卽改由四川每月撥銀三萬兩。湖北每月撥銀二萬兩。湖南每月撥銀二萬兩。江南每月撥銀二萬兩。浙江每月撥銀三萬一千六百六十

六兩零。著吳棠李鴻章郭柏蔭劉崑馬新貽劉坤一。文輝李瀚章。在於各該省釐金捐輸及無論何款內。通融湊撥。按月提交滇省委員陸續領解。該省軍務緊要。需餉孔亟。該督撫等務當力顧大局。不得推諉遲誤。其本年二月十七日。戶部奏請將浙江江西應解滇餉共十萬五千兩。改由湖北於本年應解京餉內動撥之處。著毋庸議。四川省應解劉崑昭等營餉銀。仍著照常報解。毋稍牽混。現在

各省餉需亦甚支絀。均係竭力籌撥。劉崑昭岑毓英。務當激勵將士。將滇省軍務力圖振作。及早奏功。毋致虛糜餉項。其原撥山西河南廣東等省太平粵海等關欠解滇餉。及粵鹽劃抵滇餉案內所撥銀兩。卽由戶部行知各該省陸續湊齊候撥。原摺均著鈔給閱看。將此由五百里諭知李鴻章馬新貽吳棠劉崑郭柏蔭劉崑劉坤一李瀚章岑毓英。並傳諭文輝知之。○又諭。前令定安等於伊克

昭烏蘭察布錫林郭勒三盟內籌辦駱駝三千隻解赴榆林交金順應用茲據該將軍等奏稱錫林郭勒盟已備駝一千隻分兩起押解計期早到榆林惟伊克昭盟連年被匪滋擾牲畜一空烏蘭察布盟所屬屢奉徵調且烏刺特旗境被賊竄擾窮苦難堪駝隻均難籌備自係實情金順軍營現已有錫林郭勒盟駝隻一千於一切轉運事宜諒數接濟所有前調烏伊兩盟駝隻即著暫緩籌辦以示

體恤另片奏土默特臺站三處經費告罄該臺站解運新疆各城軍火等項差務繁多請援案再行提借銀兩等語著鄭敦謹在於藩庫項下籌解銀五千兩以資應用俟土默特減成項下積有成數即著定安將前後借動銀兩如數移解歸款其用過數目每屆年終由桂成造冊報銷將此由五百里各諭令知之○以直隸成安縣捐修城垣永廣學額一名○以湖南官員捐墊軍需永廣安徽鳳陽

縣學額八名涇縣四名順天大興縣江蘇婁縣湖北蒲圻縣陝西咸陽縣各一名

大清穆宗繼天開運受中居正保大定功聖智誠孝信敏恭寬毅皇帝實錄卷之二百五十七

太歲壇。睿親王德長詣

關帝廟。鄭親王承志詣

城隍廟。孚郡王奕諲詣

時應宮。惠郡王奕詳詣

昭顯廟。鎮國公奕詢詣

宣仁廟。鎮國公奕謨詣

凝和廟。禮親王世鐸詣

覺生寺。克勤郡王晉祺詣

黑龍潭。怡親王載敦詣密雲縣

白龍潭。定郡王溥煦詣清漪園

龍神祠。豫親王本格詣靜明園

龍神祠拈香。○諭內閣。前據李鴻章奏。遵查

湖南布政使李榕。叅款大概情形。當降旨將

李榕暫行革職。諭令李鴻章。劉崐。逐款確查

茲據該督等查明具奏。此案李榕被叅各款

或查無確據。或事出有因。惟任用優伶。翠喜

數年。始終受其蒙蔽。經劉崐面諭驅逐。始令

出署。又將業經禁革之件。任意批准。並於屬

員妄定陋規。罰錢不報等案。漫無覺察。其辦

理米捐。雖無偏斂人命情事。而濫委官紳。租

捐畸重。以致不協輿情。均屬咎有應得。李榕

著卽革職。以示懲儆。劉崐既查明李榕任用

優人。卽應據實叅奏。乃僅令驅逐。亦有不合

劉崐著交部議處。至米捐一項。借資民力。自

應加意體恤。該督等已將各屬省委各紳。概

行撤回。暨捐有成數之各州縣。委員飭令銷

差。俾免煩擾。其尚未辦竣各屬。仍當體察情

形。飭令妥為經理。毋許苛累閭閻。尋吏部議

劉崐照徇隱私罪例。降三級調用。不准抵銷。

得旨著加恩改為革職留任。○諭軍機大臣

等前因御史郭從矩等先後陳奏山西直隸

有匪徒聚眾搶刦。並有二字會匪名目。疊經

諭令曾國藩鄭敦謹李鶴年督飭所屬認真

嚴拏。業據曾國藩將查辦大概情形覆奏。本

日又據李鶴年奏稱。查明豫省界連山西各

縣尚無匪徒聚眾情事。惟直隸晉三省交界

處所犬牙相錯山徑叢歧最易藏奸擬知會鄰省約期會哨等語鄭敦謹於特旨查拏之案何以日久未經陳奏殊屬延玩著卽嚴飭所屬上緊挖緝一面將辦理情形覆奏毋稍遲誤至約期會哨尤須不分畛域實力奉行庶可杜此拏彼竄之弊著曾國藩鄭敦謹李鶴年妥議章程認真籌辦毋令有司視為具文李鶴年摺著鈔給曾國藩鄭敦謹閱看將此各諭令知之○湖廣總督李鴻章奏遵查

川存滇銅已竭楚省無從收買至施南各屬開礦利少弊多亦難辦理仍請由蘇省到滬採買洋銅以資鼓鑄下部議從之○以湖北按察使王文韶為湖南布政使湖北荆宜施道張建基為按察使○乙亥補行同治六年軍政山東卓異官三員不謹官四員才力不及官二員年老官一員分別議敘處分如例○丙子諭軍機大臣等穆圖善奏陝回分股竄甘請仍飭金順回駐花定並回匪逼近中

衛董志原踞逆紛擾情形暨請將擅殺之總兵暫行革職各摺片據稱花馬池地方突有大股馬步賊匪爬城經富勒琿等擊退董志原逆匪復竄至中衛縣屬之甯安堡上橋卡將殷家寨等處及河南馬灘攻破並分股渡河逼近城垣其平番縣屬之牛站連城一帶又有西甯撤回圍攻堡城省城附近亦有賊蹤請飭金順迅回花定保護甯靈等語陝回分竄甘境穆圖善所部各軍分布西南於北

路勢難兼顧自係實情蘭州為根本重地關繫尤重仍著該署督就現有兵勇妥籌防守定邊花馬池為甘省要害之區固不可無得力兵勇扼賊匪紛竄之路第磴口界接晉疆金順前奏親統各營由達拉節勒而西以期先復磴口此時自未便撤回卽著該副都統懷遵疊次諭旨斟酌辦理張曜統師西進為金順後路接應宋慶進紮古城榆林防守無人左宗棠等或卽於劉松山郭寶昌各軍中

抽撥一軍填紮榆林以資鎮撫董志原逆股前據左宗棠等奏稱竄回金積堡茲覽穆圖善所陳是該逆分三路奔竄倏東倏西迄無定所著左宗棠嚴飭各路將弁確探賊蹤迅圖剿辦不得以回氛距陝較遠置之不顧並著將賊情隨時知照穆圖善該大臣久無奏報刻下陝境有無賊匪該大臣駐紮何處陝甘北路如何嚴密布置及回逆由董志原分竄後應由何路撥兵跟蹤截剿均著隨時奏

聞其甯靈已撫回眾仍著穆圖善飭令胡昌會率同馬潮青妥為鈴束毋令滋生事端連城城圍既解西路撤回即著嚴飭張萬美就近兼顧並飭黃金山將涼州南山游匪搜捕即由涼繞赴中衛堵擊北路竄匪以杜分擾記名總兵陳懷仁臨陣規避並有剋扣勇餉等情本屬罪所難宥黃金山於查明後即將該員正法尚無錯誤惟未稟請穆圖善批示亦有不合黃金山著暫行革職留任以示薄

懲該總兵平日打仗尚稱得力現當軍營用人之際如果續有戰績仍可仰邀恩施將此由六百里各諭令知之○兩江總督馬新貽奏酌擬江甯各屬清理交代六條一責成現任各員勒限盤查結報一新舊交代宜截清界限一交代虧空之員應定限嚴追一攤補清查各款應援案請豁一交代逾期不結由該管府州詳參一交代冊式但求簡明易曉以昭覈實下部知之○署陝甘總督穆圖善

奏甘肅軍務未靖請將節年秋審人犯仍展緩辦理從之○予甘肅甯夏傷亡副將曾天寶祭葬世職加等丁丑諭內閣文盛奏廢員由配脫逃請旨拏辦一摺已革佐領里善已革千總王得勝已革驍騎校富昌已革千總李明哲已革外委張九圍均因案發往軍臺效力贖罪竟敢私自脫逃實屬玩法著順天府五城一體嚴拏務獲究辦○戊寅諭內閣榮頤等奏司員擅行回京請仍飭覈算交

代一摺

昌陵禮部郎中桂薰現在調補工部郎中自應將經手事件交代清楚再行赴部乃該員呈遞款目內多牽混重複不候覈算遽行回京顯有情弊著該旗卽飭桂薰迅回承辦事務衙門會同覈算交代以清款項○以刑部平反獄訟予郎中伊勒通阿等獎敘有差○己卯諭內閣丁寶楨奏請將庸劣不職各員分別懲處等語山東邱縣知縣程惠昌遇事數

衍聲名平常館陶縣知縣鮑瑞駿作事乖謬眾議沸騰均著勒令休致肥城縣知縣朱相基年輕識淺不諳治體著以府經歷縣丞降補臨淄縣知縣齊世澄辦案延玩才質平庸著先行撤省察看○又諭鄭敦謹奏查明失守城池各員弁分別定擬一摺同治六年十一月間捻匪由陝西竄擾山西吉州鄉甯垣曲等州縣相繼失守該文武員弁雖無聞警先逃及事後捏飾情弊惟守禦不力失陷城

池均屬咎有應得已革署吉州知州余濤既不入城救援又未隨同克復著發往新疆效力贖罪已革鄉甯縣知縣陳魯於城陷後督團入城隨同官兵克復情稍可原業經革職著免其治罪吉州城守營把總湯得勝署鄉甯城守營把總賈吉齡垣曲縣城守營外委劉士陞均有守城之責雖先期奉調外出究屬失陷城池湯得勝賈吉齡劉士陞均著卽行革職署吉州營守備賈騰蛟奉調赴防曾

經擊退賊匪嗣復帶兵赴援隨同官兵克復州城著免其置議仍回本任吉州吏目黃晉恩鄉甯縣典史劉掄英各有疏失監犯之咎除黃晉恩業經病故外劉掄英著革職免其治罪餘著照所議辦理另片奏請將出力之文武各員量予恩施等語平陽府知府龔嘉雋絳州直隸州知州沈鍾力保府州各城功過尚足相抵該員等應得所屬失守處分均著加恩寬免已革總兵閻文忠辦理河防尚

能得力。著准其開復原官以示鼓勵。至已革太原鎮總兵陳必友防守所轄吉州河岸不能實力堵禦致賊匪由此搶渡蹂躪地方厥咎甚重。所請開復原官之處著不准行。○又諭鄭敦謹奏請飭催大員赴營帶隊等語。滿洲鑲白旗記名副都統保英向在提督張曜軍營統帶勇隊。該員於本年三月間赴部引見。迄今尚未回營。現在該提督軍營帶隊需員。著該旗飭令保英迅赴張曜軍營毋稍遲延。

○諭軍機大臣等前因富明阿奏挑選馬隊赴甘籌辦軍裝戰馬。懇請速撥銀兩。當經諭令戶部議奏。茲據該部酌議覆陳。著照所請。所有此次赴甘馬隊應需整裝各項。即著曾國藩於直隸旗租積欠東三省俸餉銀內提銀一萬五千兩。丁寶楨於山東地丁積欠東三省俸餉銀內提銀一萬五千兩。遴派妥員趕緊如數解往。毋稍延誤。其前次調赴金順軍營官兵二百五十名所需整裝等銀已

由吉林鋪商借墊。著富明阿於解款到後一併歸還。至吉林馬價昂貴。著准其按照黑龍江成案每匹給銀八兩。仍在各官兵應得軍裝項下照數扣抵。富明阿務當嚴飭購買各員一律挑選臆壯。俾資適用。不得以疲羸充數。一俟馬價平減。即照該省舊章辦理。此次抽撥官馬並著富明阿迅速購買歸補原額。以重邊防。將此由四百里各諭令知之。○又諭前因德英奏黑龍江調赴金順軍營馬隊

請飭撥整裝銀兩。當令戶部速議具奏。茲據奏稱。此項官兵需用整裝銀五千七百九十七兩二錢八分零。即在山東已巳年應徵地丁銀內照數撥給。著丁寶楨迅將前項銀兩解交奉天。由該省轉發黑龍江應用。其撥款未解到以前著都興阿清安。即於盛京部庫存項內先行如數籌墊。一面知照德英派員領回歸還。鋪商借款一俟撥款解到即行抵還。所有此次數借銀兩仍著該將軍於各該

官兵凱撤之日。在應領俸餉內按名扣還。以符舊制。將此由四百里各諭令知之。○又諭前因御史郭從矩等先後陳奏山西直隸有匪徒聚眾搶劫。並有二字會匪名目。疊經諭令曾國藩等飭屬嚴拏。業據曾國藩李鶴年將查辦情形覆奏。本日復據鄭敦謹奏稱。樂平鄉與直隸毗連。時有贊皇等縣民人來村乞食。村人呼為二子。又有匪類夜間乘便偷竊。遼平謂之二子直隸謂之黑髻。亦謂之黑

髻。棍強乞巧偷。在所不免等語。山西劫案疊出。並任令匪類沿村強索。強借其平日之捕務廢弛。已可概見。覽鄭敦謹覆奏各情。僅據屬員一稟塞責。並不實力查拏。似此粉飾養癰。必至釀成巨患。著鄭敦謹督飭所屬上緊緝拏。毋令匪徒涸跡。儻存五日京兆之見。貽誤地方。恐該署撫不能當此重咎也。至約期會哨。尤須實力奉行。著曾國藩鄭敦謹李鶴年懍遵前旨。妥議章程。認真籌辦。將此各諭

令知之。○庚辰諭內閣。劉典奏請將領獲糧價延不買補之署任知縣革職。監追一摺。陝西署洛川縣知縣州判周貴庠。於應行買補倉糧業已由營領價。延不採買。經劉典委員確查。復將報買小米價值浮開。列抵實屬膽玩。周貴庠著先行革職。監追。勒限一箇月。將應賠倉糧暨採買浮冒價值追繳。該員另有領銀一萬四千兩採買浮報糧價一併嚴追。儻逾限不完。卽著嚴叅治罪。洛川縣知縣王

浩領銀採買軍糧。並著查明有無浮冒情事。勒限完繳。如敢延宕。卽行嚴叅懲辦。尋奏查明周貴庠領銀買糧。恐礙民食。未卽採辦。遲延尚屬有因。惟那用倉糧支發募勇口食。並未先事稟明。殊屬不合。現將銀糧如數完繳。應請開復原官。仍交部議處。王浩查無浮冒情事。惟驛務廢弛。應請交部議處。從之。○又諭錦丕勒多爾濟奏請將擅戴花翎辦事枝梧。諉卸之員。交部嚴議一摺。郎中恆慶於上

年伊勒屯請獎管解馬匹出力人員案內所保四品頂帶花翎業經該部議駁乃該員並不遵照仍行擅戴花翎且於交辦事件枝梧諛卸實屬咎有應得道銜候選知府烏里雅蘇台承辦兵部事務郎中恆慶著交部嚴加議處飭回本旗聽候部議所遺員缺著該部另行揀員充補以重職守○諭軍機大臣等傳諭署安徽巡撫吳坤修安徽鳳颺道劉毓楠著吳坤修悉心察看如竟不能勝任卽行

據實叅奏前據吳坤修奏稱劉毓楠承辦宿州等處淤塞河道工程有蒙混草率情事並著該署撫仍遵前旨詳細查明從嚴叅辦不准稍涉徇隱○又諭劉崑奏援軍克復施秉蕩平各寨進規黃平新州遇伏失利現在固守鎮施兩城再籌進取一摺楚軍既克施秉復乘勝埽蕩白洗各苗寨乃因黃飄險要黃潤昌等分隊進攻逆首包大肚糾集悍黨數萬先伏山谷待我軍入險突起阻截以致黃

潤昌等血戰捐軀喪我良將披覽劉崑所奏各情昂勝悼惜現在席寶田等固守鎮施兩城雖大局尚無妨礙而逆賊猖獗至此敵愾同仇諒各營倍深忠憤卽著劉崑飭令席寶田激勵諸將力振軍威斷不可因一挫之後稍形頹喪必當設法規取將包大肚等首夥各匪悉數埽蕩以快人心其各營更換病卒及陣亡缺額各勇並著劉崑飭令迅速募足以資進剿將此由六百里諭令知之○以甘

肅防守省城出力予提督彭楚漢前布政使林之望等優敘賞總兵官雷震雲巴圖魯名號遊擊袁有光同知景春等花翎守備毛發祥等藍翎餘加銜升敘有差○以約束勇丁不嚴革湖南總兵官羅章才副將李作松都司鄧奇望職幫辦營務增生胡昌俞斥革均遣戍黑龍江並革都司黃益試唐得勝鄧奇鄉守備李振錫把總朱玉清職○子貴州黃飄寨陣亡按察使黃潤昌祭葬世職如巡撫

例諡忠壯道員鄧子垣祭葬世職如布政使例諡壯毅提督劉長槐祭葬世職加等諡果壯均交國史館立傳並於死事地方暨原籍建立專祠知府羅萱等十九員祭葬世職加等○予湖南故戶部尚書何澆漢人祀鄉賢祠從巡撫劉崐請也○

上以夏至祭

地於

方澤自是日始齋戒三日○辛巳諭內閣戶部

奏請樽節庫款緩發各項工程雜款等語現在部庫款項支絀除應放正項並緊要工程照常支放外其餘各項工程及一切雜款均著暫緩發給俟庫款充裕再由該部斟酌緩急奏明辦理諭軍機大臣等前因戶部奏請飭濱臨江海各省解錢籌銅疊經湖廣等省將錢文解存天津聽候撥用茲據該部奏稱庫款不敷周轉請停止天津練餉錢文無庸在京餉內劃抵仍將所撥銀兩解京等語

現在庫款支絀自應斟酌緩急妥籌辦理所有湖廣等省未經報解錢文即著照該部所議一律停止各該省應解八年分京餉著李鴻章馬新貽英桂瑞麟郭柏蔭劉崐劉坤一丁日昌李瀚章李福泰張兆棟文輝按照該部原撥數目批解銀兩其七年分欠解錢二十萬串並著李鴻章馬新貽丁日昌劉崐張兆棟各按以錢合銀數目趕籌銀兩委員解部不准藉詞遷延至各該省已解未到錢文

著崇厚於解到時認真驗收同上年已收錢文截清數目照舊存儲該大臣即將練餉局委員薪水等項歸併裁減咨部覈辦原摺均著鈔給閱看將此由五百里諭知李鴻章馬新貽英桂瑞麟郭柏蔭劉崐劉坤一丁日昌李瀚章李福泰崇厚並傳諭張兆棟文輝知之○又諭戶部奏援案請飭各省續撥京餉一摺據稱各省解款除截留抵撥不計外截至四月底止連已解未到併計僅止一百餘

萬兩而部庫實存無多每月放款甚鉅現復庫款支絀必須豫為籌備著照該部所請添撥山東地丁銀十萬兩河南地丁銀十萬兩驛站存賸銀六萬兩河浙鹽課鹽釐銀五萬兩福建釐捐銀五萬兩浙江茶課銀五萬兩兩淮鹽釐銀二十萬兩四川鹽釐銀五萬兩按糧津貼銀十萬兩九江關常洋兩稅銀二十萬兩贛關稅銀四萬兩共湊撥銀一百萬兩即著馬新貽英桂吳棠丁寶楨李鶴年下

寶第李瀚章劉坤一文輝督飭各該藩司等將續撥京餉趕緊設法籌措即原指款項無存亦應另行籌款源源報解以濟要需儻敢藉詞推諉即由該部指名嚴叅原摺均著鈔給閱看將此由五百里諭知馬新貽英桂吳棠丁寶楨李鶴年下寶第李瀚章劉坤一並傳諭文輝知之○追予江南江甯殉難前任廣西巡撫鄒鳴鶴祭葬世職加等諡壯節○旌表守正捐軀山東平度州民女李滿嫻○

士午諭軍機大臣等袁保恆奏糧餉需支絀請旨飭催一摺陝甘軍餉緊要前經戶部先後奏撥各省關新舊協撥銀八百一十萬兩茲據袁保恆奏稱各處應協餉銀屢經咨催或全未報解或解不足數現在實解到臺之餉不及一半且出款陸續加增至百餘萬兩皆刻不容緩而又不在左宗棠穆圖善劉典原請餉數之內無論如何騰挪萬難敷衍開單請飭迅解等語西陲糧餉奇絀兵丁困

苦情形不堪言狀亟應源源接濟方免譁潰之虞著李鴻章文煜馬新貽瑞麟英桂鄭敦謹劉坤一李瀚章郭柏蔭丁日昌卞寶第李鶴年丁寶楨劉崑李福泰張兆棟吳坤修文輝飭令各該藩司監督無論何款迅將新舊欠解之餉趕緊籌撥並著師曾崇禮按照單開欠解之數迅速設法籌解各該將軍督撫監督等務當力顧大局剋日派員解往以應急需不得稍有遲誤原單均著分別鈔給閱

看將此由五百里諭知李鴻章文煜馬新貽瑞麟英桂鄭敦謹劉坤一李瀚章郭柏蔭丁日昌卞寶第李鶴年丁寶楨劉崑李福泰並傳諭吳坤修張兆棟文輝師曾崇禮知之○又諭岑毓英奏賊匪襲踞澂江府城一摺澂江回匪上年業經投誠乃復勾結嵩尋逆匪由楊林繞越山路襲踞府城現在附省賊壘既未攻拔尋甸之賊又分竄長坡小偏橋等處館驛淩兮竹園各回寨復與澂江相聯勢

必勾合上竄省城愈形喫重岑毓英雖已令馬忠等扼守歸化等處但恐兵力單弱難資捍禦著該撫迅即督飭將士先將小偏橋等處股匪剋期掃蕩再行酌量情形分兵援勦尋甸踞匪既經傾巢竄出曲靖防務較鬆著劉嶽昭移緩就急即行帶兵進紮宜良遙為省城聲援俾糧道不至梗阻毋得株守一隅遷延不進致誤大局唐友耕所部川軍已抵大關著劉嶽昭岑毓英催令星速進行由東

川一帶相機援勦毋稍延緩將此由六百里各諭令知之○以雲南澂江府城被賊竄陷巡撫岑毓英下部議處署總兵官馬忠革職留任子陣亡遊擊崔萬象署知府同知楊保恒祭葬世職加等○癸未夏至祭

地於

方澤遣怡親王載敦恭代行禮

上以祈雨祭

社稷壇自是日始齋戒三日 甲申遣官祭

關帝廟諭軍機大臣等定安等奏官兵截勦河西股匪大獲勝仗並防該匪東竄各摺片回匪竄踞磴口分作兩股一乘船東下現泊纏金河口一竄近阿拉善旗烏蘭木頭另股於四月初間竄入杭錦旗屬經定安等派兵會同蒙兵截勦該逆拌命抵敵官兵從後抄襲賊勢不支一齊敗退追殺五六十里擒斬甚多著定安等仍咨會杜嘎爾分飭達爾濟扎那格爾第等督率所部隨時防勦務將

蕭海兩逆設法兜拏抗錦收匪殄滅淨盡其
纏金河口水路回匪與竄近烏蘭木頭陸路
回匪勢甚猖獗並著定安等迅飭成山烏爾
圖那遜分途進剿以防東竄磴口路通晉疆
若該匪自纏金東下黃河兩岸縣長數百里
防不勝防前諭金順由達拉節勒而西張曜
為金順後路接應著該署將軍卽率同張曜
趕緊拔隊由西山背進兵沿河截剿一面迅
將磴口攻復毋任該匪東擾張曜帶勇前進

古城一帶空虛著金順仍遵前旨知照宋慶
迅赴古城並相度情形與張曜暨達爾濟扎
那格爾第各營聯絡聲勢以壯軍威金順行
抵何處現在勦辦情形若何前奏渡河徑赴
達拉進勦達拉是否卽達拉忒旗該處距纏
金磴口遠近何如一面迅速具奏鄭敦謹亦
當飛飭防河員弁嚴密戒備杜賊伺隙竄擾
左宗棠何以日久未有奏報該逆歸併金積
堡後分踞磴口應如何撥兵截剿免賊東竄

又金順張曜宋慶陸續前進花靖一帶是否
有兵扼紮榆林劉厚基兵勇是否足敷分布
何以均未籌及著該大臣等統籌全局嚴飭
各路將弁迅圖勦辦並確探賊情隨時馳奏
將此由六百里各諭令知之○乙酉貴州巡
撫曾璧光奏提督張文德進規八寨獲勝得
旨著曾璧光咨商張文德統帶所部聯絡川
楚各軍節節掃蕩迅將八寨攻克毋稍延緩
○以四川鹽源擊退滇匪出力子總兵官劉

寶國以提督簡放賞副將文陞等花翎知縣
柳宗芳等藍翎餘加銜升敘有差 丙戌以
祈雨祭

大社

大稷遣恭親王奕訢恭代行禮○

上詣

大高殿祈雨壇行禮○諭內閣蘇鳳文奏遵查
藩司未能勝任據實覆奏等語藩司事務繁
多責任綦重茲既據該撫奏稱江忠濬人尚

明白。惟才具未優。精神亦難周到。不能措置裕如。廣西布政使江忠濬著開缺。來京另候簡用。廣西巡撫蘇鳳文奏軍務未竣。請緩陛見。得旨著俟太平稍鬆。即行來見。惟該撫前既奉有來京陛見之旨。現雖軍務喫緊。亦應請旨遵行。乃擅自奏緩。殊屬非是。著傳旨申飭。

實錄卷二百五十八

五

大清穆宗繼天開運受中居正保大定功聖智誠孝信敏恭寬毅皇帝實錄卷之二百五十八

大清穆宗繼天開運受中居正保大定功聖智誠孝信敏恭寬毅皇帝實錄卷之二百五十九

同治八年己巳五月丁亥諭軍機大臣等傳

諭步軍統領衙門五城御史御史王書瑞奏請飭嚴緝竊犯各摺片京師內外城設立官廳堆撥原以稽查奸宄若如該御史所奏匪徒白晝肆竊該地面官兵任意推諉廢弛怠玩實屬不成事體著步軍統領嚴飭各該弁兵於所管地面實力巡緝毋稍疏縱並著五城御史飭令司坊各官一體嚴緝以靖地方○以福建按察使康國器為廣西布政使山東鹽運使潘霽為福建按察使○戊子補鑄

廣東永安縣儒學條記。從兼署巡撫瑞麟請也。○己丑。諭軍機大臣等。景廉奏密陳關外軍務情形一摺。所稱回酋索煥漳遣人乞撫。多不可恃。各情。朝廷早已籌及。業經諭知文麟等妥慎辦理。仍著文麟、景廉懍遵前旨。會同成祿悉心籌辦。萬不可將就目前墮其奸計。關外情形孔棘。文麟、景廉所部止數千人。成祿現究行抵何處。著卽剋期出關。與文麟等聯絡聲勢。相機勦辦。如再藉詞遷延。是該

提督自干罪戾。景廉亦當迅赴哈密。會商防務。不得任意逗遛。至所稱肅州現已收復。能否將甘涼肅三屬應解肅軍之糧。移作出關。兵食。或提用正糧。或設法捐辦。多派車駝運送。並於安西玉門兩城內酌設糧臺。派員轉運各節。著左宗棠、穆圖善彼此熟商。應如何源源接濟。俾關外諸軍弗形困乏之處。卽行妥籌具奏。前有旨令左宗棠前赴涇州接受督篆。久未接該大臣奏報。諒已部署起程。刻

下陝省軍務已鬆。卽著遵奉前諭。率旅西行。將甘事妥籌辦理。以靖邊陲。將此由六百里各諭令知之。○庚寅。旌表守正捐軀河南上蔡縣民張聚城妻徐氏。唐縣民王玉安妻劉氏。○辛卯。以神靈顯佑。頒江蘇常熟縣

城隍廟扁額。曰琴河昭佑。昭文縣

城隍廟扁額。曰海虞保障。○諭軍機大臣等。

有人奏。四川總督吳棠荒謬貪污。物議沸騰。等語。據稱吳棠眷屬抵川時。需用夫轎甚多。

到任後。收受屬員規禮。不下十餘萬金。其餘賣缺賣差。甚至索及夷人。並因需索不遂。將提督胡中和駐防一軍撤散。而以所帶副將張祖雲另募之勇為邊防。名為節省。實則過之用。以調劑私人。又數月以來。雲南巡撫岑毓英差官入川。計七八次。每次必有餽遺。為數甚鉅。貪謬情形不一而足。案關大員婪贓。並邊防要務。亟應徹底根究。著李鴻章馳驛前往川省。按照原奏各款。秉公確查。據實具

奏該督與吳棠雖係同鄉不准稍有徇隱原片著摘鈔閱看將此由四百里密諭知之○又諭前因曾壁光奏請飭催各省協餉並添撥實款諭令戶部速議具奏茲據奏稱貴州每月協餉經戶部酌定每月四川五萬兩湖南二萬兩湖北二萬兩廣東一萬兩又於江蘇酌撥每月協黔餉銀一二萬兩或數千兩自同治六年十月至八年三月僅據各省解到銀十五萬兩請旨飭催等語黔省軍務正

當喫緊若餉需缺乏必至貽誤戎機著各該省督撫等查照戶部奏撥數目源源批解並著該督撫等將按年指撥協餉陸續籌撥仍由黔省委員赴各省守提該督撫等無論如何為難務當竭力籌措以濟要需江浙等省釐金業經撥給陝甘軍餉曾壁光所請於釐金較多省分添撥實銀之處著毋庸議將此由五百里諭知李鴻章馬新貽瑞麟吳棠丁日昌郭柏蔭劉崐李福泰曾壁光並傳諭張

兆棟知之○又諭定安等奏截勦竄匪獲勝並布置張曜等軍各摺片回逆由石觜子地方分股竄擾一由陸路攻撲烏蘭木頭經參領德昌等擊敗竄向西南烏爾圖那遜跟蹤追勦斃賊多名餘匪由上中灘渡河竄入杭錦旗仍由石觜子竄回邊內其水路賊匪擾至纏金河口亦經參領成山等擊沈賊船多隻匪眾舍舟登岸竄入鄂爾多斯旗境烏爾圖那遜所部已紮烏蘭木頭地方後套纏金

一帶現無賊蹤仍著定安等飭令達爾濟等探蹤進勦務絕根株毋令再行紛竄磴口地方緊要即著定安等會商金順派兵駐紮以資鎮撫該處醜類多係董志原散匪左宗棠劉典亦當撥隊挖勦不得以驅逐出境為了事也至靈州一帶均有大股回匪盤踞左宗棠自應督兵節節進勦尤當防其鉅走方可聚而殲旃定安等已調宋慶後隊移紮皇甫川截賊東竄而令張曜酌帶數營前往纏金

磴口其餘隊伍仍駐古城等處。杜賊北竄之路。布置均為周妥。僅有賊股竄近。即著分投堵截。力遏狂氛。仍隨時飭令該員等和衷共濟。以期聲勢聯絡。陝甘邊境多與晉疆毗連。鄭敦謹當會同定安隨時防範。毋令匪蹤闖入。將此由六百里各諭令知之。○又諭劉嶽昭奏進攻尋甸賊巢。並分兵宜良援救普安各情形一摺。前據岑毓英奏尋甸踞匪傾巢竄出。激江復被賊踞。省城情形喫重。當經諭

令劉嶽昭進紮宜良。遙為省城聲援。茲據奏稱該督所部各軍進規尋甸。勢難撤回。已派柳明德一軍拔赴宜良。並調全祖凱帶兵繼進。著劉嶽昭岑毓英飭令該員等實力堵擊。毋任激江之賊再行東竄。以保省城糧路。尋甸踞匪大股既經出竄。該處現在究竟有無賊匪。劉嶽昭所派各軍分紮馬龍王家莊等處。何以尚未進兵攻拔。該督所部各軍一隅株守日久無功。實屬不知振作。著即督飭各

營奮勉進剿。迅掃逆氛。並著催令川軍剋期前進。援應省垣。小偏橋等處賊巢。著岑毓英懍遵前旨。迅速進攻。力圖掃蕩。該督撫等均受朝廷厚恩。總當以國事為重。和衷商榷。共濟時艱。不得各懷成見。致誤大局。新城大股賊匪圍逼普安廳城。劉嶽昭已派劉官禮等帶兵馳援。著曾璧光迅即派兵前往。與滇軍會合夾擊。迅解城圍。劉嶽昭現在暫駐曲靖。著即酌度情形。何路喫緊。即行親往。何路督

勦。不可坐失事機。將此由六百里各諭令知之。○又諭現在雲南軍務緊急。省城圍尚未解。劉嶽昭一軍亟須由尋甸等處進攻。以資援救。惟該督所部楚軍向由川省接濟餉需。若不敷支。應難保無停兵待餉之虞。著吳棠將劉嶽昭所部楚軍及果後軍月餉。竭力籌措。源源報解。其從前所欠餉銀亦著一併按月搭解。協濟滇軍。即以保衛蜀境。毋得稍有遲誤。將此由五百里諭令知之。○又諭岑毓

英自簡任雲南巡撫後。觀其疊次奏報。似於滇省軍務。尚知認真辦理。惟省城圍尚未解。徵江近又失守。睽懷南服。焦念實深。茲聞上次楊林被陷。百姓死者數千。練頭李廷標。何秀林。敗回省城。該撫不責其罪。反各賞以四百金。以致人心不服。士卒離畔。此次徵江之變。亦因邵天貴帶練騷擾。回民銜恨。勾通逆酋馬周襲踞郡城。至省壩賊。該撫督隊攻擊。則兵刃齊奮。易以他將。則槍礮皆空。且有

練頭通賊。毀礮分賞。隨毀隨起情事。又聞該撫勒派民捐。至再至三。紳士從中漁利。任意把持。上下交征。百姓咨怨。雲南兵連禍結。歷有年所。練勇勦賊。原以輔兵力之不足。惟必須嚴明賞罰。方能令出惟行。不得任用桀驁之徒。貽誤大局。至滇餉孔亟。疊經諭令協餉。各省趕緊如數籌解。岑毓英惟當撙節動用。不得苛斂民間。致失人心。而騰謗讟。經此次訓飭後。該撫務當力圖振作。有則改之。無則

加勉。以期滇事日有轉機。不負委任。如辦理一無成效。惟事粉飾彌縫。則朝廷賞功罰罪。自有權衡。毋謂萬里外不能洞矚也。懍之慎之。將此由五百里諭令知之。○兩江總督馬新貽等奏。署布政使應寶時到任未及三月。請將上年大計仍展緩舉行。從之。○以雲南鶴麗鎮總兵官馬如龍為提督。○移江西上饒縣縣丞於銅塘山。廣豐縣縣丞於大東院。改為分防縣丞。從巡撫劉坤一請也。○以烏

蘭額爾濟招地方擊勒竄匪獲勝。賞佐領薩凌武花翎。護軍校索特諾木等藍翎。餘升敘有差。○壬辰。以記名提督宋國永為雲南鶴麗鎮總兵官。○追予江蘇揚州殉難監生鄧纘前暨道員鄧瀛繼妻李氏。子心蔚。分別旌卹如例。○追予江蘇各屬陣亡殉難縣丞費璜等紳民婦女三千六百六十一員名口分別旌卹如例。○甲午。

孝恭仁皇后忌辰。遣官祭

景陵○諭軍機大臣等吳坤修奏皖省霍邱縣境向稱匪藪該處與河南固始接壤近有積匪在交界處所潛藏時出滋事亟須掩捕等語匪徒嘯聚滋擾地方必當早絕根株免留後患吳坤修現已派令張得勝相機按捕惟皖豫兩省邊界毗連難免此拏彼竄巡查奸宄本係地方官專責著李鶴年英翰嚴飭所屬會同協緝務將該匪窩巢黨與嚴密按拏盡數殲除毋令一名漏網英翰未到任以前

吳坤修仍應隨時認真整頓不得稍涉疏懈將此諭知李鶴年英翰並傳諭吳坤修知之○追予安徽懷遠陣亡把總蔡長泰祭葬世職○追予安徽甯國合門殉難從九品梅銑暨家屬男婦九員名口分別旌卹如例○乙未諭內閣前因御史袁方城奏請整飭吏治當經諭令軍務肅清省分遇有獲案要犯仍照舊章詳由該管上司覆覈辦理以重人命茲據曾國藩奏直隸軍務雖已肅清而各匪

餘孽尚多兇悍性成最易煽動必應迅速嚴辦若令地方官於拏獲匪犯後仍照例勘轉不特使獷悍之徒久稽顯戮且羈禁解審萬一疏虞轉致兇犯漏網請仍照奏定章程辦理等語自係為除暴安良消患未萌起見著照所請嗣後直隸省拏獲烏匪土匪擾害鄉里橫行搶劫勒索貲財者以及騎馬持械倚強肆掠兇暴眾著者降擒游勇聚黨夥劫者仍照歷次奏定章程由地方官審訊明確稟

明督撫批飭該管府州親往覆訊後即行就地正法其臨時拒捕者格殺勿論以戢奸宄而儆兇頑一俟盜賊衰息即照舊章辦理至山東河南兩省與直隸壤地相連情形相近著各該撫一體照辦○諭軍機大臣等前因德英奏籌辦赴甘馬隊軍裝戰馬懇請速撥銀兩當交戶部速議具奏茲據奏稱此次黑龍江挑選馬隊前赴甘肅軍營應需整裝銀兩既據該署將軍援照成案暫向鋪商借墊

給發。自應速為撥給。擬卽在河南己巳年應徵地丁銀內。撥給銀一萬一千六百三十六兩七錢九分六釐。解交奉天省城。轉發黑龍江歸款等語。著李鶴年按照該部議撥數目。趕緊解赴奉天。並著都興阿等接到河南餉銀。卽行派員解往黑龍江交納。不得遲誤。德英於此項餉銀到時。卽著歸還前款。至前項覈借銀兩。並著俟凱撤時。卽在各官兵等應領俸餉內照數扣還。以符定制。將此各諭令知之。○直隸總督曾國藩奏籌議練軍事宜。請參用練勇之法。一。文法宜簡。一。事權宜專。一。情意宜洽。每哨仍以十人為隊。並另立馬隊營。不令雜於步隊之內。仍由部添撥月餉二萬兩。下部議從之。○丙申諭內閣。左宗棠奏官軍揆捕各匪淨盡。陝境肅清一摺。陝西官軍自埽平董志原回巢後。各路匪徒。仍復暗相勾結。肆行劫掠。經提督郭寶昌劉松山等。派兵揆捕。斬獲甚多。雲巖鎮巨逆袁大魁。

竄至保安縣屬之老巖窰。憑險結寨。經道員魏光燾提督劉端冕等率兵攻勦。殲斃逆首袁大魁及賊目多名。餘匪悉數埽除。各處匪類。亦經官兵揆捕淨盡。揄綏延廊各屬。一律肅清。勦辦尚為得手。惟陝西頻年疊遭兵燹。此時逆匪雖經勦淨。而游勇土匪。仍恐易滋。嘯聚。且各屬地方。賑撫窮黎。安插人眾。在在均關緊要。左宗棠現在振旅西征。所有陝省善後各事宜。劉典責無旁貸。卽著悉心籌畫。妥為經理。以期毋負委任。○又諭左宗棠奏遴員署理府州縣各缺。請勿拘成例一摺。甘肅慶陽一帶地方。甫經收復。辦理賑墾撫輯事宜。均關緊要。該督遴才委任。自係為地擇人。所有慶陽府知府各缺。著准其以升用直隸州知州翁健等署理。嗣後陝甘兩省委署各缺。著該督撫等斟酌情形。變通辦理。總期有益地方。毋得濫行委用。儻該員等於地方事務。未能措置裕如。著卽隨時撤參。毋稍遷

就○諭軍機大臣等。都興阿恩錫奏。遵旨會派委員。同禮部主事張元益。出邊敬謹查勘。並將張元益所遞圖說呈覽。一摺。奉天邊門外附近。

陵寢風水禁地。關繫緊要。業經該將軍等先後會派協領各員。同該主事馳抵沿邊各處。敬謹查勘。所有應行查禁之處。即著照該主事等所定界址標記。永遠封禁。其無業游民。搭蓋窩棚五處。開種零星地畝。並著該將軍等

知照該城守尉。出示曉諭。勒限三箇月。將該游民盡行驅逐。俾趕緊遷移。另謀生計。毋許潛匿。其靈陽鹼廠旺清三邊門外。著該將軍等迅飭該委員等。逐段細查。俟查畢。再行妥擬章程具奏。圖留中。將此各諭令知之。○又諭左宗棠奏。陝境肅清。馳赴涇州。及甘省窘迫情形。並遵旨覆陳各摺片。陝西土回各匪。疊經官軍勦辦。全境肅清。本日已明降諭旨宣示。其老巖窰出力員弁人等。著准其擇尤

彙案請獎。董幅詳等倡亂多年。現以窮威投誠。難保不心懷叵測。左宗棠赴甘在即。應如何妥為安插。毋滋事端之處。仍著悉心籌畫。交劉典妥為辦理。所陳劉松山等軍分路前進。馬德順等馬步各軍暫駐靈臺。以策應南北兩路。均合機宜。即著督飭諸軍。整旅邁征。迅圖掃蕩。該大臣抵涇州後。即祇受督篆任事。以一事權。陝西征兵盡出。金順現赴烏喇磴口等處。該大臣勢難兼顧。北路著即會同

定安金順。規度情形。飭令宋慶張曜兩軍合力堵剿。郭寶昌一軍。向與劉松山合力剿賊。均稱得力。現在應否會合劉松山軍截剿甯靈之賊。著左宗棠酌覈辦理。該大臣奏稱宋慶張曜郭寶昌三軍。各減營數。則餉足而軍愈精。所籌不為無見。其應否裁減之處。即著定安金順會商宋慶張曜妥籌辦法。其郭寶昌營勇。著左宗棠飭知該提督精為遴選。以收飽騰實效。所有該三營餉需。已諭知李鶴

年英翰吳坤修照舊按月批解甘餉現值奇絀未便多容客軍所奏亦係實情潘鼎新陳湜兩軍已分飭李鴻章等分別遣撤並令該員等於撤勇後各赴該大臣軍營聽候差遣至遊擊周欽輝等被殺一案仍著會同劉典確切查明按律懲辦該大臣入甘後務將軍事吏治悉心整頓以維大局邊外情形何似定安等務當懷遵前旨督飭德昌等分投追擊以靖邊氛將此由六百里各諭令知之○

又諭左宗棠奏陝甘餉絀請停止陳湜帶勇赴陝並河東鹽務解款積壓等語前因鄭敦謹奏已革臬司陳湜辦理河防尚知愧奮懇予免罪當經降旨暫免發遣飭令帶勇赴左宗棠軍營差遣委用茲覽左宗棠所奏陝甘餉項支絀自係實在情形陳湜所部勇丁卽著毋庸赴陝由鄭敦謹督飭該革員將欠餉清算籌給嚴飭陳湜自行帶領此項勇丁回湘酌留親勇數百名餘悉妥為遣撤俟撤勇

事竣仍飭赴左宗棠軍營差委效力贖罪該革員帶勇起程時著該署撫派委文武大員彈壓出境毋任滋事至經過之河南湖北各地方著李鴻章郭柏蔭李鶴年嚴密稽查儻沿途逗遛騷擾卽惟陳湜是問並著劉崐於該革員帶勇抵藉後嚴飭妥為安置毋任滋生事端左宗棠所稱河東鹽務庫款現存五十餘萬兩該道李慶翱於乙年始解甲綱遞年積壓鹺務廢弛以致甘餉涸絕並稱該道鄙詐成性惟解鑽營等語著鄭敦謹確切查明道庫現存及業經批解實數並該道有無劣蹟之處一併詳悉具奏毋稍徇隱將此由五百里各諭令知之○又諭山東布政使潘鼎新前經諭令帶勇赴陝隨同勦匪茲據左宗棠奏稱陝甘餉事窘迫各路兵勇過多勢難支持請將各軍分別裁撤等語潘鼎新所部勇丁卽著李鴻章丁寶楨英翰吳坤修傳知該藩司妥為遣散並著潘鼎新於兵勇遣

散後。仍前赴左宗棠軍營。聽候差遣。該藩司所撤之勇。籍隸安徽者多。遣撤後。並著英翰、吳坤修飭屬妥為安插。毋任滋生事端。將此由五百里諭知李鴻章、李寶楨、英翰並傳諭吳坤修知之。○又諭本日據左宗棠奏餉需支絀。擬將郭寶昌一軍。張曜、宋慶兩軍裁汰疲弱。酌留精壯。餉項照舊供支。為各該軍購糧轉運之費。所籌不為無見。已諭左宗棠暨定安、金順將郭寶昌等軍量加裁減。以資騰飽。各該軍月餉向由安徽、河南供支。此時無論裁減與否。著李鶴年、英翰、吳坤修督飭各該藩司。仍照原餉數目。按月撥解。毋任缺乏。一俟該大臣等酌定知照後。該撫等再按所定數目。盡力籌解。原片均著鈔給閱看。將此由五百里諭知李鶴年、英翰並傳諭吳坤修知之。○甘肅按察使張岳齡因病解職。以鞏秦階道崇福為按察使。○以捏報軍情。撤陝西總兵官劉厚基記名提督。奪勇號。降總兵。

官劉厚填為都司。○予陝西綏德傷亡總兵官喻先恕祭葬。世職加等。○予甘肅合水殉難知縣楊炳華祭葬。世職加等。○予甘肅鎮原陣亡外委田澤波祭葬。世職。○丁酉。以甘樹優霑。

上詣

大高殿行禮報謝。○遣恭親王奕訢詣

社稷壇。惇親王奕誼詣

天神壇。醇郡王奕譞詣

地祇壇。孚郡王奕譔詣

太歲壇。睿親王德長詣

關帝廟。鄭親王承志詣

城隍廟。惠郡王奕詳詣

時應宮。貝勒載治詣

昭顯廟。鎮國公奕詢詣

宣仁廟。鎮國公奕謨詣

凝和廟。禮親王世鐸詣

覺生寺。克勤郡王晉祺詣

黑龍潭。賽因諾顏扎薩克親王達爾瑪詣密雲縣。

白龍潭。定郡王溥煦詣清漪園。

龍神祠。豫親王本格詣靜明園。

龍神祠拈香。○諭軍機大臣等。定安等奏。勦賊續勝。磴口現無賊匪。金順奏。近日花定防勦情形。由榆林進規烏磴各一摺。回匪自竄入鄂爾多斯旗境。後復在上永和姜寨內盤踞。經烏爾圖那遜督率吉林黑龍江馬隊官

兵。力攻南門。賊匪抵死守禦。成山等由西北角攻入寨內。賊由南面奔逃。追至磴口地方。沿途擒斬甚多。其乘隙藏匿者。均按殺淨盡。並將河內渡船燒毀。現在磴口踞匪回竄邊內。包鎮迤西至磴口黃河北岸。已無賊蹤。勦辦尚為得手。此次出力官兵。著定安等擇尤彙案奏保。刻下賊匪雖遠遁邊內。大股尚踞靈州一帶。誠恐被勦情急。仍復鋌走草地。昨據左宗棠奏。督師入甘。派劉松山一軍。由西

北進。指定邊花馬池。截賊東趨之路。已令其會商定安金順。妥籌兼顧。並令酌度情形。飭郭寶昌與劉松山合軍。截勦甯靈之賊。該將軍等即可咨商辦理。烏爾圖那遜現撤隊於烏蘭木頭。是否足資控禦。仍著定安桂成。責令該副都統擇要嚴防。不可稍涉大意。並一面飭令會合達爾濟等。確探賊蹤。乘勝進勦。西路賊匪。蓄意竄擾花定。經富勒琿常福連番追擊。賊向西遁。常福帶隊回榆。惟花定距

靈州賊巢不遠。難保該逆不糾眾回犯。磴口現已無賊。劉松山業向花定前進。該署將軍應在何路扼勦。著卽酌量辦理。前據定安等奏稱。宋慶後隊。調紮皇甫川。張曜酌帶數營。前往纏金磴口。其餘隊伍。仍駐古城等處。此時磴口纏金無賊。該兩軍應於何處扼紮。聯絡金順馬步各隊。以資堵勦。並遙為包薩屏蔽之處。著定安等彼此妥商。嚴密布置。毋誤事機。將此由六百里各諭令知之。○又諭劉

典奏現擬回省。督同司道整理地方等語。陝省自董志原克復後。回逆西竄。境內漸就肅清。劉典自應回省。經理地方各事務。現在左宗棠統師入隴。陝省應辦各事。該署撫責無旁貸。所有安撫難民。開種荒田。一切善後事宜。均著劉典盡心籌畫。毋得稍有粉飾。延安一帶土匪如董幅詳等。雖已投誠。是否尚聽約束。老巖窰雖已克復。此外零星股匪。一時恐難淨盡。務當隨時勒辦。毋任日久變生。復

為民害。劉厚基等駐紮北山。所部勇丁。必當嚴禁滋擾。該處地瘠民貧。久經兵燹。必須廉謹之吏。實心任事。方能撫綏安集。著劉典督同藩司。慎選良吏。以安地方。回逆雖竄甘省。設左宗棠到甘後。奮力攻勦。難保不回竄陝疆。磴口等處踞匪。經定安等派兵進剿。據報竄入邊內。難免不乘虛東竄。該署撫俱當綢繆未雨。免致臨時周章。左宗棠派劉松山。魏光燾。黃鼎等軍。分路西征。其餘勇隊留存陝

境者。想尚不少。與甘毗連處所。何地可以扼要。是否均有得力兵將駐紮。均當早為籌及。並將如何嚴密布置之處。詳細奏聞。以慰廑繫。該署撫既回省中。仍應檄飭駐守三原文武員弁。嚴束營勇。以壯軍威。嗣後務當實事求是。虛衷集益。竭力整頓地方。毋負委任。將此由四百里諭令知之。○派工部左侍郎恩承敬謹勘估

泰陵方城後券門應修工程。○予陝西甯條梁

等處陣亡傷亡參將德貴。秀倫。巡檢李夢蘭。祭葬世職加等。德貴眷屬人等分別旌卹如例。○戊戌諭內閣。御史全善等奏據蘇州織造委員德林等呈稱。管解龍衣大貢。並緞匹庫官物。共一百十三箱。領有文批勘合。五月二十日到京。親至崇文門稅務衙門投驗。詎查驗後。輒將車輛扣留官店。迄今多日。仍不放行。屢次探詢。又稱須納稅銀五百兩。方可驗放。事關傳辦貢物。又被關押。不能速交。恐

有貽誤。懇請查明等語。奉旨傳辦要需。一經查驗。卽當迅速放行。何得無端關押。肆意勒索。實屬不成事體。著崇文門監督查明。立將扣留車輛。卽刻放行。一面確查需索銀兩。究係何人。奏明懲辦。○諭軍機大臣等。有人奏穆圖善狃於議撫。實誤聽首府舒之翰遊擊蕭兆元之言。去秋藩司林之望等探知賊目不和。齊向該署督懇請率眾進攻。而舒之翰百計阻撓。或言兵勇未齊。或言軍餉不足。並

暗中慫恿署督。面斥林之望為生事。檄斥總兵胡昌會。副將范銘為擅殺。以致眾軍憤恨。僉云蕭兆元係回匪頭目。暗中為賊耳目。舒之翰得受回匪重賂。故凡事為賊道地。不知是何肺腑。在首府任內。大開壽筵。廣受祝禮。各州縣紛紛餽送。多則千金。少亦數百。有不送者。伊則箠惑督臣。立卽撤參。請將舒之翰蕭兆元嚴行審辦等語。穆圖善辦理甘肅軍務。雖因餉絀兵單。不得已而權宜議撫。而舒

之翰等阻撓戰事。以致軍心解體。如果所參屬實。亟應嚴行懲辦。以儆官邪。著左宗棠按照原參舒之翰蕭兆元各情。嚴密訪查。據實奏。毋稍輕縱。將此由四百里諭令知之。○以浙江臨安勦平土匪。予副將吳清亮。知府張鑑。南議敘。○以廣東赤溪勦平客匪。予總兵官鄭紹忠。以提督簡放。○追予故南河河道總督楊以增諡端勤。○追予安徽當塗陣亡殉難從九品李大序等紳民婦女一千七

百八十一員名。口分別旌卹如例。○己亥。諭內閣。禮部奏遵議左宗棠等奏請補行陝甘鄉試一摺。陝甘鄉試。前因軍務久未舉行。現在陝西全境肅清。甘肅之涇慶各屬亦已安謐。著准其於本年特開一科。補行壬戌恩科及甲子正科鄉試。陝甘中額。向係合併取中。甘省軍務未竣。各屬士子。未能一律赴試。自應酌留中額。以昭平允。著照左宗棠等所議辦理。其恩詔廣額。亦著照禮部所議取中。○

以江南江甯布政使李宗義為山西巡撫○
庚子諭內閣刑部奏審明內庫直班官兵夥
盜銀兩按例加重定擬一摺此案已革護軍
德蘊等膽敢在東華門內銀庫糾夥偷盜庫
銀九千餘兩之多實屬目無法紀該犯德蘊
著照刑部所擬即行正法以昭炯戒其聽從
偷竊之穆騰額秀崑惠淋玉來松凌均著照
擬定為斬監候入於本朝審情實辦理所
有失察直班弁兵之前鋒統領護軍統領應
得處分著該部查取職名分別議處在逃之
已革護軍吉陞文通及羣聲明幅著步軍統
領衙門順天府五城一體嚴拏務獲歸案究
辦至拏獲此案人犯出力人員應得獎勵著
俟逃犯全行緝獲再由刑部於定案時聲明
請旨○又諭文麟景廉奏請將因循不力之
知縣撤任留營一摺甘肅敦煌縣知縣樊建
基經文麟等委辦後路糧運該員總以腳運
不便為詞致哈密各營口食不敷支放實屬

疲玩樊建基著先行撤任摘去翎頂仍留營
差委以觀後效其敦煌玉門等缺准其以裕
厚等暫行署理惟州縣調署係總督專責著
該大臣等仍遵前旨俟軍務稍鬆仍照舊章
辦理以符定制○兩江總督馬新貽等奏擊
散海阜一帶匪船仍飭該管營縣會緝首要
各犯得旨著即檄飭該員等督隊出洋勤加
按捕並會同營縣將首要各犯悉數殲擒毋
留餘孽○以廣東按察使梅啟照為江南江
甯布政使○予故前任熱河都統麒慶祭葬
諡莊敏

等遵照舊章報明崇文門稅務衙門放行毋許稍有留難。儻查有胥吏差役人等藉端勒索。卽著該監督從嚴懲辦。管解委員亦不得藉貢差為名夾帶私貨希圖偷漏以重稅課。

○諭軍機大臣等恩麟奏密陳抵藏查明大概情形等語。據稱諾們罕年近七旬不甚講求公事。著恩麟隨時留心察看。據實具奏。前歲廓爾喀貢使回藏頗露不遜情狀。該夷恭順已久。恩麟務當妥為駕馭。毋使別生枝節。

尤宜不動聲色嚴密防閑。披楞廓爾喀等國毗連藏地往來貿易日久相安。何以該夷等與唐古特不甚相洽。時存挾制之心。儻任其積不相能。致開邊釁於大局亦有關繫。著恩麟體察情形隨時於交涉事件妥為區畫。以期消患未萌。毋稍大意。該大臣整頓藏務如番官中有不妥協者卽與該諾們罕商量更換。儻另有別情著卽密為奏聞。毋稍徇隱。將此諭令知之。○又諭恩麟奏請飭催四川應

解藏餉一摺。西藏僻處邊陲地方瘠苦。四川每年額解藏餉六萬餘兩。連年積欠已至三十三萬餘兩之多。該處各塘兵丁甚為困苦。亟應力籌接濟。著吳棠於每年額解餉銀如數報解。毋稍短絀。其連年積欠之餉並著每年帶解三四萬兩以濟要需。將此由五百里諭令知之。○以蒙混報銷前任

昌陵禮部郎中桂薰下部嚴議。○壬寅以神靈顯佑。頒河南臨漳縣漳神廟扁額曰雙源匪

澤。○諭內閣前據御史范熙溥奏參湖北幕友徐翼夤緣招搖各款。諭令該省督撫查辦。茲據李鴻章查明具奏。此案候選知府徐翼在將軍巴揚阿署中辦理文案。雖無夤緣確據。惟既係幕友。卽不應干預外事。乃招致降人莫渴幅等投效將軍衙門。查拏教匪。莫渴幅等遇事騷擾。控案累累。皆徐翼引用匪人所致。該員訪聞河南教匪甚多。輒令莫渴幅等向至荊州。議欲誘入城中擒拏。不顧人心

驚惶實屬荒謬。惟念該員於拏獲教首劉漢忠案內尚屬在事出力者。從寬撤銷前次知府花翎保案。勒令回籍。不准在荊州逗遛。以示薄懲。千總莫渴幅前以誘擒劉漢忠保得官職。乃不知檢束。輒敢藉端滋擾情殊可惡。著卽斥革。提省審明被控各案。再行按律懲辦。荊州將軍巴揚阿保舉徐翼及飭拏教黨事屬因公。尚無迴護情事。著免其置議。惟查拏教匪並不由地方官解勘。徑行審訊殊屬非是。嗣後如訪有教匪潛匿者。知會督撫飭屬查拏解勘。毋庸由將軍審辦。以符體制。又諭前因山東布政使潘鼎新請假回籍省親。當經降旨給假三箇月。茲據李鴻章奏該員之母年屆七旬。病勢益增。懇請續假。並先行開缺等語。潘鼎新著准其開缺。再行賞假兩箇月。俟假滿後卽赴左宗棠軍營。以資差遣。諭軍機大臣等。穆圖善奏通籌全局。請飭催馬隊助剿。並請飭鮑超酌帶舊部來甘。

專顧南路各摺片。前調吉林黑龍江馬隊。據富明阿德英等先後陳奏。因存營兵數無多。各批派五百名。業已起程赴甘。穆圖善於此項馬隊到後。卽可斟酌軍情。派往助剿。以壯聲威。左宗棠現已派兵分道入隴。並帶親軍馳赴涇州。卽著迅速前進。恪遵歷次諭旨。接受督篆。籌辦一切。該大臣抵涇接篆後。距蘭州尚遠。省城防剿事宜。應如何嚴密布置之處。計早統籌全局。著卽迅速奏聞。磴口現無賊蹤。前諭金順會合張曜宋慶兩軍扼要堵截。劉松山一軍現向花定進發。著卽飭令迎頭截擊。毋令竄出邊外。甯夏回眾久經安撫。此次官兵追截竄匪。偏進甯靈。恐致懷疑。驚懼左宗棠務當派員剴切曉諭。彈壓撫綏。以免別生枝節。董志原踞匪竄併金積堡後。賊勢若何。著卽隨時具奏。南路河狄回匪負隅已久。穆圖善以秦州喫緊。暫時撤軍回顧。左宗棠接篆後。著卽酌量情形。權衡緩急。次第

勦辦穆圖善所請調鮑超帶兵赴甘專顧南路之處。著毋庸議。甘省回匪四處紛擾。兼以餉需缺乏。穆圖善尚能支持危局。力任其難。左宗棠與該將軍同辦一事。務當和衷共濟。隨時商辦。以副委任。將此由六百里各諭令知之。○以廣東鹽運使孫觀為按察使。○伯都訥副都統烏里布因病休致。以雙城堡總管雙福為伯都訥副都統。○予安徽等省軍營歷年陣亡傷亡把總劉士發等七十九員

祭葬世職加等。○癸卯。諭軍機大臣等。豐紳等奏陝匪竄入甯夏境內。城防喫緊。回匪撲犯定遠營各摺片。董志原回匪由磴口竄擾靈州中衛。自河南甯安等堡至甯夏南鄉及甯州同心堡預旺城等處數百里內。徧地皆賊。甯夏滿漢城防極形喫重。劉松山一軍現向花定進發。即著左宗棠檄飭劉松山迅速前進。馳赴甯郡。以資救援。如劉松山軍尚嫌單薄。著仍遵前旨。酌派郭寶昌帶隊合軍齊

進。以資厚集。前諭金順會合張曜宋慶兩軍扼要堵剿。現在能否統率所部馳援甯夏。即著該署將軍酌量辦理。甯夏回眾久經安撫。現在竄匪滋擾。難保不又被煽惑。別滋事端。著左宗棠懍遵昨日諭旨。酌度機宜。悉心籌辦。豐紳謙禧惟當就現有兵力。嚴密守禦。不可稍有疏虞。昨據穆圖善奏中衛戒嚴。已派黃金山帶勇二千馳往防守。能否再為添撥數營。協同援剿。著該署督妥為布置。回匪分

竄蒙旗撲犯定遠營城池。應如何抽撥勁旅星馳援應之處。著豐紳謙禧咨商左宗棠等相機調度。將此由六百里諭知左宗棠穆圖善金順豐紳並傳諭謙禧知之。○以通政使司副使劉有銘為太僕寺卿。○以山東按察使文彬為布政使。調江蘇按察使李元華為山東按察使。以江蘇蘇松太道應寶時為按察使。○以記名總兵官張其光為浙江衢州鎮總兵官。○撥山西火藥一萬斤。鉛丸一萬

五千斤火繩一萬五千丈解赴甘肅甯夏滿營備用○甲辰諭內閣御史王師曾奏軍務肅清省分丁憂留營各員請飭查明俱令補行守制並佐雜人員所得功牌概行繳銷不得冒稱加銜各摺片均著該部議奏尋奏丁憂人員應統令回籍守制佐雜人員概行繳銷功牌從之○諭軍機大臣等劉嶽昭奏官軍進剿尋匪大獲勝仗攻克要險並回目投誠各摺片雲南尋甸賊匪踞險為巢經總兵

全祖凱等督率將弁分路進攻大獲勝仗已將七星橋文筆山章格各隘全行攻克著劉嶽昭乘此得手之際仍嚴飭各該文武激勵將士迅拔州城毋再遲延其尋甸西南塘子集賢村等處二十餘寨均係為賊所脅塘子回目馬廣具呈投誠該匪旋撫旋變是其慣技此次自拔來歸意圖立功贖罪如果奮勉殺賊自可寬其既往予以自新至尋甸逆目馬添順嵩明逆目李芳沅等畏懼求撫是否

出於至誠著該督察看情形相機辦理毋墮奸計致貽後患尋甸現尚得手岑毓英務將省防嚴密布置並將各路進剿事宜與劉嶽昭會商迅殄賊氛唐友耕所部川軍計早由東川一帶南下著該督撫等催令星速前進與滇軍聯絡聲勢將省城東路賊匪節節掃蕩毋任蔓延尋甸接仗出力各員弁著暫行存記俟克復城池再行請獎其傷亡弁勇一併彙案請卹將此由六百里各諭令知之○

添鑄呼圖克圖扎薩克喇嘛印信頒給羅布藏青饒汪曲從駐藏大臣景紋請也○乙巳諭內閣前因吏治亟須講求疊經降旨令各直省督撫擇其循聲素著者臚列政蹟酌保數員送部引見候旨錄用嗣據各該督撫隨時奏保雖經量材拔擢特恐賢能之員尚未盡登薦剡仍著各直省督撫隨時留心察訪據實具奏候旨調取引見以備簡用其司道大員中如有體用兼備者亦著一併據實保

奏用備任使。儻有衰庸不職，並著隨時叅劾。以肅官方。該督撫等務當秉公舉劾，不得徇一己之愛憎，致舉錯未得其平。以副朝廷整飭吏治。康保小民之至意。將此通諭知之。

又諭岑毓英奏提督督戰受傷等語。雲南提督馬如龍前在小徧橋打仗受傷，尚未痊愈。復出城攻克羊神廟賊壘，乘勝進攻江右館。身中礮傷甚重，實屬異常奮勇。著由內府發去如意拔毒散四料，交岑毓英轉給該提督。祇領以資調理。

諭軍機大臣等：岑毓英奏官軍肅清省東賊壘，攻克楊林圍山等處各摺片。滇省東路賊匪盤踞於十里鋪等處。經岑毓英派令李維述等分路進攻。先將蕭家山賊柵焚燒，賊向省北馬村一帶狂奔。自十里鋪小徧橋至長坡六十餘里，賊壘一律掃蕩。其楊林圍山等處踞匪復經岑毓英等乘勝勦擊，斬馘甚多。楊林富民全境肅清。現已分兵進取，並規復澂江。卽著岑毓英激勵在

事將士奮力前進，將各路賊匪痛加勦洗，以靖賊氛。並著會同馬如龍將南門外餘匪迅圖殲滅，用固省垣。馬侍得一股該撫務飭楊國發等相機堵剿。毋任上竄，致滋延蔓。據稱署提督馬如龍中礮子傷甚重，覽奏深為廕繫。該提督平時打仗既能身先士卒，其籌畫省防事宜亦極周密。前已加恩將其補授雲南提督。本日並由內府發去如意拔毒散四料，以示體恤。岑毓英於接奉此旨後，卽將藥料齎交該提督祇領，仍屬令安心調理。俾得早日就痊。省城防守緊要，馬如龍現已受傷。岑毓英一人力難堵柱。昨據劉嶽昭奏進勦尋甸賊匪，攻克要隘，並回目均畏懼求撫。是尋甸一路卽可藏事。該督當審度情形，飭令全祖凱等帶兵攻勦。一面馳回省城，與岑毓英和衷商辦，以重根本。毋得藉詞遷延。是為至要。將此由六百里各諭令知之。

○予雲南十里鋪等處陣亡千總陳萬朝等祭葬世職。

加等○丁未正黃旗漢軍副都統溫德勒克西因病解職以記名副都統博崇武為正黃旗漢軍副都統○戊申諭內閣毛昶熙銜秀奏請將直隸派辦運務委員於此次漕務完竣後擇其尤為出力者先行請獎江浙及江北委員一併擇尤先獎等語天津運務完竣南北兩局出力各委員向由驗米大臣分別勞績酌擬獎敘咨由各該省督撫奏獎雖此次海運米數加增直隸委員疊為覈減差務

較繁江浙等省漕糧提前趕辦各該委員均尚奮勉惟照章咨獎已足以示鼓勵所有南北兩局尤為出力各員著毛昶熙銜秀仍查照向章酌擬獎敘分咨各該省督撫奏獎以符定制○以才不勝任浙江知府圖麟以同知降補○以浙江台州等處勒匪出力予總兵官張其光等加銜升敘有差○緩徵山西臨汾垣曲曲沃絳洪洞五縣被擾歉收地方民借倉穀○己酉

上詣

奉先殿

壽皇殿行禮○諭軍機大臣等前因福濟等奏土爾扈特汗布彥烏勒哲依圖因遊牧被擾懇請暫赴京城當差當經諭令理藩院議奏茲據該衙門奏稱該汗如暫行來京當差不日新疆平定由京回牧往返辛勞似不足以示體恤請飭福濟等暫為安插等語布彥烏勒哲依圖因回逆擾害不能回住遊牧因係實情惟左宗棠現已督兵入隴以次蕩平甘匪進定新疆各蒙古人等自可回牧有期該汗若復來京當差日後由京回牧長途跋涉往返徒勞轉非朝廷撫綏藩服之意即著福濟榮全錦丕勒多爾濟錫綸傳知該汗此時毋庸來京並於烏里雅蘇台所屬附近地方擇一妥善之區將該汗並隨帶官兵三十七員名暫行安插一俟新疆底定即令該汗就近回牧較為省便所有該汗應領俸銀仍著

由京城支領將此由四百里各諭令知之
又諭本日據翰林院侍讀學士馬恩溥奏條
陳滇省軍務事宜四條一摺雲南用兵日久
師老兵疲地方糜爛日甚亟應廣籌方略以
期日有起色該學士籍隸雲南情形較熟所
稱精選兵勇於川黔就近招募一二萬人
是否可行周達武之軍能否由永北進剿大理
滇餉轉運應否於瀘州或重慶設局辦理著
劉嶽昭岑毓英體察情形咨商四川總督妥

籌具奏至吏治與軍務相表裏地方得人則
民生樂業軍務亦可漸平滇省官常年來日
就廢弛著劉嶽昭岑毓英實心整頓其不能
稱職者隨時參劾如有勤勞素著與情愛戴
者亦即據實保奏原摺均著鈔給閱看將此
各諭令知之以正紅旗漢軍副都統環德
兼署鑲紅旗蒙古副都統庚戌子山東歷
城等處陣亡殉難官紳勇丁婦女一萬六千
九百五十四員名口分別旌卹如例辛亥

諭軍機大臣等丁寶楨奏曲阜

文廟各處要工現已估計興修惟木植油漆
顏料等物山東無從購覓現委監修委員候
補知府周垚開明應用實數帶領護照前赴
楚北漢口一帶採買著李鴻章馬新貽丁日
昌郭柏蔭劉銀李鶴年各飭所屬沿途各關
及稅釐卡局候該委員押解前項物料到境
時立即照數點驗放行免其納稅並按站妥
為護送將此各諭令知之又諭袁保恆奏

軍營欠餉過久請飭提銀撥濟一摺據稱左
宗棠現已入甘需餉甚迫各省協餉解到者
不及一半先儘採買轉運之用每營每月僅
給鹽菜銀數百兩從未發過月餉近則兼旬
無解到之餉並鹽菜亦難照發請飭山西河
東道迅將欠餉籌撥等語著鄭敦謹轉飭河
東道於借提未用之二十萬兩外加撥銀十
萬兩共三十萬兩剋期派員解赴陝西糧臺
交袁保恆轉發各營以固軍心將此由五百

里諭令知之。又諭崇實吳崇奏川軍援滇會克尋甸州城一摺。前據劉嶽昭奏官軍疊克要隘。尋甸逆匪畏懼求撫。惟回逆變詐多端。遽許就撫。恐墮詭計。仍飭在事員弁併力攻勦等語。此次崇實等所奏會克州城情形。係由回匪開門納款。是否畏懼軍威。真心悔罪。抑係暫圖免死。飢附飽颺。劉嶽昭務當督飭各營嚴密防範。不可消涉大意。一切撫綏事宜。著飭道員彭瑞毓等妥為籌辦。以期永久尋甸得手。則嵩明自當迎刃而解。省城亦可解圍。著岑毓英激勵將士。乘屢勝之威。與劉嶽昭暨川省援滇各軍聯絡聲勢。迅埽逆氛。以靖邊徼。崇實吳崇另片奏鮑超病已就痊。惟精力尚未復元。籲懇稍假休息等語。鮑超病體全愈。可為國家宣力。深慰廑念。伊現由省城回籍休息。諒一兩月後必可調理復元。著崇實吳崇傳知該提督即行來京。陛見將此由五百里各諭令知之。○又諭蘇鳳文

馮子材奏進兵越南勦賊疊勝一摺。逆匪吳亞終由越南回竄粵西邊境。經官軍擊退。遁歸巢穴。蘇鳳文馮子材分飭各師由太平歸順取道進勦。疊挫兇鋒。連破那排枯株淩淦大嶺等匪巢。收復村寨數十處。正當乘此聲勢。迅殄逆氛。著蘇鳳文等飭令謝繼貴等乘勝進兵。迅將通攜木馬等處賊寨一律蕩平。盡殲醜類。並隨時知照夷兵一體堵擊。免致該逆竄逃。蘇鳳文另摺奏進勦黔省苗匪老巢等語。貴州荔波九阡里苗匪時出侵擾粵邊。大為地方之患。現在孔憲隆等軍所向克捷。已攻破該匪卡寨多處。直逼九阡老巢。勦辦尚為得手。仍著蘇鳳文檄飭該員等迅拔九阡苗寨。埽穴擒渠。以靖邊圉。並偵探清江苗逆嚴加防範。毋令彼此勾結。是為至要。將此由五百里各諭令知之。○以四川官軍會克雲南尋甸州城。賞道員劉嶽曙巴圖魯名號。從九品蕭有愷等藍翎。餘加銜升敘有差。

子陣亡守備彭臨風祭葬世職加等○追予
三世殉難江西九江鎮總兵官馬濟美祖千
總立成父雲騎尉文雄戰功事蹟附入國史
館馬濟美列傳並予建祠○壬子派總理各
國事務衙門大臣兵部尚書董恂三口通商
大臣兵部左侍郎崇厚辦理奧斯馬加國換
約事宜○補鑄貴州興義府知府經歷儒學
興義縣知縣儒學貢豐開麻哈等州知州安
南龍里甕安修文貴定等縣知縣冊亨州同
大塘州判新城縣丞清鎮縣儒學各印信關
防條記從巡撫曾壁光請也○癸丑兩江總
督馬新貽等奏游勇劉建洪等勾結滋事拏
獲正法得旨著嚴拏在逃夥犯務獲究辦並
確查各營已撤勇丁悉數遣回本籍毋任逗
遛一面飭令地方官編查保甲以戢奸匪毋
得稍涉疏懈○以克復雲南尋甸州城復總
兵官李家福職賞總兵官劉立興楊志林參
將周起鳳安紹欽巴圖魯名號道員彭瑞毓

都司王文保等花翎知縣吳宗焯等藍翎餘
加銜升敘有差予陣亡副將沈可堂等祭葬
世職加等○追予江蘇金山陣亡訓導張璵
等祭葬世職○甲寅諭內閣兵部右侍郎伊
精阿年逾六旬步履維艱著無庸在弘德殿
行走遇有兵部引見並著免其帶領以體體
恤○諭軍機大臣等都察院奏工部員外郎
王夢熊遣抱以賊圍緊急等詞赴該衙門呈
訴據稱上年鹽茶廳匪徒張漬在靜甯威戎
等處攻掠堡寨嗣經收撫該匪潛歸威戎水
洛城老巢仍在靜甯等處焚殺抗拒官兵十
二月間賊眾三千餘人圍攻三河堡日久未
退亟望官兵援救等語左宗棠現已督師入
隴著即查明該處如有賊匪竄擾即行派兵
勦洗以靖地方原呈著鈔給閱看將此由四
百里諭令知之○直隸總督曾國藩奏請將
廣東瓊州鎮總兵官彭楚漢留於直隸差委
允之○調鑲白旗蒙古副都統福鈐為廣州

漢軍副都統歸化城副都統貴成為鑲白旗蒙古副都統貴成未到任前以頭等侍衛祥裕署理以黑龍江協領富勒琿為歸化城副都統以直隸疏防永定河漫溢總督曾國藩下部議處道員徐繼塘革職留任革代理同知通判王維清署縣丞從九品岳翰職仍留工效力予故前任河南歸德鎮總兵官朱南桂祭葬如提督例謚勤勇並予建祠○乙卯月食諭內閣御史譚鈞培奏貴州被

兵地方請飭查明蠲緩錢糧一摺貴州連年被賊擾害小民顛沛流離情殊可憫現在甫經收復地方元氣未復並前被賊擾各處均應量加體恤著該撫查明被擾輕重情形將各該州縣應徵錢糧分別奏請蠲緩以蘇民困諭軍機大臣等棍噶扎勒參奏籌辦開導叛民並給發索倫兵丁銀兩暨喇嘛困苦懇請撥給餉銀各摺片布倫托海叛民經明瑤等派人開導雖屢次詭詞乞撫而滋擾如

故哈薩克遊牧地方亦頗受其害自應認真勦辦惟棍噶扎勒參將新到索倫官兵與舊有各兵合成一營統帶起程前往額爾奇斯河立營開導叛賊是否妥協著福濟榮全錦丕勒多爾濟錫綸酌度情形熟商具奏並一面知照棍噶扎勒參聽候辦理叛賊有東竄科布多之信並著奎昌明瑤隨時偵探嚴密防範不可稍涉大意○蘇木喇嘛情形困苦從前援應塔城那墊軍物價銀自應籌款給還著福濟於解到新疆餉銀內陸續撥給以示體恤將此由六百里各諭令知之○派禮部尚書萬青藜右侍郎溫葆深恭修泰陵方城後恭門工程○以廣東海門營參將黃廷彪為瓊州鎮總兵官

大清穆宗繼天開運受中居正保大定功聖智
誠孝信敏恭寬毅皇帝實錄卷之二百六十一

聖祖皇帝御製詩書經史子集大全卷之六十六

聖祖皇帝御製詩書經史子集大全卷之六十六

聖祖皇帝御製詩書經史子集大全卷之六十六

聖祖皇帝御製詩書經史子集大全卷之六十六

聖祖皇帝御製詩書經史子集大全卷之六十六

教條

同治八年己巳六月丙辰

上

慈安皇太后

慈禧皇太后幸漱芳齋侍午膳○戊午諭軍機

大臣等劉典奏覆陳安撫難民開墾荒地暨

邊防布置情形一摺涇陽咸陽境內安插難

民六千餘人鄜州等處安插扈彰等股難民

經劉典派員經理散賑墾荒均臻安靜其董

幅詳等股人數更多亦皆志切營生不至復

聚為匪即著該署撫督飭委員實力奉行不

大清穆宗繼天開運受中居正保大定功聖智
誠孝信敏恭寬毅皇帝實錄卷之二百六十

卷之二百六十

卷之二百六十

得始勤終怠。至渭北招墾事宜。漸有規模。惟涇陽三原高陵地高土燥。非興修水利。不足以資灌溉。劉典擬將龍洞渠籌款開濬。務當妥為經畫。俾竟厥功。北山一帶地瘠民貧。現雖匪黨殄除。亟須豈弟宜民之吏。安輯撫綏。劉典所請因地擇人。暫弗拘以成例之處。著准其權宜辦理。陝省西北與甘境毗連。業經左宗棠分派各軍。扼要布置。甘省回匪。自不至有回竄之虞。該署撫尤當督飭陝軍聯絡

聲勢。隨時嚴密堵剿。以重邊防。將此由四百里諭令知之。○又諭劉崐奏截擊竄苗獲勝。力保鎮遠施秉兩城一摺。湖南援黔官兵。自黃飄失利後。苗匪張臭迷等。膽敢率黨四出。擾及巴冶冰溪巫包平下一帶。牽掣兵力。疊經官軍擊敗。猶復分股竄入龍脚坨等處。滋擾後路。大股竄踞豪米頭。計圖一逞。經席寶田督軍兩路齊進。先攻豪米賊巢。斃賊甚眾。乘勝逐北。敗賊奔竄回巢。道員戈鑑等亦於

遠口等處。斬馘賊匪無數。後路一律肅清。其分撲施秉鎮遠之賊。又經提督彭芝亮等相機防剿。疊挫兇鋒。蹋平草塘關田壩等處賊壘。軍聲頗振。正宜乘此聲威。激勵各營。探蹤進剿。惟士卒久勞。漸生疾病。廩念殊深。劉崐尤宜加意拊循。隨時策勵。以期早定黔疆。席寶田暫回沅州養病。著傳知該員安心調理。營中事務。仍著就近妥為照料。以資得力。將此由四百里諭令知之。○以廣東羅定東安。

西甯三州縣力保危城。永廣學額各二名。○予貴州黃飄寨陣亡提督榮維善祭葬。世職加等。諡忠壯。追贈三代。暨本身一品封典。於立功死事地方。暨原籍建立專祠。總兵官羅志宏等祭葬。世職加等。附祀榮維善專祠。○予貴州巴冶等處陣亡副將鄭時林等祭葬。世職加等。○己未諭內閣。御史李汝弼奏。請飭各部甄別屬員。並考覈勤惰。各摺片。各部司員賢否勤惰。例應由該堂官隨時認真考

覈近來分部人員較多其中勤慎當差熟悉部務者固不乏人而濫竽充數不諳公事者亦必不少著各該堂官破除情面認真考察如材難造就不得一概奏留以杜冒濫至京察之期尤宜分別優劣照章辦理不得有舉無効其俸滿截取之員亦當察其才具分別繁簡秉公保送並著各該衙門於候補人員隨時稽察庶使屬員有所勸懲咸知講求公事用副澄敘官方至意○諭軍機大臣等延

煦畢道遠奏訪聞積慣竊米人犯潛行回京請旨飭拏一摺金六一犯積年偷竊漕糧前經飭令步軍統領衙門查拏該犯聞風逃匿現復潛行回京著步軍統領衙門即派幹員密速查拏毋任漏網又據奏偷米匪徒多於日晡行竊黎明將賊米運入城內售賣等語並著該衙門嚴飭朝陽東便等門該班弁兵加意稽查毋稍疏懈原摺著鈔給閱看將此諭令知之○庚申以湖北當陽縣重修

關帝陵廟工竣頒扁額曰威震華夏○以神靈顯應加封福建福州府金柳二神為將軍諭內閣李鴻章奏甄別庸劣不職各員弁請分別降革另補一摺湖北荊州府知府榮光才具平庸難資整頓著開缺以同知選用光化縣知縣程端本心地樸厚聽訟久長鍾祥縣知縣張梓人尚謹慎措置未能裕如均著開缺留省遇有相當缺出酌量另補署南漳縣事即補知州趙晏清性情浮躁聲名平

常雲夢縣知縣王昌縱容差保辦案草率候補知州劉祖蔭小有才能品卑心險黃州衛守備汪琳勒索書差貪鄙狡詐均著即行革職漢川縣知縣德廉辦事顛預不洽輿情著開缺以州判儘先選用署竹山縣事即用知縣方連翼毫無振作該員係進士出身文理尚優著以教授選用以肅官方○補鑄浙江糧道庫大使條記從巡撫馬新貽請也○辛酉諭內閣醇郡王等奏武英殿不戒於火查

明大概情形各一摺。本月二十日夜間西華門內武英殿不戒於火。延燒至三十餘間。雖經該管各員會同步軍統領督率兵役趕緊撲滅。將西配殿及附近各處設法保護。究屬疏於覺察。所有管理武英殿事務。王惠郡王奕詳。明善均著交該衙門嚴加議處。該處司員著先行交部嚴加議處。仍聽候傳質。其是日直班之披甲人等於禁城近地並不小心看守。即著交慎刑司嚴行審訊。至該處

素日看守官役人等有無別項情弊。並著慎刑司一併審明究辦。尋吏部會同宗人府議上。孚郡王奕詳。明善均應降二級留任。准其抵銷員外郎延齡。副內管領景秀。郎中恩林。松琿均應降二級調用。再罰俸一年。不准抵銷從之。○調兵部尚書董恂為戶部尚書。工部尚書鄭敦謹為兵部尚書。未到任前。以禮部尚書萬青藜兼署。○以都察院左都御史毛昶熙為工部尚書。未到任前。以吏部尚書

單懋謙兼署。○以吏部左侍郎沈桂芬為都察院左都御史。轉吏部右侍郎。胡肇智為左侍郎。調戶部左侍郎龐鍾璐為吏部右侍郎。仍兼署兵部左侍郎。轉戶部右侍郎。潘祖蔭為左侍郎。管三庫事。以候補侍郎李鴻藻為戶部右侍郎。管錢法堂事。仍兼署禮部左侍郎。○以光祿寺卿阿昌阿為太常寺卿。○壬戌。以大學士朱鳳標為武英殿總裁官。以武英殿救火出力王大臣等暨文武官員得

旨嘉獎。賞加軍機章京增壽等九百二十四員各一級。並賞各營兵丁銀。○追予湖北黑沙洲陣亡知縣姚國振於奉天原籍建立專祠。按察司司獄李克慎附祀。○癸亥。遣官祭火神廟。○諭內閣。本月二十日夜間武英殿不戒於火。王大臣等督率員弁兵丁迅速撲滅。當將該王大臣等降旨嘉獎。章京司員等各加一級。兵丁賞給銀兩。以示鼓勵。乃本日據惇親王。御前大臣醇郡王。伯彥訥謨祜景

壽奕山肅親王華豐總管內務府大臣瑞常
存誠崇綸春佑尚書載齡左都御史靈桂侍
郎伊精阿恩承副都統熙拉布載良慶至總
兵榮祿達明阿率行具摺謝恩殊屬非是姑
念一時疏忽誤會諭旨均著加恩免其議處
所有御前大臣醇郡王等復行自請議處之
處著無庸議○又諭倭仁徐桐翁同龢奏請
勤修聖德以弭災變一摺方今陝甘雲貴軍
務未平各省民氣未復餉需支絀物力艱難

朝廷宵旰焦勞惟恐政事或有闕失茲者武
英殿忽被火災

上天示警正宜儆惕倍深潛消沴戾所有官廷
一切工程及應用物件除必不可緩及例應
備辦外其餘一概停止著各該衙門即遵諭
行至政事或有未當之處並著在廷臣工直
言無隱以備採擇用副遇災修省之意○又
諭吳坤修奏遵查鳳潁六泗道劉毓楠性情
輕躁不諳政體委查宿州河道復被委員蒙

蔽請開缺另簡等語劉毓楠著先行開缺仍
著該督撫查明該道辦理不善及委員余昌
宇多方蒙蔽之處一併據實嚴叅○諭軍機
大臣等穆圖善奏甘省北路賊情並收撫高
臺等處潰勇各等語據稱自中衛至靈州一
帶賊勢蔓延甘省南路各軍未能兼顧請飭
左宗棠金順派兵夾擊所奏自係為力顧東
北起見前據左宗棠奏檄飭劉松山軍向花
定前進截勦甯靈之賊當諭該大臣酌派郭

寶昌合軍齊進此時甘省北路賊蹤紛竄自
應乘其喘息未定之際痛加勦洗著左宗棠
飛飭劉松山等迅速進兵毋稍延緩金順現
在行抵何處並著仍遵前旨酌量情形統率
所部聯絡張曜宋慶兩軍扼要防勦使匪蹤
不得東竄藉為包薩屏蔽左宗棠計已行抵
涇州該處距蘭州尚遠現在北路賊勢固屬
喫緊而南路河狄之賊密邇省城亦須兼顧
刻下陝省邊境既經防軍分布當無後顧之

虞左宗棠接篆後自宜移軍前進或赴秦州一帶擇要駐紮以便居中調度該大臣鄭重進兵固是老成之見惟省垣重地關繫甘省全局左宗棠身任封圻責無旁貸總當力籌保衛儻或稍存大意致有疏虞必惟左宗棠是問穆圖善交卸督篆後卽著暫駐蘭州聽候諭旨其省城防守及河狄一帶防勦事宜仍當竭力籌辦不得以接統有人稍涉諉卸肅州鎮總兵黃金山傷疾舉發著賞假三箇

月回籍調理並免其開缺一俟病痊仍令迅速赴營以資得力高臺山丹潰勇穆圖善已派王仁和招集統帶著左宗棠穆圖善飭令認真訓練以資攻勦儻再不遵鈴束卽行從嚴懲辦所需糧餉並著隨時接濟穆圖善原片著鈔給左宗棠閱看其范銘所部勇丁因餉缺搶掠並著責令該員嚴行查辦妥為綏輯左宗棠既經入甘於甘省各軍應如何分撥糧餉及酌量調派之處著悉心籌畫奏明

辦理務使各軍協力同心不至各存意見方能所向有功穆圖善片奏接准兵部咨文據實覆陳等語敕天印一員著仍遵前旨俟軍務稍鬆解赴河南訊辦富勒琿已簡放歸化城副都統現在如可離營著金順知照該副都統卽赴新任暫緩來京陛見其所部兵丁著金順會同定安另行派員統帶將此由六百里各諭令知之○甲子署陝甘總督穆圖善奏秦州峽門等處有賊奔竄現飛飭提督梅開泰等相機夾擊得旨省南多完善之區著嚴飭該提督等分路夾擊務淨賊蹤毋徒以驅逐為能任其紛擾○乙丑以神靈顯應加湖南黔陽縣劉三將軍封號曰靈佑○諭內閣吳坤修奏請賞假回籍補行穿孝等語吳坤修前在軍營兩次丁憂均未能在籍終制自應俯如所請吳坤修著俟英翰到任後賞假百日回籍穿孝假滿後卽行來京陛見○又諭鄭敦謹奏特叅聲名惡劣公事廢

弛之州縣等官。請分別革職勒休降補一摺。山西沁州直隸州知州李採丹。鄙瑣嗜利。聲名甚劣。虞鄉縣知縣瑞徵。年少虛浮。性情貪鄙。聞喜縣知縣朱應杓。屯留縣知縣岑濟。嗜好太深。公事廢弛。試用知州邵承蕃。不知檢束。於署榆社縣任內。聲名平常。試用通判張應豫。操守不謹。於署五臺縣任內。不協輿情。候補知縣金文沂。狡猾鑽營。嗜好過重。均著卽行革職。候補知縣汪濤。年力就衰。難期振

作。著卽勒令休致。候補知縣姚景元。性情譎詐。專務取巧。著以府經歷縣丞降補。其前署平遙縣任內欠解之款。仍飭查明勒令完繳。毋任延宕。以上革職各員。並著各路統兵大臣。不得任其投營效勞。以為開復地步。○諭軍機大臣等。鄭敦謹奏。遣撤楚勇籌辦河防。暨張曜在蒙地擊賊獲勝。文麟奏。請飭催山西欠餉各摺。片。晉省沿河要隘。近接陝疆甘回現尚未平。河防仍須籌辦。鄭敦謹所陳河

保等處。責成總兵馬陞督防。興臨以下。責成總兵王巨孝督防。甯鄉石樓以下。永濟以上。責成署臬司李慶翱督防。卽著該署撫於李宗義抵任日。彼此籌商。務臻嚴密。陳湜所部楚勇。除酌留礮船水勇外。其餘勇丁。仍著飭令該革員迅帶起程。毋任在晉逗遛滋事。該省河防地段。縣長現在楚勇既撤。兵力尙單。自應添募可靠勇丁。分段填紮。李宗義抵晉後。著卽督同李慶翱妥籌辦理。總期兵歸實

用。餉不虛糜。該撫身荷厚恩。於該省吏治民生。及籌防籌餉各事宜。務當斟酌盡善。以副委任。山西協濟哈密餉銀欠解甚多。文麟現抵哈城。支發勇糧各件。需用浩繁。著鄭敦謹。李宗義。卽飭該藩司。迅將前項欠解哈密餉銀。無論何款。先行籌撥銀六萬兩。交文麟前派迎餉委員吉恆趙德鈺等。承領管解赴哈。毋得藉詞延誤。致誤急需。金順奏。請將典押部照之委員懲辦。並請飭山西巡撫檄屬查

抄等語。候選州同劉標。經金順派赴山西催餉。將帶往之部頒空白翎支等項執照率行典押。實屬膽大妄為。已將該員先行革職。交金順嚴加審辦矣。該員係前任山西長子縣劉世安之子。現寓居潞安府地方。難保無寄頓隱匿情事。著鄭敦謹。李宗義。迅飭該地方官密將劉世安寓所財物先行查封。備抵以重款項。將此由五百里各諭令知之。○又諭金順奏。現籌督兵渡河西進一摺。陝回大股

麇集甯屬黃河兩岸。西岸自石背山至中衛賊氛尤熾。該署將軍以所帶十數營合張曜所帶六營兵力尚單。未能徑由烏喇磴口直取石背山壓勦而南。著卽與定安妥商體察情形。酌撥隊伍西進。該署將軍趕緊籌備行糧。卽行督兵進發。毋稍緩延。富勒琿昨已簡放歸化城副都統。著金順仍遵前旨。如現在可以離營。卽知照前赴新任。暫緩來京陛見。所部兵丁由金順會同定安遴員統帶。另片

奏請將勸捐延不回營之州同劉標懲辦等語。劉標著卽革職。交金順嚴行審訊。按律定擬具奏。將此由六百里各諭令知之。○又諭文麟奏。接到回目投遞回文。及委員烏仁泰等稟函。現在籌辦情形。並據軍機大臣將回目妥得璘原文呈覽。詳加披閱。其情詞桀驁。尚非真心歸順。該回目探知大兵陸續出關。恐被勒窮。感先以官吏激變為詞。冀為他日卸罪地步。文麟既見及此。給與諭紙。令其調

集各城回目赴烏城曉諭。以安其心。所辦尚屬妥協。但此中操縱機宜。必當細心斟酌。文麟所給妥得璘諭稿。卽著鈔錄呈覽。成祿計已出關。著卽與文麟景廉往返籌商。不可稍涉歧異。致啟猜疑。該回目所請調赴烏城之甯夏等處各回目。其意不過欲探知口內虛實。轉恐互相勾結。甚非所宜。著文麟等諭以屢奉明旨。但分良莠不分漢回。良善者撫之。叛逆者勦之。別無投誠章程。口內各回目亦

不能令其出關。並著左宗棠、穆圖善曉諭口內受撫各回。目革面洗心。共安生業。毋得心存觀望。並即密飭各屬妥為防範。毋使與口外各回目勾結。致勘辦更形棘手。至委員烏仁泰等被該回目調赴烏城。已否送回。其情形若何。索煥璋本有投誠之語。現在有無動靜。著文麟等隨時密探奏聞。總之官吏激變。將來固當查明嚴辦。而各回目踞城變亂。亦豈能置之不問。僅能於大兵未到之先豫先

反正。尚可網開一面。以遂其效順之心。該大臣等俱能深知此意也。將此由六百里各諭令知之。○以古城察漢、渾爾、勒匪獲勝。提督張曜得旨嘉獎。並予優敘。○丙寅諭內閣。御史徐景軾奏。興利宜重農桑。及請力興教化。各摺片。農桑為衣食之原。最關緊要。惟小民耕種。未免勤惰不齊。是在地方官隨時督率。予以勸懲。著各省督撫責成。各該地方官認真考課。實力奉行。不得藉端滋擾。並著會

同各省學政。嚴飭州縣教職等官。訓迪士林。勸置義塾。以資觀感。○又諭。劉典奏。已革提督擅殺人命。酌覈定擬等語。已革記名提督劉效忠。因偷竊牲畜。細故輒將馬夫王麻子。原擅行殺斃。實屬殘暴。據該撫查明。王麻子原係從逆被擒。此次逞兇拒捕。罪本應死。劉效忠著照該撫所擬。照擅殺應死罪。人律杖一百。業經革職。照例免議。仍著押回山東原籍。交地方官嚴加管束。如再滋生事端。即著山

東巡撫據實奏。從嚴懲辦。○諭軍機大臣等。榮全奏。會立牌博。俄官意圖侵越。奎昌奏。建立牌博情形。各一摺。榮全、奎昌現與俄官分界。遵照紅綫條約。於博果蘇克壩塔斯啟勒山。分建界牌。鄂博兩處。未容俄官向內侵占。辦理尚為妥協。其由珠噶淖爾至沙賓達巴哈分界處。所原圖所載險阻難行。俄官輒欲由珠噶淖爾迤北數十里。唐努山之察布齊壩上。建立鄂博。由此直向西北。繞至沙賓

達巴哈按其地。址已將唐努烏梁海遊牧包去大半。該俄官藉詞欺蒙。意圖侵越。豈可遂其狡謀。榮全惟當按照條約。與之辯論。固不可過於決裂。致生事端。亦不得藉口從權。遷就了事。任令得步進步。貽誤事機。是在該大臣妥為籌辦。以副委任。奎昌現與俄官往立西邊牌博。亦著詳細履勘。照約辦理。將此由六百里各諭令知之。○又諭張廷岳等奏圖謝圖汗等部落。因哲布尊丹巴呼圖克圖圓

寂援案赴藏熬茶。請將銀兩解交戶部。俟達喇嘛到藏後。由駐藏大臣庫內發給等語。所有此項銀五萬兩。著張廷岳阿爾塔什達。即行派員解交戶部兌收。此時西藏庫款未必有餘。著崇實吳棠於川省應解京餉內提銀五萬兩。迅即派員解交恩麟收存。俟該達喇嘛羅布桑伊什等到藏時。即由恩麟如數給發。應用。將此由四百里各諭令知之。○補行同治七年大計。奉天卓異官一員。安徽卓異

官五員。罷輟官一員。才力不及官二員。老年官五員。分別議敘處分如例。○以烏里雅蘇台邊外建立界牌鄂博出力。賞佐領額爾德尼善等升銜花翎。○以約束兵弁不嚴。革陝西總兵官康登五職。○以互相稟託。甘肅軍營總兵官羅洪德通判張昭離革職訊辦。○丁卯盛京將軍都興阿六十生長賞。

御書福壽字。暨文綺珍玩。○戊辰。以神靈顯應。加江蘇常熟縣。

城隍神封號曰護國昭文縣

城隍神封號曰襄順。○諭軍機大臣等。丁寶楨奏鼎軍勇丁索餉滋事。請飭查拏懲辦一摺。藩司潘鼎新所部勇丁駐紮山東韓莊地方。因將次遣撤。索發欠餉。將該處鋪戶搶掠一空。迨經丁寶楨派員前往彈壓。始拔隊南赴宿遷。其不知法紀。實出情理之外。著丁寶楨即飭各屬嚴拏逃散勇丁。盡法處治。東省協撥該營餉項。本無帶欠。此次該撫又另撥

津貼銀二萬兩解赴鼎軍。則該軍更不能有所藉口。但恐該勇丁桀驁性成。在宿遷一帶仍復滋擾。著張之萬就近派委妥員前往彈壓。並著馬新貽趕緊添派文武大員會同督率。令其分起出境。毋許稍滋事端。該勇丁行抵皖境。卽著英翰、吳坤修傳知潘鼎新、安為遣散俾安生業。以免在皖復行生事。其起意搶掠鋪戶各勇丁。法所難宥。著李鴻章、英翰、吳坤修嚴飭藩司、潘鼎新及代統之總兵潘鼎立等。悉數查拏。解赴東省。交丁寶楨嚴行懲辦。不准稍涉寬縱。其不能約束之各將弁。並著李鴻章查明嚴叅。以申軍律。將此由五百里諭知李鴻章、馬新貽、張之萬、丁寶楨、英翰並傳諭吳坤修知之。○追予江南上元陣亡從九品汪雲上等祭葬世職。○旌表守正捐軀江蘇蕭縣民宗祥妻姬氏。○

上以孟秋時享

太廟。自是日始齋戒三日。○己巳諭軍機大臣

等。德英等奏遵旨舉行圍獵。請飭催資裝銀兩一摺。黑龍江舉行圍獵。應需官兵資裝等項銀一萬四千八百七十兩。業經部議在於河南實存清查提解銀兩內趕緊撥給。迄今尚未報解。現在節近秋令。亟應卽行籌備。以濟要需。著李鶴年卽將此項指撥銀兩照數趕緊派員迅速解赴盛京。由都興阿、額勒和布派員轉解黑龍江交收。均毋延誤。將此由四百里各諭令知之。○又諭庫克吉泰奏該

營月餉僅贖河東五千兩。不敷支發。目下需用甚鉅。無可挪移。前借陝西藩庫銀三千兩。又亟須歸還。昨准山西巡撫咨稱。以廣東浙江福建江蘇月協晉餉一萬兩。未據解到分毫。晉省無從籌解。是山西之不能協濟該營。由四省之不能協濟山西。擬於四省中酌量分潤。請飭廣東浙江兩省於協晉項下每月各分五千兩。徑解該營。以四箇月為止等語。著瑞麟、李福泰、李瀚章卽於協晉一萬兩項

下。每月各徑解庫克吉泰軍營五千兩俾抵
晉省欠款。俟解足四箇月後。仍照舊各解各
款。以免牽混。將此由五百里各諭令知之。○
又諭錫綸奏招撫變民未成。現在相機改辦
一摺。布倫托海變民。經錫綸派民人侯裕喜
等前往招撫。攜帶變民一名。行至烏隴古河
邊。被哈薩克將其衣物搶劫。其隨後遣來之
賊目錫吉爾渾。又為哈薩克所誣。由呼圖克
圖暫行鎖禁。是該變民與哈薩克彼此攘奪。
尚無轉機。張舉等怙惡未悛。此次所遞呈詞。
又無悔罪輸誠之意。錫綸現擬相機辦理。並
與棍噶扎勒參聯絡聲勢。以杜釁端。自係正
辦。著卽會同福濟悉心籌商。相機而行。不必
豫存成見。文碩不久抵任。亦當與福濟、錫綸
和衷商榷。毋誤事機。前據棍噶扎勒參奏請
帶兵前往額爾奇斯河開導叛賊。當諭福濟
等知照。該呼圖克圖聽候辦理。此事是否妥
協。仍著該將軍等統籌全局。熟商具奏。萬不

可遷就目前。致貽後患。將此由五百里各諭
令知之。○又諭恩麟奏籌辦三巖野番並廓
夷情形一摺。三巖野番屢次出巢搶劫。大道
幾至不通。景紋僅以紙上空言搪塞。屬吏其
不達事理。甚可痛恨。恩麟既知景紋之謬。派
員勦捕。卽著實力籌辦。以期綏靖邊疆。廓爾
喀與唐古特既有猜嫌。又因未遂其入貢之
計。與唐古特書信語多挾制。亟應設法解釋。
毋任別啟釁端。恩麟已派員前往撫諭。並擬
俟德泰到後。借巡閱後藏之便。前赴廓番交
界。親自禁約。所辦甚是。但該大臣務當不露
聲色。於開誠布公之中。仍不失統馭外夷之
意。方為得體。並著於巡閱後。將詳細情形確
探具奏。以慰廑繫。將此由五百里諭令知之。
○以驗收海運漕糧完竣。予工部尚書毛昶
熙、倉場侍郎行秀、優敘。郎中玉珩、道員周家
勳等獎敘有差。○以玩誤不職。革廣東知縣
余斌、劉駒職。○追予浙江餘姚陣亡義民王

月。和把總銜賞卹如例。○庚午

上以孟秋時享

太廟前期親詣行禮。○諭軍機大臣等。理藩院奏據阿拉善扎薩克親王貢桑珠爾默特呈稱。逆回擾害旗境。請發兵救援等語。陝西董志原回匪竄至中衛。分股三路直撲阿拉善旗境。之定遠營貢桑珠爾默特派兵迎敵。傷亡兵丁百餘名。長史疊立各爾大賴等陣亡。該逆率黨七八千圍困定遠營城。並將城外

寺院房屋焚燒。搶掠街市。貢桑珠爾默特祖塋及西園府第亦被焚毀。西路臺站不通。逆回尚盤踞該旗南界。阿拉善旗蒙兵無多。不敷防守。待援甚迫。亟須撥兵前往迅殄逆氛。左宗棠已派各軍分道入甘。穆圖善現在蘭垣。金順由烏喇西進。靈甯一帶匪眾猖獗。蒙古被其蹂躪。應如何籌撥勁旅迅速救援。著該大臣等妥籌策顧。杜噶爾熟悉甯夏回情。該副都統等是否尚在托城。如可移兵西向。

卽著統帶所部馳赴阿拉善一帶協剿。或就

近另撥得力隊伍前往救應。均著定安、金順斟酌情形妥為籌辦。至貢桑珠爾默特守城擊賊甚為出力。乃祖塋府第均毀於賊。旗屬大遭擾害。朝廷實深廕念。著理藩院傳知該親王將該旗被擾地方加意撫恤。不日大兵厚集。卽可痛加勦洗。掃蕩妖氛。該旗歷次籌墊臺費銀五萬餘兩。卽著戶部由附近省分迅速指款撥還。原摺均著鈔給閱看。將此由

六百里諭知左宗棠、穆圖善定安、金順並諭令理藩院知之。○旌表守正捐軀浙江義烏縣民婦盧王氏。

大清穆宗繼天開運受中居正保大定功聖智
誠孝信敏恭寬毅皇帝實錄卷之二百六十一

臣等謹將

奏

大清穆宗繼天開運受中居正保大定功聖智
誠孝信敏恭寬毅皇帝實錄卷之二百六十二

致珍

同治八年己巳秋七月辛未朔日食○享

太廟遣醇郡王奕譞恭代行禮

上詣綏履殿問

慈安皇太后安平安室問

慈禧皇太后安至己亥皆如之○諭軍機大臣

等總理各國事務衙門奏洋人在臺灣違禁

滋事現籌辦理情形一摺洋人美利士等在

臺灣大南澳地方伐木墾荒私販軍火交通

生番實屬違禁妄為業經該衙門照會英布

兩國使臣由中國自行拏辦並知照該督撫

酌覈辦理。此事英國使臣自知理屈。已據照覆。飭將英人名康撤回。而布國使臣則請將美利士暫行停辦。顯有袒護之意。此時該洋人等曾否撤回。抑仍在該處招募工作。如果不遵條約。任性妄為。自應由該督撫查拏懲辦。惟事關中外交涉。必須有明幹大員隨時斟酌辦理。方臻妥協。臺灣道一缺。關係緊要。未便久懸。著英桂下寶第迅速揀員奏補。或先擇人署理。責成將洋人交涉事件。察看情形。妥慎籌辦。總期不激不隨。毋稍偏倚。原摺著鈔給閱看。將此由四百里各諭令知之。○又諭棍噶扎勒參奏叛民中變。勢難開導。一摺。據稱叛民近躡哈薩克遊牧。與俄羅斯守卡之兵接仗。傷有一二十人。並與布倫托海大臣偽篆印文一件。不知內係何詞等語。該叛民兇心未改。復與俄夷生事。傷其守卡兵丁。恐開邊釁。福濟文碩錫綸。惟當懍遵前旨。相機妥籌辦法。毋稍大意。棍噶扎勒參以該

叛民言詞狂妄。未能開導。現在紮營克林河。分其再竄之勢。未敢擅行進剿。著福濟等體察情形。知照該呼圖克圖遵辦。其偽篆印文。是否即係前此所遞呈詞。並著文碩錫綸查明具奏。棍噶扎勒參另片奏。叛民與俄兵接仗。各情據逃出民人阿勒太聲稱。在內目覩。此事既屬確實。福濟等不得遷就因循。致生枝節。原摺片均著鈔給閱看。將此由五百里各諭令知之。○壬申。諭軍機大臣等。英桂下

寶第奏請簡臺灣道員缺。並請以楊在元試署臺灣鎮總兵各摺片。本日已降旨令黎兆棠署臺灣道員缺。並批令楊在元試署臺灣鎮兵。臺灣孤懸海外。五方雜處。人心浮動。當此多事之秋。必其人才識足以獨當一面。而又能實心整頓者。方能有益地方。著英桂下寶第於該鎮道到任後。留心察看。如措置未能合宜。即行奏明撤回。斷不可因保奏在前。稍涉迴護。儻該督等有心徇隱。致誤地方。必

惟英桂等是問。將此由四百里各諭令知之。
○又諭文煜等奏洋務日繁。請調員來閩差遣。英桂奏請飭江蘇撥還閩硝各摺片。閩省福州口洋務日繁。必須添員辦理。方臻妥協。前福州府知府丁嘉瑋。福建儘先補用參將王榮和。既據該將軍等奏稱該員等熟悉洋情。自應俯如所請。丁嘉瑋籍隸順天府大興縣。著萬青藜、王榕吉飭令該員迅速赴閩。王榮和一員。前經丁日昌調赴江蘇。業由英桂檄調。仍著丁日昌卽飭該參將剋日前往。以資差遣。英桂奏閩省需用硝斤。向在山東採辦。咸豐七年間。委員韋濂等在東省運辦硝斤。行過江蘇。先經喬松年截留五萬斤。又經王有齡前後截留十萬斤。共計十五萬斤。至今尚未撥解還閩。現在閩省各營操練兵丁。趕製火藥。需硝甚鉅。著丁日昌按照前次截留數目。趕緊撥還。派員押運赴閩兌收。以濟要需。將此諭知萬青藜、王榕吉。並由四百里

諭令丁日昌知之。○癸酉。諭內閣御史宋邦德奏請飭各省籌補常平倉穀等語。常平倉為積儲良策。自軍興以來。各省倉穀率多空虛。亟應及早籌補。以備荒歉。著各直省督撫督飭該管道府按屬查報。應如何籌款分年買補。並嚴杜州縣侵挪之處。卽行妥籌辦理。○又諭吳坤修奏各屬被水災黎。先行籌款撫恤等語。安徽懷甯等十六州縣。本年夏間雨水過多。江潮泛漲。漂沒田廬。小民困苦。顛連殊堪矜憫。現經該署撫籌銀三萬兩。分交安廬徽甯兩道督屬分別撫恤。卽著飭令該管各地方官躬親督率。妥為經理。毋任吏胥侵蝕。並著該署撫親赴沿江各屬實力稽查。以杜弊端。目下節屆秋令。該地方農田能否補種。仍著察看情形。隨時具奏。○諭軍機大臣等。前據丁寶楨奏。鼎軍在韓莊地方搶掠。當經諭令丁寶楨嚴拏懲辦。一面督飭出境。並諭馬新貽等添派文武彈壓回皖。茲據張

之萬奏稱該軍已抵宿遷。檄飭姚廣武等帶兵前往彈壓。並分飭各軍嚴防滋擾。卽著張之萬傳旨。令其分起回皖。並飭徐海道高梯迅給餉銀。免致藉口。馬新貽所派員弁。計可趕到。並著會同彈壓。俾遵約束。安徽現患水災。各處土匪游勇。本不安靜。而遣撤各軍踵至此輩。無所營生。深恐為害地方。著李鴻章英翰吳坤修。仍遵前旨。飭令潘鼎新妥為安置。固不可操之太蹙。亦不可任其橫行。英翰等責任地方。尤當悉心籌商。務臻妥協。毋任滋生事端。前據劉典奏。已革提督劉效忠因牲畜細故。砍斃馬夫王麻子。因降旨令解回山東原籍。交地方官嚴加管束。第恐該革員素性暴戾。與鄉里未能和協。復萌故態。著丁寶楨於劉效忠解到時。隨時留心。如仍不安分。卽著設法辦理。毋稍姑息。劉典片著鈔給丁寶楨閱看。將此由五百里諭知李鴻章馬新貽張之萬。丁寶楨英翰。並傳諭吳坤修知。

之○又諭定安桂成奏。回股復犯草地。官軍截勦獲勝。並請撥兵駐紮甯夏平羅一帶。各摺片。阿拉善旗之定遠營。被回逆圍困甚急。張曜會同烏爾圖那遜帶兵往援。由蘭扇至察漢淖爾地方。遇賊接仗。擊斃悍賊甚多。紅柳樹一帶伏賊。亦經官軍擊敗。其塔爾貝都貢地方回股。復為烏爾圖那遜所部衝散。該逆等仍由舊路連夜西遁。此次逆回糾合東竄。疊經官兵擊敗。勦辦尚為得手。卽著該將軍等。迅飭張曜各軍。乘此聲威。覘賊所向。會合勦除。以期痛殲醜類。所有在事出力將弁兵勇。著准其擇尤彙案請獎。現在蒙漢各民避居北山。該處直達包薩。難保該逆不因邊內乏糧。復行窺伺。金順一軍。前擬由烏喇西進。該軍現已渡黃。暫紮什巴爾台。著仍遵疊次諭旨。酌度情形。與張曜等聯絡聲勢。分投堵剿。定安等以左宗棠大軍進勦靈州賊匪。若鋌走草地。張曜等追勦較遠。請飭金順駐

軍於甯夏平羅一帶或由左宗棠另撥一軍聯絡扼紮遏賊東竄北竄之路所籌不為無見金順追賊正緊所部亦不甚厚應否駐軍甯夏平羅著會同定安等悉心商榷以免顧此失彼如金順實難兼顧卽著左宗棠另撥一軍往彼駐紮肅清餘匪卽可專意西征該大臣不得以無軍可撥致賊遂其乘虛之計牽掣我師刻下陝甘各回未必不意圖勾結穆圖善務當督飭將士將河狄各匪痛加剿洗以斷賊援並隨時與左宗棠金順等彼此熟商俾諸軍聲息相通迅殄羣醜杜噍爾當勒琿等現抵何處仍著定安等隨時知照該副都統等會合追剿用壯聲威將此由六百里各諭令知之○以故喀喇沁扎薩克頭等塔布囊德勒格爾子阿玉爾扎那襲職○甲戌諭軍機大臣等曾國藩奏永定河漫口未能合龍等語永定河北四下汎漫口經道員徐繼瑭堵築本已定期合龍因雨大溜急不

能搶辦固係實在情形惟口門本不甚寬引河大壩均尚如故仍當隨時酌度情形妥籌辦法著曾國藩飭令該道認真經理一遇水勢稍殺卽當趕緊堵合毋任泛濫為災至全河受病日深宣洩不暢隄埝單薄他處易有決溢之虞曾國藩旣慮及此將來合龍後自應將中洪下口挑挖疏濬以資補救毋得稍涉大意將此諭令知之○又諭劉嶽昭奏分兵赴省會剿並援救普安廳城岑毓英奏收復嵩明州城及各路軍務得手情形暨軍功李鳳祥等勦賊出力各摺片滇省賊匪急則求撫緩則悖叛已成慣技岑毓英於此次收復嵩明州城後將詐降逆首李芳園卽行殲除並將匪黨晏洪等悉予誅戮辦理尚合機宜此時祿豐羅次之軍次第得手白鹽井又經攻克聲威已壯卽著岑毓英督飭各軍乘勝進剿迅速攻取祿豐安甯易門昆陽等處以期速解省圍所有收復嵩明州城及攻克

白鹽井等處出力員弁著准其俟省圍解後
彙案奏請獎勵軍功李鳳祥劉光煥李珍國
等於迤西各城全失之際乃能固守巖阿現
又攻克龍陵廳實屬深明大義著岑毓英查
明奏請優獎劉嶽昭現派總兵李家福等各
率所部由曲靖赴省即著飭令趕緊前進知
照省垣各軍兩面夾擊迅奏肅清至貴州普
安城近接滇疆現在苗匪巖大五一股圍撲
廳城該督派兵援救並飭知州文鴻盛嚴扼
滇防杜其竄越東路自可無虞著於布置稍
定即赴省城與岑毓英和衷共濟會籌全局
早靖巖疆將此由六百里各諭令知之○以
貴州大定等處攻克苗巢出力賞道員沈壽
榕一品封典總兵官楊正高劉節高副將王
維金都司吳奇忠巴圖魯名號同知陳席珍
都司劉奇義等花翎知縣楊作霖等藍翎餘
加銜升敘有差○予雲南尋甸陣亡遊擊馬
祥麟等祭葬世職加等○旌表守正捐軀安

徽太和縣民女李討姐民婦張段氏○乙亥
諭內閣溥楫等奏知縣拖延欠餉請飭查叅
一摺直隸豐潤縣應解

孝陵

孝東陵禮部內務府本年春夏二季餉銀米折
及上年夏季八旗兵餉屢經溥楫等行催守
提該縣知縣彭載恩任意延宕實屬玩誤著
直隸總督飭令藩司查明該縣應解餉銀是
否已領未解抑或具領遲延即行據實嚴叅
尋曾國藩奏遵查豐潤縣應解禮部內務府
俸餉等銀具領後值夏雨時行道路泥淖致
稽時日應解八旗餉銀實因司庫支絀撥給
稍遲均非無故延宕請免叅辦從之○又諭
前據左宗棠奏河東鹽務廢弛解款積壓並
河東道李慶翱鄙詐成性惟解鑽營等情當
經諭令鄭敦謹查明具奏茲據奏稱河東鹽
課向係陸續徵收必至次年奏銷時始能全
完故歷屆撥解甘餉均在次年奏銷後解清

並非李慶翱任內有意積壓。道庫存款五十萬餘兩。雖與左宗棠原奏相符。然已借動一半。且有勻撥京餉等款。實存並無此數。是以甘餉未能立即解清。至鹽引積滯。則因襄樊以北。淮鹽侵占。並陝豫引地銷售不暢之故。李慶翱居官勤慎。現署臬篆。於公事均能講求。實無夸詐習氣等語。署山西按察使河東道李慶翱。既據鄭敦謹查明。並無廢弛鑽營情事。著無庸議。○陝西巡撫劉典奏請調

安徽道員易潤。壇赴營差委。允之。○以驗收海運漕糧完竣。予倉場侍郎延煦。畢道遠。議敘。員外郎廷彥等。加銜升敘有差。○以行止卑污。革山東知縣楊鐸職。永不敘用。○緩徵山西吉州被擾歉收地方民借倉穀。○丙子諭軍機大臣等。福濟錦丕勒多爾濟奏。西兩盟願領厄魯特人眾一摺。厄魯特人眾除察哈爾哈薩古特兩蘇木擇地安插外。所賸六千有餘。尚無分安之處。經福濟等劄調扎薩

克圖汗賽因諾顏諸盟長赴烏面議。該王公等現已遞呈願領擬將所賸人數平分五起。以一起留杜爾伯特。其四起按計各佐領均分。辦理甚屬妥協。即著福濟等傳知各該王公等。於該人眾到旗後。妥為約束。使之日久相安。惟該人眾分赴各旗沿途未免擁擠。著文碩錫綸先將應分三千餘人。按照杜爾伯特及扎薩克圖汗賽因諾顏佐領多寡均攤勻散。造具名冊。交該管官帶領陸續起程。俾

臻安速。並豫將所賸一半名冊編齊。俟庫倫咨到時。再行分遣。庫倫之東兩盟所領人數無幾。且見西兩盟如此辦理。諒亦不以為難。張廷岳等務須勸諭得宜。迅咨文碩等將該人眾領到。按數分安。俾此事早得就緒。另片奏棍噶扎勒參經過摺報。請隨時斟酌重輕。附摺便一併轉遞等語。嗣後該呼圖克圖所發摺報。如非緊要事件。著福濟等仍遵前旨。即行截留。附報呈遞。以符體制。將此由五百

里各諭令知之。予故河南按察使余炳燾入祀名宦祠。從巡撫瑛榮請也。丁丑以上年直隸等省蕩平擒逆出力。賞提督劉玉龍丁文學張國英龔生陽袁發吳廷瀛總兵官李勝呂金榮孔慶玉。一品封典。總兵官王孝祺張樹勳孫文科。成呈清吳春和梁朝爽吳長璐徐得貴陶崇文。丁大文李敏修副將馬道南劉奎榮李鳳翔屈聖祥王樹楠萬觀貞曹雲芬朱得勝李宏蟾劉啟發張志鼇唐安邦鮮椿山陳皋楊春貴丁貞創林成興協領聶車布參領雙福恩祥。依楞額參將劉天長王龍標武韶剛李鶴山姚德雲陳儀生徐步發周元春李加典林鵬李吉祥尹山雲喻少還尚啟瑞遊擊梅從吉朱復才張元勝王來清曾鳳翔劉詩藻徐連陞李佑增傅鴻張海洋佐領綢楚克雜克巴都司楊毅成盧金良何承貴樂達發衛守備劉步周馬樹林陳丙福羅鳳翔劉麟厚彭安吉夏輝銀張正有巴

圖魯名號知府劉樹棠副將桂林香等花翎筆帖式常緒等藍翎餘加銜升敘有差。○予貴州龍山殉難知縣湯澤長等祭葬世職加等。○予貴州軍營病故總兵官黃清源祭葬卹廕。○予貴州各屬陣亡殉難紳民林秀東等暨婦女二千七百九十七名口分別旌卹如例。○戊寅諭軍機大臣等左宗棠奏進剿甘肅南路竄回獲勝並進駐涇州籌辦軍務各一摺。河州逆回自成縣竄陷兩當。經李輝武等進剿收復縣城並將清水縣唐藏回匪擊敗吳士邁一軍復將秦安康坪堡回巢攻破。勦辦尚屬得手。所有此次尤為出力員弁勇丁著准其擇尤彙案保奏。陝回散布黑城子預望同心各堡互相猜疑甘回亦畏懼求撫。惟回情狡詐反復無常。左宗棠務當酌度情形分別勦撫以期一勞永逸。劉松山一軍到花馬池後即飭相機前進毋稍延緩。郭寶昌軍現紮何處應否與劉松山合隊西行以

資厚集著該大臣酌量調遣毋置諸無用之地董志原竄回紛擾邊外及阿拉善旗境著遵奉疊次諭旨派兵兜剿並飭雷正綰黃鼎兩軍迅由平涼固原合剿北路逆回兼為南路聲援左宗棠現已行抵涇州著穆圖善即遵前旨將關防派員送交左宗棠接收前經諭令左宗棠接篆後或前赴秦州一帶擇要駐紮本日左宗棠亦奏稱甘肅餉源恃秦州一綫轉輸河州逆回專以斷官軍餉道為主是秦州關繫尤為緊要該大臣駐軍涇州恐尚不足以資控制著仍遵前旨酌量移軍總期力保完善兼衛省垣不得顧此失彼甘省餉絀營多左宗棠接篆後即當妥為籌畫竭力整頓務使兵歸實用餉不虛糜以維大局將此由六百里各諭令知之○己卯

孝靜成皇后忌辰遣官祭

慕東陵○庚辰

孝懿仁皇后忌辰遣官祭

景陵○以翰林院編修盧士杰為陝西鄉試正考官刑部員外郎周瑞清為副考官○補行同治七年大計東河卓異官二員有疾官一員分別議敘處分如例○辛巳

上奉

慈安皇太后

慈禧皇太后幸漱芳齋侍午膳○諭軍機大臣等穆圖善奏甘省地方情形及回逆竄擾阿拉善旗地請撥兵援剿定安奏回逆圍攻定

遠營派兵進援各摺片甘省逆回北路則由甯靈竄出邊外冀得掠食南路則肆擾秦州圖絕官軍進糧之路其計甚為兇狡惟劉松山向花馬池進發截剿甯靈竄匪而秦州為轉輸要道關繫非輕著左宗棠仍遵疊次諭旨移軍進駐秦州接受督篆以期力扼要區兼衛蘭州省垣不得以屯田為詞株守一隅穆圖善即遵前旨派員將總督關防送交左宗棠接受以專責成左宗棠身為統帥兼任

封圻接篆以後軍務及地方各事宜俱屬責無旁貸著卽悉心經理妥為布置如有疏虞惟該大臣是問移圖善交卸督篆著仍以將軍督率在省兵力圖保衛其河州股匪仍當隨時撥兵堵剿該將軍所部兵勇若干糧餉應用若干卽咨明左宗棠應如何布置裁併之處卽由該大臣妥籌辦理左宗棠移圖善同辦一事務當和衷商酌以顧大局不得各存意見逆回竄擾阿拉善旗地方該親王

祖塋府第均被焚毀前據理藩院奏聞諭令定安等撥兵籌剿現在定遠營尚未解圍定安飭令楊春祥帶隊進剿兵力尚單金順行抵達拉特旗什巴爾台地方著酌量情形仍遵前旨或撥兵協剿或直抵平羅卽與定安商酌剿辦張曜現在進駐纏金沙金托海其後隊到齊後仍著定安催令前進立解重圍本日據李鶴年奏宋慶患病請給假兩月調理該軍事務委提督蔣東才劉廷照料已批

令在營調理蔣東才等能否得力並著定安隨時察看妥為兼顧定安所錄回匪王登明供詞察其情形與左宗棠等歷次所奏回逆求撫各情相符著鈔給該大臣閱看斟酌辦理將此由六百里各諭令知之○以紫禁城接班遲延散秩大臣恩齡下部議處○以綏遠城沙金托海等處剿匪出力予營總世祿以副都統簡放賞佐領銜驍騎校文瑞花翎把總李得勝等藍翎餘升敘有差○壬午

慈安皇太后聖壽節遣官祭

太廟後殿

奉先殿○

上率王以下文武大臣詣

慈寧門行慶賀禮眾官於午門外行禮○詣綏

履殿

慈安皇太后前侍早膳○奉

慈安皇太后

慈禧皇太后幸漱芳齋侍午膳○以古城十里

長灘等處擊退回匪出力賞副都統富魁。托克屯佐領富春一品封典。總兵官汪德才委參領亮山遊擊丁吉炳羅得勝王玉山副護軍參領松林佐領塔爾通阿保林都司王明海黃輝廷守備王得標程朝立李大洪防禦趙陞驍騎校郭爾吉扎千總方春發陳義興巴圖魯名號都司江有成等花翎縣丞嚴書鴻等藍翎餘加銜升敘有差。○癸未上奉

慈安皇太后

慈禧皇太后幸漱芳齋侍午膳。○甲申諭軍機大臣等蘇鳳文馮子材奏官軍克復越南九封等屯埽平賊壘現督軍進剿一摺逆匪吳亞終率黨竄入越南蔓延通攜文淵洛陽等處經該撫等飭令總兵謝繼貴統帶所部會合副將劉玉成等分投進剿殲賊甚多並將賊壘燒毀二十餘座克復通攜謝繼貴遂取道高村等處進規木馬副將吳天興一軍由

板錫乘勝前進攻克板在村其文淵匪眾又經都司陳朝綱擣平賊黨由驅贏來援者官軍約同降勇夷兵渡河夾攻賊勢披靡餘匪奪路而逸該逆復下竄龍州馮子材令劉玉成等軍取道彬橋疊奪賊壘由那錦橫坡等處分路圍攻將九封洛陽各屯次第克復該匪退守木馬蘇鳳文等現以賊勢漸蹙督軍進攻並剴諒平各路夷官堵截潰匪著即督飭劉玉成等馳往木馬等處迅速分攻毋任該逆得以喘息吳亞終於窮敗之餘竄走越南邊地何難一鼓蕩平乃臨以全省兵力經年累月尚未藏功實屬不成事體現在進剿各軍該撫等責成何人辦理其得力員弁係屬何人難免無聞茸畏蒞之人濫廁行列均著逐一查明據實具奏蘇鳳文等務當振刷精神力除積習迅將此股賊匪盡數殲滅綏靖藩封毋得觀望遷延致干咎戾道員李均前有人奏叅把持軍需侵蝕公項各款當交

蘇鳳文按照所參確查覆奏。茲據該撫奏稱李均在途患病。委員接護越南陪臣回粵等語。該道員被參各節。仍著該撫遵奉前旨。徹底查辦。不准稍涉含糊。並著催令該員趕緊回粵。毋許託病逗遛。將此由五百里各諭令知之。○予廣西龍州等處陣亡參將鄭魚守備謝福昌祭葬世職加等。○乙酉中元節。

上詣

奉先殿

壽皇殿行禮。遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵。遣官祭

端慧皇太子園寢。○諭軍機大臣等。錫綸奏擬買糧賑恤厄魯特人眾。並擊敗變民各摺。

片。厄魯特人眾散處阿勒台烏梁海土爾扈特扎哈沁等部落者已數千人。其流寓科城附近地方亦百餘家。近因迫於飢寒肆行劫盜。與各部落已有仇隙。錫綸擬在科城採買糧石散放賑濟。自係權宜之計。即著照所請。將部撥餉銀提用三千兩。就近在科城採買口糧數百石。以資賑濟。該人眾流離失業。情亦可憫。文碩錫綸務須妥為撫恤。儻餉銀有不足之處。仍准其隨時請撥。福濟所辦喀爾

喀分安各事宜已有成效。文碩錫綸卽按照該將軍等所擬分安人數按名散放口糧。一面收集一面卽分撥各該地方安插以期早弭釁端。此時庫倫東兩盟分領人數文冊已否咨到著福濟榮全錦丕勒多爾濟文碩錫綸迅速咨商辦理毋稍延緩。棍噶扎勒參帶兵赴霍博克賽里地方適變民張興率眾西擾經該呼圖克圖會合該處蒙兵攻擊斬獲甚多。張興中傷逃遁著福濟等仍遵前旨相機籌畫傳知該呼圖克圖遵照辦理將此由五百里各諭令知之。

大清穆宗繼天開運受中居正保大定功聖智誠孝信敏恭寬毅皇帝實錄卷之二百六十二

大清穆宗繼天開運受中居正保大定功聖智
誠孝信敏恭寬毅皇帝實錄卷之二百六十三

此卷係纂修官等遵奉諭旨。將前奉 上諭。內開。朝鮮國王咨文。以鴨江之北。鳳城之外。游民蓋屋墾田。請嚴行禁止。據情轉奏。一摺。奉天邊外游民私墾聚眾日繁。前經延煦等前往查勘。酌擬章程呈覽。內有推展邊界及嚴定邊禁各節。疊經諭令都興阿等悉心籌畫。酌覈辦理。此事關係中外邊疆。若不及早經理。漫無限制。恐該游民等任意侵越。漸及朝鮮柵路。致該國居民不無疑慮。殊非朝廷綏輯藩封之意。著都興阿額勒和布恩錫懌遵前旨。迅速籌辦。並將如何辦理情形據實具奏。毋得畏難苟安。稍存膜視。並著禮部查照向章。行知朝鮮國王。慎守邊境。如有游民私越滋擾情事。即行照例懲辦。禮部原摺並朝鮮國王咨文。著鈔給都興阿等閱看。將此諭知禮部。並諭令都興阿額勒和布恩錫知之。○丁亥。

同治八年己巳七月丙戌諭內閣賈楨等奏

外城練勇酌擬改併請旨遵行一摺。外城設局練勇。本屬一時權宜之計。現在地方安謐。自應酌量裁併。著照所請。外城練勇二百五十名。均著一併裁撤。即將此項練勇分屬五城。由各該城歸併原募局勇。認真挑選。酌量定額。以供緝捕之用。其部撥練勇銀每月一千兩。即由五城支領。該城本有緝捕盜賊之責。其各督飭司坊官員。實心經理。整頓捕務。所有各部院衙門及投效當差人員。即著概

文宗顯皇帝忌辰遣官祭

定陵○

上詣

奉先殿

壽皇殿行禮○諭軍機大臣等崇實吳棠奏請

將各省應協滇餉匪川轉解一摺前經戶部

議撥滇餉當經諭令四川等省按月提交滇

省委員陸續領解茲據崇實等奏稱接據岑

毓英來函以滇省軍務正在得手需餉萬分

緊急兩湖江浙等省協餉若專恃委員提解

難應急需請於四川重慶設立滇餉總局並

派員前往各省坐催即將餉銀由商號匯至

重慶由總局轉解滇省等語所奏自係為轉

輸迅速起見著馬新貽劉坤一李瀚章李鴻

章郭柏蔭劉崑即將江西浙江湖北湖南等

省應解滇餉按月提交該委員等就各省商

號匯川源源轉解至川省應協滇餉並著按

月就近撥解以濟要需其四川墊解銀四萬

五千兩即著於各省協餉過境時如數截留

歸款現在滇事既有轉機餉需亦已有著劉

嶽昭岑毓英務當督飭將士速解省圍力圖

埽蕩毋稍延緩將此由五百里各諭令知之

○成都將軍崇實等奏請飭湖南在籍丁憂

道員鄧錡前赴貴州軍營帶勇勦賊允之○

予貴州窄王苗寨傷亡總兵官鄧鴻超祭葬

世職加等附祀參將吳洪貴甕安縣專祠○

戊子諭內閣御史袁方城奏司坊官縱盜貽

害請飭查究辦一摺司坊各官原以詰捕盜

賊乃據該御史奏稱近來匪徒麇集白晝搜

人財物城外窮民進城典質或置買器用有

被夥黨分奪之事赴各衙門控訴各該司坊

官均置若罔聞而中城為尤甚實屬捕務廢

弛殊堪痛恨著巡視中城御史將督捕不力

之官役查叅懲辦並著五城御史整飭司坊

各官查拏盜賊並妥議章程以期有犯必獲

俾奸宄斂戢以靖地方尋奏京城地面盜賊

橫行。固由司坊官督捕不力。亦由捕役畏葸無能。現擬於各城適中之地。設局練勇。嚴密巡查。並立功過格。以定優劣。酌提練勇經費。以獎勤奮。下部議從之。○諭軍機大臣等。馬新貽奏。鼎軍勇丁索餉滋事。現籌分起遣散情形。一摺。鼎軍勇丁前在韓莊地方滋事。疊經諭令馬新貽等派員彈壓。茲據馬新貽奏稱。該軍抵宿遷後。經總兵潘鼎立等將滋事勇丁魯萬澄等查出正法。鼎字左營先行遣

撤。所發欠餉。仍照淮軍向例發給。其籍隸江浙之遣勇。沿途亦屬安靜各情。刻下該軍分起行走。自可漸臻安貼。惟若輩桀驁性成。究未可稍涉寬弛。仍著馬新貽嚴飭潘鼎立等。妥為鈴束。毋令再生事端。該軍滋事勇丁。雖經查獲懲辦。而辦理不善之將弁。咎亦難辭。著李鴻章懍遵前旨。據實參辦。毋稍瞻徇。其搶掠鋪戶各事。除魯萬澄五人外。是否尚有起意之人。仍著潘鼎立等徹底查拏。解赴東

省。由丁寶楨按律嚴辦。該勇丁行抵皖境。英翰吳坤修務當斟酌情形。妥籌安插。一面飭知潘鼎新。隨同遣散。俾得各安生業。將此由五百里諭知李鴻章馬新貽丁寶楨英翰。並傳諭吳坤修知之。○庚寅諭軍機大臣等。戶部奏請飭催各省應解京餉一摺。上年十二月間。經戶部奏撥本年京餉銀七百萬兩。限五月前解到一半。年終解清。本年五月間。續撥銀一百萬兩。限年內解齊。茲據該部查明。

截至七月十八日止。除天津關十五萬兩。准其留用。長蘆鹽課二十五萬兩。內劃撥造船經費等款外。餘銀並福建鹽課均已解清。湖北安徽地丁。浙江釐金。兩浙鹽課。鹽釐。河東加課羨餘。四川鹽釐津貼。福建茶稅。九江關常洋兩稅。報解過半。山東浙江地丁。廣東鹽課帑息。山東鹽課加價。湖北鹽釐。閩海關常洋兩稅。江漢關洋稅。亦據報解及半。其餘山西等省地丁。兩淮等處鹽課。粵海等處關稅。

或解不及半。或絲毫未解。京餉關繫緊要。豈得任意延宕。除業經劃撥截留解到及報解外。尚有山西地丁銀六十萬兩。山東地丁銀十五萬兩。浙江地丁銀十五萬兩。湖北地丁銀十四萬九千五百兩。湖南地丁銀十九萬兩。安徽地丁銀五萬兩。江西地丁銀二十萬兩。兩淮鹽課鹽釐銀四十萬兩。兩浙鹽課鹽釐銀十四萬兩。河東加課羨餘銀五萬兩。廣東鹽課帑息銀十萬兩。山東鹽課加價銀十萬五千兩。湖北鹽釐銀五萬兩。湖南鹽釐銀四萬兩。四川鹽釐津貼銀十七萬兩。福建茶稅銀二萬兩。粵海關稅銀十萬兩。閩海關常洋兩稅銀十萬兩。九江關常洋兩稅銀十六萬二千五百四十八兩零。浙海關洋稅銀十五萬兩。江海關洋稅銀二十一萬一千四百八十八兩零。江漢關洋稅銀十五萬兩。江西釐金銀五萬兩。江蘇釐金銀五萬兩。浙江釐金銀四萬八千六百四十七兩零。廣東釐金

銀十萬兩。湖北釐金銀三萬兩。又續撥京餉一百萬兩。內除山東起解銀三萬兩。四川劃解西藏銀五萬兩。外。尚有山東地丁銀七萬兩。河南地丁驛站銀十六萬兩。兩浙鹽課鹽釐銀五萬兩。福建釐捐銀五萬兩。浙江茶課銀五萬兩。兩淮鹽釐銀二十萬兩。四川鹽釐津貼銀十萬兩。九江關常洋兩稅銀二十萬兩。贛關稅銀四萬兩。著各該將軍督撫監督等。即將前項應解銀兩。統於年內埽數解齊。毋得遲延干咎。將此由五百里諭知福州將軍。兩江湖廣閩浙兩廣四川江蘇安徽江西福建浙江湖北湖南山東山西河南廣東各督撫。並傳諭粵海關鹽督知之。○又諭。前因理藩院奏。據阿拉善親王呈稱。歷次籌墊臺費銀五萬餘兩。當經諭令戶部指款撥還。茲據奏稱。查有圖謝圖汗等部落應抵解部庫銀五萬兩。約計尚未起程。請將此項抵撥等語。著張廷岳阿爾塔什達。即將前項銀五萬

兩。迅速派員改解綏遠城。卽由定安派員解送甯夏。並將銀兩起程日期。先行知照金順豐。紳酌派弁兵。會同綏遠城委員護送至阿拉善旗交收。毋稍疏忽。將此各諭令知之。○以湖北蘄水拏獲教匪出力。予守備萬賦元等升敘有差。○辛卯。諭軍機大臣等。張廷岳等奏。東兩盟願領厄魯特人眾一摺。厄魯特人眾。分起安插。業經福濟等將西兩盟分領情形具奏。現在圖謝圖汗車臣汗東兩盟亦

願呈領厄魯特所贖一半人數。分布安輯。辦理甚屬妥協。卽著張廷岳阿爾塔什達傳知各該王公等。於該人眾到旗後。妥為撫綏。約束務令日久相安。並著福濟錦丕勒多爾濟文碩錫綸等。將此項人眾。按照該兩盟佐領多寡。均攤勻散。造具名冊。一俟庫倫咨到。卽交該管官帶領陸續起程。俾臻妥速。將此由五百里各諭令知之。○命候補國子監司業孫詒經仍在南書房行走。○壬辰。諭內閣。魁

玉奏京口駐防難裔應行承襲各員請仿照江甯駐防變通成案試用三年再行送部引見其已經承襲之興元長年二名並請歸試用班當差各等語著兵部查明江甯駐防成案一律辦理。○諭軍機大臣等。魁玉奏請籌款興建駐防官署並添補器械一摺。京口駐防兵房現已一律工竣。惟各兵丁雖有棲止而官署尚未建蓋。器械亦復短缺。難資辦公。卽著馬新貽丁日昌續行籌款。遴派妥員。前

往估計工程。將京口駐防各官署及應行添補器械趕緊興造。並著魁玉督飭在工各員認真辦理。毋令草率。俾復舊觀。將此各諭令知之。○又諭定安桂成奏賊匪竄擾河西各軍分投進剿並請飭撥火藥等項各摺片。甘陝回匪。經張曜等軍截繫後。未敢北犯。意圖乘隙東趨。現在鄂爾多斯等旗境內均有賊蹤。其竄擾哈拉寨等處之賊。雖經宋慶所部擊敗。仍退向鹽海子一帶盤踞。杜嘎爾刻由

托克托城渡黃馳赴河西。正可杜該逆東擾之路。卽著定安等迅咨該副都統督飭達爾濟等。各率所部馬隊。探明賊蹤。相機進紮。仍一面會合宋慶等軍步隊。節節追剿。以殄逆氛。惟河西與歸綏僅隔一河。防守甚關緊要。且該處南路直達榆林。東北卽趨包薩。該逆詭譎異常。難保不避兵而行。乘虛分擾。榆林為逆匪往來熟徑。劉典務當偵探賊蹤。豫籌防範。毋稍疏虞。其歸綏包薩沿河一帶地方。

仍著定安、桂成、李宗義分飭在事將士加意嚴防。左宗棠督軍西進。設陝境復有蠢動。後路仍費周章。應如何先事圖維。撥軍嚴扼之處。著該大臣察度情形。商同劉典妥為辦理。金順現由烏喇一帶進剿。著卽會同張曜等軍分投截擊。以壯聲援。定安等所請火藥等項。本日已諭知工部照數迅撥矣。其山西應解火藥鉛丸等件。李宗義卽按照該將軍等所咨隨時撥解。以濟要需。將此由六百里各

諭令知之。○又諭定安、桂成奏請飭山東山西撥解防兵欠餉。並請飭山西速解歸綏滿蒙旗綠等營防餉各等語。口外防兵經定安等裁撤老弱。酌留六千餘名。分布沿河地面。山西積欠兵餉共銀十萬餘兩。山東每月應解銀二萬六千兩。除解到正月分協餉一萬兩及起解未到銀一萬兩外。所欠尚多。口外防務緊要。亟宜接濟。以資飽騰。著丁寶楨、李宗義將各該省欠解定安等防兵月餉嚴飭

各該藩司勒限如數趕緊撥解。毋任延宕。嗣後月餉務須源源起解。俾濟要需。至山西欠解伊克昭、烏蘭察布兩盟兵餉銀十二萬四千餘兩。綏遠右衛土默特大同鎮各營兵餉二萬三千餘兩。並著李宗義嚴飭藩司勒限撥解。毋再遲緩。將此由五百里各諭令知之。○又諭何璟奏西路軍務情形。請飭催成祿出關一摺。據稱烏魯木齊各城久為賊踞。實因大兵阻於關內。以致塞外逆氛猖獗。近日

該總兵派軍功鄧生玉等赴奇古濟木薩一帶扼紮於木壘河地方將賊擊退人在奇臺擊賊獲勝惟成祿出關尚無信息請飭剋期西進等語成祿克復肅州後一切部署自己妥協何得任意遷延至今無出關消息著成祿懍遵前旨乘此塞外兇鋒已挫迅統所部出關會同何瑄相度機宜分別勦撫妥速辦理若再株守不進玩誤軍務自問當得何罪並著左宗棠穆圖善嚴催該提督迅速起程

不得任令延宕何瑄於成祿未到之先仍宜督飭將弁認真防勦將此由五百里諭知左宗棠穆圖善成祿並傳諭何瑄知之○以哈木爾和碩等處勦賊獲勝賞協領克什克扎布等副都統銜參將洪亮等花翎餘升敘有差○撥工部火藥鉛丸各一萬斤火繩一萬大轟藥二百斤解赴綏遠城軍營備用○豁免湖南晃州廳被擾地方上平民欠錢糧○癸巳以四川劍州捐輸軍餉永廣學額二名

甲午以神靈顯應封浙江桑神曰桑王之神○諭內閣給事中劉秉厚奏風聞直隸地方徵收錢糧浮費漸增永平遵化河間等屬有加至二三錢三四錢者又或有津貼名目更加二三錢不等至收錢作銀折價每銀一兩幾費二三兩銀之數又錢糧交官例給串票乃敢另索使費逐漸加增京畿如此他省可知請旨查禁等語直隸差務紛繁屢遭兵燹當此瘡痍未起正宜竭力撫綏以冀漸復

元氣何得以有限之脂膏供無饜之腹削著曾國藩按照該給事中所奏情形查明嚴禁並著各直省督撫各率所屬裁減浮費明定章程刊示市鎮通衢俾小民得以周知胥隸無從舞弊如有額外需索者一經發覺即予從嚴參辦以副朝廷軫念黎元至意○又諭前據李鶴年奏遵查直隸山西河南交界處所山徑叢雜匪徒每易藏奸當經諭令曾國藩等妥議會哨章程認真辦理茲據曾國藩

酌擬章程開單具奏所稱接壤州縣會銜出示不分鄰省本省一律會哨令地方文武輪流出巡按月稟報及每次會哨不拘地面聯絡鄉團以為鄉導各條均屬周妥著照所議由各該督撫飭令該地方官各按章程約期會哨不分畛域實力奉行務令奸宄無從匿跡以副朝廷除暴安良至意其餘未盡事宜仍著曾國藩李宗義李鶴年隨時會商妥為辦理○諭軍機大臣等給事中劉秉厚奏山東

東東昌府及歷城縣之濼口鎮利津縣之豐國鎮自咸豐年間設立抽釐分局尚未停止計每日各局所收俱不下千餘金而吏役之藉端訛詐格外勒索較前更甚請飭量為裁撤等語著丁寶楨體察地方情形將各該處分局酌量裁撤以恤商力將此諭令知之尋奏遵查豐國鎮並無釐局現擬將聊城釐卡裁撤其濼口鎮等處應請暫留以濟餉需並嚴飭委員訪查吏役情弊從嚴懲辦下部知

之○又諭棍噶扎勒參奏進剿叛民獲勝派員開導請飭撥弓箭各摺片叛民竄擾土爾扈特遊牧地方經棍噶扎勒參會同蒙兵於六月十五日進剿殺賊七十餘名與錫綸前奏大畧相同該匪現在敗退回巢棍噶扎勒參以兵力尚單未能進取現擬添調厄魯特官兵二百名一面派員前往開導著福濟文碩錫綸傳知該呼圖克圖先行扼要堵守一遇該匪出巢即著迎頭截擊毋任紛竄俟厄

魯特官兵調到仍當相機進剿迅掃逆氛該呼圖克圖需用弓箭前據錫綸奏稱已先後撥給弓二百張箭五千枝如再有需用之處著福濟錦丕勒多爾濟文碩錫綸酌量撥給綏遠城前次截留火箭三百枝據棍噶扎勒參奏稱已接該將軍咨文業經起運久未解到著定安飭令委員迅速解往毋稍遲延棍噶扎勒參另摺奏土爾扈特郡王巴圖捐助馬匹隨同勦賊出力已諭令理藩院議給獎

欽。又奏索倫等營官兵出力。所有總管圖瓦強阿等。業照所請給獎。其在塔城勦賊出力官兵。俟軍務告蒞。卽由福濟等酌保著該將軍等一併傳知該呼圖克圖。將此由五百里各諭令知之。○補鑄安徽宣州衛守備印信。從署巡撫吳坤修請也。○以直隸新城捐築隄工。予知縣吳光鼎等加級加銜有差。○以布倫托海進勦叛民獲勝。賞總管圖瓦強阿佐領迪布希巴圖魯名號。委領催額勒和里

等藍翎。餘升敘有差。○緩徵陝西蒲城縣被

旱地方本年上忙錢糧。○乙未

仁宗睿皇帝忌辰遣官祭

昌陵。

上詣

壽皇殿行禮。○諭內閣奕榕奏查明牧廠准領地畝有礙牧放請仍照例封禁並將牧長革職訊辦一摺。大凌河西牧廠以老河身為界前因旗人胡拉布等呈請領懇三河套舊河

底地二千八百餘畝。經盛京戶部覈准升科。現據奕榕覆行查勘該處開墾地畝日久恐侵廠地。實於牧政大有關礙。自應仍行封禁。著戶部查明將該旗人等領地升科之案。卽行註銷。所墾之地一律平毀。並著該將軍府尹飭令旗民地方官照例將馬廠界限挑挖濠溝。重整封堆。自舊河底以西不准再行領墾。以重牧政。而杜奸萌。牧長卓金當承墾時派往查勘。據稱不礙牧馬。此次覆查出結。又

復獨執一詞。意存迴護。顯有營私情弊。著卽革職。嚴行訊辦。○丙申諭軍機大臣等李宗義奏籌商河防並添募晉勇情形一摺。前因回匪竄擾河西。諭令李宗義分飭在事將士加意嚴防。茲據該撫奏稱陳湜所部均已遣撤。業經鄭敦謹抽派南鎮官兵並留精銳等營及水師十一營分路駐紮。所有河防分為下段中段上段。令李慶翱等商酌辦理。其上年所築沿河石壘並飭地方文武一律修補。

所奏各情尚屬周妥。惟陝省北境與晉省處處相通。防守自難鬆勁。中段興臨等處河面較寬。而南路吉州之龍王辿。河津之禹門渡。每冬冰橋早結。堵禦尤難。卽著該撫飭令李慶翱嚴檄閻文忠等趕募晉勇四千名。於八月內成軍。並調河東練勇二百名。統交該臬司在吉鄉河津之間分段扼紮。以固南路。現在賊竄鄂爾多斯旗境。距陝之府谷神木等邑不遠。晉省北路如河曲。沔陽渡等處尤應嚴防。如需添調兵勇。亦必豫為籌及。毋致臨時周章。晉省人多怯懦。所募勇丁四千。是否得力。營兵於額餉外日加銀八分。以示體恤。原無不可。惟須汰弱留強。一兵得一兵之用。斯為餉不虛糜。該撫其督飭李慶翱實力奉行。毋負委任。歸綏一帶仍當與定安等隨時籌防。並知照張曜宋慶各軍與該處防勦等營互相聯絡。俾壯聲援。再兵之強弱轉移在將。該省現在有無得力將弁。亦當隨時留意。

察看用資調遣。將此由五百里諭令知之。○山西巡撫李宗義奏。回匪侵入蒙境。官軍截擊獲勝。得旨著卽知照宋慶督飭蔣東才等實力進剿。毋任逆賊東趨。○丁酉。諭軍機大臣等。都興阿等奏奉天拏獲賊匪。請仍照軍務省分援照成案辦理一摺。據稱奉天地方股匪橫行。雖經官兵節次剿除。而賊匪尚未淨絕。所有該省拏獲馬賊及土匪擾害鄉里勒索資財。降勇聚眾滋事者。於訊明後仍請照軍務省分援照成案就地正法。並請飭吉林黑龍江將軍一體遵辦等語。匪徒擾害閭閻。最堪痛恨。奉天根本重地。尤應除莠以安善良。嗣後奉天拏獲賊匪。卽著照都興阿等所請。從嚴懲辦。如遇有臨時拒捕者。卽行格殺勿論。惟該匪此拏彼竄。是其慣技。吉林黑龍江地方豈容此等匪徒肆行擾害。著富明阿德英按照奉天所辦章程一律辦理。如日後該三省盜風稍息。再由該將軍等隨時奏

明以復舊章。將此各諭令知之。○又諭都興阿等奏奉省演練馬兵應添藥鉛請飭工部辦理一摺。盛京馬隊練兵八百名。逐日常川操演。應需火藥鉛丸甚多。勢難由該旗佐永遠墊辦。著奕慶按月如數給發。其火藥一項並著按照前備勦捕賊匪加工做法。覈實製造。俾資應用。將此諭令知之。○又諭李鴻章奏遵籌遣撤鼎軍大致就緒一摺。潘鼎新一軍前在山東韓莊地方搶掠。隨赴江蘇宿遷。

經丁寶楨馬新貽先後撥給餉銀。妥為遣散。現將首先搶掠之勇目魯萬澄等正法。各營勇丁咸知畏懼。吳長慶等已知會各路營卡並沿途州縣。遞為護送回籍。是此事已辦有端緒。惟該勇丁雖因缺餉滋事。而營哨官之平日不能約束。已可概見。若不從嚴叅辦。何以申明軍律。且何以服韓莊各鋪戶之心。卽著李鴻章飭令潘鼎新於安置事竣後查明嚴行叅辦。不可稍涉徇庇。另摺奏彭玉麟回

籍情形。該侍郎感激知遇。力疾自浙蘇上泝岳州。逐營查驗。親為勉勵。實能不負委任。現在病體未愈。自應准其就近回籍調理。惟長江水師係該侍郎等經營創立。著李鴻章傳諭彭玉麟於病體略痊。仍遵前旨。馳赴江皖擇地駐紮。以資控制。將此由五百里諭令知之。○又諭英桂卞寶第奏緝拏游勇土匪情形。請從嚴懲辦一摺。福建興漳泉三府屬地方。民情强悍。搶案頻仍。延建邵等府每逢茶

市。卽有本省汀州及廣東江西客民數萬人前來傭工。於市罷後。匿居山廠。伺隙搶劫。甚至糾眾肆擄。本年五月間。建陽縣地面拏獲會匪張淙保等。據供聽從江西客匪吳三保結眾拜盟。名勝人會。訂期焚搶黃阨。再攻崇安。並續獲會匪范運發等。一併訊明正法。該省匪徒充斥。兼有各路散勇流入。難保不勾結為患。自應從嚴懲辦。以杜亂萌。著英桂卞寶第督飭各該地方文武認真查緝。並於拏

獲匪犯後卽行就地正法用昭炯戒俟盜風稍息再行奏明辦理其在逃之匪首吳三保已據該督撫咨會江西緝拏著劉坤一飭屬將該匪嚴拏務獲懲辦毋任漏網將此各諭令知之○以緝捕不力摘中城副指揮姬瑞麟頂帶○己亥諭軍機大臣等定安桂成奏豫軍截勦竄匪獲勝詳細情形一摺回匪竄擾鹽海子一帶經提督蔣東才等追勦斃賊甚多據獲賊供稱賊首穆壽馬考均已陣斃

惟李五舉及餘匪均向西南逃竄現在復有回匪竄至烏紳旗境打虎旗一帶蔣東才已帶所部探勦宋慶又派三營前往會勦著卽飭令迅速前進務將竄擾該處之賊痛加勦洗悉數殲除並咨令杜嘎爾督飭達爾濟等各率所部聯絡宋慶張曜兩軍確探賊蹤迅速兜擊毋任分股東趨河西賊股不一常在磴口等處掠糧金順前由達拉特旗進發現在行抵何處近日勦辦情形若何著懍遵疊

次諭旨會同張曜等軍分投截勦妥籌策應歸綏沿河一帶定安等仍當督飭各軍加意嚴防毋稍大意宋慶派員勦賊頗知緩急此次在鹽海子殺賊出力員弁著准其擇尤彙案保奏將此由五百里各諭令知之○予江蘇各屬陣亡殉難紳民楊式金等暨婦女一千八百九十一名口分別旌卹如例

大清穆宗繼天開運受中居正保大定功聖智誠孝信敏恭寬毅皇帝實錄卷之二百六十三

大清穆宗繼天開運受中居正保大定功聖智
誠孝信敏恭寬毅毅皇帝實錄卷之二百六十四

朕惟德薄才庸不足以膺此大任惟是受天開運受中居正保大定功聖智誠孝信敏恭寬毅毅皇帝實錄卷之二百六十四

同治八年己巳八月庚子朔

上詣綏履殿問

慈安皇太后安平安室問

慈禧皇太后安至戊辰皆如之○諭軍機大臣

等有人奏官紳同惡相濟請旨飭查一摺據

稱湖南湘鄉縣知縣齊德五與紳士羅會焜

等徵收錢漕任意科斂辦理捐輸蒙混漁利

民間詞訟羅會焜等得以干預顛倒是非該

縣齊德五惟言是聽以致局門貼有對聯各

等語州縣為親民之官錢漕詞訟該知縣均

應親為經理紳士何得從中播弄捐輸雖由

局紳辦理亦當隨時稽察何得任其侵漁若

如所奏於吏治民風大有關繫即著劉崐按

照摺內所參各情徹底查明據實具奏毋得

稍涉徇隱原摺著鈔給閱看將此諭令知之

○又諭德英等奏俄人越境要求通商各情

請飭總理各國事務衙門按約辦理一摺黑

龍江內地各處向無外國通商處所茲據奏

稱俄人輪船由松花江上駛抵呼蘭河口停

泊要求通商經該署將軍等派員往阻俄官

囑爾幅以批捷生科發給執照前來不能將

商船喚回並請給文保護商人在各處大開

通商該署將軍等復查此次人船數目無多

亦未攜有器械現已由呼蘭河口開船東下

請飭總理各國事務衙門照覆該國住京公

使嚴禁俄國官商濫行越境等語俄人蓄謀

甚譎往往借通商為名越界游歷刻下雖經

折回難保不挾眾潛至肆意要求德英等仍

當密飭防卡官弁如再遇俄人入境卽按照條約設法攔阻毋任其乘隙闖入並一面嚴禁軍民私相貿易以弭釁端本日已諭知總理各國事務衙門知照該國住京公使按約辦理矣將此由五百里各諭令知之○追予江蘇各屬陣亡殉難官紳楊文鈺等暨士民婦女一千七百八十六員名口分別旌卹如例○辛丑調盛京刑部侍郎志和為禮部右侍郎盛京兵部侍郎瑞聯為刑部侍郎禮部

右侍郎綿宜為盛京兵部侍郎○以四川大邑縣續捐津貼銀兩永廣學額一名○追予江西泰和陣亡殉難舉人袁炳勳等紳民婦女三百五名口分別旌卹如例並予建祠○壬寅諭內閣丁寶楨奏運鹽滯銷有因請將州縣應得處分懇恩寬免一摺河南歸德衛輝兩府所屬之商邱考城等州縣係東省南運行鹽之地近年以來地方被匪滋擾閭閻生計維艱行銷尚未甚暢且因產鹽短絀運

費倍增以致未領之引覈計分數在四分以上尚屬滯銷有因所有商邱等九州縣應得處分著照所請准其寬免至該撫所請籌添運本之處並著斟酌辦理○諭軍機大臣等穆圖善奏甘涼肅三屬軍糧不能移作出關兵食並請飭袁保恆撥解西征半餉各摺片前因飭催成祿出關諭令左宗棠穆圖善將接濟軍食安設糧臺各節妥籌辦理茲據穆圖善奏稱肅州初復彈壓撫綏各營勢難遽

撤需用芻糧向均就地籌辦連年輸助民力實已難支至甘涼二府民閒勉力輸將供西路現駐之軍已不敷用若欲移作出關兵食不過徒託空言無裨實用惟關外安西敦煌玉門三州縣向係產糧之區文麟等軍口糧可由該三屬供辦等語尚屬實在情形卽著左宗棠穆圖善飭令安西等州縣設法妥辦陸續運解不敷之項仍著該督等隨時接濟不得稍涉推諉至糧臺應設何處省城相隔

二千餘里。勢難臆斷。文麟景廉成祿同辦關外之事。即可會合商辦。擇地設臺。派員經理。庶免貽誤。成祿現在行抵何處。著卽剋期出關。毋稍延緩。左宗棠所部十二營。已抵秦州。兵數日增。需糧更鉅。非籌撥鉅款。多方採買。不足分贍諸軍。穆圖善現派知府鐵珊經理其事。著袁保恆遵照部議。迅將各省應協甘肅半餉。源源分撥。以濟要需。不准稍有遲誤。穆圖善另片奏。請飭調溫德勒克西常星阿。

來甘帶隊等語。已諭令德英傳知該副都統。傷病一痊。卽行前赴甘省。常星阿現已來京。所請調赴軍營之處。著毋庸議。黑龍江馬隊。遠道出征。必應妥籌接濟。著俟行抵陝省。卽由西征糧臺籌撥餉銀二萬兩。嗣後仍由該糧臺按月籌解。以利師行。將此由六百里諭知左宗棠。穆圖善。文麟。景廉。成祿。並傳諭袁保恆知之。○又諭本日據穆圖善奏。副都統溫德勒克西統率馬隊。素稱得力。請飭赴甘

省等語。該副都統傷病。此時能否就痊。著德英隨時查驗。一經痊愈。卽飭溫德勒克西。迅赴甘省。穆圖善軍營。毋稍延緩。將此由四百里諭令知之。○又諭定安。桂成。奏官軍進援定遠營解圍。請飭山西撥解協餉及皮衣銀兩各摺片。回匪圍困阿拉善旗定遠營。經張曜派令楊春祥等與世祿。坤庫善馬步各隊援勦。立解重圍。追至廣宗寺。斃匪甚多。勦辦甚為奮勉。所有在事出力員弁兵勇。著准其

彙案請獎。張曜分兵赴援。調度有方。著定安等傳旨嘉獎。現在賀蘭山一帶。有無餘匪伏匿。仍著飭令各營實力搜捕。毋留餘孽。甯靈東北一帶。有無另股竄匪。金順行抵何處。日來未見奏報。著卽懍遵前旨。會同張曜等軍。確探賊蹤。分投截勦。並將近日戰事賊情。隨時據實具奏。其打虎旗一帶賊匪。前經宋慶派令蔣東才等前往探勦。著定安等仍飭迅速進勦。毋任乘間東竄。宋慶張曜兩軍。正當

勦匪喫緊之際。自可毋庸議撤。其餉項雖由河南撥解。山西亦有應協。月餉該雨軍在邊外防勦。正以保衛晉疆。李宗義當按月源源籌解。毋令缺乏。其需用皮衣銀二萬一千兩。著照定安等所請。先由殺虎口稅項內借款提用。卽著李宗義飭司趕緊如數籌撥解交該關監督查收歸款。將此由五百里各諭令知之。○調正藍旗漢軍副都統安興阿為鑲藍旗滿洲副都統。以工部左侍郎恩承兼正

藍旗漢軍副都統。內閣學士寶珣署鑲紅旗蒙古副都統。○賞四川等省丁卯科鄉試年老諸生藍應椿等十人舉人副榜有差。○緩徵山東臨邑。聊城。安邱。長山。濟陽。樂陵。商河。陽穀。朝城。清平。十縣被旱被雹地方。新舊額賦暨雜課有差。○癸卯諭內閣。馬新貽奏。江甯各屬被水災黎。先行設法安插撫恤等語。本年夏間雨水過多。江潮漫溢。江甯府所屬各縣被水成災。聞有附近災民來省就食。馬

新貽業已督飭所屬擇地安插酌給米糧。卽著飭令在事各員認真經理。並著派員分赴各處實心履勘。速籌款項。量加撫恤。毋令流離失所。○又諭劉典奏查明循聲素著暨庸劣各員。據實舉劾一摺。陝西候補知府孫毓林。楊光澍。准補乾州直隸州知州余庚陽。候補同知直隸州知州喻兆圭。准補孝義廳同知趙宜煊。准補蒲城縣知縣黃傳紳等六員。據稱均能實心任事。素著循聲。卽著送部引

見試用同知程璣。小有才能。不知檢束。試用知縣童紹祖。性情卑鄙。操守不潔。均著一併革職。以肅官方。○諭軍機大臣等。都興阿等奏覆勘邊地酌擬試辦。並覆陳鳳城邊外情形各摺片。據稱自鳳凰門迤南至旺清門北查得已墾熟地九萬六千餘畝。男婦十萬餘人。現擬由豐陽迤南至鳳凰門外一帶地方先行試辦。惟豐江西岸一帶南北四百餘里與朝鮮僅一江之隔。該處地狹人稠。別無安

插之地。擬照延煦等前與朝鮮委員所議。於沿江附近地方。酌留三五十里。畫清界限。儻實格於形勢。不能多留餘地。惟有嚴禁。准墾民人。不准過江一步。如有越界滋事者。卽由朝鮮查拏。解交邊門懲辦。現已咨商朝鮮辦理等語。游民私自開墾。積重難返。自應變通辦理。以期綏輯地方。該將軍等所奏。係為因時制宜。起見。著禮部行知朝鮮國王。將商議各節。迅速咨覆。以憑覈辦。都興阿等俟朝鮮

覆文到日。卽照所擬妥慎籌辦。毋稍苟且。惟勘辦展邊。總應以距江稍遠為界。如有游民於近江地方墾種。卽當令其移進邊內居住。不得稍涉遷就。以致漫無限制。至鹼廠旺清二門外。有應進貢物地方。卽照所議。仍著都興阿等詳細查明。次第妥辦。將此諭知禮部。並諭令都興阿額勒和布。恩錫知之。○又諭。丁寶楨奏太監在外招搖煽惑一摺。據德州知州趙新稟稱。七月間有安姓太監乘坐太

平船二隻。聲勢炫赫。自稱奉旨差遣。織辦龍衣。船上有日形三足烏旗一面。船旁有龍鳳旗幟。帶有男女多人。並有女樂。品竹調絃。兩岸觀者如堵。又稱本月二十一日。係該太監生辰。中設龍衣男女羅拜。該州正在訪拏。聞船已揚帆南下。該撫已飭東昌濟甯各府州。飭屬跟蹤追捕等語。覽奏深堪詫異。該太監擅自遠出。並有種種不法情事。若不從嚴懲辦。何以肅宮禁而儆效尤。著馬新貽張之萬

丁日昌丁寶楨迅速派委幹員。於所屬地方。將六品藍翎安姓太監嚴密查拏。令隨從人等指證確實。無庸審訊。卽行就地正法。不准任其狡飾。如該太監聞風折回直境。卽著曾國藩飭屬一體嚴拏正法。儻有疏縱。惟該督撫等是問。其隨從人等有跡近匪類者。並著嚴拏分別懲辦。無庸再行請旨。將此由六百里各密諭知之。○又諭。馬新貽奏酌調額設官兵。添給津貼。立營操演一摺。江蘇額兵自

軍興以來營伍久未整頓。現當軍務肅清。亟應妥速籌辦。該督現擬於額定之兵酌挑精壯。再於額定之餉酌加津貼。並將現辦章程二條分晰縷陳。所奏尚屬妥協。即著馬新貽督飭營汛等官。將新立各營認真操練。實力舉行。不得有名無實。其安徽江西兩省係該督兼轄省分。並著俟江蘇辦有成效後。即行咨商各該巡撫妥議章程。奏明辦理。將此諭令知之。○又諭曾壁光奏官軍攻克九阡等

處生擒首逆。都勻失守。分軍進剿。各一摺。逆匪占踞荔波縣屬之九阡等處。經粵軍孔憲隆等進攻。以兵力單薄。曾壁光復添派盧振剛等會剿。將九阡等處逆巢攻克。逆首吳邦吉潘新蘭均經擒獲。辦尚為得手。該撫即督飭將弁認真掃蕩。並著蘇鳳文檄飭派出各軍協同攻剿。務當乘此聲威。將餘匪搜捕淨盡。以絕根株。張文德因餉項奇絀。移兵就糧。以致都勻復陷。各營將領損折良多。朝廷

實深廛繫。此次軍退城陷。實因飢乏所致。張文德著免其置議。即著曾壁光督令激勵官軍。迅圖規取。為克復都勻之計。一面飭令何雄輝等由貴定等處分路防剿。毋令匪蹤蔓延。將此由六百里各諭令知之。○又諭曾壁光奏黔省待餉孔亟。請飭催各省迅速籌解餉銀一摺。據稱部撥各省協黔餉銀。自同治六年十月起。至八年六月。僅據四川解到銀六萬五千兩。湖北解到銀二萬兩。廣東解到

銀三萬三千兩。覈之原撥銀數。不及十分之一。餉需不繼。各軍飢困。難堪空語。拊循終難久恃。現在提督張文德一軍。因餉絀移兵就食。途中爭險血戰。各營將領折損甚多。以致都勻府城失守。若再不迅籌接濟。大局不堪設想等語。黔省被兵日久。待餉孔殷。各該督撫總當不分畛域。共濟時艱。何得任意宕延。致該省軍務無從措手。即著該督撫等查照戶部奏撥數目。現尚欠解若干。迅即籌款陸

續批解。不准再有延緩。致誤戎機。鄂粵尚係完善之區。所有粵省欠餉十八萬餘兩。鄂省欠餉四十二萬兩。著於該省釐金項下。由黔派員協收。按數提解。以濟要需。將此由五百里各諭令知之。署安徽巡撫吳坤修奏。親勘沿江被水災區。妥籌撫恤。得旨。卽著該署撫督飭屬員認真辦理。務令實惠及民。毋令流離失所。以副軫念。鼎營勇丁現已遣散。到皖境後。仍當妥為約束。毋使滋事。予貴州

都勻陣亡總兵官王松林等十四員祭葬。世職加等。舉人王寶傑賞卹加等。甲辰諭軍機大臣等。榮全奏界務辦竣。俄國實無侵越。並議償俄人被擄錢數。暨請飭接濟索倫人眾各摺片。俄國立界事宜。久未定議。茲據該大臣奏稱。此次與俄官會議。分立地界。將中原新立牌博八處。俱用清字註明。細閱紅綫。兩國圖形相符。與從前原圖紅綫均屬相合。其唐努烏梁海蒙官等眾。皆結稱俄國實無

絲毫侵越。該大臣經理此事。使俄人無所刁難。而蒙眾亦皆悅服。實屬不負委任。現在烏屬邊界業經立畢。榮全已馳赴索果克卡倫。著奎昌迅將俄國印押圖記如期送到。其善後各務。著榮全於回抵烏城後。會同福濟等悉心酌度。次第辦理。科城界務。是奎昌專責。此時正可乘機利導。該大臣當趕緊籌辦。毋稍稽延。俄國商民被擄錢數。既據奏稱以夷鈔二十四萬分三年補償完案。合之中原銀

數。約共需銀十一萬數千有零。惟此項銀兩將來送交恰克圖補償。究從何處籌給。仍著該大臣於酌定後。詳細奏明。索倫人眾現已移入境內。自應妥為拊循。著文碩錫綸。迅即籌款量加接濟。俾免流離失所。如該處存項不敷。卽著文碩等咨明福濟等。於烏里雅蘇台庫存銀兩內酌量撥給。以資應用。至此次分界設立牌博後。該城大臣等務當派委妥員隨時嚴查。不得視為具文。以重疆界而消

隱患將此各諭令知之○吏部左侍郎胡肇智因病乞假以右侍郎龐鍾璐兼署左侍郎○以烏里雅蘇台新立界牌鄂博出力賞佐領銜防禦音得泰二品頂帶花翎筆帖式常秀等藍翎餘加銜有差○乙巳遣官祭

文昌帝君廟○諭軍機大臣等有人奏職官居心貪詐曲意鑽營據實陳奏一摺據稱川省道員宣維禮本係參革之員夤緣開復辦理川軍善後有濫用捐款需索夫馬各情並

借散給籽種為名侵蝕貴州倉穀三百石成綿龍茂道鍾峻暗樹私心廣收門生妄改場規包攬釐局勒銷積引候補道彭汝琮性情貪詐行止驕恣納賄招權罔知顧忌各等語川省頻年多事鄰封未靖亟宜整頓吏治方能安輯閭閻若如所奏宣維禮等劣蹟昭著豈可稍事姑容著李鴻章按照摺內所參各情於行抵川省後就近逐款確查據實奏辦不得稍涉徇隱彭汝琮因何在省逗遛之處

著一併查明具奏原摺著鈔給閱看將此由五百里諭令知之○以正紅旗滿洲副都統果勒敏署正藍旗漢軍副都統○

上以祭

社稷壇自是日始齋戒三日○丙午諭軍機大臣等蘇鳳文馮子材奏官軍克復高平夷省並勦辦黔苗獲勝各摺片越南木馬地方為高平夷省要鎮該處土匪勾引逆首吳亞終分踞木馬高平意欲併力死守經馮子材派

令總兵謝繼貴等督帶兵勇分路進攻四月二十三日以後官軍節節追勦先後將馬腹隘等處賊壘平毀殺斃賊匪多名克復高平夷省照錄該國王咨文及太原宣光與圖呈覽並懇賞還夷地所有高平地方自應仍歸越南管理著蘇鳳文等知照該國王即行撥兵防守並派員辦理善後事宜蘇鳳文等當督飭各軍滾營前進務將逆首吳亞終擒獲掃除餘黨以絕根株至各軍深入糧運維艱

著卽派員設法採辦源源接濟一面仍嚴飭將弁約束兵勇不准絲毫擾累夷疆是為至要。至清江苗匪先後竄擾懷遠永從等邑古州苗匪亦時出肆掠李七一股出沒於獨山交界之區與九阡逸匪勾結雖經官軍擊退而接捕不可稍鬆蘇鳳文已飭潘其泰孔憲隆等督兵分路防勦並令何元鳳帶勇馳赴羅城截擊以固柳郡門戶卽著督令該副將等認真勦辦毋使蔓延將此由五百里各諭令知之○以廣西官軍勦平貴州荔波苗匪予副將潘其泰孔憲隆以總兵官簡放州同何振新以知州用並賞花翎○予直隸深州等處殉難紳民李萬億等暨婦女二千四百九十八名口分別旌卹如例並予建祠○丁未祭先師孔子遣協辦大學士刑部尚書瑞常行禮○諭內閣都興阿等奏請擇吉恭請神牌還御一摺

福陵

隆恩殿等工完竣著欽天監於九月內敬謹選擇吉日先期知照都興阿等屆期恭請神牌還御以昭誠敬○又諭穆圖善奏辦理安插南八營回眾著有成效一摺前因穆圖善奏甘肅靜甯州回目李得倉率眾投誠當經諭令妥為安插茲據奏稱派令道員張瑞珍等前往查辦李得倉造冊呈報南八營大小男婦五萬餘人除被脅漢民分別遣散外其回眾三萬餘人均安插於張家川等處年餘以來安分務農極為馴順去冬陝回竄擾南路該回眾等並能聯絡漢民協同守禦實能改過自新深明大義殊屬可嘉署鞏秦階道張瑞珍辦理此事始終妥協著交軍機處存記候旨錄用並賞加布政使銜回目李得倉約束部眾真心歸正著賞戴四品花翎以昭激勸至該回眾等既經反正卽與良民無異著左宗棠穆圖善飭令該地方官妥為撫綏

盡心化導俾得力田敦睦勉為善良並仍責令李得倉隨時鈐束各安生業毋任稍滋事端此外甘省回眾果有悔罪輸誠真心向化者朝廷即當貸其前罪予以自新儻或辦理不善敷衍目前致日後仍煩兵力亦惟該督等是問此旨著左宗棠穆圖善刊刻謄黃徧行曉諭用示朝廷覆幬無私咸與維新至意○諭軍機大臣等劉嶽昭奏滇省尚未解圍擬俟昭通等處漢回搆釁辦有端倪即行赴

省會勸等語雲南省城圍尚未解雖經劉嶽昭飭令總兵李家福等率兵赴省與岑毓英等會籌攻勦而附城賊壘負固如常官軍現紮南門之大梵宮等處擬將該逆糧路截斷以期會攻江右館一帶巨巢即著岑毓英會商馬如龍督飭各軍迅圖掃蕩惟賊壘尚眾兵力甚單劉嶽昭若俟昭通等處布置就緒方行進援未免緩不濟事著一面飭令唐友耕等將漢回各事妥為籌辦一面即帶張松

林劉奇義等營馳援省城會合夾攻盡殲醜類不得稍涉遲迴致誤大局派出之提督胡志祺等四營並著催令迅速前進毋稍玩誤將此由六百里各諭令知之○以甘肅張家川等處安插投誠回眾出力予通判張春生守備呂有寬等加銜升敘有差○以雲南官軍援勦貴州賊匪普安廳城解圍賞副將張松林巴圖魯名號知州文鴻盛等花翎六品軍功劉官德等藍翎餘加銜升敘有差○戊

申祭

大社

大稷遣惇親王奕誼恭代行禮○

太宗文皇帝忌辰遣官祭

昭陵○諭內閣曾國藩奏續查屬員優劣分別開單呈覽一摺署直隸正定府知府張光藻南路廳同知蕭履中候補直隸州知州成福署冀州知州葉增慶懷安縣知縣鄒振岳大城縣知縣李璋候補知縣李逢源北河知縣

署南岸頭工州同王養壽候補知縣張廷緒據曾國藩奏稱該員等操履不苟勤敬自持續行列入剡章當此整頓吏治之際亟宜甄拔循良以端表率著曾國藩仍飭該員等潔己愛民始終一轍仰副朝廷厚望甯津縣知縣胡季煊貪酷眾著民怨沸騰著卽行革職永不敘用仍著該督將該員被控案件查明參辦署永年縣知縣王庶曾根本澆薄性近貪鄙前在成安任內被控按畝派收民錢雖已發還究屬紊亂官常晉州知州陸邦燧性情疏懶嗜好甚重屢被該州紳民控告浮收勒捐等款均著卽行革職還安縣知縣周培錦才識迂拘辦事遲鈍難膺民社新樂縣知縣劉福齡巧偽無能銜蠹虐民毫無覺察冀州知州宋炳文性情疲緩公事廢弛惟周培錦宋炳文係進士出身劉福齡係舉人出身均著改為教職選用保安州知州李作棠性耽安逸罷輒不職著以縣丞降補前懷安縣

知縣谷洪德性情乖僻治事顛預著勒令休致○以承辦河務不善直隸永定河道徐繼鏞開缺另補○已酉

上詣

奉先殿

壽皇殿行禮○諭軍機大臣等戶部奏遵撥吉林冬圍經費銀兩請飭河南巡撫迅速籌解一摺吉林舉行冬圍所有官兵應需資裝及帳房旗號各項經費銀兩自應速撥以期無

誤除吉林本省新增土稅抵用外共需實銀一萬四千四百餘兩著李鶴年督飭藩司於該省實存清查案內迅卽如數提撥解赴盛京戶部交納一面知照富明阿派員領取毋稍遲誤該將軍務將管圍官弁及兵役人等認真挑選實力操演於舉行狩獵之中寓整飭戎行之意毋得有名無實其應行製造各件於事竣後將動用數目覈實造報以杜浮冒將此由五百里各諭令知之又諭戶部

奏遵催西征協餉一摺。江浙等省協濟左宗棠等餉項。總計八百十餘萬兩。前經戶部奏催。僅據湖北續解銀八萬兩。浙江續解銀二十萬兩。江西續解銀六萬兩。江蘇續解銀四萬兩。廣東續解銀十二萬兩。安徽續解銀二萬兩。山西續解銀二萬兩。零山東續解銀二萬四千兩。粵海關續解銀二萬兩。覈之各該省應解數目。大相懸殊。此外各該省關並未據報續解。陝甘需餉孔亟。豈容如此玩延。著

李鴻章文煜馬新貽英桂瑞麟李瀚章劉坤一。丁日昌卞寶第李福泰郭柏蔭英翰劉崐。李宗義。丁寶楨李鶴年。崇禮按照該部此次單開數目。趕緊籌解。毋得藉詞推諉。以濟要需。如有仍前玩誤及欠解最多者。並著左宗棠查明。將該省之藩司等指名嚴叅。現在東南救靖。江南浙江湖北山東等省所留勇丁。尚屬不少。應如何酌量裁減。將節省餉需協濟西征之處。著李鴻章馬新貽。丁日昌郭柏

蔭李瀚章英翰。丁寶楨實心籌畫。俾裕餉源。其山西南安徽山東江南等省。原協張曜宋慶郭寶昌潘鼎新等餉項軍火。無論各該營有無裁汰。均著各該省隨時報解。毋稍短欠。另片奏遵議穆圖善軍需數目等語。各省協撥之款。每年專解甘省及秦州銀一百二十萬兩。著照部議。仍由穆圖善收支。隨時派員迎提。其各省協撥西征之餉。仍著左宗棠遵照前旨。統收分撥。以免紛更。穆圖善所請

添撥釐金劃半歸甘之處。著毋庸議。至四川山西協甘米價。該將軍務飭司道等詳查已收未收各若干。覈實報部。所有甘營馬步兵勇細數。及受協各款。仍著該將軍詳晰開報。並懍遵前旨。將布置裁併之處。咨明左宗棠辦理。原單均著鈔給閱看。將此由五百里諭知左宗棠李鴻章文煜穆圖善馬新貽英桂瑞麟李瀚章劉坤一。丁日昌卞寶第李福泰郭柏蔭英翰劉崐。李宗義。丁寶楨。李鶴年。並

傳諭崇禮知之。○庚戌。

太祖高皇帝忌辰遣官祭

福陵。○諭內閣本月初三日丁寶楨奏據德州知州趙新稟稱有安姓太監乘坐大船捏稱欽差織辦龍衣船旁插有龍鳳旗幟攜帶男女多人沿途招搖煽惑居民驚駭等情當經諭令直隸山東江蘇各督撫派員查拏卽行正法茲據丁寶楨奏已於泰安縣地方將該犯安得海拏獲遵旨正法其隨從人等本日

已諭令丁寶楨分別嚴行懲辦我朝

家法相承整飭宦寺有犯必懲綱紀至嚴每遇有在外招搖生事者無不立治其罪乃該太監安得海竟敢如此膽大妄為種種不法實屬罪有應得經此次嚴懲後各太監自當益知儆懼仍著總管內務府大臣嚴飭總管太監等嗣後務將所管太監嚴加約束俾各勤慎當差如有不安本分出外滋事者除將本犯照例治罪外定將該管太監一併懲辦並

通諭直省各督撫嚴飭所屬遇有太監冒稱奉差等事無論已未犯法立即鎖拏奏明懲治毋稍寬縱。○諭軍機大臣等丁寶楨奏拏獲招搖煽惑之太監遵旨正法並分別查辦隨從人等一摺已明降諭旨宣示矣安得海既經正法其隨從之陳玉祥李平安二名亦係太監均著卽行絞決此外尚有太監幾人著丁寶楨於訊明後一併絞決以儆效尤其餘隨從人等跡近匪類者卽懍遵前旨分別

懲辦至黃石魁一名係何人役摺內所稱前站官究係何官抑係冒充並著訊明辦理安得海衣物等項毋庸存儲藩庫卽由該撫派員解交內務府查收將此由六百里諭令知之。○以鑲黃旗漢軍都統春佑署正黃旗領侍衛內大臣鑲白旗蒙古都統穆騰阿署鑲藍旗漢軍都統。○辛亥遣官祭

關帝廟。○壬子諭內閣李瀚章奏查明杭嘉湖等府被災大概情形一摺本年浙江杭嘉

湖三府屬地方。夏秋多雨。江流甚漲。塘堰漫溢。該處田畝被淹居多。補種不及。秋收難免減色。覽奏實深憫惻。因思該省歷年以來。農田雖逐漸墾荒。而元氣猶未全復。此次復遭水患。小民困苦流離。亟應加意撫恤。著李瀚章督飭藩司。派員分赴各屬。詳細履勘。分別被災輕重。酌量調劑。毋令一夫失所。用副軫念民艱至意。○諭軍機大臣等。定安桂成奏馬隊官兵。勦除河西股匪。淨盡一摺。回匪馬

翰。由邊內竄擾杭錦旗屬沙拉召地方。經達爾濟等督飭所部。左右抄擊。賊匪敗逃。官軍直前追殺。斃匪甚多。投河淹斃者無數。據獲賊供。馬翰已於軍前殲斃。竄撲中灘河干之馬步回匪。亦經察哈爾馬隊連番追勦。斬除淨盡。所有達爾濟等所部出力官兵。著准其擇尤彙案奏保。惟沿邊一帶。時居秋成。河西鄂爾多斯七旗地面。又極遼闊。該逆等盤踞甯靈。難保不分股出邊。復圖擄掠。仍著該將

軍等咨會杜嘎爾。嚴飭達爾濟等。聯絡張曜。宋慶各軍。確探賊蹤。節節追勦。一面分飭沿河各隊。加意嚴防。毋稍疏懈。金順何以久無奏報。現在行抵何處。曾否遇賊接仗。著卽懷遵疊次諭旨。會同張曜等軍。相機兜勦。迅掃逆氛。並將賊勢軍情。隨時據實具奏。將此由五百里各諭令知之。○癸丑遣官祭昭忠祠。○諭軍機大臣等。豐紳謙禧奏。陝匪近城滋擾。請飭金順赴甯會勦一摺。據稱陝匪自中

衛平羅等處竄至甯夏。滿漢兩城城外屯紮。六月初二日。馬賊在府城西門外搶擄。副將方大順追至蘇家燒房地方。將賊擊敗。忽有馬賊從平羅大路前來。該副將銜入賊隊中。槍陣亡。現在賊勢鸚張。請飭金順迅速來甯等語。前因陝匪竄入甯境。諭令金順會合張曜等軍。帶隊馳援。刻下定遠營業已解圍。張曜督軍追勦。距甯夏僅八十里。豐紳等所奏賊情。係在張曜獲勝以前。所有該處近日情

形已否鬆緩著該將軍等查明馳奏並著定
安催令張曜統率所部乘勝跟追毋任該逆
得以喘息金順如可兼顧卽著懍遵疊次諭
旨會合張曜各軍相機夾擊以靖甯境豐紳
等於諸軍未到之時如賊匪仍前肆擾著卽
督率官兵營勇將兩城防守事宜妥為布置
加意嚴防不可稍涉大意將此由五百里各
諭令知之○調正紅旗滿洲副都統果勒敏
為廣州漢軍副都統○予甘肅甯夏陣亡副

將方大順參將李世瑗都司李志九祭葬世
職加等○甲寅

上奉

慈安皇太后

慈禧皇太后幸漱芳齋侍午膳○諭內閣兵部
等部奏遵議接班遲延之大臣處分一摺散
秩大臣鑲紅旗滿洲副都統侯刑部左侍郎
恩齡著革去散秩大臣仍罰俸四年並開
鑲紅旗滿洲副都統缺其所兼之文職刑部

左侍郎著降二級調用○諭軍機大臣等岑
毓英奏官軍疊破附省賊壘並各路勦匪獲
勝情形一摺省外李家地老鴉營等處賊壘
疊經岑毓英督軍攻克劉嶽昭所派李家福
等亦已進攻大梵宮等處賊巢現在兵力較
厚著岑毓英迅督各軍將江右館一帶踞賊
力圖掃蕩南路得手則西北兩面自可迎刃
而解其祿豐安甯易門昆陽等處賊匪亦經
各軍分投攻擊擒斬頗多勦辦甚為得手附

省之賊糧斷援絕勢已窮蹙該督撫等務當
乘此聲威激勵將士奮勉圖功毋稍鬆勁並
著劉嶽昭仍遵前旨卽帶張松林等軍馳赴
省城會同岑毓英妥籌布置併力攻勦以期
迅掃逆氛將此由五百里各諭令知之○雲
南巡撫岑毓英密陳滇省軍務並請俟省圍
解後陞見得旨該撫惟當以大局為重開誠
布公和衷共濟會同督臣提臣將近城各賊
壘以次掃蕩迅奏膚公毋得各存意見所請

俟省圖解後來京陛見之處著毋庸議。○調鑲藍旗蒙古副都統慶至為正紅旗滿洲副都統。以理藩院右侍郎桂清兼鑲藍旗蒙古副都統。正白旗蒙古副都統吉和署正藍旗漢軍副都統。○以通政使司副使成林為光祿寺卿。○實授全祖凱雲南騰越鎮總兵官。○予雲南祿豐等處陣亡守備劉興周等二十一員祭葬世職。

大清穆宗繼天開運受中居正保大定功聖智誠孝信敏恭寬毅皇帝實錄卷之二百六十四

大清穆宗繼天開運受中居正保大定功聖智誠孝信敏恭寬毅皇帝實錄卷之二百六十五

同治八年己巳八月乙卯諭軍機大臣等李

宗義奏官軍追勦回逆獲勝一摺回逆於本月初二日竄擾郡王旗之那把害廟地方。經提督蔣東才等督軍迎擊該逆聞風西竄。我軍追殺百餘里復出小隊誘賊前後夾擊。斃賊不少該逆悉向西北敗竄。訊據賊供逆首白禿子現已陣斃。初六日蔣東才移紮哈拉寨探得準噶爾旗境內亦有賊蹤。著定安桂成飭令宗慶迅催蔣東才等乘勝越勦。務將準噶爾旗境內賊匪悉數殲除毋留餘孽。至

清托河保等處與該旗境僅隔一河並著定
安桂成李宗羲督飭在防官兵嚴密防範不
可稍有疏虞將此由四百里各諭令知之○
調禮部右侍郎志和為刑部左侍郎理藩院
右侍郎桂清為禮部右侍郎以內閣學士廣
壽為理藩院右侍郎○調正紅旗蒙古副都
統載岱為鑲紅旗滿洲副都統以頭等侍衛
伊昌阿為正紅旗蒙古副都統 丙辰秋分
夕

月於西郊遣定郡王溥煦行禮 遣官祭黑龍

潭

昭靈沛澤龍王之神玉泉山

惠濟慈佑靈濩龍王之神昆明湖

安佑普濟沛澤廣生龍王之神密雲縣白龍

潭

昭靈廣濟普澤龍王之神 遣官祭圓明園

惠濟祠

河神廟 諭內閣英桂等奏遵旨查明才不

勝任之道員請開缺送部引見一摺福建興
泉永道曾憲德遇事任性不洽輿評著即行
開缺送部引見 以江南官軍擒獲山東幅
匪並按捕徐州土匪出力賞都司邵捷三等
花翎把總夏成功等藍翎知縣李寶等加銜
升敘有差○丁巳諭軍機大臣等丁日昌奏
請將熟悉洋務之參將仍行留滬一摺福建
奏調參將王榮和既據該撫奏稱在滬辦理
中外交涉事件經手未完著准其留滬差委

以資熟手即由該撫知照文煜等毋庸調赴
閩省將此諭令知之○又諭總理各國事務
衙門奏民教仇殺案件請旨飭催早結一摺
酉陽州團民殺斃教民教民殺斃團民一案
疊經該衙門咨催崇實等秉公迅結惟據法
國使臣羅淑亞等文稱所殺教民數內有教
士李國一名係屬該國之人崇實等前次咨
送冊內首開李國安姓名是否即教士李國
及李國安是否洋人之處均未聲敘明晰而

該使臣等屢以教士被殺並不緝兇究辦等語向該衙門爭論案關殺斃多命按之中國律例亦應查覈人數及早訊辦此時中外交涉事宜甚關緊要何得將此案任意拖延該使臣欲往川自辦之意雖經該衙門理阻而終日曉曉究屬不成事體李鴻章計已抵川著卽會同崇實吳棠嚴飭該地方官將殺死李教士一案查拏真正兇手按律審辦毋任漏網並著將民教互殺人數秉公查訊及早

擬結李國安是否卽係李國亦當確查聲覆不可稍涉含糊其覃教士率匪殺斃平民多命之案李鴻章等亦卽悉心籌辦務期毋枉毋縱以弭爭端將此由五百里各諭令知之追予江蘇各屬陣亡殉難紳民沈金鼇等暨婦女一千七百三十二名口分別旌卹如例戊午以神靈顯應加湖南長沙縣城隍神封號曰靈佑諭軍機大臣等文盛奏獨石口應建兵房請仍歸地方官辦理一

摺伊犁官兵安插獨石口應建住房一百四間前經文盛奏請由該都統衙門派員興修並在庫存軍需項下撥銀動用茲據奏稱招商估計工價浩繁庫存軍需不敷應用請飭直隸總督令地方官辦理以期妥速等語自係實在情形所有此項官兵房間著曾國藩責成該地方官踴勘地勢妥為建蓋俾資棲止現在節逾秋分水土漸凍既據該都統奏稱今歲未能興工應如何先行借給住房毋

令該官兵失所之處著文盛妥籌辦理將此各諭令知之又諭左宗棠奏分道進剿布置情形一摺甘省北路兵力已厚漸可肅清南路河州踞逆近無大股出竄蘭州運道漸已疏通惟土匪張貴盤踞靜甯州屬威戎鎮等處聚眾甚多分擾靜莊會甯各境此賊不除為平涼秦州一大患左宗棠現調黃鼎簡敬臨等分搗威戎鎮水洛城賊巢著卽飭令迅速攻剿務將此股剋期殲滅毋稍遷延其

泰安神峪河另股回逆並著嚴飭吳士邁等實力接勦俾中路早日廓清庶兵力不至為其牽掣陝甘逆回萃於平羅靈州中衛一帶劉松山已抵花馬池著左宗棠飭令該提督剋日進兵並遵前旨檄飭郭寶昌軍合力進勦節節掃蕩毋任日久蔓延邊外之賊雖經張曜等疊次擊敗而此時大兵進逼甯靈恐該逆以邊外為逋逃藪據該督奏稱金順等馬步各營已行近磴口著金順聯絡張曜等

軍勤加偵探遇有賊蹤務須實力堵勦杜其向東北奔竄之路並著該副都統將北路賊勢軍情隨時據實具奏甯夏防兵甚單如遇有警並著金順相機援應前因穆圖善奏稱南路軍情緊要諭令左宗棠酌量移紮秦州茲據左宗棠奏稱涇州為適中之地可以兼顧南北即著暫時駐紮該處妥籌調度穆圖善即將總督關防迅速派員齎交左宗棠接受毋庸再行請旨該大臣接篆後蘭州省垣

防務應交何人接辦或左宗棠即赴省城駐紮以便居中調度之處即著酌度辦理儻有疏虞仍惟該大臣是問將此由六百里各諭令知之又諭錫綸奏厄魯特人眾不能順聽分安設法辦理情形布倫托海賊首自投各一摺厄魯特人眾附近科城者僉欲赴杜爾伯特安插不願赴喀爾喀並有喇嘛奈愷等七人聚集五百餘眾搶掠扎哈沁烏梁海等部落經錫綸招致奈愷等派為頭目收集

流亡現在已得一千餘名分赴杜爾伯特安插其餘散往各處之人分安喀爾喀眾情既有不願而杜爾伯特一處又不能安置五千餘人之多應如何設法安插消患未萌之處著福濟文碩錫綸統籌全局妥為辦理棍噶扎勒參勒辦變民獲勝賊首張敖親投到營張舉亦為眾所縛獻一併解送至科經錫綸訊明正法其餘脅從人眾雖經收撫仍著福濟文碩錫綸會商棍噶扎勒參妥籌安置毋

令該人眾失所致滋事端將此由六百里各諭令知之○欽差大臣左宗棠奏請調前任陝西漢中府知府林士班赴營差委允之○已未諭軍機大臣等定安桂成奏官軍截勦竄匪連獲大勝一摺據奏提督蔣東才勦賊情形與李宗義前奏大略相同現在達爾濟一軍勦辦達拉特旗竄匪在佈魯魯招地方大獲勝仗悉將賊匪殲滅並將郡王旗境另股回匪勦除僅由西村竄出馬賊二三十騎

往西逃竄準噶爾達拉特郡王等旗已無賊蹤惟屢據獲賊供稱甯靈一帶踞匪屢欲分股出邊掠食鄂爾多斯七旗沿邊地方亟應嚴密防範著定安桂成咨催杜嘎爾飭令達爾濟等將竄出邊外賊匪悉數殲除與宋慶各軍聯絡聲勢確探賊蹤節節進勦並飭各隊嚴防沿邊要隘不得稍有疏虞金順一軍昨據左宗棠奏稱行近磴口現在究抵何處日久未見奏報著查明具奏並催令該副都

統懍遵疊次諭旨會合張曜等軍迅速前進將邊外竄匪合力埽蕩不得稍有遲誤將此由五百里各諭令知之○以鑲紅旗漢軍都統奕劻署鑲白旗蒙古都統正藍旗蒙古都統靈桂署鑲藍旗漢軍都統正白旗漢軍副都統銘安署右翼前鋒統領以刑部左侍郎志和署鑲黃旗蒙古副都統鑲黃旗漢軍副都統托倫布署正藍旗漢軍副都統○庚申諭內閣劉崐奏查明安鄉等縣被災情形

分別撥款撫恤一摺本年湖南省春夏多雨各屬被水輕重不一安鄉華容沅江等縣地勢本窪江湖並漲被淹甚寬瀏陽醴陵等縣山水陡衝災區甚廣該撫已飭司籌款賑撫酌碾倉穀接濟民食小民蕩析離居諒可不至失所仍著該撫督飭屬員選派地方公正紳士將撫恤事宜妥為經理其近省各縣災民流離轉徙並著酌撥經費分別遣撫總期實惠及民毋任丁胥舞弊用副軫念民艱至

意○諭軍機大臣等都興阿等奏賊匪聚眾滋擾截留廳官現派官兵勦捕一摺匪首叢俊茂趙日先等率領土匪由大東溝進邊在北井子向各鋪商逼索錢文即奔赴鳳界龍王廟地方滋擾並將岫巖廳通判截留廟上實屬藐法已極奉天地方近年盜風稍息乃此股賊匪膽敢聚眾滋擾截留廳官若不亟予勦除何以安善良而戢奸宄都興阿等現已派毓昌等督兵會勦著即嚴催各該員確探賊蹤迅速撲滅將匪首悉數擒拏不准稍涉稽遲致滋延蔓並一面飭飭叢登甲馳赴孤山嚴為防範該處山路紛歧現當木穽偷運之時尤恐有奸匪從中煽惑該將軍等務令色楞額詳察情形妥為布置以便合力勦捕綏靖地方將此由四百里各諭令知之○辛酉諭軍機大臣等金順奏馳抵纏金剋日西進及河東協餉請免勾扣並飭速撥欠餉各摺片近日邊外竄匪疊經張曜等截勦已

無賊蹤前圍定遠營股匪亦經提督楊春祥等擊退由石背子山迤南至甯夏中衛境內大股陝回屯踞猖獗異常金順馳抵纏金擬即會合張曜烏爾圖那遜之師徑由石背子山節勦而南直赴平羅所籌尚合機宜惟查該副都統七月二十四日馳抵纏金至本月初十日始擬拔隊西進雖因籌運軍糧而頓兵已半月之久著即懍遵疊次諭旨會合張曜各軍迅掃逆氛毋再遷延不進並著定安飭令張曜等乘勝進兵以期一鼓殲除甯夏軍餉專恃河東鹽課接濟自左宗棠提撥後驟少八萬兩金順慮續有提撥如前勾扣該軍餉稽奇絀亦是實情著戶部嗣後如有提撥河東鹽課免於甯夏指撥十八萬兩內勾扣以清款目至河東道欠解甯夏丁卯戊辰兩綱協餉共九萬二千兩並已已綱應解十八萬兩著李宗義嚴飭該道趕緊分批撥解源源接濟毋誤要需將此由六百里各諭令

知之。又諭崇實吳棠奏援黔官軍疊勝陣斬苗酋。現籌進取一摺。黔省下游自楚軍黃飄失利後。苗酋張老熊等糾集各股苗匪。窺撲牛場甕安。經唐炯檄飭副將向長曙等軍分路進剿。將該匪金幹幹等擊敗。陣斬逆首多名。張老熊仍率黨由翁巴而來。官軍突起。卽將該逆槍斃。餘賊由羅坳五里橋等處回巢。復為伏兵要殺。其出撲重安之賊。現已退至河外。擦耳崖王家牌各處苗匪亦經官軍

先後擊退。此次川軍進剿黔苗。屢殲賊首。實足以壯聲援。惟黔境下游處處皆賊。非各路官軍合力勦辦。不能痛掃逆氛。崇實等仍當飭令唐炯穩固後路。一面檄催總兵李有恆迅率所部前往會擊。劉崐亦當分飭席寶田等軍探蹤前進。與川黔各軍聯絡聲勢。乘勝規取。並著曾璧光統籌全局。調撥黔中將士分投兜剿。不得專藉客援坐失機會。崇實等另片奏昭通文武稟留提督唐友耕等語。昭

通為迤東門戶。關繫緊要。前諭劉嶽昭飭令唐友耕將漢回各事妥辦。卽帶張文林等馳援省城。茲據稱該處回匪招聚抗拒官軍各情。是唐友耕一軍勢難剋期前進。惟滇省城圍未解。岑毓英等待援甚切。若將該軍專守昭通。則於省事無濟。此時或留唐友耕勦辦昭通回匪。或分軍往解省圍之處。均著劉嶽昭熟審情形。從長辦理。岑毓英於諸軍未到之前。仍著懍遵前旨。會同馬如龍督軍防剿。

毋稍疏虞。將此由六百里各諭令知之。○又諭伊勒屯奏偵探西路賊情。現籌防範一摺。據稱烏垣踞逆。自上年擊退後。本年五月間。吐魯番踞逆約有數千。竄紮木壘河。該逆復潛出駐紮奇台所屬馬廠窩子地方。經軍功鄧生玉帶領民勇力擊獲勝等語。烏城等處逆匪。時思竄擾巴城防務。極關緊要。著伊勒屯何瑄督飭官兵勇嚴密防堵。毋得稍有疏虞。至所稱文麟派員協同肅州委員赴烏

招撫並著速行知照文麟等嚴飭各該委員斟酌情形妥為辦理毋為該逆所給將此由五百里諭知伊勒屯並傳諭何琯知之○又諭棍噶扎勒參奏招撫難民會商安置及克復布倫托海報解首犯請將出力弁兵酌保並土爾扈特親王等出力捐輸分別請獎各摺片布倫托海變民經該呼圖克圖帶兵收復尚屬出力其隨征弁兵著錫綸會同查覈酌請獎敘以示鼓勵該處賊首張敖張譽業

經錫綸訊明正法其脅從人眾並被難各民應如何籌給口食妥為收撫之處現在棍噶扎勒參前赴烏科即著福濟錦丕勒多爾濟奎昌明瑤文碩錫綸會同籌商毋令稍有失所致生事端土爾扈特親王等於棍噶扎勒參帶兵進剿時捐輸馬匹羊隻以濟要需並各帶隊隨同進剿洵屬好義急公自應酌給獎勵惟該呼圖克圖所請獎敘未免過優著福濟文碩錫綸再行查明奏獎以昭覈實棍

噶扎勒參另片奏科布多主事阿柯敦布講求時務深有遠見熟諳情形通曉蒙語可否飭令幫同錫綸辦理一切等語布倫托海地方甫經安定辦事需人如果阿柯敦布才具可用即著文碩錫綸就近訪查酌量差遣不得稍存遷就之見致有貽誤將此由六百里各諭令知之○以四川官軍援剿貴州牛場等處苗匪獲勝予副將向長曙以總兵官簡放並賞巴圖魯名號投誠賊目韋文蔚以守

備用並賞花翎○旌表守正捐軀河南祥符縣民徐化桂妻丁氏新野縣民趙四禮妻鄭氏○壬戌

世宗憲皇帝忌辰遣官祭泰陵○

上詣

壽皇殿行禮○以神靈顯應加東河

楊四將軍封號曰贊順

曹將軍封號曰顯佑

陳九龍將軍封號曰護國 癸亥諭內閣吳
崇奏甄別州縣開單呈覽一摺四川筠連縣
知縣傳有霖并研縣知縣王鳳翥年力就衰
難期整頓均著原品休致廣安州知州桂溥
辦事遲鈍著開缺俟有相當缺出再行奏補
捷為縣知縣陳啟銜永川縣知縣方翊清才
具短絀難膺民社均著以府經歷縣丞歸部
銓選南部縣知縣慶泰信任家丁才識卑陋
西昌縣知縣姚繼祖質地庸闇獄失平前

署合江縣知縣候補通判王容章聲名平常
前任邛州直隸州知州胡興倬前署名山縣
知縣試用通判寇用平吏事疲玩不治士情
均著勒令休致以四川筠連等處截勦滇
匪出力予總兵官胡尊賢唐桂林王聚蘭鍾
玉勝唐友勝陳再益劉華燦以提督蘭旂賞
提督胡日祥劉名崇彭順五一品封典參將
方明鑑等花翎千總彭祖齡等藍翎餘加銜
升敘有差 旌表守正捐軀河南陝州民員

喜迎妻趙氏 甲子諭內閣溥楸等奏拏獲
夥竊官物各犯請旨嚴辦一摺

景陵

裕陵

神廚庫內竟有竊犯邵貝糾同賊夥先後偷
竊木槽木盆牲匣錫裏多件業經溥楸等督
飭司員會同地方文武將首犯邵貝暨夥犯
姚幗志等共四名拏獲發交地方官審訊
陵寢重地該犯等竟敢夥同偷竊實屬昏不畏

法竊犯邵貝張五姚幗志姚三楞均著交刑
部嚴行審訊從重定擬其逸犯四名仍著嚴
飭各屬認真緝拏務獲究辦所有內閣防司
員內管領暨綠營將備等於官物被竊毫無
覺察本有應得之咎姑念其立即會同緝獲
首從各犯多名功過尚足相抵均著免其置
議其該管八旗總管翼長及該班章京等既
疏防範又不能協同獲賊實屬咎有難辭著
俟訊明失竊確日查取職名送部叅處另片

奏請將首先獲犯之並非該管各員并地方官獎勵等語著刑部於定案時聲明請旨尋奏遵訊邵貝疊竊官物實屬藐法應從重發往黑龍江安置為從之張五等杖一百流三千里獲犯之各員并地方官請由吏兵二部查奏請獎從之○又諭李宗義奏遵查藩司未能勝任一摺山西布政使胡大任飲酒自娛遇事健忘廢弛因循實不勝藩司之任胡大任著卽休致○諭軍機大臣等文麟奏西

路賊情並遵鈔前給烏城逆首諭帖呈覽一摺該大臣所給逆首妥得璘諭帖措詞尚為妥協惟迄今兩月有餘該逆首曾否與各回目會商定局未見回信亦未見委員烏仁泰等稟覆是否妥得璘從中扶制使逆目不敢投誠殊為可疑近日該逆又有與鄧生玉等尋釁之說該大臣以回逆詭譎異常已調前留敦煌防軍來哈協防著一面密為偵探一面嚴加防範此中操縱機宜在該大臣隨時

妥籌不可稍涉大意景廉既據安敦玉等處紳民稟留著准其暫緩赴任將安西等處力籌保衛並將哈密後路妥為料理卽行西進昨據伊勒屯奏烏垣等處踞逆不時騷擾成祿疊經諭令出關現在行抵何處杳無奏報直將歷降諭旨視若弁髦豈以派一委員赴烏招撫遂可了事耶著該提督迅速出關相機勦辦一面以起程日期具奏如再遷延自問當得何罪將此由六百里各諭令知之○

工部右侍郎石贊清因病解職以前任山東巡撫閻敬銘為工部右侍郎管錢法堂事○調湖北布政使何璟為山西布政使以湖北按察使張建基為布政使○乙丑遣官祭賢良祠諭軍機大臣等前據御史徐景軾奏請飭批濬運河並籌辦河運各情當經降旨交該部議奏茲據戶部奏酌擬三條請飭覈議詳加披覽如導河南行應如何將蘭儀以東故道設法疏濬汶河之分水口移於南旺

之北泗水口開於南旺之南築戴村壩以遏汶水復於臨清以南引衛入運是否可行著馬新貽張之萬蘇廷魁李鶴年丁寶楨派員相度會議具奏至江浙軍船久已無存即豫求軍船亦多殘缺應如何借用民船抑或酌量分造著各該督撫等一併籌議其河運經費亦當豫為籌計不得另動正款並著馬新貽丁日昌李瀚章李鶴年妥為籌議具奏戶部摺均著鈔給閱看將此各諭令知之尋奉

刻下黃河穿運北徙挾汶東趨不特蘭儀故道驟難修復即將汶河分水口移北亦不過隨黃入海不能達於臨清至於引衛入運及南徙泗口里段遙遠工費浩繁辦理殊無把握惟有將運河各工擇要興修並築壩偪溜以免衝刷而濟運行下部議從之○又諭都興阿等奏拏獲著名要犯請將出力之蒙古官兵獎勵並勒捕鳳屬賊匪獲勝額勒和布等奏賊匪滋擾現已聞拏逃逸各一摺逸犯

程廣學前因官兵捕拏就勢遠颺茲經台吉諾林丕勒追至康家屯村西將該犯拏獲並其妻屬子女及富主高姓等解送到案當於訊明後正法餘均經該將軍分別辦理所有出力之蒙古官兵著准其擇尤奏保在逃之宋英一犯仍著都興阿劄飭各該地方官嚴拏究辦毋任漏網鳳屬龍王廟賊匪在北井子一帶滋擾並刀傷通判英斌復由西山頭大路直撲官軍經防禦懷謙等帶兵迎勦生

擒張才等多名該匪向西南分竄其由邊外大東溝竄來賊匪現復進邊窺伺奉天鳳屬地方向多伏莽此次官兵會勦雖將龍王廟匪股擊散而匪首叢俊茂趙日先等尚未就擒難保不糾合餘黨乘機肆擾都興阿等務當懍遵前旨嚴飭毓昌等督兵合擊並會同額勒和布恩錫分飭附近一帶地方官派兵堵截將各股匪犯殲除淨盡以靖地方將此由四百里各諭令知之又諭昨日明降諭

旨將何璟調補山西布政使令其卽赴新任
無庸來京請訓現在山西署臬司李慶翱帶
勇赴防巡撫李宗義亦出省前赴河保一帶
察看形勢轉瞬河冰凝沍又直下忙徵收喫
緊之時籌餉籌防均關緊要著郭柏蔭傳知
何璟卽日起程迅速馳赴新任毋稍延緩將
此諭令知之○又諭劉崐奏彙報楚軍援黔
勦辦情形一摺貴州台拱之賊出竄黎平經
提督龔繼昌攻破冰廖二洞賊寨道員李光

燎等又將分擾寨蒿等處賊匪擊退至鎮遠
施秉各城新復劉崐責成提督彭芝亮道員
鄧善燮等駐守附近施城之黑石蚊子坡等
處各寨之賊均經彭芝亮等截勦大獲勝仗
六七兩月以來楚軍聲威頗振劉崐現籌轉
運接濟兵糧已足際此秋深瘴退正可乘勝
進兵著劉崐飛飭席寶田於假滿後趕緊赴
營督勦毋誤戎機苗徑叢雜楚軍深入後路
必應嚴防湖南兵力尚單著崇實吳棠迅催

駐紮重安江清平牛場等處各軍星速進勦
曾璧光務當竭力策應川黔兩省軍自上游
接勦而下楚師由下游轉戰而上庶可削平
逆寨盡埽苗氛將此由五百里各諭令知之
○以通政使司通政使于凌辰署工部右侍
郎管錢法堂事○以記名按察使劉策先為
湖北按察使○予貴州廖洞陣亡副將楊文
行祭葬世職加等○丙寅以神靈顯應加河
南

漳河神封號曰昭惠○諭軍機大臣等穆圖
善奏官軍追勦鹽關等處竄匪並伏羌勦匪
獲勝各一摺甘肅南路回匪竄擾西和禮縣
鹽關一帶經提督喻正祥等督率兵勇連日
追勦斬馘甚多將鹽關禮縣等處竄匪次第
殲除城堡均獲保全其竄擾伏羌之匪亦經
梅開泰擊勦獲勝辦理尚為妥速著左宗棠
穆圖善飭令喻正祥等軍乘勝追勦將南路
零星股匪迅速埽除毋留餘孽前據左宗棠

奏該大臣駐紮涇州可以兼顧南北卽著穆圖善懍遵前旨將總督關防派員齎交左宗棠接受該大臣於接篆後務將甘肅全省情形妥為籌畫省垣防守尤關緊要該大臣未到之先應責成何人經理亦著先事豫籌是為至要將此由五百里各諭令知之○以正紅旗漢軍副都統環德署正白旗漢軍副都統○予甘肅黑山嶺等處陣亡提督饒得勝等二十七員祭葬世職加等○丁卯山西巡撫李宗義奏殺軍在蒙古寒達召地方勦賊獲勝得旨著該撫咨會宋慶督率所部覘賊所向相機進剿務絕根株現在準噶爾及郡王旗北境雖無賊蹤所有晉省邊防仍應嚴密布置毋稍疏虞○以正黃旗蒙古副都統富明署正白旗蒙古副都統○以大理寺卿彭久餘兼署都察院左副都御史○旌表守正捐軀四川彭縣民婦鄭楊氏○戊辰以內閣學士慶陞署鑲紅旗蒙古副都統

大清穆宗繼天開運受中居正保大定功聖智誠孝信敏恭寬毅皇帝實錄卷之二百六十五

[illegible]

上詣綏履殿問

慈禧皇太后安至戊戌皆如之○奉

慈安皇太后

慈禧皇太后幸漱芳齋侍午膳諭軍機大臣等景廉奏馳援安玉賊匪東竄入關並由安起程赴任一摺肅州收復後零匪時出竄擾安西州屬黑山橋村外堡突被越進雖經趙壽汝等擊退而布隆吉爾等處時有賊匪搶

關以維大局其籌辦口糧修理堡寨等事已
經景廉劄飭張厚慶及各紳董趕辦該督等
如可兼顧並著隨時督催俾免疏失景廉刻
已抵任所有哈密防勦事宜著卽會同文麟
妥籌布置其各路投誠回目現在情形若何
亦著懍遵疊次諭旨彼此商辦不可掉以輕
心成祿疊經諭令出關乃日久遷延不進不
知是何肺肝此時景廉已赴哈垣該提督若
再帶兵前往自可倍壯聲威卽著整隊出關

會合勦辦並將起程日期迅速具奏如仍畏
蒞不前國法具在豈能為該提督稍寬耶將
此由六百里各諭令知之。又諭寄諭雲貴
總督劉嶽昭貴州巡撫曾璧光曾璧光奏請
飭道員劉嶽曙督辦興義等處軍務等語。劉
嶽曙所部果後軍本係留黔援剿旋經該
督調赴曲靖現在嵩尋楊林已克自無須該
軍拔赴昆垣而貴州興義貞豐等屬逆回盤
踞四出擾害普安雖已解圍根株尚未淨盡

著該督察看情形如劉嶽曙可以回黔卽飭
迅率所部督辦興義等處軍務以便與署總
兵楊發貴署知府葉正邦等軍力擣回巢規
復城邑該軍月領口糧銀兩暨軍裝等件卽
由曾璧光咨會吳崇仍由川省照舊支給俾
利師行將此由五百里各諭令知之。庚午
諭軍機大臣等前因有人奏參四川候補道
彭汝琮貪詐驕恣各情當經諭令李鴻章確
查具奏茲又有人奏彭汝琮前在湖南經管

木稅徒飽私囊劣蹟多端捐升四川道員後
鑽營辦理軍需局務與帶勇提鎮結為兄弟
認為師生任意招搖派員採買火器分肥漁
利該員丁憂後營求留川為崇實吳崇公請
幕友等語彭汝琮疊經被人參奏其鑽營貪
利等款必係實有其事著李鴻章將前後所
參各節確切查明據實參辦不得化有為無
稍涉徇隱原摺著鈔給閱看將此由五百里
諭令知之。又諭成祿奏部署出關縷陳管

見八條請飭催各路協餉並飭移圖善籌糧
暨派員赴川陝募勇請調甘省人員差委及
籌辦哈密勦撫情形各摺片成祿部署出關
餉項支絀自係實在情形所請於各省有著
可指之款先籌撥銀二三十萬兩俾利師行
並請於上海九江及江浙鹽務釐稅項下按
月議撥數萬金解交山西藩庫彙解其餘再
由四川山西並河東鹽務協濟之處著戶部
速議具奏至四川山西陝西湖北河南等省

應解成祿月餉並著該部查明迅速咨催以濟要需西路用兵籌糧急於籌餉成祿請將涼州以東之糧仍歸省城提用永昌山丹甘州以西之糧歸西路大兵提用著左宗棠穆圖善通盤籌畫如事屬可行即飭該地方官遵照辦理俾兵食不至缺乏成祿營內並無甘省候補大員委辦糧臺呼應難期順手所陳亦係實情著左宗棠穆圖善酌度機宜於道府大員中揀派一人前往承辦不必拘執

前議致有貽誤親王督師出自特簡豈臣下所得妄擬成祿冒昧陳請殊屬荒謬著毋庸議甘省兵多餉絀謹潰時聞成祿惟當將現存兵勇裁汰冗弱簡練精實豈可續行調募徒糜餉糈所請調別省勁旅並在川陝等處募勇赴營之處著不准行並著將裁定兵勇迅速具奏聽候諭旨至請調副都統常順前署副都統三專道員陶斯咏同知陳景謨直隸州知州鐵珊知州李光興知縣張秉恬縣

丞汪圻赴營差委能否派往著左宗棠等酌量辦理高臺勇潰成祿統率無方著交部議處至營官石成器所部之勇前據穆圖善奏業派王仁和招集統帶當經諭令妥為鈴束此次成祿請將營官張賢石成器馮永祿隨地拏獲即行正法等語著左宗棠穆圖善酌度妥辦將此由六百里各諭令知之尋兵部議成祿應照溺職例革職得旨著加恩改為革職留任○又諭袁保恆奏請飭河南山西

迅解餉銀等語山西河東鹽課歲協甘餉五十二萬兩自張曜宋慶兩軍由晉入陝河南餉銀不以時至該省奏明於河東協甘餉內通融勻濟每月撥銀二萬兩以致河東應解甘餉積欠愈多現在河南已無軍務儘可以全力供給該兩軍餉銀無須再由外省協銀著李鶴年將應解張曜宋慶兩軍餉銀專由河南供支如數提前籌撥源源批解以利攻勦仍將河東勻撥該兩軍每月銀二萬兩即

行停止照舊專作協甘之用至甘肅提撥河東鹽課銀三十萬兩本係於應解甘餉內提前撥用並非格外加增甘肅軍務孔亟待餉維殷著李宗義飭令河東道無論何款先行如數提撥趕緊批解毋誤要需將此由五百里各諭令知之○以故輔國將軍興壽子德寬降襲三等奉國將軍○辛未諭軍機大臣等曾壁光奏揀員接署提篆並請飭催協餉一摺署貴州提督張文德現因傷病回省業

經曾壁光派提督劉士奇接署所有貴州軍務卽著責成該署提督妥為辦理惟貴州地方瘠苦劉士奇接辦軍務必須豫籌實餉始克有濟湖北欠解該省協餉為數甚多著李鴻章郭柏蔭飭令該藩司等遵照部議按月撥解協餉銀二萬兩不得再有帶欠此項餉銀卽作為該署提督軍營專餉或匪解重慶府城或由該署提督自行派員提取著曾壁光斟酌情形與李鴻章等會商辦理至該營

軍火等項並著曾壁光隨時接濟毋令缺乏將此由六百里各諭令知之○予湖北各屬陣亡殉難官弁遊擊用宜璋等暨紳民婦女二百七十六員名口分別旌卹如例○旌表守正捐軀吉林民婦李周氏○壬申諭軍機大臣等李鴻章等奏湖北被水成災較重請飭部撥款以濟工賑要需一摺本年湖北武漢等屬地方夏秋多雨又值湘水下注川水襄水並漲隄垸漫潰田廬被淹業據該督撫

奏撥軍需善後項下錢二萬五千串並於省倉提撥穀石以資賑恤該督撫現於武漢城外分設粥廠並令各府縣設法平糶災黎諒可不至失所惟秋禾補種失時轉瞬節交冬令更虞飢寒交迫該省隄工既難捐辦亦宜亟為豫籌該督撫以賑撫隄工兩事搏節辦理需銀三十萬兩擬請飭部撥款以濟要需著准其在於應解京餉之司庫地丁暨江漢關六成洋稅各撥銀十萬兩並在本省貨釐

鹽釐項下各撥銀五萬兩照該督撫所議將有隄州縣未成災者准其借撥修隄已成災者以工代賑其老弱婦女及無隄州縣概行酌發賑濟該督撫務飭各該地方官認真經理以期實惠及民毋任官吏中飽其各屬被水輕重情形及成災分數並著飭屬趕緊查勘分別奏請蠲緩用副朝廷軫念災區至意將此由五百里各諭令知之 癸酉諭軍機大臣等蘇廷魁奏乾河灘地開墾升科請飭

河南山東查明辦理一摺據稱蘭儀以下乾河淤成平陸兩岸灘地不少經前任河督遵照戶部所議劉飭該道廳等會辦開墾惟地畝既多勘查不易非會同地方官經理未免呼應不靈請令河南山東巡撫查辦等語開墾地畝事關糧則自應酌辦升科第經經招種之後其業在民異日河歸故道則乾地復變為河小民有失業之虞此時固不可任其荒廢亦不可不曲體民情應如何督飭地方

官辦理之處著李鶴年丁寶楨彼此熟籌日後如有窒礙情形並著據實具奏蘇廷魁亦當與該撫等悉心籌商於國計民生兩有裨益將此各諭令知之 又諭總理各國事務衙門奏遵義教士被傷殞命請飭查明妥辦一摺貴州遵義縣教士與平民相爭據法國公使則稱遵義縣民打毀經堂學堂醫館搶擄什物其啟釁由於勒令跨越十字架跪寫出教甘結以致教士三人收入縣署趙教士

被傷殞命梅教士恐亦被殺死而曾璧光函致該衙門則稱教民楊希伯挾嫌啟釁眾懷不平將經堂醫館打毀其教士不肯回省並非遵義縣收入署中其情形與該公使所稱大相徑庭該公使在京曉曉饒舌情甚激切且打毀經堂醫館已授該教士以口實若有所藉口事關中外交涉要件必應持平辦理方能維持大局李鴻章於此中機宜素能

洞悉著卽派委通曉時務之員馳赴貴州會同曾璧光迅速查明秉公辦理據實具奏不得稍有遷延袒護以致別生事端其遵義現在情形並著曾璧光先行查明奏聞以憑辦理原摺均著鈔給閱看將此由六百里各諭令知之 旌表守正捐軀安徽渦陽縣民女吳徐姐 甲戌諭軍機大臣等御史李德源奏直隸永平府屬撫甯等州縣擡頭營各集鎮吏胥將官斛倒用改為大口小底俾經紀於收糧之時高下其手等語部頒斛式俱有一定豈容更改舊章著曾國藩飭屬嚴禁儻再任令吏胥舞弊貽害閭閻卽將該州縣從嚴叅辦又據奏永平府樂亭縣向有清河口老米溝大莊河等海口為商販必經之路近聞商船雲集每年不下數萬隻向由該縣徵收稅銀解部乃該縣書役蒙混作為緝捕經費侵吞肥己等語此項稅銀因何延不解部有無侵蝕情弊並著該督查明具奏將此諭

令知之○又諭富明阿等奏拏獲逃匪請旨辦理一摺前因奉省逃犯宋英卽宋四閭王久未弋獲當經諭令都興阿等嚴密搜捕茲據富明阿等奏拉林協領德平阿等在楊家窩棚屯拏獲宋渣卽宋英綽號宋四閭王解省審訊該犯所供啟釁情由係屬一面之詞均難憑信若再解赴奉省質訊程途遼遠轉恐疏虞著富明阿等卽將該犯就地正法至奉天鳳凰地方竄匪著都興阿懍遵前旨嚴飭派出官兵迅速按捕毋令滋蔓將此各諭令知之 又諭定安等奏降回變亂靈州失守現籌布置並毅軍截勦河西竄匪獲勝各一摺甯靈回眾視馬化澄為去就今馬化澄降而復叛靈州又被襲陷則甯郡勢成孤立岌岌可危亟宜力圖保衛著金順督率官兵星速馳赴甯夏會同該處文武員弁妥籌防剿並著左宗棠酌撥勁旅迅赴甯靈一帶合兵勦洗毋令日肆蔓延本日據神機營王大

臣奏接據定安函稱探聞劉松山一軍行抵靈州城北駐紮不分良莠肆行殺戮以至降回疑懼陷城搶糧其竄踞上八堡一帶陝回仍舊往來騷擾昌貴等堡回民亦均變叛有欲先占郡城之謀平羅十八堡回眾亦至昌貴等處駐紮等語劉松山所部兵勇前在綏德曾有譁潰之事此次輕進激變賊眾兵單儻因無食可就復蹈故轍則北路大局何堪設想著左宗棠速籌餉糈源源撥解以安軍

心並著將啟釁情形查明具奏不得稍涉迴護至陝甘回逆既已合成一氣將來金順等軍深入勦擊尤恐其避實擣虛鉗險北犯沿途口隘自應擇要嚴防定安等擬令烏爾圖那遜馬隊與張曜各營聯絡聲勢合力截勦宋慶一軍仍紮神木等處神機營等項官兵仍沿黃駐紮嚴密防範並調杜嘎爾扎那格爾第馬隊作為遊擊之師策應各路所籌均尚周密卽著督令各軍認真辦理迅殄賊氛

至郭寶昌所部一軍屢諭左宗棠酌度情形派往花定一帶與劉松山合軍前進該大臣終未覆奏殊不可解現在靈州失陷花定等處喫緊劉松山一軍恐亦未足深恃著左宗棠迅飭郭寶昌軍移紮榆林迤西以厚北路兵力馬化澂陽為歸順陰縱黨與滋擾居心叵測此次變亂情形究因如何啟釁卽著穆圖善查明據實具奏將此由六百里各諭令知之又諭崇實吳棠奏果後後軍勇丁潰

散現籌遣散等語劉嶽曙所部勇丁因派赴雲南省垣會勦輒藉欠餉為名逃走八百餘人現已行抵威甯州城外駐紮此次勇丁潰散該營官等有無激變情事著崇實吳棠嚴查懲辦勇丁不服調度竟敢相率潰逃此風斷不可長著卽飭令劉嶽曙查拏起意首犯從嚴懲治其餘勇丁卽行設法遣散毋任別滋事端該將軍等以此軍人數漸單難以獨當一面仍留滇境徒糜餉項現已酌撥銀兩

一律賞遣回籍著卽妥為辦理道員劉嶽曙於所部勇丁不能約束咎無可辭著先行摘去頂帶以示薄懲仍責成妥為遣散僅任該勇丁滋事擾害及查有激變情事卽著從嚴叅辦前因曾璧光奏興義等處需軍勦辦諭令劉嶽曙將劉嶽曙一軍酌調回黔現在此軍既經遣撤著曾璧光另行籌派兵勇前往勦辦昭通回匪聚眾抗拒唐友耕一軍近日勦辦情形若何著劉嶽曙迅速籌辦省圍日久未解亦當迅籌援應毋為一隅牽掣顧此失彼也將此由五百里各諭令知之○以拏獲逸匪子奉天驍騎校哲山以防禦用○以四川官軍克復貴州麻哈等城出力賞總兵官蔣定邦一品封典副將鄧有倫姚華萃許正信叅將潘洪貴朱本忠遊擊嘉立言張占春龍啟順巴圖魯名號遊擊劉德順等花翎同知譚其遇等藍翎餘升敘開復有差○乙亥諭內閣前據丁寶楨奏太監安得海私自

出京沿途招搖當諭令該撫嚴密查拏卽將安得海就地正法嗣據丁寶楨奏遵旨將安得海拏獲正法復諭令該撫此外尚有太監幾人於訊明後一併絞決隨從人等分別辦理茲據丁寶楨查明覆奏除陳玉祥李平安李得喜郝長瑞李順計得毒六犯均係太監跟隨私逃業經遵旨絞決外其假充前站官之黃石魁田兒及標丁韓寶青戴登雲何林芝高振邦劉鳳喜等幫同招搖恐嚇居民罪惡昭著以上七犯業經丁寶楨於審明後一併正法至金安言劉文瑞劉凱黃廣喜雖訊無隨從撞騙情事惟均係蘇拉張瑞係跟蘇拉服役之人俱應守法乃聽從安得海私自出外實屬不安本分僧人演文跟隨安得海同行不守清規安得海家屬安邦太安馬氏二犯隨同外出俱屬罪有應得以上八犯均著發往黑龍江給披甲人為奴餘著照所議辦理此旨同八月十一日諭旨著一併載入

宮中現行則例。又諭太監王添幅為安得海經管家務種種不法現在跟隨安得海出外滋事之太監陳玉祥等業經丁寶楨遵旨將該犯等絞決王添幅情罪相同著慎刑司將該犯解交刑部即行處絞。又諭左宗棠奏請將黨匪殃民之道員革職等語甘肅補用道前署平涼府知府李超羣倚恃匪首張潰自衛令其子李毓英與張潰交結並委其戚陳九如代理靜甯州知州為張潰接括民財似此黨匪殃民實為地方之害李超羣著即革職拏問州吏目陳九如縣丞李毓英著一併革職拏問嚴訊懲辦尋奏遵訊李超羣等黨匪殃民屬實李超羣業經畏罪自盡陳九如等擬發近邊充軍下部議從之。諭軍機大臣等丁寶楨奏營伍亟須整頓現擬變通辦理一摺山東營務廢弛該撫現擬裁汰老弱兵丁變賣傷疲馬匹均緩補足額數即以現在實發之餉養現在得力之兵所

籌尚屬妥協著照該撫所議認真整頓總期兵皆可用餉不虛糜至如何訓練之處摺內未經聲敘並著實事求是妥議章程奏明辦理將此諭令知之尋奏遵擬陣式令各營均就本汛操練每月合操兩次又另編馬隊就各營抽選七百五十名分為三營每營五哨每哨五隊另選將領分帶操練下部議從之。又諭左宗棠奏北路官軍勦賊情形並勦辦中路土匪肅清各一摺據奏劉松山一軍

由花馬池進抵靈州於八月初三日將郭家橋一帶回巢攻破初四至初六日附近各回寨紛紛出隊圍撲官軍營盤金積堡吳忠堡等處回匪同時糾眾抗拒是陝甘各回已聯成一氣勢頗鴟張惟昨據定安奏稱疊接豐紳張曜文劉靈州城於八月初五日夜為回匪襲踞而此次左宗棠所奏接到初八日劉松山函報並未提及靈州失陷之事究竟現在靈州情形若何著左宗棠詳查具奏劉松

山各營現紮下橋進勦吳忠堡踞匪曾否攻克現在北路回匪廣集務當飭令該提督步為營慎顧後路毋為該逆所乘並著速飭黃鼎簡敬臨馬德順等軍由固原前進與北路官軍聯絡夾擊毋稍延緩鎮靖堡定邊一帶時有逆匪刦奪官糧劉松山軍後路運道深慮梗阻著卽飭令金運昌全福等督兵挖勦疏通糧路金順現已行抵何處著懍遵昨日諭旨速赴甯夏妥籌防勦甯夏本年收成

豐稔並著該署將軍廣購糧石派隊護運劉松山軍中俾免缺乏應需糧價卽由左宗棠解還歸款甯靈甘回投誠已久此時因大兵進勦陝回致生疑懼良回因之煽惑左宗棠仍當飭令劉松山等分別良莠妥為辦理中路土匪業經肅清惟匪首張潰侯得應逃逸未獲該犯等有投往蘭州之說著穆圖善卽行查拏正法毋任漏網將此由六百里各諭令知之以陝西底店等處勦匪獲勝予道

員黃鼎優敘賞副將黃寶林巴圖魯名號餘升敘有差以需索猥鄙降陝西軍營提督熊隆名為遊擊並奪勇號丙子諭內閣丁寶楨奏知府守備被營兵戕害獲犯辦理情形一摺山東青州營步兵趙連城因考拔馬糧未得心懷忿恨起意將參將舒泰守備金國彥殺害突於八月十七日乘該處同城文武赴

龍神廟致祭時用刀將金國彥扎傷並誤傷署青州府知府王汝訥先後殞命實屬情同叛逆該犯現經拏獲著丁寶楨卽派員提省嚴審確情立置重典以彰國法該營將備有無考拔不公致激事變等情並著確查究辦諭軍機大臣等李宗義奏查勘河保沿河情形酌擬添募勇丁一摺晉省河保等處接連陝疆經李宗義查勘歷年設防處所均尚扼要惟現在僅存精銳忠字兩營及本營官兵在防轉瞬河冰凝結河曲陽沔渡至馬連

口一帶地勢又極平行兵勇不敷分布宋慶現紮西岸與河保僅隔一河其勢尚可兼顧該撫擬補募陸勇礮勇令宋慶就近督防自係為慎重防務起見即著照所請如數添募並傳知宋慶將所部仍紮原處暫不遠移所有該處原留兵勇及新募勇丁均著歸該提督暫行節制以資防勦如逆匪窺伺冰河該撫即飭該提督會同在防各軍相機堵遏毋任賊蹤東犯歸綏距河保不遠定安等仍當

嚴飭在事員弁與宋慶各軍互相聯絡用壯聲援將此由四百里各諭令知之 追予浙江嘉興等處殉難翰林院待詔胡堃等紳民婦女一百八十二員名口分別旌卹如例 旌表守正捐軀直隸滄州民婦孫朱氏 丁丑諭軍機大臣等前因直隸臬司史念祖年歲甚輕恐未能勝方面之任諭令曾國藩留心察看嗣經該督奏稱飭令該臬司綜理發審局藉資講求刑律現在已閱數月史念祖

能否通曉刑名足以表率寅僚諒該督知之必真著即據實具奏臬司為刑名總匯關繫至重朝廷用人初無成見史念祖如不勝任該督不必稍存遷就也將此諭令知之○予直隸各屬陣亡殉難文生李郁等紳民婦女三千五十八名口分別旌卹如例 戊寅諭軍機大臣等岑毓英奏官軍攻克易門縣城及黑琅等處鹽井賊巢一摺雲南附省賊匪屢恃後路聲援未斷並有鹽井以資其用築

壘抗拒官兵現經岑毓英派令李維述等節節進剿次第將易門縣城及黑琅等處鹽井收復並攻破海口八街等處賊巢勦辦尚屬得手即著岑毓英飭令田仲興各軍會合岑毓英等乘勝進攻迅將安甯州城克復次第規取昆陽新興該撫務當親督各軍將附省賊壘悉數掃除毋留餘孽並著劉嶽昭懷遵疊次諭旨將省城勦匪事宜與岑毓英會商辦理唐友耕一軍近日勦賊情形若何並著

查明具奏將此由六百里各諭令知之。以
浙江巡洋勦匪出力賞守備黎林等花翎知
縣劉定國等藍翎餘升敘有差予陣亡都司
何寬等祭葬世職加等。旌表守正捐軀直
隸平鄉縣民馬秉文妻趙氏。己卯遣官祭
都城隍之神。派署工部右侍郎于凌辰敬
謹勘估

昭西陵應修工程 庚辰諭內閣本年江浙兩
湖安徽江西等省雨水過多江湖盛漲田廬
被淹不少業經李鴻章等先後奏請籌款撫
恤以資賑濟諭令妥為區畫毋使一夫失所
第恐小民被此災祲蕩析離居實堪憫念茲
據御史宋邦德奏陳救荒事宜六條詳加披
覽尚屬可行所有各省被災流民著該管地
方官妥為安插並籌款施粥散錢或量給薪
米以資餬口其殷富之家並著地方官量為
勸諭捐助俾得接濟即選派公正紳耆經理
不得假手胥吏致有抑勒中飽等弊至官設

平糶為荒政之常經著各該督撫等籌款採
買分廠平糶以平糧價其被災地方並著該
督撫迅速查明分別輕重奏請蠲緩以免追
呼之累被災各州縣有城垣橋梁河道隄工
應行修理者即著以工代賑儻水涸之後應
酌給耕種貲本者即著該督撫籌款酌給並
飭屬出示勸諭民間有無相通毋得稍有吝
惜以副朝廷軫念災黎廣為綏輯之至意○
又諭御史宋邦德奏近來各營遣散勇丁往

往沿途逗遛滋事甚至結夥搶掠殺傷平民
為害地方請飭查辦等語軍營遣散勇丁例
應將軍裝器械在營呈繳嗣後各路軍營遣
散之勇如有未繳軍器私行帶走者無論有
無滋事一經沿途地方官查出即治以私藏
軍器之罪如有剽奪殺傷人者即以軍法從
事並著各路統兵大員嚴切曉諭飭令各處
地方官於通衢大道張貼告示務期有犯必
懲以戢兇暴又諭前因御史陸仁恬奏叅

廣西候補道李均把持軍需釐金等局剝削公項並父子異籍姻親同官各款當經諭令蘇鳳文確查覆奏嗣因李均在途患病復諭該撫查辦催令該員趕緊回粵毋許託病逗遛茲據奏稱遵查該員被叅各款其釐金總局經蘇鳳文於去年將該員經收之項接算清楚皆與各釐卡報冊相符尚非收多報少軍需款項俱有文領冊籍可憑該員亦無侵冒大洲釐卡一案疊經省局委員審訊查尺

手林崇原供於朱炳等均無牽涉至該員攜眷赴梧與陳瑞芝爭論成隙一節陳瑞芝所短廠稅銀兩業歸另案辦結並非由該員報復所致至所叅換帖拜門收受月規節規壽規等項及名列四凶各節現均無可考證惟該員未交各款並未移知接辦之員前在鹽道署任內與知縣余夢銜締姻竟不呈明迴避其子報捐同知與該員寄籍互異均屬不合請交部議處等語李均於釐金軍需等項

雖查無侵吞情弊而以監司大員與屬吏聯姻並不呈請迴避及父子籍貫互異實屬顯違定例僅予議處未免輕縱李均著即革職仍著蘇鳳文飭催該革員迅速回粵將經手未清之款儘數完繳不准稍有延玩○諭軍機大臣等蘇鳳文奏遵查派赴越南勦賊員弁尚無畏蒞並馮子材出境督辦一摺廣西官軍派赴越南勦賊既據該撫奏稱帶兵之總兵謝繼貴等俱屬勇往得力尚無畏蒞情

事該提督自得高平捷報已由龍州親赴夷地諒山一帶居中調度各該將弁可資統率惟逆首吳亞終雖經擊敗仍未就擒且句結太原土匪分踞周市買市等處設竟乘隙奔竄到處滋擾勦辦何時蕆事著蘇鳳文馮子材振刷精神會商進勦現屆秋深瘴退正可將各軍力加整頓飭令前進務將首逆擒獲全股殄除毋得觀望遷延並嚴飭謝繼貴等約束兵勇不得沿途騷擾用示朝廷綏靖藩

封至意將此由五百里各諭令知之（管理武英殿事務孚郡王等奏遵刻）

聖諭十六條及附律易解書成恭進呈覽得旨書留中並著頒發各直省督撫府尹學政及盛京吉林黑龍江將軍一體祇領 辛巳諭內閣李鴻章奏遵查韓莊滋事弁勇並不能約束之將弁分別懲辦一摺鼎軍遣撤勇丁前在山東韓莊地方因索取餉項聚眾搶掠業經總兵潘鼎立等將首先糾搶之勇目把

總魯萬澄及噤眾索開之守備王得順等十人先後拏獲正法梟示現在各營勇丁均已分投回籍遣撤竣事記名提督皖南鎮總兵潘鼎立先事未能慎防咎有應得姑念事後尚能妥為遣撤著撤銷記名提督以示薄懲江蘇補用道萬國順管理營務駕馭未能得宜著以知府降補參將鄭士貴遊擊卞長勝分管哨隊未能鈐制均著革職永不敘用以示懲儆 諭軍機大臣等英翰奏回省日期

及現在籌辦各情形一摺安徽沿江南北十餘州縣上自懷甯下迄當塗江隄被衝悉成澤國覽奏實深憫惻該撫以無為州等處隄工緊要已與馬新貽商酌撥款俟水涸後興修以工代賑並以前發銀兩不敷散放率屬捐廉飭司籌款在各災區設立粥廠著即督飭各屬認真經理毋令一夫失所皖省征防各軍待餉孔亟本年被災之區丁漕須分別蠲緩淮北錢糧又須籌撥工賑該撫飭將蕪

湖蘆卡移涉江口嚴防繞越糧臺各員認真收發以清款目均著照所議辦理其防軍各營自宜覈實歸併著飭各營兵弁仍隨統將駐紮一處逐日操演毋任騷擾地方僅各該營附近有匪徒滋事該將弁即馳往拏辦務期兵歸實用餉不虛糜毋令日久生懈以重操防將此由五百里諭令知之 又諭前因成祿奏部署出關請指撥各省有著款項當經諭令戶部建議具奏茲據奏稱成祿出關

餉項上年八月經該部在山東欠解新疆月餉內提銀十六萬兩山西欠解新疆月餉內提銀四萬兩奏令趕解現在該提督出關需餉自應指撥有著款項俾利進行著照戶部所議將前飭山西山東在欠解新疆餉內各提銀七萬兩河南在欠解新疆餉內提銀六萬兩劃還部庫共二十萬兩無庸解部還款卽著李宗義丁寶楨李鶴年各按應解數目迅速改解歸化知照該提督派員迎提至山

西山東河南直隸應解新疆月餉及四川湖北陝西應解成祿月餉著戶部催令如數報解其四川原欠撥歸成祿軍營之十七萬兩上年部撥山東十六萬兩山西四萬兩並由戶部咨催一併趕解毋任延宕將此由五百里各諭令知之又諭成祿奏擬令楊占鼈赴陝西等省招募暨調員赴營差遣辦理文案各摺片西路用兵有年出關各隊該提督果能力加整頓豈無可用之兵著該提督懍

遵前旨將現有兵勇汰弱留強覈定數目迅速奏聞聽候諭旨所有調兵募勇並調祥恩王永慶周士鍵差委之處均毋庸議將此由五百里諭令知之又諭前因總理各國事務衙門具奏貴州遵義縣教民互爭一案尚未辦結諭令李鴻章派委幹員前赴貴州會同曾璧光妥為辦理諒李鴻章接奉前旨自當派員前往矣本日復據該衙門奏稱趙教士被傷一案法國使臣羅淑亞自繕封摺呈

請代遞且另擬辦法三條詳加酌度俱與中國體制不符斷難允准業經該衙門王大臣據理斥駁自應如此辦理朝廷撫馭寰區一視同仁況關繫中外交涉要件豈可聽其案懸不結著李鴻章仍遵前旨派員赴黔會同曾璧光迅速查明持平辦理以息爭端不得任意延宕至法國使臣所遞摺件內稱四川貴州兩省大吏有嫉恨條約陵虐教士等情固由該使臣情急所致惟此等情節該衙門

均經陳奏業已諭令李鴻章等秉公覈辦該使臣何又呈請代奏自係該衙門不能詳細開導殊屬不合嗣後遇有交涉事件仍應按照條約妥為辦理毋得紛紛代遞封摺以符體制此案除已諭令李鴻章等迅速查辦外仍著總理各國事務衙門隨時咨催李鴻章曾璧光妥速辦結其四川酉陽州教民相爭一案並著李鴻章會同崇實吳崇懷遵前旨秉公辦理總理各國事務衙門原摺均著鈔

給閱看將此由六百里各諭令知之 壬午

以神靈顯應加江蘇宿遷縣

金龍四大王封號曰德庇河南陳留縣

黃大王封號曰宣仁 諭軍機大臣等前因

文煜等奏暹羅國進貢請由天津進京據情代奏當交禮部議奏茲據奏稱現在中原底定由粵赴京驛路並無梗阻即有應行繞道之處亦可知照經過地方官妥為接護若由海道至天津經涉重洋恐有風濤之險地方

官無從防護應無庸更變舊章等語即著照所議暹羅國進貢照舊航海至廣東虎門起早後馳驛赴京毋庸改由天津至該國自咸豐二年以後屢次失貢係道途阻滯事出有因著加恩免其補進貢物文煜英桂卞寶第即知照該國王欽遵辦理至該國進貢之期行抵虎門並著瑞麟李福泰遴派妥員沿途護送並知照經過各省督撫派員接護用副朝廷懷柔遠人至意將此各諭令知之 予

故前任工部右侍郎石贊清祭葬如例

大清穆宗繼天開運受中居正保大定功聖智
誠孝信敏恭寬毅皇帝實錄卷之二百六十六

大清穆宗繼天開運受中居正保大定功聖智
誠孝信敏恭寬毅皇帝實錄卷之二百六十七

教修

同治八年己巳九月甲申

上奉

慈安皇太后

慈禧皇太后幸漱芳齋侍午膳○遣官祭

歷代帝王廟○諭內閣華豐奏病難速痊懇
請開缺一摺肅親王華豐前因骸疾未痊賞
假調理茲據奏稱假期已滿病勢增劇情詞
懇摯未忍拂其所請華豐著准開一切差使
加恩無庸停俸俾得安心調理一俟病體痊
愈再行銷假當差○又諭都察院奏已革錦

州牧長卓金遣抱以舞弊誣參等詞赴該衙門呈訴此案牧長卓金前經錦州副都統奕榕奏參以該員查勘牧廠地畝意存迴護降旨革職訊辦乃該革員並不聽候查訊輒復摭拾別款遣抱控訴並牽涉奕榕有捏奏情事自應嚴切根究以成信讞著都興阿親提人證卷宗東公審訊按律定擬具奏○諭軍機大臣等王通奏請催山西欠解青海王公俸銀並西甯兵餉辦理勘撫經費各摺片青

海蒙古各王公同治二三年俸銀經王通奏准由山西籌給尚未據該省撥解其續請四五年俸銀亦經諭令鄭敦謹籌解並諭王通查明辦理該王公等頻年被擾生計日蹙自應亟籌接濟著李宗羲督飭藩司將先後兩次奉撥未解該王公俸銀共四萬五千五百兩無論何款如數撥交王通所派委員領解赴甯俾資支放西甯兵餉孔亟著該撫迅將前撥銀五萬兩即行籌撥並將王通辦

理漢回勘撫經費前撥餉銀十萬兩內未解銀七萬五千兩一併籌交該委員領解毋稍延緩將此各諭令知之○乙酉諭軍機大臣等金順奏官軍直抵甯郡城防解嚴並請飭富勒琿無庸截留隊伍各摺片陝匪竄入甯境甯屬降回復萌叛志金順派副都統常福先赴郡城協守親率步隊於上月二十九日抵甯業將距城八里之賊壘三處立時攻拔殺賊多名城防解嚴該署將軍現令衛隊營

填紮二道墩以扼南路張曜前隊亦已到甯著定安金順督飭各軍乘此聲威會合進剿迅殄逆氛前據神機營王大臣奏接據定安函稱因劉松山一軍有輕進激變等情此次金順摺內並未敘及甯屬降回究竟因何啟釁金積堡回目馬化澂現在情形若何靈州是否為其襲陷均著該署將軍詳細奏聞劉松山現駐靈州並著該署將軍聯絡聲威共籌保衛富勒琿遵赴歸化城副都統之任甯

屬攻勦正當喫緊其所部洋槍隊已由金順咨會該副都統飭令營官楊裕德統帶來甯助勦並將軍裝交該營官一併護解赴營著定安金順傳諭該副都統不得任意截留致誤西路勦務將此由六百里各諭令知之○又諭劉嶽昭奏辦理昭魯回務情形起程進省並營勇索餉請飭川省酌辦岑毓英奏省圍已解攻克大姚等縣城池及圍攻安甯州城約束降人各摺片唐友耕一軍前據崇實等奏稱該處文武稟留當經諭令劉嶽昭從長辦理茲據該督奏稱唐友耕籍隸昭通所部實俱滇練肆口復仇致魯甸威甯各處回民疊出剽掠該軍與之接仗數次互有損傷現在東昭大路復多梗塞等語此處回民聞謠自固與公然叛逆者不同唐友耕既經崇實等派令援滇何得以先辦昭回為名使漢回從中生釁即著崇實吳棠嚴飭該提督趕緊拔隊前進不准藉詞逗遛劉嶽昭亦當迅

飭孔昭鈐等相機妥辦如唐友耕仍執成見玩視省城並著劉嶽昭等據實叅奏劉嶽昭所帶四營因川省欠餉過多各勇丁攜械潛逃已由劉嶽昭派員查辦並令分紮宣威威甯等處著崇實吳棠仍遵前旨酌度情形妥為辦理其未能先事豫防之統領營官並著該將軍等查明懲辦以儆刁風大姚廣通兩縣城池經楊玉科各軍先後收復而附省之江右館等處賊壘又經岑毓英等督飭兵勇晝夜環攻生擒首逆多名蔡廷棟縛賊自獻餘匪併歸土堆省城業已解圍此次官軍攻破各壘馬如龍帶創督隊並親赴賊營勒令賊目自相斬獻實屬奮勇可嘉岑毓英於各路援軍未到之時竟能激勵將士力解省圍洵為不負委任其縛獻安汶義之降人蔡廷棟即著交馬如龍時加約束以收後效安甯逃賊業經何秀林截殺殆盡州城內外亦已一律肅清惟逆目劉城米映山現未擒獲餘

匪尚踞土堆仍著岑毓英會同馬如龍督隊圍攻。盡殲醜類。劉嶽昭計可抵省。滇南糜爛已極。該督務將一切防勦事宜與岑毓英和衷商榷。不可各存意見。並著該督等趁此官軍得手之時。將各處失陷城邑次第收復。進除巨寇。用靖邊陲。將此由六百里各諭令知之。○以正白旗滿洲都統恭親王為閱兵大臣。○以大學士官文為內大臣。○調鑲藍旗蒙古都統世鐸為鑲紅旗滿洲都統。熱河都統慶春為鑲藍旗蒙古都統。以西安將軍庫克吉泰為熱河都統。墨爾根城副都統克蒙額為西安將軍。○以隨同官軍攻克賊壘。收復城池。予雲南投誠賊目段成功更名永忠。馬興堂更名永順。均賞都司銜。○句到奉天。福建、陝西、廣東、廣西秋審情實罪犯。停決。廣東斬犯一人。絞犯一人。餘五十人予勾。○丙戌諭軍機大臣等。穆圖善奏籌辦防勦。請飭左宗棠迅撥餉銀。鎮番解圍。各摺片。前因左

宗棠奏涇州為適中之地。可以兼顧南北。當經諭令暫時駐紮。並令穆圖善即將總督關防派員送交。茲據該將軍奏擬俟左宗棠到秦。送交關防。自係尚未接奉前旨。著穆圖善仍遵前旨。將關防迅速派員送交。毋稍延緩。惟甘軍需餉甚為急迫。左宗棠既經抵甘。接印。自應將在甘各營通盤籌畫。酌量裁併。勻撥餉需。豈可稍存膜視。現據穆圖善奏稱鄂臺轉運之餉。已經袁保恆悉數提歸陝西。甘軍毫無指望。詳潰堪虞。自係實在情形。著左宗棠指明專款。飭令袁保恆迅速撥解。源源接濟。以固軍心。鎮番縣城突有賊匪圍撲。經王仁和帶兵救援。立解城圍。並將涼州西南炭山堡一帶賊匪擊退。尚為出力。著左宗棠、穆圖善仍飭王仁和、將永昌寬匪迅速追剿。毋留餘孽。陝回逃入甘境。蔓延甚廣。靖遠、碾伯等縣亦有賊蹤。左宗棠務當分派各軍。力圖掃蕩。毋任四出滋擾。劉松山等軍由靈州

進剿。近日情形若何。著隨時具奏。以慰廑繫。省垣關繫緊要。應如何布置。及南路防剿各事宜。均應妥籌辦理。毋得顧此失彼。已革提督田興恕著俟道路疏通。即行起解。將此由六百里各諭令知之。○命新授熱河都統庫克吉泰。西安將軍克蒙額。來京陛見。以西安左翼副都統圖明。阿暫署將軍。○以鑲黃旗蒙古都統明慶。兼署鑲藍旗蒙古都統。○以吉林儘先協領依克唐阿。為墨爾根城副都

統。○以甘肅秦州擊退回匪。並秦安等城解圍出力。賞副將周正延。巴圖魯名號。道員田應龍。都司黃立志等。花翎。縣丞雷作霖等。藍翎。餘加銜升敘。開復有差。○丁亥。諭軍機大臣等。文麟等奏。回匪竄撲哈密。官軍截剿獲勝。伊勒屯奏。派兵赴哈。應援各一摺。西路烏魯木齊等處。回逆竄至五堡。欲撲哈密。經文麟等派兵擊退。該逆現率大股。復來滋擾。伊勒屯已派協領富琳布等。帶兵赴哈。援應。即

著文麟。景廉。飭令孔才等。督率哈密各軍。會同巴里坤。派來之兵。迅速兜剿。毋令蔓延。巴里坤。西路。橙槽溝一帶。防務。並著伊勒屯。何瑄。飭令。協領。慶壽等。嚴密防守。不得稍有疏虞。逆回。勾引。哈城。回眾。內應。經已。故回。王伯錫。爾之。福晉。邁哩巴。鈕。妥為。防範。並諭。本城。纏頭。不准。出城。實屬。深明。大義。著。文麟。等。傳。旨。嘉獎。並。令。遴派。得力。回兵。隨同。官兵。協剿。西路。兵單。餉絀。徵調。維艱。如。現在。情形。緊急。

著。左宗棠。穆圖善。酌撥。勁旅。援剿。其。餉項。一切。並著。左宗棠。隨時。兼顧。將。此。由。六百里。諭。知。左宗棠。穆圖善。文麟。景廉。伊勒屯。並傳。諭。何瑄。知之。○。句。到。四川。秋審。情實。罪犯。停決。斬犯。七人。絞犯。二人。餘。六十一人。予。勾。○。戊子。諭。內閣。瑞麟。等。福泰。奏。承充。鹽商。職員。虧欠。餉款。請。革職。勒追。一摺。前。浙江。鹽運。使。潘仕成。以。潘繼興。商名。承充。臨全。埠鹽商。近。因。商力。不足。改歸。官辦。該員。虧欠。課款。甚鉅。業

經該督等將潘仕成家產查封備抵潘仕成著卽革職勒限追繳如逾限不完卽著從嚴叅辦○諭軍機大臣等金順奏官軍進勦蘇家燒房攻拔賊壘並請飭撥軍士寒衣銀兩各摺片回逆在蘇家燒房築壘抗拒經金順督兵會同張曜所部連獲大勝攻拔逆壘回目陣斬幾盡洵足以寒賊膽惟納萬沅一名未據該署將軍聲明是否被斬於陣抑或逃竄仍著金順查明妥速辦理毋任漏網金順

現擬會商張曜撥隊進紮南路王渠橋一帶以圖肅清西岸卽著會商節節進勦埽蕩而前以靖邊圉其後路石嘴山磴口要隘雖經張曜留兵防守第恐師行愈遠該逆乘虛繞竄並著定安妥為兼顧甯屬降回究竟因何啟釁馬化澂是否襲踞靈州近來情形若何金順現抵甯郡卽著訪查明確詳細奏聞劉松山所部現在行抵何處何以並不聯絡同進均著一併據實具奏邊外天氣寒苦副都

統托克屯籌辦皮衣無款支給深可憫念著李宗義於應解京餉內劃撥銀二萬兩卽日解交歸綏道由金順派員領解現在金順督兵進勦正值喫緊之際若令餉項缺乏必至停兵以待著李宗義懍遵前旨將河東道欠解丁卯戊辰兩綱銀九萬二千兩並已已綱應解十八萬兩嚴飭該道分批起解毋許稍有遲誤將此由六百里各諭令知之○又諭金順奏請飭天津採辦軍火等語現在金順

所部各營防勦喫緊所請在天津採買洋藥五千磅大銅帽一百萬粒著崇厚趕緊派員照數購買由金順委員提解所需價值准其作正開銷將此諭令知之○移福建鳳山縣興隆里巡檢於枋寮並撥臺灣道標千總一員兵一百名同往駐紮從閩浙總督英桂請也○補行同治七年大計江蘇卓異官七員不謹官二員罷軟官一員才力不及官二員年老官一員分別議敘處分如例○以甘肅

甯夏攻拔賊巢。殲除逆首馬義等。賞提督楊春祥一品封典。知府黃長吉都司方功連。巴圖魯名號。餘升敘有差。予陣亡遊擊舒得勝。李良材守備吳金順。祭葬世職加等。○加賞普濟堂功德林。煮賑小米八百石。○己丑諭軍機大臣等。劉坤一奏請飭江蘇巡撫轉飭江海關將代徵贛關絲稅銀兩解部以抵該關奉撥京餉等語。據稱贛關徵稅短絀。全賴江海關代徵絲稅以資補苴。近因江海關需用經費浩繁。由蘇省兩次奏准免其補解。以致贛關應放虔標兵餉不敷支發。應解內務府躉價銀兩亦無款可籌。現當續撥京餉緊要。該關稅項支絀。自是實情。著馬新貽。丁日昌轉飭江海關將同治七年代徵絲稅銀三萬六千餘兩。即由江蘇省就近委員解部。以抵贛關應行撥解京餉。其尚欠銀三千餘兩。著劉坤一於提到八年續徵絲稅時。即行找解足數。以後逐年代徵絲稅。並著馬新貽。丁

日昌飭江海關遵照部議照數撥還。俾得湊放兵餉。及委解躉價以濟要需。將此各諭令知之。○句到江蘇浙江江西湖廣秋審情實罪犯停決。江蘇絞犯一人。浙江斬犯二人。絞犯一人。湖廣斬犯四人。餘六十人。予句。○庚寅諭軍機大臣等。何瑄奏官兵擊退竄匪一摺。烏魯木齊等處賊匪竄擾哈密。並分股窺伺巴城。經何瑄帶領官兵馳抵草打坂。將山南沙棗泉一帶之賊擊退。該逆復因哈密兵到。悉向吐魯番逃遁。著伊勒屯。何瑄。迅飭派出各軍探明賊蹤。乘勝追剿。並著文麟。景廉。飭令副將趙萬海督率馬步各隊會合追擊。毋留餘孽。將此由六百里諭知文麟。景廉。伊勒屯。並傳諭何瑄知之。○補鑄安徽六安營中軍守備條記從署巡撫吳坤修請也。○辛卯予江西各屬陣亡殉難生員胡光輝等紳民婦女五千五百十二名口分別旌卹如例。○壬辰諭內閣。曾國藩奏。覈明永定河工程。

酌擬辦法請撥款項一摺直隸永定河北下
四汛隄岸於本年五月間漫決後接連伏秋
二汛尚未合龍亟應籌款疏濬下口中洪以
資堵築著照所請由戶部撥銀四萬兩其餘
三萬餘兩即於江南協濟直隸項下撥發該
督務當督飭在事各員認真辦理為一勞永
逸之計毋致再有疏失另片奏請於昔年裁
減歲修搶修等銀再加撥二萬三千餘兩由
長蘆運庫先發一二年以濟要需等語著該
部覈議具奏尋奏該督所請加撥銀兩係屬
修防要款應如所奏撥給從之○又諭英桂
奏營員違禁攤扣兵餉請分別革職撤任查
辦一摺福建省自同治六年奏准改定營制
裁兵加餉已將攤扣積弊永遠革除各該營
將弁自應恪遵辦理茲據英桂與提督羅大
春先後訪聞汀州鎮標三營仍敢違禁攤扣
兵餉放餉清單所填公差等名目銀兩率皆
虛冒確鑿可據並有那用餉銀情事當此整

頓營伍之際豈容劣弁侵漁貪利罔顧兵艱
亟應從嚴究辦署福建汀州中營守備雲騎
尉陳殿鼎著即行革職提省嚴訊究追汀州
中營遊擊練絳署汀州左營遊擊彭年汀州
左營守備鍾錫爵署汀州右營守備陳大成
著一併撤任與卸署汀州右營遊擊劉應清
均聽候查辦另片奏訪聞興化左右兩營均
有攤扣兵餉情弊等語署興化協副將彭榮
華署興化右營都司吳逢春業經撤任與已
卸事之興化左營守備趙習之均著交羅大
春就近徹底查究以肅營政尋英桂奏訊明
營員並無侵漁等弊惟勻欠兵餉歸還墊用
公費及那借米折銀給發營兵川費均屬違
例陳殿鼎吳逢春趙習之應不准開復鍾錫
爵陳大成擬以千總降補練絳等請照失察
例議處彭榮華業已革職應無庸議下部議
從之○諭軍機大臣等定安等奏嵩武軍馳
抵甯夏請飭察哈爾迅撥駝隻暨擬保打仗

防河各官兵。並宋慶病痊銷假。各摺片。張曜一軍前駐沙金托海。迤西一聞靈州警信。馳抵甯夏。與金順各軍共解城圍。該提督遠道赴援。疊獲勝仗。實屬忠勇可嘉。該軍軍火糧儲。必須隨時籌解。方可無誤師行。除礮位各件。已由定安等運解外。所需駝隻。雖由歸綏趕緊購買。而接替護送。猶慮不敷。著文盛即在商都駝羣內。揀選膽壯大駝三百隻。迅派委員解往。以備各隊轉運之需。毋稍延緩。河西一帶。即著該將軍等嚴飭所撥之軍。實力扼紮。以資策應。靈州情形究竟如何。並著傳知張曜會同金順等相機進剿。用殄逆氛。歸綏疊次打仗及防河各官兵。自上年到防以來。尚屬出力。著准其擇尤奏保。毋許冒濫。提督宋慶前因患病給假。駐軍神木。並分軍西紮。所至與民相安。所部將領復能勦匪屢勝。該提督勇於任事。約束嚴明。洵為不負委任。現在病痊銷假。著定安等仍遵前旨。飭令在

事員弁與該提督所部聯絡聲勢。遏賊東趨。不可稍涉大意。將此由五百里各諭令知之。○癸巳諭軍機大臣等。理藩院奏阿拉善親王貢桑珠爾默特呈報回匪竄擾情形。請撥兵救援一摺。所稱陝省董志原逆回竄入甯郡。勾通甯夏回匪。攻撲定遠營城及竄至福因寺等處。提督張曜所部獲勝各情。均係在金順未到甯夏以前。惟現在陝甘各回分股騷擾。該親王亦風聞靈州失守。是甯夏之圍雖解。而賊勢尚屬披猖。阿拉善所屬之定遠營。東通包鎮。綏遠等處。南連中衛。均無險阻可守。轉瞬黃河冰凍。尤虞該逆東趨。金順勦賊現正得手。著即懷遵疊次諭旨。會同張曜等軍乘機兜擊。毋任該逆盤踞城寨。勢成負隅。靈州情形何似。著左宗棠確查具奏。一面調派勁旅。馳赴甯靈一帶。與金順等迅圖勦洗。不得以無兵可撥。致逆蹤擾害蒙地。復肆蔓延。將此由五百里各諭令知之。○又諭。理

藩院代奏。阿拉善親王貢桑珠爾默特呈報回匪竄擾該旗。該親王協同官軍截剿獲勝。惟蒙古官兵向無洋槍等項。接仗未能得力。懇請飭撥洋槍洋礮數百件。以備應用等語。槍礮為軍中利器。現在回匪竄突靡常。該旗防務喫緊。需用洋槍洋礮著神機營王大臣酌量撥給。以資防剿。將此諭令知之。○河東河道總督蘇廷魁奏報秋汛安瀾。命詣河神廟祀謝。○以翰林院侍講學士常恩為

內閣學士兼禮部侍郎銜。○甲午。諭軍機大臣等。富明阿奏查城途次拏獲馬賊正法一摺。吉林五常堡新開荒地一帶。時有盜賊滋擾。本月初九日。富明阿因巡閱各城。行抵東孤家子地方。探聞該逆在桃山屯盤踞。當即派員將匪首王滌及夥匪等先後拏獲十四名。訊明正法。辦理尚為妥速。著富明阿仍飭各該管官弁。迅將逃逸各犯悉數拏獲。以靖地方。此次尤為出力之官弁兵丁等。准其崇

於節次緝賊出力官兵案內。擇尤保獎。毋許冒濫。至五常堡添設官兵。前據該將軍奏請將奉天來堡依親之旗丁充補。業經該將軍咨送旗籍到部。何以兩年之久。富明阿尚未接到部覆。著該部迅速查明辦理。將此諭令知之。○予山東武定陣亡殉難監生姚培典等紳民婦女七百八十二名口分別旌卹如例。並予建祠。○予山東海豐殉難原任直隸知縣吳式訓妻李氏等六口旌表如例。並予

建祠。○乙未

孝慈高皇后忌辰。遣官祭

福陵。○諭軍機大臣等。沈葆楨奏新造輪船赴津。請派大員勘驗一摺。福建新造第一號輪船。沈葆楨現派道員吳大廷監駛赴津。著派崇厚前往驗收。所有船身機器汽鑪一切。是否悉臻完善。並著詳細勘明。據實覆奏。至此號輪船。即著照沈葆楨前擬名為萬年清。沈葆楨所繪輪船總圖。業由軍機處呈進。留中

備覽沈葆楨原摺著鈔給崇厚閱看尋崇厚奏遵驗新造輪船實係工料堅固輪機靈捷教習駕駛亦頗嫻熟報聞○旌表守正捐軀直隸高陽縣民婦孟王氏○丙申賞五城貧民棉衣銀○

上以孟冬時享

太廟自是日始齋戒三日○丁酉

孝敬憲皇后忌辰遣官祭

泰陵○予安徽涇縣陣亡殉難從九品朱文鑾

等紳民婦女二千七百七十七員名口分別

旌卹如例○戊戌

上以孟冬時享

太廟前期親詣行禮○諭軍機大臣等福濟景

全奏會商善後防邊事宜福濟文碩奏遵籌

安插厄魯特章程酌擬變通辦理並密陳棍

噶扎勒參固執情形文碩奏因病請假並請

暫駐烏城各摺片此次立界事宜業經榮全

辦竣惟自博果蘇克壩起至沙賓達巴哈止

新立牌博八處雖與俄使議定會查章程尤

須派員隨時周歷方足以固中外之防著福

濟榮全飭令唐努烏梁海總管分派妥員不

時赴新立牌博處所嚴密巡邏具結彙報該

將軍等仍當隨時留心察訪儻該蒙官等虛

應故事不能認真稽覈立即分別懲辦以期

疆界乂安永消隱患厄魯特不願東徙自應

暫令各安舊居福濟文碩請將僧眾仍賜棍

噶扎勒參為徒居於阿勒台山南俗眾居於

青格里河交總管巴彥特古斯妥籌安插均

著照所擬辦理至遊牧領隊大臣亦著照所

請令巴彥特古斯暫行署理以資鈐束福濟

等密奏棍噶扎勒參請餉西征各節勢難遽

行著俟錫綸會銜摺奏到日再降諭旨原片

留中文碩行抵烏里雅蘇台舊疾復發著賞

假一箇月暫駐烏城調理至布倫托海應否

裁撤仍隸科城文碩錫綸將來應駐何處著

福濟詳酌情形妥議具奏將此由四百里各

諭令知之○又諭據文碩奏經過直隸訪聞宣化鎮總兵崔福泰於辦理練軍一事操守未能廉潔以致省局委員不服竟有口角互揭之事等語總兵為專閫大員若操守平常安能表率營員整頓兵制况練軍一事尤關緊要著曾國藩即將該總兵與省局委員互揭之事確切查明並留心察看如果不能勝任即行據實具奏毋稍遷就將此諭令知之○又諭據文碩奏經過蒙古臺站訪聞近來

軍機處

主

差役繁多行人需索過重情形苦累等語自西疆不靖以來一切兵差往還經過蒙古地方不得不資其供應惟為時既久情形不無苦累自應隨時加意體恤若如文碩所奏馳驛官兵人等竟至夾帶行商包馱客貨苛求規禮多索廩羊勞擾追呼動加鞭笞種種惡習實屬不成事體著福濟榮全文盛於所屬臺站地方務當隨時查察除照例供應外不得任意需索儻有前項情事即行從嚴懲辦

並著理藩院行知各該管驛部員一體遵照辦理將此諭知理藩院並由四百里諭令福濟榮全文盛知之○追予浙江紹興陣亡殉難從九品陸同祖等紳民婦女二百二十三員名口分別旌卹如例並予建祠○追予浙江會稽殉難紳民五品銜何南昌等一百三員名賞卹如例並予建祠○琉球國使臣向文光等二人於午門外瞻覲

軍機處

主

大清穆宗繼天開運受中居正保大定功聖智誠孝信敏恭寬毅皇帝實錄卷之二百六十七

[illegible]

同治八年己巳冬十月己亥朔享

永陵

福陵

昭陵

昭西陵

孝陵。

孝東陵

景陵

泰陵

裕陵

昌陵

昌西陵

慕陵

慕東陵

定陵○遣官祭

端慧皇太子園寢○

上詣綏履殿問

慈安皇太后安平室問

慈禧皇太后安至丁卯皆如之○奉

慈安皇太后

慈禧皇太后幸漱芳齋侍午膳、頒同治九年
時憲書、庚子諭軍機大臣等左宗棠奏北

路官軍疊勝請開復劉松山處分一摺據稱劉松山一軍由花馬池進剿自八月初六日起至二十八日止在吳忠堡等處連獲勝仗殺賊甚多馬化澄現稟求劉松山退駐靈州

及請委員赴靈受撫等語前因定安奏劉松山肆行殺戮致回民復叛襲踞靈城各情疊諭該大臣查明具奏現在靈州情形究竟何似劉松山有無濫殺激變情事仍著懍遵前旨迅速奏聞馬化澂求撫各節原未可盡信爲真若此時靈州已失該回日有公然復叛之心該大臣自應督軍進剿破其奸謀若已震懾兵威真心求撫前此亦無襲踞靈城之事卽著斟酌情形妥爲辦理毋令日起猜疑

至甘回窮困情狀尚與陝回不同該大臣亦當悉心體察以戢兵端雖不可一意言撫而臨事決機亦不可涉以成見所請開復劉松山革職留任處分及營哨各官免其查叅出力員弁請獎之處均著俟查明靈州情形覆奏後再降諭旨其固原北路各軍戰狀及甘回求撫陝回南竄情形著卽詳晰查奏以紓廑繫本日據穆圖善奏范銘石成器兩軍索餉甚亟請飭催撥餉接濟等語著該大臣迅

飭袁保恆於西征半餉內趕緊勻撥源源解赴甘營不可稍存膜視穆圖善又奏稱甯靈回眾仍宜籌撫及飭胡昌會督同馬潮青開導回民各節與現在辦法有無窒礙亦著該大臣隨時籌辦用靖邊陲原片著鈔給閱看將此由六百里諭令知之○又諭穆圖善奏肅州善後事宜請仍歸楊占鼐經理一摺據稱提督成祿前經奏請令署甘肅提督楊占鼐赴陝西等處募勇西上助剿現在關外軍

情該署督勢難兼顧楊占鼐有布置肅州善後之責未便遽離甘省等語成祿所奏在川陝等處募勇前經降旨已不准行著照穆圖善所請仍令楊占鼐署理甘肅提督責成該員將肅州善後事宜妥爲經理毋任回民復生事端前諭成祿將現有兵勇汰弱留強覈定實數奏聞聽候諭旨該提督自當懍遵辦理其高臺以東糧石穆圖善奏稱難以分撥成祿軍營仍將安西等三州縣徵糧專撥之

處並著穆圖善隨時斟酌情形辦理將此由五百里諭令知之○又諭錫綸等奏統籌機宜敬陳管見一摺據稱厄魯特人眾前籌分安杜爾伯特及喀爾喀四盟惟變民新降人心未固徒留兩難該處點集之徒頗為不少往往肆行煽惑必須將其莠種移之遠方而後蚩蚩愚氓不難安插等語索倫等人眾疊經諭令福濟等妥籌安插仍著該將軍等懍遵前旨酌量情形分別安插毋使滋生事端

至錫綸會同棍噶扎勒參所籌裹糧西征一節該呼圖克圖勇於任事具見惓惓惟布城變民甫定應行籌辦之事甚多能否遽圖大舉錫綸何以不與福濟等先行妥商率行具奏殊屬非是著福濟文碩錫綸仍會籌全局一切機宜務期次第辦理毋得稍涉孟浪將此由五百里各諭令知之○調浙江衢州鎮總兵官張其光為定海鎮總兵官定海鎮總兵官俞俊明為衢州鎮總兵官○以甘肅正

甯縣城被匪竄陷旋即克復免已革知縣黃紹薪逮問仍留任○予甘肅靈州陣亡提督鍾建高等三十三員祭葬世職加等○追予甘肅平涼合門殉難教諭王汝揆於伏羌縣原籍建立專祠眷屬人等一併附祀○旌表守正捐軀四川永川縣民婦宋蔣氏○辛丑諭軍機大臣等丁日昌奏新練撫標兵餉請仍照原議作為試辦章程一摺蘇省減兵增餉案內撫標兩營營員薪水兵丁口糧較原額每月加銀一千餘兩經該部議覆仍照該標各營額定餉需散放茲據該撫奏稱撫標兩營整練甫有成效未便因餉數稍溢原額再議裁減營哨等官薪俸不能不稍從優厚等語自係實在情形所有撫標兩營兵餉卽著准其於原額外每月加銀一千餘兩作為試辦章程該撫務當慎選將材認真訓練以期兵歸實用餉不虛糜其目前加增餉數及將來添營訓練應如何就通省標兵裒多益

寡因地制宜俾符原額之處並著馬新貽會同丁日昌通籌大局妥為辦理將此各諭令知之○又諭金順奏官軍續獲勝仗會師南進圍攻賊巢一摺逆目納萬沅在納家牐等處增黨修卡併力抗拒經金順商同張曜親率馬步各隊分道進剿大獲勝捷現在會師南進徑擣納家牐賊巢酌留隊伍防護甯夏郡城辦理尚為得手著金順卽同張曜督率各軍相機進剿將該逆各巢一律攻拔毋任負隅定安務當多撥勁旅為張曜後路接應以厚兵力昨據左宗棠奏劉松山一軍在吳忠堡等處獲勝現有提督黃萬友赴該營隨勒著金順飭令迅速進兵彼此聯絡聲勢以便節節兜剿迅掃逆氛將此由五百里各諭令知之○又諭前因四川酉陽州民教仇殺貴州遵義縣民教互爭兩案疊諭李鴻章等迅速查辦諒該督等業已分別辦理茲據總理各國事務衙門奏稱法國使臣以酉陽遵

義兩案未結臚列湖北山西河南廣東未結各案藉詞要挾並聲稱會同該國提督攜帶兵船前赴江西等處急求各案了結等語中外定約以來各督撫於民教爭訟案件每以正兇未獲人證未齊為詞累月經年案懸莫結以致該使臣從而生心砌詞尋釁朝廷撫馭中外原以誠信相孚豈得授人以隙轉遂其虛聲恫喝之謀所有酉陽遵義兩案著李鴻章崇實吳棠曾璧光懍遵前旨將酉陽案內劉幅張佩超等究係何人正兇按律懲辦遵義案內教士身死是否該縣保護因傷殞命抑係另有別情趕緊查明審結不可稍涉含糊亦不得再事遲延致生枝節其天門縣豐鎮廳南陽府九龍司未結各案卽著瑞麟文盛郭柏蔭李鶴年李福泰李宗義分別迅結江南江西兩省交涉事件亦著馬新貽丁日昌劉坤一隨時妥辦毋稍稽延李鴻章等身膺疆寄皆為國家倚任之人嗣後遇有中

外交涉事宜務須持平辦理不可豫存歧視之心尤不可盡諉之總理各國事務衙門而令該使臣等曉曉置辯迄無了期也至羅淑亞會同該水師提督隨帶兵船前赴江西湖北四川等處雖不致即肆鳴張而此次臚列各詞不無憤恨該使臣業稱於本月十八日帶船前行將來沿途所過地方著各該省督撫嚴飭各地方官按約妥辦遇事開解不得互相推卸別滋事端總理各國事務衙門原

摺一件片一件及羅淑亞照會一件均著鈔給閱看將此由六百里各諭令知之○以巡洋緝捕出力予江蘇知縣徐炳奎等升敘有差○予因公淹歿黑龍江參領貴慶等祭葬卹廕加等予貴州各屬陣亡殉難歲貢生王慕青等紳民婦女三千三百四十五名口分別旌卹如例○壬寅諭軍機大臣等前因花定等處喫緊諭令左宗棠迅飭郭寶昌一軍移紮榆林迤西以厚兵力旋據左宗棠奏

郭寶昌患病未痊已催金運昌撥卓勝軍馬隊由綏德鎮靖堡定邊前進現在甘肅北路回匪雖經劉松山等進剿獲勝難保該逆不乘間東竄轉瞬河水凍結晉省防務極關緊要郭寶昌向來帶兵甚為奮勇此時病體當已就痊著左宗棠即飭該提督酌帶親兵前赴山西聽候李宗羲調遣並著李宗羲督飭該提督會同李慶翱將河防事宜嚴密布置以資得力其餘各隊仍著左宗棠嚴飭金運

昌力扼花定一帶疏通糧路兼杜賊蹤旁竄該軍餉需英翰仍當源源籌解毋稍欠缺將此由四百里各諭令知之○甲辰盛京將軍都興阿奏遵於九月十六日辰時恭請

福陵

神牌還御禮成得旨敬悉○乙巳諭內閣瑞麟李福泰奏查出前任運司辦事專擅款目夥轆請飭調來粵清理一摺據稱廣東樂桂埠高孔法俸等因高力疲乏援案稟請加三折

配業經瑞麟兩次批駁該商等復蒙混續稟乃前任運司方濬頤並不檢查前案擅准搭拆以致連陽豐富等商紛紛效尤該司亦俱批准並查該司任內收支款目多屬不符各等語方濬頤于上司批駁之案何以專擅批准任內完解數目又多不符其中有無通同蒙混情弊亟應嚴切根究調任兩淮鹽運使前任廣東鹽運使方濬頤卽著馬新貽丁日昌飭令迅赴廣東聽候瑞麟等督算清理毋任遲延所有兩淮鹽運使員缺並著馬新貽等派員署理尋瑞麟等奏查明方濬頤任內徵款因籌解協餉移緩就急致形軫輓覈其收支總數尚與報部撥冊相符至批准埠商搭拆積引由於體恤商艱且係援案辦理尚非專擅惟未經詳稟究屬疏漏請交部議處從之○諭軍機大臣等前因奎昌等奏科布多餉項每年需銀四萬六七千兩僅由烏城每年領銀三萬兩實屬不敷支放前請由山

西於應解經費外按年另撥二萬兩至今未據報解請飭撥款接濟當經諭令戶部議奏茲據該部奏稱科城經費向由晉省撥解請仍於山西欠解科城經費內提解等語科城與布倫托海毗連該處叛民甫靖需款甚急卽著李宗義於欠解科城經費內先提銀四萬兩趕解歸化城轉解烏里雅蘇台由該將軍知照科城派員領取其餘欠解銀兩及本年應解該兩城經費並著飭令該藩司陸續如數籌撥不得稍有帶欠將此由四百里諭令知之○又諭左宗棠奏北路官軍勦回疊勝一摺陝回白彥虎甘回李正榮等各股由預望城等處竄入固原經雷正綰各軍分路擊敗馬化澂又遣馬萬春等進擾南路官軍在黑城子一帶追勦獲勝將逆首楊汶治殲斃其李旺堡賊巢亦卽攻破並生擒賊帥楊輝雲陝回禹得彥等約眾西趨道員黃鼎等軍追至打拉池一帶將賊痛擊甯靈現無陝

回蹤跡。此次陝回糾眾分擾。意圖阻截官軍。白彥虎等雖負創西竄。難保不勾煽河州各回。復行東犯。左宗棠現檄雷正綰等軍分投防剿。並擬進軍平涼。著即嚴飭雷正綰等各率所部相機夾擊。將未獲之各回目擒斬淨盡。以靖陝氛。並著將後路糧運事宜趕緊布置於抵平涼後。斟酌緩急。整軍前進。一面將蘭州省垣及河州狄道防剿各務悉心籌畫。並飭張會元崇志等。力顧蘭州。不可稍涉疏虞。

馬化澂是否顯露叛跡。抑係求撫。緩師靈州一城。如果失陷。究為何股所襲。均著該大臣遵奉前旨。將該城有無被陷及劉松山濫殺激變各情迅速查明具奏。其預望城半箇城各處甘回。既經款營求撫。即著飭令曾傳理妥速辦理。但不可為其所給。致貽後患。將此由六百里諭令知之。○以甘肅北路會剿回匪獲勝。賞提督雷正綰道員黃鼎。白玉搬指各一箇。白玉銅管各一支。火鐮各一件。大

荷包各一對。小荷包各二箇。總兵官劉明泰正一品封典。總兵官趙玉亭副將崇志。色圖魯名號。總兵官簡敬臨等。加銜升敘有差。○予甘肅西安堡陣亡總兵官馬德順祭葬。世職加等。謚武毅。於死事地方暨原籍建立專祠。副將張顯揚都司張成進。把總楊大鵬等。祭葬。世職加等。附祀馬德順專祠。○予甘肅打拉池陣亡都司賈洪順祭葬。世職。○予廣東長樂殉難紳民徐崧等暨婦女二百二十

七名。口分別旌卹如例。○丁未諭內閣工部尚書毛昶熙都察院左都御史沈桂芬均著在總理各國事務衙門行走。光祿寺卿總理各國事務衙門章京成林並著在該衙門大臣上行走。○又諭前因文彬奏山東兗州府知府沈錫慶稟許兗沂曹濟道長賡非刑斃命與長賡所稟情節懸殊。當經降旨將長賡沈錫慶一併解任。令丁寶楨嚴審確情具奏。茲據丁寶楨奏稱審明長賡因訪查李三等

有隨捻焚掠之案旋卽拏獲供認不諱究出李三曾在府署轎班房涸跡賭博並訪聞府役卞衍運等有開場聚賭情事當將李三等五犯正法並將聚賭之卞衍運等四犯拏獲棍責因其大肆咆哮重責致斃沈錫慶因傳聞道署連斃九命且有府署夫役在內未經查明原委遽行稟許請將長賡沈錫慶一併革職留任等語此案長賡因府署人役聚賭拏獲並不按律懲治輒用木棍重責致斃數命實屬任性僅予革留未免過輕惟據丁寶楨片奏稱長賡歷任地方辦事認真克沂一帶盜匪芟除殆盡間閭賴以久安此次因公獲咎情尚可原等語長賡著從寬革職留任沈錫慶所稟各情雖非有心隱飾惟於府役聚賭未能先事查拏事後又不詳細查明率行具稟亦屬不合著一併革職留任○又諭李鶴年奏甄別各員請旨分別降革及開缺另補一招河南扶溝縣知縣孟宣泗辦案

草率聲名平常候補知縣王德洋舉止輕浮行同市儈均著卽行革職署尉氏縣知縣陶鳴遠識見鄙瑣不諳政體候補知縣劉立恭才具平庸難膺民社均著降為府經歷縣丞歸部銓選新鄉縣知縣多仁遇事操切措施未當鎮平縣知縣謝金誥才欠開展人地未宜均著開缺留省遇有相當缺出酌量補用○以福建臺灣水師協副將吳鴻源為浙江處州鎮總兵官○予山東各屬陣亡殉難官紳婦女二千七百五十四員名口分別旌卹加等○戊申慈禱皇太后聖壽節遣官祭太廟後殿奉先殿○上率王以下文武大臣詣慈寧門行慶賀禮眾官於午門外行禮○詣平安室慈禧皇太后前侍早膳奉

慈安皇太后

慈禧皇太后幸漱芳齋侍午膳○諭軍機大臣等金順奏會師南進大獲勝仗並請飭郭寶昌黃鼎等軍前進各摺片逆匪納萬沅等糾合陝回各股在漢渠官橋迤南一帶迎拒官軍經金順張曜會派楊春祥等從東繞擊並督同各軍分路抄襲賊眾大潰悉向納家牐等處敗逃我軍追過龍王廟南並將東西各壘攻拔據賊供賊首馬添禧納保均已被斬

其來援新賊亦經常福等擊敗金順張曜遂於漢渠東西分紮復破賊寨兩處官兵追近納家牐寨門楊春祥等又拔其南面兩壘殺賊殆盡此次金順等會師南進連獲勝仗偪紮老巢洵足以寒賊膽仍著該署將軍等乘此聲威督飭各軍將近橋納洪賊寨攻拔痛埽逆氛其渠畔礮臺亦著趕緊築齊以資進取前有旨令郭寶昌前赴山西歸李宗義調遣左宗棠諒已遵旨辦理黃鼎與雷正綰等

在打拉池一帶剿賊現正得手能否抽赴北

路著左宗棠斟酌調撥至金運昌一軍打仗尚屬得力該大臣即令該提督率隊前進會同劉松山一軍與金順張曜派出各軍相機夾擊以壯聲援疊據左宗棠奏稱甯靈一帶已無陝回蹤跡茲覽金順所陳大股陝回麇集甯靈東西兩岸唐漢兩渠並被挖斷各情與左宗棠奏報不符此時甯靈界內究竟有無陝回抑係甘回滋擾均著該大臣詳細查明據實具奏金順另片奏請飭通商衙門將僧格林沁所造開花礮兩尊配齊子藥派員解往等語京師向無通商衙門名目本日已諭知神機營查明撥給矣將此由六百里各諭令知之○予山東武城陣亡生員李佩琚賞卹加等○己酉

上奉

慈安皇太后

慈禧皇太后幸漱芳齋侍午膳○諭內閣英桂

卞寶第奏請將庸劣不職之廳縣分別革職降補一摺福建海澄縣知縣朱心培性情貪鄙辦事顛預延平府上洋通判姚榮紀嗜好太重聲名平常署彰化縣知縣通判盧彝操守不謹嗜好甚深均著卽行革職准補平和縣知縣署羅源縣知縣陸如珉公事廢弛難期振作著以縣丞降補歸部銓選以肅官常○辛亥諭軍機大臣等定安奏察哈爾官兵勦捕土回各匪獲勝並請暫留桂成辦防請

將洋槍隊留於歸綏及杜嘎爾因病請假各摺片土回各匪竄擾阿薩爾西里地方經杜嘎爾飭令達爾濟督兵往勦遇賊於罕泰河迤北官軍奮勇截勦賊匪敗退追殺四十餘里斃賊三百餘名餘賊向西逃逸宋慶派兵馳赴鹽海子一帶勦辦北路匪徒亦獲勝仗著定安咨會宋慶杜嘎爾等各督所部迅將鄂爾多斯七旗境內敗竄餘匪勦除淨盡庶可專意河防桂成久任歸綏沿河情形尚為

熟悉著准其暫留該處辦理冬防事宜俟明年春融冰泮再行來京赴任富勒琿所帶洋槍隊一百五十四名著照所請留於歸綏交富勒琿統帶卽由定安知照金順並設法接濟糧餉毋令缺乏杜嘎爾督隊勇往疊著戰功此次因病請假著賞假一箇月准其暫赴托克托城就醫一俟稍痊卽著仍赴軍營以資得力其所統各項馬隊著飭令烏爾圖那遜達爾濟分領防勦不得稍有鬆懈將此由

五百里各諭令知之○壬子四川總督吳棠

奏雲陽等縣被水現經查勘撫恤得旨著飭

該管地方各官認真確查籌款撫恤毋令一

夫失所○癸丑

上奉

慈安皇太后

慈禧皇太后幸漱芳齋侍午膳○諭內閣前因

盛京大凌河西牧廠准領地畝有礙牧政查

勘不實之牧長卓金有營私各情當經降旨

令奕榕嚴查訊辦茲據奕榕奏稱傳訊牧長卓金情虛裝病並無供詞其原領地畝之旗人訊係已革甲兵信廷原名張允和捏造假名多人認領地畝業經派員前往該處將領地二千八百餘畝平毀復查出信廷即張允和侵占另段牧廠地四千六百八十餘畝卓金前後情形俱係該犯調唆主使該犯現在潛往京城請飭拏辦等語牧廠重地該犯膽敢捏名承領且侵占廠地至四千餘畝之多

平奏本
卷一百一十五

二十一

實屬目無法紀亟應嚴行懲辦著步軍統領衙門順天府五城一體嚴拏務獲歸案究辦○諭軍機大臣等總理各國事務衙門奏布倫托海分界事宜請簡員會同俄國勘辦一摺布倫托海所屬地方皆係塔爾巴哈台管轄之地前據明瑤奏稱塔城未經克復道途梗塞無地可分茲據該衙門奏稱俄國使臣擬於塔城安靜地方從北起首先建鄂博並稱無中國大臣會辦亦可自行建立是該處

分界事宜亟應迅速辦理設俄國先自往建則任意侵占事後必啟爭端文碩係布倫托海辦事大臣責無旁貸著於明歲春融時馳赴該處約齊俄國使臣將瑪呢圖嘎圖勒汗至哈巴爾阿蘇一帶逐一查勘會立牌博毋得草率了事布倫托海地方情形福濟知之最悉此次文碩前往應如何揀派嚮導及指授機宜之處著該將軍悉心籌度並著商同文碩錫綸即日行文俄國分界官約期辦理

平奏本
卷一百一十五

二十二

如該分界官業已先往建立該將軍等亦須查明有無侵占迅速奏聞原摺單均著鈔給閱看將此由六百里各諭令知之○派總理各國事務衙門大臣戶部尚書董煦辦理美利堅國換約事宜

大清穆宗繼天開運受中居正保大定功聖智
誠孝信敏恭寬毅皇帝實錄卷之二百六十八

實錄卷之二百六十八

二十三

大清穆宗繼天開運受中居正保大定功聖智
誠孝信敏恭寬毅皇帝實錄卷之二百六十九

奏

同治八年己巳十月甲寅諭內閣前因劉嶽

奏奉聖旨

昭奏參四川總督吳棠荒謬貪汙物議沸騰
各款當經諭令李鴻章馳往四川確查具奏
茲據李鴻章查明覆奏吳棠家眷抵川親丁
僕從僅五十餘人並無用夫三千餘名四驕
一百餘頂及需索門包之事該督到任時司
道及各屬員等均未致送規禮亦無飭造木
桶裝銀情事補署各缺均按班次由兩司會
詳毫無情弊其裁減胡中和湘勇令張祖雲
另募川勇係為節省餉需起見川省應解劉

嶽昭劉嶽曙餉銀陸續籌撥並未停解至另
解岑毓英餉銀本係應協滇餉並非移此就
彼岑毓英亦無差官餽遺之事並訪聞川省
官場習氣頗尚鑽營吳棠履任後遇事整頓
以致貪官猾吏造言騰謗等語吳棠被參各
款既據李鴻章查明均無其事即著無庸置
議川省吏治防務均關緊要吳棠務當振刷
精神力籌整頓毋稍瞻顧貽誤劉嶽昭於所
參吳棠各節並未詳查虛實輒以傳聞無據
之詞率行入奏實屬不合著傳旨嚴行申飭
該督現已馳抵雲南省城著將應辦各事與
岑毓英和衷商榷不得稍涉偏私致干咎戾
○又諭前因御史張沅奏四川道員鍾峻彭
汝琮貪詐鑽營又據御史龔承鈞奏彭汝琮
任意招搖各節先後諭令李鴻章查明參辦
茲據奏稱鍾峻被參各款查無行賄實據惟
該員妄改場規包攬釐局已有明徵彭汝琮
貪利各情雖不承招而鑽營實有其事且丁

憂後奉旨飭令回籍仍敢逗遛營求為崇實
吳棠公請幕友請分別參辦等語四川成綿
龍茂道鍾峻著即勒令休致永不敘用鹽運
使銜四川候補道彭汝琮著即行革職勒令
回籍不准投效各路軍營再圖開復崇實吳
棠於奉旨飭令回籍之員仍復留充幕友均
有不合著交部照例分別議處尋吏部議崇
實吳棠均照上司濫邀屬員充當幕友進署
辦事私罪例革職得旨均著加恩改為革職
留任○又諭丁日昌奏訪查營弁勇丁人等
滋事釀命請分別革職審辦一摺丁日昌無
服族人都司丁炳因銷差回籍經過蘇州輒
因丁日昌出省查勘水災帶同家人間遊妓
館與水師勇丁爭鬧遊擊薛蔭榜帶兵巡夜
查拏滋事人等棍責勇丁頒命請將薛蔭榜
丁炳先行斥革並自請議處等語都司丁炳
在妓館爭鬧遊擊薛蔭榜責打勇丁以致釀
命均屬藐法妄為薛蔭榜丁炳均著先行革

職交馬新貽親提全案人證嚴行審訊按律懲辦丁日昌雖事前公出事後訪聞究屬疏於防範並著交部議處尋議丁日昌應照防範不嚴例降一級留任得旨准其抵銷○諭軍機大臣等劉嶽昭奏移師進省會籌全局各一雄等城劉嶽昭奏移師進省會籌全局各一摺滇軍連克楚雄南安定遠三城已有破竹之勢惟土堆祿豐之賊負隅未下該二處賊黨無多著劉嶽昭岑毓英督飭各軍乘此聲

威迅圖攻拔其省南之昆陽新興館驛連令及東南之澂江竹園等處踞匪並著分飭官軍力圖進取次第廓清以便騰出兵力直搗迤西老巢綏靖靖邊圍劉嶽昭現在既抵省城即著與岑毓英會籌調度該督撫均膺重寄務當和衷商榷共維大局不得稍存私見致負委任昭魯一帶漢回構釁現在曾否解釋並著妥為籌辦毋致滋生事端將此由五百里各諭令知之○又諭李鴻章奏遵查川黔

民教各案大概情形並派員赴黔會查一摺酉陽民教互殺案內首犯劉幅雖有初供可據仍著李鴻章會同崇實吳棠將該犯嚴切覆訊並提集餘犯研究明確張佩超是否並犯亦當懍遵前旨趕緊查明按律懲辦遵義教士被傷殞命一案李鴻章現派道員余思樞馳往查訪並著曾璧光飭令黔省委員會同余思樞督飭官紳妥速籌辦毋稍稽延現在法國使臣羅淑亞業帶兵船起身前赴四

川等處雖不致遽啟釁端第川黔教案不能迅速完結必至枝節橫生愈難措手李鴻章等務當持平妥辦剋期結案不得再有遲誤其宣維禮案即著李鴻章咨明曾璧光查明參辦將此由六百里各諭令知之○予雲南澂江陣亡都司馬廣祭葬世職加等○予雲南楚雄等處陣亡傷亡守備張星等十八員祭葬世職加等○追予江蘇各屬殉難州同汪棠等紳民婦女一千七百十四員名口

分別旌卹如例○追予湖北江夏殉難知縣王恩綬建立專祠予燮附祀○乙卯諭軍機大臣等富明阿奏派兵堵剿竄匪一摺據稱吉林甯古塔屬薩奇庫卡倫額穆赫索羅通海及省西北下二臺等處突有賊匪竄擾業經分派官兵捕剿並於各要隘一體堵擊即著富明阿毓福嚴飭派出將弁督率官兵認真搜捕務將額穆赫索羅通溝等處賊匪悉數殲除不准一名漏網將此各諭令知之○

又諭前據袁保恆奏各省協餉不敷應用請提款撥補並仍由左宗棠統收分撥請撥雷正綰一軍專餉各摺片當交戶部議奏茲據戶部奏稱各省新舊協撥西餉果能源源報解自足敷用且各省財力止有此數袁保恆所請提撥江西安徽江蘇九江關等處餉銀均屬窒礙難行請飭各省將欠解協餉如數籌撥等語陝甘軍務緊要各省奉撥西征月餉欠解甚多何以收飽騰之效著戶部行知

各該督撫監督等懍遵疊次諭旨將短解月餉竭力籌措補解足數以維大局儻再仍前延欠即著左宗棠指名奏其解到協餉仍著左宗棠袁保恆遵照前旨統收分撥籌濟陝甘各軍毋稍偏枯至雷正綰一軍應需餉項原撥河東等處銀兩既不敷用即著照戶部所議由閩海關六成洋稅項下每月撥銀二萬兩為該軍專餉著文煜英桂卞寶第隨時派員解赴陝西糧臺毋稍延緩此外陝甘兩省無論何營餉項均著左宗棠於奉撥協款內酌量勻給概不得另請專餉以免分岐原摺著鈔給袁保恆閱看將此由五百里諭知左宗棠文煜英桂卞寶第並傳諭袁保恆知之○賞通州王恕園等處煮賑粟米六百石○丙辰涼州副都統瑞雲奏請將記名提督王仁和留於涼州幫同防剿得旨著咨商左宗棠妥籌辦理甘省各屬軍務均關緊要毋致顧此失彼○補鑄廣東水師提標左營

遊擊關防從兩廣總督瑞麟請也。以查報水災不實。吉林雙城堡總管那斯洪阿等下部議處。丁巳諭內閣。軍機大臣吏部尚書文祥病逾月。尚未就痊。實深廕繫。著派御醫王繼武前往診視。並賞給人參八兩。以資調理。諭軍機大臣等。金順奏官軍會剿疊勝。踴毀賊壘一摺。納家牯踞逆見渠。湃上修築礮臺。糾眾直撲工所。王家疇莊亦出賊來襲。經金順等會派楊春祥各軍擊收。追至納家牯濠邊。王連三、常福等亦將王家疇莊之賊擊退。逆首納萬沅、王三春、句合陝回於楊和堡修紮。壘卡楊春祥等分投擊剿。斃賊甚多。該處新築四壘。均經官軍踴毀。其分擾渠西及衛隊營。迤東各賊復經何維愷等追殺。直抵納家牯東門。現賊眾均集於納王兩莊。金順等擬進紮楊和堡一帶。以圖進取。著卽會同張曜督飭各隊將渠。湃礮臺趕緊築成。一面抽撥東面各營乘勝合圍。以收聚殲之。

效母任該逆負隅拒守。阻截官軍。前據左宗棠奏。甯靈已無陝回蹤跡。茲金順奏。西岸南路陝匪。廣集納王兩莊。甯夏一帶陝回情形。究竟若何。劉松山軍現抵何處。相距計不甚遠。何以未見會合。靈州是否失守。著金順查明。詳細奏聞。並將甯靈等處甘回向背情形。據實具奏。將此由六百里諭令知之。○予甘肅納家牯陣亡參將何維愷祭葬。世職加等。○戊午諭軍機大臣等。定安奏。控剿蒙境竄匪。殆盡。擬請添調隊伍。並調總兵張得祿統帶各摺片。宋慶一軍進剿鹽海子等處。回匪疊獲勝仗。擒斬殆盡。辦尚屬得手。所有在事出力員弁。著由定安擇尤彙案保奏。候旨施恩。仍著該將軍督飭宋慶等各帶所部認真探剿。並令沿河各軍嚴加防範。毋稍疏虞。現在張曜等進軍甯夏。其邊外後路雖已布置嚴密。而河西一帶尚屬空虛。定安請調勁旅以厚兵力。自應俯如所請。著神機營王大

臣派撥兩翼前鋒八旗護軍營頭二起馬隊一千名並派得力大員統帶前赴綏城其劉景芳舊部馬勇五百名即著崇實檄令該提督統帶赴綏以資熟手一俟到防統由定安酌量分撥以為張曜後路接應至此項兵勇應需餉乾即著神機營崇厚按月籌款給發毋令缺乏其前經到防之天津洋槍礮隊餉需仍著崇厚照舊發給定安奏前後調到之吉林黑龍江馬隊餉乾請飭神機營一併統

籌接濟之處著該王大臣斟酌辦理定安原摺著鈔給閱看張得祿遠在奉天飭調需時應派劉景芳管帶馬勇以免周折將此諭知神機營並由五百里諭令定安崇厚知之○又諭前因川黔教案未結法國使臣欲帶兵船入川當經諭令李鴻章趕緊查明審結茲據總理各國事務衙門奏羅淑亞行抵天津聞知安慶復有拆毀天主教堂耶穌書院之事即行登舟赴滬等語該使此次出京稱欲

帶兵赴川實因川黔教案日久未結故為此脅制之計若不迅速辨結必至激成事端辦理愈形棘手酉陽一案該使以張佩超為主謀楊珍廷為下手劉幅為頂兇必須切實根究著李鴻章崇實吳棠懍遵疊次諭旨趕緊查明擬結遵義一案李鴻章已派余思樞前往查訪並著速為結案毋稍遷延李鴻章前奏擬往重慶就近體察各情如事機稍鬆即行回鄂等語朝廷以此事關繫緊要故特令

該督會同查辦李鴻章行抵重慶後必須將川黔兩案如何辨結奏明候有諭旨再行回鄂安慶拆毀英法教堂究竟因何啟釁此次法國使臣帶領兵船沿江上駛必由安慶經過尤恐藉此要挾枝節叢生著馬新貽英翰速將此案設法了結不可稍有延緩原摺單均著鈔給閱看將此由六百里各諭令知之○以辦理海運漕糧出力予江蘇知州杜文溥等加銜升敘有差（己未諭軍機大臣等

張之萬奏請飭各省撥解協餉興修隄工一摺。堰圩長隄為淮揚保障。軍興以來失修年久潰塌日增。亟須次第修復。據該督奏稱各省額解河銀尚多懸欠。一時無款興辦。現清淮防務已鬆。請飭浙江等省將歲協清淮軍餉按年撥解為舉。辦隄工之用。約四五年後隄工完固。再行停止。並請飭催欠解河銀等語。著李鴻章、李瀚章、劉坤一、郭柏蔭、劉崑將浙江、江西、湖北、湖南歲協清淮餉銀各二萬

兩。自同治九年為始。照舊按年撥解。張之萬卽將應修各工以次興辦。浙江積欠清淮協餉尚多。亦著如數補解。至山東、浙江、廣東欠解河銀。並著瑞麟、丁寶楨、李瀚章、李福泰迅速撥解。以濟要需。將此各諭令知之。○漕運總督張之萬奏報霜汛安瀾命詣河神廟祀謝。以哈密攻克柳樹泉賊壘。賞都司張炳守備張士魁千總李琦李生元劉珍巴圖魯名號守備王俊義等花翎。知縣雷

起瀛等藍翎。餘加銜升敘有差。庚申諭軍機大臣等。福濟等奏密陳管見。暨請飭錫綸催令圖瓦強阿趕回署篆。並請區別巴哈等城餉銀各摺。片布倫托海游民業經反正。若不妥為安插。必至日久流離。福濟等以哈密勇目孔才與降眾多有親故。已函商文麟等轉為勸諭。卽著文麟景廉諭知孔才。迅派妥人招集。將該降眾帶赴哈密軍營。既可遂其報效之忱。人得親朋完聚。藉息爭端。該大臣

等務當善言開導。毋令失所。錫綸因游民新撫欲令圖瓦強阿帶兵鎮守此等降眾。毋庸紮隊防閑。致滋疑慮。况索倫一營甫回本境。管帶之人著錫綸仍照該將軍等前議。催令圖瓦強阿統帶原來官兵趕回署篆。以重邊防。不准藉詞延緩。科布多布倫托海兩城本有定餉。現在哈密巴里坤軍務未平。餉需何可缺乏。嗣後各路餉項到烏城時。福濟等自應先顧巴哈以資防勦。其科海兩城不得藉

口借撥著該將軍等卽行分咨各該城大臣
遵照辦理福濟文碩原摺一件著留覽將此
由五百里各諭令知之 又諭福濟等奏請
飭山西巡撫將烏科二城歲需經費並欠解
新疆軍餉迅速籌解一摺烏科二城每年額
餉銀八萬五千兩近來晉省歲撥僅六萬餘
兩積欠甚多部撥新疆餉銀由烏臺分撥各
城止能暫顧目前瞬屆隆冬各軍飢寒交迫
亟應豫籌接濟福濟等所奏自是實情著李

宗義督飭藩司查照應解烏科二城歲需經
費八萬五千兩並欠解新疆軍餉趕緊如數
籌備源源解往毋誤要需將此由五百里諭
令知之 盛京將軍都興阿奏游匪竄擾孤
山現經撲滅得旨著仍嚴飭撥拏逸犯毋任
逃脫肅清邊界○賞降調頭等侍衛圖庫爾
藍翎侍衛為伊犁領隊大臣○以奉天緝捕
出力予蒙古協理台吉薩金凌保護議敘賞二
品協理台吉那孫巴圖額品頂帶四品台吉

兵噶爾瑪波爾賚等花翎 予故伊犁領隊
大臣霍伽布祭葬卹廕如軍營病故例○辛
酉以神靈顯應頒陝西長武縣

城隍廟扁額曰靈昭宜祿○諭內閣御史賈
瑚奏請將道員長賡處分飭部另議劉嶽昭
傳旨申飭不足以昭炯戒一摺所奏不為無
見惟山東兗沂曹濟道長賡前以濫刑斃命
降旨革職留任因丁寶楨附片聲明該道員
係為整頓地方起見且在蘭山縣沂州府任

內均能賊畏民懷為東省必不可少之員是
以僅予革職留任以示薄懲非謂嚴酷之員
概可稍從末減也總督劉嶽昭據傳聞失實
之辭率行彈劾大員原應治以應得之罪因
李鴻章密陳時事多艱朝廷用人不能不節
取其長且劉嶽昭前在各路軍營尚有微勞
現當雲南軍務需人正資勦辦該督前經革
職留任僅予嚴行申飭以儆將來該御史於
朝廷曲成人才之意尚未深悉所奏著毋庸

置議惟長賡職任監司有撫綏地方之責若仍以嚴酷為能必至濫及無辜著丁寶楨留心察看如再有任性妄為之處卽行據實嚴叅懲辦不得稍有徇隱至劉嶽昭以總督大員辦理軍務儻敢如前輕率任意不能使地方日有起色必當重治其罪毋謂寬典可再邀也○以失察勇丁滋事陝西軍營總兵官劉厚基下部議處○壬戌諭軍機大臣等前因劉嶽昭奏唐友耕所部滇練與昭魯回民

尋仇生釁當諭崇實等飭令該提督趕緊前進不准逗遛茲據崇實吳棠奏魯甸回匪李本忠糾黨數千燒殺村寨抗拒官軍叛跡昭著旋經唐友耕會同該處文武勦撫兼施解餉後路現已肅清威甯等處回寨均各求撫唐友耕一軍應否留滇請飭劉嶽昭等商辦等語李本忠原係杜汶秀黨與此次糾眾復叛自難姑容現經官軍殲斃賊黨千餘名逆膽已寒卽當乘此聲威速籌戡定劉嶽昭所

派孔昭鈐等曾否行抵昭通辦理情形若何刻下雲南省圖已解唐友耕一軍應否暫留昭通會同辦理或仍令赴省著劉嶽昭奏毓英妥商調度如滇省兵力已敷卽著咨商崇實等將該軍遣撤回川扼守邊境崇實等原摺著鈐給劉嶽昭岑毓英閱看將此由五百里各諭令知之○又諭錫綸棍噶扎勒參奏遵保出力弁兵開單請獎請賞喇嘛銀兩並籌給新撫民人口食整頓臺站及索倫官兵請賞銀兩縷陳土爾扈特流徙情形暨創修千佛廟宇請賜廟名扁額棍噶扎勒參奏因病請假各摺片棍噶扎勒參隨征弁兵在事出力自應量予獎勵惟此次單內開列各員有無冒濫著福濟錫綸會同詳細查覈奏明候旨其隨同錫綸辦事弁兵亦著歸入此案酌保數員毋許浮冒至所請賞銀一千兩分給喇嘛愛拜等一節並著該將軍等查覈其奏原摺片單三件卽發交福濟查明辦理變

民初經撫定錫綸等現已籌買糧石等項陸續解往藉資口食而臺站廢弛轉運維艱亟宜設法整頓著奎昌明瑤於所屬各臺站或廣籌錢糧或添設駝馬務令一律整飭不得仍前疲弛致誤大局至該氏人等安插事宜仍著文碩錫綸等妥議章程奏明辦理現屆冬令塞外風雪嚴寒所有在防之索倫官兵及綠營兵丁著照所請每人賞銀千兩以示矜恤棍噶扎勒參歷年帶兵勦賊著有勞績

此次因病請假自應俯如所請著賞假一箇月調理假滿後即赴阿勒台山收集徒眾妥辦安插各事以遂其皈依懺悔之忱其創修千佛廟宇著俟工竣由福濟文碩錫綸等陳奏再行賜名並頒發扁額至所鑄千佛請用軍臺駝載之處殊於定制不合著不准行土爾扈特人眾北徙屯駐布倫托海地方業由錫綸等暫給口食以濟目前著福濟等相機妥辦遣回本牧該蒙古向來崇信佛法並傳

知棍噶扎勒參協同勸阻毋失機宜將此由六百里各諭令知之○癸亥諭內閣明善于凌辰奏請將寶源局已革鑪頭歸案審究並將監督大使議處一摺寶源局大使成蔭於鑪頭孫鳳起私淘銅土漫無覺察已屬不合且於應管事宜前後語涉歧異其庫存銅斤經明善等清查始據監督長潤聲稱內有已革鑪頭王煒均另存商銅一萬餘斤屢傳未領等語殊難憑信王煒均著刑部傳審嚴究監督長潤陳大誥大使成蔭均著交部分別議處○諭軍機大臣等榮頤等奏慕陵樹株年久未能茂密謹擬加種換補請派親郡王查勘議奏再行欽遵辦理等語慕陵慕東陵各山樹株年久未能茂密慕陵五孔橋前松樹亦多萎弱自應查照從前成案酌量加添換補以期一律鬱蔥該大臣等守護

陵寢責有專司況有成案可援尤當遵照籌辦何得率請欽派親郡王查勘意存諉卸殊屬非是著卽敬謹查看將如何按空添樹換土補種俾根深葉茂可期經久之處詳慎妥籌迅速奏明辦理將此各諭令知之 又諭戶部奏統籌雲貴協餉請旨分別辦理一摺雲南貴州兩省軍務未平亟需各省協餉源源接濟茲據該部奏稱雲南協餉前經議准四川每月撥銀三萬兩湖北每月撥銀二萬兩湖南每月撥銀二萬兩江西每月撥銀二萬兩浙江每月撥銀三萬一千六百六十六兩零現在該省軍務緊急各省協餉報解不齊時形拮据自應迅速籌濟著吳棠李鴻章馬新貽劉崐郭柏蔭劉坤一李瀚章遵照該部前次奏案在各該省釐金捐輸及無論何款內迅速湊撥按月提交雲南委員陸續領解不得稍有遲誤其各該省是否按月解清並著劉嶽昭岑毓英詳細開單報部以憑查覈

至貴州協餉前經該部酌定每月四川撥銀五萬兩湖南撥銀二萬兩湖北撥銀二萬兩廣東撥銀一萬兩又曾國藩等奏請免撥黔餉經該部奏准仍遵前奏每月協銀一二萬兩或數千兩現在各該省所撥月餉能否按月解齊未據曾壁光奏咨到部該省現存兵勇若干每月餉銀並雜支等項共需銀若干其本省地丁釐金捐輸等銀每年可收若干除本省所收銀兩外尚需協撥銀若干兩著曾壁光按照戶部指詢各節開單迅速奏報並著吳棠馬新貽李鴻章瑞麟丁日昌郭柏蔭劉崐李福泰各將應協黔餉按月如數撥解不得稍有帶欠將此由五百里各諭令知之 又諭豐紳謙禧奏甯夏籌防情形靈州失守各摺片甯夏府城解嚴業經金順馳奏現在賊匪聚於納王兩莊著金順懍遵前旨會同張曜迅籌圍剿毋任久踞甯夏城防豐紳謙禧仍當備豫不虞毋稍疏懈靈州失守

總未據左宗棠奏報茲豐紳等奏接劉松山
咨稱副將謝榮華等在靈州經理糧臺該處
回民聞各寨堡與官兵接仗遂將城門關閉
殺戮漢民謝榮華等不知下落等語是靈州
回民叛亂已無疑義惟劉松山軍糧臺安設
靈州城內有無激變該回民有無搶刦糧臺
情事並以後情形若何仍著金順詳細查明
據實奏聞將此由四百里諭知金順豐紳並
傳諭謙禧知之○甲子諭內閣都興阿等奏

奏為

奏

拏獲聚眾滋擾賊匪正法請將帶兵各員分
別勸懲一摺盛京鳳凰城屬北井子地方突
有賊匪聚集多人訛詐鋪戶並將岫巖廳通
判截留意圖占踞孤山糾眾擾害經統領叢
登甲等帶兵往捕將賊犯王慶等二十四名
拏獲正法至啟釁要犯叢均茂叢漳等現尚
在逃著都興阿等嚴飭帶兵各員務將該犯
等設法訪拏嚴行懲辦此次在事出力員弁
兵役准由該將軍等擇尤酌保毋許冒濫防

禦倭什楞額驍騎校文保經鳳凰城守尉奕
艾派往勦賊竟敢託故遲延實屬玩倭什
楞額文保均著革職交該城守尉差遣以觀
後效奕艾於所派兵丁參差不齊亦難辭咎
著交部察議○又諭前據奕榕奏請將已革
佐領春鐸暫行留營差遣旋保開復原官當
經兵部議以該革員甫准暫留不得藉詞開
復並聲明應否留營之處令都興阿據實覆
奏茲據該將軍奏稱春鐸年力富強緝賊甚
為得力請准留營並查明已革協領毓昌當
差勤奮防勦尚合機宜請一併留營等語春
鐸毓昌均著准其留營差遣以觀後效○諭
軍機大臣等前因都興阿等奏勦辦展邊事
宜當經諭令該部查照向章行知朝鮮國王
慎守邊境如有游民私越滋擾情事即行照
例懲辦茲禮部奏據該國王咨稱以近來游
民恣意蔓延罔有顧忌非伊國力能擒捕因
畏道路梗塞請使江外之地柵路去處嚴奉

奏為

奏

諭旨無敢更肆違越等語奉天鑾江西岸與朝鮮僅一江之隔該處地狹人稠既嚴禁准墾民人不准過江一步如有越界滋事者准由該國查拏解交附近邊門懲辦該游民等自必知所敬畏不敢肆越滋擾惟內地奸民愈聚愈眾難保不於江外之地仍行偷越該國王慮及道梗欲於柵路去處遵奉嚴禁自係實情著都興阿等懷遵前旨於沿江一帶嚴飭各該地方員弁實力稽查儻有中國民

平定十年五月九

上

人私行開墾或於沿邊肆擾不法者卽行嚴拏懲辦不得任其屯聚以重邊防將此由五百里各諭令知之○又諭左宗棠奏劉松山一軍續獲勝仗暨各軍勒回獲勝並覆陳靈州現在情形郭寶昌無庸折回山西各摺片陝回經官軍擊敗後竄踞顧家寨等處劉松山督軍進剿馬化澄屢以求撫為辭而賊中修寨掘濠並未少息該軍自八月二十九日至九月十九日疊破顧家寨馬家寨各處賊

壘並斬賊目毛遂生等多名現在陝回已去金積堡賊勢甚孤惟馬化澄陰蓄詭謀每以乞撫為緩師之計若不痛加勦擊為患更深劉松山所調花定後路四營計已早到著卽飭令該提督乘此聲威合隊追勦毋任該逆從中勾結日肆蔓延如有真心悔罪赴營求撫者亦著該提督相機辦理黃鼎雷正綰等軍在新堡子等處各獲勝仗殺賊甚多賊由狄道向河州竄去現在赴省驛道已通著該

平定十年五月九

上

大臣卽飭黃鼎等分投扼紮遏賊回竄之路其蘭垣防勦事宜並著妥籌兼顧回人李百寬等該大臣仍當檄令曾傳理分別妥為安撫靈州降回變亂現已收復查非劉松山濫殺所致著毋庸議副將謝榮華等下落並著查明辦理刻下黃河冰結山西河防更為緊要該大臣旣以李慶翱為不足恃則郭寶昌赴晉之行尤不可緩著卽檄令該提督酌帶親兵迅赴山西金運昌已督軍抵甯條梁並

著飭令迅速前進與劉松山軍會埽賊氛。毋稍濡滯。將此由六百里諭令知之。○又諭前因左宗棠奏署山西臬司李慶翱訛詐成性。惟解鑽營。當經諭令鄭敦謹查奏。旋據該署撫奏稱李慶翱於公事頗能講求實無夸詐習氣。因即降旨宣示無庸置議。茲據左宗棠奏稱山西冬防實須早為準備。李慶翱斷非勝任之人。前此劾奏李慶翱均有實據。山西河防若恃李慶翱必至貽誤等語。山西沿河

李慶翱

李

冬防喫緊。李慶翱能否勝任。著李宗義留心察看。確切查明。據實覆奏。毋得稍有遷就。致滋貽誤。將此諭令知之。尋奏遵查李慶翱布置河防井井有條。現值冬防喫緊之時。未便遽易生手。報聞。○予甘肅顧家寨等處陣亡副將李洪吉等十七員祭葬。世職加等。○乙丑諭軍機大臣等。金順奏官軍進攻賊巢。現已合圍。一摺。甯夏解嚴後。逆匪踞納王兩莊。伏匿不出。惟於寨外添築卡壘。負隅抗拒。經

金順會同張曜督兵進攻。獲勝平。毀賊卡三座。分隊追趕。直抵寨門。該逆猶敢憑牆死守。並出馬隊抄襲我軍。復經該署將軍等痛加勦擊。會兵合圍。勦辦尚屬得手。著該署將軍會同張曜激勵各軍。乘此聲威。務將賊巢剋期攻拔。毋稍遲延。其杜家寨等處屯聚陝土各匪。甚眾。亟應勦除。以孤賊勢。並著督飭將弁分路進剿。毋任勾結為患。將此由五百里諭令知之。○又諭劉崑奏援黔官軍擊苗壘

李慶翱

李

勝克復勝東城池。一摺。貴州苗逆九大白等在勝東城屯聚。提督龔繼昌督隊進攻。賊復死拒。總兵蘇元春分路抄擊。燒毀城外之巫信貴龍涼風坳各逆地。當將勝東城池收復。龔繼昌又擊敗施洞口等處來援之賊。其平苗三寨。經蘇元春躡平包大肚等合股來追。官軍將其擊退。清水河邊山上賊地亦經龔繼昌攻破。焚燒賊穀甚多。彭芝亮等復將潛襲施秉縣城及分伏木弄等處各逆先後截

殺各路賊卡均已次第埽除勦辦尚屬得手惟施黃境內苗巢猶多必須先平施黃逆巢肅清江內方可分路攻取制賊紛竄現在席寶田已抵長沙卽著劉崐飭令該臬司趕緊部署督軍前行以期迅抵黔疆與川軍會合痛埽賊氛其清江寨頭鎮施各路應行增兵填紮之處亦著該臬司妥籌布置毋稍疏漏另片奏請調總兵赴黔差遣等語總兵蕭榮芳旣據該撫奏稱打仗尚能得力卽著飭令

軍機處

奏

募勇二千名前赴貴州攻勦歸席寶田調遣以資厚集將此由五百里諭令知之○署甯夏將軍金順奏九月二十九日提督劉松山督軍克復靈州城池報聞命吏部左侍郎胡肇智刑部右侍郎桑春榮在紫禁城騎馬○新授工部右侍郎閻敬銘乞休以都察院左副都御史童華為工部右侍郎管錢法堂事未到任前仍以通政使司通政使于凌辰署理實授大理寺卿彭久餘都察院左副都

御史以湖南官軍克復貴州勝東城予提督龔繼昌等優敘復總兵官唐本朋蘇元春職並賞還勇號花翎以甘肅成縣守城出力予候選同知李篤慶等獎敘有差○予甘肅王家疇莊陣亡記名副都統協領貴陞祭葬世職如都統例建專祠並入祀京師暨原籍昭忠祠○予甘肅狄道等處陣亡副將范珍等十六員祭葬世職○丙寅諭軍機大臣等給事中陳鴻翊奏直隸西南各屬本年雨

軍機處

奏

澤稀少災歉已成聞有報災未遂人懷亂萌之說又廣平屬之清河威縣毗連山東館陶等縣磁州成安毗連河南安陽等縣大名府則與曹州接壤捻幅餘匪難保不潛伏其間其開州等處人心亦多浮動現聞各處已漸有均糧等事若飢民相率效尤各匪乘機竊發必至貽害地方請飭曾國藩查明辦理等語著曾國藩迅卽派員查明各該地方被災輕重情形分別賑濟如有應蠲應緩之處並

著趕緊奏明辦理以惠災黎而消隱患原摺
著鈔給閱看將此諭令知之○又諭文麟景
廉奏請飭迅解軍餉並滙陳關外瘠苦情形
請撥餉採辦軍糧各一摺前因哈密需餉孔
殷諭令山西巡撫於欠餉內先撥銀六萬兩
協濟茲據文麟等奏稱屢次派員催提該省
總未撥解分釐現在關外情形萬緊士卒枵
腹荷戈亟需餉銀接濟著李宗義嚴飭藩司
並河東道迅速籌撥銀六萬兩交防禦奎禧
等星夜解赴文麟等軍營毋再遲誤其烏里
雅蘇台勻撥哈密餉銀該城前因部款未到
先籌銀一萬兩據文麟等稱尚不敷支發著
福濟榮全寬為籌撥銀數萬兩以濟急需至
關外軍糧採辦維艱成祿出關後兵數日增
需款尤鉅著戶部查明有著之款趕緊籌撥
以便該大臣等派員分途採辦並著左宗棠
穆圖善懍遵前旨趕緊籌運接濟兼派大員
專司其事或飭鎮迪道總理後路糧臺俾得

平定縣志

七

源源挽運免致貽誤將此由六百里各諭令
知之○追予江蘇常州等處殉難武生莊載
興等紳民婦女一千四百四名口分別旌卹
如例○旬到河南山東情實罪犯停決河南
斬犯二人山東斬犯三人餘六十五人予卹
○丁卯諭軍機大臣等穆圖善奏官軍擊斃
竄匪獲勝並留總兵接辦軍務請飭糧臺撥
餉接濟各摺片甘肅禮縣所屬地方於本年
八月間被回匪滋擾經提督喻正祥親督兵
勇節節進剿殺賊多名該匪潰敗狂奔現在
崖城等處已無賊蹤即著左宗棠穆圖善飭
令各軍仍行加意防範遇賊即擊毋稍鬆懈
其駐紮中衛之貴字三營著照該將軍所請
飭令總兵黃金山接統將前募防城之勇補
足三營額數並另集團隊二百名悉聽金順
節制即著該署將軍妥為調遣會同張曜聯
絡劉松山暨金運昌各軍將北路回逆悉數
掃蕩貴字營等餉需無處支領著左宗棠飭

平定縣志

七

令西征糧臺將黃金山所統三營並圖隊二百名需用餉銀按月撥濟穆圖善著懷遵前旨將總督關防迅速派員齎交左宗棠接受以專責成將此由四百里各諭令知之○予甘肅永昌等處陣亡副將蔣光晉知縣崔步霄等祭葬世職

御製書卷九

三

大清穆宗繼天開運受中居正保大定功聖智誠孝信敏恭寬毅皇帝實錄卷之二百六十九

大清穆宗繼天開運受中居正保大定功聖智誠孝信敏恭寬毅皇帝實錄卷之二百七十

新修

同治八年己巳十一月戊辰朔

上詣綏履殿問

慈安皇太后安平安室問

慈禧皇太后安至丁酉皆如之奉

慈安皇太后

慈禧皇太后幸漱芳齋侍午膳諭內閣前因

御史張沅奏叅道員宣維禮夤緣開復濫用

捐款等情當交李鴻章就近查辦茲據該督

咨行貴州巡撫曾璧先查覆據實具奏此案

道員宣維禮前在四川打箭鑪同知任內浮

用鑪庫臺費等項銀二萬餘兩經駱秉章奏
參摘去頂帶嗣因辦理防勦局事件崇實奏
請賞還該員頂帶尚非於林自清案內竄名
開復惟上年該員調赴貴州辦理川軍善後
卽向川黔各局借領職銜貢監等項執照三
百餘張並攜帶文武隨員多人沿途滋擾到
貴州後卽安居省寓僅赴安順一行定番防
堵又未親往平日無從悉其行徑其所收捐
銀及借貴州倉穀開報平安弼廠銀兩浮冒

甚多安插賀恩茫降取一項又自捏開銀數
宣維禮以奏調差委人員移行各處文檄輒
稱欽使性情既屬貪黷行止又復不端此等
劣員何可稍事姑容以貽民害四川候補道
宣維禮著卽行革職永不敘用並發往軍臺
效力用儆官邪該革員前在四川勸派捐項
卽著吳棠查明收繳若干並覈算該革員應
領經費等項將所餘捐款押令儘數呈繳貴
州其借用貴州倉穀未放之二百石並著曾

璧光責令如數繳還如查有侵蝕情弊吳棠
等卽行按律懲辦○又諭劉坤一奏分別舉
劾守令各員以資治理一摺所保之江西贛
州府知府魏瀛署信豐縣事試用知縣周之
墉前署德興縣事候補知縣任玉琛均著送
部引見瑞州府知府柳淵不自檢束難資表
率著開缺以同知仍留江西補用義甯州知
州竇鴻甄才欠開展人地不宜著開缺以知
縣中簡缺改補建昌縣知縣崔慕瀾識見稍

拘著開缺以簡缺知縣另補前署星子縣事
卽用知縣藍向葵聽斷平常難勝民社惟文
理尚優著以教職候選萬安縣知縣丁藹士
居心巧滑辦事乖張著卽行革職○追予湖
北田家鎮陣亡道員徐豐玉諡勇烈於死事
地方暨原籍建立專祠生員吳冲謨暨家丁
等均附祀○己巳諭軍機大臣等穆圖善奏
遵旨派員齎送總督關防並克復狄道等處
出力員弁請仍擇尤保獎各摺片穆圖善已

於十月初六日將陝甘總督關防派員齎送涇州交左宗棠接受惟該將軍甫經卸篆應辦之事尚多著准其刊刻甯夏將軍木質關防以昭信守除地方尋常公事卽由藩司包封遞左宗棠行營辦理外如遇緊要軍務著該將軍懷遵前旨率同在城文武力籌保衛毋稍疏虞並著督率所部兵勇隨時勦辦不得稍涉諉卸穆圖善俟左宗棠到省或由左宗棠派員抵蘭接辦防務有人再行聽候諭

旨上年各軍克復狄道州並河州泰子寺汛在事各員弁尚屬著有微勞著准由該將軍擇尤保奏毋許冒濫將此由五百里諭令知之○又諭前據左宗棠奏稱黃鼎等軍獲勝甘省驛道疏通以楊世俊等營分路進紮並令黃鼎先赴蘭垣附近擇要安營此時北路情形計可殫定該大臣得以進規河州矣本日據穆圖善奏派員齎送總督關防前赴涇州軍營該大臣諒已在途祇受惟念蘭州為

根本重地該大臣接篆後於省城防勦一切事宜自係責無旁貸現在河州等處賊巢林立近偪省垣卽使黃鼎各軍皆能繼進亦不可無人指授機宜穆圖善旣卸督篆凡西路軍情及地方應辦事件均覺呼應不靈該大臣能否卽由平涼親赴蘭州居中調度抑一時不克前進先行派人前往接辦或以接辦乏人仍留穆圖善暫駐省垣照料軍務俟到後再行交替該大臣酌度情形著於接奉此

旨後迅速詳細奏聞以慰廑繫近日各路軍情若何黃鼎等軍何時馳抵蘭州劉松山軍在北路辦理勦撫事宜能否漸次肅清仍著該大臣督飭在事將士相機埽蕩迅奏膚公將此由六百里諭令知之○以故喀喇沁扎薩克輔國公德里克呢瑪子僧格扎布襲爵庚午諭內閣李宗義奏蘆鹽越境侵銷河東豫引壅滯請飭查禁一摺山西河東引地被蘆鹽越境侵灌以致豫引滯銷封課不旺

亟應設法疏通著河南巡撫嚴飭行銷河東引鹽各州縣協同委員實力查緝如有長蘆商鹽天津紅鹽以及汴梁小鹽入境卽照私販例從重懲辦並飭蘆鹽總匯之滎澤口及發運之鞏縣長葛襄城周家口朱仙鎮等處各地方官出示曉諭嚴密巡緝毋任偷越以重釐綱○修山西崞縣城工從巡撫李宗羲請也○辛未諭軍機大臣等曾璧光奏普安餘匪闖入安南旋經官軍收復上游苗匪投

誠歷久相安各一摺嚴大五旬結回苗各匪復行闖入安南縣城該文武等力戰數月當將縣城克復在事出力員弁准由曾璧光歸入春閒收復普安安南兩城案內彙保該撫仍檄令官軍接捕餘匪務絕根株並督飭地方官將善後事宜妥為辦理黃荆蔭繳械投誠經署水城通判袁開第督同文武官紳妥為布置歷久相安尚屬著有微勞准其擇尤保奏仍著曾璧光飭令各該員隨時約束毋

任再滋事端將此由六百里諭令知之○又諭前因貴州遵義教士因傷殞命疊經諭令曾璧光妥速籌辦並令李鴻章會同辦結李鴻章前派道員余思樞馳往查訪計早抵黔曾璧光諒已派員會辦此案總以教士因何身死為最要關鍵必須質證明確斷不可稍涉含糊現在法國使臣羅淑亞業已出京赴滬聲言欲帶兵船赴川實因川黔教案未結故為此脅制之計若再遷延必至枝節叢生

愈難辦理著曾璧光懷遵疊次諭旨嚴飭委員會同余思樞速將此案設法了結不得稍有延宕將此由六百里諭令知之○直隸總督曾國藩奏海運南糧抵津每日驗收三萬石剝船不敷輪轉請仍照舊章每日驗收一萬石免令停兌待剝下部知之○命刑部左侍郎志和前往熱河會同都統慶春查辦事件○以貴州仁懷勦辦土匪出力賞同知銜知縣張廷塏花翎教諭趙世煊等藍翎知府

周東正等加銜升敘有差予直隸各屬陣亡殉難文生孟憲禹等紳民婦女一千一百七名口分別旌卹如例○予河南各屬陣亡殉難紳民婦女一千七百十四名口分別旌卹如例○豁免直隸東明縣被淹被擾地方積欠額賦○蠲緩直隸開東明長垣安平武清廣平元城豐潤霸文安大城固安永清東安昌平清苑滿城完雄東鹿安河間獻阜城任邱天津青靜海滄南皮鹽山慶雲贊皇邢

臺平鄉廣宗鉅鹿永年邯鄲成安肥鄉曲周雞澤磁大名延慶蔚柏鄉隆平高邑臨城甯晉深饒陽博野肅甯無極趙五十八州縣被水地方新舊額賦暨各項租課民借倉穀有差○壬申諭內閣前因左宗棠奏提督劉松山勦辦靈州回匪連獲大捷請將該提督前次失察游匪一案革職留任處分懇恩開復等情當經諭知該大臣俟查明靈州失守情形後再行降旨茲據金順奏稱劉松山到靈

州後勦撫兼施現已將州城克復勦辦甚為得手等語與左宗棠所奏大略相同劉松山向來打仗甚稱得力此次勦辦靈州回匪尤能速赴戎機謀勇兼備劉松山著准其開復革職留任處分其前案內失察之分統營哨各官均皆隨同打仗著有微勞著一併免其查叅此外出力各員著准由左宗棠擇尤保獎毋許冒濫○諭軍機大臣等前因都興阿等奏覆勘展邊事宜當經諭令該將軍等俟

朝鮮覆文到日妥慎籌辦並因禮部奏據朝鮮國王咨請於沿江之地嚴禁偷越亦經諭令該將軍等飭屬認真辦理茲據禮部奏據朝鮮國王咨覆奉准江岸一帶酌留三五十里畫清界限之議請於原野平闊之處畫界稍遠等語著都興阿額勒和布恩錫查照該國王所請在江岸寬平處所酌量籌辦並於展邊之時將界限畫清仍遵前旨督飭各該地方官遇有游民私墾及滋擾等弊立即密

拏懲辦毋稍疏忽以申邊禁而靖地方朝鮮國王咨文均著鈔給閱看將此各諭令知之又諭前因總理各國事務衙門議覆富明阿等奏朝鮮國人往俄界墾地應由朝鮮早申禁令當諭禮部行文該國王妥為辦理茲據禮部奏稱准富明阿轉據甯古塔副都統咨報琿春協領訥木津奉飭前往摩闊歲會晤俄官面議兩國交涉事件於中途遇朝鮮國男婦四五十人陸續越界均由珠倫河前往海沿問其來歷言語不通因係俄界未便攔阻旋密查海沿嚴杵河棘心河等處已聚集千餘人續投者尚紛紛不止請由該部行文該國王飭令邊界官悉數領回等語朝鮮國民人潛投俄界男婦成羣竟至千餘名口之多難保不愈聚愈眾該國王自應及早禁止庶不至別滋事端著禮部迅即行文該國王將逃赴俄界民人飭令該國邊界官悉數領回並由該國王申明禁令嚴飭該國沿邊

官弁約束民人毋許再有逃越以重邊防並著富明阿飭令訥木津會商俄國廓米薩爾務將朝鮮越界民人悉行逐回不得久留俄界以致別生枝節原摺著鈔給富明阿閱看將此諭知禮部總理各國事務衙門並由五百里諭令富明阿知之又諭左宗棠穆圖善奏官軍疊勦河狄窺回獲勝左宗棠奏北路官軍克復靈州及進駐平涼令周開錫總統秦州各軍金順泰勦辦甯夏南路踞逆獲

勝並查明劉松山收復靈州情形各摺片甘肅狄河回匪糾合陝回崔三等餘黨出巢肆擾經穆圖善派傅先宗進勦獲勝左宗棠又檄李耀南等軍敗賊於李家灣一帶斬獲甚多其甯夏南路回匪楊士恭等勾結陝回援應納王各寨又經金順張曜督軍迎勦疊獲勝仗勦辦均屬奮勉現在陝境肅清各匪已無立足之處勢必要挾甘回苟延殘喘如能將河狄各賊巢逐一攻破斷其黨援則勦撫

皆易得手著左宗棠仍飭李耀南等及前派出之黃鼎各軍乘機進剿毋稍鬆勁一面嚴檄南路在防將士實力嚴防以免顧此失彼穆圖善亦當劉飭傅先宗等與陝軍聯絡聲勢迅埽逆氛納王各寨為回逆負固之區仍著金順會同張曜迅圖攻拔毋任憑險死守阻截官軍左宗棠奏查明靈州失陷文武下落情形請將各員免議等語署靈州參將馬福吏目黃廷輝既據奏稱聞變求援並導官

軍克復城池情尚可原馬福黃廷輝均著免其置議其劉松山收復靈州情形與本日金順所奏大略相同該大臣現擬進駐平涼著卽懷遵前旨將能否馳赴蘭垣情形迅速具奏回目馬化澂既給馬三重等偽劄是其狂悖之情業已敗露而又求總兵胡昌會保其永不反覆並力保陝回呈繳馬械前後兩歧殊難憑信卽著該大臣嚴飭劉松山等乘此軍威迅圖埽蕩該逆如實係真心乞撫仍著

左宗棠責成劉松山相機妥辦萬不可為甘言所誘輕率收撫轉遂奸謀周開錫既馳赴秦州派令總統諸軍卽檄飭該道員將南路兵事餉事認真整頓以資臂助北路勦撫事宜著卽檄知雷正綰等與劉松山商推以免紛歧將此由六百里各諭令知之○又諭金順奏餉源支絀請飭添撥專餉一摺金順現抵甯郡進剿回堡該軍向由山西協撥月餉四萬兩嗣因山西防費日增經部議每月減

至一萬當此攻勦喫緊之際自應寬為籌備該副都統請仍由山西添撥專餉所奏自係實情著李宗義於每月應解一萬兩外再添撥一萬兩按月如數批解以濟要需將此由五百里諭令知之○以甘肅甯夏攻克王太堡等處賊巢賞總兵官王連三遊擊李福貴馮貴珍黃得勝劉用富都司李純一詹恩科龍得勝把總胡崇光巴圖魯名號餘加銜升敘有差予陣亡副將李大勝守備鮑得勝郭

占魁祭葬世職加等○予甘肅吳忠堡傷亡提督易德麟祭葬世職謚壯節於死事地方暨原籍建立專祠○予甘肅靈州陣亡總兵官楊玉賢等十五員祭葬世職加等知州尹泗等十一員祭葬世職○予甘肅河州等處陣亡都司唐治能等祭葬世職○癸酉諭軍機大臣等英翰奏皖省籌解郭寶昌一軍月餉擬將潼關轉運局移設汾州由金運昌派弁迎提請飭山西巡撫檄屬沿途照料等語

前諭郭寶昌酌帶親兵赴晉聽候李宗義調遣並據左宗棠奏金運昌軍已行抵甯條梁茲英翰請將轉運局移設汾州皖省以後起解該軍月餉由河南陝州渡河解交汾郡轉運局俾資接濟金運昌應需月餉卽由該員派弁迎提著李宗義轉飭各該地方官於皖餉行抵晉省時沿途妥為撥護照料解赴汾州交局收存聽候該軍提撥以濟要需將此由五百里諭令知之○又諭英翰奏辦理考

童滋鬧教士公寓大概情形一摺安慶城內東右坊西右坊地方有英法兩國教士居住公寓九月間各屬考童及閒雜人等擁入英國教士密道生等寓內拋毀什物法國教士金緘三等寓內家伙亦有毀失尚無傷人拆房等情現經英翰批飭該地方官趕拏為首滋事之人並經馬新貽派道員吳世熊等前往查辦此案自不難完結惟英國葛訥利所言情形與地方所稟略同法國達伯理來函

與地方所稟大同小異並敘所失之物數至四千圓之多此時若再事耽延難免不另生枝節馬新貽等仍當懷遵前旨嚴飭該府縣官將領首滋事之夏姓等迅速查拏持平審辦並飭吳世熊等會同該地方官妥為料理斷不可稍涉偏縱致啟釁端將此由五百里各諭令知之○以東河防汛守壩出力賞道員綸恩姜麓二品封典知府張瀛等加銜升敘開復有差○減免兩浙袁浦浦東橫浦三

場拋荒田畝上年竈課旌表守正捐軀直隸高陽縣民單印川妻侯氏甲戌遣官祭先醫之神諭軍機大臣等蘇廷魁奏請添撥庚午年黃河兩岸工需銀兩一摺黃河兩岸各廳工程緊要必須妥籌布置據該署督奏稱額撥款項不敷請於節省防險銀兩內添撥料理等語著照所請於節省項下撥給工料銀三十萬兩土工銀八萬兩由李鶴年督飭藩司於年前先撥四成以便採購料物

估辦土工其餘六成於春汛前撥發三成伏汛內再撥三成俾資接濟蘇廷魁務當督飭該道廳等覈實動用毋得稍涉虛糜將此各諭令知之○乙亥旬到熱河直隸山西情實罪犯停決直隸斬犯二人絞犯三人山西斬犯三人餘六十四人予○追予四川各屬陣亡殉難紳民郭新元等暨歸女一千一百九十六名口分別旌卹如例○丙子諭內閣溥楙等奏請將承辦

定陵應用各物之司員查辦一摺定陵奉安後應用各物承辦司員久未辦齊實屬不成事體經溥楙等差傳書吏審訊據稱係鑲藍旗滿洲已革員外郎寶山未能交代以致延誤亟應徹底根究所有革員寶山著該旗嚴傳到案押赴東陵承辦事務衙門以憑查究如有侵吞隱匿情弊卽由溥楙等從嚴叅辦○山東巡撫丁寶楨奏拏獲莒平縣謀逆教匪孫上汶等正

法得旨著卽督飭各該文武嚴拏逸犯盡絕根株以靖地方又奏卹縣刃民趙鞍帽聚眾抗糧現經拏獲正法批著檄飭該署縣嚴密訪查如另有為首滋事之人卽行拏獲懲辦以儆刁風○以營兵逞兇失於防範署山東青州營參將舒泰下部議處予被戕署知府王汝訥守備金國彥祭葬卹廕○到本年朝審情實罪犯停決斬犯四人餘十一人予○蠲緩山東鄆城濮壽張濟甯齊東臨邑

東平東阿惠民青城陽信濱滕嶧陽穀荷澤
曹定陶鉅野范觀城朝城聊城館陶金鄉魚
臺平原樂陵商河單莊平武城甯陽長清陵
德平陰鄒城武堂邑博平莘嘉祥海豐霑化
蘭山汶上臨清歷城章邱鄒平長山齊河濟
陽肥城利津滋陽曲阜泗水清平冠高唐邱
濰夏津恩禹城六十七州縣暨德州東昌臨
清濟甯四衛東平所屯莊永阜官臺二場歛
收地方新舊額賦並雜稅竈課有差○丁丑

諭內閣福濟奏遵議布倫托海辦事大臣請
卽裁撤仍歸科布多管轄一摺新設布倫托
海辦事大臣既經該將軍與奎昌錫綸等相
商均以裁撤為宜自係實在情形著卽照所
議裁撤所有該城官兵卽行撤回其新頒印
信卽著撤銷索倫厄魯特等處領隊大臣及
棍噶扎勒參應辦事宜並奏咨各件著統歸
科布多參贊大臣經理以符舊制而一事權
喇嘛歲支茶布銀兩及棍噶扎勒參於一二

年後應否與各處呼圖克圖一體輪流年班
進京之處著理藩院妥議具奏此次裁撤布
倫托海係屬改歸舊制著福濟等妥為曉諭
俾各守分安居朝廷初無歧視毋得互相議
論致兵民人等復生疑慮也尋理藩院奏遵
議喇嘛歲支茶布銀兩向無例案可援應請
飭下烏里雅蘇台將軍會同科布多參贊大
臣等酌定歲支銀兩若干應由何處發放一
併議奏至棍噶扎勒參應否進京應由該管

大臣查明是否經卷熟習咨覆到院再行覈
辦從之○諭軍機大臣等福濟奏遵議裁撤
布倫托海請仍隸科城一摺所議甚是布倫
托海本係科境阿勒台山一隅之地該處設
城後辦理諸多窒礙卽著照所請裁撤將新
設布倫托海辦事大臣印信繳銷所有索倫
厄魯特各領隊大臣及棍噶扎勒參應辦事
宜統歸科布多大臣辦理以符舊制海城官
兵裁撤後所餘官弁除經手糧餉之員暫留

科城辦理覈銷外其餘旗營官兵仍著照前次奏定章程分駐熱河等處綠營官兵情願入伍者亦卽照福濟所議呈明口內各營汎以原銜當差隨時酌補不願者亦聽其便但不得逗遛科城致生事端奎昌等務當隨時留意妥為經理福濟亦當與奎昌等和衷商酌不可稍存膜視將此由五百里各諭令知之○調布倫托海辦事大臣文碩為科布多幫辦大臣○戊寅諭內閣本年各直省辦理

秋審人犯經刑部由緩決改情實者河南省多至六起山東省多至八起該撫並臬司於秋讞重犯未能詳審覈議均著交部查明分別議處嗣後各將軍府尹督撫等務當督同所屬遵照定例酌覈案情悉心究擬固不可失之刻覈亦不可惑於救生不救死之說故從輕減總期執法持平無枉無縱用副明慎用刑至意將此通諭知之諭軍機大臣等御史舒明奏本年秋季俸米北新倉限期已

逾海運倉限期亦迫所放米石均屬無多風聞朝陽門內南小街有匪徒百幅卽趙大套在倉外勾串米鋪將米票盡行把持致該倉無憑出放請飭拏辦等語著步軍統領衙門遴派幹員將百幅卽趙大套嚴拏務獲送交刑部審訊明確按律懲辦將此諭令知之○又諭前因福濟等奏請撥協濟索倫人眾經費文麟等奏請撥銀採辦軍糧各摺先後諭令戶部議撥茲據覆奏擬於山東地丁項下

撥銀三萬兩為接濟索倫人眾之用又山東奉撥新疆月餉自同治五年起至本年十月止共欠解銀一百三十五萬五千兩現在該省軍務久經肅清庫儲自必漸裕請於前項欠解餉銀內提銀十萬兩為哈密採辦軍糧之用等語新疆所需各款均關緊要著丁寶楨嚴飭藩司迅速籌銀十三萬兩派員解由山西至綏遠城再由定安派員轉解烏里雅蘇台以三萬兩交福濟等應用以十萬兩撥

解文麟等應用此項餉銀入晉境後並著李宗義迅催前進毋稍延緩將此由四百里各諭令知之○又諭曾璧光奏覆陳教務情形一摺據稱遵義府城民教爭鬪業委道員陳昌運馳往查辦先將藉事搶擄之民人傳有沅訊明正法民教悉已解散並將教士三人於六月十三日護送到省七月初七日據代辦主教任司鐸照會趙教士到省後於初六日因傷身死該撫委員往驗而任主教復以

業經殯厝未便開棺相驗攔阻至梅教士在仁懷被殺一語有無其事已派員往查等語此案既據曾璧光查明趙教士並非因傷身死該主教又有攔驗情事即可從此設法了結折服其心梅教士是否被殺亦應確切查明現在李鴻章所派之道員余恩樞計早抵黔即著李鴻章曾璧光飭令余恩樞並該省委員等迅速持平辦理及早結案免致羅淑亞到後另生枝節將此由六百里各諭令知

之○綏遠城將軍定安奏嵩武軍會勦南路踞逆攻拔王洪堡等處賊巢得旨著卽知照張曜會同金順將納王等寨迅速攻拔以靖逆氣○以禮部尚書全慶兼署吏部尚書○以鑲紅旗漢軍都統奕劻兼署鑲白旗滿洲都統○以山西綏遠城等處防河出力予按察使興奎優敘總兵官馬陞以提督簡放餘加銜升敘有差○予江蘇太湖被戕都司張在邦祭葬世職○追予安徽和州等處殉難

監生王鼎元等紳民婦女七百三十五名口分別旌卹如例○緩徵兩淮富安豐稟垛東臺河垛丁溪草堰劉莊伍佑新興廟灣板浦中正臨興十四場被水竈地新舊折價錢糧○已卯諭軍機大臣等戶部奏遵撥東三省庚午年官兵俸餉並請飭直隸等省籌解歷年欠餉各摺片奉天吉林黑龍江三省庚午年應需俸餉現經該部覈議除將各該省應徵之款儘數抵充外所有奉天餘騰銀十

萬五千六百餘兩即著留為該省緝捕官兵經費其指撥吉林之長蘆庚午年鹽課銀七萬二千二百七十二兩山東庚午年地丁銀五萬兩河南庚午年地丁銀二萬兩指撥打牲烏拉之長蘆庚午年鹽課銀二萬五千兩河南驛站存騰銀一萬七千二百九十八兩指撥黑龍江之長蘆庚午年鹽課銀五萬兩山東庚午年地丁銀五萬兩河南庚午年地丁銀三萬兩驛站存騰銀四萬五千兩直隸

旗租銀六萬兩著曾國藩丁寶楨李鶴年按照各數迅速籌撥派員解交盛京戶部收納俟各該省銀兩解到即著都興阿等知照富明阿德英派員前赴奉天關領俾資散放所有各項支放銀兩該將軍等務各遵照部定折放章程覈實辦理並將用過銀錢於奏銷時照例題報其餘騰之銀即著歸於下年請領時聲明備抵毋稍浮冒至直隸山東河南陝西歷年欠解東三省俸餉銀共一百八十

餘萬兩並著曾國藩丁寶楨李鶴年劉典迅即督飭藩運各司陸續籌解奉省交納不得仍前延欠致誤要需原片著鈔給曾國藩丁寶楨李鶴年劉典閱看將此各諭令知之○又諭恩麟奏巡閱後藏起程日期並親歷邊隘妥籌安撫一摺前因廓爾喀與唐古特頗有猜嫌諭令恩麟前往邊界妥為籌辦恩麟現已定期起程巡閱後藏即赴廓番交界親自禁約該大臣務當凜遵前旨不動聲色於

開誠布公之中仍不失長駕遠馭之意以期潛消釁隙邊境又安恩麟起行後藏中一切事宜即著德泰妥慎辦理毋稍疏虞將此由五百里各諭令知之○以江西提督劉勝祥所部各營捐輸欠餉永廣永新縣學額一名湖南寶慶府三名道州一名○以山東捐輸團練永廣清平縣學額七名章邱縣五名○蠲免安徽無為當塗銅陵望江東流蕪湖繁昌和含山懷甯桐城宿松南陵貴池青陽合

肥巢十七州縣暨屯坐各衛被水地方節年
原緩額賦並各項租課○緩徵安徽毫石隸
涇甯國旌德太平蒙城滁全椒廣德泗懷甯
桐城潛山太湖宿松宣城南陵貴池青陽建
德合肥廬江舒城巢鳳陽壽宿懷遠定遠靈
璧鳳臺潁上霍邱盱眙天長五河三十七州
縣暨屯坐各衛被水被旱被風被蟲地方新
舊額賦並各項租課有差○庚辰
聖祖仁皇帝忌辰遣官祭

景陵○

上詣

壽皇殿行禮○諭內閣劉典奏請將貪污陋劣
之知縣革職審辦並自請議處一摺陝西藍
屋縣知縣何梅楫經劉典派委兼辦該縣釐
務輒敢擅用小票就啞柏鎮一處釐卡抽解
數目已大相懸殊且該員勒派商戶津貼衙
門用費並於生辰索取里民公送壽禮實屬
貪鄙無恥何梅楫著卽行革職由該署撫督

同司道逐款嚴訊按律懲辦以儆官邪劉典
前駐三原相距甚近未能覺察咎有應得既
據查出該員劣蹟奏參所有自請議處之處
著加恩寬免○又諭劉典奏分別叅劾知縣
等語陝西候補知縣劉文彬志趣卑污不知
自愛著革職永不敘用前署大荔縣知縣齊
壽昌在署任內諸事廢弛輿論沸騰惟係舉
人出身文理尚優著改為教職歸部選用以
上二員均不准在各路軍營投效以杜鑽營

○兩江總督馬新貽奏江甯府屬圩田被淹
請將抵徵錢文暫停買米北運留為採買倉
穀及一切撫恤修圩之費下部知之○壬午

上奉

慈安皇太后

慈禧皇太后幸漱芳齋侍午膳○諭軍機大臣
等穆圖善奏查明靈州降回變亂大概情形
並暫委寶型護理安肅道篆各摺片前據左
宗棠金順奏劉松山收復靈州情形已降旨

將署靈州知州鍾蘭及代理知州尹泗等交部照例議卹並因馬化澄有給馬三重等偽劄情事又代陝回甘言求撫前後兩歧殊難憑信諭令左宗棠嚴飭劉松山等乘勝進兵相機妥辦該大臣務當懍遵前旨督率劉松山等軍分別良莠勦撫兼施不得輕率收降致墮詭計左宗棠計已進駐平涼能否馳赴蘭垣居中調度仍著迅速具奏穆圖善莅甘數載熟悉情形現在甯夏防守緊要該將軍

既已交卸督篆著將省城防勦事宜布置妥協俟左宗棠到省或左宗棠派員接辦有人即行前赴甯夏將軍本任以重職守所請來京陛見之處著毋庸議所有穆圖善原部各軍均著歸左宗棠調遣甘軍餉項並著該大臣均勻分撥以利師行毋得稍分畛域安肅道員一缺穆圖善現據肅州鎮總兵陶生林稟請暫委四品頂帶寶型護理該員係已革知縣資望太輕恐不足以勝任著左宗棠隨

時察看如果不能稱職即行另派委員前往接署將此由五百里各諭令知之○又諭金順奏官軍攻拔賊壘現在進勦情形一摺南路各堡寨攻克後經金順會同張曜督軍進勦將王家燒房油坊寨先後攻拔逆首馬鳴漳擒獲正法惟納王兩寨尚為賊踞亟應乘勝進攻著金順會商張曜嚴飭派出官軍轉戰而前將該二寨迅圖規復以期次第廓清納家牆匪勢窮蹙回目納王潰等赴營乞降

如果能呈繳軍械馬匹捆獻賊黨並與王家墮莊斷絕往來自當分別辦理惟該逆反覆無常金順不可稍涉大意致墮詭謀將此由六百里諭令知之○又諭總理各國事務衙門奏請添派立界大員一摺前因布倫托海所屬地方皆係塔爾巴哈台管轄之地所有分界事宜業經諭令文碩約期馳往辦理惟現在布倫托海大臣既經裁撤該處立界事宜即應統歸科布多大臣經理奎昌前與俄

國使臣勘辦科布多邊界甚屬妥協情形較為熟悉著即改派奎昌於明歲春融時馳往該處與俄國使臣將瑪呢圖嘎圖勒汗至哈巴爾阿蘇一帶逐一查勘會立牌博文碩即毋庸前往其應如何揀派嚮導及指授機宜之處仍著福濟遵照前旨悉心籌辦文碩既補授科布多幫辦大臣此次分界事宜亦當會同商議妥為辦理原摺均著鈔給閱看將此由六百里各諭令知之 又諭前因榮全

奏賠償俄國諾海牲畜銀兩請於津海關或北洋三口俄國應納稅餉內照數扣收當交該衙門議奏茲據總理各國事務衙門戶部奏稱此項賠款既經榮全議定俄錢二十四萬約中國銀十一萬數千兩除委員薩碧屯已還過銀九千八百二十兩外其餘銀十萬數千兩有零按照原議三年補償每年需銀三萬四千兩有應籌款分年補償惟北洋三口山海東海兩關並無俄國交納貨稅即天

津一關俄商陸運稅銀每年亦止一千餘兩不敷抵扣請於山西應解京餉內分年籌撥等語著李宗義飭令藩司於山西應解京餉內自明年為始分作三年每年撥銀三萬四千兩交歸綏道轉解務須提前於每年三月起解四月解到烏里雅蘇台交榮全收納覈計三年共應解銀十萬二千兩於應賠俄國款項有無盈絀著福濟榮全查明辦理原摺均著鈔給閱看將此由六百里各諭令知之

予甘肅肅州被戕縣丞陳聯樹祭葬世職眷屬人等分別旌卹如例

大清穆宗繼天開運受中居正保大定功聖智
誠孝信敏恭寬毅皇帝實錄卷之二百七十

大清穆宗繼天開運受中居正保大定功聖智
誠孝信敏恭寬毅皇帝實錄卷之二百七十一

校

同治八年己巳十一月癸未諭軍機大臣等。

何瑄奏官兵需糧孔亟瀝情陳訴一摺巴里
坤官兵困苦前經諭令文麟每月籌撥糧石
接濟茲據何瑄奏稱准文麟咨月糧無款可
籌僅能分撥二千數百石以後不能按月接
濟等語巴城地方瘠苦士卒枵腹荷戈盼糧
日久哈密軍務稍鬆自應妥籌兼顧著文麟
景廉懍遵前旨務當設法籌撥源源接濟不
得稍存膜視伊勒屯何瑄於哈密糧石辦有
成數卽派員迎提以濟軍食伊勒屯係巴里

坤領隊大臣此次何瑄奏報何以未經列銜並著據實覆奏將此由五百里諭知文麟景廉伊勒屯並傳諭何瑄知之免科布多所屬阿勒台烏梁海七旗本年例貢貂皮甲申諭內閣御史錫光奏請嚴禁五城寺院演劇招搖婦女入廟以端風化一摺寺院庵觀不准婦女進內燒香例禁甚嚴近來奉行不力以致京城地面竟有寺院開場演戲藉端斂錢職官眷屬亦多前往城內隆福寺護國

寺開廟之期婦女亦復結隊遊玩實屬有關風化著步軍統領衙門順天府五城出示曉諭嚴切稽查遇有前項弊端即將該廟僧尼人等從重懲辦以挽頽風○諭軍機大臣等劉嶽昭岑毓英奏官軍收復昆陽州城並現在分勦各路賊匪情形一摺昆陽踞逆楊振鵬因城外賊壘蕩平率黨抗拒提督馬如龍親往督辦楊振鵬意圖脫逃經張保和等設伏圍拏與馬聯魁等一併正法逃竄各匪截

殺殆盡其往來迤西通賊之馬生隴等亦經弋獲現在該處漢民均已歸業州境一律肅清著卽飭令該署州張啟辰等將善後事宜悉心經理其解往新興呈貢各屬之投誠回人亦著飭屬妥為安置毋令日久滋事新興軍務雖將逆首劉綱等正法而州城現尚未下仍著劉嶽昭等督飭馬青雲各軍實力環攻迅圖克復省西土堆餘匪並著親督在事將弁晝夜攻取毋任苟延殘喘祿豐澂江竹

園等處餘逆未平該督等務當嚴飭何秀林等各率所部馳往祿豐會合勦洗並一面檄令張保和迅移得勝之師由昆陽前赴竹園相機勦擊迅殄寇氛其昆陽出力文武各員著劉嶽昭等查明彙案奏保昭通一路孔昭鈐等辦理若何唐友耕已否由昭通前赴省垣該督等當懍遵前旨妥商調度並將昭通一切事宜及早籌辦用靖邊陲將此由六百里各諭令知之○以雲南元謀縣城被賊竄

陷旋即收復革署知縣楊思齊職仍留營○
予雲南昆陽等處陣亡守備馬春等十員祭
葬世職加等追予江蘇各屬陣亡殉難五
品銜程桓等紳民婦女一千八百三十七員
名口分別旌卹如例

上以冬至祀

天於

圓丘自是日始齋戒三日○乙酉諭軍機大臣
等榮頤等奏遵旨籌辦補換樹株開單呈覽

一摺

慕陵

慕東陵各山樹株年久未能茂密並多萎弱亟
應加添換補經榮頤等親詣各山履勘將不
堪成活者隨時剷除換補所創樹窩酌加寬
深共加添三萬六千八百餘株分作四年次
第補種所籌尚屬周妥著即督飭在工司員
敬謹辦理總期妥為培養經久繁茂不得草
率了事其應需各項銀兩仍著查照舊章覈

實具奏將此各諭令知之尋奏遵查初次換
補加種樹株共需銀六千七百四十兩其蓋
廠置器等工擬豫領銀一萬二千兩覈實動
支如有贏餘存備二限支用下部知之○丙
戌諭內閣醇郡王奏請整肅功令以杜專擅
一摺據稱領侍衛內大臣向無歸宗人府管
轄之例自惇親王補授宗令臚列直班新章
多條奏准通行且將領侍衛內大臣直班推
班亦令一律呈報藉整頓之名啟攬權之漸

且查操應否推班及領米日限自應推班亦
未載入章程殊屬遺漏請將新定直班章程
特派王大臣重加刪定等語惇親王向來辦
事間有意氣用事不能詳慎之處若如醇郡
王所稱藉整頓公事為名施竊弄威柄之術
諒惇親王亦斷不敢出此醇郡王措詞過當
殊屬非是著傳旨申飭惇親王醇郡王同為
國家懿親情聯手足總當以敦睦為懷不得
各存意見至王公直班本有舊制可循所請

特派王大臣重定章程一節不特摺內所稱
看操領米各事挂一漏萬且亦徒事紛更著
毋庸議宗人府前定直班章程日久不無窒
礙亦著毋庸置議嗣後應在內直班之王大
臣等遇進班之期如有藉詞推諉曠誤不到
者一經發覺定當遵照嘉慶道光年間歷次
所奉

諭旨嚴行懲辦決不寬貸○欽差大臣左宗棠
奏據總兵官劉厚基呈請於湖南耒陽縣原

籍捐建忠義祠彙祀所部陣亡員弁兵勇允
之○以甘肅克復靖遠縣城並歷年勦匪出
力賞總兵官張琮提督銜知縣何愈等藍翎
餘升敘有差予陝西神木殉難知縣賈敬
修祭葬世職加等追予甘肅傷亡副將穆
隆阿陣亡千總馬垂忠祭葬世職加等○予
陝西同官等處陣亡都司殷洪甲等三十一
員祭葬世職與副將譚同升等均附祀提督
譚玉龍專祠副將劉士祁附祀原籍湖南善

化縣忠義祠○丁亥冬至祀

天於

圓丘遣鄭親王承志恭代行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵○遣官祭

端慧皇太子園寢。停次日朝賀上奉。

慈安皇太后

慈禧皇太后幸漱芳齋侍午膳。○予故直隸霸

昌道升任尚書甘汝來入祀名宦祠。從總督

曾國藩請也。○戊子山西巡撫李宗羲奏提

督宋慶一軍已於十月十六日移紮皇甫川

防守河岸以固省北藩籬。報聞。○己丑諭內

閣御史李德源奏請將冒稱宗室勾結匪徒

假充官役。訛詐搶刦各犯嚴拏懲辦。一摺。京

城為首善之區。理應地面嚴肅。若如該御史

所奏匪徒冒稱宗室假扮番役勾結賊匪誣

害善良並聚集多人在京城內外設立下處

盤踞滋擾並有居住客店之張姓被人鎖拏

非刑拷打索要銀錢等情如此肆意橫行實

為閭閻之害著步軍統領衙門順天府五城

一體查拏送交刑部如實有宗室人等即著

該部會同宗人府從嚴究辦以儆刁風並著

各該衙門嗣後傳拏人證明定章程使匪徒無從假冒用杜弊端另片奏匪徒藉控案訛詐理刑各衙門恐拖累無辜聽其私自說合以致訛詐之風愈熾等語著問刑各衙門遇有此等案件徹底根究如有藉端陷害者即著從嚴治罪毋許稍有寬縱。○又諭前因丁日昌奏訪查營弁人等滋事釀命當經降旨將遊擊薛蔭檮都司丁炳先行革職交馬新貽親提研審按律懲辦並將丁日昌交部議

處茲據該撫奏稱續查案內有伊姪監生丁繼祖同往聞開先回並風聞伊子分發知府丁惠衡一併在內經署臬司杜文瀾督審均稱伊子並未在場請將丁惠衡丁繼祖分別斥革徹底根究並自請革職治罪各等語此案營弁人等滋事釀命丁日昌之姪監生丁繼祖既經同往著即斥革交馬新貽歸案審訊伊子丁惠衡是否同往著於到案時一併交馬新貽審明虛實分別辦理丁日昌咎止

失察前已交部議處所有自請治罪之處著無庸議。又諭前因劉典奏參記名提督劉效忠在營滋事當經降旨將其革職並令解回山東原籍。茲據丁寶楨奏稱已革提督劉效忠卽劉占考從前充當捕役繼由竊盜謀叛山東直隸河南邊境均遭荼毒招撫後調赴陝營又甚不安本分此次押解回籍所過沿途州縣信口漫罵每於派送人役輒以洋槍轟擊解至甯陽經該撫傳見訓諭猶敢出

言無狀迨押至濟甯看管該革員猶復大肆咆哮不服管束其在濟甯寓中往來見面之人均係濮范鄆城水套一帶無賴人眾濮范各屬村莊自聞該革員回籍人心惶懼皆欲紛紛赴省控請誅殛等語該革員劉效忠以首亂受撫之人未加顯戮已屬法外施仁乃竟不知悔罪自新種種狂悖實屬狼子野心法難再宥丁寶楨已將該革員按律正法並應揭其罪出示曉諭所辦甚是劉效忠之弟

已保副將劉占克前已隨同叛逆殘暴眾著著卽革職同其家屬人等牢固監禁其子已捐同知劉維清已捐主事劉維恆均著卽行革職永遠監禁不准釋放為怙惡不悛者戒。○以戶部左侍郎魁齡兼署刑部左侍郎。○庚寅諭內閣曾國藩奏堵築漫口合龍暨疏濬中洪下口均屬穩固深通一摺直隸永定河本年北四下汛漫口經曾國藩飭令道廳各員設法堵築現已合龍並據該督勘驗北

四下汛暨南七兩處壩工均各穩固張家墳一帶所挑中洪南七以下所挖引河並能暢流無滯在事出力各員著准曾國藩擇尤保獎毋許冒濫嗣後仍當督飭該道廳等認真挑挖並隨時修治堤埝俾保無虞。○又諭前諭曾國藩察看臬司史念祖能否通曉刑名足資表率據實具奏茲據奏稱史念祖心地明白器局開展論事亦尚有識惟直隸刑名較繁該臬司資望尚淺若調刑名稍簡之省

磨厲數年當可陶成令器等語臬司為刑名總匯之區無論何省均關緊要史念祖心地既尚明白若隨同曾國藩遇事講求久加歷練於公事較有裨益著曾國藩飭令張樹聲將直隸積案辦竣即行前赴山西臬司本任史念祖俟接印任事後仍著曾國藩隨時察看如不能稱職即著據實具奏○以直隸永定河漫口合龍復已革道員徐繼鎰等職○辛卯以軍機處繕修檔冊完竣予郎中梁僧

保等加銜升敘有差 壬辰以恭校

文宗顯皇帝聖訓完竣予侍郎廣壽優敘賞郎

中成善花翎餘加銜加級升敘有差○追予

浙江杭州合門殉難翰林院編修張洵諡文

節建專祠眷屬人等一併附祀○旌表守正

捐軀四川江津縣民婦王陳氏 癸巳以京

畿雪澤愆期

上詣

大高殿祈禱行禮（遣惇親王奕諒詣

時應宮恭親王奕訢詣

昭顯廟醇郡王奕譞詣

宣仁廟孚郡王奕誨詣

凝和廟拈香○甲午諭內閣內閣侍讀學士

鍾佩賢奏臬司責任綦重未宜輕授一摺前

因曾國藩覆奏直隸臬司史念祖人尚明白

可望陶成令器當諭令曾國藩俟該臬司到

任後隨時察看於造就人才之中實寓慎重

刑名之意茲據鍾佩賢奏稱與其察看於後

貽誤已多曷若審擇於前所全不少等語所

奏亦不為無見史念祖著即開缺以原官留

於直隸交曾國藩差委俾資學習如能諳練

公務即由該督隨時奏聞至所請軍營保至

藩臬人員查非科目出身及曾任實缺道府

者仍令先補道府察看稱職由該督撫奏明

後列單請簡之處著吏部妥議章程具奏

綏遠城將軍定安奏嵩武軍會勦納王兩寨

獲勝得旨已據金順奏報矣著即知照張曜

會同金順一軍迅將納王兩寨剋期掃蕩毋稍鬆勁。乙未諭內閣前因御史龔承鈞奏參湖南湘鄉縣知縣齊德五與紳士羅會焜同惡相濟等情當經諭令劉崐查明具奏。茲據劉崐覆奏齊德五徵收錢漕遵照定章並無浮勒科斂情弊。辦理捐輸亦無蒙混聽斷詞訟尚屬平恕為百姓所親信並無局紳拘傳被告坐堂質訊之事。該縣官紳遵辦團練亦尚認真。並據查有該縣封職龔雲臣前曾

呈控局紳羅會焜等包訟各情經該撫飭屬訪查龔雲臣素不安分並經其胞伯龔世泰等控縣褫革衣頂龔雲臣旋即赴都聲言必將京控齊德五被參各款與龔雲臣所控情節相同等語該御史所參齊德五各款既據該撫查明並無其事即著毋庸置議龔雲臣既素不安分並著該撫隨時查察儻再滋事事端即行從嚴懲辦。又諭劉崐奏甄別庸劣各員請旨革職一摺湖南試用知府陳鼎

金心地糊塗不知檢束試用通判陳端濂性情乖張辦事荒謬候補知縣喬宗岳性情鄙猾巧於鑽營試用知縣陳士璵心術不正嗜好甚深試用知縣李廷誥才具庸鄙妄事營求試用知縣劉乙照語言夸誕兼有嗜好均著一併革職以肅吏治。○諭軍機大臣等戶部奏豫撥來年京餉一摺據稱歷屆京餉均於年前豫撥同治九年京餉擬在各省地丁鹽課關稅等款內指撥銀七百萬兩請飭各

該省於來年分批起解等語京餉關係要現經該部就各省緩急情形斟酌動撥自應遵照奏定數目源源報解以濟要需著該將軍通商大臣督撫鹽政監督等務於來年開印後分批起解限五月前解到一半十二月初間全數解清不准截留改撥藉詞延誤儻屆限不到即照奏定章程指名嚴參原單均著鈔給閱看至本年未解京餉前經該部節次奏咨飛催現屆年終仍未如數解清著各

該督撫等迅速籌解毋再遲延于咨另片奏
內務府同治九年分應需經費擬撥兩淮鹽
課銀五萬兩兩浙鹽課銀五萬兩廣東鹽課
銀五萬兩福建茶稅銀十萬兩閩海關常稅
銀十萬兩太平關常稅銀十萬兩九江關常
稅銀十五萬兩共銀六十萬兩請飭依限完
解等語著該將軍督撫鹽政監督等各按撥
定數目務於來年開印後陸續徑解內務府
收納並將起程日期報部限六月前解到一

半十二月初開埽數解清不准稍有蒂欠將
此由五百里諭知福州將軍三口通商大臣
直隸兩江湖廣閩浙兩廣四川江蘇安徽江
西福建浙江湖北湖南河南山東山西廣東
各督撫並傳諭粵海關監督知之○又諭福
濟文碩奏俄國請分地界查有窒礙情形一
摺塔城分界事宜前因布倫托海大臣裁撤
改派奎昌於明歲春融時馳往該處會同俄
使查勘立界茲覽福濟等摺內所陳窒礙情

形不為無見卽著文碩酌帶圖冊卷宗迅卽
起程趕於明年正月內到京與總理各國事
務衙門王大臣詳細面述妥籌辦理文碩起
身後該處應行豫辦事宜仍著奎昌恪遵前
旨與福濟隨時會商籌辦將此由五百里各
諭令知之○兩江總督馬新貽奏江蘇丹陽
金壇溧陽三縣本年錢漕請照上年舊章仍
辦抵徵所徵錢文以八成買米運津以二成
收入地丁濟餉下部知之○以直隸大順廣

道錢鼎銘為按察使 錫綏湖南武陵安鄉
澁浦益陽龍陽巴陵臨湘華容澧沅江湘陰
桃源十二州縣暨岳州衛被水地方新舊額
賦租課有差 丙申諭內閣巡視東城御史
國秀等奏請將假充官役嚇取財物之棍徒
交部嚴行懲辦一摺此案鑲白旗馬甲文大
卽文惠等膽敢於輦轂重地冒充官役設局
刑嚇搶取財物實屬目無法紀所有已獲之
孔正懇卽蔡墩子蔡升玉恆祁唐氏著卽交

刑部嚴行審訊按律定擬具奏其文大卽文惠經該城傳案未到著該旗迅卽飭傳解送刑部並訊取同往各犯姓名一併嚴傳歸案審辦尋刑部奏遵訊蔡升等邀同文大假差嚇詐贓證屬實蔡升等照例分別擬杖擬徒文大在逃應移咨步軍統領等衙門一體嚴拏務獲究辦從之○予直隸邯鄲等縣殉難廩生劉清元等紳民婦女一百二十二名口分別旌卹如例並予建祠予故安徽皖南

道姚體備浙江金衢嚴道劉成萬入祀名宦祠從巡撫李瀚章署巡撫吳坤修請也○予安徽故湖北武昌道章廷樞湖南故工部員外郎陳本欽刑部主事張敬修國子監學錄向曾賢河南故江西瀘溪縣縣丞李偉山西故宗人府主事彭作邦河南知縣劉視遠庠生龐駿陝西故候選通判王允保入祀鄉賢祠從巡撫劉崐李鶴年署巡撫鄭敦謹吳坤修劉典請也丁酉諭內閣慶春奏查明熱

河開荒漸侵正園酌擬章程請將查辦遲延之總管等交部議處一摺前因熱河園場地多閒曠經前任都統瑞麟麒慶先後分別科則招佃展墾乃日久展放漫無限制以致侵占正園自應查明禁止所有鑲白旗伊遜川開墾荒地卽著照舊有大卡倫為界其河東河西佃墾私墾地畝均著飭令一律封禁並著嚴檄該總管等督修卡倫建立紅椿毋令任意展墾慶春擬於明歲春融後派原勘各

員前往查勘界址按照科則酌予年限以次裁撤並將私墾各戶一律驅逐旗民佃戶領地後陸續侵入山坡溝岔以及領地以多報少各弊出示禁止定以懲罰章程著庫克吉泰到任後詳細參酌妥為辦理委員員啟泰王清經慶春派令前赴圍場會同總管壽長督催修卡建椿乃任意遲延迄未修整實屬咎無可辭圍場總管壽長候補知州員啟亨准補喀拉河屯巡檢王清均著交部議處以

示薄懲諭軍機大臣等穆圖善奏馬步官軍剿賊獲勝暨請將同知留營差遣各摺片善山保一軍在黑茨溝剿賊殲斃甚多迨至清水驛附近地方兩路伏賊突起善山保復督隊兜剿該匪敗竄其平番縣屬馬家溝馬賊亦經營總常明等在三岔溝迎戰分路夾擊賊勢不支紛紛敗退仍著左宗棠穆圖善檄飭善山保等偵探賊蹤分路追擊毋任該逆乘隙滋擾牽掣官軍左宗棠擬進駐平涼

到省尚需時日卽著飭令派出之黃鼎等軍迅速前進以期節節掃蕩痛殄寇氛已革廣東候補知縣續保同知湯柄璣據穆圖善奏稱甘軍進攻河州需員差遣請予留營等語湯柄璣是否諳練軍事堪以留營差遣之處著左宗棠卽行查明具奏毋稍遷就將此由五百里各諭令知之尋左宗棠奏遵查湯柄璣前經奏保係據各將領單開請獎其諳練軍事與否實未深悉不敢稍涉遷就得旨湯

柄璣著不准留營卽由該督咨明穆圖善辦理又諭金順奏官軍連日進剿情形一摺逆回堅踞王家疰巢穴經金順會同提督張曜督軍進攻殲斃賊匪甚多賊圖搶踞長濠又經官軍擊退遂將新築賊壘一律蹋平總兵王連三等復兜剿獲勝賊勢諒已窮蹙惟我軍傷亡亦復不少開挖地道尚未歲工該逆憑牆踞濠卡壘甚多亟應設法攻取著該署將軍會同張曜督飭將弁加意籌攻務將該逆寨速拔以期掃蕩妖氛將此由六百里諭令知之予甘肅王家疰陣亡副將李宏林守備孫殿甲祭葬世職加等予甘肅黑茨溝陣亡都司姬伏信曹作桐祭葬世職加等○旌表守正捐軀熱河平泉州民女許娥兒

大清穆宗繼天開運受中居正保大定功聖智
誠孝信敏恭寬毅皇帝實錄卷之二百七十一

四
月
奉
旨

五

大清穆宗繼天開運受中居正保大定功聖智
誠孝信敏恭寬毅皇帝實錄卷之二百七十二

教
行

同治八年己巳十二月戊戌朔

上詣綏履殿問

慈安皇太后安平安室問

慈禧皇太后安至丙寅皆如之○奉

慈安皇太后

慈禧皇太后幸漱芳齋侍午膳○諭內閣都察
院奏江蘇紳民翰林院編修銜蔡則澐等遣
抱以淮水故道亟須濬復等詞赴該衙門呈
遞據情代奏等語並將蔡則澐等所遞圖說
全案咨送軍機處呈覽淮河關繫民生亟應

設法濬復故道應如何妥籌辦理之處著馬新貽張之萬丁日昌斟酌情形會議具奏蔡則澐等所遞圖說一件鈔案二本著都察院咨送馬新貽等閱看尋馬新貽等奏遵議挽淮復故必先濬黃河之淤繼則闢清口以導其入黃堵三河以杜其旁洩而修復堰圩堅築運隄又為目前要著惟鉅款難籌請分別緩急次第興工下部議從之○旌表守正捐軀陝西雒南縣民婦樊董氏○己亥以左春

坊左庶子烏拉喜崇阿充日講起居注官○庚子以神靈顯應頒四川梓潼縣

文昌帝君廟扁額曰陰陽下民諭軍機大臣等劉典奏陝省北路轉運軍餉等項變通章程請飭山西照辦等語陝省駐紮榆綏各軍餉銀軍火均關緊要一時驛站難復轉運維艱不得不假道晉疆而晉省西路地方瘠苦差務殷繁若加以陝省轉運苦累太甚自應變通章程辦理著照所請嗣後陝甘北路

各軍餉銀軍火等項即由李宗義飭知各州縣仍舊繞由該省西路行走先由陝省軍需局及左宗棠所設駐陝軍需局按次將轉運數目咨移山西籌防局並傳知經過各州縣查照遇有轉運過境驗明數目迅速接運前進一面將用過車贏人夫腳價照陝章分別造報陝局或按月或按季領取歸款俾免貽累如晉省章程或有參差即由山西籌防局咨明陝省酌度辦理償押運員弁沿途有額

外需索騷擾情弊即由李宗義劉典據實叅辦毋稍姑容將此由五百里各諭令知之○又諭崇實吳棠奏援滇川軍克復魯甸廳城攻破巖崗老巢生擒首逆並檄調唐友耕分兵扼守敘南各摺片滇匪李本忠經川軍擊敗後由板板房桃源一帶分撲良回村寨唐友耕督兵截擊踴毀賊營該逆退守魯甸城內又經官兵擊走收復廳城李本忠逃入巖崗老巢參將尹士超等分路進攻疊破四面

碣樓生擒李本忠及賊黨徐添驥等正法埽蕩巖崗賊巢昭魯漸次肅清此次援滇川軍疊克匪巢生擒要逆勦辦尚屬奮勉在事尤為出力員弁著崇實等覈實奏保毋許冒濫現在黑石坳回匪勢尚猖獗唐友耕一軍自當乘勝進勦惟總兵全祖凱圍攻之兵未能得手委員孔昭鈐等亦無抵昭確期即著劉嶽昭岑毓英迅飭全祖凱激勵兵勇會同唐友耕相機勦洗一面催令孔昭鈐等馳抵該

處將一切勦撫事宜妥為籌辦俾東路及早埽蕩毋稍遲延湘果各營散勇現既不遵貲遣敘南邊界自應派兵設防以資彈壓著崇實等檄飭唐友耕酌撥得勝之師前赴鎮雄以顧筠連高珙入川門戶如有潰勇滋事即會同胡中和籌辦至攻克黑石坳後仍留李家福在滇援勦其唐友耕應否撤回川省之處著崇實等會商劉嶽昭岑毓英斟酌辦理將此由五百里各諭令知之○禮部以明年

元旦慶賀禮節請得旨是照例行禮奉
慈安皇太后

慈禧皇太后懿旨停止筵宴其在外公主福晉命婦進內行禮之處並著停止○署陝西巡撫劉典奏力省差徭酌減平餘革除節壽陋規籌給各官公費以舒民力而肅官箴得旨差徭等事應裁減者即行裁減以恤民力總當覈實辦理毋博虛譽而滋弊端○以陝西捐輸軍餉永廣鄉試中額一名○予雲南魯

甸等處陣亡都司施占明等祭葬世職加等

辛丑

上復詣

大高殿祈雪行禮遣惇親王奕諒詣

時應宮恭親王奕訢詣

昭顯廟醇郡王奕譞詣

宣仁廟孚郡王奕譔詣

凝和廟拈香○壬寅諭內閣吏部尚書文祥之母秉性淑慎克享遐齡教子有方俾成良

弼今以疾終深堪軫惻朝廷優禮大臣推恩賢母著賜祭一壇賞銀二千兩經理喪事由廣儲司給發靈柩回旗時沿途地方官妥為照料以示優眷○諭軍機大臣等都興阿奏舉辦冬圍情形請將協領等官分別懲處一摺東三省舉行冬圍非徒為捕進口味實以操練官兵技藝本屆奉天冬圍捕打鹿隻未能足額該官兵等平時技藝生疏已可概見且圍場卡倫均有官兵戍守若非任令匪徒

偷打牲畜鹿隻何至稀少該管官員於兵丁不能認真訓練於圍場不能嚴密稽查實屬不成事體所有正圍長協領恩齡副圍長協領德泰翼長佐領柏林三音保均著先行交部議處仍責令在圍場督率官兵演練巡緝以觀後效記名副都統協領集爾哈布料理圍務於鹿隻未能足額隨同收肅回省咎亦難辭著交部察議此次姑念停圍年久甫經舉行從寬辦理儻來年冬圍仍復似此因循

廢弛除將該管官從嚴懲辦外定將該將軍一併懲處將此諭令知之○以內閣學士寶珣為兵部右侍郎○以刑部左侍郎志和兼正藍旗蒙古副都統未到任前以內閣學士訥仁署理○署陝西巡撫劉典開缺養親以四川布政使蔣志章為陝西巡撫○予故兵部右侍郎伊精阿祭葬賞銀三百兩治喪○癸卯

孝惠章皇后忌辰遣官祭

孝東陵○諭軍機大臣等蘇鳳文馮子材奏疊克越南夷境賊巢現在併力圍剿蘇鳳文奏接准越南國王咨文籌辦中外邊界事宜各一摺吳亞終股匪竄入越南疊經官軍跟蹤追剿攻破大慈買市等處賊巢該匪退踞左洲勢已窮蹙即著馮子材督飭各軍四路圍攻悉數殲滅總期迅速肅功毋稍延緩此次收降人眾馮子材擬旋師之日儘數帶回內地辦理尚屬得宜惟人數既多則編插非易

著該提督隨時給票分起遣送回籍蘇鳳文
卽飭各該州縣妥為安插嚴加約束毋令滋
生事端至內地民人私出邊境例禁綦嚴地
方官失察處分亦重蘇鳳文現擬申明定例
檄飭太鎮兩府督屬嚴防並咨越南國王一
體稽查卽著照所請認真辦理以期日久相
安毋得有名無實將此由五百里各諭令知
之○以鑲黃旗滿洲副都統榮祿管神機營
事○以江西按察使王德固為四川布政使

○緡綬廣西歸順宣化隆安永淳新甯武宣
思恩河池崇善左養利永康天保奉議凌雲
橫來賓象雒容柳城桂平平南貴臨桂靈川
賀永安賓武緣上林遷江三十一州縣被旱
被擾地方新舊額賦有差○甲辰諭軍機大
臣等貴州軍務日久未有起色川楚援黔各
軍頻年勦辦教匪尚能克復城邑迨進勦苗
巢楚軍敗於黃飄黔軍潰於羊安從此一蹶
不復再振皆由各軍無人統攝互相觀望以

致坐糜鉅餉師老無功李鴻章威望素著現
在重慶暫駐著卽馳赴貴州所有川楚貴州
各軍均歸節制該督卽逐加揀選申明賞罰
嚴檄各將領分投進剿互為援應庶得同心
協力迅奏膚公儻川楚各軍不能得力卽行
裁撤咨明崇實吳棠劉崐將此項兵糧仍解
赴李鴻章軍營充餉該督上年凱撤之師其
中不乏驍勇著卽酌量奏調赴黔以備調遣
廣西防邊之兵如須調赴黔省會剿並著李

鴻章酌度辦理至李鴻章進兵克復地方後
修治城池招集流散聯保甲給籽種仍著曾
璧光隨時商同李鴻章妥為經理不得以派
有督兵大臣卽思諉卸貴州軍餉奇絀吳棠
劉崐務當隨時籌解以資飽騰本日已有旨
令李瀚章署理湖廣總督並令楊昌濬署理
浙江巡撫李瀚章著卽馳赴湖北將應解餉
需源源轉運毋令缺乏此外協黔各省並著
李鴻章曾璧光隨時咨催俾資接濟楊昌濬

於接印後揀擇賢員署理藩同篆務不許存五日京兆之見稍有廢弛遵義民教各案前據李鴻章奏派道員余思樞赴黔會辦至今尚未具奏李鴻章現赴貴州卽著就近會同曾壁光迅速持平審結以弭釁端四川酉陽教案何以尚未復奏亦著一併迅結毋得稍涉遷延將此由六百里諭知李鴻章崇實吳棠李瀚章劉岷曾壁光並傳諭楊昌濬知之○又諭曾壁光奏請飭江西將收捐分黔之項不必再解湖南以免捐協牽混等語江西每月應解協黔餉項一萬八千兩已撥解湖南援黔軍餉劉坤一又將應歸黔省捐項解赴湖南藩庫交收轉解席寶田軍中濟用作抵部撥江省協黔兵餉據曾壁光奏江西收捐前卯應分黔省銀二萬餘兩二卯應分銀一萬餘兩概為湖南提去黔省軍需奇窘若將應分捐項撥歸湘省該省軍餉更形支絀自係實情著劉坤一將嗣後江西收捐分黔

之項仍交黔省提餉委員分批領解毋庸再解湖南抵充部撥江省協黔兵餉以免捐協兩項致有牽混將此由五百里諭令知之○命協辦大學士湖廣總督李鴻章馳赴貴州督辦軍務○以浙江巡撫李瀚章署湖廣總督浙江布政使楊昌濬署巡撫○以奉天奉錦山海道俊達為江西按察使○追予安徽徽州殉難布政司理問銜方茂順等紳民婦女三百八十九員名口分別旌卹如例並予建祠○追予安徽桐城殉難原任知縣何薇照妻張氏暨男婦等五名口分別旌卹如例並予建祠○乙巳諭軍機大臣等都興阿等奏籌展邊荒請緩至明春再行勘辦一摺展邊事宜關涉中外界限非相度地勢逐處履勘適中定界將來不免輻輳現屆隆冬堅冰積雪一望瀰漫勢難勘丈自係實在情形著照所請緩至來歲春融再行派委委員前往江岸審度該處情形相機試辦儻有窒礙難

行之處。卽由該將軍等隨時酌覈奏明辦理。務期中外相安。永免後患。不得稍涉推諉。將此各諭令知之。○又諭左宗棠、穆圖善奏東南各路官軍勦回疊勝。左宗棠奏遵旨覆陳。各一摺。提督楊世俊等軍將陝回擊敗西竄。自十月十九日至十一月初十日。在固城清水驛紅土窰等處分軍進剿。殺賊甚多。並生擒賊目正法。其分擾東路之逆目馬油布亦經陣斬。現在各逆窮蹙。北不能通金積堡之

援。西不能與河州遽合。左宗棠等已令周開錫將南路諸軍覈實歸併。分布鞏秦一帶。並令黃鼎等軍雕勦回土零匪。卽著檄飭各該將領偵探賊蹤。痛加勦洗。一俟北路稍定。卽由中路掃蕩而前。毋稍鬆勁。此次在事出力員弁勇丁。准其彙案請保。左宗棠現在駐軍平涼。策應各路。並派黃鼎等分布隆德、靜甯、會甯安定一帶。雖與蘭州聲息相通。而會垣防守事宜。亦不可稍形疏懈。穆圖善著懍遵。

前旨。暫駐省城。就現有兵力。督同司道各官。妥籌保衛。左宗棠仍當隨時兼顧。其石成器一股。卽著飭令蕭宗幹等會同王仁和。妥為安插。並將秦望川等處屯政趕緊料理。北路之劉松山等軍。並著催令前進。以期節節疏通。河州為甘回負固之區。必須破此巨巢。方可迎刃而解。著左宗棠察看情形。如兵力足敷。勦辦卽行。督軍前進。以竟全功。將此由六百里各諭令知之。○以故車臣汗、公銜扎薩

克頭等台吉達爾瑪巴扎爾孫、車林端多布多爾濟襲職。○賞八旗暨步軍營綠營兵半月錢糧。○予陝西馬家莊陣亡提督李就山祭葬。世職諡壯烈。總兵官周本立等二十一員祭葬。世職。○予甘肅金積堡陣亡提督姚連陞祭葬。世職諡勇烈。總兵官簡敬臨祭葬。世職諡勇節。總兵官譚正明等二十一員祭葬。世職。○科爾沁扎薩克圖謝圖親王巴寶多爾濟等四人喀喇沁扎薩克都楞郡王旺

都特那木濟勒等三人阿巴噶卓哩克圖郡王剛噶爾倫布等二人茂明安貝勒格楚克等二人巴林貝子索哩雅等二人郭爾羅斯扎薩克鎮國公噶爾瑪什第扎賚特扎薩克郡王阿勒坦鄂綽爾蘇尼特扎薩克郡王托第布木阿巴哈納爾扎薩克貝子桑齊薩喇特多布喀爾喀扎薩克郡王晉丕勒多爾濟等八人察哈爾輕車都尉巴扎爾等二人於養心門內瞻觀○丙午科爾沁扎薩克達爾

漢親王索特那木彭蘇克於養心門內瞻觀○丁未以屢著靈異封故河南祥河廳同知王仁福為將軍○諭軍機大臣等前因福濟等奏巴哈兩城需餉請飭部撥銀三十萬兩並催各省月餉當經諭令戶部迅速籌解分催茲據奏稱巴哈兩城需餉孔亟若由外省撥解誠恐緩不濟急擬請由部先行借撥仍照章遞解等語即著照所擬先由部庫借撥銀三十萬兩交順天府遞解著萬青黎王榕

吉迅派委員領解遞送綏遠城即著定安派員解赴烏里雅蘇台交福濟榮全收納該將軍等一面派員迎提俟此項餉銀到時即分撥巴哈兩城應用至此次借撥之項仍由各省欠解新疆月餉項下劃解部庫歸款山東劃銀十五萬兩山西劃銀八萬兩河南劃銀五萬兩直隸劃銀二萬兩著曾國藩李宗羲丁寶楨李鶴年迅速籌撥務於明年四月以前埽數解部以重庫儲至各省應解新疆月餉自同治五年九月起至本年十一月止山西欠解銀三十九萬四千兩山東欠解銀一百三十八萬兩河南欠解銀八十九萬二千兩直隸欠解銀九萬兩上年奏提之三十萬兩僅據山西解過銀三萬兩其餘歷次奏提及每月協餉均未報解著曾國藩李宗羲丁寶楨李鶴年嚴飭各該藩司將歷次奏提銀兩趕緊埽數解清毋再延緩嗣後該四省月餉務須按月籌解不得再有帶欠其舊欠之

款並著按月帶解以濟要需將此由五百里各諭令知之○命熱河都統庫克吉泰在紫禁城騎馬○蘇尼特郡王那木濟勒旺楚克科爾沁貝勒昂噶叩喀喇沁二等塔布囊多爾濟喇布坦於養心門內瞻覲○戊申孝和睿皇后忌辰遣官祭

昌西陵○諭軍機大臣等劉嶽昭等奏請將唐友耕一軍於昭通回務完竣遣撤回川並勦辦附省賊匪情形各摺片唐友耕一軍經崇

實吳棠派令赴滇援勦該提督駐紮昭通疊次圍攻賊壘回眾窮蹙獻首乞降勦辦尚屬得手惟昭魯一帶回民剽掠究因該軍肆口復仇以致該回眾懷疑生變現既辦有頭緒自應責令該提督將此事一手經理著崇實吳棠傳諭該提督趕緊將昭通回務辦竣卽率所部撤回川省其昭屬未盡事宜仍由劉嶽昭岑毓英督飭各該文武隨時相機辦理以臻周密至附省土堆悍匪築壘窵濠負隅

抗拒經該督等督兵進勦已將紅廟賊壘及土堆村外賊碉全行攻克著卽乘此聲威將殘感餘匪悉數殲除毋留遺孽將此由六百里各諭令知之○以宗人府府丞胡瑞瀾為都察院左副都御史太常寺卿王映斗為大理寺卿○蠲緩浙江仁和錢塘海甯富陽餘杭臨安新城於潛昌化嘉興秀水嘉善海鹽平湖石門桐鄉歸安烏程長興德清武康安吉孝豐諸暨金華蘭谿東陽義烏浦江湯溪西安龍游建德淳安遂安壽昌桐廬分水宣平山陰會稽蕭山餘姚臨海黃巖甯海天台仙居永康武義常山開化麗水縉雲青田松陽象山上虞新昌嵊雲和六十一州縣暨杭嚴嘉湖衢州三衛被水被旱被風被蟲地方新舊額賦有差○己酉孝德顯皇后忌辰遣官祭定陵○以雪澤未霑上於

大高殿設壇祈禱親詣行禮○遣惇親王奕誼詣

時應宮恭親王奕訢詣

昭顯廟醇郡王奕譞詣

宣仁廟孚郡王奕誨詣

凝和廟拈香○烏珠穆沁輔國公車林多爾

濟鄂爾多斯貝子三濟密都布於神武門內

瞻觀○庚戌以校刊

文宗顯皇帝聖訓完竣予翰林院侍讀學士惠

林以三品京堂候補編修許振初等加銜升

敘開復有差○以綏遠城官兵追勦回匪出

力賞總兵官胡保林馬玉崑從一品封典參

將王紹烈正二品封典參將張洪業守備薛

洪春巴圖魯名號遊擊王明泰知州樊鴻錫

等花翎守備志斌等藍翎餘加銜升敘開復

有差○辛亥諭內閣御史余培軒奏蘇省蠹

役私墊錢糧請嚴禁以除民害一摺另片奏

官役數目請定限制等語州縣經徵錢糧例

應當堂封納給予串票原以杜差役滋擾之弊若如該御史所奏江蘇贛榆沭陽等縣糧差代墊錢糧勒指串票等弊是小民受朘削之害奸胥享無窮之利一縣如此一省可知必應永遠禁革著兩江總督江蘇巡撫嚴飭各州縣遇錢糧開徵時務當明定期限徧行曉諭無論貧富戶口悉令當堂交納給予串票不准官役私墊錢糧私掣串票儻敢仍前舞弊一經發覺卽行從重治罪至海州各屬

官役過多驕縱不法為害閭閻並著該督撫飭令各屬嚴行懲治嗣後官役數目務當遵照定例不得任意增添其督總總役各名目卽著永遠裁革以免擾累所稱贛榆差役有陵辱廩生鄭楸林等及槍傷生員李錫麟情事如果屬實尤為目無法紀著該督撫查明嚴行懲辦各直省地方恐亦不免有此情弊並著各該督撫等督飭所屬一律查禁以除蠹役而安善良○以杭州副都統善慶署乍

浦副都統○蠲緩江蘇上元江甯句容溧水
高淳江浦六合山陽阜甯清河桃源安東鹽
城高郵泰東臺江都甘泉儀徵興化寶應銅
山豐沛蕭碭山邳宿遷睢甯海沭陽贛榆通
如皋泰興海門三十六廳州縣暨淮安大河
揚州徐州四衛被水被旱地方新舊額賦有
差○壬子諭內閣福濟文碩奏特叅大員意
見不合掣肘公務請旨懲儆錫綸奏齎交印
信開用行營關防各一摺頭等侍衛前任布
倫托海幫辦大臣錫綸前已有旨令其來京
當差茲據福濟等奏該侍衛於安插厄魯特
人眾並無隻字咨覆而於礙難辦理之事不
聽勸阻欲將所署印信移交文碩在烏里雅
蘇台接收實屬冒昧輕浮據錫綸奏已將印
信於十一月初十日齎交文碩接任開用行
營關防各等語該侍衛前經簡任布倫托海
幫辦大臣應與福濟等和衷協力共濟時艱
乃一味任性不顧大體於應辦事宜控馭無

方復率行送交印信是其掣肘公事跡涉有
心已可概見錫綸著交部議處以示懲儆尋
議錫綸應照違制杖一百例革職留任從之
○諭軍機大臣等前因布倫托海大臣裁撤
改派奎昌於來歲春融時馳往瑪呢圖嘎圖
勒汗至哈巴爾阿蘇一帶地方會同俄使查
勘立界嗣據福濟等奏陳窒礙情形令文碩
於明年正月到京該處應辦事宜仍令奎昌
與福濟籌辦茲據總理各國事務衙門奏稱
分界一事係屬已定成局雖屢經反覆開導
而俄使總以該處絕無賊蹤為詞若奎昌稍
事遷延該使徑行自辦則遂其強占侵越之
謀其患不可勝言等語西疆立界事宜亟應
早為籌辦奎昌前辦科布多分界頗臻妥協
此次應辦各事諒已了然於中著即懷遵疊
次諭旨與福濟隨時籌商將一切趕緊豫備
俟明歲春融時先與該國會辦官員約定日
期迅即前往該處妥慎辦理不得因有福濟

等前奏稍涉推延致誤大局應需圖冊卷宗
卽由該大臣酌留一分以備查覈奎昌起程
後科布多辦事需人文碩著毋庸來京卽赴
新任將該處應辦事宜悉心經理本日據福
濟等奏土爾扈特汗布彥烏勒哲依圖呈請
奏催撥兵援助等語該汗捍衛西陲忠貞世
篤數年來艱苦情形朝廷深為軫念已飭帶
兵各員設法援應至巴圖欲行東移已經福
濟等設法仍令回牧辦理尚屬妥協卽著福
濟傳知該汗王等遵奉此旨毋得再三陳請
並已飭知理藩院將此旨剴交該汗王等欽
遵矣將此由六百里各諭令知之○以內閣
學士常恩署文淵閣直閣事○蠲緩湖北武
昌黃梅沔陽嘉魚監利廣濟漢陽漢川咸甯
蒲圻黃陂孝感黃岡蘄水鍾祥京山潛江天
門雲夢應城江陵公安石首松滋枝江荊門
江夏興國大冶蘄三十州縣被水地方新舊
額賦租課有差

大清穆宗繼天開運受中居正保大定功聖智
誠孝信敏恭寬毅皇帝實錄卷之二百七十二

[illegible]

同治八年己巳十二月癸丑月食○湖北巡

撫郭柏蔭奏遵訊天門縣教案係團民誤聽謠言以致爭鬪已將團首人等量予薄懲責令將教堂及住屋重修該教士等亦無異詞取具各結銷案報聞○以故一等果勇侯穆輅子希蘭一等延恩侯鶴齡姪孫誠端三等誠毅伯彥淩子保林三等襄勤伯福謙子兆珏二等子松桂繼子立瑞二等男侍順孫文熙各襲爵○喀爾喀扎薩克貝勒西哩巴扎爾扎布等七人杜爾伯特扎薩克貝子察克

都爾扎布翁牛特鎮國公永龍阿拉善鎮國
 公沙克都爾扎布察哈爾四等台吉拉什棟
 魯布等四人於養心門內瞻覲○甲寅諭軍
 機大臣等豐紳謙禧奏請飭撥倉穀並催餉
 銀等語據稱甯夏滿營每年由晉省撥銀十
 萬兩同治五年欠解銀三萬八千兩六年至
 本年共止解過銀五萬二千兩積欠甚多現
 在該官兵等飢寒交迫困苦異常自應速籌
 接濟著李宗義卽飭歸綏道於清水河等五

廳酌提倉穀數萬石趕緊出賑知照豐紳等派員赴晉陸續領運需用水陸腳價由晉省就近籌給所有各該廳穀價均於晉省欠解甯夏滿營餉銀內扣還至前經奏定之每年應撥銀十萬兩仍著李宗義飭令藩司迅速籌款源源報解毋稍延欠將此由四百里諭令知之○以緝捕馬賊出力予吉林協領桂廉優欽賞雲騎尉開豐阿等藍翎餘加銜升敘有差○予直隸軍營病故提督劉克仁祭

莽卹廕謚武毅○乙卯諭內閣御史游百川奏請修德以召祥和一摺今歲雪澤愆期月食再見直隸山東湖廣等省水旱歉收凡此沴戾之興皆係

上蒼示儆寅畏殊深允宜兢業為懷倍加修省內外大小臣工亦當各矢公忠恪盡厥職力除瞻徇奔競之習其有言責諸臣尤宜遇事指陳毋泛母隱庶幾君臣交儆以承天眷而迓

天庥○又諭志和慶春奏請將辦事遲延之扎薩克貝子議處一摺土默特扎薩克貝子索特那木色登於該旗箭丁滋事一案越時已久並未將原告被告人傳齊到案候訊經志和等疊次咨催仍復任意推延實屬膽玩索特那木色登著先行交理藩院嚴加議處仍著志和等嚴催該貝子帶領應訊之該旗章京等速赴熱河候訊不准再有拖延以清案牘○又諭左宗棠劉典奏審明已革總兵因

姦弊命眾證確鑿從嚴定擬一摺已革總兵陳德林帶隊駐紮陝西岐山縣城外輒在雷家溝地方強姦民婦雷劉氏並將民人孫拴勞戕傷斃命疊經委審供指眾證確鑿豈能因其狡不承認致稽顯戮陳德林著即行正法以肅軍令而昭炯戒○又諭恩麟奏班禪額爾德尼呈進年班例貢請改道赴京一摺班禪額爾德尼差派堪布呈進年班例貢現因西甯道途梗阻著准照達賴喇嘛呈進貢

物之例改道由四川陝西山西直隸赴京○諭軍機大臣等恩麟奏拔楞侵占哲孟雄等處地方廓爾喀與唐古特構釁情形各等語拔楞占去哲孟雄部落之獨結嶺及甲昔地方難保不復來侵占即著照恩麟所擬飭令該大武員弁前赴哲番住牧或暗募土兵或潛豎墩臺務於險要隘口嚴密防維以期有備無患布魯克已屢拒拔楞歷年攻戰因眾寡不敵亦被占踞地面去年布魯克藏唐古

特不加撫恤。遂至布番解體。該番現在互相攻擊。且有陸續投赴披楞納款之說。亟應加意附循。以弭邊患。恩麟務當督飭該委員。將布番內難。先行解釋。一面設法撫綏。仍令不動聲色。自固疆圉。廓爾喀以唐古特上年借過礮位。尚未還清。負約欺陵。調兵報仇。若不豫為排解。勢將兵連禍結。著恩麟速派幹員妥為開導。一面將後藏漢番營伍操練整齊。卽親赴定日邊隘。剴切曉諭。以申舊約而息

爭端。德泰務將藏中一切事宜認真籌辦。不可稍有疏虞。將此各諭令知之。○以短交軍糧。革陝西知縣李天柱職。不准投效軍營。○緩徵吉林三姓甯古塔旗民歉收地方倉穀銀兩有差。○丙辰

上復詣

大高殿祈雪壇行禮。○遣惇親王奕誼詣

時應宮恭親王奕訢詣

昭顯廟醇郡王奕譞詣

宣仁廟孚郡王奕誥詣

凝和廟拈香。○諭軍機大臣等。李鴻章崇實吳崇奏議結。西陽教案。李鴻章奏遵義教案。派員會辦。暨起程回鄂各摺片。西陽州民教仇殺一案。疊經諭令李鴻章等持平審辦。茲據奏稱。此案焚毀教堂。係首犯何彩起意。楊楨庭乘亂入城殺斃司鐸李國均。非張佩超主謀。現在楊楨庭業經病故。何彩一犯已於訊明後正法。所燒教堂並經給與梅西滿銀

兩餘犯劉幅等均分別按律懲辦。著卽照該督等所議辦理。以示平允。西陽重慶等處民教仇隙已深。今雖將此案辦結。而日後民教雜處。崇實吳崇等必須設法防維。吳崇身任地方。更屬責無旁貸。所有各該處牧令等官著隨時認真遴選。務令妥為整頓。不可稍存偏袒。致滋事端。未獲之教民王學鼎等六犯卽著飭令川東道督屬嚴拏。務獲究辦。遵義一案前經李鴻章派令道員余思樞馳往查

辦茲據奏稱四川候補道塞閭籍隸遵義鄉望所歸遵民於打毀教堂後亦知悔懼請飭曾壁光責成遵義府縣會同籌辦等語著曾壁光卽將遵義團練事宜委令塞閭悉心經理以便會同余思樞及該處府縣各官將教案趕緊籌辦毋稍牽掣其梅教士有無被殺情事並著飭令該員等徹底查明毋稍含混嗣後該省遇有教民涉訟務須責令各地方官查照約章持平覈辦並將教士干預把持

及書差搥索拖累等弊嚴為禁止以消後患前因曾壁光奏稱黔省軍情緊急請派大員籌辦當經諭令李鴻章馳赴貴州督辦軍務原以四川湖南貴州各軍無知兵大員節制必至觀望不前李鴻章現以酉陽教案已結天門教案初起卽由川省起程東下自係未奉到本月初七日諭旨天門一案前經郭柏蔭查明奏結羅淑亞所帶兵船自不至駛赴漢口再圖滋擾黔中地方糜爛非得該督前

往督辦斷難淨埽寇氛著卽懷遵前旨趕緊折回應由何路入黔督軍進剿之處均著該督斟酌情形妥為籌辦並著於接奉此旨後將應辦事宜先行馳奏以慰廑盼將此由六百里各諭令知之○又諭文盛奏請借款發給官兵俸餉並請飭直省迅速撥解一摺張家口駐防官兵同治七年秋季至八年冬季俸餉前借釐捐散放應俟直隸藩庫解到後解還部庫文盛因官兵操防緊要九年春季

俸餉亟應先期放給請將已經解到之七年秋季俸餉借放尚不敷銀四千兩俟七年冬季俸餉解到時照數提出接放一俟藩庫將九年春季俸餉解到再行照數歸還解交部庫自為體恤兵艱起見著照所請辦理並著曾國藩嚴飭藩司遵照部奏卽將九年春季俸餉先行撥發嗣後按季迅速撥解毋許積欠以濟要需將此各諭令知之○以科爾沁博多勒噶台親王伯彥訥謨祜為後扈大臣

○以記名提督滕嗣武為湖北鄖陽鎮總兵官○丁巳諭內閣前因調任兩淮鹽運使方濬頤在廣東運司任內經手款目轆轤當經諭令馬新貽等卽飭該員前赴廣東聽候瑞麟等督算清理茲據馬新貽奏方濬頤因疾屢請給假等語方濬頤係奉旨飭赴廣東聽候督算款項之員何得託疾延宕仍著馬新貽丁日昌迅飭啟行毋任逗遛○諭軍機大臣等崇實吳崇奏援黔官軍勦苗獲勝請飭

楚黔振旅會勦劉峴奏湖南援黔官軍疊次攻勦苗巢獲勝蘇鳳文奏苗匪竄入粵境防軍擊退各摺片四川援黔之軍經道員唐炯提督劉鶴齡等攻克鐵廠坡木城石壘復經提督陳希祥等疊斬苗逆軍聲頗振道員唐炯擬專力進剿銳意滅賊已經崇實吳崇籌給買米銀十萬兩並改撥月餉以資接濟湖南官軍自十月以後於鎮遠思州台拱等處截勦苗匪削平堅寨苗地日蹙糧食缺乏席

實田業經抵營蕭榮芳新募之勇亦已起程正當乘此機會合力夾擊使川楚兩軍聲勢聯絡則苗逆不敢狡逞勦辦易於得手但恐川楚兩軍各分畛域以致復蹈前轍功敗垂成著李鴻章懍遵前旨迅赴黔省體察情形妥為調度以期川楚各軍踴躍用命肅清黔境該省夏秋之交瘴癘盛行冬後雪嶺凌崖一望無際尤當及時大舉不可稍涉遷延曾璧光職任封圻責無旁貸當隨時會同李鴻

章悉心經理不得因有督兵大員稍存推諉崇實吳崇劉峴於派出各軍應給餉糈務宜源源撥解不得稍有缺乏以致停兵待餉貽誤戎機廣西懷遠融縣境內均被苗匪闖入經在防各軍擊退並勦平高陽寨匪但恐該匪乘間復來仍應嚴密防範著蘇鳳文飭令各軍加意防勦毋任紛竄儻遠防不如近剿卽著李鴻章酌量調遣所有廣西此次出力員弁准由蘇鳳文擇尤彙案請獎毋許冒濫

將此由六百里各諭令知之。○又諭蘇鳳文。馮子材奏蕩平吳逆全股。越南各省肅清一摺。逆匪吳亞終因大慈等巢攻克後。逃併左洲。官軍又將左洲收復。追至峇嶺左良等處。連獲勝仗。逆匪遁往古覽地方。負隅自固。同知王思浩暨各將弁斬關擁入。生擒吳逆眷屬及逆目謝八等多名。並起獲吳亞終屍首。同各逆一併梟示。其越南永祥等處土匪。亦經副將吳天興等攻破賊巢。餘匪竄匿山西一帶。摽捕無遺。勦辦尚屬奮勉。所有高平諒山等處。仍著蘇鳳文商同馮子材督飭將弁實力摽捕。以期各境土匪盡數鏟除。毋致異日重煩兵力。至粵西與越南交界地方。尤易藏奸。並著該撫檄飭該管文武員弁嚴申邊禁。毋任奸民竄越。致生事端。內地各府善後事宜。並著馮子材妥為籌辦。廣東應解月餉。即著蘇鳳文隨時咨催。以資應用。將此由五百里各諭令知之。○神機營奏記名副都統

巴克坦呈請投效。得旨。巴克坦著發往定安軍營差委。○以詹事府詹事文奎為內閣學士兼禮部侍郎銜。○以湖南官軍克復貴州天柱等城出力。賞總兵官劉崙崑副將蕭永發劉福興周金玉范心鏞李正朝李榮華張宜宣。榮明勝伍星祿蔣玉貴李祥發劉全資。丁萬明。參將何春藻李前福陳蘭桂彭茂南。謝光勝。巴圖魯名號。參將劉行達。知州朱際平等。花翎防禦張正方等。藍翎。餘加銜升敘有差。○以廣西蕩平逆匪邊境肅清。予巡撫蘇鳳文提督馮子材議敘。賞總兵官謝繼貴一品封典。同知王思浩花翎。縣丞蕭鑒藍翎。餘升敘有差。○予貴州思州陣亡副將李其貴遊擊鄧三元守備翟繩武。祭葬世職加等。○戊午諭內閣。景霖奏請將承種樹株出力各員獎勵一摺。定陵新種儀樹。經內務府承辦各員督率樹戶勤加培護。數年以來。一律茂密。著自應量

予獎勵郎中德衡額著加加武備院卿銜尚
膳正祥盛著賞加頭等侍衛銜至請將郎中
阿爾薩蘭以知府在任候選之處殊屬不合
阿爾薩蘭著改為交部議敘諭軍機大臣
等金順奏官軍擊勦援逆屢勝力拔王家壘
莊附寨壘卡並請飭定安採辦糧石徑運甯
夏各摺片南路回匪因王家壘被圍窮蹙疊
次糾黨來援經金順會同張曜督飭馬步各
軍分投迎勦疊獲勝仗援賊遠遁金順與張

曜復會督官軍於十一月二十三日將王家
壘附寨逆壘攻拔從此愈偏愈緊自可迅克
堅巢即著金順會同張曜挑派得力隊伍偏
紮賊濠晝夜環攻迅圖蕘事現在河水凝結
路路可通既據拏獲奸細供稱陝回馬正和
等糾集大股有訂期十二月初間來援之說
阿拉善旗現復竄有馬隊洪廣一帶並有賊
騎數十人滋擾後路亟應嚴密籌防金順現
已檄飭後套各營豫為戒備並咨會貢桑珠

爾默特督率蒙兵會同留防各營加意防守
所籌甚是即著隨時力顧後路一面督飭前
敵各軍相機攻勦毋為賊匪所乘歸綏一帶
防務定安務當實力籌辦毋稍疏虞至晉省
河防當此嚴寒凍結之時關繫尤屬緊要李
宗義當督率防河各營認真堵禦不得稍涉
鬆懈甯夏湘軍需糧孔亟著定安即將左宗
棠前次賑恤餘銀二萬兩在歸化包頭等處
採辦糧石運解甯夏湘軍糧臺俾資軍食並

著理藩院轉飭阿拉善親王貢桑珠爾默特
籌辦駱駝二千隻配帶鞍繩送交甯夏以資
轉運前因戶部籌撥已哈兩城餉銀三十萬
兩諭令定安俟此項餉銀解到綏城即派員
解赴烏里雅蘇台交福濟等收納分撥已哈
兩城應用現在該城待餉甚殷刻不可緩前
項餉銀一到定安務當迅速派員妥解毋稍
遲延將此由六百里各諭令知之○又諭金
順奏甯夏勦匪所用火槍不能得力現當軍

務喫緊請飭三口通商大臣採辦洋槍二千桿等語著崇厚卽照該署將軍所請在天津採辦洋槍二千桿由金順派員領解甯夏軍營以資攻剿將此諭令知之○又諭伊勒屯奏已城需餉緊急請飭撥銀十萬兩一摺前據福濟等奏已哈兩城缺餉情形當經戶部籌議先由部庫借撥銀三十萬兩遞解綏遠城轉解烏里雅蘇台交福濟榮全收納分撥已哈兩城現在已城需餉萬緊本日已催令

定安星速轉解著福濟等迅派委員前赴綏遠一帶將戶部前撥餉銀迎提到烏卽行酌撥已城以濟眉急此項餉銀未到之先著福濟等無論何款先行籌撥銀數萬兩交伊勒屯應用俟前項餉銀到日照數提還以清款目伊勒屯惟當激勵將士實力防堵免致賊匪窺伺嗣後應解哈城之餉並著福濟等隨時勻撥毋任缺乏將此由五百里各諭令知之○又諭曾壁光奏官軍殲除襲城賊匪並

請添撥餉銀一摺貴州貴定縣城自上年收復後城垣殘缺無力興修本年十一月間復被賊匪襲入當經該處文武等官會同派援各軍立將賊匪殲除殆盡功罪尚足相抵所有該文武等應得疏防處分著免其置議並著曾壁光飭令總兵吳占勝等迅將餘匪悉數殄滅毋留餘孽貴州賊匪蔓延兵丁餉缺情形苦累亟應寬為籌撥方免匱乏之虞山東軍務肅清餉力尚可周轉著丁寶楨卽照

曾壁光所請按月籌撥餉銀二萬兩匯解赴黔交曾壁光收納以濟要需將此由六百里各諭令知之○予甘肅王家壠莊陣亡副將徐效孟遊擊楊學正祭葬世職加等並賞徐效孟三代二品封典○蠲緩山西陽曲太原洪洞薩拉齊潞城長治清水河七廳縣被水被電地方新舊額賦有差已未諭軍機大臣等近聞陝西北山一帶居民流離失所迄未復業情形甚為困苦而上匪游勇嘯集成

羣隨在皆是。扈彰等所部投誠人眾尚有數萬。仰食於官。日久既難為繼。若置之不顧。又易因飢生變。致滋事端。延榆綏地本瘠苦。近來受害尤深。榆林又密邇回氛。且吐連草地目前難民土匪游勇降眾。廣集其間。非慎選牧令。妥為安插。必至釀成巨患。不特陝省受其荼毒。即晉省西北兩路亦均可虞。朝廷實深廕繫。著劉典即將該處確切情形據實具奏。不得因從前已報肅清稍涉迴護。現在北

山一帶。防兵共有若干。分駐何處。統帶何員。著一併查明具奏。仍一面督飭文武各員設法彈壓撫綏。消弭隱患。不准存五日京兆之見。蔣志章到任時。劉典務將該處應辦事宜。及如何布置之處。詳細告知。俾措置悉臻妥善。毋稍膜視。將此由五百里諭令知之。○庚申。

上御撫辰殿大幄次。賜蒙古王貝勒貝子。額駙。台吉。暨呼圖克圖等宴。並賞賚有差。○諭

內閣都興阿奏蒙古台吉呈控扎薩克親王一案。請仍交理藩院審辦一摺。此案蒙古頭等台吉布彥烏拉吉控告該管哲里木盟長科爾沁達爾漢親王索特那木彭蘇克父子倚勢凌虐各情。既經都興阿咨行幫辦盟務卓哩克圖親王濟克登旺庫爾提集人證。審取供詞。現在達爾漢親王索特那木彭蘇克年班來京。復經理藩院因控案未經審結。奏令赴案候質。若將案內人證紛紛調京。未免

拖累。仍著都興阿會同幫辦盟務卓哩克圖親王濟克登旺庫爾提審明確。將全案供招咨交各該衙門定擬罪名具奏。以省拖累。而免延宕。○又諭永存舒恒奏請飭直隸藩庫迅解應領米價一摺。承德府應放兵米。向由直隸藩司按季支給銀兩。交各州縣採買。以供支放。現在存倉兵米無多。應領同治七年秋冬二季及八年分應領米價。均未撥解。兵食攸關。豈容延宕。著直隸總督即飭該藩司。

將同治七年秋冬二季米價及同治八年應發米價銀兩迅即籌放交該府州縣買運交倉以裕兵食其前任代理平泉州知州金齡久交咸豐十年分兵米一千二百十三石零仍著嚴催交齊毋許再涉延玩○盛京戶部侍郎額勒和布請假葬親以禮部侍郎麟書兼署戶部侍郎管奉天府府尹事以黑龍江協領托克屯為齊齊哈爾副都統○命蘇尼特郡王那木濟勒旺楚克喀爾喀貝勒西

哩巴扎爾扎布在乾清門行走賞喀爾喀貝子佟鳴拉克瓦齊爾雙眼花翎喀喇沁額駙巴圖鄂齊爾花翎撥吉林防禦五員移紮琿春並增設佐領三員防禦委佐領二員驍騎校五員領催十三名披甲一百五十七名分為八旗管理裁原設副甲二百名從將軍富明阿請也○以奉天孤山勦匪出力賞防禦懷謙花翎驍騎校額勒得科藍翎餘加銜升敘有差命貝勒奕劻帶領侍衛十員往

奠故肅親王華豐茶酒賞銀一千兩治喪賜祭葬諡曰恪○緩徵河南祥符陳留杞通許尉氏鄆陵中牟蘭儀鄧榮澤商邱甯陵永城鹿邑虞城夏邑睢柘城安陽湯陰臨漳內黃汲新野輝獲嘉淇延津滑濬封邱考城河內濟源修武武陟孟溫原武陽武洛陽偃師鞏孟津宜陽登封永甯南陽唐泌陽鎮平桐柏鄧內鄉裕葉淮甯西華項城沈邱太康扶溝六十二州縣被水被旱地方新舊額賦租課

有差○辛酉諭軍機大臣等戶部奏遵議黑龍江換班官兵整裝銀兩請飭豫省趕解一摺黑龍江挑赴神機營換班操練馬隊官兵五百餘員名應需整裝銀兩前據德英奏明援照成案暫由該處鋪商先行墊發自應照數指撥歸還商欠所有籌借該商銀七千三百四十二兩零著照部議由李鶴年督飭藩司於該省地丁項下趕緊如數籌撥委員解赴盛京戶部交納即由額勒和布交黑龍江

委員領回轉給俾清墊款至前項借給各該官兵整裝銀兩仍著德英循照歷辦成案俟此項官兵撤回時卽於該官兵應領俸餉內照數扣還歸款以符舊制將此由五百里各諭令知之○又諭昨因陝西北山一帶流民失所土匪游勇降眾隨在廣集特諭劉典將該處確切情形據實具奏茲復據該署撫奏稱距延水關七十里地方有匪搶奪民糧並圍攻小場寨等事業經署知府喻步蓮等帶

勇馳勦斬截多名現擬將收撫甘省難民數千人安插涇陽咸陽境內開墾荒地派主事周瑞松擇其精壯者編成數營按日操練等語可見該省土匪游勇嘯聚滋擾在在堪虞亟宜設法彈壓撫綏消弭隱患北山一帶地方遼闊處處接連甘境該匪竄踞無定防不勝防尤慮吳忠金積等堡回逆被勦窮蹙突犯陝疆董危降眾人數甚多更虞日久生變前竄宜川騎賊雖經都司劉厚填追斬數名

難保不乘虛再竄劉典毋得存五日京兆之見仍著飭令喻步蓮劉厚填等上緊搜捕嚴密梭巡至難民編立成營固屬一舉兩得惟當責成周瑞松實力辦理認真操練不得敷衍了事所有辦理一切情形仍著隨時據實具奏將此由五百里諭令知之○又諭前因福濟等奏豫籌安插索倫人眾需餉甚亟請飭部撥銀十五萬兩當交戶部議奏茲據奏稱安插索倫一事關係新疆大局擬先由部

庫撥銀十萬兩以濟要需其餘五萬兩卽在山西欠解新疆項下如數找足等語卽著照所議辦理將部撥銀兩交萬青黎王榕吉遴派妥員解赴綏遠城卽由定安派弁迅解烏城以便該將軍等分撥應用李宗義當遵照此次部撥數目嚴飭該藩司趕緊籌解不准稍事拖延該部自上年以來先後解過新疆餉銀不少其撥給麟興之二十萬兩又將各省劃還部庫之款改撥成祿軍營庫款已屬

無著此次所撥之十萬兩擬在山東劃銀四萬兩河南劃銀四萬兩直隸劃銀二萬兩即著曾國藩丁寶楨李鶴年迅速籌款均於明年四月以前隨同前次應行劃還已哈餉銀之三十萬兩一律解部以重庫儲其節次奏撥新疆協餉暨歷年積欠新疆月餉並曾國藩丁寶楨李宗羲李鶴年遵奉本月初十日諭旨陸續籌解用顧邊陲至此大部撥之十萬兩山西裁足之五萬兩於未經解到以

前烏城遇有急需著福濟等即由前撥已哈兩城經費三十萬兩內通融動用以資周轉將此諭知萬青黎王榕吉並由五百里諭令曾國藩福濟榮全定安支碩丁寶楨李宗羲李鶴年知之○福州副都統富勒渾泰因病解職以吉林協領全福為福州副都統○壬戌

孝莊文皇后忌辰遣官祭

昭西陵○諭內閣前因內閣侍讀學士鍾佩賢

奏軍營保至藩臬人員查非科目出身及曾任實缺道府者仍令先補道府當交吏部妥議章程具奏茲據奏稱勞績保案仍應按照章程不准保記名請簡及指項題奏等名目各等語即著照該部所擬嗣後各省督撫暨統兵大臣遇有勞績保案仍照舊章不准保至藩臬兩司其道府等官仍不得保至記名簡放及指項題奏等名目其從前已保藩臬記名題奏者如非曾任實缺道府無論是否

科目出身及曾任丞倅州縣等官均准其戴用原銜一律先補道員俟得缺到任後由各該督撫察看如果實能稱職准該督撫出具考語可否升用之處奏明請旨如不能稱職亦隨時奏參毋得遷就其鹽運使一項從前如有保奏記名者亦照此辦理至賢能素著之員仍著各直省督撫懷遵本年六月初五日諭旨留心察訪隨時保奏另片奏軍營保舉道府州縣等官試用一年期滿請嚴行甄

別等語。卽著照該部所議章程辦理。○刑部奏遵例查明免勾官犯開單呈覽得旨已革陝西候補參將盧澍標著毋庸查辦已革儘先補用參將岳炳滌著加恩減等發落。○以故扎嚕特扎薩克貝勒達木林旺濟勒繼子林沁諾魯布襲爵。○以戶部右侍郎李鴻藻充經筵講官。○蠲緩江蘇長洲元和吳吳江震澤常熟昭文崑山新陽太湖華亭婁金山青浦丹徒太倉鎮洋奉賢陽湖無錫金匱江陰宜興荆溪武進靖江嘉定上海南匯寶山泰泰興江都甘泉三十四廳州縣暨蘇州太倉鎮海金山鎮江五衛被水新墾荒田本年額賦並雜課有差

上以歲暮拾祭

太廟自是日始齋戒三日。○癸亥四川總督吳崇奏川省征防各軍暨京協等餉需用甚鉅援案請於同治九年續辦按糧津貼以資供支下部知之。○甲子

上以歲暮拾祭

太廟前期親詣行禮。○遣官祭太廟中殿

後殿。○諭內閣英翰奏遵查道員辦理河務情形及委員蒙蔽各情分別奏奏一摺開缺安徽鳳潁六泗道劉毓楠前因吳坤修奏參辦理河道聽信委員余昌宇之言含混結案當經降旨將該道開缺諭令該撫查明嚴參茲據英翰奏稱劉毓楠辦理宿州河工尚非有

心貽誤亦非受委員蒙蔽惟其為人短於政事等語劉毓楠著送部引見至候選知府余昌宇隨同該道辦工於劉毓楠未經到工之先不能及早開辦並著交部照例議處以示薄懲。○又諭丁寶楨奏遵保賢能府州縣開單呈覽一摺山東濟南府知府龔易圖高唐州知州帥嵩齡歷城縣知縣孫善述蓬萊縣知縣彭九齡章邱縣知縣蔣慶第即墨縣知縣林溥高密縣知縣周麟章據丁寶楨臚列

該員等才具政績均有可觀實為該省出色人員深堪嘉獎著丁寶楨飭令該員等益加策勵勉為循良毋得始勤終怠其餘各員仍著該撫隨時考覈如有庸劣不職者卽立行叅劾毋稍徇隱以副澄敘官方至意○又諭丁寶楨奏請將整飭地方各員給予獎勵等語山東署濟甯直隸州知州王錫麟緝捕游勇消患無形署郟城縣知縣韓光鼎擒拏幅匪多名不分畛域恩縣知縣梅纘高清楚積

案並捐貲修建隄牆保衛地方均應量予甄敘王錫麟韓光鼎梅纘高均著賞給隨帶加二級○諭軍機大臣等德英奏奉天旗戶承領荒地耕種無憑辨認請飭盛京將軍等覈對旗檔等語黑龍江屬界巴彥蘇蘇等處地方有奉天所屬金復遼蓋等處旗人承領荒地耕種據佃戶增祿等呈請編入該處旗冊經前任將軍特普欽派員挨戶清查並准盛京將軍將該旗丁姓名人口咨覆茲據該署

將軍奏稱查對委員與增祿等呈冊多不相符旗人以宗譜為重此項旗戶既無憑辨認未便據增祿等一面之詞率行辦理著都興阿額勒和布恩錫派員攜帶旗丁三代戶口清冊前往黑龍江詳細查認儻此項旗丁內實有正身旗人委無游民假冒卽由該委員分晰各該部落按名造冊呈報盛京將軍與該省旗檔詳細覈對果係清白旗人仍由該將軍等將原管各官出具切結咨送黑龍江

將軍衙門以憑編入該處旗冊令其照章交租毋許含混原片著鈔給都興阿等閱看將此各諭令知之○人諭曾國藩奏遵查畿南所屬災歉較重應行賑恤一摺直隸南路之大順廣三府地方本年雨澤稀少災情較重經曾國藩屬令臬司錢鼎銘親歷周查以肥鄉廣平成安邯鄲及永年毗連肥鄉之數十村莊及大名所屬之大名元城為最苦該督現擬寓賑於貸就各屬著名災重處所編定

戶口酌借錢大請飭部於天津存儲現錢項下撥出制錢十萬串由天津運交錢鼎銘經理賑恤事宜等語幾南災歉較重自應設法補救以靖地方茲覽該督所陳一切具臻妥協卽著崇厚在天津存儲現錢項下撥制錢十萬串由天津派員運至大名交錢鼎銘收領並著曾國藩飭令該臬司妥為散放以拯災黎如各州縣仍有沾染前時積習不能實力奉行者卽由錢鼎銘稟明該督指名嚴參

毋致澤不下究該處次貧戶口仍著該督察度情形於來春分別賑恤其給示曉諭及設局平糶各事宜均著照所議辦理將此各諭令知之○黑龍江將軍德英奏巴彥蘇蘇地方現設旗營改撥墨爾根索倫佐領驍騎校各一員原係索倫達呼爾額缺其防禦四員原係滿洲額缺均由各該部落佐領防禦驍騎校內調轉俟移撥新營續有缺出仍由各該部落應升人員內揀放以符舊制下部議

從之○山西巡撫李宗義奏遵訊豐鎮廳教民爭地控案業將地界勘明兩造具結完案下所司知之 命喀喇沁都楞郡王旺都特那木濟勒喀爾喀郡王莽珠巴扎爾在御前行走賞蘇尼特郡王托第布木紫纒○補鑄廣西憑祥州州判關防從巡撫蘇鳳文請也○蠲緩安徽無為當塗銅陵蕪湖繁昌望江東流泗懷甯桐城潛山太湖宿松宣城南陵貴池青陽建德合肥廬江舒城巢壽宿懷遠

定遠靈璧鳳臺潁上霍邱盱眙天長五河亳蒙城三十五州縣被水被旱被風被蟲地方新舊額賦有差○朝鮮國使臣李永輔等三人於午門外瞻覲○乙丑禘祭太廟遣孚郡王奕諲恭代行禮○遣官祭永陵 福陵 昭陵 昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵○遣官祭

端慧皇太子園寢○遣官祭

太歲之神○諭軍機大臣等穆圖善奏賊匪

阻擾運道疊經官軍擊剿袁保恆奏歸併協

餉請旨飭遵各摺片甘省西路回匪在李家

窯地方搶劫糧運又於三子溝一帶攻掠民

堡經提督劉定邦督隊疾追斃賊多名其竄

擾石門溝青沙嶺小川賊匪亦經分防各營

平定本三十一

十一

擊退古浪運省牲畜突被馬賊搶去統領張萬美等在黑松驛等處將賊擊敗入山穆圖善現擬將糧路改由大靖土門一帶行走並分軍擇要駐守著即檄飭張萬美等實力堵禦以利轉輸一面飭令薩英阿嚴扼金縣杜賊東竄之路西路平番古浪一帶為甘垣運道所關此時各匪乏食希圖搶掠軍糧疲我兵力非得大軍進剿省防仍屬可虞左宗棠前派之黃鼎等軍現已行抵何處該大臣駐軍平涼於省城聲息亦可相通即著嚴飭黃鼎等各率所部確探賊蹤會合追剿不可稍涉遷延穆圖善奏傷病並發懇請給假等語著賞假一箇月以資調理現在西路防務緊急該將軍仍當督同在省司道各官妥為籌布左宗棠亦當懍遵疊次諭旨迅籌兼顧如不能剋期前進即行酌派妥員馳往接替穆圖善所部各營協餉袁保恆擬請自同治九年正月為始歸併西征糧臺支發著即照所

請辦理其同治八年十二月以前各省所欠
穆圖善協餉與甘軍積年舊欠仍著袁保恆
隨時咨催按數補發不得意存畛域將此由
五百里諭知左宗棠穆圖善並傳諭袁保恆
知之○又諭袁保恆奏請飭各省改解協餉
一摺河南湖北江蘇四川山西五省應撥泰
州糧臺餉銀一百二十萬兩歷年積欠甚多
現在穆圖善所部各軍均改由西征糧臺發
餉各該省亟應隨時撥解以濟要需著馬新

貽吳棠李瀚章李鶴年郭柏蔭丁日昌李宗
義各查照應解泰州協餉數目自同治九年
正月為始按月籌撥徑解西征糧臺接收其
以前欠餉亦著一併籌解毋得久延將此由
五百里各諭令知之○朝鮮國王李熙遣使
表貢方物賞賚筵宴如例○以舞弊營私山
東知縣楊運連熾和革職訊辦○予甘肅李
家黨等處陣亡參將樊友才等三十員祭葬
世職加等○丙寅

上御保和殿筵宴朝正外藩科爾沁喀爾喀蘇
尼特喀喇沁扎賚特阿巴哈納爾阿巴噶茂
明安巴林鄂爾多斯郭爾羅斯翁牛特烏珠
穆沁杜爾伯特阿拉善察哈爾王貝勒貝子
公額駙台吉塔布囊暨朝鮮正副使等隨文
武大臣依次就坐諸樂並作

上進酒召科爾沁扎薩克圖謝圖親王巴寶多
爾濟喀爾喀親王達爾瑪蘇尼特郡王托第
布木喀喇沁貝勒德木齊扎布扎賚特郡王

阿勒坦鄂綽爾阿巴哈納爾貝子桑齊薩喇
特多布阿巴噶卓哩克圖郡王剛噶爾倫布
茂明安貝勒格楚克巴林貝子索哩雅鄂爾
多斯貝子三濟密都布郭爾羅斯鎮國公噶
爾瑪什第翁牛特鎮國公永龍烏珠穆沁輔
國公車林多爾濟杜爾伯特貝子察克都爾
扎布阿拉善鎮國公沙克都爾扎布察哈爾
四等台吉拉什棟魯布等至
御座前賜酒成禮○奉

慈安皇太后

慈禧皇太后幸漱芳齋侍午膳 酉刻詣綏履

殿

慈安皇太后前行禮平安室

慈禧皇太后前行禮○以浙江辦理海運漕糧

出力予知府陳魯等加銜升敘有差○是年

旌表孝子浙江等省張修倫等二十三名孝

友福建省林家驥一名悌弟山西省王文輝

一名孝義山西等省泰古鏡等十名義夫江

實錄本卷五十二

五十二

西省劉彥麟一名孝婦河南等省郭吳氏等

五口孝女浙江等省張五姑等七口烈婦河

南等省徐承祖妻華氏等二十八口烈女浙

江等省毛氏等二口守節合例滿洲護軍瑞

連妻白佳氏等一百十六口蒙古護軍吉元

妻李氏等六十一口漢軍藍翎侍衛存格妻

岑氏等三十口內務府披甲桂祥妻韓氏等

六口

東陵承辦事務衙門披甲善昌妻譚佳氏等三

口盛京將軍衙門閒散付廣阿妻張氏等八

十九口各省駐防披甲西成阿妻瓜爾佳氏

等一百一十一口奉天等省呂岱妻蘇氏等一

萬三千九百六十九口夫亡殉節江西等省

劉慶妻趙氏等二十七口未婚守志河南等

省蘇應常聘妻楚氏等二十五口樂善好施

安徽省方矩森一名百歲壽民婦四川等省

邵金鑑等十九名口五世同堂四川等省梁

永昶等四十三家均給銀建坊如例○會計

實錄本卷五十三

五十三

天下民數穀數除江蘇安徽福建雲南廣西

未經冊報外奉天等省通共大小男婦二萬

三千九百一萬一千三百二十一名口存倉

米穀二百八十八萬六千五百五十四石二

斗九升八合五分

大清穆宗繼天開運受中居正保大定功聖智
誠孝信敏恭寬毅皇帝實錄卷之二百七十三

實錄卷之二十三

三

大清穆宗繼天開運受中居正保大定功聖智
誠孝信敏恭寬毅皇帝實錄卷之二百七十四

欽此
同治九年庚午春正月丁卯朔
奉先殿行禮○遣官祭
太廟後殿○率王以下文武大臣詣
慈寧門慶賀
慈安皇太后
慈禧皇太后禮成御太和殿受朝作樂宣表如
儀○詣
大高殿
壽皇殿行禮○御乾清宮賜近支親藩等宴○

上詣

奉先殿行禮○遣官祭

太廟後殿○率王以下文武大臣詣

慈寧門慶賀

慈安皇太后

慈禧皇太后禮成御太和殿受朝作樂宣表如

儀○詣

大高殿

壽皇殿行禮○御乾清宮賜近支親藩等宴○

奉

慈安皇太后

慈禧皇太后幸漱芳齋。侍午膳。○予陝西延安

等處陣亡殉難遊擊李允芳等暨紳民婦女

一百七員名口分別旌卹如例。○戊辰

上詣綏履殿問

慈安皇太后安。平安室問

慈禧皇太后安。至丙申皆如之。○展綏直隸間

東明。長垣。安平。武清。廣平。元城。豐潤。霸。文。安。

大城。固安。永清。東安。昌平。清苑。滿城。宛。雄。東。

鹿安。河間。獻。阜城。肅甯。任邱。天津。青。靜。海。滄。

南皮。鹽山。慶雲。贊皇。無極。邢臺。平鄉。廣宗。鉅。

鹿。永年。邯鄲。成安。肥鄉。曲周。雞澤。磁。大名。延。

慶。蔚。趙。柏鄉。隆平。高邑。臨城。甯晉。深。饒。陽。博。

野。五十八州縣被水被旱被雹被風地方新

舊額賦租課有差。○己巳。

高宗純皇帝忌辰。遣官祭

裕陵。

上詣

壽皇殿行禮。○庚午。諭軍機大臣等。李宗義奏。

疊次擊退撲河遊匪一摺。陝省延長宜川一

帶土匪游勇。嘯聚成羣。因該處彫敝。無可掠

食。遂思偷渡冰橋。窺伺晉境。上年十一月間。

匪蹤竄撲石皮渡。十二月間。又先後竄撲小

灘及小梯巖。雖經晉省防軍擊退。難保不去

而復來。仍著李宗義檄飭李慶翱。郭寶昌等

督同在防各營嚴密堵扼。毋稍疏虞。賊股三

次撲河。晉兵或過河迎勦。或隔岸堵禦。而河

西一帶。何以未見陝兵會同夾擊。著劉典嚴

飭各營。隨時跟蹤擒捕。毋任匪徒游駛。陝北

地多山谷。最易藏奸。若不及早設法擒捕。藏

除醜類。賊股一日不盡。晉防終難解嚴。糜餉

老師。將成不了之局。左宗棠。劉典。務當悉心

商酌。妥籌辦法。迅將各股游匪盡數掃除。毋

得日久因循。致釀後患。將此由五百里各諭

令知之。○以湖北捐輸軍餉。永廣安陸縣學

額三名利川縣二名。○緩徵山東濟甯臨邑長清德東平東阿平陰惠民陽信樂陵濱霑化甯陽嶧壽張荷澤曹定陶鉅野鄆城濮范聊城堂邑博平茌平齊東青城海豐滕陽穀城武觀城朝城蘭山館陶武城魚臺三十八州縣暨德州東平臨清濟甯西衛東平所永阜場被水被旱被蟲被風被雹地方本年上忙額賦並鹽蘆各項雜課。○辛未立春順天府進土牛春山寶座。○癸酉。

世祖章皇帝忌辰遣官祭

孝陵。○以神靈顯應。頒河南省城

城隍廟扁額曰澤敷全豫祥符縣

城隍廟扁額曰浚儀顯佑南陽府

城隍廟扁額曰宛城保障南陽縣

城隍廟扁額曰德昭西鄂鄭州

關帝廟扁額曰福被三川

城隍廟扁額曰永綏古管睢州

關帝廟扁額曰承匡顯應

城隍廟扁額曰惠普睢陽武陟縣

關帝廟扁額曰福蔭覃懷

城隍廟扁額曰恩周濁鹿。○諭內閣瑞麟李

福泰奏請將丁憂總兵暫留署任一摺。丁憂

署廣東南韶連鎮總兵鄭紹忠。既據奏稱韶

州等處地方緝捕土匪。現關緊要。該員正資

得力。未便遽易生手。鄭紹忠即著准其暫留

署任。俟將各屬土匪辦竣後。飭令回籍守制。

○諭軍機大臣等。劉嶽昭。岑毓英奏官軍肅

清附省土堆餘匪。並攻克祿豐縣城一摺。土

堆逆匪。知官軍四面合圍。聚黨抗拒。經劉嶽

昭等會同馬如龍督飭各軍。攻破前層賊柵。

生擒逆首馬得良等多名。餘匪死踞各村屋

內。官軍用火圍燒。乘勢殺賊殆盡。當將土堆

村堡全行克復。附省地面一律肅清。其祿豐

縣城踞匪。亦經練目丁同義約會何秀林等

軍內外夾擊。紛紛乞降。逆首劉和等被獲。正

法。該縣城池亦即收復。勒辦均屬奮勉。逆首

劉城米映山日久稽誅。此次已否殲斃。仍著該督等嚴飭各路文武。確查實在下落。毋任幸逃。法網現在滇垣附近一帶已無賊蹤。即著劉徽昭、岑毓英分督馬忠等軍。規復澂江、新興及東南竹園館驛等處。一面檄飭楊玉科等各率所部。將姚州、楚雄等府州縣城次第攻取。用竟全功。將此由五百里各諭令知之。○以雲南省城解圍。並克復富民等城出力。賞總兵官王維金正一品封典。總兵官王東發、副將屈洪泰、吳永安、馬青雲、參將楊玉春、岑寬德、黃文學、張御鶴、遊擊蔡標、黃世昌、都司李廷標、譚美、吳鳳馬、和馬柱、巴圖魯名號按察使程誠、守備彭子祥等花翎知縣蔡元燮等藍翎道員彭緒環等加銜升敘有差。○予雲南祿豐陣亡都司劉陞廷等十九員祭葬世職加等。○予河南各屬陣亡殉難紳民婦女一千九百三十二名口分別旌卹如例。

上以孟春時享。太廟自是日始齋戒三日。○甲戌諭內閣。瑞麟、李福泰奏特參庸劣各員。請旨分別降革一摺。廣東興甯縣知縣周連甲。萎靡不振。習氣尤深。前署饒平縣事。試用知縣萬邦棟。不洽輿情。前署龍川縣事。試用知縣孫汝為。舉止躁妄。徇庇家丁。試用同知吳人壽。性情鄙陋。聲名平常。赤溪同知黎正春。補用同知華本松。署英德縣事。補用知縣阮承恩。趨向不端。物議騰沸。均著卽行革職。前署徐聞縣事。准補澄海縣知縣王伯良。前署新安縣事。准補鶴山縣知縣吳濱。前署河源縣事。准補西甯縣知縣齊聖時。庸懦無能。不知振作。均著以教職銓選。○諭軍機大臣等。金順奏。勦辦援賊獲勝。攻克賊寨情形一摺。王家墮踞匪壘。經官軍圍剿。上年十二月間。陝回趙五阿渾等糾集大股援應。經金順會同張曜督軍迎勦。奮力擊敗。殲斃賊匪數千人。逆酋趙五阿

渾等亦經擒斬。並將馬汰納洪兩寨攻破。斃賊甚多。金順勇往督戰。致手受刀傷。現在曾否平復。實深廩繫。著發去內府如意拔毒散二料。以資調理。北路平羅縣屬黃渠橋等處。現有賊騎紛擾。意圖抄截糧運。且該處距磴口一帶不遠。尤應嚴密防範。著金順會同張曜。飭令常福等實力梭剿。以清後路。王家疇賊匪困守已久。現在外援既斷。即當相機圍剿。力籌攻拔。陝回雖經南適。難保不復思北竄。意圖援應。劉松山近日攻勦金積堡情形。若何。該提督駐軍處所。距甯夏不遠。金運昌一軍亦早與劉松山合隊。著左宗棠飭令彼此聯絡。如甯郡賊勢較重。即當分兵前往。會合金順、張曜等勦辦。以資得力。並著左宗棠嚴飭北路各軍。探蹤截剿。毋任陝回紛紛北竄。致多牽掣。將此由六百里各諭令知之。○予甘肅王家疇陣亡遊擊丁得勝都司駱元益守備夏逢聖等祭葬世職加等。○乙亥。

上以孟春時享
太廟前期親詣行禮。○丙子。享太廟。遣睿親王德長恭代行禮。○遣官祭太歲之神。

上詣

時應宮拈香。○御紫光閣。賜蒙古王貝勒貝子公額駙台吉暨朝鮮使臣等宴。並賞賚有差。○盛京兵部侍郎綿宜等奏。奉省驛站經費竭蹶。援案請借馬乾銀兩接濟。以重郵務。

允之。○命圖謝圖汗扎薩克郡王拉蘇倫巴咱爾在御前行走。賞科爾沁郡王濟克默特朗布子頭等台吉那蘭格呼勒花翎。○予貴州各屬陣亡殉難生員王燦奎等紳民婦女二千四百五十四名口分別旌卹如例。○丁丑。

孝全成皇后忌辰。遣官祭

慕陵。○諭軍機大臣等。左宗棠穆圖善奏遵旨裁併營勇分段布置。並穆圖善奏擬將長順

等馬隊帶赴甯夏各摺片。甘肅秦鞏一帶分駐各營。經左宗棠飭令歸併。其省城附近營勇由穆圖善分別裁併。再由左宗棠派員點驗酌量遣留。著左宗棠等認真簡閱。應裁撤者卽行裁撤。其挑選各營責令分段防守。務使兵歸實用。餉不虛糜。裁汰各營勇丁卽著左宗棠妥籌賞遣回籍。毋任滋事。王仁和所統懷義各營並著左宗棠另籌安插。俾免失所。江蘇等省部撥穆圖善軍餉銀兩已有旨。自本年正月為始。改解西征糧臺支發。所有副都統雙福等新調馬隊月餉著左宗棠卽飭袁保恆按月接濟。其江甯月協甯夏餉銀一萬兩仍歸穆圖善收發為甯夏各軍之用。將來卽由該將軍覈實造報。以免軋轢。副都統常順等所統吉林黑龍江各起馬隊並該將軍原立圍隊一營均准穆圖善於出省時帶赴甯夏以資得力。其餘各營步隊如須挑選帶往由該將軍酌度辦理。左宗棠仍遵疊

次諭旨。剋期前進。抑或酌派委員馳往接替。毋稍延緩。至北路甯靈南路鞏秦軍務如何。月餘未據該大臣奏報戰事。著嚴密布置。妥慎進取。並隨時具奏。以慰廑繫。將此由五百里各諭令知之。○以都察院左都御史靈桂署兵部尚書。○以正黃旗蒙古都統載容署正紅旗漢軍都統。正黃旗蒙古副都統富明署正藍旗蒙古副都統。正白旗滿洲副都統棍楚克林沁暫署正黃旗漢軍副都統。○以甘肅克復狄道州城出力副都統常順等優敘賞協領滿祿佐領穆克德布阿奇泰巴圖魯名號。佐領舒圖爾善等花翎披甲福壽等六名藍翎餘加銜升敘有差。○予故前任杭州將軍崑壽祭葬諡壯敏。○戊寅諭軍機大臣等御史錫光奏本月初十日海運倉應放正藍旗包衣米石豫定洪字廠該倉花戶趙泳太陳泳安等輒敢商同已革花戶張六泳趙連明張玉賓王安邦私開蘭字廠放米

顯有情弊。著步軍統領衙門派委幹員。迅將該花戶等嚴密查拏。解交刑部嚴行審辦。該倉監督有無故縱情事。並著刑部徹底根究。將此諭令知之。○又諭瑞麟等奏查辦惠來縣積案。拏獲要犯正法一摺。潮郡匪徒搶擄械鬪積案甚夥。經該督撫派委總兵方耀道員沈映鈴等赴該郡查辦。上年十一月間。已將惠來一帶辦有端緒。共獲匪犯一百八十餘名。分別懲治。並起獲礮位多件。鬪案一律

止息。辦理尚為妥速。所有善後事宜。著卽飭令該縣妥為籌辦。至潮陽地方較大。積案尤多。該鎮道等已帶兵勇移紮該縣。接續查辦。仍著飭令相度機宜。認真整頓。務令匪黨悉除。輿情帖服。以副去暴安良至意。將此各諭令知之。○又諭文麟景廉奏肅州已撫回匪。仍行出關擾害。並敦煌玉門稟報回逆滋擾情形各摺片。據稱肅州回匪。經成祿收撫後。仍不時糾眾出關。搶殺行旅。擾害地方。各路

防兵。因該回持有肅州鎮道傳牌印文。不敢盤詰。以致該回肆行無忌。上年九十月間。疊在紅柳園大泉等處搶劫軍糧。殺害押運官弁。又攻破踰實堡城橋灣等處。任意焚掠。其成祿派出之回員李進三等。復在敦煌玉門境內搜索糧石。搶殺橫行。關外民不聊生。大局岌岌可慮等語。回匪狼子野心。非約束嚴明。斷難日久安帖。本日已諭令成祿將回員李進三迅卽撤回。惟肅州已撫之回。不能設

法彈壓。則回民積仇愈深。勢將變生不測。關外大局不堪設想。著左宗棠迅派妥員馳往肅州。查明實在情節。嚴飭該鎮道派兵彈壓。力圖補救。並約束回眾。毋再給文出關。前諭成祿將所部勇丁嚴加裁汰。奏聞聽候諭旨。迄今未據覆奏。何以此時忽派員在各屬索糧滋事。著該大臣確查成祿近日情形。如帶兵不能得力。徒事騷擾地方。卽行據實奏參。楊占鰲帶兵何如。亦著一併查明具奏。毋稍

徇隱至關外久遭回逆蹂躪幾至不可收拾。烏魯木齊等處一片賊氛。巴里坤哈密二城僅存。時有防不勝防之勢。儻日久大兵不能出關。已哈二城力難堵拄。其患不可勝言。成祿帶兵。如果不能得力。關外應如何布置。有無兵勇可以抽撥。揀派得力大員。先行統帶出關。駐紮巴哈二城扼要之處。藉壯聲威。使回逆不敢肆行窺伺。著左宗棠統籌全局。隨時具奏。以慰塵繫。竇型一員。前據穆圖善奏。

據總兵陶生林稟請暫護安肅道篆。當因該員資望太輕。恐難勝任。諭令左宗棠隨時察看。並著確遵前旨。迅派妥員前往接署。毋稍遷就。文麟等原摺片二件。均著鈔給閱看。將此由六百里諭令知之。○又諭。文麟景廉奏覆陳擊退竄匪情形。酌留防兵軍火。暨肅州回逆竄擾各摺片。據稱前次西逆竄撲哈密。文麟等曾派撥兵勇。在二三四五等堡及柳樹泉沙泉等處疊次痛勦。該逆始由小南

路瞭墩一帶遁去。並未竄入坤境。何瑄來咨亦稱親赴草打坂紮營。並撥隊在山南沙泉等處偵探。旋因賊匪已被哈密官兵擊敗。西遁。撤隊回城等語。是此股賊匪並非何瑄先在沙泉擊敗。哈密兵勇始到。該總兵前奏情形殊為失實。嗣後已哈兩城軍務。伊勒屯務當飭令何瑄隨時與文麟等悉心酌辦。毋得稍有參差。致彼此各存意見。其應行具奏事宜。著會同伊勒屯列銜入告。何瑄不得

率行單銜具奏。哈密防勦尚在喫緊。若將駐防各營全調回坤。難資分布。文麟擬於漢營官兵四百餘名內。酌留二百名。仍歸副將趙萬海等管帶。一面飭令該副將設營招兵。俟新兵募練已成。再將該官兵全數撤回。即著照所請辦理。已城代鑄哈密撞礮四十桿。尚未據何瑄解到。現在哈密需用甚急。准文麟等在於防哈密營官兵軍火內截留撞礮四十桿。抵撥前數。以資應用。即著何瑄飭令趙

萬海就近照數分撥。肅州就撫回匪。不時出關擾害。各路防兵。因該回持有鎮道印文。不敢盤詰。以致該回肆行無忌。疊次搶刦軍糧。殺害官弁。本日已諭左宗棠派員往查。嚴飭該鎮道督兵彈壓。著文麟等曉諭各該處戶民。如有回眾滋事。無論有無印文。是否貿易。即行格殺勿論。以杜紛擾。成祿派出之回員李進三等。現在敦煌等處。亦有滋擾情事。著迅速撤回。毋令貽害地方。前諭成祿將現有

兵勇汰弱留強。覈定數目。迅速奏聞。聽候諭旨。迄今數月之久。未據該提督奏報。即著詳細據實具奏。不得任意遲延。將此由六百里諭知文麟。景廉。成祿。伊勒屯。並傳諭何瑄知之。○又諭文麟。景廉奏軍餉到營。請續撥餉銀採買牛羊一摺。據稱烏城撥解哈密銀兩。據該將軍等咨稱。共撥銀六萬一千八百兩。僅據解到銀五萬六百三十餘兩。尚短銀一萬一千一百六十餘兩。因何不符之處。著福

濟榮全查明辦理。又據文麟等奏稱。哈密兵勇自本年正月以後。全無口食。採辦維艱。現派佐領富勒銘額赴烏。續請添撥餉銀。並咨請飭令烏科各屬蒙古。代買牛羊以充軍食等語。著福濟榮全。斟酌情形。於新疆款內再撥銀三四萬兩。飭令烏科各屬蒙古部落。代為採買羊一二萬隻。牛五六百頭。交富勒銘額收領。並由烏城多派蒙古人等協解赴哈。餘銀仍交該佐領一併解營。以濟急需。將此

由五百里各諭令知之。○又諭前因何瑄奏。參文麟把持糧道。不顧大局等情。當以伊勒屯未經列銜。諭令據實具奏。茲據文麟奏稱。安敦玉等處倉糧。早經撥運罄盡。新徵額糧。為數無多。哈密各營軍食。自顧不暇。僅能勸捐糧二千數百石。接濟坤城。未能按月籌撥。何瑄前派遊擊孫淵椿赴哈密。向回王福晉索討借款。滋鬧偏勒。幾至激成事端。該員前在敦煌。經戶民陳國清呈控霸種田地姦淫

婦女等情。旋即逃回坤城。何琯聽信該員簸弄。是非扶嫌具奏。且該總兵標下弁兵。驕劣妄為。深恐有誤大局。請派大員查辦等語。伊勒屯與何琯共事多年。其平日行為。及標下弁兵有無驕縱妄為情事。知之必悉。著伊勒屯即將文麟所奏各節。迅即查明據實具奏。署遊擊孫淵椿。如有恣肆不法情事。即著奏明從嚴叅辦。毋稍徇隱。原摺著文麟鈔錄咨交伊勒屯閱看。哈密與巴里坤唇齒相依。自應互相兼顧。坤城滿漢兩營需用軍糧。仍著文麟景廉隨時力籌撥解。不得稍分畛域。肅州回匪出關滋擾。致安敦玉等處糧運梗阻。亟應設法疏通。著文麟等督率兵勇探蹤截剿。毋任滋蔓。將此由五百里各諭令知之。○又諭李鴻章奏。法國使臣羅淑亞駛至漢口。由川趕回。與之商辦定議一摺。據稱梅西滿赴漢。憑憑公使出頭索帳。李鴻章面告以前次斷給銀票共三萬兩。原謂兩案並了。今羅

使必將已收票銀。專為賠堂及撫卹被害教民之用。而張佩超舊案尾欠。另行著追。止能照約由地方官隨時代催。斷不能由官籌墊。該公使遠道來此。本為川黔兩案起見。既相諄屬。應咨商川省轉飭妥辦。該使聞領事等回覆允為轉咨。意甚欣悅。請照會完案。伊勒不再入川。羅淑亞即於十二月二十八日由漢口起程回京等語。著崇實吳棠即照李鴻章所籌一切情形分別辦理。以免另生枝節。張佩超既與教堂積有仇怨。即照李鴻章所擬令其設法遷移。以圖兩全。著崇實吳棠妥籌辦理。李鴻章原摺著摘鈔給崇實吳棠閱看。貴州遵義一案。李鴻章當咨催曾璧光赴籌辦結黔中地方糜爛。非有知兵大員前往督辦。斷難埽蕩寇氛。教案現已辦竣。著李鴻章懍遵前旨。迅速起程。應由何路入黔督軍進剿之處。均著該督斟酌情形妥為籌辦。將此由六百里各諭令知之。○予甘肅肅州被

戕知州彭昭都司夏奠川。犯總崇海清等祭葬世職加等。

上以次辛祈穀於

上帝。自是日始齋戒三日。○己卯諭軍機大臣等。劉典奏覆陳籌辦北山一帶情形。暨定邊失守各摺片。陝北地本瘠苦。被兵日久。兼又密邇寇氛。自應加意彈壓撫綏。消弭隱害。據劉典陳奏各情。是該處人民稀少。田地多荒。情形實為可憫。該署撫仍當懷遵前旨。慎選

牧令。與小民休養生息。以期漸次復業。至安插降眾。賑濟難民。雖已辦有頭緒。尤當認真經理。不可敷衍了事。逃勇勾引土匪。滋擾地方。為害不淺。著即嚴飭成定康等。密速捕拏。盡法懲治。毋令日久滋蔓。卓勝軍逃勇甚多。漫無紀律。殊堪痛恨。著左宗棠。李宗羲。分飭金運昌。郭寶昌。各將所部加意約束。以肅營規。遇有潛逃勇丁。立即盡數查拏懲辦。此外各營勇丁。亦難保無私自潰逃者。並著左宗

棠。劉典。檄飭各統帶將領。嚴密稽查。隨時懲治。北山所駐各營。零星分布。尚恐未能周密。仍著劉典悉心布置。扼要設防。藉資保衛。定邊為靈州後路。劉松山等軍。攻勦正當喫緊。若因該縣失守。運道梗阻。必至掣動全局。且榆林以西。並無重兵屯紮。尤易滋擾。宋慶一軍尚在神木一帶。著李宗羲就近檄令該提督分派兵勇趕往堵剿。並著左宗棠迅撥勁旅立圖攻克。劉典仍當籌調兵勇會同夾擊。

以遏狂氛。此股賊匪恐竄邊外草地肆行奔突。著定安先事防維。嚴密布置。定邊一帶。本有金運昌留防四營。何時調赴前敵。何以劉典並未知悉。著左宗棠查明具奏。榆林等處防守緊要。即著劉典督飭成定康等實力防剿。毋稍大意。將此由六百里各諭令知之。○又諭福濟榮全奏。布倫托海裁隸科城。請派大員會辦。榮全奏。懇繳伊犁將軍印信。文碩奏。起程赴京各一摺。前因定界事宜。改派奎

昌科城料理需人。諭令文碩毋庸來京。現當海城新撤。一切分遣安插事宜。亟應次第舉辦。奎昌一人。勢恐應接不暇。且節屆春融。即須前往分界。更難兼顧。文碩著懍遵前旨。毋庸來京。無論行抵何處。仍卽折回科城。會同奎昌。將該城應辦事件認真經理。福濟等所請揀派大員赴科會辦之處。著毋庸議。榮全辦理俄國交界收集索倫等事。雖已就緒。恐尚有未盡事宜。隨時酌辦之處。所有伊犁將

軍印信。仍著榮全署理。毋庸呈繳。將此由六百里各諭令知之。○又諭前據文碩奏請來京商辦邊界事宜。當經降旨允准。嗣以科城料理需人。諭令毋庸來京。茲據文碩奏稱定於十二月十七日起程。自係尚未接奉前旨。本日已寄諭文碩。令其懍遵前旨。卽行折回。恐中途未能接到。著文盛於文碩行抵張家口時。卽行傳旨令其折回科城。毋庸來京。將此由四百里諭令知之。○賞扎薩克圖汗車

林敦多布黃纒。賽因諾顏貝子察克都爾扎勒紫纒。○蠲緩陝西臨潼渭南三原高陵涇陽富平咸陽膚施延長保安安塞延川宜川甘泉安定靖邊定邊鳳翔寶雞隴榆林懷遠葭神木府谷大荔蒲城朝邑華郿長武三水郿洛川中部宜君綏德米脂清澗吳堡咸甯長安興平醴泉藍田鄠南鄭城固褒城沔乾耀同官岐山扶風澄城華陰五十七州縣被擾地方舊欠額賦。○庚辰

宣宗成皇帝忌辰。遣官祭慕陵。○長江水師提督黃翼升奏報巡閱事竣。各汛一律安謐。得旨。所有護商防盜各事宜。仍著隨時認真講求。毋稍懈弛。○追予安徽桐城陣亡知縣劉景華祭葬。世職加等。子長芬賞卹如例。○追予江蘇軍營病故提督劉發勝。鄧長里祭葬卹廕。○追予兩江各屬陣亡殉難從九品銜吳文梓等紳民婦女一千五百七十六員名口分別旌卹如例。○辛巳

祈穀於

上帝遣恭親王奕訢恭代行禮○

上詣

大高殿

壽皇殿行禮○御保和殿賜王以下文武大臣

蒙古王貝勒貝子公額駙台吉暨朝鮮使臣

等宴○奉

慈安皇太后

慈禧皇太后幸漱芳齋侍午膳

大清穆宗繼天開運受中居正保大定功聖智
誠孝信敏恭寬毅皇帝實錄卷之二百七十四

大清穆宗繼天開運受中居正保大定功聖智

誠孝信敏恭寬毅皇帝實錄卷之二百七十五

秋修

同治九年庚午正月壬午

上御乾清宮賜近支親藩等宴○諭內閣左宗
棠奏請將居心鄙詐之紳士革職提審等語
甘肅在籍紳士工部員外郎候選道王夢熊
寄居靜甯州黨匪殃民屢被民人台秀學等
在該州控告抗不到案上年八月間道員黃
鼎勦辦土匪張貴時該員報捐倉穀雜糧六
百石經左宗棠飭令黃鼎密查嗣據查明該
員在預料堡一帶派捐糧石聲言官兵是伊
京控請來遇有交糧稍遲之戶即被拷掠其

所勒之數尚多於該員呈繳之數。且通匪被控各情。供證確鑿。亟應嚴行懲辦。王夢熊著先行革職。交左宗棠提案審訊。按律究辦。○諭軍機大臣等。左宗棠移圖善奏。南路官軍擊賊獲勝。左宗棠奏中路官軍擊退竄回。並定邊縣城失守各摺片。河狄逆回。勾結陝回。崔三。禹得彥等股。竄擾禮縣甯遠一帶。經傳先宗等疊次截擊。擒斬賊匪不下二千餘名。餘賊遁回狄道。勒辦尚為得手。所有在事出力員弁勇丁。著准其擇尤保奏。金積堡陝回。

被勒窮蹙。復勾引崔禹等逆。悉銳北趨。勢頗猖獗。周紹濂黃鼎等於半角城黑城鴉兒灣老虎溝等處。前後截勒。斃賊三千餘名。在事員弁勇丁。尚屬出力。並准左宗棠擇尤保奏。陝回馬鎮和等堅守金積堡巢穴。屢攻未下。該逆被困日久。時思勾引各股逆匪。剗糧阻運。牽掣官軍。冀圖一逞。現在敗匪雖已遠遁。仍恐乘間分竄。著左宗棠等督飭南路中路

各軍。確探賊蹤。聯絡截剿。使金積堡之賊勢孤援絕。方可力圖攻拔。陝西自甯條梁至花馬池一帶。為劉松山全軍後路糧運所經。何以金運昌遽將留防各營調赴前敵。詎不料及逆回詭計多端。一經繞截後路。全局卽虞掣動。現在定邊既被襲陷。運道設有梗阻。關係非輕。郭寶昌此時協防晉省河岸。正當喫緊。且所帶親軍人數無多。不必令其馳赴定邊。著左宗棠派隊馳援。並責成劉松山。金運

昌迅圖攻克。肅清後路。一面飛咨陝省防軍合力夾擊。以杜賊蹤竄擾。其前敵各軍。仍當飭令穩慎進攻。毋稍鬆勁。將此由六百里各諭令知之。○又諭左宗棠奏請調馬德昭一軍赴陝等語。金積堡回匪被勒窮蹙。游騎四出窺伺。來去無常。陝省兵分力單。不敷防剿。現在豫省防務較鬆。馬德昭一軍。自可移緩就急。或以全軍。或酌帶八成隊伍。扼紮三原居中策應之處。著李鶴年斟酌情形。妥速調

撥俾資得力。該軍月餉著仍由河南籌解。劃抵欠解甘餉。毋得稍分畛域。致誤事機。將此由五百里諭令知之。○予甘肅半角城等處陣亡副將劉甫田等祭葬世職加等。○予甘肅禮縣等處陣亡遊擊杜敬仲等祭葬世職。○蠲緩江西義甯南昌新建進賢上高新昌清江新淦新喻蓮花安福永新臨川東鄉新城廣昌鄱陽餘干樂平萬年星子都昌建昌德安瑞昌湖口德化彭澤雲都萬載南豐豐

城。峽江安義金谿三十五廳州縣暨九江府同知所屬被水被旱地方新舊額賦雜課有差。○癸未諭內閣本日寅刻神武門內敬事房木庫不戒於火。經王大臣等迅速進內督率官員弁兵趕緊撲救。旋即止熄。該王大臣等勤奮急公。深堪嘉獎。所有隨同救火出力之侍衛章京司員等。著各該衙門查取職名。各賞加一級。在事兵丁共若干名。著各該衙門查明咨報內務府。每名賞給銀二兩。由廣

儲司給發。火災示儆。亟應恐懼修省。寅畏

天威。本日廷臣筵宴。即著停止。○調刑部右侍郎英元為倉場侍郎。以都察院左副都御史達慶為刑部右侍郎。○甲申諭內閣御史馬相如奏請嚴禁巡役藉端訛索等弊一摺。右翼監督徵收西山牲稅。自應遵照定章辦理。若如該御史所奏巡役橫徵苛索。於起票銷票換票肆行勒索。甚至徵多報少。種種弊端。不可枚舉。亟應嚴行禁革。著該監督除將此

項巡役從嚴約束外。將稅則定章出示曉諭。並刊刻新票。以及換票銷票。明定期限。不准官吏勒索使費。以安商民而除積弊。○諭軍機大臣等。前因撥償俄國諾海牲畜銀兩。令福濟榮全查明辦理。茲據總理各國事務衙門奏稱。該將軍等咨明前撥之款。計不敷銀四千六百兩。並請將三年銀數提前二年撥解。數與前十萬數千之款。仍屬相符等語。此項銀兩。既據該將軍等查明確數。自應提前

撥償以省轆轤。著李宗義轉飭該藩司於山西應解京餉內同治九年撥銀三萬八千七百兩十年撥銀四萬八千五百兩十一年撥銀一萬九千四百兩由歸綏道轉解每年限於三月內起程四月到烏里雅蘇台由福濟移交榮全收納該署將軍卽於銀兩解到後派員運往恰克圖歸還以清款目原摺均著鈔給閱看將此由五百里各諭令知之○調鑲黃旗蒙古副都統興林為鑲藍旗滿洲副都統以前任廣州漢軍副都統成明為鑲黃旗蒙古副都統○乙酉

上御撫辰殿大幄次賜蒙古王貝勒貝子公額駙台吉暨朝鮮使臣等食○諭軍機大臣等英翰奏酌調額兵立營訓練一摺軍興以來各省皆以練勇建功綠營額兵幾成虛設亟應切實訓練以復舊章英翰現調安慶防江等營兵丁千名到省參用勇隊章程按日操演並酌給津貼口糧所籌均屬妥協卽著遵

選得力可靠熟悉營伍將弁統帶擇要扼紮認真訓練務期戰守兼資悉成勁旅毋致日久生懈復蹈從前積習其皖南壽春兩鎮所屬各營著與馬新貽妥商以次舉辦總期事皆覈實毋徒博整頓虛聲至安慶防江各營一經抽調是否不至空虛並著該署撫隨時察看毋稍疏虞將此諭令知之○又諭成祿奏擊退東路回匪請飭部迅撥月餉並派員辦理糧臺暨請定欠解協餉章程及提用甘

涼肅軍糧各摺片河狄西甯等處回逆勾結各匪圍攻高臺之七壩堡地方經成祿督飭所部分路抄擊逆眾望西逃竄官軍又於花牆子敗之該逆由南山扁都口竄回西甯東路現無賊蹤成祿擬俟胡飛鵬祥恩所募勇隊到後卽行振旅出關惟新募勇丁未加訓練攻剿皆難得力卽著飭令胡飛鵬等毋庸招募並查明該二員現赴何處隨時撤回吉林黑龍江馬步各隊官兵調赴西征殊多窒

礙所請亦毋庸議。該提督所部兵勇現存若干。著即遵奉前旨。將汰留實在數目迅速奏聞。聽候諭旨。四川等省所欠該營協餉著戶部查明數目分別咨催。應如何嚴定章程各予處分之處亦著該部詳議辦理。成祿所請借撥部款二三十萬兩現在部款外撥已多著不准行。甘涼肅三屬之糧能否歸該軍提用並應否另設糧臺均著左宗棠酌度情形妥為籌辦。關外地方糜爛將來作何布置並

抽撥何項兵勇分起出關左宗棠熟悉戎機必能胸有成見著仍遵前次諭旨統轄全局詳晰奏聞以慰廑繫。將此由五百里各諭令知之。○予甘肅河西堡等處陣亡守備王仲仁把總王廷有祭葬世職加等。○丙戌諭內閣英翰奏甄別賢否各員開單呈覽一摺安徽署霍邱縣知縣王寅清鳳陽縣知縣俞熙前署亳州知州王懋勳署蕪湖縣知縣南成烈據英翰臚列該員等才具政績均有可觀

實為該省出色之員深堪嘉獎。肝貽縣知縣崔秀春辦事巧滑利心太重。廬江縣知縣黃光彬性耽安逸廢弛捕務署績溪縣知縣宋堯金心地糊塗聲名甚劣。婺源縣典史李潤皋性情貪鄙桐城縣馬路巡檢都燕樹聲名狼藉署渦陽縣典史喻增高品行卑污。太平縣宏澤巡檢張元鼎行止躁妄均著即行革職。候補同知趙源陰險狡詐見利忘義著革職永不敘用。壽州知州顏海鵬辦事過執人

地不宜太平縣知縣蔣山才欠開展均著開缺另補。另片奏請將潔已愛民之員嘉獎等語代理蒙城縣知縣補用知府李炳濤盡心吏治久著循聲清廉自矢甚屬可嘉仍飭該員勉為廉吏始終一轍用副朝廷厚望。○諭軍機大臣等李鴻章奏籌辦黔事大略情形請飭川省裁軍騰餉暨酌撥洋稅銀兩各摺片黔省苗氛肆擾川楚各軍未能奏績特命李鴻章前往督辦底定黔疆該省軍事棘手

朝廷亦所深悉。此次該督籌陳大略詳述三難。足見遠慮深謀。老成持重。李鴻章公忠體國。必能力任其難。早靖西南邊患。所有酌調舊部籌運糧餉各事宜。均著該督相度機宜。悉心籌布。朝廷不為遙制也。黔餉勢須藉資於川。而川省營勇過多。積欠又鉅。現在唐友耕所部六千餘名。已由滇省撤回。周達武所部八千餘名。又經抽調腹地。著崇實吳棠迅將前項不出勦之軍。並其餘不能得力零星各營。籌款酌補欠餉。逐漸裁汰。騰出餉項。以贍征軍。並將裁贖餉需。儘力分濟援黔各軍。及酌撥滇黔協餉。不准稍存膜視。仍隨時知照李鴻章酌度辦理。至李鴻章督辦黔事。必得大宗的餉。方足以資飽騰。著馬新貽丁日昌於江海關應解淮軍額餉二萬兩外。按月加撥該關四成洋稅二萬兩。六成洋稅一萬兩。李瀚章郭柏蔭於江漢關按月撥解四成洋稅二萬兩。六成洋稅三萬兩。丁寶楨按月

協撥銀二萬兩。均自本年二月分起。如數籌撥。按月委解金陵軍需局。轉解李鴻章後路糧臺。該督撫等均能顧全大局。諒不至稍有遲誤。將此由六百里各諭令知之。○丁亥孝穆成皇后忌辰。遣官祭慕陵。○戊子。諭軍機大臣等。據萬青藜等奏。科布多幫辦大臣文碩。行抵昌平州。患病請假一摺。文碩前報起程赴京。諭令文盛知照。折回。該大臣未經接奉。已抵昌平。並稱感受風寒。乞假調理。即著萬青藜等傳旨賞假二十日。並令假滿後迅速折回。科布多本任。毋稍遲誤。春融後奎昌前赴瑪呢圖。嘎圖勒漢至哈巴爾阿蘇一帶。辦理俄國分界事宜。文碩到科需時。科城不可無大員鎮攝。即著榮全前往暫行代辦。俟文碩到後。再回烏里雅蘇台。以重邊防。將此諭知順天府。並由五百里諭令福濟榮全知之。○又諭李瀚章奏擬籌添協援黔客軍的餉等語。李鴻章督師入黔。

需餉孔亟。李瀚章擬於浙江歲撥釐捐六萬兩外。無論何款。每月添協銀二萬兩。作為援黔客軍的餉。此項銀兩。或由湖北派員領解。或由浙省委員解往。著李鴻章酌定後。即行知照楊昌濬遵照辦理。將此由五百里各諭令知之。○以理藩院柔遠司不戒於火。尚書崇綸等下部察議。司員等分別議處。○賞甘肅蘭州道豫師副都統銜。為西甯辦事大臣。○予故西甯辦事大臣玉通祭葬。如副都統

例。○己丑。

孝聖憲皇后忌辰。遣官祭

泰東陵。○諭內閣。朕奉

慈安皇太后

慈禧皇太后懿旨。三載考績。為國家激揚大典。中外滿漢諸臣。有能盡心職守。懋著勤勞者。允宜特加甄敘。以示優眷。茲當京察屆期。吏部開單題請。詳加披閱。恭親王首贊樞廷。於今九年。夙夜靖共。於一切行政用人。虛心匡

弼。鉅細靡遺。深資夾輔。著交宗人府從優議敘。吏部尚書文祥。戶部尚書寶鑾。都察院左都御史沈桂芬。戶部右侍郎李鴻藻。同心翊贊。克慎克勤。均著交部議敘。大學士官文應任。封圻勤勞夙著。大學士直隸總督曾國藩。老成宿望。表率羣僚。調任幾疆。盡心民事。協辦大學士湖廣總督李鴻章。韜略優長。懋昭勳績。陝甘總督左宗棠。宣力巖疆。不辭勞瘁。均著交部從優議敘。餘著照舊供職。○又諭。

榮毓等奏請申明派管倉庫定章一摺。

東陵永濟等倉庫。向派司員章京兼管。前經貝勒奕劻等奏明。酌定額數。年限章程。甚為妥善。乃近來並不遵照定章。率行添派。以致官倍於額。差無定限。倉庫關繫綦重。豈容紊亂舊章。嗣後守護大臣等。仍應遵照定章辦理。所有管理永濟倉等處人員。悉照奏定官額差限。屆期更換。不准陸續添派。如不得人。姑闕勿濫。尤不得以一員兼派二差。以重公務。

而專責成○諭軍機大臣等志和等奏拏獲滋事箭丁大概情形一摺此案八枝箭滋事箭丁抗傳不到經志和等派隨帶司員郎中伊勒通阿等帶領番役並土默特旗人等馳往朝陽查勘情形即將案犯丹珠爾等先後拏獲並有瘡子常明等自行投案該犯等屢次抗不比丁有干功令該侍郎等一面出示曉諭一面派員會同該貝子旗前往造冊比丁仍著督同司員將已獲之犯悉心研鞫毋任狡展該箭丁誣控土默特旗章京乘勢抄搶足見風氣刁詐志和等應嚴密防範俟查辦事竣妥議善後章程以期一勞永逸不得草率了事所請將出力司員等量加鼓勵之處准其於定案時聲明請旨將此各諭令知之○以甘肅永豐堡等處迎勦竄匪獲勝予佐領常明以副都統簡放賞協領正福副都統銜驍騎校依昌阿巴圖魯名號○以貴州廣順等處勦除股匪生擒逆首陳喬生賞總

兵官李昌福參將凌興發巴圖魯名號同知葉聯雲都司卜廣懋等花翎州同賴榮燦藍翎餘加銜升敘開復有差○庚寅諭軍機大臣等劉典奏回逆分竄陝境情形暨擊退竄涇賊股收復定邊各摺片回匪竄擾陝境攻陷定邊襲陷安定賊蹤飄忽肆行奔突左宗棠回援之軍總落賊後該督撫等同辦一事何以彼此不相聯絡致誤事機現在瓦窯鋪踞匪勢甚兇悍慶陽之賊又復竄至三水繞竄永樂店窺伺省城且尚有陳瞎子一股亦思竄陝定邊之賊攻撲甯條梁鎮靖堡等處並有另股賊匪滋擾希圖下竄賊蹤紛至沓來幾至不可收拾安定定邊雖據奏稱收復殊不足恃著即將實在情形查明具奏左宗棠入甘後自應酌留重兵力顧後路劉松山金運昌所部本係分紮花定何以不遵劉飭竟行相繼前進雷正綰周蘭亭張福齊蘭敬臨等四軍左宗棠止令其勦辦半角城等處

踞逆何以道員曾傳理竟令各軍進發。以致回逆乘虛竄入。各軍進止自由。無所約束。該大臣當嚴申號令。立將貽誤各員查明參奏。以示懲儆。馬德昭一軍。前據左宗棠奏調。已諭李鶴年飭令該提督督帶所部。扼紮三原。該軍抵陝後。著劉典會商左宗棠。妥籌調度。陝省防兵過單。左宗棠務當抽撥勁旅。回顧陝疆。迅將紛竄各匪盡數殲除。毋稍鬆勁。劉典仍當嚴飭陳照臺。成光裕等。分投堵剿。以遏狂氛。不得徒事張惶。毫無展布。陝事一日不靖。卽蔣志章抵任。劉典亦不得置身事外。著卽振刷精神。亟圖補救。毋得因循諉卸。自干咎戾。安定瓦窯鋪一帶。距晉非遙。現在河冰未泮。李宗義當督飭李慶翱等。嚴密防堵。毋稍疏忽。豫師前已賞給副都統銜。簡放西甯辦事大臣。著左宗棠卽知照豫師。迅赴新任。並將應辦事宜。妥為經理。以副委任。將此由六百里各諭令知之。○以雲南勦辦昭通

回匪地方肅清。賞知府岑毓寶巴圖魯名號。從九品鄒煒等藍翎。餘加銜升敘。開復有差。予陣亡遊擊熊財興千總李洪。把總馬君榮等。祭葬世職加等。○辛卯。諭軍機大臣等。總理各國事務衙門奏俄國自立牌博。請飭查辦一摺。瑪呢圖。嘎圖。勒漢。至哈巴爾。阿蘇。一帶。俄國分界事宜。前因布倫托海裁撤。統歸科布多大臣辦理。當經改派奎昌前往會辦。茲據該衙門奏稱。現接俄使照會。哈巴爾。阿蘇一帶。該國已自行分界。其所立牌博。是否均在同治三年所立紅綫界外。有無侵占之處。均難憑信。請飭查辦等語。著奎昌迅卽按照圖冊。查勘明確。儻有侵占。立卽繪圖貼說。詳細奏聞。並與該國分界大臣。婉為開導。告以兩國立界。理應會辦。方可作為定準。該大臣當妥慎辦理。以副委任。昨因文碩到科需時。諭令榮全前往代辦。卽著榮全懍遵前旨。迅速前往。俟文碩到後。再回烏城。仍著福濟

會同妥籌以重邊防。原摺一件。及照會二件。均著鈔給閱看。將此由六百里各諭令知之。○壬辰諭內閣。御史李宏謨奏禁城屢次失火。請飭豫防等語。禁城重地。近年以來。三次不戒於火。該處看守人役及直班人等。漫不經心。實非尋常疏忽可比。除此次神武門內敬事房木庫失火之看守直班人等。業經交慎刑司審辦外。嗣後著禁城內各該管大臣。暨總管內務府大臣。督飭各該處員役。並傳諭總管太監人等。隨時嚴密稽查。小心防範。毋得稍有疏失。致干重懲。○又諭定安奏副都統患病未痊。懇請開缺等語。察哈爾副都統杜嘎爾。久歷戎行。打仗素稱得力。前因患病。業經賞假調理。現在病體雖未就痊。察哈爾副都統事務較簡。非軍營可比。杜嘎爾著無庸開缺。暫回察哈爾副都統本任。藉資調理。一俟痊愈。即著前赴軍營。以資得力。○諭軍機大臣等。定安奏嵩武軍會拔賊壘。暨勦

辦北路竄匪。烏爾圖那遜所部勦賊獲勝。並豫籌南北兩路防勦情形。各摺片。王家嚙莊回逆。因官軍攻克馬汰納洪兩寨。後負隅死守。經金順張曜會督各軍。分路進勦。先將南面東面各壘攻克。該逆復向南直撲。楊春祥追賊陣亡。孫金彪等帶隊截殺。又平毀附巢壘卡四座。塔子口路逆亦經亮山勦敗。其遁踞大風口等處之賊。常福分兵夾攻。殺斃甚夥。現在王家嚙莊附近賊壘。均經平毀。該逆僅恃此老巢。不難乘機攻取。仍著該將軍迅咨金順張曜各督所部。晝夜環攻。為埽穴擒渠之計。鄂托克旗代清召一帶賊匪。滋擾常福在纏金東南地方。追勦獲勝。賊復遠颺。據獲賊供。有由金積堡偷竄出邊打糧之說。是邊外地方遼闊。匪蹤出沒靡常。該將軍仍當剴飭烏爾圖那遜督率常福各隊。確探賊蹤。嚴加防範。不准稍有疏虞。據奏回逆分路滋擾歸綏一帶。亦應兩路兼防。已屬宋慶派令

蔣東材援應榆林並飭達爾濟等分投協勦所籌均屬妥協卽著檄令達爾濟等會合各軍相機追勦總期聲勢聯絡力殄賊氛昨據劉典奏稱定邊業已收復惟瓦窰鋪踞匪勢甚兇悍該處逼近陝疆難保不圖北竄該將軍務須勤加偵探妥籌防守其沿河包薩托清等處並著嚴飭馬陞會同京津隊伍加意巡防毋稍疏懈將此由五百里諭令知之○又諭奎昌奏請將塔城分界事宜暫行緩辦

並請暫留錫綸以資熟手各摺昨據總理各國事務衙門奏俄國於哈巴爾阿蘇一帶自立牌博當經諭令奎昌按照圖冊詳細查勘妥慎辦理俄國旣已自立牌博情形更不可緩豈能俟伊塔兩城克復後再行商辦著奎昌仍遵疊次諭旨將瑪呢圖嘎圖勒漢至哈巴爾阿蘇一帶應辦分界事宜迅籌會辦毋得藉詞延宕並將俄國現立牌博有無踰於紅綫之處先行確查詳晰奏聞科布多幫辦

大臣事務已有旨令榮全暫行代辦文碩行抵昌平患病業經賞假二十日令其假滿後折回本任所有安插裁撤海城難民各事自毋須錫綸幫辦卽著傳知該員來京當差將此由五百里諭令知之○引見京察三品以下京堂各官得旨均著照舊供職○以伊克昭盟蒙古官兵疊次勦匪出力予貝子巴達爾琥等優敘賞扎奇魯克齊赤樓多爾濟等花翎四等台吉德勒葛爾扎布等藍翎○蠲

緩兩浙錢清西興青村橫浦浦東五場被災地方新舊竈課錢糧○蠲免兩浙仁和海沙鮑郎蘆滙橫浦浦東六場荒蕪竈地錢糧○癸巳諭軍機大臣等忠誠奏奉派大婚典禮應用各緞匹請予展限一摺納采大徵緞匹關繫典禮詎容稍涉延緩惟據該織造奏稱現在緞機止三十餘張諸練匠役甚少上用粧蟒久未奉傳必須先行製機打範畫樣挑花方能發織尚屬實在情形著准其展至年

底解京以備應用其己已大運緞紬俱係照例織辦之件業已遞緩一年著展至來春解部毋許再有遲誤另片奏傳辦繡紗等項請分別展緩等語此項傳辦之件一時未能竣工所有傳辦繡件各項著於年內織齊解京其續傳紗地各件准其展至明年起解所需料工銀兩除已經藩運兩庫撥解外著馬新貽再行籌款迅速撥解交忠誠製辦不得任意延宕第現在經費支絀尤當覈實撙節忠誠所估兩次傳辦各件銀兩共計至二十萬六千餘兩之多未免浮冒仍著悉心覈減以重帑項將此諭知馬新貽並傳諭忠誠知之

（甲午）諭軍機大臣等李鶴年奏潼關防務緊要馬德昭一軍未能西進李宗義奏陝回肆擾逼近蒲州布置河防各等語回逆竄擾陝西長武縣境旋竄渭南縣之倉頭孝義鎮等處已在渭河北岸安設帳房咸陽涇陽三原高陵蒲城均有賊蹤大荔縣所屬之羌白

潘驛亦有邊馬是竄陝回匪由西而東幾於徧地賊氛劉典前奏慶陽之賊竄至三水繞竄永樂店窺伺省城何以不卽派兵截剿致令賊勢如此蔓延著劉典迅撥勁旅探蹤攔擊務將此股匪眾就地殲除毋令紛竄左宗棠迅卽抽撥兵勇回顧陝疆不得置之不問並著懷遵前旨查明後路防軍何以悉赴前敵致賊匪乘虛擾陝掣動全局之處據實參奏至此股賊首是否卽係馬正剛劉典前奏另有陳瞎子一股續圖竄陝曾否與此股合併著左宗棠劉典確查兼將北路瓦窯鋪之賊趕籌撲滅倉頭等處距潼關僅百餘里馬德昭一軍若移紮三原轉出賊之西面關門左近撤去藩籬於晉豫大局均有關係著卽照李鶴年所議馬德昭暫緩西進責令將潼關防務妥籌兼顧一面抽調精壯馳赴渭河相機援剿至添募新軍卽著李鶴年趕緊募練以期有備無患渭南大荔距蒲州所屬甚

近李宗義已飭李慶翱先撥礮船兩營馳赴下游擇要嚴防並調上游一營趕赴蒲州堵禦復將各渡口船隻盡數提至東岸所籌均尚嚴密卽著督飭在事員弁實力巡防毋稍鬆勁安定瓦窯鋪賊匪尚未埽除鄉吉以上河防亦不可稍涉大意毋得顧此失彼將此由六百里各諭令知之○乙未

孝儀純皇后忌辰遣官祭

裕陵○以神靈顯應頒雲南省城

關帝廟扁額曰威宣南徽

城隍廟扁額曰福佑滇雲

蓮華寺扁額曰妙蓮湧現

許真君廟扁額曰昆池保障○諭軍機大臣

等戶部奏遵催成祿軍營協餉並嚴定處分

一摺成祿軍營協餉出關以後原定由新疆

軍餉內支給該提督未出關以前之餉疊經

戶部奏准於湖北陝西四川每月各協數千

兩嗣復奏派四川月協一萬兩旋又奏請撥

歸四川專款十七萬兩後因成祿奏稱部署

出關復在山東欠解新疆月餉內提銀十六

萬兩山西欠解新疆月餉內提銀四萬兩又

將麟興前借部庫銀二十萬兩諭令山西

東河南毋庸解還部庫改解烏城俟成祿出

關後派員迎提應用並於山東欠解新疆餉

銀內提銀十萬兩為成祿出關採辦軍糧之

款是戶部歷次指撥成祿軍營專餉不為不

多乃僅據四川報解銀九萬兩其餘或解不

足數或一批未解實屬意存推諉著李鴻章

李瀚章郭柏蔭蔣志章劉興吳崇丁寶楨李

宗義李鶴年各將該省先後應解成祿軍營

協餉迅速措解如再遲延卽由戶部查明叅

奏原摺均著鈔給閱看將此由五百里各諭

令知之○

上以祭

社稷壇自是日始齋戒三日○丙申諭內閣禮

部奏請將曠官之司員革職一摺禮部候補

主事麟懋前因當月接班曠誤經該部堂官奏參懲處。此次京察過堂復推病不到。疊經嚴傳仍不進署。實屬任意偷安。麟懋著卽革職。以為曠官者戒。○諭軍機大臣等。左宗棠奏賊蹤紛竄。現籌勦辦情形。並自請嚴議。暨請飭定安等撥濟劉松山等軍食各摺片。所陳金積堡回逆。經官軍痛勦後。竄走黑城半角城等處。提督丁賢發於石峽口敗之。其由環慶竄出各股。亦經副將蕭玉元等軍先後擊敗。惟前據劉典馳奏。逆回竄擾陝境。及昨日李鶴年。李宗義所報邊馬已至大荔。羌白潘驛等處各情。是賊蹤之紛竄陝疆者。股數不一。且自西迄東。到處蔓延。左宗棠督師西向。未能將後路嚴密布置。致全陝肅清之地。復遭蹂躪。實屬咎無可辭。左宗棠著交部嚴加議處。劉典雖因留防兵少。堵禦不及。而於所轄地方並不先事圖維。致令賊蹤竄入。亦著交部議處。現在咸陽涇陽一帶。徧地皆賊。

陝垣得以拒賊者。僅恃一綫渭河。兼之密通晉豫防勦甚為緊急。左宗棠所派李輝武一軍。兵力尚單。著卽添撥勁旅。星馳入陝。會同劉典所派各軍。合力勦擊。淨掃賊氛。儻該大臣等觀望遷延。任令賊匪縱橫。掣動全局。則該大臣等自取咎戾。朝廷亦不能曲加寬貸也。劉松山。金運昌兩軍圍攻金積堡。踞匪現正得手。所有該兩軍軍食。自應迅籌撥濟。以資飽騰。定安。金順素顧大局。無論如何為難。務須代辦糧米駝隻。設法接濟。俾免匱乏之虞。是為至要。將此由六百里各諭令知之。○又諭左宗棠奏。彙報北路官軍勦賊疊勝。暨金運昌。雷正綰等軍獲勝情形各摺片。陝回逆目陳霖等折竄金積堡。負隅抗拒。經劉松山會合金運昌等軍。於上年十一月十二月間。疊次獲勝。攻破寨壘。賊鋒大挫。著左宗棠嚴飭劉松山會同各軍。將該逆悉數殄除。毋任漏網。金運昌。雷正綰等軍均係會攻金積

堡之師現在逆回乘虛肆竄陝境著左宗棠嚴飭該員等將金積堡賊匪迅速掃除以便分兵追剿毋為該逆牽掣將此由六百里諭令知之○補鑄廣東海門營參將關防從總督瑞麟請也○予甘肅金積堡陣亡提督張四維等二十六員祭葬世職加等

大清穆宗繼天開運受中居正保大定功聖智誠孝信敏恭寬毅皇帝實錄卷之二百七十五

大清穆宗繼天開運受中居正保大定功聖智誠孝信敏恭寬毅皇帝實錄卷之二百七十六

敕修

同治九年庚午二月丁酉朔

上詣綏履殿問

慈安皇太后安平安室問

慈禧皇太后安至丙寅皆如之○祭

先師孔子遣大學士倭仁行禮○諭內閣額

勒和布恩錫奏相驗命案請變通成例一摺

據稱奉天昌圖廳屬幅員遼闊向例遇有命

案印官公出如在三百里以外檄委照磨經

歷往驗其在三百里以內則由鄰封往驗該

廳毗連僅止開原一縣道路較遠請變通辦

理等語著照所請。嗣後該地方官公出期內遇有呈報命案。無論三百里內外。如係照磨分防處所。暫由照磨往驗。如係經歷分轄。暫由經歷往驗。統候印官審辦。以重人命。而免耽延。○兵部議覆山東巡撫丁寶楨奏陳擬定陣式。分給各營將官。按月將所轄各汛弁兵合操兩次。暨挑選馬兵七百五十名。立為三營。另選將領分帶操練。並酌加月餉銀一兩二錢。馬乾銀二兩一錢。俾資飽騰。均應如所請辦理。從之。○戊戌祭

大社

大稷。遣惇親王奕諒恭代行禮。○諭內閣卞寶第奏請開缺回籍終養一摺。覽奏情詞懇摯。本宜俯如所請。惟念卞寶第自簡任福建巡撫以來。辦理一切。俱臻妥協。未便遽易生手。卞寶第著無庸開缺。賞假三箇月。回籍迎接伊母赴署。該撫於視事之餘。晨昏侍奉。既無負朝廷委任之意。兼可慰該撫孝養之思。毋

再固請。卞寶第起程後。福建巡撫著英桂兼署。○己亥。遣官祭

文昌帝君廟。○展緩山西太原曲沃定襄三縣歉收地方帶徵錢糧。暨民借倉穀。○命普濟堂功德林煮賑展期兩月。○庚子。

上奉

慈安皇太后

慈禧皇太后。幸漱芳齋。侍午膳。○遣官祭

關帝廟。○諭軍機大臣等。蘇鳳文奏。勦辦遷

江游匪各情形等語。廣西遷江縣所屬巴梧村地方。為匪徒蘇大振等盤踞。經知縣田斯杰等督率兵練。馳往勦捕。殲斃該匪首及夥黨多名。忽有游匪由貴縣交界闖入崇山村。旋經副將潘其泰等擊敗。而貴縣復有土匪嘯聚。宣化縣屬同古屯零等村。與廣東靈山交界處所。亦有匪徒勾結。粵西伏莽未清。亟宜隨時撲滅。著蘇鳳文嚴飭各該地方文武督帶兵團。認真挖剿。務期殄除淨盡。毋留餘

擘並著瑞麟李福泰一體飭屬不分畛域嚴密合勦毋任各匪勾煽以遏亂萌將此由五百里各諭令知之○引見各衙門保送京察一等人員得旨此次京察一等鈐出人員著各該堂官再行出具切實考語交吏部帶領引見鈐出之滿洲蒙古中書筆帖式等官著歸入理事同知通判內遇有缺出與舊記名人員一體帶領引見漢軍漢人著交部以撫民同知通判等官分別選用起居注主事哈

齊香阿大理寺寺丞玉權太常寺寺丞景文泰光祿寺署正承厚侍衛處主事富瑞欽天監夏官正杜春芳大通橋監督刑部主事多謙舊太倉監督理藩院主事麟昌順天府治中喬文蔚內繕書房行走戶部主事慶春上諭處委署主事德芳宗人府委署主事宗室福釗太常寺贊禮郎慶聯花沙布讀祝官哈明阿典簿聶賡墀國子監典簿尚儉助教文郁鴻臚寺鳴贊覺羅寬裕鑾儀衛鳴贊鞭官

海壽欽天監挈壺正約奎俱著交部照例以應升之缺升用其內閣侍讀恩霖等二百七十員俱著准其一等加一級○辛丑遣官祭昭忠祠諭內閣本年輪應查閱江蘇安徽江西山東河南五省營伍之期江蘇著即派馬新貽安徽即派英翰江西即派劉坤一山東即派丁寶楨河南即派李鶴年逐一查閱認真簡校如有訓練不精軍實不齊者即將廢弛之將弁據實參奏毋得視為具文○又

諭前因文碩奏訪聞直隸宣化鎮總兵崔福泰操守未潔與省局委員互揭等情當經諭令曾國藩確查具奏茲據奏稱遵查委員口角互揭一節係候補知縣王霖委署廣平縣篆之時崔福泰留算交代王霖赴任情急措詞失當旋經算清交代赴任其操守不潔一節因七年正月該總兵帶練軍在保定城外與賊接仗遺失軍械等項傳聞以兵丁缺額彌補虧空致啟物議惟與未發車價欠發兵

餉等事。均查無實據等語。崔福泰被參各節。既經訪查。並無確實憑證。卽著無庸置議。署宣化中軍守備王鵬齡。把持營務。招搖放縱。實屬不安本分。王鵬齡著卽革職。永不敘用。以肅營伍。而昭懲戒。○又諭左宗棠奏提督勦賊大勝。中礮陣亡。懇請優卹。予諡建祠一摺。廣東陸路提督劉松山。於正月初十日。督軍進勦甘肅石家莊回匪。攻克該逆新修各寨。斃匪一千數百名。復進攻馬五寨。忽有援賊二千餘名。排列營前。十五日。劉松山會同金運昌迎勦。擊斃馬步悍賊約千名。餘匪竄遁。攻破外卡。各軍一鼓齊登。劉松山策馬督攻。甚急。忽寨中飛子洞中左脅。受傷甚重。卽時陣亡。劉松山由勇丁轉戰湖南等處。十餘省。勦平粵捻。各巨寇。謀勇兼優。無愧名將。此次西征回匪。策馬前行。躬冒鋒鏑。該逆聞風膽落。方冀攻克金積堡。埽蕩而前。肅清邊圉。不料中道陣亡。覽奏曷勝悼惜。劉松山著照

提督陣亡例。從優議卹。加恩予諡。入祀京師昭忠祠。並於陝甘等省立功地方。建立專祠。所部陣亡各員。查明一併附祀。該提督各省戰績。並著宣付史館立傳。其遺櫬回籍時。著沿途地方官妥為照料。以示朝廷軫念忠勤。至意。尋予祭葬。世職。諡忠壯。○又諭左宗棠奏提督劉松山陣亡後。該軍統率需員。查有布政使銜候選道劉錦棠。膽略尚優。軍情翕服。堪以接統。請賞加京銜等語。劉錦棠著賞加三品卿銜。接統劉松山舊部。用資鎮率。○諭軍機大臣等。左宗棠奏請飭定安等速解湘卓兩軍軍食等語。劉松山。金運昌兩軍。軍食缺乏。左宗棠因雷正綰等軍須為接濟。無暇兼顧。著定安。金順。懷遵前旨。代辦糧食。馳隻迅籌接濟。左宗棠所稱金順所部封存之糧。約有若干。如於此項糧石內撥解。更為迅捷。現在該軍正在喫緊之際。斷不可稍分畛域。致有貽誤。金順於撥解後。卽可咨商定安。

籌款購糧陸續運往以備存儲郭寶昌一軍現在晉省防河正當喫重未便前往其吳堡所存糧百數十萬斤著劉典查明派委妥員分起解赴花馬池以資接濟毋許遲誤劉松山陣亡後該處軍情若何金積堡何日可以攻克劉錦棠已賞加三品卿銜接統其軍該大臣務當隨時激勵毋令勁旅頹廢提督黃萬友准其派為幫辦以資得力回逆東竄邊馬已及大荔等處陝省留營甚少左宗棠務

當撥兵迅速援應不得置之不顧陝西日來情形若何能否攔截匪蹤毋使紛竄著劉典隨時據實奏聞並飭各營將弁加緊截勦力埽兇鋒晉省西南河防緊要並著李宗羲檄飭李慶翱勤加偵探毋稍疏虞沿河各邑人心是否安定務當嚴密布置毋涉張惶將此由六百里各諭令知之○又諭英桂卞寶第奏查明臺灣洋案請將主謀構釁之蕭瑞芳等懲辦一摺據稱英國領事吉必勳洋弁咄

當前在臺灣安平地方違約滋事各案經該署道黎兆棠查係廩生許建勳副將蕭瑞芳為之主謀以致洋人藉端生釁現在許建勳冒開洋行私販樟腦日引洋人深入內山蕭瑞芳私造戰船希圖出海請即拘案懲辦等語臺灣為商賈輻湊之地人情浮動今許建勳懷挾私嫌膽敢重賂洋人從中搆煽蕭瑞芳身任武職大員竟至偷見茹嚙煽其開礮占署釀成巨案實屬目無法紀若不從嚴懲

辦何以禁遏內奸蕭瑞芳許建勳均著先行斥革英桂等即密飭黎兆棠迅將該二犯一併嚴拏正法以絕後患惟該犯等與洋人聲息相通而必麒麟因扣留樟腦一案屢唆住京英使向總理各國事務衙門曉諭此事辦理之後該洋人能否不至另生枝節滋擾地方該督等惟當責成黎兆棠妥為辦理將此由五百里各密諭知之○又諭總理各國事務衙門奏俄國擬差員商議邊界事務請飭

妥辦一摺據稱該國東悉畢爾總督欲於本年春閒差員前往齊齊哈爾吉林等處與各該將軍面議邊界事宜恐其藉端要挾請飭該將軍等相機妥辦等語吉林黑龍江等處本無議定通商口岸該國意圖貿易屢次堅求同治五年閒已有輪船駛入松花江上游之事且有在黑龍江夾心灘種地刈草各情覬覦之端不一而足此次復欲派員往議邊界事務其意必堅持前請多所要求如其循

理按約自不妨酌量允行若係違理背約之求定當力為維持嚴行禁阻著富明阿德英體察情形俟該國委員到時務須婉言開導不得稍有遷就至相待之禮不妨示以優容一切相機而行妥善辦理原摺均著鈔給閱看將此由五百里各諭令知之○以故喀爾喀扎薩克貝勒巴彥巴圖爾子堆固爾蘇隆襲爵○以都察院左都御史沈桂芬兼署吏部尚書禮部左侍郎察杭阿兼署工部左侍

郎○以正白旗漢軍副都統銘安署正藍旗漢軍副都統○以記名總兵官周得勝為直隸通永鎮總兵官○以清理積案完竣予直隸知府恩福等加級有差○壬寅諭軍機大臣等劉典奏水陸各軍勦賊獲勝現飭山內各營設法兜勦等語回酋馬正剛股匪圖渡渭河經副將陳瑞齡等擊勦該逆折竄洛西蒲城地界又經總兵張佑宸夏奉朝等沿途追勦斬馘甚多悉向北山竄走其竄入甘泉之匪復由勞山東竄兼之回逆由甘肅靈環下竄者未必非圖擾陝境陝西延榆綏各屬土匪游勇日久蔓延疊經諭令劉典認真撲勦現在回逆竄入更恐勾結為患著劉典嚴飭劉端冕劉聲集張佑宸等實力兜勦迅圖殄滅左宗棠亦當飭令夏奉朝等會合夾擊務將該匪就地殲除毋留餘孽儻令該匪再行肆竄即惟左宗棠劉典是問北山一帶現有匪蹤晉省河防更形喫重著李宗羲懷遵

疊次諭旨。飭令李慶翱。郭寶昌。督飭在防各軍。嚴密堵禦。毋稍疏懈。現在陝西腹地。雖無賊蹤。甘肅進攻金積堡各軍。糧運梗塞。著劉典迅速設法疏通。以濟軍食。將此由五百里各諭令知之。○以記名提督張曜為廣東陸路提督。○癸卯。

孝淑睿皇后忌辰。遣官祭。

昌陵。○甲辰。遣官祭。

先醫之神。○遣官祭黑龍潭。

昭靈沛澤龍王之神。玉泉山。

惠濟慈佑靈濩龍王之神。昆明湖。

安佑普濟沛澤廣生龍王之神。密雲縣白龍潭。

昭靈廣濟普澤龍王之神。○遣官祭圓明園。

惠濟祠。

河神廟。○諭軍機大臣等。劉典奏停止廣東陝捐。並請飭催廣東協餉一摺。據稱陝西在廣東開設捐局。撥充西征軍餉。每年所收捐

項無多。而貴州又在該省辦理黔捐。此招彼徠。辦法尤難一律。請停止陝捐。專儘貴州辦捐。以免膠轕。廣東每月應協陝餉。請飭瑞麟等遵照前奏。按月彙解等語。所奏係為清釐餉項起見。所有陝西設立廣東米捐分局。著即停止。並著劉典將前派之委員撤回貴州。所設捐局。既經曾璧光派令臬司葆亨赴粵開辦。即著該撫檄飭該臬司認真辦理。以濟軍食。至廣東省每月應協陝餉一萬兩。自同治五年起。至八年年底止。已欠銀四十餘萬兩。現在甘回屢擾陝邊。該省防勦各務。仍不能鬆需。餉實形緊急。著瑞麟李福泰查明該省欠解陝餉確數。即飭運司鍾謙鈞守催撥解。並將粵海關四成洋稅銀兩。每月撥濟陝餉銀一萬兩。源源轉解。不得仍前推延。劉典另片奏。請飭湖北軍需局。將督銷淮鹽局解到八年夏秋二季鄂釐五成銀兩。仍解陝省。及八年冬季十月十八日以前鄂釐應撥五

成餉銀截數解陝等語。著李鴻章等劄飭該局查明實在數目分別轉解毋稍耽延。原片著鈔給李鴻章李瀚章郭柏蔭閱看。將此由五百里各諭令知之。○引見京察年至六十五歲以上人員得旨內閣中書慶武戶部筆帖式裕德工部郎中蘇隆阿均著以原品休致。餘著照舊供職。○添鑄吉林五常堡協領佐領各關防圖記。從將軍富明阿請也。○乙巳諭內閣都興阿等奏查勘

陵寢應修工程請旨辦理一摺。

昭陵應修工程經都興阿等擇要勘估著欽天監於本年三四月內選擇吉期先行知照。即派都興阿奕慶敬謹承修。○諭軍機大臣等劉典奏擊敗延榆綏屬境竄回現籌調營會剿暨劉端冕所部剿賊獲勝各摺片回逆馬正和等由金積堡出竄安邊分撲靖邊堡勢甚兇悍成定康會同彭緒所出隊合擊該逆

擁眾環攻復經官兵擊敗賊始東竄西來逆股亦向邱家坪竄去其竄擾米脂東北城門之賊旋經該處民團擊退現在葭州境內及榆林屬之鎮川堡一帶均有回蹤劉典擬調各營會剿著即嚴飭劉厚基攔頭堵截並迅催宋慶抽撥勁旅跟蹤會擊務將此股殲除惟回逆此次竄陝股數既多而自西迄東其勢又甚剽疾陝氛一日不靖則甘事益費周章左宗棠身總師干不得稍存膜視仍著懷遵前旨添撥得力隊伍星馳入陝會同劉典所調各軍併力掃蕩毋任日肆蔓延米脂葭榆各境與晉疆相距非遙該省河防喫重李宗羲亦當遵奉疊次諭旨檄飭李慶翱郭寶昌督率在事將士實力嚴防毋稍疏虞馬正剛一股折走洛川復橫出郿甘交界之道左鋪疊經官兵追擊斃賊甚多回逆馬呼來等句結土匪游勇由宜洛交界之孟家背竄至郃陽又經官兵擊敗分竄韓城澄城等處即

著劉典迅飭傳開德等率隊躡追。一面飛咨馬德昭渡渭夾擊。毋稍遷延。其由清澗境內圖擾腹地之馬正和一股。並著催令李輝武等各率所部相機兜剿。北山一帶。為土匪游勇伏匿之所。此時回匪縱橫。難保不互相煽惑。肆行滋擾。劉典務當振刷精神。督飭在陝諸軍力圖撲滅。不得藉口兵單。致滋延誤。榆林靖邊各邑。逼近邊牆。竄突堪虞。著定安檄飭防軍。於鄂爾多斯各旗境內嚴密堵剿。毋任滋擾。將此由六百里各諭令知之。○予陝西靖邊陣亡總兵官劉求益等十八員祭葬世職加等。○追予湖北武昌殉難道員王東槐謚文直。於山東滕縣原籍建立專祠。眷屬人等一併附祀。○丙午。諭軍機大臣等。定安奏。回蹤分竄。現擬調派勁旅。疏通糧道一摺。昨據劉典奏。榆綏境內均有賊蹤。當經諭令劉典派兵攔擊。並令迅催宋慶抽撥勁旅。跟蹤會剿。茲據定安奏稱。竄陝之賊。分股肆擾。

花馬池至榆林迤西迤南一帶。湘皖各軍糧道隔斷。甯夏郡城以北及平羅縣等處。回騎充斥。石嘴山邊外。賊匪出沒靡常。以致金順張曜兩營軍火糧餉。皆形梗阻。現已飛咨宋慶選派得力將領。簡率精銳四五營。由纏金後套沙金托海一帶。掃蕩而前。疏通糧路等語。所籌尚合機宜。即著督飭宋慶派出各軍。迅速前進。與邊內外馬步諸軍會合剿辦。務將北路竄匪悉數芟鋤。庶糧運可通。金順張曜二營不至掣動。即湘皖各軍亦有饋餉之路。實於全局有益。惟宋慶一軍駐紮神木。籌辦河防。近又派隊馳赴榆林葭州等處。截擊竄回。此次分撥西援。恐該軍轉形單薄。仍著定安斟酌緩急情形。妥為辦理。毋令顧此失彼。如宋慶一軍勢難分撥。即著定安於防軍內酌派前往。俾資得力。邊牆防守緊要。定安務當懷遵昨日諭旨。檄飭各軍。於鄂爾多斯旗境內嚴密堵剿。毋任滋蔓。將此由五百里

諭令知之。○又諭定安奏設法籌備駝隻一摺。甘省回氛未靖。防勦諸軍需用糧餉軍火。必應妥為運解。定安以湘皖各軍將改由邊外轉運。又有宋慶張曜及沿河各隊轉運均須駝隻。非有駝六七千隻不敷支應。歸綏蓄駝既少。雇覓甚難。察哈爾錫林郭勒一盟及四愛曼諸部落均係產駝之區。請飭察哈爾都統勸諭八旗及牧羣軍臺兵弁捐備大駝一二千隻。其錫林郭勒及四愛曼王公台吉等。各勸捐大駝一千隻。並調喀爾喀孳生駝隻一併解赴綏遠等語。邊外轉運利用駝隻。定安所籌實係目前急務。即著文盛諄勸八旗及牧羣軍臺各員弁量捐駝一二十隻。解往綏城。其錫林郭勒一盟及四愛曼諸部落未遭匪警。畜牧蕃庶。或可勸令捐辦。惟近日蒙古不無困累。能否量力捐輸。著福濟榮全錦丕勒多爾濟文盛張廷岳阿爾塔什達各就該處情形酌量辦理。如該王公台吉等好

義急公情殷報效。即著該將軍等奏明查照例案。覈給獎敘以示鼓勵。一俟捐有成數。即行解交定安應用。喀爾喀孳生駝隻近年頗旺。著福濟榮全錦丕勒多爾濟轉飭該扎薩克王公於前項駝隻內調撥大駝一千隻解赴綏遠以濟急需。至山東省每月應解綏遠協餉二萬六千兩先後僅解過五萬兩積欠尚多。著丁寶楨嚴飭藩司務將此項協款源源批解毋再遲延。將此由五百里各諭令知之。○旌表守正捐軀安徽定遠縣民婦范李氏。阜陽縣民婦趙尹氏。○丁未。孝廉章皇后忌辰遣官祭。孝陵。○引見內務府三院等處保送京察一等人員。得旨。此次內務府三院等處京察一等鈐出人員著該堂官再行出具切實考語帶領引見。鈐出之堂筆帖式慶陞文佩文璣存秀世泰文廉廣敏存壽俊啟祥慶增浩武備院委署主事依誠六品庫掌世綱。委署庫掌

廣明筆帖式莊山奉宸苑六品庫掌福英八品苑丞德楞額圓明園委署主事崇福六品庫掌文聯六品苑丞廣連清漪園六品苑丞廣第靜明園六品苑丞平治清漪園七品苑副誠英俱著交吏部記名照例選用所有一等官員筆帖式達他等員俱著准其一等加一級至年已逾歲之武備院備箭固山達春和年力就衰著以原品休致○戊申諭內閣吏部奏調補知府與例不符請旨辦理一摺

浙江温州府知府陳思燭既據英桂等奏稱於福建情形甚為熟悉著即准其調補福建臺灣府知府嗣後不得援以為例所有該督撫應得處分著加恩寬免○諭軍機大臣等李宗義奏官軍防守河西勦賊獲勝並勦捕土匪情形各摺片回逆竄擾陝西米脂葭州綏德等境意在阻截糧道窺伺河干經提督蔣東才督兵馳赴米脂縣東馬家溝等處奮力勦擊大獲勝仗餘匪竄往綏德一帶著李

宗義知照宋慶仍飭蔣東才等確探賊蹤相機追勦所有出力各員弁准由李宗義擇尤酌保河西土匪擾及呼家寨等處經郭寶昌派兵過河搜勦斬獲多名惟宜川所屬之交口等處尚有賊蹤我軍後路亟應防其包抄且交口等處均距晉境不遠該匪既思偷渡河防尤應嚴密著李宗義檄飭在防將弁加意梭巡毋稍疏忽並飭郭寶昌督率將士隨時確探認真防勦將此由五百里諭令知之

○又諭穆圖善奏平番被匪闖入旋即克復派隊駐守及西固城等處被匪攻破後收復撫恤情形並遵旨駐省籌防各等語平番縣被回逆環攻入城經提督張萬美督兵進攻殺斃甚多該逆由北門逃竄其大股賊匪尚踞河西亦經張萬美帶兵擊勦該逆向小沙溝狂奔張萬美又追殺二十里洵屬奮勉可嘉莊浪營兵雖缺額過多而被賊衝下足見接戰不力且賊匪上城該文武臨時始行知

覺其平日玩忽可知。殊堪痛恨。著穆圖善查明。並陣亡殉難紳民兵勇。及杜家堡被陷情形。咨明左宗棠覈辦。該將軍現飭營總正福所帶馬隊。駐紮平番。會同張萬美妥為防堵。惟逆匪東西奔突。官軍不敷分派。亦屬實情。著左宗棠酌量分兵防剿。以期周密。至西固城新城堡。距省甚近。現雖賊蹤遠遁。而防範不可稍懈。著穆圖善卽飭帶兵各員。嚴密防堵。並一面籌給牛力籽種。以安民業。穆圖善

駐守省垣。兵勇尚多。每月需銀十萬兩。卽著左宗棠轉咨袁保恆。按月撥解的鈎十萬兩。交穆圖善支放。毋稍短絀。將此由五百里各諭令知之。○又諭恩麟德泰奏。錄呈廓爾喀國王表文。請議給總噶箕藏格巴都爾王銜一摺。該總噶箕藏格巴都爾。在廓爾喀國內。辦理一切事務。是否可靠。朝廷未及周知。如賞加王銜之後。該處番民是否翕服。日久與中國體制有無窒礙。不至夜郎自大之處。著

恩麟德泰切實查明。據實具奏。不得敷衍目前。致貽後患。所有應給該總噶箕王銜。及頒給敕書各件。均俟該大臣等覆奏到日。再降諭旨。將此由五百里各密諭知之。○又諭恩麟德泰奏。錄呈廓爾喀國王表文。懇請飭議一摺。本日已諭知恩麟等詳查具奏。所有應給該總噶箕藏格巴都爾王銜。著內閣理藩院先行擬定漢字。譯出廓爾喀文字。奏請欽定。並將應行頒給敕書辦齊。俟恩麟等覆奏

到日。再降諭旨。廓爾喀國王表底。及恩麟等給軍機處密咨一件。著發給該衙門閱看。將此各諭令知之。○復引見京察一等鈐出人。員。得旨。除恩霖徐士鑾何金壽邊寶泉解煜鍾泰成光楊鴻吉鍾廉惠祥王守基李常華王兆蘭英廉塔明阿廣蔭曾椿壽錫光穆克登布。薛允升董學履裕昆阿克達春林鳳官清瑞海通玉英王書瑞毋庸記名外。宗室岐元著以四五品京堂補用。宗室嵩溥豫璋著

以五品京堂補用。玉珩啟莊本係專使用道具。著交軍機處記名。仍專以道員用。慶裕。江人鏡。羅嘉福。鍾寶華。張丙炎。王慶祺。趙佑宸。許應驥。林天齡。常興。宜成。邵子彝。鈺坤。承勛。穆特布。成允。李衢。亨。管貽蓼。姚觀元。錫鎮。裕長。左雋。文魯。特克紳布。石峻。豫章。多齡。錫恩。英瑞。顏士璋。惲鴻儀。王袞。愛廉。慶錫。綸。禧麟。徵奎。福裕。景雲。隆光。穆緝。香阿。朱澄。瀾。王師曾。文增。文治。董潤。俱著交軍機處記名。以道府

中書書手

吉

用。文治著記名。以關差道府用。○以光祿寺卿朱學勤為宗人府府丞。○以辦理廓爾喀唐古特禁約事務完竣。賞守備吳國英等花翎。從九品幹玉階等藍翎。餘加銜升敘有差。○旌表守正捐軀河南汲縣民婦胡張氏。○己酉。諭內閣。昨據吏部奏稱。福建臺灣府知府梁元桂。撤回另補遺缺。未奉特旨。揀調。英桂等遽請以陳思燭調補。與例不符。請將該督撫照例議處。當經降旨。仍准以陳思燭調

補。並將該督撫處分。加恩寬免。因思臺灣地方緊要。事務紛繁。歷經降旨。令該督撫於閩浙兩省知府內揀調。英桂等因員缺緊要。未候諭旨。遽請調補。自與舊章不符。嗣後遇有臺灣府缺出。即著該督撫奏明請旨。於閩浙兩省知府內揀員調補。儻一時不得其人。並准於應升人員內。擇其人地相宜者。奏明題補。以重要缺。○諭軍機大臣等。阿拉善親王貢桑珠爾默特。遣台吉以參領尚玉搶奪駝

中書書手

吉

隻。並回逆竄擾出口。請飭統兵大臣嚴防。東甯北竄。赴理藩院呈訴。經該衙門據呈代奏。並將甯夏部員玉敏所報回逆竄擾阿拉善情形具奏。現在官軍進攻金積堡及王家疃莊。正在喫緊之際。該逆仍敢竄出口外。擾及阿拉善旗。綽克圖庫列等處。邊外地方遼闊。深恐東北紛竄。肆行滋擾。著金順隨時防範。毋稍大意。阿拉善旗。自遭回氣。地方被其蹂躪。情形極其憐憫。乃參領尚玉於達拉特地

方遇該親王所買駝隻。駛運軍糧。竟敢嚇以軍威。全行牽去。實屬肆行無忌。擾累地方。著金順查明。嚴行懲辦。並著嚴飭各將領。恪守軍律。遇有該旗駝隻糧食。毋得率意搶奪。致干重咎。原摺著鈔給閱看。將此由五百里諭令知之。旌表守正捐軀直隸多倫廳民婦王張氏。庚戌復引見內務府三院等處京察一等鈐出人員。得旨。除希曾。文治。德生。定昌。常統。毋庸記名外。師曾。慶林。錫祉。英綬。恆延。松瑞。俱著交軍機處記名。辛亥諭軍機大臣等。定安奏。毅軍截勦竄匪獲勝。現籌分路防勦一摺。回逆竄擾陝西米葭等處。經提督蔣東才擊勦獲勝。定安此次奏報。與李宗羲前奏情形大略相同。卽著定安咨會宋慶飭令蔣東才。確探賊蹤。乘勝追勦。毋任紛竄。宋慶現派提督劉廷率所部五營。馳赴包頭。剋日西進。定安因河冰迫泮。凌汛將來。該軍西渡。或尚需時。先令劉景芳帶領馬勇。馳赴

纏金沙金托海一帶。會合烏爾圖那遜探明賊蹤。相機截勦。並飭保英馳赴舍太一帶。扼紮。以為後路援應。兼杜西來竄匪。著卽督飭劉景芳等迅速前進。先通糧路。俟劉廷軍到纏金。劉景芳卽會合進勦。痛掃賊氛。俾運道暢行無阻。榆林以西邊外草地。間有賊匪出沒。並著飭令達爾濟成章聯絡聲勢。合力擊勦。其沿河包薩托清一帶。並飭馬陞等嚴密防範。毋稍疏虞。近日軍情。著該將軍隨時奏報。將此由五百里諭令知之。命宗人府府丞朱學勤仍在軍機章京上行走。

大清穆宗繼天開運受中居正保大定功聖智
誠孝信敏恭寬毅皇帝實錄卷之二百七十六

大清穆宗繼天開運受中居正保大定功聖智
誠孝信敏恭寬毅皇帝實錄卷之二百七十七

敬修

同治九年庚午二月壬子諭內閣協辦大學

士湖廣總督李鴻章著帶兵先赴陝西督辦
該省援勦事宜俟陝西肅清仍卽馳赴貴州
督辦軍務○諭軍機大臣等直隸山東地方
上年冬間得雪甚少開春後雖連次得雪亦
無甚裨於耕種朝廷軫念民依寤寐縈懷現
在節近春分如有乾旱之區未能播種者卽
著曾國藩丁寶楨察看情形將上忙應徵錢
糧奏明酌量暫緩俟秋收豐稔再行補徵以
紓民力將此各諭令知之○又諭現因陝西

回逆紛竄。關中留兵不數分。勦已明降。諭旨令李鴻章先赴陝西督兵勦辦矣。西路回逆分竄秦境。蔓延榆綏。延各屬。該處土匪潰勇。本未芟除淨盡。深恐勾結為患。左宗棠西駐平涼。離陝已遠。而北攻金積堡。南顧秦州。兵力亦屬不敷。況劉松山陣亡。良將漸少。邊外糧運之路。又無兵可以保護。是該大臣支絀情形。深可垂念。雖歷次降旨。令左宗棠派兵赴陝。諒亦因前敵喫緊。無可抽調。李鴻章本令督兵入黔。其月餉早經籌定。而郭松林等軍尚屬不少。且援陝之師。無須大支勁旅。不必與諸將領面商。再行定議。即著就現有之兵。先行統帶入陝。剋日迅速前進。將竄陝各回逆悉數埽除。並著扼要駐紮。與定安。李宗義。劉典所派各軍。聯絡聲勢。加意防範。毋任逆蹤肆意東竄。其北山土匪潰勇。並著派得力之師。次第搜捕。淨絕根株。俾左宗棠得以專心辦理甘肅軍務。不至有跋前疐後之虞。

所有甘肅回匪。即責成左宗棠督勦。務當廣籌方略。將金積堡等處迅圖克復。埽蕩而前。以紓朝廷西顧之憂。左宗棠定安。李宗義。劉典。亦當隨時與李鴻章和衷商酌。益臻周密。金順勦辦王家疃莊。近日能否得手。務與張曜竭力進攻。毋得遷延觀望。甯靈距定邊不遠。亦當與李鴻章隨時關會。免致疏失。李鴻章俟陝境肅清。再行督兵赴黔。以靖邊隅。本日據袁保恆奏。老湘卓勝兩軍。飢疲之餘。所存不過十之五六。請飭歸併等語。該兩軍既多缺額。他營亦所不免。現在餉項短絀。豈可任其冒濫。著左宗棠統飭查明。覈實歸併。以節餉需。將此由六百里各諭令知之。○又諭袁保恆奏軍情緊急。請飭催各省欠餉。以濟急用一摺。據稱甘省回股。回竄陝疆。糧道被梗。亟須籌餉添兵。各省關餉。自上年奉撥之日起。至今年正月底止。欠解舊協新撥。及四成六成洋稅。已五百四十餘萬。請旨飭催籌

解等語。西征各餉。前經諭令各該將軍督撫等按數籌撥。現在回逆東竄。需餉尤殷。豈可稍事延誤。著文煜、馬新貽、瑞麟、英桂、李瀚章、劉坤一、郭柏蔭、丁日昌、英翰、下寶第、李鶴年、丁寶楨、李宗義、劉崐、李福泰、楊昌濬、飭令各該藩司監督查明數目。無論如何為難。迅將新舊欠解之餉。隨同現在按月批解之數。分次找解。崇禮亦當按照該關所欠之數。趕緊籌措。各該將軍督撫監督等。務須設法騰挪。

剋日派員解往。以濟急需。將此由五百里諭知文煜、馬新貽、瑞麟、英桂、李瀚章、劉坤一、郭柏蔭、丁日昌、英翰、下寶第、李鶴年、丁寶楨、李宗義、劉崐、李福泰。並傳諭楊昌濬、崇禮知之。○又諭。前因黔省苗逆未平。命李鴻章督辦貴州軍務。川黔楚各軍。均歸節制。現在甘肅逆回竄擾陝境。左宗棠駐軍平涼。勢難兼顧。本日已明降諭旨。令李鴻章先赴陝西督辦軍務。俟陝西肅清。再行赴黔督辦。李鴻章未

到貴州以前。曾璧光責無旁貸。著即督率地方文武認真防剿。崇實等前奏川軍進剿功在垂成。入春可圖大舉。劉崐前奏席寶田亦已赴營。著崇實、吳棠、劉崐嚴飭川楚各軍。會合黔兵。實力勦辦。該將軍督撫等各宜振刷精神。毋得專待李鴻章到黔。致軍務稍涉鬆懈。將此由六百里各諭令知之。○補鑄乍浦左右二司。左翼協領。鑲黃旗蒙古佐領各關防圖記條記。從杭州將軍連成請也。○補鑄

江西德安縣儒學條記。從巡撫劉坤一請也。○癸酉。

上奉

慈安皇太后

慈禧皇太后幸漱芳齋侍午膳。○遣官祭

文昌帝君廟。○甲寅。諭軍機大臣等。劉典奏回逆分途竄擾。疊勦獲勝。並賊竄北山。各營防剿情形各摺片。回匪馬呼來一股。擾及同官宜君等處。經張佑庭等督隊追剿。該逆由

楊家店向甘境狂奔。另股馬長瀾等由宜川竄偏澄城。復經張佑庭擊退。韓郃地境又有大股賊匪竄擾。劉端冕現已追抵韓城。著劉典卽飭劉端冕、張佑庭等視賊所向。合力夾擊。迅圖撲滅。北路延榆綏一帶賊蹤紛竄。經喻步蓮等督軍追剿。並未大加懲創。劉典因李輝武所部未便調令遠征。現已添募陝勇千人。剋日成軍。著卽添派得力將弁統帶前進。迅速剿辦。此時老湘卓勝兩軍糧運梗阻。回逆益肆猖獗。若不迅籌掃蕩。恐前敵各營軍心不固。大局何堪設想。著左宗棠速將慶環一帶妥籌布置。杜賊紛竄之路。務使運道疏通。官軍無後顧之虞。方可一意進剿。該大臣老於戎行。諒不至漫無籌畫。坐失事機也。安定擊敗之賊竄至延水關。該處逼近河干。雖經晉省防軍會剿。南竄難保不去。而復來著李宗義檄飭防河將弁嚴密堵禦。至韓郃澄各屬沿河地方。漫灘處多。尤應加意防維。

毋稍疏忽。將此由五百里各諭令知之。○予陝西定邊安定陣亡殉難知縣李廷獻、陸均祭葬。世職加等。各建專祠。定邊典史毛福昌祭葬。世職加等。附祀李廷獻專祠。○予陝西涇陽被戕福建知縣喻夢蘭祭葬。世職加等。如陣亡例。○乙卯。以福建南日捕盜出力。予知州潘文鳳等加銜升敘有差。○丙辰。春分朝。日於東郊。遣怡親王載敦恭代行禮。○諭軍機大臣等。前因曾璧光奏黔省兵餉不敷。請飭籌撥實款。當令戶部議奏。茲據奏稱擬自本年三月為始。將四川原協黔餉五萬兩。改為月協銀二萬兩。湖南原協黔餉二萬兩。改為月協銀一萬兩。仍於福建稅釐項下。每月撥銀二萬兩。東海關六成洋稅項下。每月撥銀一萬兩。九江關常稅項下。每月撥銀一萬兩。其廣東省每月應協銀一萬兩。江蘇省每月酌撥銀一二萬兩。或數千兩。仍令照常撥解。

等語。黔省軍務正關緊要。餉需亟宜接濟。卽著馬新貽、英桂、瑞麟、吳棠、李瀚章、丁日昌、劉坤一、劉崑、下寶第、丁寶楨、李福泰。按照該部奏定數目。嚴飭各該司道如期批解。不准稍涉延宕。至四川湖南舊欠協黔餉銀。並著吳棠、劉崑陸續籌解。毋誤要需。將此由五百里各諭令知之。○又諭庫克吉泰奏前在西安辦理軍務欠借駐陝軍需局銀兩。請仍飭山西於河東道應解陝餉項下。劃撥歸款一摺。庫克吉泰前在西安將軍任內。辦理軍務。統帶各營員弁兵勇。一律裁撤。所有動用各款。經該都統分別造冊。埽數咨部覈銷。其不敷銀二萬一千三百兩零。除該都統自將歷年應支項下隨時墊發。共用銀六千三百兩零。業經全數報捐外。尚有欠借駐陝軍需局及各捐局銀一萬五千兩。係暫為那用之款。亟應如數歸結。浙江本有抵撥晉省應解該都統餉銀一萬兩。不日可以解陝。著劉典、袁保

恆。於此項餉銀解到。卽行歸還各局。至欠借項下尚短銀五千兩。既據該都統奏稱無款可籌。亦是實情。著李宗義督飭河東道查照從前應解該都統月餉。於現協西征糧臺項下。劃撥銀五千兩。由駐陝軍需局自行撥抵。以清款目。原摺著鈔給劉典、袁保恆閱看。將此由五百里諭知庫克吉泰、李宗義、劉典。並傳諭袁保恆知之。○又諭前因奎昌奏。歷陳塔城分界實在窒礙情形。當交總理各國事務衙門議奏。茲據奏稱。該大臣所陳六難兩弊。雖非全屬虛詞。而塔城所屬地方。豈可任其淪陷。請飭該大臣恪遵前旨。先行派員前往查勘。並酌擬辦理等語。前派奎昌將塔城分界事宜妥為會辦。嗣因俄人在哈巴爾阿蘇私立鄂博。復經諭令按照圖冊。詳細查勘。有無侵占。若如該大臣此次所奏各情。未免困難。退縮。異時塔城收復。而所屬地方。早被俄人潛行占踞。其患何可勝言。卽著奎昌迅

派明白曉事之員。先行前往查明該國所立牌博。是否與同治三年明誼所定紅綫相符。如其中有被侵占之處。並著繪圖貼說。迅速奏聞。酌覈辦理。不准再涉推延。貽誤大局。原摺著鈔給閱看。將此由五百里諭令知之。○又諭總理各國事務衙門奏。法國使臣藉兵要挾。漸不可長。請飭各省遇有外國案件。持平速結。並請飭地方官於傳教事件。先事防維。列入考成。及請飭江蘇福建迅辦英國未結各案各摺片。上年法國使臣羅淑亞因四川等省教案未結。自行出京。攜帶兵船赴安徽江西等省。不過數月。各案俱結。該使臣現在回京。頗鳴得意。是其輕視中國官吏。已可概見。傳教各案。牽涉民人。卽係地方官分內應辦之事。乃積習相沿。因循推諉。日久不結。致令該國使臣藉兵要挾。此風何可漸長。儻各國聞而效尤。後患伊於何底。且恐奸民乘機簸弄。更形掣肘。而中國官吏辦事泄沓之

風亦足貽誚外洋。著各該將軍督撫通商大臣等嚴飭所屬。遇有中外交涉事件。卽認真查辦。持平迅結。毋得仍前延宕。致外人得以藉口。況現在英國使臣威妥瑪鈔錄上海新聞紙。以羅淑亞催辦各省積案有效為詞。則該國未結各案。豈可聽其遷延。著文煜英桂卞寶第馬新貽。丁日昌將臺灣販運樟腦等案。剋日辦結。毋貽該國使臣口實。嗣後各該省遇有交涉案件。並著各該將軍督撫飭屬勒限完結。以弭後患。至傳教一事。流弊固多。而地方有司。如能先事圖維。經權互用。未嘗不可杜其干預。著各該將軍督撫大臣等密飭地方官。遵照前次總理衙門通行成案。悉心體察。豫為經理。儻能辦理妥協。卽准其與催科撫字一例考成。以冀挽回積習。用弭釁端。原摺片單共四件。均著鈔給閱看。將此由六百里各諭令知之。○以捐墊軍餉。予前任西安將軍熱河都統庫克吉泰優敘。○丁巳

諭軍機大臣等。文煜等奏籌辦運濟京倉米石。請援照成案辦理一摺。本年閩省籌款購米。運赴京倉。據文煜等奏稱。一面派員仍赴上海臺灣等處。一面招商採購。共辦粳米和米十萬石。運津交收。請在閩海關四成洋稅項下。撥銀採辦。並請援案免釐。及派員赴津會收等語。所辦均與成案相符。此次該省赴上海採辦之米石。即著丁日昌轉飭蘇松太道遵照同治七年成案。給照免徵釐稅。查驗放行。其採辦銀兩。著准於閩海關四成洋稅項下。動撥銀十五萬兩。以供採辦。至運通剝價等項。即由文煜等籌交道員吳大廷轉解。該省米船。不日即可抵津。著曾國藩英元畢道達崇厚。剝飭天津道先期豫備。一俟船隻進口。即會同閩省委員隨驗隨運。不准稍涉延誤。將此各諭令知之。○又諭福濟等奏請復烏科二城歲餉定額一摺。據稱烏科二城官兵臺站經費。歲需八萬五千兩。向由晉省

撥銀二十萬兩。陸續轉運。自咸豐五年改為分年撥銀六萬六千餘兩。日久相沿。未能復舊。邊野苦寒。兵丁口糧匱乏。懇復歲餉定額等語。頻年烏科二城軍書絡繹。官兵困苦情形。朝廷實深軫念。著李宗義督飭藩司將庚午年烏科經費八萬五千兩。趕緊如數籌解。其同治二年後遞欠之餉。並著該撫酌量補撥。以資接濟。將此由五百里各諭令知之。○以奉天連雲島捕盜出力。予防禦烏勒熙春

等升敘有差。○予湖南寶慶殉難紳民岳耀南等暨婦女七百九十名口。分別旌卹如例。○戊午。諭軍機大臣等。定安奏嵩武軍勦賊疊勝。金順奏官軍攻拔王家疇附巢賊壘。暨勦辦北路竄逆情形各一摺。王家疇莊踞逆恃有外援。疊於正月十一十七等日。糾黨竄撲。均經金順張曜督隊擊退。其馬步援賊亦經官軍奮力截勦。被創敗逃。辦理甚為奮勉。即著金順會同張曜督率各軍。乘此聲威。步

步進偏。攻拔堅巢。至金順所奏上年十二月間攻克附巢四壘情形。業據定安奏到。大略相同。官軍奮勉爭先。深堪嘉尚。第軍士陣亡至一百二十餘名。受傷至六百餘名。實深廩念。金順等務當於勇往之中。寓慎重之意。庶精銳不至漸耗。沙金托海以西。賊蹤出沒無常。各營軍火糧餉。時形梗阻。定安已飭保英馬隊馳赴舍太一帶駐紮。並由宋慶派撥五營。令劉廷督帶。由哈拉寨啟隊。即著定安飭

令劉景芳一軍。即日西進。會同各軍。將北路竄匪悉數芟鋤。疏通糧路。並督飭馬陞等沿河各隊。嚴加防範。毋稍疏虞。金順另片奏。河南候補道汪景度。歷著戰功。請交部存記等語。汪景度著交軍機處存記。將此由五百里各諭令知之。○予甘肅甯夏陣亡提督楊春祥祭葬。世職加等。諡果壯。於死事地方暨原籍建立專祠。○己未。遣官祭賢良祠。○諭軍機大臣等。蘇廷魁奏請撥庚午年另案工需

銀兩一摺。運河另案工程。自試行河運後。每年撥銀五萬兩。嗣因辦理軍務。撥不足數。半由道廳墊辦。本年江北所運米石加增。該處應行修補之工。較前尤多。亟應如數籌撥。著丁寶楨按照歷年請撥之數。飭令藩司迅速如數撥發。以濟要需。並將同治五年欠撥銀六千一百餘兩。六年欠撥銀二萬餘兩。七年欠撥銀三萬二千八百餘兩。八年欠撥銀二萬二千七百餘兩。陸續撥發。歸還墊款。不得

再有蒂欠。將此諭令知之。○以太僕寺卿劉有銘為太常寺卿。○派兵部尚書鄭敦謹倉場侍郎英元前往天津驗收海運漕糧。戶部左侍郎魁齡前往通州會同倉場侍郎畢道遠辦理驗收事宜。○庚申。諭內閣。前據左宗棠奏廣東陸路提督劉松山進剿甘肅馬五寨回匪。中礮陣亡。當經降旨將該提督優卹。予諡。入祀京師昭忠祠。並於陝西等省立功地方建立專祠。其戰績宣付史館立傳。茲據

曾國藩奏稱該提督宣力最久。忠勇邁倫。並
臚陳咸豐九年以後。未經具奏各事蹟。覽奏
尤深惋惜。所有該提督戰績。著再行宣付史
館。仍於本籍建立專祠。以示表彰。忠烈至意。
○辛酉。諭軍機大臣等。金順奏。回眾被賊變
亂。糾合陝回滋擾。請飭豫軍來甯會剿。並請
飭山西籌撥餉銀軍火。及擊勦踞援各回。獲
勝。河狄逆回北竄。請飭撥黃金山所部糧餉
各摺片。甯郡昌貴各堡降回馬萬選等為馬
化澂誘使復叛。窺伺城防。並圖擾絕糧路。經
金順督率常福等軍抄擊。該逆遁回新渠。現
在甯郡防兵無多。陝甘各回。麇集甯靈。宋慶
一軍。素稱得力。自應移緩就急。以資應援。著
定安。李宗義。咨令該提督親率十數營。兼程
赴甯會剿。其古城。皇甫川一帶。仍著留營駐
守。後套一路。亦關緊要。並著定安。迅飭烏爾
圖。那遜。督率所部馬隊。會同嵩武軍防營。於
磴口至石嘴山一帶。往來梭巡。以杜逆蹤。旁

竄。王瞳回眾。雖屢經金順。張曜督軍擊退。而
黃河西岸各股賊匪。均欲分路援救。河狄賊
目。又率眾北來。已距金積堡不遠。米拉溝逆
回。亦至中衛之西蘆塘地方。是甯靈各軍。內
外均受牽掣。非將甘回截擊。甯境不得肅清。
著左宗棠斟酌情形。迅撥勁軍。將河狄出竄
之賊相機勦洗。毋任挾眾北來。致甯防益形
棘手。其平羅縣城。即著金順檄令王玉山趕
緊前赴實力防守。王家瞳莊。現經官兵圍紮。
該署將軍當會同張曜穩慎進攻。計取堅巢。
毋徒耗傷精銳。甯軍糧餉兩缺。定安即飭歸
綏道無論何款先行籌糧六千石。覓雇駝隻。
交宋慶護帶前往。仍一面催令該提督整隊
西行。毋稍延緩。金順所派副將鄧得勝等在
晉催提糧餉。即著李宗義迅籌銀十萬兩。並
火藥二萬斤。及火繩鉛丸等件。交該委員等
星解回營。以資應用。黃金山所部。現在留防
中衛。待餉甚殷。著袁保恆查明該軍應領餉

項趕緊如數撥交委員陳祥勝承領。派員解甯轉給。不可稍涉推延。致有譁潰之患。將此由六百里諭知左宗棠定安。金順。李宗義。並傳諭袁保恆知之。○又諭金順奏請飭江蘇迅撥礮位等語。甘肅甯夏回寨。經金順督兵進攻。數月未克。亟需銳利火器。江蘇從前鑄造開花礮。最稱得力。著丁日昌迅撥子重七八十磅大開礮五尊。子重三四十磅小開礮五尊。配齊開花子三楞藥。及一切器用。並多配子藥。派員由海道運至天津。交金順所派之員領解赴營。卽由該撫選派善於開放之弁兵十餘名。隨同前往。俾資攻勦。毋稍遲誤。其運費及弁兵口糧。並准該撫作正開銷。將此由六百里諭令知之。○又諭金順奏請飭天津購辦洋槍藥等語。前因金順軍營需用洋槍二千桿。已令崇厚如數購買。現在該軍營攻勦正亟。需用洋藥洋火甚多。著崇厚迅卽購辦洋槍藥一萬磅。大銅帽一百萬粒。一

併交金順派來委員領解回營。以資應用。毋稍延緩。將此諭令知之。○命伊克昭盟長扎薩克貝子巴達爾琿在乾清門行走。○准前任浙江布政使沈兆澧重與鹿鳴宴。賞加頭品頂帶。○壬戌。

孝昭仁皇后忌辰。遣官祭。

景陵。○諭軍機大臣等。都興阿等奏游民滋擾朝鮮。派員查探一摺。朝鮮國碧潼城管小坡兒鎮地方。突有游民前往搶劫。燒毀民房六七十家。聚集至七百餘人。械鬪滋事。該游民由渾江口過江。何以該管員弁毫無覺察。似此玩愒因循。不但啟外邦輕視之心。且恐匪徒紛紛出境肆擾。致肇釁端。尤屬不成事體。奕艾現已就近帶員出邊。著飭令嚴密偵探。務將滋事根由。詳細查明。相機妥辦。不准敷衍了事。協領毓昌旣統馬隊赴孤山附近彈壓。遇有前項游民竄遁。立卽查拏懲辦。以安地方。至古尼音布等本係辦理邊務之員。此

時邊外既有游民生事。自應趕緊出邊。及早經理。著都興阿等迅即催調。毋任遲延。該將軍等仍當隨時認真查辦。以肅邊防。將此由五百里各諭令知之。○以鑲藍旗蒙古都統慶春署鑲白旗蒙古都統。齊齊哈爾副都統寶善頭等侍衛忠德署鑲黃旗蒙古副都統。○以正白旗漢軍副都統安住署右翼前鋒統領。○旌表守正捐軀直隸順義縣民婦吳侯氏。○癸亥諭軍機大臣等。御史李德源奏。

風聞直隸吳橋縣暨甯津東光一帶。匪徒聚眾搶擄。來去無常。吳橋盜風尤甚。竟有匪眾數百人明火持械搶劫近城鋪戶。居民刀傷事主之案。該縣知縣置若罔聞。賊日久無獲。請飭直隸總督查叅等語。盜賊橫行。最為地方之害。必須認真緝捕。方能除暴安良。若如該御史所陳。是地方官捕務廢弛。諱盜不報。實屬不成事體。著曾國藩嚴飭該管道府查明吳橋縣搶案。是否諱匿。賊曾否弋獲。

據實奏。其甯津東光等處匪盜。並著飭屬一體嚴拏。毋任一名漏網。將此諭令知之。○又諭李宗義奏。回逆竄陝。晉省兵勇憑河堵擊一摺。前因賊匪竄至延水關。該處逼近河干。並以韓邵澄各屬沿河地方。漫灘處多。諭令李宗義加意防維。現在賊匪二三千人。由韓城西鄉竄出山口。分擾榆林茶峪等渡口。因晉防嚴密。旋由朝邑退竄同州之莊里村。該處距河仍近。著李宗義懍遵前旨。檄飭防

河將弁嚴密布置。實力梭巡。不可稍涉疏懈。賊匪駭駭南向。有擾及腹地之勢。劉典務當督飭各軍。覘賊所向。認真掃蕩。迅殄逆氛。北路延榆綏等處賊情。奚若。並著劉典嚴飭喻步蓮等軍。迅速剿辦。毋令該逆日肆蔓延。將此由五百里各諭令知之。○乙丑遣官祭歷代帝王廟。○諭軍機大臣等。劉典奏。官軍截勦北山回逆疊勝。並擊敗馬呼來回股。暨遵旨疏通運道。請飭蔣東才移紮甯條梁各

摺片。北山回逆。經劉端冕各軍擊敗後。奔竄大荔華州等境。復經官軍擊退。旋撲高陵。繞由涇河上游西竄。張佑庭等連戰皆捷。該逆敗走武功。李輝武又於乾州武功交界地方敗之。逆眾亂竄。現在劉端冕等分路追擊。陳照臺由盤屋沿河扼剿。即著劉典嚴檄諸軍乘勝前進。與吳士邁所部分投兜擊。以期悉數殲除。北山為匪徒踰伏之區。雖經喻步蓮等追擊獲勝。而山路紛歧。誠恐官軍遠去。土匪游勇。又復勾結滋擾。該署撫仍當督飭喻步蓮等軍實力搜捕。毋令萌蘖潛滋。馬呼來一股。詞知馬長瀾等擾及韓郃。回踞楊家店。經黃超羣等夜擣賊巢。賊敗向石底子竄去。復聚距轉角地方。陳鴻藻等率隊圍攻。殺賊殆盡。並追賊至甘肅正甯縣屬之山河鎮。該逆竄向甯州。勦辦尚屬得手。其馬長瀾等股。此時是否竄擾同境。仍著劉典檄飭在事將士確探賊蹤。合力勦洗。以保腹地。甯條梁為

運道所關。該署撫請將蔣東才五營移紮該處。騰出成定康一軍進駐定邊。自係為疏通糧路起見。惟前據金順奏甯靈軍情緊急。已令定安等咨令宋慶赴甯會剿。並留營駐守皇甫川等處。以固晉防。該軍營數無多。勢難將進駐義合之蔣東才五營遠為移紮。左宗棠現抽張福齊所部六營回陝防剿。即著該督酌量情形。再籌一軍。會同張福齊及靖邊鄜州各營互相聯絡。俾糧運得以暢行。其石灣鎮靖堡甯條梁等處存糧。著劉典即飭成定康等運赴前敵。以資接濟。龍錫慶既令挑選降卒。編立四營。著飭令認真訓練。毋得有名無實。將此由六百里各諭令知之。○又諭前因肅州回匪不時出關擾害。恐成祿帶兵不能得力。諭令左宗棠派員往查。並諭知成祿將存營兵勇嚴加裁汰。聽候諭旨。茲據該提督奏稱存營兵勇裁汰後尚存三千一百名。久經行陣。可期得力。若使長征。實屬不敷。

候旨遵行等語。關外地方遼闊。三千兵勇。原屬不敷分布。僅令成祿另行添募。未必有裨實用。而藉端索糧。擾累地方。恐先在所不免。且所部兵勇。及收撫回眾。亦不能恪守軍律。前據文麟。景廉奏。已諭該大臣派員赴肅州查明。卽著迅速覆奏。毋稍遲誤。關外哈密巴里坤二城。獨力難支。能否派得力之軍先行出關。與文麟等協力駐守。仍著左宗棠恪遵前旨。統籌全局。隨時具奏。成祿應否撤回。

或酌留該大臣軍營。其所部勇丁三千餘名。是否可以留用。抑或遣撤之處。均著左宗棠平心覈議。據實奏聞。將此由六百里諭令知之。○又諭奎昌奏。安插扼魯特人眾。請仍照舊章辦理一摺。前據錫綸奏。扼魯特人眾。不願東徙。業經妥為安插。其後集人眾。方議安插青格里河。而該人眾值放賑之期。不到者五百餘人。查係自行東徙烏里雅蘇台。所餘一千數百人。亦漸次行動。此項人眾。既願東

徙。自不如因勢利導。俾得相安無事。著福濟榮舍。於該人眾到烏後。仍照前奏五處分安章程。迅籌安插。分散約束。毋使滋生事端。以弭後患。至此項人眾。究由何處聚集。科城。何以錫綸前奏。該人眾不願東徙。今又紛紛徙去。並著福濟等查明具奏。其餘未徙人眾。應如何安插之處。卽著奎昌。文碩。妥籌辦理。將此由五百里各諭令知之。○以甘肅克復肅州城出力。予總兵官陶生林。趙德正。以提督

簡放。賞佐領奎光等花翎。守備高忠和等藍翎。餘加銜升敘。開復有差。○以陝西米脂勦辦回逆土匪獲勝。復總兵官劉厚基道員成定康等職。賞同知童兆蓉等花翎。典史遠有望藍翎。餘升敘有差。○丙寅。諭軍機大臣等。左宗棠穆圖善奏。中衛防兵。擊賊獲勝。現飭援勦北路一摺。甘肅中衛縣境。突有回匪五百餘人。由沙坡衝出。攻撲民堡。經總兵黃金山派隊迎擊。賊匪敗遁。復於大板槽地方。擊

敗竄賊防勦尚為出力。惟據擒賊供稱。此次係米拉溝撤回。率眾欲援金積堡。並斷中衛糧運。分股先來探信等語。逆謀詭譎。恐其大股續來。乘虛竄突。亟應嚴密堵截。以遏狂氛。黃金山所部。現因雷正綰軍接仗失利。已帶兩營前往援救。自係先其所急。著穆圖善飭令該總兵迅即督隊疏通北路。將廣武峽口相機攻復。毋令賊匪久踞中衛地關緊要。所有留防各營。尤宜加意防守。以期周密。至雷

正綰接仗敗挫。廣武峽口被賊盤踞。未據左宗棠奏報。現在該處軍情賊勢若何。著該大臣詳細查明具奏。雷正綰兵力較單。該大臣仍當隨時策應。毋稍膜視。將此由五百里各諭令知之。○署浙江巡撫楊昌濬奏履勘三防塘工。業經擇要填築。現仍分飭趕辦。報聞。○補行同治七年大計。陝西卓異官八員。不謹官一員。才力不及官一員。年老官二員。分別議敘處分如例。○以誣揭長官革湖南守

備游占鰲職。遣戍軍臺。

大清穆宗繼天開運受中居正保大定功聖智誠孝信敏恭寬毅皇帝實錄卷之二百七十七

大清穆宗繼天開運受中居正保大定功聖智
誠孝信敏恭寬毅皇帝實錄卷之二百七十八

聖祖皇帝親征回疆時，曾命穆宗親征，穆宗以幼，命其弟醇親王代征。穆宗親征回疆時，曾命穆宗親征，穆宗以幼，命其弟醇親王代征。

聖祖皇帝親征回疆時，曾命穆宗親征，穆宗以幼，命其弟醇親王代征。穆宗親征回疆時，曾命穆宗親征，穆宗以幼，命其弟醇親王代征。

教修

同治九年庚午三月丁卯朔

上詣綏履殿問

慈安皇太后平安室問

慈禧皇太后安至丙申皆如之奉

慈安皇太后

慈禧皇太后幸漱芳齋侍午膳（實授英翰安

徽巡撫（戊辰諭軍機大臣等定安奏毅軍

截剿竄匪獲勝一摺回匪在準噶爾旗雪背

溝地方攻撲炭窯經宋慶所部之總兵馬玉

崑等各率馬步分路進剿斃賊甚多旋追至

清 實 錄 同治九年三月上

鎮羌以西山內官軍各處搜捕敗匪潛竄無

蹤據獲賊供西南草地尚有大股賊匪馬玉

崑等已派弁偵探宋慶並擬率領麻地溝古

城所駐各營前往督剿著定安仍懷遵疊次

諭旨催令宋慶督率所部迅速赴甯會同金

順各軍將甯靈等處竄匪力圖掃蕩並疏通

北路運道如西南草地果有賊股分擾即飭

令馬玉崑等相機兜擊其達爾濟等所帶馬

隊並著定安迅飭該總管等馳往會剿以期

遏賊東趨毋稍鬆勁將此由五百里諭令知

之○以詹事府少詹事紹祺為詹事○以右

春坊右庶子特亮充日講起居注官○己巳

祭

先蠶之神遣總管內務府大臣存誠行禮○

諭內閣李宗義奏查明庸劣各員開單分別

叅劾一摺山西永甯州知州楊篤貪鄙鑽營

嗜好甚重定襄縣知縣崔占鼇庸闇貪婪聲

名狼藉武鄉縣知縣唐思鉉倨傲浮躁不恤

八五一

輿情太原府倉大使穆崢嶸操守不謹。物議沸騰。崢嶸縣教諭候有暕。任性妄為。聲名惡劣。均著革職。永不敘用。署猗氏縣候補知縣王維藩。精力衰頹。難膺民社。平定州州判賀錫祺。年力就衰。難期振作。均著勒令休致。此外如有庸劣之員。仍著隨時詳查。據實參奏。以肅吏治。而儆官邪。○諭軍機大臣等。都興阿等奏續查游民滋擾朝鮮。啟釁原委。並添派官兵拏辦一摺。前因朝鮮國碧潼城管小坡兒鎮地方。突被邊外游民前往搶刦。燒毀民房。各情當經諭令都興阿等將滋事根由。查明妥辦。茲據奏稱。本年正月間。有朝鮮人夫十三名。用牛爬犁十三張。由渾江口過江。割草被該處墾地游民拏獲。匪徒吳思會等將十三人斃命。朝鮮復有人過江。燒毀墾地窩棚。該匪等率領人眾。攻破朝鮮小管平城。焚燒民房二十餘處。擄掠軍器財物。潛回前陽石柱子等處盤踞。又將朝鮮過江人傷斃數

名。現派員前往查辦等語。渾江口一帶地方。多與朝鮮接壤。防範尤應嚴密。今該匪等膽敢過江。焚掠傷斃多人。若不及早拏辦。何以慎固邊防。該將軍等自應遵奉前旨。催令奕艾迅速馳往相機妥辦。並檄飭豐恩等酌帶馬隊官兵。就近出鹵廠邊門各處。曉諭墾地游民。毋任匪徒勾結。吳思會各犯。現在盤聚石柱子等處。都興阿等務飭豐恩等會同奕艾將各犯按名拏獲。盡法懲治。不准稍涉遷延。致該匪等聞風遠逸。復釀釁端。至嗣後如何嚴禁奸民過江滋擾之處。並著該將軍等酌度辦理。都興阿等業經飭令奕艾將派員往查。並現在辦理情形。知會朝鮮義州官吏。即著禮部傳知該國王。申明邦禁。約束近邊人民。嗣後遇有過江滋擾。互相仇殺者。亦須設法懲辦。以期日久相安。毋稍懈怠。將此諭知禮部。並由五百里諭令都興阿。清凱。麟書。恩錫知之。○又諭李宗義奏請將硫磺例價。

暫免扣減三成等語。晉省陽曲縣之王封陽城縣之東冶地方向有礦廠。自咸豐八年扣減三成。所發例價不敷工本。礦戶日形賠累。自係實情。所有該省硫磺例價。著照該撫所請。自同治九年春季為始。准其暫免扣減三成。俟陝甘軍務肅清。再行照舊扣減。硫磺為軍中利用之物。既經免扣三成。體恤商困。尤應嚴禁私販。以肅功令。著李宗義督飭該管官加意稽查。嚴防偷漏。毋任接濟匪徒。是為

至要。將此諭令知之。○又諭。曾璧光奏運售鉛斤濟用。請免釐稅等語。黔省辦理軍務。及舉行鄉試。籌款維艱。現在提撥鉛斤運赴各省。售銀濟用。著馬新貽。李瀚章。丁日昌。劉坤一。郭柏蔭。查明遇有黔省運售鉛斤經過關卡。均著免納釐稅。並飭各關卡毋得阻滯留難。俾資濟用。將此各諭令知之。○以禮部尚書萬青藜兼署兵部尚書。○追予安徽鳳臺陣亡守備馮鼎甲祭葬世職加等。○命普濟

堂功德林。責賑展期兩月。○庚午。諭內閣。巡視五城給事中慶承等奏。宗室覺羅人等如在外城滋事被獲。請照舊例辦理。及宗室覺羅婦女如有具控案件。必須抱告。無庸自行赴案等語。著宗人府及問刑各衙門申明定例。遇有宗室覺羅人等犯事到官。遵照舊例辦理。宗室覺羅婦女呈訴冤抑。須有抱告。不准自行出名具控。以符定制。○以大理寺卿興恩為都察院左副都御史。○命五城責賑

展期兩月。○辛未。清明節。

上詣

奉先殿

壽皇殿行禮。○遣官祭

永陵。

福陵。

昭陵。

昭西陵。

孝陵。

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵○遣官祭

端慧皇太子園寢○以上默特革退扎薩克
貝勒散巴勒諾爾贊弟頭等塔布囊哈斯塔
瑪噶襲授扎薩克○壬申以前任陝西巡撫
喬松年為倉場侍郎○癸酉諭軍機大臣等
劉典奏官兵追剿竄回疊勝陝省現無回蹤
並馬正剛一股殲除殆盡及剿擊北山回土
各匪獲勝各摺片回首馬長瀾等股勾結游
勇由北山竄入內地官軍追剿情形業經劉

典先後馳奏茲據奏稱劉端冕各軍在韓城
等處擊賊獲勝賊由臨渭一帶搶渡渭河均
經水師擊敗高陵之賊經魏紀鑒等率隊敗
之張佑庭李輝武諸軍又於醴泉武功各境
追賊疊勝該逆渡涇之後分路潛逃附入游
勇亦已悉數衝散其奔竄甘境者僅數百人
劉典現飭在陝各營於陝甘毗連處所嚴密
設防馬正剛一股亦經劉端冕等追殺殆盡
據逃出難民供稱馬正剛已被槍斃各等語
此次回匪紛竄陝疆圖絕甘軍糧道劉典督
飭諸軍追剿疊獲勝捷該省已無賊蹤剿辦
尚屬得手刻下金積堡賊巢甘軍圍攻正緊
其折竄甘境各匪難保不勾煽餘黨復謀東
犯牽掣進剿諸軍左宗棠當督飭在甘將士
將金積堡相機攻取並檄飭派出援陝之軍
將折回餘匪攔頭截擊務絕根株近日甯靈
一帶軍情若何著隨時據實具奏以慰廑繫
劉典亦當嚴飭各處駐營力加防範不准稍

涉疏虞。馬正剛是否搶斃。仍著確切查明。此起零匪。究係逃竄何處。並著飭令在防將弁。隨時偵探。以期挖捕無遺。清澗等處。踞匪既經總兵田玉廣等殲除淨盡。而定邊西境及花馬池一帶。復有回蹤。並由安邊竄來逃勇一二百名。在蔣家寨一帶盤踞。甯條梁附近之呂家寨。亦有逃勇一二百名。是榆綏一帶防務尚未可鬆。著劉典卽飭成定康等加意防維。毋稍鬆勁。惟陝省前次肅清之後。凡地

方騷擾。半係土匪游勇勾結回逆。此次安邊等處逃勇。究由何營散出。其從前管帶。究係何人。若任其紛紛肆擾。後患何可勝言。著左宗棠劉典。分飭各路帶兵官。弁設法擒拏。並查明該管營官從嚴參辦。一面將各處游勇妥籌安插。分別遣散。以靖地方。將此由五百里各諭令知之。○又諭李鴻章奏遵旨赴陝援剿。酌籌派撥一摺。據稱西北地形平曠。回騎飄忽。非馬隊無以制勝。已令郭松林派員

趕募馬步隊共十五營。周盛傳趕募馬隊四營。並由鄂入陝餉項軍火。遣員沿途察勘。設局接運。所籌均屬周妥。著卽趕緊辦理。以資援剿。本日據劉典奏陝軍追剿內竄回匪及附入游勇捕斬殆盡。餘匪折竄甘境各情。已諭知左宗棠等分別籌辦矣。惟陝西留兵無多。甘回股數甚眾。雖據劉典奏稱該省現無賊蹤。而竄回餘匪。難保不復行勾結。東犯陝疆。且據奏花馬池定邊甯條梁附近一帶尚

有匪蹤。亟應趕緊堵剿。李鴻章著仍俟李瀚章抵鄂。及郭松林等募練就緒時。卽行督軍入陝。妥籌剿辦。至摺內所稱西安軍需局探報陝匪有竄鄂之說。湘營潰勇陸續東來。該督已令譚仁芳撥出兩營。往紮河南浙川之荊子關要隘。以扼商南竄路。並分隊聯紮河口樊城。以固邊防。卽著檄飭該提督督令在防將士實力嚴防。毋令匪蹤闖入。豫省距陝非遙。尤須早為堵禦。著李鶴年迅撥勁旅。會

同鄂省所派各軍聯絡聲勢以遏寇氛其潼關一路並著飭令馬德昭悉心防守毋涉疏虞將此由五百里各諭令知之○又諭李鴻章奏請飭山西籌備軍糧等語李鴻章入陝勦賊自應多備軍食以資飽騰晉省濱河各處購糧尚易著李宗義督飭藩司迅籌墊款遴員馳赴吉州蒲州一帶分投採辦米麥各二萬石擇地存儲以備該督由潼關進兵入北山時就近運取毋稍延誤儻一時辦不及數准於沿河州縣存倉穀石借撥應用並著李宗義先期籌備務令足額即咨報李鴻章聽候隨時撥用以濟要需將此由五百里諭令知之○又諭李鴻章奏請飭綏遠城將軍購辦駝隻等語李鴻章現在督軍入陝解運軍糧等項極關緊要著定安即派妥員就近採購臚壯駝隻二千匹照料進口俟該督入關後派員迎提務須認真挑選不得稍有遲誤此項駝隻價銀並即知照該督籌給以清

款項將此由五百里諭令知之○以陝西省城辦理巡防出力賞布政使翁同爵道員趙新花翎免道員高壽屬境失守處分並賞還頂翎○以陝西韓城等處截勦回匪獲勝予提督李輝武等優敘賞總兵官鄧有勝參將魏紀馨巴圖魯名號餘加銜升敘有差子陣亡副將吳賢華都司李金喜千總李求致把總畢宗永等祭葬世職加等○予陝西清澗陣亡副將康華亭千總劉秀逢外委胡登科祭葬世職○追予浙江各屬陣亡殉難從九品田恤等紳民婦女一百三十七員名口分別旌卹如例○甲戌諭內閣志和庫克吉泰奏審明滋事箭丁及辦理不善旗員分別懲辦並妥議章程開單呈覽一摺此案土默特旗八枝箭箭丁癘子常明等因該旗科派太重輒以該箭丁不應歸土默特旗管轄聚眾呈控又復立會斂錢抗不比丁並有毆傷旗員霸搶地租情事實屬罪無可逭癘子常明

德爾沁扎布。丹珠爾均著發往南五省驛站充當苦差。哈哈策老希幅呢鷹幅受聽從霸地毆差。亦有應得之罪。著發交山東河南驛站充當苦差。均由理藩院定地發配。到配嚴加管束。該箭丁等事犯雖在咸豐十一年十月恩赦以前。惟始終怙惡不悛。且係積年滋事之犯。均著不准援減。嗣後遇有恩赦。亦毋庸查辦。以示懲儆。未獲之那木薩賴扎布。色齋奈丹扎布。阿噶齊瑪哈薩都瓦等著該地

方該旗並知照鄰境一體嚴拏務獲。一俟拏獲卽照癘子常明等罪名。分別定地發遣。管旗章京阿昌阿。花尚阿等。因公科派錢文。雖非侵吞入己。究屬不能體恤。署印協理松威。丹忠疲玩糊塗。辦理旗務。難期振作。均著卽行斥革。土默特扎薩克貝子索特那木色登襲職在後。著寬免失察處分。一俟該旗諸事妥協卽由該都統給咨回京。毋得在旗逗遛。嗣後該旗事務著卓索圖盟長熱河都統隨

時認真整頓。有犯必懲。以靖地方。志和等所擬章程八條。甚為明晰。所有八枝箭箭丁。仍著歸土默特旗管束。並著理藩院將乾隆四十六年奏定章程。詳細纂入則例。其管旗章京副章京。著卽仍遵舊例。由理藩院補放。所稱變通比丁章程。申明交納丁錢舊章。及箭丁子女。不准妄行役使。隨侍陪嫁。覈減差派。加重越訴罪名。嚴拏訟棍。各條均著照所議辦理。卽著庫克吉泰將所奉諭旨。並新定條

款刊刻曉諭。俾有遵循。另片奏此次比丁。係一時權宜。未能盡歸舊制等語。嗣後如尚有應行變通之處。著熱河都統酌量情形。相機受辦。又諭志和庫克吉泰奏請將查辦案件及捕匪出力各員開單獎勵等語。此次八枝箭滋事。箭丁經志和等派員前往查辦。次第將案中要犯捕獲。其餘箭丁均已安撫。辦理尚為妥速。在事出力各員。自應量予獎勵。所有單開之郎中伊勒通阿。著賞給三品頂

帶並賞換花翎刑部候補主事孫恩慶著俟補缺後以本部員外郎儘先升用並賞加四品銜員外郎吳潮著賞給三品頂帶郎中鄂雲布著賞給隨帶加三級佐領全吉著賞加協領銜巡檢余道生軍功章釗均著賞加五品銜向來查辦案件從無保奏人員此次因拏獲要犯姑允所請嗣後隨帶司員審辦尋常案件不得援以為例○追予湖北各屬陣亡殉難監生吳必均等紳民婦女一千三百二十六名口分別旌卹如例○旌表守正捐軀湖南安化縣民婦梁譚氏○亥祭先農之神遣睿親王德長行禮○丙子追予江蘇各屬陣亡殉難候選州同陸斌等紳民婦女一千七百二員名口分別旌卹如例○追予安徽全椒等處陣亡殉難從九品銜程元發等紳民婦女一千六百十八員名口分別旌卹如例○丁丑

孝賢純皇后忌辰遣官祭

裕陵諭軍機大臣等福濟等奏赴烏厄魯特人眾俟查明辦理等語前據奎昌等奏此項人眾五百餘人自行東徙何以距二十餘日之久尚無到烏音耗究竟逗遛何處其餘一千餘人是否亦向東徙著奎昌文碩確切查明該人眾下落咨會福濟等辦理其未徙人眾仍應妥籌安插並著福濟榮全於該人眾到烏時仍照前奏分安章程分散約束毋任流離失所致生事端將此由五百里各諭令知之○追予江蘇各屬陣亡殉難候選知縣余恩宣等紳民婦女一千七百九十一員名口分別旌卹如例○戊寅諭軍機大臣等定安奏毅軍暫緩西移暨截剿雪背溝餘匪獲勝李宗義奏毅軍暫緩北進金順奏王家疃回眾乞撫湘卓兩營軍糧難籌接濟各摺片前因甯夏軍情緊急諭令定安等飭令宋慶赴甯會剿原係移緩就急之計茲據定安李宗義奏雪背溝等處時有賊股紛竄宋慶一

軍亟須分投堵剿。甯郡道路較前疏通。劉廷等軍可敷剿辦。現在榆北喫緊。毅軍勢難驟離等語。所奏自係實在情形。是宋慶一軍目下未便移動。即著定安、李宗義知會該提督。仍在神木一帶督飭所部截擊竄匪。以資得力。定安、金順即督令劉廷會合劉景芳、烏爾圖那遜等軍沿邊進剿。迅掃逆氛。毋稍鬆勁。王家疇賊匪現在畏剿乞撫。金順復勒定限期。令其清繳馬械糧石。並將悍酋等縛獻。始准就撫。若能恪遵約束。即著金順設法羈縻。騰出兵力肅清北路。惟仍須認真防範。毋為該逆所紿。後路竄匪業經官軍疊次擊敗。金順現檄常福帶隊前往磴口等處搜剿。並令汪德才、紮平羅、苗正興等紮洪廣。又商令張曜撥營扼紮黃渠橋等處。布置尚為周妥。仍著該副都統會同張曜隨時相機籌辦。金順前曾撥借劉松山、金運昌、雷正綰等軍糧石。尚能不分畛域。此時甯郡既難採辦轉運。又

難暢行。自顧維艱。實無餘力接濟。湘卓兩營軍食據奏各情。尚非推諉。所有湘卓兩軍糧食著左宗棠趕緊設法另籌接濟。毋令缺乏。雪背溝逃竄餘匪經毅軍截擊獲勝。尚為出力。其波羅等處股匪著定安仍飭蔣東才盡力探剿。免致蔓延。孤山鎮羌等處密邇河干。李宗義當飭河防將弁認真堵剿。毋任竄越。進攻金積堡諸軍聞有退駐吳忠堡之說。左宗棠月餘未有奏報。殊深廛繫。現在前敵軍情若何。賊勢若何。著該大臣據實詳細具奏。將此由六百里各諭令知之。○又諭金順奏現在轉運軍食亟需駝隻。毗連後套之喀爾喀為產駝之區。請飭籌備駝隻以資轉運等語。著理藩院飭令毗連後套之喀爾喀各盟籌備駝三千隻配帶鞍繩。派員就近送赴達拉忒旗金順糧局以資轉運。所有應給腳價即由金順照章按數發給。將此諭令知之。○以準噶爾旗地方截剿回匪獲勝。賞總兵官

胡保林提督銜遊擊劉知儉以參將用並加副將銜都司黃義之已圖魯名號○旌表守正捐軀湖南長沙縣民婦謝彭氏○已卯署陝西巡撫劉典奏陝省軍餉仍用實銀勻發不敷之數註冊候餉裕補給一律停止搭票以昭覈實下部知之○辛巳

上奉

慈安皇太后

慈禧皇太后幸漱芳齋侍午膳○諭內閣劉典

奏已革陝西藍屋縣知縣何梅樺前經奏參革職現復查明該革員前在山東蒲臺縣典史任內曾經山東巡撫因案奏參革職該革員造齋履歷竟未聲敘且查加捐與革職年分先後互異請飭將志章提案嚴訊並飭部查明該革員如何捐復加捐等語該革員經劉典以貪污各節奏參革職嚴訊卽著將志章督司嚴行審訊按律懲辦其從前如何捐復加捐難保無隱匿過名情弊並著該部查

明咨覆陝西以憑覈辦尋邵亨豫奏接准吏部來咨何梅樺因案革職加倍捐復屬實該革員在藍屋縣任內於丁役抽釐舞弊既以風聞不能查出實屬昏庸業經革職應請永不敘用從之○諭軍機大臣等左宗棠奏湘皖兩軍疊勝現籌布置情形並賊踞峽口請將失事各員懲處及查明定邊安定前次失陷情形各摺片金積堡踞逆經劉錦棠等軍擊敗後乘間抄掠河西運道復經金運昌會

同湘軍夾擊殺賊甚多二月初二日以後劉錦棠等在馬家灘板橋等處追剿馬步各賊疊獲勝仗該逆欲引馬連渠水以困官軍劉錦棠等分道並進賊向金積東門敗走各軍平卡而還現在劉錦棠等以吳忠堡至下橋一帶為形勢所必爭移兵屯紮以為扼要地步著左宗棠卽飭劉錦棠等將金積外援力圖遏截以期拔取堅巢峽口地方緊要雷正綰築壘既遲又不派隊填紮以致為賊所踞

實屬咎無可辭。雷正綰著革職留任。周蘭亭、張福齊率軍先退。亦難辭咎。均著撤銷勇號。拔去花翎。並革職暫留軍營差遣。該處為秦漢兩渠上游。必須趕緊奪回。方能制賊。雷正綰現紮何家堡。周蘭亭現紮四百戶。尚屬進兵要路。左宗棠務飭該提督等整理營伍。設法進攻。毋任該逆久踞。如該兩軍再有遷延貽誤。並著嚴叅懲辦。至前次定邊安定為賊襲踞。暨據查明金運昌暨簡敬臨、張福齊等軍前進各節。尚屬有因。卽著暫行無庸置議。儻再有貽誤重情。卽著從嚴叅辦。嗣後各軍進止。務當嚴飭帶隊官恪遵將令。毋得貪功銳進。致誤事機。曾傳理在營是否得力。並著隨時查看。毋稍遷就。該大臣現擬由靖遠造船配礮。乘河流盛漲。駛攻峽口。所籌甚是。著卽分檄各路將士次第規取。制賊死命。陝甘毗連處所。時有回蹤。游勇亦復滋擾。劉典仍當懍遵疊次諭旨。嚴飭在防各營。會同甘軍

相機堵擊。不可稍涉大意。將此由六百里各諭令知之。○又諭前因袁保恆奏老湘勝兩軍多有缺額。當經諭令左宗棠查覈歸併。茲據左宗棠奏稱老湘營因疊次增募。溢額頗多。除分撥各營外。尚有餘勇待補缺額。袁保恆所稱飢疲之餘。現存不過十之五六。不知何指。至該學士原奏以歸併節省之餉。作續調兵勇之用。欲調何軍。未與咨商。現據英翰咨錄袁保恆召募原文。並據潼商道稟稱有豫軍銳營入關。後起亦將續至。是否卽係袁保恆所調皖豫舊部。尚未可知。此時陝境已無回氛。新軍無可位置。擬卽調赴平涼安插。其已募未到各軍。卽請截止各等語。兵事與餉事相為表裏。袁保恆此次召募各軍。何以不與左宗棠等往復籌商。輒行咨調。實屬冒昧。所有到陝新軍。卽著左宗棠調往平涼編立成營。或分補各營缺額。藉資調遣。其已募未到之淮皖各軍。並著張之萬、英翰一體

截留就地撤遣如已行至豫境卽著李鶴年派員截止咨明該省督撫妥籌遣散左宗棠又稱袁保恆前奏一出設江皖督撫將應解甘軍之餉藉口遲延湘軍或因糧盡飢潰則大局可慮等語甘軍本有撥定之款江皖督撫斷不敢因袁保恆此奏藉口遷延卽李鴻章赴陝等軍亦卽以籌定入黔之餉利濟師行左宗棠正無庸總總慮也至金運昌雷正綰周蘭亭各軍既有缺額卽著左宗棠認真查覈歸併以節餉需陝省應否添軍募勇之處著李鴻章到陝後酌量情形奏明辦理袁保恆不得再行輕率從事將此由六百里諭知左宗棠李鴻章張之萬英翰李鶴年並傳諭袁保恆知之○以甘肅預望城等處截剿回匪獲勝予提督周紹濂優敘賞總兵官李良穆巴圖魯名號餘升敘開復有差○以陝西清澗等處殲除土匪賞參將陳國珍二品封典總兵官田玉廣巴圖魯名號守備王

承陞花翎餘加銜升敘有差○予甘肅金積堡陣亡提督周和美等十五員祭葬世職○予甘肅峽口陣亡總兵官韋占雄祭葬世職加等 予甘肅隆德陣亡知縣蔣於祭葬世職加等

大清穆宗繼天開運受中居正保大定功聖智誠孝信敏恭寬毅皇帝實錄卷之二百七十八

[illegible]

同治九年庚午三月壬午諭軍機大臣等恩

麟德泰奏藏餉久缺請飭籌撥一摺據稱四川每年額解西藏餉銀六萬餘兩自上年以來僅據該省解到銀一萬五千兩又吳棠派糧員糜鴻銓等帶解銀一萬兩尚未抵藏卽以此項併計一年之中亦僅收川省撥解銀二萬五千兩其歷年欠解之三十三萬餘兩分毫未解現在餉項支絀請飭迅速籌撥等語著吳棠無論何款先行籌撥銀十餘萬兩解交恩麟等收納應用以濟急需其歷年積

久之餉並著源源籌解不得再有蒂欠將此由四百里各諭令知之○癸未諭軍機大臣等李宗義秦毅軍擊賊獲勝現飭追勦一摺雪背溝孟家灣等處敗匪竄至木河溝迤西經馬王崑設法兜擊宋慶復親率隊伍馳抵哈拉寨該匪分由扎薩克旗竄至新廟地方我軍躡及賊蹤奮勇勦擊斃賊甚多敗逆分向東北正北逃竄宋慶現飭馬王崑蔣東才分路兜擊卽著定安李宗義知會宋慶飭令馬王崑等確探賊蹤乘勢追勦務將此股敗匪悉數殲除沿河托清河保等處並著定安李宗義檄飭在防將弁嚴密堵禦陝北榆綏延所屬附近河干一帶無土匪潰勇聚擾情事李宗義務當勤加偵探毋稍大意將此由四百里各諭令知之○又諭穆圖善奏布置省防請飭左宗棠籌防東南疏通運道一摺回匪紛竄陝疆甘省北路官軍攻勦情形疊經左宗棠詳悉陳奏現在陝境之賊雖已

敗竄回甘後路情形稍鬆而金積堡逆回勢仍猖獗零星股匪四出滋擾運道時虞梗阻甘軍糧餉軍火全賴西征糧臺源源接濟乃袁保恆報解正二兩月米折等銀月餘尚無抵甘信息似此轉輸遲滯誠恐兵食缺乏飢潰堪虞刻下甘省東南兩路有無阻隔左宗棠務當分撥各營妥籌布置以顧餉道並飭令西征糧臺將甘軍餉需按月籌解毋稍遲誤蘭州附近之北山阿干鎮等處時有匪蹤

竄擾著穆圖善飭令馬步各營分路雕剿嚴加防範金積堡逃匪勾結河州等處回匪肆擾西甯碾伯等境穆圖善已令總兵王仁和酌撥三營馳赴碾伯著卽飭令迅速前進相機堵剿左宗棠亦當妥籌兼顧毋任賊蹤紛竄益肆蔓延將此由五百里各諭令知之○以甘肅攻克新路坡等處賊巢出力賞驍騎校全福烏勒吉布彥圖伊勒果色圖魯名號遊擊謝炳春等花翎把總羅應魁等藍翎餘

加銜升敘有差○甲申以河南省城神靈顯應加

關帝封號曰翊贊○諭軍機大臣等瑞麟李福泰奏派兵勦辦黎匪殲擒首要各犯一摺崖州黎匪劉振欣等因外委洪雲章派貲修理土城膽敢糾集多人將洪雲章戕斃復突入內地焚劫村莊都司吳成龍等帶兵彈壓該匪並勾結各路黎匪圍攻土城吳成龍黎桂香先後戰歿經瑞麟等檄飭署總兵劉成元督同地方文武前往勦辦劉振欣等在大田一帶踞險抗拒官軍進抵大田疊破賊柵生擒首匪多名劉振欣由嶺背竄逸副將王伯熊等追至五指山下河邊將首犯劉振欣擒獲現在東西兩路各村黎人俱已投誠劉振欣等均經訊明正法在事員弁兵勇尚屬奮勉出力著瑞麟等擇尤酌保毋許冒濫儋崖陵水各州縣所屬黎匪獷悍性成平日每易滋事此次劉振欣等糾眾戕官則由於營

弁之科派啟釁實屬不成事體嗣後該府所屬文武瑞麟等務須隨時遴選循良安民戢暴遇有貪劣不職之員卽行叅劾並嚴飭該管道府力加整頓毋任文恬武嬉致滋隱患刻下投誠各路黎人仍著劉飭地方官妥為撫綏俾安生業在逃餘匪並飭認真搜捕以絕根株所有各屬藉公科派等弊卽著出示勒石永遠禁止用杜弊端將此各諭令知之○以前任科布多幫辦大臣明瑤署鑲紅旗

蒙古副都統○予廣東崖州陣亡千總吳成龍抱總黎桂香外委陳瓊林等祭葬世職○乙酉諭內閣順天府奏遵拏要犯赴京投首一摺此案已革甲兵信廷卽張允和既經自行投首卽著順天府將該犯解交盛京將軍衙門歸案審訊○諭軍機大臣等豫師奏西甯撫局難恃請酌募兵勇扼要駐防一摺據稱西甯回族名雖就撫而實則四出焚掠相率為常兼以狄河等處黨眾勾結陝回時有

圍攻碾伯縣城之事前任辦事大臣玉通困守西甯無餉無兵勢同拘偻若不酌帶兵勇前往鎮撫必至仍蹈覆轍等語自係實在情形著照豫師所請卽就平番等處募勇五營先紮碾伯及威遠堡一帶整團修堡以禦外匪一面疏通道路前赴西甯至西甯城內撫事雖由豫師責成道員郭襄之照舊辦理然究係權宜之計豫師仍當酌度情形一俟辦有端倪卽赴新任以資鈐制平番等處回類甚多豫師新募勇丁務當選擇精審毋令奸匪涸跡其中致有疏失至應需月餉著戶部於各省協甘餉內每月指撥銀二萬數千兩總歸西征糧臺催提轉解仍在各省積欠項下劃扣卽著袁保恆遵照辦理惟指撥需時誠恐緩不濟急並著左宗棠先行借發銀三四萬兩俾得趕緊招募成軍以保西路大局西甯回族與金積堡聲勢相連現在金積堡既難剋期竣事左宗棠兵力勢恐不能兼顧

蘭垣省城防守事宜。穆圖善當妥籌鎮撫。以爲西甯聲援。毋稍疏懈。將此由五百里諭知左宗棠。穆圖善豫師。並傳諭袁保恆知之。○丁亥。諭軍機大臣等。定安奏張曜宋慶兩軍勦賊情形。李宗羲奏殺軍勦賊獲勝各摺片。定安所奏嵩武軍擊賊於黃渠橋等處。及蔣東才在新廟地方擊退竄匪各情。與金順李宗義前奏大略相同。平羅一帶竄匪疊經金順會同張曜擊退。王家疇莊回匪畏勦乞撫。現在曾否呈繳馬匹器械。並將悍酋王得等縛獻。該逆反覆無常。往往藉乞撫爲緩兵之計。金順當懾遵前旨。認真防範。不可稍涉大意。其後路竄匪仍當會同張曜督飭派出各軍隨時截勦。以杜勾結。劉廷劉景芳所帶各隊已由纏金西進。著定安飭令探明賊蹤。相機兜擊。與甯夏一帶官軍聯絡聲勢。肅清糧路。宋慶一軍於擊退新廟竄匪後。復在石板廟高莊等處疊次擊賊。獲勝擒斬甚多。餘眾

悉向西奔。據獲賊供稱。賊目石姓及胡得海兩股先後由金積堡出竄。眾各三千人。後面仍有陸續竄出等語。該逆因糧食缺乏。紛紛東竄。雖經官軍疊次斬截。人數恐尚不少。著定安李宗羲知會宋慶。仍飭馬玉崑等乘勝追勦。務將竄出之匪悉數埽蕩。毋任滋蔓。劉厚基前經會合蔣東才擊賊於土孟三道河等處。著劉典飭令該總兵隨時與宋慶一軍互相策應。遇賊卽擊。毋任此勦彼竄。其麻地溝防軍並著李宗羲飭令實力堵勦。毋稍疏懈。將此由五百里各諭令知之。○又諭。前因李鴻章奏督師入陝解運軍糧需用駝隻二千匹。當經諭令定安就近採買。茲據奏稱。綏城駝隻現在缺乏。請於察哈爾錫林郭勒報捐駝隻內就近調撥等語。察哈爾錫林郭勒距內地較近。著文盛將此項駝隻於秋後卽行派員解交李鴻章軍營應用。如所捐不足二千之數。著定安設法購買補足。或於四愛

曼等處捐駝內量為添撥並著斟酌辦理刻
下李鴻章西行該營軍糧等項刻不容緩萬
不可專恃駝載著李鴻章斟酌情形或由內
地設法運解以利軍行將此由四百里各諭
令知之○又諭劉嶽昭岑毓英奏攻克麗江
等城及馬街等處賊巢會商激江新興軍情
各摺片中路官軍克復彌渡賓川及紅巖馬
街各賊巢北路官軍攻克麗江劍川南路一
軍並將緬甯廳城收復此次各營將弁疊克
城池勦辦極為得手在事出力文武員弁著
劉嶽昭等查明彙案保奏新復之賓川彌渡
偏近大理尚有鎮南姚州雲南縣三城未下
著該督撫激勵將弁乘勝進攻迅圖克復惟
官軍深入尤宜穩紮穩進不可稍涉疏虞其
永昌等處之賊並著督飭各軍分路進剿以
期次第廓清劉嶽昭岑毓英親赴中關察看
地勢會籌進攻之策即著將激江府城迅速
攻克掃蕩逆氛劉嶽昭回省後所有省城布

置機宜並著妥為籌辦另片奏請將湖南協
餉二萬兩作為馬如龍專餉等語已諭令劉
崐熙辦仍著劉嶽昭等咨會馬如龍將勇營
人數及每月收支餉銀數目隨時咨明該督
等查覈報部馬如龍既有專餉即著責令該
提督將新興等處軍務認真辦理迅拔堅城
近日馬如龍打仗情形並著該督撫詳細奏
聞將此由六百里各諭令知之尋奏馬如龍
自辦軍務以來奮勇當先疊次與賊對壘從
無避就報聞○又諭劉嶽昭岑毓英奏請飭
催各省協餉並撥給馬如龍專餉各摺片滇
省官軍勦辦回逆疊克麗江等城軍務日有
起色現在岑毓英前往激江督勦提督馬如
龍進剿新興兩路如能得手事機尤為順利
惟餉項支絀四川湖北湖南江西浙江等省
應解協滇餉銀報解無幾軍士枵腹荷戈殊
堪軫念著吳棠李瀚章郭柏蔭劉崐熙劉坤一
楊昌濬各將該省撥定協滇月餉照數批解

不得遲延推諉至湖南省每月協滇餉銀二萬兩現據劉嶽昭等奏將此項全數撥作馬如龍專餉卽由該提督派員往領著劉崐卽飭藩司在釐金捐輸項下或無論何款按月湊撥銀二萬兩交馬如龍委員領解回滇毋稍蒂欠將此由五百里諭知吳棠李瀚章郭柏蔭劉崐劉坤一並傳諭楊昌濬知之○予雲南永北陣亡副將黃文學祭葬世職加等並賞其母從一品封典○予雲南蒙化陣亡遊擊牟永昌都司王鍾祥縣丞奎譜千總王克鞏把總韓洪春等祭葬世職加等○戊子
上奉
慈安皇太后
慈禧皇太后幸宣壽宮侍午膳○賜王以下文武大臣蒙古王貝勒貝子額駙等食○乙丑
萬壽節遣官祭
太廟後殿○遣官祭
福陵

昭陵
昭西陵
孝陵
孝東陵
景陵
泰陵
泰東陵
裕陵
昌陵
昌西陵
慕陵
慕東陵
定陵○遣官祭
顯佑宮
東嶽廟
城隍廟○
上詣
大高殿

壽皇殿行禮○詣綏履殿

慈安皇太后前行禮平安室

慈禧皇太后前行禮○御乾清宮王以下文武

大臣蒙古王貝勒貝子額駙等行慶賀禮眾

官於午門外行禮○奉

慈安皇太后

慈禧皇太后幸寧壽宮侍午膳○賜王以下文

武大臣蒙古王貝勒貝子額駙等食○庚寅

上奉

慈安皇太后

慈禧皇太后幸漱芳齋侍午膳○辛卯諭軍機

大臣等蔣志章奏回匪分擾岐鳳現飭各軍

合擊並另股復竄北山各摺片回箇崔三等

率黨由隴州分股竄入縣頭鎮偏近鳳翔擾

及岐山寶雞縣境經總兵李輝武副將邵永

齡合力夾擊大挫兇鋒另股由清水太陽寺

竄至鳳縣之方石鋪賊蹤飄忽亟須就地殲

除方免滋蔓該撫現飭張福齊督營前往岐

鳳兼顧乾醴留吳士邁所部由汧陽回顧鳳

翔會同李輝武各營合力勦辦陳照臺由藍

屋前進防賊搶渡渭河布置尚為周密著卽

分飭該員等認真防勦迅掃逆氛漢南一路

仍著責成李輝武妥為兼顧北山伏莽甚多

該處地廣兵單難資捍禦刻下定靖等處復

有回蹤尤易延擾腹地卽著嚴飭劉厚基等

督率防軍力籌堵勦迅將前竄股匪盡數廓

清毋任勾結潛藏致貽後患陝省毗連甘境

密邇寇氛必須先將本境竄匪掃除自固藩

籬方能扼守門戶該撫務當就現有兵力相

機籌辦以副委任將此由五百里諭令知之

○又諭前據李鴻章奏擬令郭松林周盛傳

添募馬步各隊並籌議兵餉轉運事宜剋日

起程赴陝此時籌辦一切諒已就緒本日據

蔣志章奏回匪崔三等率黨數千人從隴州

竄偏鳳翔岐山寶雞境內均有賊蹤另股回

匪由清水擾及鳳縣境內北路回匪復竄至

定靖交界安邊堡一帶是陝省情形甚為喫緊該省兵力本單蔣志章甫經抵任於軍務調度機宜未經閱歷必須李鴻章趕緊入陝方可籌商一切相機辦理該督務當剋日起程前往毋稍延緩現在回匪既竄近鳳翔屬邑轉瞬之間卽恐蔓延北路定靖等處如無得力之軍扼勦賊蹤亦易擾及腹地儻李鴻章一時未能啟行或於郭松林等員內酌派勁旅一支先行馳赴陝省探明匪蹤會合秦軍迎頭截勦以期保衛陝疆該督仍迅速部署隨後繼進妥籌勦辦用紓朝廷西顧之憂將此由五百里諭令知之○又諭金順泰協餉無著請飭迅籌撥解一摺據稱山西奉撥月協餉銀二萬兩現准李宗義函稱每年增此鉅款恐難設措現在軍情緊急懇仍飭山西按月照數撥解惟該省協濟各軍餉需為數甚多請准於應解京餉內由李宗義截留十二萬兩等語金順軍營需餉甚殷山西增

撥此款力有未逮均係實在情形卽著照所請山西本年應解京餉准李宗義暫行截留十二萬兩以資周轉所有金順軍營協餉卽著李宗義按月撥解銀二萬兩不得稍有短欠儻該營因餉項缺乏貽誤戎機惟李宗義是問此項截留銀兩俟該省庫款稍充再行設法補解部庫以清款目將此由四百里各諭令知之○以禮部右侍郎桂清兼署戶部左侍郎管三庫事○以正紅旗漢軍副都統希元署正白旗滿洲副都統○癸巳諭軍機大臣等定安奏殺軍勦匪疊勝及賊近河干派隊分勦並達爾濟擊賊獲勝各摺片所稱殺軍將東才馬玉崑在石板廟高莊擊賊獲勝情形與李宗義前奏大略相同仍著定安李宗義懍遵二十一日諭旨知會宋慶卽飭馬玉崑乘勝追勦將胡得海各股竄匪悉數殲除並飭將東才由神木探勦而前以遏後股東竄其分擾準噶爾等旗賊匪是否卽將

東才等擊敗之賊。至達爾濟擊賊之占旦召
地方。距包頭僅八十餘里。該處逼近河干。設
被逆蹤突竄。勢將四出蔓延。前據定安奏。劉
景芳一隊。已由包頭起程。卽著飭令該總兵
探蹤迎擊。一面檄飭達爾濟等相機堵剿。一
面催令成章等隊。迅赴河西。以資援應。李宗
義亦當分飭各路防軍。遇賊卽擊。毋任乘隙
旁竄。仍會同定安嚴檄馬陞。國英等。各飭所
屬文武。隨時偵探。實力巡防。不可稍涉大意。
其達爾濟接仗獲勝詳細情形。著定安查明
具奏。並著咨令宋慶。迅飭馬玉崑。與達爾濟
等會合兜擊。力殄寇氛。將此由五百里各諭
令知之。○予貴州沙子哨被戕知縣吳汝謹
祭葬。世職加等。○予貴州各屬陣亡殉難訓
導趙登林等紳民婦女四百六十三員名口
分別旌卹如例。○甲午諭軍機大臣等。英桂。
卞寶第奏。擬派員募勇。馳赴陝甘助剿一摺。
英桂等因聞甘省回匪分股繞竄陝境軍情。

喫緊。擬派總兵劉明燈。楊芳桂。馳赴鄂省。各
募楚勇兩營。前往陝西。聽候左宗棠調遣。以
資攻剿。所籌固為力顧大局起見。惟疊據左
宗棠奏稱。西征軍餉頗形支絀。若遽令劉明
燈等募勇入陝。恐有兵多餉缺之累。劉明燈
等向來帶兵。既尚得力。著英桂等卽飭令馳
赴甘肅軍營。聽候左宗棠差遣。其應否派令
添募勇丁。或酌撥隊伍。令其統帶勦賊之處。
均著左宗棠酌度辦理。將此由四百里各諭
令知之。○又諭李鶴年奏。宜陽刀匪聚眾拒
捕。現添派隊伍兜拏一摺。本年二月間。宜陽
刀匪張野貓等在黑山頂等處聚眾搶掠。並
傷害弁兵。亟須派隊嚴拏。著李鶴年督飭總
兵楊長春等分路兜拏。務令悉數擒獲。以絕
根株。該匪張野貓等。於上年十月間藏匿宜
陽境內。經該撫飭令河陝汝道廣隆。河南府
知府陳肇鏞等會營訪拏。乃當時未能弋獲。
此次又未能先事豫防。實屬咎有應得。廣隆。

陳肇鏞均著摘去頂帶宜陽縣知縣恆倫著革職暫行留任以觀後效如再不知愧奮卽著從嚴叅辦將此諭令知之○又諭文麟等奏東山纏頭回子滋事現籌辦理等語東山纏頭回子上年聚眾滋事據該回王福晉聲稱實因暴素克一人啟釁現經章京王素普等將該匪擊斃其餘回眾懇請免究該回首犯既經擊斃餘眾自應設法撫馭著文麟景廉體察情形妥為安撫毋任別啟釁端如或再行滋事卽當從嚴懲辦魏忠義所署塔爾納沁都司一缺現既改委徐天秩代理卽著飭令魏忠義將應辦營務及屯田事宜認真辦理以專責成將此由四百里各諭令知之○

上以孟夏時享

太廟自是日始齋戒三日○乙未諭內閣楊昌濬奏知縣被戕並連斃家屬現獲兇犯提省審辦一摺據稱本年二月三十日民人龐押

新突入岷縣署內將署知縣嚴思忠並其女及妾嚴王氏砍傷先後身死僕婦王氏李氏亦被砍傷經該縣典史李承湛將兇犯拿獲提訊語言顛狂有類瘋狀等語覽奏實堪詫異所稱瘋病情形殊難憑信著楊昌濬卽將該犯提省嚴審因何起意戕害有無別項弊端及挾仇主使之人務須切實根究從嚴懲辦以彰國法○諭軍機大臣等左宗棠蔣志章奏疊勦竄陝回逆獲勝各營迎擊跟追一摺崔三等匪股竄鳳翔後圖踞陳村經李輝武等軍疊次擊敗該逆分為兩股其東竄一股由醴泉高陵竄至渭南河北各渡編茶木筏搶越渭南復經防軍擊退該逆雖屢受懲創而自西而東擾及腹地亟應速加勦辦著左宗棠蔣志章督飭派出各軍務將此股就地殲除毋令四出紛竄其西北敗逸一股現在竄往何處該督撫卽嚴檄將弁覘賊所向躡蹤追勦迅埽逆氛渭北以下渡口甚多並

著咨會李鶴年迅調馬德昭李承先統帶數營扼紮同州二華等處與劉端冕等軍聯絡聲援相機進剿北路安邊堡一帶回匪近日勦辦如何著左宗棠等分投勦洗毋令聯成一氣益肆蔓延將此由五百里各諭令知之○又諭傳諭署浙江巡撫楊昌濬前因李瀚章奏請於浙省籌濟李鴻章援黔月餉銀二萬兩當經降旨允准茲據楊昌濬奏稱浙省庫藏支絀難以湊撥請於洋稅項下按月抽撥銀五千兩協濟援陝軍餉等語現在援黔之師改為援陝需餉緊要即著照所請暫於浙海關洋稅項下月撥銀五千兩仍於省城各庫每月籌措銀一萬五千兩按月協濟李鴻章軍營毋稍遲誤惟此項洋稅銀兩係因李鴻章需餉緊要暫准動用嗣後仍著該署撫另行籌款湊解一俟籌有款項即著毋庸動用○又諭何璟奏請飭撥補製軍械銀兩並請飭部撥銀採買紙張各摺片巴城補製

軍械銀兩前經諭令於新疆軍餉內先撥銀二萬兩由何璟迎提茲據奏稱僅由烏城領到銀四千兩其餘一萬六千兩久未領到該城防務緊要製造軍械需款甚急著定安於解到新疆軍餉內先行提出銀一萬六千兩交委員高鳳靈解回巴城應用毋稍遲誤何璟所需採買紙張等項銀兩著照所請由戶部發給銀五百兩交高鳳靈承領俾資採辦將此諭知定安並傳諭何璟知之○又諭總

理各國事務衙門奏貴州遵義教案請飭迅結一摺黔省遵義教案前經李鴻章派令道員余思樞前往籌辦迄今尚無端倪該使臣羅淑亞以李鴻章改赴陝西恐貴州教案又復延閣屢次催請迅結自應妥速辦竣以弭釁端李鴻章係原派查辦大臣現雖未能入黔此案仍須該督一手經理著即飭令道員余思樞會同黔省派出各員迅將應行查辦事件認真查覈但能折服其心自不至仍前

狡執該使臣羅淑孚亦有不令教士任意婪索之語並因新使臣蘭盟將到亟望此案速結乘此機會易於轉圜若再遷延又恐別生枝節一切籌辦機宜該督即可密飭余思樞妥為辦理至此案雖由李鴻章派員往辦曾璧光係該省大吏豈得置身事外著即嚴督派出各員悉心會辦逐層確查覈實持平以自立於不敗之地毋任教士肆意索賄轉授該使臣以口實原摺均著鈔給閱看將此由

五百里各諭令知之○以刑部右侍郎達慶兼署鑲白旗蒙古副都統○以通政使司副使程祖誥為光祿寺卿○追予四川各屬陣亡外委趙永標等三千九百七十八員名賞卹如例○丙申

上以孟夏時享

太廟前期親詣行禮○諭內閣李鴻章奏江蘇釐捐充餉請加廣該省文武鄉試中額一摺江蘇辦理釐捐協濟各省軍餉自同治四年

閏五月起至七年六月底止計撥解過勦捻軍需銀七百五十餘萬兩該省商民踴躍輸將集成鉅款俾勦捻各軍得以迅速成功實屬急公好義著照該督所請加廣江蘇省文武鄉試永遠中額各八名以示鼓勵嗣後他省不得援以為例現在軍務未平各路征兵口糧需款尚鉅仍藉該省釐金接濟以資飽騰著馬新貽丁日昌督飭司道等隨時設法整頓照舊竭力籌解毋誤要需○諭軍機大

臣等李鴻章奏起程赴陝日期一摺李鴻章督軍入陝後路籌餉轉運各事宜已與李瀚章等辦有端緒擬於本月二十四日起程由水路前赴襄陽登陸西進並飭郭松林周盛傳各統現有步隊先赴樊城周家口等處整頓行裝惟郭松林等所募馬隊尚未據報成軍著即檄飭該提督等俟馬隊募齊就近歸併操練即行分起入關以資援勦昨據左宗棠蔣志章奏崔三等匪股竄鳳翔後圖踞陳

杓經李輝武等軍擊敗該逆分為兩股其東
竄一股由醴泉高陵至渭南河北各渡編紮
木筏搶越渭南其西北敗逸一股未知竄往
何處已令該督撫嚴檄將弁躡蹤追剿又安
邊堡一帶時有回蹤出沒榆綏延各屬土匪
潰勇乘機思逞者不少李鴻章入關後應於
何處擇要駐紮及分派各軍會同左宗棠等
所撥之軍如何截剿情形並自定邊迄鳳寶
各邑道路縣長在在與甘境毗連應如何分
兵扼堵俾回逆不敢回竄以固左宗棠各軍
後路之處著悉心統籌先行詳細奏聞以紓
廑盼將此由五百里諭令知之

大清穆宗繼天開運受中居正保大定功聖智
誠孝信敏恭寬毅皇帝實錄卷之二百七十九

大清穆宗繼天開運受中居正保大定功聖智
誠孝信敏恭寬毅皇帝實錄卷之二百八十

奏

同治九年庚午夏四月丁酉朔享

太廟遣鄭親王永志恭代行禮○

上詣綬履殿問

慈安皇太后安平安室問

慈禧皇太后安至乙丑皆如之○奉

慈安皇太后

慈禧皇太后幸漱芳齋侍午膳○旌表守正捐

軀浙江淳安縣民婦胡方氏○戊戌諭內閣

前因鄭敦謹奏副將穆騰額等所帶兵丁滋

事各節當經降旨將穆騰額等先行革職提

審茲據李宗義查明覆奏此案穆騰額等雖
無縱兵騷擾地方重情惟不能約束兵丁將
車折價口角爭鬧甚至滋事傷官漫無覺察
實屬咎無可辭候補副將穆騰額原叅革職
處分著准其開復降為都司歸部銓選候補
都司楊先登雲騎尉世職守備鄭富耀業經
革職均無庸議○諭軍機大臣等忠誠奏傳
派大婚典禮應用各項緞匹等件工程緊要
請籌撥銀兩一摺據稱辦理難辦各緞添設
機張需用工匠種種需費較鉅至緞氈地繡
毯等件所需工料現亦一律招工備辦惟需
款甚急請飭速撥銀兩等語著馬新貽先將
各款緞匹需用工料銀十二萬兩如數撥交
該織造以備工需其繡緞各件先儘五萬六
千兩撥解織辦至紗地簾幔以及裝盛箱隻
護解川費等款即著緩至明春再行裁解該
織造於此項銀兩收到後仍須覈實籌節迅
速辦理不得稍涉虛糜將此諭知馬新貽並

傳諭忠誠知之○以直隸山東河南勦平捻逆全股出力賞提督丁長春劉維楨總兵官黃國珍王萬釗余在榜何立香張九林楊鎮南正一品封典提督衛汝貴劉安泰賈起勝宋遠和李榮陞劉鳳翔總兵官曹萬元唐立業蔡金章王道生左振紹夏長林唐仁元方國淮曹德慶吳兆有劉鳳山朱雨珍周光貴邱得福戴得勝魏廣有時維新范萬有戴華貴周九齡周吉祥黃春源陳世雄姚玉華彭

星垣劉發祥黎耀廷陳嘉泰江成祥李正和何元啟夏定泰譚克順道員姚有志段結周世臣副將劉文魁張邦才周會松史宏祖陳維熊王先珍劉秉忠江左輔鄭才感閃殿魁李安堂龔錦標蘭福喜黃鴻宣劉瑞卿顏有貴楊永清鄧萬洪楊光龍嚴震寰劉朝聘夏開和陳志雲陽德前沙成祥李昌俊楊定發黃榮華黃作立黃松庭陳雨松劉萬魁陳星炳郭有餘曹廣順趙聚銘張輔清賀縉紳王

金亮胡春林熊宗有易恆富左世柏郭友勝錢玉興吳建昭向慕榮黃瑾王霞明李登瀛東長泰劉玉堂彭山岷湯保成朱學貴唐保臣趙孟周劉得勝劉長春參將楊開泰秦成亮吳可玉劉幹清姚得珊周家泰杜萬青袁連魁周鳳鳴黃德余琪胡國恆張家斌姚良才丁達生劉盛祥尤福聚梁玉和龔尚春朱永發易元泰袁連陞李亮成王忠信張宗保劉國志劉朝貴朱士盛遊擊黃宏基趙玉田

王尚明李大有程映山黃步廷都司李學孔朱鳴安劉朝虎孫春浩巴圖魯名號提督周壽昌道員丁中和等花翎都司吳國桓等藍翎餘加銜升敘有差○已亥諭內閣麟書奏請將在署揪毆司員分別革職解任交部訊辦一摺盛京戶部農田司員外郎恩慶因承審張成與武謙控爭地畝一案正在司堂提集兩造研訊管莊六品官紹德在旁突向藉端尋釁肆鬧公堂將恩慶揪毆致傷復向委

六品官玉和惡言肆詈該員等稟訴情形又復各執一詞且紹德稟內牽涉各款有屬託謀缺情事亟應徹底根究以期水落石出管莊六品官紹德著先行革職員外郎恩慶委六品官玉和著一併解任交都興阿會同盛京刑部研訊確情按律定擬具奏○諭軍機大臣等前諭理藩院轉飭阿拉善親王籌辦駱駝二千隻送交甯夏以資轉運茲據理藩院奏准該親王報稱該旗屢被賊擾駝隻已屬無多且因避賊驅牧遠方日增倒斃更形缺乏現在各營委員到處拏括駝隻旗民極形苦累懇請免解等語阿拉善旗駝隻短缺自難強令籌辦該委員等何得任意搜索貽累旗民著金順確查派出委員如有擾累地方者卽行撤回所有前令該親王籌辦駱駝二千隻卽著自行酌量報解又據該親王報稱提督金運昌委員鄧瑞品在該旗採買糧石拷打市民縱勇搶掠糧草駝隻旗民驚慌

等情似此任性妄為實屬不成事體著左宗棠飭令金運昌將該委員撤回查明如有騷擾各情嚴行懲辦甯夏官軍及湘軍需用糧石暨轉運事宜應如何另行籌畫之處著左宗棠金順分飭委員酌量情形設法辦理仍著該大臣等行知該旗量力籌辦顧全大局總期有裨軍食無害地方方為妥善將此由五百里各諭令知之○又諭文盛奏軍臺被賊竄擾調兵防剿並拏獲被脅人犯供悉賊情各摺片察哈爾額固德巴雅爾登庫克額爾濟地方均有馬賊數百竄入肆行焚掠旋即向北逃竄察哈爾係完善之區豈可任賊蹂躪文盛現已咨明定安調回蒙古馬隊五百名由達爾濟管帶赴軍臺大路擇要駐紮探蹤進剿卽著定安迅飭該總管卽統前項馬隊折回聽候文盛調遣文盛當先行督飭八旗及軍臺兵弁加意巡防毋令匪蹤再行竄竄杜嘎爾前已有旨令回本任現在如已

病痊卽著帶兵前往將此股賊匪盡數剿滅以靖地方定安接文盛來咨卽能籌畫餉乾器械撥隊赴援尚屬不分畛域以後達爾濟所帶官兵需用餉項准文盛於軍需項下撙節動用察哈爾地方遼闊東與直隸張獨多三廳接壤張家口尤為緊要之區著曾國藩飭令地方文武認真巡緝毋稍大意山西之豐甯歸化三廳亦與察哈爾相接並著定安李宗義一體防範賊匪既由北竄並有庫倫

豐富可去搶奪之說張廷岳阿爾塔什達務當隨時偵探儻有賊蹤竄近卽行就地撲滅毋留餘孽據拏獲被脅民人王六娃子所供是賊股係由甘肅甘州竄出沿邊北竄滋擾蒙古遊牧賊數雖不甚多而行蹤飄忽亟須及早殲除免致勾結滋蔓王六娃子既非甘心從逆卽著文盛按站解回原籍管束又據福濟等奏扎薩克阿畢爾米特旗突有大股賊匪焚掠招廟等語該旗南接歸綏著定安

飭屬嚴密堵扼毋任匪徒涸入將此由五百里各諭令知之○又諭福濟榮全奏蒙旗被賊滋擾現籌防守等語據稱扎薩克阿畢爾米特旗下突有大股賊匪焚掠招廟欲取孳生官廠圖擾各遊牧地方該處為新疆往來通衢臺站設有梗阻關係非輕福濟等已由鄰境各旗調兵接應著卽飭令迅速派撥蒙兵會合進剿務將此股及早撲滅以免蔓延並飭令該扎薩克聯絡各旗力籌戰守不可

輕率遷移致賊匪益無顧忌本日復據文盛奏三月初間察哈爾軍臺庫克額爾濟地方突有馬賊數百人竄擾據拏獲被脅民人供稱此股係屬回民由甘州草地沿邊北竄欲往庫倫等語近來甘肅回匪因大兵進剿分黨由草地北竄股數不一阿畢爾米特旗之匪究由何處竄來是否亦係回民人數約有若干著福濟等查明具奏邊外地勢遼闊匪蹤往來無定福濟等務當飭屬勤加偵探妥

籌防範母稍大意將此由四百里各諭令知之○又諭都興阿等奏拏獲滋擾朝鮮匪犯正法並飭按捕餘匪一摺匪徒楊炯汰等滋擾朝鮮地界經都興阿等派員將匪首楊炯汰拏獲正法並將已斃之劉克明等二犯戮屍現在按拏餘匪即著都興阿清凱麟書恩錫飭令豐恩等督率兵弁務將在逃要匪按名嚴拏盡法懲治不准一名漏網此次該匪等越境滋事訊因朝鮮民人過江在先並著都興阿等將啟釁根由咨會該國查明辦理嗣後兩國邊境務須會同巡緝毋令莠民滋事擾害地方古尼音布等現已出邊即飭令該員等相度情形趕緊籌辦毋稍遲緩將此各諭令知之○予直隸肅甯等處陣亡殉難文生張對隆等紳民婦女三千五百六名口分別旌卹如例○庚子諭軍機大臣等定安奏馬隊擊賊連獲勝仗情形一摺回匪被殺軍擊敗後竄入蒙古草地復與另股烏合肆

行東犯經達爾濟督率馬隊迎頭截擊連戰皆捷所有此次打仗出力各員准其擇尤彙保以示鼓勵昨據文盛奏察哈爾軍臺被賊竄擾已咨調達爾濟管帶馬隊五百名擇要駐紮探蹤進剿現在達爾濟受傷既不甚重即著定安一面飭令趕緊調治仍懍遵前旨迅飭該總管帶隊折回聽候文盛調遣賊氛既距包頭甚近該將軍當檄飭在防文武嚴密堵禦達爾濟回察哈爾後應以何營填紮並著妥籌布置毋稍疏虞將由五百里里諭令知之○補行引見京察人員得旨內閣侍讀學士恩靈楊書香均著照舊供職○補行引見京察年至六十五歲以上人員得旨禮部郎中富慶著照舊供職欽天監五官正貴康著以原品休致○以翰林院侍講吳元炳充日講起居注官侍讀黃鈺署日講起居注官○予陝西榆林等處陣亡都司志善等祭葬世職加等○辛丑諭軍機大臣等張廷岳

等奏請調官兵勦捕竄匪及籌畫餉需各摺片。前據文盛奏軍臺被賊竄擾當經諭令張廷岳等隨時防勦。茲據張廷岳等奏稱內地勦敗餘匪由扎薩克阿畢爾米特遊牧竄入圖謝圖汗部落到處滋擾復在賽因諾顏部落肆行焚搶蒙古人眾聞警逃散並探另有大股匪徒圖犯庫倫亟應迅速撲滅毋令蔓延。張廷岳等已飭東兩部落盟長調兵攻勦並咨烏里雅蘇台將軍轉飭賽因諾顏部落派兵夾擊第兵力尚嫌單薄恐不足以壯聲威所有駐紮卡倫之蒙兵一千五百名著准其暫行檄調交兩部落盟長和貝等管帶前往西南一帶會合各旗官兵協力圍勦庫倫向無城郭蒙古性情柔弱戰守均難深恃非有得力援兵恐一時未能奏效定安務當酌撥兵勇前往會勦以期早日蕆事並查明匪擾處所距綏遠道路若干迅速奏聞至庫倫防守緊要張廷岳應否馳赴前敵督兵勦賊

之處卽著該大臣酌度情形妥籌辦理此次調撥兩盟官兵需用軍火餉糈極為緊要著戶部卽籌撥部庫銀十萬兩交順天府派員解赴察哈爾交文盛如數收明迅速撥銀五萬兩派員解赴庫倫一面知照張廷岳等派員迎提毋稍遲誤庫倫如有不敷再行陸續提撥察哈爾派兵勦賊需餉亦殷准其於現存五萬兩內撙節撥用至此項部款未到以前卽照張廷岳等所請暫令兩盟設法籌畫先應急需該蒙古各旗情形困苦豈可以暫墊之款作為捐輸致滋擾累著張廷岳等於領到部款後卽行照數給還文盛於達爾濟到後卽飭前往勦洗杜嘎爾帶兵素稱得力病體計已全愈並傳知該副都統揀派將弁迅往督勦肅清臺站前據福濟等奏扎薩克阿畢爾米特旗突有大股賊匪竄擾已派旗兵會擊現在勦辦已否得手是否卽張廷岳等所奏圖犯庫倫股匪著福濟榮全查明具

奏仍遵前旨。受籌防勦。並著轉飭。賽因諾顏。部落。迅派蒙兵。將該旗界內。竄匪會同。東二盟。派出官兵。合力夾擊。以絕根株。將此。由六百里。各諭令知之。○壬寅。以京畿雨澤愆期。上詣。

大高殿祈禱行禮。○遣惇親王奕詝詣。

時應宮。孚郡王奕誨詣。

宣仁廟。惠郡王奕詳詣。

凝和廟。鎮國公奕謨詣。

昭顯廟拈香。○諭內閣。都興阿等代奏。丁憂尚書因病請假一摺。文祥著賞假兩箇月。並賞給人參五兩。安心調理。○補鑄福建大田縣桃源巡檢印信。從巡撫卞寶第請也。○

上以常雩祀。

天於。

圓丘。自是日始齋戒三日。○癸卯。諭軍機大臣等。李鶴年奏。辦理刀匪完竣。並請將出力員弁獎勵各摺片。宜陽刀匪張野貓等聚眾滋

事。現經李鶴年督率該地方文武設法進勦。該匪畏罪投誠。業已分別良莠。將為首各犯正法。其餘脅從人眾。分別遣散歸農。並派兵入山搜捕。即著李鶴年飭令參將王壽會同該地方文武認真查緝。務絕根株。並嚴防外匪乘間潛藏。毋令再生事端。以靖疆圉。將此諭令知之。○以河南宜陽勦辦刀匪完竣。賞守備劉鳳岐等花翎餘加銜。開復有差。○甲辰。諭內閣。刑部尚書譚廷襄持躬端謹。練達

老成。由庶吉士改授部曹。歷任監司。疊膺疆寄。旋以侍郎游擢尚書。並命在總理各國事務衙門行走。數歷中外。宣力有年。均能恪盡厥職。昨因患病賞假。方冀調理就痊。長資倚畀。遽聞溘逝。悼惜殊深。著加恩追贈太子少保銜。賞給陀羅經被。派員勒奠。勛帶領侍衛十員。卽日前往奠醊。照尚書例賜卹。任內一切處分悉予開復。應得卹典該衙門察例具奏。伊子戶部候補主事譚寶璫著俟服闋後

以本部員外郎補用。譚寶璿著賞給舉人。俟服闋後准其一體會試。其靈柩回籍時著沿途地方官妥為照料。用示篤念耆臣至意。尋予祭葬。謚端恪。○調兵部尚書鄭敦謹為刑部尚書。未到任前仍以禮部尚書萬青藜兼署。以都察院左都御史沈桂芬為兵部尚書。仍兼署吏部尚書。吏部右侍郎龐鍾璐為都察院左都御史。都察院左副都御史彭久餘為吏部右侍郎。○乙巳常雩祀。

天於

圖丘遣怡親王載敦恭代行禮。○予直隸交河陣亡三等侍衛閻雲鵬祭葬。世職加等。○丙午諭內閣御史宋邦德奏廣東積弊數端。請飭嚴禁等語。頂兇擄贖械鬪盜葬諸弊。本干例禁。若如該御史所奏廣東近來此等風氣。仍所不免。總由地方官平時遇事因循。不能實力整頓。以致刁民挾仇尋釁。轉以無辜論抵。良民被擄勒贖。匪黨肆行無忌。或以口角

微嫌釀成巨案。或以挖墳墓結訟經年。種種惡習。實為閭閻之害。著該督撫剴切曉諭。嚴行申禁。並慎選廉明之吏。隨時認真查辦。如有前項弊端。即行從嚴懲治。以挽頹風。○又諭景霖奏汛弁畏罪潛逃。請飭緝拏歸案。嚴審一摺。已革把總李春林前因按拏窩竊紅椿木植一案。辦理不善。致派出兵丁被匪捆毆。業經革職勒限嚴拏。乃不將首犯弋獲。復敢縱容兵丁得錢將已獲之犯賣放。以致要犯遠颺。該革弁旋即畏罪潛逃。顯有通同情弊。亟應徹底根究。著景霖飭屬嚴拏。並著直隸總督熱河都統通飭所屬一體嚴緝。務獲歸案審訊。○諭軍機大臣等。前因文盛奏軍臺被賊竄擾。當以察哈爾東與直隸張獨多三廳接壤。諭令曾國藩飭令地方文武認真巡緝。嗣據張廷岳等奏稱內地勒敗餘匪。由扎薩克阿畢爾米特遊牧竄入圖謝圖汗部落。到處滋擾。復在賽因諾顏部落肆行焚

搶並探另有大股圖犯庫倫等語庫倫至察哈爾一帶地勢平曠並無扼要處所可以守禦萬一匪蹤飄忽突向南竄恐直境人心未免震動亟應嚴為戒備曾國藩當勤加偵探於沿邊一帶應如何不動聲色嚴密設防以備不虞之處卽著妥籌辦理前經劉盛藻派趙宗道管帶銘軍八營移紮保定該軍是否勤加訓練足備調遣嗣後有續調來直者否該督前奏酌議練軍事宜古北口又添千人卽由提督傅振邦統帶此軍是否足恃其餘譚勝達等所統正定等處練軍遇有緩急能否備調以資策應著曾國藩統籌全局豫為布置將此諭令知之○又諭李宗義奏毅軍擊勦續來回匪獲勝一招逆回竄擾草地被官軍擊敗後復有後股賊匪馬玉芝率眾來援經將東才帶隊追勦斬殺甚多並將馬玉芝擊斃現在榆境邊內外已無賊蹤著定安李宗義咨會宋慶隨時偵探飭令在防各軍

加意嚴防如有敗匪竄入卽行盡力兜勦悉數殲除毋稍鬆懈庫倫至察哈爾一帶賊匪竄擾著定安懷遵疊次諭旨迅撥兵勇會勦並查明匪自何來被擾處所距綏城道路若干迅速奏聞包鎮至石嘴磴口以迄甯夏一帶近日有無匪蹤竄及糧運是否疏通亦著隨時具奏將此由四百里各諭令知之○又諭總理各國事務衙門奏美國使臣蒲安臣病故現籌辦理情形鈔錄志剛等奏彙各摺片美國使臣蒲安臣前經派充出使各國大臣與志剛孫家穀前往有約各國辦理中外交涉事務該使臣周歷英法美暨瑞丹和布諸國遠涉重洋不辭勞瘁辦事諸臻妥協本年正月間行抵俄國病故殊堪憫惻該使臣身後事宜業由志剛等妥為照料兼撥銀兩經理喪事著加恩賞給一品銜並賞銀一萬兩由出使經費項下撥給交該使臣家屬祇領以示優待之意蒲安臣業經身故出使事

宜甚關緊要著該衙門飭令志剛等督同左協理柏卓安右協理德善悉心商酌妥為辦理將此諭令知之○以廣東紳民協力勦匪永廣靈山封川陽山高明四縣學額各二名○丁未諭軍機大臣等金順奏中衛防軍疊次勦賊獲勝一摺炭山等處竄匪經黃金山擊退後復有河州回逆竄至北沙窩一帶又經該總兵沿途追殺餘逆由沙坡根渡河逃竄卽著金順飭令中衛地方文武實力防守不可再令賊蹤竄入並飭黃金山隨時偵探如有股匪滋擾卽行帶隊擊勦盡殄逆氛王家疇回匪乞撫後繳出馬匹器械甚少該匪心懷疑懼亟應加意防維並著金順與張曜隨時酌商相機辦理如該匪真心投誠不妨予以自新儻因官軍圍勦甚急故作緩兵之計卽當乘機進勦不可墮其奸謀甯夏至磴口石嘴一帶近日有無賊蹤竄及糧運是否疏通並著隨時具奏將此由五百里諭令知

之○兩廣總督瑞麟等奏靈山等處匪徒滋事劄飭知縣馮詢等帶兵會勦得旨著飭令馮詢等迅速進勦盡殲醜類並飭合浦欽州各文武一體嚴防合力勦辦以靖邊圉又奏西匪竄入西甯現經官紳擊退批蒼梧等處尚有賊匪屯聚難保不復竄入東境著卽飭令西甯等州縣督率紳團認真防勦毋令賊蹤闖入並著瑞麟嚴飭梧州所屬文武實力勦辦務絕根株毋任蔓延○以杜爾伯特貝勒巴咱爾扎那子台吉噶勒章那木濟勒繼故汗密什克多爾濟為嗣襲封○爵命棍布扎布仍襲親王巴咱爾扎那仍襲貝勒○戊申諭軍機大臣等丁日昌奏起解礮位並撥派弁兵赴津一摺現在江蘇報解金順軍營開花銅礮十二尊並礮子車輪等件及自來火一萬四千枝洋火藥一萬磅又另撥洋火箭六百桿派委知縣徐炳奎等帶同熟悉口令之都司陳友吉等二十員名一併由海道

運赴天津此項軍火到時如金順委員尚未到津卽著崇厚派員查驗暫為收儲一面趕緊知照金順迅飭該委員來津領解赴營以資攻勦將此諭令知之○以故郭爾羅斯扎薩克輔國公阿勒坦鄂齊爾子圖布烏勒濟圖襲爵○己酉追予山東各屬陣亡殉難官紳婦女九千三百七十二員名口分別旌卹如例○庚戌以甘澍應時

上詣

大高殿行禮報謝○遣惇親王奕諒詣

時應宮孚郡王奕譔詣

昭顯廟惠郡王奕詳詣

宣仁廟鎮國公奕謨詣

凝和廟拈香○以神靈顯應加福建南安縣

廣澤尊王封號曰保安○察哈爾都統文盛

奏遵旨覆陳嚴防竄賊並催總管達爾濟來

臺進勦得旨卽著會同杜嘎爾嚴飭派出兵

弁加意嚴防毋令匪蹤竄突一俟達爾濟到

日卽飭令勤加偵探相機防勦○予四川故閩浙總督楊國楨入祀鄉賢祠從總督吳棠請也○辛亥○

上奉

慈安皇太后

慈禧皇太后幸漱芳齋侍午膳○以本年鄉試考試應開列試差人員於保和殿○以大理寺少卿唐壬森為太僕寺卿

大清穆宗繼天開運受中居正保大定功聖智誠孝信敏恭寬毅皇帝實錄卷之二百八十

大清穆宗繼天開運受中居正保大定功聖智
誠孝信敏恭寬毅皇帝實錄卷之二百八十一

教謄

同治九年庚午四月壬子諭軍機大臣等前

因袁保恆遣員赴皖招募馬步各勇諭令英
翰等就地撤遣茲據英翰奏稱袁保恆所派
招勇委員此時計抵豫境已咨明李鶴年遵
照截止惟金運昌於本年二月間派委都司
陶正先等來皖招募精壯千人赴陝以補缺
額原不在袁保恆新募之列現經皖省募齊
押運軍火西上請仍飭河南陝西於該軍過
境時一體照料等語刻下金積堡一帶戰事
方殷金運昌需兵甚亟自應招集新勇以補

缺乏所有此項勇丁行過河南陝西各境時

著李鶴年將志章檄飭沿途地方官妥為照
料催令迅速前行毋稍延誤將此由五百里
各諭令知之○追予江蘇吳江殉難在籍從
九品吳治謨訓導王與沂建立專祠眷屬人
等分別附祀○癸丑

孝端文皇后忌辰遣官祭

昭陵○諭軍機大臣等左宗棠穆圖善奏官軍

截勦甘南逆回暨分勦河狄回股獲勝左宗

棠奏湘皖兩軍攻破賊壘並截勦自陝回竄
逆回疊勝及節次勦辦客土逆回情形各摺
片甘南徽兩等處竄回經湯聘珍各軍先後
擊敗而賊之前隊竄至甯州又經魏光燾等
追擊擒斬甚多陝回禹得彥仍由鹽茶廳一
帶竄走其西竄之崔三一股由隴州竄張家
川後復由秦安北竄至莊浪隆德之間左宗
棠已調徐文秀等率隊追勦惟現在各路回
股每於陝甘交界處所東奔西竄牽掣官軍

而甘之河狄尤為逆眾逋逃之藪左宗棠穆圖善務當檄飭甘陝各軍分投勦洗迅將禹得彥崔三各逆設法殲除以孤賊勢金積堡踞回疊經官軍痛勦勢甚窮蹙二月二十日後劉錦堂等軍又將山水溝賊壘三座暨王銀棚賊壘攻破馬化澂復設詞乞撫該逆詭譎異常現當圍困糧盡正可乘機計取著左宗棠卽飭劉錦棠等斟酌情形妥籌勦辦毋為該逆所紿馬阿渾等股因為陝軍勦敗回竄甘境魏光燾等於打家河毛渠井等處痛加勦擊所賸逆黨無多仍著左宗棠分飭魏光燾等跟蹤追勦迅速殄除毋任該逆苟延殘喘固原鹽茶及環慶各處客土回匪節經周紹濂等勦擊實足大挫兇鋒惟該處山谷盤互回民種類亦繁左宗棠務飭在事文武時加搜緝勦撫兼施毋任匪徒乘機煽惑以消隱患將此由六百里各諭令知之○予甘肅金積堡陣亡參將陳思忠都司阮金春守

備沈玉成把總朱泗才等祭葬世職加等○予甘肅打家河等處陣亡守備張連捷千總宋益成曾得順外委宋大勝祭葬世職加等甲寅諭軍機大臣等左宗棠蔣志章奏勦敗竄陝回股腹地仍復安謐並榆林安邊等處勦賊情形各摺片崔禹逆股竄擾陝境經各軍分投追勦連戰皆捷現在崔逆西奔禹逆東竄敗殘之賊所餘無幾鳳西同乾廊境內已無賊蹤惟崔禹兩逆帶傷逸去並未就擒其夥黨各圖潰散之說亦不足憑且劉典曾報陝境腹地肅清乃未幾而崔禹等逆旋即竄入幾至蔓延所謂肅清者安在該督撫等務當嚴密布置檄飭各將領認真防勦並將該逆首設法殄除毋任匪蹤再行闖入此次該督等奏保出力各員朝廷姑如所請藉以鼓勵軍心嗣後敘功獎勞務求允當毋得率行奏請以昭覈實安邊堡回股已退回金積老巢仍著蔣志章飭令劉厚基等督率各

營隨時防範以期周密並著左宗棠妥籌兼顧將此由五百里各諭令知之（以陝西縣頭鎮等處擊勦竄回獲勝賞總兵官黃本富副將胡義和王守基遊擊姚發義巴圖魯名號餘加銜升敘開復有差予陣亡參將黃萬陞祭葬世職加等）乙卯諭軍機大臣等都興阿等奏飭拏過江餘匪辦理情形一摺邊外滋擾朝鮮匪犯現經都興阿等續獲薛萬碌一名正法訪聞逸匪劉克功潛逃邊裏據奕艾等查明從前擊斃夥匪內有著名匪首李城蹊等三名並將土隈塔等處賊匪窩棚全行焚燒朝鮮國亦即將該處江岸游民窩棚平毀該將軍等現仍派員搜緝餘匪著都興阿清凱麟書恩錫飭令訥欽等將劉克功躡拏務獲並令春鐸帶兵隨時搜捕餘匪務絕根株至善後一切事宜應如何與朝鮮國會辦以杜後患之處並著都興阿等斟酌情形妥籌辦理小黃溝卡官錦州佐領依克錦

金州防禦富伸奏前於匪民在該管地方滋事毫無覺察均著交部議處將此各諭令知之○直隸總督曾國藩奏遵旨籌防竄匪咨商文盛等相機策應得旨著與文盛先事豫籌並令傅振邦王可陞等勤加偵探一面將新舊練軍實力操練以備不虞○追予直隸南皮殉難陝西監生趙士桐暨縣丞趙煜妻張氏分別旌卹如例○丙辰旌表守正捐軀河南禹州民婦趙傅氏○丁巳諭內閣崇實吳棠奏援滇川軍克復魯甸廳城生擒要逆遵將出力員弁開單請獎一摺雲南逆匪李本忠竄踞魯甸廳城提督唐友耕督率官軍分路進攻疊破賊巢當將廳城克復生擒逆首李本忠及賊黨多名正法昭魯漸次肅清在事出力各員洵屬著有微勞自應量予獎勵唐友耕越境援勦疊著戰功此次迅克堅城擒斬要逆實屬異常出力唐友耕著賞穿黃馬褂以示優獎另片奏請將隨同克復城

池之知府英文等失守處分免其置議等語
昭通府知府英文署魯甸通判吳廣通帶練
隨勦雖有微勞足錄惟未能先事豫防究有
應得之咎未便遽予免議英文吳廣通均著
革職留任以觀後效○諭軍機大臣等曾壁
光奏黔省軍務緊迫糧餉兩空現在籌辦情
形一摺黔省苗教各匪雖經川楚黔各軍分
路防勦而賊眾兵單總未大張撻伐曾壁光
現今總兵李榮春毛際惠等分由安順水城

募練前進勦洗土匪卽赴興普合攻回巢其
大定屬之楨匪濫練遵義屬之漏網餘匪卽
飭馬宗駿蹇閏等會同府縣各官認真撻勦
並力保開修等縣以顧餉道派兵駐紮定廣
以遏賊氛所籌均尚周密卽著該撫督飭在
事員弁實力防勦毋稍玩誤獨山荔波等州
縣界連粵西自都勻失後定廣賊熾省軍鞭
長莫及援助為難曾壁光請飭廣西各軍由
獨荔一帶掃蕩而前亦是正辦惟馮子材督

兵勦辦越南匪徒尚未歲事能否分兵援黔
之處著蘇鳳文馮子材酌度情形妥籌辦理
遵義教案疊經寄諭曾壁光迅速辦結乃該
撫並不妥為籌辦輒將李鴻章派出之道員
余思樞派赴貴定辦理軍務殊屬延玩現在
法國在京公使日以黔省教案未結向總理
各國事務衙門曉曉催問多方要挾若不趕
緊竣事必至枝節橫生著曾壁光迅飭余思
樞剋日馳赴遵義會同黔省人員將教民一
案辦結不得再涉遷延其貴定羊場等處卽
著責成提督劉士奇統籌防勦不准藉詞託
病貽誤戎機崇實吳棠劉崐當督飭川楚各
軍將黔省苗匪痛加勦辦毋稍懈弛貴州地
瘠民貧用兵日久糧餉兩空困苦情形實深
廑繫著崇實吳棠劉崐按照戶部奏定協黔
餉數按月源源解濟以拯飢軍並著戶部查
明應解黔餉省分飛速咨催一面另籌有著
之款奏明動撥解赴黔省俾士馬飽騰早收

廓清之效。曾壁光請將黔省各局收捐正印五項指省分發展限著准其再展一年。仍照部議編號彙咨以免混淆而昭慎重。將此由六百里各諭令知之。○以四川官軍克復雲南魯甸廳城。生擒首逆李本忠。賞總兵官耿得勝副將劉宇德劉萬春遊擊唐有貴巴圖魯名號守備劉玉興等花翎千總侯遇春等藍翎餘加銜升敘開復有差。○戊午改鑄江西上饒廣豐各縣丞條記。從總督馬新貽請

也。補鑄雲南楚雄協副將中軍都司武定鎮雄威遠等營參將景蒙營遊擊各關防。從總督劉嶽昭請也。○己未諭內閣恩麟等代奏達賴喇嘛呈請前往布賚綢兩寺講經熬茶請旨一摺。達賴喇嘛係遵照向例前往舊建寺院布施熬茶並化導所屬。具見誠悃。朕心深為嘉悅。達賴喇嘛本年選定吉期前赴布賚綢兩寺講經時著恩麟等隨時妥為照料。○以西藏乍丫勒辦野番完竣。賞都司馬

開昌等花翎餘加銜升敘有差。○庚申諭內閣曾國藩奏甄別年老未能得力營員請分別懲處一摺。直隸居庸路都司固勒鐸昌平營守備孟吉盛順德營遊擊伊興阿弓馬輕弱年力就衰。廣平營遊擊戎琨體弱多病殊難振作。均著勒令休致。昌平營參將松年於委查事件並不認真查辦率行含混呈報亦屬玩違著交部議處。以肅營伍。○辛酉諭軍機大臣等前因曾壁光奏黔省軍務緊急糧

餉兩空當經諭令戶部另籌有著之款奏請撥解茲據該部奏稱擬請再撥四川按糧津貼銀十萬兩協濟黔餉等語。黔省軍務正當喫緊亟應專款解往以濟急需。四川按糧津貼項下本年指撥京餉無多道路亦距黔省尚近著崇實吳棠即在該省按糧津貼項下迅撥銀十萬兩解赴黔省以資接濟並准其以五萬兩劃抵本年應解京餉至各省協黔餉項仍著戶部飛速咨催如數按月籌解毋

得任意宕延。儻再藉詞推諉。卽著該部照貽誤京餉例指名叅處。曾璧光於各餉解到後。務當督飭各軍振刷精神。實力攻勦。迅掃賊氛。不得再以糧餉空虛藉端延玩。將此由五百里各諭令知之。○又諭前因遵義教案未結。疊諭李鴻章等持平籌辦。昨因曾璧光將李鴻章派出之道員余思樞。派赴貴定辦理軍務。復諭該撫迅飭余思樞。剋日馳赴遵義會同黔省人員將教案辦結。茲據總理各國

事務衙門奏稱。法國使臣羅淑亞因教案未結。擬由天津一帶往見李鴻章商辦。並與崇厚晤稱。教案有兩種辦法。一照議賠償。一如不能賠償。或將地方官吏更調。該使臣近聞黔省業已趕辦。遂卽回京。旋又赴該衙門面稱。接貴州任教士來信。以前案不但不爲了結。而教士羅伯恩又被團勇欺陵。所言均出情理之外。當經該衙門駁斥。復遣繙譯官呈遞照會。牽涉他案。並求爲據情奏聞。請仍飭

原派查辦大臣及貴州巡撫督飭各員籌結等語。遵義教案日久未結。其中固有棘手情形。而羅淑亞性情躁妄。動輒歸咎於地方大吏者。實欲遂其牟利之心。雖帶兵船駐紮漢口。虛實均難豫料。惟在京終日嘵嘵。亦屬不成事體。李鴻章現雖帶兵赴陝。而奉命查辦之時。於此案諒有辦法。仍著迅飭余思樞會同該省官員妥速籌辦。不得以他省派往人員意存推諉。曾璧光身任黔撫。責無旁貸。著卽懍遵前旨。迅令余思樞馳回遵義。並飭承辦各員會商訊結。以期早息釁端。教士羅伯恩有無被團勇欺陵情事。亦著曾璧光切實查明。隨時約束。毋得故置不問。致生枝節。總理各國事務衙門原摺均著鈔給閱看。將此由六百里各諭令知之。○以光祿寺卿成林爲大理寺卿。○壬戌以雨澤未霑。

上於
大高殿設壇祈禱。親詣行禮。○遣惇親王奕詝

詣

時應宮惠郡王奕詳詣

昭顯廟鎮國公奕詢詣

宣仁廟鎮國公奕謨詣

凝和廟貝勒溥莊詣

黑龍潭鄭親王承志詣密雲縣

白龍潭拈香○諭軍機大臣等定安奏派兵

援剿竄匪並籌辦水路轉運糧石請派署副

都統各摺片軍臺竄匪滋擾現經定安派達

爾濟帶兵助剿並調防河西纏金等處即著

文盛飭令達爾濟會同察哈爾官兵務將竄

匪悉數殲除毋留餘孽並飭富勒琿責果爾

嚴防河西纏金一帶如遇河西有警即令劉

景芳帶領馬隊渡河迎擊並飭沿河步隊會

合協剿以壯聲威近日察哈爾軍臺是否寂

靜匪蹤竄往何處著文盛隨時確探奏聞歸

綏至甯夏一帶陸運維艱著照所請督率國

英轉飭薩拉齊托克托城兩廳趕造船一百

隻試行運解其各路駝隻解到並由陸路轉

運以速補遞毋得稍有延誤富勒琿現在帶

兵出防所有歸化城副都統印務即著定安

暫行兼署將此由四百里各諭令知之尋文

盛奏現在賊向西竄軍臺境內並無匪蹤仍

前敕靜報聞○又諭文麟景廉奏接到李宗

義咨稱山西應解哈密餉銀六萬兩無款可

籌欲俟晉省撤防後再行籌撥仍請飭催迅

速撥解等語哈密地方兵燹之後異常瘠苦

現在軍務未竣防兵需餉甚為急迫著李宗

義即飭藩司無論何款先其所急迅將前項

銀六萬兩如數撥交委員奎禧等趕緊解回

哈密以濟要需文麟等另片奏營中應需製

造帳房旗幟號衣軍火布匹鋼鐵及紙札食

用等物委員赴內地採辦經過地方需用駝

隻請飭添派轉運等語著定安文盛於該委

員等採辦前項各物過境時飭令臺站添派

駝隻迅速運解俟行抵烏里雅蘇台該委員

於照例支領駝腳外如尚應需駝隻卽著福濟飭屬代為添雇俾資轉運其腳價銀兩由文麟等自行發給覈實報銷將此由五百里各諭令知之○旌表守正捐軀鑲黃旗漢軍領催金彭壽妻佟氏○章嘉呼圖克圖桑哈色特迪於神武門外瞻觀○癸亥諭內閣榮頤等奏官物被竊請將巡查不力官弁分別覈辦一摺本月十二日

昌西陵東西配殿供器有被竊情事內務府郎

中文德員外郎喜祿主事常璽係屬專管未能豫防均著交總管內務府議處旗綠各營官弁等事前毫無覺察事後賊贓無獲均有應得之咎同旗綠兼統各官著一併交部查取職名分別議處榮頤載遷清安失於覺察著交各該衙門察議○雲貴總督劉嶽昭奏提督馬如龍進攻新興臨陣受傷得旨馬如龍督勦受傷實屬奮勇可嘉現在傷痕是否平復殊深廩繫○以雲南順雲協副將李維

述為騰越鎮總兵官○予雲南新興陣亡總兵官田仲興祭葬世職加等○旌表守正捐軀直隸平山縣民婦張焦氏○甲子諭軍機大臣等金順奏官軍勦回獲勝悍酋伏誅現在籌辦情形一摺本月初間王家疇回逆由牛頭山竄過河西滋擾渠工經金順等督兵在黃渠口截勦獲勝陣斬逆首梅照濤復將乘夜逃出之王得等逆擒獲正法卽著金順會同張曜一面撥派重兵鎮攝一面疏通糧

路護修渠工並將後套之糧設法運赴甯郡俾資屯積惟該處東北一帶回寨時圖出擾金順等務當分兵防勦庶糧運不至阻梗並飭令提督劉廷一軍暫紮石磴一帶籌辦兵食毋稍疏虞將此由五百里諭令知之○又諭奎昌奏代呼圖克圖聲明繳還印信一摺喇嘛棍噶扎勒參前因塔城赴援賞給呼圖克圖名號旋給印信茲據奎昌奏該呼圖克圖呈稱印信內僅鐫名號並無帶兵字樣雖

裁布倫托海而與印信無涉。印信既繳，是並名號亦裁。且於未結事件勢難辦理，請派員詳查經辦各務等語。該呼圖克圖印信是否與帶兵無涉，應否繳還，刻下有無經辦未結事件，著福濟奎昌會同確查彼此妥商奏明辦理。原摺著鈔給福濟閱看。將此由五百里各諭令知之。尋福濟等奏該呼圖克圖帶兵勦賊，曾著勤勞，現收門徒過八百人，與頒給印信之例亦屬符合。從前所領印信已奉文

繳還，應請飭部另鑄給發俾資鈐轄。從之。○考試應開列試差二品以下京堂各官於上書房。○補行引見京察年至六十五歲以上人員，得旨吏部筆帖式同安著照舊供職。○引見一二品廕生，得旨工部額外員外郎志顏著加恩以本部員外郎儘先補用。曾紀澤著加恩以員外郎分部行走。○調察哈爾牧羣馬五百匹解赴署甯夏將軍金順軍營備用。○乙丑

孝慎成皇后忌辰遣官祭

慕陵。諭軍機大臣等：李鴻章奏酌派勁旅分道赴陝，並即督隊前進一摺。據稱周盛傳等軍已由周口拔隊進赴潼關，郭松林所部步隊亦抵樊城。該督擬帶親兵馬步先由南陽陝州大路入關，駐候隊伍到齊，再行擇要進紮，並派員扼守秦楚邊防，兼護後路餉運。各情所籌均屬周妥。現在竄陝回股雖經甘陝各軍勦敗，而崔禹等逆尚未殲除，甘省金積堡圍攻正急，河州狄道賊巢林立，秦隴毗連處所甚多，防不勝防。陝北延榆綏一帶土匪潰勇又復出沒靡常。李鴻章務當統率援師，星馳前往，其郭松林一軍並著檄令趕緊催齊，剋期進剿，毋稍遲延。至入關後應如何擇要扼紮，並將北山土匪潰勇搜勦淨盡，及籌辦糧運屯墾兼營之處，即著該督與蔣志章悉心籌商次第舉辦，用紓廩繫。貴州遵義教案日久未結，殊難折服，遠人之心該督當懷

遵二十五日諭旨迅飭余思樞會同黔省官員妥速訊結以弭釁端將此由六百里諭令知之又諭前因李鴻章入陝勦賊諭令李宗義墊款採辦米麥各二萬石存儲備撥茲據李鴻章奏接據該撫函稱晉省糧價極昂僅能採辦米麥二萬石計需價銀十萬兩司庫無款可墊已借動地丁正項請奏明酌抵京餉等語該省司庫支絀亦係實情所有此項糧價著准其於山西應解京餉內劃抵銀五萬兩其餘五萬兩該省暫行籌措仍由李鴻章解還歸款至李鴻章軍營需駝二千隻前諭文盛由錫林郭勒捐駝內於秋後如數解往僅有不敷由定安設法購補或於四愛曼等處量為添撥西北運解軍糧惟駝隻最為利便定安文盛務當懍遵前旨趕緊籌備於秋後如數撥解不得稍有遲誤將此由五百里各諭令知之○又諭李鴻章奏督軍入陝需糧甚鉅運費亦極浩繁現撥各省餉項

尚不敷用前議川省裁軍騰餉業經崇實等籌辦妥洽此次移師西指秦蜀唇齒相依亟資協助請飭川省自本年五月起按月籌撥餉銀三萬兩等語著崇實吳棠酌量情形妥籌款項按月源源接濟俾利師行將此由五百里各諭令知之○以故肅恪親王華豐子隆懃襲爵以正紅旗蒙古副都統照祥署正白旗蒙古副都統○以前任直隸提督劉銘傳所部捐輸欠餉永廣安徽文鄉試中額

一名

大清穆宗繼天開運受中居正保大定功聖智
誠孝信敏恭寬毅皇帝實錄卷之二百八十一

大清穆宗繼天開運受中居正保大定功聖智
誠孝信敏恭寬毅皇帝實錄卷之二百八十二

同治九年庚午五月丙寅朔

上詣綏履殿問

慈安皇太后安平安室問

慈禧皇太后安至乙未皆如之○以太常寺卿

劉有銘為大理寺卿○以翰林院編修汪敘

疇為雲南鄉試正考官王先謙為副考官張

端卿為貴州鄉試正考官檢討劉青照為副

考官○以辦案草率革江蘇知縣甘澤宣職

○丁卯諭內閣劉崑泰撰減滋事會匪首要

各犯全行伏誅一摺湖南湘鄉縣會匪逆首

賴榮甫卽二蒙花本年二月間潛集匪黨分股焚掠經劉崐派出官軍會同該縣團練剿辦當將該逆首及逆目康學池等一併擒獲訊明正法全股悉就撲滅辦理尚為妥速仍著劉崐飭令各該地方官督率團練實力巡緝遇有不法匪徒立即查拏懲治以靖地方○諭軍機大臣等劉崐奏援黔官軍疊克苗寨暨撲滅會匪情形各一摺湖南援黔官軍由五岔進兵沿途雕剿平毀苗寨多處並攻克施洞口及九股河各壘鎮遠苗亦經鄧善燮等督兵截擊大挫兇鋒兩路官兵現在共規新城惟小江南岸苗寨林立必須先將北岸疏通方可併力南向席寶田擬卽合軍先拔新城再由新城迎剿而上所籌尚妥惟川軍前因餉乏未能會剿東坡以致黃仁遺回軍鎮遠此時川軍若進紮數十里由重安江壓擊而下掃蕩施黃之賊則川楚兩軍聲勢可期聯絡著崇實吳棠迅飭該省各營剋

期前迅相機剿辦並著劉崐檄飭席寶田會同川軍協力進剿務將張包等逆股悉數殲除毋稍鬆勁至湖南湘鄉會匪竟敢聚眾謀逆經該處官紳登時掩捕立將首夥各犯悉數擒斬全股撲滅辦理尚為迅速嗣後務當檄飭地方文武嚴密稽查隨時搜捕毋令伏莽潛匿又生事端劉崐現已飭屬一體舉行團練著卽認真興辦不得有名無實又據吳崇奏稱巴塘地震籌款撫恤各等語本年三月間四川巴塘一帶地震火發壓毀人民房屋該處遭此天災殊堪憫惻吳崇業已籌動款項派員前往賑恤卽著妥為安撫毋令失所將此由五百里各諭令知之○又諭劉崐奏緝獲會匪夥黨分別辦理等語廣東陽山縣屬茶田等處土匪勾結湖南宜章臨武等縣匪徒聚眾滋事經劉崐督飭該地方文武將匪首李求球等兇拏並搜獲逆書門牌等件已將首要各犯正法其餘脅從黨與分別

監禁管束。卽著劉崐飭令章濂、吳錦章等務將逆犯悉數拏獲，不准一名漏網。瑞麟、李福壽亦當檄飭林述訓等將茶田等處逃散餘黨並邀約入會之劉姓查拏，務獲懲辦。以靖地方。仍隨時督率各該員弁於交界處所會同巡查。毋令匪蹤遁入。將此各諭令知之。○成都將軍崇實等奏：抽調勁旅會合陝軍馳赴武功醴泉相機援剿，兼顧西安省城得肯。著仍檄飭李輝武督率各隊聯絡陝軍相機援剿。毋稍鬆勁。○賞肅親王隆勲三眼花翎。命在御前行走。○以湖南官軍疊克貴州苗寨，賞記名布政使席寶田提督龔繼昌、白玉翎管各一支，白玉搬指各一箇，大荷包各一對，小荷包各兩箇。提督周家良一品封典。總兵官江達明、副將黃光星、都司毛樹勳、巴圖魯名號遊擊陳嘉等花翎餘加銜升敘有差。子陣亡參將陶正相等十一員祭葬世職加等。○追予江蘇各屬陣亡殉難州同銜胡耀

奎等紳民婦女一千七百二十一員名口分別旌卹如例。○旌表守正捐軀四川華陽縣民婦楊李氏。○戊辰。孝誠仁皇后忌辰遣官祭景陵。○諭內閣：都察院奏據安徽都司孫之和以挾嫌謀害等詞赴該衙門呈訴。此案已革副將敖天印以帶兵大員縱勇慘殺，曾諭令穆圖善俟甘省軍務稍鬆卽將該革員解赴河南審辦。仍著穆圖善懍遵前旨，俟該省軍務稍平卽行解往河南交李鶴年嚴行審訊。按律定擬具奏。原告都司孫之和著該衙門飭令暫回原籍候教。天印解到卽由河南巡撫咨調前往備質。○予浙江東機暴洋面被害副將陳紹祭葬世職。如提督陣亡例。謚勇烈於死事。地方暨原籍建立專祠。千總楊郁、蔡騰光祭葬世職。○己巳以玩視命案革福建通判王惟敘職。○庚午諭軍機大臣等：前因貴州遵義民教滋事，據法國使臣聲稱趙

教士被傷殞命。梅教士恐亦被殺死等情。當以事關中外交涉。要仲特命李鴻章派員前往會同曾璧光查明辦理。旋經李鴻章派令道員余思樞赴黔查辦。時逾半載。仍未辦結。法國使臣羅淑亞以此案日久未了。屢向總理各國事務衙門曉曉催辦。意圖尋釁。若再不迅速了結。恐致激成事端。現在李鴻章業已帶兵赴陝。距黔較遠。誠恐鞭長莫及。曾璧光身任黔撫。於此案本無可推諉。但該省軍

事方殷。亦恐未能專心辦理。因思崇實前經派辦貴州教務情形較為熟悉。著即帶印馳赴貴州會同曾璧光秉公籌商。務將此案趕緊完結。李鴻章仍當飛飭余思樞會同黔省委員妥速籌辦。稟由崇實等酌奪。即行奏結。毋再稍涉遷延。將此由六百里各諭令知之。

○辛未

上復詣

大高殿祈雨壇行禮。○遣惇親王奕誼詣

時應宮孚郡王奕諱詣

昭顯廟惠郡王奕詳詣

宣仁廟鎮國公奕謨詣

凝和廟睿親王德長詣

覺生寺貝勒溥莊詣

黑龍潭怡親王載敦詣密雲縣

白龍潭拈香。○諭內閣。英桂奏遵查副將恃

強霸產結黨滋事各節。分別辦理。一摺。福建

在籍副將林文明。強占民人林應源等田產

並占收入官叛產租穀。經英桂查明飭令歸

還賠繳。該副將膽敢抗不遵依。聲稱欲與原

告林應時對質。率黨直入彰化縣署。刀傷勇

丁。形同叛逆。英桂已派員將該犯拏獲。正法

足昭炯戒。其脅從人眾。即著英桂飭令臺灣

鎮道妥為安插。予以自新。毋令再生事端。○

正白旗滿洲都統恭親王因病請假。以正黃

旗蒙古都統載容暫署。正白旗滿洲都統。○

錫綏。福建惠安。南安。馬巷。晉江。同安。漳浦。龍

溪與糧雲霄莆田仙遊十一廳縣暨羅溪佛
曇橋金門縣丞所屬被旱地方上年額賦有
差○壬申諭內閣楊昌濬奏革員蒙混開復
請革職永不敘用一摺已革浙江候補知縣
史致遜前因嵎縣失守革職留營差委嗣在
釐局私行加捐挾妓飲酒復投效長江水師
軍營蒙混保舉開復並未補繳銀兩赴部引
見輒先赴省稟求差委據所奏各情實屬貪
鄙詭詐史致遜著即革職永不敘用並不准
投效各路軍營以儆官邪而杜取巧○諭軍
機大臣等將志章奏籌辦北山情形擬咨商
李鴻章撥兵進紮豫遏回逆紛竄一摺陝省
北山一帶地曠人稀潰勇土匪降眾流民雜
處山內往往勾引外匪乘機竊發現在甘省
竄陝回股雖經各軍擊敗悉行竄出而秦隴
接壤之區自榆綏以迄鳳漢毗連計二千餘
里回匪之由慶甯等處窺伺陝境者又無定
蹤其潰勇土匪每於宜川延長延川安定無

兵之地盤踞肆掠內地各軍防守勢難徧給
將志章所陳必勦而後能防必賑而後能墾
暨咨商李鴻章酌撥勁旅擇要進紮各情均
能洞中窺要李鴻章計自襄陽起程由南陽
陝州大路入陝著即催集各隊趕緊前進就
近與蔣志章酌度情形檄飭各軍於秦隴交
界如定邊甯州等處擇要扼紮一面酌派勁
旅由韓城之靈官廟入山節節搜捕使賊匪
無可潛藏以清內患如有畏罪投誠者並隨

時籌辦蔣志章即將現在所辦情形與李鴻
章反復商榷以期緩急合宜至墾荒積穀誠
為安插降眾飢民之善策然事實實力舉行
不可徒託空言除廣東粵海關欠解各餉本
日已照請諭知瑞麟等迅即籌解外該撫當
督飭藩司先行籌款派員乘大軍將集匪勇
聚殲之時分赴北山各州縣會同地方官覈
實辦理用救民生至延榆綏各屬應如何慎
選牧令破格獎勸隨時創懲及通省吏治應

如何整頓之處該撫務當督率司道等悉心酌覈用副厚望將此由五百里各諭令知之○以浙江東塘防險出加予道員何兆瀛等加銜升敘有差○追予安徽廬江陣亡殉難從九品郭兆銘等紳民婦女二千一百五十四員名口分別旌卹如例○追予浙江各屬陣亡殉難從九品江枏等一百九十八員名賞卹如例○癸酉諭軍機大臣等前因都察院奏據安徽都司孫之和呈控已革副將敖天印挾嫌謀害等情諭令穆圖善遵奉前旨俟甘省軍務稍平即將敖天印解往河南交李鶴年審辦本日據御史李宏謨奏稱此案副將孫之友慘遭戕害事隔多年而敖天印尚延不到案請飭左宗棠嚴拏解案審辦等語敖天印以帶兵大員慘殺多命虛實均應根究即著左宗棠查明該革員在穆圖善軍營是否得加如非必不可少之員即行派弁解赴河南交李鶴年嚴行審訊按律懲辦毋

任藉詞玩延將此諭令知之○又諭總理各國事務衙門奏英國使臣威妥瑪請於沿海水底暗設通綫謹將辯論各節據實密陳一摺洋人以貿易為本時慮中國舟車遲滯欲以外國之銅綫諸法試行於中國上年議修英約時英國使臣阿禮國即以此事屢次瀆請均經總理各國事務王大臣嚴詞峻拒現在該國使臣威妥瑪復請由廣州汕頭廈門福州甯波各海口水底暗設銅綫通至上海並稱前議通綫之法俱係陸路明設此次係在海底暗設其綫端一頭在船隻內安設即在灣船埠口海面停泊與從前所論迥殊似與中國毫無虧損等語內洋外洋絲互數萬里輪船往來絡繹不絕儻伊不告中國暗設銅綫勢亦無從禁止該衙門現將沿海水底暗設數字揭清並將綫端不牽引上岸離口另設別法數語重言申明該使聲稱安綫之處如有民人損傷地方官無須追償修費已

由該使轉飭局商遵辦是於變通轉圜之中。仍寓檢制防維之意。惟洋人得步進步。詭譎萬端。經此次允辦之後。難保不藉端擴充。由海而江。由江而河。而陸駸駸乎漸入內地。不可不豫為之防。著南北洋通商大臣暨沿海各督撫密飭各關道地方官。先事豫籌。嚴密稽察。遇有洋人安設通綫之處。止准在沿海洋面水底。其綫端止准在船隻內安設。即在沿海埠口向來停泊各洋船碼頭之外。近海處所停泊。僅有將綫端牽引上岸。不遵定章辦理者。即照會領事官立時查禁。以杜將來流弊。而絕他國效尤之漸。將此由六百里密諭馬新貽、瑞麟、英桂、丁日昌、丁寶楨、下寶第、李福泰、崇厚、並傳諭楊昌濬知之。○甲戌諭軍機大臣等。崇實、吳棠奏援黔官軍攻克苗寨。現籌會擊一摺。貴州黃飄、白保等處苗寨。經道員唐炯等督隊攻克。軍聲大振。提督陳希祥等復將筆架山六角基等寨踞平。

現擬進取螃蟹並約會楚軍合擊。商同黔軍助剿。即著崇實、吳棠飭令唐炯等督率兵勇乘勝進攻。毋稍鬆勁。並著劉崑飭令席寶田由新城會剿寶谷龍巖門司等處。以收夾擊之效。曾璧光亦當嚴檄本省官軍由貴定之羅坪穀洞進紮灰坡。牽制都勻麻哈賊勢。使川楚各軍得以深入。迅殲醜類。不可專恃援軍致失機宜。將此由五百里各諭令知之。○乙亥諭軍機大臣等。張廷岳等奏督兵起程剿賊。暨請調兵會剿各摺。片張廷岳以賊股仍在賽因諾顏部落西界盤踞。已統蒙兵起程咨明察哈爾綏遠城帶兵各員一併赴圖謝圖汗部落會商進剿。並分派官兵防堵。惟聞賽因諾顏部落迪西刻下已無賊匪。庫倫附近亦無匪蹤。此時正不宜紛紛徵調轉涉張惶。所請飭綏遠城察哈爾派兵會剿之處。著毋庸議。張廷岳現擬前赴額爾德尼招等處閱看蒙兵。即著認真整頓。毋涉騷擾。一俟

查閱完竣即當折回庫倫該處地方緊要不得日久在外致有疏虞蒙古各游牧道路遠聞定安福濟榮舍文盛張廷岳阿爾塔什達仍當隨時偵探如再有匪徒竄擾即行就近兜拏毋任紛竄察哈爾應撥庫倫餉銀五萬兩即由張廷岳等派員迎提樽節撥用將此由五百里各諭令知之○撥直隸天津洋火藥一萬斤鉛丸一萬五千斤大小銅火六十萬粒皮紙八百刀解赴綏遠城轉交甘肅軍營備用○撥綏遠城礮位四尊解赴庫倫軍營備用○追予河南各屬陣亡殉難紳民婦女二千六十九名口分別旌卹如例○丙子諭軍機大臣等金順奏勦辦南路竄踞各匪疊勝一摺甯朔中衛交界木高山一帶陝土各回滋擾經金順商同張曜督隊進勦遇賊於廟山湖各軍合戰張曜復令總兵王連三等力扼西面該逆向南奔逃官軍斬獲甚多其由峽口覓渡各匪亦經追殺淨盡馬家

灘賊眾竟敢在分水嶺地方列隊抗拒金順等又令常福各軍分路衝擊賊敗入巢各軍乘勝追擊殲斃回匪二百餘名奪獲器械無數勦辦尚屬得手刻下南路計可稍安而北路渠口通昌通貴馬全各回堡緊濱河岸仍著金順會同張曜督率各軍痛加勦洗毋任陝回從中糾合復肆蔓延至庫倫並察哈爾軍臺等處前有賊匪滋擾現賊蹤雖已遠颺而邊外地方遼闊難保該逆不乘虛復來金順等務須審度情形分投截勦以遏逆匪北竄之路不可稍涉大意將此由五百里諭令知之○以太僕寺卿唐壬森為宗人府府丞○調浙江處州鎮總兵官吳鴻源為溫州鎮總兵官溫州鎮總兵官方友才為處州鎮總兵官○以內閣學士王祖培為廣東鄉試正考官翰林院編修謝維藩為副考官陳振瀛為廣西鄉試正考官山西道御史馬相如為副考官國子監祭酒寶森為福建鄉試正考

官翰林院編修劉曾為副考官○以救援主將不加革浙江署遊擊副將秦繼南職把總池奇觀池鼎泰外委鄭鳳翰革職訊辦○戊寅遣官祭

關帝廟○諭內閣委散秩大臣公承志著更名承需○諭軍機大臣等左宗棠奏官軍蕩平賊濠截剿竄回獲勝並花定等處剿賊情形各摺片金積堡踞匪經劉錦棠督隊進攻該逆出巢抗拒我軍分路攻擊立將賊濠平

毀其西竄大壩分水嶺三關刦糧之賊又經我軍擊退即著左宗棠飭令劉錦棠聯絡金順張曜派出各軍乘賊勢窮蹙之時分投截剿毋令他竄花定等處賊匪經金運昌派提督王鳳鳴擊剿獲勝復親督隊伍將金積堡附近賊壘攻破並著飭令金運昌乘此聲威迅速進剿毋稍鬆勁金積一賊堡即云雲堅糧足何以頓兵如許之久屢攻未下本日據奏中路南路均獲勝仗未知賊勢若何殊

深慮繫李鴻章指日抵陝秦隴交界處所已諭扼要分紮該大臣惟當振刷精神嚴檄劉錦棠等乘勝進攻一面飭南路各軍掃蕩而西進規河狄使賊彼此不能相顧迅奏膚公毋得日久遷延老師糜餉至該大臣各營後路既有淮軍進紮左宗棠尤當與李鴻章和衷共濟各泯畛域之見俾兩省聯為一氣庶防剿合籌更資得力浙江温州鎮總兵方友才昨已調補處州鎮總兵據英桂奏稱該員

自簡放温州鎮總兵後已屆四年尚未到任方友才係左宗棠保舉之員是否在陝甘軍營剿賊即著左宗棠查明如現在該員並不帶兵即著飭赴處州鎮總兵新任以重職守將此由六百里諭令知之○以甘肅金積堡等處截剿竄匪獲勝予提督王鳳鳴議敘賞守備何全忠遊擊銜花翎予陣亡參將張兆孟遊擊成福楨都司李興濬千總蔣洪順把總父得勝等祭葬世職○己卯諭軍機大臣

等。劉岷奏援黔各軍攻拔新城。現約川軍會剿。一擲席寶田一軍自攻克施洞口等處逆巢。後先將涼傘垵攻破。乘勢直薄新城。賊眾奔潰。立將新城克復。各路援賊疊被官軍擊敗。並焚毀甕板等處賊壘。蕭榮芳亦督軍疊破苗寨多處。剿辦尚為得手。席寶田現已約會川軍會師巖門。合力夾擊。即著崇實、吳崇飭令道員唐炯、迅督所部由濫橋前進。與席寶田各軍聲勢聯絡。並著劉岷檄令席寶田、剋期會同進剿。掃蕩清江北岸。以次規取台拱。毋稍鬆勁。前據劉岷奏。川軍須由重安江下擊。肅清施黃。又據崇實等奏。攻克黃飄。白保已約楚軍會擊甕谷。籠巖門司等處。現在新城既克。川楚兩軍聲氣漸通。正當乘此聲威通力合作。不得彼此觀望。遷延致失機會。曾壁光亦當就黔省兵加會合。川楚各軍迅速剿辦。盡殄苗氛。將此由五百里各諭令知之。○以湖南官軍克復貴州新城。蹋平賊巢。

賞提督鄧榮昌總兵官鄧真發。鄧在信柳大福道員鄧善譽。巴圖魯名號復已革提督龍萬貴。職賞還勇號花翎主簿唐蔚清。藍翎餘加銜升敘開復有差。子陣亡副將蔣子榮。參將曾子鴻。都司楊榮才。千總朱光泗。祭葬世職加等。○庚辰以望雨仍殷。迎請直隸邯鄲縣聖井龍神廟鐵牌來京供奉。都城隍廟設壇祈禱。○直隸總督曾國藩等奏。請撥河屯協八溝營兵各一百名駐紮朝陽縣。以清盜藪。得旨。新撥河屯八溝營兵。即著庫克吉泰派員管帶。認真訓練。擇要駐紮。以資巡緝。不得有名無實。○熱河都統庫克吉泰奏。回股竄擾軍臺。現飭所屬一律防範。得旨。前據文盛奏。賽因諾顏部落迤西現無賊蹤。但邊外各遊牧地勢平坦。難保不復圖竄。擾著庫克吉泰隨時偵探。酌量緩急情形。妥籌防範。○以故不入八分輔國公奕果子。

戶部尚書載齡襲爵

清實錄
同治九年五月上

大清穆宗繼天開運受中居正保大定功聖智
誠孝信敏恭寬毅皇帝實錄卷之二百八十二

平定縣志

子

九〇七

大清穆宗繼天開運受中居正保大定功聖智

誠孝信敏恭寬毅皇帝實錄卷之二百八十三

臨假期，我官船是日清早，凡往官處，亦不預夕，一聞值開事，則即乘一輪，望士籍，即於左，一呼中江，是方即放。

理史學考證戶部三庫書格之順中於十五種書中知一二種者三
莊公趙家志誠堂三子洪福太子沐文公孫嗣大梁書院英毅號

大興縣志卷之五 職官志 職官大夫 大興縣志卷之五 職官志 職官大夫 大興縣志卷之五 職官志 職官大夫

學生居於春之閣上什處歷史博物館旁縮印蘇俄大學一長部如意事機大是故曾原吉士管理戶部三歲書院圖于照事務加九級軍功加五級陸軍

加六殿錄上。文臣。其種。皆。本。利。則。我。家。規。矩。道。項。而。酒。亦。禮。謝。之。意。在。地。戶。部。之。事。亦。務。之。器。如。五。姓。錄。十。一。次。自。除。國。尊。序。

敕修

同治九年庚午五月辛巳

上復詣

大高殿祈雨壇行禮○遣惇親王奕諒恭祀

天神壇醇郡王奕譞恭祀

地祇壇孚郡王奕譞恭祀

太歲壇惠郡王奕詳詣

時應宮鎮國公奕詢詣

昭顯廟鎮國公奕謨詣

宣仁廟貝勒溥莊詣

凝和廟肅親王隆懃詣

覺生寺鎮國公載鋼詣

黑龍潭怡親王載敦詣密雲縣

白龍潭拈香 諭內閣本年春夏以來雨澤

愆期天時亢旱疊經降旨祈禱雖經得雨數

次尚未深透現在節近夏至農田望澤彌殷

觀茲風燥日炎殊深兢惕因思在京間刑各

衙門往往於現審案件日久未結以致無辜

被累之人羈繫囹圄淹滯莫申疾病顛連情

殊可憫著刑部步軍統領順天府各衙門將

現辦各案趕緊清釐如有待質應訊之人卽

飭司坊各官取保後迅速傳案逐一審結不

准稍有積壓拖累以消沴癘而迓和甘○諭

軍機大臣等前因德英奏請催提各省欠解

黑龍江官兵俸餉當令戶部速議具奏茲據

奏稱各省欠解黑龍江官兵俸餉積有一百

六十餘萬之多現在該處低田被水牲畜損

傷官兵困苦萬分需餉孔亟擬在長蘆鹽課

積欠內提銀五萬兩山東地丁積欠內提銀

十萬兩河南地丁積欠內提銀十萬兩直隸旗租積欠內提銀五萬兩請飭籌解等語著曾國藩丁寶楨李鶴年按照該部議撥數目督飭各該藩司趕緊撥解曾國藩並飭長蘆運司如數籌撥毋得遷延貽誤至本年黑龍江俸餉前經戶部指撥直隸山東河南及長蘆鹽課共銀二十三萬五千兩並著各照撥定數目源源報解將此由四百里各諭令知之○又諭李宗義奏毅軍在蒙境勦賊獲勝

一摺回目于得沅帶領賊眾由金積堡竄出在察漢淖爾盤踞提督蔣東才督軍進勦行抵胡魯蘇廟生擒賊匪多名旋至窩爾免溝該逆列隊拒戰遊擊黃義之等首先衝擊賊馬四路圍裹蔣東才將賊擊敗沿途擒斬甚多該逆復來襲營官軍乘勝掩殺山拗伏賊與前股敗逆出拒經礮隊將其賊首轟斃賊眾潰逃又經各營追殺步賊盡被殲除所餘馬賊向西南狂奔受傷亦已過半現在五勝

旗內據報已無賊蹤蔣東才亦撤回神木惟逆首于得沅尚無實在下落此股賊匪既屬兇悍異常難保不勾合各路回匪復圖竄擾仍著李宗義迅咨宋慶檄飭蔣東才等勤加偵探並於沿邊處所豫籌防範如有匪蹤竄近卽行相機截勦毋稍疏虞前據定安奏烏紳旗境尚有回匪滋擾該將軍務飭扎那噶爾第等偵明賊蹤分投堵擊一面咨令宋慶與各軍聯絡聲勢妥籌布置以遏寇氛將此

由五百里各諭令知之○命光祿寺少卿潘斯濂提督山東學政壬午以神靈顯應頒山東棲霞縣

關帝廟扁額曰神功昭佑○諭內閣鴻臚寺少卿張緒楷奏天時亢旱請飭各省大吏力除積弊以迓和甘一摺本年近畿雨澤愆期天氣亢旱深宮循省焦慮時深各省大吏亦當仰體朝廷兢惕之心勤修民事以消沴癘而迓祥和卽如徵收錢糧本有例限乃地方

官每藉口軍餉緊急先期催徵遇有水旱之災民力愈形拮据著各直省督撫申明舊例務令仍按上下兩忙徵收不得違例豫徵以紓民困近因軍務未平各省釐金分別裁減酌留大宗以濟軍餉原屬不得已之舉若各州縣私設釐卡藉端漁利實屬大干法紀著各該督撫將停止釐卡處所明白曉示以杜蒙混其有地方劣紳假公濟私把持公事勒捐科派等弊並著嚴行查禁毋任擾害閭閻

至各省京控案件有經年累月未經奏結者牽累多人羈禁無辜情尤可憫各該督撫務當破除情面認真整頓將未結各案速為審結不得意存消弭日久拖延將此通諭知之○諭軍機大臣等鴻臚寺少卿張緒楷奏直東騎馬賊匪根株未盡屢有路刦之案地方官諱匿不報現當天氣亢旱恐該匪徒煽惑飢民滋擾請飭查拏等語直隸山東交界處所騎馬賊匪不時出沒為害地方現在雨澤

愆期人心不免浮動恐該匪等勾結無賴游民乘機滋事不可不豫為防範著曾國藩于寶楨各派妥員會同地方官不分畛域一體認真緝拏消患未萌並著飭令各該地方官遇有搶刦之案立即嚴密查拏毋令匪徒漏網儻有諱匿不報即行嚴叅懲辦將此各諭令知之○新建安徽渦陽縣學宮撥置文學額十名武七名裁蒙城縣訓導改設渦陽以亳州義門巡檢屬渦陽縣管轄移亳州州同

於丁固寺集為分防州同從署巡撫英翰請也○癸未諭軍機大臣等單懋謙恩承奏修理河道等工將次完竣請派員驗收並酌擬歲修工程各摺片

永陵河道工程經單懋謙等督工興修據稱草倉河蘇子河河身挑濬深通月牙隄泊岸均已下椿安固五月內可以一律完工請派員驗收等語著派綿宜於工竣後即行詳細驗收具奏其應行補種樹株以肅觀瞻之處著

都興阿奕慶酌議辦理現在隄岸修築整齊並將蘇子河南岸淤沙一律挑除惟河水挾沙而行淤塞甚易必須隨時挑濬方無積滯衝刷之虞即著照單懋謙等所擬辦理原片著鈔給都興阿奕慶閱看將此各諭令知之尋綿宜奏遵驗各河道俱挑濬深通修築隄岸均已竣工報聞○命通政使司副使朱智仍在軍機章京上行走○緩徵山東汶上陽穀壽張觀城聊城博平茌平清平莘冠

德東平平陰堂邑武城十六州縣暨德州濟甯東昌三衛被旱地方本年上忙額賦並雜課有差○甲申以廣東官軍援勦江西福建竄逆暨勦辦西江翁源土客各匪出力予總兵官卓興以提督簡放賞總兵官方耀一品封典副將湛恩榮知府方勳都司方鼐方恭蔡申莫善喜巴圖魯名號守備卓梅等花翎千總曾龍等藍翎餘加銜升敘開復有差子陣亡參將朱國雄守備林發等祭葬世職加

等○乙酉諭軍機大臣等英桂奏拏獲句煽洋人構釁之要犯遵旨正法一摺已革副將蕭瑞芳即蘇阿成先在廣東原籍煽惑洋人構禍繼在臺灣偷見洋弁唆其開礮占署釀成巨案實屬罪大惡極經黎兆棠將該革員拏獲遵旨即行正法辦理深合機宜其未獲之許建勳仍著英桂密飭黎兆棠不動聲色務將該犯迅速拏獲立正典刑毋令潛逃出洋句煽滋事將此由五百里密諭知之○以

陝西勦辦回匪土匪全境肅清出力賞道員文墀等花翎知縣李宗緒等藍翎餘加銜升敘有差○

上以夏至祭

地於

方澤自是日始齋戒三日○丙戌以直隸天津驗收海運漕糧完竣予主事胡義質等加銜升敘有差○丁亥諭內閣前因京師入春以來糧價昂貴貧民覓食維艱業將普濟堂功

德林粥廠及五城十五處飯廠展限兩箇月。現在天氣亢旱雨澤愆期小民益增苦累。所有五城十五廠及普濟堂功德林等處均著加恩按照前限再行展限兩箇月。卽著戶部趕緊籌款發交五城御史接辦。該御史等務當督率司坊各員認真稽查俾小民均霑實惠。如查有胥吏等從中私易米石剋扣侵漁著卽從嚴懲辦。其長椿寺等處粥廠並著各該御史會同各紳士寬籌經費妥為施放。至

內城地面並六城門外應如何開放粥廠接濟民食之處著順天府尹體察情形酌量辦理。以翰林院編修王緒曾為湖南鄉試正考官。檢討楊泰亨為副考官。太僕寺少卿丁紹周為四川鄉試正考官。內閣中書劉景宸為副考官。戊子夏至祭地於

方澤遣睿親王德長恭代行禮。
孝恭仁皇后忌辰遣官祭

景陵○己丑諭軍機大臣等成祿奏東路勦辦得手回股西竄請飭左宗棠分兵夾擊並請轉飭甘涼各廳縣按月攤派軍糧及籌款採買糧石復自陳病情各摺片據稱甘涼一帶尚係完善之區為省糧所自出。現在東路大兵勦辦得手回股逐漸西趨若由南北兩路竄擾口外安敦玉防兵極單西路甚屬可慮請飭左宗棠先撥二三十營派員統領西上將河西南北兩路各要隘分布堵扼其撫彝

高臺應運省城倉斗糧四千石業經全數截留而士卒三千餘眾日食浩繁請飭左宗棠檄飭甘涼各廳縣按月攤派供支抑或籌撥餉項轉飭採買糧石以濟軍食。西路情形緊急該提督傷病舉發並請飭迅速分兵以資夾擊等語成祿所部現計僅有八營而南山口太多勢將顧此失彼東路得手以後零星回股已有偷竄河北者該軍月餉又因道路梗塞各省撥解無期士卒日形苦累所奏

亦係實情左宗棠駐軍甘境西路自應兼顧刻下回股逐漸渡河該大臣務當揆度情形撥軍西上與成祿一軍聯絡聲勢將南北兩路要隘嚴密設防並相機分兵夾擊以保甘涼門戶其甘涼各廳縣能否攤派該軍口糧及籌款購糧俾資接濟之處並著隨時斟酌辦理至成祿應否撤回或酌留該大臣軍營及所部勇丁應撤應留仍著懍遵疊次諭旨覈議具奏將此由五百里諭令知之○又諭

成祿奏軍營需餉甚亟請飭四川迅解協餉等語四川應解成祿軍營協餉連年積欠至四十二萬兩之多現在該軍營需餉甚殷自應趕緊籌撥以資應用著吳棠迅即先行籌措銀一二十萬兩發交成祿派來委員胡飛鵬承領解運毋稍延緩將此由五百里諭令知之○庚寅諭軍機大臣等崇厚奏津郡民人與天主教啟釁現在設法彈壓請派大員來津查辦一摺據稱天津地方有匪徒迷拐

人口牽涉法國教堂情事經崇厚與法領事豐大業等約定於五月二十三日令天津道府縣帶同匪犯武蘭珍親往天主堂面見教士謝福音並帶該犯指勘所歷地方房屋與該犯原供不符亦即帶犯而回旋據教士謝福音至崇厚處商量以後查辦之法商妥去後是日未刻忽聞有教堂之人與觀看之人口角爭毆正在派委武弁前往彈壓法領事豐大業忽來署中神氣兇悍帶有洋槍二桿

後跟一外國人手執利刃出言不遜將洋槍向崇厚施放幸未被中該領事將桌上物件信手砍損咆哮不止崇厚以其時民情洶洶恐激成事變勸令該領事不可出去豐大業竟飛奔出署天津縣知縣在彼彈壓當面勸阻該領事即對其放槍將該縣知縣家人打傷百姓激於眾忿將該領事羣毆至死並焚毀教堂等處房屋現在民情稍戢等語仍著崇厚督同地方文武將該民人等設法開導

妥為彈壓毋令聚眾再滋事端曾國藩病尚未痊本日已再行賞假一月惟此案關係緊要曾國藩精神如可支持著前赴天津與崇厚悉心會商妥籌辦理匪徒迷拐人口挖眼剖心實屬罪無可逭既據供稱牽連教堂之人如查有實據自應與洋人指證明確將匪犯按律懲辦以除地方之害至百姓聚眾將該領事毆死並焚毀教堂折毀仁慈堂等處此風亦不可長著將為首滋事之人查拏懲辦俾昭公允地方官如有辦理未協之處亦應一併查明毋稍迴護曾國藩等務當體察情形迅速持平辦理以順輿情而維大局原摺著鈔給曾國藩閱看將此由五百里各密諭知之○又諭左宗棠穆圖善奏各營勦賊獲勝情形一摺甘肅永昌縣境突有竄匪肆擾經總兵王仁和派隊往勦賊始敗遁其竄擾中衛地方賊股亦經總兵黃金山疊次擊敗擒斬甚多副都統善山保等復在金縣平

番境內勦賊獲勝此次附省各營遇賊即擊尚屬奮勇惟賊股未盡殄滅難保不去而復來仍著穆圖善分飭各營隨時加意偵探認真堵擊毋稍疏懈永昌中衛金縣平番等處既有匪徒四出滋擾省城根本重地尤須加意防維穆圖善當就現有兵力分投防勦毋任賊勢蔓延左宗棠雖尚駐平涼亦當妥籌兼顧不得稍存膜視本日據豫師奏部撥西甯專款每月銀二萬數千兩請飭西征糧臺墊解足數等語豫師現在募勇五營需餉甚殷部撥各省月協西甯專款共銀二萬數千兩本歸西征糧臺轉解著左宗棠行知袁保恆按月照數轉解西甯如各省協款未能按期如數解到即著袁保恆先行設法籌解足數以應急需毋許推諉將此由五百里各諭令知之○又諭豫師奏籌募平番等處勇丁並接左宗棠咨招募巴扎等處團民酌辦情形各摺片西甯竄賊麇聚且有窺伺碾伯之

意陝河各逆有圖攻威遠堡為馬化澄徒巢之計亟應迅籌援勦豫師現擬俟撥款到日卽派遊擊張鴻發等前往平番一帶募練成軍著卽飭令該員等認真選擇總須一兵得一兵之用不得濫行開募徒糜餉項礪伯等處團堡向尚得力並著督飭該處文武竭力整頓藉資保衛左宗棠擬募巴扎等處團勇助勦豫師以該處竄匪充斥各團正在堵禦礙難招募著卽酌度情形咨商左宗棠妥籌

辦理此時豫師所募新勇尚未成軍左宗棠又無可撥之兵著豫師飛飭穆圖善所撥唐有彥三營先行馳赴防所力籌保護仍一面趕募新軍協同堵勦毋稍疏虞西甯地方彫敝別無可籌之款所有指撥西甯月餉著戶部行知各該督撫務須照數源源籌解不得稍有延欠將此由五百里諭令知之○命直隸總督曾國藩前赴天津查辦事件○以直隸永定河節次辦工出力賞道員蔣春元一

品封典同知銜州同王養壽花翎縣丞王仁寶藍翎餘加銜升敘有差○予甘肅花馬池陣亡把總張護清祭葬世職加等○予甘肅小龕峪陣亡防禦滿達哩佐領訥恩等祭葬世職加等○予甘肅甯夏殉難佐領達杭額祭葬世職加等○追予直隸各屬陣亡殉難監生高淸輝等紳民婦女二千一百七十名口分別旌卹如例○豁免直隸安隆平文安三州縣積澇地畝上年額賦並緩徵節年糧

租暨民借倉穀○辛卯

上復詣

大高殿祈雨壇行禮○遣惇親王奕訢恭祀

天神壇醇郡王奕譞恭祀

地祇壇孚郡王奕譞恭祀

太歲壇睿親王德長詣

關帝廟貝勒奕劻詣

城隍廟惠郡王奕詳詣

時應宮鎮國公奕詢詣

昭顯廟鎮國公奕謨詣

宣仁廟貝勒溥莊詣

凝和廟肅親王隆懃詣

覺生寺鎮國公載綱詣

黑龍潭鄭親王承志詣密雲縣

白龍潭輔國公績銘詣清漪園

龍神祠輔國公裕恪詣靜明園

龍神祠拈香以驗收海運漕糧完竣予刑

部尚書鄭敦謹倉場侍郎英元優敘○壬辰

諭內閣前因京師亢旱疊經降旨祈禱連日

陰雲密布霖霖時施昨日甘澍旁敷土膏滋

潤此皆仰賴

昊慈默佑寅感實深朕於二十八日親詣

大高殿拈香以答

神庥惟時逾夏至農田望澤猶殷仍冀甘霖疊

沛優渥均霑以迓和甘而慰民望○又諭崇

厚奏津郡民教啟釁爭毆自請治罪並將地

方官分別嚴議革職一摺此案天津民人因

迷拐幼孩匪徒有牽涉教堂情事懷疑啟釁

復因法國領事官豐大業在崇厚署中施放

洋槍並向天津縣知縣放槍忿激致將

豐大業斃命並焚毀教堂崇厚辦理通商事

務不能綏靖地方天津道周家勳有表率之

責未能先事豫防天津府知府張光藻天津

縣知縣劉傑辦理不善以致釀成巨案均屬

咎無可辭崇厚周家勳張光藻劉傑著先行

交部分別議處仍著曾國藩於抵津後確切

查明嚴叅具奏至迷拐人口匪徒及為首滋

事人犯均應查拏懲辦並著曾國藩會同崇

厚徹底根究秉公辦理毋稍徇徇尋吏部議

崇厚應降一級留任從之○又諭前因文麟

奏叅何瑄驕縱妄為及遊擊孫淵椿恣肆不

法各款當經諭令伊勒屯查明具奏茲據奏

稱巴鎮弁兵率多驕縱何瑄平日失於拊循

幾至不能統馭其所叅文麟把持糧道各情

亦無實據等語此案巴里坤鎮總兵何瑄雖

無故縱弁兵情事而遇事措施失宜已可概見姑念督兵防守尚屬得力著交部議處以示薄懲署遊擊孫淵椿被陳國清所控霸種田地姦淫婦女各節經伊勒屯詳加訪察及查覈案據其驕劣妄為實與原奏無異孫淵椿著卽革職交刑部按律治罪以肅營伍○諭軍機大臣等昨因崇厚奏津郡民教構釁情形當經密諭曾國藩前赴天津與崇厚悉心妥籌持平辦理本日復據崇厚奏自請治

罪並將天津道府縣各官請分別嚴議革職及查津郡現在情形各摺片已明降諭旨將崇厚等先行交部分別議處並令曾國藩於抵津後確查奏參矣匪徒迷拐人口本干例禁究眼剖心之事尤屬罪無可逭人所共憤全賴地方官平日嚴密稽查隨時拏辦如任民間擅自拏人實屬不成事體著曾國藩於抵天津後與崇厚體察情形妥為辦理嗣後遇有此等案件惟當責成地方官嚴密拏辦

並飭該府縣剴切曉諭不准民間擅自拏人徒滋紛擾至百姓毆死領事焚毀教堂各情尤宜迅速查明一面檄飭地方官嚴緝正兇彈壓滋事人眾毋任再啟釁端以安中外人民之心原片著鈔給曾國藩閱看將此由五百里各密諭知之○派惇親王會同御前大臣閱侍衛等騎射○追予四川邛州等處陣亡殉難紳民孫華章等暨婦女三百七十七名口分別旌卹如例旌表過門守節故候

選筆帖式景曾聘妻馬佳氏 癸巳

上詣

大高殿謝雨行禮○諭軍機大臣等文麟景廉奏妥逆遣賊赴肅沿途搶劫疊經弁勇民勇擊敗並鈔錄偽文呈覽一摺烏嚕木齊逆首妥得璘遣馬賊由南湖沿邊潛赴肅州沿途劫搶統領魏忠義率領弁勇由石槽折回小西梁追至大圪塔迤東奪回搶去商駝等物該逆復由北山竄至玉門縣之黃花營肆行

搶掠亦經該處民勇戶民擊敗仍著文麟景廉督飭兵勇勤加訓練隨時嚴為防範一面激勵各處民勇協同守禦毋任該逆乘虛肆擾以靖地方安西玉門等處臺站時有搶奪公文案件亦屬不成事體並著該大臣等咨會安肅道飭屬隨時查究毋稍遺失至肅州甘州西甯薩拉固原河州花寺泰子寺碾伯米拉溝等處回眾紛繁妄得璘索煥漳時以偽劄句令出關難保不乘機蠢動即著左宗

棠穆圖善分飭各路帶兵將弁時加偵探如遇有匪蹤竄至即行勦捕淨盡以斷賊援關外地方遼闊回逆詭譎異常文麟等當懷遵疊次諭旨力籌保衛不可稍涉大意肅州收復未久人情易滋浮惑成祿亦當檄飭該處防守文武加意巡防毋令妄得璘等從中勾結別生事端蘇海麟等自求辦撫本不足恃現據偽文內有劄付蘇海麟等語可見逆酋並無向順之心該提督仍當與文麟等妥籌

防勦毋為該逆所給將此由五百里各諭令知之○甲午諭軍機大臣等金順奏甯夏回情並籌辦勦撫機宜繪圖呈覽一摺據稱回匪乞撫應予限呈繳馬械一律平毀寨壘仍以兵力鎮壓惟官軍缺糧須運道疏通再圖進剿等語現在軍務既不難於勦賊而難於籌糧即著金順會同張曜趁此石磴一帶並無賊蹤將軍食軍械源源運解毋令稍有缺乏一面聯絡河東各軍迅籌進剿之策將兇

悍回匪悉數殲除仍當加意防範毋以該逆暫時乞撫為可恃稍涉疏懈致為所乘圖留覽將此由五百里諭令知之○以大理寺卿劉有銘為都察院左副都御史○乙未諭內閣前因天津地方有匪徒迷拐幼孩牽涉教堂民間懷疑啟釁將法國領事官羣毆斃命焚毀教堂並毆斃多人兼誤殺俄國商民情形甚屬可憫業經降旨將崇厚及辦理不善之地方官先行交部議處仍令曾國藩確查

具奏並將迷拐人口匪徒及為首滋事人犯嚴拏懲辦因思各國通商以來遇有交涉事件皆有條約可循中外商民相安已久朝廷一視同仁但分良莠不分民教各處匪徒如有影射教民作奸犯科者即應隨時訪拏詳細究明從嚴懲辦豈可任令民間傳播謠言妄行生事此次天津既有民教滋鬧之事恐各省地方亦不免因此懷疑啟釁著各直省督撫嚴飭所屬地方官務須剴切曉諭妥為

彈壓並將各處通商傳教地方隨時保護毋任愚民藉端滋事○諭軍機大臣等李鴻章奏行抵潼關派兵相機堵剿並請調郭寶昌赴陝各摺片李鴻章現已督帶各營先後入關擬令周盛傳一軍進顧北山郭松林一軍專顧腹地布置甚妥即著分飭各營會同陝楚各軍隨時認真堵剿迅將本境匪類掃數殲除毋令外匪乘隙竄回再圖勾結滋擾以期綏靖地方陝省產糧較少轉運維艱該督

已派道員郭道直前赴晉省沿河一帶提取各州縣辦存軍糧由宜川等屬近水處所分路轉運並因郭松林進紮西北為之謀及糧運辦理均合機宜即著該督悉心籌畫以裕軍食一面進駐西安隨時相度機宜會商蔣志章次第妥辦晉防已鬆郭寶昌在晉僅帶一營此時自不妨抽動李鴻章以該提督熟悉北山情形檄令來陝會同周盛傳等勦辦北山土匪潰勇著李宗義即飭郭寶昌迅帶

該營西渡聽候李鴻章調遣郭寶昌原防地段著李宗義即於防河各營內酌量勻撥填紮免致貽誤將此由五百里各諭令知之○命三口通商大臣兵部左侍郎崇厚為出使法國欽差大臣以大理寺卿成林署三口通商大臣○予故丁憂浙江衢州鎮總兵官陳東友祭葬卹廕如軍營病故例

大清穆宗繼天開運受中居正保大定功聖智
誠孝信敏恭寬毅皇帝實錄卷之二百八十三

實錄卷之二百八十三

二十五

大清穆宗繼天開運受中居正保大定功聖智
誠孝信敏恭寬毅皇帝實錄卷之二百八十四

同治九年庚午六月丙申朔

上詣綏履殿問

慈安皇太后安平安室問

慈禧皇太后安至甲子皆如之○以祈雨靈驗

加直隸邯鄲縣

聖井龍神廟封號曰靈應並頒扁額曰甘霖

慰望○諭軍機大臣等曾國藩奏奉旨飭赴

天津恭摺覆陳一摺所稱民教啟釁一案總

以武蘭珍是否果為王三所使王三是否果

為教堂所養○它眼剖心之說是否確有證據

為案中最要關鍵。審虛則洋人理直。審實則洋人理曲等語。可謂切中事理。要言不煩。卽著飭令派出之道員。博多宏武等。會同天津道府徹底根究。妥籌辦理。昨已特命崇厚充出使法國大臣。其三口通商大臣。派成林前往署理。以冀潛伐敵謀。消弭隱患。曾國藩眩暈之證。現已十愈其八。日內如可支持。卽著前赴天津。會同崇厚悉心商辦。至傳教習教之人。傷斃若干。中國外國之人。無故被害者若干。皆須切實查明。嚴拏兇手。以懲煽亂之徒。彈壓士民。以慰各國之意。尤為目前要務。並著認真區畫。妥速籌辦。原摺著鈔給崇厚閱看。將此由五百里各密諭知之。○又諭定安奏酌擬變通轉運章程一摺。據稱甘省甯靈至晉之歸綏一帶。本非官塘驛路。自陝北回蹤竄擾。花定道路梗塞。湘卓等營及金順張曜成祿各軍營轉運糧石軍火。皆改由歸綏和歸薩三廳差務絡繹。近復添運靈州各

營軍餉。而薩拉齊一廳。遠無接替。不能不借用上站。以致歸薩車馳均多去而不返。所經蒙古地面。係烏喇特三公旗遊牧該蒙古情形困苦。卽使勉設臺站。亦難持久。擬在包頭以西至沙金托海一帶。分局接替。晉省西路內地各州縣及邊外和歸兩廳。仍循劉典現定章程辦理。薩拉齊應送餉銀軍火。止令送至臺梁。自臺梁以西。則由山西陝西甘肅設局接替。山西總局設於臺梁邊外之豐鎮甯遠。尚可令其協濟。陝西總局設於纏金。甘肅總局設於磴口。蟬聯接運。甯夏靈州運解各件。均照陝北現辦章程。如與陝甘軍務無涉者。不得濫用。各營押運員弁。如有需索騷擾情事。卽由各總局查辦等語。所奏係為疏通轉運起見。陝甘各路軍營。每以糧運艱滯為慮。邊內邊外等處地方。疊遭賊匪蹂躪。苦累不堪。自應變通辦理。著左宗棠李鴻章李宗義蔣志章按照定安所陳各節。斟酌情形。悉

心籌辦以期軍無乏食而使各處地方不至日形擾累甯靈等處轉運軍餉事同一律俟議定後卽由定安李宗義知照金順等辦理至烏喇特三公旗地畝既可令蒙古佃種卽著定安等於各總局設立時分飭該委員等勸諭居民起興耕作以裕足食之源烏喇特等旗現經設立臺站定安當豫籌經費暫令各該旗照章供應一俟各路運道通行再為停撤其山西局應支各項向由陝省領款歸

還著定安咨明李宗義督飭該藩司於設局之初先行籌款墊解以資接濟定安摺均著鈔給閱看將此由五百里各諭令知之○改廣東新設陽江直隸州為直隸同知州判為縣丞學正為教諭吏目為司獄從總督瑞麟等請也○丁酉撥神機營馬洋槍二百桿解赴熱河軍營備用○戊戌諭軍機大臣等李宗義奏河東豫引積滯請飭禁違章抽釐並嚴緝私鹽一摺據稱河東豫引滯銷因蘆紅

小土各鹽越境侵灌豫省行銷引地各州縣未經會同委員認真協緝所致且河東每年向有津貼河南銀二萬兩不應再抽鹽釐近來南陽府唐縣等處仍復私抽釐金遂致成本愈重引銷愈行壅滯等語著李鶴年嚴禁河南各府州縣毋許違章抽收鹽釐並飭行銷河東引鹽之各地方官會同委員認真巡查遇有蘆紅小土各私鹽越入引地立卽嚴拏私販人犯照例懲辦所獲私鹽一半歸公一半充賞先將獲犯官役隨時鼓勵俟試辦一年如有成效准李宗義會同李鶴年將委員及地方官等奏請優獎如或虛應故事會緝不嚴任令私鹽攬越並各府州縣仍敢私抽釐金以致滯銷虧課卽著李宗義會同李鶴年查明奏參以示懲儆將此各諭令知之○又諭福濟奏厄魯特人眾情願仍回布倫托海一摺前因厄魯特人眾流離困苦情形可憫特令福濟等妥為安插乃該人眾始則

自願東徙旋復任意逗遛且有沿途搶掠情
事實屬冥頑不靈現在該人眾既願仍回布
倫托海業經福濟酌給牛羊銀兩等項令其
折回著卽派員照料護送起程責成該管官
沿途約束毋任滋生事端並著飭令巴彥特
古斯等派員迎護催令迅速西行毋稍逗遛
經過科布多地方時著奎昌文碩一體飭屬
護送俟其行抵布倫托海後卽飭該領隊妥
為收管俾安生業將此各諭令知之○又諭

福濟奏現派蒙兵擇要防堵請飭撥軍裝口
食銀兩等語現在福濟需餉甚急前由部庫
撥解察哈爾庫倫軍需銀各五萬兩著文盛
卽於此項銀兩內撥銀二萬兩知照福濟委
員迎提並著張廷岳阿爾塔什達於前撥銀
五萬兩內酌量情形如可勻撥銀二萬兩卽
行知會福濟派員提取應用福濟於此兩項
銀兩解到後務須撙節動用毋得稍有虛糜
將此各諭令知之○又諭奎昌奏起程赴塔

勘辦立界事宜一摺奎昌接准俄國來咨定
於五月二十九日會勘塔城牌博現已帶領
司員弁兵等由科起程馳赴瑪呢圖噶圖勒
汗地方按期與俄使會勘並先期派員查看
俄國已立牌博有無侵占所籌尚是著卽將
塔城立界事宜按照圖約會同俄使詳細履
勘毋任暗中侵占以重疆界所需經費事竣
覈實報銷奎昌因起程赴塔已將叅贊大臣
印務移交文碩接管所有科布多應辦事件

卽著文碩妥為經理將此各諭令知之○庚
子以山東捐輸軍餉永廣臨邑縣學額四名
臨朐縣三名東平州二名○以陝西雒南縣
捐修城垣永廣學額一名○壬寅諭軍機大
臣等左宗棠穆圖善奏分防各營勦賊獲勝
並調兵勦辦竄匪一摺陝西賊匪自金積堡
擊敗後復勾結河狄股匪分途竄擾經穆圖
善飭令西路各軍迎頭截擊立將柳林湖等
處竄匪擊敗其駐紮阿干鎮及安定各軍亦

先後勦賊獲勝。惟碾伯縣及威遠營堡尚有陝回竄越。並句結本地回匪肆行滋擾。穆圖善現調懷義軍分隊援勦。卽著左宗棠、穆圖善飭令王仁和等乘勝追勦。迅將西路敗匪悉數殲除。檄令周維翰等嚴防阿干鎮及安定一帶。並飭唐有彥迅帶馬步各隊馳赴碾伯。先解威遠堡之圍。務將碾伯等處竄匪殲除淨盡。一面嚴防本地土回。毋令再行勾通外匪。擾累地方。將此由五百里各諭令知之。

○又諭張廷岳奏撤兵回庫。鄰盟尚有匪警。暨嚴防賊匪竄擾各摺片。前據福濟等奏股匪由原路竄回。軍臺靜謐。又據文盛奏賊匪向西回竄。軍臺所屬境內現無賊蹤。茲覽張廷岳所奏。賽因諾顏部落官兵與賊接仗。敗潰。賊卽折回額爾德尼班第達呼圖克圖廟內。烏里雅蘇台差探亦在沙爾噶勒珠特臺親見。並據扎薩克圖汗部落呈報。賊有於六月間竄擾額爾德尼班第達呼圖克圖廟後。

圖犯庫倫之語。與福濟、文盛等奏報不符。著張廷岳、阿爾塔什達再行確切偵探。固不可掉以輕心。亦不可聽傳聞無據之言。轉致人心惶惑。張廷岳現已帶兵回庫。酌留圖謝圖汗部落官兵防守額爾德尼等處。並籌辦清野之法。布置尚妥。卽著會同阿爾塔什達認真防範。總當持以鎮靜。不得過事張惶。至額爾德尼班第達呼圖克圖廟宇如何被陷。應如何撥兵防勦之處。著福濟、榮全迅速查明。妥為辦理。文盛亦當派委委員隨時探明。互相知照。庶彼此聲息相通。免致賊匪乘隙竄擾。至賽因諾顏部落現在究竟有無賊蹤。並著查明迅速具奏。將此由五百里各諭令知之。○駐藏大臣恩麟等奏遵查總噶箕藏格巴都爾在廓爾喀國內素稱公正。應請賞加王銜。得旨。藏格巴都爾既為該國民人所敬服。著加恩賞給王銜。以示優異。所有應給敕書著該衙門卽行頒給。○以甘肅馬隊官兵

勒辦西路竄匪出力賞驍騎校常興佐領銜
花翎委驍騎校慶祥等藍翎餘加銜升敘有
差○癸卯以甘澍優霑

上詣

大高殿行禮報謝○遣惇親王奕諒恭祀

天神壇醇郡王奕譞恭祀

地祇壇孚郡王奕譔恭祀

太歲壇睿親王德長詣

關帝廟貝勒奕劻詣

都城隍廟惠郡王奕詳詣

時應宮鎮國公奕詢詣

昭顯廟鎮國公奕謨詣

宣仁廟貝勒溥莊詣

凝和廟肅親王隆勲詣

覺生寺鎮國公載綱詣

黑龍潭鄭親王承志詣密雲縣

白龍潭輔國公續銘詣清漪園

龍神祠輔國公裕恪詣靜明園

龍神祠拈香○諭內閣永存舒恆奏請飭迅

撥米價銀兩並嚴催欠交米石一摺直隸藩
庫應撥承德府採買兵米銀兩僅據解到同
治七年秋冬二季其同治八年兵米尚未採
買現在支放屆期亟應迅速籌撥著直隸總
督飭令藩司將同治八年應發米價銀兩迅
速籌撥交該府州縣趕緊買運交倉不得稍
有蒂欠其前任代理平泉州知州金齡欠交
米石並著嚴催飭令迅速完交以重倉儲○

諭軍機大臣等曾國藩奏起程赴津籌辦情
形一摺據稱教堂牽涉迷拐之案訊供稍有
端倪尚未能確指證據等語此案啟釁之由
因迷拐幼孩而起總以有無確據為最要關
鍵必須切實根究則曲直既明方可再籌辦
法至洋人傷斃多人情節較重若不將倡首
滋事之犯懲辦此事亦勢難了結著曾國藩
崇厚悉心會商體察事機妥籌辦理以期早
日完案免滋後患曾國藩擬將誤斃俄國人

命及誤毀英美兩國講堂先行設法議結不與法國牽混所見甚是著卽會同崇厚妥為商辦以免齟齬將此由五百里各密諭知之○以四川官軍援剿陝西甘肅回匪出力賞都司何世林等花翎把總潘作雲等藍翎副將朱連陞等加銜升敘有差○賞節次設壇祈雨僧道銀○甲辰

上詣

奉先殿

壽皇殿行禮○以山東鄆城籌堵民捻決口不力巡撫丁寶楨下部議處革知縣徐大容職仍留任○乙巳諭軍機大臣等崇實奏遵旨查辦遵義教案陳明平日訪察情形及現籌辦理一摺據稱遵義圍民自打毀洋人教堂後川省久未得其消息前據余思樞稟稱此案已議給銀三萬兩而洋人要挾不情直至無從下手該將軍現難徑赴遵義先派同知楊蔭棠等馳赴該處設法勸導以通民情又

派知州桂溥先赴重慶密購線索以通教情並擬以巡閱川黔邊界為名順道查辦由重慶相機前進仍一面檄令蹇閣曉諭紳耆以圖結案等語所奏民教仇構各節亦係實在情形惟此案日久未結崇實既已悉其大概自不至畏難思阻卽著趕緊料理起程馳抵遵義督飭楊蔭棠等會同余思樞蹇閣各員反復開導持平審辦使該處紳民帖然相安而洋人無所藉口曾璧光身任黔撫責無旁貸仍著懷遵疊次諭旨將余思樞調赴遵義協同蹇閣等悉心籌辦並飭令各該員將隨時辦理情形呈報崇實以憑覈辦該撫尤不得以查辦有人稍涉瞻顧將此由六百里各諭令知之○丙午諭軍機大臣等蘇鳳文馮子材奏官軍攻剿叛匪疊破險隘現籌進逼一摺叛匪梁添錫遁入越南安邊地方勾結河陽踞匪黃崇英負隅抗拒經馮子材飭令副將劉玉成等分路進攻將那蓬坳及中芒

等處險隘攻破現擬進逼安邊河陽並飛咨雲南督撫撥兵扼守邊境卽著蘇鳳文馮子材飭令前敵各軍迅速乘勝進攻務將梁添錫等悉數殲除肅清夷境毋得稍事遷延並嚴飭各將弁約束兵勇沿途毋許騷擾一面飛催雲南派防之兵將該省接壤地方嚴密堵截以杜敗匪竄越廣西邊境時有土匪滋擾亦當嚴飭在防各軍加意扼守遇賊卽擊毋稍鬆懈一面保護運道俾前敵各軍糧餉不至缺乏方為周妥將此由五百里各諭令知之○丁未諭內閣布政使銜雲南迤東道蔡錦青布政使銜補用道沈壽榕前經劉嶽昭奏保一品封典嗣經吏部議駁茲據劉嶽昭奏請改獎等語蔡錦青著賞給從二品封典沈壽榕著賞給強都已圖魯名號○諭軍機大臣等劉嶽昭岑毓英奏克復威遠廳城南路肅清一摺雲南普洱府屬之威遠廳久為逆首馬標竊踞屢攻未下經劉嶽昭岑毓

英飭令迤南各軍會同土練分路進攻力戰年餘始將廳城克復其田四濫一股在四疊崖一帶恃險抗拒亦經官軍破其巢穴生擒逆首田四濫正法南路肅清惟馬標一犯現尚在逃未獲仍著該督等嚴飭所屬密速查拏懲辦毋任漏網田四濫餘黨並著妥為解散安插免致滋生事端威遠為大理後路與迤西聲息相通該處賊股業已殲除地方安謐正可乘此聲勢分路進規迤西使杜逆腹背受敵攻勦更易得手卽著該督等相機籌辦以期早日蕩平將此由五百里各諭令知之○以吏部右侍郎彭久餘為江西鄉試正考官內閣侍讀學士楊書香為副考官都察院左副都御史劉有銘為浙江鄉試正考官翰林院侍講李文田為副考官編修曹煒為湖北鄉試正考官兵部郎中蔡逢年為副考官○移湖北武昌城守營分防金口蘄洲二汛外委各一員於省城黃州協陽城把總於

黃安縣城黃安縣外委於黃陂站巴河口塘外委於麻城縣屬兩路口改道士汛外委隸興國營裁道士汛守備把總額外外委各一員李家渡額外外委一員金口簪洲李家渡兵丁共一百二十八名從總督李鴻章請也○以順天通州驗收漕糧完竣予戶部左侍郎魁齡倉場侍郎喬松年議敘郎中姚觀元等加銜升敘有差○以四川防勦雲南竄匪暨籌餉出力予道員李祐等加銜升敘有差

○以雲南克復鎮沅廳城暨南坵鹽井出力予千總陶升庭等以守備用並賞花翎州同周文佐等藍翎餘加銜升敘有差○以克復雲南威遠廳城賞知府廣潤等花翎把總劉楹等藍翎餘加銜升敘有差予陣亡雲騎尉陳國賓等祭葬世職加等○予甘肅肅州合門殉難故烏魯木齊提督文祺母佟佳氏叔母特爾欣氏暨妻妾子女等分別旌卹如例○已酉諭軍機大臣等宋晉奏和局固宜保

全民心未可稍失請飭曾國藩速查啟釁根由據實覆陳一摺據稱通商各國所駐之處久與民間相安惟傳教之法國所在皆傳有損折幼童窀穸心等事此次天津百姓激於義憤殺斃該國領事隨在天主堂地窖內放出小孩並於仁慈堂揆出幼孩及壘裝幼孩眼睛大率以此為詞欲懲擅殺之罪必究啟釁之根請飭該督速行查明曲直秉公辦理以釋民疑等語曾國藩前奏王三是否果為教堂所養窀穸心之說是否確實為全案關鍵等語已得辦理此案要領現在王三業經拏獲起出之幼孩亦經紳士收養徹底根查無難水落石出即著督同博多宏武等詳細研究審明虛實剖別曲直據實具奏該督素為中外所推必能明白昭彰使民心允服而各國亦無異詞也另片奏請飭曾國藩一面布置海口一面婉諭各國所籌亦係解散約從之策並著曾國藩酌量辦理原摺片

著鈔給閱看。宋晉又片奏長江水師緊要請飭彭玉麟迅赴江南整頓調楊岳斌同往及密飭劉銘傳來直並將來京引見之副將韓殿甲暫留差委等語。本日已寄諭沿江各督撫整飭水師並令彭玉麟迅赴江南矣。至劉銘傳能否來直楊岳斌起用能否得力韓殿甲有無謀畧足資差遣之處均著該督悉心體察據實奏聞。將此由五百里密諭知之。○又諭據宋晉奏江南設立長江水師原以控

扼海口巡邏江面近聞水師遠遜於前營制漸形疏懈並有不法水勇假巡邏為搶劫江面盜案屢出行旅戒嚴地方官不敢捕拏恐日久肆行轉致貽害請飭彭玉麟前往整理等語長江水師緊要豈容日久懈生現在各海口岸及沿江地方尤不可稍弛防範使宵小從而生心著馬新貽李瀚章丁日昌英翰劉坤一郭柏蔭劉崐按照曾國藩所定章程會同黃翼升時加整頓務使士卒驍壯號令

嚴明並一面檄飭各該地方官遇有水勇搶劫案件即行捕拏究辦不准互相容隱擾害商民黃翼升係專轄水師之員責無旁貸所有長江應辦事宜務須與沿江各督撫和衷商榷恪守成規其營弁兵勇尤當隨時稽查更番訓練必得聲威聯絡遠近懾服方為不負委任至水師創立規制係彭玉麟與曾國藩等籌畫而成該侍郎計已病痊劉崐接奉此旨後即著催令該侍郎迅速起程前赴江

南等省會同馬新貽等實心整頓力除廢弛情形以資控制將此由五百里各密諭知之○以工部左侍郎鮑源深兼署吏部右侍郎宗人府府丞唐士森署都察院左副都御史○庚戌月食○諭軍機大臣等左宗棠穆圖善奏截剿陝省回竄賊匪詳細情形左宗棠奏截剿陳林股匪各一摺陝回禹得彥崔三等股疊經官軍擊敗漏逸無多傳先宗等復擊賊於鞏昌等屬伏羌甯遠禮縣一帶均已

肅清正宜乘此聲威節節掃蕩著左宗棠飭令南路各軍迅由渭源進剿以規河狄毋稍遷延峽口要隘為賊所踞尤當迅飭雷正綰等力圖攻拔以奪金積之勢其陳林一股竄擾花定一帶經金運昌劉錦棠各軍擊敗陳逆受傷而遁現在陝回疊經受創金積賊勢漸孤左宗棠務當飭令劉錦棠等穩慎進取力拔堅巢該逆被圍緊急難保不遣黨四出圖擾後路並著嚴飭環慶等處防軍會合陝北各軍嚴密布置遇賊即擊毋稍疏懈省城附近及西路一帶時有匪蹤竄擾著穆圖善隨時酌量情形力籌防剿左宗棠亦當妥籌兼顧將此由五百里各諭令知之○以擅離職守革甘肅總兵官陶生林職並建問○以甘肅靈州等處截剿回匪獲勝賞總兵官熊道濱一品封典周顯明李必福裴思朝田連考副將朱鎮鳴遊擊李奪魁巴圖魯名號餘加銜升敘有差予陣亡遊擊黃俊傑等十四

員祭葬世職予甘肅安邊陣亡總兵官江登雲千總孫九齡祭葬世職

大清穆宗繼天開運受中居正保大定功聖智誠孝信敏恭寬毅皇帝實錄卷之二百八十四

督率烏紳旗托霍尼圖官兵視賊所向相機追擊並一面檄令巴達爾琿隨時偵探力籌防剿不可稍涉疏虞將此由五百里諭令知之○又諭定安奏歸綏軍務緊要餉項維艱請飭迅籌撥款一摺歸綏防兵餉項全賴山西等省每月協濟以應急需現在該處防剿正當喫緊且購買駝隻採辦糧米等項需用尤殷亟應趕緊籌撥以資應用山西欠解該處防餉甚多著李宗羲卽在本年應解京餉

項下劃撥銀十萬兩並於欠解歸綏月餉內先行籌撥銀十萬兩於六七月間一併解交定安軍營俾資接濟其每月應解之三萬兩仍著按月源源解往毋稍遲誤另片奏各處捐調駝隻將次解到需用駝乾甚殷請飭山東迅解防餉等語著丁寶楨嚴檄藩司卽將欠解歸綏防餉迅速埽數籌備剋期解往毋得稍有遷延將此由五百里各諭令知之○予山西綏遠城托霍里木廟陣亡烏紳旗扎

奇魯克齊赤樓多爾濟祭葬世職加等參領拉什扎木蘇等祭葬世職○甲寅諭軍機大臣等都興阿等奏查勘邊荒辦理情形一摺奉天遼陽門至鳳凰門一帶邊荒經都興阿等派員分段查勘九十一處因大雨時行路多阻隔擬將未經查勘地方俟秋後再行查勘雖係實在情形惟未查地畝尚多若不趕緊辦理任聽該委員等藉詞宕延將來大雪封山更難剋期辦竣著都興阿額勒和布恩錫嚴飭該委員等屆時迅速出邊將未查地畝一律查勘完竣造冊報部覈辦不准再事遷延將此各諭令知之○建奉天岫巖廳文廟學宮並設訓導一員文學額四名武學額二名從將軍都興阿請也○乙卯諭軍機大臣等福濟榮全奏竄匪復擾臺站籌辦防勦事宜一摺據稱推河迤西額爾德尼呼圖克圖招等處又有竄匪五六百人持械搶掠哈爾尼敦防堵蒙兵潰散賊匪向西竄回與

張廷岳前奏大畧相同。沙爾胡象蘇地方亦有賊股滋擾。並有仍入喀爾喀搶劫招廟商人撲犯烏城之說。邊外道途寥闊處處可通。若不趕將竄匪剿除。必至蔓延為患。福濟等現已酌撥兵勇赴臺防堵。並咨綏遠城察哈爾撥隊會剿。卽著定安迅派馬隊五百名酌給軍裝口糧。前赴哈爾尼敦一帶堵禦。其由綏撤回現紮賽爾烏蘇馬隊五百名。著文盛派令馳赴哈爾尼敦一同防剿。福濟等所調

滿綠營索倫官兵著卽趕催到齊。會同前項馬隊併力兜剿。務絕根株。惟賊蹤飄忽難保不此勦彼竄。軍臺一帶各宜加意偵探認真防範。著定安福濟榮全文盛張廷岳阿爾塔什達探明確蹤隨時互相知照免致賊匪伺隙奔突。福濟前請撥軍需銀兩當令察哈爾撥銀二萬兩並令張廷岳等酌量庫倫情形亦勻撥餉銀二萬兩。此外尚有新疆協餉銀兩著戶部分別咨催迅解烏里雅蘇台交福

濟等應用以資接濟。將此由五百里各諭令知之。又諭伊勒屯何琯奏營員病痊堪以起用並請飭撥防兵銀兩各摺片。巴里坤鎮遊擊陳升恆前因患病卸任該員現已病痊據稱尚堪起用著照所請准其仍回本任俟軍務告竣再行給咨送部引見。其駐紮奇台龍山口之勇目鄧生玉一軍現在防務緊要該勇丁等餉項支絀亟應迅籌接濟著福濟榮全於新疆軍餉內每月撥銀數百兩解赴

巴里坤由伊勒屯等發給以濟軍食。鄧生玉屢次勦賊出力著賞換四品頂帶。伊勒屯等仍飭令該勇目認真防剿不可始勤終怠。將此由五百里諭知福濟榮全伊勒屯並傳諭何琯知之。○以直隸永定河南岸漫溢總督曾國藩下部議處道員李朝儀通判朱津革職留任。革縣丞徐銓職不准留工。○丙辰諭內閣護軍統領克興阿奏請將未能攔阻車輜之直班護軍校等分別議處一摺。本月二

十日尚書萬青藜鄭敦謹車輛趕入東華門外柵欄之內該直班章京未能將車輛即時阻止實屬疏忽正紅旗空銜花翎護軍校恩祥司鑰長慶安著交部分別議處萬青藜鄭敦謹未能約束車夫人等亦屬不合均著交部議處尋議萬青藜鄭敦謹均罰俸一個月准其抵銷從之以翰林院侍講學士惠林為光祿寺卿○丁巳以內閣學士銘安為江南鄉試正考官翰林院編修林天齡為副考

官陸爾熙為陝西鄉試正考官國子監司業孫詒經為副考官○以品端課勤予江西教諭蔣芳訓導蕭九成加銜有差○予甘肅靈臺被戕把總蔣占春祭葬世職加等○戊午遣官祭

火神廟○諭內閣李鶴年奏請將才不稱職及人地未宜各員分別降補另補一摺河南候補知府師長怡辦事羸疏難資表率著降為同知歸部銓選孟津縣知縣茅恆春識見

鄙瑣不諳政體著以府經歷縣丞降補歸部銓選輝縣知縣鄧爾復人尚謹飭才欠開展相柏縣知縣崇縉心地明白歷練未深均著開缺留省另補○諭軍機大臣等前據曾國藩奏本月初六日起程赴津現抵該處已逾多日此案啟釁根由想該督必已詳細查明妥為籌辦矣迷拐一案究竟有無確據此係緊要關鍵即著該督迅速具奏以慰廑繫並將現在籌辦之法及該處近日民情一併奏

聞崇厚已派出使法國自應及早啟行著曾國藩體察情形如崇厚此時可以交卸即著該侍郎先行來京陛見以便即日起程其通商大臣事務著曾國藩暫時接辦成林現已病痊銷假不日亦可馳赴天津俟該京卿到時曾國藩即可將通商事務交卸將此由五百里各密諭知之○又諭有人奏風聞津郡百姓焚毀教堂之日由教堂內起有人眼人心等物呈交崇厚收執該大臣於奏報時並

未提及且聞現已消滅等語所奏是否實有其事著曾國藩確切查明據實奏聞至所稱傳教有礙通商一節應如何設法弭釁之處並著詳察情形妥籌具奏原摺著鈔給閱看將此密諭知之又諭袁保恆奏請飭催歸併續撥協餉一摺據稱四川湖北山西河南應協穆圖善軍餉每月九萬兩歸併西征糧臺催提分撥而各省應解之餉自正月以後僅據四川報解銀二萬兩山西報解銀三萬兩此外各省並無分毫報解其籌撥豫師軍餉已墊解六萬兩而指撥之河南山東兩淮每月二萬五千兩並無起解日期以後不惟無可再墊且已墊之款無可歸還現在情形萬緊請飭嚴催等語著吳棠馬新貽李瀚章李鶴年李宗羲丁寶楨郭柏蔭迅將各該省應解穆圖善豫師協餉分別如數籌撥解交西征糧臺以便袁保恆分撥應用不准稍涉延誤將此由五百里各諭令知之○以庸劣

不職廣東守備謝龍科勒休革千總溫若武職子廣東陽春等處陣亡州同銜王肇仁等紳士弁兵一千二百十九員名分別賞卹如例○己未諭內閣劉崐奏革員捏詞刁控並續查出劣蹟請飭查拏一摺湖南已革知縣陳士璵與已革知府陳鼎奎經劉崐參劾後輒敢捏詞牽涉該撫幕友許紹汾赴湖廣總督衙門呈控並據劉崐續查出該革員等劣蹟屬員因叅訐告上司意存挾制此風斷不可長亟應嚴切根究著李瀚章即將該革員陳士璵陳鼎奎查拏到案嚴行審訊按律懲辦○以翰林院侍讀學士徐桐為太常寺卿國子監祭酒翁同龢為太僕寺卿○庚申諭內閣曾國藩崇厚奏查明天津滋事大概情形一摺據稱研訊教民迷拐人口一節王三雖經供認授藥與武蘭珍然尚時供時翻亦無教堂主使確據仁慈堂查出男女一百五十餘名口均稱其家送至堂中養養並無

被拐情事至冤眼剖心一條經曾國藩於抵津時親加推問百姓無能指實詢之天津城內外亦無遺失幼孩控告之案此等情形如湖南江西揚州天門及直省之大名廣平皆有檄文揭帖紛傳不一厥後各處結案總未將檄文揭帖之虛實剖辨明白津民平日熟聞各處檄文揭帖之言已信為實而又因外國堂門終年扃閉教堂仁慈堂皆有地窖為去潮溼置煤炭之用治病者被留不出並收

留無依人口及疾病將死之人等情蓄疑莫解本年四五月間適有拐匪用藥迷人之事牽涉教堂該民人見領事官豐大業對官放槍遂致萬口譁譟同時並舉其實冤眼剖心戕害生民之說多屬虛誣毫無實據等語此案疊諭曾國藩會同崇厚持平辦理現據該督等奏稱此事均係謠傳津人致疑之由昭然共見外省地方遇有此等謠言羣疑亦可消釋至匪徒迷拐幼孩人口例禁本嚴惟恐

日久玩法著刑部於此等兇犯到案時即議以加等治罪嗣後各直省地方如拏有迷拐人口匪徒亦著照刑部所議從重處治以儆兇殘京師為首善之區尤宜揆查匪類並著步軍統領衙門隨時緝訪遇有此等匪徒即行拏交刑部加等治罪○諭軍機大臣等曾國藩崇厚奏查明天津滋事大概情形一摺曾國藩等此次陳奏各節固為消弭釁端委曲求全起見惟洋人詭譎性成得步進步若事事遂其所求將來何所底止是欲弭釁而仍不免啟釁也該督等現給該使照會於緝兇修堂等事均已力為應允想該使自不至再生異詞此後如洋人仍有要挾恫喝之語曾國藩務當力持正論據理駁斥庶可以折敵餒而張國維至豫備不虞尤為目前至急之務曾國藩已委記名臬司丁壽昌署理天津道篆其駐紮張秋之兵自應調紮附近要隘以壯聲威李鴻章已於五月十六日馳抵

潼關所部郭松林等軍亦已先後抵陝。此時竄陝回匪屢經官軍勦敗其銳漸衰若移緩就急調赴畿疆似較得力。著曾國藩斟酌情形趕緊覆奏。再降諭旨。日來辦理情形若何能否迅就了結。並著隨時馳奏總之和局固宜保全民心尤不可失。曾國藩總當體察人情向背全局通籌使民心允服始能中外相安也。沿江沿海各督撫本日已有寄諭令其嚴行戒備。陳國瑞當時是否到場到津後即可質明虛實。已令神機營飭令該提督赴津聽候曾國藩查問矣。將此由五百里各密諭知之。又諭前因天津民教啟釁諭令曾國藩前往查辦茲據曾國藩奏稱業經查明大概情形現擬妥為辦結等語。惟近日各省民教仇殺之案不一而足洋人動以兵船恐嚇訛索多方雖兵端不必自我而開然暗中防維實屬刻不容緩之舉。萬一事有決裂斷不能任其肆意猖獗不思未雨綢繆現在各省

沿江沿海口岸設立防兵能否真實可靠著馬新貽英桂瑞麟李瀚章丁日昌英翰劉坤一丁寶楨郭柏蔭劉峴李福泰黃翼升楊昌濬嚴飭各該處帶兵各員隨時訓練實力整頓該督撫等務宜悉心辦理不可徒託空言以期有備無患並將現在辦理情形詳細具奏將此由六百里密諭馬新貽英桂瑞麟李瀚章丁日昌英翰劉坤一丁寶楨郭柏蔭劉峴李福泰黃翼升並傳諭楊昌濬知之。○以

直隸天津疏防民教啟釁革知府張光藻知縣劉傑職下部治罪。○以擅動營款已革湖南遊擊艾憲銀遣戍軍臺。○追予湖北田家鎮陣亡道員張汝瀛謚勇節。於死事地方暨原籍建立專祠。○辛酉諭軍機大臣等左宗棠穆圖善奏官軍勦賊獲勝威遠堡解圍一摺回逆圍攻威遠堡經唐有彥帶隊在花園寺等處迎擊該逆潰遁立解堡圍鎮番縣屬沙窩地方復有賊匪圍攻民堡並有馬賊直

抵鎮番城下窺伺亦經韓廷芝等擊退其古浪縣屬之王家莊等處賊匪疊經常明等擊勦連獲勝仗斃賊甚多勦辦尚屬奮勇惟威遠堡一股勾結陝回尚踞白馬寺一帶而鎮番及秦旺川各隘零星股匪仍恐出沒無常阻我糧運著左宗棠移圖善督飭各軍將白馬寺等處踞逆相機痛勦並將零星各股就地埽蕩毋使糧路再有梗塞將此由五百里各諭令知之○又諭劉崐奏官軍疊克苗寨

收復巖門司城池北岸大致肅清一摺援黔各軍自躡平涼傘地賊巢及拔取新城後卽約川軍會師巖門經席寶田督飭鄧真發等軍分路進攻將亮擺高山各寨焚毀官軍乘勝轉戰陣斬逆首多名並將白洗等處援賊痛擊先後計毀平數十苗寨五月初十日席寶田飭唐本有等分攻巖門賊匪大敗立將巖門司城池克復適川軍亦克甕谷籠川楚兩軍勢已聯絡現自巖門以下白洗以上數

百里間悍苗斬除淨盡大致肅清其高碑花灘等處叢洞亦經席寶田飭軍進勦清平所屬之螃蟹數寨川軍亦可進取所有此次援黔出力人員著准其附於攻克施洞口案内彙請獎敘毋許冒濫刻下北岸各軍雖屬得手而南岸地勢袤廣苗寨尚多卽使攻拔台拱其丹江八寨一帶賊巢林立且去貴陽省垣猶遠必須合軍進勦方無後竭之虞仍著劉崐檄飭席寶田將未克巖洞迅速攻拔一

面督令唐本有等及果毅各營與川軍併力南圖毋稍鬆勁川軍旣與楚軍會合著吳棠飭令唐炯迅率所部相機夾擊以期埽穴擒渠並著將各該軍餉項源源撥給毋令稍形困乏黔邊援軍四集曾璧光亦當振刷精神就該省現有兵力督飭在事將士分投勦擊共殄寇氛將此由五百里各諭令知之○又諭劉嶽昭岑毓英奏官軍攻克姚州城池擒斬首逆餘賊殲除淨盡一摺姚州首逆馬金

保藍平潰等皆與杜逆同時搆亂著名兇悍之賊。此次官軍力拔堅城。擒斬逆首。從此杜逆黨與漸孤。進剿當易得手。著劉嶽昭、岑毓英、督飭李維述一軍。迅拔鎮南州城。卽與楊玉科等軍相機分路前進。以期早日蕲功。另片奏。激江竹園。勦賊獲勝等語。激江賊匪。經岑毓英督率各軍。於龍潭校場蘿蔔村及西山村一帶。攻破賊營。賊斃數十座。陣斬賊首多名。其竹園賊匪。亦經總兵張保和等督軍

進攻。連破營壘二百餘處。殲賊二千餘名。東西兩山夷寨。望風歸順。竹園下壩地方均已肅清。仍著岑毓英嚴飭各軍。乘勝攻剿。迅克激江郡城。並將竹園上壩賊巢一律掃蕩。以靖邊陲。將此由六百里各諭令知之。○以江西新城縣捐輸團練。永廣學額一名。○以湖南官員捐輸軍餉。永廣雲南昆明縣學額三名。江蘇宜興縣二名。○以河南鄭州捐修城工。永廣學額一名。○以克復雲南姚州城。擒

獲首逆。賞遊擊段瑞梅、徐聯魁、巴圖魯名號。都司蔣宗漢等花翎。州同朱錫熙等藍翎。餘加銜升敘有差。予陣亡都司唐文華等十二員祭葬。世職加等。○予貴州巖門陣亡參將黃守田等十三員祭葬。世職加等。○壬戌諭內閣。

慈禧皇太后之母承恩端恪公夫人溘逝。

慈衷哀慟。悲不自勝。朕仰體

孝思。中懷莫釋。著由內賞銀三千兩。交照祥等

祇領。經理喪事。○諭軍機大臣等。總理各國事務衙門奏。天津滋事一案。現辦情形一摺。據稱羅淑亞致曾國藩照會內稱。必須將天津府縣同陳國瑞先行在津正法。否則飭該國水師提督便宜行事。經總理各國事務衙門王大臣與威妥瑪面商。使其設法排解。該使答以止可由曾國藩照覆羅使。詰以此案必求立決。果係何罪。必須詳詢確情。不能僅憑傳聞之詞。遽行正法。一面由該使函勸羅

使各情業由總理各國事務衙門函致曾國藩並屬趕緊防範等語。前據曾國藩奏請將張光藻劉傑革職交刑部治罪辦理已屬過當。此次羅使欲將天津府縣同陳國瑞在津正法斷無如此辦法。萬難允准。著曾國藩崇厚懷遵前旨力持正論據理駁斥。以維大局。羅淑亞動以兵船恫喝若不豫籌備禦不但變生倉卒致為該夷所乘且恐該夷知我虛實得步進步要挾更不可言。雖現在設法轉

圜期保和局亦不可不調撥官軍為未雨綢繆之計。所有張秋銘軍即當調赴直境現應分駐何處著曾國藩妥籌布置並著該督檄催劉銘傳兼程赴直統帶銘軍以備緩急。李鴻章所部應否移緩就急調赴畿疆著曾國藩悉心籌畫趕緊奏聞。前諭神機營王大臣飭陳國瑞赴津聽候曾國藩查問此時羅淑亞既欲置之死地未便即令赴津本日並據醇郡王奏面詢陳國瑞據云抵津時適值民

夷構釁該員在廟寓未出旋有多人排門請謁求為畫策即答以係行路之人未便越俎繼聞崇厚被戕當赴通商衙門探視因係訛言遂與崇厚晤談而散至民戮夷人實未在场此外亦再無他事等語已諭令神機營王大臣暫緩派員伴送赴津矣。總理各國事務衙門摺著鈔給曾國藩等閱看將此由六百里各密諭知之。○又諭醇郡王奏風聞天津法夷有雇覓廣東匪徒四千藉圖報復之說

須豫為防範請飭密查等語著瑞麟李福壽飭令該地方官嚴密訪查如果屬實即設法妥為解散務使內地游民不為該夷所用方為妥善原片均著鈔給閱看將此由五百里各密諭知之。○又諭伯彥訥謨祜奏請調馬隊以備不虞一摺所奏不為無見著理藩院傳知東三盟蒙古王公等飭令各調馬隊一千名並著富明阿德英各調吉林黑龍江馬隊二千名務須挑選精壯揀派得力之員管

帶趁此秋高馬肥迅速飭令馳赴古北口一帶駐紮需用整裝口糧等項銀兩先行籌款墊給一面奏聞由部撥還所調馬隊作為豫防邊外回匪之用以昭慎密此項馬隊到口後著曾國藩傳諭傳振邦妥為照料聽候調遣古北口距熱河甚近並著庫克吉泰一體兼顧以後月餉需用若干著曾國藩庫克吉泰屆時奏明辦理將此密諭伯彥訥謨祜理藩院並由六百里諭知曾國藩庫克吉泰富

明阿德英傳諭傳振邦知之○

上以孟秋時享

太廟自是日始齋戒三日○癸亥諭軍機大臣等本日據崇厚奏稱法國水師提督都伯理到津崇厚前赴紫竹林晤都伯理所言與羅淑亞無異並據德微理亞言如二十七日四點鐘時尚無切實回信伊即進京將在京法國之人帶至天津羅使即帶同上船赴上海等語此時法國勢將決裂事機棘手德微理

亞進京一節曾國藩崇厚總宜設法阻止以免人心惶惑如業已起程一面迅速入奏一面飛咨總理各國事務衙門妥籌辦理據崇厚奏稱曾國藩觸發舊疾病勢甚重朝廷實深廬繫此案關繫頗大該督抱恙甚劇恐照料或有未周本日已諭令丁日昌星速赴津幫同該督辦理又以丁日昌由蘇赴津即航海前來至速亦須在旬日以外因先派毛昶熙前赴天津會辦該督等務當悉心籌畫此案了結總以愈速愈妙至天津府縣等正法一節既難照辦而為首滋事之犯自應趕緊緝拏如首犯緝獲則據理辯駁一切自易轉圜崇厚摺內所稱曾國藩論及道光年間辦理洋務以來時而主戰時而主和戰兩歧況目前情形尤與從前迥異一國構釁各國連衡沿江沿海防不勝防曾國藩所論切中情事著與毛昶熙崇厚熟籌辦法總以力保和局為要惟該國兵船業已到津意在開釁

現亦不可不豫為防範以備不虞。本日已諭令李鴻章帶兵馳赴畿疆候旨調派。並令傅振邦前赴天津聽候該督調遣。其練軍及標營官兵已令傅振邦豫為部署候調。張秋銘軍著曾國藩仍遵前旨。星速調直。妥為布置。將此由六百里各密諭知之。○又諭天津滋事一案。前經派令曾國藩前往查辦。本日據崇厚奏稱該督病證復發。臥牀不起。勢甚危篤。事機十分棘手等語。此事該使任意挾且以兵船恫喝。勢將決裂。本日已派毛昶熙前往天津會同曾國藩辦理。並令丁日昌由海道赴津幫同商辦。惟該國既有兵船到津。亟應豫籌備禦。曾國藩病勢甚重。一時實乏知兵大員。可資戰守。刻下陝省軍情稍鬆。著李鴻章移緩就急。酌帶郭松林等軍。剋日起程馳赴近畿一帶駐紮。屆時察看情形。候旨調派。現在事勢緊急。該督務須迅速前進。毋稍遲誤。其陝省防勦事宜。即著知照左宗棠。

蔣志章妥籌辦理。將此由六百里加緊密諭知之。○又諭本日據崇厚奏報並軍機大臣呈遞崇厚信函內稱法國水師提督都伯理所言與羅使無異。並據德繙譯聲稱如至次日四點鐘時尚無切實回信。伊即進京。將在京法國之人帶至天津。羅使即帶同上船。前赴上海。崇厚當赴曾國藩處告知情形。該督舊證復發。嘔吐大作。臥牀不起。各等語。事機緊迫之際。曾國藩病軀未愈。恐難獨力支持。而中外大局所關。又不能不亟籌辦法。丁日昌於洋務情形向來熟習。該撫接奉此旨。即著剋日起程。或坐中國輪船。或坐別國輪船。迅由海道駛赴天津。幫同曾國藩辦理。該撫由海道赴津。計程尚須旬日。因先派毛昶熙前往會辦。現值事勢彌亟。該撫務當兼程前進。不得稍涉遲誤。丁日昌起程後。江蘇巡撫著張兆棟護理。上海地方緊要。羅淑亞等如果前赴該處。正恐心存叵測。不可不豫為之。

防著張兆棟隨時會商馬新貽妥籌防範毋稍大意。將此由六百里加緊密諭丁日昌並傳諭張兆棟知之。○又諭江蘇上海為洋人往來駐足之所。尤為緊要。現在羅淑亞既有欲帶在京洋人同赴上海之說。心懷叵測。亟應早為備禦。著馬新貽迅將海口應辦事宜。隨時會商張兆棟妥籌防範。不可稍涉大意。將此由六百里加緊密諭知之。○又諭傳諭直隸提督傅振邦。天津滋事一案。洋人肆意

要挾。勢將決裂。不可不豫為防範。天津地方現乏帶兵大員。著傅振邦即行馳赴天津。聽候曾國藩調遣。其古北口練軍及該提督標營官兵。並著豫為部署。聽候調遣。以備緩急。現在並未打仗。不可稍涉張惶。○命工部尚書毛昶熙馳赴天津。會同直隸總督曾國藩查辦事件。○甲子。

上以孟秋時享

太廟前期親詣行禮。○諭軍機大臣等。曾國藩

奏遵旨覆陳一摺。洋人乞眼剖心之事。據稱查無確據。崇厚亦無消滅情節。此事著無庸議。至滋事正兇。現已拏獲九人。即著曾國藩等督飭道府。悉心研究。啟釁根由。如尚有未獲黨與。仍一面隨時緝拿。嚴行懲辦。自不難折服洋人之心。而操縱亦易為力。崇厚與洋人交涉日久。此時情形正緊。著准其暫緩來京。與曾國藩妥籌辦理。天津府縣議抵一節。斷難允准。該督照覆羅淑亞之言。亦頗詳晰。

該使當不至固執前意。設詞要求。已派毛昶熙赴津會辦。該尚書於七月初二日起程。抵津後一切應辦事宜。著該督等與之斟酌緩急。相機籌辦。昨諭李鴻章酌帶所部。剋日馳赴近畿一帶駐紮。以為津郡聲援。曾國藩現又令張秋全隊拔赴滄州。如此布置。當足破洋人恫喝之謀。該督等務於勢未決裂之時。竭力籌維。以期速了。片內所稱善全和局。以為保民之道。備豫不虞。以為立國之本。甚屬

曲中事理卽著該督堅持定見悉心經營用
全大局將此由五百里各密諭知之○追予
湖北武昌殉難知縣何開泰建立專祠家丁
姚福等一併附祀

大清穆宗繼天開運受中居正保大定功聖智
誠孝信敏恭寬毅皇帝實錄卷之二百八十五

同治九年庚午秋七月乙丑朔享

太廟遣孚郡王奕譞恭代行禮○

上詣綏履殿問

慈安皇太后安平安室問

慈禧皇太后安至甲午皆如之○諭內閣御史

李宏謨奏夏汛宜修河防一摺黃河工程緊

要現當夏汛期內尤宜加意修防以期穩固

著李鶴年督飭河南布政使遇有該工應發

之款先期如數籌給藉資興辦並著蘇廷魁

嚴飭該管道員常川駐工認真巡查如有在

工人員把持河務及領多發少藉圖侵冒者立卽嚴參懲處毋稍徇縱此外各河工省分並著各該督撫查有前項情弊一律參辦以重河防○諭軍機大臣等山東河南均為畿疆門戶武備尤宜講求該兩省用兵有年將弁兵勇之驍勇可恃者諒亦有人著丁寶楨李鶴年勤加整頓並遴選久經戰陣之員各帶勁旅隨時訓練聽候調撥此係先事豫籌以備不虞該撫等務須不動聲色悉心辦理

毋得稍涉張惶將此由五百里各諭令知之

○追予江蘇江都陣亡在籍內閣中書鍾淮建立專祠○追予江蘇各屬陣亡殉難同知銜吳燮等紳民婦女一千六百九十九員名口分別旌卹如例○丙寅諭軍機大臣等豫師奏威遠堡解圍現籌募勇進剿並請飭催俸餉一摺據奏威遠堡解圍情形與左宗棠等前奏大略相同豫師現派參將李春海等先赴平番募勇惟左宗棠借發餉銀尚未解

到豫師擬俟軍裝配齊卽行出省著左宗棠將先後借發西甯餉銀四萬兩迅速解交豫師應用並著豫師飭令李春海等趕將勇丁募齊選練成軍卽日統率西上會同唐有彥等軍相機堵剿將白馬寺等處賊匪悉數殲除毋得遷延番兵勦賊得力豫師擬酌調蒙番各部助剿據稱該王公俸餉及番子酬賞經費久未發給山西奉撥該蒙古俸餉等銀亟應迅籌接濟著李宗羲嚴飭藩司將該省

奉撥蒙古王公俸餉並勦撫經費銀共十二萬五百兩迅速如數籌撥解交豫師以濟要需將此由五百里各諭令知之○以潔已教士賞四川教授龔應閣教諭劉瑞璋訓導劉錫疇周宗洛國子監學正銜○戊辰諭內閣富明阿等奏琿春邊務事繁請將該處協領賞加副都統銜以資鎮攝等語琿春協領訥穆錦著賞加副都統銜嗣後琿春協領一缺卽作為副都統銜協領永為定制○諭軍機

大臣等前因御史賈瑚奏請嚴拏迷拐匪徒當經諭令步軍統領衙門認真緝拏茲已將近兩旬此等匪徒該衙門緝拏幾起有無人藥並獲之案解交刑部按律懲辦者已有幾起現在民情是否照常安謐均著據實覆奏將此諭令知之尋奏獲犯三起並未撥出藥物均卽解交刑部審辦民情安謐如常報聞○以都察院左都御史龐鍾璐兼署工部尚書○調正白旗漢軍副都統安住為鑲紅旗

滿洲副都統以兵部右侍郎寶珣兼正白旗漢軍副都統仍兼鑲紅旗旗蒙古副都統戶部右侍郎延煦兼正白旗蒙古副都統正紅旗漢軍副都統希元署正紅旗蒙古副都統○以陝西葭州等處疊勦回匪出力予提督宋慶等優敘賞參將張洪業宋學禮周雲龍二品封典參將王紹烈遊擊胡永清蔣尚年都司方勛生巴圖魯名號知府常綬遊擊袁洪業等花翎守備張廷顯等藍翎餘加銜升

敘有差○己巳諭軍機大臣等戶部奏請飭催各省趕解京餉一摺上年十一月間經戶部奏撥本年京餉銀七百萬兩限五月底前解到一半年終解清茲據該部查明截至六月底止除山西地丁銀一百萬兩內劃解俄國賠款三萬八千七百兩本省暫准緩解十二萬兩採辦李鴻章軍營米麥及歸綏軍餉十五萬兩解到二十五萬兩安徽地丁二十萬兩內本省截留十五萬兩四川鹽釐津貼三十萬兩內劃撥黔餉五萬兩起程十二萬兩長蘆鹽課二十五萬兩內劃撥練餉局棧租等銀三萬七千兩解到十萬兩兩浙鹽課鹽釐河東加課羨餘廣東鹽課帑息福建鹽課浙江釐金粵海關海浙海等處關稅報解均已過半山東河南江西浙江地丁廣東釐金福建茶稅贛關稅銀亦據報解及半至湖北等省地丁兩淮等處鹽課九江等處關稅或解不及半或絲毫未解京餉關繫要豈容

任意延宕除劃撥截留准緩解到及報解外
尚有山西地丁銀四十四萬一千三百兩山
東地丁銀十六萬兩浙江地丁銀十五萬兩
湖北地丁銀十九萬五千兩湖南地丁銀三
萬兩河南地丁銀五萬兩安徽地丁銀五萬
兩江西地丁銀十萬兩長蘆鹽課銀十一萬
三千兩兩淮鹽課鹽釐銀三十二萬兩兩浙
鹽課鹽釐銀十五萬兩河東加課羨餘銀五
萬兩廣東鹽課帑息銀十二萬兩山東鹽課

加價銀十三萬兩福建鹽課銀八萬兩湖北
鹽釐銀六萬兩湖南鹽釐銀三萬兩四川鹽
釐津貼銀十三萬兩福建茶稅銀十萬兩粵
海關稅贏餘銀五萬兩閩海關常洋兩稅銀
十五萬兩九江關洋稅銀二十七萬四千七
百十五兩零浙海關常洋兩稅銀十二萬兩
江海關洋稅銀二十萬兩江漢關洋稅銀十
七萬兩天津關常洋兩稅銀十一萬一千五
百四十五兩零贛關稅銀二萬五千兩江西

釐金五萬兩江蘇釐金五萬兩浙江釐金二
萬兩廣東釐金二萬五千兩湖北釐金三萬
兩著各該將軍督撫監督等即將前項應解
銀兩統於年內埽數解齊毋得遲延干咎另
片奏請添撥京餉等語部庫需用甚繁該部
擬添撥山東地丁銀十萬兩河南地丁銀十
萬兩榮工加價奏准解部歸款銀五萬兩浙
江釐捐銀五萬兩兩淮鹽釐銀十四萬兩廣
東鹽課銀二十萬兩四川鹽釐銀六萬兩按

糧津貼銀十萬兩閩海關洋稅銀五萬兩浙
海關洋稅銀十五萬兩並著各該將軍督撫
連本年原撥未解京餉一併於年內解齊毋
得稍涉推諉致誤要需將此由五百里諭知
福州將軍直隸兩江湖廣閩浙兩廣四川江
蘇安徽江西福建浙江湖北湖南山東山西
河南廣東各督撫並傳諭粵海關監督知之
○又諭前因逆匪竄擾臺站當經諭令定安
迅派馬隊五百名前赴哈爾尼敦一帶堵禦

茲據定安奏稱軍臺情形與內地不同各項隊伍均不甚相宜。惟察哈爾馬隊一項與臺境情形熟悉總管達爾濟所部防河馬隊除前撥過五百名馳往防勦外現尚有五百名在河西達拉特旗駐紮定安現已飛檄該隊迅速來綏籌給軍糧馳往防勦即著照該將軍所請速飭整隊來綏由定安撥給軍裝口糧剋日起程統交達爾濟管帶認真防勦並歸文盛調遣以一事權文盛仍當督飭官兵

勤加偵探實力防堵毋任賊氛竄近定安亦當遠探嚴防毋稍疏忽將此由五百里各諭令知之引見記名御史刑部員外郎周瑞清得旨著卽註銷御史開缺以五品京堂候補庚午福建巡撫卞寶第開缺養親以山西布政使何璟為福建巡撫山西按察使張樹聲為布政使山東鹽運使范梁為山西按察使○派詹事府詹事紹祺順天府府尹王榕吉監臨順天鄉試○辛未諭軍機大臣等

金順奏餉項支絀請飭照數撥解協餉一摺據稱晉省協濟金順軍營餉項前經派員守提惟該省截留京餉十二萬兩須分上下兩忙徵解其另籌銀十二萬兩尚難籌撥現在兵丁困苦待餉孔殷請飭迅速撥解其河東指撥十八萬兩請仍免其勻扣各等語金順軍營餉項奇絀亟應源源接濟著李宗羲飭令藩司將晉省應撥金順月餉除截留京餉十二萬兩外仍按月撥銀一萬兩以符每月

二萬之數交金順委員領解回營不得稍有帶欠其河東指撥之數並著李宗羲飭令河東道於庚午綱起鹽課內仍按月協濟金順軍餉銀一萬五千兩每年共十八萬兩無論何處奏提河東餉銀均免勻扣以清款目將此由五百里諭令知之○又諭崇實奏查辦遵義教案起程日期一摺貴州遵義教案日久未結自應迅速審辦崇實現於六月十六日自省起程先赴重慶駐紮將遵郡紳民開

導再密與曾璧光相機妥籌雖係慎重辦法
惟重慶與遵義界分兩省查辦大員未入黔
境轉使洋人有所藉口此案終難早結著崇
實體察情形仍遵前次諭旨馳抵遵義督飭
楊蔭棠余思樞等持平妥辦以期民教相安
免生枝節現在直隸天津地方又有焚毀教
堂毆傷領事之案辦理正當喫緊若外省教
案早日完結亦足以折服其心崇實務當悉
心籌畫以副委任將此由五百里諭令知之

○以糾毆斃命陝西已革總兵官鄧光升遣
戍黑龍江○壬申以翰林院修撰崇綺為河
南鄉試正考官內閣中書王憲曾為副考官
翰林院編修朱道然為山東鄉試正考官右
春坊右中允徐致祥為副考官翰林院編修
曹秉濬為山西鄉試正考官福建道御史黃
錫彤為副考官○追予浙江杭州殉難知縣
楊炳春祭葬世職於江蘇吳江縣原籍建立
專祠○癸酉

孝靜成皇后忌辰遣官祭

慕東陵○湖廣總督李瀚章等奏遵旨整頓長
江水師嚴申紀律飭令認真操練巡防得旨
著該督撫會同水師提督黃翼升檄飭將弁
認真操練於該管地方嚴密巡查遇有匪徒
立即捕拏懲辦毋得視為具文○甲戌
孝懿仁皇后忌辰遣官祭

景陵○諭內閣御史秀文奏請嚴禁內城賣戲
一摺京城內城地面向不准設立戲園近日

東四牌樓竟有泰華茶軒隆福寺胡同竟有
景泰茶園登臺演戲並於齋戒忌辰日期公
然演唱實屬有干例禁著步軍統領衙門嚴
行禁止儻敢故違即行從嚴懲辦○諭軍機
大臣等毛昶熙奏抵津日期並會商大概情
形一摺羅淑亞擬回京商辦諸事英國使臣
威妥瑪亦勸其回京據毛昶熙奏稱此案全
在地方官設法議辦就近與該公使商酌及
早了結若任令回京轉恐往返函商致稽時

日等語。所籌甚是。著曾國藩、毛昶熙、崇厚、悉心會商。與羅淑亞就近在天津迅速議結。毋令該公使回京。致此案轉形稽滯。至為首滋事之犯。著仍遵前旨。趕緊緝拿。以為轉圜地步。曾國藩等務當妥速籌辦。上維國體。下順輿情。以期力保大局。將此由五百里各密諭知之。○又諭庫克吉泰奏遵調蒙兵需用經費。請飭部籌撥一摺。此次調撥東三盟馬隊三千名赴古北口駐紮聽候調遣。需用行裝

鹽菜等項銀兩。熱河各庫既無款可撥。自應豫為籌備。著戶部卽行撥銀十萬兩解往熱河交庫克吉泰收存。俟該蒙兵到口後一切需用款項。卽著樽節支放。以昭覈實。吉林黑龍江馬隊到口後。著仍遵前旨一體兼顧。並著派令壽長幫同操練。俾成勁旅。該官兵月餉需用甚鉅。著曾國藩、庫克吉泰會商奏辦。其駐口聽調應行支發口糧。著戶部覈議章程具奏。此次所調官兵原為備豫不虞。庫克

吉泰仍當慎密辦理。不可稍涉張惶。所需火藥鉛丸等項。已諭知工部照數撥解矣。將此各諭令知之。○又諭劉崐奏楚省援黔各軍擬暫緩南圖一摺。據稱湖南自援黔以來。歲需餉銀甚鉅。積欠已多。湘中近日情形尚須防維補救。自固根本。擬飭席寶田設防清江北岸。清理善後事宜。俟川黔兩省進剿得手。再派兵南渡夾擊等語。黔省清江北岸業已肅清。正宜乘此聲威進規台拱。將南岸各苗寨次第掃除。以期一勞永逸。若半途鬆勁。軍務安有了期。劉崐慮竭湖南之力。不能竟事先無以對湘民。未免畏難自阻。現當天氣盛暑。援黔各軍著照該撫所請。暫予休息。卽著檄令席寶田趁此頓兵未進之時。迅將鎮思施黃各屬善後事宜依次興辦。務臻妥實。一面將積欠軍餉設法清釐。轉瞬秋涼。仍當迅速進兵。蕩平南岸。以竟全功。毋得惑於人言。轉致事機遲誤。各營如可裁汰歸併。亦著該

撫酌量辦理以節餉需本省團防事宜甚關緊要該撫仍當督飭各屬實力整頓以備不虞川省援軍亦不得稍存觀望致失機宜著崇實吳棠飭令會合楚軍相機夾擊曾璧光身任黔撫責無旁貸務當嚴檄各營隨時策應川楚各軍認真勦辦早靖疆圉將此由五百里各諭令知之○以直隸永定河南岸續行漫溢總督曾國藩道員李朝儀通判朱津復下部議處革署縣丞主簿蔡鴻慶職仍留

任○撥工部火藥五萬斤鉛丸三萬粒轟藥一千五百斤火繩五千丈解赴熱河備用○乙亥諭軍機大臣等李鴻章奏酌帶各軍剋日起程並代奏袁保恆請赴直效力各摺片天津之事現經毛昶熙前往會同曾國藩辦理旬日以來法使羅淑亞仍復恃強逞忿海口兵船雖止數隻惟夷情巨測難保不陸續駛至肆意要挾必須及早布置有備無患方可徐圖轉圜李鴻章現已飭令郭松林周盛

傳等軍分起起程並先帶親軍八營取道山西馳赴近畿實能忠勇任事深慰廑懷該督馳抵直境後應駐紮何處屆時再行請旨辦理袁保恆現辦西征糧臺情形較熟未便遽易生手所請赴直效力著毋庸議李鴻章另片奏請飭劉銘傳赴營前已諭知曾國藩飭令該提督赴直統帶銘軍本日復諭英翰催令迅速起程至所陳詢明羅使所聞張光藻等主使有何證據亦已諭令曾國藩等商辦

矣將此由六百里諭令知之○又諭李鴻章奏羅淑亞必欲將天津府縣正法其照會內稱實由府縣幫同行兇又稱有主使動手之人請飭毛昶熙等詢明該使所聞得自何人所查得有何據須將如何幫同主使證據交出由中外大員會同提集該府縣當堂質訊必兩造俱肯認供方成信讞等語曾國藩現將天津府縣解交刑部治罪本日軍機大臣呈遞毛昶熙致總理各國事務衙門信函有

羅淑亞卽擬進京之語該府縣解送到部時萬一羅淑亞欲到刑部觀看審訊殊屬不成事體現在俄比各國均向總理各國事務衙門探聽將來該府縣到部時外國人能否前往聽訊等語雖經該衙門當時竭力阻止然亦不可不防不若仍令張光藻等在津呈遞親供曾國藩等與羅淑亞據理辯駁較為妥善將來定案時仍由刑部覆覈以符曾國藩原請交刑部之奏著曾國藩等斟酌辦理本

日已傳諭錢鼎銘將該府縣仍行解赴天津候質曾國藩等於張光藻等抵津後先後取具親供照會羅淑亞如羅淑亞仍自狡執再向詢問該府縣幫同主使究竟有何證據卽得之傳聞亦應將聞自何人確鑿指出再行當堂質訊以昭覈實若以游移無據之詞欲將該府縣正法斷不能如此辦理也張光藻等既在天津傳質羅淑亞自亦應在津以免往返玉商曾國藩等卽可照會羅淑亞在津

商辦以期迅速了結如羅淑亞進京更無轉圜地步曾國藩等諒亦統籌全局熟計深思至正兇亟應嚴緝前所獲犯趕緊審訊議抵較之空言抵制者更為得力原片均著鈔給閱看將此由六百里各密諭知之○又諭傳諭直隸按察使錢鼎銘已革天津府知府張光藻已革天津縣知縣劉傑前因曾國藩奏明交部治罪惟該革員等應得之罪亦應在津取有親供質訊明確再行交部覈辦方昭平允著錢鼎銘卽行派員將該革員等解往天津聽候質訊○又諭李鴻章奏請調提督赴營等語直隸天津滋事一案不能不豫為布置李鴻章現已遵旨督兵馳赴近畿以備緩急前任直隸提督劉銘傳謀勇兼優威望素著該提督深明大義當此事機喫緊之時自應力圖報效著英翰卽行傳諭劉銘傳剋日兼程赴營藉資統率駐紮張秋銘軍馬步各營業經曾國藩調赴滄州一帶並著知照

該提督探明前進以期迅速將此由六百里諭令知之○又諭李鴻章奏現已督軍由陝赴直所部各軍需餉甚殷請飭催各省協餉等語著吳棠將應解李鴻章軍營月餉三萬兩迅速徑解湖北糧臺其山東月撥銀二萬兩著丁寶楨就近委解劉盛藻軍營應用至江蘇浙江應解李鴻章軍營額定月餉卽著馬新貽丁日昌張兆棟楊昌濬照數撥解以應急需將此由四百里諭知馬新貽吳棠丁

日昌丁寶楨並傳諭楊昌濬張兆棟知之○

丙子

慈安皇太后聖壽節遣官祭

太廟後殿

奉先殿○

上率王以下文武大臣詣

慈寧門行慶賀禮眾官於午門外行禮○詣綏

履殿

慈安皇太后前侍早膳○奉

慈安皇太后

慈禧皇太后幸漱芳齋侍午膳○諭軍機大臣等曾國藩等奏法使仍執前議徑行回京商辦一摺羅淑亞無禮要挾所請府縣抵償一節萬無允准之理昨已傳諭錢鼎銘將張光藻等解赴天津並令曾國藩等取具該府縣親供照會該使以期迅速了結今羅淑亞既因不遂所欲悻悻回京此時中外一心非理之求總理各國事務王大臣自能堅持定見

力拒詭謀曾國藩等仍當將緝兇等事趕緊辦理不得因該使業已來京稍涉鬆勁一面飭張光藻等速遞親供在津候質如此辦法該使理屈辭窮或當自行轉圜回津商辦也另片奏請將福建船局購辦京米截留二萬石存儲津郡備李鴻章軍營及銘軍全隊之用係為豫籌兵食起見著照所請行將此由五百里各密諭知之○又諭傳諭直隸提督傅振邦前據傅振邦奏部署各軍於初五日

由古北口起程赴津茲據曾國藩等奏請飭該提督暫緩來津等語古北口練軍及提標營各官兵本可緩為徵調該提督於接奉此旨後無論行抵何處卽行折回古北口暫緩赴津仍著將新練各軍勤加訓練悉成勁旅不可有名無實○予貴州八寨等處陣亡副將周發榮等祭葬世職加等○予貴州歷年陣亡從九品陳桂茹等紳士弁勇一百十八員名分別賞卹如例○豁免山東東平州道

光年間民欠攤徵隄工銀○丁丑諭軍機大臣等前因天津民教啟釁諭令沿江沿海各督撫等於各口岸嚴密設防諒該督撫等已遵旨籌辦津事尚無頭緒羅淑亞多方要求雖據曾國藩等據理駁斥該使臣桀驁性成未能就我範圍現又由津至京能否不至決裂未可豫定此時惟有先籌防守以杜洋人窺伺之心著馬新貽英桂瑞麟李瀚章丁日昌英翰劉坤一丁寶楨郭柏蔭劉崐李福泰

黃翼升張兆棟楊昌濬於各該省通商口岸迅速籌防萬一洋人兵船駛至務須設法堵禦毋任其乘虛肆擾或至占踞口岸如有疏虞惟該督撫等是問所有沿江沿海水陸官兵仍當懍遵前諭力加整頓並著將現辦情形詳晰具奏將此由六百里密諭馬新貽英桂瑞麟李瀚章丁日昌英翰劉坤一丁寶楨郭柏蔭劉崐李福泰黃翼升並傳諭張兆棟楊昌濬知之○又諭崇厚奏體察津郡現時

情形擬卽來京陛見一摺崇厚著卽來京其三口通商大臣一缺著毛昶熙暫行署理崇厚卽將關防交毛昶熙接收毋庸攜帶來京津門應辦事宜仍著曾國藩毛昶熙懍遵疊次諭旨妥速籌辦將此各諭令知之○戊寅諭軍機大臣等英元喬松年奏請嚴拏攪擾倉務人犯一摺倉務重地豈容匪徒暗中攪擾亟應嚴拏懲辦所有單開之東直門內草廠正藍旗宗室德奎西城羊肉胡同張二卽

蜜裏堅前門外長巷下頭條胡同李二卽柳
子李東單牌樓總布胡同趙大卽趙月圓暨
住址無常之已革花戶吳正澄卽活閣王吳
三著步軍統領衙門順天府五城一體嚴拏
解交刑部會同宗人府訊辦毋任漏網將此
各諭令知之○又諭李鶴年奏請將宋慶一
軍調赴彰德駐紮一摺前因天津滋事一案
洋人肆意挾恐啟兵端當經諭令李鴻章
帶兵馳赴近畿一帶以備不虞旋據奏業

已飭令郭松林周盛傳等軍分起起程該督
先帶親軍八營取道山西前進僅留鄂軍譚
仁芳五營駐紮秦境協同防剿刻下陝省兵
力較單北山土匪未靖且恐甘回乘虛竄擾
不可不加意籌防宋慶一軍駐紮神木一帶
屏藩秦晉尚資得力不宜遽行調回李鶴年
請將該軍調赴彰德駐紮之處著無庸議仍
著李鶴年就豫省現有各營勤加訓練以備
緩急之用將此由四百里諭令知之○己卯

中元節

上詣

奉先殿

壽皇殿行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵○遣官祭

端慧皇太子園寢○諭內閣曾璧光奏夾板被拆請飭稽查以杜弊端等語據稱本年正月間接到兵部同治八年十二月二十一日封發夾板一副查看黃布包印花內外封筒釘封均有拆損上有隆橋驛黏簽聲明前途拆損字樣顯係隆橋驛以前各站私行拆閱等情夾板公文最關緊要竟敢中途私拆實屬膽大已極若不嚴行根究何以重郵政而

昭慎密著四川總督迅飭臬司確切查明此項夾板究係何站拆動從嚴懲辦不得含糊了事至各省驛站亦往往有私拆公文之弊嗣後著各該督撫責成臬司妥議章程於上下站接遞詳細稽察以杜弊端如查有拆損情事即將私拆之人加等治罪並將管驛之各該地方官從嚴參處以儆效尤將此通諭知之尋吳棠奏遵查川省接遞夾板並無私拆業經飛咨曾璧光確查黔省何處拆動從

嚴懲辦報聞○諭軍機大臣等丁日昌奏密陳交涉大概情形並交卸起程北上豫籌備禦各摺片天津之事法使羅淑亞必欲將府縣及陳國瑞正法此事萬難照辦經曾國藩等據理駁斥該使仍復狡執現又回京欲向總理各國事務衙門饒舌已諭令該王大臣堅持定見力拒詭謀一面仍令曾國藩等將緝兇等事趕緊辦理丁日昌業經起程由早道北上著仍遵前旨兼程前進馳赴天津幫同曾國藩毛昶熙商辦一切毋庸先行來京際此時事艱難總以力保和局為是其非理之求仍當力與辯論以維大體惟洋人恃強逞忿動以兵船恫喝戰守之策自宜豫為籌備張秋銘軍現已調赴滄州一帶駐紮並令李鴻章統帶郭松林等軍馳赴近畿一帶以備不虞該督業於本月初七日先帶親軍啟行不久當可趕到此間布置既定洋人知我有備或可稍戢其虛憍之氣一面仍與轉圜

可期早日了結。所陳豫籌軍火一節，已諭令曾國藩照辦矣。將此由六百里密諭知之。○又諭丁日昌奏密陳交涉大概情形，並豫籌備禦各摺片。蘇省華洋雜處，羈縻彈壓較他省為難。此時情形尤屬緊要，全在地方大吏操縱得宜，持以鎮靜。事前妥為布置，以備不虞。方可消弭爭端，不至別生枝節。丁日昌現已起程赴津，所有江蘇省水陸要隘及一切守禦事宜，均著馬新貽張兆棟悉心籌畫，務

臻妥協，惟不可稍事張惶，免致中外兩不相安。轉生疑忌。丁日昌以洋人若決計用兵，必以上海為後路。請調李鴻章統兵由江東下，示以彼若決裂，則由上海擣其後路。此亦牽制洋人之法。惟李鴻章現已調赴近畿。丁日昌所奏各情，即著馬新貽張兆棟酌度機宜。豫為籌備。將來如此懾以兵威，使彼有所顧忌，則天津之事亦易轉圜。是在該督等先期部署。庶臨事方有把握。將此由六百里密諭

馬新貽並傳諭張兆棟知之。○又諭丁日昌奏張秋銘軍以軍火缺乏，赴蘇請撥，已飭上海採辦軍火委員暗中由沙船運津，以期迅速。惟洋人萬一開釁，採買軍火必多掣肘。請飭查明豫為籌備等語。著曾國藩查明所部軍火短缺何項，是否天津尚有存儲。行知沿海沿江各督撫將應需軍火設法密由海道解津應用，庶免臨時缺乏。此係備豫不虞為未雨綢繆之計。曾國藩仍當與毛昶熙妥為

辦理。力保和局，以弭釁端。丁日昌已於本月初八日啟行，由陸路兼程前進。本日已諭令迅速赴津矣。丁日昌摺一件，片二件，均著鈔給閱看。將此由五百里密諭知之。○又諭曾璧光奏黔省教案全行議結，開單呈覽。暨咨會崇實會同覈辦各摺片。貴州遵義等處教案共有九起。現經曾璧光派委司道各員會同該教士逐案查明，一律歸結。擬即出示曉諭各屬。以後遇有民教交涉事件，均照條約

辦理所籌甚為妥協著曾璧光即將各案如何議結詳細根由迅速咨明總理各國事務衙門以憑查覈黔省教案雖已全結而設堂行教等事尚須妥籌辦法該撫務當飭令余思樞蹇閻會同楊蔭棠等體察民情設法開導毋令再生枝節仍隨時咨商崇實酌覈辦理免至歧誤並檄飭地方官嗣後務當持平辦理毋任再滋事端前有旨令崇實馳赴遵義就近督辦此時遵義教案已結尚有設堂

行教事務亦須督率委員逐一經理操縱方合機宜崇實應否仍赴遵義之處著即酌量情形以定行止將此由五百里各諭令知之○以甘肅克復渭源縣城出力予總兵官張明富以提督簡放賞總兵官林明旺周慶容羅景揚謝寶勝副將楊金魁徐泗海吳永陞陳正文郭祥興參將劉金標閻思義鄭洪彪袁正宏于雲青唐文治陳緒桂陳正彪李文彪孫鏡張明友蘇登第蘇家榮江得勝史得

林羅在中童定遠邵天爵胡玉春遊擊劉道軒馬盛炳高海榮廖振聲李得元張友陞巴圖魯名號副將陳思九等花翎千總熊玉元等藍翎餘加銜升敘開復有差○以勦匪出力予陝西知州曹熙以知府用○以貴州克復平越州城並疊克賊巢出力賞知府林式恭副將莫宴壘等花翎知縣高荃等藍翎餘加銜升敘開復有差○以貴州攻克鍾華山賊巢實在藉郎中丁體常等花翎練目石有

才藍翎餘升敘有差

大清穆宗繼天開運受中居正保大定功聖智
誠孝信敏恭寬毅皇帝實錄卷之二百八十六

大清穆宗繼天開運受中居正保大定功聖智
誠孝信敏恭寬毅皇帝實錄卷之二百八十七

同治九年庚午七月庚辰戌刻有星西北流

大如璫 諭軍機大臣等總理各國事務衙
門奏法國使臣到京議辦天津教案謹陳辯
論情形一摺據稱羅淑亞到京接晤後仍以
主使之說歸咎府縣各官持定前議不稍通
融該王大臣堅與爭持毫不鬆動該使臣又
以曾國藩到津五十餘日並無確實辦法兇
手尚未拏獲並以教民慘被非刑應請查辦
為詞該王大臣答以曾國藩一到天津即為
緝兇修堂並為奏請昭雪現已先後緝犯多

名詳細研究辦理認真以破其遲延之說其教民酷受非刑一節允為查明覈辦等語該使臣非理之求斷難遷就而於近情之請必當趕緊辦理以示誠信此時如將下手滋事之犯訊出確實供詞按律懲辦則洋人自不至節外生枝再歸咎於府縣著曾國藩毛昶熙督飭丁壽昌等將現獲名犯詳細研鞫並將案內正兇迅速拏獲歸案訊究毋任漏網總期早一日結案即可早一日轉圜切勿稍

涉遲延致滋洋人口實至教民酷受非刑一節或平日民教相仇禁卒人等遇有被押教民借以洩忿亦未可定即使實有其事地方官不過失於覺察無所用其迴護著曾國藩毛昶熙確切查明據實覆奏張光藻劉傑現在何處已否到津尚未據曾國藩等奏到本日又諭令錢鼎銘將該員等迅速解津趁此洋人在京趕緊取具親供由曾國藩等奏明辦理庶其中不至為難若以奉旨治罪之員

任其他去既於國體有傷在該革員等亦非計之得者且使洋人得所藉口於議抵一節更將牢不可破該督諒早見及此也曾國藩等前奏力保和局堅持定見誠屬審時度勢之論惟不應辦者固不可許應辦者亦必切實辦理速辦則洋人無可置喙遲則多所要求曾國藩毛昶熙同辦一事務當悉心籌商密速妥辦以副委任將此由五百里各密諭知之 又諭傳諭直隸按察使錢鼎銘前諭

錢鼎銘將已革天津府知府張光藻已革天津縣知縣劉傑派員解往天津聽候質訊該革員等現在何處已否解往如尚未起程著錢鼎銘懍遵前旨遴派妥員將該革員等立即解津此事關繫緊要毋得任意耽延其起程日期並著由該臬司迅速覆奏 神機營奏現屆秋操擬留馬步隊五千八百餘員名在城輪班駐廠以六千五百餘員名撥赴南苑紮營操演從之 賞扎薩克圖汗盟長貝

勒多布欽扎木楚紫纒四等台吉米吉特多
爾濟花翎補鑄安徽鳳陽縣臨淮訓導條
記從巡撫英翰請也○辛巳

文宗顯皇帝忌辰遣官祭

定陵

上詣

奉先殿

壽皇殿行禮○以神靈顯應加山東棲霞縣印
真人封號曰綏靖○諭軍機大臣等長善等

奏請整頓駐防旗營一摺廣州駐防旗營兵
制日弛該管各官往往因循袒護積習甚深
自應大加整頓該將軍等現擬章程於各地
面派員巡查遇有盜匪夥劫立即拏辦所籌
尚屬周妥即著長善等認真辦理不得有名
無實惟經此次整飭之後該旗營各員如仍
前怠玩罔知振作該將軍等務當破除情面
即行叅辦毋稍徇庇至旗營舉劾自有定章
若限以二年一保未免徒事紛更轉滋冒濫

所請著毋庸議如實有才具出眾勞績優異
者准其酌保一二員以示獎勵將此各諭令
知之○壬午諭軍機大臣等前諭李鴻章帶
兵馳赴近畿已據該督奏報起程不久當入
直境因思此舉本係未雨綢繆豫為籌備自
宜嚴密布置未可先露風聲現在天津之事
未即決裂若調兵信息早為洋人窺破必至
又生疑忌著李鴻章於行抵直境時酌度情
形即將所帶各營扼紮直隸邊境獲鹿一帶

或於河北彰德山西平定等地方分紮總以
防回匪竄擾為名該督務須不動聲色持以
鎮靜用昭慎密至正定廣平等處均有洋人
教堂李鴻章務當就近彈壓兵民毋許滋事
免致別生枝節將此由六百里密諭知之○
以順天府府尹王榕吉為大理寺卿○癸未
以詹事府詹事梁肇煌為順天府府尹未到
任前仍以大理寺卿王榕吉署理○甲申諭
軍機大臣等本日據軍機大臣呈遞直隸按

察使錢鼎銘稟函據稱已革天津府知府張光藻因患病出省在順德府調治已革天津縣知縣劉傑亦在密雲縣治病已派員分赴守催等語覽奏不勝詫異張光藻劉傑以奉旨治罪人員即使患病屬實亦應在天津聽候查辦乃該革員等一赴順德一赴密雲捏病遠避直視諭旨如弁髦尚復成何事體試思該革員等不呈遞親供辨別是非總理各國事務衙門王大臣等與洋人終日辯詰何

能以空言相抵朝廷之令該革員等赴津者實曲示保全之意乃皆不能體會儻然置身事外若使洋人聞之豈不益滋口實此事關係重大不可再涉遷延著錢鼎銘懍遵前旨星夜派員前往將該革員等迅解天津不准藉詞託病仍著將起解日期趕緊覆奏會國藩於張光藻等革職後率行給假他出實屬不知緩急並著派員勒限催提俟解到日會同毛昶熙取具該革員等確切親供以憑覆

辦若再託詞遠避國法具在豈能寬宥將此由五百里諭知曾國藩並傳諭錢鼎銘知之
又諭聞已革天津縣知縣劉傑現在密雲該革員現有查辦之案必須迅赴天津著景豐傳問密雲縣知縣查明劉傑實在行止如尚在密雲即派旗員將該革員即日押解赴津儻省中委員到時亦著會解前往不得稍涉遲誤並不准藉詞託病一面將起解日期迅速覆奏將此諭令知之○又諭李鴻章奏

勦辦北山土匪潰勇業經就緒並遵旨分兵馳赴近畿各摺片陝西北山土匪潰勇糾聚宜川洛川一帶股數眾多李鴻章派令周盛傳等督隊進攻在老澗鋪十梅溝等處疊獲勝仗擒斬逆首多名餘匪潰散復經各營分路抄洗現在已無成股之賊地方漸就肅清勦辦尚為得手北山巨股賊匪現已殲除餘匪仍當按捕淨盡地方一切善後事宜尤須妥為經理李鴻章已帶同周盛傳所部馳赴

近畿蔣志章身任陝撫責無旁貸卽著酌派得力官兵三五營分紮北山各要隘以資彈壓並派廉幹地方官妥籌招徠賑墾等事宜以期日有起色前有旨令李鴻章行抵直境時將所帶各營分地扼紮該督已於本月十四日渡河現擬由晉省取道井陘入直並飭周盛傳一軍分起渡黃至平陽會合齊進郭松林一軍暫紮衛輝彰德與十八日諭旨通相脗合卽著飭令郭松林暫紮衛輝彰德一

帶與劉銘傳所部遙為聲援並飭周盛傳卽在平陽平定暨井陘獲鹿一帶分段扼紮總以防回匪竄擾為名不動聲色持以鎮靜並著李宗羲李鶴年於各該軍到時妥為照料不可稍涉張惶將此由五百里各諭令知之
以陝西宜川等處勦辦土匪潰勇地方肅清予提督周盛傳唐仁廉衛汝貴賈起勝優敘
乙酉追予江蘇揚州等處陣亡殉難鹽知事孫紹恆等紳民婦女五十二員名口分

別旌卹如例 追予安徽霍卹等處陣亡殉難貢生何其坊等紳民婦女一千九百九十九名口分別旌卹如例○丙戌諭軍機大臣等曾國藩奏遵旨函致彭玉麟等能否再出續行覆奏等語彭玉麟等受恩深重當此國家多事之秋自應力圖報效著曾國藩於接到彭玉麟楊岳斌覆信時卽行具奏候旨簡用劉銘傳勇往過人治軍有律據曾國藩奏稱此次催令來直可否稍示優異著俟劉銘

傳到直後再行聽候諭旨曾國藩所陳治海上水師與江上水師截然不同苟欲捍禦外侮徐圖自強非持以一二十年之久未易收效然因事端艱鉅畏縮不為俟諸後人則永無自強之日茲值閩滬兩廠船成卽當於兩處選將操練各情所籌切中竅要近來內外臣工往往遇事機緊急徒事張惶追禍患略平則又泄沓成風為目前苟安之計卽使創立戰守章程而在事諸臣奉行不力事事有

名無實遂使朝廷深謀遠慮均屬具文似此因循成習何時可冀自強何時可平外患宵旰焦憂無時可釋現在閩滬兩廠輪船次第告成著馬新貽丁日昌英桂沈葆楨於兩處各擇統將出洋操練無論有警無警窮年累歲練習不懈方可備不虞而操勝算廣東亦應籌備輪船巡防海口著瑞麟李福泰一體認真辦理以上各輪船務須均用中國人駕駛以期緩急足恃至各省將備中如有才具

出眾熟習風濤沙綫者著各該督撫隨時保奏以備擢用卽山林草野之中有長於海戰者亦當隨處留心物色量才超擢庶才能以按羅而出將士皆干城之選矣此外如另有備禦之策並著該督撫等全局統籌隨時具奏該督撫等均為國家重臣務當實心任事為嘗膽卧薪之計共挽時艱以副委任曾國藩原片均著摘鈔閱看將此由五百里各密諭知之○又諭前諭德英挑選黑龍江馬隊

二千名馳赴古北口一帶駐紮茲據德英奏黑龍江所屬各城存營兵數無多且須防守邊境僅能挑選精兵一千名擬於八月初六日陸續起程等語卽著照所請飭令管帶各員屆期迅速起程不得沿途逗遛該將軍因存營軍械不敷請飭部撥給或令直隸總督酌籌給發之處著庫克吉泰於該官兵行抵古北口時查看情形奏明辦理將此由四百里各密諭知之○又諭李瀚章郭柏蔭奏整頓水陸各軍現辦情形暨請豫籌辨認各國洋人各摺片據稱湖北水陸各軍現皆精壯堪以禦敵通省標兵亦多驍勇可用如果海疆不靖鄂省籌辦防堵當可無虞覽奏均悉天津之事現經總理各國事務衙門王大臣等與法使辯論尚未遽啟兵端而未雨綢繆不能不先期布置鄂省長江天塹守禦有資惟該省水陸要區均有洋人往來聚處江防自應嚴密該署督等所奏各情於辦防確有

把握卽著不動聲色聯絡鄰封將水陸各營妥為部署並隨時認真整頓以備不虞此次津民本與法國構釁自可將各國區別辦理以孤其勢惟因誤傷俄英比意之人以致各國藉口均有連橫之勢業經總理各國事務衙門王大臣等設法調處李瀚章等所陳辨明各國人船以便分別防範保護之處如將來事機決裂當由總理各國事務衙門相機知照辦理將此由四百里各密諭知之○又

諭丁寶楨奏籌防海口及練兵備調一摺天津一案法使羅淑亞肆意要挾近復回京向總理各國事務衙門饒舌疊經王大臣堅持定見力與辯論目前情形雖不至遽行決裂而此事如何辨結尚無實在把握此次啟釁雖由法國亦有誤傷俄英比意等國之人且洋人登駟相相遇事必相聯絡不可不先事籌畫以備不虞丁寶楨擬於東省各海口酌定兵數分別布置所籌尚妥卽著不動聲色

慎密籌備煙臺地方華洋雜處尤關緊要務當飭令文武各員拊循彈壓免滋事端王正起等營分紮德州等處並著飭令認真訓練以備緩急將此由四百里密諭知之又諭李宗義現在丁憂山西巡撫本日已將何璟調補矣所有晉省河防李宗義因晉勇八營不甚得力檄令提督張樹屏在淮南廬鳳等處招募新軍六營並令提督高占彪於晉勇內挑選精壯酌留三四營分別布置以資守

禦著俟新招勇丁到晉後卽責成何璟督飭張樹屏等認真訓練加意巡防轉瞬河凍冰結冬防益關緊要尤應先事豫籌庶臨期可資得力該撫務當迅速籌防毋稍延玩將此由四百里諭令知之○山西巡撫李宗義丁憂調福建巡撫何璟為山西巡撫以廣東布政使王凱泰為福建巡撫○以造言惑眾直隸在籍知縣劉謨閣革職訊辦○丁亥諭軍機大臣等前因定安奏派撥察哈爾馬隊赴

哈爾尼敦防勦請歸文盛調遣當經降旨允准茲據文盛等奏哈爾尼敦臺站係在烏城境內距張家口約有四千餘里勢難兼顧請飭綏遠城將軍就近酌給鍋帳駝隻飭令前赴烏境會勦卽歸烏里雅蘇台將軍調遣等語烏城境內現在有無賊蹤是否仍須馬隊助勦著福濟斟酌情形如該處尚須此項馬隊著一面具奏一面咨會定安就近酌給鍋帳駝隻等項飭令達爾濟統帶迅赴烏境協

同防勦卽歸福濟調遣如該處現無賊匪竄擾卽著福濟查明此項馬隊行抵何處飭令達爾濟管帶折回綏城如尚未起程卽著定安飭令此項馬隊暫在綏遠駐紮至察哈爾八旗及軍臺各地面仍著文盛等檄飭官兵密探嚴防毋稍疏忽亦不得稍涉張惶將此由四百里各諭令知之○調福建布政使鄧廷枏為廣東布政使以福建按察使潘霽為布政使調貴州按察使葆亨為福建按察使

以貴州督糧道林肇元為按察使○以四川寬甯等處疊破賊巢建南肅清出力賞提督馬承宗總兵官鍾有恩鄧有德支得盛張錫卿一品封典參將成輔廷二品封典總兵官劉正元副將鄧全勝巴圖魯名號知州鄧廷桂參將周得載等花翎把總洪壽祺等藍翎餘加銜升敘開復有差○戊子諭內閣蘇廷魁奏河工用項緊急請飭催商欠息銀一摺東河每年採辦稽料除例價外其幫價向由

長蘆山東兩淮解到各商生息銀兩內發給乃近年兩淮商人原領本銀五十萬以前欠解息銀一百三十四萬八千五百兩又欠解本年息銀三萬兩長蘆商人原領本銀四十萬兩以前欠解息銀七十一萬一百五十兩零又欠解本年息銀二萬四千兩山東商人原領本銀十萬兩以前欠解息銀二十四萬八千七百兩又欠解本年息銀六千兩該工用款緊要豈容各商日久宕延現在江南軍

務肅清所有兩淮商欠銀兩卽著馬新貽妥議章程速籌歸補毋任延玩其長蘆山東各商欠解銀兩並著曾國藩丁寶楨督飭各該運使飭令該商迅將本年欠解息銀卽行措解至歷年欠解銀兩亦責令陸續補交以濟要需而清款項○又諭劉崐奏請將訛詐上司之革員治罪一摺已革湖南知縣李廷誥因向臬司李廷樟營求署缺並出銀票一紙意存賄託經該臬司訶逐揭參革職該革員於被參後竟敢逗遛省垣不卽回籍並挾嫌妄向臬司訛索銀票實屬目無法紀李廷誥著發往軍臺效力贖罪期滿後永遠不准捐復並不准投效各路軍營以示懲儆○諭軍機大臣等李鶴年奏豫軍西征糧餉緊急請將河東前撥協餉照舊撥解一摺據稱豫軍西征餉需甚鉅前撥河東鹽課月協銀二萬兩經袁保恆奏准停止改作協甘之用張曜宋慶兩軍餉銀專由河南供支惟豫省常年

所入卽以全數供支甘軍豫軍尚屬不敷況京餉河工及本省應需之用急款如林實有捉襟見肘之勢甘省有十餘省協餉似河東勻撥之二萬兩尚屬無足重輕請仍飭撥解豫軍等語所奏自係實在情形著何璟卽飭河東鹽道將前協豫軍西征餉銀二萬兩照舊按月撥解藉資周轉不得稍有遲誤將此諭令知之○兩江總督馬新貽等奏江蘇巡撫丁日昌遵旨現赴天津所有本年江南鄉

試監臨請派學政童華代辦從之○補鑄甘肅鹽法兵備道平涼府知府鹽茶同知經歷儒學照磨慶陽府知府經歷儒學甯州固原州等知州儒學平涼華亭隆德合水安化環縣等知縣儒學鎮原縣知縣皋蘭縣縣丞正甯縣儒學各關防印信條記從總督左宗棠請也○豁免湖南晃州廳被擾地方上年未完額賦 己丑
仁宗睿皇帝忌辰遣官祭

昌陵

上詣

壽皇殿行禮○諭軍機大臣等前據富明阿等奏請豫籌本年捕圍官兵應需賞裝等項銀兩當交戶部議奏茲據奏稱吉林本年冬季舉行圍獵隨圍官兵應領賞裝等項銀兩除抵用外實需銀一萬二千餘兩擬請在河南驛站存贖銀內撥給等語冬圍經費自係要需著李鶴年督飭藩司如數籌撥迅委妥員

解赴盛京戶部交納不准藉詞推延並著額勒和布於此項銀兩解到時卽行知照富明阿派員領取此係由部指撥之款富明阿務當覈實支放仍著將用過銀數及官兵役名數分晰專案報部一俟該處俸餉復舊之日卽將撥款停止以符定章將此各諭令知之○又諭戶部奏撥借黑龍江整頓差操農務銀兩一摺黑龍江地處極邊農業操防均關緊要該處牛馬缺乏亟須籌款買補該部

擬請在山東地丁項下撥銀一萬兩俾資借給卽著丁寶楨速飭藩司如數指撥迅委妥員剋期解往盛京戶部交納並先行知照德英派員赴奉天守領額勒和布於此項銀兩解到時立交黑龍江委員領解德英俟餉項領回卽分飭購買牛馬務須一律臚壯以期得力仍按四年八季由兵餉內扣還歸款以重庫項將此各諭令知之○又諭本日據景豐奏派員會解革員起程赴津等語已革天

津縣知縣劉傑現經景豐派委佐領恩福等協同委員王霖於本月二十二日押解起程密雲距津甚近不日到張光藻亦已由錢鼎銘派員解送天津卽著曾國藩毛昶熙取具該革員等確切親供迅速覆奏此事本難措手該督到津後統籌全局次第辦理其中委曲求全萬不得已之苦衷在稍達事理者自無不諒刻下府縣一層堅持定見當可就我範圍所最喫緊者緝拏正兇如能將為首

滋事及下手之人嚴拏務獲訊取確供按律議抵大局似可猶定否則萬難就緒遲則亦恐另起波瀾該督公忠體國朝廷素所倚賴慎勿因循退蕙稍涉遲回毛昶熙會辦一事責無旁貸當無不迅籌商辦也將此由五百里各密諭知之○又諭左宗棠穆圖善奏附省東西兩路官兵迎剿賊匪疊獲勝仗一摺陝甘回匪疊次乘虛竄擾藉圖搶掠經協領薩英阿等先後在酸子溝平城堡楊家莊等

處截剿獲勝斃匪多名時秦州轉解甘軍餉銀尚未到省金積堡復有竄來陝賊肆行殺掠經善山保等督隊迎擊殲除殆盡將餉銀迎護到省並將沿途竄賊伏賊悉數斬擒勦辦尚為得手惟此次賊匪雖經各路官軍疊次殲除難保不再乘虛撲犯著左宗棠穆圖善飭令各路統將加意嚴防毋稍疏懈將此由五百里各諭令知之○庚寅諭內閣左宗棠奏收撫回眾現籌安插等語陝甘回匪煽

亂以來疊經官軍勦辦殲戮甚多朝廷軫念民生屢諭統兵大臣但分良莠不分漢回原以回民同係食毛踐土之人豈無天良其中被逼勉從不能自拔者自必不少大兵所至期於除暴安良斷無概行誅戮之理據左宗棠奏稱該回眾等久處賊巢既苦頭目之侵陵迫脅甫離巢穴又畏漢民之報復尋仇因之依違其間以求苟免此等情形實所不免該督現擬劃出荒絕地畝稍成片段者將收

撫之陝回給以籽糧課以耕作辦理甚為妥協著即督飭該地方官悉心經理彈壓撫綏俾得各安生業其甘回中如有真心悔罪自拔來歸者亦即妥籌安插並著劉切曉諭漢回居民務各永泯猜嫌同登衽席用示朝廷覆幬無私至意○諭軍機大臣等前據曾國藩奏王三屢經翻供現已釋還本日據給事中胡毓筠奏請將武蘭珍王三解京會訊以釋羣疑等語前羅淑亞來京告知總理各國

事務衙門王三並無其所獲之犯的係王二並稱武蘭珍到案並未受刑其意疑係有串供誣扳等情嗣據崇厚面奏所獲王三實係王二與武蘭珍所指之人籍貫面貌亦不相符該給事中所請解京會訊自無庸議惟王三卽係王二一層該督並未具奏著曾國藩毛昶熙查明實在情形具奏至武蘭珍爲此案罪魁該督等是否審訊明確將來如何定擬並著一併奏聞至緝拏正兇一節著曾

國藩等懍遵昨日諭旨嚴拏務獲迅速籌辦以免洋人另生枝節原摺均著鈔給閱看將此各密諭知之○又諭前因英桂奏調補浙江處州鎮總兵方友才自簡放溫州鎮總兵後久未到任諭令左宗棠查明該員是否在營飭令赴任茲據奏稱該總兵於全閩肅清後已回湖南湘鄉原籍等語方友才現已調補處州鎮總兵員缺豈可久懸卽著英桂行知該總兵飭令卽赴新任並著劉崐就近催

令起程毋任延緩將此各諭令知之○又諭左宗棠穆圖善奏南路官軍克復城堡左宗棠奏北中兩路官軍勦賊疊勝現籌會攻金積老巢各一摺甘肅南路官軍克復渭源狄道城池並攻拔牟佛諦堅堡正可乘此聲勢進規河州左宗棠等以自秦州至狄道計程四百餘里中隔渭源等處一片荒蕪必須節節設防保護運道方能前進察看河州賊勢應俟甯靈肅清由蘭州出兵方能得手固係

持重之見現在北路各軍已將靈州一帶賊寨攻破多處軍務自有起色則進勦河州之兵此時卽當妥為部署著左宗棠穆圖善悉心商酌以期迅埽賊氛靈州迤西至金積堡僅存賊堡十一處王楊等逆伏誅賊眾無糧可據勢已窮蹙著左宗棠飭令劉錦棠等迅將胡家堡等處攻拔盡殲醜類中路官軍疊克馬家河灣韋州堡等處金積堡南路關鍵已為我得左宗棠務當檄飭黃鼎會同雷正

館總統中路諸軍先將陝口要隘奪回次第
勒平金積迤西各堡寨並與劉錦棠等約期
會剿迅克金積等堅巢以振全局毋稍鬆懈
前有旨令李鴻章督兵馳赴近畿業據該督
奏報起程並據奏稱北山土匪潰勇巨股已
殲餘匪不至為患已咨商蔣志章酌派三五
營分紮要隘等語北山事甫就緒李鴻章近
已離陝左宗棠仍當妥籌兼顧毋令甘回折
竄陝疆又至句結為患左宗棠另片奏請將

教天印暫准留營等語教天印在南路帶兵
既尚得力一時乏員接帶著准其暫行留營
效力該大臣即咨行李鶴年查照可也將此
由六百里各諭令知之○以克復甘肅渭源
狄道兩州縣城予提督傅先宗優敘王得勝
彭忠國議敘擢守備何建威以遊擊用○予
甘肅渭源等處陣亡副將汪有餘等二十二
員祭葬世職加等○追予甘肅肅州陣亡道
員恆齡建立專祠眷屬人等分別旌卹如例

並附祀 辛卯追予浙江各屬陣亡殉難千
總盛鍾琯等紳民婦女五百九十員名口分
別旌卹如例 蠲緩兩浙浦東橫浦袁浦青
村四場歉收地方上年竈課有差 壬辰諭
內閣劉坤一奏工匠句匪滋事請將辦理不
善之官紳分別懲處一摺江西新昌縣匪徒
李侍魁等充當該縣紙廠工匠輒因減貲停
工膽敢糾眾強搶廠戶吳福家倉穀並句結
教匪楊長受等約期搶掠攻城當經該縣朱

慶萼飭令局紳鄒壽朋等派勇捕拏格殺匪
徒十餘人並將李侍魁殺斃其聽從搶劫之
謝懌發張花亦經訊明正法新昌縣知縣朱
慶萼於此案初起時即派團獲犯究辦尚屬
迅速惟未能先事禁止究有不合朱慶萼著
卽撤任開缺以簡缺改補局紳鄒壽朋等捕
獲各犯並不送官訊究輒卽殺斃棄屍雖係
應死罪人究屬專擅鄒壽朋著革去貢生訓
導劉國珍著革去武生以示懲儆 又諭吳

崇秦川東沿江各廳州縣被水並請將玩視民瘼之知縣革職查辦等語本年六月間川東連日大雨江水陡漲數十丈南充合州江北廳巴縣長壽涪州忠州酆都萬縣奉節雲陽巫山等州縣城垣衙署營汛民田廬舍多被衝淹居民遷徙不及亦有溺斃者覽奏實深軫念著吳棠督同藩司即行籌撥公項遴委妥員兼程前往查勘分別被災輕重會同地方官優加撫恤並飭該管道府及各該廳

州縣趕緊查明被淹若干戶溺斃人丁若干名口酌量分別賑恤毋令一夫失所酆都縣知縣徐濬鏞於江水進城時先行遠避置難民於不顧殊出情理之外徐濬鏞著卽革職聽候查辦諭軍機大臣等英翰奏覆陳辦理情形一摺據稱捍禦外侮言戰不如言防守平不如守險現已密撥皖軍數營暫駐安慶附近其下游一帶馬新貽已暗為布置並密商黃翼升抽調數營以捕拏江匪為名陸

續下駛暫紮金陵附近一帶至安慶省防之軍尚屬可恃現復選擇精銳五六千人作為兩大支駐紮潁毫隨時訓練以備緩急覽奏均悉天津之事現經總理各國事務王大臣與法使辯論雖已漸就範圍而能否消弭釁端尚未可定長江防守自應嚴密圖維卽著馬新貽英翰將江防上下游密速布置聯絡聲援以期有備無患英翰另片奏遵催劉銘傳迅速起程等語該提督忠勇素著此次聞

召諒已星馳就道何日起程北上著英翰卽行奏聞將此由四百里各密諭知之○癸巳諭軍機大臣等丁日昌奏行抵天津陳明幫同商辦大概情形一摺此案緝拏正兇一層疊經諭令曾國藩督飭地方官嚴拏務獲乃時將兩月尚未辦有頭緒未免遷延茲據丁日昌奏稱到津後會同勒限府縣購綫懸賞務於數日內將兇犯儘數緝拏並稱如此大案總須緝獲四五十人分別斬絞軍流或虛

抵多而實抵少。將來兇犯供無前任府縣指使。則府縣之不能正法。更不煩言。而解所籌不為無見。中外交涉事件。總須迅速妥辦。況此事枝節繁多。尤不宜虛延時日。丁日昌謂議抵議償之後。而彼猶要求無厭。似可邀齊各國公使。與之評理。所見亦是。惟此次殺斃者。除法國外。尚有俄英比意等國之人。早成連橫之勢。且未將為首滋事及下手之人。訊明議抵。不但不能與之評理。即議賠一層。亦

難論。及曾國藩仍當嚴飭丁壽昌等。先將真正兇犯趕緊儘數緝獲。會同毛昶熙。丁日昌。成林。悉心研訊。按律分別懲辦。斷不可再有遲逾。至議抵之後。彼時在我有辭。而各國以貿易為重。則因勢利導。所議各事。或不難一氣呵成。張光藻劉傑現已到津。即著曾國藩會同毛昶熙等。訊取該革員等確切親供。先行入奏。丁日昌所調杜文瀾一員。已諭知馬新貽。張兆棟。飭令該員兼程赴津。容閱等業

經陸續前來。足數差委。馮柏年趙新自可無庸調取。如必須該二員到津。再由丁日昌奏明候旨。辦理將此。由五百里各密諭知之。又諭前據蘇鳳文等奏。叛匪梁添錫遁入越南安邊地方。當經諭令蘇鳳文馮子材。飭令前敵各軍迅速進攻。肅清邊境。迄今已逾多日。尚未據蘇鳳文等續有奏報。不知現在勦辦情形究竟如何。總當督飭各軍乘勝進勦。迅殲醜類。以靖邊陲。安南國沿邊膏腴如胥

江等處。在安南為三省地方。其廣不過中國一郡。該國謂之東京。近年聞為法國所占。踞有駐紮重兵。並設提督等官。情事安南陸路接壤。廣西由廣西邊界至胥江道里若干。有無山川阻隔。著蘇鳳文密派幹練有識之員。前往該處確訪一切情形。繪圖貼說。並將近日安南與法國情意是否融洽之處。據實奏聞。此係機密要務。派員查探一層。即作為疆臣之意。不可言明。出自諭旨。庶不至涉張惶

想該撫必能仰體此意慎密籌辦也將此由五百里密諭知之尋奏遵派知府徐延旭赴諒山一帶密查據稱由太平府鎮南關邊界至越南東京計程七日多屬坦途並無胥江名目謹將各省方向繪圖貼說該國南圻濱海被洋人占踞六省銜恨甚深實無融洽情形報聞又諭景霖奏請飭催弁兵米折銀兩一摺直隸積欠馬蘭鎮標漢兵米折銀兩前經諭令直隸總督趕緊籌撥茲據景霖奏

稱除陸續領到米折銀三千四百兩外尚欠銀九千三百餘兩等語該弁兵等守護差務緊要情形窘苦亟當速籌接濟著曾國藩督飭藩司將欠撥該處弁兵米折銀兩仍遵前旨歸併

陵餉案內隨同差役米折銀兩一體迅速埽數撥給不得再有帶欠以濟要需將此諭令知之江蘇巡撫丁日昌奏請調前署蘇松太道杜文瀾前赴天津差委允之派工部左

侍郎鮑源深恭勘

昭西陵

隆恩殿暨

陵寢門應修工程○甲午諭軍機大臣等都興阿等奏草倉河泊岸被水衝刷情形一摺據稱本月初間山水驟漲將新修草倉河東頭南岸衝開水口分流歸入蘇子河兩岸椿笆間有衝敝新修泊岸全行衝刷止存椿固數丈增修月隄一道僅騰椿跡漂失鹿角多架

石隄三空橋板欄杆間有衝失地面石條移動等語新修草倉河各工因山水泛濫猝被衝刷尤恐秋令多雨河水復發更出要工都興阿奕慶現在親往確查即著督飭派出委員周歷履勘先行設法保護以昭慎重至草倉河近始興修乃甫經蒞工即被衝塌情形較前轉重是否原修工程偷減草率未能完固並著該將軍等確切查明據實具奏不准稍有含混將此由四百里各諭令知之又

諭袁保恆奏西征餉項支絀請飭催解河東
鹽課以濟急需一摺據稱山西河東鹽課每
綱應解西征糧臺共銀四千九萬兩已已綱
內除先後解過三千五萬兩尚欠解十四萬
兩請飭迅解並於庚午綱趕籌三十萬兩接
解等語西征各軍現分南北兩路進攻勦辦
正當喫緊亟應接濟餉需庶攻取可期得手
卽著何璟嚴飭河東道迅將已已綱欠解銀
十四萬兩於八月內埽數解清並著將庚午
綱趕緊籌備銀三十萬兩於秋冬之間源源
報解以濟軍食毋任拖延將此由四百里諭
令知之

大清穆宗繼天開運受中居正保大定功聖智
誠孝信敏恭寬毅皇帝實錄卷之二百八十七

大清穆宗繼天開運受中居正保大定功聖智
誠孝信敏恭寬毅皇帝實錄卷之二百八十八

臨江府知府官經提督滿起居注官太子太傅文淵閣領閣事翰林院掌院學士銜奉直人略館現職武英殿內書堂撰修臣謹識

理之所重務戶部三侍郎稽知之經書功加五級隨常加七級紀錄三十次賢良書古應爲百無誤請官太子少詹事開府開事禮部太常寺武庫藏書

正江蘇省州縣經管理工部七條事務內大臣麟慶分軍功加一級隨帶翎隨錄錄十七次。宣統元年職銜自晚庭日議及居官大小各條翰林院掌書

學士提察按奉天諸事件處副史館理核辦茲據辦學士兵部西書來稱六臣等居官怠惰工部三庫事務閑于辦事傳知九旗軍功加五級優獎

如欲收之錄十九次 沈氏家系圖載有乾隆漢口頭品頂戴總督尚書理戶部左都御史加五級紀錄十二次 徐樹錚

救急

同治九年庚午八月乙未朔

上詣綏履殿問

慈安皇太后平安室問

慈禧皇太后安。至癸亥皆如之。○命鴻臚寺卿

張澹卿為奉天府府丞兼學政工部左侍郎

鮑源深提督順天學政。吏部右侍郎彭久餘。

提督江蘇學政內閣學士景其濬提督安徽

學政翰林院侍講李文田提督江西學政太

僕寺少卿丁紹周提督浙江學政翰林院侍

講黃體芳提督福建學政修撰洪鈞提督湖

北學政編修廖壽恆提督湖南學政何金壽

提督河南學政江南道御史龔承鈞提督山

西學政翰林院編修汪鳴鑾提督陝甘學政

夏子錫提督四川學政侍講學士何廷謙提

督廣東學政編修郭懷仁提督廣西學政汪

敘疇提督雲南學政劉青照提督貴州學政

山東學政潘斯濂留任○

上以祭

社稷壇自是日始齋戒三日○丙申諭內閣○前

因奕慶奏叅盛京工部司庫英綿挾嫌稟訐

牽涉庫款任意狡展各情當經諭令盛京刑

部嚴審定擬茲據瑞聯奏稱查明已革司庫

英綿因見庫款繁多恐有虧那各情稟請查

辦嗣經工部派員查得同治七年奏銷後應

存庫銀二萬三千八百七十餘兩而現存庫

銀止有一千六百六十餘兩餘係已放未題

並各員所欠回繳之款。其存庫各項物料查

無虧短該革員所稟。並無挾嫌及狡展情事。

等語。已革司庫英綿到任二年。於庫項未能深悉。率行稟計。實屬冒昧。業經革職。著毋庸議。其已放未題並各員所欠回繳共銀二萬二千二百餘兩。即著奕慶查明。趕緊分別題銷。飭令回繳。以重庫款。○諭軍機大臣等。昨據曾國藩等奏。提解已革天津府縣到津一摺。本日據總理各國事務衙門奏。近日辯論情形。並鈔錄照會呈覽一摺。張光藻劉傑。以奉旨治罪人員。理應在津聽候查辦。乃一往順德就醫。一往密雲安置。眷累遷延多日。疊經嚴旨催促。始赴天津。以致洋人枝節叢生。任已私而貽誤國事。賢能之吏。豈應如此。現在羅淑亞所遞洋文。業由該衙門譯出。即著曾國藩等按照所指各節。逐一詳訊。取具切實親供。其事所必無者。固應明白剖晰。其情所或有者。亦不可諱飾避就。庶有以折服洋人之心。不至再滋口實。至緝獲正兇。實為此案最要關鍵。早則該使無可置喙。遲則該使

愈肆狡謀。即如羅淑亞於七月十三日到京。後詞氣尚為渾涵。現因時隔兩旬。津事尚無頭緒。遂至主使證據之說。持之愈堅。此其明證。若再不迅速辦理。此後波折愈多。收拾愈難。曾國藩等務當督飭地方文武員弁。認真購緝。將在逃首要各犯。儘數弋獲。認真懲辦。其現獲各犯。亦著詳細研究。務得實供。毋任狡展。成林到津後。毛昶熙計已交卸。仍著暫留天津。會同曾國藩籌辦一切。丁日昌於洋務情形。素稱熟悉。此次兼程到津。籌畫各事。均極認真。即著幫同曾國藩等。悉心妥辦。務協機宜。以副委任。洋文內有牽涉陳國瑞之語。並著曾國藩等詳查確訪。據實奏聞。總理各國事務衙門摺。並羅淑亞照會二件。及照覆一件。譯出洋文一件。均著鈔給閱看。將此由五百里各密諭知之。○又諭馬新貽奏籌防江蘇省水陸大致情形一摺。據稱江甯扼東南形勝。為長江有事之所必爭。萬一洋船

進犯惟有設法禦堵下游毋令駛過焦山若
進偏金陵則力扼下關不令駛入內河如登
陸攻城卽於沿江扼要處所分路設伏安徽
江西湖北各省以鎮江為入江第一門戶金
陵又為上游諸省屏蔽江皖以上戒嚴莫如
分兵下堵上海為各國通商薈萃之區不可
稍涉疑忌蘇州雖切近上海而自松江以達
崑太港汊縱橫已密屬李朝斌將外海內洋
太湖各師船調集吳淞以備緝海盜為名等
語所籌尚屬周妥天津之事雖經總理各國
事務衙門臣與法使再三辯論能否卽弭釁
端尚難豫定江防仍應實力籌辦以壯聲援
所有金陵上游沿江一帶布置情形與英翰
日前所奏大略相同卽著馬新貽隨時會商
英翰督飭在事將士擇要駐紮力扼上游並
一面咨商黃翼升將分汎各師船歸併本營
排泊操練毋令畸零散布上海口岸緊要務
飭上海道遇有中外交涉事件加意籠絡迅

速辦理不得以各國現尚安堵稍掉輕心吳
淞江口及蘇松兩府毗連形勢水陸要隘既
經李朝斌妥為布置著卽咨令該提督將各
營師船勤加操演嚴密巡防俾蘇垣與上海
兩處各有援應仍密屬張兆棟就近稽查毋
稍疏懈上游諸省防守並著咨商劉坤一李
瀚章悉心籌畫遇有警信卽可首尾銜接毋
為敵人所乘此時江防籌備惟當就蘇省現
有兵力斟酌分撥儻有意外之虞總以扼住
焦山為防江第一要著添募勇丁一層自可
臨時籌度該督素顧大局務須處以鎮靜弭
患無形慎勿先事張惶致滋口實將此由五
百里密諭知之○補鑄安徽甯國府通判關
防從巡撫英翰請也○丁酉祭
先師孔子遣大學士倭仁行禮○諭內閣魁
玉奏總督猝被行刺因傷出缺一摺據稱兩
江總督馬新貽於七月二十六日由署右箭
道校閱事竣回署突遇兇犯刺傷脇肋當經

隨從武弁等將該犯卽時拏獲嚴訊。僅據供稱係河南人。名張汶詳。而行刺緣由。供詞閃爍。該督受傷甚重。延至次日身故等語。覽奏不勝駭異。總督衙署重地。竟有兇犯膽敢持刀行刺。實屬情同叛逆。亟須嚴行訊究。卽著魁玉督同司道各官趕緊嚴訊。務得確情。盡法懲辦。馬新貽持躬清慎。辦事公勤。由進士卽用知縣。歷任繁劇。咸豐年間。隨意勦賊。疊克堅城。自簡任兩江總督。於地方一切事宜。

辦理均臻妥協。方冀長承恩眷。倚畀優隆。茲因被刺遇害。披覽遺章。實深悼惜。馬新貽著賞加太子太保銜。照總督例賜卹。並入祀賢良祠。任內一切處分。悉予開復。伊子馬毓植著加恩賞給主事。分部行走。該督靈柩回籍時。著沿途地方官妥為照料。應得卹典。該衙門察例具奏。用示憫念。疆臣至意。尋予祭葬。諡端敏。又諭李瀚章郭柏蔭奏。川江水勢異漲。荆宜等屬猝遭水患。並漢水時發。沿河

民田皖隄漫淹一摺。本年夏間。湖北大雨時行。江水陡漲。五月間。漢水又發。以致宜昌郡城內外。概被淹沒。荊州南岸公安地方。被淹最重。此外松滋石首監利嘉魚咸甯蒲圻江夏漢陽黃梅及鍾祥荊門京山潛江天門沔陽漢川黃陂孝感雲夢應城各州縣。均因各隄漫潰。田畝淹沒。人民遷徙。殊深軫念。所有被災較重之宜昌公安二郡。著李瀚章等督飭司道。籌款發給。量予賑撫。其餘各處。並

著督飭各該地方官。隨時設法。妥為安撫。毋令一夫失所。○諭軍機大臣等。本日魁玉馳奏督臣被刺。因傷出缺一摺。兇犯張汶詳。膽敢伺隙行刺。戕殺總督重臣。實屬罪大惡極。必應研訊確情。從嚴懲辦。以申國法。著魁玉督飭司道各官。設法熬審。將因何行刺緣由。及有無主使情事。一一審出。據實奏聞。現在津事未結。長江防範事宜。最關緊要。本日據英翰奏。江面扼要以靖江陰之閒。為第一

門戶。其次則焦山兩岸亦為險要。馬新貽已邀黃翼升東下。面商機宜。並因下游兵船不敷分布。須合上游數省全力。方可備豫。萬全等語。與昨日寄馬新貽諭旨。適相脗合。魁玉現署督篆。責無旁貸。即著隨時咨商李瀚章。英翰。劉坤一。郭柏蔭。同心協力。迅速妥籌。湖北江西兩省。何處可以助兵。何處可以助餉。想李瀚章。郭柏蔭。劉坤一。素顧大局。必能不分畛域。悉心區畫也。黃翼升現在行抵何處。

所有整頓水師籌辦江防之處。著與各該督撫等嚴密圖維。以資備禦。將此由五百里各密諭知之。○又諭英翰奏報提督自皖起程日期一摺。提督劉銘傳久經戰陣。忠勇過人。茲經英翰遵旨令其北來。該提督即於上月二十九日由六安起程。循淮下駛。取道山東赴直。是其報國之忱。久蘊於中。聞召即行。尤非諸將所及。覽奏之下。嘉慰實深。現在天津之事。雖未就緒。尚不至即形決裂。若遽令該

提督帶兵赴津。恐滋洋人疑懼。前據曾國藩奏銘軍係百戰之兵。但駐防過久。恐於戰事稍疏。若令劉銘傳親出統馭。不難頓復舊觀等語。該軍現紮滄州靜海一帶。即著曾國藩傳知該提督。馳赴該營。督飭所部將士勤加訓練。俾此軍悉成勁旅。以備折衝。萬一洋人難以理諭。釁端自彼而開。朝廷必假該提督以事權。用展其才。如此事即有轉圜。無須用武。屆時當令李鴻章傳諭該提督來京陛見。

本日發去白玉搬指一箇。白玉翎管一支。火鐮一把。大荷包一對。小荷包兩箇。著曾國藩交劉銘傳祇領。以示褒獎。正在寄諭間。據魁玉奏稱。兩江總督馬新貽猝被行刺。因傷出缺。已將曾國藩調任兩江總督。直隸總督著李鴻章補授矣。兩江職任綦重。曾國藩前在江南多年。情形既多熟悉。布置尤為得宜。刻下交卸在即。務當遵奉昨日諭旨。嚴飭地方文武員弁。將在逃首要各犯儘數購獲。並會

同毛昶熙丁日昌成林將現獲各犯詳細研
究務得實供其羅淑亞照會內所指各節該
督等亦當逐一詳訊取具張光藻劉傑切實
親供以期及早結案母令枝節橫生李鴻章
現在行抵何處著卽馳赴天津接篆所部各
軍仍著分飭郭松林等於直隸邊境獲鹿一
帶及河北彰德山西平定等地方分紮以防
回匪竄擾為名不可稍動聲色正定一帶近
聞有游勇滋鬧洋人教堂情事著曾國藩李

鴻章檄飭各營將領就近彈壓兵民毋得從
中搆釁儻有假冒該營勇丁及別處游勇藉
端滋事者並著隨時訪拏懲辦綏靖畿疆將
此由五百里各密諭知之○以兵部左侍郎
胡家玉兼署吏部右侍郎禮部右侍郎溫葆
深兼署工部左侍郎○調直隸總督曾國藩
為兩江總督未到任前以江甯將軍魁玉兼
署調湖廣總督李鴻章為直隸總督以浙江
巡撫李瀚章為湖廣總督浙江布政使楊昌

濬為巡撫○戊戌祭

大社

大稷遣豫親王本格恭代行禮○諭軍機大臣
等定安奏添設水師一營酌定章程開單呈
覽一摺前因甯靈各軍採買糧石陸路轉運
維艱經定安飭令歸綏道國英籌款造船由
黃河挽運並添設礮船以資防護現經定安
酌擬章程將大小礮船三十二隻設立水師
一營派令提督劉景芳為統帶官吉林泰為

副統帶官並揀派營哨各官酌定月支薪水
銀兩均著照所擬辦理此項勇丁務須挑選
精壯責成劉景芳等認真訓練嚴密梭巡以
輔陸路兵力之不足至冬令河水凝結時仍
應將船隻擇要停泊飭令該官兵等與陸路
各隊聯絡巡防以資得力將此諭令知之○
又諭張廷岳等奏確探賊蹤現籌辦理情形
一摺本年夏間賊匪先後焚掠額爾德尼班
第達呼圖克圖遊牧暨沙爾噶勒珠特台各

該處被擾情形。業經張廷岳等派員前往查明。卽當設法分別撫恤。俾該蒙民喇嘛等復安生業。毋令失所。張廷岳等以賊有九十月間復來竄擾之說。庫倫地廣人稀。無險可扼。必須斷其來路。方免伺隙奔突。請飭甯夏綏遠盤查奸宄。所籌亦是。著定安、金順、豐紳、謙禧在於毗連口外關津要隘。設兵盤詰。遇有詐稱商民結隊馱載。並無部票形跡可疑者。立即認真接查。免致賊匪潛蹤出口。滋生事

端。惟須將派出兵弁嚴加約束。不得藉端騷擾累及商民。張廷岳請令綏遠派兵出口。於賽因諾顏扎薩克圖汗兩部落西南一帶。接剿賊巢。現在該處有無賊蹤。是否須用兵力接捕。著福濟酌度情形。會商定安辦理。張廷岳等另片奏春間西愛曼有警。俄國領事卽調到該國馬隊百名。在庫倫晨夕操演等語。此項馬隊雖不滋事。而亦不可不防。著張廷岳隨時籠絡。留心查察。毋稍大意。將此由五

五百里諭知定安。福濟、金順、豐紳、張廷岳、阿爾塔什達並傳諭謙禧知之。○又諭定安奏山西委員解到直隸轉解部撥巴哈兩城餉銀三十萬兩。除將一萬六千兩撥交巴里坤委員領解外。共解烏城銀二十八萬四千兩。又山西委員解到直隸轉解部撥烏城安插索倫人衆餉銀十萬兩。因部撥原匪較大。每匣裝盛三千兩。綏城轉解均用駝隻。每駝僅能運銀三千兩。因改用裝盛一千五百兩木箱。以便相運。旋據歸綏道等詳稱。拆匣盤驗時。部撥巴哈兩城餉銀三十萬兩內。共短大元寶十三箇。又有銅元寶十箇。外長小銳一箇。碎銀四件。部撥烏城安插索倫人衆餉銀十萬兩內。共短大元寶二箇。外長碎銀七件等語。此項餉銀究由何處撓換短少。亟應徹底根究。以期水落石出。著戶部管庫大臣會同藩李鴻章定安何璟確切查明。據實具奏。此外解赴烏城銀兩有無撓換短少情弊。並

著福濟查明具奏。將此各諭令知之。尋福濟奏遵查續由綏遠城解到安插索倫銀五萬兩。並無撓換短少報聞。○又諭崇實吳棠奏裁汰援黔兵丁。並通籌全局辦理一摺。據稱川軍自援黔以來。閱時三載。增兵增餉。民力難支。現在貴州驛路已通。荒土重開。釐金自有起色。而川東之重慶夔州等屬。均被水災。餉事實難支持。已飭唐炯先將羸卒疲兵大加裁汰。並通籌全局。從長辦理等語。黔省軍務自川楚各軍協勦後。清江北岸業已肅清。正宜乘勝進攻。台拱將南岸各苗寨次第蕩平。若遽行鬆勁。必至賊勢復張。前功盡棄。崇實等以天氣暑熱。士卒多病。不能不暫為休息。現交秋令。正可及時進勦。著崇實吳棠飭令唐炯斟酌情形。裁汰疲弱。督率精銳迅速會同席寶田等軍合力進攻。一面咨會曾璧光派撥黔省兵勇協同防勦。不可久事遷延。將此由五百里各諭令知之。○改派工部左

侍郎恩承恭勅

昭西陵

隆恩殿暨

陵寢門應修工程。○調直隸布政使盧定勳為

浙江布政使。以直隸按察使錢鼎銘為布政

使。調山西按察使范梁為直隸按察使。以山

西河東道李慶勳為按察使。○以綏遠城防

河出力。賞委營總辦克巴雅爾泰巴圖魯名

號。委參領齊奇克圖花翎護軍校鄂勒哲依

等藍翎。餘加銜升敘有差。○以四川官軍攻

克貴州巖鷹坵等處苗巢。賞道員鄧錡都司

李孝德巴圖魯名號。餘加銜升敘有差。予陣

亡總兵官姚華萃祭葬。世職加等。建專祠。都

司楊通祥。楊奇清。守備駱安邦。祭葬。世職加

等。附祀姚華萃專祠。○撥山西司庫銀四萬

兩。解赴綏遠城備用。○撥火器營八旗漢軍

子母礮。劈山礮各二尊。鐵心銅礮。神威礮各

四尊。解赴庫倫軍營備用。○已亥。諭內閣。英

桂奏請將不能約束兵勇之員弁分別懲處一摺。福建莆田縣地方。於本年五月間。有華勇林瑞來等。因官兵查拏花會。輒敢糾約在營勇丁。竊取號衣。借名摻犯。肆行搶掠。並有殺斃人命。姦淫婦女情事。現經拏獲正法。並分別辦理。管帶各員。疏於防範。實屬咎無可辭。儘先守備朱有升。藍翎把總彭行浩。福建興化右營裁缺把總劉廷璋。均著卽行革職。參將朱長陞。守備陳得功。均著交部議處。以示懲儆。邇年以來。各省遣散勇丁。往往潛匿各處。乘機搶掠。擾害地方。並有造言惑眾。借端生事各情。亟應嚴拏懲辦。著各路統兵大臣。暨各直省將軍。督撫督飭該地方官。遇有此等編造謠言。乘機滋事之勇丁。立卽查拏。從嚴懲治。毋稍寬縱。將此通諭知之。○諭軍機大臣等。前諭富明阿挑選吉林馬隊二千名。馳赴古北口駐紮。茲據奏稱。挑選馬隊官兵二千六十一員名。分為八起。定於八月初

六日起程赴口。並派副都統桂廉等統帶彈壓等語。此項馬隊到口。卽著庫克吉泰。懷遵前旨。飭令駐紮該處。勤加操演。俾成勁旅。並督飭各帶兵官。申明紀律。毋令兵丁滋生事端。將此諭令知之。○又諭劉坤一。奏籌議防務情形一摺。據稱水師現經總兵丁義方。勤加操練。陸師照馬新貽練兵章程。及時整頓。並添募營勇。藉厚兵力等語。卽著劉坤一認真辦理。以備不虞。至所陳沿海各省。於決裂時。一律停其通商。封其行棧。一口有變。各口皆然。一國有變。各國皆然。該撫於夷務情形。尚未深悉。洋人蜚語相依。遇事必相聯絡。且此案誤傷俄英比意之人。各國均有連橫之勢。卽使和局決裂。亦應分別辦理。以解散其黨。與若概予拒絕。轉恐合而謀我。益難措手。現經總理各國事務衙門王大臣。與法使再三辯論。尚不至遽行決裂。而江防仍應實力籌辦。以壯聲援。前有旨諭令兩江總督將上

游各省防守咨商劉坤一李瀚章悉心籌畫。遇有警信即可首尾相應。免為敵人所乘。著劉坤一與各該督撫會籌布置。仍當不動聲色。密為備禦。不可稍涉張惶。將此由四百里密諭知之。○又諭英桂奏遵籌防範海口情形。請飭李鴻章馳赴近畿各摺片。據稱福州廈門臺灣三口各國教士洋商因聞天津之事不免陰懷疑慮。該督密飭沿海道員各於保護之中兼寓防範之法。所籌尚妥。刻下天津之事辦理尚無眉目。能否不至啟釁殊難豫料。近畿地方現已密為布置。外省沿江沿海口岸均應先事綢繆。未可稍涉大意。近據李瀚章丁寶楨馬新貽英翰等先後覆奏。均已密籌戒備。英桂現擬令羅大春赴省統率標兵認真訓練。即著督飭該提督實力整頓。務使一律精壯。足備禦侮折衝之用。應否另行募勇調兵並著酌度情形妥籌辦理。其廈門師船著咨會李成謀加意操練。藉資調遣。

臺灣地方責成該鎮道一體籌防以期有備無患。此時洋人並未開釁。該督務當不動聲色。督率所屬慎密籌辦。不可過事張惶。將此由四百里密諭知之。○又諭前因福濟等泰竄匪復擾臺站。諭令定安文盛各撥馬隊五百名派赴哈爾尼敦防剿。茲據福濟等奏稱接文盛咨會馬隊到防後應需各項由烏城就近酌給。而烏城地處窮荒素無出產。購糧維艱。察哈爾及綏遠城採買轉運較為簡易。請飭仍由該都統籌給。並飭綏遠城將軍一律辦理等語。所奏自係實情。所有察哈爾馬隊五百名應需口分等項仍著文盛按月籌給。至綏遠城所撥察哈爾馬隊五百名如須前往其口分等項並著定安按月籌給。以濟軍食。僅轉運未到該軍糧餉或形缺乏仍著福濟隨時接濟俾免飢潰之虞。前諭令福濟查明烏城境內現在有無賊蹤是否仍需馬隊助剿斟酌情形具奏。該將軍此時計已接

奉前旨所有續調之察哈爾馬隊五百名。究竟應否調往。如現在已無賊蹤。即可無須調撥。著福濟等一面具奏。一面咨照定安等。截留以免往返。將此由五百里各諭令知之。○以庸劣不職。革福建遊擊陳兆麟守備林連喜楊步高職。予浙江小渚門洋面傷亡遊擊江九華祭葬世職。附祀總兵官陳紹專祠。庚子遣官祭

文昌帝君廟。諭軍機大臣等。將志章奏。北山各軍勦賊疊勝。並龍錫慶一軍勦平匪壘。暨調張福齊馳紮廊宜各一摺。韓城火燒溝等處匪勇滋擾。經總兵官佑庭督軍前進。並提督李光前派李家安等會勦獲勝。宜川延川延長一帶匪勇。又經喻步蓮等率軍擊敗。龍錫慶一軍於涼水灣得勝後。卽飭劉春藻帶隊由瓦窯堡偪攻老巢。疊斬賊目多名。平其堅壘。劉春藻復統軍進擣逆匪。李凡覺勢窮乞撫。龍錫慶因該逆狡悍異常。當於軍前

正法全股現已蕩平。所有龍錫慶李光前等軍勦賊尚屬奮勉。著准其擇尤酌保。毋許冒濫。北山徑隘叢雜。匪勇踞伏甚多。亟應乘勝按捕。將志章以周盛傳拔隊渡黃。調張福齊六營由白水開駐郿州。以三營填紮張村黑水一帶。以三營會同喻步蓮等於延宜一帶勤加按捕。並派胡得成馳赴韓城邵陽等處。擇要扼紮。卽著嚴飭該總兵等認真堵禦。與在防各軍聯絡聲援。遇賊卽擊。不准稍有疏虞。據該撫奏左宗棠函稱黃鼎等軍已攻破張恩堡。現督軍進攻峽口。著該大臣卽飭該道員激勵諸軍。奪取該處要隘。以期次第進攻。埽除羣醜。至陝省籌辦撫綏招徠賑墾各事宜。並著左宗棠將志章督同司道遴選廉能。牧令實力奉行。毋得有名無實。將此由四百里各諭令知之。○以大學士倭仁為順天鄉試正考官。刑部尚書瑞常鄭敦謹署都察院左副都御史。唐壬森為副考官。○以都察

院左都御史靈桂禮部尚書蔣青藜兼署刑部尚書太常寺卿徐桐暫署都察院左副都御史以鑲黃旗蒙古都統明慶兼署正藍旗滿洲都統予陝西宜川等處陣亡遊擊喻緒良等祭葬世職○追予安徽蒙城陣亡千總陳景山建立專祠○辛丑諭內閣庫克吉泰奏郎街兩次被水現籌辦理情形一摺本年六七月間熱河郡街連次大雨被衝民房六百餘間淹斃大小男婦四十六名口其獅子溝等處兵民房屋亦多被衝該民人等疊被水災蕩析離居情殊可憫卽著直隸總督熱河都統一面督飭地方官設法堵禦一面查明被災各戶口加意撫恤毋令一夫失所其隄壩應修各工並著直隸總督迅派妥員前往會同庫克吉泰派出各員認真查勘妥為籌辦不得草率從事○諭軍機大臣等步軍統領衙門奏拏獲天津民人金占鼇請旨辦理一摺卽著該衙門委派員弁將金占

鼇卽日解往天津歸案訊辦曾國藩等於該犯解到時迅速嚴訊確情毋任狡展原摺著鈔給曾國藩等閱看將此諭知步軍統領衙門並由四百里諭令曾國藩毛昶熙丁日昌成林知之○又諭李鴻章奏行抵直境派兵分紮晉豫邊界一摺據稱郭松林全軍暫駐彰德衛輝等處周盛傳馬步各隊現在平陽洪洞等處休養操練該督自率親軍八營行抵井陘擬卽赴獲鹿暫紮籌辦糧運惟各軍遠紮晉豫邊界所慮一旦有警呼應不及等語所籌均合機宜前已有旨將李鴻章調補直隸總督諭令赴津接篆該督現已行抵直境卽著懷遵前旨迅速前往天津接受督篆妥籌一切以副委任近日洋人情形尚不至遽行決裂所有郭松林周盛傳等軍卽著照該督分派地方暫行駐紮以休兵力仍當嚴飭該統領等隨時操演嚴加約束毋令滋生事端將此由四百里諭令知之○又諭楊昌

藩奏遵旨籌防一摺。據稱浙江海口以甯波鎮海為最要。溫州乍浦等處次之。該處為洋人往來熟徑。防不勝防。浙省水陸各兵除巡緝內地河道及留防省城外。僅數分布各府。彈壓。惟有就現在兵力相機辦理等語。所籌尚無實在把握。天津一案現飭迅籌了結。雖不至即行決裂。不能不先事豫防。該省水陸各兵二萬餘名。既經該省督撫隨時訓練。自可猶豫不虞。該撫現經移飭沿海各營挑選

精兵設立哨隊。並擬將黃少春舊部楚勇及總兵黃有功所部新湘營等軍。豫備調用。即著妥為經理。實力整頓。所有濱海各營鎮將並著該撫嚴飭切實訓練。固不可稍涉張惶。亦不得因循貽誤。楊昌濬現已簡放浙江巡撫。責無旁貸。該省水陸籌備事宜務宜悉心辦理。毋得徒託空言。將此由四百里密諭知之。又諭楊昌濬奏請飭催提督回任等語。浙江提督黃少春前經賞假回籍。現在浙省

甯波溫州台州等屬所轄洋面緝捕巡防極關緊要。該提督在任有年。於海防情形頗為熟悉。亟應飭令回任。以資鎮守。著劉崐即行傳知黃少春星速馳赴本任。不必拘定假滿稍涉耽延。致誤防務。將此由四百里諭令知之。撫恤琉球國遭風難夷如例。士寅諭軍機大臣等。魁玉奏近日省城情形並續獲應訊各犯一摺。馬新貽出缺後。前已有旨令該將軍將現獲之兇犯張汶詳嚴訊確情。茲

據奏稱該犯供詞尚屬支離。並拏獲容留張汶詳之朱定齋。周廣彩。及同時在道旁之王咸鎮等。隔別審訊等語。此案馬新貽以兼圻重臣。猝被兇犯行刺。情節重大。亟應嚴切根究。仍著魁玉督飭承審各員。將兇犯張汶詳及朱定齋等分別熬審。務將行刺緣由究出。不得含混奏結。此外標弁家丁亦應隔別詳訊。如有供出兇黨。一併嚴拏究辦。以儆兇頑。該省近日情形。據稱現屆鄉試。稽察尚嚴。惟

省城士子雲集華洋並處最易滋生事端並著該將軍嚴飭地方文武認真稽察隨時彈壓毋得稍涉疏虞將此諭令知之 癸卯

太宗文皇帝忌辰遣官祭

昭陵 諭軍機大臣等內閣侍讀學士鍾佩賢

奏浙江湖州府屬三十六澮因年久淤墊兵燹之後壅塞尤甚前經撫臣飭屬挑治草率了事一遇連雨仍復漫溢倒灌請飭查明修濬等語浙省澮港關繫東南水利亟應速籌

疏濬著楊昌濬查明現在澮港情形應如何認真修理以期一律深通俾無淤塞潰溢之患並速派賢員實心經理仍一面先行具奏所呈吳雲重濬三十六澮議著鈔給閱看將此諭令知之 又諭李鴻章奏郭松林等軍分別駐紮並擬率親軍先至保定再行赴津等語該督於抵保定後趕緊料理一切即行前赴天津妥籌辦理正定靜謐如常雖據該督查明兵民與教堂毫無干涉仍著李鴻章

督飭各營將領隨時彈壓毋令滋生事端至各處游勇如有捏造謠言從中搆釁情事並著該督嚴拏懲辦以靖地方郭松林一軍暫紮彰德既恐軍食難繼應否就運河附近屯駐著李鴻章酌奪辦理本日據文盛等奏勸捐駝隻足敷二千之數現准李鴻章函令徑解直隸行營請旨遵行等語此項駝隻應否全數解赴直隸抑或分撥陝西以資轉運之處著李鴻章酌量情形咨照文盛妥為撥解將此由四百里密諭知之 以安徽捐輸團練永廣壽州學額六名亳州二名 追予浙江紹興殉難江蘇道員劉咸妻譚氏暨眷屬姻親十三名口分別旌卹如例並予建祠撥山東司庫銀十萬兩河南司庫銀五萬兩解赴盛京戶部轉交吉林以備軍需 甲辰

上詣

奉先殿

壽皇殿行禮 遣官祭黑龍潭

昭靈沛澤龍王之神玉泉山

惠濟慈佑靈渡龍王之神昆明湖

安佑普濟沛澤廣生龍王之神密雲縣白龍潭

昭靈廣濟普澤龍王之神○遣官祭圓明園

惠濟祠

河神廟○諭內閣給事中王書瑞奏督臣被刺遇害請派大臣查辦一摺兩江總督馬新貽猝被行刺因傷身故疊經諭令魁玉督同

該處司道等將該犯嚴訊確情盡法懲辦諒不至草率從事惟以兼圻重臣督署要地竟有不法兇徒潛入署中白晝行刺斷非該犯一人挾仇逞兇已可概見現在該犯尚無確供亟須徹底根究著派張之萬馳赴江甯會同魁玉督飭司道各員將該犯設法熬審務將其中情節確切研訊奏明辦理不得稍有含混又諭曾國藩奏滬陳病目情形懇請另簡賢能畀以兩江重任俟津事奏結再請

開大學士缺專心調理一摺兩江事務殷繁職任綦重曾國藩老成宿望前在江南多年情形熟悉措置咸宜現雖目疾未痊但得該督坐鎮其間諸事自可就理該督所請另簡賢能之處著無庸議仍著俟津事奏結後卽行前赴兩江總督之任毋再固辭○又諭曾國藩奏海疆地方緊要懇請破格用人一摺所有天津府知府員缺著准其以記名海關道刑部郎中陳欽署理○又諭穆圖善奏營

勇索餉滋事請將失察之統領革職一摺甘肅駐紮省垣各軍經左宗棠飭西征糧臺撥給一月滿餉以示體恤復因買糧需款甚亟飭該省司道將此款改為買糧銀兩隨後再將月餉補解乃該營哨官竟敢帶同散勇多人齊入藩署求發足餉勢甚洶涌該司道等恐釀成事端已允將原撥餉銀全數覈發而該勇丁復敢拋擲執石致蘭州道蔣凝學身受石傷實屬目無法紀穆圖善已將糾約滋

事之親兵中營幫辦副將張金魁查出卽行正法。仍著該將軍督飭各營統領隨時彈壓各勇丁。不准稍有滋鬧。統領親兵中等營記名提督馬洪勝雖查無同謀情事。而於幫辦出營滋事。毫無覺察。實難辭咎。記名提督借補陝甘督標前營遊擊馬洪勝著卽行革職。並革去統領。以為軍律不嚴者戒。○諭軍機大臣等前因定安奏山西委員解到直隸轉解部撥巴哈兩城及烏城餉銀有攙換短少

等情。當經諭令戶部管庫大臣直隸總督山西巡撫確查具奏。茲據該管庫大臣奏稱上年十二月間部撥巴哈兩城餉銀三十萬兩。烏城安插索倫人眾餉銀十萬兩。由銀庫定期傳知順天府派員支領。均與順天府委員並大宛兩縣當堂兌交。係原庫平以大元寶二十箇為一千。以一千為一袋。逐袋過數。經該委員等驗明數目。出具並無短少。低潮甘結照數領出。其如何裝匣轉解按站交代均

由順天府自行辦理等語。部撥餉銀既據奏稱每袋以元寶二十箇為一千。不用再加小錠碎銀。已足庫平一千之數。何以此次餉銀解到歸綏三十萬兩內共短大元寶十三箇。又有銅元寶十箇外長小錠一箇。碎銀四件。十萬兩內共短大元寶二箇外長碎銀七件。軍餉要需竟有攙換短少情事。實屬不成事體。是否沿途舛錯。抑係該委員等交代不清。亟應嚴切根究。著順天府傳集經手各員詳

細查究據實奏聞。如有舞弊情形卽著嚴參懲辦。毋稍徇縱。將此諭令知之。○又諭浙江嵊縣知縣嚴思忠被兇犯龐押新戕斃。並傷斃家屬數口。前據楊昌濬訊明該犯係屬瘋顛。奏明正法結案。茲據御史劉國光奏稱此案疑竇頗多。所稱瘋病情形未足憑信。原奏不實不盡。請認真查辦等語。嚴思忠被戕一案業據楊昌濬訊明奏結。若如該御史所奏各情實不足以成信讞。著該撫按照該御史

指駁各節覆訊明確據實具奏不准稍涉迴護原摺著鈔給閱看將此諭令知之尋奏違提人證照該御史指駁各節反覆研鞫與原審均尚相符並無可疑之處應請仍照原案完結下部知之又諭左宗棠穆圖善奏各軍勦賊獲勝情形一摺甘省駐紮鎮番金縣北山阿干鎮等處官軍分投雕勦賊股均獲勝仗尚屬得手惟回逆醜類繁多肆行竄擾必須各路一體探蹤截擊方不至伺隙奔突

勢成蔓延著左宗棠穆圖善督飭各營統領勤加偵探遇賊卽擊並隨時認真防範以遏賊氛河州尚有回眾十萬餘人並駐紮陝回二萬餘回目馬占傲有八九月間欲與官兵打仗之說亟應先事豫防左宗棠等務當悉心布置毋為該逆所乘其附省各營卽著穆圖善妥為調度以備不虞本日據穆圖善奏省垣各軍索餉滋事已分別嚴行懲辦因思甘軍協餉均歸西征糧臺轉發左宗棠自當

統籌全局均勻撥放方足以服眾心此次因撥項改充糧價以致省垣各軍藉口滋事嗣後該大臣當不分畛域體恤兵艱將甘省各營餉糈軍火源源接濟毋令缺乏甘軍楚軍不可微分厚薄免致各營援為口實並著與穆圖善彼此和衷商辦毋稍膜視將此由五百里各諭令知之予故兩江總督馬新貽於安徽立功地方建立專祠予直隸冀州陣亡在籍都司沈德英祭葬世職加等緩

徵直隸定廣平雞澤邯鄲蠡東光永年成安大名南樂十州縣被旱地方新舊額賦有差

乙巳

太祖高皇帝忌辰遣官祭

福陵 諭軍機大臣等奎昌奏查勘俄國已立

界牌鄂博一摺奎昌現已與俄國立界官穆魯木策傳公同履勘由塔城所屬之瑪呢圖噶圖勒幹卡倫起至賽哩鄂拉止查明俄國已立牌博四處均在原議分界處所建立尚

無侵占情弊已飭令弁兵等在俄國所立牌博內建立界牌鄂博四處辦理尚妥惟塔爾巴哈台山嶺等處尚有俄國已立牌博未經勘定該大臣現行抵霍野爾莫多地方與俄國立界官會商往查仍著按照圖約循依綫道詳細確切勘明毋任暗中侵越以重邊防此次隨同立界委員明魁等均著照所請先行賞戴翎頂如能始終奮勉事竣後准與出力官兵一併覈實保奏以示鼓勵分界既定

中外疆域分明彼此可以相安然政貴經久弊必豫防若不振刷精神隨時偵察恐日久懈生難免俄人不復行移占奎昌尤當督飭兵弁將設立牌博各邊界時加巡查不得稍涉大意其應如何嚴定章程以垂久遠之處著該大臣悉心妥籌奏明辦理將此由五百里諭令知之○丙午遣官祭昭忠祠○諭內閣都興阿奕慶奏查明

永陵草倉河泊岸被水情形繪圖呈覽並遵查

原修工程各摺片據稱此次山水驟漲甚急新工勢難遏其衝洶惟

陵街西堡土隄泊岸外係石圍栽椿內係三合土成做現在衝淘成院土工沈陷按其形勢似欠堅實等語著派阜保帶領通曉堪輿人員前往敬謹勘估此項工程仍派單懋謙恩承屆時前往認真承修其

陵街西堡土隄泊岸原修工程既未堅實即著於勘估後責成單懋謙恩承另行賠修務臻

鞏固○又諭都察院奏據兩江補用參將韓殿爵遣抱呈稱伊父原任安徽廬州營把總候補千總韓映奎前於咸豐二年十二月間在武昌勦賊陣亡業經議卹懇請自行捐貲建祠並將隨同殉難之兵丁金登科等一併附祀等語著湖北安徽各督撫查明具奏嗣後陣亡員弁如家屬人等有願自行捐貲建祠者應稟由各該省督撫查明請旨不得紛紛向都察院呈請以符體制○又諭前因丁

寶楨奏請以候補知縣劉莊姚補邱縣知縣一缺經部議以候補知縣內尚有名次在先之張道南例應先補將劉莊姚議駁茲據丁寶楨奏稱張道南以經歷保舉知縣報捐離任按照部咨以開缺行文日期覈計應以咸豐十一年正月到省劉莊姚由經歷保舉應升捐免本班以知縣歸候補班補用係咸豐九年八月間到省其名次係在張道南之先請仍以劉莊姚補邱縣知縣等語著吏部查

明劉莊姚請補邱縣知縣因何議駁暨應否將該員准補之處覈議具奏○又諭前據伊勒屯查明巴里坤鎮總兵何琯被參各節及署遊擊孫淵椿被控等情當經降旨將何琯交部議處並將孫淵椿革職交部治罪茲據何琯奏稱文麟把持糧道不顧大局確有實據該大臣扶嫌奏參巴里坤鎮標兵驕劣伊勒屯並未將驕縱情由及何琯不能統馭之處詳細聲敘含混具奏實屬虛妄至孫淵椿

被敦煌民人陳國清控告各節伊勒屯未將原告見證人等調赴巴城質訊亦未傳喚孫淵椿訊問僅據原控原詳一面之詞咨送刑部含混奏結請飭確實查辦等語此案文麟所參是否屬實伊勒屯查辦有無草率均應徹底根究著福濟即將文麟原參何琯暨孫淵椿被控各款及此次何琯具奏情節逐款詳查據實具奏不得稍有含混以成信讞○諭軍機大臣等前諭文盛將赴援軍臺之察

哈爾馬隊五百名應需口分等項按月籌給續調之察哈爾馬隊五百名如須前往其口分等項諭令定安籌給茲據定安奏稱前因河西空虛另挑兵丁五百名填紮並添設水師一營共計兵勇一千餘員名每月餉項卽將應給察哈爾馬隊一千名之餉抵放儻前項馬隊折回綏城餉乾無從籌給察哈爾地面遼闊該匪出沒無常現在卽無賊蹤亦應防其竄擾擬令達爾濟管帶馬隊一千名在

察哈爾右翼地方擇要駐紮於軍臺地面可
以兼顧等語。此項續調之馬隊五百名。定安
既難另行籌餉。所有此項續調馬隊與前調
馬隊共一千名。應領餉乾。均由文盛按月籌
給。並著照定安所擬。將此項馬隊駐紮右翼
地方。勤加訓練。如福濟咨照烏城境內尚有
賊蹤。卽飭迅速赴援。儻無須馬隊助剿。著文
盛飭令分別歸伍。以節餉需。將此由四百里
各諭令知之。○緩徵山東濮州被旱村莊本

年上忙錢糧。已酉諭內閣李鴻章現已調
補直隸總督。著卽馳赴天津。會同曾國藩。丁
日昌。成林。查辦事件。工部尚書毛昶熙著卽
回京供職。○諭軍機大臣等。天津民教滋事
一案。迄今多日。尚未辦有端倪。本日已明降
諭旨。令李鴻章馳赴天津。會同曾國藩。丁日
昌。成林。辦理。令毛昶熙回京矣。曾國藩等奏
訊取已革天津府縣確實親供。並由軍機大
臣將親供等件呈覽。所請交部覈議之處。著

聽候諭旨辦理。原摺留中。至滋事兇犯。雖已
拏獲八十餘名。惟犯供狡展。首要各犯。是否
在內。亦未據詳細聲明。仍著曾國藩等督飭
承審各員。認真研訊。務取確供。迅速定擬。此
外如有應拏人犯。仍著上緊購拏。務獲毋任
漏網。聞天津府縣呈遞親供時。承審官以酒
食宴會相待。殊屬非是。向來革職待罪人員。
例應監禁取供。何得如此疏略。現在張光藻
等既已取有親供。卽著照例拘禁。此案必須

操縱合宜。足以折服洋人之心。方可就我範
圍。消弭後患。曾國藩雖有立限結案之說。若
不趕緊認真辦理。率以奏結了事。圖卸責於
目前。而洋人不能帖服。必至事機決裂。或開
釁端。誰執其咎。著曾國藩李鴻章。丁日昌。成
林。全局通籌。務臻妥善。李鴻章自當輕騎減
從。赴津。所帶親軍。可以暫紮保定。免致洋人
疑恚。將此由五百里各密諭知之。○以山東
捐輸團練。永廣沂水縣學額六名。平陰縣三

名

大清穆宗繼天開運受中居正保大定功聖智
誠孝信敏恭寬毅皇帝實錄卷之二百八十八

大清穆宗繼天開運受中居正保大定功聖智
誠孝信敏恭寬毅皇帝實錄卷之二百八十九

大清穆宗繼天開運受中居正保大定功聖智
誠孝信敏恭寬毅皇帝實錄卷之二百八十九
同治九年庚午八月庚戌遣官祭
關帝廟○辛亥諭軍機大臣等總理各國事
務衙門奏請飭李鴻章迅赴天津等語昨據
曾國藩等奏稱審訊滋事各犯確有證供應
正法者得七八人略有證供應治罪者約二
十餘人第案情重大各國傷斃商民亦多若
正兇僅訊出七八人此外任其漏網恐無以
服洋人之心且此案為日已久若不趕緊辦
結必至另生枝節著李鴻章迅速馳赴天津
會同曾國藩丁日昌成林督飭承審各員將

案內得有證供各犯認真研鞫。毋任時認時翻。及早擬結。至天津府縣所具親供。內有應行覆訊。及與六月二十五日曾國藩奏到查明滋事大概情形。摺內情節不符之處。仍著曾國藩等迅速覆訊明確。一面將該革員等解交刑部聽候覈辦。一面將覆訊供詞據實具奏。另片奏請飭成林接統津郡防軍等語。天津海防關繫緊要。所有崇厚任內練習洋槍各隊。即著成林接統。督同天津通永鎮總

兵。大沽協副將認真訓練。不得稍有懈怠。其各營軍餉及需用軍火器械等項。均著悉照舊章覈實辦理。將此由六百里各密諭知之。○又諭。前因額勒和布奏借款墊放兵餉。請飭部籌撥銀兩。暨嚴催欠款。當交戶部速議具奏。茲據奏稱奉天兵餉等項。前經奏准由該省額徵各項及牛莊等處船規充抵。額勒和布以應徵之款從未足額。本年秋季俸餉不敷支放。已將東海關解黑龍江餉銀五萬

兩。先行墊發。由將軍衙門派員守提牛莊等處船規歸款。並請先行籌撥銀五六萬兩。擬在河南地丁項下撥給等語。著李鶴年飭令藩司於該省地丁本年應解京餉項下撥銀五萬兩。派員解赴盛京戶部。交額勒和布收納。以資接濟。至奉省應徵船規等項銀兩。並著都興阿等督飭所屬實力催繳。毋任延欠。該侍郎請催前墊山東應解吉林整裝銀二萬五千兩。黑龍江賑濟銀二萬兩。現據該省

報解銀二萬兩。此項餉銀到奉時。即著額勒和布知照黑龍江將軍派員領取。並著於船規項下先提銀三萬兩。務於八月內一併交黑龍江委員領解回省。以歸東海關所解餉銀五萬兩之數。嗣後各省解到吉林黑龍江餉項。奉省不得擅行截留動用。致滋膠轕。山東欠解東三省俸餉。為數甚鉅。此項下欠吉林整裝黑龍江賑濟兩款。共銀五萬二百八十三兩零。著丁寶楨嚴飭藩司查照戶部指

撥原案趕緊籌解盛京戶部收存一面知照黑龍江將軍派員赴奉領取毋再遲延將此由五百里各諭令知之○又諭庫克吉泰奏馬隊過境供應車價盤費甚繁熱河道庫款支絀無可墊辦僅於礦課升課及公用各項下動撥銀四千五百兩以資供應此外實無別款可籌且公用一項係滿營按季應放之款亟應趕緊補還請將直隸藩庫欠解熱河道庫不敷經費銀六萬九千餘兩如數撥發

等語著李鴻章督飭藩司如數籌撥如一時未能措齊務先籌撥銀二三萬兩由該道委員赴省領取以濟兵需將此諭令知之○以署兩江總督江甯將軍魁玉兼署辦理通商事務大臣○壬子諭內閣長善等奏特參不能管束兵丁之旗營各員請分別降革議處一摺鑲白旗佐領善緣精力疲怠難期愧奮著即行革職正黃正紅旗協領全貴辦事顛預毫無振作著以佐領降補正紅旗佐領惠

林心地糊塗難資表率著以防禦降補鑲白正藍旗協領全濟正紅旗驍騎校富勒渾業已另案休致著與鑲白旗防禦世彰全祿驍騎校成達吉勒占正紅旗防禦邁拉孫三音布驍騎校貴成一併交部分別議處仍著該將軍等隨時查察整頓以期營制日有起色如有勞績優異者著仍遵前旨酌保一二員毋許冒濫○順天府以宗室鄉試中額請得旨取中五名○癸丑諭內閣靈桂等奏本月

十八日奉派閱看繙譯鄉試試卷完竣順天府領卷官未到實屬曠誤據實奏一摺兼管順天府府尹萬青黎著順天府府尹王榕吉均著交部察議至派領試卷之員因何遲誤並著查取職名交部議處○諭軍機大臣等總理各國事務衙門奏請仍遵前旨飭令提督陳國瑞赴津查訊等語已諭令神機營王大臣派員伴送該提督赴津並飭將要犯周起澄交出由曾國藩等訊辦矣陳國瑞抵

津後。應卽取具切實親供。以憑覈辦。著曾國藩等督飭承審各員。將應行查訊各節。向該提督訊問明確。令其切實登覆。毋稍含混。俟遞供訊結後。再行飭令回京。其周起澄一犯。交出後。卽著歸案嚴訊。原片均著鈔給閱看。將此由五百里各密諭知之。○以鑲紅旗滿洲都統阿克敦布兼署鑲白旗蒙古都統。鑲白旗漢軍副都統滿慶。正藍旗蒙古副都統載良。署鑲黃旗蒙古副都統。刑部右侍郎達

慶。內閣學士祥泰。署鑲黃旗漢軍副都統。慶陞署鑲藍旗漢軍副都統。○甲寅。諭內閣。兵部右侍郎黃倬。著授載澂。載濂讀。○諭軍機大臣等。李鴻章奏。起程赴津一摺。天津一案。曾國藩等擬於八月二十三日先行奏結。自己辦有眉目。卽著妥速定擬。剋期具奏。不得再有遲逾。轉致另生枝節。據李鴻章奏稱。正法八人。與議罪二十餘人。辦法不為不重等語。惟天津府縣正法一節。既力為拒絕。而所

緝滋事正兇。應正法者。又僅七八人。殊無以服洋人之心。著曾國藩等將未獲之犯。趕緊勒限嚴拏。並將現獲各犯認真研鞫。不得稍涉寬縱。致令兇徒漏網。轉滋洋人口實。至天津府縣所具親供。內有應行覆訊之處。諒已早經訊明。一面將覆訊供詞迅速具奏。一面將該革員等。於接奉此旨後。卽日解交刑部。聽候覈辦。限於八月二十五日到部。本日據醇郡王等奏。遵將陳國瑞派員伴送赴津。該

督等於訊畢後。將該提督親供卽行具奏。仍令原派之員。將陳國瑞卽日伴送回京。要犯周起澄交出後。卽著歸案訊辦。將此由六百里各密諭知之。○又諭前因文盛奏捐駝足數二千。當諭李鴻章酌量咨照文盛撥解。茲據奏稱。請飭分別撥解等語。著文盛於此項捐駝內分撥一千隻。徑解保定。其餘一千隻著解交定安。聽候左宗棠撥用。該大臣如需用此項駝隻。卽著咨照定安撥解。以資轉運。

將此各諭令知之。又諭蘇鳳文等奏官軍攻勦叛匪全股蕩平。暨派防鎮安邊境及籌辦苗土等匪情形各摺片。安邊河陽等處賊匪全數殲除。勦辦尚為得手。惟首逆梁添錫一犯。僅據賊供中礮落水。賊屍猶未撈獲。其黃崇英一犯。逃匿不知去向。亟應確實查明該逆等實在下落。迅速殄滅。毋任漏網。馮子材現駐河陽。卽著趕緊揔捕餘匪。督率所部入關。毋得久留夷境。致滋擾累。另股土匪屯踞保樂夷境。距鎮安不遠。蘇鳳文當嚴飭謝繼貴等實力堵勦。並著馮子材派撥勁旅。會合夾擊。毋令逸匪潛入至柳慶邊境。時有苗匪滋擾。南太泗鎮思恩等府土匪尚多。著蘇鳳文飭令各該地方官。會同防勦。各軍認真堵擊。不得有名無實。馮子材凱還時。於各屬應勦應防處。所務當分兵布置。妥籌辦理。以靖地方。將此由五百里各諭令知之。○又諭蘇鳳文奏越南國王呈請遣使進貢一摺。越

南國王恪守藩封。素稱恭順。此次因該國被匪竄擾。經大兵越境勦辦。次第蕩平。懇請遣使呈進方物及馴象二隻。情詞懇懇。忱悃可嘉。自應准其呈進。俾遂愛戴之忱。著蘇鳳文查照歷屆例貢進關之時。酌定日期。一面具奏。一面行令該國王遵照辦理。至該國上次補進丁巳辛酉乙丑等年貢物。前已命抵下三屆。癸酉丁丑辛巳等年正貢。茲據該國王懇請賞收。具見至誠。惟朝廷厚往薄來。優待外藩。向過補進方物。均有留抵之旨。著蘇鳳文傳知該國王。仍遵前旨。留抵下三屆正貢。以示體恤。將此諭令知之。○以廣西官軍勦平越南安邊等處賊匪。實遊擊黃興仁守備覃東義巴圖魯名號。遊擊党敏宣等花翎。餘加銜升敘。開復有差。○丁巳。世宗憲皇帝忌辰。遣官祭泰陵。上詣

壽皇殿行禮○諭軍機大臣等都興阿奏。按拏盜犯正法一摺。據稱奉天昌圖廳與吉林之長春廳等處。時有賊匪滋擾。本年六七月間。有馬賊數十名。在阿力木圖各地方搶掠。威遠堡並有賊匪竄入圍場。扎傷卡官等事。經該將軍檄飭練兵營總春鐸等帶隊馳往截剿。斃匪多名。據獲賊供稱。此股匪首係烏痣李等糾眾肆擾。該將軍現已嚴檄官兵等徧加按緝等語。賊匪烏痣李即李維藩。久在邊

外肆行搶掠。疊經諭令該將軍嚴拏務獲究辦。何以日久未獲。此次復敢乘隙勾結匪眾。分股肆擾。現雖經官兵按緝盜犯四十餘名。正法。而巨魁未除。閭閻安能靜謐。著都興阿嚴檄各隊兵勇勤加按緝。並責令地方各官懸賞購拏。務將匪首烏痣李等悉數拏獲。嚴行懲辦。毋許一名漏網。邊隅關繫緊要。該將軍不得以現在民情安帖。稍為鬆勁。將此諭令知之。○又諭魁玉等奏遵旨妥籌長江防

範事宜一摺。長江下游扼守事宜。現經魁玉、黃翼升、公同籌議。擬於各處要隘安設礮位。並將分汛水師查照馬新貽原議。暫各歸併一處。排泊操練。另調礮船三十號。駐紮金陵附近。為上下策應之需。一面與李朝斌聯絡各軍。以資協助。所籌均尚妥協。即著魁玉等悉心區畫。慎密布置。毋得稍涉張惶。辦理通商事務。大臣前已有旨。令魁玉兼署。中外交涉事件。魁玉責無旁貸。即著督飭蘇松太道

涂宗瀛等。加意籠絡。弭患未形。張汶詳行刺督臣一案。斷非該犯一人逞忿行兇。必應徹底研鞫。嚴究主使。盡法懲辦。現審情形如何。魁玉此次摺內並未提及。前已明降諭旨。令張之萬馳赴江甯會同審辦。即著該漕督迅速赴甯會審。毋稍遲延。魁玉亦當督飭司道等官詳細審訊。務得確供。不得以等候張之萬為詞。稍形鬆懈。此事案情重大。斷不准存化大為小之心。希圖草率了事也。將此由五

百里各諭令知之○又諭英桂奏請飭山東省趕辦閭閻一摺閩省需用額硝向由山東代辦前因道路梗阻暫行購用洋硝係屬權宜辦理英桂現遵照部議章程委員解價赴東辦運丁寶楨自應查照向章飭屬如數辦齊不得以現辦部硝未能兼顧為詞諉令該省委員自行採買著即將應辦閩省同治八年額硝分派所屬產硝各州縣趕辦足數派員秤收分別濾出淨硝運閩此後遞年額硝

仍著照章採辦俾免缺乏閩省委員抵東守候已久毋再稽遲致誤要需將此由四百里諭令知之○派戶部尚書董煦禮部左侍郎察杭阿恭修

昭西陵

隆恩殿暨

陵寢門工程○予奉天開原傷亡驍騎校鳴翔祭葬世職加等○己未遣官祭賢良祠○諭軍機大臣等前因德英奏請飭催部撥新陳

各餉當交戶部速議具奏茲據奏稱長蘆直隸河南山東等省積欠黑龍江餉銀業經奏請提銀共三十萬兩令各該省趕緊先解其本年應解新餉一併源源接濟現在黑龍江待餉孔殷亟應迅速籌解請旨飭催等語著李鴻章李鶴年丁寶楨按照戶部前請提催積欠項下長蘆鹽課銀五萬兩山東地丁銀十萬兩河南地丁銀十萬兩直隸旗租銀五萬兩迅速提前趕解其原撥長蘆山東河南直隸應解黑龍江本年新餉銀二十三萬五千兩一併剋期分批趕解不得稍有帶欠此項銀兩係黑龍江專餉各省解至奉天時額勒和布自應迅速知照德英派員領解回省不得擅行截留德英接到此項餉銀務當擇節動用以歸覈實將此由五百里各諭令知之○又諭曾國藩等奏審明天津案內各犯分別定擬開單呈覽並天津府縣未能剋日解京各摺片天津滋事一案為時已久必應

趕緊辦結。曾國藩等以此案棘手甚多。礙難拘守常例。不得不變通辦理。現據訊明各犯擬辦正法者十五人。擬辦軍徒者二十一人。既屬供證確實。情真罪當。即著照所擬辦理。其情節較重。訊有端倪。供證尚未確實之犯。仍著認真研鞫。迅速定擬具奏。未獲各犯並著上緊飭緝。歸案訊辦。至所稱將來第二批奏結。或再辦首從犯各數名。或與洋人訂定抵償實數。由總理衙門覈定行知等語。所奏

殊屬拘泥。此次津民逞忿滋事。幾至釀釁。案情重大。自不得不嚴行懲辦。但衡情定罪。惟當以供證為憑。期無枉縱。豈能豫為懸擬。強人就案。著曾國藩等審訊明確。持平定擬。不必拘定成見。至應行正法各犯。著俟刑部議奏。已革天津府張光藻等罪名。時再降諭。旨。前諭該督於本月二十五日。將該革員等解交刑部。何以遲遲未經起解。著曾國藩等仍遵前旨。迅將該革員等解交刑部。聽候覈辦。

毋庸俟陳國瑞到津質訊。以期迅速。曾國藩另片奏請令丁日昌於李鴻章到津後。即行回任等語。丁日昌著俟李鴻章抵津商辦一切後。再行請旨。曾國藩因此案辦理遲延。自請交部嚴議。著加恩寬免。將此由六百里各密諭知之。○又諭。沈葆楨奏請簡派輪船統領一摺。據奏新設輪船。約束操演。以及稽查聯絡。其難較戰船數倍。亟需知兵大員統率。藉資訓練。福建水師提督李成謀。前隸楊岳

斌。外江水師。疊著戰功。著作為輪船統領。英桂。沈葆楨。即傳諭該提督。務當申明紀律。嚴加約束。以肅營規。兵船恃槍礮為聲威。若技藝生疏。非特不能制勝。且臨敵蒼黃。將有自焚之患。近日輪船所用槍礮。多於後膛。安放子藥。非海外絕島試之。則恐傷人。英桂等即責成李成謀。隨時駕駛出洋。周歷海島。勤加操演。俾該員弁等熟習風濤。悉成勁旅。不得性耽安逸。致令訓練皆屬具文。有名無實。輪

船號數漸多不能不分布各口。若彼此各不相習。勢必心志不齊。難期用命。李成謀身為統領。尤當將各船聯絡一氣。以壯聲援。將此各諭令知之。○庚申。諭內閣。御史劉瑞祺奏。請崇儉德。以維風化。一摺。方今物力艱難。民生彫敝。允宜黜華崇實。力挽頹風。屢經明降諭旨。期與中外臣民力除浮靡。諒已共見共聞。茲覽該御史所奏各情。尤宜倍加儆惕。嗣後當益求撙節。為天下先。中外臣民亦應一體從儉戒奢。毋蹈從前積習。以副朝廷敦崇節儉至意。○辛酉。諭軍機大臣等。李瀚章奏。會匪聚眾滋事。立時撲滅。一摺。本年七月間。哥弟會匪首楊竹客。即楊玉春。在湖北宣恩縣境糾黨起事。圖撲縣城。經該縣知縣向光謙督同紳團兜捕。當將匪首楊竹客等擒獲正法。餘黨解散。辦理尚為迅速。所有在事尤為出力官紳。著准其酌保數員。以示鼓勵。近來此等匪徒到處結會。隨地糾人。實為東南

數省隱患。前據劉岷奏報。湖南湘鄉瀏陽均有會匪滋事之案。現在宣恩地方復有此事。該處界連川楚。匪首楊竹客又係四川彭水縣人。雖已殲擒。恐尚有伏莽潛藏。乘間竊發。著李瀚章、吳棠、郭柏蔭、劉岷各飭所屬一體趕緊查拏。隨時互相知照。毋任此拏彼竄。並力行保甲。整頓團練。以期消患未萌。該督撫等職任封圻。責無旁貸。務當嚴飭各該地方官實力稽查。認真擒捕。盡絕根株。毋得日久生懈。將此由五百里各諭令知之。○壬戌。秋分夕。

月於西郊遣順承郡王慶恩行禮。○諭內閣。御史文明奏。捕務廢弛。請飭整頓。一摺。據稱七月十八日。鑲紅旗滿洲步軍校興全被步甲福成扎傷身死。遲至數日始行奏交刑部審訊。八月十八日。戶部主事福琦在車內被人刺死。兇犯逃逸未獲等語。輦轂之下。膽敢行兇。戕害職官。實屬不法。已極。除步甲福城業

經交部審辦外其福珣被刺一案該管地面各官何以未將兇手即行拏獲該衙門遲至旬日何以尚未具奏怠玩因循殊屬不成事體所有此案兇犯著步軍統領衙門順天府五城一體迅速嚴拏務獲送交刑部審辦以儆兇頑至京城地面捕務廢弛著各該衙門認真整頓毋稍懈怠○荊州左翼副都統蘇章阿因病解職調正紅旗漢軍副都統希元為荊州左翼副都統○以雇勇獲盜予福建

同知富樂賀以知府用○癸亥諭軍機大臣等曾國藩等奏遵解天津府縣赴部並鈔錄陳國瑞供詞呈覽請令丁日昌回任各摺片○張光藻等既經解部該革員等應得罪名刑部自當秉公定擬至陳國瑞所遞親供既與津案並無干涉即無庸再令總理衙門刑部覈辦江蘇地方緊要現在天津之事既有李鴻章會同曾國藩等辦理丁日昌即著速行回任以重職守所有天津應訊應緝各犯仍

著曾國藩等趕緊辦結總以愈早愈妙曾國藩另片密陳傳教情形已令總理各國事務衙門妥議矣將此由五百里各密諭知之○又諭豫師奏團勇會剿回匪克復賊寨及出省籌辦後路各摺片高寨白馬寺等處踞匪現經豫師飭令團勇會同官軍兜剿該逆渡河而逸立將高寨全溝克復白馬寺一帶業已肅清惟大股回匪尚踞河南老巢亟應迅圖剿滅著豫師飭令李春海等協同該處團

丁乘勝進攻直搗逆巢務當埽穴擒渠毋留餘孽西碾紳民捐貲殺賊尚屬著有微勞著准其擇尤酌保以示鼓勵豫師出省後擬暫駐平番著將後路事宜趕緊籌辦俟部署稍定即親率勇隊馳赴前敵相機進剿迅殄逆氛將此由五百里諭令知之○又諭張廷岳阿爾塔什達奏酌減官兵一摺庫倫防兵張廷岳等擬令於額爾德尼招等四處扼要分布此外沙畢官兵亦令羅列於各該招廟以

期防守嚴密並擬將此項駐防官兵分為兩班每屆三月往來更替以節虛糜卽著照所擬辦理庫倫現在有無賊蹤張廷岳等仍當隨時偵探嚴密防守毋稍疏虞將此由四百里各諭令知之○撥部庫銀五萬兩解赴庫倫以備軍需

大清穆宗繼天開運受中居正保大定功聖智
誠孝信敏恭寬毅皇帝實錄卷之二百八十九

大清穆宗繼天開運受中居正保大定功聖智誠孝信敏恭寬毅皇帝實錄卷之二百九十

[illegible]

同治九年庚午九月甲子朔。

上詣綏履殿問

慈安皇太后安平安室問

慈禧皇太后安。至壬辰皆如之。○奉

慈安皇太后

慈禧皇太后幸漱芳齋侍午膳○乙丑諭軍機

大臣等左宗棠奏北路官軍連克寨壘。暨中路攻勦疊勝情形各一摺。北路劉錦棠等各軍進逼金積老巢。疊次大獲勝仗。奪取蔡橋水口。越過賊濠立營。乘勝攻克小何家寨。蔡

家寨等處賊巢。大股援賊。屢經擊敗。躡毀金積附近賊卡十餘處。官軍偏賊而營。金積與王洪胡家各堡聲息不通。河西通昌通貴賊糧亦斷。正可乘此破竹之勢。迅拔堅巢。將馬化澄及著名各逆。目悉數擒斬。以竟全功。中路雷正綰等各軍。又將張恩堡峽口奪回。連克金積西路各卡壘。險要既得。賊勢更感。金積西門外。僅存洪樂等數堡。左宗棠已飭雷正綰黃鼎會同劉錦棠金運昌相機進剿。自

不難一律廓清。現在中北兩路官軍。業已聲勢聯絡。合力大舉。事機極為順利。金積已成孤立。斷難久支。賊眾檻獸釜魚。諒不能再施詭計。是在該大臣妥為調度。迅奏膚公。以慰廑繫。將此由六百里諭令知之。○又諭定安奏甯靈東南餉道漸通。擬請撥隊分紮。以便騰出毅軍。力固冬防一摺。據稱宋慶所部十營有奇。分紮沿河沿邊。兵力本形單薄。前因甯靈各軍糧道梗阻。商令宋慶分撥毅軍五

營。疏通北路糧運。半載以來。幸無貽誤。現據劉錦棠函報。靈州南路官軍疊勝。分紮要隘。即可與湘卓各營合圍。是東南運道通暢。無虞復阻。惟東路自花馬池以至榆林。千里之遙。並無重兵扼守。請撥留陝淮軍。前往駐紮。定邊等處。至張曜等軍糧儲漸足。不日進剿。恐該逆鋌險肆竄。西北一帶。不可稍有疏虞。請飭左宗棠迅撥勁旅。進紮平羅。庶可騰出毅軍五營。回紮河西等語。前據李鴻章奏。酌

留譚仁芳一軍保衛秦境。惟該提督所統僅七營。除分二營護運外。其留駐西安者。止有五營。能否撥令扼駐定邊。著蔣志章酌量情形。妥籌調派。如譚仁芳一軍不能遠駐定邊。即著左宗棠飭令劉錦棠等。分兵嚴防後路。毋稍疏虞。甯夏道路紛歧。一經大軍進剿。逆氛北竄。本在意中。毅軍五營。護餉有餘。勦賊不足。轉瞬冬防喫緊。兼顧尤難。定安所陳。自係實在情形。左宗棠務當統籌全局。迅派勁

兵進紮平羅地方。以壯聲威而顧糧運。其沿河防守事宜。卽著定安檄飭各軍。並知照宋慶隨時妥籌。務臻嚴密。將此由五百里各諭令知之。以故李曼扎薩克達爾漢郡王薩哈拉子瑪什巴圖爾襲爵。○以刑部右侍郎達慶兼正紅旗漢軍副都統。仍兼署鑲黃旗漢軍副都統。鑲藍旗漢軍副都統。富和署正紅旗蒙古副都統。○以服闋詹事府詹事夏同善為詹事。○荊州將軍巴揚阿六十生辰。

賜

御書扁額曰機鈴篤祐。並賞文綺珍玩。○予甘肅金積堡等處陣亡副將趙彩照等十七員祭葬世職加等。○予甘肅馬家堡陣亡守備趙靄廷千總焦金鳳祭葬世職加等。○丙寅諭軍機大臣等。天津道周家勳現已開缺。所遺員缺緊要。必須得人而理。前據曾國藩奏請以丁壽昌署理天津道。任事以來。於地方情形是否熟悉。若簡授斯缺。是否相宜。著曾

國藩李鴻章悉心察看。俟津案完結後。卽行據實具奏。聽候諭旨。將此各諭令知之。尋奏遵查丁壽昌沈毅有為。才大心細。自署天津道缺。適值事勢艱窘之際。而該員措置裕如。可否卽請簡授斯缺。得旨。直隸天津道員缺。著丁壽昌補授。○緩徵直隸大城。雄。任。邱。成。安。河。間。獻。清。苑。安。邯鄲。定。興。十州縣被水被旱地方。新舊額賦。並酌減差徭。○丁卯。諭內閣。丁寶楨奏。江北漕船阻滯。現籌接運各摺。

片。據稱。本年江北漕糧。初因兌米時水小。不能進船。嗣因過牆提挽頗艱。遲至七月中旬。方得到濟。黃水消落。不能前進。暫在東阿縣境八里廟一帶停泊。現擬抽溝岸水。倒剝接運等語。江北試辦漕運。歷屆均無貽誤。此次始則以水甚旺而船不至。繼則船已到而水旋消。辦理遲延。已可概見。該糧道及委員等貽誤情形。著兩江總督江蘇巡撫漕運總督確切查明。據實參奏。至漕船停泊河干。豈可

束手坐待著丁寶楨督飭運河道等趕緊設法挑溝引水雇船轉剝以期無誤漕運○諭軍機大臣等成祿奏擇期拔營並將收支餉銀數目開單呈覽一摺成祿軍營欠餉至二百三十萬兩有奇該將士等現因庫款支絀情殷報效懇請無庸扣還尚屬忱悃可嘉該提督現擬拔營前進惟該營餉需缺乏若遽行進兵亦屬不能得力著暫緩拔營前進聽候諭旨肅州一帶現在有無竄匪仍著隨時

防勦毋稍疏虞至各省欠解成祿軍營餉銀為數甚多著戶部查明迅速催解以濟要需將此由六百里諭令知之○又諭前諭令左宗棠將成祿應否撤回或酌留該大臣軍營其所部勇丁三千餘名是否可以留用抑或遣撤之處酌覈奏聞茲據成祿奏頓兵日久不特協餉屢催未到卽軍士逐日口食因本地民力拮据未能續捐若再遷延時日恐有潰散之虞擬於八月間拔營前進等語成祿

一軍餉缺兵疲恐未必卽能得力本日已諭令暫緩拔營前進聽候諭旨惟該大臣接奉本年二月二十九日寄諭時逾半年之久何以尚未覆奏現在成祿一軍應俟該大臣查明後再定進止著懍遵前旨迅速覆奏毋再遲延至成祿所部糧餉兩缺困苦難堪亦係實在情形著左宗棠力籌接濟以拯飢軍將此由六百里諭令知之○予山東夏津殉難婦女張二姑盧時氏旌表如例○戊辰諭軍

機大臣等劉嶽昭岑毓英奏收復新興州城現籌勦辦情形暨提督馬如龍疊著勤勞墊發餉銀各摺片雲南新興州城久被逆回占踞經提督馬如龍督兵進勦斷其糧路連破玉枕山石灰窯及附城逆壘多處四面偪攻殲斃逆眾無數當將州城克復逆首田慶餘等均已擒獲正法勦辦尚為得手惟就撫降眾多係建水河西所屬之館驛東溝難民該二處尚未肅清難以分遣回籍馬如龍現已

派員清查戶口。令該難民等暫居州城。並於城內及後裕鄉等處派兵駐紮。卽著該督等飭令在事員弁。隨時認真彈壓。妥辦善後事宜。以期漢回相安。免致另生枝節。新興旣克自應進勦東溝館驛等處。迅埽逆氛。馬如龍因傷發回省調治。先派都司王正坤等規取東溝館驛。該提督當趕緊調理痊癒。卽時前往督勦。以資得力。收復新興出力人員。俟東溝館驛肅清。彙案請獎。至馬如龍連年勦賊。

均能身臨戰陣。奮勇圖功。深堪嘉尚。此次進勦新興。於湖南撥餉未到時。復籌墊餉銀三萬兩。洵屬顧持大局。敵愾同仇。著發去白玉翎管一支。白玉搬指一箇。火鐮一把。大荷包一對。小荷包兩箇。交該提督祇領。以示優異。將此由五百里各諭令知之。○予雲南新興傷亡陣亡遊擊馮勝標。守備馬錫晉等。祭葬世職加等。○己巳諭軍機大臣等。前據曾國藩奏。已革天津府縣。已於八月二十八日押

解起程。至今尚未到部。聞該革員等現抵通州。張光藻因病未能前進。著萬青藜王榕吉。卽行派員前赴通州。將張光藻劉傑刻卽解送刑部。不准藉病遷延。將此各諭令知之。○又諭曾璧光奏。川軍退紮牛場。黔省軍務緊急。請飭川楚兩省仍前進。取各摺片。川楚援黔。歷有年所。今夏兩軍勦匪得手。營壘相望。聲息漸通。曾經諭令乘勝進取。以竟前功。何以唐炯當聲威正盛之時。不候咨會。不俟接

防。遽將全軍撤退。致苗匪勢復猖獗。提督陳希祥以孤軍無援。退紮貴定等處。實屬貽誤事機。著崇實吳棠查明該道擅退情形。據實叅奏。曾璧光摺內稱。唐炯本擬移師楊老以圖下司。分規都勻。凱里。續聞川督有裁撤安定果毅兩營之議。已具稟聽候遣撤。遂移紮平甕。就糧。以待批示等語。是崇實吳棠於疊次諄諄諭旨。並未實力奉行。惟以節省餉需為事。殊屬不知緩急。况近防不如遠勦。援黔

卽以保川豈可畛域攸分不顧大局仍著崇實吳棠嚴飭唐炯迅速進兵與楚黔各軍聯絡聲援以收夾擊之效不得再涉遷延致干重咎現在秋氣已深劉崐當懷遵前旨督飭席寶田等軍仍前進取期與川兵勢成犄角迅奏廓清毋稍觀望曾璧光身任黔撫責無旁貸務當督飭各營分勦上下兩游以與援軍會合綏靖巖疆將此由六百里各諭令知之○以散秩大臣恆惠為京口副都統○以

貴州遵義等處勦平土匪賞道員蹇閻布政使銜同知徐培元等花翎知縣耿光祺等藍翎餘加銜升敘有差○庚午諭內閣福濟等奏特參玩懈軍務之盟長一摺賽因諾顏盟長厄魯特扎薩克貝子察克都爾扎勒當軍務喫緊之際竟不遵調遣展轉推諉顯係有心規避察克都爾扎勒著卽撤去盟長仍留貝子之爵以示懲儆儻不知愧奮仍前玩懈卽著從嚴參辦○諭軍機大臣等文碩奏遵

送厄魯特人眾並密陳巴彥特古斯觀望情形各摺片前因厄魯特人眾欲回布倫托海經福濟酌給牛羊銀兩令其折回當諭令福濟迅飭巴彥特古斯等派員迎護並令奎昌等一體飭屬護送茲據文碩奏厄魯特人眾兩月之久始至青格里河一帶意欲盤踞度冬現接巴彥特古斯來文以布城難以安插請示遵行意存觀望等語該人眾沿途逗遛依然搶掠亟應妥為控馭著奎昌文碩迅速

將青格里河一帶認真保護並設法將該人眾等暫示羈縻毋令擾害地方文碩自請議處之處著加恩寬免該厄魯特人眾應如何妥為駕馭俾就範圍之處著福濟斟酌情形會商奎昌文碩妥籌辦理以靖邊陲署領隊大臣巴彥特古斯何以不派員迎護是否意存觀望並著福濟確查具奏一面嚴飭該領隊遵奉前旨派委妥員迎護收管俾得各安生業將此由六百里各諭令知之○又諭崇

實奏遵義教案辦理就緒。請將出力官紳酌保總理各國事務衙門奏貴州教案未結。請飭崇實仍赴遵義籌辦各摺片。前據曾璧光奏黔省教案九起。全行議結。並未將如何議結之處詳細聲敘。此次崇實摺內所稱設堂行教一事業經開導就緒。而教士遲久並無出省日期。是民教兩面尚未切實議結。不得遽謂完案。據法國使臣羅淑亞照會內開。轉遞任教士函稱。貴州各案入奏之後。並無會

同甘結。且臚列遵義等處教案。亦未設法辦理等語。可見該教士並未貼服。是否各案本未議妥含糊了結。抑係該教士之言不實。不盡若不趕緊辨妥。必至另生枝節。仍為不了之局。崇實現已起程回省。著卽迅速折回。馳赴遵義會同曾璧光督飭余思樞等妥速籌辦。總須民教兩面各無異詞。實有完案確據。方不至再滋口實。所有此案辦理出力官紳著俟全案完結後。准由崇實會同曾璧光擇

尤酌保總理各國事務衙門摺著鈔給閱看。將此由六百里各諭令知之。○壬申諭軍機大臣等。金順奏官軍截勦沿山竄賊獲勝一摺。回逆馬化澄因河東官軍進攻寨堡。嗾令河西回酋馬沅糾合馬賊數百。由西山竄入潮湖一帶。沿山肆擾。以圖阻截軍糧。經金順會同張曜督飭副都統托雲佈等軍截勦。獲勝槍斃逆酋馬沅。其阿拉善旗沙拉布爾都地方馬賊亦經副將郝永剛等馳往迎勦。該

匪向西竄逸。據獲賊供稱。西甯回匪有欲由草地東竄之說。現在劉錦棠黃鼎各軍於中北各路連克寨壘。金積堡勢已大蹙。該逆四出紛擾。自在意中。而西路賊眾又圖東竄。防範豈可稍疏。卽著金順會同張曜選派得力馬步各隊分路巡防。毋令河西逆匪再圖竄突。以顧湘卓兩軍糧道。並飭各軍嚴防東竄之匪。遇賊卽擊。不得稍有鬆勁。將此由六百里諭令知之。○又諭劉崑奏援黔各軍蕩平

苗寨暨川軍撤退。仍請飭令進兵各摺片。湖南援黔各軍自攻克亮擺巖門司等城寨後。提督唐本有等復督隊攻毀花灘各巖洞。及四星各寨。李光燦等又將朗洞城池攻克。附近數十里賊寨一律蕩平。八寨諸苗已有畏威乞撫者。楚軍方擬乘勝進規台拱。若川軍通力合作。進剿凱里諸寨。不難將逆苗醜類次第掃除。乃崇實吳棠不知顧持大局。輒因省餉撤兵。唐炯一軍遂回牛場。獲安候撤。以

致寶谷隴已有賊蹤。重安黃平復為賊踞。實屬貽誤事機。前據該將軍等奏請裁汰援黔兵丁。即諭令汰弱留強。仍飭唐炯會合席寶田等軍合力進攻。不可遽行鬆勁。何以不候諭旨竟撤援軍。棄已成之功。貽將來之患。不知緩急。一至於此。曾璧光前次奏到。已嚴諭崇實等迅飭唐炯進兵。不得遷延干咎。著卽懍遵前旨。檄令唐炯剋期拔隊。迅赴戎機。時已秋涼。劉崐卽當催令席寶田督兵迅平。台

拱毋令賊勢復張。唐炯此時應否進紮黃平。抑或卽會楚軍兜剿清江南岸。著斟酌情形辦理。台拱若平。苗疆善後及進取事宜。尚須悉心經理。席寶田未可遽行離營。屆時仍著劉崐酌度奏聞。劉崐所奏唐炯致席寶田函內有川省函商黔中全撤川師。月協餉五萬。歸黔自辦。聞黔中意甚欣然等語。黔省兵力豈能不須協助。卽數勦辦。曾璧光果允其議。何以前奏又請飭催川軍。唐炯所言。恐非確

實。著曾璧光詳細具奏。戈鑑一軍出力員弁。准劉崐先行酌保。其餘各營出力人員。著暫行存記。俟攻克台拱。併案請獎。將此由六百里各諭令知之。○以戶部左侍郎魁齡兼署吏部左侍郎。○予貴州黎平等處陣亡副將朱長林知州朱嘉瑞等祭葬。世職加等。○修直隸保定駐防兵房。從總督曾國藩請也。○癸酉。諭軍機大臣等。魁玉奏覆陳審訊兇犯大概情形一摺。張汶詳以漏網髮逆。膽敢直

入督署戕害重臣實屬罪大惡極該犯自知必遭極刑所供各情一味支離現雖將該犯家屬拏獲到案而何人主使尚未究出終不足以成信讞張之萬計已馳抵江甯著卽會同魁玉懍遵疊次諭旨督飭司道各員設法根究務將因何起意行兇及受人指使各情一一究出盡法懲辦以申國憲至督署重地竟容閒人出入毫無覺察是日守門官役魁玉是否提問何以未據奏及時金彪一名已

否由山西解到新市鎮軍犯既與張汶詳平日來往亦當密拏到案從旁引證或可究出真情並著魁玉張之萬多方研訊務得確實情形毋稍含混將此由五百里各諭令知之○又諭左宗棠穆圖善奏西路馬隊官兵勦賊續勝一摺甘省西路逆匪在松山等處及平番古浪各縣屬四出搶掠經委營總額爾慶額及代理統領常明等帶隊分路截擊殲斃多名勦辦尚屬奮勇惟省西一帶零星匪

股出沒靡常若不痛加勦洗誠恐伺隙紛擾大為糧路之患著左宗棠穆圖善督飭各軍於平番等縣屬將各股匪眾實力痛勦務期淨絕根株以清糧路將此由五百里各諭令知之○旌表守正捐軀奉天昌圖廳民婦李王氏○甲戌諭內閣前因天津府知府張光藻天津縣知縣劉傑於民教啟釁一案事前疏於防範事後又不能迅速獲犯當經降旨革職交刑部治罪嗣經曾國藩等取具親供

並將該革員等押解到部茲據刑部奏請按照刁民滋事地方文職不能彈壓撫恤革職例上從重擬以發往軍臺效力並以案情重大應如何從重改發之處請旨等語該府縣責任地方乃於津民聚眾滋事不能設法防範致匪徒乘機焚殺戕害多命又未將兇犯趕緊拏獲情節較重且該革員等於奉旨交刑部治罪後張光藻竟敢私往順德劉傑亦私往密雲任意逗遛尤屬藐玩張光藻劉傑

均著從重改發黑龍江效力贖罪以示懲儆。至津民因懷疑激忿不遵地方官彈壓輒敢逞兇殺害至二十餘命之多且將其仁慈堂內貞女慘殺尤為兇殘現經曾國藩等拏獲滋事人犯審明分別情節輕重將馮癩子等十五犯擬以正法小錐王五等二十一犯擬以軍徒既屬情真罪當即著照所擬將馮癩子等即行處決小錐王五等分別發配安置經此次嚴辦之後各直省地方官務當曉諭

居民安分守法毋任再滋事端遇有中外交涉事件並須按照條約持平妥辦總期中外商民彼此相安以靖地方○又諭前因瑞聯等審擬已革旗員興奎與民婦張王氏互控一案經刑部覈議以引斷未協駁斥當經降旨允准茲據瑞聯等查明覆奏此案已革員外郎銜內閣中書興奎並無捏契霸產情事其京控各節因叅後懷疑所致惟呈出契紙未經投稅亦有應得之咎興奎著開復原官

仍交部照例議處張王氏因契賣房租找價不遂砌詞蔓訟雖與憑空訛詐不同究屬刁健著照部駁各情按律懲辦現在逃未獲難保不潛匿在京著步軍統領衙門順天府五城將張王氏一體嚴拏解回奉天歸案懲辦○諭軍機大臣等前據曾國藩等奏天津案內應行正法各犯當諭令俟刑部議奏張光藻等罪名時再降諭旨本日刑部奏遵議張光藻等罪名一摺已明降諭旨將該革員等

從重改發黑龍江其應行正法之犯照曾國藩等所擬即行正法軍流各犯並照所擬辦理此案大致現已就緒所有應訊人犯著曾國藩等迅速訊明持平辦理妥為了結一面遣派幹員於天津地方彈壓拊循毋令秀民乘機煽惑聚眾滋事別釀釁端將此由六百里各密諭知之○補行引見京察內閣侍讀學士載英得旨著照舊供職○大學士兩江總督曾國藩六十生辰賜

御書扁額曰勳高柱石並賞

御書福壽字暨文綺珍玩○乙亥諭內閣內務府奏銀庫箱隻被賊拆動請飭嚴拏並據護軍統領安興阿奏請將西大庫直班官兵分別懲處各一摺據稱本月十一日銀庫大小封鎖全行開落庫門亦開柵欄上有越過形跡庫存各箱拆動多隻其北庫門上小鎖押封亦經拆動等語銀庫重地理宜嚴密巡察本年八月間疊次失去鐵鎖撕去鎖封該直

班官兵等應如何倍加謹慎乃此次竟致開啟庫門拆動箱隻毫無覺察尤屬不成事體所有直班之委護軍參領唐武色護軍校伊克精阿均著交部議處並著護軍統領將是日直班之護軍章京護軍等詳細查訊將可疑之人解交慎刑司嚴行訊辦此案賊犯著步軍統領衙門順天府五城一體嚴拏務獲解交慎刑司究辦並派惇親王官文會同總管內務府大臣將庫存銀兩物件詳細盤查

據實具奏嗣後著前鋒統領護軍統領嚴飭該官兵隨時實力稽查不得再有疏懈儻敢仍前怠忽即著從嚴叅辦尋惇親王等奏遵旨盤查銀庫按照存收各款逐一覈對均屬相符報聞○諭軍機大臣等前因張廷岳等奏庫倫餉糈支絀請飭戶部再行撥銀五萬兩當經降旨允准茲據戶部奏稱該處餉需緊要自應迅籌接濟惟部庫存銀未便屢議外撥山西應解京餉為數尚多且距庫倫較

近擬卽在該省應解京餉內劃撥改解等語著何璟飭令藩司於山西應解同治九年分奉撥京餉內迅速撥銀五萬兩解至庫倫交張廷岳等收存以濟要需至庫倫軍餉前已由部撥銀五萬兩並准其免協福濟軍需此次再撥銀五萬兩經費不至缺乏張廷岳等務當力求撙節覈實動用毋得稍有虛糜將此由四百里各諭令知之○又諭福濟等奏遵籌防勦情形一摺據稱額爾德尼招竄匪

仍由原路退去。現在賊在額哲尼河盤踞。阿畢爾米特旗下金山卡倫有賊阻滯。該匪仍多伏莽。非厚集兵力。後患終不能除。請飭庫倫辦事大臣張廷岳帶領該處蒙兵。其綏遠城張家口馬隊統歸調遣。迎頭堵擊等語。賊蹤飄忽靡常。原應防其竄擾。惟張廷岳究應駐兵何處。方足聯絡聲勢。所帶各隊應由何路進剿。蒙兵是否得力。應調若干。並未據福濟等籌及。又前調馬隊業據福濟等奏稱咨

照綏遠城張家口暫行停止。現在應否調撥著福濟等與張廷岳酌量緩急情形迅速詳細具奏。福濟等奏賊屯處所距竄台之路較近。難保其不隨時竄突。福濟張廷岳等仍當妥籌防剿。不得坐誤機宜。該匪到處奔竄。必須就各該地面隨時堵截。著成祿在肅州一帶嚴密按捕。斷賊來路。並著文麟、景廉、伊勒屯、何瑄於哈密、巴里坤等處勤加偵探。遇賊即擊。扼其去路。以遏逆氣。將此由五百里諭

知福濟榮全錦丕勒多爾濟文麟景廉張廷岳伊勒屯成祿並傳諭何瑄知之。丁丑盛京將軍都興阿奏捕獲盜首林泳青等正法得旨。仍著飭令派出官兵隨時認真巡緝。嚴拏懲辦。戊寅。

上奉

慈安皇太后

慈禧皇太后幸漱芳齋侍午膳。諭軍機大臣等曾國藩等奏續訊天津案內第二批人犯

分別定擬一摺。此次續拏各犯既據曾國藩等單開訊明情節輕重。著照該督等所擬將劉二等五犯即行正法。鄧老等四犯分別發配安置。曾國藩等接奉此旨後所有先後定擬正法之犯二十人軍徒各犯二十五人即行分別辦理。庶可迅速完案。羅淑亞派繙譯官德微理亞前赴天津出具切結。並確查燒毀房屋被搶物件以便議償。曾國藩等本係特簡查辦津案之員。此時該繙譯業已抵津。

修堂撫恤諸事在津易於定議。卽著該督等
晤商德微理亞妥籌辦理。迅速具奏。至所拏
兇手前已明降諭旨。著將馮癩子等卽行處
決。茲據奏稱。俟總理各國事務衙門議結後。
知照該督等酌定行刑日期等語。與前降諭
旨兩歧。議抵一節。為此案緊要關鍵。若遲遲
不辦。其餘各節勢難定議。且洋人因此藉口。
轉致另生枝節。更形棘手。曾國藩等卽懷遵
此旨辦理。毋再稽延。將此由六百里各密諭

知之。○又諭崇實吳棠奏請將統兵道員摘
頂。並通籌川黔大局一摺。黔省軍務自清水
江北岸肅清。事機順利。正宜乘此聲威。合力
進剿。以竟全功。乃唐炯因川楚兩省有減兵
節餉之議。並不妥議稟覆。聽候批示。輒將所
部川軍擅自撤回平甕。實屬貽誤事機。姑念
前次克復地方。著有微勞。著先行摘去頂帶。
以示薄懲。前據曾璧光劉崐先後奏到川軍
撤退情形。疊經諭令崇實吳棠嚴飭唐炯迅

速進兵。與楚黔各軍聯絡夾擊。劉崐前奏。並
有楚師進規台拱川軍進剿凱里諸寨之議。
著崇實等體察情形。悉心籌畫。應否改由都
勻八寨進規凱里。或仍由重安江派兵南渡。
飭令唐炯剋期拔隊前進。實力勦辦。以贖前
愆。並著劉崐檄催席寶田迅督所部會合進
攻。以收夾擊之效。至疲弱兵勇。本不應濫等
充數。豈待餉需支絀。始議裁汰。又豈可因裁
汰疲弱。停兵不進。坐失機宜。崇實吳棠劉崐

務當懷遵疊次諭旨。妥速籌辦。以維全局。總
須飭令各軍彼此聯絡策應。立於不敗之地。
斷不可意存畛域。各懷觀望。致誤戎機。儻不
以大局為重。進止不齊。以致日久糜餉。老師
辦無成效。定將統兵各員從嚴懲治。卽該督
撫等亦不能辭咎也。曾璧光身任黔撫。責無
旁貸。亦當督飭黔軍力圖進剿。不得專恃援
軍。自甘頽靡。貴州教案未結。崇實著仍遵九
月初七日諭旨。前赴遵義會辦。趕緊結案。將

此由六百里各諭令知之○成都將軍崇實等奏請將丁憂提督陳希祥留營幫辦軍務允之○撥直隸旗租山東河南地丁銀各三萬兩解赴永定河工次備用

大清穆宗繼天開運受中居正保大定功聖智誠孝信敏恭寬毅皇帝實錄卷之二百九十

大清穆宗繼天開運受中居正保大定功聖智誠孝信敏恭寬毅皇帝實錄卷之二百九十一

欽此○諭軍機大臣等前據福濟等奏察哈爾馬隊已咨照綏遠城等處暫行停調惟匪蹤飄忽靡常請飭張廷岳帶領蒙兵並綏遠城等處馬隊統歸調遣堵擊當諭令福濟等與張廷岳會商應否調撥此項馬隊酌量具奏茲據文盛等奏擬將馬隊一千名遣撤歸旗並擬挑選精壯五百名由各旗總管等勤加操練以備調遣等語即著照所擬辦理至張廷岳帶兵進剿應否需用馬隊俟福濟等覆奏到日再降諭旨文盛

同治九年庚午九月己卯諭軍機大臣等前

據福濟等奏察哈爾馬隊已咨照綏遠城等處暫行停調惟匪蹤飄忽靡常請飭張廷岳帶領蒙兵並綏遠城等處馬隊統歸調遣堵擊當諭令福濟等與張廷岳會商應否調撥此項馬隊酌量具奏茲據文盛等奏擬將馬隊一千名遣撤歸旗並擬挑選精壯五百名由各旗總管等勤加操練以備調遣等語即著照所擬辦理至張廷岳帶兵進剿應否需用馬隊俟福濟等覆奏到日再降諭旨文盛

等仍當飭令各旗官兵認真訓練。一面隨時偵探。遇有匪蹤。卽行派兵截剿。毋稍鬆懈。將此由四百里各諭令知之。○又諭文麟、景廉奏請飭催欠解糧價銀兩。並飭撥新疆協餉。各摺片前因哈密採辦糧石。當經諭令山東撥銀十萬兩解交應用。茲據文麟等奏稱。該省僅解到銀一萬五千兩。業已撥還前欠糧價等款。現在需餉甚亟。請旨飭催等語。著丁寶楨飭令藩司將山東欠解哈密糧價銀八

萬五千兩迅速如數籌撥解交烏里雅蘇台將軍衙門收存。由文麟等派員迎提。以濟要需。安西、沙州、靖逆各營需餉甚亟。並著福濟、榮全、錦丕勒、多爾濟於新疆協餉內撥銀二萬兩俾資接濟。文麟、景廉俟接准福濟等咨會時。卽遴派妥員領解回哈。分撥安西等營應用。並將分撥數目咨明甘肅藩司歸入各該營兵餉項下報部覈銷。以清款目。將此由五百里各諭令知之。○庚辰駐藏大臣恩麟

等覆陳巴塘地震情形。現在籌辦賑恤。報聞。○以西藏哈拉烏蘇勦辦野番出力。予員外郎恩承以知府用。並賞花翎。縣丞何炳焜等藍翎。餘升敘有差。○辛巳諭軍機大臣等。曾國藩奏遵旨赴任兩江。懇請陛見。並請將主事陳蘭彬帶至江南。暨續獲正犯范泳。擬卽換釋。穆巴各摺片。穆巴一犯。證佐既未的確。何以前奏遽擬死罪。著卽日釋放。以重人命。其續獲之范泳。旣屬供證確鑿。為放火燒房

正兇。著照該督等所請。歸案正法。曾國藩接奉此旨。卽著將應辦各事。懍遵。九月十五日諭旨。迅速辦理。毋再稽遲。曾國藩卽著來京陛見。該督起身後。李鴻章著仍駐天津。勿遽回省。務將彈壓撫綏各事宜。妥為籌辦。俟津郡中外諸事大定。再行請旨。主事陳蘭彬著准由曾國藩帶往江南差遣。委用。將此由六百里各諭令知之。○壬午遣官祭都城隍之神。○諭軍機大臣等。金順奏回匪

竄擾西山歸德溝等處。分隊勦辦獲勝一摺。陝回賊首張志沅等。糾眾竄至西山邊之歸德溝一帶。南北回堡潛出賊騎附合。意圖阻刼糧道。經托雲佈等督軍進勦。賊遂大潰。該匪情急反噬。再戰於空湖拉地方。復經我軍殺斃百餘名。敗匪越嶺而遁。著金順會商張曜督飭派出各軍。將逃匿餘匪搜捕淨盡。務絕根株。蘇逆受傷衝散。是否殲斃。著查明實在下落。毋任漏網。南北兩路回堡。見大礮陸續到營。益懷疑懼。糾黨拌死竄突。自在意中。金順務當與張曜悉心籌畫。嚴密布置。一俟礮位運齊。卽著實力進攻。迅殲醜類。王家疃莊賊匪前曾乞撫。恐不可恃。現在籌辦情形。並著隨時奏聞。將此由六百里諭令知之。○又諭金順奏。天津解到洋槍火藥等項。不敷攻勦。暨江蘇撥解銅礮。配帶炸子等件。亦不敷用。請飭均由江蘇製辦配解等語。著丁日昌飭令上海製造局。趕緊製辦洋槍二千桿。

配帶什物。洋槍藥二萬磅。大銅帽二百萬粒。趕由海道解赴天津。或取道山西包頭鎮。由該署將軍派員提解。並飭局造辦二十四磅炸子五千粒。各配帶木引心。暨洋礮三楞藥五千磅。解赴天津。交金順委員提解赴甯夏軍營。以資攻勦。將此由五百里諭令知之。○又諭前因金順轉運軍糧。需用駝隻。當經諭令理藩院飭令喀爾喀各盟籌備駝三千隻。解交應用。茲據金順奏稱。接准張廷岳等咨。

該兩盟因地方受災。僅解駝一百隻。其餘無可籌撥。請飭如數撥解等語。金順軍營需用駝隻。刻不可緩。亟應迅速籌備。惟前據定安奏。已於李鴻章所撥駝隻內。分撥金順。張曜軍營各二百五十隻。現喀爾喀籌解駝隻。自可量為酌減。著金順斟酌情形。覈定數目。卽行知照張廷岳等籌解備用。張廷岳阿爾塔什達。於接到金順咨會時。務當趕緊如數籌撥。不得再有推諉。致誤要需。將此由五百里

各諭令知之。○又諭劉嶽昭岑毓英奏官軍攻克激江城外賊巢一摺。激江府城踞逆於城外分築土城石碉。負隅抗拒。經岑毓英親督各軍進剿。疊將西山村西街子及上下左所等處賊巢攻破。附城四面賊營一律毀平。勦辦甚為得手。現在僅餘孤城外援已絕。釜底游魂。諒難久延殘喘。岑毓英現已回省辦理闡務。激江既經合圍。斷不可稍涉鬆勁。著劉嶽昭岑毓英飭令岑毓寶等合力圍攻。迅

圖克復。將此由五百里各諭令知之。○予雲南激江陣亡都司袁亮等祭葬。世職加等。○癸未。諭內閣。前因奉天旗員興奎與民婦張王氏互控一案。經盛京刑部侍郎瑞聯等兩次訊結。並張翰之妻張王氏在逃未獲。降旨令步軍統領等衙門嚴拏歸案懲辦。茲據都察院奏張翰之妻張王氏並張甲之妻張王氏等在該衙門呈訴冤抑各情。難保非捏詞逞刁。希圖翻案。抑或另有別情。著該部即將

張王氏等解往奉天。歸案審辦。以成信讞。○諭軍機大臣等。前因德英奏整發奉調官兵整裝銀兩。請飭撥款歸還。當交戶部速議具奏。茲據奏稱黑龍江調赴古北口馬隊官兵一千名。既據德英數明整裝銀二萬三千五百九兩零。先行籌墊。擬在河南驛站存贖項下撥還等語。著李鶴年按照戶部所擬。即在河南驛站存贖項下撥銀二萬三千五百九兩零。遴派妥員解赴盛京戶部交納。一面將

報解日期。知照德英。派員赴奉守領。額勒和布於此項銀兩到日。暫為收存。俟黑龍江委員到奉。即發交領解回省。並著德英將此次給過整裝銀兩。俟凱撤後。即於各該官兵應領俸餉銀內。如數扣還。以清款目。將此由四百里各諭令知之。○甲申。遣官祭

歷代帝王廟。○諭內閣。富明阿等奏查出軍營無著官兵各缺。請由原旗揀放一摺。各省節年徵調吉林官兵傷亡病故各遺缺。現經

富明阿等查明各路軍營。實有吉林官兵二千六百十二員名。覈與通省現在軍營實數計無著防禦二員。雲騎尉一員。兵缺六百六十三分。此項空缺。既係軍營存營兩無著落。額缺豈可久懸。卽著照該將軍等所擬。准其由吉林原旗按缺揀補。以昭覈實而免懸曠。○又諭富明阿奏舊病增劇。懇准開缺回旗一摺。吉林將軍富明阿自道光年間。由馬甲從征喀什噶爾。隨後轉戰江南河南等處。戰

功卓著。歷任甯古塔副都統。江甯將軍。皆資得力。因勦賊受傷。兩次奏請開缺。均經恩准。並賞食全俸。俾資調理。旋於同治五年間。命補授吉林將軍。督勦馬賊。自抵任以來。於整頓地方。搜捕賊匪。各事宜。辦理悉臻妥協。茲因傷病復發。懇請開缺回旗。覽奏情詞懇切。出於至誠。自當俯如所請。富明阿著准其開缺回旗調理。仍准在旗支食將軍全俸。所有任內革職留任處分。均著加恩寬免。應扣未

繳俸銀。一併免其扣交。以示體恤。○諭軍機大臣等。前據伯彥訥謨祜奏。請調馬隊以備不虞。當諭理藩院傳知東三盟。各調馬隊一千名。並調吉林黑龍江馬隊。均赴古北口一帶駐紮。茲據李鴻章奏。稱酌度時勢。古北口一帶。不必駐紮重兵。擬請撤回。以節餉需等語。此項馬隊。全數到口。籌撥餉項甚鉅。現既酌度情形。無需兵力。卽著照李鴻章所請。所有前調東三盟馬隊。著全數撤回。並著理藩

院傳知該盟蒙古王公。迅將各隊撤回遊牧。仍隨時操練。以備征調。其吉林黑龍江馬隊共三千名。據富明阿。毓福德。英先後奏報起程。因思神機營每年本有調撥該處官兵更換操防之事。此項官兵。是否可以就近調換。著神機營王大臣酌議具奏。該官兵已否全抵古北口。著李鴻章。庫克吉泰。飭令暫行駐紮。聽候諭旨。應需餉項。仍著庫克吉泰覈實支放。將此諭知神機營。理藩院。伯彥訥謨祜。

並由五百里諭令李鴻章富明阿德英庫克吉泰毓福知之○又諭陝甘回匪滋事以來朝廷軫念西陲大申捷伐特命左宗棠為欽差大臣督兵勦賊厚集兵力寬予限期計每歲撥用餉銀不下八百餘萬兩該大臣於行軍籌餉事宜有所陳奏無不立見施行倚畀不為不重乃自抵甘以後雖據疊報勝仗總未能痛埽賊氛致金積堡一隅之地至今日久未下逆首稽誅軍務安有了期竭東南數省脂膏以供西征軍實似此年復一年費此鉅帑豈能日久支持該大臣捫心自問其何以對朝廷即著左宗棠振刷精神嚴檄各軍實力勦辦該大臣前奏金積堡賊勢已感似不日即可攻克北路肅清後河狄一帶賊蹤亦宜以次殲除務當剋期蒞事毋得再事遷延致干咎戾將此由六百里諭令知之○以詹事府少詹事錢寶廉為內閣學士兼禮部侍郎銜○乙酉諭內閣又祥奏病體未痊力

難兼顧懇請開除緊要差使一摺文祥管理事務較多現在病體未痊兼顧為難自應量予體恤著無庸管理藩院國子監及嚮導處事務並開去對引大臣閱兵大臣各差使以節勞勩○諭軍機大臣等前據總理各國事務衙門奏貴州教案未結當諭崇實折回遵義籌辦總須民教兩面各無異詞實有完案確據方不至再滋口實茲據崇實奏議結遵義教案新定善後章程十二條士民均皆悅服自願出具聽從設堂行教彼此相安甘結等語惟所稱出具甘結僅係中國士民至教士是否帖服曾否會同出具甘結未據崇實奏及雖稱所議條規於教士並無牽礙終屬一面之詞著崇實懷遵前旨迅將民教兩面切實議結如該教士尚未帖服出具甘結不得遽謂完案仍須折回遵義趕緊妥辦以免另生枝節其楊希伯等應得罪名即著知照曾壁光歸案定擬具奏將此由五百里諭

令知之○以錦州副都統奕榕署吉林將軍。錦州協領古尼音布署副都統○實授吉林副都統德英黑龍江將軍正黃旗護軍參領毓福吉林副都統○丙戌諭軍機大臣等左宗棠穆圖善奏西路官軍勦匪獲勝一摺甘肅西路回匪分竄鎮番武威各屬經韓廷芝王仁和等帶兵截勦將紅柳窩紅牆兒等處賊匪擊敗柳林湖雙城堡等處之賊聞風逃竄其阿干鎮附近亦有回匪圍攻民堡復經

周惟翔帶隊擊退現在大兵由南路進勦河州逆匪乘西路空虛伺間紛竄肆行搶掠意圖牽我兵力左宗棠穆圖善仍當飭令該處防軍隨時探蹤截勦毋任竄突穆圖善另摺奏請帶馬隊馳赴近畿等語現在天津之事業經辦結畿輔兵力足資拱衛該將軍駐紮蘭州籌辦防勦亦關緊要務當與左宗棠隨時會商共維大局所請帶兵來京之處著毋庸議前疊諭左宗棠將成祿一軍應否撤回

酌覈奏聞該大臣何以久不覆奏殊不可解本日據成祿奏現擬拔營西進並請募勇撥糧捐辦駝隻籌辦屯田隨帶寶型出關各摺片該提督頓兵日久忽為此鋪張揚厲之舉事之可行與否恐未必能通盤籌畫著左宗棠懍遵疊次諭旨將成祿一軍應否撤回並該提督此次所陳各情一併酌覈迅速覆奏不得再有遲延成祿摺一件片五件均著鈔給左宗棠閱看將此由六百里各諭令知之

○又諭成祿奏拔營西進並籌辦屯田調募勇勝請飭蒙古捐辦駝隻關外州縣運解倉糧隨帶寶型出關及請頒發關防各摺片前因成祿奏該營餉需缺乏當經諭令暫緩前進聽候諭旨現在該提督已於八月二十日起程惟該提督一經出關道路愈遠籌餉愈難著成祿仍遵前諭無論行抵何處卽於關內地方擇要暫行駐紮候旨遵行肅州一帶伏莽尚多關內地方尤關緊要著成祿統率

所部將來往匪徒實力搜捕務絕根株該提督所用木質關防現已模糊卽著另行刊刻木質關防以昭信守將此由六百里諭令知之○以大學士官文為閱兵大臣並管國子監事工部尚書存誠管理藩院事○以解餉遲延革甘肅軍營副都統色楞泰職仍留營○予甘肅高臺陣亡把總仲瑞林等祭葬世職○丁亥諭內閣武備院奏礮庫被竊一摺據稱該庫司員等於本月二十二日赴庫時見庫門封皮撕去門鎖俱開查點庫內失去大銅礮二箇小銅礮四箇礮車六輛等語庫儲重地應如何嚴密看守乃任令匪犯肆行偷竊實屬不成事體著步軍統領衙門趕緊將此案賊犯悉數嚴拏懲辦並著兩翼前鋒營護軍營大臣將疏於防範之直班官兵訊明辦理其管庫員外郎恆山失於覺察著交內務府照例議處○又諭英元喬松年奏修築牆壩各工完竣請旨驗收一摺通州修築

裏河牆壩及挑濬溫榆河各工經英元等督飭該道廳等辦理完竣卽著該侍郎等詳細驗收所有此項工程動用銀兩免其造冊報銷○諭軍機大臣等奎昌奏查勘塔城界址牌博完竣並現籌辦情形各摺片俄國與塔城分界處所建立牌博現經奎昌會同俄官續行查明自察漢鄂博起至哈巴爾阿蘇山嶺止共立牌博六處連前所立四處均與同治三年原定條約相符業已繪圖換約辦理尚為妥速惟現在塔城未復附近地方別無臺卡此次立界之後俄人能否常守條約不復侵占內地仍當隨時偵察以保無虞卽著福濟等按照奎昌所擬咨會霍博克賽里之土爾扈特親王策林喇普堪扎薩克拉克特那巴扎爾圖布欣克什克三旗轉飭各該旗官弁隨時留心稽查如俄人因歷時已久復有侵占情事卽行知會福濟等隨時與之理論竭力攔阻不得因循廢弛俟塔城克復仍

照舊章。兩國派員會查。以符定制。將此由六百里各諭令知之。○句到福建。四川。廣東。廣西。情實罪犯。停決。四川斬犯八人。絞犯一人。餘三十人予勾。○戊子。以神靈顯應。加廣東高要縣太保神封號曰感佑。○諭軍機大臣等。前因英桂奏請飭催巡撫赴任。當經降旨。令王凱泰即赴福建新任。毋庸來京請訓。茲據瑞麟等奏廣東奏銷緊要。請暫留王凱泰經理。並請飭新任藩司赴粵等語。即著英桂飭令鄧廷枏兼程馳赴廣東。接受藩篆。毋庸來京請訓。鄧廷枏到後。即由瑞麟等知照王凱泰迅赴新任。以重職守。將此各諭令知之。○賞普濟堂功德林煮賑小米八百石。○己丑。以鑲黃旗漢軍都統春佑署正黃旗領侍衛內大臣。鑲紅旗漢軍都統奕劻署鑲藍旗漢軍都統。○以甘肅克復肅州城出力。予總兵官楊作霖。張慶雲。以提督簡放。賞副將譚致祥。參將戴位。聲陳。慶福。遊擊陳友。交陳元

萼。巴圖魯名號。都司周友元等花翎。在籍郎中李煥章等藍翎。餘加銜升敘有差。○予甘肅山丹等處陣亡總兵官許吉祥等六十三員祭葬。世職加等。○句到奉天。湖廣。陝西。情實罪犯。停決。奉天斬犯一人。餘四十九人予勾。○庚寅。

孝慈高皇后忌辰。遣官祭。

福陵。○諭內閣英桂奏請將損壞戰船就地變價。並援案賠補一摺。據稱閩省成造金州七號戰船。因在山東停泊兩年之久。船身柁木諸多損壞。請即在東省變價。由閩另行補造新船等語。著丁寶楨飭令該管地方官會同閩省委員傳紀確估。即將船隻變價。並將陳期登於審擬定案後。派員一併解閩。其不敷價貼銀兩。即著英桂勒限嚴追。不准稍有拖欠。○諭軍機大臣等。單懋謙奏詳陳永陵西堡泊岸情形一摺。據稱成案土隄作法。用荆園盛碎石。排列河干。以木椿撐拄。上築

灰土背築素土。藉以抵禦河流。近來蘇子河水漲時。大溜直趨北岸。圍樁難資抵禦。且恐河身日高。衝刷更甚。若仍照土隄作法修理。無益久遠。查西堡迤西泊岸。向用石工成造。堅實耐久。至今完整。請仿照辦理等語。近年蘇子河屢次水漲。衝刷泊岸。自應妥籌修理之法。以期堅實。著阜保按照所奏各節詳細查勘。斟酌情形。奏明辦理。該尚書所稱西堡陵衛。先行酌加柴埽。以資保護之處。並著一併

查明具奏。原摺著鈔給閱看。將此諭令知之。○又諭魁玉。張之萬奏請將疏防督臣被刺之中軍等官先行懲處。張之萬奏會審兇犯張汶詳情。形各一摺。馬新貽被刺重案。疊經降旨令魁玉。張之萬將兇犯張汶詳悉心研訊究。出確情。茲據奏稱連日熬審。該犯堅不吐實。現在設法研訊等語。張汶詳係亡命兇徒。豈不畏死。必須嚴切推究。訊出實供。方足以申國法。不得稍涉含糊。時金彪及湖州府

新市鎮之軍犯計可陸續解到。魁玉等務飭承審各官分別研究。毋任狡展。副將喻吉三等。於該督被刺時。毫無防範。俱有應得之咎。署督標中軍副將喻吉三。武巡捕都司葉化龍。把總唐得金。差弁守備方秉仁。劉雲青。把總朱信忠。武生潮枝桂。千總費善樂。馬兵丹雄彪。王長發。蔣金龍。均著先行解任。提訊定案。後再行分別定擬具奏。將此由五百里各諭令知之。○又諭魁玉。張之萬奏漕船渡黃

淺阻八里廟。設法開濬一摺。據稱江北試運漕船。於八月初三日全抵東境八里廟。因伏汛日漸消耗。荆門至七級牯水止數寸。淺阻未能浮送。漕船守候二十餘日。水迄未長。現經江安糧道王大經。會商運河道王化堂。督同管河府廳縣設法挖淺過剝。引水灌塘。於八月二十日興工辦理等語。漕船守候河干。亟宜設法挑濬。接運前行。卽著魁玉。張之萬。督飭江安糧道趕緊會辦。以利漕行。並著蘇

廷魁丁寶楨檄飭運河道督率管河府廳縣實力興辦相機疏濬設法浮送前進毋誤倉儲將此由四百里各諭令知之○又諭英桂沈葆楨奏酌保水師人才開單呈覽一摺輪船現既次第告成必須有長於海戰熟於駕駛及諳習沙綫風雲通曉輪機之人方足以資得力茲據英桂等酌保總兵黃聯開等七員及遊擊貝錦泉一員以備擢用並將把總吳錫章一員及都司吳世忠等十六員分別

請獎均著照所請給予獎勵該員等尚未著有勞績此次破格給獎藉資觀感英桂沈葆楨務當督飭各該員等實力講求以資驅策國家不惜數百萬帑金創製輪船原以籌備海防期於緩急足恃現在已成之船必須責成李成謀督率各員弁駕駛出洋認真操練技藝愈精膽氣愈壯方足備禦侮折衝之用至所稱揀調弁兵分配輪船常川訓練之處即著會議章程迅速具奏需用槍礮等件亦

當悉心講究認真製造備用英桂另片奏保總兵張其光等二員已交軍機處與黃聯開等一併存記矣將此各諭令知之○

上以孟冬時享

太廟自是日始齋戒三日○辛卯諭軍機大臣等前因天津民教啟釁疊諭沿江沿海各省督撫嚴密設防現在天津一案業已辦理就緒亦以時事多艱不得不將就完案以弭釁端不可因此案完竣即置防務於不問也近

來內外臣工往往遇事機危急非不盡心竭力以期共挽時艱而泄沓成風未事之先於一切戰守章程類皆紙上空談以致遇有緩急毫不足恃迨事過之後則又因禍患已平苟且因循為目前偷安之計事事有名無實何時可冀自強耶朝廷宵旰焦勞隱憂彌切著沿江沿海各省將軍督撫大臣振刷精神將戰守機宜認真講求以備不虞至各省武備廢弛已極綠營習氣尤深並著各將軍督

撫大臣破除情面認真整頓以期一兵得一兵之用經此次訓諭後務當實事求是嚴密設防毋再視為具文至各省民教交涉事件亦應處處持平不可專顧一面若地方官操縱合宜剛柔互濟自可消患未形著各直省將軍督撫府尹於所屬州縣地方官務須選擇有風骨而又通曉時務之員遇教士非分之求不得曲為遷就遇條約應辦之事亦當妥為撫綏庶中外相信不至再滋事端將此

各諭令知之○又諭左宗棠奏官軍攻破金積堡東關賊巢連克寨壘獲勝一摺金積堡踞匪於本年七月以來經左宗棠飭令劉錦棠等分路進攻次第克復西南西北東西賊寨並將金積堡東關攻破中路雷正綰等軍進剿西路賊匪立將洪樂堡攻克該逆悉敗退金積堡著左宗棠飭令提督王衍慶會同劉錦棠黃鼎各軍乘勝進攻迅速收復金積堡務將竄踞賊匪悉數殲除不得久稽時日另

片奏石城器裏眾潛逃畏罪自斃實足以昭顯戮在逃之翟占沅等係首先倡亂之犯該大臣務當飭令西路各軍及地方州縣嚴行緝拏務獲懲辦毋任漏網其管帶各員是否防範不力並著查明分別辦理唐有彥所部潰卒務飭黃武賢妥為安撫涼州永昌未潰之勇左宗棠已令蕭宗幹等裁併實數統歸王仁和鈐制即著擇要分紮毋令滋生事端將此由六百里諭令知之○賞甘肅軍營病

故提督黃萬友正一品封典予祭葬卹廕加等諡果毅附祀提督劉松山專祠○予甘肅金積堡等處陣亡總兵官趙昌元等二十六員祭葬世職加等○予甘肅涼州被戕都司張學祭葬世職加等○壬辰

孝敬憲皇后忌辰遣官祭

泰陵

上以孟冬時享

太廟前期親詣行禮○以神靈顯應加湖北麻

城縣五腦山土主神封號曰靈感。○諭內閣。前因麟書奏盛京戶部員外郎恩慶因承審張成武謙爭地一案。六品官紹德藉端尋釁。將該員毆傷。並向委六品官王和肆詈。隨後該員等互相稟訴各情。當經諭令將該員等分別革職解任。交都興阿會同盛京刑部研訊確情。定擬具奏。茲據都興阿等奏稱。訊明紹德在署揪毆一節。眾供皆同。張成武謙亦供是日晝供時。紹德從旁嚇禁。並有受賄捏報情事。至紹德所稟王和等謀缺各節。多有牽混影射之詞。所稟恩慶折徵加倍一節。恩慶供稱並無其事。張成武謙原卷情節亦多有不符。現在行查盛京戶部有無折徵告徵情事。並請將紹德刑訊等語。此案眾供已得大概。紹德當堂揪毆。顯係迴護原審啟釁。亟須確切訊明。以期水落石出。著都興阿等卽將革員紹德用刑質訊。務得實情。毋任飾詞。避就。○又諭麟書等奏會審案件。原告京控。

牽涉承審司員。請添派將軍府尹會審一摺。旗兵達啟皇控承德縣刑書黃煜賄保盜犯張布城一案。前經降旨派令麟書會同瑞聯嚴行審訊。茲據奏稱達啟之母白王氏復以刑部司員與會審各員。將伊子提案熬審。偏供並不根究。縱盜重情等詞。赴京控訴等語。案關牽涉司員濫刑偏供。亟應徹底根究。卽著添派都興阿恩錫會同麟書等嚴審。飭屬將此案要證瑞凱及門丁李宜齋卽李文彩等勒緝務獲究辦。並將前署承德縣知縣馮繼堯一併提省歸案質訊。以期水落石出。毋任狡展。○又諭前因浙江溫州玉環營參將鄭鴻章與署守備張省機等。以貼費攤扣各情。互相稟訴。經李瀚章等奏。將鄭鴻章摘去頂帶。張省機李如標暫行革職。與把總林嘉源等一併解任審辦。茲據楊昌濬奏。審明各情。分別擬議等語。此案王環營把總張省機於署守備任內。借餉製辦號衣。多開價值。

訊因物料昂貴所致。其將議裁未撤兵丁應給餉銀。誤作截曠扣存不發。亦據造冊移交。尚無浮冒侵蝕情弊。惟既經鄭鴻章飭屬查明揭叅。自應聽候查辦。乃以屬弁林嘉源等覈覆不公等情。率行稟揭。已屬不安本分。其與署守備李如標會稟參將衙門各項陋習。並未確切查明。輒以奉文整頓營規。稟請飭禁。難保非意存挾制。自應嚴行懲辦。暫革前署王環右營守備頭司把總張省機暫革前

署王環左營守備右營千總李如標均著卽行革職。不准開復。張省機種種任性。尤為乖謬。並著永不敘用。王環營參將鄭鴻章被張省機等稟訐各款。經該撫逐款訊明。尚無情弊。惟減兵募勇。事涉更張。先未稟報有案。亦有應得之咎。鄭鴻章著給還頂帶。飭回本任。仍交部議處。把總林嘉源。傳長瑞覈覆並無不公。亦無挾嫌串誣情事。著無庸議。○諭軍機大臣等。前任直隸提督劉銘傳治軍有律。

疊著戰功。此次一聞宣召。卽日兼程北來。其忠勇報國之忱。尤堪嘉尚。現在津案已結。無須用武。該提督年力正強。豈可令其投閒置散。因思李鴻章赴直時。已率郭松林、周盛傳所部全軍東來。僅留譚仁芳五營駐紮西安。此時甘軍勦匪正當喫緊。陝省兵力空虛。深慮該匪竄突。若令劉銘傳督辦陝西軍務。振旅西征。不特陝境可以安全。卽甘軍亦可免後顧之慮。似於大局較有裨益。至楚軍與淮

軍雖向不相習。而陝事甘事各有責成。料不敢各存意見也。著李鴻章斟酌機宜。據實覆奏。如劉銘傳於西事不甚相宜。或於他省軍務可期辦理有效之處。亦著妥籌具奏。該提督已於昨日召見。俟李鴻章覆奏到日。卽可明降諭旨。其駐紮滄州及丁壽昌所帶銘軍已有一萬餘人。加以駐紮直隸邊境之周盛傳、郭松林等軍。亦有一萬數千人。兵數實不為少。以有用之兵。置之無事之地。徒耗餉需。

若以百戰勁卒。遽予裁撤。亦屬可惜。著李鴻章通籌全局。或酌留直隸若干。以資拱衛。或撥給劉銘傳若干。以資勦賊。其餘各營。應如何分地布置之處。並著悉心籌畫。迅速具奏。將此諭令知之。○又諭據禮部奏。接准盛京禮部送到朝鮮國王咨文。內稱該國慶源府農圃社居民李東吉。逃往琿春地方。蓋屋墾田。嘯聚無賴。該國民口。時有犯越。皆李東吉招誘所致。琿春人與之慣熟。不肯舉發。籲懇

查拏等語。朝鮮匪徒。潛入關隘。沿邊官吏。即應如數查拏。今李東吉潛住琿春。招引該國民人逃越內地。豈可任其潛跡。毫無見聞。著毓福密飭琿春協領等。確查該國匪犯。如在所屬境內潛匿。即行購緝。務將朝鮮匪犯李東吉等。盡數拏獲。解交該國懲治。奕榕抵署任後。並著會同毓福。飭屬隨時稽查。毋任匪徒再行逃匿。以肅邊防。此次朝鮮逃越人犯。已諭令吉林將軍等。嚴拏解交。著禮部

行知該國王遵照辦理。將此諭知禮部。並諭令奕榕毓福知之。○予江蘇故雲貴總督潘鐸。入祀鄉賢祠。從巡撫丁日昌請也。

大清穆宗繼天開運受中居正保大定功聖智
誠孝信敏恭寬毅皇帝實錄卷之二百九十一

大清穆宗繼天開運受中居正保大定功聖智
誠孝信敏恭寬毅皇帝實錄卷之二百九十二

執修

同治九年庚午冬十月癸巳朔享

太廟遣豫親王本格恭代行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵○遣官祭

端慧皇太子園寢○

上詣綏履殿問

慈安皇太后安平室問

慈禧皇太后安至壬戌皆如之○奉

慈安皇太后

慈禧皇太后幸漱芳齋侍午膳○頒同治十年

時憲書○諭軍機大臣等總理各國事務衙

門奏朝鮮民人潛逃俄界請飭該國自行辦

理一摺前有旨諭令禮部行知朝鮮國王將

逃赴俄界民人悉數領回約束毋許再有逃

越並由總理各國事務衙門咨行禮部轉咨

該國卽著該部按照前咨迅卽行令朝鮮自

行設法招徠使已逃者懷德復歸嗣後尤當

嚴申禁令不可復蹈前轍並著該部行知該

國王遵照辦理至邊防必應嚴密著奕榕毓

福嚴飭邊界各員弁隨時認真稽察如有朝

鮮民人由中國地界逃至俄國者卽行查禁

毋任乘間偷越將此諭知禮部並諭令奕榕

毓福知之○追予江蘇各屬殉難六品銜劉

炯等紳民婦女一千六百八十員名口分別

旌卹如例○甲午諭軍機大臣等有人奏直

隸饒陽縣境內團里東段村莊有匪徒李輕

法王大波賈洛玉何振方何洛盈等藉團防

之名私造槍礮設立連槍會名目招集亡命

聚眾多人欺壓良善擾害閭閻請飭查辦等

語各州縣辦理團練應由地方官主持其事

若如所奏各情該縣豈毫無覺察著李鴻章

卽派妥員前往訪查如果實有匪徒藉端滋

事卽行查拏懲辦以靖地方將此諭令知之

○又諭都察院奏同知劉錫鵬遣抱劉安以奉辦軍火赴營投效等詞赴該衙門呈訴據稱該同知籍隸廣東前在山東軍營奉委回粵採辦軍火七年二月將工匠及火箭噴筒等運至濟甯州全營已撤旋由東省軍需局將已到軍火驗收其未到軍火飭卽回粵現寄存香港茲願將山東停解各軍火並添辦開花礮等項報效黔營如蒙發往貴州差委卽趕緊回粵將軍火解黔應用此項軍火內

並有告病副將黃國棟籌辦者該副將亦籍隸廣東今已病痊願將所籌軍火同赴貴州報效聽候差委等語劉錫鵬前在山東奉委採辦軍火是否實有其事東省所收軍火是否堪以利用著丁寶楨查明如果屬實俟劉錫鵬到東後卽著給咨飭令該同知迅速回粵攜帶軍火前赴黔省聽候會璧光差委其黃國棟一員並著丁寶楨咨行廣東督撫查明如亦有其事卽飭與劉錫鵬一併赴黔聽

候差委劉錫鵬已諭知都察院飭令前赴山東矣將此諭令知之○乙未以祈禱靈應頒山西平遙縣應潤侯廟扁額曰潤普平嘯○諭內閣英桂奏本年八月初五日由驛具奏摺件於九月十二日接到兵部火票遞回查驗夾板內印封均有拆動甚至兵部加封之印花倒黏夾板內面破爛不堪夾板上黏有紅籤聲明印花破損富春驛原來字樣其為緊接富春之驛拆看夾板並富春以上各驛將內封印花拆損顯而易見等語各省奏報事件均關緊要經過驛站宜如何慎重馳遞前因曾璧光奏四川驛站拆動夾板業經明降諭旨令各直省督撫責成臬司嚴定章程以重郵政乃浙江驛站復有私拆夾板之事此必管驛之員意在窺探機密要件私自拆看實屬膽玩已極著楊昌濬督同臬司迅速派員馳赴富春驛及該驛上下各站逐一挨查務須究出私拆之人從嚴懲辦不得稍涉

含糊○諭軍機大臣等前因陝省兵力空虛深虞該匪竄突諭令李鴻章將劉銘傳督辦陝西軍務是否相宜斟酌覆奏茲據毛昶熙奏通籌西陲全局請飭劉銘傳督辦陝西軍務郭松林等營均歸節制其所部銘軍留鎮畿輔請飭李鴻章酌撥數營為該提督親軍等語與前降諭旨大致相同惟銘軍係該提督所部恩信素孚故能得力劉銘傳振旅西征能否留紮直隸及郭松林周盛傳兩軍能否歸該提督節制均著李鴻章體察情形妥籌具奏至該提督入關後應如何隨時策應甘軍後路以杜該匪回竄之處並著統籌全局一併奏聞原摺著鈔給閱看將此諭令知之○又諭文煜等奏船政大臣現丁父憂請飭守制百日後仍出任事一摺前江西巡撫沈葆楨自同治六年接辦船政以來不辭勞瘁綱舉目張辦理已著成效該前撫現在丁憂懇請簡員接辦本應俯如所請以慰孝思

惟船政緊要未便遽易生手且非有地方之責沈葆楨守制在籍亦非出官外省可比即著文煜英桂傳知沈葆楨於守制百日後仍將船政事務照常經理毋得固辭該前撫平日辦事實心想能仰體朝廷倚畀之重移孝作忠也沈葆楨守制百日內應行奏咨事件並著文煜英桂飭令夏獻綸等隨時稟知該將軍督撫等代為咨奏以符體制沈葆楨百日後遇有應奏事件仍著照常奏事將此各諭令知之○又諭蔣志章奏請飭部添撥有著專款並就近指撥四川等省協款以備賑墾一摺據稱陝省每年額支各項及發給兵勇協濟金順等營餉項共需銀四百一十餘萬兩本省徵收錢糧釐金江廣等處協餉共可收銀一百五六十萬兩再於本省額支各款緩支減發省出六七十萬兩實不敷銀一百八十萬兩至廣東協餉截至本年八月止已欠至四十九萬兩請飭部添撥應用等語

陝省彫敝萬分庫款支絀自係實在情形著戶部照數指撥實款專協陝省以資接濟北山難民降眾待哺謦謦雖經蔣志章那湊銀兩以備賑壑而杯水車薪鉅斃者仍不能免山內秋稼又復被災亟應速籌拯濟著吳棠督飭藩司協撥賑壑銀十二萬兩何璟督飭藩司協撥賑壑銀八萬兩均於年內埽數解赴陝西不得稍有稽遲至撫綏招撫壑匪諸事宜蔣志章務當督飭屬員認真辦理毋難

民降眾等漸復生業得以自謀衣食方能日久相安四川山西餉力亦難有餘經此次飭撥後恐亦未能源源協濟也將此由五百里各諭令知之○予甘肅甲子墩陣亡縣丞凌鑽高祭葬世職○撫恤琉球國遭風難夷如例○丙申諭內閣李鴻章奏查明知府保案實無冒濫懇仍照原保獎勵並自請察議等語候選知府沈保靖前因勦捻出力經李鴻章奏以道員留於湖北補用續經吏部議以

該員從征楚省係在丁憂期內原保並未聲敘亦未先行奏調按照定章撤銷保案惟念該員隨從李鴻章勦賊尚屬得力未便沒其微勞沈保靖著仍准其免選本班以道員留於湖北歸候補班前先補用以示鼓勵李鴻章先未奏調究屬疏忽著交部察議○諭軍機大臣等據御史吳鎮奏四川節年被擾近復津貼鄰餉民力維艱該省並有私派流差夫馬緝捕經費委員薪水及彌補厯年欠項

前任虧空等名目莫不取償於民其各處釐金有應遵旨停止者現仍收取如故請飭嚴禁等語四川東沿江各廳州縣本年被水甚重業經諭令該督查勘情形優加撫恤若如該御史所奏各情民力愈形拮据著吳棠認真訪察將一切私派名目概行革除其被災較重地方無力津貼者卽酌量先行裁減如查有官紳侵蝕欺蒙等弊卽著據實嚴參毋得稍有迴護將此諭令知之○又諭李鴻

章奏遵旨通籌全局據實覆陳一摺據稱甘軍稍振陝事亦鬆似無須別置一軍致左宗棠或生疑忌若以陝事責成劉銘傳懇請破除常格兼任地方以免牽掣等語所奏不為無見惟陝事甘事各有責成准楚兩軍彼此分辦何至積不相能且甘省前敵各軍勦辦得手尤恐賊匪乘隙窺陝該省兵力尚單必得知兵大員督兵防勦方臻周密北山一帶居民漸次復業而伏莽猶多亦宜及時彈壓

芟除劉銘傳聲威卓著忠勇性成又能馭將愛民決機應變本日已明降諭旨令該提督督辦陝西軍務矣劉銘傳抵陝後將陝甘毗連處所嚴密布置以固隴軍後路一面將北山等處土匪叛勇埽除淨盡所有善後事宜隨時會同蔣志章和衷商辦毋執己見藉可歷練地方公事勉成令器事權不為不專期望不為不厚該提督當能仰體朝廷委任至意也該提督赴陝自應統帶所部銘軍方資

得力昨據毛昶熙陳奏已諭令李鴻章妥籌辦理本日復命軍機大臣傳知該提督卽日請訓以便迅赴天津與該督籌商一切該督接晤後尤當盡言規勸俾磨鍊益深庶備國家異日干城之選至郭松林周盛傳等軍如何分地布置或撥給若干以資助勦之處均著李鴻章會商曾國藩劉銘傳後再行具奏將此諭令知之○命前任直隸提督劉銘傳督辦陝西軍務○予陝西軍營病故提督程

廣和祭葬卹廕建專祠○丁酉減免貴州興義都勻鎮遠思南黎平貴陽石阡思州大定安順十府平越貞豐麻哈黃平開廣順永甯黔西正安獨山平遠威甯定番鎮甯普安安南興義都勻清平施秉天柱安化印江龍泉永從開泰貴定龍里修文餘慶甕安湄潭貴筑遵義綏陽鎮遠婺川青谿桐梓仁懷安平清鎮畢節玉屏四十四州縣暨普安長峯兩同知清江下江歸化水城四通州冊亨州同

羅斛州判錦屏鄉縣丞所屬並古州左右清江左右八寨台拱黃施丹江凱里九衛被擾地方舊欠額賦有差○戊戌諭內閣英元喬松年奏請派員承修剝船並由部籌款一摺裏河剝船應行添排改排既據英元等奏稱通庫無款可籌請援同治七年成案仍歸戶部籌款撥發並派大臣承修著照所請派延煦賀壽慈會同英元喬松年覈實估修奏明辦理○諭軍機大臣等李鴻章奏漕運剝船

不敷周轉請及時籌備一摺前因天津剝船不敷曾國藩請由直隸分年排造九百隻經戶部奏請仍由江西湖南湖北等省排造解赴直隸應用當經降旨允准茲據李鴻章奏稱來歲南漕抵津若待江西等省剝船趕到誠恐緩不濟急請先行撥款趕辦等語漕糧為天庾正供關係甚重李鴻章豫籌各節自係實在情形著戶部先行撥借銀十二萬兩解赴直隸交李鴻章收納該督接到此項銀

兩卽責成天津道就地趕造剝船一百隻一面招商由海道赴南購運木料到津續造二百隻務於明歲漕前造齊以備應用此項撥借銀兩著李瀚章郭柏蔭劉坤一劉崐於江西湖北湖南三省照數攤解戶部歸款其餘應造剝船六百隻並著李瀚章等飭令各該省承辦各員勒定限期趕緊分造務於明年夏初黃運水漲時解送直隸毋得稍有遲誤將此由四百里各諭令知之○追予貴州都

勻陣亡知府黃德裕諡威恪交國史館立傳於死事地方暨原籍建立專祠總兵官王松林等十五員一併附祀○予貴州歷次陣亡從九品陳慶雲等官紳弁勇一百五十七員名分別賞卹如例○己亥諭軍機大臣等崇實吳棠奏改撥協黔的餉請飭提督赴任接辦軍務一摺貴州提督周達武在川帶兵素稱得力現在川省援黔一軍久未得手崇實等請飭該提督馳赴本任接辦軍務以一事

權所籌尚妥。卽著崇實、吳棠傳知周達武卽赴貴州提督本任。接辦軍務。遇有軍營緊要機宜。准該提督就近會同曾璧光列銜具奏。唐炯各營卽著分別裁撤。妥為安置。周達武所需餉銀五萬八千兩。著照崇實等所擬。由川按月籌撥。解赴貴州省城。專供周達武馬步全軍之用。不得短少。崇實、吳棠務當傳知該提督赴黔後。迅率所部剋期進兵。與楚黔各軍聯絡夾擊。周達武本係貴州提督。著曾

璧光飭令黔省帶兵各員。遇有應勦防事。宜悉聽周達武調遣。席寶田一軍並著劉崐檄令該員迅督所部會同周達武等合力進攻。此次貴州壁壘一新。該將軍督撫等務當懍遵疊次諭旨。嚴飭帶兵各員。迅圖會勦。毋再推諉。遷延。周達武原部達字新字各營崇實等已令回川填紮。卽著飭令提督陳希祥等妥為布置。以固邊防。將此由五百里各諭令知之。○以練兵撫番始終勤奮。賞西藏駐

防遊擊王虎臣總兵官銜。○庚子諭軍機大臣等。成祿奏漢回構陷殺害職官請飭查辦。並請將各省運到軍火改由草地轉解巴城。暨懇令常順帶隊西來各摺片。肅州收復未久。必須漢回相安。方免另生枝節。乃金塔所屬河西西紅二處漢民以署金塔協標都司馬萬福有通賊情事。輒聚眾圍署。將該都司槍斃。並將其妻子殺傷。擄劫衣服財物。馬萬福前雖充當肅回頭目。業已投誠免死。並係

職官。卽使通賊果真。亦非百姓所可擅殺。若不認真查辦。無以服眾回之心。現在已有陝回數百由南山竄至肅城。儻因漢民仇殺之故。潛行唆惑。恐滋事端。著左宗棠迅派妥員前赴肅州。將馬萬福被殺一案秉公查辦。以息爭端。應否帶隊前往之處。著該大臣酌度辦理。署肅州鎮總兵陶生林赴省未回。員缺豈可虛懸。著左宗棠卽飭該總兵回任。或另派明幹之員。迅往接署。藉資彈壓。前已有旨

令成祿暫緩拔營前進。聽候諭旨。該提督既未西行。高撫金肅一帶。當就近妥為鎮撫。以安反側。各省運解成祿軍火。著仍暫存歸綏道庫。聽候撥解。成祿前請調吉林黑龍江馬隊。未經允准。如果將來有兵調往。再令常順統帶前進。將此由五百里各諭令知之。○署河東河道總督蘇廷魁奏報秋汛安瀾。命詣河神廟祀謝。實授蘇廷魁河東河道總督。○辛丑

上奉

慈安皇太后

慈禧皇太后幸漱芳齋侍午膳。○諭內閣。前據詹事府詹事夏同善。通政使司副使朱智鴻。臚寺少卿許庚身。呈進前任內閣中書張應昌所著春秋屬辭辨例編八十卷。當交南書房翰林閱看。據稱張應昌所著春秋屬辭辨例編。原本宋儒兼及眾說。間附按語。亦頗詳審。該員耆年好學。甚屬可嘉。所進之書。即著

留覽。○諭軍機大臣等。丁寶楨奏漕船阻淺。擬改由陸路設法挽運等語。江北漕船行抵八里廟一帶。節節阻滯。現在水勢消涸。抽溝剝運業已無及。丁寶楨已籌雇民車。改由陸路運至臨清。再行接運。自應如此變通辦理。即著魁玉。丁日昌。丁寶楨。分飭江安糧道。王大經。運河道王化堂等。趕將已到臨清之米一萬餘石。立即裝載開行。其未到漕米。務當星速雇齊民車。一律轉運。並籌備船隻。隨到

隨裝。不得再有遲延。並著李鴻章督飭各該地方官。於漕船入直境後。務趁河冰未凍。催令連檣北上。毋稍耽延。將此各諭令知之。○以山東曲阜捕獲梟匪。予知縣朱焜以同知直隸州知州用。並賞花翎。都司郝祿等升敘加級。有差。○壬寅

慈禧皇太后聖壽節遣官祭

太廟後殿

奉先殿。

上率王以下文武大臣詣

慈寧門行慶賀禮。眾官於午門外行禮。○詣平

安室

慈禧皇太后前侍早膳。○奉

慈安皇太后

慈禧皇太后幸漱芳齋侍午膳。○諭內閣。前據

丁寶楨奏請以道員用山東濟甯直隸州知

州程繩武補授東昌府知府。經吏部以與例

不符奏駁。茲據丁寶楨奏稱東昌府員缺緊

要。程繩武署任以來措置裕如。為地擇人。請

仍准以該員補授等語。著照所請。山東濟甯

直隸州知州程繩武准其補授東昌府知府。

○又諭。前因同知張同方招搖訛詐妄拏鄉

民。經丁寶楨奏參。當將該員革職。交丁寶楨

嚴審究辦。茲據奏稱張同方因遣回勇丁不

知下落。疑被禹城等處民團誤作敗匪活埋。

該革員並不知會地方官查辦。輒將團長范

德榮等妄拏以致范德榮等畏其官勢有許

給盤費情事等語。張同方恃官滋事。妄拏平

民殊屬藐法。已革知府銜候選同知張同方

著從重發往軍臺效力贖罪。以儆官邪。○又

諭。前因河南祥符縣在籍都司葛振川與王

姓爭毆各節。堅不實供。經李鶴年奏參。將葛

振川革職審辦。茲據李鶴年奏審明定擬等

語。此案已革都司葛振川因強食王興洋煙

爭罵經黃友勸散。後該革員復尋王興毆打

直入河督衙署挾制滋鬧。殊屬不法。亟應嚴

行懲辦。葛振川著從重發往黑龍江充當苦

差不准留養。○諭軍機大臣等。劉崐奏湘潭

會匪滋事。勦辦情形一摺。據稱湘潭縣南鄉

朱亭有哥匪約眾起事。經縣丞葛治平捕獲

何騰雲等二名。該匪膽敢聚眾至朱亭搶犯

葛治平帶團迎擊受傷殞命。朱亭被匪焚掠

並擾及黃茅山門淶口等處。大股竄踞鳳凰

山蓮花寨為巢穴。分黨肆擾。逼近湘鄉等語。

近年哥匪滋事之案層見疊出。雖經隨時撲

滅而根株未絕實為地方之害。此次湘潭匪徒戕官焚掠盤踞山寨形同叛逆必須乘其初起趕緊勦辦悉數殲除以絕後患著劉崐飭令道員李光燦等迅速進剿毋任他竄致滋蔓延。儻兵力不敷即著會商曾國荃選擇得力將弁招募勁旅統帶前往協同會剿該前撫誼切桑梓該處地勢人情較為熟悉且曾統帶勇丁殺賊立功於戰守機宜確有把握諒必能妥速籌辦尅期蒞事也將此由五百里諭令知之。○又諭劉崐奏湖南餉源匱

竭請飭協撥一摺據稱湖南援黔之師所費浩繁近來餉源日窒需餉日多各營欠發餉銀已近二百萬兩現自九月起至年底止統計出入大數入款約可收銀六十萬兩出款節省算計萬不可緩者約需銀九十七萬餘兩所短幾及十分之四又據湘潭湘鄉衡山攸縣醴陵等縣稟報哥匪蔓延亟應派兵勦辦是援鄰軍餉正虞竭蹶又加腹地切近勦

匪之餉情勢尤為偏迫請飭撥協餉等語該省援黔各軍正擬進圖台拱而內地哥匪又乘間竊發餉需匱乏自係實在情形著曾國藩魁玉丁日昌於江南迅籌協餉銀二十萬兩李瀚章郭柏蔭楊昌濬英翰瑞麟李福泰於湖北浙江安徽廣東四省各迅籌協餉銀十萬兩務於年內如數解赴湖南以濟要需將此由五百里各諭令知之。○河東河道總督蘇廷魁奏江北漕米現擬改由陸運得旨

昨據丁寶楨奏改由陸路運至臨清當飭趕緊籌辦著該督飛飭該道等迅雇民車裝運毋稍遲誤。○予湖南湘潭傷亡縣丞葛治平祭葬世職加等如陣亡例。○癸卯

上奉

慈安皇太后

慈禧皇太后幸漱芳齋侍午膳。○甲辰諭軍機大臣等崇厚等奏天津機器局告成動用經費各款開單奏報一摺天津設立機器局經

崇厚督飭在事人員度地庀材隨時監視密妥士等認真經理現已一律告成所用款項既據崇厚等聲稱事由創舉難以例價相繩所有單開用過銀數卽著准其開銷至密妥士所稱再添研藥機器三分每年所出火藥可增三倍而人工所加有限較之採買卽可節省尚屬久遠之計崇厚現在出差應如何斟酌添製開拓之處著交李鴻章妥為籌畫奏明辦理該督於此事講求有素務當督飭

津局委員事事悉心研究務將此中機巧竟委窮源庶可有裨實用不至徒託空言將此各諭令知之○又諭金順泰勦賊獲勝移營進逼王疇一摺陝回屢擾河西冀阻官軍糧道王疇通昌等寨悍賊亦潛出沿山竄擾經金順會商張曜派隊前往平洪一帶探勦將東面沙梁及北沙窩竄匪擊敗西山邊沿村劫糧之賊搜殺淨盡逆酋亦被擒斬各起巡防兵勇復分路截擊零星回股糧道現在疏

通勦辦尚為得手惟金積堡突出陝匪欲入王疇各寨就食若不盡數截殺迅拔堅巢必至勾結拒守圖抗官軍金順現已會同張曜督隊進紮王疇著卽相度機宜滾營進逼擣穴擒渠盡殲醜類該逆現在遣黨潛赴河東勾引陝回均由馬家灘一帶偷渡並著知照河東各軍隨時認真巡防毋任賊蹤竄渡金積堡業已合圍恐尚有匪徒逸出並著該署將軍會同張曜嚴飭各軍偵探兜勦以杜紛

竄將此由五百里諭令知之○署甯夏將軍金順奏添調留防中衛總兵官黃金山兩營來甯助勦報聞○命前任奉天府尹德椿來京以三品京堂候補○乙巳以都察院左都御史龐鍾璐為順天武鄉試正考官戶部左侍郎潘祖蔭為副考官○丙午賞五城貧民棉衣銀○丁未

上奉

慈安皇太后

慈禧皇太后幸漱芳齋。侍午膳。○諭內閣。御史鄧慶麟奏。新選奉天府治中齊鶴松。向在吉林長春廳開設萬慶棧店。置有房產。往來奉天省垣及海口等處貿易。該治中於註冊投供。願憑時並不照章聲明。呈請迴避。實屬有心隱匿。長春廳雖非奉天所屬。惟該廳文武童生均歸治中府考。以向在該處貿易之人。校試該處。賄屬情通。尤所不免。等語。齊鶴松於長春廳置有產業。往來奉天省垣及海口

等處貿易。是否實有其事。並是否例應迴避。該治中有心隱匿。著吏部查明具奏。至所稱奉天府治中一缺。請飭變通選法。嗣後或專用科甲出身人員。或由現任正途人員升調之處。並著吏部議奏。○諭軍機大臣等。有人奏吉林理事同知安榮。由革員開復補授。實缺孽孽為利。縱任書役到處索詐。民怨沸騰。積壓案件數百起之多。又伯都訥理事同知博霖。縱賭殃民。收納賭局錢文。並將拏賭之

鄉地刑責嚴押。現有土匪劉發邱老疙疸等。動用槍礮。屢在廳屬向陽泡長興屯各鎮市當鋪嚇詐錢文。該同知匿不以聞。積壓案件不勝枚舉。又協領花里雅春在刑司納賄擅權。與永筆帖式表裏為奸。上年春間有生員劉煥辰之胞伯。因搶案牽累。經京員楊士端趙樸訊明。省釋該協領。因詐贓未遂。擅自提審。酷刑杖責。楊士端等力爭。該協領負氣。竟將劉姓杖斃。以致趙樸抑鬱而死。又黑龍江

呼蘭廳同知文瑞到任後。將雙山堡街基址重斂地價。得錢二萬餘吊。每年復得錢數千吊。經人在該將軍衙門呈控。又於同治七八年間。向燒商索錢一萬餘吊。去冬廳屬有搶劫重案。該同知派刑書林向榮前往代辦。將事主釘指。倡索錢文。從此盜案不敢報聞。等語。近年東三省地方。時有馬賊竊發。必須該地方官潔已奉公。隨時認真整頓。方能戢奸宄而安良善。若如所奏各員貪劣情形。縱賊

殃民實為閭閻之害著瑞聯即行馳赴吉林
會同毓福將安榮等被叅各款逐一查明從
嚴叅辦並著德英將文瑞被叅各節詳細查
明據實嚴叅均不得稍有迴護隱飾又據奏
稱奉天承德縣新民廳廣甯鐵嶺開原等縣
盜賊充斥搶案層見疊出吉林葉赫地方被
賊搶去站馬若干匹並聞五常堡有馬賊焚
燒衙署之事似此緝捕廢弛該將軍等豈竟
毫無聞見著都興阿毓福德英督飭所屬實
力按捕消患未萌毋得因循怠玩致釀事端
原摺均著鈔給閱看將此各諭令知之○賞
八旗暨步軍營綠營兵丁一月錢糧

大清穆宗繼天開運受中居正保大定功聖智
誠孝信敏恭寬毅皇帝實錄卷之二百九十二

大清穆宗繼天開運受中居正保大定功聖智
誠孝信敏恭寬毅皇帝實錄卷之二百九十三

教修

同治九年庚午十月戊申諭軍機大臣等魁

玉奏武生販帶私鹽聚眾拒捕現在妥籌辦理一摺私鹽本干例禁本年九月閒江甯文闡局試時竟有武生仇茂森等興販私鹽船至千餘號鹽至數萬引之多經魁玉派委文武各員前往查禁該武生竟敢鳴鑼拒捕以致弁勇受傷實屬不成事體現在魁玉飭令運司籌款收買並拏獲抗捕之犯數人仍著該署督出示嚴禁並飭各關卡文武員弁實力稽查不准有闖卡漏私等事此次倡首拒

捕之武生仇茂森業經格斃其武生吉殿邦等卽著飭令該運司逐細查明分別輕重按律懲辦將此諭令知之○又諭金順泰偪勦王噶回匪疊勝並攻克馬四賊寨一摺金順一軍自前月二十二日移營後會同張曜督軍進偪王噶莊賊分三股出巢抗拒經各軍分中南西三面迎擊金順由東北率眾截勦疊次獲勝敗匪奔入馬四寨復經截殺多名官軍乘勝將馬四寨攻克王噶東南一帶之

賊又斃多名。回首蘭州阿渾已被轟斃。此次金順等軍進攻王疇回逆。連日獲勝。攻毀寨壘。勦辦甚屬得手。卽著金順會商張曜督飭各軍乘勝圍逼。務將王疇攻拔。殲厥渠魁。其北路各回寨與王疇回逆同類。難保不伺隙潛出圖擾糧運。並著嚴飭後路各營實力防範。毋任紛竄。將此由六百里諭令知之。○翰林院侍讀黃鈺。祁世長充日講起居注官。左春坊左中允鍾寶華。左贊善趙佑宸。右春

坊右贊善徐致祥。署日講起居注官。○旌表
守正捐軀河南葉縣民孫印川妻英氏。○加
賞通州王恕圍等處糶賑粟米六百石。○己
酉。諭軍機大臣等。崇實奏密陳貴州教案情
形。設法籌辦一摺。前諭崇實馳赴遵義。籌辦
教案。必民教各無異詞。實有完案確據。方不
至再滋口實。原恐含糊了事。難免枝節復生。
乃該教士果米帖然。意圖翻悔。崇實自應迅
赴遵義。督飭各委員悉心籌畫。以期民教相

安。及早歲事。茲該將軍以遵義民情犷悍。教
士又意存要挾。一入其境。轉難著手。所慮亦
不為無見。惟當體察實在情形。妥速結案。如
所派之員不能得力。必須崇實親身前往。仍
著該將軍懷遵疊次諭旨。力疾起程。以便就
近斟酌機宜。切實辦結。崇實現在派員前往
遵郡。著曾璧光飭令該地方官會同該委員
認真訪查。務得確情。並將該教士如何翻悔
根由。詳細咨明崇實。以憑覈辦。毋許稍涉含

混。崇實另片奏。已革貴東道多文熟悉情形。
派令前赴黔省設法開導等語。多文係曾經
債事之員。恐不可靠。崇實當隨時留心訪察。
不得稍有遷就。致誤事機。將此由五百里各
諭令知之。○庚戌。諭軍機大臣等。都興阿等
奏嚴飭查地委員起程赴邊。並協領前赴署
任一摺。奉天查邊委員古尼音布現署錦州
副都統。業已回城。所有查勘邊荒事宜。都興
阿等已飭同知張鼎鏞協領崇善出邊查辦。

卽著都興阿。額阿和布恩錫飭令張鼎鏞等
將邊外未查地畝。趕緊一律查勘完竣。造冊
報部。以憑覈辦。不得久事遷延。錦州地方緊
要。並著都興阿等飭令古尼音布於該城應
辦事宜妥為經理。以重職守。將此各諭令知
之。○命都察院左都御史龐鍾璐禮部右侍
郎溫葆深在紫禁城騎馬。○以鑲紅旗滿洲
副都統安住署右翼前鋒統領。○辛亥。諭內
閣。景豐奏拏獲搶刦犯。請交部審辦一摺。

據稱本月十二日。直班弁兵。在古北口地方。拏獲形跡可疑人犯賈會秋一名。訊係夥劫客商破斃事主兇犯。該犯恃無刑訊。現復任意翻供。請解部嚴審等語。賈會秋著卽解交刑部嚴行審辦。按律定擬具奏。其逃犯李迎山。胡永田。陳老三。著熱河都統飭屬嚴拏。務獲究辦。以靖地方。○諭軍機大臣等。庫克吉泰奏黑龍江官兵。現由古北口啟行回省。惟值冬月嚴寒。尚衣單夾。懇請每名借支俸餉。

銀三兩。製備皮衣。於明春領餉時。按名坐扣等語。該官兵長途跋涉。禦寒無衣。自應量加體恤。著加恩每名賞給銀三兩。置備皮衣。由戶部解撥餉銀內照數動支。並著知照該將軍。於明春發餉時。毋庸按名坐扣。以恤兵艱。將此諭令知之。○又諭劉坤一奏湖南湘潭等縣會匪滋事。醴陵攸縣與江西之萍鄉等處。壤地相接。萬載縣亦相去不遠。現已派兵堵剿等語。該匪盤踞鳳凰山。四出滋擾。現經

湖南官軍進剿。難保不闖入江境。卽著劉坤一飭令朱雲章等督率兵勇。嚴扼萍鄉等處隘口。兼顧萬載縣蓮花廳地面。並檄飭劉勝祥分撥兵勇。前赴蓮花廳協同守禦。毋令該匪乘間竄越。劉勝祥駐紮吉安。卽飭令力固江省門戶。毋稍疏虞。袁州城防緊要。務當飭令知府駱敏修會同朱雲章妥為布置。湖南如需江西防兵會剿。卽著劉崐知照劉坤一。檄令周亮何明亮等迅速出境。會合夾擊。並

飭李光燦等剋期進剿。毋任該匪旁竄。致滋蔓延。將此由五百里各諭令知之。○兵部等部會議兩廣總督瑞麟等條奏新設赤溪協未盡事宜。所陳改駐都司一員。千總三員。把總五員。外委八員。額外外委二員。記委四員。馬步守兵四百六十一名。暨改赤溪營為水師。隸陽江鎮管轄。變通巡洋章程。以陽江鎮總兵為上班統巡。赤溪協副將為下班統巡。並移新甯縣縣丞改駐廣海寨。均應如所請。

辦理從之○以永安寺白塔山後不戒於火
管奉宸苑事景壽等下部議處○免科布多
本年例貢貂皮○壬子諭軍機大臣等侍郎
胡家玉奏本年秋審冊內有江西東鄉縣絞
犯王高照等一起原揭聲稱該縣錢糧照通
省新章每兩收銀一兩五錢除一正一耗外
以四錢提補捐款公費及辦公之用又隨賦
捐銀一錢以為修理壇廟等工之費刁徒魯
魚典等藉求減錢糧捐費為名聚眾鬧鬧是

江省軍務雖平額外之誅求未已請飭該撫
通飭所屬徵收地丁錢糧每銀一兩遵例加
收耗銀一錢所有另立名目額外徵收者永
遠革除並請飭行各州縣開徵時照例銀錢
並收以蘇民困各等語著劉坤一斟酌情形
妥議具奏原摺著鈔給閱看將此諭令知之
又諭前據左宗棠奏中書吳士邁在營病
故請將擅殺遊擊朱德樹之案免其查參當
以該遊擊本有違令應得之罪是以降旨允

准茲據都察院奏該遊擊之兄朱積善遣姪
守備朱常久呈稱本年三月間賊竄羅局鎮
吳士邁令朱德樹攻東路因賊撲武字營甚
急即率各營力戰解圍迨赴羅局已無賊蹤
吳士邁即責以違令將其斬首復以吳士邁
所稟朱德樹侵吞餉銀等情係吳士邁跟丁
蒙保知縣之曾貴和等挾嫌讒構請昭雪給
予卹典等語朱德樹被殺一案是否實有冤
抑著左宗棠按照所呈各節確切查明據實

具奏毋稍含混原呈著鈔給閱看將此諭令
知之尋奏遵查朱德樹違令屬實吳士邁病
中憤急遽行正法亦有專殺之愆業經病故
應無庸議得旨朱德樹正法一節既據該督
查明並無冤抑即著毋庸賜卹○又諭總理
各國事務衙門奏遵議毛昶熙請撤三口通
商大臣條陳一摺洋務海防本直隸總督應
辦之事前因東豫各省匪蹤未靖總督遠駐
保定兼顧為難特設三口通商大臣駐津籌

辦係屬因時制宜。而現在情形。則天津洋務海防。較之保定省防。關緊尤重。必須專歸總督一手經理。以免推諉。而專責成。著照所議三口通商大臣一缺。即行裁撤。所有洋務海防各事宜。著歸直隸總督經管。照南洋通商大臣之例。頒給欽差大臣關防。以昭信守。其山東登萊青道所管之東海關。奉天奉錦道所管之牛莊關。均歸該大臣統轄。通商大臣業已裁撤。總督自當長駐津郡。就近彈壓。呼

應較靈。並著照所議。將通商大臣衙署。改為直隸總督行館。每年於海口春融開凍後。移紮天津。至冬令封河。再回省城。如天津遇有要件。亦不必拘定封河回省之制。李鴻章現任直隸總督。當懷遵此次改定章程。將洋務事宜悉心籌畫。海防緊要。尤須統籌全局。選將練兵。大加整頓。銘軍酌留若干營。曾否定議。楊村河西務王慶坨等處。應否修築礮臺。撥營分駐。均著該督酌度情形。妥為籌辦。畿

輔水利。本宜講求。而畿東尤亟。應如何設法宣洩。以利農田。而固封守。著該督慎選賢能之吏。次第興辦。至天津新鈔兩關稅務。應否添設海關道一員。專司其事。著李鴻章一併酌議具奏。原摺著鈔給閱看。將此諭令知之。○又諭總理各國事務衙門。奏請飭各省大吏辦理。中外交涉事件。加意慎重。一摺。中外交涉事宜。非尋常日行事件可比。況事關重大。尤應慎之又慎。密益加密。庶不至為外國

所傳播。貽誤事機。同治七年八月間。因曾國藩於密陳條約摺件。未能慎密。致被洋人傳鈔。曾經諭令各直省將軍督撫。格外慎密。誥誡諄諄。至為詳切。乃本年因天津民教構釁。令劉坤一暗中防維。諭旨一道。竟為九江領事官鈔錄。經威妥瑪照會總理衙門。此等緊要事件。劉坤一何以漫不經心。致有疏漏。其為養尊處優。事事假手於人。已可概見。此件諭旨。究由何處洩洩。著即徹底查明。嚴叅懲

辦不准稍有迴護。徇庇致干重咎。嗣後南北洋通商大臣暨各省將軍督撫等。遇有中外交涉事件。務當加意慎密。不得稍有疏虞。無論是何寄諭。均須親自拆閱。如再有漏洩機密。貽誤大局者。一經訊明。即將漏洩之人。按照軍法從事。並將疏於防範之大吏。嚴加懲處。決不寬貸。原摺均著鈔給閱看。將此各密諭知之。尋劉坤一奏。洋務密寄。惟省城司道及九江鎮道。得聞斯事。其由何處洩漏。無從

根究。惟有自請交部嚴議。以儆疏忽。九江鎮總兵黃開榜。九江道景福。與外國領事官近在同城。亦難諉卸。應請交部議處。從之。○命委散秩大臣公瑞。興往奠故巴林扎薩克郡王那木濟勒旺楚克茶酒。並賞銀五百兩治喪。○癸丑。諭軍機大臣等。定安奏。擬籌蘇木臺站津貼銀兩。及酌擬京餉改道解運各等語。歸化城迤北草地蒙古蘇木臺站三處。駝馬一切。向由該旗自備。年來差務絡繹。該扎

薩克等力不能支。自應量予調劑。定安請援照土默特臺站經費章程。每年每臺酌給銀五百兩。三臺共給銀一千五百兩。即由歸綏道稅課項下。按春秋二季支發。係為體恤蒙古起見。著照所請辦理。仍俟軍務稍鬆。轉運輕減。再由該將軍酌量情形。奏請停止。至定安所稱歸化距烏科兩城。程途雖較近便。而各省應解烏科之件。運至歸化。每多迂遠。即如部撥京餉。由順天府保定太原轉解歸化。

南北轉折二千餘里。始由歸化運歸軍臺正路。若徑由部庫發交順天府解至察哈爾。即可由該都統轉交阿勒台軍臺。直達烏科兩城。較形省便等語。不為無見。嗣後如有撥解烏科餉銀。即著戶部順天府查照辦理。並著文盛選派妥員迎提護解。毋稍疏虞。將此諭知戶部。奏天府。並諭令定安。文盛知之。○又諭前據張廷岳等奏。妥籌防勦情形。本日據福濟等奏。現籌堵勦竄匪各一摺。賊匪在額

哲尼阿盤踞距綏城西北烏城西南均不過二千餘里與庫倫則相距五千餘里若烏綏兩城派兵會剿聲勢尚屬聯絡且此股賊匪現又竄入喀喇烏蘇等處分股搶掠必須及早剿除以靖臺站福濟等已咨張家口綏遠城將前次備調馬隊催赴哈爾尼敦一帶迎擊著定安文盛卽將前項馬隊一千名分別檄飭達爾濟管帶前進與福濟等派出各隊會合確探賊蹤併力截剿金山卡倫之賊業

經張廷岳派員前往偵探如探明匪蹤所在卽著咨照福濟等派兵堵截張廷岳等仍當酌撥防兵迎頭堵禦庫倫地方緊要該辦事大臣等務當加意防範以備不虞臺站地面遼闊賊匪奔竄靡常並著福濟等會商定安文盛隨時派兵梭剿淨絕根株至張廷岳現在應否督隊進剿及在何處駐紮仍著福濟等與之悉心商榷迅速奏聞將此各諭令知之○督辦陝西軍務前直隸提督劉銘傳奏

報由津起程得旨沿途勇丁嚴加約束毋任騷擾到陝後於搜捕餘匪防堵邊境各事宜認真經理毋負委任○陝西巡撫蔣志章奏提督譚仁芳一軍礙難進駐定邊現抽撫標兩營調赴靖邊得旨著卽嚴飭在防將弁認真防剿毋稍疏懈○以蒙古官軍截剿陝西懷遠竄匪獲勝予台吉巴勒珠爾優敘賞梅楊色扎布等花翎○甲寅頒賞王大臣暨內廷翰林各省將軍都統督撫

文宗顯皇帝聖訓各一部○察哈爾都統文盛等奏接准烏里雅蘇台將軍福濟咨調馬隊助剿惟現屆冬令冰凍草枯長途跋涉難期得力得旨昨據福濟等奏報烏庫一帶賊蹤仍形竄擾已諭令文盛將此項馬隊派往防剿著仍遵昨日諭旨迅速派赴該處並著咨明福濟等如軍務稍鬆再將此項馬隊撤回休息以示體恤○己卯諭內閣曾璧光奏請將詐傳詔旨之武弁正法等語參將賀宗恆

改名那元。輒敢在貴州遵義府地方偽稱欽差詐傳。

皇太后密旨。巡查雲貴川楚四省事務。希圖搖惑人心。撞騙銀錢。實屬不法。已極。賀宗恆著即行正法。以昭炯戒。○予安徽巢縣陣亡千總崔燕桂祭葬。世職加等。○蠲緩直隸霸高陽天津滄青靜海元城大名通武清寶坻薊香河保定文安大城新城蠡雄安河閒獻東光景任邱平鄉鉅鹿永年曲周雞澤威隆平。

甯晉深。陽安平。三河博野。任。肥鄉。四十州縣被水。被旱。被雹。被蟲。地方新舊額賦租課。暨民借倉穀有差。○丙辰。諭內閣翰林院編修黃彭年奏。時事維艱。請勤修省一摺。本年時序失調。水旱疊見。江湖盛漲。下游受災。天時示儆。良用惕然。而各省慢上逞兇之案。屢見疊出。人事尤屬可憂。夙夜祇懼。若涉大川。罔知攸濟。茲覽黃彭年所陳懋聖學戒臣工。節財用廣言路各條。剴切詳明。於修省之道。

大有裨益。惟當孜孜求治。重道親師。慎侍御僕從之選。屏耳目玩好之娛。期與天下共臻上理。爾內外大小臣工。亦當恪共厥職。共濟時艱。力戒因循推諉。奔競夤緣。庶幾積習漸除。諸事可期振作。至黜奢崇儉。疊經誥誡。諄諄猶恐奢侈相沿。動踰體制。朕躬行節儉為天下先。嗣後該內務府大臣。於一切用款。務當查照舊章。力求撙節。不得任意加增。凡百臣工。尤當懍遵法制。毋尚浮華。言路通塞。實

為治理所關。在廷諸臣。於政事得失。人才賢否。如確有所見。總當直言無隱。以副朝廷廣開言路之意。民為邦本。本固不搖。為治之道。以固民心為要。而宏濟艱難。尤惟賢才是賴。願與中外諸臣朝夕圖維。共求長治久安之策。有厚望焉。原摺著留覽。○諭軍機大臣等。金順奏官軍連日攻勦竄踞各匪。獲勝力籌進取一摺。逆匪久踞王疇。負隅抗拒。經金順會同張曜連次進攻。疊獲勝仗。其郡城迤東。

之紅花寺及北路虞翔營等處竄匪。亦經各軍截剿。斃賊甚多。惟東北回寨糾集。陝匪紛擾後路。分我兵力。尤須嚴為防範。卽著金順會同張曜督飭後路防營及提督劉廷等軍。確探嚴防。遇賊卽擊。力顧運道。一面嚴督各營實力進攻。迅拔堅巢。毋任陝匪乘間來援。致剿辦更形棘手。將此由六百里諭令知之。○以四川官軍克復雲南永北廳城。予總兵官劉寶國以提督。蘭放賞千總洪萬先。巴圖

魯名號。吳全禮以守備用。並賞花翎。恩騎尉李大英等藍翎。餘加銜升敘。開復有差。○予浙江北龍洋陣亡千總吳振忠祭葬。世職加等。○丁巳諭軍機大臣等。張廷岳等奏竄匪復擾烏境。請飭撥兵進剿一摺。金山卡倫竄匪現經張廷岳等探明在額爾德尼班第達呼圖克圖地方。肆行搶掠。後分股向西北東北奔竄。並據烏城咨稱賊擾巴彥察罕等處。所向未定等語。張廷岳等以倉尼達賴地方

距額爾德尼招等三處尚屬相連。因將阿哈爾山防兵移紮該處。以資堵禦。並令圖謝圖汗部落兵丁馳往會合駐守。添派幹丹丹準車林先赴額爾德尼招等處。會同那木濟勒端多布等相機防剿。酌留車臣汗部落官兵一千名防守庫倫。布置尚妥。惟賊股奔突靡定。著福濟張廷岳等嚴飭派出各隊。確切偵探。跟蹤兜剿。務絕根株。不得彼此推諉。以致賊勢蔓延。不可收拾。烏城屬境現有賊蹤。福

濟等尤當派隊認真兜捕。毋任此拏彼竄。文盛定安等亦當確探嚴防。毋任匪蹤擾及轄境。察哈爾馬隊一千名。前已准張廷岳等所奏。諭令定安文盛等檄飭達爾濟管帶前進。著福濟等迅卽迎提。以厚兵力。並著文盛等檄令此項馬隊剋期起程。毋再延緩。所請添派綏城官兵赴烏會剿之處。是否可以調撥。著定安酌度情形奏明辦理。將此由五百里各諭令知之。○戊午諭軍機大臣等。李鴻章

奏遵旨會商酌派官軍赴陝。並分撥各軍布置情形。一摺。劉銘傳督軍赴陝。此次李鴻章所奏派撥各情。與劉銘傳前奏大略相同。該提督現已由津起程。即著李鴻章咨會劉銘傳。入陝後。即將所部銘軍及添撥之郭松林。徐邦道等營。於陝西應勦應防處所。擇要扼紮。該營所需餉項軍火。及轉運採辦經費。即由李鴻章所設湖北後路糧臺及揚州分局籌撥接濟。西北糧運維艱。並著咨會劉銘傳。

沿途體察情形。派員設局。節節轉輸。毋誤軍食。郭松林所部武毅馬步十營。本日已諭令李瀚章俟此項官軍到後。應如何分路設防之處。即行妥籌調度。周盛傳所部馬步二十三營。俟劉銘傳郭松林各營分起遠去。即著飭令移師北渡。擇要布紮。以衛畿輔。吳長慶所部步隊八營。現分駐江南宿遷揚州蘇州等處。並著咨會曾國藩就近調遣。以資統攝。將此由四百里諭令知之。○又諭李鴻章奏。

淮軍月餉。江蘇照從前減撥一半。嗣因援黔征陝。奏准每月加撥湖北五萬兩。四川三萬兩。浙江山東各二萬兩。江蘇湖北浙江等省。均經如數協濟。山東僅解至七月。四川僅解兩批。現在劉銘傳督軍入關。秦中糧食艱貴。異常。尤慮餉糈難繼。即留紮畿輔。分防江鄂各營。亦皆關繫大局。需餉孔殷。請飭各省籌解等語。此項月餉。均係有著的款。豈可稍令短絀。著曾國藩魁玉李瀚章吳棠丁日昌郭。

柏蔭楊昌濬丁寶楨。仍照原撥淮軍額款。按月如數源源籌解。毋稍缺誤。以濟要需。將此各諭令知之。○又諭李瀚章奏湖南會匪滋事。現在勦辦情形。並留陝鄂軍續有添調一摺。湘潭會匪。經官軍勦擊擒斬。解散甚多。已將鳳凰山賊巢攻破。現在鳳凰山老巢之賊。尚有若干。其四出滋擾者。現竄何處。著李瀚章咨商劉崐督飭派出各軍認真進勦。將此股匪徒接捕淨盡。務絕根株。湖北蒲圻崇通。

等縣接壤湘南難保該匪不被勒紛竄著李瀚章檄飭劉維楨調撥所部速赴蒲圻會同地方官嚴密設防遇賊卽擊迅埽逆氛本日據李鴻章奏湖北襄樊一帶為南北要衝湖南現有會匪滋事令郭松林所部武毅馬步十營迅帶回鄂由督臣李瀚章商酌調遣等語此項官兵到鄂後應如何擇要設防分路布置之處著李瀚章妥籌調度襄鄖切近秦中游勇潰匪時虞闖入著李瀚章嚴飭周得

升一軍會同地方文武晝夜巡防不得稍形疏懈將此由五百里各諭令知之○又諭穆圖善等奏陝回竄撲平番縣城勦辦情形一摺陝回禹生彥崔三兩股由河州竄擾平番屬境經駐防該處之南字左右兩營迎勦於沙溝地方接戰失利統領張萬美等均殁於陣該逆直撲縣城豫師督兵守禦賊向東北山溝遁去穆圖善親率馬隊馳抵免窩督勦將賊擊敗殲斃甚多此次賊匪乘虛出擾勢

頗猖獗現在雖已遁回河州老巢惟賊蹤出沒無常必須隨時加意防範南字營現已併歸參將李正魯統帶而兵力尚單豫師駐紮平番務當督率在城文武妥籌防守該辦事大臣新立之營亦當認真操練以資得力穆圖善擬令署莊浪協副將鍾本起招募五百名著卽飭令訓練成軍將城守事宜嚴密布置其南大通沙溝口及北十里鋪等處並著分撥官兵扼守以杜紛竄穆圖善現已回省

如西路有警仍當隨時調度力籌防勦左宗棠身任欽差大臣於甘肅全省軍務均應妥籌兼顧不得以遠在西隅置為後圖土門及武威縣屬王家臺等處有匪竄擾著左宗棠穆圖善迅飭王仁和等督軍截勦毋任滋蔓穆圖善另片奏疊次勦賊出力馬隊官兵可否酌保等語著准其擇尤保奏將此由五百里各諭令知之○直隸總督李鴻章奏請調甘肅布政使林之望翰林院編修呂耀斗前

赴劉銘傳軍營贊畫戎機以資得力允之○
補鑄陝西廊州知州儒學寶雞縣知縣儒學
靖邊縣知縣巡檢甘泉定邊安定等縣知縣
神木縣儒學各印信條記從巡撫蔣志章請
也○予甘肅平番陣亡提督張萬美祭葬世
職加等謚壯毅總兵官彭清勝等十三員祭
葬世職加等○已未旬到江蘇安徽江西浙
江情實罪犯停決江蘇斬犯二人安徽絞犯
五人餘四十三人予勾○庚申諭內閣前據

總理各國事務衙門奏遵議尚書毛昶熙請
撤三口通商大臣條陳當諭令李鴻章妥籌
應辦各事宜茲據該督酌議章程具奏天津
地方緊要自宜因時變通三口通商大臣一
缺著卽行裁撤所有應辦各事宜均著歸直
隸總督督飭該管道員經理卽由禮部頒給
欽差大臣關防用昭信守並著該督於每年
海口春融開凍後移紮天津冬令封河再回
省城儻遇有緊要事件必須回省料理亦准

其酌度情形暫行回省事竣仍赴津郡以資
兼顧其山東登萊青道所管東海關奉天奉
錦道所管牛莊關均歸該督統轄惟中外交
涉事務較繁自應添設道員管理著照所請
准其另設津海關道一缺專管中外交涉各
事件及新鈔兩關稅務並責成該道督飭府
縣悉心妥辦仍隨時稟請該督酌覈辦理嗣
後津海關道缺出著由直隸總督揀員請補
其餘未盡事宜著李鴻章迅速妥議具奏尋

奏新設天津海關道定為衝繁疲難四字最
要之缺由外揀員請補沿海地方均歸專轄
直隸通省中外交涉事件統歸管理兼令充
直隸總督海防行營翼長並擬於運河北岸
圈築新城另建官署為經久防患之計下部
議從之○又諭湖南學政溫忠翰奏保舉教
職生員請予獎勵等語選用內閣中書湖南
湘潭縣教諭鄒湘調學養純粹廉潔可風五
品銜選用知縣邵陽縣訓導梁則尹訓課勤

能學識練選。桂陽縣教諭俞錫桓。訓誡苗生。著有成效。選用內閣中書。通道縣教諭陳善。均清慎自守。品粹學純。永定縣優廩生呂敷。孝行克敦。沅陵縣優廩生張珣。清介篤實。梁則尹。著在任。以知縣卽選。鄒湘。偲俞錫桓。陳善。均著賞加五品銜。呂敷。孚。張珣。均著註冊。以教職選用。以示鼓勵。○諭軍機大臣等。李鴻章奏。遵旨酌議應辦事宜一摺。本日已明降諭旨。分別照准。其津海關道一缺。已

令陳欽署理矣。三口通商大臣。旣已裁撤。所有天津洋務一切事宜。該督責無旁貸。著隨時相度機宜。悉心籌畫。至選將練兵。籌備海防。尤為目今要務。直隸練兵日久。迄無成效。李鴻章。惟當嚴飭各將弁。認真訓練。隨事整飭變通。以期兵歸實用。大沽海口。南北礮臺。最為扼要。楊村。河西務。王慶坨等處。均屬要隘。應否撥營分駐。修築礮臺。並著妥籌辦理。周盛傳一軍。卽著暫駐景州。滄州一帶。以資

拱衛畿東水利。亦宜切實講求。崇厚開墾渠田。旣無實效。並著該督察看情形。妥籌試辦。另片奏請派道員總理機器局事務等語。道員沈保靖。卽著總理天津機器局事務。李鴻章。仍當飭令該員督率中外員弁。匠役。悉心研究。以期有裨實用。惟該局牽涉洋人。殊多窒礙。勢不能遽議更張。總在經理之員。督飭內地員匠。銳意推求。必須自能運用。轉相傳習。方為經久之道。所有一切整頓開拓章程。

應否與密妥士籌商。並著酌度妥為籌辦。將此諭令知之。○又諭左宗棠奏。官軍會剿逆。豐。疊。勝。現在合圍金積老巢。首逆被創。並迎勦。河州竄賊獲勝。暨中路護運各軍會剿。竄回情形各摺片。此次北路馬步各軍。經劉錦棠等督飭進剿。奮勇爭先。疊挫賊鋒。連克堅堡。殲除逆匪。余彥壽等多名。首逆馬化澂被創。中路雷正綰。黃鼎。徐文秀等軍。勦敗陝甘回匪。疊破堡寨。殲斃逆目鄒麻子。丁玉潰等。

首逆余彥祿亦因傷身斃。勦辦甚屬出力。現在金積堡東面僅存王洪楊明兩堡。西面僅存大河中洲馬家灘四堡。餘皆一律埽除。各路官軍復於四面紮營掘濠。漸偏漸緊。自當乘此機勢。鼓勇進攻。以收擒穴擒渠之效。至左宗棠摺內所稱金積堡城高牆厚。渠水迴環。攻堅既多有傷亡。地道又未能開掘。請寬以時日。可冀奏功等語。固屬實在情形。惟當此賊氛大挫。合圍已成。總當於慎重之中。寓奮迅之意。不可稍涉畏難。致形鬆勁。河州回

逆偷渡洮河。循河南犯。經楊世俊等迎勦。獲勝。仍著飭令在防各軍。遇賊即擊。毋稍疏懈。漢伯堡竄出之賊。疊經周紹濂等軍分路迎擊。擒斬甚多。其敗匿李旺堡等處者。亦經魏光燾追勦。陣斬賊目馬泳。步賊殲除殆盡。惟騎賊已向會甯靜甯紛竄。提督楊世俊等安定截勦之師。能否盡殲醜類。官軍糧運最關緊要。仍當督飭各軍。隨時確探。雕勦以護運。

道毋稍疏虞。將此由六百里諭令知之。○又諭左宗棠奏請飭兩江迅撥老湘全軍協餉等語。劉松山所部老湘全軍餉銀。前據左宗棠奏合計每月尚缺額餉一萬五六千兩。當經諭令兩江總督江蘇巡撫仿照舊案供支。茲據奏稱江南除月解該軍餉銀六萬兩外。並未籌解。計該軍額餉自七年十月截至本年五月。懸欠三十萬八千有奇。新四營月餉並車價馬價棚價卹銀等項。又欠數萬兩。本

年六月以後。積欠尚不在內。請飭將添協餉項撥解等情。現在劉錦棠率軍合圍金積堡。賊巢正當喫緊。豈可因軍餉短少。致誤戎機。仍著曾國藩丁日昌除將老湘軍餉月解六萬兩外。按月迅撥添協銀一萬兩。並將歷年欠款及帳棚車輛米價馬價卹養等銀。一併星速籌解。務期源源接濟。毋令缺乏。將此由五百里各諭令知之。○又諭金順奏回匪糾眾出撲官軍奮擊獲勝一摺。王噶回匪因官

軍連日進逼。率黨分路疊撲各軍營卡。經金順會同張曜連日奮擊。雖經先後獲勝。惟該逆恃其巢堅黨眾。河東陝回。又因就食趨附。後路糧道。時虞梗阻。若不迅速攻克。則逆援日多。勦辦更形棘手。著金順會同張曜督飭各軍實力進勦。迅將王疇攻拔。並將該逆援路先行斷絕。以孤賊黨。毋任勾結紛擾。致稽時日。將此由六百里諭令知之。○賞已革陝西巡撫瑛榮頭等侍衛。為科布多參贊大臣。

○予湖南軍營病故總兵官朱貴華祭葬卹廕。○予甘肅金積堡陣亡總兵官蕭榮發等三十四員祭葬世職加等。○予甘肅洮河陣亡副將向宏猷。楊占元祭葬世職。○勾到河南山東情實罪犯。停決河南斬犯二人。絞犯一人。山東斬犯四人。絞犯三人。餘四十四人。予勾。○辛酉署甯夏將軍副都統金順奏攻毀王疇附近賊壘。得旨著該副都統會同張曜督飭各隊實力進攻王疇。並嚴防後路。毋

得數行陳奏。徒事粉飾。○予甘肅胡家團陣亡參領明慶祭葬世職。○予甘肅王疇莊陣亡遊擊熊履山祭葬世職加等。○追予浙江紹興等處陣亡殉難知縣培善等紳民婦女八十四員名口。分別旌卹如例。○壬戌諭內閣。工部奏匪徒匿跡木倉。請飭查拏一摺。據稱九卿朝房後檐坐落木倉院內。牆上瓦片破碎。查係有人踰越。敞庫內遺有白米二口袋。蜈蚣梯一架。牆根並有燒火造飯情形。顯

有匪徒在內隱藏等語。倉庫重地。竟有匪徒藏匿。並任意存放物件。該官兵等毫無覺察。實屬不成事體。著前鋒統領護軍統領步軍統領各衙門嚴飭直班及地面官兵。加意稽查。並於東西長安門隨時盤詰。毋任閒雜人等出入。致滋弊端。此項匪徒。著步軍統領衙門嚴拏務獲究辦。毋任漏網。嗣後儻再有此等情形。即著將該官兵等從嚴懲辦。該管堂官泄洩成風。亦必重處不貸。毋謂言之不早。

也。諭軍機大臣等前經諭令蔣志章酌撥譚仁芳一軍扼駐定邊。並令左宗棠派兵進紮平羅。嗣據蔣志章覆奏譚仁芳一軍留防腹地。未能遠調。已將撫標中右兩營派赴靖邊。歸成定康調遣。與定邊遙壯聲援。茲據定安奏稱。探得回逆二千餘騎。竄至米脂。甄井堆子梁等處。並有續來馬步賊千餘。已到花定一帶。河東陝回復由通昌通貴河邊竄過馬步賊二三千人。分擾平羅等處。請仍飭左

宗棠蔣志章撥軍分扼等語。現在金積既經合圍。王家疃莊亦在攻勦喫緊之際。逆黨窮極紛竄。擾我後路。冀以掣動前敵。自在意中。米脂等處既有賊蹤。是已越定靖而東。劉厚基成定康等軍駐紮沿邊。何以並不迎頭截擊。任其竄入。刻下該匪擾及何處。著蔣志章迅飭北路防軍探蹤截勦。賊如竄至米脂等處。距晉疆甚近。冬令河水凝沍。尤慮東擾。並著知照何璟加意防堵。毋稍疏虞。前派撫標

兩營曾否馳抵靖邊。如果兵力不敷。即著續派數營前往定靖一帶合力防勦。毋任賊蹤再行闖入。並著定安知照宋慶等於沿邊一帶勤加偵探。遇有東竄之賊。即行派隊迎勦。力埽狂氛。劉銘傳業已由津起程。著即趕緊前進到陝後。迅派得力隊伍扼紮陝甘交界處。所並將廊延綏榆一帶土匪潰勇搜捕淨盡。毋任勾結外來匪徒滋擾陝境。平羅一帶時有賊匪竄擾糧路。設有梗阻。關繫非輕。全

順張曜等軍進勦王疃及分防甯郡石嘴磴口等處。兵力不敷分布。著左宗棠仍遵前旨。迅派勁兵進紮平羅地方。以清甯靈後路。將此由六百里各諭令知之。○又諭定安奏擊獲盜匪從嚴懲辦。現仍跟緝首夥要犯一摺。歸綏一帶地處晉邊。界連蒙古草地。時有馬賊乘閒剽掠為害地方。現經定安檄令劉景芳派員密拏已將巴噶多爾濟等九犯拏獲正法。其碩博果爾等十一名亦經殲斃。惟該

將軍五月間劄飭巴達爾琥嚴拏碩博果爾等犯之文。在碩博果爾所居帳房搜出。此等緊要公文。何以落於該犯之手。是否該旗官兵有通賊情事。亟應確切根究。著定安嚴飭烏闡察布盟長及茂明安扎薩克台吉。務將實在緣由迅速查明。嚴行究辦。不得稍有含混。其博羅扣一股。現尚未獲。碩博果爾餘黨潛逃亦多。當飭張士林等趕緊躡拏。務獲不准一名漏網。山西歸綏雁平各屬及察哈爾左右翼地方。恐為該匪潛匿。著文盛。何璟各飭所屬一體兜拏。務絕根株。如有拏獲之匪。卽由各該地方官就近訊辦。無庸解赴綏城。免致疏失。察哈爾地方遼闊。定安所派弁兵。恐於該處路徑生疏。並著文盛嚴飭各旗官弁。務當督率兵丁。協同兜拏。以靖地方。將此由五百里各諭令知之。

大清穆宗繼天開運受中居正保大定功聖智誠孝信敏恭寬毅皇帝實錄卷之二百九十三

[illegible]

上詣綏履殿問

慈禧皇太后安。至辛卯皆如之。○奉

慈安皇太后

慈禧皇太后幸漱芳齋侍午膳。○甲子。蠲緩直。

隸開東明長垣水清栢鄉高邑南皮清豐八

州縣被水地方新舊額賦雜課暨民借倉穀。

並減免差徭賑開長垣南皮柏鄉四州縣災

民○乙丑諭內閣英元等奏裏河漸已結凍○

從巡撫英翰請也○丁卯諭軍機大臣等前

據穆圖善等奏賊匪竄擾平番一帶當經諭

令豫師督率該處文武妥籌布置茲據豫師

奏稱整頓新軍籌備後路軍功何得彪督帶

練勇在塘坊沙溝等處。疊次擊賊獲勝。卽著

飭令將此路賊匪實力勦洗毋令蔓延豫師

現擬於大里壩等處分築堡寨與大寺連城

等處聯絡聲勢卽著督催各該地方官趕緊

辦理招農開墾一面疏通運道以利軍行豫

師現紮平番。著將該處防守事宜。布置妥協。卽行相機前進。馳赴本任。毋稍稽延。將此由五百里諭令知之。○又諭張廷岳等奏竄匪偏近烏城。請撥官兵會剿一摺。張廷岳等據東兩部落盟長轉報福濟劄文內稱。十月初六七等日。賊匪萬餘。復聚額爾德尼班第達呼圖克圖遊牧之博提哈拉烏蘇庫努克等處。傷害多人。肆行搶奪。該匪尚有二股。分擾烏里雅蘇台庫倫地方。其推河烏勒幹庫努克盤踞之賊。人數尤眾。沙爾噶勒珠特臺亦有匪踞道路梗塞等語。福濟劄文所稱情形。尚未據該將軍奏報。是否因臺站被阻。未能迅速遞到。著福濟榮全錦丕勒多爾濟將現在賊竄何處。賊數若干。及剿辦情形。趕緊馳奏。張廷岳等以蒙兵不能得力。請飭綏遠城將軍察哈爾都統派撥馬步官兵。由賽爾烏蘇臺站前赴烏境會剿。前據福濟等奏。已咨張家口綏遠城將前次備調馬隊催赴哈爾

尼敦一帶。當諭令定安文盛卽將前項馬隊一千名分別檄飭達爾濟管帶前往。嗣據張廷岳等請添派綏城官兵赴烏會剿。又諭令定安將是否可以調撥。酌度情形奏明辦理。此時蒙兵防剿甚不足恃。亦係實在情形。綏遠城察哈爾能否添撥官兵會剿之處。著定安文盛權衡緩急酌量辦理。一面星速奏聞。賊股奔竄靡定。著福濟榮全錦丕勒多爾濟張廷岳阿爾塔什達懷遵前旨督飭派出各隊確探賊蹤會同兜剿。毋得彼此推諉。任令賊勢蔓延。並著福濟榮全錦丕勒多爾濟張廷岳阿爾塔什達等將賊匪現竄處所及臺站相距道里若干。喀爾喀四部落各旗遊牧地方何處扼要。何處應令設防。各繪細圖貼說詳悉奏聞。將此由六百里各諭令知之。○以翰林院侍講學士文潑侍讀慶麟充日講起居注官。○以侵餉漁利革甘肅遊擊劉裕升職不准投效軍營。○己巳諭軍機大臣等

工部奏請定應用綵紬梭毯數目。並先行酌擬綵紬匹數。派辦各色羅緞等件。開單呈覽。各摺片大婚應用綵紬梭毯。現尚未有定數。自應先期覈定。以憑備辦。著禮部即將是否應搭綵棚懸挂結綵及鋪設梭毯處所。妥速議定。奏明請旨。其一應陳設器具。凡有關禮節。須及早籌辦者。著一併妥議具奏。工部以庫存鮮明綵紬現僅七千餘匹。若俟禮部覈定後再行奏派。恐致趕辦不及。先行酌派八

千匹以備應用。著照所請。即著茂林按照該部派辦匹數。迅速趕辦。連上次派辦未解者六百餘匹。及舊派未解者一千匹。統限明年五月以前。一律解送到部。不准稍有延誤。並著戶部指撥款項。咨照浙江巡撫飭令藩司如數迅即撥解。俾該織造得以剋期辦理。至應需各色羅緞等件。內務府現無存儲。著德壽按照工部單開各件。趕緊備辦。統限明年二月以前。一律解送到部。原單著鈔給閱看。

將此諭知戶部禮部工部並傳諭德壽茂林知之。○又諭張廷岳等奏烏城戒嚴情形緊急。請飭撥兵來庫以資防守一摺。據稱十月二十六日。接准福濟遣員遞到夾板摺匣一件。當即發交臺站馳遞。一面傳詢該差梅倫博羅。據稱烏城賊氛逼近。臺站不通。該差起身之日。福濟與榮全會督蒙兵二百餘名。在城防守。錦丕勒多爾濟督帶索倫蒙漢各兵五百五十名。駐紮頭臺。豫備迎擊。其時竄匪

三千餘名。已抵舒勒克二臺。現在烏城情形。不知若何等語。前據張廷岳奏賊匪萬餘。竄近烏境。勢甚猖獗。當經諭令定安文盛等酌量撥兵。星速馳奏。茲覽張廷岳等所奏各情。是賊勢漸逼漸緊。而烏城兵力單弱。戰守均不足恃。脫有不虞。則科布多等處均形震動。即庫倫亦恐孤立無援。必須迅撥勁旅。以捍疆圉。著李鴻章調撥宣化鎮標擡槍火槍等項官兵一千名。派委得力將弁管帶。馳赴庫

倫俾資協守並著何璟調大同鎮標擡槍火槍等項官兵一千名派委得力將弁管帶迅速出口由賽爾烏蘇直抵哲林臺站北接庫倫所屬額爾德尼招等四處協同扼堵力保庫倫西境其達爾濟所帶馬隊一千名卽著定安文盛懍遵疊次諭旨催令迅速起程前赴烏城會剿毋稍遲緩並著於綏遠城察哈爾兩處各調得力官兵遴員管帶飭令趕緊赴烏為達爾濟接應不得以無兵可撥為詞

一奏塞責福濟等於援兵未到之時務當督率在防兵弁實力堵剿並將現在情形隨時馳奏張廷岳等亦當確探賊情妥籌防守不得稍涉大意此次匪眾突如其來究從何處竄近烏城著福濟張廷岳等確探具奏一面檄飭附近各蒙古部落官兵派隊截剿迅掃逆氛張廷岳前次奏撥餉銀五萬兩業經諭令何璟於京餉內劃撥著該撫迅速籌解毋再稽延張廷岳本日摺報係十月二十七日

所發而二十六日轉遞福濟摺匣至今未到是否遺失卽著張廷岳等行文沿途臺站查明具奏本日諭旨除分寄福濟外著軍機處另錄一分遞交張廷岳派員齎送烏城交福濟等祇遵以免遲誤將此由六百里各諭令知之○漕運總督張之萬奏報秋汛安瀾命詣

河神廟祀謝○句到直隸熱河山西情實罪犯停決直隸斬犯四人絞犯一人山西斬犯二人餘四十五人予勾○撥部庫銀十萬兩解赴察哈爾轉解庫倫以濟軍需○庚午諭內閣內務府奏查勘熱河園庭各工請分別擇要修理開單呈覽一摺熱河園庭內外各工著熱河總管永存等設法保護暫緩興修○人諭御史鄧慶麟奏敬陳管見一摺除所奏尚簡樸以維民風一條業經疊降諭旨諄諄誥誡外至州縣為親民之官必須久於其任方能留心民瘼興利除弊若紛紛更調展

轉趨避。吏治安有起色。著各直省督撫府君。於實缺人員。務當飭歸本任。隨時察看能否。稱職分別舉劾。其一切差委事宜。候補人員。儘可派用。不得率調實缺人員。致曠職守。聽斷必期明速。兩江總督曾國藩所定考課州縣功過章程。甚有裨於吏治。著各直省仿照辦理。保甲之法。所以除暴安良。果能實力奉行。奸宄自無從匿跡。近來湖南湘潭等縣會匪滋事。皆由該地方官平時不能嚴密稽察。

所致。著各督撫將軍府君。遵照定章。編查保甲。其遣散勇丁回籍後。如有不安本分滋生事端者。務須嚴拏懲辦。毋稍寬縱。奸胥蠹役。最為閭閻之害。往往羈禁無辜。瘐斃囹圄。全在該地方官愛惜民命。不時查察。江蘇巡撫丁日昌曾令州縣懸挂粉牌。開載收押人犯。以杜濫押之弊。頗屬簡便可行。著各直省一律照辦。其有書役勾串訟棍。擾害平民者。隨時訪拏懲治。以儆刁風。現在各省地方百姓。

未盡復業。加以水旱為災。當思休養生息之計。舊有常平倉義倉。有無虧缺。亟應查明買補足額。各處荒地。務須廣為開墾。其陂堰坍塌之處。尤宜及時修築。抽收釐捐。須嚴杜中飽。以利民生。以上各節。各該督撫當實心經理。不得奉行故事。致負朝廷勤求民隱之意。至帝王之學。與儒生異。必以敬天愛民為本。等語。所陳亦尚切要。原摺著留覽。○又諭。御史鄧慶麟奏直隸永平府屬撫甯等處所用。

斗斛。以底作口。惡級奸商。藉此從中漁利。請飭查禁等語。著直隸總督嚴飭永平府屬之撫甯盧龍等縣地方。所用斗斛。務當遵照部頒定式。俾歸畫一。至各直省如有不遵定制擅用私斗情弊。並著各該督撫飭屬查明一體嚴禁。以符定制。○又諭。前因蒙古台吉布彥烏勒吉呈控哲里木盟長扎薩克達爾漢親王索特那木彭蘇克父子倚勢凌虐各情。當經諭令都興阿會同幫辦盟務卓哩克圖。

親王濟克登旺庫爾提審定擬具奏。茲據都興阿奏稱。盟長扎薩克達爾漢親王索特那木彭蘇克被控強使次子諾力布旺楚克承受七十九孀孀色登魯勒麻產業各款。業經供認。至該王之子頭等台吉棍布旺吉勒被控欲娶公爵雲敦坡爾賚已定護衛拉特那之妹為福晉各節。既經濟克登旺庫爾提集案內人證。前後供詞始終確鑿。未便因頭等台吉棍布旺吉勒堅不吐實。致案久懸。應以

眾供確鑿擬結等語。此案索特那木彭蘇克於強使次子諾力布旺楚克承受七十九孀孀色登魯勒麻產業各款。既經供認。其子頭等台吉棍布旺吉勒欲娶公爵雲敦坡爾賚已定護衛拉特那之妹為福晉各節。即著照眾供確鑿辦理。所有此案先後原被兩造供詞。並該原告頭等台吉布彥烏勒吉七十九四等台吉烏勒吉布彥等三名。即著派員一併解送理藩院。索特那木彭蘇克等應得處

分由該衙門查照例案定擬具奏。○諭軍機大臣等。劉崐奏勦辦會匪已漸肅清。並續起股匪登時撲滅。現仍派軍按捕伏莽一摺。湘潭等處會匪。現經劉崐派兵圍剿。將首要各逆擒獲正法。其脅從人眾均已解散。湘潭各境漸就肅清。其湘鄉道州續起股匪亦經該地方官等督兵剿擊。登時撲滅。現仍按捕餘匪。即著李瀚章劉崐飭令李光燦會同衡永鎮道將逃匿餘匪悉數殲除。務絕根株。毋留

後患。一面檄飭黃教銘等會同地方官認真整頓鄉團清查戶口。如有逆目遁回潛伏者立卽擒拏嚴辦。毋任漏網。聞兩湖地方勇丁遣散者結會甚多。該督撫務當督飭地方官嚴行查禁。有犯必懲。以期消患未萌。將此由四百里各諭令知之。○以防勦不力。革湖南知縣劉友鄂參將范爾愛職。仍留營摘知縣李熾福頂帶。撤知縣龔樹吉任。○辛未。諭軍機大臣等。金順奏官軍圍攻賊寨疊獲勝仗。

並後路防兵截剿竄匪情形一摺。王家疇賊匪疊據金順奏報。官軍進逼濠寨。賊勢窮蹙。此次所報十月十四至十九等日。剿賊情形。不過敷衍勝仗。意圖塞責。且此次官兵受傷甚多。該逆仍未大受懲創。賊巢何日克復。卽著金順振刷精神。督率兵勇。會同張曜各軍。迅將王家疇賊巢攻拔。並將該逆援賊實力堵剿。毋令勾結。致稽時日。儻再事遷延日久。無功恐該署將軍不能當此重咎也。將此由

五百里諭令知之。○又諭福濟等奏竄匪欲犯烏庫。請飭撥官兵援應。定安奏歸綏官兵無可調撥。各一摺。福濟等所稱賊匪屯踞博克多山推河口。額爾德尼招等處。圖撲烏里雅蘇台庫倫。十月初九日。逆賊已抵第十一烏特臺。驛卒逃避。文報不通等語。與張廷岳等前奏大略相同。烏庫兩城關係極為緊要。錦丕勒多爾濟現已親帶兵勇起程。馳赴第三臺特默爾圖。擇要防堵。著福濟榮全與該

參贊悉心會商。先就現有兵力。覘賊所向。相機進剿。毋任匪勢蔓延。棍噶扎勒參剿賊尚能出力。現既願效馳驅。卽著令其揀選精壯千名。星速赴烏。協同防剿。福濟等以賊眾兵單。不敷分布。檄催前調之察哈爾馬隊。星速前進。並擬添調綏遠城烏槍隊一千名。東三省馬隊一千名。哈密巴里坤滿綠營兵勇各一千名。前往協剿。昨據張廷岳等奏竄匪逼近烏城。請撥兵會剿。當將綏遠城察哈爾能

否撥兵前往。諭令定安文盛酌量辦理。本日復據定安奏。歸綏軍務緊要。官兵無可分撥。惟烏城竄匪滋擾。勢甚披猖。非厚集勁旅。不足以資堵剿。著定安先其所急。酌量分撥槍隊暨東三省馬隊赴烏協助。前調察哈爾馬隊一千名。著文盛催令達爾濟管帶迅速啟行。兼程前進。並能否再行添撥。速籌具奏。哈密巴里坤兩處兵本不多。著文麟景廉伊勒屯何琯酌量調撥。星馳策應。以上各軍均歸

福濟等調遣卽由推河鄂羅蓋一帶前進迎頭截擊。迅埽逆氛。惟各軍雲集。統帶需員。卽著榮全統率各軍。扼要駐紮。妥籌防勦。並著福濟等一面飛催圖庫爾尅日到烏。協同勦辦。福濟等請撥餉銀五十萬兩。已諭令戶部速議具奏。該部籌撥之款。批解需時。深恐緩不濟急。張廷岳等前請撥銀十萬兩。著於解到時先行分撥烏城。俾資接濟。毋得稍分畛域。該匪既有分撲庫倫之意。張廷岳等務當加意偵探。實力嚴防。毋稍疏懈。將此由六百里諭知定安。福濟榮全。錦丕勒。多爾濟文盛。張廷岳。阿爾塔什達。文麟。景廉。伊勒屯。並傳諭何瑄知之。○又諭前經調赴古北口之吉林馬隊二千名。黑龍江馬隊一千名。業已全數撤回。茲據福濟等奏。賊匪屯踞博克多山。推河。只額爾德尼招一帶。欲犯烏里雅蘇台等處。臺路梗阻。情形萬緊。自應添撥馬隊。以資助勦。除前調察哈爾馬隊一千名。已寄諭

文盛。催令起程外。著都興阿查明古北口撤回馬隊。現在行抵何處。卽行截留。於吉林馬隊內挑撥一千名。並黑龍江馬隊一千名。一併飭令折回。取道張家口。迅赴烏里雅蘇台。歸福濟等調遣。所需軍裝器械。鍋帳等項。及沿途需用口糧。均著都興阿就近先行籌給。俾利師行。刻下天氣嚴寒。並著都興阿籌備皮襖二千件。為該兵丁等禦寒之具。共需經費若干。該將軍覈實奏明。由部籌給。其吉林挑賸馬隊一千名。仍令撤回該省。並著德英毓福。行令管帶各員。迅速遄行。毋稍遲誤。將此由六百里各諭令知之。○蠲緩直隸豐潤。吳橋。故城。清河。南樂。慶雲。鹽山。七縣被水被旱地方。新舊額賦。暨民借倉穀。並減免差徭。○蠲緩山東濟陽。鄆城。濮臨。邑。壽。張。范。臨。清。濟甯。厯城。齊東。齊河。禹城。長清。肥城。東阿。東平平。陰。惠民。青城。陽信。商河。濱利。津。鄒。滕。嶧。汶上。陽穀。荷澤。曹鉅野。觀城。朝城。聊城。茌平。

館陶武城魚臺平原樂陵齊陽莘冠嘉祥海豐霑化蘭山章邱鄒平長山陵德蒲臺滋陽曲阜泗水單定陶堂邑博平清平高唐夏津邱金鄉六十五州縣暨濟甯德州東昌臨清四衛被水被旱被蟲地方新舊額賦並雜課有差○蠲緩山西薩拉齊黎城長治長子陽曲五廳縣被水被旱被電地方新舊額賦暨民借倉穀○壬申追予浙江嘉興等處殉難縣丞沈福年等紳民婦女二百一十一員名口分別旌卹如例並予建祠○追予浙江杭州合門殉難同知費保鏞妻妾子女等分別旌卹如例並予建祠○追予山東各屬陣亡殉難紳民婦女二千四百三十七名口分別旌卹如例○旌表守正捐軀四川西昌縣民婦劉楊氏○癸酉諭軍機大臣等前因福濟奏烏城防勦喫緊懇請飭部迅籌餉銀五十萬兩當令戶部速議具奏茲據該部奏稱擬由部庫撥庫平銀二十萬兩並由山東山西河

南等省於應解本年京餉項下各劃撥銀十萬兩共撥銀三十萬兩以符五十萬兩之數等語烏城軍情緊要自應寬籌餉項以資勦辦所有部撥餉銀二十萬兩著順天府派員迅卽解赴察哈爾其山東撥款並著丁寶楨派員一併解赴察哈爾均由文盛驗收迅速轉運烏城一面飛咨福濟委員迎提其山西河南解款卽著何璟李鶴年按照部定數目趕緊籌撥遴委委員解赴綏遠城由定安轉解此項餉銀到烏足敷勦辦福濟務當督飭各防軍實力堵遏不得再以餉絀為詞致滋貽誤近日賊勢如何並著隨時具奏所有撥解烏城餉銀臺站如有匪阻卽著解至庫倫由張廷岳等派員會同解餉委員繞道前進毋稍濡滯庫倫軍餉前已由戶部撥銀十萬兩此次籌撥五十萬兩係專為烏城防勦起見張廷岳等不得擅請截留致誤要需將此諭知萬青黎王榕吉並由五百里諭令定安

福濟文盛張廷岳阿爾塔什達丁寶楨何璟李鶴年知之。○又諭文盛杜嘎爾奏總管抗傳規避請予懲儆並籌防賊匪南竄各摺片邊外軍務緊要經文盛等遵旨疊傳總管達爾濟商酌口外進兵機宜乃該員三次抗傳迄未到口實屬不知緩急達爾濟著暫行摘去頂翎以示薄懲仍著文盛杜嘎爾懍遵前旨飭令達爾濟星速帶領前調馬隊一千名馳赴烏里雅蘇台一帶會合各軍探賊所向

迎頭截擊儻再遷延貽誤卽著嚴叅治罪賽因諾顏地方現有賊匪竄擾深慮匪蹤南竄益形滋蔓難圖文盛等已撥烏槍火藥等件令賽爾烏蘇站員領給各臺豫備堵擊並著隨時確探嚴防毋任賊股南竄將此各諭令知之。○又諭成祿奏拔隊起程出關截留運省倉糧籌辦轉運車馬並請飭山西催餉烏綏轉運各摺片前經疊諭左宗棠飭將成祿一軍應否撤回酌覈具奏並疊諭該提督暫

緩前進聽候諭旨日久未據左宗棠奏到現在成祿業已派撥頭起兵勇三營於八月二十等日陸續進發暫駐玉門嘉峪關等處該提督隨卽總統全軍跟蹤繼進軍已成行勢難再令折回成祿著督兵駐紮關外嚴防回匪竄擾肅州漢回尚未相安且有南山竄出股匪該處地方緊要伏莽未清成祿仍當妥籌兼顧不可輕率前進置肅州於不顧致有疏虞成祿拔隊西行該軍糧食缺乏自應設

法籌備以資飽騰張掖本年運省倉糧三千五百石暨高臺撫彝倉糧四千石均准成祿截留卽著左宗棠移圖善飭令省局司道剴行該三廳縣卽將前項糧石運解成祿軍營毋得稍分畛域上年成祿截留撫彝高臺運省倉糧省局司道責令署高臺縣管笙賠解並將其記過事出因公尚非該縣貽誤並著左宗棠飭知省局司道卽將此案查銷寬免並將署撫彝廳通判王佳植記過賠解之案

一併查銷寬免。成祿擬於肅州高臺設立轉運局。由總督委員管理。並令張掖山丹東樂撫彝酌量協濟車馬。其夫馬口分。由局按站酌發。能否照辦。著左宗棠穆圖善酌度具奏。各省應解成祿協餉。前已諭令戶部查明咨催。該提督請令山西委員分催各省。徒滋紛擾。其請在烏綏設局轉運一節。綏遠現有防勦事宜。烏里雅蘇台亦有賊匪竄近。臺站阻隔。自顧不遑。豈能代為轉運。所請著毋庸議。

將此由五百里各諭令知之。○追予安徽壽州殉難訓導潘俊祭葬世職。眷屬人等分別旌卹如例。○甲戌句到朝審情實罪犯。停決斬犯一人。絞犯二人。餘三人予勾。○乙亥。諭內閣。本年各直省辦理秋審人犯。經刑部由緩決改情實者。四川直隸兩省。均至七起之多。該督等並臬司於秋讞重犯。未能詳審覈議。均著交部查明分別議處。嗣後各將軍府尹督撫等。務當督同所屬。遵照定例。酌覈案

情。悉心究擬。固不可失之刻覈。亦不可惑於救生不救死之說。故從輕減總期執法持平。無枉無縱。用副明慎用刑至意。將此通諭知之。○又諭御史吳鳳藻奏。明儒呂坤所著實政錄。最為吏治鍼砭。現江南北浙江等省。均開書局。請飭刊刻等語。著該省督撫於刊刻經史之餘。接刻呂氏實政錄。廣為流布。俾收實效。而飭官方。○諭軍機大臣等。劉嶽昭岑毓英奏。官軍攻克永北等廳州城。地方一律肅清。現籌進剿一摺。永北鶴慶鎮南三城。現經克復。大理賊勢已孤。亟應乘勝追攻。迅殲醜類。即著劉嶽昭岑毓英飭令李維述等各率所部兵勇。迅速前進。將大理府城及賊踞處所。以次剋期攻拔。毋稍遲緩。已復各城。務當慎選廉能之吏。將善後事宜妥為經理。一面斟酌情形。派兵駐守。以期保衛地方。將此由六百里各諭令知之。○又諭錦丕勒多爾濟奏。賊匪撲陷烏城。並請飭撥餉銀。文盛

等奏催調馬隊赴烏會剿。暨請飭直隸山西發給征兵餉乾各摺片。賊匪四千餘人。於十月十九日。撲犯烏里雅蘇台。官兵未能抵禦。旋即失陷。覽奏實深憤懣。所有在城各官下落。著錦丕勒多爾濟查明具奏。逆匪現在盤踞附城遊牧地方。亟應厚集兵力。迅籌剿辦。前調察哈爾馬隊一千名。著文盛等飭令達爾濟。剋日管帶啟行。不准稍有遲誤。其備調官兵五百名。即著飭赴什巴爾泰博羅柴濟

地方。聽候調遣。定安仍遵前旨。於綏遠城槍隊暨東三省馬隊。酌量分撥。赴烏助剿。本日諭劉銘傳趕緊赴陝。將陝省北路邊內邊外各要隘。派兵扼紮。以便該將軍騰出兵力。續行撥兵赴烏援剿。著定安斟酌辦理。前令都興阿等將古北口撤回馬隊。截留二千名。取道張家口。赴援烏城。著即飭令迅速前進。毋稍遷延。惟所調各軍。須有大員統率。方能調度合宜。杜嘎爾向來帶兵。頗能得力。著即統

帶察哈爾馬隊先行前進。其綏遠城及吉林黑龍江調到官兵。均著歸該副都統統帶赴烏相機調遣。前調宣化大同兩鎮官兵各一千名。前赴庫倫防剿。現在烏城既失。庫倫情形亦屬喫重。著李鴻章何璟。迅即調派。剋期前往。該官兵經由軍臺行走。應需餉乾等項。並著寬為籌給。令其自行備辦。餵糧裹帶前進。需用鍋帳等項。一併備齊。以免沿途缺乏。直隸山西北境。並著李鴻章何璟。確加偵探。

先事豫籌。毋稍大意。巴里坤哈密兩處兵雖不多。惟烏城若被久踞。則關外各城愈形孤立。著文麟景廉伊勒屯何璟。酌撥得力官兵。星馳赴烏。以資策應。錦丕勒多爾濟此次未能攔截賊匪。姑念兵力較單。免其置議。該參贊現在退離數臺駐紮。著即調集蒙古官兵奮力進剿。迅圖克復。以贖前愆。此股賊匪究從何來。現在賊勢若何。並著迅速奏聞。棍噶扎勒參既願帶兵剿賊。並著催令前來協同。

大勦以資得力。錦丕勒多爾濟已咨庫倫先行協解餉銀五千兩。並請飭部再撥銀二萬兩。著張廷岳於戶部前撥銀十萬兩內解到時撥給銀二萬五千兩應用。如有不敷。並著先其所急。寬為接濟。福濟前請撥銀五十萬兩。已據戶部覆奏。由部庫撥銀二十萬兩。山東山西河南各撥銀十萬兩。臺站如有阻隔。前諭解至庫倫。由張廷岳等派員協解。此項銀兩如到庫倫。即著趕緊解往。並將借撥之銀扣還。以清款項。文盛等請將茶馬釐捐銀三萬餘兩。歸入軍需項下支放兵餉。著照所議辦理。將此由六百里加緊諭知都興阿。德英。定安。李鴻章。奕榕。毓福。文盛。杜嘎爾。何璟。錦丕勒多爾濟。張廷岳。阿爾塔什達。文麟。景廉。伊勒屯。並傳諭何瑄知之。○又諭。本日據錦丕勒多爾濟奏。烏里雅蘇台賊勢猖獗。於十月十九日竄陷烏城。該逆現踞臨城。遊牧地方。兵力甚單。遽難攻克等語。該城將軍福

濟參贊大臣榮全尚無下落。情形極為危急。亟須厚集官軍。以資攻剿。劉銘傳現在行抵何處。著即統率所部。兼程前進。星速赴陝。於該省北路邊內邊外各要隘。分撥兵勇。嚴密布置。俾定安無後顧之虞。庶該將軍或可騰出兵力。派赴烏城。迅籌援剿。以殄寇氛。將此由六百里諭令知之。○以克復雲南永北。鶴慶鎮南。三廳州城。賞總兵官李維述。楊玉科。白玉翎管各一支。白玉搬指各一箇。大荷包各一對。小荷包各二箇。予陣亡千總楊本春。外委文占元。署把總伍榮光。蔡莽世職加等。○以雲南克復楚雄等城出力。賞參將趙發。遊擊張宗冬。李棟材。林守懷。馬步雲。楊福章。王永安。都司王正坤。守備張士進。千總劉興。巴圖魯名號。知府夏源。都司雷應山等花翎。知縣寶桀。曾等藍翎。餘加銜升敘有差。○追予廣東陽春等處陣亡紳弁楊聲瀾等暨勇丁六百七十一名分別賞卹如例。○蠲緩直

隸清苑滿城東鹿。晉清豐深。饒陽定。深澤。祁。青滄。鹽山。永年。肥鄉。廣平。吳橋。東光。靜海。南皮。慶雲。蠡。安。無極。棗城。河間。獻。平鄉。鉅鹿。甯晉。武強。高陽。肅甯。天津。邯鄲。成安。雞澤。磁。元城。南樂。安平。博野。甯津。西。十三州縣被擾。地方節年額賦有差。○丙子。諭內閣。陝甘學政周蘭奏保舉教職。請予獎勵等語。陝西乾州學正王時敏。品端學樸。三原縣教諭郭維屏。教士有方。同州府學訓導楊彝珍。課士勤能。

均著賞加國子監助教銜。以示鼓勵。○諭軍機大臣等。袁保恆奏。河運久廢。宜籌變通一摺。據稱近年以來。黃流北徙。屢議試行河運。迄無成效。因張秋運口高仰。旋挑旋淤。必俟夏秋盛漲。南船方可北渡。迨抵通交卸後。秋高漲落。空船不能回南。淹留繁費。擬為南北兌運之法。於東平臨清各建數倉。使東南漕糧。以五月前盡抵東平運倉。放船南返。另用剝船運至臨清交倉。再用北船常年輪運。由

臨清達通州。南船不過東平。北船不過臨清。而以山東河船接濟其間。以免濡滯勞費等語。漕糧為京倉要需。關繫至重。山東運道日久淤墊。亟宜設法變通辦理。著曾國藩。李鴻章。魁玉。張兆棟。張之萬。丁寶楨。按照袁保恆所陳各節。體察情形。悉心會商。妥議覆奏。原摺均著鈔給閱看。將此各諭令知之。○以漕運總督張之萬為江蘇巡撫。江蘇布政使張兆棟為漕運總督。奉天府府尹恩錫為江蘇布政使。候補三品京堂德椿為奉天府府尹。○以直隸永定河漫口合龍。開復道員李朝儀等降革處分。予道員祝塏優敘。○追予陝西陣亡提督劉松山於榆林府城建立專祠。總兵官文星明。遊擊李元芳。暨官紳團勇等一併附祀。○蠲緩陝西吳堡縣被旱地方舊欠錢糧。○丁丑。諭軍機大臣等。張廷岳等奏烏城被陷。庫倫防剿緊要。請飭催援兵一摺。庫倫與烏城本有犄角之勢。烏城既為賊陷。

則庫倫孤立無援。必須厚集兵力。以資防剿。前調宣化大同兩鎮官兵各一千名。前赴庫倫。卽著李鴻章。何璟。迅卽調派。並為寬籌餉。乾。催令剋期前進。交張廷岳等調度。毋稍稽遲。並將該官兵起程日期奏聞。前調達爾濟馬隊一千名。並古北口撤回吉林黑龍江馬隊二千名。及綏遠城槍隊。東三省馬隊。均交杜嘎爾統帶。赴烏勒。現在庫倫需兵孔殷。以上各軍。馳抵邊外。如賽爾烏蘇等處。應否

酌撥若干。留庫助剿。著張廷岳等與錦丕勒多爾濟斟酌軍情。妥籌調遣。此時察哈爾綏遠城所調各兵。想定安。文盛等。於接奉前旨後。必已迅速調派。卽著催齊各軍。由杜嘎爾統帶。星馳前進。不得稍涉遷延。錦丕勒多爾濟。退離數臺駐紮。日來蒙古官兵。能否調集。棍噶扎勒參已否帶兵前來。現在賊勢若何。並著隨時具奏。文麟。景廉。伊勒屯。何瑄。仍著懍遵前旨。酌撥得力官兵。赴烏策應。張廷岳

等現擬設措銀兩。解交錦丕勒多爾濟。以應要需。尚屬力顧大局。著照所請辦理。俟山西餉銀解到。再行如數歸還。部撥烏庫餉銀。已諭順天府。迅卽起解。惟恐到尚需時。文盛前請將茶馬釐金銀三萬餘兩。歸入軍需項下。支放兵餉。已允其請。著卽於此款內先撥一二萬。解赴庫倫應用。俟部餉到後。卽行劃抵。科布多。逼近賊氛。據張廷岳等片稱。巴爾魯克厄魯特。已勾結賊匪。意圖分竄。科城防務

緊要。奎昌。文碩。務當嚴密遏堵。毋稍疏虞。棍噶扎勒參。現在何處。並著奎昌等。催令剋日赴烏勒。賊邊外賊勢猖獗。臺站梗阻。定安。文盛等。總當多發偵探。務得賊情。隨時具奏。巴爾魯克厄魯特。有通匪之說。著張廷岳。阿爾塔什達。錦丕勒多爾濟。檄飭扎薩克圖汗。撫諭各部。落。隨同官兵。實力剿除。以安反側。庫倫情形。喫緊。著錦丕勒多爾濟。會同棍噶扎勒參。將由烏竄庫倫。並恰克圖兩道。扼要堵

禦母任東竄。張廷岳於各路官兵未到以前。務就現有兵力。嚴密布置。並發連環偵探。隨時奏聞。張廷岳等另片奏。俄國界連烏城。宜防侵占等語。不為無見。現在調兵集餉。迅赴戎機。在事諸臣。果能立功邊徼。克復地方。則後患自絕矣。將此由六百里諭知李鴻章。定安。文盛。杜嘎爾。何璟。錦丕勒。多爾濟。張廷岳。阿爾塔什達。奎昌。文碩。文麟。景廉。伊勒屯。並傳諭何瑄知之。○山西巡撫何璟奏報出省巡防日期得旨。匪蹤既竄至綏德境內。距晉不遠。刻下冰橋凝沍。著督飭在防將士實力扼堵。毋稍疏虞。

大清穆宗繼天開運受中居正保大定功聖智誠孝信敏恭寬毅皇帝實錄卷之二百九十四

[illegible]

同治九年庚午閏十月戊寅諭內閣蘇鳳文

奏官軍由越南凱撤入關一摺。廣西逆匪吳亞終等由太平竄擾越南。經廣西提督馮子材親統大軍馳往勦辦。當將首要各逆殲除淨盡。並於河陽地方搜剔逸匪。越南境內一律肅清。該提督業於本年七月間振旅入關。其所帶勇丁亦經分別撤留。妥為安置。廣西提督馮子材督軍勦辦將此股賊匪悉數蕩平。實屬調度有方。深堪嘉尚。馮子材前已賞給騎都尉世職。著加恩再賞一雲騎尉世職。

各府所屬尚有伏莽務當實力捺除毋留餘孽廣西邊境如有應防處所並着斟酌情形撥兵駐守保衛地方蘇鳳文所陳善後十三條尚有可採該撫卽督率地方文武實力舉行不得徒託空言有名無實蘇鳳文俟善後事宜辦有頭緒着卽來京陛見將此由五百里各諭令知之○以擅殺武弁廣西知州劉深革職訊辦○旌表守正捐軀陝西興平縣民婦張章氏○己卯諭軍機大臣等前據張

之萬奏會審兇犯張汶詳堅不吐實設法研訊等語現已五旬之久尚未據將審出實情具奏此案關繫重大豈可日久稽延曾國藩此時計可抵任著卽會同魁玉張之萬督飭承審各員趕緊嚴切訊究以期水落石出固不可任其狡展亦不得以犯無口供將不相干涉之案牽混定讞總期設法審出實情方准定案時金彪及新市鎮軍犯曾否解到究出確情該督等如訊有端倪並着先行具奏

將此各諭令知之○又諭金順奏官軍剿匪獲勝情形一摺王家疇日久未下通昌等堡踞回及南路馬家灘一帶竄匪時欲乘間滋擾牽掣官軍現經金順會同張曜派撥兵勇分路剿擊已將南北兩路賊巢攻毀擒斬甚多余逆一股亦被石背防軍擊敗卽着金順飭令劉廷等迅將敗竄各匪悉數殲除毋令漏網一面會商張曜嚴檄前敵各營並黃金山一軍乘王家疇踞匪勢孤之時迅速進剿

趕將賊寨剋期攻拔毋得遷延觀望日久無功該逆被剿窮蹙難保不伺隙竄出金順務當嚴密布置將此股賊匪就地鏟除以杜紛竄將此由五百里諭令知之○予甘肅王家疇陣亡守備田世君祭葬世職加等○庚辰諭軍機大臣等御史張景青奏會匪根株未絕敬籌解散安插之法一摺湘潭等處會匪滋事雖已立時撲滅而根株未絕仍恐暗長潛滋且散勇無歸者東南各省所在皆有西

北等省近年亦屢有潰散滋事之案若不豫籌良法解散安插無以消患未萌張景青所陳責成紳士約束族正勸諭並令舊日主帥保舉差委復擇無主荒田招徠開墾收繳鄉團軍械暨將土匪游勇搶劫之案仿照直隸等省現辦章程嚴行懲創各條係為思患豫防起見尚屬可採着各直省督撫各就該省情形斟酌機宜妥為籌辦總當實力實心期有成效不得粉飾因循一奏了事至散勇為

患總由綠營廢弛。兵力不強。不能鈴制。致桀
驁不馴之輩。敢於肆行。張景青所陳。尚是治
標之論。此時正本清源。必以整頓營制為第
一要務。並着該督撫等。悉心籌議。講求訓練
之方。力振虛弱之弊。庶營制日有起色。匪徒
聞風斂跡。曲突徙薪。較為得其要領也。原摺
着鈔給閱看。將此各諭令知之。○又諭李鴻
章奏調撥官軍馳赴庫倫一摺。烏城失陷。庫
倫防勦緊要。李鴻章現已遵旨於宣化鎮練
軍內挑撥馬隊營官兵二百名。步隊兩營官
兵各四百名。共成一千名。籌給三箇月餉。乾
並備辦帳房鉛藥等項。飭屬應付車輛。分起
起程。此項官兵口糧。業由該督寬為籌給。以
示體恤。其應需軍械。必須選擇精利合用者。
按名發給。着李鴻章文盛飭令王可陞遵照
辦理。口外素乏知兵大員。王可陞久歷戎行。
卓著戰功。於軍務甚為熟習。着即派該總兵
管帶此項官兵。前往庫倫協同防勦。以資得

力。即由文盛就近傳知該總兵。懍遵諭旨。剋
期整頓啟行。毋稍延緩。該官兵奉調出口。裹
帶糧餉軍裝。自應由各臺站酌給駝隻。接替
運送。俾利遄行。應如何分起行走。及沿途如
何豫備駝隻。著文盛悉心酌覈。妥速備辦。並
著選派熟悉情形之蒙古嚮導。指引該官兵
前進。庶免迷失路徑。致多紆折。此項官兵抵
庫後。即着歸張廷岳等節制調遣。每月應領
餉乾軍火。着張廷岳等查照定章。接續支發。
毋令短缺。直隸西北邊境。及察哈爾所轄地
方。仍着李鴻章文盛勤加偵探。妥為防範。烏
城近日情形。暨庫倫防勦事宜。着張廷岳等
隨時奏報。將此由五百里各諭令知之。○辛
巳醇郡王因病續假。以睿親王德長署正黃
旗領侍衛內大臣。正黃旗蒙古都統載容署
正黃旗滿洲都統。○壬午諭軍機大臣等。倉
場侍郎奏船夥刦犯逞兇。請飭嚴拏。並請將
偷米匪徒隨時查拏各摺。片。本月十三日把

總泰兆年拏獲偷盜漕糧駕掌羣子一名該船夥王洪兒等膽敢逞兇持刀將泰兆年及巡役趙淩砍傷並將羣子刳去均各逃散實屬藐法已極着步軍統領衙門順天府五城遶派幹役迅將刳犯傷官之王洪兒周生兒王松林崔斜眼並偷米人犯羣子一併嚴拏務獲送交刑部按律懲辦不准一名漏網至沿河一帶積慣偷米匪徒必應隨時認真訪拏着步軍統領衙門嚴飭營汛各官務將該

處著名匪徒實力查拏解交該衙門訊究以儆兇頑原摺片着分別鈔給閱看將此各諭令知之○又諭給事中劉秉厚等奏前任兩江總督馬新貽被刺一案近聞派審之員以數月之久尚無端緒遂藉該犯游供含混擬結該犯初被獲時即有養軍十日用軍一朝之供其為必有主使毫無疑義請飭嚴行審訊等語昨因此案日久未結諭令曾國藩等督飭承審各員趕緊訊究着曾國藩魁玉張

之萬懍遵前旨速將此中主使情節逐細徹底根究毋得附會游供含混了結致干重咎原摺着鈔給閱看將此各諭令知之○以浙江東陽撲滅土匪予署知縣黃文登署都司劉應桂優敘○癸未諭內閣英桂奏甄別庸劣各員請旨革職一摺福建候補同知王脩業嗜好甚重遇事招搖候補知縣韓慶麟操守不謹專事鑽營前署彰化縣任內措置乖謬聲名狼藉該二員均着革職永不叙用王

脩業並卽勒令回籍不准在閩逗遛嘉義縣知縣章覲文玩視公事聲名平常着卽行革職以肅吏治○諭軍機大臣等前因船政緊要諭令沈葆楨守制百日後照常經理茲據文煜英桂奏稱沈葆楨具呈固辭謂前丁母憂時奉署理江西巡撫及總司船政之命籲懇終制皆邀允准並引李鴻藻從前丁憂之事仍請終制等語該前撫恪守禮經陳情終制原屬出於至誠惟在籍辦理船政仍可素

服從事。非奪情釋服者比。李鴻藻侍從禁廷。亦與沈葆楨情形不同。該前撫丁母憂時。船政尚未動工。辦理本可從緩。故即允其所請。此時船政正在緊要。沈葆楨經理有年。辦有成效。若半途而廢。設有參差貽誤。關係非輕。是總理船政事尤重於墨經從戎。着文煜、英桂傳知沈葆楨仍遵前旨。於百日後將船政事務照常經理。事非有悖禮經。毋再拘泥。因辭朝廷。因船政牽涉洋務。未便明降諭旨。宣

布。諒沈葆楨必能領會也。將此各諭令知之。○又諭昨因烏城失陷。北路軍情緊要。諭令神機營王大臣撥兵前赴察哈爾等處扼守。茲據神機營王大臣奏稱。選派馬隊官兵五百名。擡槍隊官兵四百名。槍礮隊官兵八百餘名。並以副都統成明為總統。帶領前往。擇要布置等語。所籌均屬妥協。即着照所議辦理。該官兵到張家口後。應如何將步隊在關扼紮。馬隊分駐關外。作為偵探遊擊之師。俾

昭嚴密之處。着文盛與成明商酌情形。妥為調度。嗣後一切布置防守及應行具奏事宜。即由文盛與成明會同辦理。前疊諭都興阿等將古北口撤回之吉林馬隊二千名內。挑選一千名。與黑龍江馬隊一千名。即行截留。前赴烏里雅蘇台援剿。此項馬隊如甫經出關。着玉亮、古尼音布查明該官兵無論行抵何處。除將黑龍江一千名即行截留。其吉林馬隊二千名。着玉亮、古尼音布會同該省帶

隊官挑選一千名。飭令一併折回。取道張家口。歸杜嘎爾統帶。即赴烏城。以昭迅速。不必俟到奉天後再行折回。前令杜嘎爾統帶察哈爾馬隊先行前進。着恪遵前旨。星速趕行。毋稍遲延。其吉林馬隊挑賸之一千名。仍令撤回該省。此項官兵馬匹恐多疲乏。着文盛先行備出廐壯馬二千匹。俟該官兵到口時。酌量撥換。其器械藥鉛等件。如有不敷。着文盛查明。知照神機營王大臣酌給。黑龍江官

兵分起行走。如有由草地徑行歸伍者。仍着德英查明若干名。照數挑撥赴烏。以符原撥一千名之數。將此諭知神機營王大臣。由五百里諭知都興阿。德英奕格毓福文。威杜嘎爾。玉亮並傳諭古尼音布知之。○追予江蘇各屬陣亡殉難布政司理問銜張灝等紳民婦女一千七百六十四員名口分別旌卹如例。○甲申。諭內閣。丁日昌奏本年夏秋間江蘇各屬應試諸生多有勾串牙行船戶包帶

私貨多船連檣闖關逞兇抗稅請旨嚴禁等語。私貨本干例禁。闖關抗稅尤為法所必懲。且三載實興掄才大典。該士子身列膠庠。即備他日賢良之選。宜如何束身自愛。整飭廉隅。若如所奏勾串牙商包攬客貨恃眾抗稅。惟利是圖。非特稅課有虧。實為士林之玷。着該督撫剴切曉諭。嚴行禁止。嗣後鄉會試文武舉貢生監人等赴京赴省應試。概不准包攬客貨私鹽等項。儻仍敢故違例禁。闖關抗

稅。即着嚴密查拏。先將士子扣考。船戶嚴懲。照例分別究辦。以端士習而重國課。該督撫即將此諭勒石河干。永為定例。○又諭四川學政鍾駿聲奏報舉教職舉貢請予優獎等語。四川雅州府學教授王懋昭江北廳學訓導陳文炳江津縣學教諭周允新實心教士射洪縣舉人在籍主事胡文魁著述宏富。中江縣貢生黃世喆篤志力行。羅江縣布衣計恬中江縣布衣劉開蒙文行兼美。王懋昭胡

文魁均着賞加五品銜。陳文炳周允新黃世喆均着賞加國子監學正銜。計恬劉開蒙均着賞給國子監典籍銜以示獎勵。○諭軍機大臣等。定安奏遵撥官兵赴烏會剿並陳歸綏軍務喫緊情形。請飭劉銘傳撥兵扼紮纏金。暨參帶兵侍衛各摺片。烏城失陷後北路需兵孔亟。定安現派參領貢果爾統帶所部察哈爾馬隊二百五十名。由達拉特旗星夜來綏。馳赴哈爾尼敦推河一帶查探匪蹤。相

機截勦以蒙兵赴援蒙境自可得力且係杜
嘎爾舊部兵將相習呼應較靈卽着該將軍
催令迅速前進沿途探詢與察哈爾隊伍合
兵一處歸杜嘎爾調遣以一事權至前調吉
林黑龍江馬隊向歸副都統富勒琿統帶駐
扎後套纏金一帶定安奏稱纏金為諸軍糧
運總匯之區此時磴口石嘴山一帶時有賊
蹤陝回又有欲竄後套之信若遽將此軍撤
動設該逆乘虛北竄不獨糧運梗阻卽包薩
一帶亦必震動等語自係實在情形前有旨
令劉銘傳撥兵扼紮北路要隘現在邊外望
援甚亟不可不設法籌撥着劉銘傳迅派大
支勁旅由靖邊安邊一帶取道甯條梁馳赴
纏金扼要屯紮以保糧源定安俟劉銘傳派
兵到後卽飭富勒琿統帶所部馬隊一千二
百名取道烏拉特旗馳赴烏境助勦綏遠至
烏城道里若干有無臺站並統道處所着定
安迅卽查明詳晰具奏並繪圖呈覽錦丕勒

多爾濟於援兵未到以前務當督率蒙兵妥
籌防勦仍將賊勢軍情隨時馳奏侍衛福全
管帶神機營馬隊寬嚴失當不洽眾情不得
因尚無劣蹟稍事姑容着撤去管帶官並撤
銷二品頂帶飭令回京當差以示懲儆將此
由六百里各諭令知之尋定安奏綏遠地方
與烏城所管軍臺相距尚遠自歸化城至烏
城共五十四臺計四千五百餘里此外別無
繞道處所謹繪圖呈覽報聞○又諭曾壁光
奏提督赴任分別籌辦軍務一摺提督周達
武奉旨接辦援黔軍務曾壁光擬俟該提督
到黔接印後卽令馳赴下游與席寶田籌商
機宜或進規凱里或由重安南渡以收夾擊
之效酌派提督林從太管帶兵練二千接防
貴定總兵何雄輝帶領所部由定番出勦期
與劉士奇等軍分歸都勻八寨所籌均尚妥
協卽着崇實吳棠催令周達武剋期馳赴本
任接辦下游軍務會同楚省各營將梗化逆

苗次第埽除。以靖疆圉。前已有旨。軍營緊要機宜。准周達武會同曾壁光列銜具奏。黔省帶兵各員。遇有應勦應防事宜。悉聽周達武調遣。業已優予事權。曾壁光此次所陳。慮及下游各屬意見參差。所見亦是。並著照所請。周達武着幫同曾壁光辦理軍務。所有下游府廳州縣。悉歸該提督節制。所帶原部兵勇。及將來酌留唐炯等營文武各官。卽由周達武咨明崇實吳棠。查覈奏報。其林從太等防

勦各營。係屬黔省自募之軍。其營制餉需。卽照曾壁光所議。仍按該省舊章辦理。該撫惟當力籌接濟。毋令缺乏。並檄令聯絡川楚援軍。通力合作。以壯聲勢。經此次布置。後崇實吳棠劉崐曾壁光務當分飭各營。妥為防勦。以竟全功。毋再如前觀望。致滋貽誤。唐炯前致席寶田函內。有川中月協黔餉五萬。歸黔自辦。聞黔中意甚欣然等語。曾壁光謂當時並無此意。唐炯之言。從何而來。必須各還根

據。著崇實吳棠飭令唐炯明白登復。卽行查覈具奏。以懲虛誣。嗣後該將軍督撫等總當力顧大局。不得惑於浮言。致軍務稍涉鬆勁。將此由五百里各諭令知之。尋奏唐炯以傳聞之語。形諸函牘。殊屬非是。惟係私函往來。且該道已於移師平夔案內。摘去頂帶。此次可否免其置議。得旨。唐炯著免其置議。○追予江蘇各屬陣亡殉難訓導潘兆田等紳民婦女一千六百七十九員名口。分別旌卹。如

例。○丙戌諭軍機大臣等。內務府奏請飭迅速撥款一摺。據稱。淮江南織造呈稱。大婚應用粧閃緞匹。估需料工銀十二萬兩。繡緞等項。估需料工銀八萬六千兩。復因無從籌款。奏請將紗地各件。並裝盛解費。共需之三萬兩。於明春找解。本年卽先解銀五萬六千兩。嗣僅解到織辦粧閃緞匹款內銀八萬兩。繡款內銀二萬餘兩。若同時分辦。勢必均有貽誤。已將解到之繡緞二萬兩。那辦緞匹。而繡

緞等項卽無款可用請飭迅速籌撥等語著
曾國藩張之萬嚴飭藩運兩司於應撥前項
各款銀兩無論如何籌措迅速如數撥解該
織造以便剋期織辦毋再遲延將此各諭令
知之○又諭文盛杜嘎爾奏遵飭察哈爾馬
隊赴烏協勒杜嘎爾奏催齊各軍統帶前進
張廷岳等奏請飭催宣化大同官兵各一摺
據文盛等奏稱察哈爾右翼馬隊五百名飭
令達爾濟管帶先行起程左翼馬隊五百名
接續進發並籌備駝隻等項俾利軍行所籌
均尚周到著卽飭達爾濟管帶該官兵剋日
啟行相機進剿毋稍稽遲前疊諭都興阿等
截留吉林黑龍江馬隊二千名歸杜嘎爾統
帶何時可以到口著杜嘎爾迅催此項官兵
到齊卽行統帶前進刻下天氣嚴寒軍士遠
道出征朝廷深為廬念該副都統務當妥為
拊循勉以忠義沿途經過地方尤應認真約
束毋任滋事庫倫需兵甚急前諭李鴻章飭

王可陞管帶宣化練軍一千名前往庫倫協
同防剿著該督飭令星速拔隊前行所調大
同鎮兵一千名著何璟懷遵疊次諭旨迅卽
調撥派委得力將弁管帶馳赴庫倫官兵早
到一日人心早安一日不可稍涉延緩致誤
戎機此項官兵到口時每起分撥二百名間
日出口以期臺站應付一切較為便捷此次
先後調撥官兵五千名需用駝隻甚多文盛
等擬由商都等處調撥外由錫林郭勒十旗
每旗借用駝三百隻著理藩院飛飭錫林郭
勒盟長會同該都統等委員妥為辦理趕緊
撥解以應要需馬隊臨敵衝鋒全賴得力馬
匹著張廷岳阿爾塔什達轉飭喀爾喀等部
落速撥騰壯馬三千匹先期解交庫倫妥為
牧放以便官兵到時應用藉資進剿惟喀爾
喀等部所撥馬匹恐難如數著文盛於各馬
羣內仍當寬為籌備以利進行近日烏城賊
情若何張廷岳等隨時探明奏聞並著將籌

辦一切情形。知照錦丕勒多爾濟。以壯聲援。至大軍進剿。兵食最關緊要。口外均非產糧之區。自應在察哈爾安設糧臺。以資轉運。惟該衙門差委乏員。著李鴻章卽飭口北道酌派委員。赴口設立糧臺。所有征兵糧餉。並採辦乾餼。及需用軍火等項。責成派出之員專司其事。應需銀兩。並著李鴻章籌款撥給。奏明辦理。將此諭知理藩院。並由六百里諭令李鴻章。文盛。杜嘎爾。何璟。張廷岳。阿爾塔什。

達知之。○命前任荊州副都統薩薩布。馳赴綏遠城。交將軍定安差委。撥部庫銀二十萬兩。解赴察哈爾。以備軍需。○緩徵吉林甯古塔三姓。琿春。被旱地方。新舊額賦。○丁亥。以神靈顯應。頒湖北荊州府。

江神廟扁額。曰金隄保障。沮漳二神祠扁額。曰安流福佑。○諭軍機大臣等。神機營奏折。回吉林。黑龍江馬隊。請整備軍械。行裝。並酌給餉乾。一摺。此項馬隊。遠

道從征。情形困苦。自應優加體恤。前諭玉亮古尼音布。查明該官兵行抵何處。除將黑龍江一千名全數截留外。其吉林二千名。挑選一千名。均飭折回。取道張家口前進。惟該官兵軍裝行糧等項。亟應料理。前諭文盛等籌備。深恐有稽時日。茲據神機營王大臣奏稱。該官兵困苦已極。須倍加調劑。方可期其勇往。著玉亮古尼音布。於此項官兵折回時。卽飭改赴昌平州地方駐紮。並著神機營王大臣。

臣派員前往照料。所有應發衣裝器械鞍轡及糧餉等項。卽照該王大臣所擬妥為籌給。該王大臣請由部撥銀六萬兩。已諭令戶部如數撥給矣。該官兵現由錦州山海關一帶折回。勢必資斧不繼。著玉亮古尼音布先行設法籌款。每名酌給銀一二兩。俾資接濟。所籌之款。卽報明神機營。在於部撥項下歸還。該官兵馬匹疲乏。恐已不堪乘騎。著古尼音布於大凌河牧羣內。挑選臚壯馬二千匹。換

給該官兵應用如該官兵尚未出關著古尼音布即將此項馬匹解交神機營毋稍遲誤惟調撥援剿烏城之兵需馬尚多著德英於黑龍江地方設法勸諭捐輸馬匹備用俟捐有成數奏請獎勵將此諭知神機營王大臣由六百里諭知德英玉亮並傳諭古尼音布知之○又諭前據袁保恆奏各省關應協陝甘軍餉截至十月止積欠一千三十餘萬請飭飛速籌解並請於各省京餉項下暫行通那或於海關洋稅內的提協濟以數一月足餉之用等語當交戶部速議具奏茲據奏稱部庫正項無存需用甚急京餉勢難通那洋稅專備要需亦難動撥擬於各省積欠軍餉內先行提撥山西十萬兩河南十萬兩四川十萬兩廣東十萬兩山東五萬兩湖北五萬兩江蘇五萬兩浙江五萬兩即照所議著各該督撫嚴飭藩司迅速如數籌撥限於年內解交西征糧臺此係立候應用之款儻逾限

不解即由左宗棠指名嚴叅陝甘軍餉緊要各省關於撥定之款竟至積欠如許之多嗣後務須按月如數報解不准延欠其以前欠解月餉仍著陸續補解以資接濟將此由五百里諭知曾國藩左宗棠魁玉李瀚章瑞麟英桂吳棠何璟李鶴年李福泰丁寶楨郭柏蔭張之萬楊昌濬並傳諭袁保恆知之○又諭蔣志章奏草地逆回竄入陝境兇勦獲勝現調官軍力顧河防劉銘傳奏迅速赴陝並

渡黃情形各一摺懷遠逆回竄擾三道河等處經提督成鏡春等疊次擊敗其靖邊一股聞我軍獲勝即由貓兒灣陳里川逸去該逆復由懷遠後山竄至綏德之吳家山分擾清澗安定等處官軍截擊疊有斬擒著蔣志章督飭各軍實力揔捕將此股賊匪殲除淨盡務絕根株吳堡清澗延川延長宜川一帶濱近黃河現屆冰橋凝沍處處可通亟應防賊偷渡而宜川之龍王辿尤關緊要蔣志章即

檄飭王名滔等嚴密布置防勦兼施以扼該逆竄晉之路。何璟現已出省履勘河防。著卽督飭在防各軍認真守禦。毋令該匪闖入晉疆。定安務於沿河一帶勤加偵探。遇有東竄之賊卽派兵會合攔勦。迅掃逆氛。昨諭劉銘傳迅派大支勁旅由靖邊安邊一帶取道甯條梁馳赴纏金扼紮。卽著該提督兼程赴陝。速行派隊扼守纏金以保糧源。其餘邊內邊外各要隘並著統籌全局擇要布置毋稍疏虞。將此由五百里各諭令知之。湖廣總督

李瀚章陛見以湖北巡撫郭柏蔭兼署湖廣總督。○以陝西北路肅清並克復甘肅靈州城出力賞提督尹興茂總兵官賀大光沈先梅鍾興祿陳鳳翔胡在朝李協和張忠武。臣義忠成呈清賀志高鄧泰志張振壽蘇懋林蕭萬和彭福勝舒榮翼副將魏承瑞夏得勝李恆春陳建厚曾叙友廖得勝易林發文仁福彭臣功周萬勝陳元騏顏昌燦魏金闡周

春生左大源彭其麟鄧勝友趙寶林劉廣昌李有成羅雲貴李添順張富益盧榮陞榮雲勝蔡榮貴黃必慶蕭紫元蔡玉和易福政楊炳南李湘桂周受殷王正祥劉蘭亭余占魁彭明海錢有德尹德芳協領花良阿委參領吳俊吉陞阿參將戴雲正沈玉林李有勝宋祥發李春和蕭拱照方正興喻少還楊必耀甯仁備羅福棠鄒光裕雷貴財李秀吉楊友慶湯秀齋周良驥陳發林陳義和譚仁義陶

國安舒安仁李位得劉信玉殷有元羅化龍黃勝發張錦臣楊景德樊有勝胡世貴周恆陞彭禎祥朱正和姜明山胡文道吳恆山郭嵐雲廖勝山黃仁傑舒培仕黃復履劉春岐蕭意發吳雙泉趙連陞劉兆元傅從雲溫長集成芝美鄧興隆周有重曾義勝周盛友彭星政彭瑞春陳慶泰張貴和劉德喜錢寶鍾遊擊陳必達丁選正張輔文張明月蔣益安宋有貴彭春志吳朝坤劉森勝楊明黻屈傳

秀廖大宗吳秀銀葛致清譚洪發曾傳禮潘鳳翔陳煥榮章柏濤劉國斌張錦文呂桂華劉福春何西就王鉞安馮元陞蔣國玉李明成知州李樹棠知縣武條箴都司張美步湯仁和李克常易行善古茂成王榮誥朱凌雲焦國興盧國太湯月福賀長發尹意麟陳得勝龍春華汪友高易榮昌郭大勝黃鯉庭陳長春袁昭喜萬勝常田玉蘭周玉清羅金福陳雲祥蔣雲龍李正元胡振行劉清和歐陽

勝丁金廣賀國恩舒榮貴黃連陞李成金蕭其勝守備張世文孫忠祿胡英傑何觀光千總湯廷幹巴圖魯名號總兵官王品俊同知劉鼎等花翎都司張祥雲等藍翎餘加銜升叙有差○予陝西三道河陣亡都司鄧茂盛祭葬世職○撥部庫銀六萬兩解交神機營備用○戊子諭軍機大臣等傳諭太常寺少卿王家璧前因兩江總督馬新貽被刺身故疊經諭令魁玉張之萬嚴切根究並令曾國

藩到任後督飭審訊務得確情茲據王家璧奏稱此等兇徒志在必死甚或扳扯問官希圖挾制不敢窮詰致多畏葸瞻徇並稱此案頗有傳聞等語馬新貽被刺一案據魁玉等奏張汶詳子女等到案後供詞尚屬支離自係因一時未得實供不能奏結案關重大謠傳必多該京卿如確有所見即著據實詳細奏聞不得以傳聞無據之詞率行具奏致開誣訐之端○又諭英翰奏津案暫結隱憂方

大敬陳籌備事宜一摺津案雖已了結而蓄艾卧薪之志不可一日或忘疊經諭令沿海沿江各督撫力戒因循網繆未雨並因直隸江南為南北洋總匯以曾國藩李鴻章分任其事該督等為國家股肱心膂之臣想必能先事圖維講求實際此次英翰所陳天津海防宜設水陸提督擇威望素著之大將畀以斯任統其舊部作為提標兼轄海防水陸各營等語著李鴻章斟酌機宜妥議具奏至所

稱銘軍西去。幾輔空虛。請將淮軍調駐海口。並令沿江沿海暫緩撤防。嚴行戒備。以杜窺伺等語。著曾國藩李鴻章會商妥議。實力辦理。該撫又以日本籲請通商。恐貽後患。殷殷以杜絕為請。此事因該國嚮化甚堅。業已令其特派大員到時。再與妥議條約。自無再事拒絕之理。至將來如何明定章程。以期永遠相安之處。並著曾國藩李鴻章豫行妥籌。詳晰奏明。庶臨時較有把握。本日又據王家璧奏修備設防。所以長保和約。請宣諭各國。毋庸疑慮。一摺。另片奏和不可恃。不可一日忘備等語。自古保邦致治。斷無畏敵國生疑。自弛武備之理。況中國增修戰備。力求自強。亦豈外國所能阻止。惟在疆寄重臣。於練兵設防。增修礮臺。講求機器等事。實力奉行。毋徒託諸空言。庶不至貽笑於遠人耳。英翰王家璧摺片共三件。均著鈔給閱看。將此各諭令知之。○又諭都興阿奏遵旨截留官兵一摺。

吉林官兵現由威遠堡邊門截回二三百名。黑龍江官兵尚未報到。烏城軍務緊要。亟需兵力。著都興阿趕緊催齊。即遵前旨分別挑撥點驗。發給軍裝口糧等項。剋期分起。趕程前進。毋稍延緩。昨准神機營王大臣所奏。諭令玉亮等於此項官兵折回時。飭令改赴昌平州地方駐紮。聽候神機營王大臣派員前往照料。由部撥銀六萬兩。酌給該官兵衣裝器械鞍轡及糧餉等項。以利進行。如該官兵原帶器械未全。都興阿查點明確。仍著先行籌給。應繳前領整裝銀兩。加恩免其繳還。並著照該將軍所議。發給一月鹽糧。每兵各給皮襖一件。俾免飢寒。朝廷因該官兵遠道出征。加意體恤。都興阿務當激勵拊循。使知感奮。所需皮衣銀二萬有餘。准其提用洋稅銀二萬兩。俟部款撥到。即行歸還。昨已慮及該官兵馬匹疲乏。不堪乘騎。諭令古尼音布於大凌河牧羣內挑選臄壯馬二千匹。換給應

用並諭文盛張廷岳等寬籌馬匹留備出口
征兵之用當可藉資進剿將此由五百里諭
令知之○緩徵安徽舒城蕪湖懷甯宿松當
塗青陽宣城桐城望江桐陵繁昌無為和含
山五河泗十六州縣被水被旱被風被蟲地
方新舊額賦○已丑諭軍機大臣等有人奏
安徽婺源縣團練捐輸業於同治三年停止
至同治四年忽有劣紳程元瑞邀同紳士設
立捐局私刻關防勒民報捐迄今數年之久

捐輸約數十萬之多而所給執照止有公局
私刻圖記上有善後關防字樣並無在官印
信捐生無處更換執照紛紛聚訟請飭查辦
等語如果屬實亟應嚴切根究著曾國藩英
翰徹底詳查務令水落石出據實參辦毋稍
徇隱將此各諭令知之尋英翰奏遵查在籍
知府程元瑞因辦理善後工程收捐團費擅
用圖記給發執照雖查無抑勒侵欺情弊究
屬辦理荒謬應請革職從之○又諭左宗棠

奏官軍攻克賊寨情形暨覆陳賊竄米脂平
羅探報未確各摺片甘省中北兩路官軍自
攻克漢伯堡後雷正綰等接攻張家泉金家
堡賊寨獲勝劉錦棠等復合力攻破楊明堡
陣斬賊目楊洪開等多名正擬進攻王洪適
涼州大股賊匪繞竄圖援金積恐馬家河灘
各堡勾引援賊遂先將該處各小堡及附近
團莊一律埽除尚有兩大堡未下仍當趕緊
攻拔俾援賊失所憑依勒辦方易得手金積

現已合圍各處匪股乘隙來援總當加意防
範著左宗棠嚴飭前敵諸軍穩紮力攻以期
埽穴擒渠毋稍鬆懈並分檄各路將士扼要
堵擊毋任援賊竄近牽我兵力前竄米脂平
羅股匪據左宗棠覆奏探報未確不足為據
金積合圍實無一賊竄出十月以後花定等
處未據報賊蹤東竄陝西北山竄賊實亦無
多等語近據蔣志章奏報草地逆回竄至綏
德分擾清澗安定等處是竄陝之賊現尚陸

續踵至著卽飭令成定康等隨時兜勦力遏
狂氛平羅地方現雖無兵可撥如遇有緊要
軍情該大臣仍當妥籌兼顧竄入河西之禹
彥祿等一起左宗棠奏稱禹彥祿卽係余彥
祿之訛前已傷斃何以金順前後奏報王
軍情尚有餘彥祿在內著該大臣查明具奏
左宗棠另片奏遵籌成祿出關事宜等語前
因成祿已拔隊西行當諭該提督督軍駐紮
關外不得輕率前進仍著成祿懷遵本月十

一日諭旨擇要扼紮就近兼顧肅州該提督
營餉積欠甚多且川陝各勇不能得力成祿
著毋庸另募勇丁卽就現有兵力加整飭
與提督楊占鼇和衷共濟遇賊卽擊並辦理
屯田事宜該軍口糧已准提用張掖等處運
省倉糧成祿當知體恤民艱不准再有勒索
苛派等情致滋紛擾將此由六百里各諭令
知之○又諭金順奏北路防軍進剿踞匪暨
陝回夜援王疿另股乘夜南竄官軍先後截

勦獲勝一摺余逆馬賊回竄通昌一帶提督
劉廷等敗之於渠溝疿莊之賊復潛出糾合
陝匪並馬家灘遁出匪眾內外合撲官軍卡
壘各軍迎擊擒斬多名其竄踞王元橋迤東
一股亦經托雲佈等擊散寨賊雖已勢感惟
通昌一帶踞匪仍時出逆援牽掣官軍並據
擒賊供稱有欲赴中衛阻援河東各軍南路
糧道等情亟應先行撲滅著金順會同張曜
督飭各軍迅將此股逆援掃蕩並嚴堵該逆

來路以免內外勾結王疿一寨日久盤踞金
順雖疊報勝仗而該逆負隅如故援賊亦來
往自如豈能卽行得手金順務當會同張曜
激勵將士迅拔堅巢毋再遷延貽誤至逆首
余彥祿本日據左宗棠奏報卽係禹彥祿前
已傷斃是否卽係一人著查明具奏將此由
六百里諭令知之○以把持倉糧革甘肅知
縣胡韻蘭職○以甘肅好麥川等處勦匪獲
勝賞遊擊劉三元蔣柏高譚桂林巴圖魯名

號守備呂長樂等花翎餘加銜升敘有差予
陣亡副將蔣昌品守備胡連陞祭葬世職○
上以冬至祀

天於

圖丘自是日始齋戒三日○庚寅諭軍機大臣
等御史李宏謨奏安徽廣德等州縣客民廣
集劫奪頻聞強占田宅並造有會館私藏軍
器動輒聚眾地方官並不嚴辦江浙與皖南
毗連處所客民亦復不少恐彼此煽惑為患

不可勝言請飭妥為籌辦等語東南各省兵
燹之後地曠人稀各處遣散游勇所在盤踞
欺壓良民乘機滋事若不豫為防範必至愈
無忌憚著曾國藩張之萬英翰楊昌濬遴派
明幹大員前往各該州縣認真體察情形分
別良莠將安分守業之民量給荒田暫行耕
種俾安生業其強橫不法之徒查明原籍遞
回管束其實在無籍可歸者分別安置各州
縣另編保甲收繳軍械責成該管道府隨時

稽察儻敢滋生事端即行嚴拏懲辦以靖地
方原片著摘鈔給閱看將此各諭令知之○
辛卯諭軍機大臣等蘇廷魁奏部議會估張
秋築隄束水事宜現准張之萬來咨張秋南
北兩岸均隸東省應由河東河道總督及山
東巡撫委員勘辦惟此事前經漕臣委道員
章儀林會勘運道倡為此議現在察看情形
如欲築隄束水須就蘭工口門兩岸接續築
做方能一氣聯絡事關黃河改道仍復穿運
而行未敢率議舉行請飭漕臣帶同章儀林
來東會勘等語漕運總督前有旨令張兆棟
補授即著曾國藩張之萬迅速委員署理江
蘇藩司印務以便張兆棟早赴新任該漕督
即帶同章儀林剋期起程前赴山東會同蘇
廷魁丁寶楨體察情形覈實勘估熟商辦理
總須無害民田有益河運方為妥善將此各
諭令知之○又諭蘇廷魁奏豫籌來年修守
請添撥節省防險銀兩一摺據稱黃河北

兩岸各廳工程緊要來歲修守事宜必須豫
籌布置。方不至臨時掣肘。現在額款不敷。請
於歷年節省防險銀兩內。南岸各廳添撥銀
十四萬兩。北岸各廳添撥銀十二萬兩等語。
黃河南岸各工險要疊出自應寬為籌撥。著
照所請。於歷年節省項下添撥銀二十六萬
兩。著李鶴年督飭藩司。於年內先撥四成。以
便採購料物。其餘六成。務於春汛前撥發。俾
資接濟。該廷魁務當督飭該道廳等覈實動
用。總期工堅料實。不得稍涉虛糜。將此各諭
令知之。

大清穆宗繼天開運受中居正保大定功聖智
誠孝信敏恭寬毅皇帝實錄卷之二百九十五

大清穆宗繼天開運受中居正保大定功聖智
誠孝信敏恭寬毅皇帝實錄卷之二百九十六

監修總裁臣等謹將本年奉旨纂修實錄各條開列於左

理宗事係戶部主事加七級奉旨加七級紀錄二十

正統高麗使臣等上書一併奉旨加七級紀錄二十

學士等奉旨纂修實錄各條開列於左

加六級紀錄十九次奉旨纂修實錄各條開列於左

秋修

同治九年庚午十一月壬辰朔冬至祀

天於

圜丘遣豫親王本格恭代行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

裕陵

昌陵

昌西陵

慕陵

慕東陵

定陵○遣官祭

端慧皇太子園寢 停次日朝賀

上詣綏履殿問

慈安皇太后安平安室問

慈禧皇太后安至辛酉皆如之 奉

慈安皇太后

慈禧皇太后幸漱芳齋侍午膳○諭軍機大臣

等戶部奏遵撥東三省辛未年官兵俸餉並

請飭直隸等省籌解歷年欠餉各摺片奉天

吉林黑龍江三省辛未年應需俸餉現經該

部覈議除將各該省應徵之款儘數抵充外

所有奉天餘賸銀一萬六千餘兩卽著留為該省緝捕官兵經費短徵船規並加稅銀七萬二千餘兩著都興阿額勒和布著落經徵之牛莊防守尉海城縣知縣等名下勒限賠補並著查取職名送部叢議其指撥吉林之長蘆辛未年鹽課銀五萬三千七百兩山東辛未年地丁銀三萬兩河南辛未年地丁銀二萬兩指撥打牲烏拉之長蘆辛未年鹽課銀二萬五千兩河南驛站存賸銀一萬四千

一百三十六兩指撥黑龍江之長蘆辛未年鹽課銀六萬三千兩山東辛未年地丁銀四萬兩河南辛未年地丁銀三萬兩驛站存賸銀四萬兩直隸旗租銀五萬兩著李鴻章丁寶楨李鶴年按照各數迅速籌撥派員解交盛京戶部收納俟各該省銀兩解到卽著都興阿等知照德英奕榕毓福派員前赴奉天關領以資散放各項支放銀兩該將軍等務各遵照部定折放章程覈實辦理並將用過

銀錢於奏銷時照例題報其餘賸之銀卽著歸於下年請領時聲明備抵毋稍浮冒至直隸山東河南陝西歷年欠解東三省俸餉銀共一百九十六萬餘兩並著李鴻章丁寶楨李鶴年蔣志章迅卽督飭藩運各司陸續籌解奉天交納不得仍前延欠致誤要需將此各諭令知之又諭前因有人奏吉林葉赫站馬被搶並五常堡馬賊焚燒衙署各情當經諭令毓福飭屬嚴拏懲辦茲據毓福奏稱

葉赫站於本年七月間突有馬賊八十餘名闖入站街施放槍礮搶去孳生餘馬二十三匹並向鋪商勒索錢文逃竄邊外昌圖地界八月間伯都訥界大嶺四合城等處亦有盜匪聚眾游賭乘隙搶奪五常堡渴河地面復有盜首王澱英等各糾夥匪忽聚忽散該處官兵現在分護衙署錢庫等語吉林地方遼闊匪蹤出沒靡常按捕宜容稍懈風聞該處盜賊充斥肆意橫行該護將軍所奏站馬被

搶二十餘匹之多五常堡雖無衙署被燒之事而賊匪聚眾糾夥來往自如實屬不成事體雖經官兵拏獲多名正法而伏莽未淨滋擾時虞著奕榕毓福嚴飭所屬及派出官兵實力嚴拏務將著名各匪悉數殲除不准一名漏網並隨時督飭各卡官兵設法稽查毋令宵小涸跡仍按季派員前往奉省接壤處所巡查結報務期肅清地面以消奸宄而靖閭閻至安榮等被參各款著奕榕毓福會同

瑞聯迅速東公確查從嚴參辦毋稍迴護將此各諭令知之 調鑲紅旗蒙古副都統西蒙克西克為鑲白旗蒙古副都統 以甘肅甯夏解圍暨攻克賊巢出力予總兵官陳祥勝以提督簡放佐領富春以副都統簡放賞副都統世祿副將安萬全協領全陞參將黃萬發任開泰遊擊黃金堂吳金魁汪朝富王得魁王飛熊佐領薩凌阿舒英阿精格委參領莫爾賡額都司曹正興劉占魁羅永興紀

才俊葉金魁守備張元凱驍騎校凌寬烏凌阿千總李士明鄔鴻盛陳有華泰涵達鄭國發華文錦田國昌巴圖魯名號員外郎玉敏參將萬福等花翎通判張寶善等藍翎餘加銜升敘有差 癸巳諭內閣前因江北漕船阻滯當經諭令兩江總督等確查該糧道及委員等貽誤情形據實參奏旋據御史劉瑞祺奏江北漕船沿途售貨逗遛各節亦經戶部奏明該交該督撫等彙案參辦茲據魁玉

張之萬奏稱查明本年江北河運始因出口處天旱河涸裝兌較遲至行抵清江挽運尚速惟入山東境內因大泛郝山兩口及微山獨山等湖節節淺阻而鄆城縣之紅船口隄埝潰決安山張秋一帶挽運維艱加以今年黃水消落較早以致守候月餘並無卸貨逗遛之事該糧道王大經於東境河道情形未能熟悉漕船阻滯事出有因該糧道平日操守廉潔辦事認真請與委員等均免查議等

語本年江北漕船阻滯愆期既經該署督等查明實係人力難施尚非遷延貽誤糧道王大經及各委員等即著免其查議嗣後江北河運事宜該督撫等仍當飭令經手各員迅速辦理毋得再有遲誤○又諭魁玉張之萬奏審明謀殺制使匪犯情節較重請比照大逆問擬並將涉案人犯分別定擬罪名一摺據稱兇犯張汶詳曾從髮逆復通海盜因馬新貽前在浙撫任內勦辦南田海盜戮伊夥

黨甚多又因伊妻羅氏為吳炳燮誘逃曾於馬新貽閱邊至甯波時攔輿呈控未准審理該犯心懷忿恨適在逃海盜龍啟濬等復指使張汶詳為同夥報仇即為自己洩恨張汶詳被激允許該犯旋至新市鎮私開小押適當馬新貽出示禁止之時遂本利俱虧追念前仇殺機愈決同治七八等年屢至杭州江甯欲乘隙行刺未能下手本年七月二十六日隨眾潛進督署突出行兇再三質訊矢口

不移其供無另有主使各情尚屬可信等語馬新貽以總督重臣突遭此變案情重大張汶詳所供挾恨各節暨龍啟濬等指使情事恐尚有不實不盡若遽照魁玉等所擬即正典刑不足以成信讞前已有旨令曾國藩於抵任後會同嚴訊務得實情著再派鄭敦謹馳驛前往江甯會同曾國藩將全案人證詳細研鞫究出實在情形從嚴懲辦以中國法○諭軍機大臣等何璟奏遵派大同官兵赴

庫起程暨河保防務情形各摺片烏城失陷賊匪時虞紛竄庫倫兵單防勦甚屬緊要何璟現於大同鎮標內挑選官兵一千名備帶器械並籌動銀兩發給四箇月鹽糧分起啟行即著飭令統帶各員星速前進馳赴庫倫聽候張廷岳等調度毋得沿途濡滯致誤戎機河曲保德一帶冰橋已結亟應嚴密設防該撫尤當督飭派出各營與河西守慶一軍聯絡聲援妥為布置毋稍大意金積堡現已

合圍賊勢窮蹙。難保不突圍。鋌走。宋慶一軍。分紮皇甫川等處。與榆綏相距較遠。勢難兼顧。著蔣志章、劉銘傳分撥得力隊伍。力顧延榆綏一帶。保衛陝南。兼顧晉防。其沿邊內外及陝甘毗連處所。並著分布各軍。妥為防範。以免疏虞。將此由六百里各諭令知之。○追予江蘇銅山等處陣亡殉難監生高勤等紳民婦女六百五十七名口。分別旌卹。並入祠建坊如例。○緩徵兩淮富安、安豐、梁垛、東臺。

河垛、丁溪、草堰、劉莊、伍佑、新興、廟灣、板浦、中正、臨興、十四場被水地方。未完折價錢糧。○甲午遣官祭。

先醫之神。○乙未諭內閣。于凌辰奏查勘西陵樹株情形一摺。據稱海地內榆楊及四山松柏等樹。查係翦枝去皮。速之使乾。以為伐除變價地步。與原報回乾情形大相懸殊。請飭查辦等語。著派志和、胡家玉前往西陵詳細查勘。據實具奏。至于凌辰因上年未

能查出樹株情形。自請先行議處。著於查明覆奏時聲明。請旨。○諭軍機大臣等。李鴻章等奏遣撤各路官兵全數起程。請將放餘銀兩暫存備用一摺。前調駐防古北口之東三盟蒙古官兵及吉林黑龍江馬隊現已全數遣撤起程。庫克吉泰請將部撥餉項放餘銀兩暫存備用。著照所請。將此項放餘銀兩留存熱河道庫。以備緩急。仍將支放數目及騰存銀兩若干分晰報部。以備查覈。東三盟官

兵遠道跋涉情形困苦。著加恩賞銀一萬兩。由庫克吉泰於此項放餘銀兩內如數提撥。迅速解交各該盟按名散放。以示體恤。將此諭令知之。○以鑲黃旗漢軍副都統常順署鑲黃旗蒙古副都統。予四川巴塘殉難土司扎喜等賞卹如例。○丁酉諭軍機大臣等。左宗棠穆圖善奏賊竄涼州鎮番派兵勦捕並續赴平番布置城防一摺。甘肅古浪縣屬韓家莊堡有馬賊撲擾。經副都統常明率隊

擊退其由裴家營東馬家磨溝竄出之賊復經都司尹天祥調營馳勦斃賊多名官兵撤出溝口被援賊圍裹致副將謝元興等陣亡賊由土門擾及涼州圖攻郡城總兵王仁和督兵扼守賊向鎮番竄逃遊擊韓廷芝等各率兵勇迎擊斃賊甚夥餘賊奔往柳林湖一帶此股賊匪止有四五千名不難勦洗淨盡著左宗棠穆圖善嚴飭大靖上門各防軍會同涼州兵勇實力合勦務期一律芟除毋任延蔓至平番為蘭垣西路咽喉深慮柳林湖踞匪及西甯撒回河州踞逆分途旁犯穆圖善親赴平番督飭副將鍾本起等扼紮營壘分布守禦並著飭令在防各營嚴密堵遏力固省防毋稍疏懈將此由五百里各諭令知之○以江西捐輸團練永廣廣信府學額五名臨江府四名南康府一名龍南縣十名貴溪安義進賢三縣各九名上猶縣八名峽江萬安二縣各四名○以陝西延綏鎮總兵官

劉厚基捐輸軍餉永廣湖南耒陽縣學額二名以湖南提督楊鼎勳捐輸軍餉永廣四川成都縣學額一名予甘肅馬家磨溝陣亡副將謝元興守備傅永昌把總石中和潘水川外委夏景融祭葬世職加等予甘肅侯家河陣亡外委郭有陞祭葬世職加等○己亥諭內閣御史劉國光奏請飭嚴禁各關稅衙門留難需索等語前據丁日昌奏本年江蘇應試諸生聞關抗稅當降旨嗣後鄉會試文武舉人生監人等赴京赴省應試概不准包攬客貨私鹽等項原因不肖士子借考漁利不得不嚴行查禁但恐該吏役等假公濟私於該士子所過關津釐卡皆以查稅為名藉端訛詐指無為有需索不遂任意留難致令各士子沿途節節阻滯貽誤場期殊失朝廷優待士林之意著各省督撫嚴諭各關卡官員凡鄉會試文武舉貢生監人等除有勾串牙商包攬客貨恃眾抗稅情事仍應查

辦外其照例隨帶衣箱食物等件該吏役等不得任意留難如有需索情弊准該士子赴該管衙門呈訴將該吏役等從重懲辦如該管官有意袒護並著該督撫一併查參其尋常往來之人如無夾帶貨物亦應迅速放行不得借端留難以安行旅○又諭御史劉國光奏請飭整頓捕務等語禁暴詰奸本地方官之專責若如所奏近年河南山東直隸等省時有路劫之案並有摺差被劫情事每遇

事主報案地方官往往諱盜為竊其有盜案承緝限滿則又求調他缺為開脫處分地步似此捕務廢弛實屬不成事體著各直省督撫嚴飭所屬州縣認真緝捕如有諱盜及承緝不獲者據實參處不准稍涉徇隱其通衢大道為行旅經由之處並著飭令該管地方官多設更鋪添派兵役晝夜巡邏嚴密稽察俾盜賊無所託足遇有往來士商人等隨時加意護送不得藉端需索以戢奸宄而靖地

方○諭軍機大臣等前因于凌辰奏查勘西陵樹株情形當派志和胡家玉前往詳細查勘據實具奏各

陵樹株為風水蔭護所關極為緊要乃將多年大樹膽敢翦枝去皮速之使乾竟至成片成段以為伐除變價地步究係何人舞弊亟應徹底根究嚴行懲辦著志和胡家玉認真查明據實奏毋稍徇隱將此各諭令知之○又諭李鴻章奏酌議津海關道章程七條已

令該衙門議奏矣此外如尚有未盡事宜仍著該督體察情形隨時陳奏另片奏天津機器局添購碾磨器增建廠屋並興造藥庫該局事務多與洋人交涉擬派陳欽會同沈保靖辦理等語著即飭令該員等認真經理以期漸臻精熟又片奏請以遊擊徐平川護理宣化鎮總兵該員能否勝任著李鴻章隨時察看如果不能得力即著另行派員署理將此諭令知之○又諭前據錦丕勒多爾濟張廷

岳等先後奏報烏里雅蘇台失守迄今二旬有餘未據續奏情形殊深懸盼賊匪竄陷烏城後盤踞附近遊牧地方近日有無竄動在城各官下落究竟若何錦丕勒多爾濟現在駐紮何處曾否調集蒙古官兵設法進剿棍噶扎勒參曾否到烏著卽詳細奏聞並著張廷岳阿爾塔什達將烏城情形隨時探明具奏前據文盛等奏赴援烏城官兵擬在察哈爾安設糧臺當經諭令李鴻章籌撥款項飭

口北道派員辦理該督諒已遵照籌辦惟自察哈爾至烏里雅蘇台程途甚遠軍士糧食羊馬設有缺乏關繫非輕應如何節節轉運派員照料必須先行籌畫賽爾烏蘇地方應否設立轉運糧臺並沿途應於何處設臺接運著文盛杜嘎爾張廷岳阿爾塔什達酌度情形奏明辦理察哈爾馬隊計已起程著文盛杜嘎爾飭達爾濟迅速管帶前進相機援剿其吉林黑龍江馬隊現赴昌平州整頓行

裝卽可出口杜嘎爾一俟此項官兵到齊卽著統帶繼進前調宣化大同官兵均已奏報起程著張廷岳阿爾塔什達俟該官兵到後妥為布置藉資防剿將此由六百里各諭令知之○庚子諭軍機大臣等蘇鳳文奏越南夷匪滋事情形暨防堵柳慶邊境剿捕武緣等處伏莽各摺片越南賊匪襲踞淦台等處攻破木馬倉城及諒山夷省其貪班上巴通攜高平地方復有聚匪圖窺思陵等境匪勢

如此狡猾自應派兵堵剿蘇鳳文現已派令知府姚茂田統帶選守四營馳出太平邊境協同徐延旭相機堵擊卽著飭令該員等迅速嚴密扼剿毋令闖入內地以固疆圉廣東欽州轄境亦與該處毗連並著瑞麟李福奏一體嚴防免致匪徒侵軼吳亞終一股甫據蘇鳳文馮子材奏報全數蕩平越南地方安孰何以該處又有此巨股肆擾恐仍係吳亞終餘黨暗長潛滋該撫等因前報肅清此次

遂託名於越南匪徒粉飾入告著蘇鳳文馮子材確切查明據實具奏不准稍涉迴護一面檄飭徐延旭等會同夷兵合力兜擊務將此股賊匪悉數埽除馮子材本係辦理越南軍務尤不能置身事外若以中國竄匪諉為該國本有之賊聽其蹂躪殊非矜恤小邦之意著蘇鳳文馮子材悉心商酌設法勒洗不得稍存諉卸黔省苗匪不時竄邊粵邊柳慶邊防甚形喫重現在苗匪入有蠢動之信該

撫已添派林宇兩營助防慶遠檄令黃才貴等移紮葛諒以固柳州一路著即嚴飭防軍及各該地方官認真防勦力行堅壁清野之法毋任該匪越境擄掠以遏狂氛武緣匪徒劉新城業已殲除積匪亦次第搜捕並將賓州廖八股匪巢穴攻毀惟南太泗鎮思恩等府距省較遠伏莽尤多仍著該撫飭屬分投勒洗庶免死灰復燃至桂林所屬之永甯州三隍地方亦有積匪滋事雖已擒渠埽穴難

保無零星逸匪四出逃匿並著蘇鳳文嚴飭該地方官實力搜捕毋任延蔓將此由五百里各諭令知之廣西巡撫蘇鳳文陛見以廣東巡撫李福泰署廣西巡撫兩廣總督瑞麟兼署廣東巡撫以廣西慶遠等處勦辦苗匪土匪出力賞知府王達材二品封典徐延旭巴圖魯名號知州趙椿遊擊鄭得威等花翎同知潘世淑等藍翎餘如銜升敘開復有差○以廣西追勦逸匪肅清越南出力賞

總兵官楊安龍一品封典都司章永忠等花翎守備楊安明等藍翎餘加銜升敘開復有差○辛丑諭軍機大臣等戶部奏請飭江浙等省整頓漕務等語據稱近年來外省辦理漕運遲延由州縣舍米徵銀司道復另行委員以銀易米市僧屯積米石擡價居奇委員等遲回觀望止求糴米之減價不問受兌之逾期即如本年夏至後東省黃水盛漲如果江北糧船先到數日早已直達通州是轉運

之遲滯實由開兌之遷延來歲新漕亟宜整頓等語漕運為京倉要需本年轉運業已愆期亟宜豫先籌畫趕辦以免臨時貽誤著曾國藩魁玉張兆棟張之萬將本年江北漕糧嚴飭各該州縣就起運之數徵收本色恪遵定例冬兌冬開以期早到東境守候黃汛並將受兌開幫到東各日期隨時奏報由丁寶楨沿途催趲前進毋再遲延致蹈覆轍其江蘇浙江海運新漕並著各該督撫提前趕辦

毋稍濡滯將此各諭令知之又諭前因侍郎胡家玉奏江西錢糧有額外徵收並隨賦派捐等情請飭照定例辦理當經諭令劉坤一斟酌具奏茲據奏稱江西省地丁錢糧從前名為遵例一正一耗實則收錢不止二十四百文收銀不止一兩五錢軍興以後酌減每地丁一兩折收錢二千四百文改為收銀一兩五錢通省一律照辦至萬安東鄉等縣自更定新章以後徵數均經遞減其按糧派捐

一節係因善後工程必不可緩前經部議以一年為限並非歷久攤派若徒博遵例之虛名恐轉蹈浮收之故轍等語所奏自係實在情形惟該省當兵燹之後民間元氣未復該地方大吏亦當體念民艱力除積弊著劉坤一督飭所屬各地方官於明定徵收確數之外不准絲毫任意加增以副朝廷軫念閭閻至意將此諭令知之○又諭有人奏統帶江西水師道員何應祺久歷戎行屢著戰績前署贛南道時頌聲翕然實為有體有用之才前江西督糧道段起於咸豐年間募勇在江西勦賊頗有戰功防守廣信轉危為安吏治兵事均能勝任等語段起前在江西督糧道任內恐其不能勝任曾諭劉坤一查看嗣據該撫奏稱該道告病開缺究竟段起是否堪以錄用及何應祺才略有無過人之處著劉坤一詳晰據實具奏將此諭令知之又諭李鴻章奏派員籌設糧臺一摺李鴻章現已

遵旨。在察哈爾設立糧臺。以備調赴庫倫等處。征兵口食。宣化官兵一千名。已由該督籌給三箇月餉乾及軍裝等項。以後月需。採運糧食費用。仍著李鴻章按月籌款。解交糧臺。源源接濟。其察哈爾吉林黑龍江馬隊官兵。應需採辦乾餼裹帶糧餉。前已准文盛等所請。由部撥銀二十萬兩。即可於此項餉銀內。覈實動用。著文盛杜嘎爾會商李鴻章妥為應付。以利進行。以後口糧。自應豫為籌畫。著

戶部迅撥銀三萬兩。交順天府派員解交口北道收存。專備前項官兵口外購糧之用。並著李鴻章文盛等飭令該道。寬為購備。毋令缺乏。惟由察哈爾以至烏庫程途。遠窳奉調出口。征兵裹帶糧餉軍火等項。必須足用。以示體恤。現在如何採辦。如何分給。及由何處接續轉運之處。仍著文盛錦丕勒多爾濟杜嘎爾張廷岳阿爾塔什達悉心酌度。詳晰奏聞。李鴻章以大同官兵係由歸化出口。歸綏

本有支應防兵糧臺。所有該官兵糧食軍火。應由定安何璟飭令歸綏道運解。免致轉轆。著該將軍等體察情形。奏明辦理。各路官軍抵烏庫後。應需糧藥。由李鴻章文盛等督飭後路各糧局購運。其例支鹽菜馬駝乾等銀。勢難由遠籌放。烏庫本各有部撥餉銀。著照李鴻章所議。所有察哈爾吉林黑龍江官兵應領餉乾。著由錦丕勒多爾濟就近支給。宣化大同官兵應領餉乾。著由張廷岳等就近

支給至軍火等項。需用甚急。著工部先行籌發若干。解赴察哈爾糧臺。以備應用。其業經出口及啟行各營請領軍火糧食等項。著由各該統帶官呈明文盛等飭令糧臺照例發給。用過銀數。事竣覈實報銷。至所稱烏庫糧無大股嘯聚。止須酌留官兵分投搜捕。無庸專設糧臺。以節糜費之處。著定安文盛杜嘎爾張廷岳阿爾塔什達錦丕勒多爾濟隨時偵探。明確相度。機宜妥籌具奏。將此由六百

里各諭令知之○又諭劉崐奏援黔湘軍疊破賊寨克復台拱廳城暨請飭川軍迅克清黃各摺片貴州苗匪麇集羊條各寨經提督龔繼昌率隊進剿疊克堅巢席寶田會督諸軍乘勝進拔三丙革夷等巢立將台拱廳城克復該城西南北三面賊壘以次鏟除勦辦尚為得手惟九股河深處寨賊匪尚多高坡雞擺尾等處仍有賊寨數十梗於台拱清江古州之間現雖有番招登裸等寨來營乞降席寶田已派員分往撫定仍當將各處著名逆匪殲除淨盡方能勦撫兼施著劉崐檄飭席寶田迅將九股河之台生養開等寨次第削平即進軍將高坡等處苗寨分別勦辦以期清江台拱一律肅清所有先後克復各城必須將善後妥為籌辦始能步步進紮劉崐仍當飭令各軍一面將上下江丹江古州各路布置妥協一面派隊將甕谷隴黃飄一帶迅圖勦洗周達武一軍計已入黔著崇實

吳棠飭令該提督迅將清黃起期收復龔興楚軍聲勢聯絡麻哈都勻兩城為逆苗仰食之地著曾壁光即派黔軍迅將該城收復扼要紮守遙為楚軍聲援即以自固疆圉毋得專恃鄰兵意存諉卸將此由五百里各諭令知之○以湖南官軍克復貴州台拱廳城賞提督龔繼昌唐本有黃馬褂都司馬盛治巴圖魯名號知縣文煒同知銜花翎餘加銜升敘有差予陣亡參將宋兆雲等十三員祭葬世職加等○以湖南官軍攻克貴州九甲三丙等處賊巢出力賞提督黃開運副將鄧善企正一品封典餘加銜升敘有差○追予河南各屬陣亡殉難官紳兵勇婦女二千二百六十一員名口分別旌卹如例○旌表守正捐軀河南淮甯縣民陳貫儒女繼姐

大清穆宗繼天開運受中居正保大定功聖智
誠孝信敏恭寬毅皇帝實錄卷之二百九十六

大清穆宗繼天開運受中居正保大定功聖智
誠孝信敏恭寬毅皇帝實錄卷之二百九十七

張廷岳阿爾塔什達奏籌防事宜並繪圖呈
覽賊蹤西竄請飭堵截喀爾喀駝隻驟難籌
撥各摺片據奏接到錦丕勒多爾濟玉稱探
聞賊匪已於十月二十三日西竄仍回肅州
並探聞該參贊大臣已回烏城等語此股賊
匪撲陷烏城僅留四日即行竄走口外地方
遼闊難保不到處奔突現在賊蹤究往何處
仍著張廷岳阿爾塔什達確探具奏宣化大
同官兵已先後奏報起程張廷岳等置辦穹

缺修

同治九年庚午十一月壬寅諭軍機大臣等

廬四百架所籌甚妥該官兵到庫後仍應擇要分紮以固邊圉不得以匪蹤漸遠稍涉大意錦丕勒多爾濟自奏報烏城失守後迄今尚未續有奏報該參贊大臣既回烏城著即將該城將軍等下落及賊匪竄向何處詳細查明具奏並著將烏城所屬臺站趕緊整飭以通臺路其烏城所屬地勢並臺站道里仍著繪圖貼說詳悉奏聞現調赴烏城之兵有吉林黑龍江二千名察哈爾馬隊一千名又

貢果爾帶察哈爾親軍馬隊二百五十名統歸杜嘎爾調遣到烏後著錦丕勒多爾濟會同杜嘎爾妥籌布置該參贊並應將所屬喀爾喀各盟蒙古官兵設法整頓隨時操練以固邊防賊匪雖有回竄肅州之信而沿邊各口皆可回竄著左宗棠穆圖善定安金順成祿於肅州甯夏及綏遠城一帶分投偵探遇有賊股陸續回竄即行派兵設法兜剿務須就地殄滅毋再任令竄出邊外致難辦轉形

棘手烏城之賊雖已退去或在附近地方暫時伏匿乘機仍肆竄擾亦未可定所有調赴烏庫之察哈爾吉林黑龍江馬隊及宣化大同官兵仍應迅速分別前往昨據李鴻章奏已派員籌設糧臺所有採辦糧食分給軍火及沿途轉運等事著李鴻章文盛杜嘎爾錦丕勒多爾濟張廷岳阿爾塔什達仍遵昨日諭旨分別妥籌具奏大同官兵所需糧餉軍火何璟亦當源源應付均毋任稍有缺乏定

安前派參領貢果爾統帶察哈爾馬隊二百五十名赴哈爾尼敦推河一帶探蹤截剿刻下諒早起程此項馬隊本歸杜嘎爾調遣著即飭令與達爾濟所部合兵一處相機探剿毋稍遲延劉銘傳何日到陝著定安咨照該提督迅速撥兵前赴纏金屯紮其富勒琿所部吉林黑龍江馬隊一千二百名暫緩起程仍紮原處會同防守聽候續有諭旨再行調往金順前請調撥喀爾喀駝隻據張廷岳等

奏現在籌辦征兵轉運駝隻已覺不敷實難再行籌撥等語金順需用駝隻前已由定安撥給二百五十隻現在喀爾喀既難籌解著金順咨商定安應如何通融應用之處受籌辦理將此由六百里各諭令知之○癸卯諭軍機大臣等工部奏大婚禮需用綵紬請飭趕辦並請飭添解梭毛各摺片據稱大婚禮應用架綵等項所需綵紬除前次奏派八千匹外擬添派十萬匹內大紅四萬匹黃色一萬五千匹綠色一萬五千匹桃紅二萬匹玉色一萬匹請飭杭州織造趕辦四萬匹江甯織造趕辦三萬匹蘇州織造趕辦三萬匹等語此項綵紬經工部及內務府覈計實用必不可少之數著忠誠德壽茂林按照指撥數目迅速趕辦均限於來年四月內一律辦齊解送到部不得絲毫短少儻或任意延緩致誤要需即著工部從嚴參處至此次派辦之後是否敷用尚難豫定並著該織造等寬為

籌備以便臨時撥用所需銀兩著戶部籌撥款項迅咨江浙督撫嚴飭藩司覈計需用之數撥解該織造俾得起期趕辦儻該藩司撥款遲誤並著工部嚴參至需用梭毛前已令兩江總督趕解三十萬斤茲據工部奏稱覈計尚屬不敷請添派十五萬斤等語著曾國藩魁玉迅將前後所派梭毛四十五萬斤辦齊分起報解統於來年四月以前埽數解清不准稍涉遲延將此諭知戶部工部曾國藩

魁玉並傳諭忠誠德壽茂林知之○追予廣東順德陣亡殉難紳民潘常光等暨婦女一百六十二名口分別旌卹如例○甲辰聖祖仁皇帝忌辰遣官祭景陵○

上詣

壽皇殿行禮○諭軍機大臣等定安奏請飭山西提借臺站經費等語歸化城土默特臺站經費向由山西提借銀兩接濟現在該處運

解新疆等處餉銀軍火差務正殷經費不敷自應豫為籌備著何璟卽飭藩司迅速提銀五千兩解赴歸化俾資應用毋稍延緩一俟土默特減成項下積有成數再由定安歸還將此由四百里諭令知之○蠲緩浙江仁錢塘海甯富陽餘杭臨安新城於潛昌化嘉興秀水嘉善海鹽平湖石門桐鄉歸安烏程長興德清武康安吉孝豐諸暨金華蘭谿東陽義烏浦江湯溪西安龍游建德淳安遂安

壽昌桐廬分水山陰會稽蕭山臨海黃巖甯海天台仙居永康武義常山開化麗水縉雲青田松陽宣平象山餘姚上虞新昌嵊遂昌雲和六十二州縣暨杭嚴嘉湖衢州台州四衛被災歉收地方新舊額賦有差○乙巳旌表守正捐軀安徽毫縣民婦楊張氏○丙午上奉

慈安皇太后

慈禧皇太后幸漱芳齋侍午膳○諭內閣前因

工部奏司員劉文鍾身家不清當經諭令順天府府尹飭屬查明具奏茲據奏稱查明劉文鍾係劉浦胞姪嘉慶年間入籍大興劉浦並非劉雨之孫道光年間曾有諾爾吉等証告劉浦係其家奴疊經刑部訊明坐証擬結劉文鍾之叔劉滌曾任江南藩庫大使劉浦之子劉其俊曾任山西嵐縣知縣伊家並無在河南服官被參之人請飭將原參所稱司員羞與為伍究係何人是否知其底實並劉文鍾之叔係何官名曾任河南何縣知縣何年被參逐一詳查等語著工部堂官查明具奏○諭軍機大臣等劉銘傳奏到陝日期暫難拔隊扼守纏金並請調李成先一軍仍歸北路各摺片前因烏城失陷當諭劉銘傳撥兵紮守纏金以便富勒琿統帶馬隊起程赴烏茲據奏稱纏金距陝較遠分兵不易轉運尤難請飭定安就近派隊扼守等語烏城竄匪據張廷岳等奏已於十月二十三日仍回

肅州。此時該提督兵勇既暫難撥赴纏金。卽著定安仍遵前旨。令富勒琿照舊實力嚴防。仍著劉銘傳俟後隊入關餉項軍火運到後。派撥得力隊伍前往纏金節節進紮。並將應防應勦處所與定安蔣志章隨時會商妥籌布置。甯靈一帶賊匪現被官軍圍勦勢已窮蹙。難保不以蒙古為掠食之地。劉銘傳請令駐紮潼關之李成先一軍調回北路所籌亦是。卽著李鶴年飭令李成先統率所部移赴

北路。照舊歸宋慶調遣。以厚兵力。劉銘傳於疏通北山後卽駐兵定靖。俟山西防務較鬆卽咨商宋慶以包頭為老營。會合定安馬隊為蒙古遊擊之師。遏賊東竄。將此由五百里各諭令知之。○又諭劉銘傳奏西路轉運糧石必須廣購駝隻。現已由洛陽派員先赴歸化一帶收買駝一千匹。請飭殺虎口監督於駝隻到關時免稅等語。著鍾泰於此項駝隻到關卽按數驗實。免稅放行。並著戶兵兩

部卽行知照所過地方一體免稅。何璟卽轉飭藩司張樹聲派員出口幫同照料護解赴陝。以期迅速。將此由四百里諭知何璟並傳諭鍾泰知之。○以戶部左侍郎潘祖蔭兼署

吏部右侍郎刑部左侍郎賀壽慈兼署兵部左侍郎工部左侍郎恩承兼署刑部左侍郎。○以鑲黃旗蒙古副都統尚宗瑞兼署正藍旗蒙古副都統。○丁未諭軍機大臣等兵部奏請飭各省督撫及各路統兵大臣依限咨

報兵勇數目。並請飭各省將兵丁數目按年題報各摺片。同治元年十一月間曾經諭令各省督撫及各路統兵大臣將存營出師各兵數按限造報。並將軍營徵調兵勇名數及隨時有無增減限三箇月咨報一次。茲據兵部奏稱各省兵勇數目有始則按限咨報繼則並未依限造送或有咨報一二次後又不續報。且有一次未報者其兵丁數目除湖北四川兩省依限題報外其餘仍未按限題報。

疊經該部嚴催總未遵照辦理實屬任意玩延著各省督撫統兵大臣等奉到此旨後除以前未經造報兵勇各數無庸補報外即將現在所部兵勇數目仍按三箇月咨報一次以備稽覈儻再視為具文即著兵部嚴叅至已造報各處仍著依限報部毋得先後參差以昭覈實其各省兵丁數目並著該督撫按年造冊題報不得再有耽延至軍興以來舍兵用勇本係權宜之計而勇丁遣撤易滋事

端流弊日甚若不將綠營及早整飭致國家費千百萬帑項養之於平日不能用之於臨時身任封疆者問心何安現在天津之案雖經了結何可復事因循況甘肅滇黔各省軍務未靖我君臣卧薪嘗膽正宜力圖自強以期有備無患著各直省督撫將所管各營設法整頓限奉旨後六箇月將如何汰弱募強如何分日操練及各省可得有精銳士卒若干之處詳晰奏聞直隸天津江蘇上海及劉

銘傳軍營均練習槍隊礮隊步伐尚為整齊號令尚為嚴肅其教演之法著各該省自行咨取章程照辦總期實事求是變疲弱為精強不得空言粉飾以至有名無實年來各督撫曾有裁兵增餉及酌調額兵訓練之奏然為政不在多言而在實力奉行若以一奏塞責日久又漸形廢弛甚非朝廷倚任疆臣之意也將此各諭令知之○又諭庫克吉泰奏籌辦圍場開墾地畝情形一摺熱河招墾圍

荒地畝現經庫克吉泰查明除旗佃侵放圍內地六百餘頃應行禁止拋荒外其民佃侵放圍內地有八百餘頃之多該都統擬將貴山等舉出旗佃圍外隱匿餘地六百餘頃撥補圍內民佃令其遷徙安業尚有不敷即將貴山等報捐所領圍外地畝及現任官員弁目所領圍外之地陸續添補即著庫克吉泰遴派委員前赴圍場逐細履勘認真籌辦務將正圍以內民戶儘數遷出以清圍地並將

安插各民妥為布置毋令一夫失所尤當隨時稽察弊竇不可疏略其應如何立界設卡清丈升科之處並著斟酌情形妥為辦理將此諭令知之○又諭張廷岳阿爾塔什達奏籌撥馬匹以備官兵騎乘並探聞賊匪情形各摺片據稱赴援烏城之兵若繞由庫倫蘇木臺站行走中途未免濡滯不如由賽爾烏蘇向西由推河直抵烏城較為便捷所籌尚合機宜張廷岳等現已剴飭賽因諾顏部落盟長將推河以北至烏城十五臺趕緊設復著錦丕勒多爾濟一體剴飭該盟長迅速辦理以通臺路賊匪尚在距烏城西南四五臺之雜普汗河地方盤踞此時援兵若能趕早前往正可出賊不意擊其惰歸達爾濟所帶察哈爾馬隊一千名計已起程著文盛杜嘎爾迅即飭令由賽爾烏蘇向西探蹤截剿毋稍遲延貢果爾所帶察哈爾馬隊二百五十名著定安飭令探明達爾濟行抵何處即行

合隊進剿以資厚集張廷岳等所稱援兵出口若一路徑趨烏城轉向西南追剿一路由沙勒噶爾珠特推河向西北迎擊可期得手著杜嘎爾催齊吉林黑龍江馬隊統帶前進應如何與達爾濟分路進兵兩面夾擊之處妥商辦理張廷岳等咨調烏城所屬官廠馬匹三千著錦丕勒多爾濟飭令如數挑選解至推河一帶牧放以備官兵進剿之用庫倫所屬東兩部落籌備馬二千一百匹情殷報效著張廷岳等驗收後即行奏請獎敘以昭激勸宣化大同官兵行抵庫倫即著妥為布置以固邊防將此由六百里各諭令知之○追予山西絳州等處殉難武舉閻林茂等紳民婦女七百一十六名口分別旌卹如例並予建祠○戊申月食○諭內閣福濟榮全奏回匪撲陷烏垣焚掠遠颺自請治罪一摺據稱烏里雅蘇台於本年十月十九日突有賊匪千餘由東南西南山溝奔撲該城東西南

三門經官兵擊退後賊仍抵死抗拒東溝復有續來賊隊數千蜂擁撲城四面放火蟻附而登城內城外官兵僅三百餘名力不能守賊匪遂肆焚掠於二十三日向西南竄出等語。此次烏城被匪竄入福濟等既不能先事豫防臨時復不能力圖堵剿本當治以應得之罪姑念該城兵力甚單勢難堵禦尚屬可原福濟榮全錦丕勒多爾濟均著革職留任以觀後效仍著督飭蒙古官兵及派往察哈

爾吉林黑龍江等處馬隊迅將竄去賊匪悉數殲除毋留餘孽○諭軍機大臣等文盛杜嘎爾奏達爾濟所部馬隊五百名業已啟行察哈爾後起馬隊日內即可進發烏城賊蹤現已西竄請將吉林黑龍江馬隊暫緩進發一摺。昨因張廷岳等奏賊匪尚在距烏城西南四五臺之雜普汗河地方盤踞各路援軍若能及早趕到正可聚而殲旃當經諭令文盛杜嘎爾飭達爾濟一軍由賽爾烏蘇向西

探蹤截剿並令杜嘎爾催齊吉林黑龍江馬隊統帶前進此時若照文盛等所奏遽將吉林黑龍江馬隊暫停進發則達爾濟孤軍無繼殊不足以壯聲威仍著懷運昨日諭旨俟吉林黑龍江馬隊到口由杜嘎爾統帶迅速進發至進兵道路自以由賽爾烏蘇向西徑達烏城較為直捷所有推河以北至烏城十五臺著錦丕勒多爾濟迅飭賽因諾顏部落盟長趕緊設復以利師行達爾濟已於十一

月初一日起程此時計可行抵賽爾烏蘇即著飭令轉西赴烏毋庸繞赴庫倫致形濡滯如達爾濟行走迅速業已抵庫應如何取道赴烏之處著張廷岳等設法籌辦該軍馬匹遠道疲乏如須更換即由庫倫籌備馬匹內先行撥給一千匹以應急需並著文盛等於官庫內如數撥還俾備宣大官兵之用參領貢果爾馬隊二百五十名現已到口著文盛等迅籌駝隻飭令即日啟行與達爾濟合兵

一處相機探勘。塞外用兵。軍食最關緊要。文盛等業於頭臺賽爾烏蘇適中之地添設支發轉運一處。其烏庫兩城所屬各臺應於何處安設接運之處。並著錦丕勒多爾濟張廷岳等酌度地勢。妥為籌畫。正在寄諭間。據李鴻章奏張家口地方不敷官兵棲止。請將吉林黑龍江馬隊暫行擇要駐紮。及籌辦難民難回事宜。福濟榮全奏現籌招集安撫各摺片。已明降諭旨。將福濟榮全錦丕勒多爾濟

革職留任。責令戴罪自效矣。賊匪尚在烏城附近。並未遠颺。亟宜進兵勦辦。所有吉林黑龍江馬隊斷不可遽議停止。該官兵現已陸續馳抵昌平。著文盛等於駝隻柴薪等項。寬為籌備。俟察哈爾馬隊及宣化大同官兵出口後。即催吉林黑龍江馬隊分起到口。陸續進發。毋稍遲誤。福濟榮全防守無方。城池被陷。錦丕勒多爾濟督勦不力。均應治以應得之罪。姑念該處兵力本單。從寬革留。該將軍

等務當激發天良。招集蒙兵力。籌勦堵禦。再不能勉贖前愆。或至一誤再誤。則國法具在。毋謂寬典可幸邀也。其喀爾喀扎薩克圖汗賽因諾顏西兩部落。即著理藩院劄知各扎薩克。趕赴烏城。隨同福濟等將防勦事宜。實心辦理。不准觀望遲回。自貽伊戚。李鴻章片內所稱竄陷烏城之賊。係伊犁等處難民難回。勾結本處蒙民喇嘛滋事。是否屬實。著福濟等查明具奏。仍妥籌辦理。以遏亂萌。將此

諭知理藩院。並由六百里諭令李鴻章福濟榮全錦丕勒多爾濟文盛杜嘎爾張廷岳阿爾塔什達知之。○以吏部尚書單懋謙兼署刑部尚書。○以兩江總督曾國藩充辦理通商事務大臣。○己酉諭內閣。溥楙等奏職官蒙混具呈前後互異。請派大員查辦一摺。據稱章京多福因伊祖遺香河縣祭田佃戶捐租呈請咨查戶部。該員並不聽候行查。復在部具呈。請將裁撤筆帖式官房二十四處。又

寶華峪廢棄官房一處情願認領並捏稱部中准行之言屢次瀆稟查該員前後具呈既屬互異所稟官房坐落地面亦與各衙門所報及現存案卷不符由伊祖遺香河縣祭田遽及裁缺官房復由官房連及土塘荒廠更連及南口門外並金星山迤南各地段顯係任意開列希冀蒙混等語此案章京多福先後具稟情詞甚屬支離是否另有要挾情事抑係受人唆使均應徹底根究著派寶珣賀壽慈前往會同溥琳等秉公審訊務得確情據實具奏毋稍含混○諭軍機大臣等于凌辰奏回乾樹株變價積弊請飭一併查辦一摺據稱回乾樹株積弊日久伐除變價尤為舞弊關鍵該管司員李春華舊在半壁店開一福盛糧店現因變價樹木過多運賣不及復開福盛木廠五品官春七郎中鄭二朋比為奸將此項樹株販運各處請飭查辦等語西陵樹株蔭護風水宜容該管司員等任意變

賣捏報欺飾著志和胡家玉將于凌辰所奏各情嚴密訪查一面將福盛木廠先行查封嚴究如果屬實即著嚴叅懲辦原摺著鈔給閱看將此各諭令知之○又諭御史鄧慶麟奏奉天無業流民私墾荒田業經派員履勘會議章程妥為安撫近聞鳳凰城暨沿邊一帶帶有冒充流民蒙混影射者漸至一人捏造數名報墾數十百頃不論官禁開荒民墾熟地肆行侵占原墾貧民轉失故業盜賊藉以藏身防兵久不得撤等語奉天東邊禁荒前因流民墾種既久不忍令其失業故准就地安撫若如該御史所奏是流民未受安撫之恩豪強轉擅兼并之利且有馬賊餘黨伐木匪徒潤跡其中亟宜認真整頓著都興阿額勒和布德椿就邊外地方情形悉心籌畫妥為經理以期久遠無弊另片奏興京地方請添設官員各專責成等語並著都興阿額勒和布德椿體察情形會議具奏原摺片均著

鈔給閱看將此各諭令知之尋奏遵查邊地墾荒均經造冊存查並無冒墾侵占等弊至流民既多誠難保無馬賊土匪涸跡其中惟有嚴加訪察隨時懲辦其添官移鎮各事應俟地畝查竣起科邊界劃清界限後再行奏請辦理得旨一切應辦事宜仍著都興阿等悉心會商屆時次第興辦○庚戌諭內閣前因御史鄧慶麟奏參吉林同知安榮等貪劣各款當派瑞聯馳赴吉林會同毓福查明具

奏茲據瑞聯等分別審擬覆奏此案吉林理事同知安榮雖訊無縱任書役索詐及積壓案件數百起等情惟於審理未完案件尚有八十餘起之多其已完各起多不立案實屬任意稽延辦理乖謬安榮著交部嚴加議處伯都訥廳同知博霖雖訊無收納賭錢匿報盜案及責押拏賭鄉地等情惟積壓案件至百餘起之多復於盜匪肆行嚇詐丁書縱賭抽頭毫無覺察實屬昏庸不職博霖著即革

職副都統銜協領花里雅春因劉廷楨報獲盜犯張和等呈交贓物不足疑有容留匿贓情事輒將劉廷楨提訊追贓掌責收監復令盛春授意劉廷楨之姪劉煥辰求人討保劉煥辰未從該協領復提劉廷楨杖責以致因傷身死實屬罪無可辭花里雅春著即革職發往軍臺效力贖罪雲騎尉連春於劉廷楨受杖斃命誤報病故非尋常錯誤可比雲騎尉盛春聽從花里雅春主使向劉煥辰告知

覓人討保殊屬不合連春著交部嚴加議處盛春著交部議處前吉林將軍富明阿前護理副都統總管巴陽阿前刑司郎中常岱楊士端於劉廷楨被責一案未能詳覈即行擬結均屬錯誤著一併交部分別議處○又諭左宗棠奏特參委員侵欺勒派冒銷賑糧各款請旨嚴懲一摺甘肅總兵周東興經左宗棠委赴中衛縣採購軍糧並辦賑務該員於採買糧價數目竟敢浮冒制錢一萬串有奇

其報銷賑糧多用米麥而每日所發實係黍豆稀粥且於賑過丁口數目及起止月日諸多含混經左宗棠查辦僅據供認入己贓款一千串有零希圖狡展似此貪劣不法之員亟應從嚴懲辦周東興著即在軍前正法以昭炯戒○諭軍機大臣等左宗棠等奏官軍剿賊獲勝並金積堡近日軍情各摺片金積堡陝回餘黨會合河州援賊由三家集渡洮河竄擾柳林溝等處經官軍分投進攻斬馘甚多其渡渭而南之賊復經官兵躡蹤截擊殲除殆盡剿辦尚為得手在事出力員弁准由左宗棠擇尤彙案保奏以示鼓勵其零星竄逸之匪著左宗棠督飭各營分途搜捕毋令死灰復燃蔣志章亦當會同劉銘傳檄飭各軍嚴密堵禦毋任闖入陝疆左宗棠一面飭令張家川已撫回民李得昌分別收輯以孤賊勢金積堡合圍後逆情日形窮蹙著左宗棠嚴飭劉錦棠黃鼎等迅將馬家灘剋期

攻拔以便各軍節節掃蕩會攻王洪堡以圖金積老巢為掃穴擒渠之計至投出回匪絡繹不絕回目馬壽清亦率眷投營左宗棠已飭安插平涼惟該回眾是否真心反正尚未可知左宗棠務當隨時察看加意防維毋為該回眾所給前甯夏縣知縣彭慶章甘心從逆為馬化澂謀主現仍投入金運昌營著左宗棠即飭將彭慶章解赴平涼嚴行訊辦毋稍寬縱將此由六百里各諭令知之○兩江總督曾國藩奏本年江北漕糧遵旨仍辦河運下部知之○以不遵調度革陝西道員李耀南職永不敘用並不准投效軍營○辛亥諭內閣醇郡王奏滙陳下情請振積習以濟大局一摺方今時事孔亟軍務未平籌餉徵兵重煩民力宵旰焦勞恆以自強不息為念內外文武臣工均應力戒因循勉圖振作迺近來各直省督撫及統兵大臣實心任事者固不乏人而苟且偷安者亦復不少以致軍

務未有了。期吏治毫無起色。在廷諸臣亦復
泄沓成風。未能力圖補救。共挽時艱。醇郡王
賢親並著休戚相關。議論忠言與朝廷兢惕
之心。適相脗合。嗣後內外文武臣工。其各振
刷精神。破除積習。戒行何以整飭。官方何以
澄欽。民生何以乂安。務當精白乃心。實事求
是。俾庶政修明。日臻上理。用副誥誡。諄諄至
意。○又諭李鶴年奏營員行劫餉銀請卽行
正法等語。銘軍遊擊剿鴻貴。千總楊萬金。因

誤差被逐出營。在河南滎陽地方途遇解餉
馱羸。膽敢起意劫奪。將護役驅散。用刀劈斃。
取銀潛逃。行至商邱周家口。先後被獲。實屬
目無法紀。剿鴻貴楊萬金均著革職。卽行就
地正法。以昭炯戒。○諭軍機大臣等。戶部奏
變通驗收海運漕糧及海運仿照河運章程
辦理各摺片。南省漕糧由海運。津歷年以來
因津郡無地方大吏駐紮。特派大員前往驗
收。茲據該部奏稱通商大臣現已裁撤。直隸

總督常駐津郡。請自同治十年為始。凡天津
驗米事宜均由直隸總督就近經理。無庸另
派大員前往驗收。至倉場侍郎應否仍照向
章一員赴津會同查驗。並通州收米事宜可
否責成留通倉場侍郎一手經理。無庸另派
大員請飭妥議等語。著李鴻章英元喬松年
按照該部所奏各節。會同妥議具奏。其一切
章程仍應悉照成案妥辦。至海運交卸一節。
該部擬請按照河運章程。改由糧道赴通徑

交係為埽除積弊起見。著曾國藩李鴻章英
桂張兆棟張之萬楊昌濬斟酌情形。詳細妥
商。會同覈議具奏。原摺片均著分別鈔給閱
看。將此各諭令知之。

大清穆宗繼天開運受中居正保大定功聖智
誠孝信敏恭寬毅皇帝實錄卷之二百九十七

大清穆宗繼天開運受中居正保大定功聖智
誠孝信敏恭寬毅皇帝實錄卷之二百九十八

教修

同治九年庚午十一月癸丑諭軍機大臣等

前因天津民教啟釁疊於六月二十五七月
十三八月初三等日諭令沿江沿海各督撫
嚴密設防嗣因津案就緒復於九月二十八
日諭令各該督撫等振刷精神講求戰守並
於閏十月十八十一月十六等日寄諭各省
疆臣整頓綠營操練槍隊礮隊原因津案雖
將就了結非嘗膽卧薪力求振作無以禦外
侮而杜隱憂本日醇郡王奏請飭辦理夷務
諸臣除徇夷之積習舉驅夷之大局等語自

辦理中外交涉事務以來時艱孔亟本當懲前毖後不可一息苟安嗣後中外任事諸臣遇有交涉事件務當堅持定見豫伐敵謀毋令一事稍涉畏怯致長敵人氣燄至驅夷大局目前雖未能遽見施行亦當未雨綢繆先機布置為自強不息之計著總理各國事務衙門王大臣及沿江沿海各將軍督撫實力實心次第籌辦以整頓武備為第一要務而整飭吏治固結民心寬籌餉需尤與軍事相

表裏各該督撫等職任封圻受恩極渥當此時事艱難務各激發天良講求實際勿事因循勿涉蒙蔽尤當慎密圖維毋使有所洩漏日後勢需用兵應如何確有把握之處著各該將軍督撫詳細熟籌具奏至傳教一事易啟釁端尤當督飭地方官持平妥辦於弭患之中隱寓保民之意庶無事則中外相安有事則同心禦侮有厚望焉原摺均著鈔給閱看將此各密諭知之○甲寅督辦陝西軍務

前任直隸提督劉銘傳奏分撥隊伍扼要設防得旨著即督飭各隊認真防堵毋稍疏懈北山伏莽尚多並著派得力隊伍實力挖剿纏金一帶仍遵前旨派勇前往扼紮以厚兵力○賞順天等省鄉試年老諸生周桂森等九十二人舉人副榜有差○乙卯諭軍機大臣等都興阿等奏查勘邊地情形一摺據稱鳳鸞二門邊地經該將軍等於本年十月間委員前往查勘接連春季所丈地畧向東北

一帶查辦續查出坐落多處已墾熟地十四萬餘畝現值天寒雪凍難於查丈各委員暫行回省請俟來歲春融再行接辦等語鳳鸞邊地亟應趕緊勘定豈可年復一年耽延時日著都興阿額勒和布德椿於明春雪消時飭催該委員等趕緊出邊迅將鳳鸞二邊切實通查完竣並將春間查丈後被水衝淹地畝一併迅速查勘詳報不准稍事延宕將此各諭令知之○又諭周達武奏籌議勦辦情

形一摺前因唐炯一軍裁撤諭令貴州提督周達武迅速赴任接辦軍務現在該提督已抵貴州據稱所部兵勇僅五千九百人益以挑募唐炯舊部擬暫駐平甕然後整頓黔師次第肅清定廣等處會合楚師進擊等語卽著曾壁光周達武飭令帶兵各員認真扼守烏江北岸毋使苗匪得擾遵義府屬侵軼川邊以顧省北大道一面整頓黔師先清定廣俟省門無警再由龍貴平甕兩路規取都勻

以次由凱里八寨會同楚師協力進剿至所請添募兵勇一節卽著周達武與曾壁光妥為籌畫該提督在川日久有無可調之兵諒所深悉或楚省勇丁可以招募均著周達武分別咨商以助攻剿該提督所稱帶兵員弁非隸部下誠恐呼應不靈前已有旨令周達武會同曾壁光列銜奏事帶兵各員悉歸調遣事權不為不專卽著周達武迅將黔省軍務認真整頓力除積習該提督以川省月協

餉銀五萬八千兩一經添軍不敷支放懇請寬籌餉項著戶部將各省協黔餉需先行分催撥解俟曾壁光周達武等商定添兵若干後再行寬為籌撥俾濟要需將此由五百里諭知崇實吳崇劉崐曾壁光並傳諭周達武知之○又諭奎昌文碩奏烏里雅蘇台軍情緊急請調兵援剿一摺前因賊匪竄撲烏城疊經調派察哈爾馬隊一千二百五十名吉林黑龍江馬隊各一千名令杜嘎爾統帶赴烏助剿並調宣化大同兩鎮官兵各一千名赴庫倫防守嗣據張廷岳福濟等先後奏報賊於十月十九日攻陷烏城二十三日旋即退去該逆尚在距烏城西南四五臺雜普汗河地方盤踞業已催令所調各軍星速前進此時賊既竄走科城所屬臺站著奎昌等趕緊設復以通文報烏城被賊焚掠一空福濟等重新整頓需兵彈壓內地援軍遠道遙征轉運等事均須節節部署恐未能剋期抵烏

奎昌等所派吳雲等帶兵百名赴烏仍著飭令前往聽候福濟等差遣棍噶扎勒參駐紮何處現如尚未到烏著奎昌等飭令迅速前進文碩應否帶兵東行援應之處著咨商福濟等斟酌情形辦理科城防務亦關緊要奎昌文碩務當督飭官兵認真操練加意巡防以固邊圉將此由五百里各諭令知之○命翰林院侍講學士孫毓汶提督福建學政○丙辰諭軍機大臣等戶部奏豫撥來年京餉

一摺據稱歷屆京餉均於年前豫撥同治十年京餉擬在各省地丁鹽課關稅等款內指撥銀七百萬兩請飭各該省於來年分批起解等語京餉關繫緊要現經該部就各省緩急情形斟酌動撥自應遵照奏定數目源源報解以濟要需著該將軍督撫鹽政監督等務於來年開印後分批起解限五月前解到一半十二月初間全數解清不准截留改撥藉詞延誤儘屆限不到卽照奏定章程指名

嚴叅至本年未解京餉前經該部節次奏咨飛催現屆年終仍未如數解清著各該督撫等迅速籌解毋再遲延干咎另片奏內務府同治十年分應需經費擬撥兩浙鹽課銀五萬兩兩淮鹽課銀五萬兩廣東鹽課銀五萬兩福建茶稅銀十萬兩閩海關常稅銀十萬兩太平關常稅銀十萬兩九江關常稅銀十萬兩共銀六十萬兩請飭依限完解等語著該將軍督撫鹽政監督等按撥定數目

務於來年開印後陸續徑解內務府並將起程日期報部限六月前解到一半十二月初間埽數解清不准稍有帶欠將此由五百里諭知福州將軍直隸兩江湖廣閩浙兩廣四川江蘇安徽江西福建浙江湖北湖南河南山東山西廣東各督撫並傳諭粵海關監督知之○又諭前因工部奏大婚禮需用綵絢添派江甯等織造趕辦十萬匹限來年四月內辦齊解京當經諭令戶部籌撥款項迅咨

江浙督撫照數撥解。茲據戶部奏稱業經咨行工部將各色綵緇價值分晰查明復經該部將例價增價覈實等計共需銀三十九萬餘兩請飭江南浙江各督撫如數撥給等語。此次大婚禮添辦綵緇十萬匹業經戶部實計工料銀兩均係按照例價增價詳細覈明亟應迅速籌撥以資製辦著曾國藩張之萬楊昌濬卽飭藩運各司按照戶部單開各數速行撥交各該織造趕緊備辦毋得稍有稽延致誤要需將此各諭令知之○以禮部左侍郎察杭阿兼署兵部右侍郎兵部右侍郎黃倬兼署刑部左侍郎內閣學士錢寶廉署兵部左侍郎銘安署倉場侍郎○以鑲白旗漢軍副都統滿慶署正白旗漢軍副都統正藍旗蒙古副都統載良署鑲紅旗蒙古副都統○追予四川松潘等處陣亡殉難紳民張必達等暨婦女二百八十四名口分別旌卹如例○蠲緩湖南武陵安鄉龍陽益陽巴陵

臨湘華容澧沅江湘陰十州縣暨岳州衛被水地方本年額賦有差○丁巳諭內閣前因于凌辰奏西陵回乾樹株承辦司員舞弊情形當經諭令志和胡家玉嚴密查究茲據奏稱半壁店大街北有輔盛糧店與雙盛木廠毗連查閱雙盛木廠帳簿實係販運回乾樹株當將該木廠查封提取木商張得成高祥等嚴訊僅供與春七等合夥此外語多閃爍並查勘未伐樹株枝皮多有不全該管司員李春華鄭二雖據張得成等供稱並未合夥難保無詭名影射情弊等語陵寢樹株關係甚重既據查有合夥販賣情弊亟應嚴切根究尚膳正李春華郎中鄭二卽文明五品官春七卽防禦貴普均著暫行解任歸案審訊如有通同舞弊等情卽著從嚴叅辦○諭軍機大臣等左宗棠穆圖善奏鎮番肅清附省兵團勦賊獲勝左宗棠豫師奏

派員統軍彈壓及籌布後路防勦事宜各一摺鎮番踞匪經官軍擊敗全數西竄永昌穆圖善已飭總兵王仁和等跟蹤追勦務將此股賊匪悉數埽除毋令蔓延為患如兵力不敷即著左宗棠穆圖善酌度情形添兵前往援應皋蘭碾伯地方及省東轄境時有零匪竄擾雖經兵團勦辦獲勝惟省垣根本重地逼近河狄該處賊股眾多深虞竄突現在河冰凍結尤應加意嚴防著穆圖善督飭兵

隨時偵探防勦毋稍疏虞左宗棠亦當妥籌兼顧全積堡賊勢已蹙何以日久未見成功糜餉老師該大臣難辭其咎若再不振刷精神迅圖攻拔致以一隅之地牽掣兵力耗費餉需大局何堪設想南路秦階一帶時有賊蹤該處統領能否得力河狄巨股如何設法進剿左宗棠當統籌全局迅將全積攻克騰出兵力次第廓清不得以遠在平涼僅顧甘北一路致軍務總未得手也豫師現已會商

左宗棠將平番碾伯隘口布置嚴密以杜西甯回眾由米拉三溝竄出之路先派總兵黃武賢馳赴威遠堡整頓各營西碾平番近既安靖豫師當懷遵前旨馳赴本任會同黃武賢認真籌辦以重職守米拉溝窩藏陝回萬餘據豫師奏已分股竄赴甘涼一路著左宗棠穆圖善檄令甘涼防兵探明痛勦就地殲除毋留餘孽將此由五百里各諭令知之○戊午諭軍機大臣等錦丕勒多爾濟奏擬帶

蒙兵出境駐紮並請調員差委簡員管理孳生廠臺站事務文盛杜嘎爾奏遵飭馬隊陸續起程各摺片前因烏城被賊撲陷諭令錦丕勒多爾濟調集蒙兵力圖進剿現在賊既退竄烏城商民漸集彈壓撫綏均關緊要錦丕勒多爾濟自應在城會同福濟榮全籌辦一切以定人心著即折回烏城毋庸出境駐紮據奏賊向西南退去已過扎薩克圖汗部落刻下賊蹤究往何處仍著福濟等確切偵

探具奏。錦丕勒多爾濟既回烏城。所請調幫辦章京音得泰筆帖式成惠哈達哈三員。如有應行差委之處。卽著會商福濟等酌量調派。其孳生廠及喀爾喀臺站事務緊要著派多布欽扎木楚桑噶西哩一併幫同錦丕勒多爾濟辦理。此時內地援軍進發。豫備駝馬整頓臺站。均係刻不可緩。仍著責成錦丕勒多爾濟會同籌辦。不得以幫辦有人稍涉推諉。文盛等現已飛咨達爾濟由賽爾烏蘇轉

西前進。察哈爾後起馬隊及貢果爾所帶馬隊亦已定期起程。著卽催令迅速進行。黑龍江馬隊既經陸續抵宣。卽著趕給駝隻。飭令先行進發。其宣大步隊卽飭隨後啟行。並著杜嘎爾催齊吉林馬隊。剋期統帶前往。毋稍延緩。推河迤北臺站著福濟等懷遵前旨。趕緊設復。並寬備駝馬及蒙古包薪水等項。以便沿途支應。援兵不至稍有阻滯。福濟等俟援軍到後。著卽會商布置。探明匪蹤。相機防

剿。並派熟悉道路之嚮導官兵一同前進。以資得力。將此由六百里各諭令知之。○己未。諭軍機大臣等。蔣志章奏銘軍進紮中路。並派軍分防南北一摺。據稱劉銘傳統率所部到陝後。當卽飭令提督劉盛休等十四營進紮乾州。吳宏洛等九營分紮耀州。該提督復率親兵前往乾州駐紮。並商派提督譚仁芳各營移紮鳳翔。與李輝武一軍聲勢聯絡。北山一帶亦經嚴飭派防陝軍會哨分防等語。

著蔣志章劉銘傳飭令派出各營協力巡防。嚴密堵禦。毋任甘回竄擾陝疆。至北山自宜洛以達靖定。地廣人稀。游匪零回。時虞紛竄。並著蔣志章劉銘傳悉心會商。先就現在派防陝軍飭令隨時偵探。認真按捕。俟唐定奎一軍到陝。卽著飭令前進。以顧北路門戶。蔣志章卽飭成定康等舉辦賑糶。招集流亡。使游匪無從勾結。以靖邊陲。將此由四百里各諭令知之。○又諭。崇實吳崇奏通等黔省全

局事宜一摺據稱黔省軍務宜懲前此之失先清上游股匪改從都勻進兵若遽令周達武馳赴下游必至孤立無援等語昨因周達武馳赴貴州籌辦進剿並請添募兵勇當經諭令該提督與曾壁光妥為籌畫貴州軍務日久未見起色曾壁光周達武亟應設法整頓和衷商辦期於實事求是豈可各存意見卽著該撫等按照崇實等所奏及貴州現在情形悉心籌畫妥為布置以期迅掃賊氛早除民害儻因彼此意見兩歧致日久無功賊勢鴟張益甚恐曾壁光周達武不能當此重咎也將此由五百里諭知崇實吳棠曾壁光並傳諭周達武知之○庚申諭內閣御史彝昌奏請嚴肅門禁以杜弊端一摺禁門重地例禁綦嚴豈容閒雜人等任意出入若如該御史所奏紫禁城四門以內竟有貨賣食物人等私行往來實屬不成事體亟宜從嚴整頓著前鋒統領護軍統領各衙門嚴飭直班

官弁認真稽查隨時盤詰儻該官弁等仍前廢弛卽行據實嚴參毋稍徇隱以肅門禁而儆玩泄○諭軍機大臣等前因前內閣侍讀學士鍾佩賢奏浙江淞港壅塞請速籌疏濬當諭令楊昌濬查勘辦理茲據奏稱派員周歷淞港委係年久失修淤塞現在查明最要及較次各工分別估辦先於釐捐項下借款動工惟湖州淞港泥水壅灌多係蘇松下游淤滯請飭江蘇一體籌辦等語淞港關繫水利自應趕緊疏濬著楊昌濬卽督飭該處地方官赴此冬隙之際先將寺橋等最要之九港及諸沈二淞先行借撥款項趕辦其餘各工及碧浪湖工程亦應次第查勘分別興辦並著曾國藩張之萬迅卽遴派妥員查勘吳江縣長橋及太湖出水各口設法疏通與浙江同時並舉以期一律疏暢有裨民田將此各諭令知之○又諭奎昌文碩奏續探烏城情形請將前摺更正自請議處並陳邊防利

害請撥餉項火藥一摺奎昌等十月二十六日摺報業於十一月二十四日遞到當經寄諭該大臣等督飭官兵認真操練加意巡防並將調援兵數詳晰諭知想邊外各城一聞大軍將至聲勢自可增壯至奎昌等閏十月初九日專差齎遞摺件迄今未到所陳福濟等殉難情形自係得自訛傳著加恩免其議處科屬官兵來城收伍者僅有五六百名且賊蹤竄往扎棚河一帶去扎薩克圖汗與科布多屬交界不遠文碩自未便率旅束行致科城轉有空虛之患著該大臣等就現有兵加一面留城訓練一面偵探賊蹤與福濟等斟酌情形妥為進止奎昌文碩等請撥部餉火藥係為邊疆大局起見著戶部迅即籌撥銀十萬兩咨交順天府解至察哈爾由該都統派員護解赴科以應急需烏城前撥餉銀已由戶部解往如科城需餉孔亟即著福濟先行酌撥數萬前往俟科城餉項到時再行

扣還並著定安速撥火藥一萬斤火繩一萬盤遣派妥員解赴科城以資利用蒙古地方首以茶布代煙為日用所需現在賊蹤雖遠深恐商民惑於流言裹足不進則蒙民生計日蹙著定安出示曉諭商民俾令照常貿易以期食貨流通亦安邊之要務也達爾濟一軍已由賽爾烏蘇轉西前進察哈爾後起馬隊及貢果爾所帶馬隊亦已定期起程黑龍江吉林馬隊亦令陸續進發國家不惜數百萬帑金調集勁兵綏靖疆圉福濟等務當懍遵疊次諭旨將推河迤北臺站趕緊設復毋令援兵稍有阻滯仍將目前防勦各事宜悉心妥籌毋得再有疏虞致干重咎將此由六百里各諭令知之○又諭何瑄奏探悉南北兩路軍情一摺據稱接據防堵奇台龍口山勇目鄧生玉稟報南疆安集延率眾圍攻吐魯番屢將烏魯木齊赴援之賊擊敗並據烏魯木齊南山圍練勇目徐學功稟報聚集民

勇千餘與賊接仗連勝擒斬逆首多名山後
安集延酋長呼什伯克帶領所部回眾圍困
番城聲稱投誠報效徐學功已帶勇丁赴番
會勦稟請大軍西征擬調孔才一營前赴奇
古俟成祿出關即當親自帶兵會同進勦收
復各城等語回逆叛亂以來烏魯木齊各城
久未收復若如何瑄所奏是該逆已疊受圍
勇懲創吐魯番又被安集延圍攻機會大有
可乘惟此等軍情何以不與伊勒屯列銜具

奏至安集延酋長投誠報效事難遽信恐係
該回族等靈觸相爭欲借大兵自圖報復即
如妥得璘投誠之說至今未得確耗豈可輕
率聽信致為所紿著文麟景廉伊勒屯確切
查明如果各城賊勢窮蹙逆黨內訌自屬機
有可乘即著確實偵探悉心酌度會商何瑄
妥為籌辦何瑄仍不准單銜具奏以符體制
孔才一營能否調赴奇古駐紮著文麟景廉
斟酌情形知照伊勒屯何瑄辦理將此由五

百里諭知文麟景廉伊勒屯並傳諭何瑄知
之○吏部奏江西巡撫劉坤一漏洩密寄遵
旨嚴議劉坤一應比照例案於降一級留任
例上從嚴加等議以革職留任從之○辛酉
諭內閣步軍統領衙門奏舊太倉失火情形
一摺本月二十九日戌刻舊太倉不戒於火
延燒官廳六間廩房三間當經該官兵等撲
救息止該管各員未能先事豫防咎有應得
倉場侍郎及該倉監督著交部分別議處並

著倉場侍郎查明失火緣由有無別項情弊
及倉廩米石有無損失據實具奏

督昨已降旨交部分別議處外至該花戶所供十一月二十九日酉刻封閉倉門後戌刻忽見火起不知火所由來等語恐尚有不實不盡花戶李國棟著交刑部嚴訊有無別項情弊卽行照例懲辦尋奏遵訊失火之由據李國棟供係日間領米人多吸煙遺火所致調查該倉存米印冊覈與所供相符雖無別項情弊究係疏忽應革去花戶按律擬罪從之○諭軍機大臣等總理各國事務衙門奏

英國議定新約現欲中止大概情形一摺英國新修條約上年業經該衙門與英國使臣定議乃本年十月間據威妥瑪照會以新修之約彼國商民僉稱不便接到回文未經遵照復經該衙門駁斥該使仍以入告本國為詞故為延宕窺其用意不過欲俟布法諸國修約時別圖更改現法與布構兵未息自尚未暇議及修約而彼族所注意要求之款不可不先事圖維此時英國之約既未通行誠

恐各國洋商於新約中在彼有利之端或指定條款託言試辦或巧更名目含混請行萬一墮其術中將來辦理更行棘手著曾國藩李鴻章密飭各關監督嚴加防範豫杜影射蒙混之弊毋稍大意原摺均著鈔給閱看將此由五百里各密諭知之○補鑄江西德化縣通遠驛驛丞條記從巡撫劉坤一請也○癸亥諭內閣李鴻章奏請將營務廢弛之副將分別革職另補並揀員請補以期得力等

語開州協副將署大沽協副將張秉鐸擅離汛地鑽營取巧著卽革職留營效力大沽協副將署開州協副將興齡於練兵戰陣事宜毫無閱歷著開缺回旗以佐領補用所有大沽協副將員缺卽著羅榮光補授開州協副將員缺卽著張桂芳補授以資整飭○諭軍機大臣等前因太常寺少卿王家璧奏馬新貽被刺一案頗有傳聞當經諭令據實具奏茲據奏稱所得之傳聞者丁日昌之子被案

應歸馬新貽查辦。請託不行。致有此變。請飭將丁日昌之子原案再行查辦等語。該京卿所奏一節。僅係得自傳聞。且丁惠衡前因不能約束家丁范貴。閒游妓館。先經丁日昌自行奏明。交馬新貽審擬奏結。自毋庸再行提訊。惟既據該京卿陳奏。亦不可不令曾國藩等知悉。著曾國藩鄭敦謹。即將張汶詳悉心推鞠。有無另有主使之入。務得確供。以成信識。不得含糊草率。希圖遷就了結。原摺著鈔

給閱看。將此各諭令知之。○又諭有人奏。湖南郴州劣紳張國寶。在籍疊次攘功。濫得保舉。改義學為惜字會。藉以專利。張氏義川公田。改歸義學。並強奪李氏宗祠等語。張國寶身為紳士。自應安分守法。若如所參各款。實屬貪詐妄為。著劉崐確切查明。據實奏。毋稍徇隱。原摺著鈔給閱看。將此諭令知之。尋奏。遵查張國寶被參各款。均無確據。其積功得保。並無虛冒。惟得保時。收受賀儀。幫項究

屬不合。應請交部議處。從之。○直隸總督李鴻章奏。遵議英翰奏請添設海防提督一員。欲求威望素著之將。實難其選。兵事止論強弱。不在職分。應請從緩。再行酌奏。下部議。從之。○以左春坊左中允鍾寶華。右春坊右中允徐致祥。充日講起居注官。翰林院侍講楊慶麟。林天齡。左春坊左贊善王之翰。署日講起居注官。○賞圖謝圖汗二等台吉。那遜巴雅爾二等侍衛。在大門上行走。○追予湖南

陣亡知縣魏承祝教諭吳棠。於衡陽湘潭二縣原籍各建專祠。○甲子。諭內閣。前因署工部侍郎于凌辰奏。

西陵樹株承辦司員舞弊。並自請議處。當派志和胡家玉前往查辦。旋據志和等查明。職官入夥販運各情。當經降旨。將尚膳正李春華等解任。審訊。茲據該侍郎等查勘各處樹株。與歷年冊報相符。委無翦剝情弊。並審明職官夥同販運情事。定擬具奏。此案尚膳正李

春華雖無夥開福盛糧店等事惟以承辦招商變價之員輒與商人合夥致滋物議防禦貴普卽貴溥以職官合夥販運均有應得之咎著一併交部嚴加議處卽中文明喜春員外郎常松承辦招商變價事宜並不妥為經理致商人高詳等於驗貨後陸續將貨取回辦理已屬不善文明又商令貴普春華入股尤為不能遠嫌文明喜春常松均著交部分別議處守護公榮願載遷泰甯鎮總兵兼總

管內務府大臣清安揀派喜春等辦理變價未能妥協並於貴普等販運各情漫無覺察亦難辭咎均著交各該衙門議處另片奏回乾樹株可否另招殷商變價抑仍解交易州工部存儲等語著工部妥議具奏至商人高詳等所交樹價並支用運費多有轉轆並著該管大臣詳查辦理于凌辰上年未能將樹株情形查出亦屬疏忽著交部議處○又諭御史奇臣奏請豫籌修防河工一摺東河隄

防最關緊要在事各員自宜先時籌畫所有購料築壩等事均應覈實辦理若如該御史所奏竟有不肖廳員私行干謁難保無交通差弁剋減工料侵蝕帑項等情著河東河道總督嚴密察訪如有前項情弊卽行嚴參另片奏請嚴禁東河地面私立廟宇等語並著該河督一併嚴行禁止○諭軍機大臣等福濟榮全奏豫籌催調官兵安設糧臺一摺前因烏城賊匪向西南退去諭令文盛等飛咨

達爾濟由賽爾烏蘇轉西前進催令察哈爾後起馬隊及吉林黑龍江馬隊陸續進發現在賊蹤未知究往何處所有前項奉調出口官兵仍著文盛杜嘎爾遵照前旨迅催前進隨時知照福濟等將此項援兵妥為布置探蹤防剿福濟等以大兵漸集糧餉亟宜豫籌請飭直隸山西酌派實缺道府出口在賽爾烏蘇一帶督辦後路糧臺前據文盛等奏報業於頭臺賽爾烏蘇適中之地添設支發轉

運一處。當諭錦丕勒多爾濟張廷岳等。於烏庫兩城所屬各臺酌度地勢。應在何處安設接運福濟等。此次所請直晉派員出口督辦糧臺。著李鴻章。何璟斟酌情形。咨商福濟等妥籌辦理。將此由五百里各諭令知之。○禮部以明年元旦慶賀禮節。請得旨是。照例行禮。奉

慈安皇太后

慈禧皇太后懿旨。停止筵宴。其在外公主福晉

命婦進內行禮之處。並著停止。○予烏里雅蘇台陣亡內閣侍讀慶春等四十員暨殉難婦女十九口。分別旌卹如例。○乙丑諭內閣。前因

永陵草倉河新修工程。被水衝淘。當經降旨。仍派單懋謙恩承前往承修。其

陵街西堡土隄泊岸原修工程。未能堅實。並責成單懋謙恩承。另行賠修。此項工程。著添派都興阿會同單懋謙等認真修理。務臻鞏固。

嗣後盛京一切緊要工程。遇有派出大員承修者。均著盛京將軍會同督修。○又諭給事中夏獻馨奏。已故安徽巡撫程楙采墳墓在江西新建縣古木岡地方。突於本年閏十月十七日被匪徒乘夜發掘。並將骸骨焚燒拋棄。請飭究辦等語。發掘墳墓。法所必懲。該匪徒膽敢將已故大員發冢毀屍。實屬兇殘。已極。著劉坤一。卽飭地方官將該匪徒等迅速拏獲。從嚴懲辦。不准一名漏網。○丙寅。蠲緩

湖北公安。沔陽黃梅監利廣濟。江夏咸甯嘉魚蒲圻漢陽黃陂孝感黃岡蘄水。鍾祥京山。潛江天門雲夢應城。江陵石首松滋枝江荊門蘄武昌興國大冶漢川。三十州縣暨武昌沔陽二衛被水地方。新舊額賦有差。○丁卯。孝惠章皇后忌辰。遣官祭

孝東陵。○諭軍機大臣等。金順奏官軍攻勦情形一摺。王家疃踞匪疊經官軍痛剿。外援已絕。復經金順會同張曜督飭各軍攻破外濠。

賊壘並先後開挖地道多處轟倒礮樓寨牆
殲賊多名惟因寨牆之內復有濠牆阻隔賊
得憑牆拒守我軍攻撲數次未能迅克著金
順會商張曜督令各營奮力進攻迅將王家
疇莊賊巢剋期攻拔不得遷延粉飾日久無
功當此長圍已合金順等尤當嚴密防範毋
任賊眾乘閒竄逸甯夏城防亦應相機布置
沙金托海一帶為糧運要路著即咨照劉廷
協力防護毋令匪蹤滋擾將此由五百里諭

令知之○予甘肅王家疇陣亡副將丁德西
參將孫德麟遊擊唐廣興都司何遠鎮丁采
庭祭葬世職加等○戊辰諭軍機大臣等曾
璧光奏黔省籌辦捐餉一摺據稱黔省地處
極邊民窮財盡專賴捐輸一項接濟甘省既
准另撥省分自行辦捐黔省事同一律亦須
酌設專局緩急方有所資除山西陝西河南
三省仍歸該省專設甘捐外所有廣東山東
兩省應仍歸黔省設局專辦此外浙江福建

二省應與江蘇湖北湖南等省併照部議仿
江西辦捐章程統由各省督撫自設收捐總
局所收捐項本省毋庸留支作為甘黔兩省
軍餉各半提解仍由黔遴員分赴浙江等省
幫辦等語黔省地方瘠苦周達武現統所部
抵黔軍餉支絀自係實在情形著左宗棠按
照所陳各節與曾璧光妥為籌辦其餘各省
並著曾璧光咨商各該督撫會同辦理務臻
妥協曾璧光原摺著鈔給左宗棠閱看將此

由五百里各諭令知之○巴林頭等台吉阿
拉瑪斯巴咱爾於養心門內瞻覲○己巳諭
內閣前因溥霖等奏章京多福呈訴祭田指
租先後稟詞互異當派寶珣賀壽慈前往會
同溥霖等秉公訊究茲據該侍郎等奏稱連
日提訊該章京供詞閃爍並據供出該員原
稟戶部清單係家住東交民巷之戶部書吏
陳秀峰給彙謄鈔請將該章京革職審訊並
請飭拏陳秀峰到案質審等語防禦多福著

暫行革職。交寶珣等從嚴訊究。並著步軍統領衙門順天府五城將書吏陳秀峰一體嚴拏。務獲派員押解前往歸案訊辦。毋任漏網。○諭軍機大臣等。定安奏殺軍會擊回匪。連獲勝仗一摺。陝回余彥祿等眾踞匪通昌。騎賊竄及保豐一帶。經提督劉廷派隊馳擊。擒斬多名。該提督即會同金順所部各軍進剿通昌。連獲勝仗。現因各隊裹糧將完。統軍暫回石嘴。此次余逆等眾雖經官軍擊敗。仍未

大受懲創。通昌踞匪尚有二千餘人。難保不乘虛竄擾。石嘴為各軍屯糧之所。尤關緊要。著定安飭令劉廷一面將石嘴磴口平羅等處嚴密防守。以通糧運。一面勤加偵探。遇賊即擊。務將此股賊匪悉數殲除。毋留餘孽。將此由五百里諭令知之。○又諭本年十月間突有賊匪四千餘名。撲陷烏里雅蘇台。據張廷岳等探明。係屬肅州回股。該匪徒現已沿途飽掠。仍回肅州。若不將醜類悉數殲除。大

為沿邊之患。臺站遼闊。賊蹤來去自如。本年春夏閒時。有零股竄擾察哈爾庫倫烏里雅蘇台之事。至冬閒竟成大股。竄陷烏城。是肅回出邊滋事者。實繁有徒。肅州一帶賊巢正復不少。成祿辦理肅州軍務。未能一律肅清。以致匪徒充斥。蹂躪地方。亟應趁此賊股回巢。痛加剿洗。及早鏟除。儻任伏莽潛藏。乘隙再逞。必又掣動內地兵力。成祿本令暫駐關外。就近兼顧肅州。著即振刷精神。迅將該處

賊巢掃除淨盡。務絕根株。左宗棠亦當統籌全局。撥兵會剿。不准稍存膜視。再據張廷岳等奏探聞有賊千餘。在烏喇特地方游弋。圖擾甯夏糧道。並著左宗棠隨時知照。定安金順勤加偵探。妥為防範。將此由五百里各諭令知之。○又諭張廷岳阿爾塔什達奏遵設轉運糧臺及應行籌辦各事宜。並宣大官兵不可遽停暨撥兵防守。推河各摺片口外用兵轉運最關緊要。張廷岳等擬在察哈爾所

屬之霍呢齊臺及烏城所屬之推河臺兩處設立轉運糧臺揆之道里遠近尚屬適中卽著福濟文盛等按照所陳妥為籌辦並各撥官兵分赴該兩處戍守以資防護烏城退出賊匪雖已飽掠回肅而烏喇特地方尚有賊匪千餘難保不乘虛竄突且庫倫獲賊供稱有探明庫屬路徑擬於明春撲犯等語是邊外防守仍不可一日稍鬆致蹈烏城覆轍達爾濟頭起馬隊前據文盛等奏已咨令由賽

爾烏蘇轉西前進察哈爾後起馬隊亦已定期起程此時計已陸續進發文盛等卽當將駝隻帳房等項妥速籌畫催令宣大官兵趕緊出口迅赴庫倫以資防剿毋得再以冰凍草枯支應艱難為詞因循貽誤至宣大兩處之兵均係派往戍守庫倫張廷岳等擬將大同官兵月需糧食由推河糧臺支領宣化官兵月需糧食由霍呢齊糧臺支領霍呢齊尚距賽爾烏蘇不遠推河則在庫倫大西轉輸

不易仍著張廷岳等斟酌情形力任其難毋得稍涉推諉致誤事機喀爾喀四部落地方時有土匪竊發著張廷岳等隨時嚴拏懲辦務絕根株所請飭令西路統兵大臣直擣肅州賊巢一節已諭令左宗棠成祿相機辦理矣張廷岳等因錦丕勒多爾濟劄調東兩盟蒙古官兵駐紮推河已將協防官兵二百名全數撤回卽著錦丕勒多爾濟將此項撤回官兵歸併西兩盟派出各軍分布要隘藉資

備禦將此由六百里各諭令知之○旌表守正捐軀河南鄧州民段承信妻宋氏○科爾沁扎薩克圖謝圖親王巴寶多爾濟等五人蘇尼特扎薩克郡王托第布木等二人扎嚕特鎮國公達瓦甯保阿巴噶卓哩克圖郡王剛噶爾倫布等二人教漢貝子達克沁翁牛特輔國公克什克阿爾畢濟琥克什克騰扎薩克公銜頭等台吉畢瑪拉吉哩第烏珠穆沁公銜頭等台吉堆代扎布巴林二等台吉

色旺諾爾布。喀爾喀扎薩克頭等台吉拉布坦多爾濟等二人。於養心門內瞻觀。○庚午諭內閣。浙江學政徐樹銘奏。採訪儒修各摺片。覽其所奏。請將已革翰林院編修俞樾賞還原銜。交翰林院帶領引見。聽候錄用。署秀水縣學教諭譚廷獻等。飭部卽選。特予召試。秀水縣舉人趙銘並江西拔貢生楊希閔等。均比照博學宏詞及拔貢優貢朝考之例。特予廷試。各等語。實堪詫異。俞樾前於咸豐年

閒。在河南學政任內。因出題割裂荒謬。已極奉

旨革職之員。何得擅請錄用。至召試博學宏詞。必須特旨舉行。卽拔貢優貢朝考之例。亦係國家定制。非憑空所能比擬。徐樹銘輒為俞樾乞恩。意存嘗試。並臆舉多人。遽請特予廷試。實屬私心自用。謬妄糊塗。所請均不准行。徐樹銘著交部嚴加議處。尋議徐樹銘應降四級調用。不准抵銷。從之。○又諭都興阿奏

差役疏縱盜犯分別擬辦一摺。奉天盜犯劉萬才。經都興阿訊明。飭令押赴市曹正法。乃該犯於收禁時。賄屬散役薛義存等。暗地更換木杓。致該犯於押提出獄時。乘閒脫逃。薛義存行至半途。並故意落後。一任該犯遠颺。訊據薛義存供認。確有受賄。另換刑具知情。故縱等弊。實屬不法。已極。若照尋常疏縱盜犯辦理。殊不足以昭炯戒。薛義存著卽行正法。並著都興阿等。將逃犯劉萬才趕緊緝拏。

務獲毋任漏網。尋奏劉萬才逃至大瓢爾屯地方。糾眾行劫。經官兵追捕。該犯情急自戕。報聞。○兩江總督曾國藩奏。甫經蒞任。請將本年軍政展緩辦理。從之。○湖廣總督李瀚章等奏。鄂省應造漕運剝船。請將價銀解赴直隸代造。下部知之。○改鑄呼圖克圖印信。頒給喇嘛棍噶扎勒參。從定邊左副將軍福濟請也。○辛未。諭軍機大臣等。劉嶽昭岑毓英奏攻克鄧川浪穹兩城。並馬如龍傷痊進

兵各摺片。鄧川浪穹兩城久為賊踞。經劉嶽昭等派令總兵楊玉科督兵進剿。先將浪穹縣城攻克。旋即分兵進攻鄧川。立時克復。並先後攻拔鳳羽白米莊長邑村鍊鐵橋後各賊巢。擒斬甚多。勦辦尚為得手。楊玉科裹創力戰。實屬奮勉可嘉。現在大理北路業已肅清。賊勢愈孤。著劉嶽昭岑毓英飭令該總兵將收復地方分兵固守。毋稍疏虞。一面相度機宜。穩慎進取。並著飭令李維述等合力攻

勦。以期擣穴擒渠。早除巨患。馬如龍傷疾已痊。現擬出省勦賊。具見任事勇往。著劉嶽昭等趕緊籌給餉項。俾得剋日起程。將東溝等處賊巢迅籌掃蕩。前據劉嶽昭等奏。潞江業已合圍。近日攻勦情形若何。即飭岑毓英等力圖攻克。毋稍遲延。將此由六百里各諭令知之。○山西巡撫何璟奏。動賑常平倉穀一千五百石。撥運陝西。作抵晉省應解辦賑銀兩。報聞。又奏邊境尚未肅清。請將本年軍政

展緩辦理從之。○以故教漢郡王布彥德勒格呼固魯克齊繼子察克達爾扎布襲爵。○以記名總兵官楊玉科為雲南開化鎮總兵官。○以籌辦善後妥協。予雲南撤任副將楊盛宗以總兵官簡放。○以雲南克復尋甸等城出力。賞總兵官楊致林劉令集副將吳奇忠。○一品封典。副將李文才。廖復勝。李敬修。范有恆。遊擊韓徽。巴圖魯名號。知府蘇長。豐參將劉青照等花翎。知縣德生等藍翎。餘加銜

升敘有差

番及甘郡城下均有賊股屯聚山丹高臺兩縣復有匪蹤尤須懾以兵力成祿後隊著卽駐紮高臺將關內附近地方隨時防勦以遏狂氛其頭起三營業已出關應否折回或卽在關外分紮著成祿妥為調度至張掖等處運省倉糧前已准成祿提用著左宗棠飭令該地方官源源運濟毋令缺乏甘涼兩郡賊股已不下二三萬若不及早掃除必至四出為患著左宗棠迅卽撥兵前赴甘涼一帶探

蹤追勦以期西路肅清成祿請調吉林黑龍江馬隊交常順統帶赴營前已未允所請仍著毋庸置議山丹被賊圍入何以楊占鰲派防兵勇次日始入城堵勦署知縣張秉恬及署提督楊占鰲貽誤情形著左宗棠查明具奏署遊擊孫啟後拒賊身死並其餘各員下落著一併查奏原片著鈔給左宗棠閱看成祿另片奏請赴海疆效力此時津案業經辦結所請著毋庸議將此由五百里各諭令知

之 以甘肅高臺擊退竄匪予千總巨興德以守備用並賞花翎韓福等藍翎徐升欽有差 追予山東曹縣陣亡千總袁炮監生李興若賞卹加等並予建祠 追予山東東阿等處殉難州同周洛書等紳民婦女三百六十五員名口分別旌卹如例並予建祠 癸酉

孝德顯皇后忌辰遣官祭

定陵 諭內閣桂清奏請嚴密繙譯鄉會試及

考試拔貢關防一摺繙譯鄉會試及考試八旗拔貢均係國家掄才大典如該侍郎所奏近日考試繙譯歸併文場關防不能嚴密士子專占一號既不免有代債等弊且士子十六日出場十八日始行奏派閱卷十七日一日竟無關防亦難保無請託情事至考試八旗拔貢卷面雖揭浮籤仍將佐領之名註於旗分之下殊不足以昭慎重著自明年會試起繙譯鄉會試均改復舊制其考試八旗拔

貢並著自同治癸酉科為始由部頒發卷面
字式永遠遵行以重關防而杜弊竇又諭
李瀚章郭柏蔭奏查明庸劣不職各員請分
別降革勒休一摺湖北施南府同知熊兆鼎
心性麤浮不諳吏治蒲圻縣知縣楊思謙委
靡不振聲名平常試用知縣譚惠海才具平
庸辦事踴躍均著以原品休致候補知州姚
時熙遇事顛預居心貪鄙試用通判莊文波
品地卑污人亦委瑣東湖縣知縣竇達生使

酒任性心地糊塗通山縣知縣張炳元治理
乖謬才具平常候補知縣李良璧人極麤庸
嗜好甚重補用知縣竇凌漢性情鄙詐辦事
乖方均著即行革職南漳縣知縣趙文蔚才
欠開展聽斷未嫻著開缺以州判降補以肅
吏治諭軍機大臣等單懋謙奏再陳
陵工西堡泊岸屢形一摺據稱泊岸情次被衝
實由河水漫溢自上衝淘所致河身被淤漸
高若以虛懸無根之椿固鬆散易瀉之沙土

衝淘於波浪中工程難期穩固鉅款即屬虛
糜仍請仿照西堡迤西石隄辦理等語

陵工關繫甚重近年蘇子河水勢派發自應妥
籌辦理以為一勞永逸之計著都興阿奕慶
按照所奏情形詳細斟酌奏明辦理並將泊
岸應行酌鑲柴埽以資保護之處一併確查
具奏原摺著鈔給閱看將此各諭令知之○
又諭何璟奏奉調大同官兵仍飭由張家口
出邊一摺山西大同鎮官兵業經何璟籌撥

糧餉齊集天鎮取道張家口行走係由賓爾
烏蘇往庫倫大路若令折回大同向歸化出
口程途既多紆折駝隻又艱於供應察哈爾
本有調撥商都等處及借用錫林郭勒十旗
駝隻輪轉馱載足敷應用所有奉調大同官
兵著照何璟所請飭由張家口出邊以期便
捷仍令暫紮天鎮由何璟探明接續進發免
致擁擠應需軍火餉項該撫務當按月籌解
撥令歸綏糧臺轉運接濟毋稍缺乏此項官

兵到口時。著文盛杜嘎爾隨時出料飭令分
起出邊需用駝隻等項。會飭臺站妥為應付。
不得稍涉推諉。察哈爾後起馬隊及宣化吉
林黑龍江官兵。何日出口。如何分起前進。著
文盛等趕緊料理。毋稍延緩。並著隨時奏聞。
將此由五百里各諭令知之。○又諭錦丕勒
多爾濟奏調集蒙古官兵。豫籌堵剿一摺。前
因賊匪退竄。當經諭令錦丕勒多爾濟卽駐
烏城。會同福濟榮全籌辦一切。茲據奏稱。現
駐烏城附近臺站。飭西兩部落於前調官兵
二千名內。揀派千名。擇有水草地。分紮操
練。備調其餘千名。仍令各防該旗遊牧邊境。
該參贊整齊蒙兵。卽前往扼要堵禦等語。逆
回現雖遠颺。難保不乘虛回竄。卽著錦丕勒
多爾濟確探賊情。熟審地勢。整頓蒙古官兵。
飭往扼要防剿。一切進止機宜。福濟榮全。錦
丕勒多爾濟仍當會同商辦。並將東竄庫倫
恰克圖兩路要隊。豫為防範。毋稍疏虞。其科

布多一帶兵力。本單賊蹤紛竄。靡常亦應妥
籌防守。棍噶札勒參一軍。卽著知照奎昌等
飭令暫駐科城。如續有賊匪回竄。仍卽剴調
來烏助剿。以厚兵力。該將軍等務當多設偵
探。先事防維。毋致臨時竭蹶。再蹈覆轍。將此
由五百里各諭令知之。○命翰林院修撰徐
郵仍在南書房行走。○旌表守正捐軀四川
永川縣民石生福妻高氏。○乙亥諭內閣。御
史許廷桂奏請飭各部堂官常川進署等語。
在京各衙門堂官。皆有應辦之事。職守攸關。
自應常川進署。與司員等遇事講求。豈容稍
涉懈弛。若如該御史所奏。各部堂官近來進
署辦事者甚少。司員每於該堂官聽宣直日
之便。攜橐至朝房呈畫。甚至赴私宅畫行。此
等情形。實難保其必無。嗣後各部院堂官。務
須逐日到署。將各該衙門公事認真辦理。力
戒因循泄沓之風。毋得仍蹈故轍。致員諄諄
誥誡至意。○又諭御史許廷桂奏請整頓吏

治一摺向來捐納人員試用期滿勞績人員到省一年均由該督撫察看甄別必須嚴定去留方足以示勸懲近來該督撫於各項人員甄別時大率填註籠統考語概予留用雖有繁簡之分從無降斥之請致定例皆屬具文殊非覈實之道嗣後著各直省督撫恪遵定例於道府州縣等官到省時無論捐納勞績認真察看如果係為守兼優堪膺民社之員卽出具切實考語分別繁簡奏明補用如

才具未能勝任卽東公叅劾或酌量改補降補毋稍姑容其實缺及正途人員亦應隨時考覈以肅官方○又諭前據李鴻章奏保前任詹事府右中允馮桂芬請賞加三品卿銜當經降旨允准嗣經吏部以覈與定章不符奏駁茲據李鴻章奏稱馮桂芬品端學邃體用兼賅懇恩獎勵等語馮桂芬著改為賞加三品銜以昭激勵○又諭定安奏營弁奉差釀命畏罪潛逃請旨斥革嚴緝並請將副都

統交部察議一摺花翎都司銜儘先守備陝西漢中鎮城守營額外委齊步雲於本年五月閒因富勒琿差委辦駝運糧在茂明妥旗屬打忽爾梁地方率同兵丁十名與禿舍八旗蒙古阿堯爾等互鬪槍傷阿堯爾身死並據齊步雲稟稱未滋事之先因蒙古不允充差曾具稟派領催奎亮回營投遞由台吉免旺之家派令魯勒扎布引路西去至今未回嗣據魯勒扎布等供稱奎亮被打身死經

定安咨提齊步雲歸案審訊乃該弁始則藉病耽延繼復乘閒逃逸顯有情虛畏罪情事齊步雲著卽行斥革一面由定安咨行陝甘總督陝西山西各巡撫飭令地方文武一體嚴拏務獲解交綏遠城歸案訊辦並著定安咨會西路各軍營如遇齊步雲投營卽行拏獲解赴歸綏毋任漏網並將致死阿堯爾奎亮兩案一併按律懲辦副都統富勒琿派員不慎亦有失察之咎著交部察議○命車臣

汗貝勒幹丹丹準車林貝子德濟特多爾濟圖謝圖汗頭等台吉齊默特多爾濟在御前行走。圖謝圖汗貝子那木濟勒都布車臣汗頭等台吉車林端都布在乾清門行走。○以山西綏遠城等處勦匪運糧出力予侍衛額勒恆額等加銜升敘有差。○以山西綏遠城官兵援勦茂明安馬賊出力予都司冉鳳文等加銜升敘有差。

上奉

慈安皇太后

慈禧皇太后幸漱芳齋侍午膳。○諭軍機大臣等戶部奏理各國事務衙門奏廣東徵收洋藥正稅請飭自行覈實辦理一摺據稱接據赫德申稱香澳併徵洋藥正稅粵省既不承辦該省洋藥稅走私甚多擬在附近香澳等處設立公所代關納稅已將巡查洋稅之輪船調赴廣東委副稅務司專司其事每月需經費銀一萬兩年終計可多徵洋藥稅銀四

五十萬兩等語廣東洋藥稅偷漏甚多該省雖派有輪船查緝甚不足恃若謂徵稅不便於商情何以赫德獨能辦理使瑞麟等果能興利除弊則稅務自日有起色何至洋人越俎代謀據該稅務司所稱每年多徵之數可至四五十萬是已確有把握惟華商納稅係該省應辦事件地方官吏豈可置身事外著瑞麟崇禮按照赫德原申各節及戶部等衙門此次所奏即於收釐處所帶收正稅由該

督等自行商辦總在巡緝認真嚴防偷漏毋得任令委員蒙混以除從前積弊月需經費銀兩准由該督等自行覈定正稅按三十兩之數徵收仍於年終將總數報部惟利源所在洋人每生覬覦現如自行商辦必實無走私偷漏情弊方為覈實辦公不至為洋人所竊笑該督等務即詳定章程斟酌妥辦不得稍事顛預亦不准稍涉推諉原摺著鈔給閱看將此由五百里諭知瑞麟並傳諭崇禮知

之。又諭前據魁玉張之萬奏審明故督馬新貽被刺一案摺內所稱該故督任浙撫時疊勦海盜甯台兩屬擒斬甚多仍有匪黨漏網以致張設祥挾仇行刺並風聞浙省刺案尚不止一起粵省又有特力入署之案等語如果屬實是盜匪肆意橫行此風斷不可長亟須嚴拏務獲淨絕根株著瑞麟楊昌濬各飭地方實力查拏嚴行懲辦以息盜風而靖疆圉並將該省有無此等案件查明據實具

奏將此各諭令知之。又諭英桂王凱奏奏捕獲江省齊匪現飭根究按緝一摺福建崇安浦城交界之黃柏山及鐵廠山一帶聚有江西齊匪多人希圖起事經各該營縣拏獲匪犯王馬吉等八名訊係聽從匪首張變理等糾邀入黨張變理先在江省與朱葛亮等結拜弟兄約期圍攻浦城句約難民入關滋事因官軍勦捕各散朱葛亮等屯聚江西鉛山縣之十三都捕拏未獲閩省現派弁勇密

赴江西購捕匪首著劉坤一嚴飭該地方官查明首夥人數及朱葛亮彭洪勝等實在蹤跡會同嚴密按捕毋令一名漏網此次齊匪希圖入關滋事雖經立時撲滅逸匪遠颺猶恐伏莽潛藏乘隙勾結邵武各屬均與江西毗連崇安浦城又與浙省連界必須一體認真盤查毋任此拏彼竄著英桂王凱奏楊昌濬劉坤一各飭所屬查探匪蹤按捕淨盡務絕根株江西撫州一帶難民千百成羣由九

江至湖坊雖因閩省有兵堵截未敢入關此起難民究竟如何安插已否遣散英桂王凱奏劉坤一務當悉心會商妥籌安置毋稍之意將此各諭令知之。又諭英桂等奏福建廈門地方訪有遣散游勇聽糾結會當經飭屬嚴拏旋據該官文武陸續拏獲哨弁曾廣幅暨會夥葉兆紅曾作華林步雲吳小章等犯訊據該犯曾廣幅供認聽從張大源即張淙源等結會不諱並繳出八卦圖布等件當

於訊明後正法。首犯張大源已改名張備修。逃回湖南原籍。現飭訪拏等語。著英桂、王凱泰仍飭各該地方官認真訪拏。並據劉崐督飭所屬將逸犯張大源即張備修嚴密緝獲。解交福建歸案訊辦。毋任漏網。將此由四百里各諭令知之。○又諭李鶴年奏奉撥防軍詩緩調往何璟奏布置河防各一摺。前因甘肅甯靈一帶賊匪被勒窮蹙。恐其竄擾蒙古地方。當諭李鶴年飭令駐紮潼關之李承先

一軍調回北路。以厚兵力。茲據該撫以李承先所部本屬無多。現在派往韓城等處追剿回匪。刻下金積堡踞回勢感思竄。恐零匪潰勇乘間出關。豫省邊防喫緊。該軍情暫緩移動。所奏亦屬實在情形。李承先一軍即准其暫緩調往。並著李鶴年飭令會同馬德昭嚴密巡防。以顧豫省門戶。如宋慶必須添兵。即令該軍迅速前往。以資得力。著劉銘傳酌度辦理。金積賊巢日久未拔。王疇踞匪尚在負

隅。陝省此山游匪出沒靡常。晉省河防正關緊要。何璟布置一切尚屬周妥。仍著飭令李慶翱等軍聯絡聲勢。實力梭巡。毋稍鬆懈。延榆綏一帶逼近晉疆。並著蔣志章、劉銘傳分派得力隊伍。力圖兼顧。王名溍新募略式四營。前經蔣志章派令由韓城前赴宜川。力扼龍王辿要津。一帶著該撫飭令迅速到防。俾資堵禦。將此由五百里各諭令知之。○又諭甘肅金積堡逆回馬化龍負固日久。疊經諄

諭左宗棠督飭將士迅圖剿洗。該大臣自十一月十九日奏到擊敗柳林溝等處援賊以後。未見奏報朝廷殊深廬繫。本日據李鶴年何璟摺內均有馬化龍自縛投誠之說。該逆狼子野心。屢降屢叛。此次如有乞降情事。恐係緩兵潰圍之計。近日金積堡圍攻情形究竟若何。該大臣務當悉心察度。賊情萬不可為賊所紿。仍當嚴飭在事各軍一面遏賊援應之路。一面激勵將弁。星速設法殲除。毋得

敷衍了事。隨賊詭謀致貽後患。並將現在軍情據實馳奏。將此由六百里諭令知之。○又諭文盛杜嘎爾奏達爾濟一軍行抵賽爾烏蘇。阻滯不能前進。一摺。據稱達爾濟一軍現已行抵賽爾烏蘇。惟查推河等處臺站官兵寥寥無幾。駝馬帳房等項數亦無多。且管理五臺之台吉吹扎普等。被警後迄未歸臺。拜達拉克等十臺亦被賊擾。又無氈房。哈爾尼敦起至沙拉嘎勒卓特臺。雖未被擾。而積雪深厚。生畜疲瘁。大兵不能前進。現飭該總管暫在賽爾烏蘇。迤西各臺分隊駐紮。豫備進發等語。推河以北潰散各臺。疊經諭令福濟等趕緊設復。以利師行。乃為日已久。而臺站仍未整頓。實屬因循疲玩。塞外風雪嚴寒。糧食稀少。儻分紮各軍。因天寒餉缺。或有譁潰之虞。福濟等豈能當此重咎耶。即著該將軍等迅將哈爾尼敦等二十臺站應備駝隻薪。水蒙古包等項。無分晝夜趕緊一律豫備妥

協。並將援兵乘騎派員解赴經過各臺。俾大軍得以遄行。不至阻滯。毋得再有遲延。自干罪戾。文盛杜嘎爾仍當督飭達爾濟約束附循設法相機前進。並催後起各隊接續進發。毋稍觀望。前竄烏城賊匪首逆係何名姓。現在究竄何處。並著福濟等查明據實具奏。將此由六百里諭令知之。○是日辛未年立春。順天府進土牛春山寶座。丁丑諭內閣。御史劉國光奏請整頓京城捕務一摺。京城地方理宜嚴肅。若如該御史所奏匪徒白晝搶奪聚夥訛詐乘夜放火各情。亟應嚴行懲辦。著步軍統領衙門順天府五城一體飭令所屬地方文武務將該匪徒等嚴密查拏。按律懲辦。毋得稍有疏忽。○諭軍機大臣等。錦丕勒多爾濟奏確探賊蹤。整飭臺站。並請飭催部餉各摺片。昨因文盛等奏達爾濟一軍行抵賽爾烏蘇。臺站阻滯不能前進。當經諭令福濟等趕緊妥辦。以利師行。此次錦丕勒多

爾濟摺內聲稱各處臺站僅通文報尚未整齊等語是疏通整飭之說不過徒託空言並無實效實屬因循貽誤臺站係錦丕勒多爾濟專責前派多布欽扎木楚等幫辦臺務時卽諭令該參贊大臣妥為會辦不得以幫辦有人稍涉推諉著懍遵前旨及昨日寄諭與福濟榮全迅將哈爾尼敦等二十臺站應用駝隻薪水蒙古包等項迅速豫備妥協卽知照杜嘎爾督飭達爾濟等軍陸續進發捍衛

邊疆儻再玩愒因循致大軍中途梗滯貽誤事機必惟錦丕勒多爾濟等是問前據張廷岳等奏在霍呢齊暨烏城所屬之推臺各設轉運糧臺並派兵戍守著福濟等遵照本月初八日諭旨趕緊設法辦理至烏城餉需緊要已於閏十月十一日經戶部奏撥部餉二十萬兩由察哈爾運解赴烏並於山東山西河南兵撥銀三十萬兩飭令分路解赴烏城所有部餉二十萬兩此時許已運解在途卽

著福濟等派委員弁沿途迎護一俟解到卽斟酌情形撙節動用錦丕勒多爾濟與福濟榮全同辦一事總當遇事會籌和衷共濟不得自分畛域嗣後應奏事件著會同福濟榮全聯銜具奏所請軍需則例本日已令戶部由驛頒發矣賊蹤究竄何處仍著福濟等查明具奏將此由六百里各諭令知之○以故二等子兼一騎都尉英惠繼子經額哩襲爵○蠲免兩浙仁和海沙鮑郎蘆漚橫浦浦東

六場坍廢竈地本年額徵賊課額爾喀扎薩克郡王鄂特薩爾巴咱爾等二人喀喇沁輔國公維羅布忠肅蘇尼特輔國公瑪哈西哩歸化城土默特輔國公格木丕勒多爾濟科爾沁額駙棍布色楞敖漢郡王察克達爾扎布杜爾伯特扎薩克貝子格里克巴勒珠爾翁牛特鎮國公永龍於養心門內瞻覲○戊寅予故安徽皖南道程銑河南汝甯府升府升任道員費庚吉廣西左江道吳德徽入

祀名宦祠。從巡撫英翰李鶴年蘇鳳文請也。
○予安徽故內閣中書程組廣東故吏部郎
中雲茂琦山東故兵馬司正指揮王青熙浙
江故山東運河道宗稷辰湖南東安縣知縣
曾鏞舉人范炳華直隸故安徽池州府知府
馬允剛舉人王仲倫歲貢生閻彬廣西故山
東登州府同知卓爾舉人路順德江蘇故直
隸三河縣知縣劉寶楠生員張省齊監生姚
椿福建故山東臨邑縣知縣莫樹椿甘肅故
直隸卽用知縣張慶麟湖北故鍾祥縣教諭
陳啟圖山西故長治縣教諭楊國泰貴州故
婺川縣教諭李蹇臣入祀鄉賢祠。從總督曾
國藩李鴻章左宗棠巡撫英翰丁日昌卞寶
第楊昌濬丁寶楨郭柏蔭何璟李福泰蘇鳳
文曾璧光請也。○予直隸永年縣前明貢生
張益入祀鄉賢祠。從總督李鴻章請也。○緩
徵安徽五河泗宣城無為東流銅陵懷遠足
遠壽宿靈璧鳳臺巢蒙城潁上桐城望江宿

松合肥毫霍邱渦陽懷甯盱眙天長太和潛
山南陵貴池繁昌建德蕪湖舒城廬江太湖
阜陽當塗青陽三十八州縣被水被旱被風
被蟲地方新舊額賦。○己卯以福建重修考
亭書院落成頒
朱子祠扁額曰理學真傳。○諭內閣醇郡王
奏病體未痊懇請開去御前大臣領侍衛內
大臣都統等缺一摺。醇郡王業經寬賞假期
仍著安心調理毋庸開去差務俟病體痊愈
仍著照舊供職。○又諭前因戶部奏變通驗
收海運漕糧及海運仿照河運章程辦理當
經諭令李鴻章等分別會議具奏。茲據李鴻
章會同倉場侍郎酌議具奏。據稱直隸總督
每年於春融復移紮天津所有天津驗米自
可遵照部議就近經理無庸另請派員驗收
惟近年海運米石較多總督事務繁重未能
專顧一端請仍照向章酌派倉場侍郎一員
赴津會同查驗其通州收米事宜可由留通

倉場侍郎經理。無庸另請派員等語。明春江浙海運漕船抵津。著戶部先期奏派倉場侍郎一員。早行赴津。會同直隸總督妥籌辦理。其通州驗收轉運事宜。卽由留通倉場侍郎一手經理。毋庸另請派員。以專責成。又諭都興阿等奏協領互相揭稟。請分別懲處一摺。此案錦州協領古尼音布與捐復協領世管佐領桂齡互相揭稟。據都興阿等查明。桂齡初捐協領時。那移各旗公款湊捐至今尚

未歸還。又盜犯池泳幅曾在民人王三槐家住宿。該員將王三槐傳案勒罰之款。係為修城之用。當日辦理此案時。並未報明。實屬任意妄為。桂齡著革去協領。留世管佐領。仍交部議處。古尼音布雖據查明。並無剋扣兵餉。侵吞船規各等情。惟於桂齡那移公款勒罰錢文時。未據隨時聲明。亦有揭報遲延之咎。古尼音布著交部察議。○諭軍機大臣等。左宗棠奏馬家灘等堡平毀。陝回就撫。馬化澂

就擒。范銘部眾潰變。辦理情形。丁賢發激變被害各摺。片昨據李鶴年等奏。有馬化澂自縛投誠之說。當諭左宗棠察度賊情。不可為該逆所紿。現在馬化澂遞呈乞撫。懇求曲宥。族眾僅以一人抵罪。該大臣擬令馬化澂將本堡馬賊呈繳牆垣平毀後。接辦河西王家疇等堡撫局。再辦河州西甯撫局。軍情旦夕變遷。朝廷亦不為遙制。惟馬化澂兇狡異常。萬一收撫後。又生反側。竄入西路。歸併河州

賊黨。逆燄復張。彼時隨其術中。不但追悔無及。且恐大局愈難收拾。左宗棠務當通盤籌畫。穩慎以圖。不可稍涉疏虞。貽後日無窮之患。其收撫之陳林等。並著妥為安插。毋令再滋事端。所有在事出力之員。弁兵勇著該大臣於事竣後。奏請獎勵。至陳湜一員。到營未久。此次金積堡將士尚未請獎。若將陳湜先行開復。殊不足以昭公允。著俟續有勞績。再行保奏。總兵范銘違令潰走。其弟范鎔及匪

黨尤芝政等輒敢裏脅叛眾在岷州一帶焚掠。雖經楊世俊等追斬多名。而匪黨仍踞岷州。著卽飭令周開錫等添派兵勇合力攻剿。迅圖蕩事。並著確查范銘避匿何處。嚴拏懲辦。其何建威等營。仍當妥為鈴束。免滋他變。提督丁賢發因催辦駝贏激變被戕。罪犯馬添發等業經解營。訊明正法。駐紮豫望城之馬柏森。於丁賢發等之死。雖救援不及。惟罪犯均就殲滅。功過尚足相抵。著免其置議。金

積堡馬械繳清。堡寨平毀。降眾如何安插。該大臣應進紮何處。次第掃蕩。均著妥籌具奏。南路各軍。該大臣倚周開錫調度。一切務飭特平妥辦。毋任激生事端。密片一件留中。將此由六百里諭令知之。○又諭左宗棠密陳馬化澂稔惡三世。從寬必滋後患。此時議暫緩其誅者。以王家疇非猛攻所可驟得。宜先圖王家疇。俟撫定後。將馬化澂父子兄弟親屬夥黨重者誅夷。輕者遷徙等語。所奏不為

無見。若不照該大臣所請。恐於該處軍勢賊情不甚相宜。馬化澂著暫緩正法。俟王家疇等處就緒。卽將該逆等分別重輕。相機辦理。屆時不得以收復各處代為乞恩。以申國法。而快人心。至所稱該逆在北省各口開設店鋪。分布夥友。探聽衙門消息。足見黨與甚多。應如何密為防範。用靖奸宄。並不動聲色藉安反側之處。著左宗棠妥籌具奏。交結洋商一節。是否僅為購買外洋軍火等件。抑另有

句結重情。並著密訪奏聞。將此由六百里密諭知之。○此剋扣勇糧。甘肅軍營總兵官蕭友和革職。訊辦。○以縱兵潛逃。革甘肅守備張玉成職。○予甘肅預望城被戕副將楊正華等祭葬。世職。生員馬獻瑞賞卹如例。○撥山東司庫銀六萬兩。解赴運河。以備工需。○緩懲河南祥符陳留杞通許尉氏洧川鄆陵中牟蘭議鄭榮陽榮澤汜水商邱甯陵永城鹿邑虞城夏邑睢柘城安陽湯陰臨漳武安

內黃。汲。新鄉。輝。獲。嘉。淇。延。津。滑。濬。封。邱。考。城。
河。內。濟。源。修。武。武。涉。孟。溫。原。武。陽。武。洛。陽。偃。
師。鞏。孟。津。宜。陽。登。封。水。甯。南。陽。泌。陽。鎮。平。相。
柏。鄆。內。鄉。浙。川。裕。舞。陽。葉。上。蔡。淮。甯。西。華。商。
水。項。城。沈。邱。扶。溝。臨。潁。襄。城。息。七。十。一。廳。州。
縣。被。水。被。旱。地。方。新。舊。額。賦。辛。巳。諭。內。閣。
前。因。溥。楙。等。奏。章。京。多。福。呈。訴。祭。田。措。租。先。
後。稟。詞。互。異。當。派。寶。珣。賀。壽。慈。前。往。會。同。溥。
楙。等。秉。公。訊。究。旋。據。該。侍。郎。等。奏。稱。究。出。書。

吏。陳。秀。峰。指。使。復。諭。令。步。軍。統。領。等。衙。門。拏。
獲。歸。案。訊。辦。茲。據。寶。珣。賀。壽。慈。查。勘。明。確。先。
行。定。擬。具。奏。此。案。防。禦。多。福。因。香。河。祭。田。遺。
失。遽。及。裁。缺。官。房。復。由。官。房。連。及。土。塘。荒。廠。
更。連。及。南。口。門。外。金。星。山。地。段。希。圖。承。領。情。
節。本。屬。蒙。混。其。呈。請。認。墾。處。所。在。紅。椿。以。內。
尤。屬。大。干。例。禁。未。便。因。陳。秀。峰。尚。未。到。案。致。
稽。科。罪。自。應。先。行。擬。結。暫。革。防。禦。多。福。著。卽。
行。革。職。從。重。發。往。軍。臺。効。力。贖。罪。總。管。峻。德。

於多福含混異呈時未能查出率行轉呈咨
部已屬疏忽復將咨部公文交該員親齎前
往致使到京非分營求亦有應得之咎峻德
著交部議處其隨同畫彙各員著一併交部
查取職名分別議處溥楙等另片奏多福蒙
混具稟一時未能查出請分別察議等語溥
楙溥芸景霖等均著交各該衙門察議○諭
軍機大臣等戶部奏遵議吉林整裝等項並
俸餉銀兩請飭各省迅解一摺直隸等省積

年欠解吉林俸餉等項銀兩甚多本年八月
間吉林因勢發官兵整裝銀兩及用款正亟
當經戶部奏明諭令河南撥銀五萬兩山東
撥銀十萬兩迅速籌解迄今數月僅據山東
報解過銀四萬兩其餘未報續解河南則未
解絲毫吉林庫款支絀商墊亟須籌還而支
發俸餉等銀亦屬刻不容緩所有河南欠解
銀五萬兩山東欠解銀六萬兩著李鶴年于
寶楨各飭藩司先將此項銀兩迅速如數解

赴盛京戶部交納卽由奕榕派員前往守提俾資應用其山東前欠報解銀四萬兩現在曾否解到並著額勒和布奕榕派員沿途催提不准逗遛遲誤至吉林前因防勦喫緊借提發商生息本銀亦經戶部奏明由直隸欠解吉林軍餉內撥銀二萬兩山東欠解吉林軍餉內撥銀九萬兩籌解請完吉林捕圍資裝經該部奏請由河南撥銀二萬二千餘兩以上二款均係吉林緊要之需豈可任意延宕著李鴻章丁寶楨李鶴年迅卽如數分批委解務於來年六月以前全數解完毋再稍有拖欠東三省俸餉各省厯年積欠竟至一百九十餘萬之多實屬延玩已極並著李鴻章丁寶楨蔣志章嚴飭藩運各司查明積欠數目陸續籌款補解以濟餉需將此各諭令知之○賞四川等省鄉試年老諸生張鎮庠等一百七十九人舉人副榜有差○展緩山西太原平遙二縣被水村莊新額賦

大清穆宗繼天開運受中居正保大定功聖智誠孝信敏恭寬毅皇帝實錄卷之三百

延長保安安塞延川宜川甘泉安定靖邊定邊榆林懷遠葭神木府谷綏德米脂清澗吳堡十九州縣被電被旱被擾地方舊欠錢糧並緩徵來年上下忙額賦○蠲緩陝西臨潼渭南三原涇陽高陵富平咸陽大荔蒲城華鳳翔寶雞隴郿長武三水鄜洛川中部宜君咸甯長安興平醴泉鄠南鄭城固褒城沔縣藍田洋州陽澄城岐山三十五州縣被災被擾地方舊欠額賦有差○甲申

上御撫辰殿大幄次。賜蒙古王貝勒貝子。公台吉暨呼圖克圖等宴。並賞賚有差。○諭內閣。永存舒恆奏。請飭直隸藩庫迅解應領米價一摺。承德府應放兵米。向由直隸藩司按季支給銀兩。交各州縣採買。以供支放。現在存倉兵米無多。同治八年秋冬二季米石。各該州縣已報領價。尚未採買交倉。其同治九年米價。未據領到。兵食攸關。豈容延宕。著直隸總督卽飭藩司。將同治九年應發米價銀兩。迅卽籌放。並嚴飭該府州縣一併買運交倉。以裕兵食。前代理平泉州知州金齡。欠交咸豐十年分兵米一千十二石零。仍著嚴催交齊。毋許再延。○諭軍機大臣等。瑞雲奏請劃撥餉項以濟兵艱一摺。前因涼莊兩營官兵困苦。准於山西協甘餉內借撥銀五六萬兩。作為該營五年俸餉。復由四川協甘餉內每月劃撥銀五千兩。作為該營六七兩年俸餉。山西省奉撥之款。僅解過銀六千兩。四川省

陸續解過銀二萬兩。因各省協餉歸併西征糧臺統收統撥。川省現未將涼莊協餉劃扣。兵丁困苦異常。殊為可憫。著何璟無論何款。即將欠解涼莊五年俸餉銀五萬四千兩。趕緊埽數解清。以應急需。並著吳棠仍在四川協甘餉內。續行按月劃扣銀五千兩。作為涼莊兩營八九兩年俸餉。即著左宗棠知照袁保恆。在於四川協甘餉內。將舊欠如數籌撥。並將此次劃撥銀兩。咨明吳棠按月劃扣。由

瑞雲派員領取。無庸統解西征糧臺。以清款目。涼莊二營庫存馬價銀一萬四千兩。前經瑞雲動用。著准其暫緩歸還。俟支領全分俸餉時。分作兩年歸款。以示體恤。前據豫師奏。米拉溝窩藏陝回萬餘。已分竄甘涼一路。靈甯一帶賊匪。又恐西趨。瑞雲當督飭防兵。嚴密堵擊。力遏狂氣。該處兵力單薄。且係邊要之區。著左宗棠。穆圖善。迅各添撥兵勇前往。會同瑞雲認真防範。藉壯聲威。將此由五百

里諭知左宗棠。穆圖善。吳棠。何璟。瑞雲。並傳諭袁保恆知之。○賞敘漢郡王察克達爾扎布三眼花翎。杜爾伯特貝子格里克巴勒珠爾。喀爾喀貝子托果瓦雙眼花翎。○命歸化城土默特輔國公格木丕勒多爾濟。喀爾喀輔國公章達勒密濟特。在乾清門行走。○乙酉。諭內閣。左宗棠奏。請將貪酷巧詐之知縣革職。拏問一摺。甘肅署禮縣知縣補用同知直隸州知州容恬。於民人白鼎之妻自縊一

案。酷刑索賄。至三千兩之多。又藉轉運募勇。侵冒餉項一萬餘串。實屬貪鄙不職。容恬著即革職。拏問。勒追贓款。按例懲辦。以肅官箴。鞏秦階道唐啟蔭。於所屬知縣貪劣款蹟。敗露。不即會司據實揭參。僅請甄別。亦屬不知輕重。著一併交部議處。○又諭。左宗棠奏。請將藉端誣良之知縣革職。拏問一摺。署甘肅平番縣事左秉忠。於回民馬三父子通賊情事。並未查明。叛逆實蹟。亦未錄有供詞。僅憑

紳士公呈稟請究辦經該督派員查明馬三係屬安分良回本年賊匪闖入平番實無從逆確據傳訊紳民盧學植等並不知公稟情事查係左秉忠於提督張萬美將馬三父子交訊後憑無姓名公呈自行填寫盧學植等六名率行具稟實屬誣陷良回辦理荒謬亟應從嚴懲辦署平番縣事知府銜升補直隸州知州左秉忠著卽革職拏問交左宗棠嚴行審訊按律定擬具奏○諭軍機大臣等前

據張廷岳等探奏撲陷烏里雅蘇台賊匪係屬肅州回股現已沿途飽掠仍回肅州當諭成祿趁賊回巢痛加勦洗並諭左宗棠撥兵會剿茲復據福濟榮全奏稱此股匪徒內有偽元帥王大漢及馬隆馬溶毛黃雷李四姓頭目裹脅甚夥實係甘涼肅三處逆回自甘省額哲尼河土爾扈特貝勒旗竄入賽因諾顏部落等處攻陷烏城向西南颺去明春仍圖竄烏城東撲庫倫等語肅州賊股成祿未

能及早鏟除甘涼僻在西隅兵力單薄左宗棠穆圖善均未顧及以致賊股充斥且又有米拉溝逃賊萬餘竄往該處甯靈一帶昨據左宗棠奏已無陝回蹤跡難保非西竄甘涼句結滋事甘涼肅伏莽不除必至乘隙出邊擾亂臺站亟須擊其情歸埽除巢穴著左宗棠穆圖善迅卽派撥兵勇馳往兜拏務將甘涼肅一帶著名頭目悉數擒獲盡殲醜類毋任餘孽潛藏致成延蔓並飭令各營嚴密扼

駐斷賊出入要路成祿著懷遵前旨就現有兵力勦辦肅州賊股不得置身事外自取愆尤將此由五百里各諭令知之○又諭福濟榮全奏探聞逆回仍欲回竄請催官兵文盛杜嘎爾奏察哈爾馬隊應紮何處請旨遵行各一摺烏城退出賊匪現尚盤踞金山卡倫察罕博克多地方距烏二十三站且據逃回蒙民聲稱明春仍欲回竄烏城搶掠官廠駝馬東撲庫倫等語自應迅飭援兵陸續赴

烏以資防勦。惟據文盛等摺內所稱。十二月十九日接福濟等咨。推錦丕勒多爾濟咨稱。有停止馬隊赴烏。藉蘇臺困。並免徒勞駝馬等語。是福濟等既欲援軍之速至。又畏臺站之難復。疲玩因循。自相矛盾。殊不可解。抑知臺站一日不復。則大兵一日不得前進。轉瞬春融。儻賊蹤突至。該將軍等何以禦之。況賽爾烏蘇一望沙漠。牲畜稀少。薪水維艱。萬一分紮各軍餉缺。譁潰。各將誰執。著福濟禁舍

錦丕勒多爾濟。遵疊次諭旨。迅將哈爾尼敦等二十臺站。趕緊豫備妥協。咨催達爾濟一軍相機前進。毋得再有遲延。致干重咎。臺站係錦丕勒多爾濟專責。尤不准藉詞推諉。自取罪戾。文盛等仍飭達爾濟。暫勿移兵。恪遵前旨。設法西行。毋稍觀望。福濟等請催富勒琿帶兵探路援烏之處。著定安一面咨催劉銘傳派兵填紮纏金。一面飭令該副都統迅速前往。福濟等請飭甘涼肅帶兵大員勦

捕賊匪。已寄諭左宗棠。穆圖善成祿。各飭所部擊賊。情歸掃除巢穴。福濟等仍當就現有兵力。先事豫防。毋稍大意。棍噶扎勒參現已帶兵到烏。力圖報效。福濟等當妥為駕馭。以期得力。福濟等另片奏請調綏遠城軍火等語。所有烏城咨調擡槍火藥鉛丸刀矛各件。著定安按照來咨。如數撥給。俾資利用。至請將布克坦。張光藻發交烏城效力。請調范允中。魯學浩。襄辦文案。或與定例不合。或道遠

難以速到。均著毋庸置議。將此由六百里各諭令知之。○烏里雅蘇台將軍福濟等奏烏城事務殷繁。所設駐班臺站蒙員。礙難裁撤。擬請仍設扎薩克四員。管臺台吉二員。俟軍務肅清。再行議撤。從之。○以南河霜汛安瀾。並辦理界首隄工出力。賞道員龐際雲二品封典。吳世熊等加銜升敘有差。○追予直隸甯津陣亡從九品李萬倉等祭葬世職。○追予江蘇江浦殉難署知縣曾勉禮祭葬世職。

加等建專祠○追予江蘇六塘河口等處陣亡文生葛天錫等賞卹如例○丙戌

孝莊文皇后忌辰遣官祭

昭西陵○諭內閣寶珣賀壽慈奏風水重地請

飭增設禁衛一摺據稱

東陵昌瑞山之南金星山為風水照山由金星

山根迤南至石門北山根南北相距三百四

十餘丈東至劉家莊菜園一帶西至興隆口

東河沿東西相距四百七十餘丈地勢遼闊

且附近孔道易於混淆該處現設撥汛四五

所紅椿數十根似尚不足以示限制等語

陵寢重地風水攸關自應倍加慎重著守護大

臣等體察情形由南口門外以南至石門後

山凡立紅椿處所如未便改建圍牆或添置

撥汛並於該處密植樹株務使界址分明禁

衛森列以昭嚴肅所有辦理情形即著妥議

具奏尋溥楙等奏建立圍牆工程較大原設

紅椿不能經久擬一律更換石椿並於扼要

處所添設撥汛三處紅椿界內空曠之地密

植樹株以昭嚴肅下部議從之○又諭奕榕

毓福奏請將玩視捕務員弁懲處一摺伯都

訥騎都尉貴英經副都統富貴派令帶兵在

屬界緝捕盜賊輒藉詞患病置身事外僅令

佐領薩音佈彥帶兵四名往捕致薩音佈彥

與甲兵海春遇賊傷亡實屬玩視捕務貴英

著即行革職奕榕等派出捕盜之記名佐領

披甲萬忠並不合力追擊亦有應得之咎萬

忠著撤銷記名佐領以示懲儆○又諭劉崐

奏甄別現任候補各員請分別革休降補一

摺湖南盧溪縣知縣李楨才具庸鄙聲名平

常著即行革職永定縣知縣李燾因循貽誤

不知振作著勒令休致醴陵縣知縣龔樹吉

辦事顛預著以縣丞降補歸部銓選候補知

縣程殿英性情輕浮著降為州判仍留湖南

補用以肅官方○諭軍機大臣等前因單懋

謙奏

陵工西堡泊岸情形。仍請仿照西堡迤西石隄辦理。當諭令都興阿奕慶。詳細斟酌。奏明辦理。茲據恩承奏。改建石隄。雖似經久。不知石隄全恃根脚堅穩。而河身石少沙多。奔衝既不能深築。灌漿亦不能膠固。若經大溜衝刷。沙性鬆浮。卽尋丈巨石。亦必隨之而傾。前兩次山水盛漲。竟將數十年大樹圓徑二三尺者。俱為拔仆。石工雖堅。究不能如樹之盤根結實。此其明驗等語。改建石隄。究竟是否可行。仍著都興阿奕慶。按照單樾謙恩承先後所奏各情。悉心妥籌。奏明辦理。將此各諭令知之。○刑部奏。查明免勾官犯。開單呈覽。得旨。已革陝西候補參將盧澱標。已革東便汛把總于三。卽明剛。均著加恩減等發落。○以故賽因諾顏公銜扎薩克頭等台吉薩莽達巴達爾子烏爾津扎布襲職。○以內閣學士宋晉充文淵閣直閣事。○予奉天伯都訥傷亡佐領薩音佈彥。甲兵海春。分別賞卹。如陣

亡例。○追予湖南岳州陣亡武生彭慶瑞賞卹加等。○豁除湖南澁浦縣被水衝沒民屯田地賦額。

上以歲暮禋祭

太廟。自是日始齋戒三日。○丁亥。諭內閣。都興阿奕慶。奏詳查

陵工西堡泊岸。請先行挑濬保護一摺。據稱西堡泊岸隄工。無論將來用土用石。其南岸河身。總須挑挖通暢。水歸故道。方可得手。請飭

單樾謙等前來工次。會勘辦理等語。著單樾謙恩承。於明春攜帶錢糧。馳赴工所。先行挑挖河道。就近會同都興阿奕慶。詳加履勘。應如何酌用料件。以期穩固。泊岸如何鑲埽。暫為保護。並工料運脚。應需錢糧若干。通盤籌算。再行奏明辦理。○又諭。據綿宜奏。恭查恩詔條款。請將無誤驛站各員獎勵。並外郎劉需等。前隨文祥行營出力。據咨請獎等語。同治元年恩詔。因軍興以來。驛站勞苦。諭令各

省督撫加意撫恤。並未令將出力人員奏請獎敘。此次綿宜牽混援引。遽行奏保。實屬輕率。綿宜著交部議處。其請將前在文祥軍營出力之候選州同外郎劉霽。候補驛丞莊永敬。獎勵之處。著該部議奏。尋吏部議。綿宜應照不應重例。降二級留任。得旨。准其抵銷。○又諭。前因已革牧長卓金。呈控翼領烏林泰等剋扣銀兩。舞弊誣參等情。當交都興阿審辦。並因討種地畝。侵占牧廠之革兵張允和

赴京投首。復飭解往盛京。歸案審訊。茲據都興阿審明具奏。此案翼領烏林泰。廣榮等。於歷年關領鹽菜銀兩。濫行開銷。實屬不成事體。牧長廣田。八十五。經管帳簿。不能阻止。亦難辭咎。烏林泰。廣榮。廣田。八十五。均著先行解任。交盛京刑部再行研訊。確供。照例定擬具奏。已革牧長卓金。糾人搶去帳簿。形同無賴。前經奕榕奏參革職。並非捏參。至該革員查辦廠地。有無營私情弊。並著盛京刑部一

併審訊。革兵張允和。討領荒地。竟敢影射侵占。私開四千六百餘畝之多。復於奏准封禁後。私開一千數百畝。尤屬目無法紀。張允和並續行私開地畝。之趙廷芝。穆信等。均著交盛京刑部。照例科罪懲辦。以儆刁健。卓金。張允和。先後呈控烏林泰等。偷開廠地。私收黑租。各情。究竟有無其事。著錦州副都統於明春親往詳查履勘。奏明辦理。至開河底荒地。著仍遵前旨。照舊嚴行封禁。寬留界限。不准

再議開墾。以重牧廠。諭軍機大臣等。庫克吉泰。奏勦捕盜匪。分別懲辦。並擒獲續起匪徒。各摺片。匪犯龐小禿。勾結賊黨。在朝陽縣屬之楊家店一帶搶掠。張中險等匪。復在黑水轉山子等處。勾結礦匪。結會搶劫。先後經官軍擒獲。要犯多名正法。其龐小禿之姪龐三拐子。復招聚馬賊。在混登營子地方滋事。意圖報復。亦經兵團勦捕。將龐三拐子等匪拏獲。餘匪敗竄。卽著庫克吉泰。飭令帶兵各

員會同地方文武。趕緊將逃逸各匪悉數弋獲。不准一名漏網。此次勦匪出力員弁。俟事竣後。准其擇尤保奏。毋許冒濫。至設立練軍。緝捕操防。均屬分內之事。不得遽行奏請獎勵。以示限制。將此諭令知之。○以前任四川按察使楊重雅。為甘肅按察使。○以陝西勦辦回匪土匪。肅清全境出力。賞提督劉聲雋。王雲孚。金運昌。鄧正峰。唐俊元。總兵官葉春蘭。一品封典。道員魏光壽。胡光墉。都司賈鳳章。二品封典。提督鄧時益。章洪勝。總兵官周振南。張明進。副將賀卓吾。黃興發。雷天源。喻先知。溫宗秀。黃緒鴻。石茂林。王正和。蘇得勝。段洲寶。易咸臨。曾和。營參將牟大成。李恆勝。李萬盛。趙文海。王廣越。徐亮。劉尚義。丁訓士。張萬金。李萬有。郎永清。丁啟發。劉定邦。黃承佐。顏禧承。毛正明。袁海壽。彭邦達。張清和。胡弼武。遊擊羅允謙。邵升堂。王盤。李長勝。田作仁。方庭萬。張玉成。呂繼祥。郭占元。段恆元。都

司侯德明。魏宗武。何文繼。殷紹禮。邵維常。陳鳳鳴。朱義發。和得華。張可達。守備王玉林。巴圖魯名號。參將吳文斗。等花翎。遊擊戴名彪。等藍翎。餘加銜升敘。開復有差。○戊子。上以歲暮。裕祭。太廟。前期親詣行禮。○遣官祭太廟中殿。後殿。○賞巴林郡王阿拉瑪斯巴。咱爾三。眼花翎。命科爾沁貝子阿敏烏爾圖。在乾清門行走。○朝鮮國使臣姜洙等三人。於午門外瞻覲。○己丑。裕祭太廟。遣恭親王奕訢。恭代行禮。○遣官祭永陵。福陵。昭陵。昭西陵。孝陵。孝東陵。

景陵
泰陵
泰東陵
裕陵
昌陵
昌西陵
慕陵
慕東陵
定陵○遣官祭

端慧皇太子園寢○遣官祭
太歲之神○庚寅

上御保和殿筵宴朝正外藩科爾沁喀爾喀扎
賚特阿巴噶土默特敖漢翁牛特扎魯特喀
喇沁蘇尼特歸化城土默特烏珠穆沁克什
克騰巴林察哈爾王貝勒貝子公台吉暨朝
鮮正副使等隨文武大臣依次就坐諸樂並
作
上進酒召科爾沁扎薩克圖謝圖親王巴寶多

爾濟喀爾喀親王達爾瑪扎賚特郡王阿勒
坦鄂綽爾阿巴噶卓哩克圖郡王剛噶爾倫
布土默特貝子索特那木色登敖漢貝子達
克沁翁牛特鎮國公永龍扎魯特鎮國公達
瓦甯保喀喇沁貝勒德木齊扎布蘇尼特郡
王托第布木歸化城土默特輔國公格木丕
勒多爾濟烏珠穆沁頭等台吉堆代扎布克
什克騰扎薩克頭等台吉畢瑪拉吉哩第巴
林二等台吉色旺諾爾布察哈爾三等台吉

布爾呢巴達爾等至
御座前賜酒成禮○奉

慈安皇太后

慈禧皇太后幸漱芳齋侍午膳○酉刻詣綏履
殿

慈安皇太后前行禮平安室


慈禧皇太后前行禮○諭內閣丁寶楨奏請將
庸劣各員分別懲處等語山東候補知縣余
溥才質麤淺辦事荒謬候補知縣茅光嶽不

知檢束。聲名甚劣。均著卽行革職。候補知縣武勳。性情輕佻。難膺民社。著以府經歷縣丞降補。鄆城縣知縣王之翰。毫無閱歷。辦事羸疏。著開缺留省察看。遇有相當缺出。酌量補用。以肅吏治。○諭軍機大臣等。張廷岳等奏庫倫防兵待食孔亟。現在派員赴口。分起採運。請飭直隸總督飭屬應付車腳等語。著李鴻章檄令口北道轉飭宣化萬全二縣。於該委員等到口採買米麪齊備時。照例應付各起車腳。以利轉運。將此諭令知之。○以庫倫襄辦軍務出力。賞員外郎惠陞等花翎。通事官岑登等藍翎。餘加銜升敘有差。○追予福建殉難道員孔昭慈。於山東濟甯州原籍建立專祠。○是年旌表孝子直隸等省周柏林等六十三名。孝友福建等省陳尚洙等四名。孝義山西等省田富德等二十四名。孝婦湖北等省張裕春妻崔氏等十八口。孝女四川等省趙姑等三口。烈婦直隸等省滕順來妻

齊氏等八十一口。烈女山西等省于純倫聘妻續氏等十二口。義夫浙江省朱叔鐸一名。義士湖北省祝景富一名。義僕江蘇省裴如一名。守節合例。滿洲馬甲富明阿妻王氏等八十七口。蒙古馬甲托克通武妻吳佳氏等五十九口。漢軍馬甲李國順妻朱氏等三十五口。各省駐防閒散劉永發妻耿氏等一百七十七口。奉天等省周致廣妻孫氏等二萬三千三百六十九口。夫亡殉節。江蘇等省徐墀妻顧氏等十八口。未婚守志。江西等省劉秋姑等四十九口。百歲壽民婦。江西等省封宏安等十三名。五世同居。掌山西等省張成璽等三十五家。六世同居。福建省施元壽一家。七世同居。河南省黃清廉一家。均給銀建坊如例。○會計天下民數穀數。除奉天江蘇安徽福建雲南廣西陝西甘肅未經冊報外。吉林等省通共大小男婦二萬六千八百四萬二十三名。存倉米穀二百六十二萬七

千九十八石二斗四升三合三勺。

大清穆宗繼天開運受中居正保大定功聖智
誠孝信敏恭寬毅皇帝實錄卷之三百一



統一書號:11018·1355—50

定 價: 54.00 元